

El Nuevo Testamento en el mixe de Guichicovi



La Liga Bíblica
Las Sagradas Escrituras para Todos

El Nuevo Testamento
en el mixe de Guichovi

La Liga Bíblica 1M primera edición 1988 [mir]
La Liga Bíblica versión electrónica 2009

Publicado por

© La Liga Bíblica 1988

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

Índice

San Mateo	1
San Marcos.....	70
San Lucas	121
San Juan	192
Hechos.....	251
Romanos	341
1 Corintios.....	388
2 Corintios.....	423
Gálatas.....	448
Efesios.....	459
Filipenses	473
Colosenses.....	480
1 Tesalonicenses.....	488
2 Tesalonicenses.....	496
1 Timoteo	500
2 Timoteo	511
Tito	518
Filemón	523
Hebreos	526
Santiago.....	549
1 Pedro	556
2 Pedro	569
1 Juan	576
2 Juan	584
3 Juan	586
Judas.....	588
Apocalipsis.....	591

San Mateo

1 Yaa jaduhñ myiñ cujaay nebiaty ja'a Jesús yhap tieedyhajxy jecy xiøhajty. Abraham xiøhajty ja'a jawyiinhájtäbä. David xiøhajty ja'a cujecy jaac miiñäbä.

²Ja'a Abraham yhuung, Isaac je'e xiøhajty. Ja'a Isaac yhuung, Jacob je'e xiøhajty. Ja'a Jacob yhuung tu'ug, Judá je'e xiøhajty. May ja'a Judá ja'a piuhya'ay hänäjty miøødä. ³Ja'a Judá yhuunghajxy, Fares hajxy xiøhajty møødä Zara. Ja'a Fares tiajhajxy, Tamar je'e xiøhajty. Ja'a Fares yhuung, Esrom je'e xiøhajty. Ja'a Esrom yhuung, Aram je'e xiøhajty. ⁴Ja'a Aram yhuung, Aminadab je'e xiøhajty. Ja'a Aminadab yhuung, Naasón je'e xiøhajty. Ja'a Naasón yhuung, Salmón je'e xiøhajty. ⁵Ja'a Salmón yhuung, Booz je'e xiøhajty. Ja'a Booz tiaj, Rahab je'e xiøhajty. Ja'a Booz yhuung, Obed je'e xiøhajty. Ja'a Obed tiaj, Rut je'e xiøhajty. Ja'a Obed yhuung, Isaí je'e xiøhajty. ⁶Ja'a Isaí yhuung, David je'e xiøhajty. Mänitä David tiägøøyy gobiernähajpä. Mänitä Urías yajyagho'cä mänaa ja'a tsip jiadyiijän. Coó ja'a Urías yho'cy, mänitä David ja'a Urías tio'oxiøjc wyiingpøjcä. Mänitä

David yaghuungpaaty. Salomón ja'a yhuung hajxy yajxøhajty.

⁷Ja'a Salomón yhuung, Roboam je'e xiøhajty. Ja'a Roboam yhuung, Abías je'e xiøhajty. Ja'a Abías yhuung, Asa je'e xiøhajty. ⁸Ja'a Asa yhuung, Josafat je'e xiøhajty. Ja'a Josafat yhuung, Joram je'e xiøhajty. Ja'a Joram yhuung, Uzías je'e xiøhajty. ⁹Ja'a Uzías yhuung, Jotam je'e xiøhajty. Ja'a Jotam yhuung, Acáz je'e xiøhajty. Ja'a Acáz yhuung, Ezequías je'e xiøhajty. ¹⁰Ja'a Ezequías yhuung, Manasés je'e xiøhajty. Ja'a Manasés yhuung, Amón je'e xiøhajty. Ja'a Amón yhuung, Josías je'e xiøhajty. ¹¹Ja'a Josías yhuung tu'ug, Jeconías je'e xiøhajty. Jimä Jeconías ja'a piuhya'ay hänäjty miøødä. Mänitä judíoshajxy hadsip yajnøcxä jäguem Babilonia-naaxooty.

¹²Jim hajxy chánaadiaacpøjcy Babilonia. Jimä Jeconías ja'a yhuung yajxøhajty Salatiel. Ja'a Salatiel yhuung, Zorobabel je'e xiøhajty. ¹³Ja'a Zorobabel yhuung, Abiud je'e xiøhajty. Ja'a Abiud yhuung, Eliaquim je'e xiøhajty. Ja'a Eliaquim yhuung, Azor je'e xiøhajty. ¹⁴Ja'a Azor yhuung, Sadoc je'e xiøhajty. Ja'a Sadoc yhuung, Aquim

je'e xiøhajty. Ja'a Aquim yhuung, Eliud je'e xiøhajty. ¹⁵Ja'a Eliud yhuung, Eleazar je'e xiøhajty. Ja'a Eleazar yhuung, Matán je'e xiøhajty. Ja'a Matán yhuung, Jacob je'e xiøhajty. ¹⁶Ja'a Jacob yhuung, José je'e xiøhajty. Coo ja'a María yhuung hánajty tøø myiñ tøø quia'ay, ja'a Jesúshajpä, mänitá José ja'a María wyiingpøjcy. Ja'a Jesús, Cristo je'e xiøhajty; paady yaa quiejxä hädaa yaabä naaxwiin maa højtsçxpän.

¹⁷Námajmacts ja'a Jesús ja'a yhap ja'a tieedy hánajty miøødä, møødä Abraham møødä David. Y jaac námajmacts ja'a yhap ja'a tieedy hánajty miøødä, møødä Salomón møødä Jeconías. Mänitá judíoshajxy yajnøcxä Babilonia-naaxooty. Y jaac námajmacts ja'a Jesús ja'a yhap ja'a tieedy hánajty miøødä, møødä Salatiel møødä José. Mänitá Cristo myiiñguiahy.

¹⁸Yaa jaduhñ myiñ cujaay nebiä Jesucristo myiiñguiahyän. Ja'a Jesucristo tiaj, María hánajty je'e xiøhaty. Tøø hánajty tiødiägø'y coo ja'a Maríahajxy hánajty piøga'añ møødä José. Pero cajnä hajxy hánajty piøcyñä, mänitá María quiähxø'cy coo hánajty yhuungmøødä. Ja'a Dioshespírituhaam hánajty tøø yhuungpaady. ¹⁹Jaduhñ ja'a judíoshajxy hánajty quihdujthaty, coo ja'a to'oxiøjc yhuungpáadät jabiøcy, mänit jaduhñ yhøxmájtsänät. Pero miøød ja'a José hojiot hánajty; cabä María hánajty ñäxø'øwø'øwa'añ. Mänitá José wyiinmahñdyhajty coo ja'a María yhøxmádsät hamee'ch, nebiä María jaduhñ quia'a yajtsähdiúnät.

²⁰Yhuuc wiinmahñdyhajpy ja'a José hánajty, mänit miaaho'cy. Mänitá Diosmoonsä wyiinhijxy cuma'ayhaam. Tsajpootyp hánajty chooñ. Mänitá José ñämaayyá: —José, David miičh hijty mhaphajpy mdeedyhajpy. Ca'a mdajy ca'a mmay. Hoy jaduhñ coo ja'a María mwiingpøgät. Dioshespírituhaam jaduhñ tøø yhuungpaady. ²¹Ya'ayhäna'c jaduhñ yhuunghadaamby, ja'a Jesúshajpä. Coo ja'a quiu'ug ja'a piojpä quiädieey yajnähwa'adsaanä, paady jaduhñ xiøhata'añ Jesús.

²²⁻²⁵Coo ja'a José mia'abiädø'cy, mänit quiudiuuñ neby hánajty tøø ñäma'ayíjäm ja'a Diosmóonsäm. Mänitá María wyiingpøjcy. Pero cab hajxy ñimiøødmaawä høxtä coonä ja'a María ja'a Jesús yajmiññä. Ja'a coobhuung, je'eds jaduhñ miingahw. Jesús jaduhñ xiøhajty. Coo ja'a Jesús jaduhñ myiiñguiahy, tøjiajt ja'a Diosmädia'agy jaduhñ nebiä Diosmädia'agy-yajwa'xpähajxy jecy quiujahyyän:

Huungpaadaamb ja'a cäxyiihäna'c tu'ug.

Ya'ayhäna'c yhuunghadaamby.

Jue'e xiøhata'añ, Emanuel.

Je'eduhñ ñänøømby coo ja'a Dios hajxy xmiøødhájtäm.

2 Ja'a Jesús, jim jaduhñ myiiñguiahy maa ja'a cajpt jaduhñ xiøhatiän Belén, jim Judeanaaxooty. Ja'a Herodes, je'e hánajty tuumb gobiernä. Jim je'e hánajty chäna'ay maa ja'a møjcajptän Jerusalén. Mänitá jäya'ayhajxy jim näje'e miejch maa ja'a Heródesän. Jäguem hajxy

hänajty tøø choon̄ maa ja'a xøø piädsømiän. Madsa'ahøxtaabiä hajxy hänajty wiädity. ²Mänit hajxy jajtøøyy:

—Maa ja'a judfos guiobiernähajxy, ja'a tøø myiñ tøø quiá'ayäbä.

Jäguem̄ hōjts ja'a miadsa'a tøø nnäheebøøyyä, jim̄ maa ja'a xøø piädsømiän. Paady hōjts yaa tøø nmiñ tøø nmech neby hōjts jaduhñ nwiingudsähgø'øwät.

³Coo ja'a gobiernä Herodes jaduhñ miädoyhajty møødä Jerusalénpä-jäya'ayhajxy nägøxiä, mänit hajxy tiägøøyy tajpä maabiä.

⁴Mänitä Herodes miøjyaaxy ja'a teedywiindsøn̄hajxy møødä ley-yajnahixøøbiähajxy. Mänitä Herodes jajtøøyy:

—Maa ja'a Cristo myina'añ quia'awa'añ, ja'a Dios quixaambiä.

⁵Mänit hajxy yhadsooyy:

—Beléncajptøotiäc jaduhñ myina'añ quia'awa'añ yaa Judeanaaxooty. Ja'a Diosmädia'agy-yajwa'xpä jecy cujahy nebiä Dios miänaañ:

⁶Ja'a cajpt jaduhñ xøhajpä Belén,

jim̄ Judeanaaxooty, jim̄ä wiindsøn̄ tu'ug myina'añ

quia'awa'añ;

je'eçh ja'a ngu'ug

xyhane'emáañäp, ja'a

judioshajxy; paadiä Beléncajpt

jaduhñ yajmäbaada'añii nebiä

møjcajptän.

⁷Mänitä Herodes

miøjyaaxy hamee'ch ja'a madsa'ahøxtaabiähajxy. Mänitä Herodes jajtøøyy:

—Mäduhnajtä ja'a madsa'a quiahxø'tsohñ.

⁸Coo ja'a Herodes tøyhajt miooyyä, mänitä miänáangumbä:

—Nøcx ja'a pigäna'c hajxy jim̄ jajtøw Belén. Naxy hajxy hoy mdehm̄ jajtøwät. Coo mbáadät, mänitøch hajxy min̄ xyhawaanä, nébiøch jim̄ nøcxy nwiingudsähgøøbiä.

⁹⁻¹⁰Mänitä madsa'ahøxtaabiähajxy

tiu'ubøjcy. Jim̄ hajxy ñøcxy Belén nebiä Herodes hänajty tøø miäna'añän. Mänitä madsa'a

hajxy jadähooc yhjxcumbä, ja'a hajxy hänajty tøø yhuug hijxpä jäguem̄ maa ja'a xøø piädsømiän. Mänit hajxy jiaançh tehñ xioonndaacy. Mänitä madsa'a hajxy piadu'ubøjcy. Mänitä madsa'a jim̄ tøyä tiänaaxiøjpy maa ja'a pigäna'c-huung hänajty yhitiän naaxyp. Tøyä ja'a madsa'a hänajty quihajnaaxy maa hänajty quio'na'ayän.

¹¹Mänitä madsa'ahøxtaabiähajxy tiøjtägøøyy. Jim̄ä regalo hajxy hänajty miøødä caajäjooty. Mänitä pigäna'c-huung hajxy yhjxy møødä tiaj María. Mänitä pigäna'c hajxy wyiinjjcädaacy; wyiingudsähgøøyy hajxy jaduhñ. Mänitä quiaajä hajxy yaghawaach. Mänitä oro hajxy yajpädsøømy møødä poom møødä mirraperfume. Pa'agxuu'p je'le; tsow ñøcxy. Mänitä pigäna'c hajxy jaduhñ ñä'a mooyy. ¹²Mänit hajxy wyiimbijnä. Mänit hajxy ñøcxy maa ja'a quiajpthajxiän. Wiingtuum hajxy ñøcxøøñä; cab hajxy jim̄ ñaxøøñä maa ja'a Heródesän. Hix, tøø hajxy hänajty yhawáañäxä cuma'ayhaam coo hajxy jim̄ quia'a naxøøñät.

¹³Coo ja'a madsa'ahøxtaabiähajxy hänäjty tøø wyiimbijnä, mänitä José ja'a Diosmoonsä tu'ug wyiinhijxy cuma'ayhaam, ja'a tsajpootypä. Mänitä José ñämaayyä:

—José, pädø'øg. Nøcx hajxy jim Egiptonaaxooty møødä mhuung møødä mdo'oxy. Jim hajxy mmähmø'øwät høxtä coonä nhawáañämät coo hajxy mwiiimbídät. Paady hajxy mbäyø'øgät neby yø'ø mhuung xquia'a yaghó'cät. Ja'a Herodes, xyhøxta'awáañäp yø'ø mhuung jaduñ; xyajyagho'ogáañäp jaduñ.

¹⁴Mänitä José piädø'cy. Mänitä Joséhajxy jim jiaančh nøcxy Egipto møødä yhuung møødä tio'oxy. Mänitcoods hajxy tiehm tiu'ubøjcy. ¹⁵Jim hajxy hänäjty miähmø'owa'añ Egipto. Høxtä ja'a Herodes hó'ogäp, mänit hajxy hänäjty wyiimbijtagatsa'añ. Jequiän ja'a Diosmädia'agy-yajwa'xpä hänäjty tu'ug tøø quiujaay nebiä Dios miänaañän: “Nhøxyaaxpädsomáambiøch ja'a nhuung jiiiby Egiptonaaxooty.” Y coo ja'a Joséhajxy jim jiaančh nøcxy Egipto, tøjiajt ja'a Diosmädia'agy jaduñ.

¹⁶Coo ja'a Herodes ñajuøøyy coo hänäjty tøø wyiinhøøñii ja'a madsa'ahøxtaabiädøjc, mänitä Herodes jiootma'ty. Mänitä Herodes ja'a pigäna'c jajyagho'cä nägøxiä, pønjata ja'a mejtsjumøjtpä hänäjty ca'a yaghabejpnä, ja'a hajxy hänäjty tsänaabiä Belén møødä Belén mäwiingón. Hix, tøø hänäjty mejtsjumøjt yhiñä coo ja'a madsa'a quiahxø'tsoñ,

ja'a madsa'ahøxtaabiädøjc-hajxy hänäjty tøø yhiñiäbä. ¹⁷⁻¹⁸Jaduñ ja'a Diosmädia'agy tiøjiájucumbä nebiä Jeremías hänäjty jecy tøø quiujaayän:

Jim maa xiøhatiän Ramá, jimä Raquel ja'a yhuung ñäjøøyy ñaxuu'ch.

Coo ja'a yhuung yaghó'cäxä, paady quia'a jootcapxmøcpøgaanä.

Ja'a Jeremías, je'e ja'a Diosmädia'agy jecy jajwa'x.

¹⁹Coo ja'a Herodes yho'nä, jimnä ja'a Joséhajxy hänäjty Egiptonaaxooty. Mänitä José ja'a Diosmoonsä tu'ug wyiinhijxcumbä cuma'ayhaam, ja'a tsajpootypä. Mänitä José ñämaayyä:

²⁰—Pädø'øg, wiimbit hajxy møødä mhuung møødä mdo'oxy. Nøcx hajxy Israelnaaxooty. Tøø jäya'ayhajxy yho'nä, ja'a mhuung hajxy hijty xyagho'ogáañäbä.

²¹Mänitä Joséhajxy piädø'cy møødä yhuung møødä tio'oxy. Mänit hajxy jim jiaančh nøcxy Israelnaaxooty. ²²Mänitä José miädoyhajty coo Arquelao hänäjty guobiernähajnä jim Judeanaaxooty maa ja'a tieedy Herodes hänäjty tøø guobiernähatiän. Mänitä José chähgøøyy. Cab hänäjty jim ñøcxaannä Judeanaaxooty. Wiingtuum hajxy ñøcxy Galileanaaxooty, nebiä José hänäjty tøø yhawáañäxän cuma'ayhaam. ²³Coo hajxy jim miejch Galileanaaxooty, mänit hajxy jim chänaadiaacpøjcy maa ja'a cajpt xiøhatiän Nazaret. Coo hajxy jim chänaadiaacpøjcy, tøjiajt ja'a Diosmädia'agy jaduñ

maa jaduḥṇ myiñān cujaay coo ja'a Jesús hānajt̃y ñāma'awa'añii coo jim̃ chooñ Nazaret. Ja'a Diosmādia'agy-yajwa'xpāhajxy jaduḥṇ jecy cujahy.

3 Cujecy ja'a Juan ja'a māyajnābejpā jim̃ miejch Judeanaaxooty pactuum. Ja'a Diosmādia'agy hānajt̃y yajwa'xyp. ²Mānitā Juan tiägøøyy mādiaacpā. Mānit miānaañ:

—Najtshixø'ow ja'a mhaxøøgcuhdujt̃ hajxy; habaadāannāp jaduḥṇ coo ja'a Dios ja'a miājaa yajcāhxø'oga'añ.

³Ja'a Isafās, ja'a Diosmādia'agy jecy yajwá'xābā, je'e hānajt̃y jaduḥṇ jecy tøø quiujaay:

Jimā jāya'ay tu'ug yaaxwādity pactuum:

“Najtshixø'ow ja'a mhaxøøgcuhdujt̃ hajxy, nebiā mwiindsōñ hajxy hoy mjøbhíxät;

hoy hajxy jaduḥṇ mwiingudsāhgø'owät.”

Ja'a Juan jaduḥṇ nānøømā.

⁴Ja'a Juan, camellopøjt̃ hānajt̃y wyithajpy; wajhac hānajt̃y wiøønhajpy. Chu'chp mu'u hānajt̃y je'e; yhuucypy cunaaxmøjt̃siinnøø hānajt̃y. ⁵Majiāya'ay ja'a Juan hānajt̃y ñāmečhii. Jerusalén hajxy hānajt̃y nāje'e chooñ. Nāje'e hajxy hānajt̃y chohmbā Judeanaaxooty møødā Jordānmøjnøøbaha. Yhamādoowhidāanāp ja'a Juan miādia'agy hajxy hānajt̃y. ⁶Mānitā piojpā quiādieey hajxy ñāgapxy. Mānitā hajxy jim̃ yajnābejtā ja'a Juāngām maa ja'a Jordānmøjnøøjān.

⁷Mānitā Juan yhijxy coo hānajt̃y ñāmečhii ja'a fariseoshajxy nāmay

møødā saduceoshajxy. Ja wi'i ñābetaamb hajxy hānajt̃y je'ebā. Ja'a fariseoshajxy, hoy hajxy hānajt̃y jiaanč tehṇ quiudiuñ ja'a Moisés miādia'agy. Ja'a saduceoshajxy, wiingā cuhdujt̃ hajxy hānajt̃y miøødā; cab hajxy hānajt̃y miāna'añ coo hajxy jiuypipøjt̃gatsa'añ. Mānitā Juan miānaañ:

—Hay, møjcu'u, caj mijts hoguiuhdujt̃ mnā'ägädā møødā. Paady hajxy mja wi'i ñābetaambā nebiā Dios hajxy jaduḥṇ xquia'a yajcumādōwät, túhmäts.

⁸Hoy hajxy mwādítāt neby hajxy jaduḥṇ myajcāhxø'ogät coo ja'a mhaxøøgcuhdujt̃ hajxy hānajt̃y tøø mjaanč najtshixø'oy. ⁹Cab hajxy jaduḥṇ mmānā'anāt: “Abrahámhøch hijty nhaphajpy ndeedyhajpy, páadyhøch ja'a Dios jaduḥṇ xquia'a yajcumādowa'añ.” Mānitā Dios jaduḥṇ xyajñāhwá'adsät coo ja'a mhaxøøgcuhdujt̃ hajxy mnajtshixø'owät, ca'a jie'eguiøxpā coo ja'a Abraham hajxy hijty mhaphaty mdeedyhaty. ¹⁰Pøñ hoy ca'a wādijp, jaduḥṇ māvīnāts je'e nebiā quepychaajān, ja'a ca'a tøømhapjā. Piuxaamby hajxy je'e; mānit hajxy ño'oga'añ. Paady hajxy hoy mwādítāt nebiā Dios hajxy jaduḥṇ xquia'a yajcumādōwät.

¹¹Tøyhajt̃ mijts nyajñābety nøøhaam neby hajxy jaduḥṇ myajcāhxø'ogät coo ja'a mhaxøøgcuhdujt̃ hajxy tøø mnajtshixø'oy. Pero xii jāya'ay tu'ug jiaac miñ høxhaam; je'eds mājōjnābā ja'a Dioshespíritu hajxy xmio'owaamb. Xyajñāhwa'ads xyajcuhwa'adsaamb hajxy jaduḥṇ. Maas mōcā cuhdujt̃ je'e miøødā

quejeech hooch. Cábøch cuhdujt nná'ägä mөөdä ni weeñtiä maa jaaya'aguiøxpän. ¹²Ja'a jäya'ayhajxy, coo ja'a trigo hajxy hänäjty tøø tiexy, tøgooty hajxy nõcxy piäda'agy. Pero ja'a trigohac, naaxwiin je'e quia'ay. Jaduhñ mäwíinäts jäya'ayhajxy quia'awa'añ haxøøgtuum, ja'a yhaxøøgcuhdujt hajxy ca'a najtshixø'øwaambä. Cøjxta'axiøø hajxy jiiby chaaçhpøga'añ.

¹³Mänitä Jesús miehch maa ja'a Juan hänäjty miäyajnabetiän jim maa ja'a Jordánmøjnøøjän. Galilea ja'a Jesús hänäjty tøø chooñ. Näbetaamb hänäjty je'ebä. ¹⁴Mänitä Juan ja'a Jesús ñämaayy: —Cab jaduhñ yhahixø'øy cooçh miich nyajnbétät; maas hoy hijty jaduhñ cooçh miich cu xyajnbeyty.

¹⁵Mänitä Jesús miänaañ: —Høøch yajnbéjtäc neby jaduhñ ngudiúunämät nebiaty ja'a Dios xyhanéhñäm.

Mänitä Juan jaduhñ miänaañ: —Ween nyajnbétät.

¹⁶Mänitä Jesús ñäbeyty. Mänit je'e tiø'ødspädsøømy. Mänitä tsajt yhawaach. Mänitä Jesús ja'a Dioshespíritu yhiyxy coo hänäjty miänacy nebiä palomän, coo hoy yhänaaguiäda'agy ja'a Jesús quiuhduum. ¹⁷Mänitä Dios jim quiapxy tsajpootyp:

—Høøch nHuung yøø. Njaançh tehñ chójpiøch jaduhñ. Jaançh tehñ jiootcújc-høch nñijiäwø'øyii ja'a nHuungcøxpøch.

4 Mänitä Dioshespíritu ja'a Jesús wioonøcxy pactuum. Jimä Jesús hänäjty jia wi'i ñäma'awa'añii ja'a møjcu'ugóngäm coo haxøøg jiatcø'øwät.

²Juxychägui'xxøø ja'a Jesús hänäjty jim tøø yhity jaguiay. Ni xøøm ni coods hänäjty tøø quia'a cay. Mänit yäho'pøjcä. ³Mänitä Jesús ñämejtsä ja'a møjcu'ugóngäm. Ja wi'i yagjatcø'øwáanäp ja'a Jesús hänäjty haxøøg. Mänitä møjcu'ugong miänaañ:

—Pø miich ja'a Dios tøyhajt xyHuunghajp, näma'aw yøø tsaacoo ween chajcaagyquiojy.

⁴Mänitä Jesús yhadsooyy: —Jaduhñ ja'a Diosmädia'agy miäna'añ: “Ca'a quiaaguiähajtiä ja'a jäya'ayhajxy miädsänaaby hädaa yaabä naaxwiin; mөөdä Diosmädia'agy hajxy miädsäna'ay.”

⁵Mänitä møjcu'ugong ja'a Jesús wioonøcxy jim Jerusalén. Ja'a Dioscajt je'e jim. Mänitä Jesús miøødwimbejtä ja'a møjtsajtøcuhduum. ⁶Mänit ñämaayyä:

—Pø miich ja'a Dios tøyhajt xyHuunghajp, cuhdøpxnax jii. Caj miich nej mjädät. Jaduhñ ja'a Diosmädia'agy miäna'añ:

Ja'a Dios ja'a mioonsä hane'emaamb, ja'a hajxy jim tsajpootypä coo miich xcwieendähädät.

Xchehñhidaamb miich hajxy nej miich tsaajooty jaduhñ mga'a cuhnébät.

⁷Mänitä Jesús yhadsooyy: —Pero nõm ja'a Diosmädia'agy miänaambä: “Cabä Dios ja'a mWiindsøn mjøjcapxø'øwät.”

⁸Mänitä møjcu'ugong ja'a Jesús wioonøcxcumbä maa ja'a tunän, ja'a jaançh tehñ quiøxpä. Mänitä Jesús yajnbixøøyyä ja'a naax ja'a cajt cøxiä hädaa yaabä naaxwiin,

coo ja'a jäya'ayhajxy miøjjä
jiaančhä. ⁹Mänitä Jesús ñämaayya:

—Høøch nje'e yøøduhñ cøxiä
mäduhñtiä jii quiähxø'ogy. Cooch
miich jijnä'a xwyiingudsähgø'owät,
mänitäts yøø ngøxy mó'owät.

¹⁰Mänitä Jesús yhadsooyy:

—Jäwa'ads miich jim, møjcu'u.

Jaduhñ ja'a Diosmädia'agy
miäna'añ: “Dios hajxy
mwiingudsähgø'owäp, ja'a hajxy
mWiindsønñhajpiä. Cab jaduhñ
wiingpä mwiingudsähgø'owät.”

¹¹Mänitä møjcu'ugong
wyiimbijnä; nidiuhñ ja'a Jesús
miähmøyy. Mänitä Jesús
ñägädaacä ja'a Dios miöonsäm ja'a
tsajpootypä. Mänit je'e piuhbejtä.

¹²Coo ja'a Jesús miädoyhajty
coo ja'a Juan hänajty tøø chumyii,
mänit jim ñøcxy Galileanaaxooty.

¹³Mänitä Jesús jim ñaxøyy
maa ja'a Nazaretcajptän, pero
cab jim miähmøyy. Mänit jim
chänaadiaacpøjcy maa ja'a cajpt
jaduhñ xiøhatiän Capernaum. Jimäts
je'e Galileamejypia'a maa ja'a
Zabulón yhap yhoc-hajxy chäna'ayän.
Jimä Neftalí ja'a yhap yhoc-hajxy
chänaabiä. ¹⁴Coo Ja'a Jesús jim
chänaadiaacpøjcy Capernaum, tøjiajt
ja'a Diosmädia'agy jaduhñ nebiä
Isaías hänajty jecy tøø quiujaayän,
ja'a Diosmädia'agy jecy jajwä'xäbä:

¹⁵Ja'a naax maa ja'a Zabulón yhap
yhoc-hajxy chäna'ayän, maa
ja'a Neftalí yhap yhoc-hajxy
chänaabiän,

jimä tu'u ñaxø'oy mejypia'a,
jim Galilea, jim maa ja'a ca'a
judíoshajxy chäna'ayän.

¹⁶Ja'a jäya'ayhajxy hijty
haxøøgwädijpä, tøø ja'a

piojpä quiädieey hajxy
yajnähwäatsäxä.

Ja'a jäya'ayhajxy hijty
hagoodstuum ca'awaambä,
nøcxaamb hajxy je'e jim
tsajpootyp,

coo ja'a piojpä quiädieey hajxy
tøø yajnähwäatsäxäbä.

¹⁷Mänitä Jesús tiägøyy
yajwiingapxøøbiä ja'a
Diosmädia'agy. Mänit miänaañ:

—Najtshixø'ow ja'a
mhaxøøgcuhdujt hajxy.
Habaadäännäp jaduhñ coo ja'a Dios
ja'a miäjaa jajcähxø'oga'añ.

¹⁸Jimä Jesús hänajty
miejypia'ayo'oy maa ja'a
Galileamejjiän. Mänitä jäya'ay
metsc yhijxy, ja'a Simón, ja'a
xøhajpä Pedro, møødä piuhya'ay
Andrés. Hacxmats hajxy hänajty
tiuunghajpy. Jimä yhacxjohmd
hajxy hänajty miehpyiäda'aga'añ.

¹⁹Mänitä Simónhajxy ñämaayyä
ja'a Jesúsäm:

—Jam hajxy wädjítäm. Jue'e
mijts mduunghajpy, hacxmats;
wiingtuunng mijts nmo'owaamby.
Nyajnähixø'owaamby mijts nebiä
jäya'ay hajxy myajwiingapxø'owät
ja'a Diosmädia'agy.

²⁰Tuunä je'eduhñ ñä'ä mänaañ,
mäntiä ja'a yhacxjohmd hajxy
ñajtswidsoøyy; mänit ja'a Jesús
hajxy piadu'ubøjcy.

²¹Mänitä Jesús jiaag hädaacy
mejypia'a. Mänitä Zebedeo yhijxy
møødä yhuunghajxy, ja'a Jacobo
møødä Juan. Jiiby hajxy hänajty
yhäna'ay barcojooty. Yhacxjohmd
hajxy hänajty yhaxodsøøby. Mänitä
Jesús ja'a Jacobo miøjyaaxy møødä
Juan. ²²Tuunä hajxy jaduhñ ñä'ä

mädooyy, mäniitä hajxy piädsøømy barcojooty; mäniit ja'a Jesús hajxy piadu'ubøjcy; yajmähmøoyy ja'a tieedy hajxy jiiby barcojooty.

²³Mäniitä Jesús tiägøoyy wädiipä cajpt-cajpt jim Galilea. Mädia'agy-yajwa'xpä jaduhñ wiädiity coo ja'a Dios ja'a miäjaa yajcähxø'øga'añ. Homiädyii cajptä hänäjty ñøcxy, jiiby hänäjty yajnähiixø'øy maa ja'a judíos chajtøjc-hajxiän. May ja'a jäya'ay yajmøcpøjcy. Homiädyii pa'amä jaduhñ yajnajxy.

²⁴Mäniitä mädia'agy jaduhñ wiädiity ja'a Jesúscøxpä jim maa jaduhñ xiøhatiän Siria. Mäniitä pa'amjäya'ayhajxy yajmejtsä maa ja'a Jesúsän, põnjaty ja'a mõjcu'u møød, møød põnjaty ja'a pojpa'am møød. Mäniitä Jesús ja'a pa'amjäya'ay quiøxy yajmøcpøjcy. ²⁵Mäniitä Jesús piadu'ubøjcä ja'a majiäya'ay. Jim Galilea hajxy hänäjty näje'e chooñ. Näje'e hajxy hänäjty chooñ maa ja'a majc-hagajptän, näje'e Jerusalén, møødä Judea møødä Jordánmøjnøø'awiimb.

5 Coo ja'a Jesús ja'a majiäya'ay yhiixy, mäniit ñøcxy tunguhduum. Mäniit yhöxtaacy naaxwiin. Mäniit nämejtsä ja'a jiamiøødhajxy. ²Mäniit tiägøoyy yajnähiixøøbiä. Mäniit miänaañ:

³—Jootcuyc hajxy jaduhñ yhida'añ põnjaty jaduhñ yajpejxp. Paady hajxy jootcuyc yhida'añ, coo hajxy jim ñøcxa'añ maa ja'a Diosän.

⁴Jootcuyc hajxy jaduhñ yhida'añ põnjaty jootmayhajp. Paady hajxy jootcuyc yhida'añ, coo ja'a Dios hajxy quiapxmøcpøga'añiijäm.

⁵Jootcuyc hajxy jaduhñ yhida'añ põnjaty mee'xxieemy hidaamb. Paady hajxy jootcuyc yhida'añ, coo ja'a Dios hajxy mio'owa'añiijäm nebiaty ja'a Dios tøø yajwiinwaanø'øy.

⁶Jootcuyc hajxy jaduhñ yhida'añ põnjaty ja'a joot tsojp coo hajxy hoy quiudiünät. Puhbedäänäp hajxy jaduhñ Diósäm.

⁷Jootcuyc hajxy jaduhñ yhida'añ põnjaty hojioot møød. Paady hajxy jootcuyc yhida'añ, coo ja'a Dios hajxy ñäxuudsaañiijäm.

⁸Jootcuyc hajxy jaduhñ yhida'añ põnjaty haxøøgwiiimahñdy ca'a møød. Paady hajxy jootcuyc yhida'añ, coo ja'a Dios hajxy yhixa'añ.

⁹Jootcuyc hajxy jaduhñ yhida'añ põnjaty capxuhgädaacp maa ja'a tsip piädø'øguiän. Paady hajxy jootcuyc yhida'añ, coo ja'a Dios hajxy yhuunghada'añiijäm.

¹⁰Tsaächpøjpp ja'a jäya'ayhajxy näje'e coo hoguiuhdujt hajxy miøødä; pero jootcuyc hajxy jaduhñ yhida'añ. Paady hajxy jootcuyc yhida'añ, coo hajxy jim ñøcxa'añ maa ja'a Diosän.

¹¹Jootcuyc hajxy mhida'añ, hoy ja'a jäya'ayhajxy hänäjty xjia nämä'ay haxøøg, hoy ja'a jäya'ayhajxy hänäjty xjia tuna'añ haxøøg, hoy ja'a jäya'ayhajxy hänäjty xjia nähøøno'øwa'añ hoñejpiä ja'a høøhcøxpä.

¹²Jaana jaduhñ hajxy jecy tøø chaächpøjppä, ja'a Diosmädia'agy hajxy jecy yajwá'xäbä. Pero xoonäda'ag hajxy, jootcugø'øw hajxy; jimä hoybä weenbä hajxy mjaanč tehñ piada'añ jim tsajpootyp.

¹³Ja'a caan, coo ja'a tiaamdspä tiägöyyät, cab jaduhñ mänaa tiaamdsóõñät. Tøø jaduhñ mia'ady. Mänitä jäya'ayhajxy yhøxwøjy, mänit hajxy yajteeñ. Jaduhñ mäwíinäts mijts nebiä caanän hädaa yaabä naaxwiin; coo ja'a Diosmädia'agy hajxy mnajtshixó'owät, mmá'adäp hajxy jaduhñ.

¹⁴⁻¹⁶Ja'a cajpt, ja'a tunguhdum hijpä, caj mänaa yhiixtägyy. Y coo ja'a cera hajxy ño'ogy, cab hajxy jaduhñ ñähjujpety cachpa'c. Caj pues. Jiiby hajxy jaduhñ piäda'agy cøxp maa ja'a ceratoyøhñdiän, nebiä jäya'ayhajxy nägøxiä quiudøø'xøjät jiiby tøgooty. Jaduhñ mäwíinäts mijts, hoy hajxy mwädítät nebiä jäya'ay hajxy jaduhñ xyhíxät coo hajxy hánajty hoy mwädity. Mänitä jäya'ayhajxy wyiingudsähgó'owät ja'a nDeedyhájtäm jim tsajpootyp.

¹⁷Páadyhöch yaa tøø nmiñ tøø nmech hädaa yaabä naaxwiin nébiøch mijts jaduhñ nyajnahixó'owät nebiä Diosmädia'agy hajxy hamuumdu'joot mgudiúnät, ja'a Moisés jecy quiujáhyyäbä, ja'a Diosmoonsähajxy yajwá'xäbä, ja'a hajxy hädaa yaabä naaxwiimbä. Cábøchä Diosmädia'agy nyajcuhdägoyya'añ. Cab hajxy jaduhñ mmäná'anät cooch nyajcuhdägoyya'añ. ¹⁸Tøyhájtøch mijts nnäma'ay, mäduhñtiä ja'a tsajtwiing miähmø'owa'añ, mäduhñtiä hädaa yaabä naaxwiin miähmø'owa'añ, cabä Diosmädia'agy quiuhdägoyya'añ, ni weeñtiä, ni tu'lí'xytiädä, høxtä

coonä hánajty tøø quiøxy habejnä. ¹⁹Pønjaty ja'a Diosmädia'agy jaduhñ cudiuumb, pønjaty ja'a wiinghänac jaduhñ yajnahixøøby coo hajxy quiudiúumbät, je'eds hajxy mõj jaançh päda'agáanäp coo ja'a Dios ja'a miäjaa yajcähxø'øga'añ. Pero pønjaty ja'a Diosmädia'agy ni weeñtiä ca'a cudiuumb, pønjaty ja'a wiinghänac yajnahixøøby coo hajxy quia'a cudiuúnät, cab hajxy je'e mõj jaançh piäda'aga'añii coo ja'a Dios ja'a miäjaa yajcähxø'øga'añ. ²⁰Míjtshøch jaduhñ nnämaaby, cabä ley-yajnahixøøbiädøjc-hajxy hoy wiädity ni ja'a fariseodøjc-hajxy. Coo mijts maas hoy mwädítät, mänit hajxy jim mnøcxät cøxp maa ja'a Diosän. Pø cab hajxy hoy mwädita'añ, cab hajxy jim mnøcxät.

²¹Tøø hajxy mmädoyhaty nebiä mhäp mdeedyhajxy hijty jecy miäna'añän: "Ca'a hajxy mjäya'ay-yagho'ogy coo ja'a cuduung hajxy xyajcumädówät." ²²Pero høøch mijts nnämaaby, pøn ja'a miäjøøn miädøjc mäjootma'p, je'eds cumädowaamb maa ja'a cuduungän. Pøn ja'a miäjøøn miädøjc nähwaambejp, je'eds cumädowaamb maa ja'a gobiernän. Pøn ja'a miäjøøn miädøjc nämaaby coo je'e quiuhmañø'øy, je'eds jiiby ca'awaamb haxøøgtuum, maa ja'a jøøn mänaa quia'a pi'ichän.

²³Entonces, coo hajxy hánajty tii mänaa myoxa'añ jiiby tsajtøgooty maa ja'a altarän, y coo hajxy mänit mjahmiédsät coo ja'a mmäjøøn mmädøjc hajxy hánajty tøø xmiädsibø'øy hotyigiigüxpä, ²⁴jim hajxy mnajtsconø'owät

altarwiinduum, tijaty hajxy
hänajty myoxaamby. Mänit hajxy
jim̄ mnöcxät maa ja'a mmäjöönän
maa ja'a mmädöjcän, neby hajxy
jaduhñ myajtödiägó'owät. Mänit
hajxy mwiimbídät. Mänit hajxy
mnöcxtagátsät maa ja'a altarän.
Mänit hajxy myóxnät.

²⁵'Coo pön̄ hänajty mänaa
xñäxó'owó'owa'añ maa
ja'a cuduungän, jayöjp
myajtödiägó'owät tu'haamnöcxpä.
Coo jim̄ mga'a yajtödiägó'owät
tu'haamnöcxpä, mänit hajxy
xyajmédsät cuduungwiinduum.
Mänitä cuduung xyajcö'ödägó'owät
ja'a policíahajxy. Mänit hajxy
xchúmat. ²⁶Jiiby jaduhñ
mmähmó'owät pujxtögooty. Cab
jaduhñ mdsoj pädsómät. Mänit
jaduhñ mbädsómät coo hänajty
pedyii tøø mniyhöxjuubiädsömyii.
Tøyhajt jaduhñ.

²⁷'Tøø hajxy mmädoyhaty
coo jäya'ayhajxy hijty jegyhajty
miäna'añ coo hajxy mga'a
tu'udägöyyät. ²⁸Pero høøch
mijts jaduhñ nnämaaby, coo pön̄
wiingto'oxiöjc mänaa yhadsoy,
nä'ägädä tu'udägooby je'eduhñ.

²⁹⁻³⁰'Coo tii hoyhadsojnä mhíxät,
cab jim̄ mmøjhée'pnät ni mga'a
nähdónät. Jaduhñ mnibiäda'agó'ojät
nebiä wiindspän nebiä cö'öducpän.
Pø caj, jiiby hajxy mga'awa'añ
haxøøgtuum.

³¹'Jaduhñä jäya'ayhajxy hijty
jegyhajty miänaambä: "Coo pön̄
ja'a tio'oxiöjc mänaa yhöxmádsät,
mänitä hagujpöjnocy quió'otsnät."

³²Pero høøch mijts jaduhñ
nnämaaby, coo pön̄ tio'oxiöjc
mänaa yhöxmádsät, y cabä

tio'oxiöjc hänajty nej tøø jiatcø'öy,
coo ja'a to'oxiöjc wiingya'adiöjc
jiöjpögó'owät, pues tu'udägöyyäp
ja'a to'oxiöjc jaduhñ. Ja'a
ya'adiöjc, ja'a hänajty jawyiin
tøøbä yhöxmáchäbä, je'edsä pojpä
møød. Y ja'a ya'adiöjc tøø jiaac
jöjpögó'öyabä, jaanä tu'udägooby
je'ebä.

³³'Jaduhñä jecyjiiäya'ayhajxy
hijty nñama'ayii: "Pø tøø ja'a Dios
hajxy mnäma'ay hamuumdu'joot
coo hajxy hotyijä mgudiuna'añ,
tsipcøxp hajxy jaduhñ
mgudiúnät." ³⁴⁻³⁶Pero høøch
mijts nnämaaby coo hajxy tii
mga'a yajwiinwaanó'owät nä'ä
nägoobä. Coo hajxy hänajty tii
myajwiinwaanó'owa'añ, cabä
tsajpootypä hajxy mgapxpáadät,
ni ja'a naaxwiimbä, ni ja'a
Jerusalén, ni ja'a mgopc-hajxy.
Hix, paadiä tsajpootypä hajxy
mga'a capxpáadät je'eguiøxpä
coo ja'a Dios jim̄ yhäñ'aay. Møød
hädaa yaabä naaxwiin hajxy
mga'a capxpáatpät je'eguiøxpä
coo ja'a Dios yajtänaabiety. Møødä
Jerusalén hajxy mga'a capxpáatpät
je'eguiøxpä coo je'e Dyioscajptä.
Møødä mhamdsoo copc hajxy
mga'a capxpáatpät je'eguiøxpä coo
ja'a mguhwaay hajxy hoy mga'a
yajpó'owät, ni hajxy hoy mga'a
yagjiñó'owät. ³⁷Jaduhyyä hajxy
mmäná'anät pø tøyhajt, pø caj. Coo
hajxy waamb mjaac mäná'anät,
ja'a möjcu'ugong hajxy jaduhñ
xyajmänaamb.

³⁸'Tøø hajxy hijty mmädoyhaty
nebiä jäya'ayhajxy hijty jegyhajty
miäna'añ: "Coo pön̄ cøxypänejpiä
xñä'a túnät, myaghawiimbídäp

jaduhñ.”³⁹ Pero hөөч mijts nnämaaby: cab jaduhñ myaghawiimbídät; coo pөн xyhala'pó'ogät tu'nax, mjaac yégäp jaduhñ ja'a tu'naxpä, ween xjiaac hala'pó'ogy.⁴⁰ Coo pөн mänaa xñäx'owó'owät, coo ja'a mgamiixy hänäjty xpíogaanä, myégäp jaduhñ mөөдä mnähgäjén.⁴¹ Coo pөн hänäjty tii xyajtsömnöcx'a'añ tu'kilómetro hadsip, mejtskilómetro mnä'ägä tsömnöcxät.⁴² Coo pөн hänäjty tii xmiäyujwa'ana'añ, mmó'owäp jaduhñ. Tsipcөxp jaduhñ hotyijä mmó'owät.

⁴³Tөө hajxy hijty mmädoyhajpä nebiä jäya'ayhajxy hijty jegyhajty miänaambä: “Hoy ja'a mmägu'ughajpä mdsoc mba'häyöwät; pero ja'a mmädsip, mmähänhädäp je'e.”⁴⁴ Pero hөөч mijts nnämaaby: ca'a mmähänhaty pөнjaty jaduhñ xmiädsiphajp. Hoy hajxy mnänómät pөнjaty haxөөг xñänөөmb. Mnäxúudsäp hajxy pөнjaty xmiähänhajp. Mänuu'xta'ag ja'a Dios hajxy coo ween mio'oy ja'a hoyhajt ja'a weenhajt pөнjaty xwyiinwohmб xyhawohmб, pөнjaty xyhäyoowhijxp.⁴⁵ Jaduhñä Dios hajxy hoy xyhuunghädät, ja'a jim hijpä tsajpootyp. Jaayá'ayäts jaduhñ yajxөөhaamb maa ja'a jäya'ay hoybän chaads jim maa ja'a jäya'ay ca'awiindöybän. Jaayá'ayäts jaduhñ yajtuub maa ja'a jäya'ay hoybän chaads jim maa ja'a jäya'ay ca'awiindöybän.⁴⁶ Cab hajxy tii mbädät nä'a täg'өbä coo ja'a mmägu'ughajpähajtjä mmөөдnijootpaadöøjät. Hөxtä ja'a yajnähjuudiuutpädöjc-hajxy ničhojc nibia'häyöowäp. Pero

coo ja'a mmädsip hajxy mmée'xät, mänitä Dios hajxy xyhuunghädät.⁴⁷ Cab jaduhñ nejpiä coo ja'a mmägu'ughajpä hajxy mmөөдnijootpaadyii. Hopíönä nijootpaadyii, hoy ja'a Diosmädia'agy hajxy quia'ja máböcy. Pero coo ja'a mmädsip hajxy mmée'xät, hoy hajxy mgudiuñ.⁴⁸ Ja'a nDeedyhájtäm, ja'a jim tsajpootypä, jaanč tehñ nä'ägä hoy je'eduhñ yhyty. Hoy hajxy jaduhñ mbahíxpät.

6 'Näje'e ja'a jäya'ayhajxy jia wi'i yajcumaya'añ, paady hajxy jaduhñ nibiäda'agyii nebiä hojjiäya'ayän. Pero cab jaduhñ yhooyä coo hajxy jaduhñ yajcumäyät. Cab hajxy jaduhñ mbahix mbadúnät. Coo hajxy jaduhñ mbahix mbadúnät, cabä Dios hajxy xyhuunghädät, ja'a jim tsajpootypä.² Jii jäya'ayhajxy näje'ebä, coo ja'a häyoobäya'ay ja'a xäd'өñ hajxy hänäjty төө mio'oy, mänit hajxy tiäg'өy mädiaacpä jiiby tsajtөгooty mөөд jim tu'haam. Paady hajxy jaduhñ miädia'agy, yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumayíjäm, je'leguioxpä coo hajxy hänäjty jim төө yajcumay maa ja'a cu'ugän.³ Pero mijts, coo ja'a häyoobäya'ay xäd'өñ hajxy hänäjty төө mmo'oy, cab hajxy waamb mmäná'anät. Ni pөн hajxy mga'a hawáanät, ni ja'a mmägu'ughajpähajxy.⁴ Hamee'ch ja'a xäd'өñ hajxy jaduhñ myégät. Dios hajxy jaduhñ xyhíxäp; mänit hajxy jaduhñ xyhuunghädät.⁵⁻⁶ Jii jäya'ayhajxy näje'ebä, tänä'a ja'a Dios hajxy naxy

pia'ya'axy jii by tsajtøgooty møød jim maa ja'a tu'uxeñän. Pero cabä Dios hajxy tu'joot pia'ya'axy. Nä'ä yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumaya'añijäm. Tøyhajt jaduhñ. Pero mijts, hamee'ch ja'a Dios hajxy mba'yá'axät. Xyhíxäp xmiädówäp hajxy je'eduhñ; mänit hajxy xyhuunghädät.

⁷⁻⁸Ja'a jäya'ay ja'a Diosmädia'agy hajxy ca'a mäbøjpä, cab hajxy ñajuø'øy waambaty ja'a Dios hajxy jia pa'ya'axy. Ja capxp hajxy jaduhñ ja naañ ja tsojc. Paady hajxy jaduhñ jia capxy cooc tyijy ja'a Dios hajxy jaduhñ miädowa'añijäm. Pero mijts, cab hajxy jaduhñ mbahix mbadúnät. Hix, jäguemiä ja'a Dios ñajuø'øy tijaty hajxy hänäjty myajmaajajpy.

⁹Jaduhñä Dios hajxy mba'yá'axät:

Teedy, jim miich mdsäna'ay tsajpootyp;
ween miich ja'a cu'ughajxy xwyiingudsähgø'øy.

¹⁰Ween ja'a mmäjaa min yaa myajcähxø'ogy hädaa yaabä naaxwiin.

Ween ja'a jäya'ay ja'a mmädia'agy hajxy yaa xquiudiuunä hädaa yaabä naaxwiin,
neby jim xquiudiuunän tsajpootyp.

¹¹Højts ja'a caayyøøc huucøøc móoyyác jabom-jabom.

¹²Højts ja'a nbojpä ngädieey méé'xác neby højts tøø nmämee'xiän ja'a højts tøø xñägädieeyø'øyäbä.

¹³Ca'a højts xyajcädieey; pero pädaacác højts hodiium neby højts jaduhñ nga'a cädieeyät.

Miich hanehmb; miich ja'a mäjaa mmøød; miich møj jaanč homiänaajä. Amén.

¹⁴Coo mijts jaduhñ mmämée'xät ja'a hajxy tøø xñägädieeyø'øyäbä, mänitä Dios hajxy jaduhñ xmiée'xpät, ja'a nDeedyhajtäm ja'a jim tsänaabiä tsajpootyp. ¹⁵Pero coo wiinghäna'c hajxy jaduhñ mga'a mämée'xät, cabä Dios ja'a mbojpä mgädieey hajxy jaduhñ xmiée'xät.

¹⁶Jii jäya'ayhajxy näje'e, coo hajxy hänäjty yhayuuhada'añ, jaduhñ hajxy ñibiäda'agyii nebiä jootmayhajpän. Paady hajxy jaduhñ ñibiäda'agyii, jaduhñ hajxy quiähxø'oga'añ jäya'awyiinduum coo hajxy hänäjty yhayuuhaty. Tøyhajthøch mijts nnäma'ay, cab hajxy jaduhñ tii piaada'añ. ¹⁷Pero mijts, cab hajxy jaduhñ mnibiäda'agøøjät nebiä jootmayhajpän. Coö hajxy hänäjty mhayuuhada'añ, yajxon hajxy mniyhonøøjät mniwyiimbujøøjät. ¹⁸Jaduhñ hajxy mga'a yajcähxø'ögät maa ja'a cu'ugän pø mhayuuhajp hajxy hänäjty. Hamee'ch ja'a Dios hajxy jaduhñ xyhíxät, ja'a ca'a cähxø'pä. Jaaya'ay hajxy jaduhñ xmio'owaamb ja'a hoyhajt ja'a weenhajt.

¹⁹Cabä mjoot hajxy yaa mbädá'agät tijaty yaabä naaxwiin. Haagä ma'adaamb jaduhñ cøxiä mäduhñtiä hädaa yaabä naaxwiin. Y jaanč tehñ wiädijp ja'a mee'tspähajxy. ²⁰Pero jaduhñ hajxy mwiinmahñdyhädät neby hajxy hoy mwädítät. Jaduhñ hajxy jootcujc mhídät jim tsajpootyp; caj pøn jim xyagjootmayhädät. ²¹Pøn jaduhñ ja

wi'i miäyøøhadaamb hädaa yaabä naaxwiin, jimä jioot hajxy jaduhñ piäda'agy maa ja'a xädø'øñän. Pero pøn hoy wäditaamb, jimä jioot jaduhñ piäda'agy maa ja'a Diosän.

²²Pø mmøødä howyiinmahñdy hajxy, mänit hajxy hoy mwädítät nebiä Dios choquiän. ²³Pero pø cabä mwiinmahñdyhajxy yhooyä, cab hajxy hoy mwädítät nebiä Dios ja tsoquiän.

²⁴Cabä wiindsøn hoy metsec mmøødtünät. Mxøøghadaamby tu'ug; jatu'ugpä jaduhñ mdsogaamby. Hoy ja'a miädia'agy jaduhñ mgudiunaanä. Jaanä jaduhñduhmbä, coo ja'a mjoot mbädá'agät maa ja'a xädø'øñän, cabä Dios jaduhñ hoy mwiingudsähgø'owät.

²⁵Jaduhñäts mijts nnäma'ay, ca'a hajxy mwi'i tiajy mwi'i miay tijaty hajxy mnäjyghädäp, tii hajxy mwithädäp. Maas tsoobaatp ja'a jugyhajt jaduhñ quejee ja'a cay, y maas tsoobaatp ja'a ni'x jaduhñ quejee ja'a wit. ²⁶Høxtahmäsä muuxyhajxy, cab hajxy ñi'iby tiuñ, cab hajxy tii piäda'agy tsehjxooty. Pero ja'a nDeedyhajtäm ja'a jim tsajpootypä, je'eds jaduhñ yagjøø'xp yajpøjp. Y mmaas tsoobaatp mijts quejee ja'a muuxyhajxy. ²⁷Ni pøn jaduhñ hamdsoo quia'a yajnijugyhädøøjät.

²⁸Cabä wit hajxy mnädaj mnämáyät. Høxtahmäsä pøjy hujts, cab tii tiuñ. ²⁹Pero maas yajxon je'e quejee ja'a rey Salomón hijty; jaançh tehñ yajxon ja'a Salomón hijty jegyhajty ñibiäda'agyii. ³⁰Ja'a pøjy hujts, yajxon ja'a Dios jaduhñ tøø quiunuu'xy. Y häyaa jaboom

hajxy jaduhñ ño'oga'añ. Y mijts, xmiaas cunuu'xaamb mijts ja'a Dios, hoy hajxy mga'a ja mabøcy.

³¹Ca'ads hajxy mdajy mmay; ca'a hajxy mwi'i miäna'añ: "Tii ngäaayyamb, tii nhúucämb, tii mwithájtämb." ³²Yø'øduhmbä hajxy yhøxtaaby ja'a Dios hajxy ca'a wiingudsähgøøbiä. Pero ja'a nDeedyhajtäm jim tsajpootypä, ñajuøøby je'eduhñ coo mijts myajmaajiaty. ³³Mhøxtá'awäp hajxy jayøjp neby hajxy hoy mwädítät, neby hajxy jaduhñ jim mnøcxät maa ja'a Diosän. Jaduhñä Dios chocy. Mänit hajxy jaduhñ cøxiä xmió'owät. ³⁴Ca'a hajxy mwi'i tiajy mwi'i miay ja'a jaboomgøxpä; ween hamdsoo yhuuc habaady. Mädøyyä ja'a tsaächpä hajxy xpiaada'añ ja'a jäda'agøxpä.

7 Cabä wiinghäna'c hajxy mnähójtät, coo ja'a Dios hajxy jaduhñ xñä'a yajcumädówät. ²Jaduhñ hajxy xyajcumädówät nej mijts wiinghäna'c hänäjty tøø mnähøjjiän. ³⁻⁴Coo ja'a mmägu'ughajpä weentiä quiädiéeyät, y coo miäch hänäjty maas hanaxiä tøø mgädieey, cab jaduhñ yhawiiinmatsä coo ja'a mmägu'ughajpä waamb mnämä'awät. ⁵Mänitä mmägu'ughajpä jaduhñ hawiiinmats mwiingapx mjøjcaxø'owät, coo miäch hänäjty tøø myajniñähwa'achii.

⁶Cabä jäya'ay hajxy hadsip mnämä'awät coo ja'a Diosmädia'agy hajxy miäböğät. Pø cab hajxy jaduhñ miädowa'añ, ca'a hajxy hadsiipc mduñ, coo hajxy jaduhñ ñä'a jootmä'adät.

7-8' Coo ja'a Dios hajxy tii mmäyujwá'anät, mänit hajxy jaduhñ xmió'owät; coo hajxy mmänuu'xtá'agät, mänit hajxy jaduhñ xpiuhbédät.

9' Coo ja'a mhuung ja'a tsajcaagy xmiäyujwa'añ, je'eds jaduhñ mmooby, túhmäts. Cabä tsa mmo'oy. 10' Y coo hacx jaduhñ xmiäyujwa'añ, je'eds jaduhñ mmooby, túhmäts. Cabä tsahñdy mmo'oy. 11' Hoorä, je'edsä mhuung hajxy mmooby ja'a hoybä, hoy mijts mja haxøøgjäya'ayä. Pero ja'a nDeedyhajtäm jim tsajpootypä, hojiäya'ay je'e. Xmio'owaamb ja'a hoyhajt hajxy jaduhñ coo hajxy mmäyujwá'anät.

12' Jaduhñäts mijts ja'a jäya'ayhajxy mnäxúu'tspät nej mijts myajnäxuudsaañän. Jaduhñä Moisés jecy miänaañ coo hajxy ngudiúunämät. Jaduhñ hajxy jecy miänaambä, ja'a Diosmädia'agy hajxy jecy jajwá'xäbä.

13-14' Hamäjaa jim mnøxcät Dioswiinduum. Jaduhñ mäwíinäts jim nebiä xu'udstu'ujän; cab hajxy jaduhñ nämay piaady. Pero coo jii by mhädá'agät haxøøgtuum, cab jaduhñ yhamäjaaä. Jaduhñ mäwíinäts je'e nebiä mõjtu'ujän; nämay hajxy jii by yhäda'agy.

15' Mnigwieendähadøøjap hajxy maa ja'a jäya'ayhajxy tyijy Diosquexypän. Nä'a hønñdaacp hajxy jaduhñ. Jaduhñ hajxy ñibiäda'agyii nebiä mabøjpän, pero cab hajxy tiehm miäböcy; jaanč tehñ quia'awiindøy hajxy jaduhñ. 16' Haxøøg hajxy jiatcø'øy; jaduhñ hajxy mhøxcábät coo haxøøgwiinmahñdy hajxy miøødä.

Jaduhñ mäwíinäts hajxy je'e nebiä hujts nebiä haptiän. Ja'a wädsats, cab jaduhñ tiøømhaty nebiä tsaatypän. Ja'a hapy, cab jaduhñ tiøømhaty nebiä piidsän. 17-18' Mädyii quepychaa hoy, hoy tiøømhaty; mädyii ca'a hoy, cab hoy tiøømhaty. 19' Mädyii quepychaa jaduhñ hoy ca'a tømhajp, piuxyp hajxy jaduhñ; mänit hajxy ño'ogy. 20' Ja'a jäya'ayhajxy haxøøg jatcøobiä, jaduhñ mäwíinäts hajxy je'e nebiä quepychaa hoy ca'a tømhajpän. Jaduhñ hajxy mhøxcábät coo haxøøgwiinmahñdy hajxy miøødä.

21' Nämáyhøch ja'a jäya'ayhajxy xjia nämä'ay: "Wiindsøn." Pero cab hajxy nägøxiä jim tiägø'owa'añ Dioswiinduum jim tsajpootyp. Pønjátyhøch ja'a nDeedy ja'a miädia'agy xquiudiúunäp, je'eds jim tægø'owaamb. 22' Coo ja'a naaxwiimbä hñajty wyiimbida'añ, mänítøch hajxy nämay xjia nämä'awa'añ: "Wiindsøn, tøø højts ja'a Diosmädia'agy nyajwa'xy ja'a miich mmäjaagøxpä; tøø højts ja'a mõjcu'u ngøxy jajpäyø'ogy ja'a miich mmäjaagøxpä; tøø højts ja'a hoy-yagjuøøñjatypä may nyajcähxø'ogy ja'a miich mmäjaagøxpä." 23' Mänítøch hajxy nnäma'awa'añ: "Cábøch mijts mänaa tøø nhixyhaty. Jua'ads hajxy jim; haxøøg ja'a mwiinmahñdyhajxy jaduhñ."

24' Pønñhøch nmädia'agy xmiädóowäp, coo jaduhñ quiudiúnät nébiøch nhane'emiän, jaduhñ mäwíinäts je'e nebiä jäya'ay ja'a tiøjc tøø quiojjiän tsaawiing. 25' Mänit com tiuuyy.

Mänitā mōjnøø quiomgādaacy.
 Mänitā tōjc mōc miōjpojpejty. Pero
 cabā tōjc nā'ā jījty, je'leguiōxpā
 coo tsaawiing quiojjiā. ²⁶Pero
 pōnhōch nmādia'agy tōø xquia'a
 cudiuunā nébiōch nhane'emiän,
 jaduħn māwīnāts je'e nebiā jāya'ay
 ca'a jajpān. Jiibiā tōjcy quiojy
 tsabiu'ujooty. ²⁷Mänit com tiuuyy.
 Mänitā mōjnøø quiomgādaacy.
 Mänitā tōjc miōjpojpejty mōc.
 Mänit piuumy.

²⁸Mänitā Jesús miādiaacpādøøyy.
 Mänitā jāya'ayhajxy yagjuøøyy
 nebiaty ja'a Jesús hānajty
 tōø yajnāhixø'øy. ²⁹Jaduħn
 hānajty yajnāhixø'øy nebiā
 mōjcuhdujtmøødpān. Ja'a cu'ug
 wyiindsønħajxy, cab hajxy hānajty
 jiaty jaty.

8 Tunguhduum ja'a Jesús
 hānajty tōø yajnāhixø'øy.
 Mänit miānajnā. Mänit
 majiāya'ay piadu'ubōjcy. ²Mänit
 pa'amjāya'ay Jesús nāmejch.
 Haxøøgpa'am hānajty miøød.
 Mänitā Jesús wyiinjičādaacy,
 wyiingudsāhgøøyyā. Mänit
 nāmaayyā:

—Wiindsøn, pø chojpy ja'a
 mjoot jaduħn, hōyhōch jaduħn
 xyajnāhwa'ads xyajcuhwā'adsät.

³Mänitā Jesús ja'a māhdiojcy
 nāhdooñ. Mänit nāmaayy:

—Chōjpiōch ja'a njoot jaduħn; tōø
 jaduħn mnāhwa'ačh mguhwa'ačh.

Mänitiā ja'a māhdiojcy jiaančh
 nāhwaach jiaančh cuhwaach.

⁴Mänitā Jesús miānaañ:

—Huuc māadow, ca'a pøn
 mnā'ägädā hawaanā. Nōcxy
 jim Jerusalén maa ja'a teediän.
 Jim myajcāhxø'øgät coo tōø

mnāhwa'ačh coo tōø mguhwa'ačh.
 Jimā xādø'ōñ mguyoxø'owät nebiā
 Moisés jecy yhanehmiän. Jaduħnā
 hijxtahnd myajcāhxø'øgät coo tōø
 mnāhwa'ačh coo tōø mguhwa'ačh.

⁵Mänitā Jesús miejch maa ja'a
 cajpt hānajty xiøhatiän Capernaum.
 Coo quiajptägøøyy, mänit ja'a Jesús
 ja'a soldadowiindsøn nāmejch.

⁶Mänit Jesús nāmaayyā:
 —Jimhōch ja'a nmoonsā tu'ug
 quio'na'ay tøgooty. Tōø ja'a tiecy
 miucy. Hanaxiā jaduħn chaächpøcy
 tehngajnā.

⁷Mänitā Jesús miānaañ:
 —Nōcxy nhuuc yaghoyø'øy.

⁸Mänitā soldadowiindsøn
 yhadsooyy:

—Pero Wiindsøn, cab jaduħn
 yhahixø'øy coo mičh jiiiby
 mdägø'owät maačh ndøgootiän,
 je'leguiōxpā coo mičh mmōjjā
 mjaančhā. Nāgooyyā mičh jaduħn
 mmānā'anät coočh nmoonsā
 yhoyø'owät, pues hoyø'owäp.

⁹Hané'emyhōch nhity; jimhōch
 nwiindsønba, y jimhōch nsoldado.
 Coočhā nsoldado tu'ug nnāmā'awät
 coo homiaajā nōcxät, nōcxäp
 jaduħn; y coočh nnāmā'awät coo
 myñät, minäp jaduħn. Y coočhā
 nmoonsā waamb nnāmā'awät,
 quidiúñäp jaduħn.

¹⁰Mänitā Jesús jiaančh tehñ
 yagjuøøyy. Mänit nāmaayy ja'a
 hajxy hānajty pawädijpā:

—Cábøčhā nmāgunaaxhajxy
 jaduħn miäböcy neby yø'ø craa
 miäböquiän, y jāguem yø'ø chooñ.
 Tøyhajt jaduħn. ¹¹Coo ja'a Dios ja'a
 miājaa hānajty yajcāhxø'øga'añ,
 mänit hajxy hānajty nāmay
 miedsa'añ, ja'a hajxy hānajty

mäbøjpä. Wiinduhmyhagajpt hajxy hänäjty choona'añ. Mänit hajxy hänäjty miøødhida'añijäm ja'a Abraham møødä Isaac møødä Jacob. ¹²Pero ja'a judiøshajxy ca'a mäbøjpä, cab hajxy hänäjty jim quiooda'añ Dioswiinduum. Jiiby hajxy jaduñ quiuhjuipnaxa'añii møjcu'uhaam maa yhagoodsän. Jiiby hajxy jaduñ chaaçhpøga'añ tehngajnä.

¹³Mänitä Jesús ja'a soldadowiindsøn ñämaayy:
—Nøcx maa ja'a mdøjcän. Tøø jaduñ mmäböcy, tøø ja'a mmoonsä jaduñ yhojø'øy.

Mänitä ja'a mioonsä jiaançh hoyøøyy.

¹⁴Mänitä Jesús ñøcxy maa ja'a Pedro tiøjcän. Jiibiä Pedro miøødhoc hänäjty quio'na'ay tomiøød. ¹⁵Mänitä Jesús ja'a tajiäya'ay ja'a quiø'ø ñahdoonä. Mänitä tiøy tiøjch. Mänitä tajiäya'ay piäðø'cy. Mänitä tiägøøyy mayhajtuumbä ja'a Jesuscøxpä.

¹⁶Coo quioodsøøyy, mänitä pa'amjäya'ayhajxy may yajmejtsä maa ja'a Jesúsän. Tøø hajxy hänäjty näje'e miächii ja'a møjcü'ujäm. Mänitä Jesús quiapxy. Manityä hajxy yhøxmajtsä ja'a møjcü'ujäm. Jaduñä pa'amjäya'ayhajxy quiøxy yajmøcpøjcä; ja'a Jesús jaduñ yajmøcpøjc. ¹⁷Tøjajt ja'a Diosmädia'agy jaduñ maa jaduñ myiñän cujaay, mänaa ja'a Isaías jecy miäna'añän: “Jaaya'ay ja'a nba'amhájtäm tøø xyajñähwáatsäm tøø xyajchuwáatsäm.” Ja'a Isaías, je'eds ja'a Diosmädia'agy jaduñ jecy yajwa'x.

¹⁸Coo ja'a Jesús yhiyx coo hänäjty cuje tøø piäda'agyii ja'a majiäya'ay, mänit miänaañ coo hajxy ñäxät mejyhawiimb møødä jiamioødhajxy. ¹⁹Cajnä hajxy hänäjty tiu'ubøcyñä, mänitä Jesús jäya'ay tu'ug ñämejtsä. Yajñähixøøby hänäjty je'ebä maa ja'a tsajtøjcän. Mänitä Jesús ñämaayyä:

—Wiindsøn, miñ nhuuc jamiøødhaty. Homiaajä mnøcxät, quipxy nbawädítät.

²⁰Mänitä Jesús yhadsooyy:
—Ja'a xøøgaa, jimä jiut je'e; ja'a muuxy, jimä pie'eñ je'e; pero høøch, ja'a Diosquexypä, cáböch ndøjc maaçh nboo'x nhäñá'awät.

²¹Mänitä Jesús ja'a jiamioøød tu'ug miänaañ:

—Wiindsøn, mänitøch miiçh nbadu'ubøga'añ cooçhä ndeedy hänäjty tøø yho'nä, cooçh hänäjty tøø nyajnaaxtägøøñä.

²²Mänitä Jesús yhadsooyy:
—Ween ja'a mjujy ja'a mmägu'ughajxy yajnaaxtägø'øy. Cáböch ja'a nmädia'agy hajxy xpianøcxaañä. Pero miich, ween quipxy nwädíjtäm.

²³Mänitä Jesús hajxy tiägøøyy barcojooty møødä jiamioødhajxy. Tiu'ubøjnä hajxy barcojooty.

²⁴Mänitä poj møc piäðø'cy, høxtä cugujjøøyy ja'a nøø jiiby barcojooty. Pero tøø ja'a Jesús hänäjty miaaho'nä. ²⁵Mänit hoy yuxyíjäm ja'a miägu'ughajpä tu'ug. Mänit ñämaayyä:

—Wiindsøn, højts yajñähwáatsäc. Cham højts nnøøho'ogø'øwa'añ.

²⁶Mänitä Jesús yhadsooyy:

—Tii hajxy coo mwi'i chähgø'øy. Cábøch mijts ja'a nmädia'agy hajxy jaduñ xñä'ä mäbøjcä, paady hajxy mdsähgø'øy.

Mänit piädø'cy. Mänitä poj jiøjcunäma'awøøyy møødä mejy coo quia'a mínnät. Mänit jaduñ yuungøøyy. Caj nã'ägädä pojnä.

²⁷Mänitä miägu'ughajpähajxy yagjuøøyy. Mänit hajxy nĩñämaayyä:

—Nebiäda'a jaduñ coo miädia'agy miäbøjcäxä høxtä ja'a poj møødä mejy.

²⁸Mänitä Jesúshajxy jim miejch mejyhawiimb maa ja'a naax hänajty xiøhatiän Gadara. Jimä cabäsantä hänajty tu'ug. Mänitä Jesús jäya'ay nämetsc nãmejtsä. Jim hajxy hänajty tøø choon maa ja'a cabäsantän. Tøø hajxy hänajty miächii ja'a mõjcu'ujäm. Jaançh tehñ quia'awiindøyy hajxy hänajty nibiäda'agyii. Ni pøn hajxy hänajty quia'a yajnaxa'añ maa ja'a tu'ujän. ²⁹Mänitä Jesús tiägøøyy wiinguyaaxøøyyäbä:

—Jesús, tii højts xwia'ana'añ, miich Dioshuung. Cajnä yhabaady coo højts xyajcumädówät.

Ja'a mõjcu'uhajxy jaduñ mänaan, ca'a jäya'ayä.

³⁰Jim mayhädsøm hänajty wiädity tunwiinmänac jäguemjuøøby. ³¹Mänitä Jesús miänuu'xtaacä ja'a mõjcu'uhajxy:

—Pø xyajpäsømaamb højts yaa maa hädaa jäya'ayän nämetscä, na'añ højts jiiby nhuuc tægø'øy maa yø'ø hädsøm jiodootyhajxiän.

³²Mänitä Jesús miänaañ:

—Nøcx hajxy jiiby tægø'øw.

Mänitä mõjcu'uhajxy nãhwaach ja'a jäya'ay nämetspä. Mänitä

hädsøm hajxy nãmejch. Cøjx ja'a hädsømhajxy wyiinmänacpäyø'øgy. Cøjx hajxy quiuhcahnaxy naaxøjpcøxp. Mejjiooty hajxy hoy quiuga'awø'øy. Cøjx hajxy jiiby yho'ogy mejjiooty.

³³Mänitä

hädsøm güeendähajpähajxy chähgø'øbäyø'cy. Coo hajxy jim miejch maa ja'a cajptän, mänit hajxy miädiaacy nebiaty hajxy hänajty tøø yhixy, coo ja'a mõjcu'uhajxy hänajty tøø nãhwa'açh ja'a jäya'ay nämetspä.

³⁴Cøjx ja'a cu'ughajxy nøcxy päyø'øguiä maa ja'a Jesúsän. Coo ja'a Jesús hajxy piaaty, mänit hajxy miänuu'xtaacy coo ja'a Jesús jim choonät maa ja'a nãaxhajxiän.

9 Mänitä Jesúshajxy tiägøøguiumbä barcojooty, najxtägajch hajxy jadähooc mejyhawiimb maa ja'a quiajpthajxiän. ²Mänitä tecymiucypliä tu'ug quiøømiejtsä tsaajiooty maa ja'a Jesúsän. Ja'a mähdiøjc ja'a miägu'ughajpähajxy jaduñ cøømiejtsä. Coo ja'a Jesús yhixy coo hajxy hänajty miäböcy, mänitä Jesús ja'a mähdiøjc nãmaayy: —Huung, jootcugø'øw; tøø ja'a mbojpä mgädieey xñähwa'açh.

³Jimä ley-yajnahixøøbiädøjc hänajty näje'e tiäna'ay ja'a Jesús nãhmøjc. Coo hajxy jaduñ miädooyy nebiä Jesús miänaañän, mänit hajxy näje'e quiopcooty tiägøøyy mädiaacpä: “Capxtägooby hädaa craa jaduñ maa ja'a Dioscøxpän.” ⁴Najuøøby ja'a Jesús hänajty neby hajxy hänajty miädia'aguiän quiopcooty. Mänit miänaañ:

—Tii haxøøgwiinmahñdy hajxy
 coo mmøødhaty mgopcooty.
⁵Mädyii mädia'agy maas tsip,
 cooch hädaa mähdiojc nnämä'awät:
 “Tøø ja'a mbojpa mgädieey
 xñähwa'açh”, tøgå maas tsip jaduhñ
 cooch nnämä'awät: “Tänaayyø'og,
 yo'oyø'og.” ⁶Nyajcähxø'ogáambiöch
 coochä cuhdujt jaduhñ nmøødä
 hädaa yaabä naaxwiin coochä
 pojpa cädieey nyajñähwá'adsät,
 høøch ja'a Diosquexypä.

Mänitä Jesús ja'a tecymiucypiä
 ñämaayy:

—Tänaayyø'og, widsø'og yø'ø
 mdsaa, nøcxnä maa ja'a mdøjcän.

⁷Mänitä tecymiucypiä
 tiänaayyø'cy. Mänit ñøcxnä maa
 ja'a tiøjcän. ⁸Coo ja'a cu'ughajxy
 jaduhñ yhiixy coo ja'a tecymiucypiä
 tøø yhoø'øy, mänit hajxy
 chähgøøbiøjcy. Mänitä Dios hajxy
 wyingudsähgøøyy, je'eguiøxpä
 coo ja'a Jesús ja'a mäjaa hñajty
 tøø mio'oyii, ja'a Diosquexypä.
 Cab hajxy hñajty ñajuø'oy pø
 Dioshuung hñajty je'e, ja'a Jesús.

⁹Mänitä Jesús jim choñ.
 Mänitä jäya'ay tu'ug yhiixy, ja'a
 xøhajpa Mateo. Jimä Mateo
 hñajty yhäña'ay maa hñajty
 yajñähjuudiu'udiän. Mänitä Mateo
 ñämaayyä:

—Jam quipxy wädijtäm.

Mänitä Mateo tiänaayyø'cy. Mänit
 ja'a Jesús piadu'ubøjcy.

¹⁰Jimä Jesús hñajty quiaiy
 tøgooty møødä miägu'ughajpähajxy.
 Mänitä yajñähjuudiu'upähajxy
 may miejch mägaabiä, møødä
 jäya'ayhajxy ca'a panøcxpä ja'a
 judíos quiuhdujt. Mänitä Jesús
 hajxy tiägøøyy møødcaabiä. ¹¹Jimä

fariseoshajxy hñajtypä, ja'a hajxy
 hñajty hoy jaançh tehñ pianøcxpä
 ja'a Moisés miädia'agy. Mänitä
 fariseoshajxy miänaañ:

—Tii yø'ø mwiindsøn
 coo miøødcay ja'a
 yajñähjuudiu'upähajxy møødä
 cubojpä cugädieeyhajxy —nomä
 Jesús miägu'ughajpähajxy
 ñämaayyä.

¹²⁻¹³Miädoow ja'a Jesús jaduhñ.
 Mänit miänaañ:

—Pøn jaduhñ møc, caj
 yajtsooyø'oy; pøn jaduhñ
 pa'ammøød, je'eds jaduhñ
 yajtsooyøøby. Jaduhñ mäwiiñøch
 høøch nebiä mädsøoyøøbiän.
 Páadyhöch yaa tøø nmiñ tøø
 nmech, nébiøch ja'a cubojpä
 cugädieeybähajxy nnämä'awät
 coo ja'a yhaxøøgwiinmahñdy
 hajxy ween ñajtshixø'oy. Ja'a
 hojiäya'ayhajxy, cáböch hajxy
 je'e waamb nnäma'awa'añ. Nøcx
 hajxy habøc tii ja'a Diosmädia'agy
 jaduhñ ñänøømby: “Chójpjøch ja'a
 njoot jaduhñ coo hojiot hajxy
 mmøødhädät; cáböch jaduhñ
 nmänaannä coo animal hajxy
 myóxät maa ja'a høøchcøxpän.”

¹⁴Mänitä Jesús ñämejtsä ja'a Juan
 mäyajnäbejpa miägu'ughajpähajxy.
 Mänitä Jesús miäyajtøwä:

—Tii miich mmägu'ughajpähajxy
 jaguiay quia'a nä'ägädä hida'añ.
 Naxy højts jaguiay tu'xøøjaty nhity
 tähoocjaty; jaduhñ højts ja'a Dios
 nwiingudsähgø'oy. Jaanä jaduhñä
 fariseoshajxy yhiijpa jaguiay.

¹⁵Mänitä Jesús yhadsooyy:
 —Coo ja'a jäya'ayhajxy mänaa
 piøcy yhu'ugy, cabä woyba wichpä
 hajxy jiø'oy xiuuçh. Xoonäacp

hajxy jaduhñ, je'eguiøxpä coo ja'a jamiø'ød jyijä. Jaduhñ mäwfinøch høøch nebiä jamiø'ødän. Páadyhøch nmägu'ughajpähajxy jaguiay quia'a hity. Habaadaamb jaduhñ cooçh yaa ndsoonaanñä; mänit hajxy mäbøcypiä jaguiay yhida'añ.

¹⁶Cab jaduhñ pøn tucwit yhagøyyø'y jemwyithaam. Múgäp ja'a jemwyit jaduhñ y maas hanaxiä ja'a tucwit jaduhñ quiøødsät. ¹⁷Jaanä jaduhñduhmbä, cabä pøn jemvyino quiuDEMø'ø'y tucwajhacxujiooty. Cøødsäp ja'a wajhacxuy jaduhñ y høxyógäp ja'a vino jaduhñ. Haagä tågóyyäp ja'a wajhacxuy jaduhñ møødä vino. Pero jiibiä jemvyino hajxy quiuDEMø'ø'y maa ja'a wajhacxuy jembyiän. Jaduhñ ni mädyii quia'a tågóyyät.

¹⁸Cajnä ja'a Jesús hänajty miädiaacpäDø'ø'y, mänitä tsajtøjcwiiindsøn tu'ug miejch. Mänitä Jesús wyiingo'naaguiädaacä. Mänit nämaayyä:

—Naamhó'ogyhøchä nhuung ja'a to'oxypä. Coo miich nøcxy mnähdoñ, mänit jiuypiojtägätsät.

¹⁹Mänitä Jesús piäDø'cy. Mänit jaaya'ay miøødtu'ubøjcy møødä Jesús miägu'ughajpähajxy. ²⁰⁻²¹Jimä tadjäya'ay hänajty tu'ug høxhaam pianøcxy. Pa'ammøøD hänajty je'e. Majmetscjumøjt ja'a ñø'ty hänajty tøø wyi'i xie'e'xy, weenjaty weenjaty. Jaduhñä tadjäya'ay hänajty miädia'agy quioPCooty: “Nägóoyyøch ja'a wyitpa'a nnähdóonät, mänitøch nmøcpøgät.” Coo ja'a Jesús ja'a tadjäya'ay jäguyohdiägøøyyä, mänitä wyitpa'a nähdoñäxä.

²²Mänitä Jesús yhee'pwiimbijty, Mänit ja'a tadjäya'ay yhijxy. Mänit miänaañ:

—Huung, jootcugø'øw; tøø jaduhñ mmøcpøcy, je'eguiøxpä coo tøø mmäbøcy.

Mänitiä ja'a tadjäya'ay miøcpøjcy.

²³Mänitä Jesús hajxy jim miejch maa ja'a tsajtøjcwiiindsøn tiøjcän. Jiibiä xuuxpäDøjch-hajxy hänajty yho'ogyjäya'awyyinxu'uxy. Jiibiä jäya'ayhajxy hänajty wyi'i yhaamhaty. ²⁴Mänitä Jesús miänaañ:

—Pädsøm hajxy jiiby. Cab yø'ø tøø yho'ogy, nä'ä maab yø'øduhñ.

Mänitä Jesús näxiicä. ²⁵Cøjx hajxy jaduhñ piädsømy. Mänitä Jesús tiøjtägøøyy. Mänitä to'oxyhäna'c quiøømajch. Mänitä to'oxyhäna'c yhänaayyø'cy. ²⁶Mänitä mädia'agy wiädipty wiinduhmyhagajpt coo ja'a to'oxyhäna'c tøø yagjuypiogyii.

²⁷Coo ja'a Jesús hajxy jim choññ, mänitä wiindshajxy nämetsc piadu'ubøjcy yáaxäp:

—Højts näxúu'tsac. David miich hijty mhaphajpy mdeedyhajpy.

²⁸Coo ja'a Jesús tiøjtägøøyy, mänitä wiindshajxy miäwiingooñ. Mänitä Jesús miänaañ:

—Nej, mmäbøjpy hajxy jaduhñä cooçhä mäjaa nmøødä coo hajxy nyaghixø'øgädä.

Mänit hajxy miänaañ:

—Wiindsøn, nmäbøjpy højts.

²⁹Mänitä Jesús ja'a wiinds wyiinhajxy nähdoonä. Mänitä Jesús miänaañ:

—Ween hajxy mhixø'øgy coo hajxy tøø mmäbøcy.

³⁰Mänit hajxy yhixø'cy. Mänitä Jesús miänaañ:

—Ca'a pøn hajxy mnä'ägädä hawaanä.

³¹Coo ja'a wiindshajxy jim chohñ, mänit hajxy tiägøøyy mädia'agy-yajwädijpä coo hajxy tøø yaghijxø'ogyii ja'a Jesúsäm.

³²Mänitä huum tu'ug yajmejtsä maa ja'a Jesúsän. Tøø hänajty miächii ja'a møjcü'ujäm. ³³Mänitä Jesús ja'a møjcu'u jiiby yajpäyø'cy. Mänitä ja'a huum quiapxø'cy. Yagjuøøyy ja'a jäya'ayhajxy jaduñ. Mänit hajxy miänaañ:

—Ni mänaa jaduñ pøn tii quia'a yagjadyii nebiä hädaajän yaa Israelnaaxooty.

³⁴Mänitä fariseoshajxy miänaañ: —Paady yø'øya'ay ja'a møjcu'u yajpäyø'ogy, coo ja'a møjcu'ugong miäjaa miøødhajtä.

³⁵Cøjx ja'a Jesús wiädity wiinduhmyhagajpt. Homiaajä hänajty wiädity, jiiby hänajty yajnähixø'øy tsajtøgooty coo ja'a Dios ja'a miäjaa mobädajp yajcähxø'øga'añ. Yajnajxyp hänajty homiädyii pa'amä. ³⁶Näxuu'chp ja'a Jesús ja'a majiäya'ay hänajty. Jaduñ mäwíinäts hajxy hänajty nebiä meegän, ja'a cajpä wyiindsøn. Nebiä tægowiädijpä hajxy hänajty je'e. Nebiä jootmayhajpä hajxy hänajty je'e. ³⁷Mänitä Jesús ñämaayy ja'a miägu'ughajpähajxy:

—Yø'ø majiäya'ayhajxy, hoy jaduñ coochä nmädia'agy hajxy xmiäböjcat. Pero cab højts nnämáyyäm, højts ja'a mädia'agy nyajwá'xämbä.

³⁸Mänuu'xta'ag ja'a Dios hajxy coo ween ja'a mägu'ughajpä hajxy xjiaac móooyämät, neby højts ja'a mädia'agy hajxy xmiøodyajwá'xämät.

10 Mänitä Jesús ja'a miägu'ughajpä miøjyaaxy ja'a nämajmetspä. Mänitä cuhdujt miooyy coo ja'a møjcu'u hajxy yajpäyø'øgät, coo homiädyii pa'amä hajxy yajnáxät.

²Jaduñä nämajmetspähajxy hänajty xiøhaty: Simón Pedro møødä piuhya'ay Andrés; ja'a Zebedeo yhuunghajxy, Jacobo møødä Juan; ³Felipe; Bartolomé; Tomás; Mateo ja'a yajnähuudiutpä; Jacobo, ja'a Alfeo yhuung; Lebeo Tadeo; ⁴Simón ja'a cananista; Judas Iscariote, ja'a Jesús hänajty yajyagho'ogáanäbä.

⁵Mänitä Jesús ja'a nämajmetspähajxy quiejxy mädia'agy-yajwa'xpä. Mänit ñämaayy:

—Ca'a hajxy jim mnøcxy maa ja'a ca'a judiøshajxy chäna'ayän, y ca'a hajxy jim mnøcxy Samarianaaxooty. Yaayyä hajxy jaduñ mwädítät, yaa Israelnaaxooty. ⁶Ja'a jäya'ayhajxy yaabä, jaduñ mäwíinäts hajxy je'e nebiä meeg tægowiädijpä. ⁷Mnägäpxäp hajxy jaduñ coo ja'a Dios ja'a miäjaa mobädajp yajcähxø'øga'añ. ⁸Myajnáxäp hajxy homiädyii pa'amä møødä haxøøgpa'am. Myagjujypiøgäp ja'a ho'ogyjiäya'ay hajxy. Myajpäyø'øgäp ja'a møjcu'u hajxy. Nnä'a móobiøch mijts hädaa cuhdujt; cábøch mijts nyagjuya'añ; jaduñ mijtspä, cab hajxy myagjúubiät.

⁹Cabä xädø'øñ hajxy mgónät ni weentiä. ¹⁰Cabä morral hajxy mwídsät. Tu'uquiä camiixy hajxy mwídsät. Cabä cø'øg hajxy mejtstehng mmänøcxät. Cabä

cuhdajt hajxy mgábät. Jim hajxy mmägaya'añ mmähu'uga'añ maa hajxy hänäjty mhamejststa'aga'añän.

¹¹Coo hajxy maa mgajptägó'owät, jimä jäya'ay hajxy mhøxtá'awät ja'a hojiootmøødpä; jim hajxy mhamejststá'agät. Jiiby hajxy mhídät høxtä coonä hajxy hänäjty mdu'ubøga'añ. ¹²Coo hajxy mdøjtägó'owät, mänit hajxy myajpó'xät. ¹³Coo hajxy jaduhñ xyajtøjtägó'owät hamuumdu'joot, mänit hajxy jaduhñ quiunuu'xóøjät ja'a Diósäm; pø caj, cab hajxy jaduhñ quiunuu'xóøjät. ¹⁴Coo hajxy jaduhñ xquia'a nä'ägä jøjpøgó'owät, coo ja'a mmädia'agyhajxy xquia'a nä'ägä mädóowät, mänit hajxy jim mdsóonät. Mänitä mdecy hajxy mwiinwop mwiinxídät, nebiä hijxtahñd jaduhñ miähmó'owät coo mijts jaduhñ tøø xquia'a yajtøjtägó'ø. ¹⁵Tøyhájtäts mijts nnäma'ay, coo yhabáadät coo ja'a jäya'ayhajxy quiumädowa'añ, maas hanaxiä yøø cajpt jaduhñ quiumädowa'añ quejee ja'a Sodomacajpt møødá Gomorracajpt.

¹⁶Maäch mijts nwiinguexiän, haxøøgwiinmahñdy ja'a jäya'ayhajxy jim miøød. Paady hajxy nähix hahixøø mnibiäda'agóøjät. Mee'xxieemy hajxy jaduhñ mwädítät.

¹⁷Mniyajcopcø'owøøjap mijts. Xyajcø'ødägó'owäp mijts maa ja'a tuungmøødpän. Mänitäts hajxy xwyiinwop xjiøjwóbät maa ja'a chajtøgootyhajxiän. ¹⁸Høxtä jim hajxy xyajmedsa'añ maa ja'a gobiernä wyiinduumhajxiän, møød jim maa ja'a ca'a judíos wyiinduumhajxiän. ¹⁹Pero coo

hajxy jaduhñ xyajmédsät maa ja'a wyiinduumhajxiän, cab hajxy mdaj mmáyät waambaty hajxy hänäjty mmädia'aga'añ. Coo jaduhñ yhabáadät, mänitä Dios jaduhñ xyhawáanät waambaty hajxy jaduhñ mmäná'anät. ²⁰Cab hajxy hamdsoo mmädia'aga'añ. Dioshespírituhaam hajxy jaduhñ mmädia'aga'añ.

²¹Haxøøg jaduhñ jiaada'añii. Hamdsoo hajxy ñiñahanuu'xø'owa'añii ja'a tu'que'expä-jäya'ay. Jaduhñ ja'a tieedyhajxy jiatcø'owaambä møødá yhuunghajxy. ²²Ja'a høøchcøxpä mijts ja'a jäya'ayhajxy nägøxiä xmiähanhada'añ. Pøn jaduhñ mee'xtujp cøjxta'axiøø, je'leds jaduhñ mähmø'owaamb hodiium. ²³Coo mijts hajxy xchaaçhtiünät mädu'ughagajpt, mänit hajxy mbäyø'ogät, mänit hajxy mnócxät wiingtuum. Tøyhájtäts mijts nnäma'ay, cooçh hänäjty ngäda'aga'añ, høøch ja'a Diosquexypä, cahnä cajpt hajxy hänäjty mwiinwädityñä maa ja'a judíoshajxy chäna'ayän.

²⁴Cabä pøn jaduhñ jiaty nebiä wyiindsón jiatian. ²⁵Coo hajxy jaduhñ mjädät nebiä mwiindsøn hajxy jiatian, jootcujc hajxy jaduhñ mhídät. Cooçhä jäya'ayhajxy jaduhñ tøø xñäma'ay: "Møjcu'u", jaduhñ mijts hajxy xñäma'awaambä.

²⁶Cabä cu'ug hajxy mdsähgó'owät. Nebiaty hajxy jaduhñ jiatcø'øy hamee'ch, cähxø'øgaamb jaduhñ. ²⁷Waambátyhøch mijts hamee'chhaam nnajtscapxøøyyäm,

majiäya'ayhagujc hajxy myajcapxó'owät. ²⁸Cab hajxy mdsähgó'owät pøn ja'a mnaaxni'x hajxy xyaghó'cäp; cabä mháañämä hajxy jaduhñ xyaghó'cät. Ja'a Dios hajxy mdsähgó'owäp; je'edsä cuhdujt jaduhñ mөөd coo hajxy jiiby xquiéxät haxөөgtuum. Jiiby ja'a mnaaxni'xhajxy quiuhdägóyyät mөөdä mháañämähajxy.

²⁹Ja'a muuxyhuunghajxy, coo hajxy quia'ay, yhiixyp ja'a nDeedyhájtämhajxy jaduhñ, hoy hajxy quia'a ja tsowä. ³⁰Jaanaä jaduhñ mijts xyhiixpä, hөxtä xñajuóyyäp mijts naag mijts mguhwaay. ³¹Cabä jäya'ay hajxy mdsähgó'owät; hix, mmaas tsoobaatp mijts quejee ja'a muuxyhajxy.

³²Pönjátyhöch ja'a nmädia'agy xmiөdyajtu'ugөөby maa ja'a cu'ugwiinduumän, mänitөch ja'a miädia'agyhajxy nmөodyajtu'ugө'owaambä maaächä nDeedy wyiinduumän jim tsajpootyp. ³³Pero pönjátyhöch jaduhñ tu'ugmädia'agy tөө xquia'a mөөdhity maa ja'a cu'ugwiinduumän, ni hөөch jaduhñ tu'ugmädia'agy nga'a mөөdhidaambä maaächä nDeedy wyiinduumän jim tsajpootyp.

³⁴Cooch yaa tөө ngäda'agy, paadiä jäya'ayhajxy jaduhñ ñimiädsibө'owa'añii ja'a hөөch nmädia'agyquioxpä. Cab hajxy jootujc yhida'añ. ³⁵⁻³⁶Tu'tөjc hajxy jaduhñ ñimiädsibө'owa'añii, mөөdä tiaj mөөdä tieedy, mөөdä ñөөx mөөdä miajc, mөөdä jiaxie'eb mөөdä xiocy.

³⁷Pönä tiaj pönä tieedy maas tsojp quejeech hөөch jaduhñ

xchocy, cábөch ja'a nmädia'agy hoy xpianөcxät. Y pönä ñөөx pönä miajc maas tsojp quejeech hөөch jaduhñ xchocy, ni je'eч ja'a nmädia'agy hoy xquia'a panөcxäbät. ³⁸Pönä jioot tsojp cooch hөөch xpianөcxät, pero cabä jioot jaduhñ chocy coo chaächpөгät nébiөch jaduhñ ndsaaчpөгa'añän, cábөch nmädia'agy jaduhñ hoy xpianөcxät. ³⁹Pönä jiugyhajt jaduhñ ja wi'i yaghoyө'owaamb, tägöyyäp ja'a jiugyhajt jaduhñ. Pero pönä jiugyhajt najtshixө'owaamb ja'a hөөchcxpä, je'eds hodiium nөcxaamb.

⁴⁰Pөн mijts jaduhñ xchojp, jaduhñ mäwiinөch hөөch xchojpä. Y pөнhöch hөөch jaduhñ xchojp, jaduhñ mäwiinädsä Dios jaduhñ chojpä, ja'aäch tөө xquiéxiäbä.

⁴¹Ja'a Diosquexyhajxy, hodiium hajxy ñөcxa'añ. Jaanaä jim hajxy ñөcxaambä pөн jaduhñ tsojp ja'a Diosquexy. Paady hajxy chogyii coo hajxy jaduhñ Dyiosquexiä. Jaanaä jim hajxy ñөcxaambä hodiium pөн jaduhñ tsojp ja'a hojiäya'ay. ⁴²Coo hädaa häyoobäya'ay төchñөө ñälä mo'owөөjät je'eguiөxpä cooch jaduhñ xpianөcxy, mänit jaaya'ay piäda'agөөjät hodiium, ja'a nөө tөө yéquiäbä. Tehm tiөyhajt jaduhñ.

11 Coo ja'a Jesús ja'a jiamiөdhajxy yajwiingapxөөbiädөөyy, mänit jim chohñ. Mänit tiägөөyy yajnähiхөөbiä maa ja'a cajtp mäwiingonän.

²Ja'a Juan, tsumyhäñaaby hänajty je'e. Coo miädoyhajty coo ja'a Cristo hänajty wiädity yajnähiхөөbiä, mänitä

miägu'ughajpä metsc quiejxy maa ja'a Jesúsän. ³Mänitä Jesús hajxy miäyajtøoyy:

—Nej, miich ja'a Crístojä, ja'a Dios jaduhñ quiexaambä, tøgä wiinghäna'c je'ejä.

⁴Mänitä Jesús yhadsooyy:

—Nøcx ja'a Juan hajxy hawaanä neby hajxy xii mhix mmädooy.

⁵Nøcx hajxy yajmøødmädia'ag coo ja'a wiindshajxy tøø yhiyxø'ogy, coo ja'a tecymia'adpähajxy tøø yo'oyø'ogy, coo ja'a haxøøgpa'ammøødpähajxy tøø ñähwa'aäch, coo ja'a cuhnatpähajxy tøø miädoowø'ogy, coo ja'a ho'ogyjäya'ayhajxy tøø jiuypioçy, coo ja'a häyoobäya'ayhajxy tøø yajmøødmädia'agyii ja'a Diosmädia'agy. ⁶Jootcuç hajxy jaduhñ yhity ja'aäch nmädia'agy hajxy hamuumdu'joot tøø xmiäbøjcäbä.

⁷Coo ja'a Juan

miägu'ughajpähajxy wyiimbijty, mänitä Jesús ja'a cu'ug tiägøoyy møødmädiaacpä ja'a Juancøxpä.

—Coo hajxy tøø mhoy pactuum, ja'a Juan miädia'agy hajxy hänajty mmädowáanäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tøø mhoy coo ja'a Juan ja'a miädia'agy hajxy hänajty mmädowaanä. ⁸⁻⁹Diosquexy je'e, paadiä miädia'agy hajxy hoy tøø mmädoowä, hoy ja'a howyit hänajty quia'a ja møødä nebiä mäyøøjäya'ayhajxy miøødän. Tøyhajt jaduhñ coo ja'a Juan ja'a Diosmädia'agy yajwiingapxø'ø. Pero ja'a Diosmädia'agy hajxy nä'ä jaac yajnähixøøbiä, je'edsä

cuhdujt hajxy maas may tøø mio'oyii ja'a Diósäm. ¹⁰Ja'a Diosmädia'agy jecy mädiáacäbä, Juan je'e. Nømä Dios jecy miánaañ coo ja'a quiuguexy hänajty jayøjp quiexa'añ maa ja'a cu'ugän, ween yajwiinxiic yajwiingapxø'ø coo ja'a yhaxøøgcuhdujt hajxy ñajtshixø'owät. Høxháamhøch hänajty ngäda'aga'añ. Jayøjp ja'a Juan jiaançh quejxä; høxháamhøch njaançh cädaacy. ¹¹Ni pøn jaduhñ jäda'ahaty quia'a mäbaady hädaa yaabä naaxwiin nebiä Juan mäyajnabejpä ja'a cuhdujt miøødän. Tøyhajt jaduhñ. Pero cooçh hänajty tøø nho'nä, cooçh hänajty tøø nnøcxtägach maaçh nhuuc tsohmän, pønjaty ja'a Diosmädia'agy mäbøgaamb ja'a høøchcøxpä, maas mayyä cuhdujt hajxy hänajty miøødhada'añ quejee ja'a Juan miøødä, hoy ja'a møjcuhdujt hajxy hänajty quia'a ja møødä.

¹²'Coo ja'a Juan tiägøoyy mäyajnabejpä, høxtä je'enä jäda'anäbaadyñä, nägø'ø nädecypä ja'a jäya'ayhajxy jia wi'i tiägø'owa'añ maa ja'a Dios wyiinduumän. ¹³⁻¹⁴Ja'a Diosquexyhajxy jecypä, jaduhñ hajxy jecy miánaañ coo ja'a Dios ja'a miäjaa yajcähxø'oga'añ. Jaduhñä Moisés miädia'agy miánaambä. Pero jayøjpac ja'a Elías hijty myina'añ. Y coo ja'a Juan tøø miech, Elías je'e, pø mwiinjuø'owaamby hajxy jaduhñ. ¹⁵Pøn mädohnd møød, ween miädoy.

¹⁶Pänébioch jäya'ayhajxy nyajmäbáadät ja'a jäda'ahatypä.

Cab hajxy tii yhojiäwø'owa'añ. Jaduhñ mäwfiñäts hajxy je'e nebiä pigäna'c wiinhecpän. Coö hajxy naxy miech häyø'pä tøjpa'c, mänitä miäbigäna'c hajxy ñäma'ay: ¹⁷“Tøø højts nja xu'uxy, pero cab hajxy tøø mhech. Tøø højts hojiøøñä nja høy, pero cab hajxy tøø mjø'øy.” ¹⁸Coö ja'a Juan miejch, cab hänäjty quiaya'añ yhu'uga'añ. Mänit mijts mnänøømy coö je'e quiu'umañøøbiä. ¹⁹Mänitøch nbasejtspä, høøch ja'a Diosquexypä. Mänitøch ndägøøyy caabiä huucpä. Jaduhñhöch mijts xñänøømbä coöch nwi'i quiaya'añ coöch nwi'i yhu'uga'añ, coöchä cubojpä cugädieeybä nmägu'ughaty møødä yajñähjuudiutpädøjc. Pero yajcähxø'øgaamby ja'a Dios jaduhñ ja'a wyiinmahñdyhaam coöch ja'a tøyhajt jaduhñ nmøødä.

²⁰Mänitä Jesús tiägøøyy hamänajpä. Ja'a cajptjäya'ayhajxy jaduhñ hojjä, ja'a hajxy hänäjty tsänaabiä maa ja'a Jesús ja'a hoy-yagjuøøñäjatypä hänäjty tøø jia yajcähxø'øguiän. Paady jaduhñ yhamänajty, coö yhaxøøgwinnmahñdy hajxy hänäjty tøø quia'a najtshixø'øy. Mänitä Jesús miänaañ:

²¹—Haxøøg mijts mjada'añ mhabeta'añ, mijts yaa tsänaabiä Corazín møødä Betsaida. Ja'a jecyjäya'ayhajxy hijty jim tsänaabiä Tiro møødä Sidón, coö hajxy häxøpy tøø yhixy ja'a hoy-yagjuøøñäjatypä nej mijts tøø mja hixiän, tøø ja'a yhaxøøgwinnmahñdy hajxy häxøpy ñajtshixø'øy. ²²Tøyhajt jaduhñ, coö ja'a Dios yaghabáadät,

maas haxøøgtuum mijts jaduhñ xpiäda'aga'añ quejee ja'a jäya'ayhajxy jim jecy tsänäayyabä Tiro møødä Sidón. ²³Y mijts jim tsänaabiä Capernaum, mja wi'i yajcumayaamb hajxy jaduhñ. Pero cabä Dios hajxy jaduhñ xquiumaya'añ. Ja'a jecyjäya'ayhajxy hijty jim tsänaabiä Sodoma, coö ja'a hoy-yagjuøøñäjatypä hajxy häxøpy tøø yhixy nej mijts tøø mja hixiän, cab hajxy häxøpy tøø quiuhdägoy. ²⁴Tøyhajt jaduhñ, coö ja'a Dios yaghabáadät, maas haxøøgtuum mijts xpiäda'aga'añ quejee ja'a jäya'ayhajxy jim jecy tsänäayyabä Sodoma.

²⁵Mänitxøø ja'a Jesús miänaañ: —Teedy, miich nba'yaaxyp. Miich jim häñaaby tsajpootyp; miich yaa Dioshajp maa hädaa yaabä naaxwiinän. Dioscujú'uyäp coö ja'a tøyhajt tøø myajñähixø'øy ja'a hajxy tii ca'a jajpä. Caj tøø myajñähixø'øy ja'a hajxy tyijy jajpä. ²⁶Tøyhajt jaduhñ, Teedy, je'eguiøxpä coö miich mjoot jaduhñ chocy.

²⁷Mänitä Jesús miänángumbä: —Tøøchä nDeedy ja'a tøyhajt xquiøxy yajcø'ødägø'øy. Cábøch pøn xyhixyhaty, høøch ja'a Dioshuung. Tøyhajt jaduhñ. Jagóoyyøch nDeedy xyhixiä. Y cábøch ja'a nDeedy pøn xyhixyhajtä. Jagóoyyøch jaduhñ nhixiä, høøch ja'a Dioshuung. Nyajñähdíjábøch pønjätyhøch nDeedy hixyhádäp. ²⁸⁻³⁰Mijts, pøn jaduhñ ca'a mee'xtugaamb neby hajxy hijty mguhdujthatiän, høøch nguhdujt habøjcäc. Hojióthøch nmøød; cábøch nyajcumaya'añ. Mänitäts ja'a hoybä weenbä hajxy

mbaadät. Cábøch ja'a jemčhpä mapxypä jaduhñ nbäda'aga'añ.

12 Mänitxøø ja'a Jesúsahajxy hänajty wiädity trigoni'ibyquiuyc poo'xxiøøjooty. Yähó'cäp ja'a Jesús jiamiøødhajxy hänajty. Mänit hajxy tiägøøyy trigotøjpä. ²Coo ja'a fariseoshajxy jaduhñ yhjy, mänitä Jesús hajxy ñämaayy:

—Huug hiḡ, xiidsä

mmägu'ughajpä trigo hajxy wyi'i tiøjy. Cabä cuhdujt jaduhñ myiñ coo hajxy tii ndúunämät ja'a poo'xxiøøjooty.

³Mänitä Jesús miänaañ:

—Nej, cahnä ja'a Diosmädia'agy hajxy mgapxiä. Jim jaduhñ myiñ cujaay coo ja'a Davidhajxy yäho'pøjcä. ⁴Mänit hajxy tiägøøyy Diostøgooty. Mänitä Diostajcaagy hajxy quiaayy, ja'a teedyhajxy hänajty tøø quiuyoxø'øyäbä. Cabä cuhdujt hänajty pøn miøødä coo hajxy quiáyät ni ja'a Davidhajxy. Jagooyyä teedy ja'a cuhdujt hajxy hänajty miøødä coo hajxy quiáyät.

⁵Jaduhñ cujaay myiimbä maa ja'a Moisés miädia'aguiän coo ja'a teedyhajxy tsajtøgootypä quia'a nä'ägädä poo'xy ja'a poo'xxiøøjooty; y cab jaduhñ ñejiä. ⁶Y høøčh, maas móc-høch ja'a cuhdujt jaduhñ nmøødä quejee ja'a tsajtøjc. ⁷Caj mijts mwiinjuø'øy waamb ja'a Diosmädia'agy jaduhñ miäna'añ: “Mänáambøch jaduhñ coo hojiot hajxy mmøødhädät; cábøch jaduhñ nmäna'añ coo animal hajxy myóxät ja'a høøčhøxpä.” Coo hajxy jaduhñ mwiinjuø'øwät, cabä jäya'ay hajxy nä'ä nägoodä mwiingapxpédät.

⁸Høøčh ja'a Diosquexypä,

nmøødhøch cuhdujt jaduhñ høxtä maa ja'a poo'xxiøøbaadiän.

⁹Mänitä Jesús jim chohñ. Mänit tiägøøyy tsajtøgooty. ¹⁰Jiibiä mähdiøjc hänajty tu'ug; cø'ødø'øds hänajty tu'nax. Jiibiä fariseoshajxy hänajty näje'e tiänaabiä. Mänitä Jesús miäyajtøwä:

—Nej, hoy jaduhñ coo ja'a pa'amjäya'ay myajmøcpøgät ja'a poo'xxiøøjootiä.

Paadiä fariseoshajxy jaduhñ miänaañ, yhøxtaaby ja'a wiinmahñdy hajxy hänajty nebiä Jesús hajxy yajtsumøøjät. Coo ja'a Jesús ja'a pa'amjäya'ay yajmøcpøgät ja'a poo'xxiøøjooty, mänitä Jesús hajxy hänajty yajtsuma'añii.

¹¹Mänitä Jesús yhadsooyy:

—Hoy pues. Coo pøn mieeg quiug'a'awø'øy nøøjutjooty ja'a poo'xxiøøjooty, mänit hajxy nøcxy yajpädsømy, túhmäts. ¹²Y maas tsoobaatp ja'a jäya'ay quejee ja'a meeg. Hoy jaduhñ coo jäya'ay mnäxúudsät ja'a poo'xxiøøjooty.

¹³Mänitä Jesús ja'a mähdiøjc ñämaayy:

—Xajtøw yø'ø mgø'ø.

Mänit xiajtøøyy. Mänit miäbaaty nebiä tu'ugpä. ¹⁴Mänitä fariseoshajxy tiøjpädsøømy. Mänit hajxy quiojyquiapxyhajty nebiä Jesús hajxy yaghó'ogät.

¹⁵Coo ja'a Jesús jaduhñ miädoyhajty, mänit jim chohñ. Mänitä jäya'ay may piadu'ubøjcy. Mänitä Jesús ja'a pa'amjäya'ay yajmøcpøjcy nägøxiä. ¹⁶Mänit jaduhñ miänaañ coo hajxy quia'a nägäpxät pøn je'e. ¹⁷Jaduhñdsä tiøjiajty nebiä Isaías jecy miänaañän, ja'a Diosquexypä. Dios jaduhñ mänaamb:

¹⁸ Høøchä nmoonsä hädaa, ja'aäch tøø nwiimbíyyäbä.
 Ndsójpíoch jaduñ.
 Jootcújc-høch nniijiäwø'oyii yø'øgøxpä.
 Nbäda'agáambiøch ja'a nhEspíritu maa yø'øjän.
 Høøch nguhdujt jaduñ xyajwiingapxø'øwáanäp maa ja'a jäya'ayhajxy nägøxiän.
¹⁹ Caj chiptuna'añ; caj ya'axa'añ caj jioga'añ.
 Hahuum jaduñ wiädita'añ cajptooty.
²⁰⁻²¹ Jiootcapxmøcpøgaamby pøn hobiä nejpiä mäbøjp.
 Mäbøgáanäxpä ja'a miädia'agy ja'a jäya'ayhajxy nägøxiä.
 Mänit jaduñ tiägø'owa'añ hoyhanehmbä.
²² Mänitä mähdiojc tu'ug yajmejtsä maa Jesúsän. Wiindsä mähdiojc hänäjty, møød hänäjty yhuumä, møød ja'a møjcu'uba'am hänäjty miøødä. Mänitä Jesús jaduñ yajnähwaach, yaghijxø'cy, yajcapxø'cy. ²³ Mänitä jäya'ayhajxy nägøxiä yagjuøoyy. Mänit hajxy ñiñämaayyä:
 —Nej, David yhap yhocäda'a yø'øduhñä.
²⁴ Coo ja'a fariseoshajxy jaduñ miädooyy, mänit hajxy miänaañ:
 —Coo yø'ø craa ja'a møjcu'uwiiinmahñdy jaduñ miøødä, paadiä møjcu'uba'am jaduñ yajnähwa'aäch.
²⁵ Ñajuøøbiä Jesús hänäjty nebiä fariseoshajxy hänäjty wyiinmahñdyhaty. Mänit miänaañ:
 —Coo ja'a tu'hagajtpä jäya'ayhajxy ñimiädsibø'øwøøjät, cuhdägöyyäp ja'a quiajpthajxy

jaduñ. Y coo ja'a tu'ugtøgootypä jäya'ayhajxy ñimiädsibø'øwøøjät, cab hajxy hoy yhijnät tu'ugtøgooty. ²⁶ Jaaná jaduñduhmbä, coo ja'a møjcu'uhajxy ñimiädsibø'øwøøjät, tägöyyäp ja'a wyiinmahñdyhajxy jaduñ. ²⁷ Hoorä, mijts jaduñ mänaamb cooçh ja'a møjcu'uba'am nyajnähwa'aäch ja'a møjcu'uwiiinmahñdyhaam. Coo häxøpy jiaduñä, maa mijts ja'a mjamiøød ja'a wiinmahñdy hajxy piaady coo ja'a møjcu'uba'am hajxy yajnähwa'aäch. Hamdsoo hajxy myajcähxø'øgy coo ja'a tøyhajt hajxy mga'a møødä. ²⁸ Pero høøch, DioshEspirituháamhøch ja'a møjcu'uba'am nyajnähwa'aäch. Cähxø'p jaduñ coo tøø yhabaatnä coo ja'a Dios ja'a miäjaa yajcähxø'øga'añ.

²⁹ Coo ja'a møjcu'u xquia'a yajmäjädá'agät, cabä miäjaa jaduñ mbøjcät.

³⁰ Pøñhøch jaduñ xquia'a møødpädø'p, høøch nmädsip je'e. Y pøñhøch jaduñ xquia'a møødtuumb, xmiähanhájpøch je'e.

³¹⁻³² Je'eguiøxpøch mijts jaduñ nnäma'ay, coo pøn jaduñ tiu'udägöyyät, hoy jaduñ ñähwá'adsät, hóyhøch jaduñ xjia nänømy, høøch ja'a Diosquexypä. Pero coo pøn jaduñ ñänómät ja'a DioshEspíritu, cab jaduñ mänaa ñähwa'adsa'añ.

³³ Mhøxcábäp hajxy jaduñ pøn ja'a howyiinmahñdy møød; je'eds hoy wädiip. Pøn ja'a howyiinmahñdy ca'a møød, cab hoy wiädity. ³⁴ Jaduñ mäwíinäts mijts hajxy mjatcø'øy nebiä tshänñiän. Paadiä hoybä

hajxy mǵa'a mädia'aga'añ, coo ja'a haxøøgwiinmahñdy hajxy mmøødä. Haagä mgopcooty ja'a mmädia'agyhajxy jaduhñ chohñda'agy. ³⁵Jaaya'ay hojiäya'aybä, hoy jaduhñ quiapxy miädia'agy je'eguiøxpä coo ja'a howyiinmahñdy miøødä quiopcooty. Pero jaaya'ay ca'a hoybä, haxøøg jaduhñ quiapxy miädia'agy je'eguiøxpä coo ja'a haxøøgwiinmahñdy miøødä quiopcooty. ³⁶Chaaçh mijts nnäma'ay, coo jaduhñ yhabáadät coo ja'a Dios hänäjty yajnähdi ja'añ, mänitä Dios hajxy xmiäyajtowa'añ waambaty hajxy hänäjty tøø mgapxtägoy, hoy hajxy jaduhñ tøø mja nä'ä wiingapxnaxy. ³⁷Pø haxøøg hajxy hänäjty tøø mmädia'agy, mänit Dios hajxy xpiäda'aga'añ haxøøgtuum. Pø hoy hajxy hänäjty tøø mmädia'agy, mänitä Dios hajxy xpiäda'aga'añ hodiumu.

³⁸Mänitä Jesús ñämaayyä ja'a fariseoshajxy näje'e møødä ley-yajnähixøøbiähajxy:

—Wiindsón, hõjts ja'a hijxtahñd huuc yaghíxäc ja'a hoy-yagjuøøñbä.

³⁹Mänitä Jesús yhadsooyy:
—Ja'a jäya'ayhajxy jäda'ahatypä, haxøøg hajxy jiatø'oy; cabä Dios hajxy chocy. Ja'a hijxtahñd hajxy mja wi'i yhixaamby. Jagooyyä hajxy jaduhñ mhixa'añ nebiä hijxtahñd jecy quiähxø'quiän ja'a Jonáscøxpä, ja'a Dios jecy quiéjxäbä. ⁴⁰Ja'a ballenajoodooty ja'a Jonás yhiyty tågøøgxøø tågøøgtsuhm. Jadúhñäts høøçh nhidaambä naaxjutjooty tågøøgxøø tågøøgtsuhm, høøçh

ja'a Diosquexypä. ⁴¹Coo ja'a Jonás jaduhñ piädsøømy ballenajoodooty, mänitä Diosmädia'agy hoy yajwa'xy maa ja'a cajpt hänäjty xiøhatiän Nínive. Coo hajxy jim miädooyy, mänit hajxy miäbøjcy. Mänitä yhaxøøgwiinmahñdy hajxy ñajtshixøøyy. Y cabä Jonás mõjtuung hijty jaduhñ jiaty møødä. Maas mõjtúungghøch nmøødä høøçh. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä. Coo jaduhñ yhabáadät coo hajxy hänäjty yajnähdi ja'añii, mänit hajxy ñäma'awa'añii coo hajxy jaduhñ piäda'agøøjät haxøøgtuum. Ja'a jecyjiiäya'ayhajxy jaduhñ mäna'anaamb, ja'a hajxy hijty jegyhajty tsänaabiä Nínive. ⁴²Jaduhñdsä to'oxiøjc miäna'anaambä, ja'a jecy gobiernähájtäbä jäguemnaax ja'a jøømbojmänajpä. Mänitä Salomón hoy miämädoowhity, je'eguiøxpä coo ja'a Salomón hänäjty jiaançh tehñ quiuhwijjiä. Y cabä Salomón ja'a mõjtuung hijty jiaty møødä. Maas mõjtúungghøch nmøødä høøçh. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä.

⁴³⁻⁴⁵Ja'a jäya'ayhajxy jäda'ahatypä, haxøøgwiinmahñdy hajxy miøød. Y cooçh nmädia'agy hajxy xquia'a mäbøjçät, maas haxøøg hajxy jaduhñ jiadät. Jaduhñ mäwíinäts hajxy jiadät nebiä jäya'ay mõjcu'umøødpän. Coo ja'a mõjcu'u jii by piädsøømät maa jaaya'ay quiopcän, mänitä poo'xtaact nøcxy jäguemduum yhøxta'ay maa ja'a tø'ødsnäghapän. Coo ja'a

poo'xtaact jim quia'a páadät, mänit miäna'ana'añ: “Mejor nnä'ägä nœcxtägáchhœch maaçh nhuuc tsohm̄bän.” Coo jaduñ wyiimbídät, mänitä jäya'ay quiopc jaduñ piáatät nebiä yajwa'adstœjcän, ja'a yajxón tœø pie'edyiijábä. Mänitä jiamiœød nœcxy juxtujc jiaac woy, ja'a maas haxœøgpä. Mänit hajxy nägœxiä tiägœ'oy maa jaaya'ay quiopcootiän. Y maas haxœøg jaaya'ay jaduñ jiada'añ quejee hijty yhity.

⁴⁶Jimnä ja'a Jesús ja'a cu'ug hänäjty miœœdmädia'agyñä, mänitä tiajhajxy miejch mœœdä piuhya'ayhajxy. Jim hajxy miähmœøyy tœba'am. Ja'a Jesús hajxy hänäjty miœœdmädia'agaamby.

⁴⁷Mänitä Jesús hoy ñäma'ayii: —Xiidsä mdaj xmiœœdmädia'aga'añ tœba'am mœœdä mbuhya'ayhajxy.

⁴⁸Mänitä Jesús yhadsooyy: —Pœñhœch ndajhajpy; pœñhœch nbuhya'ayhajpy.

⁴⁹Mänitä jiamiœød ñädsiiwœøyy. Mänit miänaañ:

—Hœœch ndaj yœ'œ; hœœch nbuhya'ay yœ'œ. ⁵⁰Pœñhœch ja'a nDeedy miädia'agy xquiudiúunäp ja'a tsajpootypä, jaduñ mäwíinäts hajxy je'e nébiœch nbuhya'ayän, nébiœch nbuhdo'oxiän, nébiœch ndajján.

13 Mänitxœø ja'a Jesús jim chohñ tœgooty. Mänit jim miejch mejypia'a. Hoy jim yhänaaguiäda'agy. ²Mänitä jäya'ay may miejch maa ja'a Jesús hänäjtiän. Mänitä Jesús tiägœøyy barcojooty. Hoy jiiby yhœxta'agy. Cœjxä jäya'ayhajxy jim miähmœø'oy pu'uwiiing. ³Mänitä

Jesús tiägœøyy yajnähihxœœbiä madiu'u. Mäbaadyhaam jaduñ yajnähihxœøyy. Mänit miänaañ: —Mänitä jäya'ay tu'ug tiu'ubœjcy niippä. ⁴⁻⁸Coo ja'a tœœmd tiägœøyy wœjpä, näje'e ja'a tœœmd quiahy tu'haam, näje'e quiahy tsaanähgœxp, näje'e quiahy haptiooty, näje'e quiahy maa ja'a hoñaaxän. Ja'a jim cáhwäbä tu'haam, yajpädœc ja'a muuxyhajxy je'e. Ja'a jim cáhwäbä tsaanähgœxp, paquiä jaduñ jia mujxy, je'eguiœxpä coo ja'a naax quia'a jaty cœœcä. Coo quioxxœø'œøyy, mänitä tiœœch, coo ja'a tyicts hänäjty quia'a mœœdä. Ja'a cáhwäbä haptiooty, ja mujx jaduñ. Ja yee'c jaduñ, pero cabä ñä'ä tœœmbejty. Hix, ja'a hapy je'e xaam. Y ja'a cáhwäbä maa ja'a hoñaaxän, may jaduñ tiœœmhajty, näje'e mägo'xhaam, näje'e tægœøghii'xhaam, näje'e hii'xmajc-haam. ⁹Pœñ jaduñ wiinjuœœby, weenç hádaa nmädia'agy xmiäbœjcä.

¹⁰Mänitä Jesús ñämejtsä ja'a jiamiœœdhajxy. Mänit miäyajtœœwä: —Tii ja'a cu'ug coo myajnähihxœø'oy yajmäbaadyhaam.

¹¹Mänitä Jesús yhadsooyy: —Tœø mijts ja'a Dios xyajwiinjuœø'oy nebiaty yhane'emy. Cab hijty yajwiinjuœø'oy. Y yœ'œ cu'ughajxy, cab hajxy hoy wyiinjuœø'owa'añ. ¹²Pœñ madiu'u jaduñ mœœd, maas may jaduñ mio'owa'añii. Pero pœñ weeñtiä mœœd, pœgáanäxäp je'e mäduhñtiä jim miœœdä. ¹³Páadyhœch jaduñ nmädia'agy yajmäbaadyhaam. Jia wi'i yhee'py hajxy, cab hajxy tii yhixy. Jia wi'i miämädoowhijpy

hajxy, cab hajxy wyiinjuø'øy, neby hajxy tii quia'a mädoybän.

¹⁴Tøjjajp jaduhñ

yø'øya'aguiøxpahajxy nebiä Isaías jecy miänaañ, ja'a hijty jegyhajty wädijpä Diosquexy:

Mmädowaamby hajxy jaduhñ,
cab hajxy mwiinjuø'øwa'añ;
Mheebaamby hajxy, cab hajxy mhixa'añ.

¹⁵Tøø hädaa jäya'ayhajxy quiuhxexy;

nebiä cuhnatpän, nebiä wiimbi'idspän hajxy jaduhñ
ñibiäda'agyii neby hajxy jaduhñ quia'a wiinjuø'øwät,
nébiøch nmädia'agy hajxy xquia'a mäßöjcät.

Coočh nmädia'agy hajxy xmiäböjcät,
mänitøch hajxy jaduhñ nyajnähwá'adsät.

¹⁶Jootcujc jaduhñ mhity je'eguiøxpä coo hajxy jaduhñ mhixy, coo hajxy jaduhñ mmädoy.
¹⁷Tøyhájthøch mijts nnäma'ay, may ja'a Diosquexy pähajxy, may ja'a hojiäya'aybähajxy jia hixaañ nej mijts cham mhixiän. Jia mädowaan hajxy nej mijts cham mmädoyän.

¹⁸Huuc mädo w hajxy waamb ja'a niippä cwieento miädia'agytiaø'øy.
¹⁹Näje'e ja'a jäya'ayhajxy, coo ja'a Diosmädia'agy hajxy miädoy nebiä Dios yhane'emiän, cab hajxy wyiinjuø'øy. Mänitä Diosmädia'agy hajxy piøjcäxä ja'a mõjcu'ugong. Jaduhñ mäwiiñäts hajxy je'e nebiä tøømd quiahyyän tu'haam.
²⁰⁻²¹Näje'e ja'a Diosmädia'agy hajxy hamuumdu'joot yhuuc ja mäßøcy. Pero coo hajxy chaächtüüii ja'a Diosmädia'aguyiøxpä, mänit hajxy

piädsøømnä. Jaduhñ mäwiiñäts hajxy je'e nebiä tøømd quiahyyän tsaanähgøxp. Paquiä jaduhñ tiø'øch je'eguiøxpä coo ja'a tyicts quia'a hity. ²²Näje'e ja'a Diosmädia'agy hajxy yhuuc ja mädoy. Pero jiaančh tehñ jiahmiejchp hajxy jaduhñ hädaa yaabä naaxwiimbä. Jiaančh tehñ yhadsojpy ja'a xädø'øñ hajxy, paadiä Diosmädia'agy hajxy hoy quia'a panøcxa'añ. Jaduhñ mäwiiñäts hajxy je'e nebiä tøømd quiahyyän haptiooty. ²³Näje'e ja'a Diosmädia'agy hajxy hoy wyiinjuø'øy. Hoy hajxy jaduhñ pianøcxy hamuumdu'joot. Jaduhñ mäwiiñäts hajxy je'e nebiä tøømd quiahyyän hoñaaxooty.

²⁴Mänitä Jesús tiägøøguiumbä mädiaacpä yajmäbaadyhaam:
—Coo ja'a Dios yhane'emy, jaduhñhöch nyajmäbaada'añ nebiä tuljäya'ay hodiøømd tøø wiøjjiäbän maa ja'a ñaaxän. ²⁵Mänitcoods hajxy quiøxy maaho'cy. Mänitä miädsip ja'a cizañatøømd hoy wiøjy maa ja'a trigotøømd hänajty tøø wiøjjiän. ²⁶Tu'cuहुdujt ja'a trigo miujxy mõødä cizaña. Coo ja'a trigo xiäbaajøøyy, mänitä cizaña quiähxø'pä. ²⁷Mänitä jäya'ay hoy ñäma'ayijäm ja'a mioonsähajxy: “Wiindsøn, hodiøømd miich mwøj, túhmäts. Pämaadä yø'ø cizañahujts tøø choon.” ²⁸Mänitä wyiindsøn miänaañ: “Nmädsiphøchäda'a jaduhñ tøø jiatcø'øy.” Mänitä mioonsä miänaañ: “Nej, nõcxäp højts yø'ø cizañahujts nwixiä.” ²⁹Mänitä wyiindsøn miänaañ: “Caj, cab hajxy mwixät coo ja'a trigo jaduhñ nä'ä mäßäðø'øgø'øwät. ³⁰Ween yhity; ween tu'cuहुdujt

yeegy. Coo ja'a trigopux jaduhñ yhabáadät, mänítöch nmoonsä nguexa'añ, weenä cizañahujts hajxy jayöjp quiöxy yajpädø'ogy. Ween hajxy quiöxy haxoch. Mänít hajxy jaduhñ nõ'ogät. Mänitä trigo hajxy ñähmädsät. Mänit hajxy piädá'agät tsehxooty."

³¹Mänitä Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jaduhñhöch nyajmäbaada'añ nebiä mostazapajcän. Jim tu'ljäya'ay tøø ñi'iby maa ja'a ñaaxän. ³²Tøyhajt jaduhñ coo ja'a mostazapajc jiaanč tehñ chayyá. Pero coo yeegy, cruty jaduhñ jiaty nebiä quepychaajän. Mädøyyä ja'a muuxyhajxy nõcxy jim mia'ay yhaajiooty.

³³Mänitä Jesús miänáangumbä yajmäbaadyhaam:

—Coo ja'a Dios yhane'emy, jaduhñhöch nyajmäbaada'añ nebiä to'oxiöjc ja'a tsajcaagychooy yajmädijø'øyäbän harinajooty tægøøgquixøhñdy. Mänit jaduhñ cøxiä yajmäyäbicø'øy.

³⁴Jaduhñä Jesús ja'a cu'ug yajnähiçøøyy haagä yajmäbaadyhaam. ³⁵Jaduhñds tiøjiajty nebiä Diosquexypä jecy quiujahyyän:

Mäbaadyháamhöch
nmädia'aga'añ.

Nyajcähxø'ogáambiöch mädyiijaty hánajty yu'uçhtium hijp mänaa hädaa yaabä naaxwiin yhawijy tiøø'xta'aguiän; cahnä quiähxø'øgyñä.

³⁶Mänitä Jesús ja'a cu'ughajxy quiejxwiimbijty. Mänit tiøjtägøøyy. Mänit ja'a jiamiøødhajxy miejch. Mänitä Jesús hajxy ñämaayy:

—Højts capxwíjjäc ja'a cizañahujtsøxpä.

³⁷Mänitä Jesús miänaañ:

—Høøch ja'a Diosquexypä, jaduhñ mäwíinhöch høøch nebiä jaaya'ay hodiøømd tøø wiøjjiäbän. ³⁸Y hädaa yaabä naaxwiin, jaduhñ mäwíinäts hädaa nebiä naaxän maa ja'a hodiøømd wiøjjiän.

Jaaya'ayhajxy hanéhmäbä ja'a Diösäm, jaduhñ mäwíinäts hajxy je'e nebiä hodiøømdän. Jaaya'ayhajxy hanéhmäbä ja'a mõjcu'ugong, jaduhñ mäwíinäts hajxy je'e bā nebiä cizañahujtsän. ³⁹Y ja'a mõjcu'ugong, jaduhñ mäwíinäts je'e nebiä jaaya'ay ja'a cizañahujts tøø wiøjjiäbän. Coo ja'a naaxwiimbä wyiimbida'añ, jaduhñ mäwíinäts je'e nebiä trigo hajxy yajpädø'quiän møødä cizañahujts. Y ja'a Dios ja'a mioonsähajxy tsajpootypä, jaduhñ mäwíinäts hajxy je'e nebiä jaaya'ay ja'a trigo hajxy yajpädø'quiän.

⁴⁰Coo ja'a naaxwiimbä jaduhñ wyiimbida'añ, jaduhñ mäwíinäts je'e nebiä cizañahujts hajxy ñø'quiän.

⁴¹Mänitöch nmoonsä nhane'ema'añ coo hajxy ween nõcxy yajpädsømy põnjaty ja'a haxøøgwíinmahñdy møød, møødä põnjaty jaduhñ ja wi'i yhadugaamb ja'a Diosmädia'agy. Jim hajxy yajpädsøma'añii maačh hánajty nhane'ema'añän, høøch ja'a Diosquexypä. ⁴²Mänit hajxy hánajty quiujuipø'owa'añii jøønjooty. Jiiby hajxy jiø'owa'añ xiuudsä'añ.

⁴³Ja'a hajxy jaduhñ howiädijpā, jaanč tehñ miøj jaanč tehñ jiaanč hajxy yhida'añ maa ja'a Tieedyhajxy yhane'ema'añän. Pø jii mmädohndhajxy, mmädøwäp hajxy jaduhñ.

44' Coo ja'a Dios ja'a miäjaa yajcähxø'øga'añ, jaduñ mävínäts je'e nebiä jäya'ay maxiädø'øñ tiajø'øyäbän naaxpa'c. Coo pøn piädät, mänitä tiajøödiägatsa'añ. Xoonäda'agaamb jaduñ. Mänit nøcxy tioogy tijaty jim miøød. Mänitä naax nøcxy jiuu maa ja'a maxiädø'øñ tøø piaadiän.

45' Coo ja'a Dios ja'a miäjaa yajcähxø'øga'añ, jaduñ mävínäts je'e nebiä perlatsaahajuubiän, ja'a jaanč tehñ yajxonbä. Ja'a perlatsaa, pic je'e møød pioobä.

46' Coo jaduñ tu'ug piädät jaanč tehñ chowbä, mänit nøcxy tioogy tijaty jim miøød. Mänitä perlatsaa nøcxy jiuu.

47' Coo ja'a Dios ja'a miäjaa yajcähxø'øga'añ, jaduñ mävínäts je'e nebiä hacxjohm d hajxy piädá'aguiäbän mejjiooty coo hacx hajxy hänäjty jiooma'añ madiu'u. 48' Coo ja'a hacxjohm d jaduñ yhúdsät, mänit hajxy yhøxwohm bädsoymy. Mänitä hacx hajxy wyiimbij ja'a hojiatypä. Mänit hajxy piäda'agy cachjooty. Mänitä ca'a hojiatypä hajxy ñøøga'adsø'øy. 49' Jaduñ mävínäts jiada'añ coo ja'a naaxwiimbä wyiimbida'añ. Mänitä Dios ja'a mioonsähajxy wyiimbiwa'añ ja'a hojiäya'aybä. 50' Pøn ca'a hojiäya'ay, je'e hajxy cujuipø'øwáanäp jøønjooty. Jiiby hajxy jio'øwa'añ xiuudsä'añ.

51' Mänitä Jesús miänaañ:

—Nej, mwiinjuøøby hajxy jaduñä.

Mänit hajxy yhadsooyy:

—Wiindsøn, nwiinjuøøby højts jaduñ.

52' Mänitä Jesús miänángumbä:

—Coo ja'a ley-yajnáhixøøbiähajxy tiägø'owät habøjpä nebiä Dios yhane'emiän, mejtstu'u ja'a mädia'agy jaduñ jiada'añ møødä jecypiä møødä jemybiä. Jaduñ mävínäts je'e nebiä cudøjc madiu'u miøødhátiäbän, møødä jemybiä møødä jecypiä.

53' Coo ja'a Jesús jaduñ miädiaacpädøøyy, mänit jim chohñ. 54' Mänit miehch maa ja'a yhamdsoo cajptän. Mänit tiägøøyy yajnáhixøøbiä tsajtøgooty. Mänitä jäya'ayhajxy jiaanč tehñ yagjuøøyy. Mänit hajxy miänaañ:

—Maa yø'ø wiinmahñdiäda'a tøø yhabøcy. Nebiä hoy-yagjuøøñäjatypä jaduñ yajcähxø'øgy. 55' José yhuung yø'ø, yø'ø tsejtspä pujxpä. María ja'a tiaj xiøhaty. Jue'e piuhya'ayhajxy xiøhaty, Jacobo, José, Simón, møødä Judas. 56' Yaa hajxy chána'ay maa højts ngajptän møødä piuhdo'oxyhajxy. Pämaadä yø'ø wiinmahñdy yø'øduhmbä tøø yajtsooñ.

57' Mänitä Jesús miädia'agy quia'a mabøjcäxa. Mänitä Jesús miänaañ: —Homiaajä ja'a Diosquexy wiädity, cumáayypä jaduñ. Pero cab jim quiumayii maa yhamdsoo naax maa yhamdsoo tøjcän.

58' Cabä Jesús ja'a hoy-yagjuøøñäjatypä jim jiaty yajcähxø'cy, je'eguiøxpä coo ja'a miädia'agy hänäjty quia'a mabøjcäxa.

14 Mänitä Herodes miädoyhajty coo ja'a Jesús hänäjty jim wiädity. Ja'a Herodes, jim hänäjty je'e guiobernadorhaty Galileanaaxooty. 2' Mänitä Herodes ja'a mioonsä ñämaayy:

—Juan mäyajnäbejpäda'aj'e. Tøøda'ajiu jypioçy. Paadiä möcmäjaa jiaançh teh̄m miøødä. ³⁻⁴Tøø ja'a Herodes ja'a Juan hänajty yajtsumyii. Tøø ja'a Juan hänajty quio'øxoçhii cadenahaam. Paadiä Juan jaduh̄n chuuma coo ja'a Herodes hänajty tøø ñäma'ay coo jaduh̄n quia'aj hooyyä coo ja'a Herodes ja'a piuhya'ay tio'oxioçj miøødtsänäaayät. Jue'e ja'a Herodes piuhya'ay hänajty xiøhaty, Felipe. Jue'e ja'a Felipe tio'oxioçj hänajty xiøhaty, Herodías. ⁵Jaduh̄nä Herodes hänajty tiajy miay coo ja'a Juan hänajty yagho'oga'añ. Pero jaançh teh̄m chähgøøby ja'a Herodes hänajty. Ja'a cu'ug hänajty chähgøøby je'eguiøxpä coo ja'a cu'ughajxy hänajty miäna'añ coogä Juan ja'a Diosmädia'agy hänajty yajwa'xy.

⁶Mänitä Herodes jiumøjt jaduh̄n piejtä. Jimä Herodes hänajty yhäñ'aay möødä pawoy pawichpähajxy. Mänit hajxy tiägøøyy wiinhéjtsäbä. Ja'a Herodías yhuung jaduh̄n tägøøyy hejtspä. Mänitä Herodes xioondaacy nägø'ø nädecypiä. ⁷Mänitä Herodes ja'a quixy yajwiinwaanøøyy:

—Hotyijä miich xmiäyujwá'anät, nmó'owäbøch miich jaduh̄n.

⁸Mänitä quixy ja'a tiaj hoy yhawaanä. Mänitä tiaj jaduh̄n miänaañ coo ja'a Juan mäyajnäbejpä quioçp jaduh̄n miäyujwá'anät. Mänitä quixy ja'a Herodes hoy ñäma'ay:

—Høøchä Juan mäyajnäbejpä quioçp móooyäc texyjooty.

⁹⁻¹⁰Mänitä Herodes jiootmädiägøøyy nägø'ø nädecypiä.

Pero tøø hänajty miäna'añ jäya'awyyiinduum coog hänajty yega'añ hotyijatiä. Mänit yhanehmy coo ja'a Juan quioçp yhøxpújxäxät jiiiby pujxtøgooty. ¹¹Mänitä Juan quioçp yajnøcxäxä texyjooty maa ja'a Herodeshajxiän. Mänitä quixy mioooyä. Mänitä quixy ja'a tiaj hoy mio'oy.

¹²Mänitä Juan ñäxäwa'ay yo'tuc hoy quio'øyyäxä; ja'a Juan miägu'ughajpähajxy jaduh̄n hoy quio'øy. Mänitä Juan hajxy hoy yajnaaxtägø'øy. Mänitä Jesús hajxy hoy yhawaanä cooc ja'a Juan hänajty tøø yagho'ogyii.

¹³Coo ja'a Jesús jaduh̄n miädoyhajty cooc ja'a Juan tøø yagho'ogyii, mänit jim choññ barcojooty nidiuh̄m. Mänit ñøçxy hanidiuh̄mduum. Mänitä cu'ughajxy miädoyhajty cooc ja'a Jesús hänajty jim tøø choññ. Mänitä Jesús hajxy piadu'ubøjcy cajptooty. Tey-yo'oy hajxy pianøçxy. Jayøjp hajxy jim miejch maa ja'a Jesús hänajty ñøçxiän. Mänitä Jesús piamejch høxhaam. ¹⁴Coo ja'a Jesús piädsøømy barcojooty, mänitä majiäya'ay yhihxy. Mänit ñäxuu'ch. Mänitä pa'amjäya'ay yajmøçpøjcy. ¹⁵Mänittsuu ja'a Jesús miägu'ughajpähajxy piamejch. Mänitä Jesús hajxy ñämaayy:

—Tøø chuujø'øy y cabä tøjç yaa. Quejxwiimbit yø'ø jäya'ayhajxy; weenä caagy hajxy nøçxy jiu y cajptooty.

¹⁶Mänitä Jesús miänaañ:

—Caj, ween hajxy yhity. Mijs jaduh̄n ween myajcáyät.

¹⁷Mänit hajxy yhadsooyy:

—Cab højts tii nmøødä. Jagooyyä højts ja'a tsajcaagy mägooyyä nmøødä chaadsä hacx metscä.

¹⁸Mänitá Jesús miánaaṅ:

—Mäminxä yø'ø.

¹⁹Mänitá Jesús ja'a majiäya'ay ñämaayy coo hajxy ween yhøxta'agy møøwyiing. Mänitá tsajcaagy quiøøchooyy møødä hacx. Mänit yuughee'py cøxp. Mänit miánaaṅ:

—Dioscujú'uyäp.

Mänitá Jesús ja'a tsajcaagy yhaguidøoyy. Mänitá miägu'ughajpähajxy miooyy. Mänit hajxy hoy yajwa'xy majiäya'ayhagujc. ²⁰Nägøxiä hajxy jaduñ quiaayy cu'uxiä. Mänitá Jesús miägu'ughajpä tsajcaagyhagujc hajxy yajpäðø'cy majmejtscach. ²¹Nämägooxmil hajxy quiaayy haagä ya'adiøjc. Hawiingä to'oxiøjc-hajxy møødä pigäna'c-hajxy.

²²Mänitá Jesús ja'a miägu'ughajpä ñämaayy coo hajxy ween tiägø'ø y barcojooty, coo hajxy ween ñøønajxø'øgy. Mänitá Jesús ja'a majiäya'ayhajxy quiejxwiimbijty.

²³Mänitá Jesús ñøcxy nidiuhm tunñähgøxp Diospa'yaa xpä. Coo quioodsøoyy, jimnä Jesús hänajty nidiuhm tunñähgøxp. ²⁴Ja'a Jesús ja'a miägu'ughajpähajxy, mejyquuijc hajxy hänajty tøø miech barcojooty. Møc hajxy hänajty jiojcubojo'ø y; paadiä nøø hänajty miøjjädsembejty barcomøjc. ²⁵Coodsnä Jesús tiu'ubøjcy tecy-yo'oy. Mejywyiing jaduñ yohy. Mänit miejch maa ja'a miägu'ughajpähajxiän. ²⁶Coo ja'a Jesús hajxy yhijxy coo hänajty yo'oy mejywyiing, mänit hajxy chähgøbiøjcy. Mänit hajxy chähgø'øyaaxy:

—Haañämäda'a yø'ø.

²⁷Mänitá Jesús miánaaṅ:

—Ca'a hajxy mdsähgø'ø y. Høøch ja'a Jesús.

²⁸Mänitá Pedro miánaaṅ:

—Wiindsøn, pø miich ja'a Jesús, høøch huuc hanéhmäc coöch jim mnøcxät yo'oy maa miichän.

²⁹Mänitá Jesús yhadsooyy:

—Minxä.

Mänitá Pedro piädsøomy barcojooty. Mänit tiägøoyy yohbiä mejywyiing. Jim hänajty ñøcxa'añ maa ja'a Jesúsän. ³⁰Coo jiäwøoyy coo møc piojy, mänit chähgøbiøjcy. Mänit tiägøoyy quiimbä. Mänit yaaxy:

—Wiindsøn, høøch yajpädsøømäc.

³¹Mänitiä ja'a Jesús ja'a Pedro quiø'ø miajtsä. Mänit miánaaṅ:

—Caj miich mhuuc mäbøjpä. Tiich nmädia'agy coo xquia'a mäbøjca.

³²Coo ja'a Jesús tiägøoyy barcojooty møødä Pedro, mänitá poj yuungøoyy. ³³Mänitá Jesús hajxy wyiinjiäcädaacy. Mänitá Jesús hajxy ñämaayy:

—Tøyhajt miich mDioshuungä.

³⁴Mänit hajxy miejch mejyhawiimb maa hänajty xiøhatiän Genesaret. ³⁵Coo ja'a Jesús yhøxcajpä ja'a jäya'ayhajxy jimä, mänitá mädia'agy tiägøoyy wädijpä coo ja'a Jesús jim tøø miech Genesaret. Mänitá pa'amjäya'ayhajxy may yajmejtsä maa ja'a Jesúsän. ³⁶Mänitá Jesús hajxy miänuu'xtaacy coo ja'a wyitpa'a hajxy ween ñähdoonä. Coo hajxy jaduñ ñähdoon, mänit hajxy miøcpøjcy.

15 Mänitá Jesús nämejtsä ja'a fariseoshajxy näje'e møødä

ley-yajnáhixøobiáhajxy näje'e.
 Jerusalén hajxy hánajty chooñ.
 Mänitá Jesús hajxy miäyajtøoyy:
²—Yø'ø mmägu'ughajpähajxy,
 tii ja'a cuhdujt hajxy coo quia'a
 cudiuñ nebiä jecyjiäya'ayhajxy
 xyajmämähmøøyyäm. Ja'a
 jecyjiäya'ayhajxy, cø'øbujp hajxy
 hijty coo hajxy hánajty quiaya'añ.
 Jaduhñ hajxy hijty quiuhdujthaty.
 Pero yø'ø mmägu'ughajpähajxy, cab
 hajxy jaduhñ quiuhdujthaty.

³Mänitá Jesús yhadsooyy:
 —Pero mijts, cabä Dios
 miädia'agy hajxy myajtuunä.
 Ja'a mhamdsoo cuhdujt hajxy
 myajtuumby. ⁴Ja'a Dios jaduhñ
 mänaañ coo ja'a ndaj ndeedy hajxy
 nwiingudsähgøøyyämät. Jaduhñ
 miänaambä, coo pøn ja'a tiaj ja'a
 tieedy haxøøg ñänømät, tsipcøxp
 jaduhñ yho'oga'añ. ⁵⁻⁶Pero wiing
 mijts mmänaambä. Mijts jaduhñ
 mänaamb coo jaduhñ yhooyä
 coo ja'a mdaj ja'a mdeedy jaduhñ
 mnämá'awät: “Cábøchä xädø'øñ
 nmøødä cooçh mijts nbuhbédät.
 Tøøchä Dios ngøxy mo'oy
 mäduhñtiä mijts hijty nmo'owa'añ.”
 Coo hajxy jaduhñ mmäna'añ, cabä
 Diosmädia'agy hajxy hánajty
 myajtuñ. Ja'a mhamdsoo cuhdujt
 hajxy hánajty myajtuumby.
⁷Jaduhñ mäwíinäts mijts
 mnibiäda'agyii nebiä hoyhána'cän.
 Pero cab hajxy mhoyhána'cä.
 Mijtsøxpä ja'a Isaías Diosquexypä
 jecy miänaañ:

⁸Nä'a mänaamb hajxy jaduhñ cooc
 tyijy hajxy xwyiingudsähgø'øy
 hamuumdu'joot.

⁹Xiøøbä hajxy jaduhñ ñä'a
 mäna'añ;

cábøch nmädia'agy hajxy xñä'a
 panøcxä.

Yhamdsoo wiinmahñdy hajxy
 yajwiinhixøøby,
 nømä Dios miäna'añ.

¹⁰Mänitá Jesús jäya'ay may
 miøjyaaxy. Mänit miänaañ:
 —Huuc mädox hajxy, huuc
 wiinjuø'ow hajxy. ¹¹Mädyiijaty
 tågøøby mhaawjooty, cab
 jaduhñ xyajtägóyyät. Je'eduhñ
 xyajtägóyyäp mädyiijaty pädsøømb
 mhaawjooty.

¹²Mänitá Jesús ñämaayyä ja'a
 miägu'ughajpähajxy:
 —Cabä fariseoshajxy yhojiäwø'øy
 coo jaduhñ tøø mmäna'añ.

¹³Mänitá Jesús yhadsooyy:
 —Mädyiijátyhøch nDeedy
 tsajpootypä tøø quia'a päda'agy,
 cab jaduhñ yhojø'owa'añ. ¹⁴Weends
 yø'ø fariseoshajxy yhity. Jaduhñds
 hajxy wiädity nebiä Haagä
 wiindspän coo hajxy ñibiawoyii.
 Nämetsc hajxy nøcxy wiocca'ay.

¹⁵Mänitá Pedro ja'a Jesús
 ñämaayy:
 —Cab højts ndu'jootwiinjuø'øy.
 Højts capxwíjjäc.

¹⁶Mänitá Jesús miänaañ:
 —Nej, ni mijts tii mga'a
 wiinjuø'øyñä. ¹⁷Jaduhñds je'e,
 mädyiijaty tågøøby mhaawjooty,
 jiiby jaduhñ yháda'agy mjoodooty.
 Mänitá jaduhñ piädsøømdägach.
¹⁸Pero mädyiijaty jaduhñ
 pädsøømb mhaawjooty, jiiby
 jaduhñ chohñda'agy mgopcooty.
 Je'eduhñ xyajtägóyyäp. ¹⁹Haagä
 jiibiä haxøøgwiiinmahñdy
 chohñda'agy mgopcooty hoñä'a
 mädyiibä. Je'eduhñ xøhajp
 ja'a haxøøgwiiinmahñdy, ja'a

jäya'ay-yagho'ogyiibä, mөөдä meečiibä, mөөд coo wiingjäya'ay tio'oxiöjc mmөөдtsänáayyät, mөөд coo mhөhdá'agät, mөөд coo häna'c haxөөг mnänömät. ²⁰Je'eds jaduhñ xyajtägóyyäp. Pero coo mgáyät jaguiø'öbujy, cab jaduhñ ñejpiä; cab jaduhñ xyajtägóyyät.

²¹Mänitä Jesús jim chohñnä.

Mänit ñöcxnä Canaán maa ja'a cajpt hänajty xiöhatiän Tiro mөөдä Sidón. ²²Mänitä Jesús tadjäya'ay tu'ug ñämejtsä. Jim hänajty chäna'ay Canaán. Mänitä Jesús ñämaayyä:

—Wiindsón, miičh ja'a David hijty mhaphajpy mdeedyhajpy. Hөөčh näxúu'tsác. Tөөčh ndo'oxyhuung miächii ja'a möjcu'u. Hanaxiä jaduhñ chaächtiunii —nөm je'e yaaxy.

²³Cabä Jesús yhadsooyy. Mänitä ñämaayyä ja'a miägu'ughajpähajxy:

—Huuc quejxwiimbit yø'ø tadjäya'ay. Tsaächyáaxäp jaduhñ xpiawädíjtäm.

²⁴Mänitä Jesús yhadsooyy:

—Yáayyöčhä Dios tөө xquiexy maa hädaa judiöshajxiän. Cábөch wiingtuum tөө xquiexy.

²⁵Mänitä tadjäya'ay ja'a Jesús wyiinjiçdaacy. Mänit ñämaayy:

—Wiindsón, tunä mayhajt. Hөөčh puhbéjtäc.

²⁶Mänitä Jesús yhadsooyy:

—Cab jaduhñ yhooyä coočhä huc tsajcaagy nmó'owät mädyii ja'a pigäna'c-hajxy quiayaamby.

Ja'a judiös Jesús yajmäbaat nebiä pigäna'cän. Ja'a ca'a judiöshajxy, je'eduhñ yajmäbaat nebiä hucän.

²⁷Mänitä tadjäya'ay miänaañ:

—Tøyhajt jaduhñ. Pero quiaaby ja'a huc ja'a tsajcaagyhawaagy coo

jim quia'ay maa ja'a wyiindsón ja'a mieexän.

²⁸Mänitä Jesús miänaañ:

—Tøyhajtөch miičh nmädia'agy xmiäböjçä. Weenä mhuung miöcpöcy.

Mänitiä ja'a yhuung jiaančh mөcpöjcy.

²⁹Mänitä Jesús jim chohñnä.

Mänit ñöcxnä maa ja'a mejypia'ajan, ja'a xөhajpä Galilea. Mänit hoy piety tunnähgөxp. Mänit yhöxtaacy.

³⁰Mänitä jäya'ay may miejch maa ja'a Jesúsän, mөөдä pa'amjäya'ay, mөөдä cø'ö mucypiä tecymiucypiä, mөөдä wiindspä, mөөдä huumbä. Mänitä Jesús yajmäbaadöoyy.

³¹Mänitä jäya'ayhajxy yagjuöoyy coo hajxy jaduhñ yhiixy coo ja'a huumbähajxy tөө quiapxø'ogy, coo ja'a cø'ö mucypiähajxy tөө yhooyø'y, coo ja'a tecymiucypiähajxy tөө yo'oyø'ogy, coo ja'a wiindspähajxy tөө yhiixø'ogy. Mänit hajxy miänaañ coogä Dios miöjjä jiaančhä.

³²Mänitä Jesús miöjyaaxy ja'a miägu'ughajpä. Mänit miänaañ:

—Nnäxúu'chpөch yø'öya'ayhajxy. Tägөөgxöjөch hajxy tөө xpiawädity, y cabä caayyөөc hajxy miөөдä. Cábөch hajxy nguejxwiimbida'añ jaguiay maa tiöjçän coo hajxy maa tiu'ugädäwät.

³³Mänitä Jesús ja'a

miägu'ughajpähajxy miänaañ:

—Pero maadsä cay hajxy jaduhñ nnä'a páatämät maa yø'öya'aguiөxphajxiän. Pactuumäda'a yaa.

³⁴Mänitä Jesús miäyajtöoyy ja'a miägu'ughajpähajxy:

—Naag tsajcaagy hajxy jii mmөөдä.

Mänit hajxy yhadsooyy:

—Juxtujc, chaadsä hacxhuung mejtstägøøg.

³⁵Mänitä Jesús miänaaṅ coo ja'a jäya'ayhajxy yhöxtá'agät naaxwiin.

³⁶Mänitä tsajcaagy quioondsooyy møødá hacxhuung. Mänitä Dios ṅämaayy:

—Dioscujú'uyäp.

Mänitä Jesús ja'a miägu'ughajpä ja'a tsajcaagy hajxy yajnäguidøøyy møødá hacxhuung. Mänit hajxy yajwa'xtägajch maa ja'a jäya'ayhajxiän. ³⁷Mänit hajxy quiaayy cu'uxiä nägøxiä. Mänitä Jesús miägu'ughajpä ja'a tsajcaagyhaguijc hajxy yajpädø'cy juxtujcach. ³⁸Nämädaaxmil ja'a ya'adiøjc-hajxy quiaayy. Pagaayy ja'a to'oxiøjc-hajxypä møødá pigäna'c-hajxy. Pero cab jaduḥṅ yajnajuø'øy nanaagä hajxy hānajtj je'ebä. ³⁹Mänitä Jesús ja'a jäya'ayhajxy quiejxwiimbijty. Mänit tiägøøyy barcojooty. Mänit ṅøcxy Magadānaaxooty.

16 Mänitä Jesús ṅämejtsä ja'a fariseoshajxy näje'e møødá saduceoshajxy. Mänitä Jesús ṅämaayy coo hijxtahṅd ween yajcāhxø'øgy jim tsajpootyp. Paady hajxy jaduḥṅ miänaaṅ coo ja'a Jesús hajxy hānajtj jia wi'i jiojcaxø'øwa'añ. ²Mänitä Jesús yhadsooyy:

—Coo hānajtj chuujø'øy, mänit hajxy naxy mmāna'añ: “Wa'ads ja'a tsajt; wa'ads jaboom yhida'añ.” ³Y coo hānajtj jiojø'øy, mänit hajxy naxy mmāna'añ: “Tøø wyiimbøcy; tu'uwaamb.” Mnajuøøby hajxy jaduḥṅ nebiä tsajt yhida'añ, pero cabä hijxtahṅd hajxy mwiinjuø'øy

ja'açh chaa nyajcājxø'piä. Ja'a jäya'ayhajxy jäda'ahatypä, haxøøg hajxy jäya'ayhajnä; cabä Dios hajxy chocy. ⁴Hijxtahṅd hajxy jaduḥṅ yujwaamb, pero cab hajxy mio'owa'añii. Jagooyyä hajxy jaduḥṅ yaghixa'añii nebiä Jonás jecy jiajty yhabejtian.

Mänitä Jesús jim jäwaach. Mänit jim tiu'ubøjcy.

⁵Mänitä Jesúshajxy miejyñajxy. Pero jiahdiägooyy ja'a quiaayyøøc hajxy, ja'a Jesús miägu'ughajpähajxy. ⁶Mänitä Jesús miänaaṅ:

—Huuc madow hajxy. Cabä fariseos chajcaagychooyhajxy yhooyä, ni ja'a saduceos chajcaagychooyhajxy quia'a hooyä.

⁷Mänitä miägu'ughajpähajxy tiägøøyy mädiaacpä:

—Paady jaduḥṅ miäna'añ, coo ja'a caayyøøc hajxy nga'a jahmiejtsäm.

⁸Najuøøby ja'a Jesús hānajtj nebiaty hajxy hānajtj miädia'agy. Mänit miänaaṅ:

—Tii hajxy jaduḥṅ coo mwi'i miädia'agy coo ja'a caayyøøc hajxy mga'a møødá. Cábøchä nmädia'agy hajxy jaduḥṅ xñä'ägädä mäbøjca. ⁹Cāhnøch nmädia'agy hajxy xwyiinjuøøyyä. Cab hajxy jaduḥṅ mjahmiejtsnä nébiøch ja'a mägooxpä tsajcaagy nyajnāwa'xøøyyän ja'a nāmāgooxmilpä jäya'ay, y coo hajxy maguiach myajpädø'cy. ¹⁰Ni jaduḥṅ hajxy mga'a jahmiejtsnä nébiøch ja'a juxtujpä tsajcaagy nyajnāwa'xøøyyän ja'a nāmādaaxmilpä jäya'ay, y coo hajxy maguiach myajpädø'cumbä. ¹¹Cooçh jaduḥṅ nmānaaṅ coo

ja'a fariseos chajcaagychooyhajxy quia'a hoyyā, coo ja'a saduceos chajcaagychooyhajxy quia'a hoyyā, cáboch tsajcaagychooy hānajty ndehm̄ nānōomy. Pero caj mijts mwiinjuōyy.

¹²Mānit hajxy wyiinjuōñā tii Jesús hānajty miādiaacy. Ca'a chajcaagychooyā hānajty tiehm̄ miādiaacy, ja'a hajxy yajtsajcaagyquiojpiä. Jadhuh̄ hānajty miādia'agy cooc ja'a fariseos miādia'agyhajxy quia'a hoyyā, cooc ja'a saduceos miādia'agyhajxy quia'a hoyyā.

¹³Mānitā Jesús hajxy jim̄ miehch maa ja'a cajpt hānajty xiōhatiän Cesarea de Filipo. Mānitā Jesús miäyajtōyy ja'a miägu'ughajpāhajxy:

—Waambátyhøch ja'a cu'ughajxy xñānomy pōnhøch høøch ja'a Diosquexypā.

¹⁴Mānit hajxy yhadsooyy:

—Nāje'e ja'a cu'ughajxy miāna'añ cooc miich mJuan māyajnābejpā; nāje'e hajxy miānaambā cooc miich mhElíasā; nāje'e hajxy miānaambā cooc miich mJeremíasā, ja'a Diosmādia'agy jecy yajwá'xäbā; nāje'e hajxy miānaambā cooc miich mDiosquexiä.

¹⁵Mānitā Jesús miānaañ:

—Míjtsäts, wāambøch mijts xñānōombā.

¹⁶Mānitā Simón Pedro miānaañ:

—Miičh je'e ja'a Cristo. Miičh ja'a Dios tøø xquiexy, ja'a jim̄ tsajpootypā. MDioshuung miičh.

¹⁷Mānitā Jesús yhadsooyy:

—Miičh Simón, Jonás miičh xyhuunghajp. Caj miičh pōn tøø xyhawaanā cooçh nDioshuungä.

Ja'a nDéedyhøch tøø xyhawaanā, ja'a jim̄ tsajpootypā. Paady miičh hoyhajt weenhajt mbaada'añ.

¹⁸Miičh jaduh̄ nnāmaaby coo miičh mxøhata'añ Pedro; je'edu'un̄ nānōomby “tsaa.” Miičhcøxpøch ja'a jāya'ay ja'a nmādia'agy hajxy may xmiäbøgaanā. Hoy hajxy cu jia ho'og, cab hajxy jaduh̄ quiuhdägoyya'añ. Cøjxta'axiøø hajxy jim̄ yhida'añ tsajpootyp. ¹⁹Nmo'owáambiøch miičh cuhdujt cooçh miičh nmādia'agy xyajwá'xät nébiøch ja'a jāya'ay ja'a nmādia'agy hajxy jaduh̄ xmiäbøjcät. Dios jaduh̄ xñajtsapxø'owáanāp nebiaty ja'a jāya'ayhajxy mhané'emät coo hajxy jaduh̄ ween quiudiuñ, coo ja'a yhaxøøgwiiinmahñdy hajxy ñajtshixø'owät.

²⁰Mānitā Jesús ja'a miägu'ughajpā yhanehm̄y coo hajxy ween quia'a mādia'agy coo je'e Cristo.

²¹Mānitxøø ja'a Jesús tiägøoyy hawāanābā ja'a miägu'ughajpāhajxy cooc hānajty jim̄ ñøcxa'añ Jerusalén, cooc hānajty jim̄ yajtsaachpøga'añijām ja'a martuumädøjc møødä teedywiindsøn̄hajxy møødä ley-yajnahixøøbiädøjc. Mānit miānaambā cooc hānajty yagho'oga'añii, pero cumáaxcäc hānajty jiuypio'oga'añ.

²²Mānitā Pedro ja'a Jesús yajwooduuty. Mānitā Jesús wyiingugapxøoyyā:

—Wiindsøn̄, cab jaduh̄ yhooyyā miäbaadä coo jaduh̄ mjädät mhabétät.

²³Mānitā Jesús wia'wiimbijty. Mānitā Pedro yhojjä:

—Jua'ads jim, møjcu'u. Náxyhøch miich xjijcapxø'oy. Jaduhñ miich mwiiimahñdy nebiä jäya'ayhajxy wyiimahñdyhatiän. Caj miich mwiiimahñdy tiuhñä nebiä Dios wyiimahñdiän.

²⁴Mänitä Jesús nāmaayy ja'a miägu'ughajpä:

—Põñhøch nmädia'agy jaduhñ xpiadu'ubøgáañäp, weenä yhamdsoo cuhdujt ñajtshixø'oy; ween jaduhñ chaachpøjpat nébiøch ndsaaçhpøga'añän; weenç nmädia'agy xjijøjtägøøyyä. ²⁵Põñ yhamdsoo wiimahñdy ja wi'i yaghidaamb, cuhdägoyyaamb je'e. Pero coo põñ jaduhñ yhó'ogät ja'a høøhcøxpä, nä'ägä hodium je'e nõcxy miähmø'owa'añ. ²⁶Coo põñ jaduhñ quiuhdägóyyät, hoy jaduhñ yaa tøø jia mäyøøhaty hädaa yaabä naaxwiin, caj tii piaada'añ. Cabä jiu gyhajt jaduhñ piaadaañnä, homiäduhñtiä xädø'øn cu jia yec.

²⁷⁻²⁸Cädaactägatsáambøch yaa, høøch ja'a Diosquexypä. Ja'a Diosmóonsøch nmøødcäda'agaamby, ja'a hajxy jim tsajpootypä. Møødhøch nDeedy quiuhdujt jaduhñ ngädaactägatsa'añ. Mänitøch ja'a juyhajt hānajtjy njaac mo'owa'añ pønjatjy hānajtjy hoy tøø wiädity. Pero pønjatjy hānajtjy hoy tøø quia'a wädity, je'eds hajxy hānajtjy yajcumädownāañäp. Mänitøch ndägø'owa'añ hanehmbä. Tøyhajt mijts nnāma'ay, cooçh hānajtjy ngädaactägatsa'añ, mänitøch hajxy näjé'eyyäm xyhixa'añ, ja'a hajxy yaa tänaabiä. Cajnä hajxy hānajtjy yho'ogyñä.

17 Cudädujxøø ja'a Jesús ja'a Pedro wioonøcxy

tunnähgøxp møødä Jacobo møødä Jacobo yhuch Juan. Nämädaaxc hajxy jaduhñ ñøcxy møødä Jesús. ²Mänitä Jesús wiing jiajty maa ja'a Pedro wyiinduuhajxiän. Jaduhñdsä wyiin jijøp cøjx jiaty nebiä haambän. Mänitä wyit hobiaob jiajty. ³Mänitä Moisés hajxy ñäguehxtøø'xy møødä Elías. Mänitä Jesús hajxy tiägøøyy møødmädiaacpä. Coø hajxy yhiixä, ⁴mänitä Pedro ja'a Jesús nāmaayy: —Wiindsøn, hoyøøyy jaduhñ coo højts yaa tøø nbéjtäm. Pø chojpiä mjoot jaduhñ, ween højts tøjquemyhuung tægøøg nhuuc hädiuñ ja'a mijtsøcøxpä cøjtu'ug; tu'ug miich mjje'e, tu'ug ja'a Moisés jie'e, tu'ug ja'a Elías jie'e.

⁵Mädiaaccujc ja'a Pedrohajxy ñähgädaacpejtä ja'a nāma'a. Hajajp ja'a nāma'a hānajtjy. Mänit hajxy miädooyy quiapxy nāma'ajooty:

—Høøch nHuung hädaa; njaanç tehñ chójpiøch. Xyagjootcugøøbiøch. Huuc mädoowä ja'a miädia'agy hajxy.

⁶Coo ja'a Pedrohajxy jaduhñ miädooyy, mänit hajxy miägutscädaacy naaxwiin. ⁷Mänit hajxy ñähdoonä ja'a Jesús. Mänit hajxy nāmaayyä:

—Pädø'øg hajxy; ca'a hajxy mdsähgø'oy.

⁸Mänit hajxy piädø'cy. Mänit hajxy yhiixwädijty. Cab hajxy põñ yhiixy; jagooyyä ja'a Jesús hajxy nidiuhñ yhiixy.

⁹Mänit hajxy miänajcy tunnähgøxp. Mänitä Jesús ja'a Pedro nāmaayy:

—Cab hajxy põñ mhawāañät nebiaty hajxy jim tøø mhixy

tunnähgøxp, høxtä cónøch hānajtj
tøø njujypiojtägach, høøch ja'a
Diosquexypä.

¹⁰Mänitā Jesús hajxy miäyajtøøyy:
—Yø'ø ley-yajnahixøøbiädøjc, tii
hajxy coo miāna'añ cooc ja'a Elías
miejtsø'øga'añ.

¹¹Mänitā Jesús yhadsooyy:
—Tøyhajt jaduhñ coo ja'a Elías
hijty miejtsø'øga'añ. Mänit hijty
cøxiä wiinä yaghoyø'owa'añ. ¹²Pero
mijts jaduhñ nnāmaaby coo ja'a
Elías tøø jia hoy; pero caj yhøxcajpä.
Jaduhñ tiuunä nebiä jäya'ay
jioothajxy chojquiän. Jaduhñch
hajxy xhaačhtiuuaambä, høøch
ja'a Diosquexypä.

¹³Mänitā Pedrohajxy wyiinjuøøñä
coo ja'a Jesús ja'a Juan
mäyajnäbejpä hānajtj miädia'agy.

¹⁴Mänitā Jesús hajxy miehch maa
ja'a jäya'ayhajxy miayyän. Mänitā
tu'jäya'ay ja'a Jesús wyiinjičādaacy.
Mänitā Jesús ñāmaayyā:

¹⁵—Wiindsón, høøch nhuung
näxúu'tsác. Mayhooc jaduhñ tøø
quiädāy pojmoød. Hanaxiä jaduhñ
chaachpøcy. Naxy jiøøngädawø'øy;
naxy ñøøgädawø'øy. ¹⁶Yaačh
tøø nja yajmech maa miičh
mmägu'ughajpädøjcän, pero cab
hajxy hijty yajnahwa'adsa'añ.

¹⁷Mänitā Jesús miānaañ:
—Caj mijts mnä'ägä mæbøcy.
Cábøch nmeex'tugaannä cooçh
mijts njaac møødhídät. Mämín ja'a
pigāna'c yaa.

¹⁸Mänitā Jesús ja'a mõjcu'u hojy.
Mänitiä ja'a pigāna'c ñāhwaach.

¹⁹Mänitā Jesús hawiing
ñāmaayyā ja'a miägu'ughajpädøjc.
—Tii højts ja'a mõjcu'u hijty coo
nga'a yajpædsøma'añ.

²⁰Mänitā Jesús yhadsooyy:
—Caj mijts hijty mnä'ägädä
mæbøcy. Tøyhajt mijts nnāma'ay,
coo hajxy jaduhñ mmæbøgät
howieeñtiä, mänit hajxy
hotyijä mjádät. Høxtáhmmäts
yø'ø tun, coo yø'ø tun hajxy
mnämä'awät: “Jua'ads jim, nõcx
wiingtuum”; mänitäts yø'ø tun
jiaančh jäwá'adsät. Hotyijä hajxy
jaduhñ mjádät coo hajxy tøyhajt
mmæbøgät. ²¹Mänitā mõjcu'u
hajxy myajpædsømmät coo ja'a Dios
hajxy mba'yá'axät, coo hajxy
mhamajtsch-hádät.

²²Jimä Jesús hajxy hānajtj
wiädity Galileanaaxooty. Mänitā
Jesús miānaañ:

—Xyajcø'ødägø'owáambøch ja'a
cu'ughajxy, høøch ja'a Diosquexypä.
²³Mänitøch hajxy xyaghø'oga'añ.
Pero cudägøøgxøøch
njujypiojtägatsa'añ.

Mänitā miägu'ughajpädøjc-hajxy
jiootmadiägøøyy.

²⁴Mänitā Jesús hajxy
miejch Capernaum. Mänitā
Pedro miäyajtøøwä ja'a
yajnahjuudiutpædøjc:
—Nej, cabä mwiindsønhajxy
ñāhjuudiu'udy maa ja'a tsajtøjcänä.

²⁵Mänitā Pedro yhadsooyy:
—Ñāhjuudiutyp pues.
Mänitā Pedro tiøjtægøøyy maa
ja'a Jesús hānajtj yhāñ'ayän.
Mänitā Jesús ja'a Pedro ñāmaayy:
—Simón, nej miičh mmāna'añ,
ja'a gobiernāhajxy, pøn hajxy
yajnahjuudiutyp, yhamdsoo cu'ug,
tøgä wiingjäya'ay.

²⁶Mänitā Pedro yhadsooyy:
—Wiingjäya'ay hajxy
yajnahjuudiutyp.

Mänitá Jesús miánaañ:

—Entonces, cabá yhamdsoo cu'ug hajxy yajnáhjuudiu'udy. ²⁷ Pero cábøch pøn nyagjootma'ada'añ. Nøcx mejypia'a. Jiibiä xuhñdy mnøøwobø'owät. Coö hacx mxúyät, mänit myajpädsømat. Jiibiä xädø'øn mbaada'añ hacxhaawjooty. Mädyhadaamb jaduhñ coö nämetsc nyajniñhjuudiúutämät. Mänitáts nøcxy mnähjuudiu'udy.

18 Mänitá Jesús miägu'ughajpädøjc-hajxy miejch maa ja'a Jesús wyiinduumän. Mänitá Jesús miäyajtøwä:

—Pønjaty ja'a mõjtuung mõød maa ja'a Dios yhane'emiän.

²Mänitá Jesús ja'a pigäna'c tu'ug miøjyaaxy. Mänitá pigäna'c cujc piädaacä. ³⁻⁴Mänitá Jesús miánaañ:

—Ja'a pigäna'c-hajxy, cabä mõjtuung hajxy ñiyhøxtáayyäxä. Pøn ja'a mõjtuung yaa ñiyhøxtáayyäxäp hädaa yaabä naaxwiin, cab jim tiägø'owa'añ maa ja'a Dios wyiinduumän. Pero pøn ja'a mõjtuung jaduhñ ca'a høxtaaby, nebiä hädaa pigäna'c jaduhñ quia'a høxta'ayän, je'eds ja'a mõjtuung jaduhñ jim paadaamb maa ja'a Dios yhane'emiän. Tøyhajt jaduhñ. ⁵Pøn jaduhñ mägu'ugpøgäp hädaa pigäna'c jaduhmbä maa ja'a høøchcøxpän, jaduhñ mäwíinhøch høøch xmiägu'ughaty.

⁶Hädaa pigäna'c-høch nmädia'agy hajxy xmiäbøjcäbä, coö hajxy pønjaty jiojcapxø'owøøjät, maas hoy hit jaduhñ coö ja'a mäjøjcapxøøbiä paan yajyo'xodsø'owøøjät y coö miejjiäwipø'owøøjät hagomduum.

⁷Hanaxiä hajxy yaa chaaçhpøcy ja'a hajxy hädaa yaabä naaxwiin tsänaabiä. Paady hajxy chaaçhpøcy coö ja'a jøjcapxøøbiä hajxy piaady. Pero Dios jaduhñ yajcumädowaamb ja'a mäjøjcapxøøbiä.

⁸⁻⁹'Coo tii hoyhadsojnä mhíxät, cab jim mmøjhée'pnät ni mga'a nähdonät. Jaduhñ mnibiäda'agøøjät nebiä wiindspän, nebiä cø'øducpäñ. Pø caj, jim haxøøgtuum mga'awa'añ.

¹⁰'Ca'a yø'ø pigäna'c hajxy mxøøghaty. Cueendähájtäp hajxy jaduhñ. Ja'a Diosmoonsähajxy ja'a Dioswiinduumbä, je'edsä pigäna'c hajxy cueendähajp. ¹¹Høøch mõjhajp. Yaaçh tøø ngäda'agy hädaa yaabä naaxwiin nébiøch ja'a jäya'ayhajxy nyajnáhwá'adsät coö hajxy hijty quiuhdägoyya'añ.

¹²'Tsøc mädiáacäm. Jii tu'jäya'ay meeg mägo'x miøødä. Coö tu'ug tiägóyyät, mänit nøcxy yhøxta'ay. Jimä meeghajxy miähmø'øy tunhøjx, ja'a hajxy tøø quia'a tägóyyäbä. ¹³Y coö piáadät, mänit xioønða'aga'añ nägø'ø nädecypiä. Tøyhajt jaduhñ. ¹⁴Jaduhñ mäwíinät je'e neby højts nDeedyhájtäm ja'a jim tsajpootypä; cabä jioot chocy coö ni mädyii pigäna'c quia'a cuhdägóyyät.

¹⁵'Coo ja'a mmäjøøn coö ja'a mmädøjc jaduhñ xmiägädiéeyät, mänit hamee'ch mmägäpax mhané'emät. Coö jaduhñ xmiäbøjcät, mänit jaduhñ yhoyø'owät. ¹⁶Pero coö jaduhñ xquia'a mäbøjcät, mänitä jäya'ay mmøjyá'axät mejtstägøøg neby hajxy jaduhñ tiestigohádät waambaty hajxy hánajty mmädia'agy. ¹⁷Y coö ni jaduhñ

quia'a mábógát, mänítäts ja'a hermanodøjc mhawáañät. Y coo ni jaduñ quia'a mábógát, mänit hajxy mbuhwá'adsät.

¹⁸Tøyhajt mijts nnäma'ay coo ja'a Diosmädia'agy hajxy yaa myajwá'xät hädaa yaabä naaxwiin nebiä jäya'ayhajxy jaduñ hoy yhidät. Dios hajxy jaduñ xyhané'emäp nebiaty hajxy mmädiá'agät.

¹⁹Jaduñ mijts nnämaabiä, coo hajxy nämetsc mnøcxät tu'ugmädia'agy hädaa yaabä naaxwiin, y cooç nDeedy hajxy homiädyiibä xmiäyujwáañät ja'a jim tsajpootypä, mänit jaduñ xmió'owät. ²⁰Coo hajxy nämetsc nädägøøg tiu'ugmúgät maa ja'a høøçhcøxpän, jimhøch jaduñ nhidaambä cujc.

²¹Mänitä Pedro ja'a Jesús nänäaayy:

—Wiindsøn, cooç nmäjøøn cooç nmädøjc jaduñ xmiägädiéeyät, naaghøoc-høch jaduñ nmämée'xät. Nej, mädøyyä jaduñ cooç juxtujc-hooc nmämée'xädä.

²²Mänitä Jesús yhadsooyy:

—Cab jaduñ miädøyyä. Cunaaghøoc hänajty xmiägädieey, mänit mmämée'xät.

²³Neby hajxy hoy mwiinjuø'øwät nebiä Dios yhane'emiän. Tøoc yajmäbáatäm nebiä rey tu'ugän. Mänitä rey wyiinmahñdyhajty coo ja'a mioonsähajxy ñuu'xycápxät. ²⁴Naamnä hänajty ñuu'xycapxtsooñ coo ja'a mioonsä tu'ug miejch. Mamyillón hänajty miänuu'xyhadyii. ²⁵Pero cabä mioonsä xädø'øñ hänajty miøøðä neby jaduñ yajnähwá'adsät.

Mänitä rey miänaañ coo ween tioogøøjät møødä yhuung møødä tio'oxy, møødä chømy møødä tiajy, cøxiä nebiä ñuu'xy jaduñ ñähwá'adsät. ²⁶Mänitä rey wyiinjjcädaacä ja'a miøonsäm. Mänit miänuu'xtaacä: “Wiindsøn, mee'x. Cøxáambøch nyega'añ.” ²⁷Mänitä wyiindsøn hojioot ñä'a møødhajty. Mänit miänaañ coo tøø ñähwa'açh, coo ween yhawa'adspädsømy. ²⁸Coo ja'a moonsä jim chohñ, mänitiä miämoonsä tu'ug piaaty. Mejtsmil tægøøgmil hänajty miänuu'xyhadyii. Mänitä miämoonsä yo'mämadsøoyy.

Mänit miänaañ: “Høøçh móøyyäc mädúhñtiøch miich xmiänuu'xyhaty.” ²⁹Mänit wyiinjjcädaacä. Mänit miänuu'xtaacä: “Mee'x, cøxáambøch nyega'añ.” ³⁰Pero cabä craa hojioot ñä'a møødhajty. Mänitä mähdiøjc yajtsuumä. Jiiby jaduñ yhida'añ pujxtøgooty høxtä coonä quioxy yégät.

³¹Coo ja'a moonsädøjc-hajxy yhiijxy, ja'a hajxy hänajty jaac jimä, mänit hajxy jiootmabiøjcy. Mänitä wyiindsøn hajxy hoy yhawaanä nebiaty hänajty tøø jiaty tøø yhabety. ³²Mänitä rey ja'a mioonsä miøjyaaxy, ja'a hänajty tøø ñähwá'açhäbä. Mänit miänaañ: “Haxøøghäna'c miich. Tøøçh miich cøxiä nyajnähwa'açh mädúhñtiøch miich hijty xmiänuu'xyhaty. Páadyhøch miich tøø nyajnähwa'açh, cooçh miich tøø xmiänuu'xta'agy. ³³Jaduñ miich mmämoonsä cu mnäxuu'ch nébiøch miich tøø nnäxuu'chän.” ³⁴Hoyhoy ja'a rey jaduñ yhawa'andaacy.

Mänit miänaaṅ coo ja'a mioonsä quiumädówät høxtä coonä hānajty tøø yajñähwa'ačh mäduhñtiä hānajty miānuu'xyhadyii.

³⁵Jaduhñčh nDeedy mijts xyajcumädowaambä, ja'a jim tsajpootypä, coo ja'a mmäjøøn coo ja'a mmädøjc hajxy mگا'a mämée'xät hamuumdu'joot.

Mänitä Jesús jaduhñ miädiaacmaayy.

19 Mänitä Jesús jim chohñ Galilea. Mänit jim ñöcxty Judeanaaxooty. Jimäts je'e Jordánmøjnøøhawiiimb maa ja'a xøø piädsømiän. ²Mänitä jäya'ayhajxy may piadu'ubøjcy. Mänit hajxy yajmøcpøjcä ja'a Jesúsäm.

³Mänitä Jesús ñämejtsä ja'a fariseoshajxy näje'ebä. Mänitä Jesús hajxy miäyajtøoyy:

—Nej, hoy jaduhñ coo jäya'ay ja'a tio'oxiøjc nä'ä nägoobä yhøxmädsädä.

Paady hajxy jaduhñ miänaaṅ, jia jøjcäpxøøwaañ ja'a Jesús hajxy jaduhñ. ⁴Mänitä Jesús yhadsooyy:

—Nej, cajñä ja'a Diosmädia'agy hajxy mgapxyñä. Jiiby jaduhñ myiñ coo ja'a Dios jäya'ay jecy quiunu'u'xy ya'adio'oxy. ⁵Paadiä ya'adiøjc ja'a tiaj ja'a tieedy hajxy ñähgueecnä, coo ja'a to'oxiøjc hajxy wyiingpøjnä. Nämetsc hajxy jaduhñ ñimiøødtsäna'awāaṅänä. ⁶Jaduhñ hajxy yhidaaṅnä nebiä tu'que'expän. Cab jaduhñ yhooyä coo hajxy myajniyhøxmadsøøjät pønjaty ja'a Dios jaduhñ tøø quiunu'u'xy coo hajxy ñimiøødtsäna'awøøjät — nømä Jesús miänaaṅ.

⁷Mänitä Jesús hajxy miäyajtøøgumbä:

—Tii ja'a Moisés jaduhñ coo miänaaṅ coo ja'a to'oxiøjc yhøxmadsøøjät cuhdujthaam.

⁸Mänitä Jesús miänaaṅ:

—Coo ja'a mgopc-hajxy jaduhñ wyi'i xiexä, paadiä Moisés hajxy jaduhñ xquihdujtmoooy coo ja'a mdo'oxiøjc hajxy mhøxmädsät. Pero cabä Dios jaduhñ quiunu'u'xy. ⁹Cab jaduhñ yhooyä coo wiingto'oxiøjc mwiingpøjtägätsät, pø nä'ä nägoobä ja'a mdo'oxiøjc hānajty tøø mhøxmach. Ni jaduhñ quia'a hoyyä coo høxmachtio'oxiøjc mwiingpøgät.

¹⁰Mänitä Jesús ñämaayyä ja'a miägu'ughajpähajxy:

—Maas hoyyädä'a jaduhñ coo mگا'a nä'ägädä pøgät.

¹¹Mänitä Jesús miänaaṅ:

—Cab hajxy nägøxiä wyiinjuøøwa'añ hädaaduhmbä. Jayooyyä hajxy jaduhñ wyiinjuøøwa'añ pønjaty ja'a Dios jaduhñ tøø yajwiinjuøøy.

¹²Näje'e ja'a ya'adiøjc-hajxy ma'ad myiñguia'ay; paady hajxy quia'a ñibiøgyii. Näje'e hajxy yajtsucy. Coo ja'a Dios hajxy wyiingudsähgøøwa'añ, paady hajxy näje'e quia'a nibiøgyii. Pøn jaduhñ mee'xtugaamb, ween miee'xtucy.

¹³Mänitä pigäna'c-hajxy näje'e wiomejtsä maa ja'a Jesús wyiinduumän nebiä Jesús ja'a hoyhajt jaduhñ mió'owät. Pero cabä Jesús ja'a miägu'ughajpähajxy jaduhñ yhojiäwøoyy. Mänit hajxy yhojjä, ja'a pigäna'c hajxy hānajty tøø wioméchäbä. ¹⁴Mänitä Jesús miänaaṅ:

—Caj, wéenhøch ja'a pigäna'c-hajxy xñämech. Ca'a hajxy

mhojy. Coo ja'a Diosmädia'agy hajxy jaduhñ mmäbögät nebiä pigäna'c-hajxy miäbøquiän, mänitä Dios hajxy jaduhñ xyhuunghádát.

¹⁵Coo ja'a Jesús ja'a pigäna'c-hajxy hänäjty tøø mio'oy ja'a hoyhajt, mänit jim chohñ.

¹⁶Mänitä Jesús jäya'ay tu'ug ñämejtsä. Mänit miäyajtøøwä: —Wiindsøn, tii hóybøch ndúnäp nébiøch njugyhádát cøjxta'axiøø nebiä Dios jiugyhätian.

¹⁷Mänitä Jesús yhadsooy: —Tiiçh ja'a hoybä coo xmiäyajtøy. Caj pøn jaduhñ yhooyä; jagooyyä Dios jaduhñ yhooyä. Pø chojpy ja'a mjoot jaduhñ coo mjugyhádát cøjxta'axiøø nebiä Dios jiugyhätian, mgudiúnäp ja'a Diosmädia'agy jaduhñ.

¹⁸Mänitä craa miänaañ:

—Mädyiibä.

Mänitä Jesús yhadsooy:

—Caj mjäya'ay-yaghó'ogät; caj mméedsät; caj pøn mnähøønó'owät; ¹⁹mwiingudsähgó'owäp ja'a mdaj ja'a mdeedy; mmøødnijootpaadøøjäp ja'a mmäjøøn ja'a mmädøjc hamuumdu'joot.

²⁰Mänitä craa miänaañ:

—Tøøch jaduhñ ngøxy cudiuñ. Múutsnøch hänäjty cooçh jaduhñ ngudiuundsohñ. Tijátyhøch jaduhñ nga'a cudiuumyñä.

²¹Mänitä Jesús miänaañ:

—Pø mjaançh cudiunaamby hoy yaxón, nøcx yø'ø mje'le cøxy toog. Mänitä häyoobädøjc mnä'a mó'owät cøxiä. Jaduhñ jim mdägó'owät tsajpootyp. Mänitøch jaduhñ xpiadu'ubögät.

²²Coo ja'a craa jaduhñ miädooyy, mänit jaduhñ jiootmadiägøøyy.

Hix, mäyøø ja'a craa hänäjty. Mänit wyiimbijnä.

²³Mänitä Jesús ñämaayy ja'a miägu'ughajpähajxy:

—Näl'ägä tøyhajt mijts nnäma'ay, tsip jaduhñ coo mäyøøhänä'c jim ñøcxät tsajpootyp. ²⁴Tøyhajt jaduhñ, cab jaduhñ jiaty tsipä coo ja'a camello ñäxät xuhñdyjutjooty. Maas tsip coo mäyøøhänä'c jim ñøcxät tsajpootyp.

²⁵Coo hajxy jaduhñ miädooyy, mänit hajxy yagjuøøyy. Mänit hajxy ñimiäyajtøøwä:

—Pønds jaduhñ nähwá'adsäp.

²⁶Mänit hajxy wyiinhee'ppejtä ja'a Jesúsäm. Mänitä Jesús miänaañ:

—Cabä jäya'ayhajxy jaduhñ ñä'a jájpät; pero hotyiijä ja'a Dios jaduhñ jiaty.

²⁷Mänitä Pedro miänaañ:

—Wiindsøn, tøø højts cøxiä nnähgue'egy nhøxyo'oy. Tøø højts miiçh nbadu'ubøjnä. Tii højts jaduhñ nbaadaamby.

²⁸Mänitä Jesús yhadsooy:

—Näl'ägä tøyhajt mijts nnäma'ay, coo ja'a xøøwiimbä naaxwiimbä cøxiä jieemdagätsät, mänitøch jim nøcxy nhøxta'aga'añ maa ja'a Dios wyiinduumän, høøch ja'a Diosquexypä. Jimhøch nhane'ema'añ. Y mijts, jim hajxy jaduhñ nøcxy mhøxta'agaambä pønjátýhøch yaa tøø xpiawädity. Cødu'ug häñaabiejt hajxy jim mbaada'añ, majmetspä. Jim mijts ja'a judiøshajxy mhane'ema'añ, ja'a majmetsc-hagajtpä. ²⁹Pønjatý ja'a tiøjc jaduhñ tøø nähgue'egy ja'a høøçhcøxpä, o ja'a piuhya'ay ja'a piuhdo'oxy, o ja'a tiaj

ja'a tieedy, o ja'a yhuung ja'a tio'oxy, o ja'a ñaax, majiäduhñtiä piaattägatsa'añ, y cøjxta'axiøø jiugyhada'añ nebiä Dios jiugyhatian. ³⁰ Ja'a hajxy mõjtuungmøødpä jäda'ahaty, nämay ja'a tiuung hajxy yajtägoyya'añ; y ja'a mõjtuung hajxy jäda'ahaty ca'a møødpä, nämay hajxy miøjtuungpaada'añ.

20 'Maa ja'a Dios yhane'emiän, tsøc yajmäbáatäm nebiä cudsatypcamän tu'ug. Jopy jaduhñ tiu'ubøjcy moonsähøxtaabiä, pøn jaduhñ miøødtúnäp ja'a chaatypcamjooty. ² Coo piaaty, mänit hajxy quiojyquiapxtiuuñ coo ja'a xiøøhajxy jiuyáanäxä mägooxmiljaty. Mänit hajxy quiejxä tuumbä maa ja'a tsaatypcamän. ³ Møjpetyxiøø ja'a cudsatypcam tiu'ubøjcumbä moonsähøxtaabiä. Mänitä jäya'ay jim yhiixy maa halaplaazän. Nämetsc nädägøøghajxy hänäjty jim tiäna'ay. Cabä tuung hajxy hänäjty miøøpä. ⁴ Mänit hajxy ñämaayyá: "Jam hajxy cudún maäch ndsaatypcamän. Nä'a mädøyyäjuøøbyhøch jaduhñ njuya'añ." Mänit hajxy ñøxcy cuduumbä. ⁵ Mänitä cudsatypcam yhooguiumbä moonsähøxtaabiä cujyxiøøho'ogy. Mänit yhooguiumbä mänacyxiøø. ⁶ Møjmänacyxiøø tiu'ubøjcumbä. Jimä jäya'ay yhiixy halaplaaz. Cabä tuung hajxy hänäjty miøøpä. Mänit hajxy ñämaayyá: "Tii mijts coo myaajä. Tii hajxy yaa coo mwi'i xiunaxy." ⁷ Mänit hajxy miänaañ: "Cab højts pøn waamb tøø xñäma'ay." Mänit hajxy ñämaayyá: "Jam hajxy

cudún maaäch nnaaxootiän. Nä'a mädøyyäjuøøbyhøch jaduhñ njuya'añ." ⁸ Coo chuujøøyy, mänitä cudsatypcam ja'a moonsäwiindsón mõjhajpä ñämaayy: "Mmøjyá'axäp yøø moonsähajxy. Mänit hajxy mmäjúyät. Pønjaty høxhaam tøø jiaac tægøøy cuduumbä, je'eds hajxy jawyiin mmäjuuüchóonäp. Y pønjaty jawyiin tægøøyy cuduumbä, je'eds hajxy høxhaam mmäjúyáp." ⁹ Mänit hajxy yajmäjuuyy. Jawyiin hajxy yajmäjuuyy ja'a hajxy hänäjty tøø tiägøøyábä mänacyxiøø. Pedyii hajxy jaduhñ miooyyä mägooxmiljaty. ¹⁰ Ja'a hajxy hänäjty tøø tiägøøyábä jayøjp, jaduhñ hajxy hänäjty tiajy miay coo hajxy maas majiaty mio'owa'añii. Pero jaduhñ hajxy miøoyyábä mägooxmiljaty. ¹¹ Coo hajxy jaduhñ yajmäjuuyy tu'cuhdujtä, paadiä cudsatypcam hajxy miäjootma'ty. ¹² Mänit hajxy miänaañ: "Yøø häna'c-hajxy høxhaam tøø jiaac tehñ tiägøøyábä, tu'hóráyyä hajxy jaduhñ ñä'a tuuñ. Pero jaduhñ miich tøø mmäjuy neby højts tøø xmiäjúyyän. Cab jaduhñ yhooyy. Tøø højts tu'xøø nmee'xtucy. Jaanç tehñ yhan jaduhñ. Hamäjaa højts jaduhñ tøø nmänaxy." ¹³ Mänitä cudsatypcam yhadsooyy: "Mägu'ughajpä, cábøch miich tøø nyajniwyiindoyii. Jaduhñ ngojyquiapxtiúunäm cooçh miich mägooxmil nmo'owa'añ. ¹⁴ Chaadsä mmäjuhñdy. Nøcxnä. Chójpjøch njoot jaduhñ cooçh yøø craa nmó'owät nébiøch miich tøø nmo'oyän, yøø craa høxhaam tøø jiaac tægøøyábä. ¹⁵ Nej, cábøch ja'a cuhdujt jaduhñ nmøøpä cooçh

nxädø'õñ jaduñ nyajwá'xät nébiøch njoot choquiän. Tögä paady jaduñ mjootma'adiä, cooçh hojioot nmøødä." ¹⁶Pønjaty hõxhaam tægøoby, copc-hadaamb je'e. Pønjaty jawyiin tægøoby, hõxhaamø'øwaamb je'ebä. Nämaj hajxy jaduñ tøø jia mõjya'axyii, pero näweeñtiä hajxy tøø wyiimbiyii.

¹⁷Mäniä Jesús hajxy jim choññ, ñøcxy hajxy Jerusalén. Nämaj ja'a cu'ughajxy hänäjty ñøcxy. Tu'haamnøcxpä ja'a Jesús hajxy yohwia'xy møødä miägu'ughajpädøjc-hajxy nämajmetspä. Mäniä Jesús miänaañ:

¹⁸—Yam hajxy nnøcxäm Jerusalén. Høøch ja'a Diosquexypä, jimhøch häna'c xyajcø'ødägø'øwa'añ maa ja'a teedywiindsøn'hajxiän, maa ja'a ley-yajnahixøøbiädøjc-hajxiän. Jimhøch hajxy xyajyagho'oga'añii. ¹⁹Mänitøch hajxy xyajcø'ødägø'øwa'añ maa ja'a jäya'ayhajxiän, ja'a jäguemnaaxtsohmbä. Mänitøch hajxy xwyiinwoona'añ. Mänitøch hajxy xwiobho'oga'añ. Mänitøch hajxy xmiøjpahbeda'añ cruzcøxp. Pero cudägøøgxøøch jaduñ njuyypiøga'añ cooçh hänäjty tøø nho'ogy.

²⁰Jaduñä Jesús miägu'ughajpähajxy hänäjty xiøhaty metscä, Jacobo møødä Juan. Zebedeo ja'a tiedyhajxy hänäjty xiøhaty. Coo ja'a Jesús hajxy hänäjty ñøcxy Jerusalén, jimä Jacobo tiajhajxy hänäjty piawädijpä. Mänit miejch maa ja'a Jesús

wyiinduumän. Mäniä Jesús wyiinjiçädaacä, miäyujwaanä ja'a mayhajt.

²¹Mäniä Jesús miänaañ:
—Tii mayhájthøch jaduñ ndúnäp. Mäniä tajiäya'ay yhadsooyy:
—Coo miich hänäjty tøø mgoody maa mhane'ema'añän, mäniä mhané'emät cooçh nhuunghajxy yaghøxta'agøøjät hahooyhaampiä møødä hanajtyhaampiä maa miich mwiinduumän.

²²Mäniä Jesús ja'a nämajmetspä ñämaayy:

—Cab hajxy jaduñ mnajuø'øy tii hajxy jaduñ myujwaamby. Nej, hoy hajxy jaduñ mjada'añ mhabeta'añä nébiøch jaduñ njada'añ nhabeta'añän.

Mäniä hajxy yhadsooyy:
—Hoy pues.

²³Mäniä Jesús miänaañ:
—Näl'ägä tøyhajt jaduñ coo mijts jaduñ mjadaambä mhabetaambä nébiøch njada'añ nhabeta'añän. Pero cábøch cuhdujt jaduñ nmøødä coo hajxy jim mhøxtá'agät maaçh nwiinduumän, hahooyhaampiä møødä hanajtyhaampiä. Pønjátyhøch ja'a nDeedy jaduñ tøø yajnahdijy, je'leds jaduñ jim høxta'agaamb maaçh nwiinduumän.

²⁴Coo ja'a Jesús miägu'ughajpädøjc-hajxy jiaac mädooyy ja'a jaac nämajcpä, mäniä Jacobo hajxy miäjootma'ty møødä Juan. ²⁵Mäniä Jesús jämiøød quiøxy mõjyaaxy. Mäniä miänaañ:

—Mnajuøøby hajxy coo ja'a gobiernahajxy yhane'emy maa hajxy tiuñän. Ja'a hajxy

møjtuungmøødpä, je'eds hajxy maas hanehmb. ²⁶Pero mijts, cab hajxy jaduhñ mhane'ema'añ. Pøn ja'a mõjtuung jaduhñ tsojy maa mijtsän, tsipcøxp ja'a miägu'ughajpä piuhbédät. ²⁷Y jaanä jaduhñduhmbä, pøn jaduhñ yajcumayaamb maa mijtsän, tsipcøxp ja'a miägu'ughajpä yajtunøøjät. ²⁸Høøch ja'a Diosquexypä, puhbéjþoch jaduhñ tøø ngäda'agy. Cábøch jaduhñ nyajpuhbeda'añ. Páadyhøch yaa tøø ngäda'agy nébiøch ja'a jäya'ay jaduhñ may nnähho'tú'udät.

²⁹Tøø hajxy hänajty quioody maa ja'a cajpt hänajty xiøhatiän Jericó. Coø hajxy quiajptpädsøomy, mänitä jäya'ayhajxy may piadu'ubøjcy.

³⁰Jimä wiindspähajxy hänajty quihxna'ay tu'uba'a nämetscä. Coø ja'a Jesús hajxy miädooyy ñajxy, mänit hajxy yaaxy:

—Wiindsøn, miieh ja'a David jecy mhaphajt mdeedyhajt. Højts näxuu'tsäs.

³¹Mänit hajxy yhojja ja'a cú'ugäm, ween hajxy jaduhñ yhamoñ. Pero cab hajxy miäböjcy. Mänit hajxy tehngajnä yáaxy:

—Wiindsøn, miieh ja'a David jecy mhaphajt mdeedyhajt. Højts näxuu'tsäs.

³²Mänitä Jesús tiänaaxiøjpy. Mänitä wiindspähajxy miøjyaaxy:

—Tii mayhajt hajxy jaduhñ mdsojpy.

³³Mänit hajxy yhadsooyy:

—Højts yaghixø'cäs.

³⁴Mänit hajxy ñäxuu'tsä. Mänit hajxy wyiingudsiiwøoyy. Mänit hajxy jiaanç hijxø'cy. Mänitä Jesús hajxy piadu'ubøjcy.

21 Mäwiingoomb ja'a Jesús hajxy hänajty jim Jerusalén. Mänit hajxy miehch maa ja'a cajpt hänajty xiøhatiän Betfagé, jim mädøyyä maa ja'a Olivostunän. ²Mänitä Jesús ja'a miägu'ughajpä nämetsc ñämaayy:

—Nøcx hajxy maa yøø cajpt ximhaampiän. Jimä burrataj hajxy mbaada'añ cuxoch møødá yhuung. Mmäguejð'owäp hajxy jaduhñ. Mänit hajxy yaa mwitsmínät. ³Coø hajxy pøn waamb xñámá'awät, jaduhñ hajxy mnámá'awät coø ja'a wiindsøn jaduhñ yajmaajiaty, coø hajxy mänit mmoodiägatsa'añ.

⁴Jaduhñds tiøjiajty nebiä Diosmädia'agy-yajwa'xpä jecy quiujaahyyän:

⁵Jaduhñdsä cu'ug hajxy mhawáanät ja'a hajxy jim tsánaabiä Jerusalén:

“Huuc heeb hajxy, xiidsä mgobiernä hajxy jaduhñ xñägody burrohuungnähgøxp møødá burrataj.

Cab jaduhñ yajcumaya'añ.”

⁶⁻⁷Mänitä burrataj hajxy hoy wyich møødá burrohuung, neby hajxy hänajty tøø ñäma'ayiijän. Mänitä Jesús miägu'ughajpä wyithajxy yagjäbe'enøoyy ja'a burrohuung. Mänitä Jesús yajpejty. ⁸Jimä cu'ughajxy hänajty may tøø yhamugø'øy. Mänitä wyit hajxy ye'py tu'haam maa ja'a Jesús hänajty ñaxø'owa'añän. Ja'a jäya'ayhajxy näje'ebä, mänitä hujtshaa'x hajxy hoy ñäbuxy. Mänitä hujtshaa'x hajxy hoy ñajtswidso'øy tu'haam. ⁹Mänit hajxy nägøxiä tiägøoyy hayaaxpä:

—iViva ja'a rey David yhap yhoc!
Tsog hajxy wiingudsähgöøyyäm,
ja'a Dios tøø quiéxiabä. Weenä Dios
jim wyiingudsähgø'oyii tsajpootyp.

¹⁰Mänitä Jesús hajxy quioo'ty
Jerusalén. Coö hajxy tiägøøyy
cajptooty, mänitä cu'ughajxy
tiägøøyy haamhajpä. Mänit hajxy
nämay nīmiäyajtøøwä:

—Pøñ jäya'ay yø'øduhñ.

¹¹Mänit hajxy yhadsooyy:

—Jesús yø'ø. Nazaret
chooñ Galileanaaxooty. Ja'a
Diosmädia'agy jaduññ yajwa'xyp.

¹²Mänitä Jesús tiägøøyy
Diostsajtøgooty. Jiibiä jäya'ayhajxy
hänajty may jiuuydioogy. Mänit
hajxy yhöxquejxpädsøømä.
Mänitä xädø'øñguuiwijtspädøjc
ja'a mieexä hajxy yajtsitø'cäxä
møødä palomatoop'ädøjc ja'a
yhänaabiejthajxy. ¹³Mänitä Jesús
miänaañ:

—Jaduññ myiñ cujaay maa ja'a
Diosmädia'aguiän: “Jue'ečh ndøjc
hajxy xwiáañät coočh hajxy jaduññ
jiiby xpia'yá'axät.” Dios jaduññ
mänaañ; pero mijts jaduññ mwa'añ
meedsøhñdy podøhñdy.

¹⁴Mänitä Jesús nämejtsä ja'a
wiindspä møødä tecymia'adpä.
Jiiby hajxy hänajty ñä'ägä
hity tsajtøgooty. Mänit hajxy
yajmøcpøjcä yajmäbaadøøyyä.
¹⁵Jiibiä pigäna'c-hajxy hänajty
wyi'i ya'axy tsajtøgooty: “iViva
ja'a rey David yhap yhoc!” Ja'a
teedywiindsøn'hajxy møødä
ley-yajnähixøøbiädøjc-hajxy, coö
hajxy yhijxy nebiä Jesús ja'a
hoy-yagjuøøñäjatypä hänajty
yajcähxø'øguiän, coö hajxy
miädooyy coö pigäna'c-hajxy

hänajty wyi'i ya'axy, mänit hajxy
yhawa'andaacy. ¹⁶Mänitä Jesús
ñämaayyä:

—Nej, mmädooby jaduññ
waambaty hajxy ya'axiä.

Mänitä Jesús yhadsooyy:

—Jexio'ch, nmädøobiøch jaduññ.
Pero mijts, nej, cajnä hajxy
jaduññ mmädoyhatyñä nebiä
Diosmädia'agy myiñän cooc ja'a
Dios jaduññ tøø miäna'añ coö ja'a
pigäna'c-hajxy ween yhöy maa ja'a
Dioscøxpän.

¹⁷Mänitä Jesús hajxy jim chohñ.
Mänit hajxy ñøcxy maa ja'a cajpt
hänajty xiøhatiän Betania. Jim
hajxy jaduññ chuunajxy.

¹⁸Coö jioböøyy, mänitä Jesús hajxy
wyiimbijty. Yähó'cäp hajxy
hänajty. ¹⁹Tu'haamnøcxpä piids
hajxy jaduññ piaaty. Pero cabä tii
tøøm hänajty miøødä. Haagä haay
hänajty je'e. Mänitä Jesús ja'a piids
ñämaayy:

—Ni mänaa miičh mga'a
tøømbejtägatsaannä.

Mänitiä ja'a piids jaduññ
jiaančh tøøch. ²⁰Coö ja'a Jesús
miägu'ughajpähajxy jaduññ
yhijxy, mänit hajxy jiaančh
tehñ yagjuøøyy. Mänitä Jesús
miäyajtøøwä:

—Neby yø'ø piids jaduññ paquiä
jiaančh tøøch.

²¹Mänitä Jesús yhadsooyy:

—Nä'ägä tøyhájthøch
mijts nnäma'ay, coö hajxy
hamuumdu'joot mjaančh mabógät,
hotyijj hajxy jaduññ mjädät,
nébiøch yø'ø piids jaduññ tøø
nyajtø'øchän. Coö yø'ø tun hajxy
jaduññ mnämä'awät: “Jua'ads
jim, nøcx mejjiooty tægø'ow”,

mänit jaduhñ jiaančh tägó'owät.

²²Pø mjaančh mäbøjp hajxy jaduhñ, coo ja'a Dios hajxy tijaty mmäyujwá'anät, mänit hajxy jaduhñ xmió'owät.

²³Mänitä Jesús tiägøøyy tsajtøgooty. Mänit tiägøøyy yajnähixøöbiä. Mänitä teedywiindsøn hajxy miejch møødä martuumädøjc. Mänitä Jesús miäyajtøwä:

—Pøn miich cuhdujt tøø xmió'oy coo miich yaa mhané'emät.

²⁴Mänitä Jesús yhadsooyy:

—Cooch mijts ja'a tøyhajt xmió'owät nébiøch mijts cham nmäyajtøwa'añän, mänitøch mijts ja'a tøyhajt nmoodiägätsät põnhøch ja'a cuhdujt tøø xmió'oy cooch yaa nhané'emät. ²⁵Pønä Juan jaduhñ quejx mäyajnäbejpä, Dios tögä jäya'ayä.

Cab hajxy nä'a hadsooyy. Mänit hajxy tiägøøyy yajcapxiøöbiä:

—Coo hajxy nhadsóowämät coo ja'a Dios quiejxy, mänit hajxy xmiäyajtøwáanäm tii ja'a Juan miädia'agy hajxy coo tøø nga'a mäbøjcäm. ²⁶Ni jaduhñ quia'a hoyyä coo hajxy nhadsóowämät coo jäya'ay jaduhñ quiejxy; cabä cu'ughajxy jaduhñ yhojiäwó'owät. Jaduhñ hajxy miäna'añ cooc ja'a Juan Dyiosquexiä.

²⁷Mänitä Jesús nämaayyä:

—Cab højts nnajuø'øy.

Mänitä Jesús miänaañ:

—Cábøch nnägäpaxaambä põnhøch ja'a cuhdujt tøø xmió'oy cooch yaa nhané'emät.

²⁸Mänitä Jesús miänaañ:

—Chaads mijts cuento tu'ug nyajmøødmädia'aga'añ. Jii

jäya'ay hijty tu'ug; metscä yhuung hänäjty. Mänitä yhuung nämaayy tu'ug: “Huong, nøcx jim huuc tun maačh ndsaatpcamän.”

²⁹Mänitä yhuung yhadsooyy: “Cábøch nnøcxa'añ.” Pero mänit wyiinmahñdyhajty jadähooc coo jaduhñ ñøcxáangumbä. ³⁰Mänitä yhuung tu'ug nämaaguiumbä coo ñøcxät tuumbä. Mänit yhadsooyy coo ñøcxa'añ. Pero cab jaduhñ nä'a nøcxy. ³¹Mädyii craa jaduhñ cudiuun nebiä tieedy hänäjty tøø miäna'añ.

Mänit hajxy yhadsooyy:

—Ja'a jawyiinhajpä.

Mänitä Jesús miänaañ:

—Nä'ägä tøyhájthøch

mijts nnäma'ay, jawyiin ja'a yajnähuudiutpädøjc-hajxy tiägø'owa'añ Dioswiinduum møødä cuhhiñdo'oxiøjc-hajxy. Pero mijts, høxhaam mijts mdägø'owa'añ.

³²Ja'a Juan mäyajnäbejpä, hoy mijts xjia yajnähixøøyy neby hajxy hoy mwädität, cab hajxy mmäbøjcy. Ja'a yajnähuudiutpädøjc-hajxy møødä cuhhiñdo'oxiøjc-hajxy, je'eds hajxy jaduhñ mäbøjc. Hoy mijts mja hijxy coo hajxy miäbøjcy, caj mijts mwiiinmahñdyhajty jadähooc coo hajxy mmäbøjpät.

³³'Chaads mijts cuento tu'ug nyajmøødmädia'agáangumbä. Jii jäya'ay hijty tu'ug naaxmøød. Mänitä tsaatpcam quiojy. Mänit curaa piädaacy. Mänitä tsaatyñøøxee'xøhñdy nädajøøyy tsaajooty. Mänitä häna'awøhñdy cøxp quiojy.

'Mänitä wiingjäya'ay ja'a tsaatpcam hajxy yaghajoodiujcä. Mänita cudsatpcam jim chohñ,

ñøcxy jäguem. ³⁴Coo ja'a tsaatpctuc yhabaaty, mänitá cudsatpccam miejstägajch. Mänitá mioonsá quiejxy coo ja'a tsaatp hajxy yajmédsát mäduhñtiä hajxy hánajty mio'owa'añii.

³⁵Mänitá mioonsáhajxy miájtsäxä; ja'a naaxhajoodiujpähajxy jaduhñ mämajts. Wojpä mähdiojc tu'ug; yagho'cá tu'ugpä; ca'tsá tu'ugpä.

³⁶Mänitá cudsatpccam ja'a mioonsá quiejxy maas may. Jaaná jaduhñ hajxy yhayoowhíjxábä.

³⁷Mänitá yhamdsoo huung jaduhñ quiejxy coo tyijy jaduhñ wyingudsähgøøyyäxät. ³⁸Pero coo yhuung jaduhñ yhíjxäxä, mänitá naaxhajoodiujpähajxy ñiñämaayyá: “Coo yø'ø craa ja'a tieedy yhó'ogät, mänit yø'ø craa ja'a tsaatpccam miämähmø'owa'añ. Tsøg hajxy yagho'cäm. Mänit højts ja'a tsaatpccam jaduhñ nmämähmøøyyämät.” ³⁹Mänit hajxy jiaanč majch. Mänit hajxy yhøxjuijpádsøømy. Mänit hajxy yagho'cy. ⁴⁰Hoorä, coo ja'a cudsatpccam jaduhñ miédsát, nebiä naaxhajoodiujpähajxy tiuna'añii.

⁴¹Mänit hajxy yhadsooyy: —Yagho'tägatsáanäp hajxy jaduhñ je'leguioxpä coo hajxy quia'awiindøyyä. Mänitá wiingjäya'ay ja'a naax yaghajoodiuga'añ, pønä tsaatp jaduhñ yegaamb coo ja'a tsaatpctuc yhabaadät.

⁴²Mänitá Jesús miänaañ: —Nej, cajnä ja'a Diosmädia'agy hajxy mgapxyñä maa jaduhñ myiñän cujaayá:

Ja'a tsaá mädyii ja'a tøjcojpähajxy quia'a nä'ägä cumaayy,

je'e nä'ägä tuundsohn.

Dios jaduhñ pädaac, paady højts njaanč tehñ yagjuø'øy.

(Jesús jaduhñ hamdsoo niyajmäbaatä nebiä tsaajän je'leguioxpä coo hánajty quia'a tsocy quia'a mee'xyíjäm ja'a cu'ug. Pero mo'owáanäp ja'a Jesús ja'a mõjtuung ja'a hodiung hánajty.)

⁴³Paady, xpiøgáanäp ja'a mguhdujt hajxy coo hajxy jim mdägø'owät Dioswiinduum. Wiingjäyá'ayäts jaduhñ tægø'owaamb pønjaty jaduhñ howiädijp. ⁴⁴Pøn jaduhñ cá'awäp yø'ø tsaanähgøxp, tægøyyäp jaduhñ. Y coo pøn jaduhñ ñähgahbedøøjät yø'ø tsáajäm, jaaná tægøyyäp je'ebä.

⁴⁵Coo ja'a teedywiindsøn hajxy jaduhñ miädooyy mõødä fariseodøjc-hajxy, mänit hajxy ñajuøøyy coo hajxy hánajty tøø miädia'agyii ja'a Jesúsäm. ⁴⁶Mänitá teedywiindsøn ja'a Jesús hajxy jia madsaañ; cab hajxy ñä'ä majch je'leguioxpä coo ja'a cu'ug hajxy hánajty chähgø'øy; hiñ, jaduhñä cu'ughajxy hánajty miäna'añ cooc ja'a Jesús ja'a Diosmädia'agy hánajty yajwa'xy.

22 Mänitá Jesús tiägøøguiumbä mädiaacpä. Mänit miänaañ:

²—Maa ja'a Dios yhane'emiän, jaduhñ mäwiñäts je'e nebiä rey tu'ugän. Yajpøgaamby ja'a yhuung hánajty je'e. Yagjadáanäp ja'a cay ja'a hu'ug hánajty je'e. ³Mänitá mioonsáhajxy quiejxy woobä wijtspä; pero cabä jäya'ayhajxy hánajty ñøcxa'añ mägaabiä.

⁴Mänitá rey ja'a mioonsá quiejxcumbä. Mänit miänaañ:

“Nøcx hajxy näma'aw coo ja'a cay ja'a hu'ugy tøø quiøønä, coochä waj tøø nyajyagho'ogyii ja'a ni'xpä. Tøø ja'a cayiibä yhabaady; weends hajxy miñ quiay.” ⁵Pero cabä jäya'ayhajxy nã'ägädä mäbøjcy. Tu'jäya'ay nøcxy maa ja'a quiamän; tu'jäya'ay nøcxy too'pä. ⁶Mänitä rey mioonsähajxy miäjtsäxä ja'a jäya'ayhajxy hänäjty jaac jimbä. Mänit hajxy yaghäyoowhijxy; yagho'cä hajxy jaduñ. ⁷Mänitä rey yhawa'andaacy. Mänitä soldadohajxy quiejxä mäyagho'pä. Ja'a hajxy hänäjty tøø mioonsäyagho'oguiäbä, je'e hajxy nøcxy yagho'ogyii; møødä quiajpthajxy nøcxy ñó'cäxä.

⁸Mänitä rey ja'a mioonsähajxy nãmaayy: “Tøø jaduñ yhabaady coochä nhuung jaduñ piøga'añ. Pero ja'a jäya'ayhajxy tøø nja woy tøø nja wíchäbøch, cab hajxy hawiinmats myínät. ⁹Nøcx hajxy wow wits pønjaty hajxy mbaatyp jim tu'haam.” ¹⁰Mänitä mioonsähajxy hoy wioy wyich nägøxiä, pønjaty hajxy jaduñ piaatyp, møødä hojiäya'ay møødä haxøøgjäya'ay. Mänitädsä tøjc jaduñ yhujch.

¹¹Mänitä rey tiøjtägøøyy woybä wíchpä hijxpä. Mänitä craa tu'ug yhixä, cabä wyit hänäjty yhooyä. ¹²Mänit nãmaayy: “Mägu'ughajpä, cab yø'ø mwit yaa hawiinmäts mmädägø'øwät maa ja'a pøc jaduñ jiadyiijän.” Pero cabä craa nã'ä hadsoowiimbijty. ¹³Mänitä rey ja'a mioonsä nãmaayy, ja'a hajxy hänäjty texycøøbiä: “Cø'øxots tecyxiots yø'ø craa. Mänit hajxy mhøxjuijpádsómät maa wyiingoodsän. Jim jaduñ jio'øwa'añ xiuudsä'añ.” ¹⁴Nämay

hajxy jia møyja'axa'añii, pero näweeñtiä hajxy jaduñ wyiimbiwa'añii.

¹⁵Mänitä fariseoshajxy jim chohñ. Mänit hajxy quiojyquiapxytiuuñ coo ja'a Jesús hajxy jiojcapxø'øwa'añ neby hajxy jaduñ yajnähdsómät. ¹⁶Mänitä miägu'ughajpähajxy quiejxy møødä Herodes miägu'ughajpähajxy. Mänitä Jesús hajxy nãmaayy:

—Wiindsøn, nnajuøøby højts coo miich ja'a tøyhajt myecy, coo ja'a Diostu'u myajnähixø'øy. Caj miich mmøjpäda'agy nebiaty ja'a cu'ughajxy miädia'agy; caj miich mmøjpäda'agy pøn tyijy møjcuहुdujtmøød. ¹⁷Højts capxwíjjäc. Nej, hahixøøby jaduñ coo ja'a gobiernä xädø'øñ mmó'owädä, ja'a jim tsänaabiä Roma.

¹⁸Najuøøbiä Jesús hänäjty coo hänäjty jia jøjcapxø'øwa'añii. Mänit miänaañ:

—Haxøøg mijts mwiinmahñdyhajxy, hoy hajxy mja nibiäda'agyii nebiä hojiäya'ayän. Tiič hajxy coo xjia jøjcapxø'øwa'añ. ¹⁹Tsøgä xädø'øñ tu'ug huuc híjxäm.

Mänitä Jesús wa'xxiädø'øñ miooyy. ²⁰Mänit miänaañ: —Pøn yhähädiuunnaxy hädaaduhñ; pøn xiøø hädaaduhñ.

²¹Mänit hajxy yhadsooyy: —Ja'a gobiernä.

Mänitä Jesús miänaañ: —Mmó'owäbä gobiernä hajxy mädyii je'e jie'e; y mmó'owäbä Dios hajxy mädyii je'e jie'e.

²²Coo hajxy jaduñ miädooyy, mänit hajxy yagjuøøyy. Mänit hajxy wyiimbijnä.

²³Mänitxøø ja'a saduceodøjc-hajxy näje'e miejch maa ja'a Jesúsän. Jaduhñ hajxy hänäjty miäna'añ cooc tyijy hajxy nga'a jujypiøjtägatsaanäm. Mänitä Jesús hajxy nāmaayy:

²⁴—Wiindsøn, ja'a Moisés jecy mänaañ, coo ja'a pøcy-ya'adiøjc yhó'ogät, ja'a cajpä yhuung, mänitätsä piuhya'ay ja'a yaamgto'oxy wyiingpøgät, nebiä yaamgto'oxy jaduhñ yhuungpáadät ja'a ya'adiøjcøxpä, ja'a tøø yhó'ogüübä. ²⁵⁻²⁶Bueno, näjxutjyc hajxy hijty tu'que'ex, haagä ya'adiøjc. Ja'a coobhuung, jayøjp jaduhñ piøjcy; mänit yho'cy. Cabä yhuung hänäjty. Mänitätsä jüadsømy ja'a yaamgto'oxy wyiingpøjcy. Mänitätsä je'e yhó'cumbä. Mänitätsä miädägøøgpä jaduhñ jüajcumbä. Jaduhñ hajxy nägøxiä jüajty møødä miäjxutjycpä. ²⁷Mänitä to'oxiøjc yho'pä høxhaam. ²⁸Bueno, coo hajxy jaduhñ jujypiøgät, mädyii tehñ tiøybä hänäjty to'oxiøjc-hadaamb, ja'a näjxutjycpä puhya'ayhajxy, ja'a hajxy hänäjty tøø jia pøquiübä.

²⁹Mänitä Jesús yhadsooyy: —Caj mijts ja'a tøyhajt mnä'ägädä møødä. Cabä Diosmädia'agy hajxy mhixiä ni ja'a Diosmäjaa. ³⁰Coo ja'a jäya'ayhajxy jujypiøga'añ, cab hajxy hänäjty piøga'añ, ni cabä yhuung hajxy hänäjty yajpøga'añ. Jaduhñ hajxy yhida'añ nebiä Diosmoonsähajxiän, ja'a hajxy jim tsajpootypä. ³¹Hamdsoo ja'a Dios hajxy jaduhñ tøø xñäma'ay cujaayhaam coo ja'a jäya'ayhajxy jujypiøga'añ:

³²“Xwyiingudsähgøøbiøch ja'a Abraham møødä Isaac møødä Jacob.” Hoorä, wiingudsähgøøyap ja'a Dios ja'a jujcyjiäya'ayhájxiäm. Cab jaduhñ wyiingudsähgøøyii ja'a ho'ogyjiäya'ayhájxiäm.

³³Coo ja'a cu'ughajxy jaduhñ miädooyy nebiä Jesús hänäjty yajnähiøøy, mänit hajxy yagjuøøyy.

³⁴Coo ja'a fariseoshajxy jaduhñ miädoyhajty coo ja'a Jesús quia'a yajmäjdaacy ja'a saduceos, mänitä fariseoshajxy yhamugøøyy.

³⁵Jimä fariseo hänäjty tu'ug; ley-yajnähiøøby hänäjty je'e. Ja'a Jesús hänäjty jøjcapxø'owáañäp. Mänitä Jesús miäyajtøøwä:

³⁶—Wiindsøn, mädyii cuhdujt maas møy maa ja'a ley myiñän.

³⁷Mänitä Jesús yhadsooyy: —“Wiingudsähgøøw ja'a nDioshajtäm hamuumdu'joot; mabøjca ja'a miädia'agy; mjahmiédsäp øjxta'axiøø.”

³⁸Hädaa cuhdujt, jawyiin jaduhñ myiñ maa ja'a leyän y maas møy jaduhñ. ³⁹Jaana jaduhñ ja'a miämetspä miänaambä: “Møødnijootpaadøø ja'a mmäjøøñ ja'a mmädøjc hamuumdu'joot.”

⁴⁰Hädaa cuhdujt metspä, ja'a ley yhøjx tiecy jaduhñ møødä øøxiä mäduhñtiä ja'a Diosmädia'agy-yajwa'xpähajxy tøø miädia'agy.

⁴¹Jimnä ja'a fariseoshajxy hänäjty tiäna'aynä. ⁴²Mänitä Jesús miäyajtøøyy:

—Waamb mijts mmäna'añ ja'a Cristocøxpä. Pøn je'e yphahajpy tieedyhajpy.

Mänit hajxy yhadsooyy:

—David yhap yhoc je'eduhñ.

⁴³Mänitá Jesús miánaañ:

—Pero ja'a Dioshspiritucøxpä ja'a David ja'a Cristo nãmaayy: “Wiindsøn.” Jaduhñä David miánaañ:

⁴⁴Tøøchä Dios ja'a nWiindsøn xñãmaayyä:

“Hãña'aw yaa hahooyhaamb y høxtä coonä ja'a mmädsip jaduhñ quia'a mäjääd'agät”, nømä Dios miánaañ.

⁴⁵Bueno, pø tøø ja'a David ja'a Cristo nãma'ay: “Wiindsøn”, nébiäts jaduhñ yhaphat yhoc-hádät.

⁴⁶Caj pøn waamb nã'ägädä hadsooy. Y cabä Jesús waamb miäyajtøwänä høxtä coonä hãnajty yho'oga'añ.

23 Mänitá Jesús ja'a cu'ug nãmaayy møødä jiamiødhajxy:

²—Ja'a ley-yajñähixøøbiädøjc møødä fariseoshajxy, cuhdujtmo'oy hajxy jaduhñ coo ja'a Moisés miädia'agy hajxy yajñähixøøyyä.

³Mgudiúnäp hajxy jaduhñ waambaty hajxy xñãma'ay. Pero cab hajxy mbahíxät nebiaty hajxy jiatcø'oy. Cabä yhamdsoo mädia'agy hajxy quiudiuñ. ⁴Hanaxiä hajxy tsipjaty yajñähixø'oy; y mänaamb hajxy jaduhñ coo ja'a cu'ug tsipcøxp quiudiúnät. Pero cab hajxy hamdsoo quiudiuñ. ⁵Jaanch tehñ yajcumayaamb hajxy maa ja'a cu'ugwiinduumän. Paadiä nocyquiuaaybä hajxy yajxon yajniwyiinnähgopxodsø'oyii; paady hajxy yajniGUIØ'OXODSØ'oyii. Paadiä wit hajxy piägø'oy ja'a høxyoñbä. ⁶Coo hajxy maa miägay, hãña'awaamb hajxy hãnajty maa

ja'a meexäteecän. Y coo hajxy nøcxy tsajtøgooty, hãña'awaamb hajxy hãnajty maa ja'a hãñaabiejt yajxonbän. ⁷Coo hajxy maa wiädity cajptooty, yajwiingudsähgø'owaamb hajxy hãnajty maa ja'a cu'ugän. Yajñama'awaamb hajxy hãnajty: “Wiindsøn.”

⁸Pero mijts, cab hajxy mmäná'anät coo ja'a cu'ug hajxy xñámá'awät: “Wiindsøn.” Tu'ugä mWiindsønhajxy jaduhñ; ja'a Cristo je'e. Jaduhñ hajxy mnijjävø'owøøjät nebiä tu'que'expän. ⁹Cab hajxy pøn mnámá'awät: “Teedy”, hädaa yaabä naaxwiimbä. Tu'ugä mDeedyhajxy jim cøxp. ¹⁰Cab hajxy mmäná'anät coo pøn xñámá'awät coo hajxy xquiopc-hádät. Tu'jaya'ay hajxy jaduhñ xyhané'emät; ja'a Cristo je'e. ¹¹Pøn jaduhñ puhbejp ja'a jiamiødhajxy, je'edsä møjtuung jaduhñ paadaamb maa mijtsän. ¹²Hix, pøn jaduhñ yajcumayaamb, cabä møjtuung jaduhñ piaada'añ. Pero pøn jaduhñ ca'a yajcumayaamb, je'edsä møjtuung jaduhñ paadaamb.

¹³Mänitá ley-yajñähixøøbiädøjc-hajxy nãmaayyä møødä fariseoshajxy: —Jaduhñ mijts mnibiäda'agyii nebiä hoyhãna'cän; pero cab hajxy mhoyhãna'cä. Haxøøg hajxy mjada'añ mhabeta'añ. Cab hajxy jim mdägø'owa'añ maa ja'a Dioswiinduumän, y cab hajxy jaduhñ mmäna'añ coo wiinghãna'c jim tiägø'owät, hoy hajxy hãnajty hamdsoo jia mäna'añ coo hajxy jim tiägø'owa'añ.

¹⁴Xiøøbä ja'a Dios hajxy jejcy tøø mnä'a pa'ya'axy. Mänitá

yaamgto'oxy ja'a tiøjc hajxy mbøjcä. Paady hajxy hoyhoy mdsaaçhpøga'añ.

¹⁵Wiinduhmyhagajpt jamiøød hajxy naxy mhøxta'ay pøn jaduhñ xmiøødtúnäp maa ja'a mguhdujthajxiän. Y coo hajxy hänäjty tøø mbaady, mänitä haxøøgcuhdujt hajxy myajnähixø'øy. Maas haxøøg hajxy jaduhñ jiatcø'øwa'añ quejee mijts.

¹⁶Cab hajxy hoy mnä'ägä yajnähixø'øy. Jaduhñ hajxy mmäna'añ; coo hajxy hänäjty tii myajwiinwaanø'øwa'añ, coo ja'a tsajtøjc mgapxpáadät, cab tyijy jaduhñ ñejpiä coo hajxy mga'a cudiúnät neby hajxy hänäjty tøø myajwiinwaanø'øyän. Pero jaduhñ hajxy mmänaambä, coo ja'a oro hajxy mgapxpáadät, ja'a jiiby tsajtøgootypä, tsipcøxp hajxy tyijy mgudiúnät. ¹⁷Mguhmäñøøby hajxy jaduhñ; cab hajxy tii mwijnjuø'øy. Haa ca'a, maas tsoobaatp ja'a tsajtøjc quejee ja'a oro. Hiñ, Dios ja'a tsajtøjc jaduhñ cunuu'x. Ja'a oro, ñä'ä yajmägunuu'xøøyy je'eduhñ. ¹⁸Jaanä jaduhñ hajxy mmänaambä, coo mgapxpáadät ja'a cuyoxøhñdy, cábac tyijy jaduhñ ñejpiä coo mga'a cudiúnät. Pero jaduhñ hajxy mmänaambä, coo hajxy mgapxpáadät tijaty tøø mguyoxø'øy, tsipcøxpäc tyijy jaduhñ mgudiúnät. ¹⁹Nej, cab hajxy mnajuø'øyä coo ja'a cuyoxøhñdy miaas tsoobaady quejee tijaty hajxy mguyoxøøby. ²⁰Pøn jaduhñ capxpaatp ja'a cuyoxøhñdy, jaanä jaduhñ quiapxpaatpä tijatycøxpä ja'a jäya'ayhajxy jiiby tøø quiuyoxø'øy. ²¹Pøn jaduhñ

capxpaatp ja'a tsajtøjcøxpä, jaanä Dios quiapxpaatpä, ja'a jiiby tsänaabiä tsajtøgooty. ²²Pøn jaduhñ capxpaatp ja'a tsajpootyp, jaanä Dios yhäñaabiejt quiapxpaatpä, møødä Dios ja'a jim häñaabiä.

²³Mijts myajcopcøøby mädyii ca'a tsoobaatp coo hajxy hänäjty tii mguyoxø'øwa'añ maa ja'a tsajtøjcän. Pero cabä Diosmädia'agy hajxy myajcopcø'øy coo jaduhñ miäna'añ coo mhojiäya'ayhädät, coo hojioot mmøødhädät, coo ja'a Diosmädia'agy mmäbøgät. Maas hoy jaduhñ coo hajxy mgudiúnät ca'xy pedyii. ²⁴Jaduhñ mäwíinäts hajxy myajwiinhixø'øy nebiä wiindspän; cab hajxy myajcopcø'øy mädyii tsoobaatp.

²⁵⁻²⁸Jaduhñ mijts mja wi'i quiähxø'øga'añ nebiä hoyhäna'cän maa ja'a cu'ugwiinduumän. Pero haxøøgwíinmahñdy hajxy mmøød. Tsipcøxp ja'a mhaxøøgwíinmahñdy hajxy mnajtshixø'øwät, jaduhñ hajxy tøyhajt hoy mhídät.

²⁹Naxy hajxy yajxón mguhmuuçh maa ja'a Diosquexypähajxy jecy ñaaxtägøøyyän. Hojiäya'ayhajxy hijty. ³⁰Mänit hajxy mmäna'añ: "Coo højts häxøpy jecy tøø njugyhájtäm, cabä nhap ndeedy hajxy häxøpy tøø nbuhbéjtäm coo ja'a Diosquexypä hajxy yagho'cy."

³¹Cab jaduhñ tiøyyä. Tøø ja'a mhap mdeedy hajxy häxøpy mbajatcøøbiä; ³²y jaduhñ hajxy mjaançh pajatcø'øwaambä.

³³Jaduhñ mäwíinäts hajxy mga'awiindøyyä nebiä tsahñdiän. Hoyhoy hajxy jaduhñ jiiby mdsaaçhpøga'añ møjcu'uhaam.

³⁴Nguexáambiøch ja'a Diosquexypä

maa mijtsän, mөөдä cuhwijypä, mөөдä yajnähixөөbiä. Näje'e hajxy myagho'oga'añ; näje'e hajxy mmөjpahbeda'añ cruzcөxp; näje'e hajxy mwobho'oga'añ tsajtөгooty. Näje'e hajxy mbäbo'owa'añ cajpt-cajpt. ³⁵Mijts jaduһn mmөөdhadaamby ja'a pojpä coo ja'a hojiäya'ayhajxy nägөxiä yagho'cä mөөдä Abel mөөдä Zacarías, ja'a Berequías yhuung. Tsajtөгooty ja'a Zacarías yagho'cä; ja'a mhap ja'a mdeedyhajxy jaduһn jecy jatcөөyy. ³⁶Tehm tiөyhajt jaduһn, mijts ja'a pojpä mmөөdhadaamby.

³⁷Mijts Jerusalénpäjäya'ay, tөө ja'a Diosquexypä hajxy mguhga'ačh. Jaduһn mäwíinhөch mijts mayhooc tөө nja näwa'añ nebiä tsey ja'a yhuung nähmuhxtägoyyän; pero caj mijts myajnäwa'ana'añ. ³⁸Mobädäjpөch mijts nnähgue'ega'añ, ³⁹y cábөch jaduһn xyhixaannä hөxtä cóonөch hänäjty ngädaactägatsa'añ. Mänit hajxy mmäna'ana'añ: “Tsөc yө'oya'ay wiingudsähgөөyyäm, yө'oya'ay Diosquexypä.”

24 Mänitá Jesús hajxy piädsөөmy tsajtөгooty. Mänitá Jesús nämaayyá ja'a miägu'ughajpähajxy:

—Huug hix yө'ө möj tsajtөjc.

²Mänitá Jesús yhadsooyy:

—Tehm tiөyhájthөch mijts nnäma'ay, yө'ө möj tsajtөjcä, cөxaamb jaduһn piuma'añ; cөxaamb jaduһn quiuhdägoyya'añ.

³Mänit hajxy nөcxy maa ja'a Olivostunän. Mänitá Jesús yhөxtaacy naaxwiin. Mänitá Jesús hamee'ch nämaayyá ja'a miägu'ughajpähajxy:

—Hөjts hawáañac mänaa yө'ө tsajtөjc jaduһn piuma'añ. Mädyii hijxtahnd jaduһn cähxө'ogaamb coo hänäjty mgädaactägatsa'añ, coo ja'a naaxwiimbä hänäjty wyiimbida'añ.

⁴Mänitá Jesús miänaañ:

—Ca'a hajxy myajwiinhөөñ.

⁵Minaamb hajxy nämay.

Jaduһn hajxy ñibiäda'aga'añii nébiөch hөөchän. Jaduһn hajxy miäna'ana'añ: “Hөөch je'e Cristo.” Nämayyá jäya'ay yajwiinhөөna'añ.

⁶Mänit hajxy mmädoyhada'añ coo ja'a tsip jaduһn tөө piädө'ogy. Pero cab hajxy mdsähgө'өwät. Tspicөxpä häyohn jaduһn jiada'añii. Pero cajnä hänäjty yhabaady coo ja'a naaxwiimbä hänäjty wyiimbida'añ. ⁷Cajpthaam hajxy jaduһn ñimiädsibө'өwa'añii. Naxaambä yuuba'am wiinduhmyhagajpt mөөдä hujx. ⁸Pero nä'ä tshöndaacnä ja'a tsө'ty hänäjty jaduһn.

⁹Mänit mijts myaghäyoowhixa'añ myajyagho'oga'añ. Mänit mijts myajmähanhada'añ maa ja'a hөөchcөxpän wiinduhmyhagajpt. ¹⁰Mänitá Dios hajxy ñajtshixө'өwa'añ nämay. Mänit hajxy ñimiähanhada'añii hamiñ haxөpy mөөдä hajxy tijaty yajniñahdsөma'añii.

¹¹Wäditaambä hөhndaacpähajxy hänäjty may. Mäna'anaamb hajxy hänäjty cooc tyijy hajxy wiädity ja'a Dioscөxpä. Nämayyá cu'ughajxy yajwiinhөөna'añ. ¹²Cab hajxy ñimiägu'ughadäänänä je'eguiөxpä coo ja'a haxөөгpä hänäjty jiaanč tehm wiädity.

¹³Pero pөnjaty jaduһn ca'a

jøjwa'adsaamb, je'eds ja'a hoybä paadaamb. ¹⁴Wiinduhmyhagajpt ja'a mädia'agy wiädita'añ mädyii jaduhñ mänaamb coo ja'a Dios ja'a miäjaa yajcähxø'øga'añ. Cøxaambä cu'ughajxy miädoyhada'añ; mänitäts ja'a naaxwiimbä wyiimbida'añ.

¹⁵(Pøñ hädaa nocy capxp, ween jaduhñ wyiinjuø'øy.) Ja'a Daniel, Dios jaduhñ jecy quejx. Je'eduhñ cujahy coo ja'a haxøøgpä miedsa'añ maa ja'a Diostøjcän, y coo mänit jaduhñ yajma'ada'añ. Coo ja'a haxøøgpä hajxy mhíxät, ¹⁶mänit hajxy päyø'øguiä mnøcxät maa ja'a tunän, mijts yaa tsänaabiä Judeanaaxooty. ¹⁷Y ja'a hajxy hijpä tøjwiing, jaduhyyä hajxy piäyø'tówät, cab hajxy jaduhñ tii yajpädsómät tøgooty. ¹⁸Y ja'a hajxy jim hijpä camjooty, jaduhyyä hajxy piäyø'tóöbät, cab hajxy jaduhñ nøcxy tii wyich maa ja'a tiøjcän. ¹⁹Pobre ja'a to'oxiøjc-hajxy hänäjty maaxhuungmøødpä, møøð hajxy hänäjty huungyajtsi'tspä. ²⁰Mmänuu'xtá'agäp ja'a Dios hajxy coo hajxy ween mga'a päyø'øgy coo hänäjty tiøøhcä, ni ja'a poo'xxiøøjooty. ²¹Porque jaanč tehñ miøc ja'a tsaächpä ñaxa'añ. Ni mänaa jaduhñ tøø quia'a jadyii nebiä jaduhñ jiada'añiijän. Y caj mänaa jiajtägatsa'añii jadähooçän. ²²Pero Dios jaduhñ tøø yajnähdiij coo ja'a tsaächpä jejcy quia'a jadóøjät, je'eguiøxpä coo chocy ja'a tøøbä wyiimbíyyäbä. Coo häxøpy jaduhñ tøø quia'a yajnähdiij, caj pøñ häxøpy cho'oga'añ.

²³Coo mijts pøñ xñämä'awät: "Huug hix, chaadsä Cristo", o

"Huug hix, xiids je'e", cab hajxy mmäbóögät. ²⁴Hix, minaambä wiinhøhmbähajxy; jaduhñ mäwiin hajxy ñibiäda'aga'añii nebiä Criston; jaduhñ mäwiinäts hajxy ñibiäda'aga'añii nebiä Diosquexypän. Yajcähxø'øgaambä hajxy ja'a hoy-yagjuøøñäjatypä nebiä cu'ug hajxy jaduhñ wyiinhøønät; høxtä ja wiinhøønäänäp hajxy je'ebä, ja'a Dios tøø wyiimbíyyäbä. ²⁵Chaads mijts nnäma'ay jäguemiä. ²⁶Coo pøñ xñämä'awät: "Huug hix, jim wiädity pactuum", cab hajxy jim mnøcxät; o coo hajxy xñämä'awät: "Huug hix, jiiby je'e yu'uçhtium", cab hajxy mmäbóögät. ²⁷Cooçh hänäjty nwiimbida'añ, høøch ja'a Diosquexypä, jaduhñ mäwiin quiähxø'øga'añ nebiä wädsucän. Wiinduhmyhagajpthøch ja'a jäya'ayhajxy xyhixa'añ. ²⁸Tsipcøxp jaduhñ jiada'añii nébiøch chaa nmäna'añ.

²⁹Coo ja'a tsaächpä hänäjty tøø ñajxnä, mänitiä hänäjty wyiingoodsø'øwa'añ; cabä po'o hänäjty yhana'añ. Chaadsä madsa'a may quia'awa'añ; chaadsä tsajt chäyuyya'añ. ³⁰Mänitøch ja'a nhijxtahñd jim quiähxø'øga'añ tsajpootyp cooçh hänäjty nwiimbida'añ, høøch ja'a Diosquexypä. Mänitä jäya'ayhajxy wiinduhmyhagajpt jiø'øwa'añ xiuudsa'añ. Mänitøch hajxy xyhixa'añ cooçh hänäjty ngäda'aga'añ jocjooty. Diosmäjaaháamhøch jaduhñ ngäda'aga'añ hajájjäp. ³¹Mänitøch ja'a nmoonsä tsajpootypä nhane'ema'añ coo ween hajxy møc

xiu'uxy xuuxthaam. Mänitöch ja'a nwiimbiybähajxy xyajtu'ugmugaanä wiinduhmyhagajtpä.

³²'Tsög ja'a tsø'ty jaduhñ yajmábatám nebiä piidsquepiän. Coö yhaabiädsömy, mänit hajxy mnajuø'øy coö piodtägøøñä.

³³Jaduhñ mäwíinäts je'e, coö ja'a tsø'ty hajxy jaduhñ mhíxät, mänit hajxy mnajuø'øwät coöch hánajty mobädajpä nwiimbida'añ.

³⁴Tøyhájtäts mijts nnäma'ay, coöch hánajty nwiimbida'añ, cajnä jäya'ayhajxy hánajty quiøxy ho'ogy, ja'a hajxy jäda'ahaty jugyhajpä. ³⁵Ja'a tsajtwiing jaduhñ tägoyyaamb møødä naaxwiimbä. Tøjiadaamb jaduhñ nébiøch cham nmädia'aguiän.

³⁶'Pero ni pøn jaduhñ quia'a najuø'øy mänaaxøø jiada'añii ni mäduhnajtä. Ni ja'a Diosmoonsä tsajpootypä hajxy quia'a najuø'øy. Ni høøch nga'a najuø'øy, høøch ja'a Dioshuung. Jagooyyä Dios jaduhñ ñajuø'øy, ja'a nDeedyhájtäm.

³⁷'Coöch jaduhñ nwiimbida'añ, høøch ja'a Diosquexypä, jaduhñ mäwíinäts hánajty jiada'añii nebiä Noé jecy jiajtiän. ³⁸Cajnä Dios ja'a nøøgomdägoy hánajty quiexyñä. Jimä jäya'ayhajxy hánajty quiay yhu'ugy, piøcy yhu'ugy, høxtä coö ja'a Noé hánajty tøø tiägø'øy barcojooty. ³⁹Ni mänit hajxy hánajty quia'a najuø'øyñä høxtä coönä ja'a nøøgomdägoy miejch. Mänit hajxy øjx chømdu'ubøgyii. Jaduhñ mäwíinäts jiadáañäbä coöch hánajty nwiimbida'añ, høøch ja'a Diosquexypä. ⁴⁰Mänitxøø ja'a ya'adiøjc-hajxy hánajty nämetsc yhida'añ camjooty. Tu'ug hánajty

yajnøcxa'añii; tu'ug hánajty yajmähmø'øwa'añii. ⁴¹Metscä to'oxiøjc-hajxy hánajty jiøch. Tu'ug hánajty yajnøcxa'añii; tu'ug hánajty yajmähmø'øwa'añii.

⁴²'Nähix hahixø'ø hajxy mhídät; cab hajxy mnajuø'øy mänaa ja'a mWiindsønñhajxy quiäda'aga'añ. ⁴³Jaduhñ mäwíinäts ja'a cudøjc-hajxy, coö hajxy jaduhñ ñajuø'øwät mäduhnajtä ja'a mee'tspä miedsa'añ coods, jujcy hajxy jaduhñ yhídät, y cabä mee'tspä hajxy jaduhñ yajtøjtägø'øwät. ⁴⁴Jaduhñ mäwíinäts mijtspä, nähix hahixø'ø hajxy mhídät. Cábøch mijts xñä'ägä najuø'øwät mänájøch jaduhñ ngäda'aga'añ, høøch ja'a Diosquexypä.

⁴⁵'Ja'a moonsäwiindsøn, je'edsä miämoonsä yajcaaby maa ja'a wyiindsøn tiøjcän. Hoy jaduhñ coö ja'a wyiindsøn miädia'agy miäbøjcät, coö cuhwijy tiünät. ⁴⁶Coö ja'a wyiindsøn miädsät, jootcujc ja'a moonsä ñijiäwø'øwa'añii mädyii jaduhñ cudiuumb. ⁴⁷Tøyhájtäts mijts nnäma'ay, jaduhñä moonsä piäda'aga'añii nebiä wyiindsønän jim maa ja'a wyiindsøn tiøjcän, mäduhñtiä ja'a wyiindsøn hánajty miøødä. ⁴⁸'Pero ja'a moonsä ca'a hoybä, je'eds jaduhñ mäna'anaamb cooc tyijy ja'a wyiindsøn quia'a tsoj medsa'añ. ⁴⁹Mänitä miämoonsä tiägø'øwa'añ häyoowhijxpä. Mänitä mu'ugyjiäya'ay miøødtägø'øwa'añ caabiä huucpä. ⁵⁰Cabä wyiindsøn jaduhñ yhuuc jahmiedsaannä coö wyiimbida'añ. Coö ja'a wyiindsøn jaduhñ jiaançh médsät, ⁵¹mänitäts

ja'a craa hoyhoy quiumädowa'añ mөөдä miäga'awiindöybä. Mänit hajxy jio'owa'añ xiuuds'a'añ.

25 'Coo ja'a Dios ja'a miäjaa jaduhñ yajcähxö'oga'añ, jaduhñ mäwíinäts je'e nebiä pөc hu'ug tөө jiadyijän. Jimä cäxyiidöjc ja'a jamiö'öd hajxy hänäjty yhähixy. Nämajc hajxy hänäjty. Candilcón hajxy hänäjty yhähixy. ²⁻⁴Nämägooxc-hajxy, cab hajxy hänäjty nähix hähixö'ө tөө tiu'uböcy. Cabä guiaastä hajxy hänäjty nä'ä tägö'öbä tөө jiuu. Pero ja'a jiamioөdhajxy ja'a jaac nämägooxpä, nähix hähixö'ө hajxy hänäjty tөө tiu'uböcy mäbөjpä. Nä'ä tägö'öbä ja'a guiaastä hajxy hänäjty tөө jiuu. ⁵Coo ja'a jamiö'öd jaduhñ quia'a tsoj mejch, mänitä cäxyiidöjc-hajxy cөjx miaaho'ogy. ⁶Coo quiuptsuhmdäjööyy, mänitä jäya'ay tu'ug yaaxy: “Xiidsä jamiö'öd miech; nөcx hajxy jөjcubaadö'ow.” ⁷Mänitä cäxyiidöjc-hajxy cөjx piädö'ogy. Mänitä quiandilhajxy quiuhdö'өxööyy. ⁸Mänit hajxy miänaañ, ja'a hajxy hänäjty nähix hähixö'ө tөө quia'a tu'uböquiäbä: “Hөjtsä gaastä weeñtiä móooyäc; pi'idsaamb hөjtsä ngandil jaduhñ.” ⁹Mänit hajxy yhadsoooy, ja'a hajxy hänäjty nähix hähixö'ө tөө tiu'uböquiäbä: “Caj, ni jaduhñ quia'a mädöyhada'añ maa ja'a hөjtsөxpän. Nөcx hajxy jaduhñ ñijiuuyyaxä maa tiogyijän.” ¹⁰Mänit hajxy ñөcxy juubiä. Mänitä jamiö'öd jaduhñ miejch. Ja'a cäxyiidöjc-hajxy gaastämөөdpä, mänitä jamiö'öd hajxy miөөdtägööyy tөгooty. Mänitä

tөjc hajxy yhägөөñä. ¹¹Mänitä cäxyiidöjc-hajxy jia mejtsnä, ja'a gaastä hajxy hoy tөө jiuuyyabä. Mänitä hajxy jia cugapxööyy: “Wiindsön, huuc yaghawa'ads hädaa төjc.” ¹²Mänit hajxy nämäaayyä: “Cäbөch mijts jaduhñ nhixiä. Tөyhajt jaduhñ.”

¹³Coo ja'a Jesús jaduhñ miädiaacpädööyy, mänit miänaañ: —Jaduhñ hajxy mnibiäda'agöөjät nähix hähixö'ө. Caj mijts mnajuö'ө mänaajөch nwiimbida'añ, hөөch ja'a Diosquexypä.

¹⁴'Coo ja'a Dios ja'a miäjaa jaduhñ yajcähxö'oga'añ, jaduhñ mäwíinäts je'e nebiä jäya'ay tu'ugpä. Nөcxaamb hänäjty je'e wiingnaaxooty. Mänitä mioonsähajxy miөjyaaxy. Mänitä xiädö'өñ yajmämähmөöyy.

¹⁵Tu'ug jaduhñ yajmämähmөöyyä mägooxmillón. Paady may miooyyä coo hänäjty jiaty xädö'өñ yajmayö'ow. Tu'ug jaduhñ yajmämähmөöyyä mejtsmillón. Tu'ug jaduhñ yajmämähmөöyyä tu'millón. Mänitä wiindsön tiu'ubөjcy. ¹⁶Jaaya'ay ja'a mägooxmillón wiingpөjcäbä, yajtägөöyy jaduhñ niyhajjätbä. Yajmayööyy ja'a xädö'өñ jaduhñ; mägooxmillón jaduhñ jiaac paaty. ¹⁷Jaana jaduhñduhmbä, jaaya'ay ja'a mejtsmillón wiingpөjcäbä, mejtsmillón jaduhñ jiaac paaty. ¹⁸Pero jaaya'ay ja'a tu'millón wiingpөjcäbä, hoy ja'a jut jaduhñ tiajy. Mänitä wyiindsön xiädö'өñ hoy yú'tsanä jutjooty.

¹⁹Cujecy ja'a wyiindsөнhajxy mejtstägajch. Mänit hajxy tiägөöyy cueentäyajpädsөөmbä. ²⁰Jayөjp

jaaya'ay miehch ja'a mägooxmillón hánajty tøø wyiingpóquiäbä. Mänitá wyiindsón miooyy cøxiä møødä mägooxmillón tøø jiaac páadiäbä. Mänit miänaañ: "Wiindsón, mägooxmillónhøch jaduhñ xmiooyy; chaads je'e møødä mägooxmillónhøch tøø njaac yajmayó'øyäbä." ²¹Mänitá wyiindsón miänaañ: "Hoy miich jaduhñ tøø mgudiuñ. Wééñtiøch miich nyajmämähmøoyy. Maas máyhøch miich ja'a xädø'øñ jaduhñ njaac mo'owa'añ neby jaduhñ mjaac yajmayó'øwät. Tøjtägø'øw tøgooty, ween nxoondáacäm." ²²Mänitá craa jiaac miehch ja'a mejtsmillón hánajty tøø wyiingpóquiäbä. Mänit miänaañ: "Wiindsón, mejtsmillónhøch jaduhñ xmiooyy; chaads je'e møødä mejtsmillónhøch tøø njaac yajmayó'øyäbä." ²³Mänitá wyiindsón miänáangumbä: "Hoy miich jaduhñ tøø mgudiuñ. Wééñtiøch miich jaduhñ nyajmämähmøoyy. Maas máyhøch miich ja'a xädø'øñ jaduhñ njaac mo'owa'añ neby jaduhñ mjaac yajmayó'øwät. Tøjtägø'øw tøgooty, ween nxoondáacäm." ²⁴Mänitá craa jiaac tehñ miehch ja'a tu'millón hánajty tøø wyiingpóquiäbä. Mänit miänaañ: "Wiindsón, nnajuøøbiøch coo miich hojioot mga'a møødä. Miich ja'a xädø'øñ jaduhñ mbaadaamby maa tøø mga'a tuñän. ²⁵Páadyhøch hijty ndsähgø'øy. Páadyhøch ja'a xädø'øñ hoy nyu'uçh naaxjutjooty. Huug hix, chaads je'e." ²⁶Mänitá wyiindsón yhadsooyy: "Caj miich hoy mgudiuñ. Mjaançh tehñ ñuux miich. Mnajuøøby miich

jaduhñ cooçh hojioot nga'a møødä, cooçhä xädø'øñ nbaada'añ maaçh tøø nga'a tuñän. ²⁷Páadyhøch nxädø'øñ jaduhñ cu xpiädaacä bancojooty. Jiiby cu miayøøyy. Mänitøch nxädø'øñ cu xmiooyy møødä xädø'øñhuung." ²⁸Mänitá hajxy ñämaayyá, ja'a hajxy jim tánaabiä: "Pøjcä yø'ø craa xädø'øñ hajxy tu'millón; mo'ow yø'ø craa hajxy ja'a majcmillónmøødpä. ²⁹Pøñ may nä'ägä møød, maas may jaduhñ mio'owa'añii. Hanaxiä jaduhñ miøødhada'añ. Pero pøñ jaduhñ weeñtiä møød, pøgáanäxäp je'e mäduhñtiä miøødä. ³⁰Yø'ø craa jaançh tehñ ñuuxpä, høxwijtspädsøñ hajxy hagoonstuum. Jiiby jaduhñ jiø'øwa'añ xiuuds'a'añ." ³¹Cooçh jaduhñ ngädá'agät hanehmä, høøçh ja'a Diosquexypä, jímhøch jaduhñ nhäña'awa'añ maa ja'a hoyhñäabiejtän ja'a yajxonbä. Quípxyhøch nmoonsä tsajpootypähajxy xmiøødcäda'aga'añ nägøxiä. ³²Mänitøch ja'a jäya'ayhajxy xwyiingumedsø'øwa'añ ja'a wiinduhmyhagajtpä. Mänitøch hajxy jaduhñ nyajwa'xa'añ nebiä meegän nebiä chiibän. ³³Nbäda'agáambiøch näje'e maaçh nhahooguiø'øjän, näje'e maaçh nhanajtycø'øjän. ³⁴Ja'a hajxy hijpä hahooguiø'ø, mänitøch hajxy nnäma'awa'añ: "Min hajxy yam; tøøçh mijts nDeedy xwyiimbiiy coo hajxy mhané'emät. Jequiän hajxy jaduhñ xwyiimbiiy, cajnä ja'a naaxwiin hánajty yhädiuñ. ³⁵Mänáajøch hijty nyäho'ogyiijän, mänitøch hajxy xyajcaayy.

Mänáajøch hijty ndødsø'yijän, mänítøch hajxy xyajnøøhuucy. Mänáajøch hijty nwäditian nebiä jäguembäya'ayän, mänítøch hajxy xyaghamejtstaacy. ³⁶Mänáajøch wit hijty nga'a møødän, mänítøch hajxy xñähxojxy. Mänáajøch hijty mba'amgo'na'ayän, ndsumyhäna'ayän, mänítøch hajxy hoy xquihixy.” ³⁷Ja'a hajxy hijpä hahooguiø', mänit hajxy yhadsowa'añ: “Wiindsøn, mänaa højts miič tøø nyajcay; mänaa højts miič tøø nyajnøøhu'ugy; ³⁸mänaa højts miič tøø nyaghamejtsta'agy; mänaa højts miič tøø nnähxoxy; ³⁹mänaa højts miič hoy tøø nguhixy.” ⁴⁰Mänítøch nhadsowa'añ: “Tøyhajt mijts nnäma'ay, coočh mijts ja'a njamiøødhajxy tøø xñäxuu'tsä, hoy hajxy quia'a ja møjtojcä, jaduñ mäwiinhøch tøø xñäxuu'tspä.” ⁴¹Mänítøch hajxy nnäma'awa'añ ja'a hajxy hanajtycø'øbä: “Jua'ads hajxy jim, mijts haxøøgtuum hijpä. Häda'ag hajxy jilby maa ja'a jøøn mänaa quia'a pi'lichän. Paadiä jøøn tøø piäda'agyii, jiiä møjcu'uhajxy chaächpøga'añ. ⁴²Mänáajøch hijty nyäho'ogyijän, cábøch hajxy xyajcaayy; mänáajøch hijty ndødsø'yijän, cábøch hajxy xyajnøøhuucy; ⁴³mänáajøch hijty nwäditian nebiä jäguembäya'ayän, cábøch hajxy xyaghamejtstaacy; mänáajøch wit hijty nga'a møødän, cábøch wit hajxy xmiooyy; mänáajøch hijty nba'amgo'na'ayän, ndsumyhäna'ayän, cábøch hajxy hoy xquihixy.” ⁴⁴Mänit hajxy miäna'ana'añ: “Wiindsøn, mänaa højts miič nga'a puhbejty;

mänaa højts miič nhijxy coo hänajty myäho'ogyii, coo hänajty mdødsø'yii, coo hänajty mwäditian nebiä jäguembäya'ayän, coo wit hänajty mga'a møødä, coo hänajty mba'amgo'na'ay, coo hänajty mdsumyhäna'ay.” ⁴⁵Mänítøch nhadsowa'añ: “Tøyhajt mijts nnäma'ay, coočh mijts ja'a njamiøødhajxy tøø xquia'a näxuu'tsä, hoy hajxy quia'a ja møjtojcä, jaduñ mäwiinhøch tøø xquia'a näxuu'tspä.” ⁴⁶Yø'øds hajxy jilby häda'agaamb maa hajxy chaächpøga'añän cøjxta'axiøø. Pero pønjätyhøch tøø nwiimbiy, je'eds hajxy cøjxta'axiøø jugyhadaamb nebiä Dios jjugyhatian.

26 Coo ja'a Jesús jaduñ miädiaacpædøøyy, mänit nñämaayy ja'a jiamiøødhajxy:

²—Mnajuøøby hajxy jaduñ coo ja'a pascuaxøø cumaaxc yhadsuujø'øwa'añ. Mänítøch hajxy xyajcø'dägø'øwa'añ, høøch ja'a Diosquexypä. Mänítøch hajxy xmiøjpahbeda'añ cruzcøxp.

³Mänitä teedywiindsøn'hajxy yhamugøøyy møødä ley-yajnähihøøbiähajxy møødä jäya'ayhajxy martuumähajpä maa ja'a judiøshajxiän. Jim hajxy yhamugøøyy maa ja'a Caifás tiøjcän, ja'a hänajty møjcuहुdujtmøødpä maa ja'a teedyhajxiän. ⁴Mänit hajxy quiojyquiapxyhajty nebiä Jesús hajxy miädsät, neby hajxy jaduñ yagh'ogät. ⁵Mänit hajxy niñämaayyä: —Cab jaduñ yhoyyä coo hajxy nmájtsämät ja'a xøøjooty coo ja'a cu'ughajxy nñä haamhadät.

⁶Jimä Jesús hänajty maa ja'a cajt jaduñ xiøhatian Betania,

maa ja'a Simón tiögootiän, ja'a hänäjty tøø nähwa'ačhíjibä ja'a haxøøgpa'am. ⁷Jimä Jesús hänäjty quiay, mänitä to'oxiøjc tu'ug miejch, perfumecón, ja'a jaanč tehñ chowbä. Mänitä Jesús ja'a perfume yajcuhda'xøøyyä. ⁸Coo ja'a Jesús jiamiøødhajxy jaduhñ yhiixy, cab hajxy jaduhñ yhojiäwøøyy. Mänit hajxy miänaañ:

—Tii yø'ø perfume jaduhñ coo yaghäyooyy. ⁹Coo jaduhñ cu tiøø'cy, mänitä häyoobäya'ay jaduhñ cu nä'ägä puhbejty.

¹⁰Coo ja'a Jesús jaduhñ miädooyy, mänit miänaañ:

—Ca'a yø'ø to'oxiøjc hajxy mhadsipy. Ca'a yhaxøøgpä jaduhñ tøø tiuñ maa ja'a høøčhcøxpän.

¹¹Ja'a häyoobädøjc, homiänaajä mijts jaduhñ xmiøødhida'añ; pero høøč, cábøch mijts jejcy nmøødhida'añ. ¹²Páadyhöch yø'ø to'oxiøjc perfume xyajcuhda'xøøyy, cooč mobädajpä nho'oga'añ.

¹³Tøyhájttäts mijts nnäma'ay, homiaajä hädaa hoguiapxy hädaa homiädia'agy hajxy yaghawa'xø'øwät maa hädaa yaabä naaxwiinän, mänit hajxy jaduhñ miädia'aga'añ nébiøch yø'ø to'oxiøjc perfume tøø xyajcuhda'xø'øy. Jaduhñds yø'ø to'oxiøjc jiahmiedsa'añii.

¹⁴⁻¹⁵Ja'a Jesús jiamiøødhajxy ja'a nämajmetspä, tu'ug hänäjty xiøhaty Judas Iscariote. Mänitä Judas ja'a teedywiindsønñhajxy hoy näma'ay:

—Mädúhñtiøch hajxy xmiäjúyät cooč ja'a Jesús hajxy nyajcø'ødägø'øwät.

Mänitä Judas miooyyä hii'xmajc plataxädø'øñ. ¹⁶Mänit

wyiinmahñdyhajty nebiä Jesús yajcø'ødägø'øwät.

¹⁷Ja'a tehñ xiøøhadsuujø'ø hajxy hänäjty quiuhdujthaty coo ja'a tsajcaagy hajxy hänäjty quiay ja'a ca'a tsoomiøødpä. Mänitä Jesús ja'a jiamiøød nämejtsä. Mänit miäyajtøøwä:

—Maa hajxy ndsuugáayyämät ja'a pascuaxøøjooty.

¹⁸Mänitä Jesús yhadsooyy: —Nøcx hajxy cajptooty maačh nmägu'ughajpä tiøjcän. Mänit hajxy mnämä'awät: “Nøm højts nWiindsønñ miäna'añ cooc tøø yhabáatäxä, y cooc højts yaa ndsuugaya'añ ja'a pascuaxøøjooty maa miičh mdøgootiän.”

¹⁹Mänit hajxy jiaanč cudiuuñ neby hajxy nämaayyän. Mänitä jøø'xy hajxy yhädiuuñ.

²⁰Coo quioodsøøyy, jimä Jesús hajxy hänäjty quiay møødä nämajmetspä. ²¹Mänitä Jesús miänaañ caaguiujc:

—Tøyhájttäts mijts nnäma'ay cooč mijts mjamiøød tu'jaya'ay xyajcø'ødägø'øwa'añ maačh nmädsipän.

²²Mänit hajxy jiootmadiägøøyy. Mänit hajxy tiägøøyy yajtøøbä: —Wiindsønñ, nej, høøčh je'ejä.

²³Mänitä Jesús yhadsooyy: —Ja'ačh tu'ugtexy

xmiøødcaamiujpä, jé'ečhäts jaduhñ xyajcø'ødägø'øwaamb.

²⁴Jadúhñhöch njada'añ nhabeta'añ, høøčh ja'a Diosquexypä, nebiä Diosmädia'agy jaduhñ miäna'añän. Pero jaanč tehñ chaachpøgaamb jaaya'ay häyoobä ja'ačh tøø xyhawaanñø'øyabä. Mejor häxøpy tøø quia'a miñ tøø quia'a ca'ay.

²⁵Mänitá Judas miánaañ, ja'a hánajty tøø yhawaan'ø'oyäbä:

—Wiindsón, nej, høøch je'eja.

Mänitá Jesús yhadsooy:

—Miičh je'e.

²⁶Jimná hajxy hánajty quiaynä, mänitá Jesús tsajcaagy quion'cy. Mänitá Dioscujú'uyäp jejcy. Mänitá tsajcaagy qyijwa'xy. Mänitá jiamiøød miooy. Mänit miánaañ:

—Cay hajxy; jaduñ mäwiin hädaa tsajcaagy nébiøchä nni'x nébiøchä ngopcän.

²⁷Mänitá Jesús taza quion'cy. Mänitá Dioscujú'uyäp yéjcumbä. Mänitá jiamiøød ja'a taza miooy. Mänitá Jesús miánaañ:

—Hu'ug hädaa vino hajxy nägøxiä.

Mänitá vino hajxy yhuucmujcy tu'ugtaza.

²⁸Mänitá Jesús miánaangumbä:

—Jaduñ mäwiin hädaa vino nébiøchä nnø'tiän. Hijxtahñ jaduñ coöchä jemyguiuhdujt nyajwiimbädsøma'añ coöchä jäya'ayhajxy may nnähho'tu'uda'añ, coöch jaduñ nyajnähw'adsaanä ja'a piojpa quiädieey. ²⁹Pero nnämäabiøch mijts coöch hädaa vino nga'a huuctägatsa'añ høxtä cóonøch hánajty tøø nho'ogy. Mänitøch mijts jaduñ nmøødhuucmujtägatsa'añ jim maächä nDeedy jaduñ yhane'emiän.

³⁰Mänitá Dioshøy hajxy yhøøyy.

Mänit hajxy ñøcxy maa ja'a Olivostunän. ³¹Mänitá Jesús miánaañ:

—Hädaa coods, cáboch mijts ja'a nmädia'agy hajxy hoy xmiäbøgáañä. Mänitøch hajxy jaduñ xñähgue'ega'añ.

Jaduñhä Diosmädia'agy miána'añ: “Nyagho'ogáambiøch ja'a meegcueendähajpä. Mänitá meeghajxy xii yaa ñøcxø'owa'añ.”

³²Pero coöch hánajty tøø njujypiøcy, mänitøch nnøcxø'oga'añ jim Galilea; mänit mijts høxhaam mnøcxa'añ.

³³Mänitá Pedro miánaañ: —Hoy miičh hajxy nägøxiä xjia nähgue'egät, cáboch miičh nnähgue'egät.

³⁴Mänitá Jesús miánaañ: —Tøyhájthøch miičh nnäma'ay, coo ja'a tseey hánajty quia'a ya'axynä hädaa coods, tøø miičh hánajty tægøøghooc mnijjøgapxyii cóogøch tyjy jaduñ xquia'a hixiä.

³⁵Mänitá Pedro miánaañ: —Høyhøch miičh näguipxy nja møødhø'ogät, cáboch jaduñ nnijjøgapxøøjät.

Jaduñ hajxy nägøxiä piamánaambä.

³⁶Mänitá Jesús hajxy miejch maa hánajty xiøhatiän Getsemaní. Mänitá Jesús miánaañ:

—Yaa hajxy høxta'ag naaxwiin; nõcxyhøch jimhaamby nhuuc Diospa'ya'axy.

³⁷Mänitá Jesús ja'a Pedro wioonøcxy hawiing møødä Zebedeo yhuunghajxy nämetscä. Mänitá Jesús tiägøøyy jootmayhajpä hoyhoy. ³⁸Mänit miánaañ:

—Jaančh tehñ jootmayhájjøch jaduñ. Jadúhñhøch nnijjiawø'oyii nebiä ho'ogaambän. Yaa hajxy mmähmø'øwät. Tsøg hajxy jujcy hjjtäm.

³⁹Mänitá Jesús weentiä jiaac nõcxy. Mänit miägutscädaacy. Mänit Dyiospa'yaaxy:

—Teedy, miich mee'x, ca'a yhndijy jaduhñ cu ndsaaçhpøjcy. Pero ca'a yhøøçhä nguhdujt jaduhñ nyajtunaamby; miichä mguhdujt nyajtunaañäm.

⁴⁰Mänitä Jesús wyiimbijty maa ja'a nädägøøgpä hänajty tøø ñähgue'eguiän. Jim hajxy hänajty mia'ay coo ja'a Jesús jim miejch. Mänitä Pedro ñämaayyá:

—Nej, ni tu'horä hajxy jujcy mga'a hida'añä. ⁴¹Jujcy hajxy mhídät. MDiospa'yá'axäp hajxy jaduhñ nebiä møjcu'u hajxy jaduhñ xquia'a jøjcapxó'øwät. Jia tsojpiä mjoothajxy jaduhñ coo hajxy jujcy mhídät, pero ja'a mni'x ja'a mgopc-hajxy jaduhñ ca'a mee'xtugaamb.

⁴²Ja'a miämetsc-hoocpä Jesús ñøcxy Diospa'yaaxpä:

—Teedy, miich mee'x, cábøch ndijy jaduhñ cu ndsaaçhpøjcy. Pero ween miichä mguhdujt nyajtúñäm.

⁴³Mänit wyiimbjycumbä maa ja'a Pedrohajxiän. Tøø hajxy hänajty miaahó'cumbä. Jaançh tehñ mia'awaamb hajxy hänajty hanaxiä. ⁴⁴Mänitä Jesús ñähguéeccumbä. Mänit ñøcxumbä miädägøøghoocpä Diospa'yaaxpä. Mänit jaduhyyä miänáangumbä.

⁴⁵Mänit miéjtscumbä maa ja'a Pedrohajxiän. Mänit miänaañ:

—Ma'awxä hajxy, poo'xxä hajxy. Tøøds je'e yhabaady cooçh hajxy xyajcø'ødägø'øwa'añ maa ja'a cubojpä cugädieejjäya'ayän, høøçh ja'a Diosquexypä. ⁴⁶Pädø'øg hajxy, jamds hajxy. Xiids je'e myiñ ja'a høøçh jaduhñ xyegaambä.

⁴⁷Mädiaacnä ja'a Jesús hänajty coo ja'a Judas miejch, ja'a Jesús

hänajty tøø miøødwädítiäbä ja'a miämajmetspä. Jaançh tehñ miay ja'a jäya'ay hänajty miøødä, pujxtmøødpä, paçycappä. Ja'a teedywiindsøn'hajxy jaduhñ quejx møødä martuumädøjc. ⁴⁸Ja'a Judas ja'a Jesús hänajty yegaamb. Tøø ja'a Judas ja'a jäya'ay hänajty ñäma'ay:

—Ja'a høøçh hänajty ndsu'xaambiä, je'eds hajxy mmádsäp.

⁴⁹Mänitä Judas ja'a Jesús ñämejch. Mänitä yajpoo'xy. Mänit chu'xy. ⁵⁰Mänitä Jesús miänaañ: —Mägu'ughajpä, tiich xwia'ana'añ. Mänitä Jesús hajxy miajch.

⁵¹Mänitä Jesús jiamiøød ja'a piujxt jiuu'ty. Mänitä teedywiindsøn mioonsä tu'ug tiaatspujxtúutäxä.

⁵²Mänitä Jesús miänaañ:

—Cuyuugø'øw yø'ø mbujxt. Pønjaty jaduhñ pädø'p pujxtthaam, jaanä pujxtthaam yho'ogaambä. ⁵³Nej, caj miich mnajuø'øyä, cooçhän Deedy jaduhñ nnámá'awät cooçh ween xpiuhbety, mänítøch ja'a mioonsä tsajpootypä milhaam xyajñäguéxät.

⁵⁴Pero cooçh jaduhñ nnámá'awät, cabä Diosmädia'agy jaduhñ tiøjiädät maa jaduhñ myiñän cujaay cooçh jaduhñ tsipcøxp njada'añ nhabeta'añ.

⁵⁵Mänitä Jesús ja'a majiäya'ay ñämaayy:

—Pujxtmøød paçycap hajxy tøø mbädø'øgy. Jaduhñhøch hajxy tøø xmiach nebiä mee'tspän. Jabom-jabomhøch mijts hijty nyajñähixø'øy tsajtøgooty, y cábøch hajxy mänaa tøø xmiach. ⁵⁶Pero páadyhøch jaduhñ njaty nhabety, jaduhñä Diosmädia'agy jaduhñ tiøjiädät, nebiä Diosquexypähajxy jecy quiujahyyän.

Mänitä Jesús jiamiød quiøxy päyø'cy. Nidiuhmä Jesús jaduhñ ñähgueecä.

⁵⁷Mänitä Jesús yajmejtsä maa ja'a Caifás tiøjcän, ja'a mõjcuhdujtmøødpä maa ja'a teedyhajxiän. Jimä ley-yajñähixøøbiähajxy hänajty tøø yhamugø'øy møødä martuumädøjc-hajxy. ⁵⁸Ja'a Pedro, jäguemjuøøby hänajty pianøcxy. Mänit jii by tiägøøyy maa ja'a Caifás tiøjwiingän. Mänitiä yhöxtaacy maa ja'a policíahajxiän. Yhixaamby hänajty je'e nebiä Jesús hänajty tiuna'añii.

⁵⁹Ja'a Jesús, tøø hänajty yajtøjtägø'øyii maa ja'a teedywiindsøn hänajty tøø yhamugø'øyän møødä ley-yajñähixøøbiähajxy møødä mõjtøjc-hajxy. Jiiby hajxy hänajty wyiinmahñdyhaty nebiä Jesús hajxy jaduhñ ñähøønø'øwät, hoy jaduhñ quia'a ja tøyyä, nebiä Jesús hajxy jaduhñ yajyagho'ogøøjät.

⁶⁰Pero cabä tøyhajt hajxy piaaty, hoy jäya'ay may jia wi'i ñähøønøøyy. Mänitä höhñdaacpä metsc piädsøømy. ⁶¹Mänit hajxy miänaañ:

—Nøm yø'ø craa miänaañ coogä Diostøjc jaduhñ yajma'ada'añ; mänítäc cumaaxc wiingpä yajpädø'øgåangumbä.

⁶²Mänitä teedywiindsøn tiänaayyø'cy. Mänitä Jesús ñämaayyä:

—Nej, caj mhadsowa'añä. Tii hajxy jaduhñ coo xñäxø'owø'øy.

⁶³Pero cabä Jesús waamb ñä'a mänaañ. Mänitä teedywiindsøn miänáangumbä:

—Ja'a Diosøxpä miich ja'a tøyhajt myégät; højts hawáañäc pø tøyhajt jaduhñ coo miich ja'a Dios tøø xquiøxy, coo ja'a Dios xyHuunghaty.

⁶⁴Mänitä Jesús miänaañ:

—Tøyhajt jaduhñ nej miich mmäna'añän. Jadúhñhöch mijts nnämaabiä, høøch ja'a Diosquexypä, cooçh hajxy xyhixa'añ hääna'a maa ja'a Dios yhahooyhaampiän, ja'a mäjaamøødpä; y cooçh jaduhñ nmänajtagatsa'añ jocjooty.

⁶⁵Mänitä teedywiindsøn ja'a wyit quiøø'ch. Paady quiøø'ch coo hänajty yhawa'anda'agy. Mänit miänaañ:

—Tøø hädaa craa quiapxtägoy ja'a Diosøxpä. Tii testigo hajxy njaac wáañämät. Hamdsoo hajxy tøø mmädoy nej tøø quiapxtägoyyän.

⁶⁶Neby hajxy mmäna'añ.

Mänit hajxy yhadsooyy:

—Tøø jaduhñ quiapxtägoy ja'a Diosøxpä; ween yho'ogy.

⁶⁷Mänitä Jesús wyiingudsujøøyyä. Mänit wiojpä. Mänit wyiingugoxøøyyä. ⁶⁸Mänit ñämaayyä:

—Pø tøyhajt jaduhñ coo Dios tøø xquiøxy, najuø'ow pøn tøø xquiøxy.

⁶⁹Jimnä ja'a Pedro hänajty yhäna'ay tøjwiing. Mänitä Pedro ñämejtsä to'oxymoosä tu'ug. Mänit ñämaayyä:

—Miiçh ja'a Jesús hijty mmøødwädijpy, túhmäts, ja'a Galileatsohmbä.

⁷⁰Mänitä Pedro ñijjogapxä maa ja'a jäya'ayhajxiän:

—Pätiidä jaduhñ mnä'a mädiaacypy.

⁷¹Tøjpädsømäännäp ja'a Pedro hänajty, mänit yhiçxägumbä

ja'a to'oxymoonsä tu'ug. Mänitä moonsä ñämaayy ja'a hajxy hänajty jimbä:

—Yø'ø mixy ja'a Jesús hijty møødwädiyp ja'a Nazarettsohmbä.

⁷²Jadähooc ja'a Pedro ñijjogapxä:

—Tøyhajt, cábøch ja'a craa nhixiä.

⁷³Mänitjuøøby ja'a Pedro ñämäayyägumbä, ja'a hajxy hänajty jimbä:

—Tøyhajt jaduhñ coo miich ja'a Jesús hijty mmøødwädity; jaduhñ miich mmädiaacpä nebiä Galileatsohmbän.

⁷⁴Mänitä Pedro miänaañ:

—Pø cábøch tøyhajt nmädia'agy, wéenhøch ja'a Dios jaduhñ xyajcumädoy. Cábøch ja'a craa nhixiä.

Tuunä ja'a Pedro jaduhñ ñä'ä mänaañ, mänitiä tseey yaaxy.

⁷⁵Mänitä Pedro quiøxy jahmiejch nebiaty ja'a Jesús hänajty tøø miäna'añän: “Cajnä ja'a tseey hänajty ya'axy, tøø miich hänajty tægøøghooc mnijjogapxyii cóogøch tyijy xquia'a hixiä.” Mänitä Pedro jim chohñ. Mänit tiägøøyy jøøbiä hoyhoy.

27 Coø jioøøyy, mänitä teedywiindsønajxy quiojyquiapxytiuuñ møødä martuumädøjc-hajxy nebiä Jesús hajxy yaghó'ogät. ²Mänitä Jesús hajxy cø'øxoch hoy yajcø'ødägø'øyy maa ja'a Poncio Pilatän, ja'a hänajty tuumbä gobernador.

³Ja'a Judas ja'a Jesús hänajty tøø yhawaanø'øyy. Coø ja'a Judas yhijxy coo ja'a Jesús hänajty yagho'oga'añii, cabä jioot jaduhñ ñä'ä møc-hajty. Mänitä hii'xmajcpä plataxädø'øñ hoy yajwiimbity maa

ja'a teedywiindsønajxiän, maa ja'a martuumädøjc-hajxiän. ⁴Mänit miänaañ:

—Tøøch jaduhñ ngädieey coochä craa ho'cøøc tøø nhawaanø'øyy, ja'a cajpä pojpä cádieemiøødpä.

Mänit hajxy yhadsooyy:

—Ca'a yhøjts ngüeendä yø'øduhñ. Miiçh mgüeendä yø'øduhñ.

⁵Mänitä Judas ja'a xädø'øñ ñajtsxäbapøøyy jiiby tsajtøgooty. Mänit hoy ñiyo'tøøyyänä.

⁶Mänitä teedywiindsøn ja'a xädø'øñ hajxy pyiwø'cy. Mänit hajxy miänaañ:

—Cab hädaa xädø'øñ hajxy hawiinmats nbädäacämät maa ja'a xädø'øñ hajxy quiuyoxø'øyyän, je'eguiøxpä coo jäya'ay jaduhñ tøø tioogyii ho'cøøc.

⁷Mänit hajxy quiojyquiapxytiuuñ coo ja'a naax hajxy hänajty jiuya'añ, ja'a xøhajpä Tu'tspojtstaact, ja'a xädø'øñhaam ja'a Judas hänajty hoy tøø ñajtsxäbapø'øyyäbä. Je'e hajxy hänajty wia'ana'añ cabäsantä maa ja'a jäguembäjäya'ayhajxy ñaaxtägø'øwät.

⁸Coo ja'a naax hajxy jaduhñ jiuuyy ja'a xädø'øñhaam ja'a Judas hänajty hoy tøø ñajtsxäbapø'øyyäbä, paady jaduhñ xiøhaty Nø'ñaaax høxtä jäda'anäbaadyñä. ⁹Jaduhñdsä tøjiajty nebiä Jeremías jecy miänaañän, ja'a Diosquexypä: “Mänitä plataxädø'øñ hajxy miooyyä hii'xmajc (nebiä judiøshajxy tøø ñägapxiän). ¹⁰Mänitä tu'tspojtstaact hajxy hoy jiuuy nébiøch ja'a Dios tøø xyhane'emiän.”

¹¹Mänitä Jesús yajmejtsä maa ja'a gobernadorän. Mänit miäyajtøøwä:

—Nej, miich ja'a judiøshajxy xguiobiernähajpä.

Mänitä Jesús yhadsooyy:

—Tøyhajt jaduhñ nej miičh mmäna'añän.

¹²Mänitä Jesús ñähwaambejtä ja'a teedywiindsøn

¹³Mänitä Pilato miänaañ:

—Nej, caj miičh jaduhñ mmädoyyä nebiaty hajxy jaduhñ xñänómiänä.

¹⁴Pero cabä Jesús ñä'a hadsooyy; paadiä gobernador jiaančh tehñ yagjuøoyy. Cab hänajty ñajuø'øy nebiaty jaduhñ wyiinmahñdyhädät.

¹⁵Jaduhñdsä gobernador hänajty quiuhdujthaty coo ja'a tsumyjiäya'ay hänajty tu'ug yhøxmach xøøjooty pøn ja'a cu'ug jaduhñ ñänómäp coo yhøxmadsøøjät. ¹⁶Jiibiä craa hänajty tu'ug chumyčhäna'ay ja'a xøhajpä Barrabás. Tøø ja'a Barrabás xiøø hänajty wyi'li wia'xy. ¹⁷Coo ja'a cu'ughajxy hänajty tøø quiøxy hamugø'øy, mänitä Pilato yajtøoyy: —Pøn mijts jaduhñ mnänøømby cooçh nhøxmádsät, Barrabás tögä ja'a Jesús ja'a Cristohajpä.

¹⁸Ñajuøøbiä Pilato hänajty coo ja'a Jesús jaduhñ yajcø'ødägøøyyä je'eguiøxpä coo ja'a quiuhdujt hänajty quia'a yajmädsøjcäxä.

¹⁹Jimnä ja'a Pilato hänajty yhäña'ayñä maa hänajty tiuñän, mänitä Pilato quiapxyñäguejxä ja'a tio'oxiøjcäm: “Cab jaduhñ cu mdsaačhtiuuñ; hoyhäna'c yø'øduhñ. Tøøçh haamyquiods haxøøg nguma'ay yø'øgøxpä.”

²⁰Mänitä teedywiindsøn ja'a cu'ug hajxy jiojcapxøøyy coo ween hajxy miäna'añ coo ja'a Barrabás yhøxmadsøøjät, y coo ja'a Jesús

yagho'ogøøjät. ²¹Mänitä gobernador ja'a cu'ug miäyajtøøgumbä:

—Mädyii häna'c mijts mnänøømby cooçh nhøxmádsät.

Mänit hajxy yhadsooyy:

—Barrabás.

²²Mänitä Pilato yajtøoyy:

—Ja'a Jesúsäts, ja'a xøhajpä ja'a Cristo, nébiøch je'le ndúnät.

Mänit hajxy nägøxiä yhadsooyy:

—Møjpahbet cruzøxp.

²³Mänitä Pilato miänaañ:

—Tii haxøøgpä jaduhñ tøø tiuñ coo jaduhñ yagho'ogøøjät.

Mänit hajxy jaduhñ yáaxcumbä:

—Møjpahbet cruzøxp.

²⁴Coo ja'a Pilato jaduhñ yhiixy coo ja'a cu'ughajxy hänajty quia'a mädowa'añ, coo hajxy maas hanaxiä yhaamhada'añ, mänitä nøø yujwaañ. Mänit quiø'øbuju cu'ugwiinduum. Mänit miänaañ:

—Ca'a yhøøçh jaduhñ mänaamb coo yø'ø hoyhäna'c jaduhñ yagho'ogøøjät; mijts jaduhñ mänaamb.

²⁵Mänitä cu'ughajxy nägøxiä miänaañ:

—Tøyhajt jaduhñ. Højts jaduhñ mänaamb mөөd højts nnøøx mөөd højts nmajc.

²⁶Mänitä Pilato ja'a Barrabás yhøxmajch. Mänitä Jesús yajwojpä. Mänit yajcø'ødägøøyy coo nøcxy miøjpahbedyii.

²⁷Mänitä Jesús yajnøcxä ja'a gobernador soldadohajxy. Mänitä Jesús jiuhibgøøyyä ja'a soldadohajxy nägøxiä. ²⁸Mänitä wyit yajtsijjxä. Mänitä tsaptswit yajpägøøyyä. ²⁹Mänitä haptycoronä piädaacä maa ja'a quiuhduumän. Mänitä paxy yajcø'øgabøøyyä

yhahooyhaampiäcø'ø. Mänit
wyiinjjicädaacä. Mänit
wyiingapxpejtä:

—iViva ja'a judíos ja'a
guiobiernähajxy, viva!

³⁰Mänitä Jesús wyiingutsujøøyyä.

Mänitä paxy piójcäxä. Mänit
wiojpä quiuhduum. ³¹Coo
yhuuc wiingapxpéjtäbä, mänit
tsaptswit yajtsíjjägumbä. Mänit
yhamdsoo wit yajpägøøyyägumbä.
Mänit yajnøcxänä maa hánajty
miøjpahbeda'añiijän.

³²Tu'haamnøcxpä jäya'ay
hajxy tu'ug jiojcubaadøøyy ja'a
Cirenetsohmä. Simón hánajty
xiøhaty. Mänitä Simón ja'a cruz
hadsip yajcajptsoowä.

³³Mänit hajxy miehch maa
jaduhñ xiøhatiän Gólgota.
Je'eduhñ nänøømby: “Maa
ja'a ho'ogyjiäya'aguiopc
ñähgäda'aguiän.” ³⁴Mänitä Jesús
tsaatyñøø jia yaghuucä ja'a
jaanč tehñ tiahmbä. Coo jaduhñ
yhuucmajch, cab jaduhñ chojcy.

³⁵Mänitä Jesús miøjpahbéjtänä
cruzøxp. Mänitä soldadohajxy
yhäyø'cy dadoshaam nebiä
Jesús ja'a wyit hajxy yajwá'xät.
Jaduhñdsä tiøjajty nebiä
Diosquexypä jecy miänaañän:
“Dadoshaam hajxy yhäyø'cy
nébiøch nwit hajxy jaduhñ
xyajwá'xät.” ³⁶Mänitä soldadohajxy
jim yhøxtaacy nebiä Jesús hajxy
jaduhñ wyiinhäñá'awät. ³⁷Mänit
hajxy jim yuugjahy cruzcuhduum
tiiguiøxp ja'a Jesús coo tøø
miøjpahbedyii: “Jesús hädaa, ja'a
judíos guiobierno hajxy.”

³⁸Jimä mee'tspä metsc
miøjpahbéjtäbä. Cujc ja'a Jesús

miähmøøyy, tu'ug hanajtyhaamby,
tu'ug hahooyhaamby. ³⁹Ja'a
jäya'ayhajxy hánajty najxpä, wyi'i
wyiingapxpejpy hajxy hánajty
møød hajxy hánajty wyi'i
quihjägøñ. ⁴⁰Jaduhñ hajxy hánajty
ñiñäma'ayii:

—Ja'a, miich jaduhñ mänaañ coo
mahñdy ja'a tsajtøjc myagjida'añ,
y cumaaꝑc mahñdy mhädiuna'añ
wiingpä. Niyajmänacøøjätš
hamdsoo pø tøyhajt jaduhñ coo
miich Dios xyHuunghaty.

⁴¹Jaduhñ ja'a teedywiindsøñhajxy
pimänaambä møødä
ley-yajnáhixøøbiähajxy,
møødä fariseoshajxy, møødä
martuumädøjc-hajxy.

⁴²—Tøø jaduhñ yhuuc wi'i
miäyajnähwa'ačh, y caj hamdsoo
ñiyajnähwa'adsa'añii. Pø tøyhajt
jaduhñ coo jaduhñ guiobiernähaty
maa ja'a judíoshajxiän, ween
jaduhñ hamdsoo ñiyajmänaqyii
cruzøxp neby højts jaduhñ
nmäböjcämät. ⁴³Jaduhñ tøø
xnämäáyyäm coo yHuunghadyii
ja'a Diósäm y coo ja'a Dios jaduhñ
cwieendähada'añ. Pø tøyhajt jaduhñ
coo ja'a Dios jaduhñ jiaanč tsoey,
ween jaduhñ yajnähwa'ačh.

⁴⁴Jaduhñdsä mee'tspähajxy
pimänaambä, ja'a hajxy jim
miøjpahbetypä cruzøxp.

⁴⁵Mänitcujxyxiøø ja'a naaxwiimbä
wyiingoodsøøyy. Tägøøghorä jaduhñ
yhiyty wiingoods. ⁴⁶Mänitmänacyxiøø
ja'a Jesús møc yaaxy: “Elí, Elí, lama
sabactani”, je'eduhñ nänøømby: Dios
mee'x, Dios mee'x, tiich jaduhñ coo
tøø xñajtshixø'øy.

⁴⁷Ja'a hajxy hánajty jim wi'i
tiänaabiä, coo hajxy jaduhñ

miädooyy, mänit hajxy näje'e miänaañ:

—Elías yø'ø craa jaduħn jia wi'i miøjyaaxyp.

⁴⁸Mänit tuljäya'ay xo'od hoy quioñ päyø'øguiä. Mänit quiumadsøoyy ja'a tsaatyñøøxunjooty. Cøjx je'e chomø'øy. Mänit paxy yagøjwøøñøoyy ja'a xo'od. Mänitä Jesús yaghaguubøoyyä neby jaduħn miúugät. ⁴⁹Mänitä häna'c-hajxy wiingpä miänaañ:

—Huug hahixnä, ween yhuuc cähxø'øgy pø minaambä Elías yajñahwa'adsa'añ.

⁵⁰Mänitä Jesús jadähooc møc yäaxcumbä. Mänit yho'nä. ⁵¹Mänitä tsajtøjc-hadøødiuc quioø'tswa'xy cujjiä. Cøxp jaduħn quioø'tsohñ. Mänitä hujx ñajxy. Mänitä tsaajaduħn wia'xy. ⁵²Mänitä ho'ogyjiäya'ajiut may yhawaach. Mänitä ho'ogyjiäya'ayhajxy may jiuypiojcy, ja'a Diosmädia'agy hajxy hänajty tøø miäbøquiäbä. ⁵³Coo ja'a Jesús hänajty tøø jiuypiojcy, mänitä ho'ogyjiäya'ayhajxy yhawa'adspädsøømy, ja'a hajxy hänajty tøø jiuypioquiäbä. Mänit hajxy quiajptägøoyy Jerusalén. Jim hajxy jaduħn yhiyxä nämay.

⁵⁴Jimä soldadowiindsøn ja'a Jesús hänajty cwieendähaty møødä soldadohajxy. Coo ja'a tsø'ty hajxy jaduħn yhiyx, mänit hajxy jiaanč tehñ chähgøoyy. Mänit hajxy miänaañ:

—Tøyhåjtäm hijty coo hädaa craa hijty Dyioshuungä.

⁵⁵Jimä tadjäya'ay ja'a Jesús hajxy hänajty wyl'i ñäheebø'øy jäguemduum. Jimä Jesús hajxy hänajty tøø piadsoon Galilea.

Tøø hajxy hänajty piuhbety.

⁵⁶Jimä María hänajtypä ja'a Magdalatsohmbä, møødä María ja'a Jacobo tiajhajxy, møødä Zebedeo tio'oxiojcy. ⁵⁷Coo quioodsøoyy, mänitä mäyøøjäya'ay tu'ug miejch, ja'a xøhajpä José. Jim hänajty choon Arimatea. Pianøcxäbä ja'a Jesús miädia'agy hänajty je'e. ⁵⁸Mänitä José ja'a Pilato cuhdujt hoy miäyujwa'añ coo ja'a ho'ogyjiäya'ay yajmänácät cruzcøxp. Mänitä José ja'a cuhdujt miooyyä. ⁵⁹Mänit jaduħn yajmänajcy. Mänitä poobwit yajñahbijty. ⁶⁰Mänit jaduħn jiiby piädaacy tsaajutjooty ja'a naamdajypä. Paadiä José ja'a tsaajut hänajty tøø yajtajyii, jiiby hänajty piäda'aga'añii coo hänajty tøø yho'ogy. Mänitä tsaajut yhahämoomtägooyy tsaahaam maa ja'a Jesús hänajty tøø ñaaxtägø'øyän. Mänitä José wyiimbijty. ⁶¹Jimä María Magdalatsohmbähajxy miähmøoyy møødä María tu'ugpä. Jim hajxy hänajty yhäña'ay maa ja'a Jesús hänajty tøø ñaaxtägø'øyän.

⁶²Viernes ja'a Jesús jaduħn yho'cy. Cujaboom ja'a teedywiindsøn hajxy miejch maa ja'a Pilatän møødä fariseoshajxy. ⁶³Mänitä Pilato ñämaayyä:

—Miič møjteedy, ja'a craa häxøoy hó'cäbä, tøø hijty miäna'añ cooc tyijy cumaaxc hijty jiuypioğa'añ. Pero nä'a hønndaac jaduħn.

⁶⁴Entonces, quex ja'a soldado jim maa tøø ñaaxtägø'øyän, jaduħn hajxy jaduħn jim yhadänä'awät jadu'tsuhm. Jaduħndsä Jesús miägu'ughajpä ja'a ñaaxni'x hajxy nøcxy quia'a yajpädsøømä.

Jaduhñdsä cu'ug hajxy quia'a nämá'awät cooc tyijy tøø jiuypioçy. Maas hanaxiä hajxy jaduhñ cu yhöñdaacy quejee ja'a Jesús hijty yhöñda'aguiän.

⁶⁵Mäniä Pilato miänaañ:

—Xiidsä soldadohajxy. Ween hajxy jim nõcxy yhadána'ay neby jaduhñ quia'a pädsómät.

⁶⁶Mäniä soldadohajxy jim quiejxä hadänaabiä. Mäniä tsaajxy xioøjøøyy ja'a jim hämoonnaabiä maa ja'a tsaajuthaawän. Mäniä hajxy jim miähmøøyy.

28 Cujaboom näxøø jopynä, mäniä María Magdalatsohmä jim miejch maa ja'a Jesús hänajty tøø ñaaxtägø'øyän møødä María tu'ugpä. ²Mäniä hujx møc ñajxy. Jimä Dios ja'a mioonsä hänajty tu'ug tiäna'ay. Tsajpootyp hänajty tøø choon. Mäniä tsaajxy jöhämoomy ja'a hijty hijpä juthaguum.

Mäniä yhöxtaacy tsaanähgøxp.

³Jaanch tehñ yhaamb hänajty je'e. Jaanch tehñ pioob ja'a wyit hänajty. ⁴Coo ja'a soldado ja'a Diosmoonsä hajxy yhjy, mäniä hajxy tiägøøyy tsäyubiä. Jaanch tehñ chähgøøby hajxy hänajty. Mäniä hajxy quiädaayy. Jaduhñ hajxy miähmøøyy nebiä ho'ogypiän.

⁵Mäniä Maríahajxy ñämaayy ja'a Diosmoonsäm:

—Ca'a hajxy mdsähgø'øy. Nnajuøøbiøch jaduhñ coo ja'a Jesús hajxy mhøxta'ay, ja'a hijty tøø miøjpahbedyíjibä. ⁶Cabä jii; tøø jiuypioçy neby hijty tøø miäna'añän. Min hajxy huug hix maa tøø ñaaxtägø'øyän. ⁷Coo hajxy jaduhñ mhíxät, mäniä

miägu'ughajpä hajxy nõcxy paquiä mhawaanä coo jaduhñ tøø jiuypioçy, coo jaduhñ ñøcxø'øga'añ Galilea. Jim hajxy jaduhñ mbaada'añ. Jaduhñhöch mijts nhawáañäm.

⁸Mäniä Maríahajxy hoy yhjy paquiä maa ja'a Jesús hänajty tøø ñaaxtägø'øyän. Jiiäbä hajxy chähgø'øy, jiiäbä hajxy xioonda'agy. Mäniä miägu'ughajpä hajxy hoy yhawaanä päyø'øguiä.

⁹Tu'haamnøcxp ja'a Jesús ñäguehxtøøxy. Mäniä Maríahajxy yajpoo'xä. Mäniä Jesús hajxy wyiingumedsoøyy. Mäniä hajxy tiecymiämänenøøyy. Jaduhñ hajxy wyiingudsähgøøyy. ¹⁰Mäniä hajxy ñämaayy:

—Ca'a hajxy mdsähgø'øy. Nøcxhöch ja'a nmägu'ughajpä hajxy hawáañac coo hajxy jim ñøcxät Galilea, cooch hajxy jim xpiaada'añ.

¹¹Coo ja'a Maríahajxy hänajty tøø wyiimbity maa ja'a Jesús hänajty tøø jiuypioquiän, mäniä soldadohajxy näje'e nõcxy cajpooty, ja'a hajxy hänajty tøø yhadána'ayäbä. Mäniä teedywiindsøn hajxy hoy yhawaanä nebiaty hajxy hänajty tøø yhjy.

¹²Mäniä teedywiindsøn hajxy hoy miøødmädia'agy ja'a martuumädøjc-hajxy neby hajxy jaduhñ quiojyquiapxytiünät. Mäniä soldado xädø'øn hajxy may miooyy. ¹³Mäniä soldadohajxy ñämaayy:

—Jaduhñ hajxy mmäná'anät coo hajxy coods mmaaho'cy, y coo ja'a Jesús ja'a miägu'ughajpähajxy hoy yajpädsømyii. ¹⁴Y coodsä gobernador jaduhñ miädoyhädät,

højts jaduḥḥ nyajmábógäp. Jaduḥḥ hajxy xquia'a capxpáadät.

¹⁵Mänitä soldado ja'a xädø'øñ hajxy wyiingpøjcy. Mänit hajxy hoy jiatcø'øy neby hajxy hánajty tøø ñäma'ayijän. Jaduḥḥdsä judíoshajxy miädia'agyñä høxtä jäda'anäbaadyñä.

¹⁶Mänitä Jesús miägu'ughajpähajxy jim ñøcxy Galilea, ja'a nämajtu'ugpä. Mänit hajxy jim miejch maa ja'a tuñän maa ja'a Jesús hánajty tøø ñägäpxiän. ¹⁷Coo ja'a Jesús hajxy yhijxy, mänit hajxy wyiingudsähgøøyy, hoy hajxy hánajty näje'e quia'a ja mábøcy hamuumdu'joot. ¹⁸Mänit hajxy

wyiingumedsoøyyä. Mänit hajxy ñämaayyä:

—Tøøchä Dios cuhdujt cøxiä xmio'oy jim tsajpootyp, møød hädaa yaabä naaxwiin. ¹⁹Nøcx hajxy wiinduhmyhagajpt. Yajwiingapxø'øw hajxy nébiøch nmädia'agy hajxy xmiäbójcät. Jaduḥḥ hajxy myajnábétät ja'a Diosteedycoxpä, møødä høøchcoxpä, møødä Dioshespíritucøxpä. Høøch ja'a Dios xyHuunghajp. ²⁰Jaduḥḥ hajxy myajnähixø'øwät coo hajxy jaduḥḥ miäbógät nebiátyhøch mijts tøø nhane'emiän. Mjahmiédsäp hajxy jaduḥḥ cooçh mijts nmøødhida'añ cøjxta'axiøø høxtä coonä naaxwiimbä wyiimbídät.

San Marcos

1 Jaduhñä Diosmädia'agy chohnda'agy ja'a Jesucristocøxpä, neby jiajty, neby yhabejty. Dioshuungä Jesucristo je'eduhñ.

²Jaduhñ jim cujaay myiñ nocyjiooty, ja'a Isafas jecy quiujáhyäbä. Ja'a Isafas, je'e ja'a Diosmädia'agy jecy yajwa'x. Jaduhñä Dios ja'a yHuung jecy ñämaayy:

Huuc mäadow, chámhøchä nguguexy nguejxø'øga'añ maa miich mnøcxø'øwa'añ.

Je'e ja'a mädia'agy nøcxy yajwa'xa'añ coo miich jim nøcxy mwäditaambä.

³Mänitä Dios jiaac mänaañ: “Pactúmhøchä nguguexy nøcxy wiädita'añ. Coo ja'a cu'ughajxy jaduhñ miädoyhada'añ coo ja'a wiingapx jøjcapxøøbiä jim tøø quiäda'agy pactuum, mänit hajxy nøcxy wyiingapx jøjcapxø'øwa'añii coo ja'a haxøøgwiinmahñdy hajxy ñajtshixø'ød, coo ja'a Jesús ja'a miädia'agy hajxy miäbøjcät, ja'a hajxy mWiindsønhadaambiä.”

Ja'a Juan jaduhñ nänøømä, ja'a hánajty mäyajnäbetaambä.

⁴⁻⁵Mänitä Juan je'e jiaançh tægøøyy mäyajnäbejpä jim jäguemduum, maa ja'a mõjnøø hánajty xiøhatiän Jordán. Mänitä jäya'ayhajxy may miejch maa ja'a Juan hánajtiän. Jim hajxy hánajty choon maa ja'a naax hánajty xiøhatiän Judea, mõød jim maa ja'a cajpt hánajty xiøhatiän Jerusalén. Mänitä Juan ja'a cu'ug tiægøøyy yajwiingapxøøbiä coo hajxy ñäbétät, weenä jiootä wyiinmahñdy hajxy yajtagach. Jaduhñä Dios ja'a piojpä quiädieey hajxy yajnähwáatsät. Mänitä cu'ugä piojpä quiädieey hajxy ñägäpaxy. Jaduhñ hajxy hánajty miäna'añ cooc ja'a yhaxøøgwiinmahñdy hajxy hánajty ñajtshixø'øwa'añ. Mänit hajxy ñäbejnä.

⁶Ja'a Juan, camellopøjt hánajty wyithajpy. Wajhac hánajty wiøønhajpy. Mu'u hánajty chu'uchhajpy. Møjtsiinnøø hánajty yhu'ugyhajpy. ⁷Mänitä Juan ja'a cu'ug yajwiingapxøøyy: “Jímhøchä njamiøød tu'ug jiaac medsa'añ yajwiingapxøøbiä. Maas mäjaamøød je'e miedsa'añ quejeech høøch. Cábøch cuhdujt jaduhñ njaty mõødä nebiä cuhdujt je'e miøødän, ja'a jiaac medsaambä.

⁸Coo mijts nyajnábejty, nøøhaam mijts nyajnábejty. Pero ja'a jaac minaambä, Dioshespírituhaam hajxy jadáhooc xyajnábejtägatsa'añ." Jaduhñä Juan miánaañ.

⁹Cujequiä Jesús jim miejch maa ja'a Juan hánajty miáyajnábetiän, jim maa ja'a mõjnøø hánajty xiøhatiän Jordán. Jimä Jesús hánajty tøø choon maa ja'a cajpt xiøhatiän Nazaret, jim maa ja'a naax hánajty xiøhatiän Galilea. Mänitä Juan ja'a Jesús yajnábejty. ¹⁰Tuunä Jesús ñä'ä tø'ødspädsøomy, mänit yhijsy coo ja'a tsajt yhawaach. Mänitä Jesús ja'a Dioshespíritu yhijsy coo hánajty ñägäda'agyii nebiä paloman. ¹¹Mänitä Dios jim quiuhgapxnajxy tsajpootyp. "Høøch miič tu'uquiä nHuunghajpy. Miič njaanč tehñ chojpy. Miič njaanč tehñ quiumaaby." Jaduhñä Jesús ñämaayä.

¹²Mänitä Jesús miødhajtä pactuum ja'a Dioshespíritu.

¹³Mänitä Jesús jim piuhwaatsä. Nidiuhñ jim miähmøoyy.

Jagooyyä animalhajxy hánajty jim wiädity. Mänitä Jesús ñämejtsä ja'a mõjcu'ugong. Mänitä Jesús jia tågøoyyä jøjcapxøoyyäbä. Juxychägui'xxøø ja'a Jesús jim yhijsy jäguemduum. Mänitä Jesús ñämejtsä ja'a Diosmoonsähajxy ja'a jim tsajpootypä. Mänitä Jesús piuhbejtä.

¹⁴Ja'a Juan, cujegy je'le chuumā. Coo je'le jaduhñ chuumā, mänitä Jesús jim ñøcxtägajch Galilea. Mänitä Jesús ja'a cu'ug tiägøoyy yajwiingapxøøbiä ja'a Diosmädia'agy cooc hánajty yhabaatnä coo ja'a Dios ja'a

miøcmäjaa hánajty yajcähxø'øga'añ.

¹⁵"Habáatnäp jaduhñ coo ja'a Dios ja'a miøcmäjaa yajcähxø'øga'añ. Paadiä Dios ja'a miädia'agy hajxy mmábøjcat. Weenä mjootä mwiiinmahñdy hajxy myajtägach. Weenä mhaxøøgwiinmahñdy hajxy mnajtshixø'øy." Jaduhñä Jesús miánaañ.

¹⁶Cujequiä Jesús tiägøoyy wädijpä maa ja'a mejy hánajty xiøhatiän Galilea. Jim hánajty wiädity mejypia'a, mänitä jäya'ay metsc yhijsy, ja'a Simón møødä piuhya'ay Andrés. Hacxmats ja'a Simónghajxy hánajty tiuunghajpy. Jiibiä yhacxjohmñd hajxy hánajty piäda'agy mejjiooty. ¹⁷Mänitä Simónghajxy ñämaayä:

— Jam hajxy wädjítäm. Je'le mijts hijty mduunghajpy, hacxmats. Wiingtuunghøøch mijts nmo'owaamby. Nyajnáhixø'owáambiøch mijts nebiä cu'ugä Diosmädia'agy hajxy myajwiingapxø'øwät —nømä Jesús miánaañ.

¹⁸Tuunä jaduhñ ñä'ä mänaañ, mänitä Simón ja'a yhacxjohmñd hajxy hoy ñajtswidø'øy mejypia'a. Mänitä Jesús hajxy piadu'ubøjcy. ¹⁹Weeñtiä ja'a Jesúshajxy hánajty tøø miejypia'ayo'oy, mänitä Jesús ja'a Zebedeo yhijsy møødä yhuunghajxy, ja'a Santiago møødä Juan. Barcohuungooty ja'a Zebedeohajxy hánajty yháña'ay. Jiibiä yhacxjohmñd hajxy hánajty yhaxodsø'øy. ²⁰Mänitä Jesús ja'a Santiago miøjyaaxy møødä Juan. Mänitä Santiago ja'a Jesús hajxy piadu'ubøjpä. Nähgueec ja'a tieedy hajxy jiiby barcohuungooty møødä mioonsähajxy.

²¹Mänitä Jesúshajxy jim miejch maa ja'a cajpt hánajty xiøhatiän Capernaum. Coo ja'a poo'xxiøø yhabaaty, mänit hajxy jiiby tiägøøyy tsajtøgooty. Mänitä Jesús ja'a cu'ug tiägøøyy yajwiingapxøøbiä. ²²Mänitä cu'ughajxy yagjuøøyy coogä Jesús hánajty hoy yajnáhixø'øy nebiä møjcu'umøødpän. Maas hóyyäc hánajty yajnáhixø'øy quejee ja'a häna'c-hajxy, ja'a Diosmädia'agy hajxy hánajty naxy yajnáhixøøbiä tsajtøgooty. ²³Jiibiä mähdiojc hánajty tu'ug tsajtøgooty, tøø hánajty yajtägø'øyii ja'a møjcu'u. Mänitä møjcu'u tiägøøyy yaaxpä møc:

²⁴—Miičh Jesús, Nazaret miičh mdsooñ. Tii højts coo xmiädsibø'øy. Højts jaduhñ xjia wi'i yajcuhdägøyyaamb, túhmäts. Nnajuøøbiøch pøn miičh. Miičhä Dios xyHuunghajp —nømä mähdiojcä møjcu'u yajmänaañä.

²⁵Mänitä Jesús ja'a møjcu'u yhojy: —Hamón, jua'ads jim maa yø'ø mähdiojcän —nømä Jesús miänaañ.

²⁶Mänitä møjcu'u ja'a mähdiojc je'e yajpojpaaty. Yáaxäbä mähdiojc ñähwaatsä. Ja'a møjcu'u jaduhñ yajyaax. ²⁷Coo ja'a Jesús ja'a mähdiojc jaduhñ yajnáhwaach, jiaančh tehñ yagjuøøyy ja'a cu'ughajxy jaduhñ nägøxiä. Mänit hajxy tiägøøyy niñämäyyäbä: —Maa yø'ø craa cuhdujt jaduhñ tøø ñä'ä mahñ piøcy coo yø'ø mähdiojcä møjcu'u jaduhñ yajnáhwaatsä. Nej, hawiinjemyguiuhdujtäda'a miøødäjä —nømä Jesús ñänøømä.

²⁸Paquiä mädia'agy jim wia'xy Galileanaaxooty wiinduhmyhagajpt

coo ja'a Jesús ja'a miøcmäjaa hánajty tøø yajcähxø'øgy.

²⁹Coo ja'a Jesúshajxy jiiby chajtøjpädsøømy møødä jiamioødtøjc, mänit hajxy jim ñøcxy maa ja'a Simónghajxy hánajty chäna'ayän møødä Andrés. Quipxiä Santiaghajxy hánajty choonä møødä Juan. ³⁰Ja'a Simón ja'a miø'ødhoc, pa'amgo'naaby hánajty je'e. Tobia'am hánajty miøød. Coo ja'a Jesús jim miejch maa ja'a Simón tiøjcän, mänitä Jesús yhawáañäxä coo ja'a pa'amjäya'ay hánajty jiiby tøgooty. ³¹Coo ja'a Jesús tiøjtägøøyy, mänitä pa'amjäya'ay wyidsø'cy. Mäntiä ja'a tiøy tiøjch. Mänitä Jesús yajcaayyä yaghuucä ja'a Simón ja'a miø'ødhoc.

³²Mänittsuu, coo ja'a xøø hánajty tøø quiuhnaxy, mänitä Jesús pa'amjäya'ay may yajnämejtsä, jim maa ja'a Simón tiøjcän, møødä møjcu'umøødpähajxy. ³³Jimä cu'ughajxy hánajty may tiäna'ay tøgaaawjooty. ³⁴Mänitä Jesús jäya'ay may yajpa'amnajxy. Madiu'ujä pa'am hajxy hánajty miøødä. Møødä møjcu'umøødpähajxy, yajnáhwaatsä hajxy je'ebä. Mänitä Jesús ja'a møjcu'u yhanehmy coo hajxy quia'a cápxät, je'eguiøxpä coo ja'a Jesús hánajty ñajuø'øyii pøn je'e.

³⁵Cujaboom, je'enä hánajty wyiingoodsä, mänitä Jesús piädø'cy. Mänit tiøjpädsøømy. Mänit jim ñøcxy jäguemduum. Mänitä Tiedy hoy pia'ya'axy. ³⁶Coo jioøøyy, mänitä Simónghajxy yhiixy coo Jesús hánajty tøø tiu'ubøcy. Mänit hajxy tiu'ubøjcy høxtaabiä. ³⁷Coo ja'a Jesús piaatä, mänit ñämaayyä:

—Jim miichä cu'ug xjia wi'i yajtøy maačhä ndøjcän.

³⁸Mänitä Jesús yhadsooyy:

—Jam hajxy wiingtuum wädjftäm maa ja'a cajpt wiingonbän.

Jadúhñhøčhä cu'ugä Diosmädia'agy jim nyajwiingapxøöbiät.

Jadúhñhøch nwiinguexiä coočhä Diosmädia'agy wiinduhmyhagajpt nmäwädítät.

³⁹Mänitä Jesús tiägøøyy wädijpä tsajtøjc-tsjtøjc wiinduhmyhagajpt jim Galileanaaxooty. Ja'a

Diosmädia'agy hänäjty yajwiingapxøöby, møødä pa'amjäya'ay hänäjty yajnáhwaatspä, ja'a hajxy møjcu'umøødpä.

⁴⁰Mänitä Jesús pa'amjäya'ay nänimejtsä tu'ug, ja'a

leprapa'ammøødpä. Mänitä Jesús wyiinijcädaacä, miänuu'xtaacä:

—Pø chojpy miichä mjoot jaduñ, høøch hädaa nba'am yajnáhwäatsäc —nømä Jesús nänimaayyä.

⁴¹Mänitä mähdiøjc nänxuu'tsä.

Mänit nänhdoonä. Mänit nänimaayyä:

—Tii coo quia'a cabä. Tøø jaduñ mnähwa'ačh.

⁴²Tuunä ja'a Jesús jaduñ nänä mänaañ, mänitiä mähdiøjcä pia'am nänhwaatsä. ⁴³⁻⁴⁴Mänit miägapx yhanehmä:

—Huuc mäadow, cab jaduñ pøn mhawáañät coo tøø mba'amnähwa'ačh. Tu'uda'aukiä jim mnøcxät maa ja'a teediän, ween jaduñ xyhixy coo tøø mjaanč pa'amnähwa'ačh. Mänit mguyoxø'øwät nebiä Moisés jecy yhanehmian, jaduñä cu'ughajxy nänajuø'øwät coo tøyhajtä mba'am tøø jiaanč naxy —nømä Jesús miänaañ.

⁴⁵Pero cabä craa nänä mädia'agymiäböjcy, ja'a pia'am hänäjty tøø yajnáhwa'ačhijjäbä. Coo tiu'ubøjcy, mänit tiägøøyy mädiaacpä nebiaty hänäjty

tøø jiaty. Wiinduhmyhagajptä mädia'agy jaduñ wia'xy. Coo ja'a pa'amjäya'ayhajxy jaduñ miädoyhajty coo ja'a Jesús hänäjty miäyajpa'amnaxy, mänitä Jesús hajxy tiägøøyy høxtaabiä coo ja'a pia'amhajxy yajnájxäxät. Paadiä Jesús hänäjty quia'a cajptägø'øwaannä coo ja'a pa'amjäya'ayhajxy hänäjty jia wi'i nänimech. Paadiä Jesús miähmøønä jäguemduum maa jäya'ay quia'a hitiän. Mänitä Jesús ja'a pa'amjäya'ay may nänimejtsä. Wiinduhmyhagajptjaty hajxy hänäjty choon.

2 Cujequiä Jesús jadähooc quiajptägøøyy Capernaum.

Mänitä mädia'agy wia'xy coo hänäjty jim tøø miéjtscumbä.

²Mänitä jäya'ayhajxy may miejch maa ja'a Jesús hänäjty miejsta'aguiän. Paquiä ja'a tøjc jaduñ yhujch. Høxtä tøguubiaady hajxy miejch. Mänitä Jesús ja'a cu'ugä Diosmädia'agy tiägøøyy yajwiingapxøöbiä. ³Mänitä pa'amjäya'ay tu'ug quiøømiejtsä cø'ømucy tecymiucy. Nämädaaxcä jäya'ayhajxy hänäjty quiø'øy tsaajiooty. ⁴Cabä pa'amjäya'ay hänäjty hoy yajmedsa'añii maa ja'a Jesúsän, coo ja'a jäya'ayhajxy hänäjty jiaanč tehñ miayyä. Mänitä mähdiøjc miäbejtä cuhjodiøjnähgøxp. Mänitä tøjc hajxy weentiä yajcuhwaach, jim mädooyyä maa ja'a Jesús

hänajty pia'täna'ayän, mäduhñtiä pa'amjäya'ay hoy ñänaxy. Mänit jaduħn quiuhdøñajxä tsaajiooty. Jiiby hoy quiäda'agy maa ja'a Jesús wyiinduumän. ⁵Paadiä pa'amjäya'ay yajmejtsä maa ja'a Jesúsän, ñajuøøby hajxy hänajty coo ja'a pia'am hänajty yajnaxäänäxä. Coo ja'a Jesús jaduħn yhiyx coo ja'a miädia'agy hänajty miäbøgäänäxä coo hänajty miäyajtso'oga'añ, mänit pa'amjäya'ay ñämaayyä:
—Mägu'ughajpä, tøø ja'a mboj tøø ja'a mgädieey xñähwa'aäch —nømä Jesús miänaañ.

⁶Jiibiä häna'c-hajxy hänajty näje'e piahäñ'ay, ja'a Diosmädia'agy hajxy naxy yajnähixøøbiä tsajtøgooty. Jiiby hajxy hänajty miämädoonaabiä. Mänit hajxy näje'e miänaañ quiopcooty: ⁷“Tii yøø craa jaduħn coo miäna'añ cooc tyijy yøø pa'amjäya'ay piojpä quiädieey tøø yajnähwäätsäxä. Cap pøn cuhdujt miøødä coo jäya'ayä piojpä quiädieey yajnähwäätsät; jagooyyä Dios tu'uquiiä miøødä.” ⁸Ñajuøøyy ja'a Jesús jaduħn waambaty hajxy hänajty miädia'agy quiopcooty. Mänit hajxy ñämaayyä:

—Tii hajxy jaduħn coo mwil'i miädia'agy mgopcooty. ⁹⁻¹¹Høøch, Diosquëxyhöch høøch, páadyhöch cuhdujt nmøødä cooçhä jäya'ayä piojpä quiädieeyhajxy yaa nyajnähwäätsät hädaa yaabä naaxwiin. Hädaa mähdiøjc, nyajpa'amnaxáambiøch hädaa. Jadúhñhöch nyajcähxø'oga'añ cooçh njaançh Diosquëxiä. Jaduhñä tøyhajt hajxy mmøødhäjpät cooçh

cuhdujt njaançh møødä cooçhä jäya'ayä piojpä quiädieeyhajxy nyajnähwäätsät —nømä Jesús miänaañ.

Mänit pa'amjäya'ay ñämaayyä:
—Tänaayyøøg. Widsøøg yøø mdsaa. Nøcxnä maa ja'a mdøjcän.

¹²Tuunä ja'a Jesús jaduħn ñä'ä mänaañ, mänit pa'amjäya'ay jiaançh møcpøjcy. Mänit tiänaayyø'cy. Mänit chaay wyidsø'cy. Mänit tiu'ubøjnä. Coo ja'a cu'ughajxy jaduħn yhiyx, mänit hajxy nägøxiä jiaançh tehñ yagjuøøyy. Mänit hajxy miänaañ:
—Ni mänaa højts jaduħn nga'a hñxäm.

Mänit Dios hajxy wyiingudsähgøøyy.

¹³Mänit Jesús ñøcxtägajch maa ja'a mejjiän. Mänit jäya'ay jim may ñäméjtsägumbä. Mänit Diosmädia'agy hajxy yajwiingapxøøyyä. ¹⁴Jimä Jesús hänajty miejypia'ayo'oy, mänit Leví yhiyx, ja'a Alfeo yhuung. Jim hänajty yhäña'ay meexäpa'a maa hajxy hänajty yajnähjuudiu'udiän. Mänit Leví ñämaayyä:

—Jam wädíjtäm —nømä Jesús miänaañ.

Mänit Leví tiänaayyø'cy. Mänit piadu'ubøjcy.

¹⁵Mänit Jesús hajxy wiowä mägaabiä maa ja'a Leví ja'a tiøjcän, møødä jiamøødtøjc. Nämäyyä jäya'ayhajxy jim piamejch, ja'a Jesús hajxy hänajty pawädijpä. Jiibiä yajnähjuudiuutpäðøjcä Jesús hajxy hänajty may miøødcaamiucy miøødhuucmucy, møødä cuboj cugädieediøjc. ¹⁶Jiibiä fariseoshajxy hänajty näje'e miähee'pna'ay,

møødä häna'c-hajxy, ja'a Diosmädia'agy hajxy hänajty naxy yajnahixøøbiä tsajtøgooty. Coö ja'a Jesús hajxy jaduhñ yhihxy coö ja'a yajnahjuuduutpädøjc-hajxy hänajty miøødcaamiugyii møødä cuboj cugädieejäya'ayhajxy, mänitä Jesús ja'a jiamiøødhajxy ñämaayyä:

—Yø'ø mwiindsøn, tii yø'ø yajnahjuuduutpädøjc coö miøødcaamiucy, møød yø'ø cuboj cugädieejäya'ay —nømä fariseoshajxy miänaañ.

¹⁷Miädoow ja'a Jesús jaduhñ coö hajxy jaduhñ miänaañ. Mänit hajxy ñämaayyä:

—Pøn jaduhñ møc, cab hajxy yajtsooyø'øy. Pøn jaduhñ pa'ammøød, je'eds hajxy jaduhñ yajtsooyøøby. Páadyhöch yaa tøø ngäda'agy hädaa yaabä naaxwiin coöchä cuboj cugädieebiähajxy nnämä'awät coö ja'a yhaxøøgwiiinmahñdy hajxy ween ñajtshixø'øy. Pønäc tyijy pojpä cädieey ca'a møød, cábøch hajxy je'e waamb nnäma'awa'añ —nømä Jesús miänaañ.

¹⁸Cujecy, jimä Juan ja'a jiamiøødhajxy hänajty jaguiay yhity, møødä fariseoshajxy näje'e. Mänitä jäya'ayä Jesús hajxy hoy näje'e miäyajtøy:

—Yø'ø Juan ja'a jiamiøødhajxy, jaguiay hajxy yø'ø yhity, møød yø'ø fariseoshajxy. Pero miichä mjamiøødhajxy, cab hajxy jaduhñ yhihpä. Tisän —nømä Jesús ñämaayyä.

¹⁹Mänitä Jesús yhadsooyy:

—Coo ja'a pøc ja'a hu'ug naxy jiadyii, cabä jäya'ayhajxy yhity jaguiay, ja'a hajxy woybä wichpä,

coö ja'a jamiø'ød hajxy hänajty wyiingay wyiinhu'ugy. Cab hajxy hänajty jiootmayhaty. ²⁰Pero habaadäännäp jaduhñ coöch yaa ndsoonaannä. Mänitøch mähøjñäbä ja'a njamiøødhajxy yhida'añ jaguiay. Jootmayhadaamb hajxy hänajtiän.

²¹Ni pønä tucwit quia'a hagø'yø'øy jemywyithaam. Ja'a jemywyit, mógap je'e. Ja'a tucwit, cøødsäp je'ebä. Maas hanaxiä jiaac pagøødsät. ²²Jaanaä jaduhñduhmä, ni pønä jemyvyino quia'a cudemø'øy tucwajhacxujiooty. Jaac xúnäp ja'a jemyvyino jaduhñ. Mägøødsø'øb ja'a tucwajhacxuy jaduhñ. Cøxäp ja'a jemyvyino yhöxyocy. Nä'ägä tägöyyäp jaduhñ nämetsc. Tägöyyäp ja'a tucwajhacxuy. Jaanaä tägöyyäbä jemyvyinbä. Päädiädsä jemyvyino hajxy quidemø'øy jemywiajhacxujiooty —nømä Jesús miänaañ.

²³Poo'xxiøøjooty hänajty je'e, jimä Jesús hajxy hänajty wiädity trigocamjooty, møødä jiamiøødtøjc. Mänitä jiamiøødhajxy yohguiujc tiägøøyy trigowiingädsujtspä. Je'e hajxy hänajty jiøø'xaamby. ²⁴Jimä Fariseoshajxy hänajty näje'e piawädijpä. Mänitä Jesús ñämaayyä:

—Tii yø'ø mjamiøødhajxy coö trigowiingädsuch poo'xxiøøjooty. Nej, cab hajxiäda'a ñajuø'øyä coö ja'a cuhdujt jaduhñ myiñä coö hajxy jaduhñ mga'a tünät poo'xxiøøjootiä —nømä fariseoshajxy miänaañ.

²⁵Mänitä Jesús miänaañ:

—Nej, cahnä Diosmädia'agy hajxy mgapxiä coö ja'a Davidhajxy jecy yäho'pøjc møødä jiamiøødtøjc.

²⁶Ja'a Abiatar hānajt̃y tuumb teedywiindsõñ. Mānitā David jiiby tiägøøyy Diostøgooty. Mānitā tsajcaagy quiaaay, ja'a teedyhajxy hānajt̃y tøø quiuyoxø'øyābā Dioswiinduum. Mānitā David ja'a jiamiøødtøjc piuhmooyy. Hoorā, cabā cuhdujt̃ hānajt̃y myiñ coo ja'a David ja'a tsajcaagy hajxy jaduhñ quiáyāt. Jagooyyā teedy cuhdujt̃ hajxy hānajt̃y miøødā coo hajxy quiáyāt.

²⁷Mānitā Jesús miánáangumbā: —Paadiā Dios ja'a poo'xxiøø quiunuu'xy, weenā jāya'ayhajxy mānit̃ pioo'xy. Mijts jaduhñ ja mānaamb, paadiā Dios ja'a jāya'ay piāda'agy cooc tyijy ja'a poo'xxiøø hajxy wyiingudsāhgø'owāt. Cab jaduhñ nā'ā tøyā. ²⁸Cooč jaduhñ nDiosquexiā, pāadyhøch cuhdujt̃ nmøødā cooč nmāhané'emāt høxtā poo'xxiøøjooty paady —nømä fariseoshajxy nāmaayyā.

3 Mānitā Jesús jadāhooc tiøjtāgøøyy tsajtøgooty. Jimā jāya'ay hānajt̃y tu'ug cø'øma'ad. ²Jimā fariseos ja'a Jesús hajxy hānajt̃y miāhee'pna'ay pø jaančh māyajpa'amnaxaamb hānajt̃y je'e poo'xxiøøjooty. Wiinmahñdy hajxy hānajt̃y yhøxtaaby nebiā Jesús hajxy yajtsumøøjāt. ³Mānitā cø'øma'adpā nāmaayyā:

—Tānaayyø'øg. M̃iñ yam̃ cujc tāna'aw —nømä Jesús miānaañ.

Mānitā mähdiøjc jaduhñ quiudiuuñ. ⁴Mānitā fariseoshajxy nāmaayyā:

—Nebiā cuhdujt̃ myiñ coo hajxy ndúunāmāt poo'xxiøøjooty, hoy tøgā haxøøgā. Nej, jaduhñā cuhdujt̃ myiñ coo jāya'ay hajxy

nyajtsóocāmāt poo'xxiøøjootiā, tøgā jaduhñ myiñ coo jāya'ay hajxy nyaghó'cāmādā —nømä Jesús miánáangumbā.

Pero cabā fariseoshajxy waamb nā'ägā hadsooyy. ⁵Mānit̃ hajxy wyiinhee'ppejtā, māduhñtiā Jesús hajxy hānajt̃y jiuhdānaawiādity. Jootmayhajpā Jesús hānajt̃y coo ja'a fariseos ja'a cø'øma'adpā hajxy hānajt̃y quia'a nāxuuch. Cabā Jesús hānajt̃y jiootcujcā. Mānitā mähdiøjc nāmaayyā:

—Xajtøw yø'ø mgø'ø.

Mānitā quiø'ø jiaančh xajtøoyy. Tuunā jaduhñ nā'ā xajtøoyy, mānitiā quiø'ø yhooyøoyy. ⁶Mānitā fariseoshajxy wyiimbijty. Mānit̃ hajxy nøcxy maa ja'a Herodes jiamiøødhajxiän. Ja'a Herodes, gobiernā hānajt̃y tiuumby. Mānitā fariseoshajxy nāgøxiā quiojyquiapxyhajty nebiā Jesús hajxy yajyagho'ogøøjāt.

⁷Coo ja'a Jesús hajxy jiiby chohñ tsajtøgooty møødā jiamiøødtøjc, mānit̃ hajxy jim̃ nøcxtāgajch maa ja'a mejypia'ajän. Jimā jāya'ayhajxy hānajt̃y may piawādity. Galilea hajxy hānajt̃y chooñ. ⁸Tøø ja'a mādia'agy hānajt̃y wia'xy wiinduhmyhagajpt̃ coo ja'a Jesús madiu'u hoy-yagjuøøñājatypā hānajt̃y yajcāhxø'ogy. Coo ja'a jāya'ay ja'a mādia'agy hajxy jaduhñ miādooyy wiinduhmyhagajpt̃, mānitā Jesús jāya'ay may nāmejtsā. Wiinduhmyhagajpt̃ hajxy hānajt̃y chooñ, møød jim̃ Judeanaaxooty, møød jim̃ Jerusalén, møød jim̃ Idumea, møød jim̃ Jordánmøjnøøhawiimb, møød jim̃ Tiro, møød jim̃ Sidón. ⁹⁻¹⁰Coo ja'a

pa'amjäya'ayhajxy hänäjty may tøø yajmøcpøgyii, paadiä Jesús hänäjty jia wi'i nähdonä'añii ja'a jäya'ayhajxy jaac pa'ammøødpä, ween hajxy jaduhñ nähwaatpä. Høxtä niyhanø'tsmújcäp hajxy hänäjty. Mänitä Jesús ja'a jiamiøødtøjc nämaayy coo barcohuung hajxy jim nähix hahixø'ø miähäná'awät, jaduhñä Jesús jiiby paquiä piédät coo hänäjty pianø'ødsa'añii ja'a cu'ug.

¹¹Jimä jäya'ayhajxy hänäjty wiädijpä ja'a mõjcu'umøødpä. Homiaajä Jesús hajxy hänäjty yhixy, mänitä Jesús hajxy hänäjty wyiinijcäda'agy, mänitä Jesús hajxy hänäjty näma'ay:

—Dios miich xyHuunghajp — jaduhñä mõjcu'umøødpähajxy hänäjty wyi'i ya'axy.

¹²Mänit hajxy yhanehmä coo ja'a Jesús hajxy quia'a nägäpxät majiäya'ayhagujc. Ja'a Jesús jaduhñ hanehm.

¹³Mänitä Jesús jim nõcxy tunguhduum. Mänitä Jesús ja'a jiamiøød miøjyaaxy, pøn hänäjty hoy quipxy miøødwäditaamy. Coo hajxy jim quioo'ty maa Jesús hänäjtiän, ¹⁴mänit hajxy nämajmetsc wyiinguejxä coo ja'a Jesús hajxy quipxy miøødwädítät, møød coo ja'a Diosmädia'agy hajxy nõcxy yajwa'xy. ¹⁵Mänitä cuhdujt hajxy miooyä coo jäya'ay hajxy yajnáhwá'adsät, ja'a hajxy mõjcu'umøødpä. ¹⁶Jaduhñä Jesús ja'a jiamiøødhajxy hänäjty xiøhaty, ja'a hajxy nämajmetspä. Tu'ug hänäjty xiøhaty Simón. Je'e ja'a Jesús yajxøbejt Pedro. ¹⁷Jimä Zebedeo yhuunghajxy hänäjtypä,

ja'a Santiago møødä Juan. Jue'e hajxy yajxødägøøyyä Boanerges. Jaduhñ hänäjty miädia'agytiägø'øy coo hajxy hänäjty paquiä jiaanč tehñ yhawa'anda'agy nebiä häneejän. ¹⁸Ja'a hajxy hänäjty jaac jimä, jaduhñ hajxy hänäjty xiøhaty Andrés, møødä Felipe, møødä Bartolomé, møødä Mateo, møødä Tomás, møød Santiago, ja'a Alfeo yhuung, møødä Tadeo, møødä Simón, ja'a hänäjty xøhajpä ja'a celote. ¹⁹Ja'a miämajmetspä hänäjty xøhajp Judas Iscariote. Je'e ja'a Jesús cujegy too'c; ja'a Jesús miädsiphajxy cø'ødägøøyyä. ²⁰Mänitä Jesús hajxy nõcxy maa tiøjcän møødä jiamiøødhajxy.

Mänitä jäya'ayhajxy may miéjtscumbä maa ja'a Jesús hajxy hänäjtiän. Paadiä Jesús hajxy hänäjty quia'a näbaadøøyyäxä mänaa hajxy jaduhñ quiáyät møødä jiamiøød, coo ja'a pa'amjäya'ayhajxy hänäjty wyi'i yhadsipy coo ja'a pia'amhajxy yajnájxäxät. ²¹Coo ja'a Jesús ja'a jiuju miägu'ughajxy jaduhñ miädoyhajty coo ja'a Jesús hänäjty jiaanč tehñ yhadsibyyi, mänitä Jesús hajxy nämejch. Mänitä Jesús hajxy jia yajnøcxañ hadsip. Jaduhñ hajxy hänäjty miäna'añ cooc tyijy ja'a Jesús hänäjty tøø quiuhhiñ.

²²Mänitä häna'c-hajxy näje'e quiädaacy, ja'a Diosmädia'agy hajxy hänäjty naxy yajnáhiøøbiä tsajtøgooty. Jerusalén hajxy hänäjty tøø chohnda'agy. Mänit hajxy miänaañ:

—Yø'ø Jesús, puhbéjtäp yø'ø ja'a mõjcu'ugong, paadiä mäjaa miøødä

coo jäya'ay yajnä́hwa'ačh, ja'a hajxy mójcu'umøødpä. Haa ca'a, ja'a mójcu'ugong ja'a mójcu'u hajxy wyiindsõnhajpiä —nõmä Jesús wyiingapxpejtä.

²³⁻²⁶Mäniä

yajnä́hixøøbiädøjc-hajxy miøjyaaxä. Mäniä Jesús tiägøøyy yajnä́hixøøbiä cuento yajmäbaadyhaam.

—Coo jäya'ayhajxy ñimiädsibø'øwøøjät quipxyjiaty tu'cajpt, cab hajxy hoy ñimiøødtunäanänä. Jaanä jaduhnduhmbä, coo jäya'ayhajxy ñimiädsibø'øwøøjät quipxyjiaty tu'que'ex, cab hajxy hoy tøgooty ñimiøødhidäanänä. Jaanä jaduhnduhmbä, coo ja'a mójcu'uhajxy ñimiädsibø'øwøøjät quipxyjiaty mójcu'u, cab hajxy jaduhñ hoy wiäditaannä. Cõxäp hajxy jaduhñ quiuhdägoyy. Jaduhñä tøyhajt hajxy mmøødhädät coočhä mójcu'ugong xquia'a puhbety.

²⁷Jaanä jaduhnduhmbä, ni pønä mójcjäya'ay hoy mga'a mäméedsät tijaty jiiby miøød tiøgooty. Mäniä mabøcypä coo jawyiin mgø'øxots mdexyíódsät, mänítäts hoy mmäméedsät.

²⁸Tøyhajt jaduhñ coo ja'a Dios jäya'ay miämee'xa'añ nebiatiä pojpä cädieey hajxy miøødä, waambatiä Dios hajxy tøø miägapxtägoy.

²⁹Pero pønä Dioshespíritu tøø miägapxtägoy, je'e mabøcypä, cab hajxy mänaa miämee'xáanänä. Homiänaaxøø ja'a piojpä quiädieey hajxy miäwädita'añ —nõmä Jesús miänaañ.

³⁰Paadiä Jesús jaduhñ miänaañ, coo hänäjty tøø ñänømyii cooc tyijy ja'a mójcu'ugong hänäjty miøødwädity.

³¹⁻³²Jimä Jesús hänäjty miädia'agyñä, mäniä tiajhajxy miejch møødä piuhya'ayhajxy. Coo jäya'ayhajxy hänäjty jiaančh tehñ miayyä tøgooty, paadiä tiajhajxy tøguum miähmøøyy. Mäniä capxy hajxy quiejxy tøgooty coo ja'a Jesús ween yhuuc pädsomy. Jiibiä Jesús jäya'ay hänäjty may juhhänaawiädityii tøgooty. Mäniä hajxy miänaañ:

—Ximä mdaj xwyi'i yajtøy møødä mbuhya'ayhajxy møødä mbuhdo'oxyhajxy.

³³Mäniä Jesús yhadsooyy: —Põñhöch ndajhajpy; põñhöch nbuhya'ayhajpy.

³⁴⁻³⁵Mäniä Jesús jäya'ay wyiinhee'ppejty mäduhñtiä hänäjty juhhänaawiädityii. Mäniä miänaañ: —Põnjátyhöch nDeedy miädia'agy cudiúunäp, je'ečh ndajhajpy, je'ečh nbuhya'ayhajpy —nõmä Jesús miänaañ.

4 Mäniä Jesús jadähooc yhadäaccumbä mejypia'a Diosmädia'agy-yajwiingapxøøbiä. Mäniä jäya'ayhajxy may miejch maa je'e hänäjtian. Coo hawa'adspä hänäjty jim quia'a hity pu'uwiing, paadiä Jesús barcohuungooty tiägøøyy mejywyiing. Mäniä jiiby yhänaaguiädaacy. Jimä jäya'ayhajxy miähmøøyy pu'uwiing hamädoowhijpä waambatiä Jesús hänäjty miädia'agy. ²Mäniä Jesús tiägøøyy yajnä́hixøøbiä cuento-yajmäbaadyhaam.

³—Huuc mäadow hajxy, mänitä jäya'ay tu'ug tiu'ubøjcy trigowøjpä.

⁴Näje'e trigotøømd quiahy tu'haam. Mänitä muuxyhajxy hoy pyiwø'øgy. ⁵Wiingtuumä trigotøømd hoy quiáhumbä tsaajoot maa naax hänajty quia'a møødän. Paquiä trigotøømd miujxy coo naax hänajty quia'a cøøcä.

⁶Pero nägooyyä xøø piädsøømy, cøjxä trigohuung tiø'øch coo tyicts hänajty cøøc tøø quia'a häda'agy.

⁷Wiingtuum hoy quiáhumbä maa hapyt hänajty jiaanč tehṃ miayyän. Coo hapyt jaduḥṇ yee'cy, cøjx jaduḥṇ nãhdäna'ayii. Ni tiøøm ja'a trigo quia'a pejty. ⁸Wiingtuum hoy quiáhumbä maa ja'a naax hänajty jiaanč tehṃ tiøø'quiän. Jaanč tehṃ yhoyøøyy ja'a trigo jim. Näje'e hii'xmajcpajc miøødä tu'wipä; näje'e tãgøøghii'xpajc miøødä; näje'e mägo'xpajc miøødä tu'wipä.

⁹Mänitä Jesús jiaac mänaaṇ: —Pøṇ hädaaduhṇ wiinjuøøby, wéenhøch nmädia'agy xmiäbøjcä.

¹⁰Coo majiäya'ayhajxy wyiimbijty, jimä Jesús ja'a jiamiøød miøødmähmøøyy, ja'a hajxy hänajty nämajmetspä, møødä wiingjäya'ay ja'a näwéeṇtiäbä. Mänitä Jesús nãmaayyä coo quiapxtøwät waambaty hänajty tøø miädia'agy. ¹¹Mänitä Jesús yhadsooyy:

—Jaduḥṇä Dios jioot chocy coo mijts mwiinjuø'øwät nebiä miäjaa yajcähxø'øga'añ. Hijty, cap pøṇ hijty wyiinjuø'øy. Yø'ø wiinghäna'c-hajxy, ni yø'øhajxy quia'a wiinjuø'øy. Páadyhøch yø'ø häna'c-hajxy nyajnähixø'øy

cuento-yajmäbaadyhaam.

¹²Hoy hajxy jia mädooy, cab hajxy wyiinjuø'øy; jaduḥṇä Dios hajxy quia'a jøjpøgø'øwät; jaduḥṇä piojpä quiädieey hajxy quia'a yajnähwäatsäxät.

¹³Mänitä Jesús jiaac mänaaṇ: —Mijts, pø cab hajxy jaduḥṇ hoy mwiinjuø'øwa'añ waambátyhøch naamnä tøø ngapxy cuento-yajmäbaadyhaamä, ni jaduḥṇ hajxy hoy mga'a wiinjuø'øwa'añ waambátyhøch njaac yajmøødmädia'aga'añ cuento-yajmäbaadyhaam.

¹⁴Ja'a jäya'ay trigowøjpä, jaduḥṇ mäwlinäts miäbaady nebiä Diosmädia'agy-yajwa'xpän. ¹⁵Ja'a trigotøømd cähwäbä tu'haam, jaduḥṇ mäwiin miäbaady nebiä jäya'ay ja'a Diosmädia'agy hajxy näje'e jia mädooyyän. Pero nägooyyä ja'a møjcu'u nãmech, mänitiä hajxy yagjahdiägøoyyäxä waambaty hajxy tøø yajwiingapxø'øyii. ¹⁶Ja'a tøømd cähwäbä tsaajoot, jaduḥṇ mäwiin miäbaady nebiä jäya'ay ja'a Diosmädia'agy hajxy näje'e paquiä miäbøquiän, Jaanč tehṃ xioondaacp hajxy jaduḥṇ. ¹⁷Pero cab hajxy jejcy miäböcy. Nägooyyä hajxy jaduḥṇ chaächtiiñii ja'a Diosmädia'agyquiøxpä, mänit hajxy ñajtshixøøñä. ¹⁸Ja'a tøømd cähwäbä maa hapyt jiaanč tehṃ miayyän, jaduḥṇ mäwiin miäbaady nebiä jäya'ay ja'a Diosmädia'agy hajxy näje'e jia mäbøquiän.

¹⁹Pero jiaanč tehṃ jiahmiejchp hajxy jaduḥṇ ja'a hädaa yaabä naaxwiimbä. Je'e hajxy jaduḥṇ wyi'i nädajpy wyi'i nãmaaby neby hajxy hoy chäná'awät, neby

hajxy hoy yhäyówät, mөөd maa mäyөөhadyiibän. Yajtägoobiä Diosmädia'agy hajxy jaduhñ. ²⁰Ja'a tөөmd cáhwäbä maa naax jiaanč tehñ tioo'quiän, jaduhñ mäwiin miäbaady nebiä jäya'ay ja'a Diosmädia'agy hajxy näje'e hamuumdu'joot miäbөquiän. Hoy hajxy jiaanč tehñ quiudiunñ. Jaduhñ hajxy miäbaady nebiä trigo hii'xmajcpajc miөөdän tu'wipä, mөөd nebiä tägөөghii'xpajc miөөdän, mөөd nebiä mägo'xpajc miөөdän tu'wipä.

²¹Mänitä Jesús jiaac mänaañ: —Coo jäya'ay jөөn hajxy quiudөө'xө'өy, cөxp hajxy yujcoñ. Cab hajxy jiiby quiuhjupy cubetapa'c. Ni jiiby hajxy quia'a päda'agy maabejtpa'c. ²²Jaana jaduhñduhmä, tijaty jaduhñ hijp yu'učh, tsipcөxp jaduhñ quiөxy cáhxө'öga'añ. ²³Pөñ jaduhñ wiinjuөby, wéenhөch nmädia'agy xmiäbөjcä.

²⁴Mänitä Jesús jiaac mänaañ: —Huuc wiinjuө'өw hajxy nébiөch cham nyajmөөdmädia'aga'añ; pөñ hädaa mädia'agy hoy wiinjuөby, maas hoy jaduhñ jiaac yajwiinjuө'өwa'añii. ²⁵Pөñhөch nmädia'agy tөө xmiäbөjcä, je'ečh njaac yajnähixө'өwaamby. Pero pөñhөch nmädia'agy tөө xquia'a mäbөjcä, cábөch je'e tii nyajnähixө'өwaannä. Hөxtä jiahdägoyyaamby je'e mädyii tyijy tөө jia wiinjuө'өy.

²⁶Mänitä Jesús jiaac mänaañ: —Coo ja'a Dios ja'a miөcmäjaa yajcähxө'öga'añ, jaduhñ mäwiin miäbaady nebiä jäya'ay ñi'ibiän. ²⁷Coo ñiippädө'өy, mänit nөcxy

miaanä coo tөө quioodsө'өy. Cujaboom, coo jioбө'өy, mänit piädө'cumbä. Pero cab jaduhñ ñajuө'өy nebiä tөөmd miuxy. Hix, hamdsoo ja'a tөөmd miuxy yeegy. ²⁸Ja'a tөөmd, jiibiä miäjaa piaady naaxooty. Coo miuxy, mänit yeegy. Coo yeegy, mänit piөjy. Coo piөjy, mänit tiөөmbety. Coo tiөөmbety, mänit miäjay. ²⁹Coo miäjay, mänit hajxy chucy. Tөө jaduhñ yhabaatnä coo hajxy yajpädө'ögät.

³⁰Mänitä Jesús jiaac mänaañ: —Nebiaduhñ njaac yajmäbäatämät coo ja'a Dios ja'a miөcmäjaa jaduhñ yajcähxө'öga'añ. ³¹⁻³²Coo ja'a Dios ja'a miөcmäjaa yajcähxө'öga'añ, jaduhñ mäwiin miäbaady nebiä mostazapajcän. Jaanč tehñ chay ja'abi' mostazapajc jaduhñ. Ni mädyii hujts pajc jaduhñ quia'a tsayyä nebiä habi' mostazapajc chayyän. Pero coo mn'i'ibät, jaanč tehñ piaquiä jaduhñ yeegy cөxp. Mäjatyjaty yhaa'x yeegy. Hөxtä hoyyä muuxyhajxy jim pie'eñ yhaa'xjooty.

³³⁻³⁴Haagä hädaaduhmbä cuento-yajmäbaadyhaamä Jesús ja'a cu'ug hänajty yajwiingapxө'өy, mäduhñtiä hajxy hänajty hoy wyiinjuө'өwa'añ. Pero coo ja'a cu'ug hänajty tөө wyiimbijnä, mänitä Jesús ja'a jiamiөөd hawiing ca'xy quiapxtөөnä, ja'a hajxy hänajty nämajmetspä.

³⁵Coo chuujөөyy, mänitä Jesús ja'a jiamiөөd ñamaaayy: —Tsөc hajxy jáamäm barcojooty; jam hajxy jimhaamby mejyhawiimb.

³⁶Jiibiä Jesús hajxy hänajty yhäña'ay barcojooty mөөdä jiamiөdhajxy. Mänit hajxy

tiu'ubøjcy. Jiibiä jäya'ayhajxy näje'e piadu'ubøjpä wiingbarcojooty. Pero ja'a majiäya'ay, jim hajxy miähmøøyy mejypia'a. ³⁷Mänit møc tiägøøyy pojpä. Mänitä mejy tiägøøyy ja'tspä. Mänitä barco nähja'tspejtä. Mänitä nøø com tiägøøyy barcojooty. Høxtä hujts ja'a barco jaduħn. Quinaambä barco hänajty. ³⁸Pero ja'a Jesús, maab hänajty je'e jiiby barcohøjxhaam. Cuhñø'øxø'øyy hänajty jiiby mia'ay. Jaanč tehñ chähgøøbiä Jesús ja'a jiamiøødhajxy hänajty. Mänitä Jesús hajxy hoy yuxy. Mänitä Jesús ñämaayyä:

—Wiindsón, nej, caj mdajy mmayyä coo hajxy nguhdägoyyáanämä.

³⁹Coo ja'a Jesús mia'abiädø'cy, mänitä poj yhojy møødä mejy coo yuungø'øwät. Mänitä poj jiaanč moonñ; møødä mejy, yuungøøyy je'ebä. ⁴⁰Mänitä Jesús ja'a jiamiøød ñämaayy:

—Tii hajxy hijty coo mwil'i chähgø'øy. Nej, cab hajxy mmäbøquiä coöch møcmäjaa nmøødä.

⁴¹Jaanč tehñ chähgøøby hajxy hänajty. Mänit hajxy hamee'ch ñiñämaayyä:

—Pønäda'a yø'ø; høxtä poj møødä mejy, cudiúunäxäbä miädia'agy yø'ø.

5 Mänitä Jesús hajxy jim miejch mejyhawiimb, maa ja'a naax hänajty xiøhatiän Gerasa. ²Coo hajxy miänajcy barcojooty, jimä jäya'ay hänajty tu'ug tiäna'ay jäguemjuøøby. Møjcu'u hänajty tøø yajtägø'øyyii. ³Jutjooty hänajty

chäna'ay maa ja'a ho'ogyjiäya'ay hajxy hänajty ñaaxtägø'øyän. Jaanč tehñ miøcä craa hänajty. Ni cadenahaamä jäya'ayhajxy hänajty hoy quia'a cø'øxots quia'a tecyxiodsa'añ. ⁴Mayhooc hajxy hänajty tøø jia cø'øxoch tøø jia tecyxioch cadenahaam. Pero wyil'i yaghapodøøbiä cadena hänajty. Ni pøn hänajty quia'a mäjäda'aga'añ. ⁵Xøømdsuhñ hänajty jim ya'axy jiocy cabäsantäjooty møød tunjooty. Naxy hänajty tsahaam hamdsoo ñiçhugyii. ⁶Coo ja'a Jesús jaduħn yhiixä jäguem, mänit päyø'øguiä ñänøcxä. Mänit hoy wyiinjjicäda'agyii. ⁷⁻⁸Mänitä Jesús ja'a møjcu'u ñämaayy:

—Jua'ads miich jiiby maa yø'ø craajän.

Mänitä møjcu'u møc yaaxy: —Miič Jesús, miichä Dios xyHuunghajp, ja'a jim tsajpootypä. Nej mñiijiäwø'øyyii møød høøchcøxpä. Tunä mayhajt, ca'ač xchaačhtiuñ. Dios, cøxp je'e.

⁹Mänitä Jesús ja'a møjcu'u miäyajtøøyy:

—Tii mxøhaty.

Mänitä møjcu'u yhadsooyy: —Legiónghøch nxøhaty.

Páadyhøch jaduħn nxøhaty coo højts jaduħn njaanč tehñ ñämayyä.

¹⁰Mänitä Jesús miänuu'xtaacä coo ja'a møjcu'uhajxy quia'a høxquexøøjät jäguem.

¹¹⁻¹³Jim wiingón maa ja'a Jesús hajxy hänajtiän, jim mejypia'a, jimä hädsømhajxy hänajty may yuumydiajy tunmøjc. Námejtsmil hajxy hänajty wiädity. Mänitä Jesús jadähooc miänuu'xtaacä coo ja'a

møjcu'uhajxy ween jim̄ quiexyii maa ja'a mayhädsøm̄än, weenä hädsøm̄hajxy nõcxy yajtägø'oyii. Mänitä mõjcu'uhajxy jiaančh quejxä maa ja'a hädsøm̄än. Mänitä craa nähwaach, ja'a hänajty tøø miøjcu'uyajtägø'oyijäbä. Mänitä hädsøm̄hajxy cøjx yajtägø'oyii. Mänit hajxy päyø'øguiä yhädaacy mejjiooty. Cøjx hajxy jiiby ñøøji'xø'øy.

¹⁴Ja'a häna'c-hajxy hänajty jim̄ hädsøm̄güeendähjpä, cøjx hajxy piäyø'øgy. Hoyyä mädia'agy hajxy jim̄ yajwa'xy cajptooty møød cajtpa'a neby hänajty tøø jiadyii tøø tiuñii. Coø ja'a cu'ughajxy jaduñ miädooyy, mänit hajxy hoy yhixy. ¹⁵Coø hajxy jim̄ miehch maa ja'a Jesús hänajtiän, mänitä craa hajxy yhijxy, ja'a hijty pa'ammøødpä, coø hänajty tøø nähwáatsänä ja'a mõjcu'ü. Jim̄ je'e hänajty witmøød yhäñaañä. Coø hijty pia'ammøødä, nähwa'ads høxwa'ads hijty wiädity. Tøø hänajty wyiinmahñmejtsnä. Jaančh tehñ yagjuøøyy ja'a cu'ughajxy jaduñ coø ja'a craa hajxy yhijxy coø ja'a pia'am hänajty tøø nähwáatsänä. Høxtä tsähgøøyy hajxy jaduñ. ¹⁶Mänit hajxy cøjx yajmøødmädia'agyii neby hänajty tøø jiadyii tøø tiuñii. Ja'a jäya'ayhajxy jaduñ híjxäbä coø ja'a hädsøm̄ ja'a mõjcu'ü hajxy yajtägøøyyä, je'edshajxy jaduñ mädiaac. ¹⁷Mänitä cu'ug ja'a Jesús hajxy miänuu'xtaacy coø jim̄ chõonät maa ja'a quiajpthajxiän.

¹⁸Coø ja'a Jesús hänajty wyiimbidaannä barcojooty, mänit jaduñ nämaayyä coø ween

piadu'ubøgyii. Ja'a craa jaduñ mänaañ, ja'a pia'am hänajty tøø yajnájxäxäbä. ¹⁹Mänitä Jesús ja'a craa nämaayy:

—Caj, ca'ačh xpianøcxy. Nøcx jim̄ maa ja'a mdøjcän, maa ja'a mjujy maa ja'a mmägu'ugän. Nøcxä mädia'agy yajwa'x coø miichä Dios tøø xñäxuuch, coø miichä Dios ja'a mõjcu'ü tøø xyajnähwa'ačh.

²⁰Mänitä craa jiaančh nõcxy maa ja'a tiøjcän. Mänitä mädia'agy jim̄ tiägøøyy yajwa'xpä maa naax hänajty xiøhatiän Decápolis. Jaduñ je'e miädia'agytiägø'øy majc-cajpt. Jaduñä miädia'agy hänajty yajwa'xy coø ja'a Jesús ja'a mähdiøjc mõjcu'umøødpä hänajty tøø yajnähwa'ačh. Coø ja'a cu'ughajxy jaduñ miädooyy, mänit hajxy jiaančh tehñ yagjuøøyy.

²¹Mänitä Jesús hajxy wyiimbijnä barcojooty møødä jiamioødhajxy. Coø hajxy jim̄ miéjtscombä meyhawiimb maa hajxy hänajty tøø chohñda'aguian, mänit hajxy jim̄ biarcomänajcy mejypia'a. Mänitä Jesús jäya'ay may nämejtsä.

²²Mänitä Jesús jäya'ay tu'ug wyiinjiçädaacä. Jairo hänajty xiøhaty. Je'e hänajty jim̄ tuumb wiindsõñ maa ja'a tsajtøjcän.

²³Mänitä Jesús miänuu'xtaacä:

—Wiindsõñ, mõjtá'agyhøch nhuung. To'oxiäna'c je'e. Majmetscjumøjt miøødä. Jámhøch nhuung cø'ønähgäjpäc, ween jaduñ miøcpøcy —nømä Jairo miänaañ.

²⁴Mänitä Jairo ja'a Jesús miødhajty. Jim̄ä jäya'ay ja'a Jesús hajxy hänajty may pianø'øch piabooñ. ²⁵Jim̄ä tajjäya'ay hänajty

tu'ug pa'ammøød majiäya'ayhagujc. Majmetscjumøjtä ñø'ty hänäjty tøø xiee'xy jabom-jabom. ²⁶Tøø ja'a mähdiojç hänäjty jejcy jia yajtsooyø'øy maa ja'a doctorhajxiän. Pero cábädsä pia'am hänäjty ñä'ägä yajnájxäxä. Tøø ja'a xiädø'øn hänäjty quiøjxnä tii jaduhñ ñä'ä jaac yajniämäjuyø'øwøøjöp. Coø hänäjty jaduhñ ñä'ägä yajtsooyø'øy tehñgajnä, maas hanaxiä pia'am hänäjty jaduhñ jiaac tehñ miøjta'agy. ²⁷⁻²⁸Coø ja'a mähdiojç jaduhñ miädoyhajty coø ja'a Jesús hänäjty wiädity mäba'amyajnajxpä, mänit jaduhñ wyiinmaayy quiopcooty: “Cooçh yø'ø wyit häyaa nnä'ä nähdoónät, náxäbøch nba'amäda'a häyaajä.” Mänitä Jesús jioyuhdiägøøyyä. Mänitä wyit jiaanç nähdoónäxä. ²⁹Mänitiä tajjäya'ay ñø'ty jiaanç hadujcy. Mänit ñijiäwøøyyä coø ja'a pia'am hänäjty tøø ñaxy. ³⁰Mänitä Jesús ñijiäwøøyyä coø tu'jäya'ay hänäjty tøø miøcpøcy ja'a miäjaahaam. Mänitä Jesús ja'a jäya'ay çøjx wyiinhee'ppety. Mänit miänaañ:

—Pøñhøch nwit tøø xñähdoonä.

³¹Mänitä jiamioødhajxy yhadsooyy:

—Tii jaduhñ coø myajtøy pø tøø miich jäya'ay mwit xñähdoonä. Haa ca'a, majiäya'ay hajxy jaduhñ xwyi'i pianø'tsämä —nømä Jesús ñämaayyä.

³²Pero jimä Jesús hänäjty yhøxta'ayñä pønä wyit hänäjty tøø nähdoonäxä. ³³Ja'a tajjäya'ayä, jaanç tehñ chähgøøby hänäjty je'e. Paady hänäjty chähgø'øy coø hänäjty ñajuø'øy neby hänäjty tøø miøcpøcy. Mänitä Jesús hoy

wyiinjicäda'agyii tsäyúuyyöp. Mänitä tajjäya'ay ñägapy neby hänäjty tøø miøcpøcy. ³⁴Mänitä Jesús miänaañ:

—Huung, paady miich mba'am tøø ñaxy coø tøø mmäböcy cooçh mäjaa nmøødä cooçhä jäya'ay tøy njaanç yajpa'amnaxy. Nøcxnä jootcujc.

³⁵Jimä Jesús hänäjty miädia'agyñä, mänitä jäya'ayhajxy näje'e miejch. Jim hajxy hänäjty tøø choñda'agy maa ja'a Jairo tiøjcän. Mänitä Jairo ñämaayyä: —Tøø ja'a mhuung yho'nä. Ca'a Jesús mhadsijpnä. Tii jaduhñ jim ñä'ä jaac tünöp. Tøø ja'a mhuung yho'nä.

³⁶Coø ja'a Jesús jaduhñ yhamädoonajxy, mänitä Jairo ñämaayyä:

—Ca'a mga'a mäböcy. Ca'a mjootmayhaty —nømä Jesús miänaañ.

³⁷Mänitä Jesús miänaañ coø pøn jim quia'a panøcxät maa ja'a Jairo tiøjcän. Jagóoyyägä Pedrohajxy jim ñøcxät møødä Santiago møødä Juan, ja'a Santiago piuhya'ay.

³⁸Coø hajxy jim miejch maa ja'a Jairo tiøjcän, jaanç tehñ jioøby jaanç tehñ yaaxpä jäya'ayhajxy hänäjty jim. ³⁹Mänitä Jesús hajxy tiøjtägøøyy. Mänitä Jesús miänaañ: —Cajxä yø'ø to'oxiäna'c ñä'ä hó'oguiäbä. Tii hajxy coø mwil'i jio'øy coø mwil'i ya'axy. Nä'ä maab yø'øduhñ.

⁴⁰Coø ja'a Jesús jaduhñ miänaañ, mänit ñäxiicä. Mänitä Jesús ja'a jäya'ay çøjx yhøxquejxpädsømy tøghaguuy. Mänitä Jesús ja'a to'oxiäna'c hajxy ñänøcxy maa

to'oxiäna'c hänajty quio'na'ayän, mөөдä Jesús ja'a jiamioөdhajxy, mөөдä to'oxiäna'cä tiaj tieedyhajxy.

⁴¹Mänitä Jesús ja'a to'oxiäna'c wyidsø'cy. Mänit nāmaayy:

—Quixyhuung, pädø'øg.

⁴²Tuunä ja'a Jesús jaduһn nā'ä mänaaһ, mänitiä to'oxiäna'c jiaančһ pädø'cy. Mänit yo'oyø'cy. Jiaančһ tehм yagjuøøyy ja'a Jairohajxy jaduһn mөөдä Jesús ja'a jiamioөdhajxy.

⁴³Mänitä Jairohajxy yhaneһmä coo hajxy jaduһn quia'a mädiä'agät coogä yhuung hänajty tøø jiuypioøcy. Mänit hajxy nāmāyyäbä coo yhuung hajxy yajcäyät. Ja'a Jesús jaduһn mänaaһ.

6 Coo ja'a Jesús hajxy jim chónhgumbä mөөдä jiamioөdhajxy, mänit hajxy jim nөcxy maa ja'a cajpt hänajty xiøhatiän Nazaret. Jimä Jesús hänajty nā'ägädä tsooһ. ²Coo ja'a poo'xxioø yhabaaty, mänitä Jesús jim nөcxy maa ja'a tsajtøjcän. Mänit tiägøøyy yajnähiхøöbiä. Coo ja'a cu'ughajxy jaduһn miädooyy, mänit hajxy jiaančһ tehм yagjuøøyy. Mänit hajxy tiägøøyy niñāmāyyäbä:

—Maa yø'ø craa mädia'agy jaduһmbä tøø nā'ä maaһ yhabøcy coo jaduһn jiaančһ tehм jiaty jiaančһ tehм najuø'øy, coo jaduһn hoy-yagjuøøñajaty yajcäһxø'øgy. Haa ca'a, højts nmägunaaxhajtäm yø'øjä. ³Je'le yø'ø, ja'a hijty tsejtspä puјxpä. Ja'a María yhuung yø'ø. Hajchhajtäp yø'ø, ja'a Santiago, mөөдä José, mөөдä Judas, mөөдä Simón. Yaa ja'a piuhdo'oxyhajxy chäna'ay maa højts ngajptän.

Coo ja'a Jesús hänajty jim chooһ Nazaret, paady hänajty jim quia'a mämøjø'øy quia'a māmayø'øyii.

⁴Coo ja'a Jesús jaduһn miädooyy, mänit miänaaһ:

—Homiaajä ja'a

Dioswiingueхypähajxy wyiingudsähgø'øyii. Jagooyyä hajxy jim quia'a wiingudsähgø'øyii maa yhamdsoo cajpthajxiän, maa yhamdsoo tøjc-hajxiän.

⁵Coo ja'a Jesús hänajty jim quia'a mämøjø'øy quia'a māmayø'øyii, paady hänajty jim madiu'u hoy quia'a yajcäһxø'øga'añ. Nämets nädägøøquiä pa'amjäya'ayhajxy jim nā'ä maaһ yajpa'amnajxä cø'ønähgapyaam. ⁶Jiaančһ tehм yagjuøøbiä Jesús hänajty jaduһn coo ja'a miädia'agy jim quia'a jøjpøgøøyyäxä.

Mänitä Jesús ja'a mädia'agy jim tiägøøyy yajwa'xpä mäduһnjatiä cajpthuung wiingonbä. ⁷Mänitä Jesús ja'a jiamioөd wyiinguejxy, ja'a hajxy hänajty nāmajmetspä, coo hajxy wiädítät cajpt-cajpt, coo ja'a pa'amjäya'ay hajxy yajnähwá'adsät, ja'a hajxy hänajty møjcu'umøөdpä. Nämetscjaty hajxy hänajty wiädita'añ. ⁸Mänitä Jesús ja'a jiamioөd jiaac nāmaayy coo hajxy tii quia'a mänøcxät, ni tsajcaagy, ni morral, ni xädø'øñ. Jagooyyä yomybiaxy hajxy quiábät tu'uquiä. ⁹Tu'tehñquiä cø'øg hajxy miänøcxät mөөд tu'xoјxyä wit.

¹⁰Mänitä Jesús jiaac mänaaһ:

—Coo hajxy jim mmédsät homiädyii cajptä, jimä tøjc hajxy tu'ug myujwá'anät maa hajxy hänajty mmejtsta'aga'añän. Jimiä hajxy jaduһn mhídät. Cabä tøjc hajxy myajtägätsät. ¹¹Majaty mijtsä cu'ugä mmädia'agy hänajty xquia'a jøjpøgø'øwaanä, mänitä

mdecy hajxy mwiinxit mwiinwóbät, weenä naaxoc jaduñ quiøxy ca'ay. Jaduñnä hijxtahñd miähmó'owät coo ja'a cu'ugä Diosmädia'agy hajxy hänajty tøø quia'a jøjhadsowø'øy. Mänit hajxy jim mdsóonät.

¹²Mänitä Jesús ja'a jiamiøødhajxy tiu'ubójnä mädia'agy-yajwa'xpä. Jaduñnä cu'ug hajxy hänajty yajwiingapxø'øy coo ja'a Diosmädia'agy hajxy piadu'ubójnät, møød coo ja'a yhaxøøgwiinmahñdy hajxy ñajtshixóñät. ¹³Mayyä jáya'ayhajxy hänajty yajnáhwa'ačhii, ja'a hajxy hänajty mõjcu'umøødpä. Mayyä pa'amjáya'ayhajxy hänajty yajmøcpøgyii coo hon hajxy hänajty yajnáhjaaxyii.

¹⁴Jimä Herodes hänajty guobiernähaty maa ja'a naax hänajty xiøhatiän Galilea. Mänitä Herodes miädoyhajty coo ja'a Jesús ja'a hoy-yagjuøñäjatypä hänajty yajcähxø'øgy. Mänitä Herodes miänaañ cooc tyijy ja'a Juan mäyajnäbejpä tøø jiuypiojtägach. Ja'a Juan, je'e ja'a Herodes yhajodhajt cooc tyijy hänajty je'e Jiesúsä; páadiägä hoy-yagjuøñäjatypä yajcähxø'øgy ja'a wyiinmahñdycxpä, cooc tyijy hänajty tøø jiuypiojtägach.

¹⁵Wiingatä jáya'ayhajxy hänajty miänaambä. Naje'e hajxy hänajty miäna'añ cooc tyijy Jesús hänajty je'e yhElíasä. Naje'e hajxy hänajty miänaambä cooc tyijy ja'a Jesús hänajty wiädity nebiä jecyjäya'ayhajxy hänajty tøø Dyiosmädia'agy-yajwa'xiän jegyhajty. ¹⁶Pero ja'a Herodes, tehngajnä je'e hänajty miäna'añ cooc tyijy je'e Jwiangä, ja'a hänajty

tøø yajyo'puxyíjábä. Je'eg tyijy jaduñ tøø jiuypiojtägach.

¹⁷⁻¹⁸Hiç, haxøøgä Herodes hänajty jiäya'ayhaty; ja'a yhamdsoo puhya'ay tio'oxiøjc hänajty miøødtsänáayyap. Felipe ja'a Herodes piuhya'ay hänajty xiøhaty. Herodías ja'a Felipe tio'oxiøjc hänajty xiøhjäpä, ja'a Herodes hänajty miøødtsänaabiä. Mänitä Juan ja'a Herodes yhojy: "Cab jaduñ yhooyä coo ja'a mhamdsoo puhya'ay tio'oxiøjc jaduñ mmøødtsänáayyät." Coo ja'a Herodes jaduñ yhojjä, paadiä Juan yajmajtsä. Mänitä Juan chuumä.

¹⁹Cabä Herodías hänajty yhojwiø'øy coo ja'a Herodes jaduñ yhojjä, paadiä Herodías ja'a Juan hänajty jia wi'i yajyagho'oga'añii. ²⁰Pero cabä Herodes hänajty jaduñ miäna'añ coo ja'a Juan yagho'ogóøjät. Hiç, wyiingudsähgøøbiä Herodes ja'a Juan hänajty. Ñajuøøbiä Herodes hänajty coo ja'a Juan hänajty jiaanč tehñ yhojhäna'cä. Jaanč tehñ yhomiädoonä ja'a Herodes ja'a Juan miädia'agy hänajty miädoowä. Pero cabä Herodes hänajty ñajuø'øy neby jiató'owät. ²¹Cabä Herodías wiinmahñdy hänajty ñä'ägädä paady nebiä Juan yajyagho'ogóøjät. Mänit yhabaaty coo ja'a Herodes xiøø hänajty jiada'añii. Mänitä Herodes ja'a jiamiøødtøjc miøødcaayy miøødhuucy, møødä mioonsähajxy, møødä generalhajxy, møødä mäyøødøjc-hajxy, ja'a hajxy hänajty jim tsänaabiä Galilea. ²²⁻²³Jim hajxy hänajty quiaay yhu'ugy, mänitä Herodías yhuung jiiby tiøjtägøøyy. Mänitä quixy

tiägøøyy hejtspä pujpä. Jaanč tehṁ yajxón yhejch piujty. Jaanč tehṁ xioondaac ja'a Herodeshajxy jaduhṁ møødä wioybä wyichpä. Mänitä Herodes ja'a quixy nāmaayy:

—Tehṁ tiøyy nnämä'awät, høøčh yajmäyujwáanäc tii mdsogaamby, nmó'owäbøch miičh je'e, hotyijä, høxtä nmó'owäbøch miičh naax cupc maačh yaa ngobiernähatiän.

Paadiä Herodes jaduhṁ miānaañ, jaanč tehṁ xioondaacp hānajtj jaduhṁ coo ja'a quixy hānajtj yajxón yhech. ²⁴Mänitä quixy piädsøømy. Mänitä tij hoy miāyajtøyy tiig jaduhṁ yujwá'anäp. Mänitä Herodías wiinmahñdy piaaty nebiä Juan mäyajnābejpä yajyagho'ogøøjät. Mänitä yhuung nāmaayy coo ja'a Juan ja'a quiopc yujwáanäxät. ²⁵Mänitiä quixy ja'a Herodes hoy nāma'ay:

—Høøčhä Juan quiopc móøyyäc texyjooty.

²⁶Coo ja'a Herodes jaduhṁ nāmaayy, mänit jiaanč tehṁ jiootmadiägøøyy. Mänit jaduhṁ nāhadsooyy. Hiṁ, tøø hānajtj jaduhṁ miāna'añ cooc hānajtj hoy nā'a tiijä yega'añ. Hiṁ, tøø ja'a wioybä wyichpä hānajtj jaduhṁ yajmädoy. ²⁷Mänitä Herodes ja'a mioonsä jiiby quiejxy pujxtøgooty coo ja'a Juan nøcxy yo'puxyii. ²⁸Mänit hoy jiaanč yo'puxyii. Mänitä quixy ja'a Juan quiopc hoy yajcø'ødägø'øyyii texyjooty. Mänitä tij hoy mioodiägach.

²⁹Coo ja'a Juan jiamiøødhajxy jaduhṁ miädoyhajty coo ja'a Juan hānajtj tøø yagho'ogyii, mänitä Juan ñi'x hajxy hoy yajpädø'cä. Mänit hajxy hoy yajnaaxtägø'øyy.

³⁰Mänitä Jesús nāmejtstägajtsä ja'a jiamiøød, ja'a hajxy nāmajmetspä. Cøjxä Jesús yhawáanäxä, nebiaty hajxy hānajtj tøø miäba'amyajnaaxy, møød waambaty hajxy hānajtj tøø yajnähiçø'øyy. ³¹Jaanč tehṁ miayyä Jesús jäya'ay hajxy hānajtj nāmečhii. Wiimbijp hadøjpä majiäya'ayhajxy hānajtj. Coo ja'a jäya'ayhajxy may wyi'i miech, paadiä Jesúshajxy hānajtj quia'a nābaadøøyyäxä mäduhnajtä hajxy quia'y yhú'ugät. Mänitä Jesús miānaañ:

—Jam hajxy paquiä póo'xäm wiingtuum maa majiäya'ay hajxy xquia'a paadāanäm.

³²Mänitä Jesúshajxy tiägøøyy barcojooty. Tsohṁ hajxy jimän. Mänit hajxy jim nøcxy maa ja'a majiäya'ayhajxy hānajtj quia'a jadyhitiän. ³³Coo ja'a Jesúshajxy jaduhṁ yhiçtu'ubøjcä, mänitä majiäya'ayhajxy wyi'i piadu'ubøjpä. Najuøøby hajxy hānajtj jaduhṁ maa ja'a Jesúshajxy hānajtj nøcxa'añ. Päyø'øguiä hajxy jaduhṁ nā'ägä nøcxy. Jawyiin hajxy jim nā'ägä mejch maa ja'a Jesúshajxy hānajtj nøcxiän. Wiinduhmyguiajpt hajxy hānajtj choon. ³⁴Coo ja'a Jesús jiiby piädsøømy barcojooty, mänitä jäya'ay yaghiçøøyy may. Mänit näxuu'tscapxy miøødhajty. Jaduhṁ yhiçxy nej coo meeg wyiindsøn ca'a hijpän, coo ja'a Diosmädia'agy hajxy hānajtj quia'a yajnähiçø'øyyii. Mänitä Jesús madiu'u tiägøøyy yajnähiçøøbiä. ³⁵Tøø hānajtj chuujøøñä. Mänitä Jesús ja'a jiamiøød nāmejtsä. Mänitä Jesús nāmaayyä:

—Jue'e jaduḥḥ yaa, pactuum.
Cabä cajpt yaa maa ja'a cu'ug
quiaaayyøøc hajxy häyaa jiüyät.
Tøø jaduḥḥ hoyhoy jiaančh tehḥ
chuuḥø'øy. ³⁶Näma'aw yø'ø cu'ug,
ween hajxy nøcxy quiayhøxta'ay
maa ja'a cajpt yaa wiingonbän —
nøḥmä Jesús ñämaayyä.

³⁷Mänitä Jesús yhadsooyy:

—Tsøg hajxy nä'ägä yajcáayyäm
højtshájtäm.

Mänit hajxy yhadsoögumbä:

—Haa tii hajxy jaduḥḥ nhuuc
nä'ä yajcáayyämbäp. Cajx nä'ä
caayyøøcpä nä'ä huucøøcpä. Nej,
jaduḥḥ miičh mmäna'añä coo højts
tsajcaagy nøcxy njuy mejtsmägo'x
denario —nøḥmä Jesús jiamiøød
ñämáayyägumbä.

³⁸Mänitä Jesús miänáangumbä:

—Huuc mäyajtøw yø'ø cu'ug pøn
caayyøøc møød. Pønjaty jaduḥḥ
møød, ween hajxy yajmucy.

Coo hajxy hänäjty tøø yajmujnä,
mänitä Jesús ñämaayyä:

—Jagooyyä højts tsajcaagy
mägooxyä tøø nbaady møødä hacx
metsyä.

³⁹⁻⁴⁰Mänitä Jesús miänaañ
coo ja'a cu'ughajxy yhøxtá'agät
necchooty tu'hagøøbiäjaty,
nämägo'xhaam møød
näjuxychägui'xmajc-haam. Mänit
hajxy jaduḥḥ jiaančh yhøxtaacy.

⁴¹Mänitä Jesús ja'a tsajcaagy
mägooxpä quioondsooyy møødä
hacx metspä. Coo chajhee'py,
mänitä Dioscujú'uyäp yejcy
ja'a tsajcaagy quiøxpä møødä
hacx quiøxpä. Mänitä tsajcaagy
tiägøøyy haguiddøøbiä. Mänitä
jamiøød tiägøøyy moobiä ja'a
tsajcaagy møødä hacx, ween hajxy

jaduḥḥ yajwa'xy maa ja'a cu'ugän.
Tehḥngajnä Jesús ja'a tsajcaagy
hänäjty yajwa'añguiojy møødä hacx.
Jiaac tehḥ yajmayøøby hänäjty
jaduḥḥ. ⁴²Cu'uxiä jäya'ayhajxy
jaduḥḥ jiaančh tehḥ quiaaayy.

⁴³⁻⁴⁴Hoyyä jäya'ayhajxy hänäjty
jaduḥḥ jia mayyä, majmetscachä
tsajcaagy quiunajxy møødä hacx.
Ja'a Jesús jaduḥḥ yajwa'añguioj.
Nämägøoxmil ja'a ya'adiøjc-hajxy
jaduḥḥ quiaaayy yhuucy.

⁴⁵Mänitä Jesús ja'a jiamiøød
ñämaayy coo hajxy tiägø'øwät
jiiby barcojooty, wéenac hajxy jim
ñøcxø'øgät mejyhawiimb maa ja'a
cajpt jaduḥḥ xiøhatiän Betsaida.
Coogä Jesús ja'a majiäya'ay jaduḥḥ
ñähguéecnät, mänitäc hajxy jim
ñibiaadøøjät. ⁴⁶Coo ja'a Jesús
ja'a majiäya'ay ñähgueecy, mänit
jim nøcxy tungøxp Diospa'yaaxpä.

⁴⁷⁻⁴⁸Coo quiooodsøøyy, jimä Jesús
hänäjty tøø miähmø'øy mejypia'a
nidiuhḥ. Ja'a barco, jagooyyä
hänäjty mejyquiujc tøø ñä'ä mahñ
miech. Jaančh tehḥ miøcä barco
hänäjty jiojcbujø'øyii. Tøø ja'a
Jesús jiamiøødhajxy hänäjty jiaančh
tehḥ yhanuu'xøøñä coo ja'a barco
hajxy hänäjty jia wi'i quiaaby. Coo
ja'a Jesús jaduḥḥ yhiyx coo hajxy
hänäjty tøø yhanuu'xøøñä, mänit
yo'oyhaam tiu'ubøjcy nøøwiing.
Mobädajpä hänäjty jiojø'owaannä,
tøø ja'a Jesús ja'a jiamiøød hänäjty
ñajtspaadøøñä. Wyiinnaxáannäbä
Jesús ja'a jiamiøød hänäjty
jaduḥḥ. ⁴⁹Coo ja'a Jesús yhiyxä coo
hänäjty yo'oy nøøwiing, mänitä
jamiøødhajxy miänaañ cooc tyijy
hänäjty je'e yháañämä. Mänit hajxy
møc chaächyaaxy. ⁵⁰Nägøxiä hajxy

hänajty chähgø'oy coo ja'a Jesús hajxy jaduhñ yhiixy coo hänajty yo'oy nõøwiing. Cab hajxy choj hõxcajpy. Mänitä Jesús miänaañ:

—Mõcä mjoot hajxy päda'ag; hõøch hädaa; ca'ačh hajxy xchähgø'oy.

⁵¹Coo ja'a Jesús tiägøøyy barcojooty, mänitä poj miooñ. Jiaanč tehñ yagjuøøyy ja'a Jesús jiamiødhajxy jaduhñ coo poj miooñ. ⁵²Hoy hajxy hänajty tøø jia hixy coo ja'a Jesús ja'a tsajcaagy yajwa'añguiojy møødä hacx, cab hajxy hänajty ñajuø'oy coo ja'a Jesús mõcmäjaa miøødä ja'a Dioscøxpä. Jaanč tehñ quiuhxex hajxy hänajty.

⁵³Coo ja'a Jesús hajxy jim miejch mejyhawiimb maa ja'a naax hänajty xiøhatiän Genesaret, mänitä barco hajxy jim quiuxojch mejypia'a. ⁵⁴Tuunä hajxy jaduhñ ñä'ä barcopädsøømy, mänitiä Jesús yhõxcajpä ja'a cu'ug. ⁵⁵⁻⁵⁶Paquiä mädia'agy jim wia'xy coo ja'a Jesús hänajty jim tøø miech. Mänit tiägøøyy wädiipä cajpt-cajpt. Mänitä pa'amjäya'ayhajxy tiägøøyy cøømiéjtsäbä tsaajiooty maa ja'a Jesús hänajty wiäditiän. Jimä pa'amjäya'ayhajxy hänajty tøø ñajtsçoyø'oyii mõjtu'uba'a maa ja'a Jesús hänajty ñaxø'owa'añän. Mänitä Jesús hajxy miänuu'xtaacy coo ja'a pa'amjäya'ayhajxy yajpa'amnaxø'øjät. Põnjatiä Jesús wyitpa'a hänajty nä'ä nähdoõnäxäp, tehñ ñajxpä pia'amhajxy hänajty mänitiä.

7 Mänitä fariseos ja'a Jesús hajxy ñämejch, møødä häna'c ja'a Diosmädia'agy hajxy

yajnähiixøøbiä. Jim hajxy hänajty chooñ Jerusalén. ²Mänitä fariseoshajxy yhiixy coo ja'a Jesús jiamiøød ja'a cuhdujt hajxy hänajty näje'e quia'a yajtuñ, coo hajxy quia'a cø'øbuju coo hajxy hänajty tiägø'owa'añ caabiä huucpä. Ja'a fariseoshajxy, jaanč tehñ yhooyä judiocuhdujt hajxy hänajty quiudiuñ. ³Hix, jaduhñä judiøshajxy hänajty nägøxiä quiuhdujthatyñä nebiä yhapä tieedyhajxy hänajty jegyhajty tøø yajnähiixø'oyii. Naaghoc hajxy hänajty quiaya'añ, tsipcøxpä quiø'ø hajxy hänajty hoyhoy ñä'ägä puju wa'ads. ⁴Møød coo hajxy hänajty tøø yhoy halaplaaztøjpa'c, cab hajxy hänajty quiaya'añ jaguiø'øbuju. Madiu'u cuhdujt hajxy hänajty miøødä coo hajxy cøxiä wiinä ñähbuju ñähje'ečh, møødä cayøhñdy hu'ugøhñdy, møødä tu'ts, møødä pujxtu'ts. ⁵Mänitä fariseos ja'a Jesús hajxy miäyajtøøyy:

—Tii yø'ø mjamioødhajxy jaguiø'øbuju coo quiay. Cabä jecyquiuhdujt hajxy yajtuñ neby jäya'ayhajxy hijty jegyhajty quiuhdujthatiän.

⁶Mänitä Jesús yhadsooyy: —Jue'e mijts, mjaanč tehñ miähane'emaamb mijts, pero cab hajxy mnä'ä cudiuñ waambaty hajxy hamdsoo mja hane'emy. Mijtsçøxpä ja'a Isafas jecy quiujahy, mänitä Dios miänaañ:

Hädaa jäya'ayhajxy, ja mänaamb hajxy jaduhñ cóogøch tyijy hajxy xwyiingudsähgø'oy, pero cábøch hajxy hamuumdu'joot xñä'ä tsooy.

⁷ Xiðbøch hajxy xjia wi'li
pia'häyoy.

Jaduhñ hajxy jia mäna'añ
cóogøch tyjy nmädia'agy
hajxy xjia yajnahixøyyä,
pero yhamdsoo mädia'agy hajxy
ñä'a wi'li miädiaacy,py,
nømä Isafas jecy quiujahy. ⁸ Mijts,
tøø ja'a Diosmädia'agy hajxy
mnajtshixøøñä. Ja'a mhamdsoo
cuhdujt hajxy jaduhñ myaghíjnäp —
nømä Jesús ja'a fariseos ñämaayy.

⁹⁻¹⁰ Mänitä Jesús ñämäaguiumbä:

—Paadiä Diosmädia'agy hajxy tøø
mnajtshixø'øy, jaduhñä mhamdsoo
cuhdujt hajxy hoy myaghida'añ.
Jaduhñä Moisés jecy miänaañ coo
ja'a mdaj coo ja'a mdeedy hajxy
mwiingudsähgø'owät. Pero pónägä
tiaj ja'a tieedy haxøøg nänøømb,
yajcuyagho'ogø'owáanäbäc
jaduhñ. ¹¹⁻¹² Pero wiing mijts
mja mäna'añ cooc tyjy jaduhñ
yhawiinmatsä cooc pønä tiajjä
tieedy haxøøg ñämä'awät:

“Cábøch mijts nbuhbedaannä.
Hix, tøøchä Dios nnäma'ay
coöch je'e cøxiä nmo'owa'añ
ja'açh mijts hijty nmo'owaambiä.”

¹³ Coo hajxy jaduhñ mmäna'añ,
myajcähxø'py hajxy jaduhñ
coo ja'a Diosmädia'agy hajxy
mga'a yajtuunnä, møød coo
ja'a mhamdsoo cuhdujt hajxy
myajnahixøøñä. Madiu'u hajxy
jaduhñ myajcähxø'ogy coo
ja'a Diosmädia'agy hajxy tøø
mnajtshixøøñä, møød coo
ja'a mhamdsoo cuhdujt hajxy
myajtuunnä —nømä fariseoshajxy
ñämaayyä.

¹⁴ Mänitä Jesús ja'a cu'ug
yajwiingapxøøguiumbä:

—Høøch nmädia'agy hajxy
hamädoowhíjtäc. ¹⁵ Tijaty
hajxy mgaaby mhuucypy, cab
hajxy xyajcädieey. Pero ja'a
haxøøgwiinmahñdy, je'eds hajxy
mäböcy xyajcädieeyäp. ¹⁶ Pøn
jaduhñ wiinjuøøby, wéenhøch
nmädia'agy xmiäböjçä.

¹⁷ Coo ja'a Jesús ja'a quiapxy
miädia'agy jaduhñ yajmaayy,
mänitä cu'ughajxy quiøxy
wiimbijnä. Mänitä Jesúshajxy
tiøjtägøøñä møødä jiamiøødtøjc,
ja'a hajxy hänäjty ja'a nämajmetspä.
Mänitä Jesús miäyajtøøwä neby
hänäjty jaduhñ miädia'agytiägø'oy
ja'a hänäjty jaduhñ jim tøø
miädiä'aguüäbä majiäya'ayhagujc.
Ja'a Jesús jiamiøødhajxy jaduhñ
yajtøøw yajtøø'x. ¹⁸ Mänitä Jesús
yhadsooyy:

—Nej, ni mijtshajxy jaduhñ tøø
mga'a wiinjuø'oyä waambátyhøch
tøø nja mädia'aguüä. Jaduhñds je'e,
tijaty hajxy mgaaby mhuucypy, cab
hajxy xyajcädieey. ¹⁹ Hix, ja'a jøø'xy
ja'a pøcy, jiiiby jaduhñ yhäda'agø'oy
maa ja'a mjøø'xytiøjc-hajxiän.
Jadähooc nøcxy piädsømy. Cab
jaduhñ jiiiby tiehñ tiägø'oy maa
ja'a mjuøhñdyhajxiän —nømä Jesús
miänaañ.

Jaduhñ hädaaduhñ
miädia'agytiägø'oy coo ni mädyii
jøø'xy pøcy quia'a hamajtsä.

²⁰ Mänitä Jesús miänångumbä:

—Pero ja'a haxøøgwiinmahñdy,
je'eds hajxy mäböjñbä
xyajcädieeyäp. ²¹⁻²² Coo ja'a
jäya'ay haxøøgwiinmahñdy hajxy
jiaançh tehñ miøødä, paady
hajxy haxøøgjaty jiaançh tehñ
jiatcø'oy; paady hajxy miämeeçh,

paady hajxy ñiyagho'ogyii, paadiä jäya'adio'oxiøjc hajxy miødtsäna'ay, paadiä jäya'ajie'e hajxy yhadsoçy, paady hajxy miäwiinhøøñ, paady hajxy ñiñähojyii, paady hajxy jiaançh tehṃ yajcumaya'añ, paady hajxy quia'a nä'ägädä wiinmahñmech. Coø hajxy naçy miu'ugyii, paadiä hadsoçwiinmahñdy hajxy miøødä. ²³Jaduhñds je'e, jaançh tehṃ miadiu'u ja'a haxøøgwiinmahñdy jii. Je'eds hajxy jaduhñ mäbøçy xyajcädiehby.

Mänitä Jesús miädiaacpädøøñä.

²⁴Coo ja'a Jesús jim chohñ, mänit jim ñøçxy maa ja'a naax jaduhñ xiøhatiän Tiro møød Sidón. Mänitä tøjc tu'ug piaaty maa hänajty miejtsta'aga'añän. Hamee'ch jim jia hidaañ. Pero miädoow ja'a cu'ughajxy jaduhñ coo ja'a Jesús hänajty jim tøø miech. ²⁵⁻²⁶Jimä tadjäya'ay hänajty tu'ug çhäna'ay. Hagriego hänajty miädia'agy. Ca'a hänajty je'e jiuðiosä. Jimä yhuung hänajty tu'ug, to'oxiäna'c. Tøø ja'a to'oxiäna'c hänajty pia'ambety. Møjcu'u hänajty tøø yajtägø'oyii. Coø ja'a quixiä tiaj jaduhñ miädoyhajty coo ja'a Jesús hänajty jim tøø miech, mänitä Jesús hoy wyiinjjcäda'agyii. Mänitä Jesús miänuu'xtaacä coo ja'a to'oxiäna'c nøçxy yajpa'amnáçxä. ²⁷Mänitä Jesús miänaañ:

—Cab jaduhñ yhäxø'øçy cooçhä huc-huung tsajcaagy nmó'owät, ja'a pigäna'c-hajxy hijty quiayaambä.

Coo ja'a Jesús jaduhñ miänaañ, ja'a juðioshajxy jaduhñ yajmäbaatä nebiä pigäna'cän. Ja'a ca'a juðioshajxy jaduhñ yajmäbaatä

nebiä hucän. ²⁸Mänitä tadjäya'ay yhadsooyy:

—Wiindsøn, tøyhajt jaduhñ. Pero jiiä huc-huunghajxy pia'piy pia'coñ meexäpa'c tijaty ja'a pigäna'c-hajxy yajwiinga'awøøby.

²⁹Mänitä Jesús miänaañ:

—Coo jaduhñ tøø mmäna'añ, cäxø'p jaduhñ cooçh nmädia'agy xmiäbøçjä. Tøø ja'a mhuungä møjcu'u ñähwäatsänä. Nøçxnä jootcuç maa ja'a mdøçän.

³⁰Mänitä tadjäya'ay wyiimbijty. Coø jim miech maa ja'a tiøçän, tøø ja'a yhuungä møjcu'u hänajty jiaançh nähwäatsänä. Jimä yhuung hänajty quio'na'ay maabejtcøxp hoy weenän.

³¹Mänitä Jesús jim wyiimbijtägajch maa ja'a naax xiøhatiän Tiro. Mänit jim ñaxøøyy maa ja'a cajpt hänajty xiøhatiän Sidón. Mänit jim ñøçxøøyy maa ja'a naax hänajty xiøhatiän Decápolis. Mänit jim miedsøøyy maa ja'a mejy hänajty xiøhatiän Galilea. ³²Mänitä mähdioçc tu'ug yajmejtsä maa ja'a Jesús ja'a wyiinduumän. Cabä mähdioçcä mädia'agy hänajty hoy yhäbädsømy, møød hänajty quiuhnatä. Mänitä Jesús miänuu'xtaacä coo ja'a quio'øç yajnähgäbät maa ja'a mähdioçc cuhnatpän. Ja'a mähdioçcä jiamioødhajxy jaduhñ mänaañ. ³³Mänitä Jesús ja'a mähdioçc jäguemjuøøby miødhajty nidiuhñ. Mänitä Jesús ja'a mähdioçcä tiaatsc piadsihwä. Mänitä Jesús ja'a quio'øwahçc chujyñähbo'ty. Mänitä mähdioçc tiaatsc chujyhabo'odøøyyäxä. ³⁴Mänitä Jesús çhajhee'py. Mänit

miänaaṅ: “Efata.” Jaduhṅ hädaa miädia'agytiägø'øy: “Hawa'ads.”

³⁵Tuunä ja'a Jesús jaduhṅ ṅä'ä mänaaṅ, mäniitiä mähdiøjc quiapxø'cy miädoowø'cy. Jaančh tehṅ yhoj jaduhṅ miädiaacnä.

³⁶Mäniitä Jesús miänaaṅ coo hajxy quia'a mädiá'agät coo ja'a mähdiøjc jaduhṅ tøø yhojyø'øy. Pero cab hajxy jaduhṅ jioodhajty. Mäniitiä hajxy jaduhṅ hoy yhamädiaagø'øy. Hoyyä Jesús mayhooç jia hanehṅy coo hajxy quia'a hamädiaagø'owät, maas hanaxiä ja'a mähdiøjc hajxy yhamädiaagøøyy. Cabä Jesús miädia'agy jaduhṅ ṅä'ä yajtũuṅäxä.

³⁷Jiaančh tehṅ yagjuøobiä cu'ughajxy hānajty jaduhṅ. Mäniit hajxy tiägøøyy mänaambä: “Jaančh tehṅ miøjmayhajt jaduhṅ tiuumby coo ja'a cuhnapä yajmādoowø'øgy, møød coo ja'a huumbä yajcapxø'øgy.”

8 Cujaboom cumaaxç, mäniitä jäya'ayhajxy nämay yhamugøøguiumbä maa ja'a Jesús hānajtiän. Ja yähó'cäp hajxy hānajty, cabä caayyøøc hajxy hānajty ṅä'ägädä møødä. Mäniitä Jesús ja'a jiamioødtøjc yaaxmujcy, ja'a hajxy hānajty nämajmetspä. Mäniitä Jesús miänaaṅ:

²—Nnäxúu'chpøch hädaa jäya'ayhajxy. Tägøøgxøøjoch hajxy tøø xpiawädiñä. Tøø ja'a quiaay tøø ja'a yhu'ugyhajxy quiøjxnä. Tii hajxy jaduhṅ ṅä'ä jaac cáyap. ³Coočh hajxy jaguiay nguejxwiimbídät, wehṅdä hajxy jim tiu'uyuugädawät. Hix, näje'e hajxy jäguem tøø chohnda'agy.

⁴Mäniitä Jesús yhadsoowä ja'a jiamioødtøjc:

—Tii hädaa jäya'ay hajxy häyaa nnä'ä yajcáayyāmb. Cabä cajpt yaa. Maa tsajcaagy hajxy häyaa nnä'ä páatāmät —nøṁä Jesús jiamioødhajxy miänaaṅ.

⁵Mäniitä Jesús ja'a jiamioødtøjc miäyajtøøyy:

—Naag tsajcaagy hajxy jii mmøødä.

—Juxtujc —nøṁ hajxy yhadsooyy.

⁶Mäniitä Jesús miänaaṅ coo ja'a majiäya'ayhajxy yhøxtá'agät naaxwiin. Mäniitä Jesús ja'a tsajcaagy quioondsooyy. Mäniitä Dioscujú'uyäp yejcy. Mäniitä tsajcaagy tiägøøyy haguideoöbiä. Mäniitä jiamioødtøjc miooyy. Mäniitä majiäya'ayhajxy miooyy. Coo ja'a Jesús ja'a tsajcaagy hānajty yhaguideo'øy, yajwa'aṅguiojpy hānajty tehngajñä. ⁷Jimä hacxhuung hajxy hānajty miøødäbä mejtstägøøg. Mäniitä Jesús quiunuu'xy. Mäniit miänaaṅ coo ja'a majiäya'ayhajxy mio'owøøjtä. Jaduhṅ je'e may yajwa'aṅguiojpä.

⁸Mäniitä jäya'ayhajxy tiägøøyy caabiä. Høxtä cuuxä hajxy hoyhoy. Høxtä jiaac piwø'c hajxy juxtujcach, ja'a hānajty tøø quiunáxiäbä. ⁹Nämādaaxmil jäya'ayhajxy jaduhṅ quiaayy yhuucy. Mäniitä Jesús miänaaṅ coo hajxy wyiimbijnät. ¹⁰Mäniitä Jesús hajxy jadāhooç biarcopéjcumbä møødä jiamioødtøjc. Mäniit hajxy jim ṅøcxy maa ja'a cajpt hānajty xiøhatiän Dalmanuta.

¹¹Mäniitä Jesús ja'a fariseos näje'e nämejtsä. Mäniitä fariseos ja'a Jesús ja'a Diosmädia'agy hajxy miøødyajtsibøøyy. Mäniitä Jesús jia nämāayyä:

—Huuc yajcähxø'ogä hijxtahnd hoy-yagjuøøñäbä ja'a tsajpootypä. Jadhuhñ hõjtsä tøyhajt nmøødhádät coo miichä Diosmäjaa mjaančh møødä —nømä fariseoshajxy miänaañ.

¹²Mänitä Jesús jiootmaxiejy. Jootmadiägøøyy jadhuhñ. Mänit miänaañ:

—Tii ja'a Diosmäjaa hajxy coo mwil'i yhixa'añ. Tøyhajt mijts nnämä'awät coo hajxy mga'a hixa'añ —nømä fariseoshajxy ñämaayyá.

¹³Mänitä Jesús hajxy wyiimbijnä møødä jiamioødtjç. Mänit hajxy tiägøøyy barcojooty. Mänit hajxy tiu'ubøjcy. Mejyhawiimb hajxy hánajty ñøcxa'añ.

¹⁴⁻¹⁵Mänitä Jesús ja'a jiamioødtjç ñämaayy:

—Mnigwieendähadøøjäp hajxy. Ca'a ja'a Herodes chajcaagychooy hajxy mmäwädijtä, ni ja'a fariseos jie'ehajxy.

Mänitä Jesús jiamioødhajxy yhijxy coo ja'a tsajcaagy hajxy hánajty tøø quia'a jaac juy. Jagooyyá tsajcaagy hajxy hánajty tu'uquüä miøødä barcojooty. ¹⁶Mänit hajxy tiägøøyy niñämäayyábä:

—Paady hajxy jadhuhñ xñämäayyäm, coo tsajcaagy hajxy tøø njahdiägóoyyäm.

¹⁷Coo ja'a Jesús jadhuhñ yhamädoonajxy waambatiä jiamioødhajxy hánajty ñiñäma'ayii, mänit hajxy ñämaayyá:

—Nej, jadhuhñ hajxy mwiiñjuø'øyyä coočhä tsajcaagy tøø nmädia'aguüä, ja'a hajxy tøø mjahdiägóoyyábä. Cab hajxy tøø mnä'ägädä wiinjuø'øyy

tijátyhöch tøø nmädia'agy. Mjaančh tehñ quiuhxex mijts jadhuhñ. ¹⁸Xiidsä mwiiñ hajxy mja møødä, cab hajxy tii mhijxmähmø'øyy. Xiidsä mmädohnd hajxy mja møødä, cab hajxy tii mmädoomähmø'øyy. ¹⁹Mänájøčhä nämägooxmilpä jäya'ay nyajcayyän ja'a mägoøxtsajcaagy, naac cachä caadiuc hajxy mbiwø'cy.

Mänit hajxy yhadsooyy:

—Majmetsc.

²⁰Mänitä Jesús miänáangumbä: —Jaanä mänájøčhä nämädaaxmilpä jäya'ay nyajcayyän ja'a juxtujtsajcaagy, naag cach hajxy mbiwø'pä.

Mänit hajxy yhadsoogumbä:

—Juxtujc.

²¹Mänit hajxy ñämäayyägumbä: —Caj mijts tøø mnä'ägä wiinjuø'øyy tijátyhöch tøø nmädia'agy —nømä Jesús miänaañ.

²²Mänitä Jesús hajxy jim miejstägajch maa ja'a cajpt hánajty xiøhatiän Betsaida. Mänitä wiinds tu'ug wyitsmejtsä maa ja'a Jesúsän. Mänitä Jesús miänuu'xtaacä coo ja'a wiinds ween ñähdoñii, ween jadhuhñ yhixø'øgy. ²³Mänitä Jesús ja'a wiinds wiyjstsooyy. Mänitä wiinds cajptpa'a quipxy miødhajtä. Mänitä wiinds wyiingutsujøøyyä. Mänit wyiingumo'xøøyyä. Mänit miäyajtøwä pø tøø hánajty yhixø'øgy. ²⁴Mänit tiägøøyy hijxø'pä weenjaty. Mänit miänaañ:

—Tøøčh weenjaty nhixø'øgy. Cábøčhä jäya'ay hoy nhøxcaba'añ. Nnajuøøbiøch jadhuhñ coo jiäya'ayä, pero jadúhñhöch nhixy nebiä quepychaajän.

²⁵Mänitä Jesús ja'a wiinds jadähooc wyiingumo'xøøguiumbä.

Mänitá wiinds hoy tiägøøñä hijxpä.
Hotyijä hänajty jäguemjaty yhiixnä.

²⁶Mänitá Jesús miänaañ:

—Tu'uda' aquíä mnøcxät maa
ja'a mdøjcän. Ca'a cajptooty
mguyo'oy mgubøgø'øy —nømä
craa ñämaayyá, ja'a hänajty tøø
yhixø'øguiäbä.

²⁷Mänitá Jesús hajxy jim
tiu'ubøjcy møødä jiamioødtøjc. Jim
hajxy hänajty ñøcxa'añ maa ja'a
naax hänajty xiøhatiän Cesarea de
Filipo. Cajpt-cajpt hajxy hänajty
wiädita'añ. Tu'haamnøcxpä, jimä
Jesús ja'a jiamioødtøjc miäyajtøøyy:

—Høøch, pøn'høchä cu'ugäda'a
xtyijp.

²⁸Mänitá Jesús yhadsoowä:

—Näje'e hajxy miäna'añ cooc
tyijy miich mJuan mäyajnäbejpä.
Näje'e hajxy miänaambä cooc
tyijy miich mElíasä. Näje'e hajxy
jiaac mänaambä cooc tyijy miich
mDiosquexiä, cooc tyijy miichä
mDiosmädia'agy jecy myajwa'xy.

²⁹Mänitá Jesús yajtøøgumbä:

—Mijtsäts, pøn'høch mijtshajxy
jaduhñ xtyijp.

Mänitá Pedro yhadsooyy:

—Jue'e miich, Cristo. Dios miich
tøø xwyiinguexy.

³⁰Mänitá Jesús ja'a jiamioødtøjc
ñämaayy coo ja'a Jesús hajxy quia'a
mädiá'agät pøn hänajty je'e.

³¹Mänitá Jesús ja'a jiamioødtøjc
tiägøøyy yajwiingapxøøbiä:

—Høøch, Diosquexyhøch
høøch. Madiú'ujøchä
tsaačpä nøcxy nhabaada'añ.
Xmiähänhadáambøchä
jäya'ayhajxy, ja'a hajxy jiihy
wiindsøn'hajpä maa ja'a tsajtøjcän,
møødä teedywiindsøn'hajxy,

møødä häna'c-hajxy jiihy
Diosmädia'agy-yajnähixøøbiä maa
ja'a tsajtøjcän. Mänithøch hajxy
jaduhñ xjia yajyagho'oga'añii.
Pero cooçh hajxy hänajty tøø
xyajyagho'ogyii, cudägøøgxøøyyä,
mänithøch njujypiøjtägatsa'añ.

³²Howyiinjuøøñä ja'a Jesús
jaduhñ miädiaacy. Mänitá Pedro
ja'a Jesús hawiingtuum wioonøcxy.
Mänitá Pedro miänaañ:

—Wiindsøn, ca'ads jaduhñ
mwi'i miäna'añ. Caj miich nej
mjada'añ mhabeta'añ —nømä Jesús
ñämaayyä.

³³Mänitá Jesús wia'wiimbijty.
Mänitá jiamioødtøjc
wyiinhee'ppejty. Mänitá Pedro
yhojjä:

—Møjcu'u, jua'ads yaa maačh
nwiinduumän. Jaduhñ miich
mwiinmahñdyhaty nebiä
jäya'ayhajxy wyiinmahñdyhajpä.
Caj miich jaduhñ
mwiinmahñdyhaty nebiä Dios
wyiinmahñdyhatiän —nømä Jesús
miänaañ.

³⁴Mänitá Jesús ja'a cu'ug
miøjyaaxy møødä jiamioødtøjc.
Mänitá Jesús miänaañ:

—Pøn jioot tsojy cooçh
xjiamioødhädät, weenä yhamdsoo
cuhdujt hajxy ñajtshixø'øy,
weenä jioot hajxy piäda'agy coo
hajxy chaachpøjpät nébiøch
ndsaačhpøga'añän. Wéenhøchä
nmädia'agy hajxy tehngajnä
xmiäbøjcä. ³⁵Pønä jioot ja pädaacp
coo hajxy hoy jjugyhädät, cab
hajxy çøjxta'axiøø jjugyhada'añ
nebiä Dios jjugyhatiän. Pero
pønä jioot pädaacp coo hajxy
yhø'ogät ja'a høøchøcxpä møødä

Diosmädia'agyquiøxpä, je'edshajxy homiänaajä jugyhadaamb nebiä Dios jugyhatiän. ³⁶Coo hajxy hodiumm mga'a mähmó'owät coo hajxy hänajty tøø mho'ogy, cab hajxy jaduhñ mniyaghoyø'owóøjät, hoy hajxy hänajty yaa tøø mja näyøøhaty hädaa yaabä naaxwiin. ³⁷Ni tii yaa quia'a nä'ägädä tsoobaady hädaa yaabä naaxwiin nebiä mjugyhajthajxy choobaada'añän, coo hajxy homiänaajä mjugyhädät nebiä Dios jugyhatiän. ³⁸Põnhöch xmiädsähdiuumb móødhöchä nmädia'agyquiøxpä maa hädaa jäya'ay wyiinduumhajxiän, hädaa pojmoødpä cädieemiøødpähajxy, hädaahajxy ca'a Diosmädia'agymiäbøjpä, cooöch yaa ngädaactägätsät hädaa yaabä naaxwiin, mänitøch hajxy jadähooç nmädsähdiuundägatsa'añ, pønjätyhöch hänajty yaa tøø xmiädsähdiuñ. Diosquéxyhöch høøch. Diosmøcmäjaamóødhöch hänajty yaa ngäda'aga'añ, näguipxy møødä Diosmoonsähajxy, ja'a hajxy jim hijpä Dioswiinduum —nømä Jesús miänaañ.

9 Mänitä Jesús miänäängumbä: —Chaads mijts tøyhajt ndehm nämá'awät, mijts xii tänaabiä, näje'e hajxy hänajty mga'a ho'ogyñä coo hänajty quiähxø'øga'añ coo ja'a Dios hänajty yhane'ema'añ ja'a miøcmäjaahaam.

²Cudädujxøø, mänitä Jesús ja'a Pedro wioonøçxy maa ja'a tun jaançh tehñ quiøxpän, näguipxy møødä Santiago møødä Juan. Nämädaaxyä hajxy hänajty jim.

Mänitä Jesús wyiin jiøjp wiing jiajty maa ja'a Pedro wyiinduumhajxiän. ³Høxtä haamb høxtä tsämaambä Jesús hänajty møødä wyit møødä tiucxy. Jaançh tehñ pioobä wyit hänajty nägøø nädecypiä. ⁴Mänitä Elíashajxy jim nägüehxtøø'xy møødä Moisés. Jimä Jesús hajxy hänajty wyi'i miøødmädia'agy. Nägoojä Pedrohajxy hänajty nä'ä hijxcäda'agy nä'ä hee'pcäda'agy. ⁵⁻⁶Jaançh tehñ chähgøøbiä Pedrohajxy hänajty. Cab hajxy hänajty näjuø'øy waamb hajxy jaduhñ nä'ä mäná'anät. Mänitä Pedro nä'ä nägoobä miänaañ: —Wiindsøn, hoyøøyy jaduhñ coo hajxy yaa tøø nbéjtäm. Nhuuc hädiuñ højts tøjquemyhuung tägøøg maa mijtshajxy häyaa cødu'ug myaghäña'awø'owät, møød miich, møødä Moisés, møødä Elías —nømä Jesús nämaayyä.

⁷Tuunä ja'a Pedro jaduhñ nä'ä mänaañ, mänit hajxy näma'anähbejty. Mänitä Dios jiiby quiapxy näma'ajooty: “Høøch nHuung hädaa. Njaançh tehñ chójpiøch hädaa. Mäbøjçä miädia'agy hajxy.” ⁸Coo ja'a nämä'a chajpejty, tøø ja'a Moiséshajxy hänajty yhadägoyyø'øy møødä Elías. Coo ja'a Pedrohajxy jia hijxwädijty, cabä Moisés hajxy yhiixnä ni ja'a Elías; jagooyyä ja'a Jesús hajxy jiaag hijxy nidihñ.

⁹Jimä Jesús hajxy hänajty wyiinmänacy tunnähgøxp møødä jiamioød nädägøøgpä, mänitä Jesús miänaañ:

—Ca'a hajxy pøn mnä'ägädä hawaanä tijaty hajxy yaa tøø mhixy tøø mmädoy høxtä cóonøch hänajty

tøø njujypiøjtägach cooçh hänajty tøø nho'ogy. Diosquexyhøch høøçh —nømä Pedrohajxy ñämaayyã.

¹⁰Coo ja'a Pedrohajxy jaduhñ ñämaayyã, paadia mädia'agy hajxy jaduhñ miäbøjcy. Jioodhajt hajxy jaduhñ nebiaty hajxy hänajty tøø yhixy tøø miädoy. Hamiñ haxøpy hajxy hänajty jia ñimiäyajtøyyi waambã Jesús hänajty jaduhñ jia mäna'ana'añ coo jaduhñ miänaañ cooc hänajty jiujypiøjtägatsa'añ.

¹¹Mänitã Jesús hajxy miäyajtøoyy:

—Ja'a häna'c hajxy jiiby yajñähixøøbiã maa ja'a tsajtøjcän, jaduhñ hajxy miäna'añ coogã Elías tsipcøxp jawyiin quädã'agät. Mänitãgã Cristo høxhaam jiaac tehñ quädã'aga'añ. Tii hajxy jaduhñ coo miäna'añ. Nej, tøyhajt jaduhñã.

¹²⁻¹³Mänitã Jesús yhadsooyy:

—Jaduhñã Diosmädia'agy jiaançh mäna'añ coogã Elías jawyiin quädã'aga'añ. Tøyhajt jaduhñ. Mänitãgã cøxiã wiinä yagjema'añ yajtägatsa'añ. Tøø ja'a Elías jia cãda'agy. Pero tøø jaduhñ jiaançh tehñ chaaçhtiunii nebiatiã jäya'ay jioothajxy chocy. Tøjiajt jaduhñ nebiã Diosquexyhajxy jecy quiujahyyän. Nej, mnajuøøby hajxy jaduhñã waambátyhøçhã Diosmädia'agy xmiädiaacpä, høøçh ja'a Diosquexypã, cooçhã jäya'ayhajxy xchaaçhtiunaambã, møød cooçh hajxy xquia'a jaac hixaannã.

¹⁴Coo ja'a Jesús hajxy jiiby quädãacy maa ja'a jiamioødhajxy hänajty tøø miähmø'øyän, ja'a hajxy hänajty jiiby nådaaxtupã, mänitã Jesús yhiixy coo ja'a jiamioødhajxy hänajty piquiã

tøø piäda'agyii ja'a majiäya'ay. Jimã häna'c hajxy hänajty miøødniyhojyii, ja'a häna'c-hajxy jim yajñähixøøbiã maa ja'a tsajtøjcän. ¹⁵Nägoø ja'a cu'ugã Jesús hajxy jiojcuhiøøyy, mänit hajxy jiaançh tehñ xioondaacy. Mänitã Jesús jiojcuübäyø'ogøøyyã. Mänit yajpoo'xã. ¹⁶Mänitã Jesús miänaañ:

—Tii hajxy mwi'i yajniguiuhøjøoyyã.

¹⁷Mänit tu'jäya'ay yhadsooyy:

—Wiindsøn, chaaçhã nhuung tøø nja møødmech. Møjcu'u jaduhñ miøød. Ja'a møjcu'u wi'i yaghuhmb. ¹⁸Naxy jaduhñ yajcädayyii. Mänit tiägø'øy hahoo'pä. Mänitã tiøøts tiägø'øy yajcädajpä. Mänit møc-häwøønã jiaty. Tøøçhã mjamiøødtøjc nja mänuu'xta'agy cooçh nhuung hajxy cu xyajpa'amñähwaatsã. Pero cab hajxy tøø miäjãda'agy —nømä Jesús ñämaayyã.

¹⁹Mänitã Jesús ja'a jiamioødtøjc ñämaayy:

—iJa'a! Cábøch mijtsã nmädia'agy xñã'ä mabøjcã cooçh nDiosquexiã. Tøøçh mijts jejcy nja møødwädity, y cahnã hajxy tii mnã'ägädã habøcyñã. Jaançh tehñ yhanaxiã mijts jaduhñ mguhxexã. Nébiøch mijts nnã'ä tünät. Hoorã, witsminxã ja'a pa'amjäya'ay yaa —nømä Jesús miänaañ.

²⁰Mänitã Jesús miädia'agy quidiúunãxã. Coo ja'a Jesús yhiixã ja'a møjcu'u, mänitã mähdiøjcã pia'am tiehñ ñamejtsã. Mänitã mähdiøjc quädãayy naaxwiin. Mänit piayajch piadøø'py. Mänit tiägøøyy hahoo'pä. ²¹Mänitã craa tieedy miäyajtøøwãxã:

—Mánaa hádaa mhuung tøø pia'ambety.

Ja'a Jesús jaduhñ yajtøøw.

—Muutsnä hánajyñä —nømä craa tieedy yhadsooyy.

²²Mänitá tieedy miánaangumbä:

—Náxyhøch hádaa nhuung jiøøngädaw jiøømbøgø'ø y coo pia'am jaduhñ naxy ñähbaadyii. Naxy ñøøgädaw ñøøbøgøøbiä. Ja weenjaty jaduhñ quiaa yagho'ogyii. Tunä mayhajt. Pø jii miich møcmäjaa mmøødä, højts näxúu'tsäc, højts puhbéjtäc —nømä Jesús ñämaayyä.

²³Mänitá Jesús miánaañ:

—Nej, jadúhñhøch miich xmiøyajtøyyä pø nmøødhøch møcmäjaajä. Pøn jaduhñ mábøjp, hotyijjä jaduhñ yhoýø'owáañäxä.

²⁴Mänitá pa'amjäya'ay tieedy yaaxy:

—Nmábøjpiøch. Høøch puhbéjtäc, jadúhñhøch maas hoy njaac mábøgät.

²⁵Jimä jäya'ayhajxy hánajty may wyi'i miamiucy. Coo ja'a Jesús ja'a majiäya'ay jaduhñ yhiixy, mänitá Jesús ja'a møjcu'u ñämaayy:

—Høøch miich nhanehmby coo hádaa craa mhøxmájtñät. Cab jaduhñ mánaa mnämejtstägájtñät. Naxy miich hádaa mähdiøc myaghuumy myajnaty —nømä møjcu'u yhojjä.

²⁶Mänitá mähdiøc møc yajtsaaçhyaaxä. Mänit jäwiwpø'cy xiäyaayyø'cy. Mänit ñähwaatsä quihwaatsä. Nebiä ho'ogypiän jiajty. Coo jaduhñ yhiixä, mänitá jäya'ayhajxy may miánaañ cooc tyijy hánajty tøø yho'ogy. ²⁷Mänitá Jesús ja'a craa wyidsø'cy. Mänitá craa hoy tiänaayyø'nø.

²⁸Mänitá Jesús hajxy tiøjtägøøyy møødä jiamiøødtøjc. Mänitá Jesús hamee'ch miäyajtøøwä ja'a jiamiøød:

—Tii højts jaduhñ coo tøø nga'a mäjädaacpä.

²⁹Mänitá Jesús yhadsooyy:

—Coo Dios hajxy mjaanç tehñ miänuu'xtá'agät, mänit yø'øduhmä pa'am hajxy hoy myajnáxät. Pero pø caj, cab hajxy myajnáxät.

³⁰Coo ja'a Jesús hajxy jim chohñ, mänit hajxy ñøcxy Galilea. Cabä Jesús hánajty yajnajuø'owa'añii maa hánajty nøcxy wiädita'añ.

³¹Mänitá Jesús ja'a jiamiøødtøjc tiägøøyy yajwiingapxøøbiä:

—Høøch ja'a Diosquexypä, nøcxáambøch nniñähduga'añii cooçhä jäya'ayhajxy xyaghó'ogät. Y cooç hánajty tøø nho'ogy, cumáaxc-høch hánajty njujypiøjtägatsa'añ —nømä Jesús miánaañ.

³²Cabä Jesús ja'a jiamiøødhajxy ñä'ägädä wiinjuøøyy waambatiä Jesús hánajty tøø miädia'agy. Cab hajxy hánajty jia nä'a wi'i miäyajtøwaambä. Hix, tsähgøøby hajxy hánajty.

³³Mänit hajxy jim miejch Capernaum maa hajxy hánajty çhána'ayän. Coo hajxy hánajty tøø tiøjtägø'ø y, mänitá Jesús ja'a jiamiøødtøjc miäyajtøøyy:

—Tii hajxy hijty mwi'i yajcapxiøøby jim tu'haam-miimbä.

³⁴Pero cab hajxy waamb ñä'ägädä hadsooyy. Hix, jue'e hajxy hánajty tøø yajtsibø'ø y tu'haam-miimbä, pønä cuhdajt hánajty maas møc møød. Tsähdiuumb hajxy hánajty, paady hajxy quia'a

nä'ägädä hadsooyy. ³⁵Mänitä Jesús yhäñaaguiädaacy, Mänitä jiamiødtjç nāmaayy, ja'a hajxy hānajtý nāmajmetspā:

—Yam hajxy weeñtiä huuc møjwa'ag. Pøn jaduhñ pøc-juøøby coo møjcuhdujt miøødhádät, cabä cuhdujt jaduhñ nā'ägädä møødhada'añ. Moonsä jaduhñ nā'ägä tunaamby.

³⁶Mänitä Jesús pigäna'c-huung tu'ug miøjyaaxy. Mänit piädaacy cujc maa ja'a jiamiøødhajxy hānajtýän. Mänit chehñø'cy. Mänitä jiamiøødtjç nāmaayy:

³⁷—Pøn hädaa pigäna'c hädaaduhmbä tsojp ja'a høøchcøxpä, jaduhñ mäwíinhøch xchojpä. Jaanä jadúhñhøchä nDeedy hajxy xchójcäbä —nømä Jesús miānaañ.

³⁸Mänitä Juan ja'a Jesús nāmaayy:

—Wiindsón, tøø højts jäya'ay tu'ug nbaady. Jimä pa'amjäya'ay hānajtý yajpa'amnaxy, ja'a hajxy møjcu'umøødpä. Miičhä mxøø hānajtý xquiapxpáatäp. Mänit højts nnāmaayy coo quia'a yajpa'amnájxnät. Paady højts jaduhñ nnāmaayy, coo højts näguipxy xquia'a møødwádíjtäm.

³⁹Mänitä Jesús miānaañ:

—Cábäts hajxy waamb cu mnāmaayy. Pønñhøchä nxøø xquiapxpáatäp coo ja'a hoy-yagjuøøñbä hānajtý yajcähxø'øgy, cábøch jaduhñ xchoj mägapxtägoyya'añ.

⁴⁰Pøn højts jaduhñ xquia'a mädsiphájtäm, je'eds hajxy jaduhñ xmiägu'ughájtäm. ⁴¹Coo mijts pøn xyajnøøhú'ugät je'eguiøxpä cooçh

mijts xpiawädity, høøch ja'a Cristo, jimä hoyhajtä weenhajt piaada'añ Dioswiinduum.

⁴²Pønjátyhøchä nmädia'agy xmiäbójcäp, hoy hajxy quia'a jagä høxpøquiä, coo hajxy jiojcapxø'øwøøjät, ja'a häna'c-hajxy jaduhñ mäjojcapxøøbiä, mejor paandsaa hajxy häxøpy tøø yajyo'xodsø'yii, jaduhñds hajxy häxøpy tøø miejjiäwipø'yii. ⁴³⁻⁴⁴Pø jimä mgø'ø hānajtý xyajcädieey, maas hoy jaduhñ coo mnā'ägädä høxpúxät, jaduhñ tehngajnä xquia'a yajcädiéhñät. Jadúhñäts homiānaajä mjugyhádät nebiä Dios jiugyhatiän, hoyyä mgø'ø hānajtý metsc mga'a jagä møødá. Hix, coo tehngajnä mjaac cädiéeyät, jiiby mhädá'agät haxøøgtuum maa ja'a jøøn mänaa quia'a nā'ägädä pi'ichän, hoyyä mgø'ø hānajtý jia ca'xiä. ⁴⁵⁻⁴⁶Jaanä jaduhñduhmbä, pø jimä mdecy hānajtý xyajcädieey, maas hoy jaduhñ coo mnā'ägädä høxpúxät, jaduhñ tehngajnä xquia'a yajcädiéhñät. Jadúhñäts homiānaajä mjugyhádät nebiä Dios jiugyhatiän, hoyyä mdecy hānajtý metsc mga'a jagä møødá. Hix, coo tehngajnä mjaac cädiéeyät, jiiby mhädá'agät haxøøgtuum, hoyyä mdecy hānajtý jia ca'xiä. ⁴⁷Jaanä jaduhñduhmbä, pø jimä mwiin hānajtý xyajcädieey, maas hoy jaduhñ coo mnā'ägädä yajpádsømät, jaduhñ tehngajnä xquia'a yajcädiéhñät. Jadúhñäts homiānaajä mjugyhádät nebiä Dios jiugyhatiän, hoyyä mwiin hānajtý metsc mga'a jagä møødá. Hix, coo tehngajnä mjaac cädiéeyät, jilby mhädá'agät haxøøgtuum, hoyyä

mwiin hänajty jia ca'xiä. ⁴⁸Jiiby haxøøgtuum, cabä tøønghajxy jiiby mänaa ñä'ägä ho'ogy, møød cabä jøøn jiiby mänaa ñä'ägä pi'tspä.

⁴⁹Pøñ jiiby hijp haxøøgtuum, cab hajxy jaduhñ jiiby mänaa quiøxy toya'añ. Jaduhñ mäwíinäts je'e nebiä tsu'u'ch caanø'oybän, cabä jøøn jaduhñ jiiby mänaa pyi'ich.

⁵⁰Ja'a caan, tuungpaatp je'e. Pero coo ja'a tiaamdspä quióxät, cab jaduhñ mänaa tiuungpáatnät. Jaduhñ mäwíinäts mijtpä, hoy yajxón hajxy mnimiøødhidøøjät. Cab hajxy jaduhñ mänaa myajniguiudsip myajniguiuma'adø'owøøjät.

10 Mänitä Jesús jim chónhgumbä Capernaum.

Mänit ñøcxy Judea-naaxooty, ja'a xøøbädsømyhaampiä, jim Jordán-møjnøøhawiimb. Mänitä jäya'ay may ñäméjtsägumbä.

Mänitä Jesús tiägøøguiumbä yajnähihöøbiä, neby hänajty naxxy yajnähihöøyhatiän. ²Mänitä fariseodøjc-hajxy näje'e miehch.

Mänitä Jesús hajxy miäyajtøoyy:

—Nej, miimbä cuhdujt jaduhñä coo jäya'ayhajxy ñiyhöøxmadsoøjädä.

Paadiä Jesús jaduhñ miäyajtøowä, hijxmadsaanäp hänajty jaduhñ waamb hänajty yhadsowa'añ.

³Mänitä Jesús yajtøødagajch:

—Nej, jaduhñä Moisés jecy quiujahyyä coo hajxy mniyhøøxmadsoøjädä.

⁴Mänitä fariseoshajxy yhadsooyy:

—Jaduhñä Moisés jecy quiujahy coogä cuhdujt jaduhñ myiñ coo jäya'ayhajxy ñiyhöøxmadsoøjät.

⁵Mänitä Jesús miänáangumbä:

—Coo mijts mjaançh tehñ quiuhxexä, paadiä Moisés ja'a

cuhdujt jaduhñ jecy jecy coo mdo'oxiøjc hajxy mhøøxmadsoøt.

⁶Mänaa ja'a naaxwiimbä jecy yhawijy tiøø'xta'aguiän, mänitä Dios jäya'ay metsc quiunuu'xy ya'adio'oxy. ⁷⁻⁸Coo ja'a Dios ja'a jäya'ay jaduhñ jecy quiunuu'xy ya'adio'oxy, paadiä ya'adiøjc jaduhñ tio'oxiøjwiingpøögät. Jaduhñ hajxy jaduhñ yhiñnät nebiä tu'que'expän. Hawiingøøby hajxy jaduhñ. Cab hajxy wioowhiñtänä ja'a tiaj ja'a tiédiäm. ⁹Pønjetiä Dios jaduhñ tøø quiunuu'xy coo hajxy ñimiøødtsäna'awøød nämetsc, cab hajxy jaduhñ ñiyhöøxmadsoøjät — nømä Jesús miänaañ.

¹⁰Mänitä Jesús hajxy tiøjtägøoyy møødä jiamiøødtøjc. Mänitä Jesús jadähooç miäyajtøowä ja'a jiamiøød waambatiä Jesús ja'a fariseodøjc hänajty tøø miøødmädia'agy.

¹¹Mänitä Jesús yhadsooyy:

—Pøñä tio'oxiøjc höøxmajtsp, y mänitä wiingto'oxiøjc wyiingpøcy, miägädiehbiä tio'oxiøjc jaduhñ.

Haxøøg jaduhñ jiatcø'oy. ¹²Jaaná jaduhñduhmbä, coo ja'a to'oxiøjc ñiyhap yhöøxmadsoøt, y coo wiingya'adiøjc wyiingpøögät, jaduhñä ñiyhap miägädiehbiä. Jaaná haxøøg je'eduhñ jiatcøøbiä — nømä Jesús miänaañ.

¹³Mänitä Jesús pigäna'c mejtstägøøg yajnämejtsä, coo hajxy ween quiunuu'xyii. Coo ja'a Jesús jiamiøød hajxy jaduhñ yhiñxy cooc tyijy ja'a Jesús hänajty yhadsiba'añii, mänitä pigäna'cä tiajhajxy yhadúçäxä coo ja'a Jesús hajxy jaduhñ quia'a nänøçxät.

¹⁴Coo ja'a Jesús jaduhñ yhiñxy coo ja'a pigäna'c-hajxy hänajty

wyi'i yhadugyii, mänitä Jesús ja'a jiamiøød yhojy:

—Ca'a yø'ø pigäna'c hajxy mwii' yhaducy. Wéenhøch hajxy jaduhñ xñämiñ. Coö mijtsä Diosmädia'agy jaduhñ mmäbøgät neby hädaa pigäna'c-hajxy miäbøquiän, mänit mijtsä Dios jaduhñ xyhuunghädät. ¹⁵Hix, ja'a pigäna'c-hajxy, cab hajxy tii quia'a nä'a mäbøcy. Tsipcøxp hajxy jaduhñ ñä'ägä mäbøcy. Jaduhñds je'e, coö mijts mmäbøgät nebiä pigäna'c-hajxy miäbøquiän, mänit hajxy jaduhñ mjygyhädät cøjxta'axiøø nebiä Dios jiygyhatiän. Tøyhajt jaduhñ —nømä Jesús miänaañ.

¹⁶Mänitä Jesús ja'a pigäna'c tiägøøyy cunuuxpä tu'ugjaty-tu'ugjaty. Cø'ønähgäjpäp hajxy hänajty.

¹⁷Mänitä Jesús jim chohñ. Jim hänajty tiu'uyo'oyñä, mänitä Jesús jäya'ay tu'ug päyø'øguiä ñajtspaadøøyyä. Mänit wyiinjiçädaacä. Mänit ñämaayyä: —Wiindsøn, mjaanç tehñ yhoyhäna'c miich. Nébiøch ngudiünät coöch cøjxta'axiøø njygyhädät nebiä Dios jiygyhatiän —nømä Jesús miäyajtøwä.

¹⁸Mänitä Jesús yhadsooyy: —Tiiç miich jaduhñ coö xñäma'ay coöch nhoyhäna'cä. Ni pøn jaduhñ quia'a hoyhäna'cä. Jagooyyä Dios tu'uquiä yhoyhäna'cä. ¹⁹Mnajuøøby miich jaduhñ nebiatiä Moisés cuhdujt jecy yejcy, túhmäts. “Cab hajxy mnnyagho'ogøøjät. Cabä wiingto'oxiøjc hajxy mmøødtsänä'awät. Cab hajxy mméedsät. Cab hajxy mhøhñdá'agät.

Cab hajxy mmäméedsät høhnda'agymiädia'agyhaam. Mwiingudsähgø'øwäbä mdajjä mdeedy hajxy” —nømä Jesús miänaañ.

²⁰Mänitä Jesús ñämäayyägumbä: —Pero Wiindsøn, homiänáajøch jaduhñ ngudiüñ. Múutsnøçhä hoguiuhdujt nmädsøhñdaacy —nømä Jesús ñämaayyä.

²¹Mänitä Jesús ja'a craa wyiinhee'ppejty. Jiaanç tehñ chøjcäbä craa hänajty je'e. Mänitä Jesús miänaañ:

—Tu'tu'uuyyä mga'a cøxy cudiüñ. Nøcx cøxy toog tijaty jim mmøød, jaduhñds mmó'owät pønjaty hajxy häyoob. Coö jaduhñ mgudiünät, mänit jim mnøcxät Dioswiinduum. Jim miichä hoybä weenbä mbäädät tsajpootyp. Hoorä, høøch padu'ubøjcäc.

²²Coö ja'a craa jaduhñ ñämaayyä, mänit jiootmadiägøøyy. Mänit wyiimbijnä tájjäp máayyäp. Hix, jaanç tehñ miäyøø hänajty je'e.

²³Jimä Jesús ja'a jiamiøødhajxy hänajty piädäna'ay. Mänitä Jesús wyiinhee'ppejty. Mänit miänaañ: —Jaanç tehñ chip jaduhñ coö yø'ø mäyøødøjc-hajxy jim ñøcxät Dioswiinduum. Tehñ tiøyhajt jaduhñ.

²⁴Coö ja'a Jesús jaduhñ miänaañ, jiaanç tehñ yagjuøøyy ja'a jiamiøødhajxy jaduhñ. Mänitä Jesús miänáangumbä:

—Mägu'ughajpädøjc, pønjatiä xiädø'øn hajxy hajoodhajp, jaanç tehñ chip jaduhñ coö hajxy jim ñøcxät Dioswiinduum. ²⁵Maas paquiä camello tu'ug jiiby ñaxø'øwät xuhñdyjutooty

quejee ja'a mäyøøhäna'c-hajxy jim
tiägø'owät Dioswiinduum.

²⁶Coo ja'a Jesús jaduñ
miänáangumbä, mänitä
jiamiøødhajxy maas hanaxiä
yagjuøøguiumbä. Mänitä Jesús
miäyajtøwä:

—Pønxada'aduhñ jaančh tøy
nähwa'adsaamb.

²⁷Mänitä Jesús
wyiinhee'ppéjcumbä. Mänit
miänaañ:

—Ja'a jäya'ayhajxy, cab
hajxy hamdsoojoot hoy
yajniñähwa'adsøjät. Pero Dios,
je'eds mäyajnähwaatsp. Hotyijä
Dios jaduñ jiaty.

²⁸Mänitä Pedro ja'a Jesús
ñämaayy:

—Huuc mäadow, coo højts
miich nbadu'ubøjcy, cøjx højts
nnähgue'egy tijaty højts hijty
nmøød.

²⁹⁻³⁰Mänitä Jesús yhadsooyy:
—Pønjaty cøxiä tøø ñähgue'egy
ja'a høøchcøxpä møødä
Diosmädia'agyquiøxpä, maas may
hajxy jaduñ jiaac paada'añ hädaa
yaabä naaxwiin tijaty hajxy hänajty
tøø ñähgue'egy tøø yhøxy'oy,
tiøjc, piuhya'ay, piuhdo'oxy, tiaj
tieedy, yhuung, ñaax. Møød
jim hajxy ñøcxa'añ tsajpootyp.
Jim hajxy jaduñ homiänaajä
yhida'añ, hoy hajxy hänajty yaa
tøø jia tsaächpøcy ja'a høøchcøxpä
hädaa yaabä naaxwiin. Tøyhajt
jaduñ. ³¹Pønjatia möjtuung
jäda'ahaty ca'a møød, nämay hajxy
miøjtägø'owa'añ. Pero pønjatia
möjtuung jäda'ahaty ja møød,
nämayyä tiuunghajxy piøgáanaxä
—nømä Jesús miänaañ.

³²Mänitä Jesús hajxy jim
tiu'ubøjcy møødä jiamiøødtøjc.
Jerusalén hajxy hänajty
ñøcxa'añ. Jawyiinä Jesús hänajty
yo'oy. Mayyä jäya'ayhajxy
hänajty pianøcxy møødä Jesús
jiamiøødhajxy, ja'a hajxy hänajty
nämajmetspä. Jaančh tehñ
yagjuøøby hajxy hänajty. Høxtä
tsähgøøby hajxy hänajty. Mänitä
Jesús ja'a jiamiøød hawiing
wioonøcxy. Mänitä Jesús tiägøøyy
mädiaacpä nebiaty hänajty jiada'añ
yhabeta'añ:

³³—Huuc mäadow hajxy, yam
hajxy nnøcxäm Jerusalén.
Coo hajxy jim ngoodáanam,
mänitøchä teedywiindsøn hajxy
xyajcø'ødägø'owa'añ, møødä
häna'cä Diosmädia'agy hajxy jim
yajnähixøøbiä tsajtøgooty, høøch
ja'a Diosquexypä. Mänitøch hajxy
jaduñ xyajnähdija'añ cooçh
hajxy xyagho'oga'añ. Mänitøch
hajxy xyajcø'ødägø'owa'añ
ja'a häna'c-hajxy jim tsohmä
Roma. ³⁴Madiú'ujøch hajxy
xchaächtuuna'añ. Xñäxi'igáambøch
hajxy. Xwyiinwoonáambøch
hajxy. Xwyiingutsujø'owáambøch
hajxy. Xwiobho'ogáambøch hajxy.
Mänitøch hajxy xjia yagho'oga'añ.
Pero cudägøøgxøøyyøch
njujypiøjtägatsa'añ, —nømä Jesús
miänaañ.

³⁵Mänitä Jesús
wyiinguwa'agøøyyä ja'a Santiago
møødä Juan. Ja'a Zebedeo
yhuunghajxy hänajty je'e. Mänit
hajxy miänaañ:

—Wiindsøn, huuc tunä mayhajt
ja'a højtsøxpä.

³⁶Mänitä Jesús yhadsooyy:

—Tii mayhájt̄høch ndúnäp.

³⁷Mänitä Santiagohajxy miänáangumbä:

—Coo miich hánajty tøø mmøjtägø'øy, coo hánajty tøø mdägø'øy hanehmbä, mänit højts cuhdujt xmió'owät coo højts jim nhäñá'awät miichä mnähmøjc, hahooyhaampiä møød hanajtyhaampiä.

³⁸Mänitä Jesús yhadsóogumbä:

—Mijts, cab hajxy mnajuø'øy tii hajxy jaduhñ mnänøømby. Nej, mmee'xtúgäp hajxy jaduhmbä nébiøch ndsaächpøgá'añänä.

³⁹Mänitä Santiagohajxy yhadsooyy:

—Nmee'xtúgäp højts jaduhñ.

Mänitä Jesús miänáangumbä:

—Jaduhñ mijts mjaançh tsaächpøgaambä nébiøch ndsaächpøga'añän. Tøyhajt jaduhñ. ⁴⁰Pero cábøchä cuhdujt jaduhñ nmøødä coo mijtsä cuhdujt nmó'owät coo hajxy jim mhäñá'awät høøchä nnähmøjc mänájøch hánajty tøø ndägø'øyän hanehmbä. Dios ja'a cuhdujt møød pøn yajnähdiijaamby coo hajxy jim yhäñá'awät. Je'edshajxy jaduhñ jim häña'awaamb —nømä Jesús miänaañ.

⁴¹Coo Jaha Jesús jiamiøødhajxy jaduhñ miädooyy, ja'a hajxy hánajty jaac nämajcpä, mänitä Santiagohajxy miäjootma'tä møødä Juan. ⁴²Mänitä Jesús miøjyaaxy ja'a hajxy hánajty jaac nämajcpä. Mänitä Jesús miänaañ:

—Ja'a gobiernähajxy, møødä häna'c-hajxy yaa møjtuungmøødpä hädaa yaabä naaxwiin, ja'a hänä'cätshajxy jaduhñ yaa

hanehmb. Mnajuøøby hajxy jaduhñ, túhmäts. ⁴³⁻⁴⁴Pero mijts, cab hajxy mbøc-juø'owät coo møjtuunng hajxy mmøødhädät. Pønä jioot tsojp coo wyiingudsähgø'owøøjät, weenä jioot piäda'agy coo jiamiøød piuhbédät. ⁴⁵Høøchpaady, høøch ja'a Diosquexypä, mäbuhbéjpcøch jaduhñ yaa tøø ngäda'agy. Høxtä nnähho'tu'udáambiøchä jäya'ayhajxy nägøxiä. Cáboch jaduhñ nmäna'añ cooçhä jäya'ayhajxy xpiuhbédät.

⁴⁶Mänitä Jesús hajxy quioo'ty maa ja'a cajpt hánajty xiøhatiän Jericó. Coo hajxy jim chóhngumbä, mayyä jäya'ay hajxy piadu'ubøjcä. Jimä wiinds hánajty tu'ug yhäña'ay tu'haam. Bartimeo hánajty xiøhaty. Timeo ja'a tieedy hánajty xiøhaty. Xädø'ønyujwaambä Bartimeo hánajty. ⁴⁷Coo ja'a Bartimeo jaduhñ miädooyy coo hánajty je'le Jiesúsä, ja'a hánajty tsohm̄bä Nazaret, mänitä Bartimeo møc yaaxy:

—Jesús, David miich jecy mhaphajt mdeedyhajt. Høøch näxúutsäc.

⁴⁸Mänitä Bartimeo yhojmujcä nämay coo cu yhamooñ. Pero cab jaduhñ ñä'a hamooñ. Tehngajnä maas møc tiägøøyy yaaxpä:

—Jesús, miichä David jecy mhaphajt mdeedyhajt. Høøch näxúutsäc.

⁴⁹Mänitä Jesús tiänaaxiøjpy. Mänit miänaañ coo ja'a Bartimeo miøjya'axøøjät. Mänitä Bartimeo tu'jäya'ay ñamaayyä:

—Xoonda'ag, tänaayyø'øg. Ximä Jesús xmiøjya'axy.

⁵⁰Mänitä Bartimeo paquiä tiänaayyø'cy. Mänitä yoñwit

yajniñahnajptuutä. Mäniä Jesús päyø'øguiä hoy wyiingumedso'øy.

⁵¹Mäniä Jesús ja'a Bartimeo miäyajtøøy:

—Tii mayhajt jaduñ myajtunáanäp.

Mäniä Bartimeo yhadsooy:

—Wiindsón, høøch yaghjxø'cäc.

⁵²Mäniä Jesús miánaañ:

—Ja'a hoy, tisän coo quia'a cabä.

Coochä nmädia'agy tøø xmiäbøjcä, paady tøø mhjxø'nø.

Tuunä Jesús jaduñ ñä'ä mänaañ, mäniä Bartimeo jiaanč hijxø'cy.

Mäniä Jesús piadu'ubøjnä.

11 Jimä Jesúshajxy hánajty quioodaannä maa ja'a cajpt hánajty xiøhatiän Betfagé møød Betania, jim mädøyyä maa ja'a tun hánajty xiøhatiän Olivos. Jim hánajty miäwiingón Jerusalén. Mäniä Jesús ja'a jiamiøød metsc ²ñämaayy:

—Nøcx hajxy jimhaamby maa yø'ø cajpthuangän. Coo hajxy jim mmedsa'añ, jimä burro hajxy tu'ug mbaada'añ cuxoch. Cahnä pøn yajpejmachñä. Mmägüejø'øwäp hajxy. Jaduhnds hajxy yaa mwitsmínät. ³Y pø jimä jäya'ay hajxy xmiäyajtøy tii hajxy jaduñ coo mmägüejø'øy, mäniä hajxy mnämä'awät: “Ja'a nwiindsón højts cham yajmaajiajp. Paquia højts nnä'ä yajtuna'añ. Mäniä højts min nnajtswidso'øy.” Jaduhñ hajxy mmäná'anät —nømä Jesús ñajtscapxøøy.

⁴⁻⁵Mäniä burro hajxy hoy jiaanč paady cuxoch jim mõjtu'haam, jim tøjñähmøjc mädøyyä. Jimä jäya'ayhajxy hánajty näje'e tiäna'ay. Coo ja'a Jesús jiamiøødhajxy

tiägøøy burromägüejø'øbiä, mäniä hajxy ñämaayyä:

—Tii yø'ø burro hajxy jaduñ coo mmägüejø'øy.

⁶Mäniä hajxy jaduñ yhadsooy waambaty hajxy hánajty tøø yhane'emyii coo hajxy jaduñ yhadsówät. ⁷Mäniä Jesús ja'a burro yajnäméjtsäxä. Mäniä

jiamiøødä wyit hajxy jim piädaacy burronähgøxp. Mäniä Jesús jim piejty. ⁸Jaanč tehñ

miayyä jäya'ayhajxy hánajty pianøcxy. Mäniä wyit hajxy näje'e chijy. Jaduhnds hajxy tu'haam ñajtsye'ebøøy maa ja'a Jesús hánajty burronähgøxp ñaxø'owa'añän. Näje'e hujtsaay hajxy hánajty piujxpä. Jim hajxy hánajty piädaacpä tu'haam.

⁹Cu'ughagujcä Jesús hánajty ñøcxy. Mäniä cu'ughajxy nägøxiä tiägøøy yaaxpä jøjpä:

—iViva Jesús, viva! iGloria a Dios! Diosquexy hädaa Jesús jaduñ. ¹⁰iGloria a Dios tsajpootypä! Jaduhñ hädaa Jesús yhane'emaambä nebiä David jecy yhanehmiän, ja'a hajxy jecy nhaphajt ndeedyhájtäm.

¹¹Mäniä Jesúshajxy jim quioo'nä Jerusalén, møødä jiamiøød ja'a nämajmetspähajxy. Mäniä hajxy jim ñøcxøøy maa ja'a tsajtøjcän. Coo hajxy jiiby chajtøjtägøøy, mäniä hajxy yhjxwädijty tijaty hánajty jiiby. Mäniä hajxy wyiimbjçumbä. Mäniä hajxy jiiby yhädaaccumbä Betania. Hix, tøø hánajty chuujø'øy, y jiiby hajxy hánajty miejtsta'aga'añ Betania.

¹²Cujaboom, mäniä Jesúshajxy jim tiu'ubøjcumbä. Mäniä Jesús

yäho'pøjcä. ¹³Mänitä piids tu'ug nãheebøøyy coo hãnajty jim tiãna'ay picumnä. Coo wiingón nãmejch, mänit yhiixy coo tiøøm hãnajty quia'a nã'ägädä hity. Haagä haay hãnajty je'e. Cahnä yhiil'ts hãnajty yhabaadyñä mänaabä hãnajty naxy tiøømbetiän. ¹⁴Mänitä Jesús piids nãmaayy:

—Ni mänaa miich mga'a tømbejtägatsaannä.

Coo ja'a Jesús jaduhñ miãnaañ, miädoow ja'a jiamioødhajxy jaduhñ.

¹⁵Coo ja'a Jesúshajxy jim miejstägajch Jerusalén, mänitä Jesús jiiby chajtojtägøøguiumbä. Mänitä Jesús ja'a too'pädøjc juubiädøjc tiägøøyy høxpäboobiädsøømbä jiiby tsajtøgooty. Mänitä meexä tiägøøyy høxjuijpä maa xädø'øñ hajxy hãnajty quiuwichän, møødä hãñaabiejt maa hajxy hãnajty yhäña'ayän coo hajxy hãnajty pialomatoogy. ¹⁶Mänitä Jesús tiägøøyy hadujpä coo ja'a jäya'ayä tiogy hajxy jiiby quia'a mädagøøñät tsajtøgooty. ¹⁷Mänitä Jesús tiägøøyy yajwiingapxøøbiä:

—Jaduhñ jim myiñ cujaay maa ja'a Diosmädia'aguian: “Pa'yaaxtäacthøchä ndøjc hajxy nägøxiä xwiäänät, ja'a jäya'ayhajxy wiinduhmyhagajtpä.” Jaduhñä Dios jecy miãnaañ. Pero mijts, wiing mijtsä tsajtøjc mwa'añ. Jaduhñ hajxy mwa'añ nebiä mee'tstaactän —nømä Jesús miãnaañ.

¹⁸Coo ja'a teedywiindsøn'hajxy jaduhñ miädooyy, møødä häna'cä Diosmädia'agy hajxy hãnajty jiiby yajnahixøøbiä tsajtøgooty, mänit

hajxy tiägøøyy cojyquiapxytiumbä nebiä Jesús hajxy yaghó'ogät. Hix, chähgøøbiä Jesús hajxy hãnajty je'eguiøxpä coo ja'a Jesús ja'a miädia'agy hãnajty jiaanç tehñ yhamädoowhijtäxä ja'a cu'ug.

¹⁹Pero coo quioodsøøñä, mänitä Jesúshajxy jiiby yhadáaccumbä Betania.

²⁰Cujaboomä Jesúshajxy ñøcxtägajch Jerusalén. Coo hajxy jim ñaxøøguiumbä maa ja'a Jesús ja'a piids hãnajty tøø nãbogø'øyän, mänitä piids hajxy yhiixy coo hãnajty tøø quiøxy tø'øch. ²¹Coo ja'a Pedro jaduhñ jiahmiejtstaacy, mänitä Jesús nãmaayyä:

—Wiindsøn, huug hix yø'ø piids. Hãxøoy miich yø'ø mnãbogøøyy coo ni mänaa quia'a tømhájnät. Tøø yø'ø quiøxy tøøtsnä —nømä Pedro miãnaañ.

²²Mänitä Jesús yhadsooyy: —Mäbøjcä ja'a Dios miädia'agy coo jiaanç tehñ tiømiädia'aguia. ²³Coo hajxy hamuumdu'joot mmäbøgät, høxtä yø'ø tun ja'a mmädia'agyhajxy xquiudiüunäp coo hajxy mnämä'awät coo ween nøcxy miejyquia'awø'øy. Mänitä mmädia'agyhajxy jaduhñ xquiudiüunät coo ja'a Dios ja'a miädia'agy hajxy hamuumdu'joot mmäbøjcät coo tiømiädia'aguia. Tøyhajt jaduhñ. ²⁴Coo mijtsä Dios tijaty mmäyujwá'anät, xmió'owäp hajxy jaduhñ, coo ja'a miädia'agy hajxy hamuumdu'joot mmäbøjcät coo tiømiädia'aguia. ²⁵Coo mijtsä Dios hãnajty mba'ya'axa'añ, tsipcøxpä häna'c hajxy jayøjp mmämée'xät, ja'a mijts hãnajty tøø xñägädieeyø'øyäbä, jaduhñä

Dios hajxy jaduhñ xmiämée'xpät tijaty hajxy hānajtɔ mgādieeyhajpy. ²⁶Pero pø cab hajxy mmāmee'xa'añ, ni mijtsā mDeedy tsajpootypā xquia'a māmee'xtāgatsa'añ —nōmä Jesús miānaañ.

²⁷Coo ja'a Jesúshajxy jim quioo'tāgajch Jerusalén, mānitā Jesús jadāhooc tiāgøøyy tsajtøgooty. Jiibiā Jesús hānajtɔ wiādity, mānit nāmejtsā ja'a teedywiindsōñ, møødä hāna'c-hajxy jiiby yajñāhixøøbiā tsajtøgooty, møødä majjāya'adiøjc. ²⁸Mānitā Jesús hajxy miāyajtøøyy:

—Pøñ miičh cuhdujt tøø xmio'oy coo miičh häxøøyy yaa tsajtøgooty tøø mdsiptuñ.

²⁹⁻³⁰Mānitā Jesús yhadsoooy: —Nhadsóowäbøch häyaa jaduhñ cooçh mijts häyaa jayøjp xyhadsóowät. Pøñä Juan māyajnābejpä quejx, Diosā tøgä jāya'ayä. Hadsóowägøch hajxy. Cooçh hajxy häyaa xyhadsóowät, mānitøch mijts häyaa nhadsóodāgājtspät —nōmä Jesús miānaañ.

³¹Cabā teedywiindsøñhajxy hānajtɔ ñajuø'oy waambā Jesús hajxy yhadsóowät. Mānit hajxy tiāgøøyy niñāmāyābā: “Coo hajxy häyaa nmānānāmät coo ja'a Dios ja'a Juan quiejxy, jaduhñ jadāhooc xyhadsowāanām: Aa, pø tøyhajt jaduhñ coo ja'a Dios ja'a Juan jiaančh quejxy, tii ja'a Juan miādia'agy hajxy coo tøø mga'a mājøjcä. ³²Y coo hajxy häyaa nmānānāmät coo ja'a Dios ja'a Juan quia'a quejxy, mānitā cu'ug hajxy häyaa xmiādsibøøyyāmät.” Hix, jaduhñä cu'ughajxy hānajtɔ

miāna'añ coogä Juan hānajtɔ Dyiosquexiä. ³³Mānitā Jesús hajxy ñāmaayy coo hajxy hānajtɔ quia'a najuø'oy. Mānitā Jesús yhadsoooy: —Pues, ni høøçh jaduhñ nga'a nāgapxaambā pøñhøçhā cuhdujt tøø xmio'oy.

12 Mānitā Jesús tiāgøøyy yajñāhixøøbiā cuentāyajmābaadyhaam: —Mānitā jāya'ay tsaatypcam tu'ug piādaacy. Mānit jiuhguraajøøyy. Mānitā tsaatyñøøxee'xøhñdy ñādajøøyy. Mānitā nähbettøjc tu'ug yhädiuuñ coo hajxy jim yhāñā'awät coo ja'a tsaatypcam hajxy hānajtɔ cwieendāhada'añ. Mānitā wiingjāya'ay ja'a tsaatypcam hajxy yajcø'ødägøøyyäxä coo hajxy cøguipxyjiaty cwieendāhādät. Mānitā cudsatyp jāguemnaax ñøcxy. ²Coo ja'a tsaatypcuc yhabaaty, mānitā cudsatyp ja'a mioonsä quiejxy coo hajxy cøgujjiä ween yajwa'xy. ³Coo ja'a craa jim miejch, mānit hoyhoy quioxho'cä. Mānit piäboowyiimbijtä cø'øwa'ads. ⁴Mānitā cudsatyp ja'a mioonsä mäwiingpä jia quéjxcumbä. Maas hanaxiä craa je'le wiobhø'cäbä. Høxtä yajtsäbjtāxä ja'a quiope jaduhñ. Hoyhoy jaduhñ chaächtiiunä. ⁵Mānitā cudsatyp ja'a mioonsä mäwiingpä jia quéjxcumbä. Mānit hajxy je'le yagho'cy. Maas mayyā mioonsä jia jaac tehñ quiejxy. Nāje'le hajxy wiobho'cä; nāje'le hajxy yagho'cä. ⁶Jimä cudsatyp ja'a yhuung hānajtɔ tu'ug. Jiaančh tehñ chojpiä yhuung hānajtɔ. Mānit ñāmaayy: “Nhuuc quéxyhøch miičh jim. Wehñdä miičh hajxy

häyaa xñä'a wiingudsähg'owät.”

⁷ Coo ja'a cudsaatyp yhuung jim miejch, mänit hajxy tiäg'ooyy niñamáayyabä, ja'a tsaatypcam hajxy hänajty t'ø miämähm'oyäbä: “Coo hädaa craa tieedy häyaa ñä'a hó'ogät, hädaa craa jaduñ c'oxiä mämähm'owaamb mäduhñtiä hädaa tsaatypcam. Ts'oc hädaa craa hajxy jaduñ nä'ägä yaghó'cäm, jaduñ h'ojts hädaa tsaatypcam nje'ehájtämät.” ⁸ Mänitä cudsaatyp yhuung miájtsäxä. Mänit yaghó'cä. Mänit hajxy hoy yh'oxch'omy jäguemju'øby.

⁹ Haa, nebiä cudsaatypäda'a hänajty jiatc'owä'añ. N'ocxaambäda'a hajxy yaghó'tägatsa'añii, ja'a hajxy hänajty t'ø miäyaghó'oguiäbä. Mänitä wiinghäna'cä tsaatypcam hajxy hänajty jajc'ø'däg'owä'añii.

¹⁰ Jaduñ jim myiñ cujaay maa ja'a Diosmädia'aguiän:

Ja'a tsaä mädyii ja'a t'ojmuu'tspäd'ojc-hajxy quia'a nä'ägä cumaayy, je'e nä'ägä tuundsoñ maa ja'a t'ojteecän.

¹¹ Ja'a Dios jaduñ mänaañ coo ja'a tsaä jaduñ jim tiuundsóonät.

Paady hajxy jaduñ jaan'ch tehñ jajxón nhíjxäm

—n'omä Jesús miädiaacy.

¹² Ja'a teedywiinds'nhajxy, ñaju'øby hajxy hänajty jaduñ coo hajxy hänajty t'ø yajmäbaadyii nebiä cahwiind'oyhäna'cän, ja'a hajxy hänajty tsaatypcueendähajpä. Coo hajxy jaduñ ñaju'øyy, paadiä Jesús hajxy hänajty jia wi'i

miadsa'añ. Pero cab hajxy jaduñ ñä'a majch, je'egui'øxpä coo ja'a cu'ug hajxy hänajty chähg'øyy. Mänitä Jesús hajxy ñähg'ueecnä. Mänit hajxy wyiimbijnä.

¹³ Mänitä fariseoshajxy näje'e wyiinguejxä, m'øødä Herodes quiu'ughajxy näje'ebä, coo ja'a Jesús hajxy yajcapxtägóyyät, jaduñ hajxy hoy ñäx'ow'owät. ¹⁴ Mänitä Jesús ñámejtsä. Mänit ñämaayyä:

—Nnaju'øby h'ojts coo miich t'oy mjaan'ch tehñ miädia'agy. Caj miich jaduñ mnä'ägä m'ojpäda'agy waambatiä cu'ug xjia näma'ay. Tu'cuhdujt miichä jäya'ay mhixy, p'ønjaty hajxy mäy'øø, p'ønjaty hajxy häyooob. T'oyhajt h'ojts miich xyajnähix'øyy coo h'ojts hoy njäya'ayhädät nebiä Dios choquiän. Hoorä, coo h'ojtsä gobiernä Rómabä hänajty xyajnähuudiu'uda'añ, nej, hahix'øby jaduñ coo h'ojts nnähjuudiú'udädä —n'omä Jesús miäyajt'øwä.

¹⁵ Mänitä Jesús yhadsooyy:

—Tii'ch hajxy jaduñ coo xjia wi'i yajcapxtägoyya'añ. H'øøchä xäd'øñ tu'ug huuc yaghíjxäc.

Paadiä Jesús jaduñ miänaañ, ñaju'øby hänajty jaduñ coo hänajty jia wi'i yajcapxtägoyya'añii.

¹⁶ Mänitä Jesús xäd'øñ jiaan'ch yaghijxä. Mänit miänaañ:

—P'øn wyiin j'ojp y'ø'øduñ. P'øn xi'ø y'ø'øduñ jim miim'b.

Mänit hajxy yhadsooyy:

—Ja'a gobiernä wyiin j'ojp y'ø'ø, ja'a jim tuumbä Roma. Jaaya'ay xi'ø y'ø'bä.

¹⁷ Mänitä Jesús miänáangumbä: —T'oyhajt jaduñ. Mo'owxä ja'a gobiernä hajxy p'ø je'e jie'e y'ø'ø.

Pero mädyii ja'a Dios jie'e, mo'ow hajxy je'ebä.

Coo ja'a Jesús jaduhñ yhadsooyy, jaanč tehñ yagjuøøyy ja'a fariseoshajxy jaduhñ.

¹⁸Mänitä Jesús ja'a saduceos näje'e nämejtsä. Cabä saduceoshajxy hänajty miäböcy coogä ho'ogyjiäya'ayhajxy hänajty jiuypiojtägatsa'añ. Jaduhñä saduceoshajxy hänajty miäna'añ cooc tyijy ja'a ho'ogyjiäya'ayhajxy quia'a juypiojtägatsa'añ. ¹⁹Mänitä saduceos ja'a Jesús hajxy ñämaayy:

—Wiindsón, jaduhñä Moisés jecy quiujahy neby højts nguhdujthájtämät, højts judíojäya'ayháltäm. Hoorä, coogä ya'adiøjc tu'ug yho'ogät, coog hänajty piøquia, pø cáhnäg hajxy hänajty yhuungpaadyña, pø jímägä piuhya'ay, wéenägä piuhya'ay ja'a yaamgto'oxy wyiingpøcy, jadúhñäc hajxy jaduhñ yhuungpáadät. Jadúhñäc quiähxó'ogät coog hänajty je'e yhuungä, ja'a hänajty tøø yho'oguiäbä. ²⁰Hoorä, jii jäya'ayhajxy hänajty näjuxtujya'ay, haagä tu'que'ex. Mänitä tehñ quiobhuung tio'oxiojwiingpøjcy. Cab jecy miøødsánaayy, mänitä craa yho'cy. Cabä huung hajxy ñä'a paaty. ²¹Mänitä jiodsomy ja'a yaamgto'oxy wyiingpøjcy. Ni je'ehajxy quia'a huungpaatpä. Mänitä craa yho'pä. Jaduhñä jiodsomy je'ebä jia wiingpøjcumbä. Jaanä jaduhyyä je'e jiajpä nebiä yhajchhajxy jiajtiän. ²²Jaduhñ hajxy näjuxtujc jia møødsánaayy, ni pøn je'e quia'a yaghuungpaaty. Nägøxiä hajxy jaduhñ yho'cy. Høxtä ja'a to'oxiojç, jaac tehñ

yho'c je'ebä. ²³Bueno, coo ja'a ho'ogyjiäya'ayhajxy hänajty nägøxiä jiuypiojtägatsa'añ, pønda'a je'e tehñ tiøybä møødsána'awaamb, ja'a hajxy hänajty näjuxtujcpä. Hix, näjuxtujc hajxy hänajty tøø jia møødsána'ay. Paady højtsä tøyhajt ndsocy — nømä Jesús ñämaayyä.

²⁴Mänitä Jesús yhadsooyy: —Caj mijtsä tøyhajt hajxy mnä'ägä møødä, je'eguiøxpä coo ja'a Diosmädia'agy hajxy mga'a nä'ägädä wiinjuøøy. Møød cab hajxy mnajuøøbiä nebiatiä Dios ja'a miøcmäjaa yajcähxø'ogy. ²⁵Coo ja'a ho'ogyjiäya'ayhajxy hänajty jiuypiojtägatsa'añ, cab hajxy mänit piøga'añ, cab hajxy mänit yhu'uga'añ. Jaduhñ hajxy yhida'añ nebiä Diosmoonsähajxy jim yhitiän tsajpootyp. ²⁶Tii mijts coo mga'a mäbøga'añ coo ja'a ho'ogyjiäya'ayhajxy jiuypiojtägatsa'añ. Jaduhñä Moisés jecy quiujahy coogä Dios tähooc miøødnibiaatä jim pactuum maagä hujts haptymøødpä hänajty tioyyän. Mänitägä Dios ja'a Moisés ñämaayy: “Høøchä Abraham xDyioshajp, møødä Isaac, møødä Jacob.” ²⁷Coo ja'a Dios jaduhñ jecy miänaañ, jaduhñä tøyhajt hajxy nmøødháltäm coo ja'a Abrahamhajxy hänajty tøø jiuypiojtägach, møødä Isaac, møødä Jacob. Hix, jujcyjiäya'ay ja'a Dios jaduhñ Diosháltäp, ca'a yho'oguiäya'ayä. Coo mijts jaduhñ mmäna'añ cooc tyijy ja'a ho'ogyjiäya'ayhajxy quia'a juypiojtägatsa'añ, caj mijtsä tøyhajt hajxy mnä'ägä møødä —nømä Jesús miänaañ.

²⁸Jimä jäya'ay hänajty tu'ug yhamädoowhity. Tsajtøgooty hänajty tiuñ. Coö miädooyy coö ja'a Jesús hänajty hoy tøø yhadsoy, mänitä Jesús hoy wyinguwa'agø'oyii. Mänit nāmaayyā:

—Madiu'u ja'a Moisés hajxy jecy xyhanéhäm. Mädyii jaduñ maas tuungpaatp —nømä Jesús miäyajtøwä.

²⁹Mänitä Jesús yhadsooyy:

—Jaduñ je'e miäna'añ:

“Pønjatiä Israel jecy haphajt teedyhajt, hamädoowhit hajxy. Ja'a Dios hajxy nWindsøn'hájtäm. Tu'uquiiä Dios jaduñ Dyioshaty.

³⁰Hamuumdu'jootä Dios hajxy mjaanč tehñ wyiingudsähgø'owät nägøø nädecypii. Mäbøjcä miädia'agy hajxy homiänaajä.

Jahmiets hajxy jaduñ cøjxta'axiøø.”

³¹Jaduñnä miämetspä miänaambä:

“Mdsógäbä jäya'ay hajxy nägøxiä nej mijts hamdsooyyä mničogoyiiän. Ni mädyii mädia'agy jaduñ quia'a mäbaady neby hädaa mädia'agy metspä tiuungpaadiän” —nømä Jesús miänaañ.

³²Mänitä craa miänáangumbä, ja'a hänajty tuumbä tsajtøgooty:

—Wiindsøn, jaanč tehñ yhoy miich mhadsooyy. Tøyhajt jaduñ nej miich mmäna'añän coö Dios tiu'uquiiä. Cabä wiingDios jyiiä. Xjiaanč tehñ tiuungpáatäm hajxy jaduñ ³³coö ja'a Dios hajxy hamuumdu'joot nwiingudsähgøoyyämät, møød coö jäya'ay hajxy nägøxiä ndsójcämät neby hajxy hamdsooyyä nničójcäm. Pero cab hajxy xjiaty tuungpáatäm coö animal hajxy jiiby

nøcxy nnä'a hayójxäm tsajtøgooty no'cøøc —nømä Jesús nāmaayyā.

³⁴Coö ja'a Jesús jaduñ miädooyy coö ja'a craa hänajty najuøoyyaamby tøø quiapxy, ja'a hänajty tuumbä tsajtøgooty, mänitä craa nāmaayyā:

—Jaac mäbøc ja'a Diosmädia'agy hamuumdu'joot, jaduñds miich jim mnøcxät Dioswiinduum —nømä Jesús miänaañ.

Mänitä häna'c-hajxy yhamoonnä, ja'a Jesús hajxy hänajty jia wi'i yagho'ogaambä. Cabä Jesús hajxy waamb miäyajtøonä je'eguiøxpä coö ja'a Jesús hajxy hänajty chähgø'oy.

³⁵Jiibiä Jesús hänajty yajnähixø'oy tsajtøgooty. Mänit miänaañ:

—Yøø häna'c-hajxy jii yajnähixøøbiä tsajtøgooty, tii hajxy jaduñ coö miäna'añ coogä David ja'a Cristo yhaphaty yhoc-haty.

³⁶Haa ca'a, jaduñ jim myiñ cujaayä maa ja'a Diosmädia'aguiän coö ja'a David hamdsooyyä jecy miänaañ:

Mänitøchä Dios ja'a nWiindsøn xñāmaayyā:

“Yaa miñ häña'aw maächä nhahooyhaampiän, høxtä cóonøchä mmädsip nga'a yajmäjädaacämät.”

Ja'a Dioshəpərituhaamä David jaduñ jecy miänaañ. ³⁷Jaduñnä David jecy miänaañ coogä Cristo hänajty wyiindsønhaty. Hoorä, pø tøyhajt jaduñ coö ja'a David ja'a Cristo jaduñ jecy wyiindsønhaty, tii yøø jäya'ayhajxy coö miäna'añ coogä David ja'a Cristo nā'a haphaty nā'a hoc-haty —nømä Jesús miänaañ.

Jaančh teh̄m yhomiädoonä ja'a jäya'ayhajxy hänäjty miädoxy nebiä Jesüs hänäjty yajnahixø'oyän.

Nämayyä jäya'ayhajxy hänäjty.

³⁸Mänitä Jesüs jiaac mänaañ:

—Yø'ø häna'c-hajxy jii

yajnahixø'obiä tsajtøgooty, cab yø'ø miädia'agy hajxy mmäbøjcat.

Yoñwitmøød hajxy naxy wiädity

cajptooty je'eguiøxpä coo

hajxy wyi'li yajcumaya'añ. Wi'i

yajwiingudsähgø'owaamb hajxy

jaduhñ. ³⁹Jiiby hajxy jia wi'i

yhäna'awa'añ maa ja'a hänaabiejt

yajxonjatypän, hädaa yaabä

tsajtøgootypä, møød jim maa ja'a

cay hu'ugy naxy jiadyiijän. ⁴⁰Pero

cabä quiuhdujthajxy nä'ägädä

hoyyä. Hix, pøjcäxäbä yaamgtø'oxiä

tiøjc-hajxy. Hoy hajxy jaduhñ jia

jatcø'oy, jejcyjatiä Dios hajxy jia wi'i

pia'ya'axy. Pero jaančh teh̄m yhoxyhoy

hajxy jaduhñ yajcumädoxa'añii —

nømä Jesüs miänaañ.

⁴¹Mänitä Jesüs jim mädoxyä hoy yhöxta'agy maa ja'a jäya'ay xädø'øñ

hajxy hänäjty naxy quiuyoxø'oyän.

Ja'a mäyøøjäya'ayhajxy, majiatiä

xädø'øñ hajxy hänäjty piäda'agy.

Jimä Jesüs hänäjty miähee'pna'ay.

⁴²Mänitä yaamgtø'oxy tu'ug miejch.

Jaančh teh̄m yhäyoob hänäjty

je'e. Mejtsmägo'xä häyoobä je'e

quiugonøxy. ⁴³⁻⁴⁴Mänitä Jesüs ja'a

jiamøødtøjc nämaaxy:

—Huug hix yø'ø yaamgtø'oxy hajxy.

Cøxiä yø'øduhñ tøø yecy mäduhñtiä

hijty miøødä, ja'a hijty nägayaambiä.

Pero yø'ø mäyøøhäna'c-hajxy,

weeñtiä hajxy jaduhñ nä'ä puhyejcy.

13 Coo ja'a Jesüshajxy jiiby

chajtøjpädsøømy, mänitä

jiamøød tu'ug miänaañ:

—Wiindsøñ, huug hix yø'ø tsajtøjc, jaančh teh̄m yajxon yø'øduhñ miuuchä.

²Mänitä Jesüs yhadsooxy:

—Hoy huuc teh̄m yheeb. Hoy yø'ø tøjc jaduhñ jia cruundä, cøxaamb yø'øduhñ jyida'añ. Haxit hatajø'oy yø'ø muuch jiada'añ.

³Mänitä Jesüshajxy jim nõcxy maa ja'a tun hänäjty xiøhatiän Olivos, jim Jerusalén-woc-hawiimb. Coo hajxy jim miejch, mänitä Jesüs haniduhmduum hoy yhöxta'agy. Mänitä Pedro ja'a Jesüs hajxy nänøcxy, møødä Santiago, møødä Juan, møødä Andrés. Mänitä Jesüs hajxy miäyajtøxy:

⁴—Mänaads yø'ø tsajtøjc jaduhñ jyida'añ. Mädyii hijxtähndäts jaduhñ cähxø'øgaamb coo hänäjty jaduhñ yhabaada'añ.

⁵Mänitä Jesüs yhadsooxy:

—Mniyajcopcø'owøøjap hajxy. Cab hajxy myajwiinhøønät. ⁶Mayyä jäya'ayhajxy min miäwiinhøøna'añ. Jaduhñ hajxy hänäjty miäna'ana'añ: “Høøch je'e Cristo.” Mayyä jäya'ayhajxy hänäjty jiaančh teh̄m miäbøga'añ.

⁷Coo hajxy mmädoxyhädät coo tsip pleetä hänäjty xii yaa tøø piädø'ogy, cab hajxy jaduhñ mmäná'anät cooc tyijy ja'a naaxwiimbä hänäjty wyiimbida'añ. Homiänaajä tsip pleetä jiadyii.

⁸Nimiädsibø'owäänap hajxy hänäjty wiinghagajptjaty. Wiinduhmyhagajpt hujx hänäjty naxa'añ. Jadäänäbä yuuxøø hänäjty wiinduhmyhagajpt. Coo jaduhñ jiada'añii, hijxtahñd jaduhñ cähxø'tsoonaamb coo tsø'ty häyohn høchähgøøñajaty hänäjty jiada'añii.

⁹Mniyajcopcø'owøøjap hajxy mänit. Mäjahñdiuum hajxy hānajtj mhida'añ. Xmiadsaambä mmädsip hajxy hānajtj. Mānit hajxy jim xyajñøcxa'añ haguċ. Møød jim maa ja'a judfos chajtøjc-hajxiān, xwiobho'ogaamb hajxy hānajtj jim. Xyajñøcxaamb hajxy hānajtj jim maa ja'a gobiernā wyiinduumhajxiān, je'eguiøxpä cooċh mijts xpiawädity. Jímhøch hajxy jaduhñ xmiädiá'agät gobiernāwiinduum.

¹⁰Hix, cahnā naaxwiimbä hānajtj wyiimbityñā, cøxaambä jäya'ay ja'a Diosmädia'agy hajxy miādowa'añ wiinduhmyhagajpt. ¹¹Y coo hajxy jim xyajñøcxät haguċ, cab hajxy mänit mnādaj mnāmáyät waambaty hajxy mhadsówät. Hix, ja'a Dios ja'a mädia'agy hajxy hānajtj xmio'owaamb. Cab hajxy hānajtj hamdsoo mmädia'aga'añ; ja'a Dioshespíritu hajxy hānajtj xyajmädia'agaamb.

¹²Hamiñ haxøpiä jäya'ayhajxy hānajtj tu'que'ex ñiñāhduga'añii coo hajxy yagho'ogøøjät. Jaanā jaduhñā yhuung hajxy hānajtj ñāhdugaambä. Ja'a muutsc-hāna'c-hajxy, jaanā jaduhñā tieedy hajxy hānajtj tiunaambä. ¹³Nägøxiä mijtsä jäya'ay xmiāhanhada'añ je'eguiøxpä cooċh mijts xpiawädity. Pero pøn hānajtj tøø miee'xtucy, hoy hānajtj tøø jia ho'ogy, nähwa'adsaamb hānajtj je'e.

¹⁴Habaadaamb jaduhñ coo ja'a haxøøgpä ca'a hoybä miedsa'añ maa ja'a Diostøjcän —pøn hädaa nocy capxp, ween jaduhñ wyiijnjuø'y—. Mānitā Diostøjc jaduhñ yajma'ada'añii. Coo ja'a

haxøøgpä hajxy jaduhñ mhíxät, mänit hajxy päyø'øguiä mnøcxät tunjoot, pønjatj yaa tsānaaby Judeanaaxooty. ¹⁵Pønjatj hānajtj hāñaaby tøjñähgøxp, ween ñā'ägä päyø'øgy, cap nøcxy tii jiiby yajpädsømy tøgooty. ¹⁶Pønjatj hānajtj camjooty, cab jaduhñ jim ñøcxät maa ja'a tiøjcän. Cap nøcxy jiiby tii yajpädsømy, ni wyit ni tii.

¹⁷Jaanċh tehñ chaaċhpøgaambä to'oxiøjc-hajxy hānajtj, ja'a hajxy hānajtj co'na'awaambä, møød ja'a hajxy hānajtj huungyajtsi'tspä.

¹⁸Mmänuu'xtá'agäbä Dios hajxy coo tsø'ty häyohn ween quia'a jadyii coo hānajtj jiaanċh tehñ tiøøhcä. ¹⁹Jaanċh tehñ yhoyhoyyä jäya'ayhajxy hānajtj chaaċhpøga'añ. Ni mädyii tsaäċhpä jaduhñ quia'a mäbaada'añ neby hānajtj jiada'añiiñjān, ni ja'a jecy nājxäbä, ni ja'a jaac minaambä. ²⁰Tøø ja'a Dios jaduhñ miāna'añ coo ja'a jäya'ayhajxy hānajtj jejcy quia'a tsaäċhpøga'añ, je'eguiøxpä coo chocy pønjatj jaduhñ tøø wyiimbij. Coo ja'a Dios häxøpy jaduhñ tøø quia'a mäna'añ, jejquiä jäya'ayhajxy häxøpy chaaċhpøga'añ. Ni pøn häxøpy quia'a nähwa'adsa'añ.

²¹Coo mijts pøn xñämä'awät coog tyijy ja'a Cristo hānajtj jii wiädity, cab hajxy mmäbøgät. ²²Hix, mayyā jäya'ayhajxy hānajtj wiädita'añ mäwiinhøhmä, cooc tyijy hajxy hānajtj je'e Cristo, møød cooc tyijy hajxy hānajtj Dyiosquexiä. Piayajcähxø'øgaambiä hijxtahñd hajxy hānajtj hoy-yagjuøøñbä. Jaduhñä jäya'ayhajxy hānajtj jia wi'i wyiinhøøna'añii, møød ja'a hajxy hānajtj Dioswiimbíyyäbä.

²³Mniyajcopcø'øwøøjäp hajxy. Jäguemiä hajxy cham nnäma'ay coo hajxy mniyajcopcø'øwøøjät.

²⁴Mänitxøøbä, coo ja'a tsaačhpä hänäjty tøø ñajxnä, mänitä xøø wyiingoodø'øwahñ møødä po'ö.

²⁵Mänitä mamiadsa'a hänäjty quia'awa'añ. Tsäyuyyaamb hänäjty jaduñ, tijaty jim cuhdujtmøød tsajtcøxp.

²⁶Mänitøch hänäjty ngäda'aga'añ jocjooty, høøch ja'a Diosquexypä. Møcmäjaamøødhøch hänäjty ngäda'aga'añ. Yajxónhøch hänäjty mänit ngäda'aga'añ. Mänitøchä jäya'ayhajxy hänäjty may xpia'hee'ptägø'owa'añ.

²⁷Mänitøchä nmoonsä tsajpootypähajxy hänäjty nguexa'añ coo hajxy jaduñ quiøxy yajtu'ugmügät pønjátyhøch hänäjty tøø nwiimbij. Wiinduhmyhagajpt hajxy hänäjty wioomuga'añii.

²⁸Høxtahmdsä higueraquepy, coo jaduñ wiámät, hijxtahnd jaduñ coo hänäjty tøø piodtägøøñä.

²⁹Jaana jaduñduhmä, coo ja'a tsø'ty hajxy jaduñ mhíxät nébiøch naamnä tøø nmädia'agy, hijxtahnd hänäjty jaduñ cooch hänäjty mobädajpä ngädaactägatsa'añ hädaa yaabä naaxwiin, høøch ja'a Diosquexypä.

³⁰Cøxaamb jaduñ jiada'añii nébiøch naamnä tøø nmädia'agy, cahnä jäya'ayhajxy hänäjty quiøxy ho'ogyñä, ja'a hajxy jäda'ahaty jugyhajpä. Tøyhajt jaduñ.

³¹Cuhdägoyyaambä tsajt møødä naaxwiimbä. Pero tsipcøxp jaduñ tiøjiada'añ nébiøch cham nmädia'aguiän.

³²Ni pøn jaduñ quia'a najuø'øy mänaa jaduñ jiada'añii. Jagooyyä Dios nidihm ñajuø'øy, ja'a

hajxy nDeedyhájtäm. Ni ja'a Diosmoonsähajxy jaduñ quia'a najuø'øy, ja'a hajxy jim tsajpootypä. Ni høøch nga'a najuø'øy, høøch ja'a Diosquexypä.

³³Paady, nähix hahixø'ø hajxy mhídät homiänaajä, je'eguiøxpä coo hajxy mga'a najuø'øy mänaa jaduñ jiada'añii.

³⁴Jii jäya'ay hänäjty tu'ug, coo hänäjty ñøcxa'añ jäguemnaax, mänitä mioonsä ñämaayy coo ja'a tiøjc cwieendähájtäxät. Nägøxiä hajxy jaduñ yhaagä nä'ä tuungmooyyä. Jaduñä tu'jäya'ay ñämáayyäbä coo jim tiünät maa ja'a tøgħaawän, weenä tøjc yaghawa'ačh jopy; tsuu jadähooc yhagøøguiumbät.

³⁵⁻³⁶Ja'a cudøjcä mioonsähajxy, cab hajxy hänäjty ñajuø'øy mänaa ja'a wyiindsøn hajxy hänäjty miejstägatsa'añ, pø coodsøøñäp hänäjty jaduñ, o pø tshmdä hänäjty, o pø tu'tseey-yaaxø'ogy hänäjty, o pø jobøøñäp hänäjty. Nähix hahixø'ø ja'a wyiindsøn hajxy jaduñ yhahíxät. Pø caj, coo hajxy jaduñ jaguiapxiä ñähmejtspedøøjät, wehndä hajxy hänäjty mia'ay. Jaduñ mäwínäts mijtpä, cab hajxy jaduñ mnajuø'øy mänájoch yaa ngädaactägatsa'añ hädaa yaabä naaxwiin. Paady hajxy nähix hahixø'ø homiänaajä mnä'ägä hídät.

³⁷Jadúhnhøchä jäya'ayhajxy nägøxiä nnämaabiä coo hajxy nähix hahixø'ø ñä'ägä hídät homiänaajä.

14 Mejtsxøø ja'a pascuaxøø hänäjty quia'a habaady mänaa ja'a judíos tsajcaagy hajxy hänäjty quiaayän, ja'a cajpä tsoomiøødpä. Ja'a

teedywiindsønajxy, mөөдä häna'c-hajxy, ja'a hajxy hänäjty jii_{by} yajnahixөөbiä tsajtөгooty, cojyquiapxytiumb hajxy hänäjty jaduhñ nebiä Jesús hajxy yajtsumөөjät hөhnda'agymiädia'agyhaam, jaduhñ hajxy jaduhñ hoy yajyagho'ogөөjät. ²Mänit hajxy näje'e niñämaayä:

—Cab hajxy tsөc nej jatcөөyyäm coo ja'a cu'ug hajxy jaduhñ xñä'ä nähbädө'cämät.

³Tөө ja'a Jesús hänäjty yhäda'agy Betania. Jim hänäjty miädsuugay maa ja'a Simón tiөjcän, ja'a hijty leprapa'ammөөdpä. Mänitä to'oxiөjc tu'ug miejch. Jimä nardoperfume hänäjty quiө'ogonhaty alabastro-vidriojooty. Jaanч tehñ chowä nardoperfume hänäjty ñөcxy. Mänitä to'oxiөjcä perfume-vidrio piuhy. Mänitä Jesús ja'a perfume yajcuhtemөөyyä.

⁴Mänitä jäya'ayhajxy näje'e jiootma'ty, ja'a hajxy hänäjty jim pahäñaabiä. Mänit hajxy niñämaayä:

—Cap yө'ө perfume jaduhñ cu yaghäyooyy. ⁵Coo jaduhñ cu ñä'ägä too'cy, tsoobaadaamb yө'ө hijty, tägөөgmägo'x-xөөguduñ. Jimä häyoobädөjcä chow hajxy jaduhñ cu miooyyä coo jaduhñ cu ñä'ägä too'cy.

Jaduhñä to'oxiөjc yhojjä.

⁶Mänitä Jesús miänaañ:

—Weends yhity. Ca'a hajxy mwi'i yhojy. Nébiөch yө'ө jaduhñ tөө xtiuñän, cab jaduhñ ñejpiä; hoy jaduhñ. ⁷Homiänaajä mijtsä häyoobäjäya'ay mhixy. Homiänaajä hajxy jaduhñ mbuhbédät. Pero

hөөчh, cábөch mijts jejcy xyhixa'añ. ⁸Xwyiingudsähgөөbiөch yө'өya'ay jaduhñ, páadyhөчhä perfume jaduhñ xyajcuhtemөөyy. Jaduhñ miäbaady nej coöчh häxөpy tөө nho'oguiän. Jaduhñhөch yө'ө hijty xyajnähdema'añ. ⁹Majatiä Diosmädia'agy wiädita'añ wiinduhmyhagajpt ja'a hөөчhcөxpä, jaduhñä jäya'ayhajxy miädia'aga'añ nébiөch yө'өya'ay naamnä tөө xtiuñ. Jaduhñ yө'ө homiänaajä jiahmiedsáañänä. Tөyhajt jaduhñ.

¹⁰Jimä Jesús ja'a jiamiөөд hänäjty tu'ug xiөhaty Judas Iscariote, ja'a hajxy hänäjty nämajmetspä. Mänitä Judas ja'a teedywiindsøn hoy miөөdcojyquiapxytiuñ coo ja'a Judas ja'a Jesús hänäjty tiooga'añ.

¹¹Coo ja'a teedywiindsønajxy jaduhñ miädooyy, mänit hajxy jaduhñ jiaanч tehñ xioondaacpөjcy. Mänitä Judas yajwiinwaanөөyyä coo xädө'өн hänäjty mio'owa'añii. Mänitä Judas tiägөөyy wiinmaabiä nebiä Jesús paquiä yajcө'ödägө'öwät.

¹²Mänitä pascuaxөө yhabaatnä.

Jaduhñä judiөshajxy hänäjty quihdujthaty coo tsajcaagy hajxy naxy quia_y, ja'a cajpä tsoomiөөдäbä. Jaduhñ hajxy hänäjty quihdujthajpä coo meeghuung hajxy naxy yoxy ja'a pascuaxөөjooty. Mänitä Jesús ja'a jiamiөөд miäyajtөwä:

—Maada'a yhoyyä coo pascuaxөө hajxy häyaa nwiindsuugäyyämät.

¹³Mänitä Jesús ja'a jiamiөөд nämetsc ñämaayy:

—Nөcx hajxy jim Jerusalén.

Jimä jäya'ay hajxy tu'ug mbaada'añ nõөгөн. ¹⁴Je'eds

hajxy mbadu'ubóǵäp. Mänit hajxy mbadøjtäg'owät. Mänitä cudøjc hajxy mnämä'awät: "Ja'a nWiindsón højts jaduhñ tøø xwyiinguexy coo højts nyajtówät maa højtsä pascuaxøø häyaa tsuu nwiindsuugáyät." ¹⁵Mänit mijtsä cudøjc cuarto nøcxy xyajnáhixø'owa'añ nähbettøjcøxp. Jaančh tehñ quiäruundä ja'a cuarto jaduhñ møød yajxonä. Jimä cay hu'ugy hajxy mnähix mhahixø'owät coo hajxy jim ndsuugayáanam — nömä Jesús miänaañ.

¹⁶Mänit hajxy nämetsc jiaančh nøcxy jim cajptooty. Jiaančh paat hajxy jaduhñ neby hajxy hänäjty tøø näma'ayijän. Mänitä tsuugay hajxy tiägøøyy nähix hahixøöbiä.

¹⁷Coo quioodsøöñä, mänitä Jesús hajxy jim nøcxy maa ja'a pascuaxøø hajxy hänäjty wyiindsuugaya'añän, møødä jiamøødhajxy ja'a jaac nämajcpä. Mänit hajxy tiägøøyy caabiä.

¹⁸Mänitä Jesús miänaañ:

—Tú'ughøch mijts mjamiøød xñäxø'owø'owa'añ. Quipxy hajxy je'e cham xmiøødcamiújcäm. Tøyhajt jaduhñ —nömä Jesús miänaañ.

¹⁹Mänit hajxy nägøxiä jiootmadiägøøyy. Mänit hajxy tiägøøyy niñamáayyabä:

—Nej, høøch je'eda'a tyjy xñänøömbä.

²⁰Mänitä Jesús yhadsooyy:

—Mijts mjamiøød jaduhñ tu'ug jatø'øwaamb, näguipxiä tsajcaagy hajxy jaduhñ jiiby xmiøødpaguhmä'tsäm texyjooty.

²¹Høøch, ja'a Diosquexypä, jadúhñhøch njada'añ nhabeta'añ

nepy jim myiñän cujaay maa ja'a Diosmädia'aguiän. Tøjiadaambä Diosmädia'agy jaduhñ. Pero ja'a cráajøch jaduhñ xñähdugaambä, jaančh tehñ yhoyhoy jaduhñ chaačhpøga'añ. Maas hoy häxøpy coo quia'a nä'ägä naaxwiimbädsøömy —nömä Jesús miänaañ.

²²Caabyñä ja'a Jesús hajxy hänäjty, mänitä Jesús ja'a tsajcaagy quionø'cy. Mänitä Dios nämaayy: "Dioscujú'uyäp." Mänitä jiamioødä tsajcaagy nägøxiä yajnäguidøøyy. Mänit miänaañ:

—Cay hädaa hajxy; høøch nni'x ngopc hädaa —nömä Jesús miänaañ.

²³Mänitä Jesús ja'a vaso quionø'cy, ja'a hänäjty vinomøødpä. Mänitä Dios nämäaguuiumbä: "Dioscujú'uyäp." Mänitä Jesús ja'a vino yhuuctsohñ. Mänitä jiamioød miooyy. Nägøxiä hajxy jaduhñ yhuucy. ²⁴Mänitä Jesús miänángumbä:

—Høøch nnø'ty hädaa. Hijxtahñd hädaa jaduhñ coöchä nnø'ty nyajxee'xa'añ coöchä jäya'ayhajxy hänäjty nnähho'tu'uda'añ. Jadúhñhøchä cuhdajt

nyajtødiägø'owa'añ, ja'a Dios ja'a Abraham jecy miøødyajcuhdújcäbä.

²⁵Tøyhájthøch jaduhñ nnämä'awät, cábøchä vino nhuuctägatsa'añ høxtä cóonøch hänäjty jim tøø nnøcxtägach maačhä nDeediä wyiinduumän. Mänitøchä vino jembybiä nhuucmadsa'añ —nömä Jesús miänaañ.

²⁶Mänitä Jesús ja'a Dios høy hajxy yhøøyy, møødä jiamioødtøjc. Mänit hajxy jim chohñ. Mänit hajxy

jim ñocxy maa ja'a tun hānajtj
xiøhatiän Olivos. ²⁷Mānitä Jesús
ja'a jiamiøødtøjc ñāmaayy:

—Nägøxiøch mijts xñāhgue'ega'añ,
je'eguiøxpä cooçh nmädia'agy
hajxy xquia'a mäßøgaanä.
Jaduhñ jim myiñ cujaay
maa ja'a Diosmädia'aguiän:

“Nyagho'ogäämbiøchä
meegcueendähajpä. Cøxaambä
meeghajxy piäyø'oga'añ. Xii yaa
hajxy ñocxø'øwa'añ.” ²⁸Cooçh
hānajtj tøø nho'ogy, mānitøch
jadähooc njujypiøjtägatsa'añ.
Mānitøch jim nnocxa'añ Galilea.
Mānitøch mijts jim ñocxy
xpiaada'añ —nømä Jesús miānaañ.

²⁹Mānitä Pedro ja'a Jesús
ñāmaayy:

—Høøch mäßøcypiä, cábøch miich
mänaa nbuhwa'adsa'añ, hoy miich
hajxy nägøxiä xjia puhwá'adsät.

³⁰Mānitä Jesús yhadsooyy:

—Tøyhájthøch miich nnámá'awät,
häyaa coods miich tägøøghooc
mniguiugapxa'añii cooçh tyjy
xquia'a hixiä.

³¹Pero Pedro, tehngajnä je'e jiaac
miānaañ:

—Cábøch mänaa
nniguiugapxa'añii cooçh tyjy miich
nga'a hixiä, høyhøch miich quipxy
nja møødhó'ogät —nømä Pedro
miānaañ.

Jaduhñ hajxy nägøxiä piahadsoobä.

³²Mānitä Jesús hajxy jim ñocxy
maa hānajtj xiøhatiän Getsemaní.
Mānitä Jesús ja'a jiamiøødtøjc
ñāmaayy:

—Jiids hajxy huuc hāna'aw, ñocxy
nhuuc Diospa'ya'axy.

³³Mānitä Jesús ja'a Pedro hawiing
miøødnøcxy, møødä Santiago,

møødä Juan. Mānitä Jesús hoyhoy
jiaançh tehñ jiootmabiøjcy.

³⁴Mānitä Pedro hajxy ñāmaayyä:

—Høyhøyhøch jaduhñ njaançh
tehñ jiootmayhaty. Høxtä
ho'ogäämbøch nnijiäwø'øyii. Huuc
mähmø'øw hajxy yaa. Cab hajxy
mmaahó'ogät. Jujcy hajxy mhídät
—nømä Jesús miānaañ.

³⁵⁻³⁶Mānitä Jesús weenñtiä
jiaac ñocxy. Mānit jaduhñ
miägutscädaacy. Mānitä Dios
tiägøøyy mänuu'xtaacpä: “Teedy,
mee'x, coo miich jaduhñ cu
mga'a mänaañ, cábøch häxøpy
ndsaaçhpøga'añ nébiøch cham
nmānaxa'añän. Pero cábøchä
nguhdujt yhidät nébiøchä njoot jia
tsoquiän. Miiçhä mguhdujt jaduhñ
nä'ägädä hidaamb.”

³⁷Mānitä Jesús jim ñocxtägajch
maa ja'a Pedro hajxy hānajtj tøø
miähmø'øyän. Coo jim miejch,
mānit jaduhñ yhijxy coo hajxy
hānajtj tøø quiøxy maaho'ogy.
Mānitä Pedro ñāmaayyä:

—Simón, nej, mmaabä. Nidu'hora
miich tøø mga'a mee'xtucy. ³⁸Jujcy
hajxy hit. Tehngajnä ja'a Dios hajxy
mba'yá'axät. Jaduhñä møjcu'ugong
hajxy xquia'a jøjcapxø'øwät. Jia
tsojpiä mjoothajxy jaduhñ coo hajxy
jujcy mhídät, pero cabä mni'x ja'a
mgopc-hajxy jaduhñ miee'xtuga'añ.

³⁹Mānitä Jesús ja'a Dios
hoy pia'yáaxcumbä. Jaduhñ
jadähooc ñāmānaanøøguiumbä.

⁴⁰Mānit jadähooc miéjtscumbä
maa ja'a Pedro hajxy hānajtj
tøø miähmø'øyän. Tøø hajxy
hānajtj miaahó'cumbä. Hix,
tøø hajxy hānajtj jiaançh tehñ
yhanuu'xø'øy. Coo hajxy jaduhñ

yujxä, cab hajxy hänajty ñä'ägä najuø'øy waamb hajxy yhadsówät.

⁴¹Coo ja'a Jesús jaduhñ miejch ja'a miädägøøghoocpä, mänit miänaannä:

—Nej, je'enä hajxy mwili mia'ayñä.

Ween tiuhñä. Tøø yhabaatnä coochä cahwiindøyhäna'c-hajxy xquiø'ødägø'øwaannä, høøch ja'a Diosquexypä. ⁴²Pädó'näts hajxy. Jam hajxy. Ximä craa myiñ ja'aäch jaduhñ xyajcø'ødägø'øwaambä.

⁴³Jimä Jesús hänajty miädia'agyñä, mänitä Judashajxy miejch, møødä majiäya'ay, haagä espada-cap. Näje'e hajxy hänajty wiojptcappä. Ja'a teedywiindsønñhajxy jaduhñ mäguejx, møødä häna'c-hajxy jiiby yajñähixøøbiä tsajtøgooty, møødä majjäya'adiøjc-hajxy.

⁴⁴Tøø ja'a Judashajxy hänajty quiojyquiapxytiuhñ: “Ja'aäch hänajty ndsu'xaambiä, je'e hänajty je'e. Mänit hajxy mmádsät. Mänit hajxy nøcxy mdsuymy”, nømä Judas hänajty tøø miäna'añ. ⁴⁵Mänitä Judas ja'a Jesús ñämejch. Mänit ñämaayy:

—iWiindsøn!

Mänitä Judas ja'a Jesús jiaançh tsu'xy. ⁴⁶Mänitä Jesús miajtsä.

⁴⁷Ja'a Jesús ja'a jiamioød tu'ug, jimä espada hänajty miøjnädawhaty. Coo jaduhñ yhiyx coo ja'a Jesús hänajty tøø miächii, mänitä yhespada jiuu'pädsøømy. Mänitä teedywiindsønñä mioonsä tu'ug tiaatspujxtuutä.

⁴⁸Mänitä Jesús ja'a majiäya'ay ñämaayy:

—Tiich hajxy jaduhñ coo tøø xñämiñ espada-cap wojptcap. Tiich

hajxy xyhixy, mée'tspäjä. ⁴⁹Tiich hajxy jim coo xquia'a majtspä tsajtøgooty. Nébyhøch hajxy jaduhñ høxtä yaa tøø xñämiñ. Nej, ca'a, jabom-jabómhøch hijty jim nøcxy nyajñähixø'øyä. Pero páadyhøch cham njaty nhabety, jaduhñ Diosmädia'agy tiøjiädät ja'a høøchcøxpä.

⁵⁰Nidiuhmä Jesús hänajty jiaac mädia'agy. Tøø ja'a jiamioødhajxy hänajty quioxy päyø'ogy. ⁵¹Jimä høxcujc-häna'c ja'a Jesús hänajty tu'ug piawädijpä, poobwit-nähcäjeenä. Mänit jaduhñ jia madsaanä. ⁵²Mänitä poobwit yajniñähnajptuutä. Nähwa'ads høxwa'ads je'e piäyø'cy.

⁵³Mänitä Jesús yajnøcxä maa ja'a teedywiindsønñ wyiinduumän, ja'a jaac tehñ miøjpä. Mänitä teedywiindsønñhajxy jiaac tehñ miejch, møødä majjäya'adiøjc-hajxy, møødä häna'c-hajxy jiiby yajñähixøøbiä maa ja'a tsajtøjcän. ⁵⁴Jimä Pedro hänajty jäguemjuøøby piadäna'ay maa ja'a teedywiindsønñ tiøjwiingøn. Mänit jim piahøxtaacy maa ja'a hadänaabiähajxy hänajty jiøømba'axamiän.

⁵⁵Jimä teedywiindsønñhajxy hänajty jia wi'li wyiinmahñdyhaty nebiä Jesús hajxy yajyagho'ogøøjät. Pero cab hajxy hänajty ñä'ägä wiinmahmybiaady. ⁵⁶Hix, hoyyä Jesús hajxy hänajty nämay jia nähøøno'øy, wiingaty hajxy hänajty miädia'agy; cab hajxy hänajty tiu'ugmädia'aguia. ⁵⁷⁻⁵⁸Mänitä wiinghäna'c-hajxy tiänaayyø'cy; nøm hajxy je'e miänaambä:

—Tøø højts jaduhñ nmädoy coo jaduhñ miänaañ: “Hädaa tsajtøjc,

jäya'ayhajxy hädaa hädiuun. Pero hөөч, nyajnajtsjidó'owäböch hädaa. Cudägөөгxóөyyöchä wiingpä nhädiuundägätsät. Ca'a jäya'ayhajxy je'e hädiünäp" — jaduһн hajxy je'e yhөһndaacpä.

⁵⁹Ni je'e hajxy hänäjty quia'a tu'ugmädiá'aguiäbä.

⁶⁰Mänitä teedywiindsón tiänaayyö'cy majiäya'ayhagujc, ja'a tehм miөjpä. Mänitä Jesús nāmaayyā:

—Nej, cab jaduһн mnä'ä hadsowa'añä waambaty hajxy miäna'añä.

⁶¹Pero cabä Jesús waamb nā'ägä hadsooyy. Mänit nāmāyyägumbä:

—Nej, tøyhajt jaduһнä coo miichä Dios tөө xquiexiä, Nej, miichä Dios xyHuunghajpä.

⁶²Mänitä Jesús yhadsooyy:

—Tøyhajt jaduһн. Hөөч je'e. Xyhixáamböch mijts jaduһн coöch jim nhäna'awa'añ Dioswiinduum, maa ja'a yhahooyhaampiän. Mänítöch hajxy jadähooc xyhixáangumbä coöch hänäjty yaa ngädaactägatsa'añ hädaa yaabä naaxwiin. Jocjootyhöch hänäjty nmänaca'añ.

⁶³Mänitä teedywiindsón ja'a wyit quioö'ch. Paady jaduһн jiatcөөyy coo hänäjty jiaanč tehм jootma'ady. Mänit miänaañ:

—Tii testigo hajxy jaduһн nnä'ä jaac wáañämät. ⁶⁴Tөө hajxy jaduһн mhamdsoo mädooy coo ja'a Dios tөө miägapxtägoy. Waamb hajxy jaduһн mmäna'añ, neby hajxy ndúunämät.

Haagä jaduһн hajxy miänaañ cooc tyijy ja'a Jesús tөө quidiēey, mөөd cooc ween yagho'ogyii.

⁶⁵Mänitä Jesús tiägөөyyä wiingutsujöөyyäbä. Mänit wyiinguxodsөөyyä. Mänit wyiingutexөөyyä. Mänit nāmaayyā: —Najuö'ow pөн xquiөjx.

Mänitä hadänaabiädöjc ja'a Jesús hajxy wyiinguḷa'abөөyy.

⁶⁶⁻⁶⁷Y ja'a Pedro, jii by hänäjty je'e hanaaxyp jioөmba'axamy maa ja'a tøjwiingän. Mänitä teedywiindsönä qyixymoonsä tu'ug miejch maa ja'a Pedro hänäjtiän. Coo ja'a Pedro jaduһн yhiixä, mänit wyiinhee'ppejtä. Mänit nāmaayyā:

—Naxy miich yö'ö Jesús mmөөdwädity, túhmäts. Haagä Nazaret hajxy mdsoon nāmetsc, túhmäts.

⁶⁸Mänitä Pedro nijiögapxä:

—Ni nga'a hixiөch yö'ö. Ni nga'a najuö'öyhöch jaduһн tiich jaduһн xjia wi'i yajmөөdmädiaacp —nөmä Pedro yhөһndaacy.

Mänitä Pedro quiuraabädsөөmy. Mänitiä tseyy tu'ug jiaanč yaaxö'cy. ⁶⁹Mänitä qyixymoonsä ja'a Pedro yhiixcumbä. Mänitä jäya'ayhajxy nāmaayyā, ja'a hajxy hänäjty jim jaac padänaabiä: —Xii Jesús jiamioөd tu'ug. Je'e yö'ö —nөmä qyixymoonsä miänaañ.

⁷⁰Mänitä Pedro jadähooc ñiguiugäpxägumbä. Cab jaduһн ñä'a jegөөyy, mänitä Pedro nāmāyyägumbä:

—Mbawädijpy miichä Jesús pä, túhmäts. Nyo'mädooby hөjts jaduһн coo miich jim mdsoon Galilea.

⁷¹Mänitä Pedro jadähooc miänāngumbä:

—Tøyhajt, cáböch jaduһн nnä'ägä hixiä pөн hajxy jaduһн mja mädiaacypy.

Tähoocapxiä ja'a Pedro jaduhñ miänaañ cooc tyijy ja'a Jesús hänajty quia'a nä'ägädä hixiä. ⁷²Mänitä tsee miämetsc-hoocpä yáaxcumbä. Mänitä Pedro jiahmiejstaacy coo ja'a Jesús hänajty tøø miäna'añ: "Cahnä tsee hänajty miämetsc-hoocpä ya'axy, tøø miich hänajty tägøøghooc mniguiugapxyii cooch miich hänajty xquia'a hixiä." Mänitä Pedro jioøguiuoty coo ja'a tsee miämetsc-hoocpä jiaanč yaaxy.

15 Coo jioøøyy, mänitä teedywiindsøn hajxy nägøxiä yhamugøøguiumbä, møødä majjäya'adiøjc-hajxy, møødä häna'c-hajxy jiiby yajnähixøøbiä tsajtøgooty. Mänit hajxy quiojyquiapxytiuuñ nebiä Jesús hajxy hänajty tiuna'añ. Mänitä Jesús hajxy quio'øxojch. Mänitä Pilato hajxy hoy yajcø'ødägø'øy maa je'e hänajty guobiernähatiän. ²Mänitä Pilato ja'a Jesús miäyajtøøyy: —Nej, tøyhajt jaduhñä coo miichä judíoshajxy xguiobiernähatiä.

Mänitä Jesús yhadsooyy:

—Tøyhajt jaduhñ.

³Madiu'u ja'a teedywiindsøn ja'a Jesús hajxy hänajty jia wi'i näxø'øwø'øy. Pero cabä Jesús hänajty waamb nä'ägä hadsooyy.

⁴Mänitä Pilato miänáangumbä:

—Nej, caj mhadsowa'añä. Madiu'u miich hajxy xjia wi'i näxø'øwø'øy —nømä Jesús nñamaayyä.

⁵Pero cabä Jesús waamb nä'ägädä hadsooyy. Jiaanč tehñ yagjuøøyy ja'a Pilato jaduhñ coo ja'a Jesús jaduhñ quia'a nä'ägädä hadsooyy.

⁶Jaduhñä Pilato hänajty jomøjt-jomøjt quihdujthaty

coo xøø hänajty jiadyii, mänitä tsumyjiäya'ay naxy tu'ug yajpädsømy, ja'a judíoshajxy hänajty yajnähdiijpiä. ⁷Jiibiä jäya'ayhajxy hänajty näje'e chumyčhänä'ay. Tsip hajxy hänajty tøø yagjadyii. Tøø hajxy hänajty miäjäya'ay-yagho'ogy. Tu'ugä tsumyjiäya'ay hänajty xiøhaty Barrabás. ⁸Coo ja'a cu'ughajxy jim miejch maa ja'a Pilato wyiinduumän, mänitä Pilato hajxy jaduhñ nñamaayy coo ja'a tsumyjiäya'ay tu'ug yhøxmádsät.

⁹Mänitä Pilato yhadsooyy:

—Nej, jaduhñ hajxy mmäna'añä coochä Jesús nhøxmádsädä, ja'a tyijy hajxy mgobiernähajpiä.

¹⁰Paadiä Pilato jaduhñ miänaañ, najuøøby hänajty je'eduhñ tiiguiøxpä ja'a Jesús coo yajcø'ødägøøyyä ja'a teedywiindsøn. Paadiä Jesús jaduhñ yajcø'ødägøøyyä je'eguiøxpä coo ja'a miädia'agy hänajty quia'a yajmädsójcäxä. ¹¹Mänitä teedywiindsøn ja'a cu'ug hajxy jiojcapxøøyy coo ja'a cu'ughajxy jaduhñ miäná'anät coo ja'a Jesús ween quia'a høxmačhii, weenä Barrabás nä'ägä høxmačhii. Coo ja'a cu'ughajxy jaduhñ jiaanč mänaañ, ¹²mänitä Pilato ja'a cu'ug jadähooc miäyajtøøyy:

—Y yø'ø Jesúsäts, ja'a tyijy hajxy mgobiernähajpiä, neby hajxy yø'ø myajnähdiijy nébiøch yø'ø ndünät.

¹³Mänitä cu'ughajxy møc yaaxy: —Møjpahbet hajxy cruzøxp.

¹⁴Mänitä Pilato miänáangumbä: —iPero tisän! Tii tøø quidiiey.

Mänit hajxy maas møc yáaxcumbä:

—Møjpahbet hajxy cruzcøxp.

¹⁵Mänitä Pilato jiaančh mänaañ coo ja'a Barrabás hajxy ween nøcxy yajpädsømy pujxtøgooty. Hiḅ, cabä Pilato ja'a cu'ug hänajty yagjootma'ada'añ. Mänitä Pilato miänaañ coo ja'a Jesús wiobho'ogóøjät. Mänit miänáangumbä coo ja'a Jesús hajxy nøcxy cruzcøxp miøjpahbety.

¹⁶Mänitä soldado ja'a Jesús hajxy yajnøcxy maa ja'a hagučän. Mänitä soldado ja'a jiamioød hajxy quiøxy mõjyaaxy. ¹⁷Mänitä Jesús hucywyit yajnähtämoogøøyyä. Mänitä haptycorona yajcuhjenøøyyä.

¹⁸Mänitä Jesús tiägøøyyä wiinyáaxäbä:

—iViva ja'a Jesús, ja'a judíoshajxy jaduhñ guobiernähajpiä! iViva!

Jaduhñä Jesús hänajty wyiinwooñii. ¹⁹Mänit hoyhoy wiojpä quiuhduum paḅyhaam. Møød wyiingutsujøøyyä. Mänit wyiinjičdaacä. Jaduhñä soldadohajxy hänajty jiatcø'øy nebiä wyiingudsähgøøbiän. ²⁰Pero wyiinwohm̄biä Jesús hajxy hänajty jaduhñ. Mänitä hucywyit hajxy yajtsijy. Mänitä yhamdsoo wit yajpøgøøyyäxä. Mänit hajxy yajnøcxy maa hajxy hänajty miøjpahbeda'añän.

²¹Mänitä jäya'ay hajxy tu'ug jiojcubaadøøyy. Camjooty hänajty tøø yhoy. Simón hänajty xiøhaty. Jim̄ hänajty chooñ Cirene. Jue'e yhuunghajxy hänajty xiøhaty Alejandro mõødä Rufo. Jim̄ä Jesús cruz hänajty chømä. Mänitä Simón hadsip nãmaayyä coo ja'a Jesús ween piuhdsømø'øyy. Mänitä Simón ja'a cruz jiaančh tsømø'ocy.

²²Mänitä Jesús yajmejtsä maa ja'a nähgaphuung hänajty xiøhatiän Gólgota. Jaduhñä nähgaphuung hänajty quiähxø'øgy nebiä ho'ogyjiäya'aguiopcän, paady hajxy jaduhñ yajxøbejty Gólgota. ²³Mänitä Jesús vino jia mooyyä. Mirra ja'a vino hajxy hänajty tøø yajmädemø'øyy. Pero cabä Jesús jaduhñ nã'ägä huucy. ²⁴⁻²⁵Mänitä Jesús miøjpahbejtä cruzcøxp. Møjpetyxiøø hänajty jaduhñ. Tøø ja'a Jesús ja'a wyit hänajty jadähooc yajtsijjächä. Mänitä soldado ja'a Jesús ja'a wyit hajxy tiägøøyy yajniuguuhäyø'cäbä. ²⁶Mänit hajxy jim̄ yuugjahy cruzcopcuhdum tiiguiøxpä ja'a Jesús jaduhñ coo miøjpahbejtä: “Hädaa ja'a judíoshajxy guobiernähajpy”, nõm hajxy jim̄ quiujahy. ²⁷Mänitä mee'tspähajxy nämetsc miøjpahbéjtäbä. Tu'jäya'ay miøjpahbejtä maa ja'a Jesús yhahooyhaampiän. Jatu'ug miøjpahbéjtäbä maa ja'a Jesús yhanajtyhaampiän. Cujcä Jesús jaduhñ hoy piäda'agyii. ²⁸Coo ja'a Jesús ja'a mee'tspä jaduhñ näguipxy miøødho'cy, jaduhñä Diosmädia'agy tiøjiajty maa jaduhñ myiñän cujaay: “Haxøøghäna'c jaduhñ pianänøømä.”

²⁹Ja'a jäya'ayhajxy hänajty jaduhñ jim̄ naxøøbiä, høxtä yagjuøøby hajxy hänajty coo ja'a Jesús hajxy jim̄ yhijxy cruzcøxp. Møød hajxy hänajty wyiinwooñ: —Ja'a, miich mahñdy ja'a tsajtøjc mwi'i yagjidaamby, y cudägøøgxøøyyä mahñdy miich je'e mhädiuundägätsät. ³⁰Pø tøy miich mõcmäjaa mjaančh mõødä, tiids miich jim̄ coo mga'a mänacy

cruzcøxp. Jadúhñäts mbäy'ø'ögät —
nømä Jesús ñämaayyá.

³¹ Jaaná jaduhñä

teedywiindsønmiäwiingapxpejpä, møødä
häna'c-hajxy hänäjty jim
yajnähixøöbiä maa ja'a tsajtøjcän.
Jaduhñ hajxy hänäjty ñiñäma'ayii:
—Tøø yø'ø wiinghäna'c may
yajnähwa'ačh, pero caj yø'ø
hamdsoo hoy yajniñähwa'adsa'añii.
Jaduhñ hijty ñibiäda'agyii
nebiä Dioshuungän. Jaduhñ
hijty niñänømyii cooc tyijy ja'a
judíoshajxy guobiernähaty. ³² Mänit
hajxy häyaa njaančh mabøjcämät,
nägooyyá jim miänácät cruzcøxp.

Jaaná jaduhñä mee'tspähajxy
hänäjty miäwiingapxpejpä, ja'a
Jesús hajxy hänäjty näguipxy tøø
miøødmøjpahbedyíjábä.

³³ Nägooyyá quiujyxioøjøøyy,
mänit jaduhñ cøjx wyiingoodsø'øy.
Tägøøghora jaduhñ yhiyty
wiingoods. ³⁴ Coø ja'a xøø
jaduhñ wyiinajtúutcumbä,
mänitä Jesús møc yaaxy: “Eloi,
Eloi, lema sabactani.” Jaduhñ
miädia'agytiägø'øy: “Diosteedy,
Diosteedy, tiich coo tøø
xñähgue'egy.”

³⁵ Jimä jäya'ayhajxy hänäjty
näje'e miähee'pna'ay. Coø hajxy
jaduhñ miädooyy, mänit hajxy
miänaañ:

—Mäadow, Elíasäda'a møyjáaxäp.

³⁶ Mänit tu'jäya'ay esponja hoy
quioñ päyø'øguiä. Mänit jiiby
piama'tsnajxy xunvinojooty. Mänitä
esponja yujxojch paxyjøbhaam.
Mänitä Jesús yaghagaabøøyyä
coo jaduhñ wyiinmúügät. Mänit
jaaya'ay miänaañ:

—Tsøc huuc híjxäm pø minaambä
Elías, pø yajmānacāañäbä Jesús
cruzcøxp.

³⁷ Mänitä Jesús møc yáaxcumbä.
Mänit yho'nä. ³⁸ Tuunä ja'a
Jesús jaduhñ ñä'ä ho'cy, mänitä
tsajtøjc-hadøødiujt cujjiä
quiøø'tswa'xy. Quiuhduum
chohñdaacy, høxtä yhøxhaam
jaduhñ yhagøødsøøyy. ³⁹ Jimä
capitán ja'a Jesús hänäjty tu'ug
wyiindäna'ay. Coø yhiixy coo ja'a
Jesús hänäjty tøø yho'ogy, mänit
miänaañ:

—Tøyhajt yø'øduhñ hijty
Dyioshuungä.

⁴⁰ Jimä tadjäya'ayhajxy hänäjty
näje'e miähee'pna'ay jäguemjuøøby.
Jimä María hänäjtypä, ja'a hänäjty
jim tsohmä Magdala, møødä
Salomé. Ja'a María, ja'a Santiago
møødä José tja, jim hänäjty je'ebä.
Ja'a muutspä Santiago jaduhñ
ñänøømby. ⁴¹ Hädaa tadjäya'ayhajxy,
quipxiä Jesús hajxy hänäjty tøø
piawädity jim Galilea. Tøø hajxy
hänäjty piuhbety mänaa hänäjty
jim tøø yhitiän. Y coo ja'a Jesús
jaduhñ piejnä Jerusalén, quipxy
hajxy piabejty, näguipxy møødä
wiingjäya'ayhajxy nämay.

⁴²⁻⁴³ Ja'a viernes hänäjty
tsuujøøby. Ja'a poo'xxiøø hänäjty
tsohñda'agaamb, ja'a pascuaxøø.
Ñähix yhahixøöbiä judíoshajxy
hänäjty ja'a pascuaxøøgøxpä.
Jimä jäya'ay hänäjty tu'ug choon
Arimatea. José hänäjty xiøhaty.
Jim hänäjty miøjtunngmøødä
tsajtøgooty. Jaančh tehñ
yhojiäya'ayä José hänäjty.
Jiøbhixyp hänäjty jaduhñ coo
ja'a Dios ja'a møcmäjaa hänäjty

yajcähxø'oga'añ. Mänitä José ja'a Pilato ja'a Jesús ñaaxni'x hoy miäyujwaanä. Hix, cabä José ja'a Pilato hänajty chähgø'ø. ⁴⁴Cahnä Pilato hänajty miädoyhatyñä coo ja'a Jesús hänajty tøø yho'nä. Yagjuøøyy je'eduhñ coo ja'a Jesús paquiä yho'cy. Mänitä Pilato ja'a capitán miøjyaaxy. Mänit miäyajtøøyy mäduhnajtä ja'a Jesús yho'cy. ⁴⁵Coo ja'a Pilato jaduhñ yhawáañäxä coo ja'a Jesús hänajty tøø jiaančh ho'ogy, mänit miánaañ coo ja'a José ja'a ho'ogyjiäya'ay ween yajmänacy cruzcøxp. ⁴⁶Mänitä José sábanä hoy jiuu. Mänitä Jesús hoy yajmänacy cruzcøxp. Mänit ñähbijty ñähmojch sábanahaam. Mänit hoy yajnaaxtägø'øyy tsaajutjooty. Mänitä tsaajut ja'a tsaahajxy yaghadäguejtägooyy. ⁴⁷Jimä Maríahajxy hänajty miähee'pna'ay, møødä Magdala-tsohmä, møødä José tijaj.

16 Coo ja'a poo'xxiøø hänajty tøø ñajxnä, mänitä María perfume hajxy hoy jiuu, møødä Magdala-tsohmä, møødä Santiago tijaj, møødä Salomé. Ja'a Jesús ja'a perfume hajxy hänajty yajnahjaaxaamby. ²Cujaboom jopy ja'a Maríahajxy jim ñøcxy maa ja'a Jesús hänajty tøø ñaaxtägø'øyan. Näxøø hänajty je'e. Tøø ja'a xøø hänajty piädsøømnä. ³Tu'haamnøcxpä hajxy tiägøøyy niñämäyyäbä:

—Pønä tsaahäyaa hadäguejtú'udäp.

⁴Tehñ miejtsp hajxy hänajty jim, mänitä tsaajut hajxy yhiixy coo hänajty yhawa'adsän. Tøø

hänä'cä tsaahänajty yagjua'ačh, hoyy tsaahänajty jia cruundä. ⁵Coo hajxy jiiby chaajuttägøøyy, mänitä muutsc-hänä'c hajxy tu'ug yhiixy. Jiiby hänajty yhäña'ay hahooyhaamby. Yomybioobwit hänajty miøød. Coo ja'a Maríahajxy jaduhñ yhiixy, mänit hajxy chähgøøyy. ⁶Mänit hajxy ñämaayyä:

—Ca'a hajxy mdsähgø'øyy. Ja'a Jesús hajxy mhøxtaaby, ja'a jim tsohmä Nazaret, ja'a tøø miøjpahbedyijäbä cruzcøxp. Tøø jiuypijøjtägach. Tøø yaa chohñnä. Huuc tehñ yhiix hajxy, cab je'e yaajän maa je'e piädaacän. ⁷Nøcx ja'a jiamiøød hajxy hawaanä. Møødä Pedro, mhawáañäp je'ebä. Jaduhñ hajxy mhawáañät cooc jim ñøcxa'añ Galilea. Jimäc hajxy nøcxy piaady, neby hajxy hijty tøø yajmøødmädia'agyijän —nømä muutsc-hänä'c miánaañ.

⁸Päyø'øguiä Maríahajxy jiuupädsøømy. Tsähgøøyyäp tsäyüuyyap hajxy piädsøømy. Cab hajxy jaduhñ pøn ñäl'ägädä hawaanä. Hix, jaančh tehñ chähgøøby hajxy hänajty.

⁹Näxøø jopy ja'a Jesús jiuypijøjtägajch. Mänitä María jayøjp yhiixtsohñnä, ja'a hänajty jim tsohmä Magdala, ja'a møjcu'u juxtujc-hooc yajnahwäätsäbä. Ja'a Jesús jaduhñ mäyajnähwaats.

¹⁰Mänitä María ja'a Jesús jiamiøød hoy jia hawaanä. Wi'i jioøby wi'i xiuu'tsp ja'a Jesús jiamiøødhajxy hänajty. ¹¹Hoy hajxy jia nämaayyä coogä Jesús hänajty tøø jiuypioøcy, møød coogä María hänajty tøø yhiixy hajujcy, cab hajxy ñäl'ägä mäböjcy.

¹²Cujecy, jimä Jesús ja'a jiamiøødhajxy hñajty nämetsc ñöcxy camjooty. Mänitä Jesús ñäguehxtøø'xy maa wyiinduuhajxiän. ¹³Mänitä jiamiøød hajxy hoy jia hawáañäbä. Ni je'e ja'a miädia'agyhajxy jaduhñ quia'a mäbøjcäxä.

¹⁴Cujequiä Jesús jiamiøødhajxy hñajty quiai, ja'a hajxy hñajty nämajtu'ugpä. Mänitä Jesús jimä ñäguehxtøø'xcumbä maa hajxy hñajty quiayyän. Mänit hajxy jaduhñ ñämaayyä:

—Tii mijtsä miädia'agy hajxy coo tøø mga'a mäbøjcä, ja'a mijts tøø xjia hawáañäbä cóogøch hajxy tøø xyhixy hajujcy, cóogøch tøø njujypiøjtägach. ¹⁵Nøcx hädaa mädia'agy hajxy yajwa'x wiinduhmyhagajpt. Jaduhñä jäya'ay hajxy nägøxiä myajwiingapxø'owät neby hajxy ñähwá'adsät. ¹⁶Pønjaty jaduhñ mäbøjp, pønjaty jaduhñ näbejp, je'edshajxy jaduhñ nähwa'adsaamb. Pero pønjaty jaduhñ ca'a mäbøjp, haxøøgtuum hajxy je'e miähmø'owa'añ.

¹⁷Pønjaty jaduhñ mäbøjp, hijxtahñd hajxy yajcähxø'øgaamby hoy-yagjuøøñäbä. Ja'a høøchcøxpä, jaduhñä pa'amjäya'ay hajxy yajnähwá'adsät, ja'a hajxy møjcu'umøødpä. Wiinghayuuc hajxy miädia'agáannäp. ¹⁸Hoyyä tsahñdy hajxy tiehm wyidsø'øgät, cab hajxy nej tiunøøjät. Hoyyä veneno hajxy tiehm yhú'ugät, ni jaduhñ hajxy nej quia'a jádät. Y coo ja'a pa'amjäya'ay hajxy quiø'ønähgábät, naxäbä pia'amhajxy.

¹⁹Coo ja'a Jesús ja'a jiamiøødtøjc miøødmädiaacpädøøyy, ja'a hajxy nWiindsønähjtämbä, mänit ñöcxnä tsajpootyp. Mänit hoy yhøxta'agy maa ja'a Tieediä yhahooyhaampiän. ²⁰Mänitä jiamiøødhajxy jiaanch tu'ubøjcy. Mänitä mädia'agy hajxy hoy yajwa'xy wiinduhmyhagajpt. Piuhbejpiä Jesús ja'a jiamiøødtøjc hñajty. Majaty hajxy hñajty wiädity, yajcähxø'piä hijxtahñd hajxy hñajty hoy-yagjuøøñäjaty. Jaduhñ hñajty yajnajuø'øy coo hajxy hñajty tiømiädia'agy. Amén.

San Lucas

1 ¹⁻⁴Mägu'ughajpä Teófilo, miichcøxpøch hädaa nocy nhädiuñ nej miich ja'a tøyhajt jaduhñ mmøødhädät ja'a Jesucristocøxpä, nej jiajty nej yhabejty, nej ñibianøcxyii. Pedyíjøch jaduhñ tøø nhabøcy. Jaduhñ miich tøø mmädoyhajpä. Nämäy jäya'ay ja'a nocy capxy hajxy tøø yajpäðø'ogy ja'a Jesucristocøxpä. Ja'a Diosmädia'agy-yajwa'xpähajxy, je'eds hajxy jaduhñ tøø xyajmäðoyhajtäm. Yhamdsoo wiinhaam hajxy tiehm yhiijxy.

⁵Coo ja'a Herodes hänajty jim guiobiernähaty Judeanaaxooty, jimä jäya'ay hänajty tu'ug xiøhaty Zacarías. Teedy ja'a Zacarías hänajty tiuumby maa ja'a judíos ja'a quiuhdujthajxy hänajty myiñän. Ja'a Abías ja'a quiuhdujt hänajty yajtúunäxäp neby hänajty jecy tøø yhane'emiän. Ja'a Zacarías ja'a tio'oxiøjc, Elisabet hänajty xiøhaty. Ja'a Aarón yhap yhoc ja'a Elisabet jaduhñ. ⁶Pedyii ja'a Zacaríashajxy hänajty quiuidiuñ ja'a Diosmädia'agy. Hoy hajxy hänajty yajtuñ nebiä Dios choquiän. ⁷Pero cabä yhuunghajxy hänajty nitu'ugtä. Cahnä Elisabet hänajty ñä'ägädä

huungpaadyñä. Tøøds hajxy hänajty miäjaanä.

⁸Tu'ugxøøbä, jiibiä Zacarías hänajty tiuñ møjtsajtøgooty. ⁹Mänitä piaatä coo ja'a poom jiiby jiögät maa ja'a poomjojtaactän, jim Dioswiinduum. Jaduhñä teedyhajxy hänajty quiuhdujthaty. ¹⁰Mänit yhabaaty coo ja'a Zacarías ja'a poom hänajty jiiby jioga'añ. Mänitä cu'ughajxy yhamugøøyy møjtsajtøghaguuy. Mänit hajxy tiägøøyy Diospa'yaaxpä. ¹¹Jimä Zacarías hänajty piomjocy, mänitä Dios mioonsä tu'ug ñäguehxtøø'xy hahooyhaamby maa ja'a poom hänajty jioquiän. Jim hänajty tøø chooñ Dioswiinduum. ¹²Coo ja'a Zacarías jaduhñ yhiijxy, mänit chähgøøyy. Cabä wiinmahñdy piaaty nej jiatcø'øwät. ¹³Mänit ñämaayyä:

—Zacarías, ca'a mdsähgø'oy. Tøø ja'a Dios miädoy nej tøø mmägäpxiän coo huung xmió'owät. Huungpaadaamb ja'a mdo'oxiøjc jaduhñ. Juan ja'a mhuung myajxøhätät. ¹⁴Mxoonda'agaamb miich jaduhñ ja'a mhuungcøxpä. Nämäy ja'a jäya'ayhajxy jaduhñ xioonnda'agaambä coo mhuung myínät miédsät. ¹⁵Cumay ja'a

mhuung piädsõma'añ ja'a Dioscõxpä. Miøðdhadaambiä Dioshespíritu; jaduñ miámín miäga'awa'añ. Cabä jocnø yhu'uga'añ ni ja'a vino. ¹⁶⁻¹⁷Jaduhñdsä cuhdujt miøðhada'añ nebiä Elías jecy miøðhajtjän. Ja'a Diosmädia'agy jaduhñ yajwa'xaamby. Mänitä judíos ja'a Dios hajxy jiahmiejstaactägatsa'añ jadähooc. Jaduhñä Juan yajwiingapxø'øwa'añ coo ja'a yhuung hajxy quia'a møødnimiädsiphájtänät, y coods hajxy miäbøjnät ja'a hoguiapxy ja'a homiädia'agy pøn yhamdsoo cuhdujt ja wi'i yajtunaamb. Coo hajxy jaduhñ quiudiúnät, mänitä Dios jaduhñ quiuhbøga'añ.

¹⁸Mänitä Zacarías miänaañ: —Nébiøch ja'a tøyhajt jaduhñ nmøødhädät cooçh nhuung myina'añ. Tøø højts nmäjaanä møødhøch ndo'oxiøjc.

¹⁹Mänitä Dios mioonsä yhadsooyy: —Gabriélhøch nxøhaty. Jímhøch ndsoñ Dioswiinduum. Je'eçh tøø xquiexy cooçh miich min nhawaanä coo ja'a mhuung jaduhñ myina'añ. ²⁰Cooçh miich ja'a nmädia'agy tøø xquia'a mäbøjcä, huum miich mmähmø'øwa'añ. Høxtä coonä ja'a mhuung myínät, mänit mgapxø'øga'añ. Tøjiadaamb jaduhñ nébiøch cham nmädia'aguiän.

²¹Jimä cu'ug ja'a Zacarías hajxy hänajty jia wi'i yhahixy mõjtsajtøghaguuy. Yagjuøøby hajxy hänajty coo ja'a Zacarías jiiby wyl'i jiecyc tsajtøgooty. ²²Coo ja'a Zacarías tøjpadsoømnä, tøø hänajty jiaançh huuy. Mänitä

cu'ughajxy ñajuøøyy coo ja'a Zacarías ja'a tsø'ty hänajty tøø yhixy. Hix, cø'øhaam yajnähixøøñä.

²³Hoorä, coo ja'a Zacarías yaghabejty mäduhñtiä hänajty tiuna'añ tsajtøgooty, mänit ñøcxnä maa ja'a quiajptän. ²⁴Mänitä tio'oxiøjc jiaançh mähmøøyy maaxhuungmøød. Jiiby ñä'ägä mähmøøyy tøgooty mägooxpø'o. Caj ñä'ägä tøjpadsoømnä. Jaduhñ hänajty wyl'i miädiaacta'agy quiopcooty: ²⁵“Páadyhøch ja'a Dios jaduhñ tøø xñäxuuch nébiøch ja'a cu'ughajxy jaduhñ xquia'a péjxnät.”

²⁶Tädujpo'o ja'a Elisabet hänajty tøø yhity maaxhuungmøød, mänitä Dios ja'a Gabriel quiejxcumbä. Jimä Gabriel quiejxä maa ja'a cajpt xiøhatiän Nazaret jim Galileanaaxooty. ²⁷Ja'a María jaduhñ yajnäguejxä. Cäxyihajpnä hänajty je'enä. Tøø hänajty tiødiägø'øyy coo ja'a José hänajty piøga'añ. Jue'e ja'a José, David yhap yhoc je'e, ja'a hijty jegyhajty gobiernätuumbä. ²⁸Mänitä Gabriel tiøjtägøøyy maa ja'a María hänajtjän. Mänitä María ñämaayyä: —Diøshøch tøø xquiexy cooçh miich jaduhñ nmägápxät. Miichcõxpä ja'a Dios ja'a mayhajt tiuna'añ. Xmiøðdhijp miich ja'a Dios. Maas hoy miich ja'a Dios xyhixy quejee ja'a mmädo'oxiøjc-hajxy.

²⁹Cabä María hänajty ñajuø'øyy tii jaduhñ coo tøø ñäma'ayii ja'a Dioscõxpä. Tsähgøøyy jaduhñ siémpräm. ³⁰Mänitä ñämáayyägumbä:

—María, ca'a mdsähgø'øyy. Møj ja'a Dios ja'a mayhajt tiuna'añ ja'a

miičhcøxpä. ³¹Mhuungpaadaamb miičh jaduħn. Jesús ja'a mhuung myajxøhata'añ. ³²Møj jaančh jaduħn yhida'añ. Høxcabáanáp jaduħn coo Dyioshuungä. Dios jaduħn päda'agaamb gobiernä nebiä David jecy tiuunän, ja'a Jesús yhap tieedy. ³³Paady jaduħn piäda'aga'añii gobiernä nebiä judíoshajxy yhané'emät cøjxta'axiøø. Nimänaa jaduħn quia'a haneħmbädø'owa'añ.

³⁴Mänitä María yajtøoyy:
—Nébiøch jaduħn nnä'a huungpáadät; cáhnøch ya'adiøjc nhixyhatyñä.

³⁵Mänitä Gabriel yhadsooyy:
—Minaambä Dioshespíritu xyhuungmo'owa'añ. Dioshuung jaduħn minaamb ca'awaamb. Cabä pojpä cädieey mänaa tiuna'añ. ³⁶Y miičh mhocmaam, ja'a Elisabet, jaduħn je'e miaaxhuungpaadaambä, hoy jaduħn jia majjä jia petiä. Tädujpo'ohájnap je'e. Cábäc tyjy hijty miaaxhuungpaada'añ; jaduħnä cu'ughajxy hijty miäna'añ. ³⁷Pero cabä Dios tii tsip ñä'ägä juø'oy. Hotyijjä jaduħn tiuna'añ.

³⁸Mänitä María miänaañ:
—Wéenhøch ja'a Dios jaduħn xñä'ägä moonsähaty. Wéenhøch jaduħn njaty nébiøch tøø xñäma'ayän.

Mänitä Gabriel wyiimbijnä.

³⁹⁻⁴⁰Mänitiä ja'a María ñøcxy maa ja'a Elisabethajxiän. Judeanaaxooty hajxy hänajty chäna'ay tunjooty. Mänitä María tiøjtägøoyy. ⁴¹Mänitä Elisabet yajpoo'xä. Mänitä maaxhuung jiiby yu'xy Elisabet jioodoo. Mänitä

Elisabet ja'a Dioshespíritu ñámejtsä.

⁴²Mänitä Elisabet møc yaaxy:

—Maas hoy miičh ja'a Dios xyhixy quejee ja'a mmädo'oxiøjc-hajxy.

Jaduħn miičh mhuung xyhixáanabä. ⁴³Ja'a miičh mhuung, nwiindsønhadáambiøch je'e.

Nyagjuøbiøch jaduħn cooçh miičh xwyiingudsähgø'oy.

⁴⁴Túunøch miičh xñä'a yajpoo'xy, mänitiøch nhuung yaaby jiaančh tehñ yu'xy njoodótyhøch. Jootcujc jaduħn ñijiäwø'oyii, paady yu'xy.

⁴⁵Tøjiadaamb jaduħn nej miičh ja'a Dios tøø xñäma'ayän. Coo jaduħn mmäbøcy, jootcujc mhida'añ — nõmä Elisabet ja'a María ñämaayy.

⁴⁶Mänitä María miänaañ:

Tøyhajtä Dios miøjjä jiaančhä.

⁴⁷Jootcujc-høch nñijiäwø'oyii cooçh je'e xyhixy.

⁴⁸Xjiahmiéjtspøch jaduħn, hóyhøch nja häyoy.

Jootcujc-høch ja'a jäya'ayhajxy xñä'ägä nänømaannä,

⁴⁹je'eguiøxpä cooçh ja'a Dios tøø xyhuungmo'oy.

Møj jaančh ja'a Dios.

⁵⁰Pønjaty ja'a Dios jaduħn wiingudsähgøøby,

Dios jaduħn näxuudsaaamb cøjxta'axiøø.

⁵¹Tøø ja'a Dios ja'a miäjaa yajcähxø'ogy;

tøø hajxy quia'a mäjäda'agy, ja'a hajxy hijty yajcumayaambä.

⁵²Tøø ja'a gobiernä quihdujthajxy piøjcäxä, tøø ja'a häyooobäjäya'ayhajxy miøjtägø'oy.

⁵³Tøø ja'a häyooobäjäya'ayhajxy cøxiä wiinä mio'oyii;

cabä mäyøøjäya'ayhajxy tii tøø
piaady.
⁵⁴ Piuhejt ja'a Dios ja'a
judíoshajxy.
 Cøjxta'axiøø ñäxuučh pia'häyoy,
⁵⁵ nebiä Abrahamhajxy jecy
ñämaayyän,
 ja'a nhaphájtäm ja'a
ndeedyhájtäm.
⁵⁶ Tägøøgp'o ja'a María jim jiaac
hijty maa ja'a Elisabetän. Mänit
yhädaacnä maa ja'a quiajptän.
⁵⁷ Mänitä Elisabet
miaaxhuungpaatnä; ya'ayhäna'c
jaduhñ miingahw. ⁵⁸ Mänitä
Elisabet hoy quiuhixyíijäm ja'a
jiujy ja'a miägu'ughajxy møødä
miädøjc-hajxy. Mänit hajxy
nägøxiä xioondaacy coo Dios
ja'a mayhajt jaduhñ tøø tiuñ.
⁵⁹ Cuductujxøø ja'a pigäna'c
hajxy hoy yajcircuncidarhadyii
nebiä judíoshajxy hänajty
quihdujthatiän. Mänit hajxy jia
yajxøhataañ Zacarías nebiä tieedy
hänajty xiøhatiän. ⁶⁰ Mänitä tiaj
miänaañ:
 —Cábøch jaduhñ nyajxøhata'añ.
 Juánhøch jaduhñ nyajxøhata'añ.
⁶¹ Mänitä Elisabet ñämaayyä:
 —Tii jaduhñ coo myajxøhata'añ.
 Caj pøn jaduhñ xiøhaty maa miich
mjujy maa miich mmägu'ugän.
⁶² Mänitä Zacarías miäyajtøøwä
cø'øhaam nebiä yhuung xiøhátät.
⁶³ Mänitä pu'uyhuung ñädsiiwøøyy
coo mio'owøøjät. Mänit yuugjahy
pu'uguiøxp: “Juan xiøhata'añ.”
 Mänit hajxy nägøxiä yagjuøøyy.
⁶⁴ Mänitä Zacarías quiapxø'nä.
 Mänitä Dios Dioscujú'uyäp
miooyy. ⁶⁵ Jaančh tehñ yagjuøøyy
ja'a cu'ughajxy jaduhñ. Mänitä

mädia'agy tiägøøyy wädijpä
jim Judeanaaxooty jim tunjooty
nebiaty ja'a Zacarías tøø jiaty.
⁶⁶ Coø ja'a jäya'ayhajxy nägøxiä
miädoyhajty, mänit hajxy tiägøøyy
najuøødiaacpä. Mänit hajxy
miänaañ:
 —Pätiidä yø'ø pigäna'c tiunaamby
coo hänajty tøø yeegy.
 Tøyhajtä Dios hänajty
piuhbeda'añ.
⁶⁷ Mänitä Zacarías ñämejtsä ja'a
Dioshespíritu. Mänitä Zacarías
jømädiaacnajxy neby hänajty tøø
miøødmädia'agyijän ja'a Diósäm:
⁶⁸ Møj jaančh ja'a Dios;
 paady jaduhñ tøø quiäda'agy
coo højts xyajñähwa'ads
xyajcuhwa'adsaanäm, højts
judíoshájtäm.
⁶⁹ Tøø højts ja'a yajnähwaatspä
yajcuhwaatspä
xyajnäguéjxäm;
 je'edsä møjcuहुdujt jaduhñ møød;
 ja'a David yhap yhoc je'e.
⁷⁰⁻⁷³ Jaduhñä Dios jecy miänaañ
coo højts xyajñähwa'ads
xyajcuhwa'adsaanäm højts
nmädsiphájtäm.
 Jaanä jaduhñ miänaambä coo
xñäxuuds xpia'häyowáanäm.
 Yajtøjiadaamby jaduhñ
nebiä Abrahamhajxy jecy
miøødyajcuhdujquiän,
 ja'a nhap ja'a ndeedyhajtämhajxy.
 Ja'a Diosquexyhajxy jaduhñ
jømädiaacnajx.
⁷⁴ Coø ja'a Dios hajxy jaduhñ
xñäwáanäm maa ja'a
nmädsiphajtämhajxiän,
 paady hajxy nga'a
tsähgøøyyänä. Hoyyä Dios
hajxy nbanøcxämät.

- ⁷⁵ Hawa'adstuum hajxy
xyaghidáa_nám cøjxta'axiøø.
- ⁷⁶ Huung, miičh nnámaaby coo
Diosmädia'agy-yajwa'xpä
mwädita'añ.
- ⁷⁷ Myajwiingapxø'owaamby ja'a
Dios quiu'ughajxy neby
hajxy jadu_hn ñähwa'ads
quihwá'adsät.
Coo ja'a Dios ja'a piojpä
quiädieey hajxy
yajmøødmädiá'agät,
mänit hajxy yajñähwa'ads
yajcuhwa'adsóøjät.
- ⁷⁸ Xñäxúu'tsäm ja'a Dios hajxy
jadu_hn,
paadiä yajñähwaatspä
yajcuhwaatspä quiejxy.
- ⁷⁹ Xpiädáacäm hajxy
hawa'adstuum,
xmióoyyäm ja'a hoyhajt ja'a
weenhajt hajxy,
nømä Zacarías miänaañ.
- ⁸⁰ Hoorä, yee'c møjjøøyy ja'a
Juan jadu_hn. Wiinmahñdymejts
jadu_hn. Ñajuøøyy jadu_hn mädyii
hoy mädyii mäbaad. Miøødhajt
ja'a Dioshespíritu jadu_hn. Coo
miøjjøøyy, mänit tiägøøyy wädijpä
hanidiuh_mduum. Jim yhiyty høxtä
coonä tiägøøyy Diosmädia'agy-yaj
wa'xpä.
- 2** Coo ja'a xøø jomøjt yhabaaty,
mänitä gobiernä Augusto
yhaneh_my coo ja'a jäya'ayhajxy
ween nøcxy nägøxiä ñiguiujaayii
maa ja'a yhamdsoo cajpthajxiän,
ja'a hajxy wiinduh_myhagajtpä.
²Ja'a Augusto jadu_hn
haneh_mdsoh_n; cahnä pø_n hänajty
jadu_hn yhane'emyñä. Ja'a Cirenio,
je'e hänajty jim tuumb gobernador
Sirianaaxooty. ³Mänitä jäya'ayhajxy

nägøxiä jiaančh cudiuuñ nebiä
Augusto hänajty tøø yhane'emiän.
⁴⁻⁵Jue'e ja'a José hänajty, ja'a
David yhap yhoc hänajty je'e. Belén
ja'a cajpt hänajty xiøhaty maa
ja'a David hänajty tøø myiñ tøø
quia'ayän, jim Judeanaaxooty.
Coo ja'a David hänajty jim tøø
myiñ tøø quia'ay, paadiä Joséhajxy
hänajty jim nøcxy ñiguiujaaya'añii
møødä María. Tøø hänajty
tiødiägøøñä coo hajxy hänajty
piøgaanä. Maaxhuungmøød ja'a
María hänajty. Galileanaaxooty
hajxy hänajty tøø cho_hnda'agy
maa ja'a cajpt xiøhatiän Nazaret.
⁶Coo hajxy jim miejch Belén,
mänitä María miaaxhuungpaaty.
⁷Ja'a quiobhuung jadu_hn
miingahw. Mänitä María ñähbijty
ñähmojch. Mänit quiugo'ogøøyy
wajjøø'xøhñdyooty. Hi_x, cabä
mejtstaact hajxy hänajty maa
tøø ñä'ägädä paady jim cajptooty.
Paady hajxy jim ñä'a nøcxøøyy
tøjpa'c maa häna'c ja'a waj hajxy
hänajty yajtäna'ayän.

⁸Jim häna'c-hajxy hänajty näje'e
mieegcueendähaty cajtpa'a.
Coods hänajty je'e. ⁹Mänitä
Dios ja'a cujajpä cudøø'xpä
yajcähxø'cy maa hajxy hänajty
mieegcueendähatiän. Mänitä
Diosmoonsä tu'ug ñäguehxtøø'xy
maa wyiinduuhajxiän; jim
hänajty tøø choon tsajpootyp.
Mänit hajxy chähgøøyy. ¹⁰⁻¹¹Mänit
hajxy ñamaayyä:
—Ca'a hajxy mdsähgøø'y.
Naamnä ja'a Cristo tøø myiñ tøø
quia'ay jim Belén. Mijts jadu_hn
xyajñähwa'ads xyajcuhwa'adsaamb.
MWiindsønhadaamby hajxy jadu_hn.

Páadyhøch nhawáañäm nebiä jäya'ayhajxy nägøxiä xioondá'agät.

¹²Coo ja'a pigäna'c hajxy jaduñ mbáadät nähbity nähmoch wajjøø'xøhñdyjooty, jaduñ hajxy mnajuø'owät coo hänajty jie'ejä.

¹³Mänitä Diosmoonsähajxy nämay jiaac näguehxtø'xy; haagä jim hajxy hänajty tøø choon tsajpootyp. Mänit hajxy miánaaŋ:

¹⁴Møj jaanč ja'a Dios; tsajpootyp jaduñ yhity.

Jootcujc ja'a jäya'ayhajxy yaa yhida'añ hädaa yaabä naaxwiin pønjaty ja'a Dios quiumaaby.

¹⁵Mänitä Diosmoonsä hajxy wyiimbijnä, ñøcxnä hajxy tsajpootyp. Mänitä meegcueendähajpähajxy ñiñämaayyä:

—Jam hajxy híjxäm Belén nebiä Diosmoonsä hajxy tøø xyhawáañäm.

¹⁶Päyø'øguiä hajxy tiu'ubøjcy. Mänitä Jesucristo hajxy hoy jiaanč paady møødä María møødä José. Jiibiä Jesucristo hänajty quio'na'ay nähbity nähmoch wajjøø'xøhñdyjooty. ¹⁷Mänitä mädia'agy hajxy hoy yajwa'xy nebiaty hajxy hänajty tøø yhixy tøø miädooy ja'a Jesucristocøxpä. ¹⁸Ja'a jäya'ayhajxy jaac mädoyhájtäbä, yagjuøøyy hajxy jaduñ. ¹⁹Pero cabä María jaduñ yagjuøøyy. Tøø hänajty miøødmädia'agyii coo jaduñ jiada'añ yhabeta'añ. Jiiby quiopcooty miädiaactaacy. Caj pøn yajmøødmädiaacy. ²⁰Haa ja'a meegcueendähajpähajxy, mänit hajxy wyiimbijnä, ñøcxnä hajxy. Mänitä Dios ja'a Dioscujú'uyäp hajxy miooy coo hajxy tøø yhixy

tøø miädooy nebiaty hajxy hänajty tøø miøødmädia'agyii.

²¹Cuductujxøø ja'a Jesús hajxy yajcircuncidarhajtä. Mänit hajxy yajxøbejty Jesús nebiä María hänajty tøø ñäma'ayii coo hänajty quia'a huungmo'oyiinä. Ja'a Diosmoonsä tsajpootypä hänajty hoy tøø ñäma'ay.

²²Coo ja'a xøø hänajty tøø yhabejnä, mänit hajxy hoy chi'iy nebiä ley myiñän, ja'a Moisés jecy quiujähyyäbä. Mänitä Jesús hajxy jiiby chehñhädäacy Jerusalén jim mõjtsajtøgooty. ²³Jaduñ jiiby myiñ maa ja'a Diosmädia'aguiän: “Ja'a coobhuung ya'ayhäna'cpähajxy, Diostuung hajxy tiunaamby.”

²⁴Mänitä paloma hajxy metsc vojxy nebiä jiiby myiñän cujaay maa ja'a Diosmädia'aguiän.

²⁵Jimä jäya'ay hänajty tu'ug chäna'ay Jerusalén; Simeón hänajty xiøhaty. Hojiäya'ay hänajty je'e. Hoyyä Dios hänajty wyiingudsähgø'øy. Miøød ja'a Dioshespíritu hänajty je'e. ²⁶Tøø hänajty miøødmädia'agyijäm ja'a Dioshespíritu coo hänajty quia'a tsoj ho'oga'añ høxtä coonä ja'a Cristo hänajty tøø yhamdsoo hixy, ja'a Dios hänajty quixaaambiä. ²⁷Mänitä Simeón ñämaayyä ja'a Dioshespíritu coo jim ñøcxät tsajtøgooty. Mänitä Jesús hoy jiiby piaady møødä tijahajxy. Cahnä hajxy hänajty wyiimbityñä. ²⁸⁻²⁹Mänitä Simeón ja'a Jesús chehñdsooyy. Mänitä Simeón miánaaŋ:

Diosteedy, Dioscujú'uyäp,
jootcújc-høch nhó'ogät,
je'eguiøxpä coo tøø
myajtøjiaty nébiøch hijty tøø
xmiøødmädia'aguiän.

³⁰ Hamdsóojoch tøø nhixy
ja'a yajnáhwaatspä, ja'a
yajjuhwaatspä,
³¹ ja'a miich tøø mguéxiäbä hädaa
yaabä naaxwiin.
³² Ja'a hajxy ca'a judíospä,
yajwiingapxø'owáanäp ja'a
hoguiapxy ja'a homiädia'agy
hajxy.
Ja'a judíoshajxy, cumayáanäp
hajxy je'e;
møj jaančh hajxy piäda'aga'añii.
³³ Mänitá Jesús tiajhajxy
yagjuøøyy coo yhuunghajxy hánajty
jaduhñ tøø nánøømäxä. ³⁴⁻³⁵ Mänit
hajxy nãmaayyá:
—Weenä Dios ja'a hoyhajt ja'a
weenhajt xmiø'oy.
Mänitá María nidiuhñ nãmaayyá:
—Näje'e ja'a judíoshajxy
yhida'añ tu'ugmädia'agy møød
miich mhuung. Piaadaamby ja'a
hoyhajt ja'a weenhajt hajxy je'e.
Pero nãmay hajxy jaduhñ quia'a
møødhida'añ tu'ugmädia'agy.
Ñähwaambedaamby hajxy je'e.
Tu'udägoyyaamb hajxy jaduhñ.
Cähxø'øgaambä wyiinmahñdyhajxy
jaduhñ neby hajxy tiajy miay.
³⁶⁻³⁷ Jiibiä yaamgto'oxy
hánajty tu'ug tsajtøgooty; Ana
hánajty xiøhaty. Fanuel ja'a
tieedy hánajty tøø xiøhaty. Aser
ja'a yhap ja'a tieedy jegyhajty
xiøhaty. Juxtujcjomøjt ja'a ñihyhap
hánajty tøø miøødtsána'ay.
Mänitá ñihyhap yho'ná. Mänitáts
hánajty tøø jiaac jugyhaty
mädaaxc-hii'xcumädaaxcjomøjt
nidiuhñ. Tøø hánajty miäjaaná.
Ja'a Diosmädia'agy hánajty
yajwa'xyp. Jiiby hánajty nã'ägä
tuñ tsajtøgooty. Xøømdsuhñ ja'a

Dios hánajty wyiingudsähgø'oy.
Hayuu hánajty yhity tähoocjaty
nebiä Diosmädia'agy jaduhñ maas
hoy wyiinjuø'owät. ³⁸ Coo ja'a Ana
jaduhñ miädooyy nebiä Simeón
ja'a Jesús nánøømiän, mänitá Dios
miooyy Dioscujú'uyäp. Mänitá
mädia'agy tiägøøyy yajwa'xpä
jim Jerusalem coo ja'a Cristo tøø
quiäda'agy. Nägøxiä jäya'ayhajxy
miädoyhajty, ja'a Cristo hajxy
hánajty yhahixypä.

³⁹ Coo ja'a Maríahajxy hánajty
tøø quiudiuñ nebiä Diosley myiñän,
mänit hajxy wyiimbijnä, yhädaacnä
hajxy Nazaret jiiby Galileanaaxooty,
maa hajxy hánajty tøø choonän.
⁴⁰ Yee'c møjjøøyy ja'a Jesús jaduhñ.
Wiinmahñdymejts jaduhñ. Dios
jaduhñ mooyy ja'a hoyhajt ja'a
weenhajt.

⁴¹ Wiingujomøjt ja'a judíos
ja'a xøø hajxy hánajty yagjadyii
jim Jerusalem mänaabä ja'a
meeghuung hajxy hánajty yoxiän.
⁴² Coo ja'a Jesús majmetscjomøjt
yaghabejty, mänitá Maríahajxy
ñøcxy xøøhajpä Jerusalem møødä
Jesús, nebiä cuhdujt hajxy
hánajty miøødän. ⁴³ Coo ja'a xøø
hánajty tøø miaañä, mänit hajxy
wyiimbijnä. Pero ja'a Jesús, jim je'e
miähmøøyy Jerusalem nidiuhñ.
Cabä tiajhajxy hánajty ñajuø'oy pø
tøø miähmø'oy. ⁴⁴ Jaduhñ hajxy
hánajty miäna'añ cooc tyijy hajxy
hánajty jim piamánaqyii møødä
miägu'ughajpähajxy. Tu'xøø ja'a
Maríahajxy hánajty tøø tiu'uyo'oy,
mänitá Jesús hajxy yhixpaaty
coo hánajty jim quia'a pamánacy
høxhaam. Mänit hajxy jia høxtaayy
maa ja'a jiuuy ja'a miägu'ughajxiän.

⁴⁵ Coo hajxy quia'a paaty, mänit hajxy wyiimbíjcumbä. Mänit hajxy ñocxtägajch Jerusalén jadähooc.

⁴⁶ Jimä Jesús hajxy jiaančh paaty tsajtögooty. Miädägøøgxøøbä hänajty jim tøø yhity. Jiiby hänajty yhäña'ay maa ja'a ley-yajnähixøøbiädøjc-hajxiän, ja'a hajxy jiiby tsajtögootypä. Jiibiä capxy mädia'agy hänajty miämädoona'ay. Cøxiä wiinä hänajty yajtøø. ⁴⁷ Jaduhñ hänajty yhadsoy nebiä jajpän, nebiä tøøbä quiapxtá'aguiäbän. Yagjuøøby hajxy hänajty, ja'a hajxy hänajty jiiby häñaabiä tsajtögooty. ⁴⁸ Coo ja'a Jesús jaduhñ piaatä ja'a tiajhajxy, mänit hajxy yagjuøøyy. Mänitä tiaj miänaañ:

—Huung, tii højts jaduhñ coo tøø xyhäyoowhixy coo tøø mmähmø'øy. Jiiby højts miich nja wi'i yhøxta'ay.

⁴⁹ Mänitä Jesús yhadsooyy:

—Tiich mijts coo xyhøxta'ay. Nej, cab hajxy mnajuø'øyä coočh tsipcøxp nduna'añ maačh nDeedy tiøjcänä. Haa ca'a, Dióshøch jaduhñ nDeedyhajpiä.

⁵⁰ Pero cabä tiajhajxy wyiinjuøøyy tii jaduhñ coo tøø miäna'añ.

⁵¹ Mänitä Jesús jiaančh padu'ubøjnä, piahädaacy jiiby Nazaret. Hix, jiaac mabøjcäp ja'a tiaj miädia'agyhajxy hänajty. Y ja'a María, jiiby hänajty yajnøcxy yagjuø'øy quiopcooty nebiä yhuung hänajty tøø xyi'igy tøø miädia'agy jiiby tsajtögooty.

⁵² Yee'c-habejt ja'a Jesús jaduhñ; jaac wiinmahñdymejts jaduhñ. Quiumaayy ja'a Dios jaduhñ møøädä tsaan møøädä cu'ug.

3 ¹⁻² Coo ja'a Juan hänajty tøø miøjjøøñä, ja'a Zacarías yhuung, mänit miägäpxä ja'a Diósäm. Mänit tiägøøyy wädijpä haniduihmduum. Majmocxjomøjt ja'a Tiberio hänajty tøø guiobiernähaty. Ja'a Poncio Pilato hänajty tuumb gobernador Judeanaaxooty. Ja'a Herodes hänajty tuumb gobernador Galileanaaxooty. Ja'a piuhya'ay Felipe hänajty tuumb gobernador Itureanaaxooty møøädä Traconitenaaxooty. Ja'a Lisanas hänajty tuumb gobernador Abilinianaaxooty. Ja'a Anás hänajty tuumb teedywiindsøn møøädä Caifás. ³ Mänitä Juan ñocxøøyy maa ja'a Jordánmøjnøø mäwiingonän. Jaduhñä tsaangu'ug hänajty yajwiingapxø'øy coo hajxy ñäbétät, coo ja'a yhaxøøgwiinmahñdy hajxy ñajtshixø'øwät, nebiä piojpä quiädieey hajxy jaduhñ ñähwá'adsät. ⁴⁻⁵ Tøjiajt jaduhñ nebiä Isaías ja'a Diosquexypä jecy jahyyän:

Jimä jäya'ay tu'ug yaaæwädity haniduihmduum:

“Najtshixø'øw ja'a mhaxøøgwiinmahñdy hajxy. Jaduhñ ja'a mWiindsøn hajxy hoy mhahíxät; jaduhñ hajxy hoy mwiingudsähgø'øwät.

⁶ Nägøxiä jäya'ayhajxy jaduhñ ñajuø'øwa'añ neby hajxy yajnähwa'adsøøjät ja'a Diósäm.”

⁷ Coo ja'a tsaangu'ughajxy hänajty yajnäbeta'añijäm ja'a Juángäm, jaduhñ hajxy hänajty näma'ayii:

—Haay mōjcu'u, caj mijts hoguiuhdujt mnä'ägä mōödä. Paady hajxy jaduñ mhuuc näbetaambä nebiä Dios hajxy jaduñ xquia'a yajcumädöwät, túhmäts. ⁸Hoy hajxy mwädítät neby jaduñ quiähxó'ogät coo ja'a mhaxøøgwiinmahñdy hajxy hānajty tøø mnajtshixøøñä. Y cab hajxy jaduñ mmäná'anät: “Abrahámhøch nhaphajt ndeedyhajt, páadyhøch ja'a Dios xquia'a yajcumädowa'añ.” Mänitä Dios hajxy xyajñähwá'adsät coo ja'a mhaxøøgwiinmahñdy hajxy mnajtshixó'owät; ca'a jie'eguiøxpä coo Abraham hajxy mhaphajty mdeedyhajt. ⁹Hoy hajxy mwädítät nebiä Dios hajxy jaduñ xquia'a pädá'agät haxøøgtuum. Pøn hoy ca'a wädiyp, jaduñ mäwíinäts je'le nebiä quepychaa ca'a tømhājpan. Piuxaamby hajxy je'le; mänit hajxy ño'oga'añ.

¹⁰Mänitä tsaangu'ughajxy miänaañ:

—Neby hōjts ndúnät coo hōjts hoy nwädítät.

¹¹Mänitä Juan yhadsooy:

—Pøn camiixy metsc mōød, ween tu'ug ñä'ä mo'oy pøn quiamiixy ca'a hijp. Jaanä jaduñduhmä, pøn jøø'xyøcy mōød, ween mio'oy pøn mähdiojc ca'a mōød —nømä Juan miänaañ.

¹²Näje'le ja'a yajñahuudiutpāhajxy miejtspä näbejpä. Mänitä Juan hajxy ñāmaayy:

—Wiindsón, hōjtsäts, neby hōjts jaduñ ndúnät.

¹³Mänitä Juan yhadsooy:

—Cab hajxy nä'ä tægø'øbä myagjuuñáxät.

¹⁴Jaanä jaduñhä policíahajxy näje'le yajtøøbä. Mänitä Juan yhadsooy:

—Cabä xädø'øñ pøn mbójcät nä'ä nagoobä. Y caj pøn mnähwaambédät nä'ä nagoobä. Mjootcädá'agäp ja'a mmājuhñdy hajxy.

¹⁵Ja'a tsaangu'ughajxy, jaduñ hajxy hānajty wyi'i yajtøy wyi'i yajtø'xy pø Cristo je'le ja'a Juan. Paady hajxy hānajty wyi'i yajtøy, coo ja'a Cristo hajxy hānajty yhahixy. ¹⁶Mänitä Juan yhadsooy:

—Nøøháamhøch mijts chaa nyajñäbety. Pero xiičhä jäya'ay tu'ug xjiaac pamiñ. Je'eds mijts mabøcy xmio'owaamb ja'a Dioshespíritu. Xyajñähwa'ads xyajcuhwa'adsaamb hajxy jaduñ. Maas møc cuhdujt jaaya'ay miøødä quejeech høøch. Cábøchä cuhdujt nnä'ägä mōødä ni weeñtiä maa jaaya'aguiøxpän. ¹⁷Pøn ja'a haxøøgwiinmahñdy jaduñ ca'a najtshixø'owaamb, haxøøgtuum piäda'aga'añii. Cøjxta'axiøø jiiby chaačhpøga'añ. Pero pønä homiädia'agy pawädiyp, cøjxta'axiøø hajxy jim yhida'añ tsajpootyp.

¹⁸Madiu'u ja'a Juan ja'a cu'ug hānajty yajwiinxiic yajwiingapxø'oy ja'a Diosmädia'agy. Møc hānajty jiaanč tehñ miädia'agy. ¹⁹Mänitä Juan ja'a Herodes hoy yhojy, ja'a hānajty tuumbä gobernador. Paadiä Herodes yhojjä coo yhamdsoo puhya'ay ja'a tio'oxiøjc hānajty miøødtsānaayyā. Felipe ja'a piuhya'ay hānajty xiøhaty. Jiinä hānajty jiugyhatyñä. Herodías ja'a Felipe tio'oxiøjc hānajty

xiøhaty. Madiu'u ja'a Herodes hānajty jiatcø'øy haxøøg. ²⁰ Coo ja'a Herodes jaduhñ yhojjä, mänitä Herodes ja'a Juan yajtsuumä. Hix, haxøøgwiinmahñdy ja'a Herodes hānajty miøød.

²¹ Coo ja'a Juan hānajty quia'a tsumyiinä, jimä cu'ug hānajty yajnäbety. Mänitä Jesús miehch näbejpä. Juan hānajty je'e yajnäbetaamb. Jimä Jesús hānajty Dyiospa'ya'axy, mänitä tsajpootyp yhawaach. ²² Mänitä Dioshespíritu ja'a Jesús nāgädaacy nebiä paloman. Mänit hoy yhänaaxiøpy ja'a Jesús ja'a quiuhduum. Mänitä Dios jim quiapxy tsajpootyp:

—NHuunghájpiøch miich. Njaanç tehñ chójpiøch miich. Jootcujc-høch jaduhñ nnijiäwø'øyii maa miichcøxpän.

²³ Hii'xmajcjomøjt ja'a Jesús hānajty miøødä mänaabä tiägø'øyän yajnähixøöbiä. Ja'a cu'ug jaduhñ mänaan cooc tyijy ja'a Jesús ja'a José hānajty tieedyhaty. Ja'a José yhap tieedyhajxy, jaduhñä xiøøhajxy ñibianøcxä: Elí ja'a José tieedy xiøhajty. ²⁴ Ja'a Elí tieedy, Matat je'e xiøhajty. Ja'a Matat tieedy, Leví je'e xiøhajty. Ja'a Leví tieedy, Melqui je'e xiøhajty. Ja'a Melqui tieedy, Jana je'e xiøhajty. Ja'a Jana tieedy, José je'e xiøhajty. ²⁵ Ja'a José tieedy, Matatías je'e xiøhajty. Ja'a Matatías tieedy, Amós je'e xiøhajty. Ja'a Amós tieedy, Nahúm je'e xiøhajty. Ja'a Nahúm tieedy, Esli je'e xiøhajty. Ja'a Esli tieedy, Nagai je'e xiøhajty. ²⁶ Ja'a Nagai tieedy, Maat je'e xiøhajty. Ja'a Maat tieedy, Matatías je'e xiøhajty. Ja'a Matatías tieedy, Semei

je'e xiøhajty. Ja'a Semei tieedy, Josec je'e xiøhajty. Ja'a Josec tieedy, Judá je'e xiøhajty. ²⁷ Ja'a Judá tieedy, Joanán je'e xiøhajty. Ja'a Joanán tieedy, Resa je'e xiøhajty. Ja'a Resa tieedy, Zorobabel je'e xiøhajty. Ja'a Zorobabel tieedy, Salatiel je'e xiøhajty. Ja'a Salatiel tieedy, Neri je'e xiøhajty. ²⁸ Ja'a Neri tieedy, Melqui je'e xiøhajty. Ja'a Melqui tieedy, Adi je'e xiøhajty. Ja'a Adi tieedy, Cosam je'e xiøhajty. Ja'a Cosam tieedy, Elmodam je'e xiøhajty. Ja'a Elmodam tieedy, Er je'e xiøhajty. ²⁹ Ja'a Er tieedy, Josué je'e xiøhajty. Ja'a Josué tieedy, Eliezer je'e xiøhajty. Ja'a Eliezer tieedy, Jorim je'e xiøhajty. Ja'a Jorim tieedy, Matat je'e xiøhajty. ³⁰ Ja'a Matat tieedy, Leví je'e xiøhajty. Ja'a Leví tieedy, Simeón je'e xiøhajty. Ja'a Simeón tieedy, Judá je'e xiøhajty. Ja'a Judá tieedy, José je'e xiøhajty. Ja'a José tieedy, Jonam je'e xiøhajty. Ja'a Jonam tieedy, Eliaquim je'e xiøhajty. ³¹ Ja'a Eliaquim tieedy, Melea je'e xiøhajty. Ja'a Melea tieedy, Mena je'e xiøhajty. Ja'a Mena tieedy, Matata je'e xiøhajty. Ja'a Matata tieedy, Natán je'e xiøhajty. ³² Ja'a Natán tieedy, David je'e xiøhajty. Ja'a David tieedy, Isaí je'e xiøhajty. Ja'a Isaí tieedy, Obed je'e xiøhajty. Ja'a Obed tieedy, Booz je'e xiøhajty. Ja'a Booz tieedy, Sala je'e xiøhajty. Ja'a Sala tieedy, Naasón je'e xiøhajty. ³³ Ja'a Naasón tieedy, Aminadab je'e xiøhajty. Ja'a Aminadab tieedy, Admin je'e xiøhajty. Ja'a Admin tieedy, Esrom je'e xiøhajty. Ja'a Esrom tieedy, Fares je'e xiøhajty. Ja'a Fares tieedy, Judá je'e xiøhajty.

³⁴ Ja'a Judá tieedy, Jacob je'e xiøhajty. Ja'a Jacob tieedy, Isaac je'e xiøhajty. Ja'a Isaac tieedy, Abraham je'e xiøhajty. Ja'a Abra'am tieedy, Taré je'e xiøhajty. Ja'a Taré tieedy, Nacor je'e xiøhajty. ³⁵ Ja'a Nacor tieedy, Serug je'e xiøhajty. Ja'a Serug tieedy, Ragau je'e xiøhajty. Ja'a Ragau tieedy, Peleg je'e xiøhajty. Ja'a Peleg tieedy, Heber je'e xiøhajty. Ja'a Heber tieedy, Sala je'e xiøhajty. ³⁶ Ja'a Sala tieedy, Cainán je'e xiøhajty. Ja'a Cainán tieedy, Arfaxad je'e xiøhajty. Ja'a Arfaxad tieedy, Sem je'e xiøhajty. Ja'a Sem tieedy, Noé je'e xiøhajty. Ja'a Noé tieedy, Lamec je'e xiøhajty. ³⁷ Ja'a Lamec tieedy, Matusalén je'e xiøhajty. Ja'a Matusalén tieedy, Enoc je'e xiøhajty. Ja'a Enoc tieedy, Jared je'e xiøhajty. Ja'a Jared tieedy, Mahalaleel je'e xiøhajty. Ja'a Mahalaleel tieedy, Cainán je'e xiøhajty. ³⁸ Ja'a Cainán tieedy, Enós je'e xiøhajty. Ja'a Enós tieedy, Set je'e xiøhajty. Ja'a Set tieedy, Adán je'e xiøhajty. Ja'a Adán, Dios jaduhñ cunuux pádaac.

4 Jimä Jesús hánajty maa ja'a Jordánmøjnøøjän. Miøødä Jesús ja'a Dioshespíritu hánajty. Mänitá Jesús wioonøcxä hanidiuhmduum ja'a Dioshespíritu. ²⁻³ Jim jaduhñ yhiyty juxychägui'xxøø. Hayuu hánajty ñä'ägä hity. Jimä Jesús hánajty jia jøjcapxø'øwa'añii ja'a mõjcu'ugóngäm coog tyijy cu tiu'udägooyy. Mänitá Jesús yuu paaatä. Mänitá Jesús ñämaayyá ja'a mõjcu'ugóngäm:

—Pø tøy miich ja'a Dios xyHuunghaty, yajwa'añguioj

yø'ø tsaá nebiä tsajcaaguiän —ja jøjcapxø'øwaanä ja'a Jesús jaduhñ, paady jaduhñ ñämaayyá.

⁴ Mänitá Jesús yhadsooyy: —Jaduhñä Diosmädia'agy miána'añ: “Ca'a quiaaguiä ja'a jäya'ayhajxy miäjuggyhádat hádaa yaabä naaxwiin; møødä Diosmädia'agy hajxy miäjuggyhádat.”

⁵ Mänitá mõjcu'ugong ja'a Jesús wioonøcxy maa ja'a tun jaančh tehñ quiøxpän. Mänitá Jesús tu'habaquiä yajnäheebøoyyá ja'a naax ja'a cajpt cøxiä hádaa yaabä naaxwiin.

⁶⁻⁷ Mänitá Jesús ñämaayyá: —Høøch nje'e yø'øduhñ cøxiä mäduhñtiä jii quiähxø'øgy. Yajxon yø'ø cajpt jaduhñ. Møj jaančh ja'a jäya'ayhajxy, ja'a hajxy xiiby tsánaabiä. Høøch jaduhñ cøxiä tøø xquiøxy cø'ødägø'øy. Nmøødhøch ja'a cuhdujt jaduhñ cooçh hopiønä nyajcø'ødägø'øwät. Y cooçh miich jaduhñ xwyiingudsähgø'øwät, mänitøch miich ngøxy mó'owät.

⁸ Mänitá Jesús yhadsooyy: —Jaduhñä Diosmädia'agy miána'añ: “Mwiingudsähgø'øwäp ja'a Dios; je'eduhñ mWiindsønähädäp. Cab jaduhñ wiingpä mwiindsønähädät.”

⁹ Mänitá mõjcu'ugong ja'a Jesús wioonøcxy jim Jerusalén-cajptooty. Mänit miøødwimbejty mõjtsajtøjcuhduum. Mänitá mõjcu'ugong miánaañ:

—Pø tøy miich ja'a Dios xyHuunghaty, cuhdøpxnax jiiiby naaxwiin. ¹⁰ Caj miich nej mjádät. Jaduhñ jiiiby myiñ maa ja'a Diosmädia'aguiän:

Dios hane'emaamb ja'a mioonsähajxy tsajpootypä coo miich xcwieendähädät.

¹¹ Xchehñhidaamb miič hajxy
jaduhñ nej miič tsaajooty
jaduhñ mga'a cuhnébät.

¹² Mänitä Jesús yhadsooyy:
—Jaduhñä Diosmädia'agy

miänaambä: “Cabä Dios
mjøjcapxø'owät, ja'a
mWiindsønħajpiä.”

¹³ Coö ja'a mõjcu'ugong
miädia'agy hänajty quia'a
jøjtägø'owáanäxä, mänit
ñähgueecnä. ¹⁴ Mänitä Jesús
yhädaactägajch Galileanaaxooty.
Diosmäjaa hänajty miøød. Mänitä
mädia'agy wiädijty ja'a Jesúscøxpä
wiinduhmyhagajpt. ¹⁵ Cajpt-cajpt
ja'a Jesús hänajty wiädity
yajñähixøöbiä tsajtøgooty. Mänitä
Jesús quiumaayyä ja'a jäya'ayhajxy
nägøxiä.

¹⁶ Mänitä Jesús miejch Nazaret
maa hänajty tøø miuutsc-hatiän.
Coö ja'a poo'xxiøø yhabaaty, mänit
tiägøøyy tsajtøgooty. Jaduhñ
hänajty ñä'ägä cuhdujthaty
ja'a poo'xxiøøjooty. Mänit
ñämaayyä coö ja'a Diosmädia'agy
quiápxät. Coö tiänaayyø'cy
majjäya'awyiinduum, ¹⁷ mänitä
libro miooyyä, ja'a Isaías
hänajty jegyhajty tøø jiäayäbä,
ja'a Diosquexypä. Mänitä libro
quiejtøøyy. Mänit tiägøøyy capxpä:

¹⁸ Ja'a Dioshespíritoch nmøød.

Je'ečh tøø xpiäda'agy
coöchä häyoobäya'ayhajxy
nhawáanät coö hajxy
yaghoyø'owa'añii.

Jadúhñhöch tøø xwyiinguexy
coöchä jäya'ayhajxy
nhawáanät nebiä piojpa
quiädieey hajxy ñähwa'ads
quiuhwá'adsät,

nebiä Diosmädia'agy hajxy
pedyii quiudiünät.

¹⁹ Tøø jaduhñ yhabaady coö ja'a
Dios ja'a mayhajt jaduhñ
tiuna'añ mõj may.

²⁰ Mänitä Jesús ja'a libro
yhabädiñä. Mänitä tsajtøjyohbiä
jaduhñ miooyyä. Mänitä
Jesús yhäñaaguiädaacy. Wyi'i
wyiinhee'ppejpy ja'a cu'ug ja'a
Jesús hajxy hänajty. ²¹ Mänitä Jesús
miänaañ:

—Tøø ja'a Diosmädia'agy tiøjyaty
nébiøch tøø ngapxiän.

²² Mänitä cu'ughajxy yagjuøøyy
coö ja'a Jesús hänajty hoy tøø
quiapxy. Hoy ja'a Jesús hajxy
hänajty ñänømy:

—Maa yø'ø capxy yø'ø
mädia'aguiäda'a tøø yhuug
habøjpa. Haa ca'a, ja'a José yhuung
yø'øduhñ, cabä —nøm hajxy
hänajty miäna'añ.

²³ Mänitä Jesús miänaañ:
—Jadúhñhöch mijtsäda'a
xñäma'awa'añ: “Huuc yajcähxø'øg
ja'a hijxtahñd yaa maa ja'a
mhamdsoo cajptän nej miič
jim tøø mhuuc yajcähxø'pän jim
Capernaum.”

²⁴ Mänitä Jesús jiaac mänaañ:
—Pero høøch jaduhñ mänaamb,
ja'a Diosquexypähajxy, cabä
miädia'agyhajxy miäbøgáanäxä
maa yhamdsoo cajpthajxiän. Tehm
tiøjhajt jaduhñ. ²⁵⁻²⁶ Coö ja'a
Elías hänajty jegyhajty wiädity
Diosmädia'agy-yajwa'xpä yaa
Israelpä-naaxooty, tægøøgjomøjtä
cupc caj ñä'ägädä tuuyy. Chaadsä
yuuxøø jiaanč tehm jiajtä. Mänitä
Dios ja'a Elías quiejxy maa ja'a
cajpt hänajty xiøhatiän Sarepta, jim

Sidón mäwiingón. Jimä Elías ja'a yaamgto'oxy hoy tu'ug piuhbety. Pero ja'a yaamgto'oxyhajxy yaabä, cab hajxy yajnäguejxä, hoy hajxy hänajty jia nämayyä.

²⁷ Jaanä jaduħnduhmbä, jii haxøøgpa'ammøødpähajxy hänajty nämay yaa Israelpä-naaxooty mänaa ja'a Eliseo hänajty yaa wiäditiän Diosmädia'agy-yajwa'xpä. Pero cabä pia'amhajxy jaduħn yajnax yajmäayyäxä. Jagooyyä Naamán pia'am nidiuhm ñajxy miaayy, y jäguem hänajty chána'ay jim Sirianaaxooty, ca'a yaajä.

²⁸ Coo ja'a jäya'ayhajxy jaduħn miädooyy nebiä Jesús miänaañän, ja'a hajxy hänajty jiiby tsajtøogootypä, cøjx hajxy jootma'ady. ²⁹ Mänitä Jesús hajxy ñädánaayyø'cy. Mänitä Jesús hajxy jim yajnøcxy tunguhduum jim cajtpa'a. Jimä Jesús hajxy hänajty quiuhjuijpnaxa'añ. ³⁰ Pero cabä Jesús hajxy nej ñä'a tuuñ. Jaduhyyä je'e yajyohñajxy majiäya'ayhagujc. Mänit jim wyiimbijnä.

³¹ Mänitä Jesús ñøcxy Capernaum, jim Galileanaaxooty. Coo ja'a poo'xxiøø yhabaaty, mänitä Jesús ja'a cu'ug tiägøøyy yajnähixøøbiä tsajtøogooty. ³² Jaduhnä Jesús hänajty yajnähixø'øy nebiä capxta'agypiän, paadiä cu'ughajxy hänajty yagjuø'øy.

³³ Jiibiä jäya'ay hänajty tu'ug ja'a mõjcu'uba'ammøødpä. Mänit mõc yaaxy:

³⁴ —Ween højts nhity. Tii jaduħn mhøxtaaby maa højtsän. Nej, xyajcuhdägoyyaamb højtsä. Nhíxyhøch miich. Jesús mxøhaty. Nazaret mdsooñ. Nnajuøøbiøch

jaduħn coo miichä Dios xyHuunghaty.

³⁵ Mänitä Jesús ja'a mõjcu'u yhojy: —Hamón, jua'ads jim maa yø'ø craajän.

Mänitä mähdijc quiädaayy naaxwiin maa ja'a jäya'ay wyiinduuhajxiän. Mänitä mõjcu'u piädsøømy. Cabä mähdijc nej jiajnä. ³⁶ Mänitä jäya'ayhajxy nägøxiä chähgøøyy. Mänit hajxy ñiñämaayyä:

—Høxtahm̄ds jaduħn quiapxy miädia'agy. Cuhdujtmøødäda'a yø'øduħn maa ja'a mõjcu'uhajxiän. Jaanč pädsøømb hajxy jaduħn coo hajxy ñäma'ayii coo hajxy piädsømat.

³⁷ Mänitä mädia'agy tiägøøyy wädiipä ja'a Jesúscøxpä jim wiinduhmyhagajpt.

³⁸ Mänitä Jesús piädsøømy tsajtøogooty. Mänit ñøcxy maa ja'a Simón tiøjc-hajxiän. Jiibiä Simón miø'ødhoc hänajty pia'amgo'na'ay tomiøød. Mänitä Jesús hajxy miänuu'xtaacy coo ja'a toy ween yajtøjtsäxä. ³⁹ Mänitä Jesús ja'a pa'amjäya'ay wyiinguwoodsøøyy. Mänit miänaañ coo ja'a toy ween ñähwa'ačhii. Mänitiä ja'a toy jiaanč tøjtsnä. Mänitä pa'amjäya'ay piädø'cy. Mänit tiägøøyy mayhajt-tuumbä maa ja'a Jesúshajxiän.

⁴⁰ Coo chuujøøyy, mänitä pa'amjäya'ayhajxy may wioomejtsä maa ja'a Jesúsän. Madiu'u ja'a pa'am hajxy hänajty miøødä. Mänitä Jesús nägøxiä quiø'onähgajpy tu'ugjaty-tu'ugjaty. Jaduhnä pia'amhajxy ñähwaats quiuhwaatsä. ⁴¹ Nämäy hajxy

hänajty miøjcu'uba'ammøødä. Coö ja'a møjcu'uhajxy piädsøømy, mänit hajxy yhayaaxy:

—Dios miich xyHuunghajp.

Mänitä Jesús ja'a møjcu'u yhojy. Cab hajxy nã'ägä yajcapxä. Hix, ñajuøøby hajxy hänajty coö ja'a Jesús jie'ejä ja'a Cristo, ja'a Dios tøø quiéxiäbä.

⁴²Coö jiojøøyy, mänitä Jesús ñøxcy cajtpa'a hanidiuhmduum. Jimä cu'ug ja'a Jesús hajxy hänajty yhöxta'ay. Coö hajxy piaaty, mänit hajxy jia yajmähmø'øwaañ.

⁴³Mänitä Jesús miänaañ:

—Páadyhöch ja'a Dios yaa tøø xquixy hädaa yaabä naaxwiin coöch wiinduhmyhagajpt nwädität, coöch nyajwiingapxø'øwät coö ja'a Dios ja'a miäjaa yajcähxø'øgaannä. Paady, cáböch yaa nmähmø'øwa'añ.

⁴⁴Jaduhnä Jesús hänajty wiädity yajnähixøöbiä jim Galileanaaxooty. Wiinduhmychajtøjc hänajty wiädity.

5 Mänitä Jesús hänajty jim tiäna'ay Genesaretmejypia'a.

Mänitä jäya'ayhajxy may miejch Diosmädia'agymiädoobä. Nø'øchpän ja'a jäya'ayhajxy hänajty tiäna'ay maa ja'a Jesúsän. Cabä hawa'adspä hänajty maa.

²Mänitä Jesús barco yhijxy metsec jim mejypia'a. Yajwa'adsä barco hänajty. Jimä cubarcohajxy hänajty quihjuijtsaabiujy mäwiingón.

³Mänitä Jesús ja'a barco tu'ug yajpejty ja'a Simón jie'e. Mänitä Jesús ja'a Simón ñämaayy coö barco weenä yajmäwiingónät wiinduum. Jimä Simón ja'a Zebedeo yhuunghajxy hänajty miøødä nämetscä. Jacobo hänajty tu'ug xiøhaty. Tu'ug hänajty

xiøhajpä Juan. Mänitä Jesús yhäñaaguiädaacy barcojooty. Mänitä cu'ughajxy tiägøøyyä yajwiingapxøøyyäbä. ⁴Coö ja'a Jesús jaduhñ quiapxpädøøyy, mänitä Simón ñämaayyä:

—Yajmøjyo'oy ja'a mbarco ja ween comduum. Jiibiä mguhjuijtsaay hajxy mbädá'agät.

⁵Mänitä Simón yhadsooyy: —Wiindsón, tu'tsuhm højts tøø nja cuhjuipy. Cab højts tii tøø nnä'ägädä mach. Pero coöch miich jaduhñ tøø xñäma'ay, nõcxyhöch nhuuc jaac juipy.

⁶Coö hajxy jaduhñ jiaançh cudiuunñ, mänitä hacx hajxy may miajch, høxtä tsøømgøø'tsä ja'a cuhjuijtsaay jaduhñ.

⁷Mänitä miägu'ughajpä hajxy miøjyeemy, ja'a hajxy hänajty wiingbarcojootypä, coö hajxy min piuhbedyii. Mänitä barco hajxy metsec yaghujch. Ja weenjaty hajxy quia'a mäguinä. ⁸⁻¹⁰Mänit hajxy yagjuøøyy coö hacx hajxy may miajch. Mänit hajxy ñajuøøyy coö ja'a Jesús ja'a hijxtahnd jaduhñ yajcähxø'cy hoy-yagjuøøñä.

Mänitä Simón Pedro ja'a Jesús wyiinjiçädaacy. Mänit miänaañ:

—Wiindsón, cáböch miich hawiinmats xmiøødhidät. Cáböch hoguiuhdujt nmøødä.

Mänitä Jesús ja'a Simón ñämaayy: —Ca'a mdsähgøøy.

Wiingtuung mbanøcxáannäp. Myajwiingapxø'øwaambiä cu'ug ja'a Diosmädia'agy.

¹¹Mänitä barco hajxy yajmøjyohbiejty mejypia'a. Mänitä Jesús hajxy piadu'ubøjcy. Ñähgueecy hajxy jaduhñ cøxiä.

¹²Mänitä Jesús wiingcajpt miejch. Jimä jäya'ay hänajty tu'ug haxøøgpu'udsmøød. Coo ja'a Jesús yhiixä, mänit wyiinjjicadaacä. Mänit nãmaayyã:

—Wiindsøn, miičh nnãmaaby, høøch nbu'uds yajtsóocäc.

¹³Mänitä Jesús ja'a mähdiøjc nãhdoon. Mänitä Jesús miãnaaã: —Tøø jaduñ mdsø'ogy.

Tuunä ja'a Jesús jaduñ nã'ä mänaaã, mänitiä ja'a mähdiøjc choocy. ¹⁴Mänitä Jesús miãnaaã:

—Caj pøn mhawáanät coo tøø mdsø'ogy. Nøcx tu'uda'aquiä maa ja'a teediän. Jimä xädø'øn mguyoxø'øwät nebiä Moisés jecy yhanehmiän. Paadiä xädø'øn mguyoxø'øwät, jaduñhä hijxtahnd myajcähxø'øgät coo tøø mdsø'ogy.

¹⁵Mänitä mädia'agy hajxy yajwädipty jäguembaady cooc ja'a Jesús ja'a hijxtahnd tøø yajcähxø'øgy. Mänitä jäya'ayhajxy maas may jiaac hamugøøyy maa ja'a Jesúsän. Ja'a Jesús miädia'agy hajxy hänajty yhamädoowhidáanäp. Møødä pia'amhajxy hänajty yajnaxáanäxä. ¹⁶Coo ja'a jäya'ayhajxy hänajty wyi'i yhamugø'øyy maa ja'a Jesúsän, paadiä Jesús hanidiuhmduum ñøcxy Diospa'yaaxpä.

¹⁷Wiinghooä Jesús ja'a cu'ug hänajty yajwiingapxø'øyy. Jaančh tehñ yhujts ja'a tøjc hänajty. Jiibiä fariseoshajxy hänajty yhäña'ay møødä ley-yajnáhixøøbiähajxy. Wiinduhmyhagajpt hajxy hänajty choon Galileanaaxooty møødä Judeanaaxooty møødä Jerusalén. Miøødä Jesús ja'a Diosmäjaa hänajty nebiä pa'am

jaduñ yajnaxät. ¹⁸Mänitä cø'ømucypiä tecymiucypiä tu'ug quiøømiejtsä tsaajiooty. Jiiby hajxy jia yajtøjtägø'øwaañ maa ja'a Jesús hänajty miädia'aguiän.

¹⁹Pero jaančh tehñ yhujts ja'a tægø'øwøødiaact hänajty. Mänit hajxy ñiñãmaayyã coo hajxy jim yaghawa'adsa'añ tøjñähgøxp. Mänit pa'amjäya'ay hajxy quiuhdøønajxy tøjcuhduum maa ja'a Jesús hänajty pia'tána'ayän. ²⁰Coo ja'a Jesús ñajuøøyy coo ja'a miädia'agy hänajty miäbøgáanäxä, mänitiä cø'ømucypiä tecymiucypiä ñãmaayyã:

—Mägu'ughajpä, miičh nnãmaaby coo ja'a mbojpä mgädieey tøø xñähwa'ačh tøø xquiuhwa'ačh.

²¹Mänitä fariseoshajxy quiopcooty tiägøøyy mädiaactaacpä møødä ley-yajnáhixøøbiä: “Tii yø'ø craa jaduñ coo miãna'añ. Capxtägooby yø'øduhñ. Jagooyyã Dios ja'a cuhdujt jaduñ miøødä coo ja'a pojpa cädieey miée'xät.”

²²Mänitä Jesús ñajuøøyy nebiaty hajxy hänajty miädiaacta'agy quiopcooty. Mänit miãnaaã:

—Tii hajxy jaduñ coo mmädiaacta'agy mgopcooty. ²³Nej, maas páquiøch yø'ø mähdiøjc nnámá'awädä: “Tøøch miičh mbojpä mgädieey nmãmee'xy”, tøgä maas páquiøch jaduñ nnámá'awädä “Tãnaayyø'øg, yo'oyø'øg.” ²⁴Mhuug híxäp hajxy nébiøch hädaa mähdiøjc nyajmøcpøga'añ. Jaduñ hajxy mnajuø'øwät coočhã cuhdujt jaduñ nmøødä hädaa yaabä naaxwiin coočhã pojpa cädieey jaduñ nmée'xät, høøch ja'a Diosquexypä.

Mänitä mähdiøjc nāmaayyā:

—Tānaayyø'øg; widsø'øg yø'ø mdsaa; nøcxnä maa ja'a mdøjcän.

²⁵Mänitiä ja'a mähdiøjc jaduhñ tiānaayyø'cy maa ja'a wyiinduuhajxiän. Mänitā tsaay wyidsø'cy maa hānajty tøø quio'na'ayän. Mänit nøcxnä maa ja'a tiøjcän. Mänitā Dios Dioscujú'uyäp miooyy. ²⁶Mänit hajxy nägøxiä jiaanč tehñ yagjuøøyy. Jaanč tehñ chähgøøyy hajxy jaduhñ. Mänitā Dios Dioscujú'uyäp hajxy miooyy. Mänit hajxy miānaañ:

—Tøødsä hoy-yagjuøøñäbä hajxy nhíjxäm jäda'a.

²⁷Mänitā Jesús wyiimbijnä. Mänitā jäya'ay tu'ug yhiixy, ja'a Levíhajpä. Jimä Leví hānajty yhäñ'a'ay maa hajxy hānajty yajnähjuudi'udiän. Je'e ja'a Leví hānajty tiuunghajpy. Mänitā Jesús ja'a Leví nāmaayy:

—Høøch pamíinäc.

²⁸Mänitā Leví tiānaayyø'cy, pianøcxy ja'a Jesús. Cøjx jaduhñ nāhgue'egy mäduhñtiä hānajty miøødä.

²⁹Mänitā Leví ja'a xøø yagjajtä maa ja'a tiøjcän ja'a Jesúscoxpä. Jiibiä yajnähjuudiutpähajxy hānajty nāmay miägaabiä møødä wiinghäna'c-hajxy. ³⁰Jiibiä fariseoshajxy hānajty miägaabiä møødä ley-yajnähixøøbiähajxy. Mänitā Jesús jiamiøødhajxy nāmaayyä ja'a fariseoshajxy:

—Tii yø'ø yajnähjuudiutpä hajxy coo mmøødcay coo mmøødh'u'ugy. Haa ca'a, jue'e yø'ø hajxy, pojpäya'ay cädieejäya'ayhajxy jaduhñ.

³¹Mänitā Jesús yhadsooyy:

—Pøn møc, cab hajxy yajtsooyø'øy. Pøn pa'ammøød, je'eds hajxy yajtsooyøøby. ³²Jaduhñ mäwíinäts høøch ja'a pojpäya'ay cädieejäya'ay nyajñahwa'ačh nyajcuhwa'ačh. Pero mijts jaduhñ mänaamb cooc tyijy pojpä cädieey hajxy mga'a møødä. Páadyhøch mijts waamb nga'a nāma'ay.

³³Mänitā Jesús hajxy nāmaayy: —Ja'a Juan jiamiøødhajxy, naxy hajxy yhity hayuu; naxiä Dios hajxy pia'ya'axy. Jaduhñä fariseos jiamiøødhajxy naxy quiudiuumbä. Pero miich mjamiøødhajxy, nä'ä caaby nä'ä huucp hajxy je'e. Cab hajxy yhity hayuu. Cab jaduhñ yhooyä.

³⁴Mänitā Jesús miānaañ: —Coo ja'a pøc hu'ug maa jiadyii, cabä woybä wichpähajxy hayuu wyiimbity. Jaduhñ mäwíinäts høøch nebiä jamiø'ødän ja'a pøgaambä. Páadyhøch njamiøødhajxy hayuu quia'a hity. ³⁵Habaadāannäp jaduhñ cooch yaa ndsoonaannä. Mänítøch njamiøødhajxy yhida'añ hayuu mäbøcypä.

³⁶Mänitā Jesús jadähooc wyiingapxøøguiumbä:

—Cabä tuwit pøn yhagøyø'øy jemyywíthaam. Cøødsäp ja'a jemyywít jaduhñ; cab jaduhñ ñibiaada'añii møødä tuwit.

³⁷Jaanaä jaduhñduhmbä, cabä jemyyvino pøn quiudemø'øy ja'a tucwajhacxujiooty. Cøødsäp ja'a tucwajhacxuy jaduhñ; høxyógäp ja'a vino jaduhñ. Haagä tågóyyäp ja'a tucwajhacxuy jaduhñ møødä vino. ³⁸Pero jiibiä

jemyvyino hajxy quiudemø'øy ja'a jemywiahacxujooty. Cab jadhun̄ tii mia'ady, ni ja'a jemyvyino, ni ja'a jemywiahacxuy. ³⁹Cabä jemyvyino pøn̄ hoyhuucnä jia'wø'øy coo ja'a vino hänajty tøø yhu'ugy ja'a teh̄m jiecypä. “Maas hoyhuucnä ja'a jecyvyino” —nømä jäya'ayhajxy miäna'añ.

6 Mänitxøø ja'a Jesúshajxy hänajty wiädity trigoni'ibyquijc. Poo'xxiøøjooty hänajty je'e. Mänitä jiamioød ja'a trigo hajxy tiøjy. Mänit hajxy ñähxajtstuuty. Mänit hajxy jiøø'xy. ²Mänitä fariseoshajxy näje'e miänaa'ñ:

—Cabä cuhdujt jadhun̄ myiñ̄ coo hajxy jadhun̄ mdúnät ja'a poo'xxiøøjooty.

³Mänitä Jesús miänaa'ñ:

—Nej, cahnä ja'a Diosmädia'agy hajxy mgapxiä nebiä David tiuun̄ coo hänajty yäho'ogyii møødä jiamioødhajxy. ⁴Mänit hajxy jiiby tiägøøyy tsajtøgooty. Mänitä tsajcaagy hajxy quiaaayy ja'a teedyhajxy hänajty tøø quiuyoxø'øyäbä. Cabä David ja'a cuhdujt hajxy hänajty miøødä coo hajxy jadhun̄ quiáyät. Jagooyyä teedy ja'a cuhdujt hajxy hänajty miøødä coo hajxy quiáyät. ⁵Høøch ja'a Diosquexypä, jadúhnhøch høøchpä, nmøødhøch ja'a cuhdujt jaduhmbä høxtä maa ja'a poo'xxiøøbaadiän —nømä Jesús miänaa'ñ.

⁶Jatu'ugpä poo'xxiøøjootypä ja'a Jesús tiägøøyy tsajtøgooty. Mänit tiägøøyy yajwiingapxøøbiä. Jiibiä mähdiøjc hänajty tu'ug hadu'ugcø'ødø'øds ja'a

yhahooyhaampiä. ⁷Jiibiä fariseoshajxy hänajty tiäna'ay møødä ley-yajnähixøøbiähajxy. Jiibiä Jesús hajxy hänajty wyl'i yheeby. Yhijxmajchp ja'a Jesús hajxy hänajty pø yajnaxaambiä pa'am ja'a poo'xxiøøjooty. Yhøxtaabiä fariseos ja'a wiinmahñdy hajxy hänajty nebiä Jesús hajxy yajtsumøøjät coo ja'a pa'amjäya'ay hänajty yajmøcpøgyii ja'a poo'xxiøøjooty. ⁸Ja'a Jesús, ñajuøøby hänajty je'e nebiä fariseoshajxy hänajty tiajy miay. Mänitä Jesús ja'a mähdiøjc ñämaayy ja'a hadu'ugcø'ødø'ødspä: —Tänaayyø'øg, min̄ huuc täna'aw cujc.

Mänit jiaançh tänaayyø'cy.

⁹Mänitä Jesús ñämaayy ja'a fariseoshajxy:

—Mijts nmäyajtøøby, nej, yejpiä Dios ja'a cuhdujt jadhun̄ coo hajxy hoy ndúunämät ja'a poo'xxiøøjootiä, tøgä yejpiä cuhdujt coo hajxy haxøøg ndúunämät ja'a poo'xxiøøjootiä. Jaanä jadhun̄duhm̄bä, nej, yejpiä Dios ja'a cuhdujt coo ja'a jäya'ay hajxy nyajnähwäatsämät ja'a poo'xxiøøjootiä, tøgä yejpiä cuhdujt coo jäya'ay hajxy nyajcuhdägøoyyämät ja'a poo'xxiøøjootiä.

¹⁰Mänitä Jesús ja'a jäya'ay wyiinhee'ppejty nägøxiä. Mänitä Jesús ja'a mähdiøjc ñämaayy:

—Xajtøw yø'ø mgø'ø.

Mänitä quiø'ø jiaançh xajtøøyy. Mänitä quiø'ø hoy jiajnä. ¹¹Mänitä fariseoshajxy jiootma'ty hoyhoy. Mänit hajxy quiojyquiapxyhajty nebiä Jesús hajxy tiuna'añ.

¹²Cujaboomgumaaxc ja'a Jesús ñøcxy tunguhduum. Tu'tsuhmä Tieedy pia'yaaxy. ¹³Coo jioðøøyy, mänitä jiamioðdhajxy miojyaaxy. Mänitä nämajmetspähajxy wyiimbiiwä coo ja'a Diosmädia'agy hajxy yajwá'xät. ¹⁴Jaduhndsä nämajmetspähajxy hánajty xiøhaty: Simón, ja'a Jesús hánajty tøø yajxøbétiäbä Pedro, møødá piuhya'ay Andrés, møødá Jacobo, møødá Juan, møødá Felipe, møødá Bartolomé, ¹⁵møødá Mateo, møødá Tomás, møødá Jacobo, ja'a Alfeo yhuung, møødá Simón ja'a celote, ¹⁶møødá Judas, ja'a Jacobo yhuung, møødá Judas Iscariote; je'e ja'a Jesús hánajty yajcø'dägø'øwaamb ho'cøøc maa ja'a fariseoshajxiän.

¹⁷Mänitä Jesúshajxy miänajnä tunguhduum. Mänit hajxy hoy ñaaxoguiädaacnä. Jimä Jesús jiamiøðdhajxy hánajty nämay. Jimä jäya'ayhajxy hánajty may tøø miech. Ja'a Jesús miädia'agy hajxy hánajty yhamädoowhidáanäp. Yajnaáanäxäp ja'a pia'amhajxy hánajty. Jäguembaady hajxy hánajty tøø choon Judeanaaxooty, møødá Jerusalén, møødá mejypia'a jim Tiro møøð jim Sidón. ¹⁸Ja'a jäya'ayhajxy hánajty mõjcu'uba'ammøødpä, yajnájxäxä ja'a pia'amhajxy je'ebä. ¹⁹Nägøxiä ja'a Jesús hajxy hánajty ñähdona'añ. Mänitä pia'amhajxy yajnájxäxä ja'a Jesús miäjaahaam.

²⁰Mänitä Jesús wyiinhee'ppejty ja'a jiamiøðdhajxy. Mänit miänaañ: —Jootcuyc mijts mhity, mijts häyoobädøjc. Paady hajxy jootcuyc mhity coo hajxy jim mnøcxa'añ maa ja'a Diosän.

²¹Jootcuyc mijts mhity, mijts yajmaajiajpä. Paady hajxy jootcuyc mhity coo ja'a Dios hajxy cøxiä wiinä xmio'owa'añ.

'Jootcuyc mijts mhity, mijts jøøbiä xuu'tspä. Paady hajxy jootcuyc mhity coo hajxy mxil'ig mxoonda'aga'añ.

²²Jootcuyc mijts mhity, hoy mijts jäya'ay xjia mähanhhaty ja'a høøchcøxpä, hoy mijts jäya'ay xquia'a ja tsocy xquia'a ja mee'xy, hoy mijts xjia nänømy, hoy mijts xjia pexy. ²³Mxi'ig mxoondá'agäp hajxy jaduhñ. Mbaadaambiä hoyhajt ja'a weenhajt hajxy jim tsajpootyp. Jaduhñ hajxy jiajpä yhabejpä, ja'a Diosmädia'agy hajxy jecy tøø yajwá'xiäbä.

²⁴'Pero mijts mäyøøjäya'ayhajxy, ja'a tsaächpä hajxy mbaadaamby. Cab hajxy mxoonda'agaannä neby hajxy hijty mxoonda'aguian.

²⁵'Hoy mijts tii hamaay mga'a ja juø'øy, myajmaajiadaamby hajxy jaduhñ.

'Hoy mijts mja xi'igy mja xoonda'agy, pero mnä'ägädä jø'øw mnä'ägädä xuudsaaamb hajxy.

²⁶'Tspicøxpä tsaächpä hajxy mbaada'añ, hoyyä cu'ug hajxy xjia cumay. Jaduhnä jäya'ayhajxy hijty yajcumay ja'a hajxy hijty jegyhajty nä'a wädiypä hønndaacpä. Nä'a mänaamb hajxy hijty jaduhñ cooc tyijy ja'a Diosmädia'agy hajxy yajwa'xy.

²⁷'Huuc mäadow hajxy, mdsógäp hajxy pøn jaduhñ xmiädsiphajp hädaa yaabä naaxwiin; mmée'xäp hajxy pøn jaduhñ xmiähahajp. ²⁸Mmänuu'xtá'agäp ja'a Dios hajxy coo ja'a Dios ween mio'oy ja'a

hoyhajt ja'a weenhajt pønjaty mijts jaduhñ xyhäyoowhijxp, pønjaty mijts jaduhñ haxøøg xñänøømb.

²⁹Coo pøn xyhatejxø'ogät tu'nax, mmøjcøogumbäp jadu'nax; ween jaduhñ jadu'nax xjiaac tehñ yhatejxø'ogy. Coo pøn mjocxwit xpíøjcät, mänitä mgamiixy mjaac tehñ mió'owät. ³⁰Coo pøn tii jaduhñ xmiäyujwá'anät, mmó'owäp jaduhñ. Y coo pøn tii xpíøjcät, cab je'e mmäyujwaandägájtñät.

³¹Jaduhñds mijts wiinghäna'c mnäxúudsät nej mijts hánajty myajnäxuuds'añän.

³²Coo ja'a mmägu'ughajpähajtiä hajxy mmøodnijootpaadøøjät, cab hajxy tii mbáadät; jaduhñdsä pojpyä'ay cädieejäya'ayhajxy ñiçhójcäbä. ³³Coo hajxy jagooyä mmøodniñäxuudsøøjät pønjaty jaduhñ xñäxuu'tsp, cab hajxy tii mbáadät; jaduhñdsä pojpyä'ay cädieejäya'ayhajxy ñiñäxúu'tsäbä.

³⁴Coo jagooyä xädø'øn hajxy myaghanú'xät pøn jaduhñ mnajuøøby xmioodiägatsaamb pedyii, cab hajxy tii mbáadät; jaduhñdsä pojpyä'ay cädieejäya'ay xädø'øn hajxy yajnimähanú'xäbä. Ñajuøøby hajxy jaduhñ coo hajxy pedyii mioodiägatsa'añii.

³⁵Mdsógäp hajxy pøn jaduhñ xmiädsiphajp. Mnäxúudsäp hajxy jaduhñ. Coo pøn xädø'øn xmiäyujwá'anät, mnä'a mó'owäp jaduhñ. Mänitä hoyhajt ja'a weenhajt hajxy mbáadät may. Mänitä Dios hajxy xyhuunghádät jim tsajpootyp. Hix, Dios, ñäxuu'chp ja'a jäya'ayhajxy høxtä ja'a jäya'ayhajxy ja'a Dioscujú'uyäp hajxy quia'a yejpiä, møød ja'a

hojioot hajxy ca'a møødpä.

³⁶Mmøødhádäp ja'a hojioot hajxy jaduhñ nebiä nDeedy hojioot miøødhájtäm.

³⁷'Cabä wiinghäna'c hajxy mnähójät coo ja'a Dios hajxy xyajcumädówät. Pero mmämée'xäp hajxy jaduhñ; mänitä Dios hajxy jaduhñ xmiämée'xpät.

³⁸Mäduhñtiä wiinghäna'c hajxy mmo'oy, nä'a tægø'øbä hajxy mbaattägatsa'añ. ³⁹Jaduhñhøch mijts nyajmäbáadät nebiä wiindspän. Coo ja'a wiindspähajxy ñiwyitswädityii, tsipcøxp hajxy jiuca'ay. Paady mijts jaduhñ mga'a wädítät nebiä wiindspän. ⁴⁰Cabä capxtaacpäna'c-hajxy jiaty jaty nebiä wyiindsøn'hajxy jiatian. Coo hajxy nägø'ø nädecypii quiapxtá'agät, mänit hajxy jaduhñ ñajtspaadø'owät.

⁴¹⁻⁴²'Coo ja'a mmägu'ughajpä weeñtiä quiädíeeyät, y coo miich hánajty maas hanaxiä tøø mgädieey, cabä mmägu'ughajpä hawiinmats waamb mnä'ägädä nämá'awät. Coo miich hánajty tøø mnähwa'açh, mänitä mmägu'ughajpä hawiinmats mwiingapx mjøcäpxø'owät.

⁴³Mädyii quepychaa pa'ag nä'ägädä tøømbejp, ni mänaa ja'a tiøøm quia'a xunä. Jaanä jaduhñduhmbä, mädyii quepychaa xun nä'ägädä tøømbejp, ni mänaa ja'a tiøøm quia'a pa'agø'øy. Tøyhajt jaduhñ. ⁴⁴Mnajuøøby hajxy jaduhñ mädyii quepychaa hoy tøømhajp. Ja'a hapy, cab jaduhñ tiøømhaty nebiä piidsän. Y ja'a wädsats, cab jaduhñ tiøømhaty nebiä tsaatypän. ⁴⁵Jaduhñ mäwíinädsä hojiäya'ay ja'a howyiinmahñdy

miøødä. Hoy jaduñ wiädity. Pero ja'a ca'awiindøjiäya'ayhajxy, cabä howyiinmahñdy hajxy miøødä. Haxøøgwiinmahñdy hajxy miäwädiipy. Haxøøg hajxy jaduñ nã'ägädä capxy nã'ägädä mädia'agy.

⁴⁶Wiindsøn høch mijts xwyi'i nãma'ay; pero cab hajxy jaduñ mgudiuna'añ nebiøch mijts nja hane'emiän. ⁴⁷Pøn høch nmädia'agy xmiädóowäp, pøn høch nmädia'agy xmiäböjcäp, jaduñ mäwínäts je'e ⁴⁸nebiä jäya'ay tiøcojjiän. Cøøc jaduñ tiajøøyy. Tsaawiing jaduñ miuu'tsø'cy. Coø ja'a nøøgomdägoy quiädaacy, coø ja'a tøjc jaduñ ñøønähgoombejty, cab jaduñ piädø'cy, je'leguiøxpä coø hänajty cøøc miuu'tsø'øguiä. ⁴⁹Pero pøn høch nmädia'agy jaduñ xquia'a mäböjcäp, jaduñ mäwínäts je'e nebiä jäya'ay tiøjc cøøc quia'a muu'tsø'quiän. Coø ja'a tøjc ñøønähgoombejty, pädø'c jaduñ; cøjx jaduñ quiädäy.

7 Coø ja'a Jesús miädiaacpädøøyy, mänit quiajptägøøyy Capernaum. ²Jimä soldadowiindsøn hänajty tu'ug. Roma hänajty choøn. Tøø ja'a mioonsä hänajty tu'ug pia'ambety. Jaduñ hänajty jiäwø'øyy nebiä yhamdsoo puhya'ayän. Nä'ägädä ho'ogáannäp hänajty je'e. ³Coø ja'a soldadowiindsøn miädoyhajty coø ja'a Jesús ja'a pa'amjäya'ay hänajty yajmøcpøcy, mänitä majtøjc näje'e quiejxy maa ja'a Jesúsän. Judíos hajxy je'e. ⁴Mänitä Jesús hajxy hoy miänuu'xta'agy coø ja'a pa'amjäya'ay ween nøøcy yajmøcpøcy. Mänitä Jesús nãmaayyä:

—Ja'a soldadowiindsøn, hojiäya'ay je'e. Hahixøøby jaduñ coø mbuhbédät. ⁵Xhöjcäm hajxy jaduñ. Tøø højts ndsajtøjc xyajcøjjäm.

⁶⁻⁷Mänitä Jesús ja'a majtøjc miøødtu'ubøjcy. Ja ween hajxy hänajty quia'a coody maa ja'a soldadowiindsøn tiøjcän, mänitä soldadowiindsøn ja'a Jesús capxy yajnäguejxy:

—Wiindsøn, jaduhyä mmäná'anät coøch nmoonsä miøcpøgät. Cábøch cuhdujt nmøødä nej miièch cuhdujt mmøødän; paady jaduñ caj yhawiinmatsä coø mdägø'owät maaèch ndøgootiän. Päädyhöch miièch hamdsoo tøø nga'a mägapxy. ⁸Hix, hané'emyhöch nhity; y coøch nsoldado howiaambä nhané'emät møødhøch nmoonsä, xquiudiüünäbøch nmädia'agy hajxy —nømä soldadowiindsøn ja'a Jesús quiapxyñäguejxy.

⁹Jaanèch tehñ yagjuøøyy ja'a Jesús jaduñ coø jaduñ nãmaayyä. Mänitä cu'ug wyiinhee'ppejty. Mänit miänaañ:

—Cábøch nmägunaaxhajxy jaduñ miäböcy nej yø'ø craa miäböquiän, y jäguem choøn.

¹⁰Ja'a majtøjc hänajty tøø quiexyíjibä maa ja'a Jesúsän, mänit hajxy wyiimbijnä. Coø hajxy miejstägajch maa ja'a soldadowiindsøn tiøjcän, tøø ja'a soldadowiindsøn mioonsä hänajty miøcpøjnä.

¹¹Mänitä Jesús hajxy ñøøcy maa ja'a cajpt hänajty xiøhatiän Naín møødä miägu'ughajpähajxy. Nãmuyyä jäya'ayhajxy hänajty pianøøcy. ¹²Jim hajxy hänajty

miäwiingoñ cajtpa'a, mänitä ho'ogyjiäya'ay hajxy hoy jiöjcubaadø'øy. Cabäsantä hänäjty nõcxy ñaaxtägø'øy. Tu'ughuung hänäjty je'e. Yaamgto'oxy ja'a tiaj je'ebä. Majiäya'ay hänäjty panøcxp. ¹³Coo ja'a Jesús ja'a yaamgto'oxy yhijsy, mänit ñäxuu'ch. Mänit ñämaayy:

—Ca'a mjø'øy ca'a mxuuč.

¹⁴Mänitä Jesús miänaañ coo hajxy yhuuc yaghahíxät. Mänitä cøøbiädøjc-hajxy tiänaaxiøjpy. Mänitä Jesús ja'a ho'ogyjiäya'aguiajä hoy ñähdoñ. Mänitä ho'ogyjiäya'ay ñämaayy: —Jexy, pädø'ög.

¹⁵Mänitä craa yhäñaayyø'cy. Mänit quiapxø'cy. Mänitä tiaj miødhajnä. ¹⁶Mänitä jäya'ayhajxy nägøxiä jiaanč tehñ yagjuøøyy. Mänitä Dios hajxy ñämaayy: —Dioscujú'uyäp.

Mänit hajxy ñiñämaayyä:

—Diosquexy yø'ø craa. Møj jaančh yø'øduhñ. Paadiä Dios tøø quiexy, piuhbedaamby ja'a quiu'ug jaduñ, ja'a hajxy hädaa yaabä naaxwiimbä.

¹⁷Mänitä mädia'agy tiägøøyy wädijsy jim Judeanaaxooty coo ja'a Jesús ja'a ho'ogyjiäya'ay tøø yagjujyipiøcy. Wiinduhmyhagajpt ja'a mädia'agy jaduñ wiädijsy.

¹⁸Ja'a Juan, tøø je'e hänäjty chumy. Coo ja'a miägu'ughajpähajxy miädoyhajty nebiatiä Jesús hänäjty tiuñ, mänitä Juan hoy yhawáanäxä. ¹⁹⁻²⁰Mänitä Juan ja'a miägu'ughajpähajxy metsc miøjyaaxy. Mänit hajxy quiejxä maa ja'a Jesúsän. Coo hajxy jim miejch, mänitä Jesús hajxy ñämaayy:

—Juan mäyajnäbejpä højts tøø quiexy coo højts miich

nmäyajtøwät pøn miich. Nej, miich ja'a Dios hijty jaduñ xquieaambä, tøgä wiinghäna'c je'ejä.

²¹Jimä Jesús ja'a pa'amjäya'ay hänäjty yajmøcpøcy. Madiu'u ja'a pa'am hajxy hänäjty miøødä møødä møjcu'u. Møødä wiindspähajxy hänäjty nämay yaghijxø'ogyii.

²²Mänitä Jesús yhadsooyy:

—Nøcxä Juan hajxy hawaanä nebiaty hajxy yaa mhixy mmädooy. Hijxø'p ja wiindspähajxy, yo'oyø'p ja'a tecymia'adpähajxy, nähwaatsp ja'a haxøøgpa'ammøødpähajxy, mädoowø'p ja'a cuhnatpähajxy, jujyipiøjp ja'a ho'ogyjiäya'ayhajxy, yajwiingapxøøyyäp ja'a häyoobäya'ay ja'a Diosmädia'agy hajxy. ²³Pønjätyhöch nmädia'agy xmiäbøjcäp tehngajnä, jootcuyc hajxy jaduñ ñijiäwø'oyii —nømä Jesús miänaañ.

²⁴Coo ja'a Juan

miägu'ughajpähajxy wyiimbijnä, mänitä Jesús miänaañ:

—Coo hajxy tøø mhoy pactuum, Juan miädia'agy hajxy hänäjty mmädoowáanäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tøø mhoy coo ja'a Juan ja'a miädia'agy hajxy hänäjty mmädoowanä. ²⁵Diosquexy je'e, paady hajxy hoy tøø mmädoowä, hoyyä howyit je'e quia'a ja møødä nebiä mäyøøjäya'ayhajxy miøødän.

²⁶Tøyhajt jaduñ coo ja'a Juan ja'a Diosmädia'agy yajwa'xy. Maas may ja'a Dios ja'a Juan cuhdujt tøø mio'oy quejee ja'a jäya'ay ja'a Diosmädia'agy hajxy jecy yajwá'xäbä. ²⁷Ja'a jäya'ay ja'a Diosmädia'agy jecy nägäpxäbä,

Juan je'e. Jaduhñä Dios jecy miänaañ coo ja'a quiuguexy hänäjty jayøjp quixea'añ coo ja'a cu'ug ween yajwiinxiic yajwiingapxø'øy coo ja'a yhaxøøgcuhdujt hajxy ñajtshixø'øwät. Høxháamhøch hijty ngäda'aga'añ. Jayøjpä Juan quiejxä; høxháamhøch njaančh cädaacy.

²⁸Ni pøn jaduhñ jäda'ahaty quia'a mäbaady hädaa yaabä naaxwiin nebiä Juan mäyajnäbejpä ja'a cuhdujt miøødän. Tøyhajt jaduhñ. Pero cooçh hänäjty tøø nho'nä, cooçh hänäjty tøø nnøcxtägach maaçh nhuuc tsohmän, pønjaty ja'a Diosmädia'agy hänäjty mäbögaamb ja'a høøchcøxpä, maas may ja'a cuhdujt hajxy hänäjty miøødhada'añ quejee ja'a Juan jäda'ahaty miøødän, hoyyä møjcuhtdujt hajxy hänäjty quia'a ja møødä.

²⁹Coo ja'a cu'ughajxy jaduhñ miädooyy møødä yajnähuudiutpädøjc-hajxy, mänitä Dios hajxy quiapxpaaty coo yhooyä, je'eguiøxpä coo hajxy hänäjty tøø yajnäbetyii ja'a Juángäm. ³⁰Pero ja'a fariseoshajxy møødä ley-yajnähixøøbiähajxy, cab hajxy hänäjty tøø yajnäbetyii ja'a Juángäm. Paadiä Dios hajxy quia'a jøjpøgøøyy. Cabä jioot hajxy hänäjty chocy coo hajxy yajnähwa'adsøøjät ja'a Diósäm.

³¹Mänitä Jesús miänaañ:

—Nhuuc yajmäbäadyhøch ja'a jäya'ayhajxy jäda'ahatypä.

³²Cab hajxy tii yhojiäwø'owa'añ. Jaduhñ mäwíinäts hajxy je'e nebiä pigäna'c-hajxy wiinhecpän. Coo hajxy naxy miech häyø'pä tøjpa'c, mänitä miäbigäna'c hajxy

ñäma'ay: “Tøø højts nja xu'uxy, pero cab hajxy tøø mhech. Tøø højts hojiøøñä nja høy, pero cab hajxy tøø mjø'øy.” ³³Hoorä, coo ja'a Juan mäyajnäbejpä miejch, cabä tsajcaagy hänäjty quiaaya'añ, ni ja'a vino hänäjty quia'a hu'uga'añ. Y mijts jaduhñ mänaamb coo quiuhmäñø'øy.

³⁴Y cooçh nbeamejtspä, høøch ja'a Diosquexypä, mänítøch ndägøøyy caabiä huucpä. Jaduhñch mijts xñänøømbä cooçh nwi'i quiaaya'añ, cooçh nwi'i yhu'uga'añ, cooçhä pojpäya'ay cädieejäya'ay nmägu'ughaty møødä yajnähuudiutpädøjc. ³⁵Pønjaty ja'a Dios jaančh jahmiejtsp, yajcähxø'py hajxy jaduhñ coo ja'a Dioswiinmahñdy hajxy miøødä.

³⁶Mänitä fariseo ja'a Jesús tu'ug hoy wioy caabiä. Simón hänäjty xiøhaty. Mänit hajxy yhänaaguiädaacy caabiä maa ja'a Simón tiøjcän. ³⁷Mänitä to'oxiøjc tu'ug miejch cuhhiñbä. Haxøøgcuhdujt hänäjty miøød. Tøø hänäjty miädoyhaty coo ja'a Jesús jiiby tøø miech maa ja'a Simón tiøjcän. Perfume quionmejts alabastrofrascoty. ³⁸Mänit tiägøøyy jøøbiä. Mänitä Jesús tiecypiuju wyiinnøøhaam. Mänit tiecymieexy quiuhwaayhaam. Mänit tiecychu'xy. Mänit tiecyñähjahxy perfumehaam.

³⁹Mänitä Simón tiägøøyy tajpä maabiä: “Coo ja'a Jesús häxøpy quiunajuøhñdiä, tøø häxøpy ñajuø'øy coo yø'ø to'oxiøjc quiuhhiñä.” ⁴⁰Mänitä Jesús ja'a Simón ñämaayy:

—Simón, tsøg mädiäacäm.

Mänitä Simón yhadsooy:

—Wiindsón, tsoc.

⁴¹Mänitä Jesús miänaañ:

—Jimä jäya'ay hijty tu'ug miänuu'xyhadyii jäya'ay metscä. Tu'jäya'ay hänajty miänuu'xyhaty mägooxmägo'x denarios. Jatu'ug, juxychägui'xmajc. ⁴²Cab hajxy hänajty tii miøødä nebiä nüu'xy hajxy yajnahwá'adsät. Mänit hajxy nämaayyá: “Weends yhity.” Hoorä, pønäda'a maas mädsógäp.

⁴³Mänitä Simón yhadsooy:

—Jue'eda'a, ja'a craa ja'a nüu'xy maas may hijty miøødpä.

Mänitä Jesús miänaañ:

—Je'e pues.

⁴⁴Mänitä Jesús ja'a to'oxiøjc miøjhee'py. Mänitä Simón nämaayy:

—Coočh yaa ndägøøyy maa miich mdøgootiän, cábøch miich nøø tøø xmiø'oy coočh ndecypiújät. Jaduhñ hajxy naxy nguhdujthájtäm. Pero yø'ø to'oxiøjc, wyiinnøøháamhøch ndecy tøø xpiujjä, quiuhwaayháamhøch ndecy tøø xmieexä. ⁴⁵Cábøch miich tøø xchu'xy, pero yø'ø to'oxiøjc, tehngájnoch ndecy xwyl'i chu'xä.

⁴⁶Cábøch miich ja'a nguhwaay tøø xyhoonä. Jaduhñ hajxy naxy nguhdujthájtäm. Pero yø'ø to'oxiøjc, perfumeháamhøch ndecy tøø xyhoonä. ⁴⁷Xjiaančh tehñ chójpøch yø'øduhñ; paadiä piojpä quiädieey yajnahwáatsäxä, hoy hijty may jia møødä. Pero pønä pojpä cädieey hijty ca'a jaty møød, cábøch jaduhñ xjiaty wiingudsähgø'øy.

⁴⁸Mänitä Jesús ja'a to'oxiøjc nämaayy:

—Tøøčh miich ja'a mbojpä mgädieey nyajnahwáatsäm.

⁴⁹Ja'a hajxy hänajty jiiyb pahäñaabiä, mänit hajxy tiägøøyy niñamáayyäbä:

—Maa ja'a cuhdujtäda'a tøø yhuuc paatpä coo ja'a pojpä cädieey yajnahwa'ačh.

⁵⁰Mänitä Jesús ja'a to'oxiøjc niñamáaguiumbä:

—Coočh nmädia'agy tøø xmiäbøjcä, páadyhøch ja'a mbojpä mgädieey tøø nyajnahwa'ačh. Nøcxnä jootcujc.

8 Mänitä Jesús hajxy tiägøøyy wädijpä wiinduhmyhagajpt møødä jiamioødhajxy ja'a nämajmetspä. Diosmädia'agy-yajwa'xpä hajxy hänajty wiädity. Jaduhñ Jesús hänajty miäna'añ cooc ja'a Dios ja'a miäjaa hänajty yajcähxø'øgaannä. ²Quipxiä to'oxiøjc-hajxy hänajty nämay piawädijpä, ja'a Jesús hänajty tøø yajpa'amnáxiäbä, møød ja'a møjcu'u hajxy hänajty tøø yajnahwa'ačhijäbä. Paadiä Jesús hajxy hänajty piawädity, mioobiä Jesús hajxy hänajty tijaty je'e hänajty miäjuyhajpy. María ja'a to'oxiøjc hänajty tu'ug xiøhaty ja'a Magdalatsohmbä. Juxtujc ja'a møjcu'u hänajty tøø yajnahwa'ačhii. ³Jatu'ug hänajty xiøhaty Juana, ja'a Cuza tio'oxiøjc. Ja'a Cuza hänajty copc-hajp maa ja'a Herodes hänajty yhane'emiän. Møødä Susana hänajty piawädijpä.

⁴Mänitä Jesús jäya'ay may nänøcxä. Mayhagajpt hajxy hänajty chooñ. Coo hajxy hänajty may tøø yhamugø'øy, mänitä Jesús tiägøøyy yajwiingapxøøbiä yajmäbaadyhaam:

⁵—Mänitä jäya'ay tu'ug tiu'ubøjcy niippä. Coo ja'a tøømd tiägøøyy

wõjpä, näje'e ja'a tømmd quiahy tu'haam. Mänitä muuxyhajxy hoy yajpädø'ogy. Mäduhñtiä ja'a muuxyhajxy quia'a yajpädø'cy, je'edsä jäya'ay jiaac yajtehñ. ⁶Näje'e ja'a tømmd quiahy tsaanähgøxp. Ja mujx je'eduhñ, pero tøøts. Hiñ, weeñtiä ja'a naax jim tsaanähgøxp. ⁷Näje'e ja'a tømmd quiahy haptiooty. Ja mujx je'eduhñ. Ja yee'c, pero caj ñä'a tømbejty. Hiñ, ja'a hapyt je'e xaam. ⁸Näje'e ja'a tømmd quiahy maa ja'a hoñaaxän. May je'e tiømhajty høxtä mägo'xhaam.

Mänitä Jesús møc miänaañ:

—Pøn hädaa wiinjuøby, wéenhøch hädaa nmädia'agy xmiäbøjcä.

⁹Mänitä Jesús miäyajtøwä neby jaduhñ miädia'agytiägø'oy. Ja'a miägu'ughajpähajxy jaduhñ yajtøw. ¹⁰Mänitä Jesús yhadsooy:

—Chojpiä Dios jioot jaduhñ coo mijts mwiinjuø'owät nebiä miäjaa yajcähxø'oga'añ. Pero ja'a häna'c-hajxy jaac yaabä, cabä Diosmädia'agy hajxy tiu'jooftsoy. Hoyyä mädia'agy hajxy jia mädoy, pero cab hajxy wyiinjuø'oy tii jaduhñ jia mädiaacypy.

¹¹Jaduhñds miädia'agytiägø'oy nebiøch hajxy tøø nyajwiingapxø'oyän. Jaduhñdsä tømmd miäbaady nebiä Diosmädia'aguian. ¹²Ja'a tømmd cáhwäbä tu'haam, jaduhñ miäbaady nebiä jäya'ay ja'a Diosmädia'agy hajxy jia mädoyyän. Coö ja'a mõjcu'u miech, mänit hajxy wyiinhøøñii neby hajxy jaduhñ quia'a mäsögät, nebiä piojpä quiädieyhajxy jaduhñ quia'a nähwá'adsät. ¹³Y ja'a tømmd

cáhwäbä tsaanähgøxp, jaduhñds je'e miäbaatpä neby hajxy jia mädoyyän. Tu'habaquiä hajxy jaduhñ xioonda'agy. Pero cab hajxy hamuumdu'joot pianøcxy. Coö hajxy cøxypänejiä tiuñii, mänit hajxy ñajtshixøøñä. ¹⁴Y ja'a tømmd cáhwäbä haptiooty, jaduhñds je'e miäbaatpä neby hajxy jia mädoyyän. Pero cabä yhamdsoo cuhdujt hajxy ñajtshixø'owa'añ møødä miäyøøhajt. Cabä Diosmädia'agy hajxy hoy quiudiuna'añ. ¹⁵Y ja'a tømmd cáhwäbä hoñaaxooty, jaduhñ miäbaady nebiä Diosmädia'agy hajxy hamuumdu'joot mäsøjpän. Jaançh tehñ yhoy hajxy jaduhñ quiudiunñ.

¹⁶'Coö jäya'ay jøøn hajxy quiuhno'ogø'oy, cøxp hajxy yujcoñ neby hajxy quiudøø'xøøjät, ja'a hajxy tøjtagøøbiä. Cabä pøn jøøn quiuhjupy, ni maabejtpa'c hajxy quia'a päda'agy. ¹⁷Jaduhñ mäwfinäts mijts ja'a nmädiä'agyhøch hajxy xwyiinjuø'owaanä, ja'a tsipjätypøch jaduhñ tøø nyajwiingapxø'oyäbä.

¹⁸'Huuc wiinjuø'ow hajxy hoy. Pønhoch nmädia'agy tøø xmiäbøjcä, njaac yajñähixø'owáambioch je'e. Pønhoch nmädia'agy tøø xquia'a mäsøjcä, cáboch tii nyajñähixø'owaanä. Høxtä jiahdiägoyyaamby hajxy je'e mädyii tyijy ja'a tøø wyiinjuø'oy.

¹⁹Mänitä Jesús ñamejtsä ja'a tiaj møødä piuhya'ayhajxy. Cab hajxy hoy tiehñ wyiingumedsøøyy, je'eguiøxpä coö ja'a jäya'ayhajxy hänajty ñamayyä jiiby tøgooty maa ja'a Jesús hänajtiän. ²⁰Mänitä Jesús ñämaayyä:

—Ximä mdajhajxy tøgaguuy mөөдä mbuhya'ayhajxy. Miič hajxy xjia wi'i miөөdmädia'agaamb.

²¹Mänitä Jesús miänaaň:

—Pөnä Diosmädia'agy jaduhñ mäböjp, pөñ jaduhñ cudiuumb, je'eč ndajhajpy, je'eč nbuhya'ayhajpy.

²²Miäwiinghoocpä ja'a Jesúshajxy tiägөөyy barcojooty mөөдä miägu'ughajpähajxy. Mänitä Jesús miänaaň:

—Jam hajxy jim mejyhawiimb.

Mänit hajxy jiaanč tu'uböjcy. ²³Nөcxnä hajxy hänajty jaduhñ, mänitä Jesús miaaho'cy. Mänitä poj mөc piädö'cy. Mänitä nөө quiubojөөyy barcojooty. Hújtsnäp ja'a barco hänajty. ²⁴Mänitä Jesús hajxy hoy yuxy. Mänit hajxy ñämaayy:

—Wiindsón, Wiindsón, pädö'ög, quinaambä barco cham.

Mänitä Jesús piädö'cy. Mänitä poj yhojy mөөдä nөө. Mänitä poj yuungөөyy. Moñdiucy jaduhñ jiajnä. ²⁵Mänitä Jesús ja'a miägu'ughajpähajxy ñämaayy:

—Tii hajxy coo mwi'i chähgö'öy. Nej, cab hajxy mnajuö'öyä cooč mijts homiänaajä ngüeendähada'aň.

Jaanč tehñ yagjuөөyy hajxy jaduhñ. Mänit hajxy hamiñ haxөpy ñiñämaayyä:

—Pөnäda'a yө'өduhñ coo ja'a miädia'agy miäböjcxä ja'a poj mөөдä nөө.

²⁶Mänit hajxy mieyhawiimpädsөmñnä jim maa ja'a naax hänajty xiöhatian Gadara, jim jaduhñ mejyhawiimpä maa ja'a Galileanaaxootian. ²⁷Coo ja'a Jesús biarcopädsөmny, mänitä jäya'ay

tu'ug miejch Jesús wyiinduum, ja'a jim cajptooty tsänaabiä. Tөө hänajty jegö'öy mänaa ja'a mähdiojc möjcu'u hänajty tөө ñämečhijän. Cabä wit hänajty miөөdhajnä, ni quia'a häña'ay hänajty tögooty. Jim hänajty yhity maa ja'a cabäsantän. ²⁸Coo ja'a Jesús yhijxy, mänit wyiinjjcädaacy. Mänitä möjcu'uhajxy yaaxy:

—Jesús, tii höjts xwia'ana'aň.

Dios miič xyHuunghajp ja'a tsajpootypä. Tunä mayhajt, ca'a höjts jiiby xquiexy maa jiaanč tehñ chaačpäñ.

²⁹Paadiä mähdiojc jaduhñ yaaxy, je'leguioxpä coo ja'a Jesús ja'a möjcu'u hänajty tөө yhane'emy coo ñähwa'adsöøjät. Mayhooc ja'a mähdiojc hänajty tөө ñämečhii ja'a möjcu'ujäm. Paadiä jäya'ayhajxy hänajty jia wi'i yaghida'aň cө'öxoch tecyxioch cadenahaam neby jaduhñ hoy yhidät. Pero nimiäpodöөyyäp hänajty je'e, y yajnөcxäp hänajty pactuum ja'a möjcu'ujäm. ³⁰Mänitä Jesús ja'a mähdiojc miäyajtөөyy:

—Tii mxöhaty.

Mänit yhadsooyy:

—Legiónhöch nxöhaty.

Paady jaduhñ miänaaň coo ja'a möjcu'u hänajty may mөөдä.

³¹Mänitä möjcu'u ja'a Jesús hajxy miänuu'xtaacy coo hajxy jiiby quia'a quexöøjät möjcu'uhaam maa jiaanč tehñ chaačpäñ.

³²Jimä mayhädsөm hänajty yuumy tunmөjc. Mänitä möjcu'u ja'a Jesús hajxy miänuu'xtáaccumbä coo hajxy jim quieXöøjät maa ja'a mayhädsөm hänajtiän. Mänitä Jesús cuhdujt miooyy. ³³Mänitä mähdiojc ja'a möjcu'u ñähwáatsänä.

Mänitä hädsøm̄hajxy hoy nāmečhii. Mänit hajxy wyiinmānacpāyø'cy. Mänit hajxy quiuhgahnajxy naaxøjpcøxp mejjiooty. Jiiby hajxy cøjx ñøho'ogø'øy.

³⁴Coo ja'a

hädsøm̄güeendāhajpāhajxy jaduhñ yhiyx, mänit hajxy piäyø'cy. Mänitā cu'ug hajxy hoy yhawaanā cajptooty mөөdā cajtpa'a. ³⁵⁻³⁶Mänitā cu'ughajxy hānajt y nøcxy yhixa'añ neby hānajt tøø jiadyiijān. Mänit hajxy miejch maa ja'a Jesús hānajtīān. Jiibiā mähdiøjc ja'a Jesús hānajt wyiinhāñ'ay, ja'a møjcu'u hānajt tøø nāhwa'ačhijābā. Tøø wit hānajt piägøøñā. Tøø hānajt wyiinmahñdymejtsnā. Coo ja'a cu'ughajxy jaduhñ yhiyx, mänit hajxy chāhgøøbiøjcy. Paady hajxy chāhgøøyy, haxøøgjāya'ay tyijy ja'a Jesús. Mänitā cu'ughajxy yhawāñāxā nebiā mähdiøjc ja'a møjcu'u hānajt tøø nāhwa'ačhijān. Ja'a hajxy hānajt tøø yhiñiābā, je'e hajxy jaduhñ nāgapx. ³⁷⁻³⁹Mänitā Jesús hajxy tiägøøyy mänuu'xtaacpä coo jim chōonāt Gadara. Hiñ, jaanč tehñ chāhgøøby hajxy hānajt. Jim tyijy ja'a Jesús cøxpānejpiā jiaac jatçø'owa'añ. Ja'a mähdiøjc hānajt tøø nāhwā'ačhābā, mänitā Jesús miānuu'xtaacy coo cu miødhajt. Mänitā Jesús yhadsooy coo miāhmø'owāt maa quiajptān:

—Nøcx maa ja'a mdøjcān; mädia'ag nebiaty ja'a Dios tøø xpiuhbety.

Mänitā craa jiaanč nøcxy, miādiaacy jiiby cajptooty nebiaty hānajt tøø piuhbedyiijām ja'a Jesús. Mänitā Jesús biarcotägøøñā, wyiimbijnā.

⁴⁰Coo ja'a Jesús jim miejtstāgajch mejyhawiimb, jimā cu'ughajxy hānajt yhahixy. Mänit hajxy xioondaacy. ⁴¹Mänitā jāya'ay tu'ug miejch ja'a xøhajpā Jairo. Tsajtøjwiindsøn hānajt tiuumby. Mänitā Jesús wyiinjicādaacy. Mänit miānuu'xtaacy coo ñøcxāt maa ja'a tiøjcān. ⁴²Jimā Jairo yhuung hānajt yho'ogaannā. Tiu'ughuung hānajt je'e. Majmetscjomøjt ja'a to'oxyhāna'c hānajt miøødā. Mänitā Jesús tiu'ubøjcy. Mayyā jāya'ayhajxy piadu'ubøjcy, høxtā yhanø'tsmujp ja'a Jesús hajxy hānajt.

⁴³⁻⁴⁴Mänitā Jesús ja'a tāj jāya'ay tu'ug jīguyohdiägøøyyā. Pa'ammøød hānajt je'e. Majmetscjomøjt ja'a pa'am hānajt tøø miähäyoy. Ñø'ty hānajt wi'i xiee'xp, pero weenjaty weenjaty. Ni pøn hānajt quia'a najuø'øy nebiā choomiāyāt. Mänitā Jesús wyitpa'a ñāhdōonāxā. Mänitiā ja'a tāj jāya'ay ñø'ty yhadujnā. ⁴⁵Mänitā Jesús miānaañ:

—Pøñhöch xñāhdoon.

Ni pøn quia'a mānaañ coo hajxy ñāhdoon. Mänitā Pedrohajxy miānaañ:

—Wiindsøn, xjiaanč tehñ yhanø'tsmujp miič ja'a cu'ug. Tii nyajnajuoøyyām pøn tøø xñāhdoñ.

⁴⁶Mänitā Jesús miānāngumbā:

—Nnajuøøbiøch coo pøn tøø miābaadø'øy høøch nmājaahaam. Pāadyhöch jaduhñ tøø nnā'ā najuø'øy cooçh hajxy tøø xñāhdoñ.

⁴⁷Mänitā tāj jāya'ay jaduhñ ñajuøøyy coo ja'a Jesús hānajt ñajuø'øy coo je'e hānajt tøø miānāhdoñ. Mänitā Jesús

wyিংgumedsooyy tsäyúuyyáp. Mänit Jesús wyiinjjicádaacy. Mänit ñägapxy cu'ughagujc cooc ja'a Jesús wyit hánajty tøø ñähdoonä, y cooc mänitiä pia'amnajxy. ⁴⁸Mänit Jesús ja'a tajjäya'ay ñämaayy:

—Huung, paady miich tøø mba'amnaxy coo tøø mmäböcy. Nöcxnä jootcujc.

⁴⁹Jimä Jesús hánajty miädia'agyñä, mänitä jäya'ay tu'ug miejch. Jim hánajty tøø chohnda'agy maa ja'a Jairo tiöjcän. Mänitä Jairo ñämaayyä:

—Tøø ja'a mhuung yho'ogy. Cabä wiindsón mhadsíjpnät.

⁵⁰Miädoow ja'a Jesús jaduhñ. Mänitä Jairo ñämaayy:

—Ca'a mjootmayhaty. Mäböc. Jujyipiögäp ja'a mhuung häyaa.

⁵¹Mänit hajxy jim miejtsnä maa ja'a Jairo tiöjcän. Cooc ja'a Jesús tiöjtägøoyy, caj pøn miøødtöjtägøoyy, jagooyyä Pedro møødä Juan møødä quixy tiaj tieedy. ⁵²Tøghaguuy ja'a cu'ughajxy miähmøoyy jøöbiä xuu'tspä. Mänitä Jesús miänaañ:

—Ca'a hajxy mwil'i jio'oy mwil'i xiuuäch. Caj tøø yho'ogy, nä'a maab jaduhñ.

⁵³Mänitä Jesús ñäxiicä. Ñajuøöby hajxy hánajty coo ja'a quixy hánajty tøø yho'ogy. ⁵⁴Mänitä Jesús ja'a quixy quio'ø miajtsä. Mänitä Jesús møc miänaañ:

—Huung, pädø'og.

⁵⁵Mänitä quixy jujyipiöjcy. Mänit piädø'cy. Mänitä Jesús miänaañ coo hajxy yajcáyät.

⁵⁶Jaanč tehñ yagjuøoyy ja'a tiaj ja'a tieedy jaduhñ. Mänitä Jesús miänaañ coo hajxy pøn quia'a

yajmøødmädiá'agät neby hánajty tøø jiatian.

9 Mänitä Jesús ja'a jiamioød miøjyaaxy ja'a hajxy nämajmetspä. Mänitä cuhdujt hajxy miooyyä coo ja'a møjcu'uba'ammøødpä hajxy nägøxiä yajnahwá'adsät. Møødä mäjaa hajxy miooyyäbä coo ja'a pa'amjäya'ay hajxy yajmøcpögät. ²Mänit hajxy wyiinguejxä coo ja'a Diosmädia'agy hajxy yajwá'xät, coo ja'a pa'amjäya'ay hajxy yajmøcpögät. Jaduhñ hajxy miädiá'agät coo ja'a Dios ja'a miäjaa yajcähxø'øga'añ. ³Mänit hajxy ñämaayyä:

—Cab hajxy tii mmänöcxät, ni cuhdajt, ni pijty, ni tsajcaagy, ni xädø'öñ. Tu'xojxc-hajtiä ja'a mwit hajxy mmänöcxät, ca'a mietscä. ⁴Homiädyii töjca hajxy mmejtstá'agät, jim hajxy mmähmø'øwät høxtä coonä hajxy jim jadähooc mwiimbídat.

⁵Y coo hajxy maa xquia'a yajtöjtägø'owá'anät, mänit hajxy jim mdsóonät maa ja'a cajptän. Mänitä mdecy hajxy mwiinwóbät nebiä hijxtahñ jaduhñ miähmø'øwät coo mijts tøø xquia'a yajtöjtägø'oy — nömä Jesús miänaañ.

⁶Mänit hajxy tiu'uböjcy. Wiinduhmyhagajpt hajxy hánajty wiädity Diosmädia'agy-yajwa'xpä, pa'amjäya'ay-yajmøcpöjpä.

⁷Ja'a Herodes hánajty jim tuumb gobernador. Mänit miädoyhajty nebiatiä Jesús ja'a hijxtahñ hánajty yajcähxø'øguiän. Cab hánajty ñajuø'oy nebiä wyiinmahñdyhädät. Hix, näje'e hajxy hánajty miäna'añ cooc

tyijy ja'a Juan hānajt̃y t̃oθ
 jiuyp̃iocy. Hix, t̃oθ ja'a Juan
 hānajt̃y yagho'ogyii. ⁸Nāje'e hajxy
 hānajt̃y miānaambā cooc tyijy
 je'e Elías, ja'a Diosmādia'agy jecy
 yajwá'xábā. Nāje'e hajxy hānajt̃y
 jiaac mānaambā cooc tyijy ja'a
 jecyjiāya'ay t̃oθ jiuyp̃iocy, ja'a
 Diosmādia'agy jecy yajwá'xábā.

⁹Mānitā Herodes miānaañ:

—H̃oθchā Juan nyajyo'puxā.
 P̃onāda'a jaduh̃ wādiip̃.
 Madiú'uj̃och jaduh̃ nmādoy
 yajcāhx̃o'ogy.

Jiaanč̃ teh̃m yhixaaambiā
 Herodes ja'a Jesús hānajt̃y.

¹⁰Coo ja'a Jesús jiamĩoθdhajxy
 wyiimbij̃tagajch, mānitā Jesús
 hajxy yajm̃oθdmādiaacy nebiaty
 hajxy hānajt̃y t̃oθ wiādity. Mānit
 hajxy mĩoθdñocxā pactuum,
 jim̃ māwiingōñ maa ja'a cajpt
 hānajt̃y xĩohatiān Betsaida.

¹¹Coo ja'a cu'ughajxy jaduh̃
 miādoyhajty, mānitā Jesús hajxy jim̃
 piamejch. Mānit hajxy nāmaayyā
 coo hajxy jim̃ miāhm̃o'owāt.
 Mānitā Diosmādia'agy hajxy
 yajm̃oθdmādiaacā cooc ja'a Dios
 ja'a miājaa yajcāhx̃o'oga'añ.
 M̃oθdā pa'amjāya'ayhajxy may
 yajm̃ocp̃ojcā.

¹²Tsuuj̃oñāp̃ hānajt̃y, mānitā
 Jesús wyiingumeds̃ooyyā ja'a
 jiamĩoθdhajxy ja'a nāmajmetspā.
 Mānitā Jesús nāmaayyā:

—Nāma'aw ỹo'θ jāya'ayhajxy coo
 hajxy ñocxy pioo'xnā, coo hajxy
 ñocxy quiayh̃oxta'ay wiingtuum
 maa ja'a cajpt miāwiingoñān. Yaa
 maa hajxy nh̃jt̃ām, cabā tii yaa.

¹³Mānitā Jesús miānaañ:

—Huuc yajcay mijts.

Mānit hajxy yhadsooyy:

—Cab h̃ojts tii nm̃oθdā; jagooyyā
 h̃ojts tsajcaagy māgooxc nm̃oθdā
 m̃oθdā hacx metscā. T̃ogā
 ñocxāp̃ h̃ojts njuuyyā ja'a hajxy
 quiayaambiā, hoy hajxy jia
 nāmayyā.

¹⁴Nāmāgoox̃mil ja'a
 ya'adĩojc-hajxy hānajt̃y nāg̃oxiā.
 Mānitā Jesús nāmaayy ja'a
 jiamĩoθdhajxy:

—Nāma'aw hajxy ween hajxy
 yhānaaguiāda'agy naax̃wiin
 nājuxychāgui'xmajc̃jaty.

¹⁵Mānit hajxy nāmaayy coo hajxy
 jaduh̃ yhānaaguiādā'agāt. Mānit
 hajxy yhānaaguiādaacy nāg̃oxiā.

¹⁶Mānitā Jesús ja'a māgooxpā
 tsajcaagy quiooñdsooyy m̃oθdā
 metspā hacx. Mānit chajhee'py.
 Mānitā Dios pia'yaaxy, miānaañ:
 —Dioscuj̃u'uyāp̃ coo h̃ojts hādaa
 t̃oθ xmio'oy.

Mānit jaduh̃ yhaguid̃ooyy.
 Mānitā jiamĩoθd̃ miooyy coo hajxy
 jaduh̃ yajwá'xāt maa ja'a cu'ugān.
¹⁷Mānit hajxy nāg̃oxiā quiaayy
 cu'uxiā. Majmejtscach ja'a caadiuc
 quiunajxy.

¹⁸Wiingx̃oθ hānajt̃y je'ebā,
 jim̃ā Jesús ja'a Tieedy hānajt̃y
 pia'ya'axy haniduih̃m̃duum. Jim̃ā
 jiamĩoθdhajxy hānajt̃y mĩoθdā.
 Mānitā Jesús yajt̃ooyy:

—Nébyh̃och ja'a cu'ughajxy
 x̃nāñomy p̃oñh̃och h̃oθch.

¹⁹Mānit hajxy yhadsooyy:
 —Nāje'e hajxy miāna'añ cooc
 tyijy miič̃h̃ m̃Juangā ja'a hijty
 māyajnābejpā. Nāje'e hajxy
 miānaambā cooc tyijy miič̃h̃
 mh̃Elíasā. Nāje'e hajxy jiaac
 mānaambā cooc tyijy ja'a

jecyjiaaya'ay tøø jiuypioçy, ja'a Diosmädia'agy jecy yajwá'xäbä, y cooc tyijy miich mje'ejä.

²⁰Mänitä Jesús yajtøøgumbä:

—Míjtsäts, nej mijts mmánaambä pøn xtyijy høøch.

Mänitä Pedro yhadsooyy:

—Diosquexy miich.

²¹Mänitä Jesús møc miánaañ

coo hajxy quia'a nägäpät pøn hänajty je'e. ²²Mänitä Jesús miánaangumbä:

—Høøch ja'a Diosquexypä, hoyhóyhøch njaanç tehñ chaaçhpøga'añ. Cábøch ja'a tsajtøjwiindsøn'hajxy xñä'ägädä wiingudsähgø'owa'añ, ni ja'a teedywiindsøn'hajxy, ni ja'a jäya'ayhajxy jim cuhdujtmøødpä tsajtøgooty. Xyagho'ogáambøch hajxy, pero cudägøøgxøjøch njujypioğa'añ.

²³Mänit jiaac mänáangumbä:

—Pønjátyhøch nmädia'agy xpiaadu'ubøgáañäp, ween yhamdsoo cuhdujt hajxy ñajtshixø'oy, ween hajxy chaaçhpøjpä jabom-jabom nébioch ndsaaçhpøga'añän. Jadúhñhøch nmädia'agy hajxy hoy xpianøçxät. ²⁴Pøn jiugyhajt ja wi'i yaghoyø'owaamb, nä'ägä cuhdägoyyaamb je'e. Pero pøn jiugyhajt jaduñ yajtägoyyaamb ja'a høøchcøxpä, nä'ägä hodiium je'e miähmø'owa'añ. ²⁵Coo hajxy hodiium mga'a mmähmø'owät, cab hajxy jaduñ mnnyaghoyø'owøjät, hoy hajxy mja mäyøøjä hädaa yaabä naaxwiin. ²⁶Pøñhøch xmiädsähdiuumb møødhøch nmädia'agyquiøxpä, mänitøch jaduñ nmädsähdiunaambä coøch hänajty ngädaactägatsa'añ.

Hajajaamb hänajty yaa neby jim yhajajjiän tsajpootyp maaçh nDeedy yhitiän, maa ja'a mioonsähajxy yhitiän. ²⁷Tøyhájthøch jaduñ nmána'añ, ja'a hajxy yaa tánaabiä, näje'e hajxy jaduñ quia'a tsoj ho'oga'añ høxtä coonä ja'a Dios ja'a miäjaa hänajty yajcähxø'oga'añ.

²⁸Cuductujxøø ja'a Jesús

ja'a Pedro miøødwiimbejty tunguhduum Diospa'yaaxpä, møødä Juan møødä Jacobo.

²⁹Jimä Jesús ja'a Tieedy hänajty pia'ya'axy, mänitä wyiin jiojp høxtä haamb høxtä tsämaamb quiähxø'cy. Jaanç tehñ pioob ja'a wyit jaduñ jiajnä. ³⁰⁻³¹Mänitä Moisésähajxy ñäguehxtø'xy maa jiajy maa chämamiän møødä Elías. Mänitä Jesús hajxy miøødtägøøyy mädiaacpä. Je'e hajxy hänajty miädiaacyy coo ja'a Jesús hänajty jim nøçxy yho'oga'añ Jerusalén.

³²Hoyyä Pedrohajxy hänajty jia wi'i mia'awa'añ, cab hajxy nä'ägädä maaho'cy. Mänit hajxy yhiixy coo ja'a Jesúsähajxy hänajty jiajy chämamy møødä Moisés møødä Elías. ³³Coo ja'a Moisésähajxy hänajty wyiimbidaañnä, coo ja'a Jesús hajxy hänajty piuhwa'adsaannä, mänitä Pedro ja'a Jesús nämäaayy:

—Wiindsøn, hoyøøyy jaduñ coo hajxy yaa tøø nbéjtäm. Ween højts tøjquemy tægøøg cu nhädiuñ, tu'ug miich mje'e, tu'ug Moisés jie'e, tu'ug Elías jie'e.

Nä'a nagoobä ja'a Pedro jaduñ miánaañ. ³⁴Mänitä nämä'a tehñ miapxy quiädaacy maa hajxy hänajtiän. Nädägooyy hajxy jaduñ. Mänitä Pedrohajxy chähgøøbiøjcy.

³⁵Mänit hajxy miädooyy ja'a Dios quiapxy nämä'ajooty:

—Høøch nHuung hädaa. Høøch tøø nwiinguexy. Mhamädoowhjtäp ja'a miädia'agy hajxy.

³⁶Mänitä Jesús hajxy yhiixy coo hänajty nidiuhm tiänaañä. Hamoñ hajxy jaduhñ miähmøøñä. Cab hajxy pøn yajmøødmädiaacy nebiaty hajxy hänajty tøø yhiixy.

³⁷Cujaboom hajxy jim wyiimbijnä tunguhduum. Mänitä Jesús jäya'ay may jiojcubaadøøyyä. ³⁸⁻³⁹Mänit tul'jäya'ay møc quiapxy maa ja'a cu'ugän:

—Wiindsón, tú'uquiøch nhuung. Naxyhøch nhuung mõjcu'u xjiaančh tehñ nämejsä. Møc jaduhñ ya'axy, møc chäyuy. Høxtä hahoo'p jaduhñ. Hanaxiä jaduhñ chaačhtiuñii, y cab jaduhñ ñä'ägädä nähwa'ačh. Wiindsón, tunä mayhajt, yajnahwäätsägøch nhuung.

⁴⁰Tøøch ja'a mjamiøød nja wi'i miänuu'xta'agy cooçh nhuung hajxy xyajnahwäätsät, pero cab hajxy jaduhñ ñä'ä jajty.

⁴¹Mänitä Jesús ja'a jiamiøød ñämaayy:

—Nej, cájtäm mijts mänaa mmäbøga'añä. Pämädúhñtiøch mijts jaduhñ njaac mämee'xtuga'añ.

Mänitä cuhuung ñämaayy:

—Woominxa mhuung.

⁴²Cahnä craa hänajty miechñä maa ja'a Jesúsän, mänit yajcädaawä ja'a mõjcu'ujäm. Mänit yajtsäyuuyä. Mänitä Jesús ja'a mõjcu'u yhøxquejxy. Mänitä craa ñähwaach. Mänitä tieedy yajcø'ødägøøyyä. ⁴³Mänitä cu'ughajxy nägøxiä yagjuøøyy coo ja'a Dios miøjjä jiaančh,

nebiä Jesús ja'a hijxtahnd hänajty yajcähxø'øguiän.

Mänitä Jesús ñämaayy ja'a jiamiøødhajxy:

⁴⁴—Hoy hajxy wiinjuø'ow; ca'a hajxy mjahdiägoy; høøch ja'a Diosquexypä, nmädsiphøch hajxy jim xyajcø'ødägø'owaamb maa ja'a cu'ughajxiän nägøxiä.

⁴⁵Pero cabä jiamiøødhajxy ñä'ägädä wiinjuøøyy neby hajxy hänajty tøø miøødmädia'agyijän. Hix, Jesús jaduhñ ca'a yajwiinjuøøyy. Cab hajxy jaduhñ yajtøøyy. Tsähgøøby hajxy hänajty.

⁴⁶Mänit hajxy tiägøøyy yajtsiptaacpä pøn cuhdujt maas mõ mo'owáañäp. ⁴⁷Ñajuøøbiä Jesús hänajty nebiaty hajxy hänajty tiajy miay. Mänitä pigäna'c hoy tu'ug wioy, piädaacy miøjc-haamby.

⁴⁸Mänit miänaañ:

—Pøn hädaa pigäna'c jaduhñ tsögäp ja'a høøchcøxpä, jaduhñ mäwíinäts høøch xchojpa. Y pønhoçh jaduhñ xchojpa, je'eçh nDeedy jaduhñ xjiahmiéjtsäp ja'ačh jaduhñ tøø xquiéxiäbä. Pøn ja'a mõjcuhdujt ca'a tsogaamb maa mijtsän, je'eds ja'a mõjcuhdujt jaduhñ nä'ägädä mo'owáañäp.

⁴⁹Mänitä Juan miänaañ:

—Wiindsón, tøø højts tul'jäya'ay nhixy. Miihcøxpä ja'a mõjcu'u hijty yhøxquexy. Mänit højts jaduhñ nnämaayy coo quia'a høxquejxnät, je'eguiøxpä coo højts xquia'a møødwädíjtäm.

⁵⁰Mänitä Jesús miänaañ:

—Cab hajxy jaduhñ cu mnämaayy. Pøn højts jaduhñ xquia'a mädsiphajtäm, je'e højts jaduhñ xmiäg'u'ughajtäm.

⁵¹Tøø hānajtj miāwiingooñnā coo ja'a Jesús hānajtj ñōcxaannā tsajpootyp, mānitā jioot yajmøødmādiaacy coo jim ñōcxnāt Jerusalén. ⁵²Mānitā jiamioød mejtstägøøg quiejxø'cy. Mānitā mejtstaact hajxy hoy jia høxta'ay maa ja'a cajpthuung tu'ugān jim Samarianaaxooty. ⁵³Pero cab hajxy jaduhñ ñā'ä tøjmooyyā, je'eguiøxpā coo hajxy hānajtj jim jiaac ñōcxa'añ Jerusalén. Hix, cabā Samariabā-jāya'ayhajxy hānajtj miøødnijootpaadyii ja'a jāya'ayhajxy hānajtj tsānaabiā Jerusalén. ⁵⁴Coo ja'a Jacobo jaduhñ miādooyy møødā Juan, mānitā Jesús hajxy ñāmaayy:

—Wiindsón, tāhooc ja'a Elías jøøn jim miøjyaaxy tsajpootyp nebiā haxøøgjāya'ayhajxy jaduhñ tióyāt. Nej, mmānā'anāp miich jaduhñ coo højts jøøn jim nmøjyáaxpāt tsajpootyp neby hajxy jaduhñ tióobiāt ja'a højts jaduhñ xquia'a tøjmo'owaambā.

⁵⁵Mānitā Jesús wyiinhee'ppejty; mānit yhojy:

—Mijts, cab hajxy mnajuø'øy coo haxøøgwiinmahñdy hajxy mmøødā. ⁵⁶Pāadyhøch yaa tøø ngāda'agy hādaa yaabā naaxwiin nébiøch ja'a jāya'ayhajxy jaduhñ nyajñahwa'ads nyajcuhwá'adsāt. Cábøch hajxy jaduhñ nyajcuhdāgoyya'añ.

Mānit hajxy jim tiu'ubøjnā, ñōcxy hajxy wiingcajpt.

⁵⁷Jim hajxy hānajtj tiu'uyo'oyñā, mānitā jāya'ay hajxy tu'ug piaaty jim tu'haam. Mānitā Jesús ñāmaayyā:

—Wiindsón, nja wi'i pianøcxáambiøch miich majaty miich mnøcxa'añān.

⁵⁸Mānitā Jesús miānaañ:

—Ja'a xøøgaa, jimā jiuut je'e; ja'a muuxy, jimā pie'eñ je'e; pero høøch ja'a Diosquexypā, cábøch ndøjc jaduhñ maačh nboø'x nhāñā'awāt.

⁵⁹Mānitā Jesús wiinghāna'c ñāmāaguumbā:

—Høøch padu'ubøjcāc.

Mānitā Jesús ñāmaayyā:

—Mānitøch miich nbadu'ubøgāt cooçh ndeedy hānajtj tøø yho'nā, cooçh hānajtj tøø nyajnaaxtägøøñā.

⁶⁰Mānitā Jesús miānaañ:

—Ja'a jāya'ayhajxy ca'a mábøjpa, je'e miich ja'a mdeedy hajxy xyajnaaxtägø'øwāanāp. Pero miich, ñōcx ja'a Diosmādia'agy yajwa'x coo ja'a Dios ja'a miājaa yajcāhxø'oga'añ.

⁶¹Mānitā Jesús ñāmaayyā wiingjāyā'ayāgumbā:

—Wiindsón, nja wi'i

pianøcxáambiøch miich, pero nõcxyhøch ja'a njujy nmāgu'ug nhuuc hawaanā jayøjp cooçh miich jaduhñ nbadu'ubøgaannā.

⁶²Mānitā Jesús yhadsooyy:

—Pønñhøch jaduhñ xjia wi'i piawāditaamb, cooçh nmādia'agy hamuumdu'joot xquia'a mábøjcāt, cábøch jaduhñ hoy xpianøcxāt.

10 Mānitā Jesús jāya'ay jiaac wiimbiyy nādägøøghii'xcumajc. Mānit hajxy metscaty metscaty quiejxø'cā majaty ja'a Jesús hānajtj ñōcxa'añān. ²Mānit hajxy ñāmaayyā:

—Nāmayyā jāya'ayhajxy jia mábøga'añ; je'eds ca'a hijp pøn ja'a Diosmādia'agy yajwá'xāp. Mānuu'xta'ag ja'a Dios hajxy coo ja'a Diosmādia'agy-yajwa'xpā

jiaac quéxät. ³Nøcx hajxy. Mnigwieendähadøjöp hajxy. Ca'awiindøyhäna'c-hagujc hajxy mwädita'añ. ⁴Cabä xuummy hajxy mmänøcxät, ni xädø'øñ. Tu'tehngä cø'og hajxy mmänøcxät. Cab hajxy pøn mwiindänaaxiøbät tu'haam. ⁵Coo hajxy muum maa mhamejtstä'agät, myajpoo'xäp ja'a cudøjc hajxy. “Weenä Dios hajxy xmio'oy ja'a hoyhajt ja'a weenhajt.” Jaduhñ hajxy mnämá'awät. ⁶Pø hojiäya'ay ja'a cudøjc-hajxy jaduhñ, mänitä Dios jiaančh mó'owät ja'a hoyhajt ja'a weenhajt; pø caj, cab hajxy jaduhñ mio'owøjät. Y cab hajxy jim mnä'ägä mähmø'owät. ⁷Cab hajxy tøjc-tøjc mwädität. Jim hajxy mnä'ägädä hídät maa hajxy hänäjty tøø mmejtsta'aguiän. Jim hajxy mmähu'ug mmägáyät. Je'e hajxy jaduhñ mhú'ugäp mgáyäp tijaty hajxy jaduhñ xmiooby. Hawiinmats jaduhñ coo hajxy jaduhñ xmió'owät, je'eguiøxpä coo hajxy mwiinguexiä. ⁸Homiädyii cajptä hajxy jaduhñ xtiøjmó'owät, mgáyäp hajxy jaduhñ tijaty hajxy xmiooby. ⁹Myajmøcpøgäp ja'a pa'amjäya'ay hajxy maa ja'a cajptän. Jaduhñ hajxy mnämá'awät: “Tøø miäwiingoonnä coo ja'a Dios ja'a miäjaa yajcähxø'øga'añ ja'a mijtsøxpä.” ¹⁰Pero homiädyii cajptä hajxy jaduhñ xquia'a tøjmó'owät, callejooty hajxy nøcxy mya'axy: ¹¹“Hädaa cajpt yaabä, cabä quiuhdujthajxy yhooyä. Paady højts ndecy nwiinwoba'añ. Jaduhñä hijxtahñd miähmø'owät coo ja'a mguhdujthajxy quia'a hoyyä. Mjahmiédsäp hajxy jaduhñ coo miäwiingoonnä coo ja'a Dios

ja'a miäjaa yajcähxø'øga'añ ja'a mijtsøxpä.” ¹²Tøyhájthøch jaduhñ nmäna'añ, coo ja'a naaxwiimbä hänäjty wyiimbida'añ, maas hanaxiä ja'a cajpt jaduhmbä chaačhpøga'añ quejee ja'a Sodomacajpt jecy chaačhpøjquiän.

¹³⁻¹⁴Mjaančh tehñ chaačhpøgaamb hajxy pønjaty jim tsänaaby Corazíncajptooty møødä Betsaidacajptooty. Maas hanaxiä hajxy mdsaačhpøga'añ quejee ja'a jäya'ayhajxy jecy chaačhpøjquiän, ja'a hajxy jecy tsänáayyabä Tirocajptooty møødä Sidóncajptooty. Coo je'e hajxy cu yhiyx ja'a hijxtahñd nej mijts mja hixiän, cu ñajtshixøyy ja'a yhaxøøgcuhdujt hajxy; cu jiøyy cu xiuu'ch hajxy jaduhñ. ¹⁵Y mijts jim tsänaabiä Capernaum, Haagä jiiby mijts mhäda'aga'añ mõjcu'uhaam. Cab hajxy jim mnøcxa'añ tsajptooty neby hajxy mdijjiän.

¹⁶Mänitä Jesús ñämaayy ja'a jiamiøødhajxy ja'a nädägøøghii'xcumajcpä: —Pønjaty mijts mmädia'agy xyhamädoowhíjtäp, jaanä jaduhñhøch nmädia'agy hajxy xyhamädoowhíjtäbä. Pero pønjaty mijts mmädia'agy xquia'a hamädoowhíjtäp, ni høøčh nmädia'agy hajxy xquia'a hamädoowhíjtäbä; ni ja'a nDéedyhøch miädia'agy xquia'a hamädoowhíjtäbä, ja'ačh tøø xquiéxiäbä.

¹⁷Mänitä nädägøøghii'xcumajcpähajxy tiu'ubøjcy Diosmädia'agy-yajwa'xpä. Cujecy hajxy wyiimbijtägajch. Jaančh tehñ jiootcujc hajxy hänäjty. Mänit hajxy miänaañ:

—Wiindsón, høxtá ja'a mójcu'u hõjts nmädia'agy hajxy tøø xmiäbøjcä ja'a miichcøxpä.

¹⁸Mänitä Jesús miänaañ:

—Tøyhajt jaduñ. Nhíxhøch ja'a Satanás coo jim quiahj tsajpootyp. Nebiä wädsucän jaduñ jiatcøøyy. ¹⁹Huuc mädown hajxy, tøøch mijts ja'a mājaa nmo'oy coo mijts tsahñdy myajténät møødä caa'pty, y coo ja'a mójcu'u hajxy mga'a yajmäjädá'agät; y cab hajxy nej mjada'añ. ²⁰Paady hajxy mxoondá'agät coo ja'a mxøøhajxy jim yhity cujaay tsajpootyp. Cab jaduñ ñejpiä pø tøø ja'a mójcu'u ja'a mmädia'agyhajxy xmiäbøjcä.

²¹Mänitä Jesús jiaanč tehñ yajxoondaacpøjcä ja'a Dioshespíritu. Mänitä Jesús miänaañ:

—Teedy, míichäts jim Wiindsónhajt tsajpootyp møød hädaa yaabä naaxwiin. Chojpy miich mjoot jaduñ coo ja'a hajxy ca'a høxpøcypiä wyiinjuó'owät tijaty ja'a hajxy høxpøcypiä tøø mga'a yajwiinjuó'oy. Páadyhøch miich hoy nnänømy.

²²Mänitä Jesús ñämaayy ja'a jiamiødhajxy:

—Tøøch nDeedy ja'a cuhdujt xquioxo mo'oy. Cábøch pøn xñajuó'oy pønñhøch høøch, jagóoyyøch nDeedy jaduñ xñajuó'oy. Y jagóoyyøch nDeedy nnajuøøbiä. Najuøøby hajxy je'ebä pønjátyhøch tøø nyajnáhdijy coo hajxy ñajuó'owät.

²³Mänitä Jesús ja'a jiamiøød wyiinhee'ppejty ja'a hajxy nämajmetspä. Mänit hajxy hawiing ñämaayyä:

—Jootcujc hajxy jaduñ mhídät je'eguiøxpä cooç mijts ja'a

hijxtahñd may tøø nyajnáhixø'oy.

²⁴Tøyhájtñhøch jaduñ nmäna'añ.

Ja'a Diosmädia'agy-yajwa'xpähajxy møødä gobiernähajxy, nämay hajxy jia hixaañ tijaty mijts mhijxyp. Nämay hajxy jia mädownaañ tijaty mijts mmädooby.

²⁵Mänitä ley-yajnáhixøøbiä tu'ug tiänaayyø'cy. Mänitä Jesús hoy miäyajtøy:

—Wiindsón, tiich ngudiúnäp nébiøch cøjxta'axiøø njugyhádät nebiä Dios jjugyhatiän.

Paadiä Jesús jaduñ ñämaayyä, nä'a mädia'agyhixáañäp hánajty je'le waamb hánajty yhadsoowa'añ.

²⁶Mänitä Jesús yhadsooyy:

—Neby jaduñ jim myiñ cujaay maa ja'a leyän. Neby jaduñ mwiiñjuó'oy.

²⁷Mänitä ley-yajnáhixøøbiä yhadsooyy:

—Jaduñ jim myiñ maa ja'a leyän coo ja'a Dios mwiiingudsähgø'owät hamuumdu'joot. Jaaná jaduñ jim myiimbä coo hopiønä mdsógät mba'häyówät nebiä mni'x nebiä mgopc mdsoquiän.

²⁸Mänitä Jesús miänaañ:

—Hoy jaduñ tøø mhadsoy; coo jaduñ ngudiúnät, mänit jim mnócxät tsajpootyp.

²⁹Pero yajcumayaambä ley-yajnáhixøøbiä hánajty. Mänit miänáangumbä:

—Pøn jaduñ mnänøømby cooç hopiønä ndsógät nba'häyówät.

³⁰Mänitä Jesús yhadsoogumbä:

—Nhuuc yajmøødmädiá'agyhøch mädia'agy tu'ug, nej miich jaduñ hoy mwiiñjuó'owät. Jiibiä jäya'ay hánajty tu'ug yhäda'agy Jericó. Jerusalén hánajty tøø chohnda'agy.

Tu'haamhädaacpä ja'a mee'tspä
 piaaty. Cøjx jaduñ miée'tsäxä
 mөөdä wyit. Mänit hoyhoy
 wiobho'cä. Nebiä ho'ogypiän
 hajxy jaduñ ñahgueecy. ³¹Mänit
 teedywiindsón tu'ug ñajxy. Coö ja'a
 mähdiöjc jaduñ yhiixy, cab jaduñ
 tiänaaxiöjpy. Jiuhyohy jaduñ.
³²Jaduñdsä tsajtöjcueendähajpä
 tu'ug ñajxpä; jaduñ je'e jiuhyohbiä.
³³Mänitä Samariabäya'ay tu'ug
 ñajxpä. Coö jaduñ yhiixy, mänitä
 hojiot miөdthajty. ³⁴Mänitä
 mähdiöjc chooyöoy aceitehaam
 mөөdä vinohaam. Mänit
 yhamäguijty withaam maa hänajty
 tөө jiotiän. Mänitä yhamdsoo
 jäyujcøxp yujtsehñ. Mänitä
 mähdiöjc hoy ñajtsömö'oyii maa
 ja'a mejtstaactän. Mänit jim yhiixä.
³⁵Cujaboomä Samariabäya'ay ja'a
 cudöjc plataxädö'öñ metsc miooyy.
 Mänit ñämaayy: “Tunä mayhajt,
 huuc cueendähat yö'ö mähdiöjc.
 Mädühñtiä xädö'öñ mjaac yajtuñ,
 mänitöch jaduñ nmoodiägätsät
 coöch nwiimbijtägätsät.”
³⁶Mänitä Jesús ja'a
 ley-yajñähixööbiä miäyajtöoyy:
 —Pön maas hoyhäna'c tөө
 piädsömy yö'ö nädägöögpähajxy.
³⁷Mänitä ley-yajñähixööbiä
 yhadsooyy:
 —Ja'a häna'c hojiot mөөdhájtäbä.
 Mänitä Jesús miänaañ:
 —Nöcx, y jaduñ miich hojiot
 mmөөdhájpät.
³⁸Mänitä Jesús hajxy
 tiu'uböjcumä. Mänit hajxy
 miehch wiingcajptooty. Mänitä
 Jesús yajtöjtägöoyyä ja'a to'oxiöjc
 tu'ug ja'a xøhajpä Marta. ³⁹Jimä
 Marta piuhdo'oxy hänajty tu'ug

ja'a xøhajpä María. Mänitä
 María ja'a Jesús wyiinhöxtaacy.
 Yhamädoowhidaamby hänajty
 je'e waambaty ja'a Jesús hänajty
 miädia'aga'añ. ⁴⁰Pero wyi'i
 jioodhadöotsäp ja'a Marta tiuung
 hänajty. Mänitä Jesús ñämaayy:
 —Wiindsón, nej miich jaduñ
 mnijiäwö'yii coöch nbuhdo'oxy
 ja'a tuung tөө xyajmännähgueegö'oy.
 Huuc näma'aw weenç xpiuhbety.
⁴¹Mänitä Jesús yhadsooyy:
 —Marta, Marta, madiu'u miich
 mwili tiajy mwili miay. ⁴²Tu'tu'uyyä
 jaduñ yhawiinmatsä. Hoyyä
 mbuhdo'oxy jaduñ quiudiuñ.
 Cabä María ja'a cuhdujt jaduñ
 pön piögáañäxä coöch nmädia'agy
 jaduñ xyhamädoowhíjtät.

11 Wiingtuumä Jesús ja'a Dios
 hänajty pia'ya'axy. Coö
 pia'yaaxpädöoyy, mänitä jiamiööd
 tu'ug miänaañ:
 —Wiindsón, hõjts Diospa'ya'ax
 yajñähixööyyäc nebiä Juan ja'a
 jiamiööd yajñähixööyyän.
²Mänitä Jesús miänaañ:
 —Coö ja'a Dios hajxy hänajty
 mba'ya'axa'añ, jaduñ hajxy
 mmäná'anät:
 Dios, miich hõjts nDeedyhajpy.
 Jim mhity tsajpootyp.
 Weenä jäya'ayhajxy nägöxiä
 xwyiingudsähgö'oy. Weenä
 mmäjaa myajcähxö'ogy.
 Weenä mmädia'agy hajxy yaa
 xmiäböjcä hädaa yaabä
 naaxwiin neby hajxy jim
 xmiäböjcän tsajpootyp.
³Móoyyäc hõjts ja'a cay jäda'axöө
 neby hõjts cu'uxiä ngáyät.
⁴Hõjts ja'a pojpä cädieey
 mämée'xäc neby hõjts jaduñ

nmáme'e'xiän pønjaty hõjts
xñägädieeyøøby.

Cabä møjcu'ugong cuhdujt
mmó'owät coo hõjts
xjijcaxø'øwät, coo hõjts ja'a
haxøøgpä xyajnähdjät.

⁵Mänitä Jesús miänáangumbä:

—Tsøg hajxy jaduhñ mänáanäm
coo mijts mmägu'ughajpä mmøødä
tu'ug. Coo miich cuptsuhmdä nõcxy
mnäma'ay: “Mägu'ughajpä, høøchä
tsajcaagy tægøøg jajyujwáanäc.

⁶Ja'a nmägu'ughájþøch tu'ug
tøø miech. Jäguem choon.

Cábøch tii nmøødä tiich jaduhñ
nnä'ä mó'owäp.” ⁷Wehndä

mmägu'ughajpä jiiby tøgooty
xyhadsówät: “Ca'a xyhadsipy.
Hagø'øy ja'a tøjcän. Tøø hõjts ngøxy
maaho'nä mõødhøch nhuunghajxy.

Cábøch nbädø'øgaannä cooçh
miich jaduhñ tijaty nmó'owät.”

⁸Tøyháþthøch jaduhñ nmána'añ,
hoy jaduhñ xjia mägu'ughaty, cab
jaduhñ xñä'ä näbädø'øgåambät
coo miich tijaty xmió'owät. Pero
coo miich tehngajnä mwi'i

ñé'emät, mänit jaduhñ piädø'øgät,
mänit jaduhñ xmió'owät tijaty
miich hänäjty myajmaajiajpy.

⁹Tøyháþthøch jaduhñ nmána'añ,
coo mijts ja'a Dios tijaty
mmäyujwá'anät tehngajnä, tsipcøxp
jaduhñ xñä'ägädä mó'owät. ¹⁰Coo
pønä Dios tijaty miäyujwá'anät
tehngajnä, tsipcøxp jaduhñ
ñä'ägädä mo'owa'añii.

¹¹Þø jim mhuunghajxy, coo
tsajcaagy xmiäyujwá'anät, cabä
tsaa mmo'owa'añ; coo hacx
xmiäyujwá'anät, cabä tsahñdy
mmo'owa'añ. ¹²O coo tseediu'udy
xmiäyujwá'anät, cabä caa'pty

mmo'owa'añ. ¹³Hojiatypä ja'a
mhuung hajxy jaduhñ mmooby, hoy
hajxy mja ca'awiindøyyä. Mänaxiä
ja'a mDeedyhajxy jim tsajpootypä
xmió'owät ja'a yhEspiritu coo mijts
jaduhñ mmäyujwá'anät.

¹⁴Wiinghoocä Jesús ja'a møjcu'u
hänäjty yhøxquexy. Tøø jäya'ay
hänäjty tu'ug yaghuumyii. Coo
ja'a mähdijc nãhwaatsnä, mänit
quiapxø'nä. Yagjuøyy ja'a
jäya'ayhajxy jaduhñ. ¹⁵Pero näje'e
hajxy jaduhñ miänaañ:

—Yøø craa, ja'a møjcu'ugongä
miäjaa jaduhñ miøødhájtäp,
paadiä møjcu'u yhøxquexy. Ja'a
møjcu'ugong, ja'a møjcu'u
wyyiindsøn'hajxy je'e.

¹⁶Näje'e häna'c ja'a Jesús
hajxy hänäjty nãma'ay coo
hijxtahnd ween jajcähxø'øgy,
ja'a jim tsajpootypä.
Wyyinmahñdyhixaambä Jesús
hajxy hänäjty. ¹⁷Pero nãjuøøbiä
Jesús hänäjty nebiaty hajxy hänäjty
wyi'i tiajy wyi'i miay. Mänit
miänaañ:

—Homiädyii cajptä, coo ja'a
cu'ughajxy ñiyhawiingpäda'agøøjät,
coo hajxy tu'tøjc ñimiädsibø'owøøjät,
cuhdägøyyäp ja'a chäna'ahajxy
jaduhñ. ¹⁸Jaana jaduhñduhmbä, coo
Satanáshajxy ñimiädsibø'owøøjät,
cuhdägøyyäp hajxy je'ebä. Mijts
jaduhñ mänaamb cooçh tyijy ja'a
møjcu'uhajxy nhøxquexy ja'a
møjcu'ugongä miäjaagøxpä. ¹⁹Pero
coo häxøpy jaduhñ tiøyyä, maa
mijts mjamiøød ja'a mäjaa hajxy
yhuuc paatpä coo ja'a møjcu'u
hajxy yhøxquexy. Cähxø'p jaduhñ
coo mijts ja'a tøyhajt hajxy
mga'a mõødä. ²⁰Pero høøch, ja'a

Diosmäjaagõxpõch ja'a mõjcu'uhajxy nhõxquexy. Y cãhxõ'p jaduñ coo miãwiingoonnä coo Dios ja'a miãjaa yajcãhxõ'õga'añ ja'a mijtscõxpä.

²¹ 'Tsõg jaduñ mänãaanãm, coo ja'a jäya'ay jaanç mõcpä cwieendãhãdãt ja'a yhamdsoo tõjc, coo pujxt coo wojpt hãnajty miõõdã, cabã mee'tspã jaduñ tiãgõ'õwãt. ²² Pero coo jäya'ay maas ca'awiindõybã miãdsãt, cabã cudõjc jaduñ miãjãdã'agãt. Põjcãxp ja'a piujxt ja'a wiojpt jaduñ ja'a tyijy yajmãjãdã'agaambiã. Mõõd jaduñ piõjcãxãbãt tijaty jiiby miõõd tõgooty. Y hõõch, jaduñ mãwiinãts hõõch ja'a mõjcu'ugong nga'a yajmãjãdã'agy.

²³ 'Põnhõch jaduñ xquia'a mõõdpãdõ'p, hõõch nmãdsip je'eduhñ. Y põnhõch jaduñ xquia'a mõõdtuumb, je'e jaduñ yajma'p põnjãtyhõch nmãdia'agy xjia wi'i miãbõgãanãp.

²⁴ Mãnitã Jesús miãnãangumbã: —Tsõg jadãhooc mãdiãaccumbã. Coo ja'a mõjcu'u piãdsõmãt maa jäya'ay tu'ugãn, mãnit tiãgõ'õy poo'xtaacthõxtaabiã pactuum. Y coo jaduñ quia'a pãadãt, mãnit miãna'añ cooc jim wyiimbida'añ maa tõõ yhuuc pãdsõmbãn.

²⁵ Coo jim miejstãgãtsãt maa ja'a jäya'ayãn, tõõ ja'a jäya'ay hãnajty wyiinmahñdymech nebiã tõjc wa'adspãn. ²⁶ Mãnitã mõjcu'u ja'a jiamõõd nõcxy wioy juxtujc ja'a maas haxõõgpã. Mãnit hajxy nãgõxiã tiãgõ'õy maa ja'a jäya'ayãn tsãnaabiã. Y maas haxõõg ja'a jäya'ay nã'ãgã jaty quejee hãnajty.

²⁷ Jimã Jesús hãnajty miãdia'agyñã, mãnitã to'oxiõjc tu'ug yaaxy cu'ughagujc:

—Jootcujc miich mdaj mdsi'tsc jaduñ yhity je'eguiõxpã coo miich tõõ xyajtso'ogy tõõ xyajyeegy.

²⁸ Mãnitã Jesús miãnaañ:

—Je'eds maas jootcujc hijp, põnjatiã Diosmãdia'agy cudiuumb.

²⁹⁻³⁰ Tehngajnä ja'a Jesús ja'a cu'ug hãnajty jiaanç tehñ nãmugõ'õyii may. Mãnitã Jesús miãnaañ:

—Cabã jäya'ay howyiinmahñdy hajxy miõõdã, ja'a hajxy jãdã'ahatypã. Ja'a hijxtahñd hajxy jia wi'i yhixaamby, ja'a hoy-yagjuõõñãbã. Pero cab hajxy jaduñ yaghixa'añii. Jagooyyã hajxy jaduñ yhixa'añ coõch hõõch jaduñ njada'añ nebiã Jonás jecy jiajtiãn mãnaa jim quiexyijjãn Nínivecãjptooty. Dios jaduñ quejx. ³¹ Coo jaduñ yhabãadãt coo ja'a jäya'ayhajxy hãnajty yajnãhdija'añii, mãnitã to'oxiõjc piãdõ'õga'añ, ja'a jecy hanẽhmãbã jim jãguemnaax ja'a jõõmbojmanãjãpã. Je'e jaduñ mãna'anaamb coo ja'a jäya'ayhajxy jãdã'ahatypã piãdã'agõõjãt haxõõgtuum. Je'eds ja'a Salomõn hoy tõõ miãmãdoona'ay, je'eguiõxpã coo ja'a Salomõn hãnajty jiaanç tehñ quihwijiã. Y cabã Salomõn cuhdujt hãnajty jiaty mõõdã nẽbiõch hõõch jaduñ nmõõdãn. ³² Y ja'a jäya'ayhajxy jecy tsãnãayyãbã Nínivecãjptooty, jaduñ hajxy miãna'anaambã coo ja'a jäya'ayhajxy jãdã'ahatypã piãdã'agõõjãt haxõõgtuum. Coo ja'a Jonás ja'a Diosmãdia'agy hoy yajwa'xy jim Nínivecãjptooty, mãnitã jäya'ay ja'a yhaxõõgwiinmahñdy hajxy ñajtshixõõyy. Y cabã Jonás cuhdujt

hänajty jiaty mөөдä nébiøch hөөчh nmөөдän.

³³ Coo ja'a jäya'ay jøøn hajxy quiuhno'ogø'øy, cøxp hajxy jaduñ piäda'agy, nebiä jäya'ayhajxy jaduñ quiudøø'xøøjät ja'a hajxy tøjtägøøbiä. Cabä jøøn hajxy yu'učh, ni cab hajxy quiuhjupy cajónghaam. ³⁴⁻³⁶ Coočh mijts ja'a nmädia'agy hamuumdu'joot xmiäbøjcät, hoy hajxy jaduñ mwädítät homiänaajä. Pero coočh nmädia'agy hajxy xquia'a mäbøjcät, hagoonstuum hajxy jaduñ mhídät. Homiänáajøch nmädia'agy hajxy xmiäbøjcät neby hajxy hagoonstuum mga'a cá'awät.

³⁷ Coo ja'a Jesús miädiaacpädøøyy, mänitä Jesús wioonøcxä mägaabiä ja'a farisewäm. Coo jim miejch maa ja'a fariseo tiøjcän, mänit yhäñaaguiädaacy meexäwiinduum. ³⁸ Jaguiø'øbuju ja'a Jesús yhäñaaguiädaacy. Caj quiø'øbuju nebiä judiøshajxy hänajty quiuhdujthatiän. Coo hajxy hänajty tiägø'owa'añ caabiä, mänit hajxy hänajty quiø'øbuju. Coo ja'a Jesús quia'a cø'øbuju, yagjuøøyy ja'a fariseo jaduñ. ³⁹ Mänitä Jesús miänaañ:

—Mijts fariseodøjc, jaduñ hajxy mja wi'i quiähxø'øga'añ nebiä hoyhäna'cän jim cu'ughagujc. Pero cabä mjoot cabä mjuøhñdyhajxy yhooyä, je'eguiøxpä coo hajxy mw'i'i mieečh mw'i'i pioty. ⁴⁰ Caj mijts mwiinmahñdy yhooyä. Tøø ja'a Dios ja'a mni'x ja'a mgopc-hajxy xquiunuu'xä. Tøø ja'a mjoothajxy xjia cunúu'xäbä coo ja'a mjuøhñdyhajxy hoy cu mhijty.

⁴¹ Coo ja'a häyoobäya'ay hajxy

mbuhbédät hamuumdu'joot, mänit hajxy jaduñ mnähwá'adsät.

⁴² Mijts fariseodøjc, haxøøg hajxy mjada'añ mhabeta'añ. Xiøøbä hajxy mja nä'ä wi'i quiuyoxø'øy yø'øbi'c jøø'xychooy jii by tsajtøgooty. Pero cabä Diosmädia'agy hajxy mgudiuna'añ maa jaduñ myiñän coo hajxy hoy mwädítät, coo ja'a Dios hajxy mwiingudsähgø'øwät. Pedyii ja'a Diosmädia'agy hajxy mgudiünät.

⁴³ Mijts fariseodøjc, haxøøg hajxy mjada'añ mhabeta'añ. Mjaančh tehñ yajcumayaamb hajxy jaduñ. Jii by hajxy mja wi'i yhäña'awa'añ maa ja'a häñaabiejt hojiatypän jii by tsajtøgooty. Y chojpy ja'a mjoothajxy jaduñ coo ja'a cu'ug hajxy xi'ig xon xwyiingudsähgø'øwät jii by halaplaaz.

⁴⁴ Mijts fariseodøjc, mijts ley-yajnähi xøøbiädøjc, mhøhñdaacp hajxy jaduñ. Cab hajxy myajcähxø'øgy coo ja'a mguhdujthajxy quia'a hoyyä. Y pønjaty ja'a mmädia'agyhajxy xpianøcxäp, tu'udägooby hajxy je'lebä, je'eguiøxpä coo hajxy quia'a najuø'øy coo mijts mguhdujt jaduñ yhaxøøgä.

⁴⁵ Mänitä Jesús nämaayyä ja'a ley-yajnähi xøøbiä tu'ug:

—Wiindsøn, coo jaduñ mmäna'añ, haxøøg højts jaduñ xñänøømbä.

⁴⁶ Mänitä Jesús miänaañ:
—Mijts ley-yajnähi xøøbiädøjc, jaanä haxøøg mijts mjadaambä mhabetaambä. Hanaxiä mijts ja'a tsipjatypä myajnähi xø'øy. Ni pøn jaduñ quia'a jada'añ nej mijts

myajnáhixø'øyän. Y cab hajxy hamdsoo mgudiuna'añ neby hajxy myajnáhixø'øyän ni weeñtiä.

⁴⁷⁻⁴⁸ Haxøøg hajxy mjada'añ mhabeta'añ. Haxøøg mijts mguhdujt nebiä mhap ja'a mdeedyhajxy hijty chäna'ay yhäyoyyän jegyhajty. Je'eds hajxy jaduñ yagho'c ja'a Diosmädia'agy hajxy jecy yajwá'xäbä. Y mijts ja'a tiøjc-huunghajxy myajcójjäp maa hajxy jecy ñaaxtägøøyyän. Myajcähxø'py hajxy jaduñ coo ja'a mhap ja'a mdeedy hajxy tu'ugwiinmahñdy mmøødhity.

⁴⁹ Najuøøbiä Dios jaduñ. Je'e jaduñ mänaañ: “Nguexáambiøch nguguexyhajxy maa yø'ø häna'c-hajxiän. Nájé'ejøch nguguexyhajxy xyagho'ogaañä. Nájé'e hajxy ñä'ä tsaächtiuna'añii.”

⁵⁰ Ja'a jäya'ayhajxy jäda'ahatypä, pojpäuum cädieedium hajxy jaduñ miähmø'owa'añ ja'a Dios quiugueycøxpähajxy, ja'a hajxy tøøbä yagho'ogyíjibä nägøxiä. Mänit hajxy tiägøøyyä yaghó'cäbä mänaa hädaa yaabä naaxwiin yhawijy tiøø'xta'aguiän.

⁵¹ Møødä Abel yaghó'cäbä møødä Zacarías. Tsajtøghaguuy ja'a Zacarías yagho'cä jim mädøyyä maa ja'a altarän. Tøyhajt jaduñ coo ja'a jäya'ayhajxy jäda'ahatypä miähmø'owa'añ pojpäuum cädieedium.

⁵² Mijts ley-yajnáhixøøbiädøjc, haxøøg hajxy mjada'añ mhabeta'añ. Cabä cu'ug ja'a tøyhajt hajxy mnä'ä mo'owa'añ. Cabä tøyhajt hajxy hamdsoo mnä'ä tsocy. Mijts ja'a cu'ug mwi'i quiapxhiimby nebiä tøyhajt hajxy jaduñ quia'a páadät.

⁵³ Mänitä Jesús jiaanč tehñ miäjootma'tä ja'a fariseodøjc møødä ley-yajnáhixøøbiädøjc. Mänit hajxy tiägøøyy mäyajtøøbä madiu'u. ⁵⁴ Jia wiinmahñdyhixaan ja'a Jesús hajxy jaduñ neby hajxy jaduñ cu yajnáhdsøømy.

12 Mänitä jäya'ayhajxy yhamugøøyy milhaam høxtä niñø'tsmujcä hajxy jaduñ. Mänitä Jesús ja'a jiamiøød hawiing ñämaayy:

—Cabä fariseos miädia'agy hajxy mmäbøjcät. Nämäy häna'c jaduñ tiu'udägoy coo ja'a fariseos miädia'agy hajxy miäbøjcä. Hix, høhndaacp ja'a fariseoshajxy jaduñ. Yajnajuø'owaamb jaduñ tsipcøxp coo hajxy jaduñ yhöhnda'agy. Hoy hajxy hoy jia capxy jia mädia'agy, cab hajxy hamdsoo hoy quiuidiuñ. ² Hix, cab jaduñ tii ñä'ägädä mähmø'owa'añ jañägapxy. Haagä cähxø'ogaamb jaduñ cøxiä. ³ Jaanä jaduñduhmbä ja'a mijtsøxpä, waambaty hajxy tøø mmäna'añ hamee'ch, yajmädowaamb jaduñ cu'ughagujc.

⁴ Mägu'ughajpädøjc, cab hajxy mdsähgø'owät pøn ja'a mni'x ja'a mgopc xyaghó'cäp. Cab jaduñ nej xjiaac túnät. ⁵ Pero ja'a Dios hajxy jaduñ mdsähgø'owäp. Je'edsä cuhdujt møød coo ja'a mjugyhajthajxy xyajcuhdägóoyyät, y coo hajxy xpiädá'agät haxøøgtuum.

⁶ Høxtahmdsä muuxyhuunghajxy, hoy hajxy yaa tii quia'a ja wa'añ, jiahmiejchpä Dios je'e. ⁷ Mänaxiä mijts ja'a Dios xquia'a jahmiédsät. Paady hajxy jaduñ mga'a

tsähgó'owät. Xjiaanč tehṃ chojp mijts ja'a Dios hœxtä xmioby hajxy tijaty hajxy myajmaajajpy.

⁸Tøyhájthœch jaduhṃ nmäna'añ, hœœch ja'a Diosquexypä, pónhœch xquiapxpaatp cu'ughagujc, je'ečh jaduhṃ ngapxpaattägatsaamby jim tsajpootyp ja'a Diosmoonsäwiinduum. ⁹Pero pónhœch jaduhṃ xquia'a capxpaatp cu'ughagujc, ni je'ečh jaduhṃ nga'a capxpaadaambä ja'a Diosmoonsäwiinduum.

¹⁰Pónhœch haxœg xñänœmb, mee'xáanäp je'e. Pero coo ja'a Dioshespíritu hajxy haxœg ñänœmät, cab hajxy jaduhṃ mié'xänät.

¹¹Coo mijts häna'c mädsibœ'øbä xyajnöcxät tsajtœgooty o jim maa ja'a hagujtœjcän, cab hajxy mdaj mmáyät waamb hajxy mmädiá'agät, ¹²je'leguiœxpä coo ja'a Dioshespíritu hajxy xñajtsapxœ'œyyät waambaty hajxy jaduhṃ mhadsówät.

¹³Mänitä Jesús ñämaayyá tu'jája'ay maa ja'a cu'ugän: —Wiindsón, nämáayyägœch nbuhya'ay cooçhä nnädeedyñaax xpiuhmó'owät.

¹⁴Mänitä Jesús miánaañ: —Pónhœch tœœ xquiuhdujtmœ'oy cooçh mijts nhané'emät.

¹⁵Mänitä Jesús miánaangombä: —Mnigwieendähadœ'œjöp hajxy coo hajxy tii mğa'a hadsógät. Cab hajxy nõcxy mdaj mmay coo hajxy cœxiä mğa'a mœödä.

¹⁶Mänit miánaangombä: —Tsœg hajxy mänánañ, jii jáya'ay hijty tu'ug jaanč tehṃ miäyœœ. Mänitä ñœœ mioc may jajpädœ'cy. ¹⁷Mänit tiägœ'œyyä tajpä

maabiä: “Nébiœch nnœœ nmooc ndúnät. Maačh jaduhṃ nnä'ä pädá'agät.” ¹⁸Mänit miánaangombä: “Tœœch nnajuœ'œy maačh nbädá'agät. Nyajmä'adäbœch yœœ ndsehx. Maas crúundœch ngójät. Jíibyhœch nnœœ nmooc ngœxy pädá'agät, mäduhñtiœch nmœödä. ¹⁹Cábœch jaduhṃ tii ndájnät nmánañ. Jootcujc-hœch jaduhṃ ndsánaañät nhäyóonät majiomœjt. Poo'xáambœch, cayáambœch hu'ugáambœch, xoonda'agáambœch.”

²⁰Mänitä Dios ja'a craa ñämaayy: “Miičh, cab jaduhṃ mnä'ägä mäbœcy. Jáda'a coods mho'oga'añ. Yœ'œduhṃ tœœ mwil'i piädá'aguiäbä, pœñ jaduhṃ mämähmœ'œwaamb.” ²¹Jaduhñdsä mäyœ'œjája'ayhajxy jiaty yhabety pœñjaty maxiädœ'œñ jaduhṃ tehngajnä jajmujp yhamdsoogœxpähajxy. Pero maa ja'a Dioswiinduumän, häyoob hajxy jaduhṃ.

²²Mänitä Jesús ja'a jiamiœœd ñämaayy:

—Ca'a hajxy mdajy mmay tii hajxy mnäjyghadaamby, tii hajxy mgayaamby, tii hajxy mwithadaamby. ²³Cab hajxy nõcxy mdajy mmay coo hajxy cœxiä wiinä mğa'a mœödä. ²⁴Hœxtahm̄ds yœ'œ muuxyhajxy, cab hajxy tiuñ xiagy. Cab hajxy tii ñi'iby; cab hajxy tii jajpädœ'œgy; cabä tseh̄x hajxy miœödä. Ja'a Dios jaduhṃ yagjœ'œxp. Y mijts, mmaas tsoobaatp hajxy quejee ja'a muuxyhajxy. ²⁵Hoy hajxy mäduhñtiä mja taj mja máyät, cab hajxy hamdsoo mniyajyeegœ'œjät ni weñtiä. ²⁶Pœ cab hajxy hoy hamdsoo mniyajyeega'añii, cab hajxy tii mdaj mmáyät.

²⁷Høxtahmds yø'ø pøjy, yee'p yø'ø. Pero cab tiuñ xiajy; cab pyiidyhädiuñ. Tøyhajt jaduhñ, ni ja'a rey Salomón jecy quia'a nä'ägä mäbaaty nej yø'ø pøjjiän, hoy howyit hänajty jia mөөdä.

²⁸Hoyyä Dios yø'ø pøjy yajxón jia cunuuxy, cab jecy. Mänaxiä mijts ja'a Dios xquia'a witmó'owät, hoy mijts jaduhñ mga'a ja mäböcy. ²⁹Ca'a hajxy mwil'i tiajy mwil'i miay tii hajxy mgayaamby mh'uugaamby. ³⁰Ja'a hajxy jaduhñ ca'a mäbøjpä, je'eds hajxy wyl'i tiajpy wyl'i miaaby. Pero mijts, ñajuøöbiä mDeedyhajxy tijaty hajxy myajmaajiajpy. ³¹Taj may hajxy nebiä Diosmädia'agy hajxy hoy mgudiúnät, mänitä Dios cøxiä xmió'owät.

³²Mägu'ughajpädøjc, ca'a hajxy mdsähgø'øy, hoy hajxy jaduhñ mja nä'a weeñtiä. Chojiä mDeedy jioot jaduhñ coo mijts xyhuunghädät.

³³Mdóogäp hajxy mäduhñtiä hajxy mmөөdä; mänitä häyoobäya'ay hajxy mnä'a mó'owät cøxiä. Jaduhñ mijts hoyhajt weenhajt jim mbáadät tsajpootyp. Cab jaduhñ pøn jim tii xpiójcät. ³⁴Coo ja'a Diosmädia'agy hajxy hamuumdu'joot mgudiúnät, mbáadäp ja'a hoyhajt ja'a weenhajt hajxy jaduhñ. Coo ja'a yaabä naaxwiimbä hajxy mbøcjuø'owät, cab hajxy tii mbáadät.

³⁵⁻³⁶Mänitä Jesús tiägøøyy mädiaacpä nebiä jiamiódhajxy nähix hahixø'ø yhídät coo hänajty quiädaactägatsa'añ jadähooc. Mänit miänaañ:

—Nähix hahixø'ø hajxy mhídät nebiä homioonsähajxiän coo ja'a wyiindsøn hajxy wyiimbídät

mägaabiä mähuucpä maa ja'a pøc hu'ug jiadyiijän. Jøønmoød hajxy jaduhñ yhahixy. Coo ja'a wyiindsøn hajxy miech maa ja'a tiøjcän, mänit hajxy yajtøjtägø'øy. ³⁷⁻³⁸Pø jujyñä ja'a mioonsähajxy hänajty, hoy ja tsuhmdä, hoy ja moññä, cumayaambä wyiindsøn jaduhñ. Tøyhajt jaduhñ. Høxtä yajcayøøjäp hajxy ja'a yhamdsoo wiindsøn. ³⁹Y jaanä jaduhñduhmbä, coo ja'a cudøjc jaduhñ ñajuø'owät mäduhnajtä ja'a mee'tspä miédsät, cab jaduhñ nä'ägä maahó'ogät nebiä mee'tspä jaduhñ quia'a tøjtägø'owät. ⁴⁰Jaduhñ mijts nähix hahixø'ø mhíjpät. Cab hajxy mnä'ägä najuø'owät mänáajøch ngädaactägatsa'añ, høøch ja'a Diosquexypä.

⁴¹Mänitä Pedro yajtøøyy:

—Wiindsøn, pøn miich hädaa myajmøødmädiaacpy, højtsyähajtiä tøgä nägøxiä.

⁴²Mänitä Jesús yhadsooyy:

—Pøn jaduhñ cudiumb nebiatiä wyiindsøn yhane'emiän, je'eds jaduhñ hoy copc-hajp maa ja'a wyiindsøn tiøjcän.

Coo ja'a wyiindsøn maa ñøcxy, je'eduhñ mähmøøby coo jaduhñ yajcáyät pøn jiiby hijp tøgooty.

⁴³Pø cudiumbä copc-hajpä hänajty hoy, coo ja'a wyiindsøn wyiimbijtägätsät, cumayáañäp jaduhñ ja'a wyiindsøn. ⁴⁴Mänitä wyiindsøn yajnähdiija'añii coo jaduhñ quiopc-hädät mäduhñtiä ja'a wyiindsøn miөөdä cøxiä. ⁴⁵Pero coo ja'a copc-hajpä miäná'anät coo ja'a wyiindsøn quia'a tsoj medsa'añ, coo ja'a miämoonsä yhäyoowhíxät, coo tiägø'owät huucpä caabiä,

coo miu'ugóójtät, ⁴⁶mänitá wyiindsón miejstägatsa'añ jaguiapxy, mänit jaduñ jiaanč tehñ chaačhtiuna'añii neby hajxy chaačhtiunijän ja'a hajxy ca'a mábøjpä.

⁴⁷Mädyii moonsä jaduñ ca'a mädia'agymiäbøjp, hoy jia najuø'øy nebiaty ja'a wyiindsón yhane'emyii, jaanč tehñ chaačhtiunáanäp je'e. ⁴⁸Peró mädyii moonsä ca'a mädia'agymiäbøjp je'leguixpä coo quia'a najuø'øy, cab jaduñ jiaty tsaáčhtiuna'añii. Pøn madiuung jaduñ yajcø'ødägøyyäp, tsipcøxp jaduñ quiudiünät nebiaty yhane'emyii.

⁴⁹Páadyhøch yaa tøø ngäda'agy hädaa yaabä naaxwiin nebiä tsip jaduñ piädó'ögät. Weená jäya'ayhajxy ñimiädsibø'oyii.

⁵⁰Mobadájpøch nho'oga'añ. Jiaanč tehñ chójpjøch njoot coo paquii yhabáadät. ⁵¹⁻⁵²Páadyhøch yaa tøø ngäda'agy hädaa yaabä naaxwiin nebiä jäya'ayhajxy ñimiädsibø'owøójtät. Cabä jäya'ayhajxy jootcujc ñä'ägä hidaañnä. Nimiädsibø'owáanäp hajxy tu'ugtøgooty.

Nädägøøgpána'c-hajxy yajmuga'añ ja'a nämetspäya'ay. ⁵³Miøødnimiädsibø'owáanäp ja'a tiaj ja'a tieedyhajxy. Miø'ødhoc jiaxie'ebhajxy ñimiädsibø'owa'añii.

⁵⁴Mänitá Jesús ja'a cu'ug ñämaayy:

—Coo ja'a joc piädø'ogy maa ja'a xøø quiuhnaxiän, hijxtahñd je'e coo tiu'uwa'añ. ⁵⁵Y coo jiøømbojy, hijxtahñd jaduñ coo han yhida'añ. Y mnajuøøby hajxy jaduñmäbä.

⁵⁶Tøyhajt jaduñ, mnajuøøby hajxy

jaduñ nebiä xøø ñaxa'añ, pero cab hajxy mnajuø'øy tijaty jadaañnäp habetáañnäp. Hix, hamdsoo ja'a mjoothajxy quia'a tsoey coo hajxy jaduñ mnajuø'owät.

⁵⁷Tii hoguiuhdujt hajxy hamdsoo coo mga'a jada'añ. ⁵⁸Coo pøn hánajty tøø xñäxø'owø'øy, coo hánajty xyajnøcxy haguyc, tu'haamnøcxpä myajtødiägø'owät. Pø caj, xchúmäp hajxy jaduñ. ⁵⁹Y cab jaduñ mdsoj pädsómät høxtä coonä mnuu'xy myajnähwá'adsät pedyii. Jaduñ mäwífinäts Dios hajxy xyajcumädówät.

13 Mänitiä ja'a Jesús yhawáanäxä coo ja'a Pilato ja'a Galileabäya'ay hánajty näje'e tøø yajyagho'ogyii tsajtøghaguuy. Animalyøjxpä Galileabäya'ayhajxy hánajty. Jaduñ hajxy hánajty quiuhdujthaty. ²Mänitá Jesús miänaañ:

—Nej, mmánaamb hajxy jaduñnä, paady yø'ø häna'c-hajxy yagho'cä je'leguixpä coo maas may ja'a pojpä cädieey hajxy hánajty tøø tiuñ quejee ja'a miägunaaxhajxiä. ³Høøch jaduñ mänaamb, caj. Y coo mijts ja'a mhaxøøgcuhdujt hajxy mga'a najtshixø'owät, jaduñ hajxy mjájpät nägøxiä. ⁴Y yø'ø häna'c-hajxy nämajmocxtägøøgpä tøø yhö'oguiäbä jim Siloé mänaa ja'a mõj torre tøø ñähgahbetiän, nej, mmánaamb mijts jaduñnä coo maas may pojpä cädieey hajxy hánajty tøø tiuñ quejee ja'a jiamiøødhajxy jim tsánaabiä Jerusalén. ⁵Høøch jaduñ mänaamb, caj. Y coo mijts ja'a mhaxøøgcuhdujt hajxy mga'a najtshixø'owät, jaduñ hajxy mjájpät nägøxiä.

⁶Mänitá Jesús miänáangombä:

—Tsøc mädiáacäm, jii jáya'ay piids hijty tu'copc miøødä maa ja'a ñaaxän. Mänit hoy jia hixø'øy pø tøø tiøømbety. Cahnä hánajty tiøømbetyñä. ⁷Mänitá mioonsä ñämaayy: “Huug hix yø'ø piids, tøø ndijy häxøpy tiøømbejnä cudägøøgjomøjt, y cahnä ñä'ägädä tøømbetyñä. Púxäts, xiøøbä jim ñä'ä naaxñähdána'ay.” ⁸Mänitá mioonsä miänaañ: “Wiindsøn, ween jiaac täna'ay tu'jomøjt. Nhuuc nä'ä juhdajtú'udyhøch. Nhuuc tsooyø'øyhøch abonohaam. ⁹Wehndä jaduħñ ñä'ä tøømbédät. Pø caj, mänitøch nbúxät.”

¹⁰Wiinghoocä Jesús hánajty jii by yajwiingapxø'øy tsajtøgooty. Poo'xxiøøjooty hánajty je'le.

¹¹Jiibiä tadjäya'ay hánajty tu'ug. Majmocxtägøøgjomøjt ja'a pa'am hánajty tøø miähäyoy. Jøney ja'a mähdiojc hánajty tøø yagjadyii ja'a mõjcú'ujäm; ni cab hánajty hoy ñä'ägä tøwa'añ. ¹²Coo ja'a Jesús ja'a tadjäya'ay yhiixy, mänit miøjyaaxy. Mänit miänaañ:

—Pi'maam, tøø ja'a mba'am jaduħñ xñähwa'açh.

¹³Mänitá Jesús ja'a pa'amjäya'ay ñähdoon. Mänitiä ja'a mähdiojc tiøøyy. Mänit miänaañ coo ja'a Dios miøjjä jiaançhä. ¹⁴Mänitá tsajtøjwiindsøn jiootma'ty je'leguiøxpä coo ja'a Jesús ja'a pa'am yajnaxy ja'a poo'xxiøøjooty. Mänitá cu'ug ñämaayy:

—Tädujxøø ja'a Dios tøø quiunuu'xy coo hajxy ndúunämät. Mänitá mba'am hajxy min myajniñähwa'açhii. Pero cab hajxy myajniñähwa'adsøøjät ja'a poo'xxiøøjooty.

¹⁵Mänitá Jesús miänaañ:

—Mhøhndaacp mijts jaduħñ. Nej, caj mijts mweey mburro hajxy myajnøøhu'ugy ja'a poo'xxiøøjootiä. Hoy hajxy hoy mja capxy mja hane'emy, cab hajxy hamdsoo hoy mgudiuñ. ¹⁶Y hädaa tadjäya'ay, Abraham yhap yhoc hädaaduħñ. Majmocxtägøøgjomøjt hijty tøø yaghidyii pa'ammøød ja'a mõjcú'ujäm. Nej, cáboch ja'a cuħdujt hijty nmøødä cooçh poo'xxiøøjooty tøø nyajñähwa'açhä.

¹⁷Mänitá Jesús miädsiphajxy çhähdiiuñ. Pero ja'a cu'ug, jaançh tehñ xioondaac hajxy jaduħñ je'leguiøxpä coo ja'a Jesús ja'a hoy-yagjuøøñäjatypä hánajty tøø yajcähxø'øgy.

¹⁸Mänitá Jesús miänaañ:

—Coo ja'a Dios ja'a miäjaa hánajty yajcähxø'øga'añ, jadúhñhøch nyajmäbaada'añ ¹⁹nebiä habi'c mostazapajcän. Coo jäya'ay jaduħñ ñi'ibät maa ja'a ñaaxän, cøxp jaduħñ yéegät. Høxtä pe'eñhädiünäp ja'a muuxyhajxy yhaa'xcøxp.

²⁰Mänitá Jesús miänáangombä:

—Coo ja'a Dios ja'a miäjaa hánajty yajcähxø'øga'añ, jadúhñhøch nyajmäbaada'añ ²¹nebiä to'oxiojc tsajcaagyooy hajxy yajtuñän coo tsajcaagy hajxy yhädiuñ. Tägøøgquixøøhñdy ja'a harina hajxy yajmäbadaagø'øy ja'a tsajcaagyooy. Mänit jaduħñ hoy piädø'øgy.

²²Mänitá Jesús tiu'ubøjcy. Jerusalén hánajty ñøcxa'añ. Tu'haamnøcxpä ja'a Jesús hánajty yajñähixø'øy maa ja'a cajpthuungän.

²³Mänitá Jesús miäyajtøwä:

—Nej, näweeñtiä hajxy ñähwa'adsa'añ ja'a piojpä cádieeyhajxiä.

Mäniä Jesús yhadsooyy:

²⁴—Tsipcøxpä Diosmädiä'agy hajxy hoy mgudiúnät nebiä cuhdujt hajxy hoy mmøødhádät neby hajxy jim mdägø'owät tsajpootyp. Nämäy hajxy jia wi'i tiägø'owa'añ, pero cab hajxy hänäjty yajtägø'owa'añii coo cuhdujt hajxy hänäjty quia'a møødá. ²⁵Coo ja'a Dios ja'a tøjc hänäjty tøø yhagøøñä, mäniä tøghagø'ow hajxy hänäjty jia wi'i quiojxnoga'añ, pønjaty tøba'am hänäjty tøø miähmø'oy. Mänit hajxy hänäjty jia wi'i miäna'ana'añ: “Dios, yaghawa'ads yø'ø tøjc.” Mäniä Dios yhadsowa'añ: “Cábøch mijts nhixiä.” ²⁶Mänit hajxy hänäjty miäna'anáangombä: “Pero tøøds miich nmøødcay nmøødhu'ugy; tøøds miich mmädiä'agy xyajñähixø'oy mänaa jim mhitiän maa højts ngajptän.” ²⁷Mäniä Dios hänäjty yhadsowáangombä: “Tøø hajxy nnäma'ay coo hajxy nga'a hixiä. Wiimbit hajxy. Caj mijts mguhdujt ñä'ägä hoyyá.” ²⁸Mäniä Abraham hajxy hänäjty jim mhixa'añ tsajpootyp jim Dioswiinduum møødá Isaac møødá Jacob møødá Diosquexyhajxy nägøxiä. Mänit hajxy mjø'owa'añ mxuudsaañ coo ja'a Dios hajxy tøø xquia'a yajtägø'ø'y. ²⁹Nøcxaambä jäya'ayhajxy miägaya'añ Dioswiinduum ja'a hajxy wiinduhmyhagajpt-tsohmä. ³⁰Jaaya'ayhajxy jäda'ahaty péjxäbä, näje'e møjtuung hajxy piaada'añ. Y jaaya'ayhajxy jäda'ahaty møjtuungmøødpä, näje'e tiuunghajxy piøgáañäxä.

³¹Mäniäxøøbä ja'a fariseoshajxy näje'e miejch maa ja'a Jesúsän. Mäniä Jesús hajxy ñämaayy: —Mdsóonäp yaa coo ja'a Herodes xjia wi'i yajyagho'oga'añii.

³²Mäniä Jesús yhadsooyy: —Ca'awiindøyyä Herodes jaduñ. Nøcx hajxy näma'aw cooçh mejtsxøø tægøøgxøø njaac tuna'añ. Njaac høxquexáambiøch ja'a møjcu'uhajxy. Njaac yajmøcpøgåambiøch ja'a pa'amjäya'ayhajxy. Mänitøch nduumädø'owa'añ. ³³Jexioo, mejtsxøø tægøøgxøøjøch njaac tu'uyo'oya'añ. Mänitøch jim nmedsa'añ Jerusalén. Cab jaduñ yhawiinmatsä coo ja'a Diosquexy wiingtuum yhö'ogät.

³⁴Mäniä Jesús miänáangombä: —Ja'a häna'c-hajxy jim tsánaabiä Jerusalén, tøø ja'a Diosquexy hajxy may quiuhga'açh. Tøøch mayhooc nja wi'i ñäma'ay coo ja'a yhaxøøgcuhdujt hajxy ñajtshixø'owät; pero cab hajxy ñä'ä najtshixø'owa'añ. ³⁵Cooçh jim ngóodät Jerusalén, páquiøch jim nhida'añ. Mänitøch mijts jim nnähgue'egáangombä. Cábøch hajxy xyhixaannä høxtä cóonøch hänäjty ngádaactägatsa'añ. Mänit hajxy hänäjty mmäna'ana'añ: “Jaançh tehñ miøj jaançh tehñ jiaançh ja'a Dios tøø quiéxiäbä.”

14 Wiinghoocä Jesús ñøcxy mägaabiä maa ja'a fariseowiindsønä tiøjcän. Poo'xxiøøjooty hänäjty je'e. Jiibiä Jesús hänäjty miähijxna'ayíijäm tøgooty ja'a fariseoshajxy. ²Jiibiä mähdiøjc hänäjty tu'ug qui'ixypa'ammøød.

Jesúswiinduum hánajty tiána'ay.

³Mänitá Jesús miäyajtøøyy ja'a ley-yajnáhixøøbiáhajxy møødä fariseoshajxy:

—Nej, jii cuhdujt jaduhñ coo ja'a pa'amjäya'ay myajmøcpøgät poo'xxiøøjootiä.

⁴Pero cab hajxy waamb ñä'a hadsooyy. Mänitá Jesús ja'a pa'amjäya'ay ñähdoonñ, yajmøcpøjcy. Mänit ñämaayy coo wyiimbídät. ⁵Mänitá fariseoshajxy ñämáayyägombä:

—Coo mijts mburro mweey quiuga'awø'øwät nøøjutjooty, nej, cab hajxy mänitiä myajpädsómädä, hoy hánajty jia poo'xxiøøjootiä.

⁶Cab hajxy waamb ñä'ägä hadsooyy.

⁷Mänitá Jesús yhijxy coo ja'a woybä wichpä hoyháñaabiejt hajxy jia wi'i yhøxta'ay. Mänit miänaañ:

⁸—Coo ja'a pøc ja'a hu'ug hánajty mänaa jiadyii, coo mijts myajwówät, cabä hoyháñaabiejt hajxy myaghäña'awø'øwät. Hix, coo häna'c maas cuhdujtmøødpä jiaac médsät, ⁹mänitá cudøjc xñámá'awät: “Pädø'øg, mo'ow yø'ø häñaabiejt yø'ø häna'c tøø jiaac méchäbä.” Xyajtsähdiúnäp jaduhñ. Mänit nøcxy mhäña'ay maa ja'a häñaabiejt ca'a hojiatypän.

¹⁰Pero jayøjp mhøxtá'awät ja'a häñaabiejt ca'a hojiatypä. Mänitá cudøjc xñámá'awät: “Mägu'ughajpä, yaa naχ maa hädaa häñaabiejt hojiatypän.” Xquiumáyäp ja'a jäya'ayhajxy ja'a hajxy jim häñaabiä.

¹¹Pøn ja wi'i yajcumayaamb, yajpexaamb je'eduhñ. Pøn ca'a yajcumayaamb, je'eds jaduhñ møjtägø'øwaamb.

¹²Mänitá Jesús ja'a fariseowiindsøn ñämaayy, ja'a hánajty tøø miäwóyyäbä:

—Coo ja'a tsuunaχ hánajty mänaa myagjada'añii, cabä mmägu'ughajpähajxy mwówät, ni ja'a mbuhya'ayhajxy, ni ja'a mjuju ja'a mmägu'ughajxy, ni ja'a mmäjøøn ja'a mmädøjc-hajxy ja'a mäyøøbä. Xwioodägátsäp hajxy je'e ja'a miich hánajty tøø mwóyyäbä.

¹³Pero je'eds mwówäp ja'a häyoobä, ja'a ca'a hoybä, ja'a tecymia'adpä, ja'a wiindspä. ¹⁴Hoy miich jaduhñ xquia'a ja woodägátsät, jootcujc mhídät jadähooc je'eguiøxpä coo ja'a hoyhajt ja'a weenhajt mbaada'añ mänaa ja'a jäya'ayhajxy hánajty jiuypjøjtägatsa'añän, ja'a Diosmädia'agy hajxy hánajty tøø quiudiúñäbä.

¹⁵Jimä jäya'ay hánajty tu'ug yhäña'ay meexäwiinduum. Mänitá Jesús ñämaayy:

—Jootcujc je'e, pøn mägayaamb Dioswiinduum.

¹⁶Mänitá Jesús miänaañ: —Tsøc mädiäacäm. Jaduhñä jäya'ay tsuunaχ tu'ug yagjajtä. Mänitá jäya'ay may yajwoowä.

¹⁷Coo hánajty tøø yhabaady, mänitá mioonsä ñämaayy: “Nøcx ja'a woybä wichpähajxy näma'aw coo hajxy yhadø'ødsät, coo ja'a cay tøø yhabaatnä.” ¹⁸Pero mänit hajxy nägøxiä yhadsooyy cooc hajxy quia'a näbaadø'øwáañäxä. Tu'jäya'ay miänaañ: “Tøøchä naax njuy; nøcxáambøch cham nhixa'añ. Huuc mee'x, cábøch xñäbaadø'øwaanä.” ¹⁹Mänit wiingpä miänáangombä: “Tøøchä waj njuy mägooxmancuerno. Je'eçh

nøcxy nyajtuunghabøga'añ. Huuc mee'x, cábøch xñábaadø'øwaañä.”
 20 Mänitá wiingpä jiaac mánáaṅgombä: “Naambócyhøch høøch; páadyhøch nga'a nøcxa'añ mägaañä.” 21 Coø ja'a moonsä wyiimbijtägajch, mänit je'e cøjx nãgapxy waambaty hajxy yhadsooy. Mänitá wyiindsøn jiaanč tehṁ jiootma'ty. Mänitá mioonsä nãmáaguioombä: “Nøcx jim päyø'øguiä maa ja'a mõjtu'ujän. Pønjaty jim mbaatyp, ja'a häyooä, ja'a ca'a hoybä, ja'a tecymia'adpä, ja'a wiindspä, je'e jaduñ mwoomínäp.” 22 Coø ja'a moonsä jadähooç wyiimbijtägajch, mänit miänaañ: “Wiindsøn, Tøøch ngudiñ nébiøch miich tøø xyhane'emiän. Pero xiinä hawa'adspä.” 23 Mänitá wyiindsøn yhadsooy: “Nøcx jim maa ja'a xu'udstu'ujän, maa ja'a padu'ujän; pønjaty jim najxp, mnãmá'awäp hadsip coø hajxy myínät, nébiøch ndøjc jaduñ yhúdsät. 24 Pero pønjátyhøch tøø nja yajwoyii, cab hajxy min quiaya'añ maač ndsuunax nyagjadyiijän.”

25 Nãmayyä jäya'ay ja'a Jesús hánajty pianøcxy. Mänitá Jesús wia'wiimbijty. Mänit miänaañ:

26-27 —Pønjátyhøch xpianøcxaamb, wéenhøch xmiaas tsocy quejee ja'a tiaj ja'a tieedyhajxy chocy, møødä yhuch ja'a piuhya'ay; quejee ja'a yhuungä tio'oxy chocy. Pø caj, cábøch hoy xpianøcxät. Pøn ja'a jiugyhajt ca'a nähdujp, cábøch jaduñ hoy xpianøcxät. 28 Coø pønä tøjc hánajty quioja'añ, jayøjpä xiädø'ñ miächoy pø pedáañäp jaduñ. 29 Pø caj, mänit jaduñ näxi'igøøjät coø hánajty

quia'a maya'añ. 30 Jaduñ hajxy miáná'anät: “Xiøøbä yø'ø craa ñä'ä yajtsøhndaacy; maa jaduñ ñä'ä yajmaayy.” 31 Coø ja'a reyhajxy hánajty ñimiädsibø'owa'añii, jayøjp hajxy yhahixø'oy pø mäjäda'agaamb coø nãmajcmil soldado jia møødä, coø ja'a miädsip ja'a soldado nähii'xmil miøødä. 32 Pø caj, jäguemä ja'a quiuguexy quiéxät weenä miädsip jaduñ miee'xy. 33 Jaaná jaduñ mijtspä, coø hajxy cøxiä wiinä mga'a najtshixø'owät ja'a høøchcøxpä, cábøch hajxy hoy xpianøcxät.

34 Tuungpaatpä caan hit.

Pero coø jiø'owät, cab jaduñ mänaa yhojó'ñät. 35 Cab jaduñ tiuungpaadaannä. Nä'ä tägooby jaduñ. Pø mwiiñjuøby hajxy, wéenhøch hädaa nmädia'agy xmiäbøjcä.

15 Mänitá Jesús ñámejtsä ja'a yajnähjuudiutpähajxy nãmay møødä cubojpä cugädieeybähajxy. Miädowaambiä miädia'agy hajxy hánajty.

2 Mänitá fariseos ja'a Jesús hajxy tiägøøyy mädiaacpä møødä ley-yajnáhixø'obiähajxy:

—Cab jaduñ yhooyä coø yø'ø craa ja'a cubojpä ja'a cugädieeybä miägu'ughädät, coø miøødcáyät.

3 Mänitá Jesús tiägøøyy mädiaacpä:

4 —Tsøc mänáañäm, pøn meeg hánajty møød mägo'x, coø tu'ug tiägóyyät, nej, cabäda'a nägø'ø nädecypä mhøxtá'awädä. 5 Y coø mbáadät, mänit mxoondá'agät. Mänitá meeg mdsehñø'ögät. Mänit mdsehñnøcxät maa ja'a mdøjcän. 6 Coø jim mmédsät, mänit

mmäjøøn mmädøjc mwoomúgät møødä mmägu'ughajpähajxy. Mänit mmäná'anät: "Tsøg hajxy xoondáacäm; tøøchä meeg nbaady ja'a hijty tøø tiägöyyäbä." ⁷Tøyhajt, jaanä jaduhñ hajxy jim xioonnda'agaambä tsajpootyp coo ja'a cubojpä cugädieeybä yhaxøøgcuhdujt hajxy ñajtshixó'owät. Ja'a jaac nämäd aaxc-hii'x-cumajmocxmádaaxc jäya'ayhajxy, ja'a hijty tøø quia'a tu'udägöyyäbä, cab hajxy jiaty näxoonnda'aga'añii.

⁸Tsøg jaac mänánaäm, mädyii to'oxiøjc xädø'øñ majc møød, coo tu'ug tiägöyyät, mänitä jøøn quiudøø'xø'øy. Mänit tiägø'øy tøjpeetpä hodia'agyhaamby, cham jaduhñ yhøxta'ay. ⁹Coo ja'a xädø'øñ piAADY, mänitä miäjøøn miädøjc wioomucy møødä miägu'ughajpähajxy. Mänit miäna'añ: "Tsøg hajxy xoondáacäm; tøøchä xädø'øñ nbaady ja'a hijty tøø tiägöyyäbä." ¹⁰Tøyhajt jaduhñ, jaanä jaduhñ ja'a Diosmoonsähajxy jim xioonnda'agaambä tsajpootyp coo ja'a cubojpä cugädieeybä yhaxøøgcuhdujt hajxy ñajtshixó'owät.

¹¹Mänitä Jesús jadähooc miänáangombä:

—Tsøg mädiáacäm, jaduhñä jäya'ay hänajty tu'ug, metsc yhuung. ¹²Mänitä muutspä ñämaayy ja'a tieedy: "Teedy, høøchä xädø'øñ móoyyác mädúhñtiøch hijty tøø xyajnáhdijy." Mänitä yhuunghajxy miooyy ja'a xädø'øñ. ¹³Cujaboom cumaaxcä craa muutspä tiu'ubøjnä. Cøjxä xiädø'øñ miädu'ubøcy. Mänit ñøxcy jäguemnaax.

Mänitä xiädø'øñ cøjx ñähadun ñähána'ma'awø'øy. Haxøøg hänajty wiädity. ¹⁴Coo ja'a xiädø'øñ hänajty tøø quiøjxnä, mänitä yuu miejch maa ja'a craa hänajtiän. Mänitä yuu hoyhoy piáatänä. ¹⁵Mänitä tuung hoy piAADY mähädsømyagjøø'x. ¹⁶Jia wi'i jioø'xaamby hänajty ja'a hädsøm hänajty jioø'xypä, pero cab hänajty tii ñä'ägä mo'oyii. ¹⁷Mänit wyiinmahñdymejch: "Jim maaäch ndeedy tiøjcän, jaançh tehñ quiu'uxiä ja'a moonsähajxy jim quia'y yhu'ugy. Y høøch, cooçh yaa nmähmó'owät, yuuhó'ogäbøch häyaa. ¹⁸Nnä'ägä nõcxyhøch jim maaäch ndeedy tiøjcän. Jadúhñhøch nnäma'awa'añ: Teedy, tøøch ngädieey ja'a Dioscøxpä møødä miichcøxpä. ¹⁹Cábøch miich hawiinmats xyhuunghájñät. Hóyhøch miich xñä'a wá'anät moonsä." ²⁰Mänitä craa wyiimbijty, ñøcxtägajch maa ja'a tieedy tiøjcän.

'Møjñä hänajty quia'a mech, mänitä tieedy jioøcuheebøyyä. Mänitä tieedy jioot xiuu'tspøjcy jadähooc. Mänit päyø'øguiä hoy jioøcubaadø'øy. Mänit ñähmäneeñ quiuhmäneeñ. Mänit chu'xy. ²¹Mänitä yhuung miänaañ: "Teedy, tøøch ngädieey ja'a Dioscøxpä møødä miichcøxpä. Cábøch miich hawiinmats xyhuunghájñät."

²²Mänitä tieedy ja'a moonsä tu'ug ñämaayy: "Tsógäm, nõcx ja'a howyit yajpädsøm. Yajnguiubøgøø. Pädaacä cø'øjädsohñdy tu'ug møødä xäguiø'og. ²³Nøcxä wajhuung hajxy yagho'og ja'a ni'xpä. Tsøgä xøø hajxy yagjájñäm. Tsøg hajxy caayy tsøg hajxy húucäm. ²⁴Jadúhñhøch hädaa nhuung hijty

nebiä ho'ogypiän nebiä tägoybän. Pero tøøch jadähooc xyhajuø'oyii. Y chaačh tøø xñamech." Mänitå xøødsuu hajxy yagjåjtå.

²⁵Ja'a craa mõjpä, jim hånajty je'e camjooty. Mänit wyiimbijty. Coø hånajty miedsaannå maa tøjcån, mänit miädooyy coø hajxy wyi'i xiu'luxy, coø hajxy wyi'i yhech wyi'i piuty. ²⁶Mänitå moonså tu'ug miøjyaaxy. Mänit miäyajtøoyy: "Tii jaduhñ jåjtåp." ²⁷Mänit nãmaayyå: "Tøø ja'a mhuch miech hoy ween. Paadiå mdeedy ja'a wajhuung ni'xpå tøø yajyagho'ogyii."

²⁸Mänitå craa mõjpä jiootma'ty. Cab hånajty tiøjtågø'owa'ån. Mänitå tieedy tiøjpådsøomy. Mänit hoy miänuu'xta'agyii coø tiågø'owåt.

²⁹Mänitå craa ja'a tieedy nãmaayy: "Tøøch miich majiomøjt nja møødtuñ. Homiänåajøch miich mmådia'agy tøø nmåbøjcåm. Pero cåbøch miich månaa tii tøø xñå'ågå mo'oy, nébiøchå xøø jaduhñ nyagjadøøjåt møødhøch nmågu'ughajpådøjc-hajxy. ³⁰Pero xiidså mhuung tøø miech. Tøø miich mxådø'øñ xñå'å yaghåyø'cå maa ja'a cuhhindo'oxiøjcån. Y yø'ø craagøxpå miichå wajhuung ni'xpå tøø myajyagho'ogyii."

³¹Mänitå tieedy miänåañ: "Huung, homiänåajøch miich tøø xmiøødhity. Y haagå miich mj'e jadeuhñ mådúhñtiøch jii nmøødå. ³²Pero hawiinmats jadeuhñ coø ja'a xøø nyagjåjtåmåt, coø nxoondåacåmåt, je'eguiøxpå coø yø'ø mhuch tøø miech. Jadeuhñ hijty nebiä ho'ogypiän nebiä tägoybän. Pero tøøds jadähooc xyhajuø'oyyåm."

16 Mänitå Jesús ja'a jiamiøød nãmaayy:

—Jaduhñdså mäyøøjäya'ay hånajty tu'ug. Mänit hoy yhawåañxå coø ja'a xiådø'øñ hånajty yajtúunåxå ja'a mioonså. ²Mänitå mioonså miøjyaaxy: "Nej, tøyhajt jadeuhñ coøch miich ja'a nxådø'øñ xwyi'i yajtúunåjå. Hoorå, høøch móoyyåc mådúhñtiøch miich hijty tøø nyajcø'ødågø'oy. Cåbøch miich nmoonsåhadaannå." ³Mänitå craa tiågøoyy tajpä maabiå: "Nébiøch jadeuhñ nnå'å jatcø'owåt. Xpiøgåanåbøch ja'a nduung jadeuhñ. Cåbøch mõcmåjaa nmøødå coøch nyu'uw coøch nbúxåt. Tsåhdiúnåbøch jadeuhñ coøch ndågø'owåt xådø'øñyujwaambå. ⁴Tøøch nnajuø'oy nébiøch njatcø'owåt, nébiøchå jäya'ayhajxy xtiøjmø'owåt, coøch nduung hånajty tøø xpiøjcå." ⁵Mänit tu'ugjaty tu'ugjaty miøjyaaxy pønjaty ja'a wyiindsøñ hånajty månuu'xyhajp. Mänitå tu'jäya'ay jayøbjat miäyajtøoyy: "Mådúhñtiøch yø'ø nwiindsøñ xmiänuu'xiå." ⁶Mänit yhadsooyy: "Mågo'xlatå acéitøch nmänuu'xiå." Mänitå craa miänåañ: "Hådaa nocy jadeuhñ månaamb coø miich mågo'xlatå mmänuu'xyhaty. Chaadså nocy wiingpä. Huug hädiuundågats coø juxychågui'xmajc-latå mmänuu'xyhaty." ⁷Mänitå tu'ug miäyajtøøgombå: "Míichåts, mådúhñtiå mnuu'xy." Mänit yhadsooyy: "Mågo'xquixø'hñdyhøchå trigo nmänuu'xyhaty." Mänitå craa miänåañ: "Chaadså nocy

wiingpä. Huug hädiuundägats coo mädaaxc-hii'x mmänuu'xyhaty.”

⁸Manitä mäyøøjäya'ay ja'a mioonsä quiumaayy coo quiuhwijjiä. Maas cuhwijy ja'a Diosmädia'agy hajxy ca'a mabøjpä maa ja'a tiuunghajxiän quejee yø'ø Diosmädia'agy hajxy mabøjpä.

⁹Tsipøxpä xädø'øñ quiøxa'añ hädaa yaabä naaxwiin. Myajtúnäp hajxy jaduhñ nebiä jäya'ay hajxy jaduhñ xmiägu'ughädät. Coo hänäjty tøø mho'nä, mänitä Dios jim xwyiingpøgät tsajpootyp.

¹⁰Pønä xädø'øñ hoy yajtuumb, hoy jia weentiä, coo ja'a xädø'øñ hänäjty miayyä, mänit hoy yajtúungombät. Pero pønä xädø'øñ hoy ca'a yajtuumb coo hänäjty weentiä, ni jaduhñ hoy quia'a yajtúnät coo hänäjty miayyä.

¹¹Jaduhñds je'e, coo mijts ja'a xädø'øñ hoy mga'a yajtúnät hädaa yaabä naaxwiin, caj mijts ja'a Dios xyajcø'ødägø'øwät mädyii jaančh tsoobaadaamb. ¹²Y coo wiingjäya'ay xiädø'øñ hajxy hoy mga'a yajtúunät, cabä hoyhajt ja'a weenhajt hajxy jim mbáadät tsajpootyp.

¹³Coo ja'a moonsä ja'a wyiindsøn metsc miädúnät, ja'a tu'jäyá'ayäbä, je'e miädia'agy hoy quiudiuunäp; ja'a tu'jäyá'ayäbä, cabä miädia'agy miäbøjcät. Jaanä jaduhñduhmbä, coo ja'a xädø'øñ hajxy mwi'i chögät, cabä Dios hajxy hoy mmädúnät.

¹⁴Jimä fariseoshajxy hänäjty näje'e miämädoona'ay. Jiaančh tehñ piøcjuøøbiä fariseos ja'a xädø'øñ hajxy hänäjty. Mänitä Jesús hajxy ñäxiicy. ¹⁵Mänitä Jesús miänaañ:

—Mijts, mjaančh tehñ yajcumayaamb hajxy jaduhñ

maa ja'a cu'ughagujcän. Pero xñajuøøyyäp ja'a Dios ja'a mwiinmahñdyhajxy. Mädyiijaty ja'a jäya'ayhajxy quiumaaby, je'edsä Dios jaduhñ piejxyp.

¹⁶Ja'a Moisés miädia'agy hijty cudiuunäxäp møødä Diosquexy miädia'agyhajxy. Pero coo ja'a Juan ja'a Diosmädia'agy tiägøøyy yajwa'xpä, nägøxiä jäya'ayhajxy jia wi'i tiägø'øwa'añ maa ja'a Diosmädia'aguiän.

¹⁷Pero cabä Moisés miädia'agy tiägoyya'añ. Maas paquiä ja'a tsajpootyp tiägóyyät møødä naaxwiin quejee ja'a Moisés miädia'agy.

¹⁸Pønä tio'oxiøjc høxmajtsp, tu'udägooby jaduhñ coo wiingto'oxiøjc wyiingpøjnät. Jaanä jaduhñ tiu'udägoobiä pønä to'oxiøjc wiingpøjp ja'a tøø yhøxmachñijäbä.

¹⁹Jaduhñdsä mäyøøjäya'ay hänäjty tu'ug. Jaančh tehñ yajxon ja'a wyit hänäjty miøødhaty. Jabom-jabom ja'a xøø hänäjty yagjadyii jaančh tehñ yajxon.

²⁰Jimä mähdiøjc hänäjty tu'ug xiøhaty Lázaro. Jaančh tehñ ñähbu'uds jaančh tehñ quiuhbu'udsä Lázaro hänäjty. Jim naxy yhäna'ay naaxwiin maa ja'a mäyøøhäna'c tiøghaawän.

²¹Je'e ja'a Lázaro hänäjty jia wi'i quiaaamby tijaty jiiby cahb naaxwiin maa ja'a mäyøøjäya'ay mieexän. Høxtä nähwéhyyäxäbä Lázaro piu'uds hänäjty ja'a húcäm. ²²Mänitä Lázaro yho'nä. Mänitä yháañämä yajnøcxäxä tsajpootyp maa ja'a Abraham wyiinduumän. Ja'a Diosmoonsä yajnøcx. Mänitä mäyøøjäya'ay

yho'pä. Mänit yajnaaxtägøøyyä.
²³Mänitä yháañämä yhádaacy
 mõjcu'uhaam. Mänit tiägøøyyä
 tsaächtiúunäbä. Mänit chajhee'py.
 Jimä Abraham nãheebøøyy møødä
 Lázaro. ²⁴Mänit yaaxy: “Abraham,
 høøch näxúu'tsäc. Høøchä Lázaro
 yajnäguéjxäc. Weenä quiø'øjøjp
 yajxoogy wéenhøch ndoots
 min xyajtøjtsä. Jaanč tehñ
 chaächpøjöpoch yaa jøønjooty.”
²⁵Mänitä Abraham yhadsooyy:
 “Huung, jahmiets jaduñ nej tøø
 mdsäna'ay nej tøø mhäyoyyän
 yajxon. Pero Lázaro, jaanč tehñ
 yhäyoob je'e hijty. Pero coo yaa tøø
 quioo'nä, jootcujc yhjñä. Miičhäts
 jiiby tsaächpøjnäp. ²⁶Y chaads
 je'ebä, cabä najxtaact maa, coo
 ja'a Lázaro jiiby yhädá'agät, ni
 coo miič yaa mbédät.” ²⁷Mänitä
 mäyøøjäya'ay miänaañ: “Abraham,
 tunä mayhajt, huuc quex ja'a
 Lázaro jim maač ndeediän.
²⁸Mägøøxc-høch nbuhy'a'y jim.
 Weenä Lázaro nøxcy nãma'ay
 coo ja'a yhaxøøgcuhdujt hajxy
 ñajtshixø'owät, neby hajxy yaa
 min quia'a tsaächpøjpät.” ²⁹Mänitä
 Abraham miänaañ: “Jim hajxy je'e
 miøødä ja'a Moisés miädia'agy
 møødä Diosquexy miädia'agyhajxy.
 Je'e hajxy quiudiünäp.” ³⁰Mänitä
 mäyøøjäya'ay miänáangombä:
 “Abraham, tøyhajt jaduñ, pero
 coo ja'a ho'ogyjiäya'ay jim miédsät
 maač ndeedyhajxiän, mänit
 mábøcypiä yhaxøøgcuhdujt hajxy
 ñajtshixø'owät.” ³¹Mänitä Abraham
 yhadsóogombä: “Pø cab hajxy
 quiudiuna'añ nebiä Moisés jia
 hanehmiän, nebiä Diosquexyhajxy
 jia hanehmiän, nej, je'e hajxy nøxcy

ñä'a mábøquiä coo ja'a ho'ogypiä
 jia médsädä.”

17 Mänitä Jesús ja'a jiamiøød
 nãmaayy:

—Tspicøxpä jäya'ay hajxy xjia
 wi'i yajtu'udägoyya'añ. Pero pøn
 jaduñ jatcøøby, haxøøg jiada'añ.
²⁻³Nägüentä hajxy mwädítät. Coo
 pøn yø'ø pigäna'c yajtu'udägóyyät,
 haxøøg jaduñ jiädät. Mejor
 nã'ägä mejjwyipø'owøjät
 molinopaanyo'xodsø'oy.

'Coo ja'a mbuhy'a'y
 xñägädieeyø'owät, mhójjäp
 jaduñ. Y coo xñämä'awät coo
 mmée'xät, mmée'xäp jaduñ. ⁴Coo
 juxtujc-hooc xñägädieeyø'owät
 tu'xøøbä, y coo juxtujc-hooc
 xñämä'awät coo quia'a
 jatcø'owaannä jaduñ, mmée'xäp
 jaduñ.

⁵Mänitä Jesús nãmaayyä ja'a
 jiamiøødhajxy:

—Højtsä mäjaa jaac móoyyác neby
 højts maas hoy nmábøgät.

⁶Mänitä Jesús yhadsooyy:
 —Coo mijts häxøpy mmábøcy hoy
 jia tu'lii'xiä, coo yø'ø quepychaa
 hajxy mnämä'awät coo nøxcy
 ñimiejjwyipø'oyii, xquiudiünäbä
 mmädia'agyhajxy jaduñ.

⁷Tsøg jaduñ mänáanäm,
 coo ja'a mmoonsä tu'ug
 wyiimbídät camjooty, nej, jaduñ
 mnämä'awädä: “Min cay.” ⁸Caj pues,
 cab jaduñ mnämä'awät. Jaduñ
 mnämä'awät: “Høøch njøø'xy
 hädiünäc, høøch puhbéjtäc maač
 cham गया'añ nhu'uga'añän.
 Mänit miič häyaa høxhaam
 mgáyät mhú'ugät.” ⁹Ni mga'a
 Diosmó'owät coo ja'a mmädia'agy
 hánajty tøø xquiudiünä. ¹⁰Jaanä

jaduhñ mijtspä, coo hajxy hänäjty tøø mgudiuñ nebiatiä Dios hänäjty tøø xyhane'emiän, jaduñhä Dios hajxy mnämä'awät: “Cab højts hawiinmats xmió'owät Dioscujú'uyäp. Jaduhyyä højts tøø ngudiuñ neby højts miich tøø xyhane'emiän” —nømä Jesús miänaañ.

¹¹Tu'uyöñhäbä Jesús hajxy hänäjty. Jerusalén hajxy hänäjty ñøcxy. Mänit hajxy jim miejch maa ja'a Samarianaax miøødnibiaadyijän ja'a Galileanaax. ¹²Mänit hajxy miejch maa ja'a cajpthuung tu'ugän. Mänitä Jesús jiojcubaadøøyyä ja'a häna'c nämajcpä ja'a haxøøgpu'udsmøødpä. Pero cabä Jesús wiingón tiehm ñämejtsä.

¹³Mänit hajxy yaaxy:

—Jesús, Wiindsøn, højts näxúu'tsäc.

¹⁴Coo ja'a Jesús jaduñ yhijxy, mänit miänaañ:

—Nøcx hajxy niyajcähxø'ogøø maa ja'a teedyhajxiän.

Coo hajxy wyiimbijty, mänit hajxy cøjx ñähwa'açh ja'a piu'uds. ¹⁵Coo hajxy yhijxy coo hajxy hänäjty tøø ñähwa'açh, mänit tu'jäya'ay wyiimbjcumä. Mänit møc yaaxy coo ja'a Dios miøjjä jiaançhä.

¹⁶Mänitä Jesús hoy wyiinjjcäda'agy. Høxtä mägujtscädaac naaxwiin. Mänitä Jesús Dyosmooyy. Samaria ja'a craa hänäjty chooñ. ¹⁷Mänitä Jesús miänaañ:

—Nämajc ndijy hajxy tøø ñähwa'açh. Maa ja'a jiamiøødhajxy ja'a nädaaxtucpä. ¹⁸Jagooyyä hädaa craa nidiuñ tøø wyiimbity Diospa'yaaxpä, y Samaria chooñ.

¹⁹Mänitä Jesús ja'a craa nämäaayy:

—Tänaaayø'og, nøcxnä. Coo tøø mmäbøcy, paadiä mbu'uds tøø cho'ogy.

²⁰Mänitä fariseos ja'a Jesús hajxy miäyajtøøyy mänaa hänäjty yhabaada'añ coo ja'a Dios ja'a miäjaa hänäjty yajcähxø'oga'añ. Mänitä Jesús yhadsooyy:

—Cab jaduñ yaghixa'añ mänaa jaduñ yhabaada'añ. ²¹Cab hajxy jaduñ miäna'ana'añ: “Xiids je'e”, o “Chaads je'e.” Tøø yhabaatnä coo ja'a Dios ja'a miäjaa yajcähxø'oga'añ.

²²Mänitä Jesús ja'a jiamiøøð nämäaayy:

—Habaadaamb jaduñ cooçh mijts xjia wi'i yhiixtägatsa'añ, høøçh ja'a Diosquexypä; pero cábøch hajxy xyhixa'añ. ²³Mänitä cu'ughajxy miäna'ana'añ cóogøch tyijy tøø ngäda'agy; pero cab hajxy mmäbøgät.

²⁴Jadúñhøch ngäda'aga'añ nebiä wädsucän coo xim yam tiägø'oy hajjapä. ²⁵Pero jaançh tehñ chaaçhpøgáambøch jayøjp. Cáboch jäya'ayhajxy xmiee'xa'añ ja'a hajxy jäda'ahatypä. ²⁶Cooçh hänäjty ngädaactägatsa'añ, jaduñhä jäya'ayhajxy hänäjty jiatcø'owa'añ nebiä jecyjäya'ayhajxy hänäjty jiatcø'oyän mänaa ja'a Noé hänäjty jyijän. ²⁷Wi'i quiaaby wi'i yhuucp hajxy hänäjty, wi'i piøjp wi'i yhuucp hajxy hänäjty. Mänitä Noé tiägøøyy barcojooty. Mänitä Dios ja'a nøøgomdägoy quiejxy. Cøjx hajxy jaduñ yho'ogy. ²⁸Jaduñ hajxy hänäjty jiatcøøbiä mänaa ja'a Lot hänäjty jyijän. Wi'i quiaaby wi'i yhuucp hajxy hänäjty, wi'i jiuuby wi'i tioo'p hajxy hänäjty, wi'i

ñiip hajxy hānajtj, wi'i tiõjcojp hajxy hānajtj. ²⁹Coo ja'a Lot jim chohñ maa ja'a Sodomacajptootiän, mänitā jøøn tiägøøyy cahbā møødä azufre. Cõjxā jäya'ayhajxy yho'ogy. ³⁰Jaduhñä jäya'ayhajxy hānajtj jiatcø'owáangombā cooçh hānajtj ngādaactägatsa'añ, høøçh ja'a Diosquexypä.

³¹Mānitxøø, pøn hānajtj hijp tøjwiing, caj tiõjtägø'owät coo cõxiä wiinä yajpādsõmät; jaduhyyā piäyø'ögät. Y pøn hānajtj hijp camjooty, caj wyiimbídät maa ja'a tiõjcän; jaduhyyā tiu'ubøjtõwät.

³²Høxtahm̄dsä Lot tio'oxiõjc jiajty.

³³Pønä jiugyhajt hädaa yaabā naaxwiin ja wi'i yaghoyø'owaamb, haxøøgtuum piäda'aga'añii. Pero pønä jiugyhajt nähdugaamb, hodium je'e ñäl'ägä nõcxa'añ.

³⁴Tøyhajt jaduñ, mānitcoods, nämetsc hajxy hānajtj mia'awa'añ tu'ugmaabejt. Tu'ug yajnõcxa'añii, tu'ug yajmāhmø'owa'añii.

³⁵Jaduhñä to'oxiõjc-hajxy hānajtj jiojtpä nämetsc. Tu'ug yajnõcxa'añii, tu'ug yajmāhmø'owa'añii.

³⁶Jaduhñä ya'adiõjc-hajxy hānajtj nämetsc tiuumbā camjooty. Tu'ug yajnõcxa'añii, tu'ug yajmāhmø'owa'añii.

³⁷Mānitā Jesús miäyajtøøwä:

—Wiindsõñ, maa jaduñ jiada'añii.

Mānitā Jesús yhadsooyy:

—Tsipecxp jaduñ jiada'añii nébiøch cham̄ nmādia'aguian.

18 Mānitā Jesús tiägøøyy yajwiingapxøøbiä coo hajxy tehngajnā Dyiospa'yá'axät, coo hajxy mānaa quia'a jootmayhädät, hoyyā Dios quia'a ja tsoj hadsówät.

²Mānit miānaañ:

—Tsøg hajxy mādiáacām. Jaduhñä jäya'ay hijty tu'ug quiuduunghaty. Cabā Dios hānajtj wyiingudsähgø'øy ni ja'a miägajptjāya'ay. ³Jimā yaamgto'oxy hānajtj tu'ug maa ja'a cajptän. Ja'a miädsip hānajtj jia wi'i ñäxø'owø'owaamby. Paady hānajtj jabom̄-jabom̄ ñõcxy maa ja'a cuduungän neby jaduñ piuhbedøøjät. ⁴Cabā yaamgto'oxy miādia'agy hānajtj ñäl'ägä cudiuñāñäxä. Mānitā cuduung tiägøøyy tajpā maabiä: “Cábøch pøn nwiingudsähgø'øy ni ja'a Dios ni ja'a jäya'ay. ⁵Pero cooçh yø'ø yaamgto'oxy xwyi'i yhadsipy, ngudiunāñbøçhā miādia'agy jaduñ, nébiøch min̄ xquia'a wi'i yhadsijpnät. Pø caj, jootmā'adäbøch häyaa.”

⁶—Nømā cuduung miānaañ, ja'a Dios ca'a wiingudsähgøøbiä.

⁷Jaduhñä Dios ja'a yhuung piuhbedaañbā, ja'a hajxy xøømdsuhm̄ pa'yaaxpä. ⁸Paquiä yhadsowa'añ. Pero høøçh ja'a Diosquexypä, cooçh yaa ngādaactägätsät hädaa yaabā naaxwiin, nej, je'enä ja'a jäya'ay ja'a Diosmādia'agy hajxy hānajtj miäböcyñäjä.

⁹Jimā jäya'ayhajxy hānajtj näje'e, wi'i yajcumayaamb hajxy hānajtj. Wyi'i piejxyp wyi'i tiehmby ja'a miägu'ughajpā hajxy hānajtj. Mānitā Jesús miānaañ:

¹⁰—Tsøg hajxy mādiáacām.

Jaduhñä jäya'ay metsc ñõcxy tsajtøogooty Diospa'yaaxpä. Tu'ug hānajtj tiuñ fariseo, tu'ug hānajtj tiuñ yajnähjuudiutpä.

¹¹Ja'a fariseo, täna'a hānajtj

Dyiospa'ya'axy: "Haay Dios, Dioscujú'uyäp cooçh nguhdujt quia'a haxoøgä. Cábøch nmeeçh cábøch nboty, cábøçhä to'oxiojç nmøødá wiingpä. Cábøch jaduhñ njatcø'øy nej yø'ø yajnähjuudiutpä. ¹²Hayúujøch naxy nhity metsc-hooc tu'ugpä semana. Nyéjpiøçhä diezmo homiánaajä." ¹³Jäguemjuøbiä yajnähjuudiutpä hänäjty tiäna'ay. Cab hänäjty nälägä tsajheeby. Jaanç tehñ jiootmayhajp hänäjty je'e. Jaduhñ hänäjty miäna'añ: "Haay Dios, høøçh näxúu'tsäc. Nnajuøbiøch cooçh ngubojpä cooçh ngugädieeyä." ¹⁴Tøyhajt jaduhñ, coo ja'a yajnähjuudiutpä wyiimbijnä, tøø ja'a piojpä quiädieey hänäjty yajnähwa'açhijäm ja'a Diösäm. Pero ja'a fariseo, cab jaduhñ yajnähwaatsä. Pøn ja wi'i yajcumayaamb, cabä Dios quiumay. Pero pøn ca'a yajcumayaamb, je'edsä Dios jaduhñ quiumaaby. ¹⁵Mänitä pigäna'c-huunghajxy näje'e wiomejtsä maa ja'a Jesúsän, nebiä Jesús jaduhñ quiunuu'xät. Coo ja'a jiamiøødhajxy jaduhñ yhjxy, mänit hajxy tiägøøyy hojpä ja'a pigäna'c-hajxy tøø wiomeçhijäbä. ¹⁶⁻¹⁷Mänitä Jesús nänämaay ja'a jiamiøødhajxy: —Weenç yø'ø pigäna'c-hajxy xñämiñ. Ca'a hajxy mhaducy. Yø'ø pigäna'c-hajxy, chojpiä jioothajxy coo ja'a Diosmädia'agy hajxy miäböçät. Cab hajxy yajcumaya'añ. Pønä jioot jaduhñ tsojpa coo ja'a Diosmädia'agy miäböçät, pøn ca'a yajcumayaamb, je'eds jim nõcxaamb maa ja'a Dioswiinduumän. Tøyhajt jaduhñ.

¹⁸Mänitä Jesús miäyajtøøwä ja'a copc-hajpä tu'ug:

—Wiindsøn, mhoyhäna'c miiçh. Tiiçh ngudiünäp nébiøch çojxta'axioø njyuhädät nebiä Dios jiygyhatiän.

¹⁹Mänitä Jesús yhadsooyy: —Tiiçh coo xñäma'ay cooçh nhoyhäna'cä. Jagooyyä Dios tu'ug yhooyä. ²⁰Mjajpy jaduhñ nebiä Dios tøø xyhanéhäm, tuhmds: "Cabä to'oxiojç wiingpä mmøødhädät; ca'a mjäya'ay-yagho'ogy; ca'a mmeeçh; ca'a mhøhnda'agy; mwiingudsähgø'øwäp ja'a mdaj ja'a mdeedy."

²¹Mänitä copc-hajpä miänaañ: —Ngudiúumbiøch jaduhñ. Chúucnøch jaduhñ nmädsohndaacy ja'a wiinmahñdy hoybä.

²²Mänitä Jesús miänaañ: —Jadu'tu'uyyä mga'a yajpedyii. Cøx toog mäduhñtiä mmøødá; mänitä häyoobäya'ay mnä'ä mó'owät. Coo jaduhñ mgudiünät, mänit jim mdägø'øwät tsajpootyp. Hoorä, høøçh padu'ubøjçäc.

²³Mänitä craa jiootmabiøjcy, je'eguiøxpä coo hänäjty jiaanç tehñ miäyøøjä. ²⁴Coo ja'a Jesús yhjxy coo ja'a craa hänäjty tøø jiootmabiøcy, mänit miänaañ: —Jaanç tehñ chip jaduhñ coo ja'a mäyøøjäya'ayhajxy jim tiägø'øwät Dioswiinduum. ²⁵Maas paquiä ja'a camello naxø'øwät ja'a xuhñdyjutjooty quejee ja'a mäyøøjäya'ayhajxy jim tiägø'øwät Dioswiinduum.

²⁶Mänitä jäya'ayhajxy miänaañ, ja'a hajxy hänäjty jim mämädoonaabiä:

—Pønäda'a jim nä'ä tægø'øwäp Dioswiinduum.

²⁷Mänitá Jesús miánaangombá:
—Mädyii ja'a jäya'ayhajxy quia'a
jadaamby, Dios mäböcypiiä jadaamb.

²⁸Mänitá Pedro miánaañ:
—Tøøds højts ngøxy najtshixø'oy
mäduhñtiä højts hijty nmøødä,
neby højts miich hoy nbanøcxät.

²⁹Mänitá Jesús yhadsooy:
—Tøyhajt jaduñ, pønä tiøjc
najtshixø'owaamb, o ja'a tiaj
ja'a tieedy, o ja'a piuhya'ay, o
ja'a yhuung ja'a tio'oxy, ja'a
Diosmädia'agyquioxpä,

³⁰piaadaamby ja'a maas hoybä
ja'a maas weenbä hädaa yaabä
naaxwiin. Y coo hänajty tøø
yho'nä, mänit hänajty cøjxta'axiøø
jiugyhada'añ nebiä Dios jiugyhatiän.

³¹Mänitá Jesús ja'a jiamiøød
hawiing wioonøcxy ja'a
nämajmetspä. Mänit miánaañ:
—Yam hajxy nnøcxäm Jerusalén.

Jímhøch njada'añ nhabeta'añ
nébiøchä Diosquexyhajxy
jegy xmiädiaaquiän,
høøch ja'a Diosquexypä.

³²Xquiø'ødägø'owáambøch
ja'a teedywiindsøn'hajxy
ja'a jäguembäya'ayhajxy.
Xñäxi'igáambøch hajxy.

Xwyiinwoonáambøch hajxy.
Xwyiingutsujø'owáambøch hajxy.

³³Xwiobho'ogáambøch hajxy.
Mänitøch hajxy xyagho'ogaannä. Y
cudägøøgxøøjoch njujypioğa'añ.

³⁴Cabä Jesús ja'a jiamiøødhajxy
hänajty ñä'ägä wiinjuø'oy nebiä
Jesús hänajty miädia'agy. Tsip
hänajty miädia'agy.

³⁵Coo ja'a Jesúshajxy hänajty
tøø miäwiingoonnä maa ja'a cajpt
hänajty xiøhatiän Jericó, jimä
wiindspä hänajty tu'ug yhäna'ay

tu'haam. Xädø'øñ hänajty
yujwaamby. ³⁶Coo miädooy coo
jäya'ay hänajty may wyl'i ñaxy,
mänit yajtøoy tii jältäp. ³⁷Mänitá
yhawáañäxä coo ja'a Jesús hänajty
ñaxy, ja'a Nazaret-tsohmä.

³⁸Mänitá wiindspä yaaxy:
—Jesús, miichä David xyhaphajp
xyhoc-hajp. Høøch hii näxúu'tsác.

³⁹Ja'a hajxy hänajty jawyiin
najxpä, mänit hajxy yhojy coo
yhamónät. Pero maas møc jaduñ
jiaac yaaxy:

—Miichä David xyhaphajp
xyhoc-hajp. Høøch hii näxúu'tsác.

⁴⁰Mänitá Jesús tiánaaxiøjpy.
Mänit miánaañ:

—Yajmets yø'ø wiindspä yaa.
Coo ja'a mähdiojc yajmejtsä maa
ja'a Jesúsän, mänitá Jesús ja'a
wiindspä miäyajtøoyy:

⁴¹—Nébiøch miich nbuhbédät.

Mänitá mähdiojc yhadsooy:
—Wiindsøn, høøch hii
yaghixø'cäc.

⁴²Mänitá Jesús miánaañ:
—Tøø jaduñ mhixø'øgy coo tøø
mmäböcy.

⁴³Mänitiä ja'a wiindspä jiaančh
hijxø'cy. Mänitá Jesús piadu'ubøjcy.
Mänit tiägøoyy mänaambä coo
ja'a Dios miøjjä jiaančhä. Ja'a
jäya'ayhajxy jaduñ híxäbä, jaduñ
hajxy miánaambä nägøxiä coo ja'a
Dios miøjjä jiaančhä.

19 Mänitá Jesús quiajptägøoyy
Jericó. Mänit ñajxy
cajptooty. ²Jimä mäyøøjäya'ay
hänajty tu'ug ja'a xøhjäpä Zaqueo.
Wiindsøn hänajty tiuumby maa
ja'a yajnähjuudiutpähajxiän. ³Ja'a
Zaqueo, jia wi'i yhixaambiä Jesús
hänajty, pero cab hänajty hoy

yhixa'añ je'eguiøxpä coo hānajtj
jiaančh tehṁ ñaaxypä, møødä
jäya'ayhajxy hānajtj jiaančh
tehṁ miayyā. ⁴Mānit päyø'øguiä
ñøcxy maa ja'a Jesús hānajtj
ñaxø'owa'añän. Mānit piejty
quepyquiøxp, nebiä Jesús jaduhñ
hoy yhixät. ⁵Coo ja'a Jesús jim
ñajxy, mānit yuughee'py maa ja'a
Zaqueo hānajtj yhäña'ayän. Mānitä
Jesús miānaañ:

—Zaqueo, tsógāmäts, mänácäts,
mejtsta'agáambøch jim maa miičh
mdøjcän.

⁶Mānitiä ja'a Zaqueo miānajcy.
Mānitä Jesús hoy yajtøjtägø'øy
jootcujc. ⁷Coo ja'a cu'ug jaduhñ
yhijxy, mānit hajxy tiägøøyy
mänaambä cooc jaduhñ
quia'a hoyyā coo ja'a Jesús jim
miejtstäl'agät maa ja'a cubojpäya'ay
cugädieejäya'ay tiøjcän. ⁸Mānitä
Zaqueo tiānaayyø'cy. Mānitä Jesús
ñāmaayy:

—Wiindsøn, huuc mäadow,
mäduhñtiøch nmøødä, cúpc-høčhä
häyoobäya'ay nnä'a mo'owa'añ.
Pønjätyhøch tøø nmāmeečh
høhñda'agymiädia'agyhaam,
mädaaxcjaduhñtiøch
nyajwiimbida'añ.

⁹Mānitä Jesús miānaañ:

—Jädá'ajøčhä piojpä
quiädieeyhajxy nyajñahwa'adsaanä
hädaa tøgootypä, je'eguiøxpä coo
yhAbraham yhap yhocä hädaa
craabä, hoy jia nä'a yajnähjuudiu'udy.
¹⁰Páadyhøch yaa tøø ngäda'agy
hädaa yaabä naaxwiin, høøch ja'a
Diosquexypä, nébiøčhä jäya'ay
piojpä quiädieeyhajxy jaduhñ
nyajñahwá'adsät. Jaduhñhøch njoot
chocy.

¹¹Mäwiingóonnäbä Jesúshajxy
hānajtj Jerusalén. Miädóowäbä
cu'ugä Jesús miädia'agy hānajtj.
Jaduhñ hajxy hānajtj miāna'añ
cooc hānajtj tøø yhabaatnä coo
ja'a Dios ja'a miājaa hānajtj
yajcähxø'øga'añ. ¹²Paadiä Jesús
tiägøøyy mädiaacpä:

—Jaduhñä mäyøøhāna'c
hānajtj tu'ug. Nøcxaamb
hānajtj jäguemnaax coo hānajtj
mio'owa'añii møjtuung maa
ja'a yhamdsoo cajptän. Mānit
hānajtj wyiimbida'añ. ¹³Coo
hānajtj tiu'ubøga'añ, mānitä
mioonsä ja'a majcpä miøjyaaxy.
Mānitä maxiädø'øñ hajxy
nägøxiä yajcø'ødägøøyyä.
Mānitä mäyøøjäya'ay miānaañ:
“Mädúhñtiøch jäguem nhida'añ,
myajmayø'owäp hädaa xädø'øñ
hajxy.” Mānitä craa tiu'ubøjcy.
¹⁴Jaanch tehṁ xiøøghájtäbä craa
jim maa ja'a yhamdsoo cajptän.
Mānitä cu'ugä capxy quiejxy coo
hajxy hānajtj quia'a tsocy coo ja'a
craa jim quiopc-hádät maa ja'a
quiajpthajxiän. ¹⁵Coo ja'a craa
hānajtj tøø tiuungwiingpøjnä,
mānit wyiimbijnä maa ja'a
quiajptän. Mānitä mioonsä
miøjyaaxy ja'a xädø'øñ hajxy
hānajtj tøø yajcø'ødägø'øyijjäbä.
Yajtøwaambiä craa hānajtj
mäduhñjaty hajxy hānajtj tøø
yajmayø'øy. ¹⁶Mānit tu'ug miejch.
Mānit miānaañ: “Wiindsøn,
majcjaduhñtiä ja'a mxädø'øñ
tøø miayø'øy.” ¹⁷Mānitä craa
yhadsøoyy: “Jaanch tehṁ yhoy
miičh tøø mgudiuñ. Wéñtiøch
miičh hijty tøø nyajcø'ødägø'øy.
Coo hoy tøø mgudiuñ, páadyhøch

miičh nyajnáhdijy coo mgopc-hádát maa yø'ø majcpä cajptän." ¹⁸Mänitä wiingpä miejtpä. Mänit miänaaň: "Wiindsón, mägooxcjaduhñtiä ja'a mxädø'ñ tøø miayø'øy." ¹⁹Mänitä craa yhadsoogombä: "Jim miičh mgopc-hada'añ maa ja'a mägooxpä cajptän." ²⁰Mänitä wiingpä jiaac mejtpä. Mänit miänaaň: "Wiindsón, chaadsä mxädø'ñ. Paayyäjóotyhöch hijty nyaghity. ²¹Miičhhöch hijty ndsähgøøby je'eguiøxpä coo miičh mjootmøjjä, coo miičh myajpädø'ogy maa hijty tøø mga'a päda'aguiän." ²²Mänitä mäyøøhänä'c miänaaň: "Caj miičh hoy tøø mgudiuñ. Hamdsoo miičh mmäna'añ cooçh njootmøjjä, cooçh nyajpädø'ogy maačh hijty tøø nga'a päda'aguiän. ²³Jímhöch nxädø'ñ häxøpy tøø xpiädaacä maa ja'a bancon, neby jaduhñ cu miayøøyy, mäduhñtiöch hoy jäguem tøø nwädity." ²⁴Mänitä craa ja'a jäya'ay ñämaayy ja'a hajxy hánajty jiiby tänaabiä: "Pøjcä yø'ø craa yø'ø xädø'ñ. Mo'ow yø'ø craa ja'a xädø'ñ majcjaduhñtiä tøø yajmayø'øyäbä." ²⁵Mänit hajxy yhadsooyy: "Wiindsón, tisän, ximä xädø'ñ may miøødäbä." ²⁶Mänitä mäyøøhänä'c yhadsooyy: "Høøch jaduhñ mänaamb; pøn may møød, maas may mio'owa'añii. Pero pøn weeñtiä møød, pøgáanaxäp cøxiä mäduhñtiä miøødä. ²⁷Y ja'a nmädsiphöchhajxy, ja'a høøch hajxy xxiøøghajpä, yajmín hajxy yaa; yagho'og hajxy yaa maačh nwiinduumän" —nømä Jesús miänaaň.

²⁸Mänitä Jesús hajxy tiu'ubøjcombä. Jerusalén hajxy

hánajty ñøcxy. ²⁹Mäwiingoomb hajxy hánajty maa ja'a cajpt hánajty metsc xiøhatiän Betfagé møødä Betania, mäwiingón maa ja'a tun hánajty xiøhatiän Olivos. Mänitä Jesús ja'a jiamiøød metsc ³⁰ñämaayy:

—Nøcxø'og hajxy jim maa yø'ø cajptän. Jim cajtpa'a ja'a burrohuung hajxy tu'ug mbaada'añ cuxoch. Cahnä pøn ñäl'ägä yaghänaabietyñä.

Mmäguejø'owäp hajxy; mänit hajxy yaa mmämínät. ³¹Coo pøn xmiäyajtówät tii ja'a burro hajxy coo mmäguejø'øy, mänit hajxy mhadsówät cooçh høøch jaduhñ nmäna'añ.

³²Mänitä burro hajxy hoy jiaančh paady nebiä Jesús hánajty tøø miäna'añän. ³³Jimä burro hajxy hánajty miäguejø'øy, mänit hajxy ñämaayy ja'a cuburrohajxy:

—Tii yø'ø burro hajxy coo mmäguejø'øy.

³⁴Mänit hajxy yhadsooyy: —Højts nwiindsón jaduhñ mänaamb.

³⁵Mänitä burro hajxy yajnøcxy maa ja'a Jesúsän. Mänitä wyit hajxy piädaacy burronähgøxp. Mänitä Jesús hajxy yajpejty burronähgøxp.

³⁶Mänitä cu'ugä wyit hajxy tiägøøyy najtswidsoøbiä tu'haam maa ja'a Jesús hánajty ñaxø'owa'añän. ³⁷Olivostunmøjcä tu'u hánajty ñaxø'øy. Coo hajxy miejtsnä maa ja'a wiinmänacän, mänitä Jesús jiamiøødhajxy tiägøøyy yaaxpä jojpä je'eguiøxpä coo hajxy hánajty xioonda'agy. Nämayyä Jesús jiamiøødhajxy hánajty. Jaduhñ hajxy hánajty

ya'axy coo ja'a Dios miõjǵǵǵ jiaančhä, coo hajxy hānajtǵ tøø yhiǵy ja'a hoy-yagjuøøñājatypä ja'a Jesús hānajtǵ tøø yajcāhxø'øguiābā:

³⁸—Møj jaančh hädaa gobiernā; Diosquexy hädaaduhñ. Møj jaančhä Dios jim tsajpootypä; ween hajxy jim xiooñda'agy —nøm hajxy hānajtǵ ya'axy.

³⁹Jimä fariseoshajxy hānajtǵ näje'e piadāna'ay. Mānitä Jesús hajxy ñāmaayy:

—Wiindsøn, mhóǵǵp yø'ø mjamiøødhajxy.

⁴⁰Mānitä Jesús yhadsooyy: —Hóyhøch yø'ø hāna'c cu nja hoj, cab hāna'c häyaa ñā'ä hamóombät; maas møc hajxy ñā'ägä yá'axät.

⁴¹Coo ja'a Jesús hānajtǵ jim miedsaannä Jerusalén, coo jaduhñ ñāheebøøyy, mānit tiägøøyy jøøbiä.

⁴²Mānit miānaañ:

—Yø'ø Jerusalénpäya'ayhajxy, cooçh hajxy cu xchojcy, jootcujc hajxy häxøpy yhity. Tøø yhabaady coo ja'a cu'ughajxy cu jiootcugøøyy. Pero cab hajxy wyiinjuø'øwa'añ. Cábøch hajxy xchoga'añ xmiee'xa'añ. ⁴³Haxøøg hajxy jiada'añ yhabeta'añ. Medsaambä miädsiphajxy. Mānit hajxy jiuhguraajø'øwa'añii piquiä.

⁴⁴Cab hajxy yajmājāda'aga'añii. Yagho'ogāañp hajxy jaduhñ. Mānitä quiajphajxy quihdägoyya'añ. Paady hajxy jaduhñ jiada'añ yhabeta'añ cooçh hajxy jaduhñ xquia'a tsoga'añ.

⁴⁵Coo ja'a Jesús miehch cajpooty, mānit tiägøøyy tsajtøgooty. Mānit tiägøøyy høxquejxpädsøømbä pøñjaty jii by juuby too'p. ⁴⁶Mānit miānaañ:

—Jim jaduhñ myiñ cujaay maa ja'a Diosmädia'aguiān: “Jue'eçh ndøjc hajxy xwiāañät cooçh hajxy jii by xpia'yá'axät.” Ja'a Dios jaduhñ mānaañ. Pero mijts, jaduhñ hajxy mwa'añ meedsøhñdy.

⁴⁷Najxpäxøø ja'a Jesús hānajtǵ jii by yajñähixø'øy tsajtøgooty. Pero ja'a teedywiindsøñhajxy møødä ley-yajñähixøøbiāhajxy, quiojyquiapxytiuumby hajxy hānajtǵ nebiä Jesús hajxy yaghó'ogät, møødä cu'ugwiindsøñhajxy. ⁴⁸Pero cab hajxy hānajtǵ ñajuø'øy neby hajxy jiatcø'øwät je'eguiøxpä coo ja'a cu'ug ja'a Jesús miädia'agy hajxy hānajtǵ jiaančh tehñ miämädoonaayyä.

20 Jiibiä Jesús ja'a cu'ug ja'a Diosmädia'agy hānajtǵ yajñähixø'øy tsajtøgooty, mānitä Jesús ñāmejtsä ja'a teedywiindsøñhajxy møødä ley-yajñähixøøbiāhajxy møødä copc-hajpāhajxy. ²Mānit hajxy miānaañ:

—Pøñä cuhdujt tøø xmio'oy coo ja'a cu'ug tøø mhøxquejxpädsømy tsajtøgooty, y coo tøø mdägø'øy yajñähixøøbiä.

³Mānitä Jesús miānaañ:

—Chaads mijts nmäyajtøwaambä. Mhadsówäp hajxy jaduhñ: ⁴Coo ja'a Juan hijty wiädity mäyajnābejpä, pøñ jaduhñ quejx, Dios tøgä jäya'ayä.

Cab hajxy ñā'ä hadsooyy. ⁵Mānit hajxy tiägøøyy yajcapxiøøbiä:

—Neby hajxy nnä'ä hadsóowämät; coo hajxy nmānāñämät coo ja'a Dios quiejxy, mānit yhadsowa'añ: “Tii hajxy coo mǵa'a mǵøjçä.”

⁶Y coo hajxy nmánáanámät coo jäya'ay quiejxy, mänitä cu'ug hajxy xquihgá'tsämät. Hix, haagä mänaamb hajxy jaduñ coo ja'a Juan tøø quiexyíijäm ja'a Dios.

⁷Mänit hajxy yhadsooy coo hajxy quia'a najuø'øy pønä Juan quejx mäyajnäbejpä.

⁸Mänitä Jesús miänaañ:

—Ni høøch nga'a nägapxa'añ pønñhøch ja'a cuhdujt tøø xmio'oy.

⁹Mänitä Jesús ja'a cu'ug tiägøøyy møødmädiaacpä:

—Jaduñnä jäya'ay tsaatypcam piädaacy maa ja'a ñaaxän. Mänit yhadoo'tujcy. Mänit tiu'ubøjcy. Jäguem ñøcxy. Jegaamb hänäjty jim. ¹⁰Coo ja'a tsaatyptuc yhabaaty, mänitä mioonsä tu'ug quiejxy coo ja'a tsaatypcam piuhmo'owøøjät. Mänitä mioonsä quioxhó'cäxä. Caj tii yajmäwiimbijtä.

¹¹Mänitä mioonsä tu'ug quíejxcumbä. Jaduñnä mähdiojcy quioxhó'cägombä. Haxøøgjaty jaduñ nämaayy. Ni je'le tii quia'a mooyy. ¹²Mänitä wiingpä jiaac quéjxcumbä. Nähdsäbit cuhdsäbit ja'a mähdiojcy piädäacänä.

¹³Mänitä cudsatypcam miänaañnä: “Nébiøch nnä'a jatcø'øwät. Tøøch cham nnajuø'øy. Hädaa nhúunghøch, njaançh tehñ chójpiøch njaançh tehñ pia'häyóobiøch hädaa. Nhuuc quéxyhøch hädaa. Coo yhøxcabøøjät, wehndä wyiingudsähgø'øwøøjät.”

Mänitä yhuung quiejxy. ¹⁴Coo yhøxcajpä, mänit hajxy tiägøøyy ñiñämäyyäbä, ja'a tsaatypcam hajxy hänäjty hajoodiujpä: “Ja'a cudsatypcam yhuung yøø. Coo

yøø tieedy jaduñ yhó'ogät, yøø mähmø'øwaamb cudsatypcam. Tsøg hajxy yaghó'cäm neby hajxy jaduñ nmähmøøyyämät.”

¹⁵Mänitä cudsatypcam yhuung yhøxwijtspädsøømäxä. Mänit hajxy yagho'cy.

Mänitä Jesús yajtøøyy:

—Nebiä cudsatypcam jiatcø'øwa'añ coo yhuung yaghó'cäxä. ¹⁶Nøcxaamb yagho'tägatsa'añ ja'a yhuung tøø yaghó'cäxäbä. Mänitä wiinghäna'c ja'a tsaatypcam yaghajoodiuga'añ.

Coo ja'a cu'ughajxy jaduñ miädooyy, mänit hajxy miänaañ: —Ni ja'a Dios jaduñ quia'a mäná'anät.

¹⁷Mänitä Jesús ja'a cu'ug wyiinhee'ppejty. Mänit miänaañ: —Nej mijts ja'a Diosmädia'agy myajmädia'agytiägø'øy coo miäna'añ:

Ja'a tsaä mädyii ja'a tøjcojpä hajxy quia'a nä'ägä cumaayy, je'le nä'ägä tuundsohñ. (Jesús hamdsoo niñanøømä nebiä tsaajän je'eguiøxpä coo hänäjty quia'a tsoy quia'a mee'xyíijäm ja'a cu'ug. Pero mo'owáanäbä Jesús hänäjty møjtuung.)

¹⁸Mänitä Jesús miänáangumbä: —Pøn jaduñ cá'awäp yøø tsaanähgøxp, tægóyyäp jaduñ. Y coo pøn nähgahbedøøjät yøø tsaä, tægóyyäp je'ebä.

¹⁹Mänitiä ja'a Jesús jia madsaanä ja'a teedywiindsøñhajxy møødä ley-yajnähiøøbiähajxy. Ñajuøøby hajxy hänäjty coo hajxy hänäjty tøø miädia'agyii. Pero cabä Jesús ñä'a majtsä je'eguiøxpä coo ja'a cu'ug hänäjty chähgø'øyíijäm ja'a

teedywiindsønajxy. ²⁰Mänitä häna'c hajxy yajnähdijy coo hajxy n̄ibiäda'agóøjät nebiä hoyhäna'cän. Nócäp hajxy miädooy nebiaty ja'a Jesús hänajty miädia'aga'añ. Coo ja'a Jesús quiapxtägóyyät, mänit hajxy n̄äxø'øwø'øwa'añ maa ja'a gobernadorän. ²¹Mänitä Jesús hajxy miäyajtøoyy:

—Wiindsøn, nnajuøøby højts coo miichä tøyhajt myajnäixø'øy ja'a Diosmädia'agy. Hopiønä miich mmøødmädia'agy; y caj miich pøn mmøjpäda'agy, hoy pøn møjtuung jia møødä. ²²Højtsä tøyhajt móoyäc. Coo højtsä gobiernä hänajty xyagjuy xyajmo'ona'añ, nej, hoyyäda'a jaduñ coo højts njúyädä.

²³Pero n̄ajuøøbiä Jesús hänajty coo hänajty jia yajcapxtägoyya'añii. Mänit miänaañ:

—Tiich hajxy coo xjia wi'i jiojcapxø'øwa'añ. ²⁴Høøchä xädø'øñ tu'ug yaghijäc. Pøn yhajahñaxy yø'øduñ, pøn xiøø yø'øduñ.

Mänit hajxy yhadsooyy:

—Ja'a gobiernä.

²⁵Mänitä Jesús miänáangombä:

—Pues, mmó'owäp ja'a gobiernä hajxy tijaty yø'ø jie'ehajpy. Y mmó'owäbä Dios hajxy tijaty yø'ø jie'ehajpy.

²⁶Cabä Jesús hajxy hänajty hoy yajcapxtägoyya'añ cu'ughagujc. Yagjuøøyy hajxy jaduñ coo hoy yhadsooyy. Y cab hajxy waamb miänaañä.

²⁷Mänitä Jesús n̄ämejtsä ja'a saduceoshajxy näje'e, ja'a hajxy jaduñ mänaambä cooc tyijy ni pøn quia'a jujypioğa'añ. Mänitä Jesús hajxy n̄ämaayy:

²⁸—Wiindsøn, jaduñdsä Moisés jecy quiujahy, cooc ja'a

ya'adiøjc hänajty tu'ug tøø yho'ogy, y cooc ja'a yaamgto'oxy ja'a huung quia'a møødä, mänitägä quiapy wyiingpógät, nébiägä yhuung jaduñ miähmó'owät ja'a piuhya'aguiøxpä. ²⁹Jaduñä häna'c-hajxy hänajty, näjuxtujc tu'que'ex. Ja'a craa møjpä, mänit jia pøjcy. Mänit yho'cy. Nitu'ugtä yhuung quia'a mähmøoyy. ³⁰Mänitä jioðsømy ja'a yaamgto'oxy jia wiingpójcombä. Mänit je'e yhó'combä. Nitu'ugtä yhuung quia'a mähmøøbiä. ³¹Mänitä yaamgto'oxy ja'a quiapy jia wiingpójcombä jatu'ug. Jaanä jaduñ yhó'combä. Nägøxiä ja'a yaamgto'oxy ja'a quiapy jia møøðtsänaayy ja'a näjuxtujpä; cøjx hajxy yho'ogy, y ni pøn yhuung quia'a mähmøoyy. ³²Mänitä yaamgto'oxy jiaag ho'pä. ³³Hoorä, coo hajxy hänajty tøø jiuypiojñä, pønä to'oxiojc tøyhajt møøðtsäna'awaamb ja'a näjuxtujpä, jim tsajpootyp.

³⁴Mänitä Jesús yhadsooyy:

—Hädaa yaabä naaxwiin, pøjp huucp ja'a jäya'ayhajxy yaa. ³⁵Pero pønjaty jujypioğaamb, pønjaty nøcxaamb tsajpootyp, cab hajxy jim piøgaannä yhu'ugaannä. ³⁶Cab hajxy mänaa yho'tägatsaannä. Coo hajxy hänajty tøø jiuypiojñä, jaduñ hajxy miähmø'øwaannä nebiä Dioshuungän, nebiä Diosmoonsän. ³⁷Hamdsoo ja'a Moisés hajxy xyajnäixø'øyyäm coo ja'a ho'ogyjiäya'ayhajxy jiuypioğa'añ, jiiby maa jaduñ myiñän coo ja'a hujtshuung hänajty tioy tu'ug. Jaduñ jiiby myiimbä coo ja'a Dios wyiingudsähgø'øyiijäm ja'a

Abraham mөөдä Isaac mөөдä Jacob.

³⁸Cabä Dios wyiingudsähgø'oyfijäm ja'a ho'ogypiähajxy. Ja'a jujcyjiäya'ayhajxy, je'eds hajxy jaduhñ wiingudsähgøøby ja'a Dios.

³⁹Mänitä ley-yajñähixøøbiähajxy näje'e miänaañ:

—Wiindsón, yajxón miich jaduhñ mmädia'agy.

⁴⁰Cabä Jesús hajxy waamb ñämaañä je'eguiøxpä coo hajxy hänäjty chähgøøñä.

⁴¹Mänitä Jesús miänaañ:

—Tii hajxy coo mmäna'añ cooc ja'a David yhuunghaty ja'a Diosquexy. ⁴²Hamdsoo ja'a David miänaañ maa ja'a Salmos quiujahyyän:

Mänitøchä Dios ja'a nwiindsón xñämaayyä:

“Yaads min häña'aw nhahooguiø'øháampiøch,

⁴³höxtä cóonøchä mmädsip tøø nga'a yajmäjädáacäm.”

⁴⁴Coo ja'a David ja'a Diosquexy hamdsoo ñämaayy “wiindsón”, nébiäts jaduhñ ñä'a huunghádät.

⁴⁵Jimä cu'ughajxy hänäjty nägøxiä miämädoona'ay, mänitä Jesús ñämaayy ja'a jiamioødhajxy:

⁴⁶—Ca'a yøø ley-yajñähixøøbiä miädia'agy hajxy mmäbøjcä.

Yoñwitmøød hajxy wyi'i wiädity je'eguiøxpä coo hajxy wyi'i yajcumaya'añ. Jaduhñä jioothajxy jia tsocy coo hajxy jim wyiingudsähgø'øwøøjät halaplaaz. Jiiby hajxy yhäña'awa'añ maa ja'a häñaabiejt yajxonjatypän jiiby tsajtøgooty, chaads jim maa ja'a xøø jiadyiijän. ⁴⁷Y piójcäbä yaamgt'oxy ja'a tiøjc hajxy. Wi'i yajcumayaamb hajxy, paady hajxy

wyi'i Dyiospa'ya'axy jejcyyjaty.

Hanaxiä hajxy chaächtiuna'añii.

21 Tsajtøgootiä Jesús hänäjty, mänitä mäyøøjäya'ay yhiixy coo xädø'øn hajxy hänäjty quiuyoxø'oy. ²Mänitä yaamgt'oxy tu'ug yhiixpä ja'a jaanč tehñ yhäyoobä. Jagooyyä xädø'ønhuung hänäjty miøødä metsec. Je'eduhñ cøjx yecy. ³Mänitä Jesús miänaañ: —Tøyhajt jaduhñ, maas may hädaa yaamgt'oxy häyoobä ja'a xädø'øn tøø quiuyoxø'oy quejee yøø mäyøøjäya'ayhajxy. ⁴Yøø mäyøøjäya'ayhajxy, je'e hajxy quiuyoxøøyy mäduhñtiä hajxy tøø yajcunaxy. Pero hädaa yaamgt'oxy, je'e cøjx quiuyoxø'oy mäduhñtiä hijty ñägaya'añ.

⁵Jiibiä jäya'ayhajxy hänäjty näje'e tsajtøgooty. Jaduhñ hajxy hänäjty miädia'agy coo ja'a tsaajaanč tehñ yajxonjatiä, coo hajxy tøgooty yajxón jiaanč tehñ yhiixy nebiatiä jäya'ayhajxy hänäjty tøø piäda'aguian. Mänitä Jesús miänaañ:

⁶—Habaadaamb jaduhñ coo hädaa tsajtøjc jyida'añ cøxiä.

⁷Mänitä Jesús ñämaayyä:

—Wiindsón, mänaa jaduhñ jiada'añii. Tii hijxtahñ jaduhñ naxaamb coo hänäjty tøø yhabaatnä.

⁸Mänitä Jesús yhadsooyy:

—Mniyajcopcø'øwøøjöp hajxy, cab hajxy myajwiinhøønät. Nämay hajxy wiädita'añ. Jaduhñ hajxy miäna'ana'añ: “Høøchä Dios tøø xquixy”, y “Tøø yhabaatnä.” Pero cab hajxy mmäbøgät. ⁹Coo hajxy jaduhñ mmädoyhádät coo tsip piädøøga'añ, cab hajxy

mdsähg'owät. Jayøjpä tsip
jiada'añii, cahnä hänäjty
yhabaadyñä.

¹⁰Mänitä Jesús jiaac mänaañ:

—Nimiädsib'owáañäbä
wiingcajptjaty. ¹¹Møc hujx
jiädita'añ. Jadáañäbä yuuxøø
møødä pa'am wiinduhmyhagajpt.
Y jimä hočhähgøøñajaty pä
quiahxø'oga'añ tsajtwiing.

¹²'Pero cahnä hänäjty
yhabaadyñä, xmiadsaamb mijts ja'a
jäya'ayhajxy. Xyajnøcxaamb hajxy
maa ja'a tsajtøjcän. Jiiby hajxy
xñäxø'owø'owa'añ. Xchumaamb
hajxy jaduñ. Xyajnøcxaamb hajxy
maa ja'a gobiernäwiinduumhajxiän.
Ja'a høøčhcøxpä hajxy
xchaačhtiuna'añ. ¹³Coo hajxy
jaduñ mjádät mhabétät, mänítøch
hajxy xmiädiá'agät. ¹⁴Wiinjuø'ow
hajxy jaduñ. Cab hajxy
jäguemiä mwiinmahñdyhádät
waambaty hajxy mhadsówät.

¹⁵Høøčh mijts nbuhbedaamby.
Nmo'owáambiøch mijts ja'a
wiinmahñdy nebiä mmädsip hajxy
mga'a yajmäjädá'agät. ¹⁶Høxtä
xñähdugaambä mdeedy hajxy
møødä mbuhya'ayhajxy møødä
mjujy mmägu'ughajxy møødä
mmägu'ughajpähajxy. Näjë'eyyäm
mijts häna'c xyagho'oga'añ.

¹⁷Nägøxiä hajxy xxiøøghada'añ
maa ja'a høøčhcøxpän. ¹⁸Hoy
hajxy cøxypänejpiä cu mja jat
cu mja habet, tsipcøxp hajxy
hodium mnøcxa'añ. ¹⁹Coo hajxy
hamuumdu'joot mmee'xtügät,
mdägø'owäp hajxy jim tsajpootyp.

²⁰Coo hajxy mhíxät coo
ja'a Jerusaléncajpt hänäjty tøø
jihuhbigø'oyíijäm ja'a miädsip,

mänit hajxy mnajuø'owät coo
hänäjty tøø yhabaatnä coo
Jerusalén quiuhdägoyya'añ.

²¹Pønjaty hänäjty yaa hijp
Judeanaaxooty, tsipcøxp hajxy
piäyø'ögät, nõcxäp hajxy jim maa
ja'a tunän. Pønjaty hänäjty yaa hijp
Jerusaléncajptooty, tsipcøxp hajxy
yaa chóonät. Pønjaty hänäjty hijp
camjooty, cab hajxy ñøcxtägátsät
quiajptootyhajxy. ²²Jaanč tehñ
chaačpøgaambä jäya'ayhajxy
nägø'ø nädecypiä. Jadáañäp
jaduñ nebiaty jiiby myiñän
cujaay maa ja'a Diosmädia'aguiän
coo jiada'añii. ²³Jaanč tehñ
chaačpøgaambä to'oxiøjc-hajxy
hänäjty, ja'a hajxy hänäjty
moxtsa'amhjäp, ja'a hajxy hänäjty
maaxhuungmøødpä. Hoyhoyyä
jäya'ayhajxy yaa chaačpøga'añ
hädaa yaabä naaxwiin. Jaanč
tehñ yajcumädowáañäp hajxy
jaduñ. ²⁴Näjä'e hajxy yho'oga'añ
coo ja'a tsip jiada'añii. Näjä'e
hajxy miadsa'añii. Mänit hajxy
yajnøcxa'añii wiinduhmyhagajpt.
Minaambä jäguemjäya'ay ja'a
Jerusaléncajpt hajxy yajma'ada'añ,
høxtä coonä yhabétät coo ja'a
cuhdujt hajxy piøjcäxät coo hajxy
jaduñ quia'a jatcøñät.

²⁵'Cähxø'ogaambä hijxtahñd
maa ja'a xøøjän, maa ja'a
po'ojän, maa ja'a madsa'ajan.
Pädø'ogaambä mejy; jäditaamb
jaduñ. Paadiä cu'ughajxy
chähgø'owa'añ wiinduhmyhagajpt.
²⁶Wiinmahñtiägoyyaambä
jäya'ayhajxy coo hočhähgøøñä
yaa jiada'añii hädaa yaabä
naaxwiin. Tsäyuyyaambä xøø
chaadsä po'o chaadsä madsa'a.

²⁷Mänitøch ngädaactägatsa'añ joc-hagujc, høøch ja'a Diosquexypä. Hajájjäbøch ngäda'aga'añ mäjaamøød. Xyhixáambøchä jäya'ayhajxy. ²⁸Coo jaduhñ jiadóøját, mänit hajxy mjootcugó'owät. Mänit hajxy mbädsøma'añ hawa'adstuum.

²⁹Mänitä Jesús miánaangombä:

—Høxtahm̄dsä quepychaa, ³⁰coo hajxy mhixy coo wiamy, mnajuøøby hajxy coo pioodtägøøñä. ³¹Jaduhñ mäwíinäts je'e coo ja'a hijxtahñd hajxy mhijxtsóonät, mnajuó'owäp hajxy jaduhñ coo yhabaatnä coo Dios ja'a miäjaa yajcähxø'oga'añ.

³²Coo jaduhñ yhabaadät nébiøch cham̄ nmädia'aguiän, cahnä jäya'ayhajxy hänäjty quiøxy ho'ogyñä ja'a hajxy jäda'ahatypä. Tøyhajt jaduhñ. ³³Tägoyyaambä tsajtwiing møødä naaxwiin, pero tøjiaadaamb nébiøch cham̄ nmädia'aguiän.

³⁴⁻³⁵Mniyajcopcø'owøøjäp hajxy. Cab hajxy mnajuø'øy mänääjøch ngädaactägatsa'añ. Paady hajxy hoy mhídät. Cab hajxy mhu'ug cab hajxy mjóø'xät. Cab hajxy tii mhadsógät hädaa yaabä naaxwiin. Pønjaty jaduhñ ca'a cudiumb, haxøøg hajxy jiada'añ yhabeta'añ, høxtä hoy hajxy maa cu jia tsäna'aw. ³⁶Nähix hahixø'ø hajxy mhídät. Homiánaajä hajxy mDiospa'yá'axät neby hajxy haxøøg mga'a jat mga'a habétät, nébiøch hajxy hoy xwyiingudsähgø'owät, høøch ja'a Diosquexypä.

³⁷Xøømbaadiä Jesús hänäjty yajnähixø'øy tsajtøgooty. Coodspaady hänäjty wiädity maa ja'a tun̄ xiøhatiän Olivos. ³⁸Jopyñä ja'a jäya'ayhajxy hänäjty quiøxy

hamugø'øy tsajtøgooty coo ja'a Jesús miädia'agy hajxy hänäjty wyi'i yhamädoowhidaañä.

22 Tøø ja'a pascuaxøø hänäjty miäwiingoonnä mänaa ja'a tsajcaagy hajxy hänäjty quiayyän ja'a cajpä tsooy mióødäbä. ²Jia wi'i xyiictaacypy jia wyi'i miädiaactaacypy ja'a teedywiindsøn̄hajxy hänäjty møødä ley-yajnähixøøbiähajxy nebiä Jesús hajxy yaghó'ogät. Pero chähgøøbiä cu'ug hajxy hänäjty.

³Mänitä Judas Iscariote ja'a Satanás jiottägøøyy quioptägøøyyä. Jesús jiamiøød hänäjty je'e tu'ug maa ja'a nämajmetspän. ⁴Mänitä Judas ja'a teedywiindsøn̄ hoy miøødmädia'agy møødä møjhjäpä hajxy maa ja'a tsajtøjcän. Je'e yajmøødmädiaac nebiä Jesús yajcø'ødägø'owät. ⁵Mänitä teedywiindsøn̄hajxy xioonndaacy. Mänitä Judas hajxy ñämaayy coo xädø'øñ hajxy mio'owa'añ. ⁶Mänitä Judas ñähadsooyy. Mänit tiägøøyy wiinmahñdyhjäpä nebiä Jesús yajcø'ødägø'owa'añ, mänaa ja'a cu'ughajxy hänäjty quia'a jaty mayyän.

⁷Mänitä pascuaxøø yhabaatnä mänaa ja'a tsajcaagy hajxy quiayyän, ja'a cajpä tsooy mióødäbä. Yoixypä meeghuung hajxy hänäjty ja'a pascuaxøøjooty. ⁸Mänitä Jesús ñämaayy ja'a Pedro møødä Juan:

—Nøcx ja'a tsuugay hajxy yaghoyø'ow. Tøø yhabaady coo hajxy ndsuugayáañäm ja'a pascuaxøøgøxpä.

⁹Mänitä Jesús hajxy miäyajtøøyy:

—Maa hõjts nyaghoyó'owät.

¹⁰Mänitá Jesús yhadsooy:

—Coo hajxy mgajptägó'owät, mbaadaambiä jáya'ay hajxy tu'ug majtcón. Mbanócxäp hajxy maa tiójtägó'owa'añän. ¹¹Mänitá cudójc hajxy mnámá'awät: “Hõjts nWiindsón tøø xquiexy coo hõjts miich nmäyajtówät maa hawa'adspä jii maa hõjts ndsuugáyät ja'a pascuaxøøgxpä.”

¹²Mänitá hawa'adspä hajxy xmio'owa'añ cruundä jim cøxp. Tøø hajxy hánajty hoy yajxón yaghoyó'oy. Jimä tsuugay hajxy myaghoyó'owät.

¹³Mänit hajxy hoy piaady nebiatiä Jesús hánajty tøø miäna'añän. Mänitá tsuugay hajxy yaghoyøøyy ja'a pascuaxøøgxpä.

¹⁴Coo yhabaatnä, mänitá Jesús hajxy yhánaaguiädaacy meexäwiinduum mõødä jiamiøødhajxy. ¹⁵Mänitá Jesús miänaañ:

—Cooch nho'ogaannä, jootcújc-høch nnijäwø'oyii cooçh mijts nmøødt suugaya'añ ja'a pascuaxøøgxpä. ¹⁶Cábøch mijts nmøødt suugaadiägatsa'añ høxtä coonä yhabáadät mänaa ja'a Dios ja'a miäjaa yajcähxø'oga'añän. Tøyhajt jaduñ.

¹⁷Mänitá Jesús ja'a vaso tu'ug quionø'cy vinomøød. Mänitá Dioscujú'uyäp yejcy. Mänit miänaañ:

—Huucmuc hajxy hädaa nägøxiä.

¹⁸Cábøchä vino nhuuctägatsa'añ høxtä coonä yhabáadät coo ja'a Dios ja'a miäjaa yajcähxø'oga'añ.

¹⁹Mänitá Jesús tsajcaagy quionø'cy. Mänitá Dioscujú'uyäp

yéjcombä. Mänitá tsajcaagy qyijwa'xy. Mänitá jiamiøød miooy. Mänit miänaañ:

—Høøch nni'x ngopc hädaa. Ja'a mijts cøxpøch nniñähduga'añii cooçh mijts nnähho'tu'uda'añ. Naaghóoc-høch mijts xjiahmiejtsta'agy, jaduñä tsajcaagy hajxy mgáyät.

Coo hajxy quiaabiädøøyy, mänitá Jesús ja'a vaso quionø'cy, ja'a hánajty vinomøødpä. Mänit miänaañ:

²⁰—Hädaa vino, hijxtahnd jaduñ miähmø'owa'añ nébiøch nnø'ty nyaghäyowa'añän cooçh mijts nnähho'tu'uda'añ.

²¹'Pero ja'a craa xyegáambøchä, yaaçh jaduñ xmiøødhäña'ay maa hädaa meexän. ²²Tsipcøxpøch nho'oga'añ nébiøchä Dios tøø xyajnáhdijjiän, høøch ja'a Dios quexypä. Pero ja'a craa xyegaambä, maas haxøøg jiada'añ yhabeta'añ.

²³Mänitá Jesús jiamiøødhajxy tiägøøyy nimiäyajtøwäbä hamiñ haxøpy põñä Jesús yegaamb.

²⁴Mänit hajxy tiägøøyy yajcapxiøøbiä põñ mõjtuuñg mo'owáañäp. ²⁵Mänitá Jesús miänaañ:

—Hädaa hajxy yaa gobiernähajpä hädaa yaabä naaxwiin, nä'a hanehmb hajxy. Tsipcøxpä cu'ughajxy quiudiuñ neby hajxy yhane'emyijän. ²⁶Pero mijts, cab hajxy mnibiäda'agøøjät nebiä gobiernän. Pøñ mõjtuuñg mõød maa mijtsän, ween ñibiäda'agyii nebiä tuuñg mõj ca'a mõødpän. Pøñ hanehmb maa mijtsän, ween ñibiäda'agyii nebiä moonsän. ²⁷Pøñ

møjtuung møød, ja'a craa caabiä, tøgä craa mäyajcaabiä. Ja'a craa caabiä, je'eds møjtuung møød. Pero høøch mijts nyajcaaby, hóyhøch møjtuung nja møødä.

²⁸Tøøch mijts xmiøødyo'oy xmiøødnaꝑy tsip xex. ²⁹Páadyhøch mijts møjtuung nmo'owa'añ, nébiøch nDeedy tøø xmio'oyän, ³⁰neby hajxy jim mgay mhú'ugät maaçh nmeexäwiinduumän maaçh ngobiernähada'añän, nebiä hoyhänäbiejt hajxy myaghänä'awó'owät mänaa ja'a judíos hajxy mhane'ema'añän, ja'a nämajmetsc-hagajtpä.

³¹Mänitä Jesús ja'a Pedro ñämaayy:

—Simón, Simón, mniyajcopcø'øwøøjäp. Tøøchä Satanás cuhdujt xjia mäyujwa'añ coo mijts xyajtu'udägóyyät. ³²Pero tøøchä Dios nmänuu'xta'agy ja'a miichcøxpä nébiøch miich nmädia'agy homiänaajä xmiäböjçät. Coö miich hänajty tøø mwiinmahñdymejtsnä, mjoodcapxmøcpøgäp ja'a mjamiøødtøjc neby hajxy jaduñ quia'a tu'udägóyyät.

³³Mänitä Pedro ja'a Jesús ñämaayy:

—Homíáajøch miich nbanøcxät, hoy jia pujxtøgootiä. Høxtä näguipxy jaduñ nmøødhó'ogät.

³⁴Mänitä Jesús miänaañ:

—Pedro, chamñ nnäma'ay, cahnä tseey hänajty ya'axyñä, tøø miich hänajty tägøøghooc mnijjogapxyii coöch tyjy xquia'a hixiä.

³⁵Mänitä Jesús miäyajtøøyy ja'a jiamiøødhajxy:

—Cooch mijts nguejxy Diosmädia'agy-yajwa'xpä, mänitøch mijts nnämaayy coö hajxy tii mga'a wähátät, ni xuummy, ni xädø'øñhidøhñdy, ni cø'og. Y tii hajxy myajmaajiajt.

Mänit hajxy yhadsooyy:

—Ni tii.

³⁶Mänitä Jesús miänaañ:

—Pero chaaçh nmänaañnä coö xuummy hajxy mwähátät møødä xädø'øñhidøhñdy. Pøn espada ca'a møød, weenä wyit tioogy nebiä espada jiúyät. ³⁷Tsipcøxp tiøjiada'añ neby jim myiñän cujaay maa ja'a Diosmädia'aguian ja'a høøhcøxpä: “Ca'awiindøyhäna'c jaduñ tyijjä.” Cøxiä jaduñ tiøjiada'añ neby jim myiñän cujaay ja'a høøhcøxpä.

³⁸Mänit hajxy miänaañ:

—Chaa højts espada metsc nmøødä.

Mänitä Jesús yhadsooyy:

—Mädøyyä jaduñ.

³⁹Mänitä Jesús tiu'ubøjcy. Mänit ñøcxy maa ja'a Olivostuñän neby hänajty ñä'ägä cuhdujthatiän. Quipxiä jiamiøødhajxy pianøcxy. ⁴⁰Coö hajxy jim miejch, mänitä Jesús miänaañ:

—Tøgä Dios hajxy pa'yáaxäm; jaduñ hajxy mga'a tu'udägóyyät.

⁴¹Mänitä Jesús ñøcxy jäguemjuøøby nidiuhñ Diospa'yaaxpä. Mänit jyjçädaacy.

⁴²Mänit miänaañ:

—Teedy, coö miich jaduñ mmäná'anät, cábøch hädaa tsaachpä peenä nmänáxät. Pero ca'a yhøøch nguhdujtä nyaghidaamby; miich mguhdujt hidaamb.

⁴³Mänitä Diosmoonsä tu'ug ñäguehxtøø'xy. Tsajpootyp hänajty chooñ. Ja'a Jesús ja'a määaa hoy mio'oy. ⁴⁴Jaančh tehṃ chaačhpøjpä Jesús hänajty. Mänitä Dios miänuu'xtaacy nägøø nädecypä. Mänit xiäbitnøø tiägøøyy ta'xpä naaxwiin nebiä nø'tiän.

⁴⁵Coo ja'a Jesús Dyiospa'yaaxpäðøøyy, mänit tiänaayyø'cy. Mänitä jiamiøødhajxy hoy yhixø'øy. Haagä maab hajxy hänajty je'eguiøxpä coo hajxy hänajty jiaančh tehṃ jiootmayhaty.

⁴⁶Mänitä Jesús miänaañ:

—Tii hajxy coo mwi'i mia'ay. Päðø'øg hajxy. MDiospa'yá'axäp hajxy; jaduñ hajxy mga'a tu'udägóyyät.

⁴⁷Jimnä ja'a Jesús hänajty miädia'agyñä, mänitä cu'ug miejch. Ja'a Judas hänajty copc-hajp maa ja'a cu'ughajxiän. Je'e ja'a Jesús hänajty tøø jiamiøødhaty maa ja'a nämajmetspähajxiän. ⁴⁸Mänitä Jesús hoy chu'xy. Mänitä Jesús miänaañ:

—Judas, nej, tsu'xyháamhøch miich xyega'añä, høøch ja'a Diosqueyypä.

⁴⁹Mänitä Jesús jiamiøødhajxy miänaañ:

—Wiindsøn, nej, päðø'øgäp højts espadahaamä.

⁵⁰Mänitä Jesús jiamiøød tu'ug tiaatspujxtuuty ja'a teedywiindsøn mioonsä. Ja'a hahooybä taatse ñäbujx. ⁵¹Mänitä Jesús miänaañ:

—Ween hajxy yhity. Ween tiuhñä.

Mänitä Jesús ja'a craa tiaatse piädaacä. Tsooc je'e. ⁵²Mänitä Jesús ñämaayy ja'a teedywiindsøn'hajxy, møødä tsajtøwiindsøn'hajxy, møødä

møjtøjc-hajxy, ja'a Jesús hajxy hänajty yajpäðø'øgaambä:

—Nej, mée'tspøch hajxy jaduñ xtyijjiä coo espada coo wojpt hajxy mmäbäðø'øguiä. ⁵³Cooch mijts hijty nmøødhity tsajtøgooty najxpäxøø, cáboch mijts hijty nej xtiuñ. Pero tøø yhabaatnä cooch mijts xmiädsät ja'a haxøøgpä miäjaagøxpä.

⁵⁴Mänitä Jesús hajxy miajch.

Mänit hajxy yajnøcxy maa ja'a teedywiindsøn tiøjcän. Jäguemjuøøbiä Pedro hänajty piayo'oy. ⁵⁵Mänitä soldado jøøn hajxy tiägøøyy yajmøjjøøbiä jim tøba'amhagujc. Mänit hajxy yhøxtaacy piquiä jøømba'axaambä. Mänitä Pedro piahøxtaacpä.

⁵⁶Mänitä to'oxymoosä ja'a Pedro yhiixy coo jii by piahäñaabiä. Mänit miänaañ:

—Yø'ø mixy, ja'a Jesús jiamiøød yø'ø.

⁵⁷Mänitä Pedro ñijjogapxä:

—Pi'muuxy, cábočhä Jesús nhixiä.

⁵⁸Mänitä Pedro yhøxcájpägombä wiinghäna'c. Mänit ñämaayyä:

—Miič mjamiøød je'e, tuhṃds.

Mänitä Pedro yhadsooyy:

—Joom, caj tiøyyä.

⁵⁹Tøø hänajty tu'horä yhity, mänitä Pedro ñänøømä:

—Tøyhajt jaduñ coo ja'a Jesús jiamiøød yø'ø. Galilea yø'ø craa chohmbä.

⁶⁰Mänitä Pedro miänaañ:

—Joom, pätiidä miich jaduñ mnä'ä mädiaacyy.

Tuunä Pedro jaduñ ñä'ä mänaañ, mänitä ja'a tsey jiaančh yaaxy. ⁶¹Mänitä Jesús ja'a Pedro miøjhee'py. Mänitä Pedro øjx jahmiech waambaty hänajty tøø

ñäma'ayíjäm ja'a Jesús: “Cahnä tsee y hänajty ya'axyñä, tøø miich hänajty tägøøghooc mnijögapxyii coogøch tyjy xquia'a hixiä.”

⁶²Mänitä Pedro wyiimbijnä. Mänit hoyoy jioøyy.

⁶³Mänitä Jesús tiägøøyyä näxícäbä näyáaxäbä ja'a häna'c-hajxy hänajty hadänaabiä. Mänit tiägøøyyä wobhó'cäbä.

⁶⁴Mänit hajxy wyiinguxodsøøyy. Mänit hajxy wyiinguwobøøyy. Mänitä Jesús ñämaayyä:

—Najuø'øw pøn tøø xwiopy.

⁶⁵Jaanch tehñ yhaxøøgjatiä Jesús ñämaayyä.

⁶⁶Coo jioøøyy, mänitä judíoshajxy yhamugøøyy, møødä møjtøjc-hajxy, møødä teedywiindsønñhajxy, møødä ley-yajnahixøøbiähajxy. Mänitä Jesús hajxy yajnøcxy maa junta hajxy hänajty yagjadyijän. Mänit hajxy miäyajtøøyy:

⁶⁷—Højtsä tøyhajt móoyyác, nej, miich Dios tøø xquiexiä.

Mänitä Jesús yhadsooyy:

—Hóyhøch jaduhñ cu nja mäna'an, cáboch mijts häyaa xñä'a mäbójcäbät. ⁶⁸Y cooçh mijts waambaty nmäyajtøwät, cáboch hajxy xyhadsówät, ni cáboch hajxy xyhøxmádsät. ⁶⁹Tøø yhabaatnä cooçh jim nnøcxaannä maa ja'a Diosän, ja'a møjcuhdujtmøødpä. Jímhøch nøcxy nhäñ'awa'añ maa ja'a yhahooyhaampiän, høøch ja'a Diosquexypä.

⁷⁰Mänit hajxy wyi'i miäyajtøøyy:

—Nej, miichä Dios xyHuunghajpä.

Mänitä Jesús yhadsooyy:

—Tøyhajt jaduhñ nej mijts mmäna'añän.

⁷¹Mänit hajxy miänaañ:

—Tii testigo hajxy nnä'a jaac wáañämät. Hamdsoo hajxy tøø nmädóowäm coo hamdsoo tøø ñimiadia'agyii.

23 Mänit hajxy nägøxiä tiänaayyø'cy. Mänitä Jesús hajxy yajnøcxy maa ja'a Pilato wyiinduumän. ²Mänit hajxy tiägøøyy nähwaambejpä:

—Jim hädaa craa ja'a cu'ug hijty wyi'i quiapxiñ. Nøm hijty miäna'añ coo højtsä gobiernä xädø'øñ nga'a mó'owät ja'a jim tsänaabiä Roma. Jaduhñ hijty miänaambä cooc tyjy ja'a Dios tøø quiexyii gobiernähajpä.

³Mänitä Pilato ja'a Jesús miäyajtøøyy:

—Nej, jaduhñ miich mnibiäda'agyii nebiä gobiernän maa hädaa judíoscájpänä.

Mänitä Jesús yhadsooyy:

—Tøyhajt jaduhñ nej miich mmäna'añän.

⁴Mänitä Pilato ñämaayy ja'a teedywiindsønñhajxy møødä cu'ug: —Cábøch hädaa craa nhixy coo tii pojpä quia'a møødä.

⁵Mänit hajxy tehngajnä wyi'i ya'axy:

—Høhnda'agymiadia'agyhaam yøø craa yajnahixø'øy ja'a Judeabä-jäya'ayhajxy. Jim yajtsohndaacy Galilea. Yaa tøø miech. Jaduhñ yaa jiatcøøbiä.

⁶Coo ja'a Pilato jaduhñ miädooyy, mänit yajtøøyy pø jimä Jesús jiaanç tsoñ Galilea. ⁷Coo ja'a Pilato yhawáañäxä cooc ja'a Jesús jim chooñ, mänitä Pilato ja'a Jesús quiejxy maa ja'a Herodes wyiinduumän. Hix, gobernador

ja'a Herodes hánajty jim̄ tiumby Galilea. Tøø hánajty quioody Jerusalén xøøhajpä. ⁸Coo ja'a Herodes ja'a Jesús yhiixy, mänit jiootcugøøyy je'eguiøxpä coo hánajty jia wi'i yhixa'añ. Tøø hánajty miädoyhaty coo ja'a Jesús ja'a hoy-yagjuøøñäjatypä hánajty tøø yajcähxø'øgy. Jaduhñä Herodes hánajty jia wi'i yhixa'añ coo ja'a Jesús ja'a hoy-yagjuøøñäbä yajcähxø'øgät. ⁹Mänitä Herodes ja'a Jesús madiu'u jia wi'i miäyajtøøyy, pero cabä Jesús ñä'ägä hadsooy. ¹⁰Tehngajnä ja'a Jesús hánajty ñähwaambedyíjjäm ja'a teedywiindsøn̄hajxy møødä ley-yajñähixøøbiähajxy. ¹¹Mänitä Herodes ja'a Jesús hajxy tiägøøyy näxiicpä näyaaxpä møødä soldadohajxy. Mänitä wit hajxy yajpägøøyy yajxonbä nebiä rey wyitän. Mänitä Herodes ja'a Jesús quiejxwiimbijty maa ja'a Pilatän. ¹²Mänitxøø ja'a Pilato ja'a Herodes miøødnimiägu'ughajpøjca. Nimiädsiphájtáp hajxy hánajty.

¹³Mänitä Pilato yaaxmujcy ja'a teedywiindsøn̄hajxy møødä copc-hajpähajxy møødä cu'ughajxy.

¹⁴Mänit miänaañ:

—Míjtshøch hädaa craa tøø xyajnämech. Mmänaamb mijts jaduhñ coo ja'a cu'ug hijty quiapxhiñ. Tøøch nja yajmâyach maa mijts mwiinduumhajxiän, y tøø hajxy mhixy mmädoy coo ja'a pojpä quia'a møødä nej mijts tøø mja nähwaambetiän. ¹⁵Ni ja'a Herodes quia'a mäna'añ coo ja'a pojpä miøødä, paady tøø quiejxwiimbity. Tøø hajxy mhixy coo ja'a pojpä quia'a møødä.

Paady, cáboch nyajyagho'oga'añii.

¹⁶Jayøjphøch nyajcumädowa'añ, mänitøch nhøxmadsaannä.

¹⁷Jaduhñ hajxy hánajty quiuhdujthaty coo ja'a tsumyjiäya'ay hajxy hánajty tu'ug yhøxmach ja'a pascuaxøøjooty.

¹⁸Mänit hajxy nägøxiä yaaxy:

—Ca'a yø'ø craa mhøxmach. Jue'e mhøxmädsäp ja'a craa Barrabáshajpä.

¹⁹Paadiä Barrabás hánajty tøø chumyii coo ja'a tsip hánajty tøø yajpädø'øgy cajptooty, møød coo hánajty tøø miäjäya'ay-yagho'ogy.

²⁰Jia wi'i yhøxmadsaamby ja'a Pilato ja'a Jesús hánajty. Jaduhñä cu'ug jia nämäaguioimbä. ²¹Mänitä cu'ughajxy maas møc jiaac yaaxy:

—Møjpahbet hajxy cruzcøxp, møjpahbet hajxy cruzcøxp.

²²Miädägøøghoocpä ja'a Pilato jia mänáangombä:

—Pero nébiämäts jaduhñ tøø jiatcø'øy. Cabä pojpä tii miøødä.

Nébiøch nyajyagho'ogøøjät.

Nyajcumädowáambiøch. Mänitøch nhøxmadsaannä.

²³Pero tehngajnä hajxy jiaançh tehñ ya'axy coo ja'a Jesús miøjpahbedøøjät cruzcøxp.

Jaduhñdsä teedywiindsøn̄hajxy yaaxpä. Mäjädaac hajxy jaduhñ neby hajxy hánajty miäna'añän.

²⁴Mänitä Pilato miänaannä coo ja'a Jesús miøjpahbedøøjät cruzcøxp.

²⁵Mänit Barrabás yhøxmajch, ja'a cu'ughajxy hánajty tøø yajñähdíjjäbä, ja'a hánajty tøø chumyíjjäbä je'eguiøxpä coo tsip hánajty tøø yajpädø'ogy, møød coo hánajty tøø miäjäya'ay-yagho'ogy. Mänitä Pilato yhanehmy coo ja'a Jesús miøjpahbedøøjät cruzcøxp.

²⁶Jimä soldado ja'a Jesús hajxy hänäjty yajnøcxy maa hajxy hänäjty miøjpahbeda'añän. Mänitä jäya'ay hajxy tu'ug miajch, ja'a xøhajpä Simón, ja'a Cirenetsohmbä. Camjootiä Simón hänäjty tøø yhoy. Mänitä cruz hadsip yajtsømdu'ubøjcä. Høxhaamä cruz miäyohy.

²⁷Jaanch tehñ nāmay hajxy hänäjty pianøcxy møødä to'oxiøjc-hajxy. Jøøyyäp yáaxäbä to'oxiøjc-hajxy hänäjty ñøcxy. Jootmayhajp hajxy hänäjty ja'a Jesúscøxpä. ²⁸Mänitä Jesús ja'a to'oxiøjc-hajxy miøjhee'ppejty ja'a hajxy tsohmbä Jerusalén. Mänit hajxy ñāmaayyā:

—Ca'ačh hajxy xñäjø'øy. Mijts hamdsoo mniñäjø'øwøøjäp møødä mhunghajxy. ²⁹Habaadaamb jaduhñ coo ja'a jäya'ayhajxy miäna'ana'añ: “Jootucjca to'oxiøjc-hajxy yhity ja'a yhuung ca'a hijpä.” ³⁰Mänitä jäya'ay ja'a tuñ hajxy ñāma'awa'añ: “Højts nähgabhéjtäc, højts yú'tsäc.”

³¹Xchaächtiunáambøch ja'a jäya'ayhajxy, hóyhøchä pojpä cädieey nga'a ja møødä. Maas hanaxiä mijts mjada'añ mhabeta'añ.

³²Metscä mee'tspädøjc ja'a Jesús hänäjty quipxy nøcxy miøødmøjpahbeda'añii. ³³Coo hajxy jim miejch maa hänäjty xiøhatiän “Maa ja'a Ho'ogyjiäya'aguiopc Ñähgädá'aguiän”, mänitä Jesús miøjpahbejtä cruzøxp møødä mee'tspädøjc, tu'ug hanajtyhaamby, tu'ug hahooyhaamby. ³⁴Jimnä ja'a Jesús hänäjty miøjpahbedyiinä, mänit miänaañ:

—Teedy, mee'x yø'ø häna'c-hajxy; cab hajxy ñajuø'øy tii hajxy jaduhñ coo jiatcø'øy.

Mänitä soldado ja'a Jesús wyit hajxy tiägøøyy yajniguiuhäyø'cäbä.

³⁵Jimä cu'ughajxy hänäjty miähee'pna'ay møødä tuungmøødpähajxy. Jimä Jesús hajxy hänäjty wyi'i ñäxi'igy:

—Yajnähwaachp yø'ø craa hijty wiinghäna'c. Ween hamdsoo yajniñähwa'ačhii pø tøy jaduhñ Dyioshuungä, pø tøy jaduhñ Dyiosquexiä.

³⁶Jaana jaduhñä soldadohajxy wyi'i ñäxiicpä. Mänitä Jesús vinagre yaghuucä. ³⁷Mänit ñāmaayyā:

—Pø tøy miičhä judíoshajxy xquiobiernähaty, hamdsoods yajniñähwa'adsøø.

³⁸Mänitä soldado pu'uyhuung hajxy jim yujpahy cruzcuhdum. Tägøøgtu'u hayuuc hänäjty miøødä cujaay: “Hädaadsä judíoshajxy guiobiernähajpy.” Griegohaam hänäjty quiujaayä, møødä latínhaam, møødä hebreohaam.

³⁹Mänitä mee'tspä tu'ug miänaañ, ja'a hänäjty tøø miøjpahbéjtäbä cruzøxp:

—Pø tøyä Dios tøø xquiexy, hamdsoods yajniñähwa'adsøø, y yajnhwäatsägäts højtspä —nømä Jesús ñāmaayyā.

⁴⁰⁻⁴¹Mänitä craa yhojjä jiamiøød:

—Nej, cajtämä Dios mwiiingudsähgø'øyä. Paady højts ngumadowäänäm coo tøø ngädiéhyyäm. Pero hädaa craa, caj nej tøø jiatcø'øy.

⁴²Mänitä Jesús ñāmaayyā:

—Jesús, hөөч xjiahmiédsáp coo miich hánajty mdägø'owa'añ gobiernähajpä.

⁴³Mänitä Jesús yhadsooyy:

—Tøyhajt jaduhñ nnäma'ay, jádá'ajöch miich jim xmiødhada'añ tsajpootyp.

⁴⁴Cujyxioø hánajty je'e, mänit wyiingoodsøoyy wiinduhmyhagajpt. Tägøøghorä yhiyty wiingoods.

⁴⁵Cabä xøø hánajty maa ñä'ä hañ. Mänitä tsajtøjc-hadøødiuc quioø'tswa'xy cujjiä. ⁴⁶Mänitä Jesús yaaxy:

—Teedy, hөөч miich njoot njuøhñdy nyajcø'ødägø'owaamby.

Jagoo jaduhñ jiaac mänaañnä, mänitiä yho'nä.

⁴⁷Mänitä soldadowiindsón yhiyx nebiä Jesús jiajtiän. Mänit jia mänaañ coo ja'a Dios miøjjä jiaančhä, coo ja'a Jesús ja'a pojpä hijty quia'a møødä.

⁴⁸Coo ja'a cu'ughajxy yhiyx nebiä Jesús jiajtiän, mänit hajxy wyiimbijnä jootmayháltäp. ⁴⁹Jimä Jesús miägu'ughajpähajxy hánajty tiäna'ay jäguemjuøøby møødä to'oxiøjc-hajxy, ja'a hajxy hánajty jim tøø piadsóoñbä Galilea. Yhiyx hajxy je'ebä nebiä Jesús jiajtiän.

⁵⁰Jimä hojiäya'ay hánajty tu'ug ja'a xøhajpä José. Arimatea hánajty chooñ jim Judeanaaxooty. Møjtuung hánajty miøød maa ja'a judfoscajptän. ⁵¹Pero cab jaduhñ piamanaañ coo ja'a Jesús cu yagho'cä. Jiøbhijxyp hánajty je'e coo ja'a Dios ja'a miäjaa yajcähxø'øga'añ. ⁵²Mänitä José ja'a Pilato ja'a cuhdujt hoy miäyujwa'añ coo ja'a ho'ogyjiäya'ay yajmānācāt cruzcøxp. ⁵³Coo ja'a cuhdujt jaduhñ

miooyyā, mänit yajmānajcy. Mänitä poobwit yajnāhbijty. Mänit hoy yajnaaxtägø'oy maa ja'a tsaajutän ja'a naamhādiūñābā. ⁵⁴Mānacyxiøø hánajty je'e mänaa ja'a Jesús ñaaxtägø'oyän. Viernes hánajty je'e. Hadsuujøøñāp hánajty; ja'a poo'xxiøø hánajty habāatnāp.

⁵⁵Ja'a to'oxiøjc-hajxy, ja'a Jesús hajxy hánajty tøø piadsóoñbä Galilea, mänitä Jesús hajxy hoy yhiyx maa hánajty tøø ñaaxtägø'oyän. ⁵⁶Coo hajxy wyiimbijty, mänitä pa'agxuu'pähón hajxy hoy jiuu. Mänit hajxy pioo'xnä ja'a poo'xxiøøjooty neby hajxy hánajty quihdujthatiän.

24 Nāxøøjopiä to'oxiøjc-hajxy ñøcxtägajch maa ja'a Jesús hánajty tøø ñaaxtägø'oyän møødä jiamioødhajxy wiingpä. Pa'agxuu'pähongón hajxy ñøcxy ja'a hajxy hánajty tøø júyyābā. ²Coo hajxy jim miejch, mänit hajxy yhiyx coo ja'a tsaajut hánajty tøø yhawa'ačh. ³Mänit hajxy jiiby tiägøøyy. Cab hajxy jiiby pøn piaaty. ⁴Mänit hajxy chähgøøyy. Cab hajxy hánajty ñajuø'oy neby hajxy jiatcø'owät. Mänit hajxy yhiyx coo ja'a jäya'ay hajxy hánajty metsc miøødtāna'ay. Yajxonjatiä wyithajxy hánajty. Høxtä haambā wyithajxy hánajty. ⁵Mänitä to'oxiøjc-hajxy ñaaxcooyy je'eguiøxpä coo hajxy hánajty chähgø'oy. Mänit hajxy ñāmaayyā:

—Tii ja'a Jesús hajxy yaa coo mhøxta'ay maa ja'a ho'ogyjiäya'ayhagujcān. ⁶Cab je'e yaajän. Tøø jiuypiojñä. Nej, cab hajxy mjahmiechä neby hajxy jiiby tøø xyajmøødmādia'aguian

Galilea. ⁷Nõmä Jesús ja'a Diosquexypä hajxy xyhawaanä cooc hijty quiø'ødägø'owa'añii ja'a cubojpäya'ay ja'a cugädieejiäya'ay, cooc hijty miøjpahbeda'añii cruzcøxp, cooc cudägøøgxøø hijty jiuypioğa'añ.

⁸Mänit hajxy jiaančh jahmiejtsnä neby hajxy hänajty tøø ñäma'ayijän Jesúsäm. ⁹Mänit hajxy wyiimbijnä. Mänitä jiamiøød hajxy hoy yhawaanä ja'a nämajtu'ugpä møødä nämaybä. ¹⁰Ja'a to'oxiøjc ja'a mädia'agy hajxy mäméjtsäbä, jue'e hajxy hänajty näje'e xiøhaty María Magdalatsohmbä, møødä Juana, møødä María ja'a Jacobo tiaj. ¹¹Pero cabä to'oxiøjc ja'a miädia'agyhajxy miäbøjcäxä ja'a Jesús jiamiøødhajxy. Nebiä cuhhiimbä-mädia'aguiän hajxy jaduhñ miädooyy.

¹²Pero ja'a Pedro, miäbøjc je'e. Päyø'øguiä ñøcxy maa ja'a Jesús hänajty tøø ñäaxtägø'øyän. Cooc jiiiby quiuwoodsøøyy, mänitä poobwit yhihxy coo wiingtuum yhijnä. Mänit wyiimbijnä. Yagjuøøyy jaduhñ neby hänajty tøø jiadyiijän.

¹³Mänitxøøbä ja'a Jesús jiamiøødhajxy hänajty metsec ñøcxy maa ja'a cajpt hänajty xiøhatiän Emaús. Majtu'ugkilómetro hänajty jiäguemä maa ja'a Jerusalencajptän. ¹⁴Mädiäacäp hajxy hänajty tiu'uyo'oy tijaty tøø jiadyii. ¹⁵Mänit hajxy wyiingumedsøøyyä ja'a Jesús. Mänit hajxy miøødtu'ubøjcy. ¹⁶Hoy hajxy jia hijxy, cab hajxy yhøxcajpy. ¹⁷Mänitä Jesús miänaañ:

—Tii hajxy mmädiaacypy. Tii hajxy coo mdajy coo mmay.

¹⁸Tu'jäya'ay hänajty xiøhaty Cleofas. Mänit yhadsooyy:

—Hopiønä ñajuø'øy tii jim tøø jiadyii Jerusalén jäda'a xøøbä. Nej, miich nidiuhm nga'a najuøøby tii jim tøø jiadyiijä, hoy miich jim tøø mja hijpä.

¹⁹⁻²⁰Mänitä Jesús yhadsooyy: —Tii jaduhñ tøø jiadyii.

Mänit hajxy yhadsooyy: —Ja'a Jesús tøø yagho'ogyii cruzcøxp. Ja'a teedywiindsøn'hajxy yejc møød højts ngopc-hajpä. Diosquexy hijty wiädity. Hoy-yagjuøøñäjatypä hijty yajcähxø'py. Hoy hijty miädia'agy ja'a Dioscøxpä cu'ughagujc.

²¹Jaduhñ højts njoot hijty choicy coo ja'a Jesús ja'a gobiernä Rómaba ja'a quiuhdujt cu piøjcä nebiä gobiernä yaa quia'a hanéhmnät maa højts ngajptän, højts judiøsjäya'ayhajxy. Maaxtøjcy mädagøøyy jaduhñ yagho'cä.

²²Haamiän ja'a to'oxiøjc-hajxy näje'e yhooyy maa ja'a Jesús hänajty tøø ñäaxtägø'øyän. ²³Pero cábac hajxy piaaty. Mänitägä Diosmoonsä hajxy metsec yhihxy ja'a tsajpootypä-tsohmbä. Mänitac hajxy yhawaanäxä cooc ja'a Jesús hänajty tøø jiuypiojtnä. Hoy-yagjuøøñä højts hajxy xyajmøødmädiaacy. ²⁴Mänit højts njamiøødhajxy hoy yhihxpä. Jadúhñac hajxy piaatpä nebiä to'oxiøjc-hajxy hänajty tøø ñägäpxiän. Ni jé'egädsä Jesús hajxy quia'a hijxy.

²⁵Mänitä Jesús miänaañ: —Nej, cab hajxy mnä'ägä wiinjuø'øyä, cab hajxy mnä'ägä mabøquiä nebiä Diosquexyhajxy jecy miänaañän. ²⁶Tsipcøxpä

Diosquexy chaačhpøga'añ coo hånajty jim ñøcxaannä tsajpootyp.

²⁷Mänit tiägøøyy yajwiingapxøøbiä ja'a Diosmädia'agy majaty miädia'agyijän. Jim quiapxtsohñ maa ja'a Moisés hånajty tøø quiujaayän. Čøjx quiapxy mäduhñtiä ja'a Diosquexyhajxy quiujahyyän.

²⁸Coo hajxy jim miehch Emaús, mänitä Jesús miänaañ cooc jiaac yo'oya'añ. ²⁹Mänit hajxy ñämaayyo'cy:

—Huuc mähmø'ow yaa maa højtsän. Tøø chuujøøñä. Coodsøñäp jaduhñ.

Mänitä Jesús jiaančh mähmøøyy. Mänit hajxy tiøjtägøøyy.

³⁰Mänit hajxy yhäñaaguiädaacy meexäwiinduum. Mänitä Jesús tsajcaagy quionø'cy. Mänitä Dioscujú'uyäp jejcy. Mänitä tsajcaagy qyjwa'xy. Mänitä jiamiøød miooyy. ³¹Mänitnäs hajxy yhøxcajpnä. Mänitä Jesús yhadägoyyøøñä. ³²Mänit tu'jäya'ay miänaañ:

—Wíinghøch hijty nnijäwø'oyii tu'haambejpä coo ja'a Diosmädia'agy xyajmøødmädiäcäm.

³³Mänitiä hajxy wyiimbijnä, ñøcxtägajch Jerusalén. Mänitä jiamiøød hajxy hoy piaady maa hajxy hånajty tøø yhamugø'oyän, ja'a nämajtu'ugpä møød hajxy nämaybä.

³⁴Mänit hajxy nämetspä ñämaayyä:

—Tøyhajt jaduhñ coo ja'a nWiindsøñhajtäm tøø jiuypio'cy. Ja'a Simón jaduhñ tøø yhi'xy.

³⁵Mänit hajxy je'e ñägäp xpä cooc ja'a Jesús hajxy tøø piaady tu'haam.

Mänitäc hajxy yhøxcajpnä coogä Jesús ja'a tsajcaagy qyjwa'xy.

³⁶Jiiby hajxy hånajty miädia'agyñä, mänitä Jesús ñäguehxtøø'xy maa hajxy hånajty yhäña'ayän. Mänit yajpoo'xy ja'a jiamiøødhajxy. ³⁷Mänit hajxy jiaančh tehñ chähgøøyy. Hääñämä tyijy hajxy nämejtsä. ³⁸Mänitä Jesús miänaañ:

—Tii hajxy coo mwi'i chähgø'oy.

Tiičh hajxy coo xquia'a høxcapy.

³⁹Høxtáhmdsøch hädaa ngø'ø, høxtáhmdsøch hädaa ndecy. Høøčh je'e Jesús. Høøčh hajxy nähdoonäc. Cabä hääñämä ni'x copc miøødä nébiøch høøčh nmøødän.

⁴⁰Mänitä Jesús ja'a quiø'ødiecy yaghijxy ja'a jiamiøødhajxy. ⁴¹Pero cab hajxy hamuumdu'joot ñä'ägä mäßøjcy. Xoonäcäp hajxy hånajty møød hajxy hånajty yagjuø'oy.

Mänitä Jesús miänaañ:

—Tii hajxy jii mmøød cooçh ngáyät.

⁴²Mänitä hacxtsa'ay hajxy miooyy møødä møjtsiinjøødy. ⁴³Mänitä Jesús quioonäsooyy. Mänit quiaayy maa ja'a wyiinduumhajxiän.

⁴⁴Mänit miänaañ:

—Nébiøch tøø njatiän, tøøds hajxy hijty nhawáañäm mänaa hajxy quipxy tøø nhíjtäm. Tøjiajt jaduhñ ja'a høøchcøxpä neby jiiby myiñän cujaay maa ja'a Moisés miädia'aguiän, chaads jiiby maa ja'a Sálmosän, chaads jiiby maa ja'a librän ja'a Diosquexyhajxy jecy jíáhyyäbä.

⁴⁵Mänitä Diosmädia'agy quiapxtøøyy:

⁴⁶—Jaduhñ myiñ cujaay maa ja'a Diosmädia'aguiän

cooc ja'a Diosquexy
 tsipcøxp yho'oga'añ, y cooc
 cudägøøgxøø jiuypiojtägatsa'añ,
⁴⁷y cooc miädia'aga'añii
 wiinduhmyhagajpt. Yaa Jerusalén
 miädiaactsoona'añii. Jaduhnä
 cu'ughajxy yajwiingapxø'owa'añii
 coo ja'a yhaxøøgcuhdujt hajxy
 ñajtshixø'owät. Mänit hajxy
 yajnahwa'adsa'añii ja'a piojpä
 quiädieey hajxy. ⁴⁸Hamdsoo
 hajxy tøø mhixy tøø mmädoy
 nébiøch cham nmädia'aguiän.
⁴⁹Nyajnäguexáambiøch mijts ja'a
 Dioshespíritu ja'a nDéedyhøch
 tøø xyajwiinwaanø'øyäbä
 cooçh mijts nmó'owät. Jim
 choona'añ tsajpootyp. Yaa hajxy
 mmähmø'owät Jerusalén høxtä

coonä ja'a Dioshespíritu hajxy
 hänajty tøø xñägäda'agy.

⁵⁰Mänitä Jesús
 miøødcajptpädsøømy ja'a
 jiamiøødhajxy. Mänit hajxy miejch
 maa ja'a cajpt xiøhatiän Betania.
 Mänitä Jesús ja'a quiø'ø chajxajy.
 Mänitä Dioscujú'uyäp yejcy ja'a
 jiamiøødcøxpähajxy.

⁵¹Mänit hajxy ñähguéecänä.
 Mänitä Jesús jim ñøcxy
 tsajpootyp. ⁵²Mänitä Jesús hajxy
 wyiingudsähgøøyy. Mänit hajxy
 wyiimbijnä jaançh teh̄m jiootcujc.
 Mänit hajxy ñøcxy Jerusalén.
⁵³Jabom-jabom hajxy hänajty
 ñøcxy tsajtøgooty. Nøcxy hajxy
 hänajty quiapxy miädia'agy coo ja'a
 Dios miøjjä jiaançhä. Amén.

San Juan

1 Ja'a Dioshuung, je'e hajxy xyajnáhixóoyyám nebiä Dios jiäya'ayhatiän. Jiíyyám hánajty je'e mänaa hádaa yaabä naaxwiin yhawijy tiøø'xta'aguiän. Jiíyyám hánajty je'e mөөdä Dios; Diósäts je'e. ²Jim hánajty je'e mөөdä Dios mänaa hádaa yaabä naaxwiin yhawijy tiøø'xta'aguiän. ³Jaaya'ay jaduhñ hädiuun cøxiä. Nidiuhñ yhädiuun. ⁴Ja'a Dioshuung, yepjy ja'a jugyhajt je'e. Jaduhñ mäwiin je'e nebiä cujajpä nebiä cudøø'xpän. Xyajpádsøømäm hajxy hagoonstuum. ⁵Coo jøøn yhajjy hagoonstuum, hoy jaduhñ nhíjxäm. Ja'a Dioshuung, jaduhñ mäwíinäts je'e nebiä jøønän coo xyaghíjxäm neby hajxy hoy nwädíjtämät.

⁶Mänitä Dios jäya'ay tu'ug quiejxy, ja'a xøhajpä Juan. ⁷Paadiä Juan quiejxä, jaduhñä Dioshuung ñägápxät, jaduhñä jäya'ayhajxy nägøxiä miäbögat. ⁸Ja'a Juan, ca'a je'e Dyioshuungä. Nä'ä nägapxpä jaduhñ quiejxä. ⁹Tøø ja'a Dioshuung hánajty yaa miejtsnä hádaa yaabä naaxwiin. Je'e ja'a tøyhajt hajxy xmióoyyám nägøxiä maa hajxy yaa ndsánáayyám hádaa yaabä naaxwiin. Cøxiä xyajnáhixóoyyám.

¹⁰Coo yaa miejch hádaa yaabä naaxwiin, cabä miädia'agy

miäböjcäxä, hoy hánajty cøxiä tøø jia hädiuun. ¹¹Jim je'e jia medsøoyy maa ja'a yhamdsoo cajptän, pero cab jim chojcä. ¹²Pero näje'ejaty hajxy chojcy. Pøn jaduhñ tsojc, pøn ja'a miädia'agy mäböjcä, je'edsä cuhdujt hajxy mooyyä coo hajxy yhidät nebiä Dioshuungän. ¹³Cab hajxy xyhuunghájtäm nebiä yaabä teedy hajxy xyhuunghájtäm. Pero coo hajxy nmäböjcämät ja'a Dios ja'a miädia'agy, mänit hajxy jaduhñ xyhuunghájtämät.

¹⁴Ja'a Dioshuung, jäya'ayhajt je'e neby højts chaa njäya'ayhájjtäm. Hádaa yaabä naaxwiin je'e chánaayy maa højtshájtäm. Tøø højts nhixy coo je'e miøjjä jiaančhä. Paady miøjjä jiaančhä coo je'e Dyioshuungä. Tiumby je'e ja'a mayhajt homiänaajä. Tømiädiaacp je'e homiänaajä. ¹⁵Jaayá'ayädsä Juan jaduhñ ñägapx:

—Yø'øya'ayhöch hijty nnägapxyp, yø'ø høxhaam tøø jiaac méchäbä. Høøch hijty jayøjp tøø nmech. Yø'ødsä møjcuhdujt nä'ägädä mөөd. Høøch, cáböčhä cuhdujt jaduhñ nmөөdä neby yø'øya'ay miөөdän. Jímiäm yø'øya'ay hánajty cooč yaa nmiiñ ngahy.

¹⁶Jaayá'ayäts ja'a mayhajt tuumb ja'a højtsøxphájtäm homiänaajä.

¹⁷Dios ja'a Moisés ja'a cuhdujt jaduhñ mooyy. Højts ja'a Moisés ja'a cuhdujt xmioodiägájtám. Pero xhójcám ja'a Dios hajxy mөөd xmióoyyám ja'a tøyhajt. Paadiä Jesucristo yaa quiejxä. ¹⁸Ni pөñ ja'a Dios quia'a hixyñä. Ja'a yHuung, je'e hajxy xyhawáañäm nebiä Dios jiäya'ayhatiän. Jiaančh tehñ chojpy ja'a Dios ja'a Jesucristo. Tu'ughuunghajp ja'a Jesucristo.

¹⁹Mänitä teedyhajxy näje'e jim quiejxä mөөdä levitashajxy maa Juangän. Ja'a levitashajxy, tsajtöjcueendähajpä hajxy hänäjty tiuunghajpy. Jim hajxy chohndaacy maa ja'a cajpt jaduhñ xiøhatiän Jerusalén. Ja'a judíos wyiindsønhajxy jaduhñ mäguejx. Paadiä teedyhajxy jaduhñ quiejxä coo ja'a Juan hajxy ween nøcxy tiøyhajtmadoy pөñ je'e. ²⁰Coo ja'a Juan jaduhñ miäyajtøowa, yejc je'e ja'a tøyhajt. Caj yhøhndaacy:

—Ca'a yhøøčhä je'e ja'a Cristo, ja'a hajxy nhahíjxämbä, ja'a Dios tøø wyiinguéxiäbä coo hajxy xyhanéhämät.

²¹Mänitä jadähooc miäyajtøowägumbä:

—Pөñ miich. Nej, miich Elíashajpä ja'a mináambäjä.

Mänitä Juan yhadsooyy:

—Caj.

Mänitä miäyajtøowägumbä:

—Nej, tögä miich ja'a Diosmädia'agy jecy tøø mhuuc mäwädijpä.

Mänitä Juan yhadsoogumbä:

—Cábämäts.

²²Mänitä miäyajtøowägumbä:

—Pөñ miich. Højts ja'a tøyhajt móoyyác neby højts ja'a nwiindsøn häyaa nhawaandägájtät pөñ miich.

²³Mänitä Juan yhadsooyy:

—Høøčh, nyajcapxøøbiøch ja'a Diosmädia'agy mөc pactuum. Panøcx ja'a Diostu'u hajxy nebiä Isaías jecy miänaañän coo hajxy mbanøcxät. Diosmädia'agy ja'a Isaías jecy yajwa'x.

²⁴Ja'a hajxy hänäjty tøø quiexyíjábä maa ja'a Juangän, näje'e hajxy hänäjty pianøcxä ja'a fariseos ja'a miädia'agy hajxy.

²⁵Mänitä Juan miäyajtøowa:

—Tii miich coo mnä'ä mäyajnäbejpä pø cá'adäm miich mGrístäjä, pø cá'adäm miich ja'a jäya'ay ja'a Diosmädia'agy jecy tøø yajwä'xiäbä.

²⁶Mänitä Juan yhadsooyy:

—Høøčh, nøøháamhøch nmäyajnäbety. Pero xima jäya'ay tu'ug majiäya'ayhagujc. Cahnä hajxy mhixyhatyñä. ²⁷Jayøjphøch nmejch. Mänit yø'øya'ay høxhaam jiaac mejch. Møjcuhdujt yø'øya'ay miøød quejeech nmөөdä.

²⁸Jimä Juan hänäjty

miäyajnäbety maa ja'a cajpt hänäjty xiøhatiän Betábara, ja'a Jordánpä møjnøøhaawiimbä jaduhñ maa ja'a xøø piädsømiän.

²⁹Cujaboom ja'a Juan ja'a Jesús yhiijxy. Jimä Jesús hänäjty miänacy maa ja'a Juan hänäjty tiäna'ayän. Mänitä Juan miänaañ:

—Huug hix hajxy, xii jäya'ay tu'ug miänacy. Yø'ø jaduhñ xøhajp ja'a Meeghuung ja'a Dios tøø quiéxiäbä. Yø'øds hajxy je'e xñähho'tu'udáañäm. Yø'øds hajxy je'e xyajnáhwa'ads xyajcuhwa'adsáañäm ja'a nbojpä ngädieeyhajtäm. ³⁰Yø'øch hijty nnänøømby ja'a høxhaam tøø jiaac méchäbä. Høøčh hijty jayøjp tøø

nmech. Yø'øds je'e ja'a møjcuhdajt møød quejeeč nmøødä. Jimiäm yø'øya'ay hänäjty mänaäch nmiñ nga'ayän. ³¹Cábøch hijty nnajuø'øy pøn jaduhñ tunaamb nébiøch tøø nmädia'aguiän. Pero páadyhöch tøø nmech mäyajnäbejpä nøøhaam neby hajxy jaduhñ mnajuø'øwät pøn je'e, mijts judíos.

³²Mänitä Juan miänáangumbä: —Tøøchä Dioshespíritu nhixy coo jim tøø choñ tsajpootyp. Mänitøch nhixy coo hänäjty miänacy nebiä palomän. Mänitä ñaaxcädaacy. Mänitä jim yhöxtaacy yø'øya'ay quiuhduum. ³³Cáhnøch hänäjty nnajuø'øy pøn je'e. Pero jaayá'ayhöch tøø xquiéxiäbä mäyajnäbejpä nøøhaam, je'ečh jaduhñ xñämaayy: “Mhixaambiä Dioshespíritu maa je'e miänacø'owa'añän. Jim jaduhñ miähmø'owa'añ maa tu'jäya'ay quiuhduumän. Jaayá'ayäts ja'a Dioshespíritu jaduhñ yegáannäp.”

³⁴Tøøch njaančh hixy. Tøøch nnägapxy coo yø'øya'ay jiaančh Dioshuungä. Nyéjpiøch ja'a tøyhajt jaduhñ.

³⁵Cujaboom ja'a Juan hänäjty jim tiänáaguiumbä møødä jiamiøød metscä. ³⁶Jimä Jesús hänäjty wiädijpä. Coo ja'a Juan ja'a Jesús miøjhee'py, mänitä Juan miänaañ: —Yø'øds jaduhñ xøhajt ja'a Meeghuung ja'a Dios tøø quiéxiäbä.

³⁷Coo ja'a Juan ja'a jiamiøødhajxy jaduhñ miädooyy, mänitä Jesús hajxy piadu'ubøjcy nämetscä. ³⁸Coo Jesús jiäwøøyy coo hänäjty pianøxyii, mänitä wia'wiimbijty. Mänitä yhixy coo hänäjty nämetscä pianøxyii. Mänitä miänaañ:

—Tii hajxy mhøxtaaby.

Mänit hajxy yhadsooyy:

—Wiindsøn, maa miich tøø mmejtsta'agy.

³⁹Mänitä Jesús yhadsooyy:

—Jam huug híjxäm.

Mänit hajxy hoy jiaančh hixy maa Jesús hänäjty tøø mjejtsta'aguiän. Tøø hänäjty miänacyxiøøjøñä. Jim hajxy miähmøøñä maa Jesúsän.

⁴⁰Tu'ugä Juan ja'a jiamiøød hänäjty xiøhaty Andrés, ja'a Simón Pedro piuhya'ay. Je'eds ja'a Jesús hänäjty tøø piadu'ubøcy møødä jiamiøød tu'ug. ⁴¹Mänitiä Andrés ja'a piuhya'ay hoy piaady, ja'a xøhajt Simón. Mänitä Simón ñämaayy:

—Tøø højts ja'a Mesías nbaady — je'e jaduhñ ñänøømby ja'a Cristo, ja'a Dios tøø wyiinguéxiäbä coo hajxy yaa xyhanéhämät.

⁴²Mänitä Andrés ja'a Simón jim wioonøcxy maa ja'a Jesús hänäjtian. Coo ja'a Jesús ja'a Simón yhixy, mänit miänaañ:

—Miičh, Simón miičh mxøhaty. Jonás miičh mdeedyhajpy. Pero Pedro mxøhataannä —je'e jaduhñ ñänøømby tsaa.

⁴³Cujaboom ja'a Jesús hänäjty ñøcxa'añ Galilea. Mänitä Felipe hoy piaady. Mänitä Felipe ñämaayy:

—Jámhöch quipxy møødwädíjtäc. Høøchä nmädia'agy habøjcäc.

⁴⁴Jimä Felipe hänäjty chooñ maa ja'a cajpt hänäjty xiøhatian Betsaida. Jim ja'a Andrés hänäjty chohmbä møødä Pedro. ⁴⁵Mänitä Felipe ja'a Natanael hoy piaady. Mänitä Natanael ñämaayy:

—Tøø højts jaaya'ay nbaady ja'a Moisés tøø ñägäpxiäbä

maa ja'a nocy piädø'quiän, ja'a Diosmädia'agymiäwädijpähajxy tøø ñägäpxiäbä. Jesús jaduhñ xiøhaty. José yhuung je'eduhñ. Jim jaduhñ chooñ Nazaret.

⁴⁶Mänitä Natanael miänaañ:

—Nazaretä. Cabä ndijy hoybäda'ajim Nazaret.

Mänitä Felipe yhadsooyy:

—Jam huug hjxäm.

⁴⁷Jimä Natanael ja'a Jesús hänajty ñämech. Coö Jesús ja'a Natanael yhijxy, mänitä Jesús miänaañ:

—Yø'ø judío xii miimbä, hamuumdu'joot ja'a Diosmädia'agy quiudiuñ. Ni mänaa quia'a hõhnda'agy.

⁴⁸Mänitä Natanael ja'a Jesús miäyajtøoyy:

—Maačh miich tøø xyhixy cooçh miich jaduhñ tøø xyhøxcapy.

Mänitä Jesús yhadsooyy:

—Jiiby miich hänajty mdäna'ay piidspa'c. Cahnä Felipe hänajty xmiägapxy.

⁴⁹Mänitä Natanael miänaañ:

—Wiindsõñ, Dios miich xyhuunghajp. Mhanehmby miich ja'a judiøshajxy.

⁵⁰Mänitä Jesús miänaañ:

—Páadyhøch ja'a nmädia'agy xmiäböjca cooçh jaduhñ nmänaañ cooçh miich jiiby tøø nhixy piidspa'c. Pero mhixaamby cooçh maas hoy-yagjuøõñäjatypä nyajcähxø'øga'añ.

⁵¹Mänitä Jesús miänångumbä:

—Chaads mijts nnämá'awät, mhixaamby hajxy coo ja'a tsajpootyp yhawa'adsa'añ. Mhixaamby ja'a Diosmoonsä hajxy ja'a tsajpootypä coo hajxy chajpeda'añ coo hajxy

ñaaxcäda'aga'añ maačhä nwiinduumän, høøch ja'a Diosquexypä.

2 Cumaaxc ja'a pøc hu'ug hänajty jiada'añii maa ja'a cajpt hänajty xiøhatiän Caná de Galilea. Jimä Jesús ja'a tiaj wiowwä ²møødä Jesús møødä jiamiøødhajxy. ³Mänitä vino quiøjxy. Mänitä Jesús ñämaayyä ja'a tiaj coog ja'a vino tøø quiøxy. ⁴Mänitä Jesús yhadsooyy:

—Maam, ca'a mhaaw mbäda'agy. Ca'a myiichä mgüeendä. Høøch nnajuøøby. Cahnä yhabaadyñä cooçh nmayhajtúnät.

⁵Mänitä Jesús ja'a tiaj miänaañ, ñämaayyä ja'a moonsähajxy:

—Naxy hajxy mdehm miäbögåt coo Jesús hajxy xmiägapxy xyhané'emät.

⁶Jimä hamøj tsaanøøgow hänajty quiärumna'ay tädujca. Tägø'øwaamb jiiby tu'nøøgow mädaaxc-hii'xlitro o mägo'xlitro. Jue'e ja'a judiøshajxy hänajty wia'añ, cø'øbujnøøhidøhñdy. Jaduhñ hajxy hänajty quiuhdujthaty. ⁷Mänitä Jesús miänaañ, ñämaayyä ja'a moonsähajxy:

—Cudemø'ow nøø hajxy nøøgowooty. Cøxy yaghuts hajxy.

Mänit hajxy jiaançh yaghujch.

⁸Mänit Jesús miänångumbä:

—Jee'ppädsøm nøø hajxy weeñtiä. Nøcx ja'a mwiindsõñ hajxy mo'ow.

Mänit hajxy jaduhñ quiudiuñ.

⁹Tøø ja'a nøø hänajty wia'añguiojy

vino. Jesús jaduhñ yajwa'añguioj.

Mänitä moonsäwiindsõñ ja'a vino quiøøchooyy. Mänit yhuucmajch.

Cab hänajty ñajuø'øy maa ja'a vino tøø chooñ. Pero ñajuøøby

ja'a moonsähajxy hänajty;
hix, je'e ja'a nøø hajxy hänajty
tøø jiee'ppädsomy. Mänitä
moonsäwiindsón ja'a jamiø'ød
miøjyaaxy. ¹⁰Mänit nämaayä:

—Jayøjp ja'a hovyino hajxy naxy
nä'ägädä temy. Coø ja'a woybä
wichpähajxy hänajty com tøø
yhu'ugy, mänit hajxy hänajty
jiaac tema'añ ja'a vino ca'a jaty
hoybä. Pero miich, cahnä hovyino
mdemyñä.

¹¹Coo Jesús ja'a vino
yajwa'añguiojy jim Caná de Galilea,
hijxtahnd jaduhñ yajcähxø'tsohn
coo miøjjä coo jiaančhä. Coø Jesús
ja'a jiamiøødhajxy jaduhñ yhijsy
coo Jesús ja'a vino yajwa'añguiojy,
paadiä Jesús miädia'agy
miäbøjcäxä.

¹²Mänitä Jesúshajxy jiiby
yhädaacy maa ja'a cajpt jaduhñ
xiøhatiän Capernaum, møødä tij,
møødä piuhya'ayhajxy, møødä
jiamiøødhajxy. Coø hajxy jiiby
quiädaacy, mejtsxøø tågøøgxøø
hajxy jiiby yhijsy.

¹³Jadäänäp ja'a pascuaxøø
hänajty jim maa ja'a cajpt
jaduhñ xiøhatiän Jerusalén.
Ja'a judíoshajxy hänajty jim
yagjadäänäp. Mänit Jesús jim ñøcxy
Jerusalén. ¹⁴Coo jim quioo'ty, mänit
jiiby tiøjtägøøyy maa ja'a tsajtøjc
hamøjpän maa ja'a judíos ja'a Dios
hajxy hänajty wyiingudsähgø'øyän.
Jiiby ja'a wajtoo'pähajxy hänajty
møødä meegtoo'pä møødä
palomatoopä. Jaanä jiiipiä
xädø'øñguuiuwijtspähajxy hänajty
yhänaabiä. ¹⁵Coo Jesús jaduhñ
yhijsy, mänitä xaäch wyidsø'cy.
Mänitä ju'xt yhädiuñ. Mänitä

jäya'ayhajxy cøjx yhøxpäbo'oyii
jiiby tsajtøgooty møødä waj
møødä meeg cøxiä. Mänitä Jesús
yajtsitø'cy ja'a xädø'øñguuiuwijtspä
mieexähajxy. Cøjx ja'a
xiädø'øñhajxy yhøxxity. ¹⁶Mänitä
palomatoopähajxy nämaayä:
—iYajpädsøm yø'ø mbaloma hajxy!
iCábøch nDeedy ja'a tiøjc hajxy
xwiáañät halaplaaz!

¹⁷Mänitä jiamiøødhajxy
jiahmiejtsaacy coo jaduhñ
yhity cujaay: “Mjaanč tehñ
cwieendhadäänäbøch hädaa miich
mdøjc nägø'ø nädecypä, hóyhøch
hajxy cu xjia yajcuyagho'ogø'ow.”

¹⁸Mänitä judíoshajxy miänaañ,
nämaayä Jesús:

—Tii hijxtahnd højts
xyajcähxø'ögäänäp
hoy-yagjuøøñäjatypä pø
mmøød miich cuhdujt jaduhñ
coo yø'øya'ayhajxy tøø mgøxy
høxpäbo'oy.

¹⁹Mänitä Jesús yhadsooyy:
—Coo hädaa tsajtøjc hajxy
myagjidät, pues cudägøøgxøøyyøch
nyaghoyøødiägätsät.

²⁰Mänitä judíoshajxy miänaañ:
—Cujuxychägü'xtädujcjumøjt
hädaa tsajtøjc jecy miaayy
y tågøøgxøøyyä miich
myaghoyøødiägatsa'añ. Cab højts
jaduhñ nmäbøcy.

²¹Pero jue'e Jesús hänajty
ñänømby “ja'a tsajtøjc”, ja'a
yhamdsoo ni'x ja'a yhamdsoo
copc. ²²Coo Jesús hänajty cujecy
tøø jiaanč juyypiøcy, mänitä
jiamiøødhajxy jiahmiejtsaacy nebiaty
hänajty tøø miäna'añän. Mänitä
Diosmädia'agy hajxy miäbøjnä møødä
Jesús ja'a miädia'agy.

²³Mänaa ja'a Jesús jim yhitiän Jerusalén ja'a pascuaxøøjooty, mänitä cu'ugä Jesús hajxy yhijsy coo ja'a Jesús ja'a hoy-yagjuøøñäjatypä hänäjty yajcähxø'øgy. Mänitä Jesús ja'a miädia'agy miäbøjcäxä nämøj nämäy. ²⁴Pero cabä Jesús hänäjty yajwiinhøøñ, je'eguiøxpä coo hänäjty ñajuø'øy hamdsoohaamby coo ja'a cu'ughajxy hänäjty hamuumdu'joot quia'a mäbøcy. ²⁵Hix, hamdsoohaambiä Jesús hänäjty ñajuø'øy coo hajxy haxøøg nwiinmahñdyháltäm nägøxiä. Cabä Jesús hänäjty pøn miäyajtøy neby hajxy nwiinmahñdyháltäm.

3 ¹⁻²Coo maxiøø hänäjty tøø yhiñä, mänitä copc-hajpä jim tu'ug miejch maa Jesúsän. Nämäy hajxy hänäjty quiopc-haty maa judiøshajxiän. Nicodemo ja'a copc-hajpä hänäjty xiøhaty. Pianøcxäp ja'a fariseos miädia'agyhajxy hänäjty. Tøø hänäjty quioodsø'øy coo jim miejch maa Jesúsän. Mänit Jesús ñämaayä:

—Wiindsøn, nnajuøøby højts coo miichä Dios tøø xquiexy yajnähixøøbiä. Coo miichä Dios häxøpy xquia'a puhbety, caj miich hoy-yagjuøøñäjatypä häxøpy myajcähxø'øgy.

³Mänit Jesús miänaañ:

—Chaads miich tehñ tiøyhajt nnämä'awät, coo mga'a miindägats mga'a cahdägätsät, cabä Dios xyhané'emät.

⁴Mänit Nicodemo yajtøøyy:

—Pero neby jaduñ mmiindägats mgahdägätsät coo hänäjty tøø mmäjaanä. Neby jiiby

mdägøødiägätsät ja'a mdaj jioodooty coo jiiby jadähooc mmaaxhuunghädät.

⁵Mänit Jesús yhadsooyy:

—Pues caj. Chaads miich tehñ tiøyhajt nnämä'awät, coo mga'a miindägats mga'a cahdägätsät nøøhaam møødä Dios yhEspirituhaam, cabä Dios xyhané'emät. ⁶Coo tøø mmiñ tøø mga'ay nebiä maaxhuungän, Dios je'e xmiooyy ja'a mni'x ja'a mgopc møødä mjuøhñdy. Y jaduñ mäwiiñäts je'e, coo Dioshøspiritu mbadu'ubøgät, nebiä miindägach cahdägachpäñ mmähmø'øwät.

⁷Ca'a myagjuø'øy cooçh jaduñ nnäma'ay coo tsipcøxp mmiindägats mgahdägätsät. ⁸Coo poj jaduñ xiämemy, cab hajxy nnajuøøyyäm maa myinø'øy maa ñøcxø'øy. Homiaajä poj xiämemy. Mmädówäp jaduñ pero caj mhíxät. Jaduñ mäwiiñäts ja'a Dios yhEspiritu coo xjioottägø'øw coo xquioptägø'øwät. Coo jaduñ mmäbøgät hamuumdu'joot, jaduñ mjädät nebiä miindägach cahdägachpäñ —nømä Jesús miänaañ.

⁹Mänitä Nicodemo yajtøøgumbä:

—Neby je'eduñ mnänømy.

¹⁰Mänit Jesús yhadsooyy:

—Yajnähixøøbiä miich mduunghajpy maa ja'a judiøshajxiän pero cáhnøch nmädia'agy xwyiinjuøøyyäbä. ¹¹Chaads miich tehñ tiøyhajt nnämä'awät. Nmädiaacyy højts mädyiijaty højts nnajuøøby y nnägapxyy højts mädyiijaty højts tøø nhixy. Pero mijts, cab højts mijts nmädia'agy xñä'ägädä

mäbøjcä. ¹²Tøø hajxy nja yajmøødmädia'agy tijaty yaa ja hijp hädaa yaabä naaxwiin, pero cab hajxy mmäbøcy. Hoorä, coöch ja'a tsajpootypä hajxy nyajmøødmädiä'agät, ni je'e hajxy mga'a wiinjuó'owät.

¹³Ni pøn jim quia'a hoynä tsajpootyp. Jagóoyyoch jim nidiuhm ndsoon, høøch ja'a Diosquexypä. Páadyhøch ja'a tøyhajt nmøødä neby jim. ¹⁴Ja'a Moisés, jimä tsahñdyhahädiuunnaxy yujpahy quepyquiøxp jim pactuum. Jaanä jadúhñhøch jäya'ay xyujpa'awaambä, høøch ja'a Diosquexypä. ¹⁵Pønjátyhøch nmädia'agy xmiäbøjcäp, cabä yháañmähajxy mänaa quiuhdägoyya'añ. Cøjxta'axiøø hajxy jiugyhada'añ nebiä Dios jiugyhatiän —nømä Jesús miänaañ.

¹⁶Xjiaançh tehñ chojc xjiaançh tehñ pia'häyóowäm ja'a Dios hajxy nägøxiä, mäduhñtiä hajxy yaa nhíjtäm hädaa yaabä naaxwiin; paadiä tiu'ughuung ñähdujcy. Coö ja'a mädia'agy hajxy hamuumdu'joot nmäbøjcämät ja'a Dioshuungcøxpä, cabä nháañmähajxy mänaa quiuhdägóoyyämät. Jaduhñ hajxy cøjxta'axiøø njugyhájtämät nebiä Dios jiugyhatiän. ¹⁷Paadiä Dios ja'a yHuung yaa tøø quiexy hädaa yaabä naaxwiin coö hajxy jaduhñ ween xñähho'túútäm. Cab hajxy jaduhñ xyajcumädowáañäm.

¹⁸Pønjatiä Dios yHuung ja'a miädia'agy mäbøjcäcäp, cab hajxy je'e yajcumädowa'añii. Pønjaty ca'a mäbøjp, tøø Dios miäna'añ cooc hajxy yajcumädowa'añii, coogä

Dios ja'a yHuung ja'a miädia'agy quia'a mäbøjcäcä. ¹⁹Coö Dios yHuung yaa yhooyy hädaa yaabä naaxwiin, hagoonstuum jäya'ayhajxy hánajty yhity. Paady hajxy hánajty yhity hagoonstuum coö haxøøgwiinmahñdy hajxy hánajty tiuñ. Cabä Dios yHuung miädia'agy hánajty miäbøjcäcä. Jaduhñ mäwíinäts je'e nebiä jøønän. Paady jaduhñ nebiä jøønän, jaduhñ jäya'ayhajxy piädsómät hagoonstuum. Pønjaty hagoonstuum mähmø'owaamb, je'eds Dios ñänøømby coö hajxy yajcumädowa'añii.

²⁰Pønjaty haxøøgwiinmahñdy tuumb, cab hajxy chocy maa jiajjiän. Cähxø'øgaamb yhaxøøgwiinmahñdyhajxy je'e, paady hajxy quia'a pädsøma'añ jajtuum. ²¹Pønjaty panøcxaamb ja'a tømiädia'agy, je'eds jaduhñ pädsømaamb jajtuum. Paady hajxy jaduhñ piädsøma'añ, jaduhñ quiähxø'øga'añ coö Dios hajxy tøyhajt jiaançh puhbedyii.

²²Mänitä Jesús hajxy jim ñøcxy Judeanaaxooty møødä jiamioødhajxy. Coö hajxy jim miejch, mänit hajxy tiägøoyy mäyajnäbejpä. Maxiøø hajxy jim yhiyty mäyajnäbejpä. ²³Jaanä jimä Juanghajxy hánajty miäyajnäbejpä maa ja'a cajpt hánajty xiøhatiän Enón. Salim cajpt mäwiingón jaduhñ. Comä nøø hánajty jim. Mejtsp jäya'ayhajxy hánajty jim näbejpä. ²⁴Cahnä Juan hánajty chumyii.

²⁵Mänitä Juan ja'a jiamioødhajxy tiägøoyy mädiaacpä møødä judíoshajxy nämejtsc nädägøøg.

Je'e hajxy hānajt̃y miādiaacỹpy neby hajxy nābētāt. ²⁶Mānit Juan hoy nāma'ayii:

—Wiindsōñ, xiiby yø'øya'ay miāyajnābety, ja'a miich hijty jim̃ xmiøødhijpā ja'a Jordāngpā mōjnøøhawiimb, ja'a miich tøø mnāgāpxiābā coo Dios tøø quiexy. May jāya'ay tøø nāmech maa miāyajnābetiān.

²⁷Mānit Juan miānaaāñ:

—Coo ja'a Dios jaduhñ tøø miāna'añ, paadiā Jesús miādia'agy pianócxāxā nāmay. ²⁸Tøø hajxy mmādoy cooēh nga'a Cristo. Jawyīinhøch Dios xquiejxy. Pāadyhøch jawyīin xquiejxy cooēh mādia'agy nyajwá'xāt yø'ø Jesúscoxpā. ²⁹Coo ja'a pøc hu'ug maa jiadyii, ja'a jamiø'ød, je'eds ja'a jaxie'eb møød. Ja'a jamiø'ød ja'a miāgu'ughajpā jii hijpā, xoonāacp je'eduhñ coo jamiø'ød quiapxy. Jaanā xoonāacpøch høøčhpā je'eguiøxpā coo Jesús miādia'agy pianócxāxā nāmay. ³⁰Tehngahnā hajxy miayø'øwa'añ, ja'a Jesús miādia'agy hajxy panócxābā. Pero pōnjátyhøchā nmādia'agy xpianócxāp, haweenø'øwaamb hajxy je'e.

³¹Xyhanéh̃mām hajxy je'e nāgøxiā, jaaya'ay jim̃ tsohm̃bā tsajpootyp. Yaayyā hajxy ndsānāayyām hādaa yaabā naaxwiin, y hādaa yaabā naaxwiimbā mādia'agy hajxy nmādiāacām. Pero jaaya'ay jim̃ tsohm̃bā tsajpootyp, ³²je'eduhñ miādiaacỹpy nebiaty jim̃ tøø yhixy tøø miādoyyān tsajpootyp. Pero cabā miādia'agy miābōjčāxā nāmay. ³³Pōnjatiā Jesús miādia'agy mābōjčāp, je'eds tøyhajt̃ yejp coo

Dios tiømiādia'agy. ³⁴Jaaya'ay Dios tøø quiéxiābā, Diosmādia'agy je'eduhñ miādiaacỹpy.

Hamuumdu'joot Dios ja'a Jesús ja'a Dioshēpīritu miooyy nebiā Jesús jaduhñ miādiaactāgātsāt.

³⁵Chojpy ja'a Dios ja'a yHuung; paadiā cøxiā wiinā tøø yajcø'ødāgø'y. ³⁶Pōñā Dios yHuung ja'a miādia'agy mābōjčāp, je'eds cøjxta'axiøø jugyhadaamb nebiā Dios jiugyhatiān. Ja'a hajxy ca'a mābōjčāp, cab hajxy jaduhñ jiugyhada'añ nebiā Dios jiugyhatiān; yajcumādowāanāp hajxy je'e ja'a Diósām.

4¹⁻³Coo Jesús miādoyhajty tøø miādoyhaty coogā Jesús ja'a jiamīøødhajxy hānajt̃y maas may yajmābøcy y yajnābety quejee Juan, mānit Jesúshajxy wyiimbijty Judea. Galilea hajxy ñøcxtāgajch.

⁴Jim̃ hajxy ñaxøoyy Samarianaaxooty. ⁵Mānit hajxy jim̃ miejch maa ja'a cajpt hānajt̃y xiøhatiān Sicar jim̃ Samarianaaxooty, māwiingón maa José nādeedyñaxān. Ja'a tieedy jaduhñ jecy xøhajt̃ Jacob. ⁶⁻⁸Jim̃ā nøøjut mādyii José yajmāmāhmøoyyā coo Jacob yho'cy. Coo Jesúshajxy jim̃ miejch maa nøøjutān, tøø Jesús hānajt̃y yhanuu'xø'y. Mānit Jesús yhøxtaacy nøøjutpa'a. Tøø hānajt̃y quiujyxiøøjø'y. Mānitā jiamīøødhajxy ñøcxy cajptooty juuguiaabiā. Mānitā to'oxiøjc tu'ug quiādaacy nøøgoombā; Samaria hānajt̃y chooñ. Mānit Jesús to'oxiøjc nāmaayy:

—Høøchā nøø móoyyāc.

⁹Mänit Jesús nāmaayyā:

—Tiičh miičh nøø coo xmiäyujwa'añ. Jue'e miičh mdsooñ Judea. Høøčh, yaačh ndsooñ Samaria.

(Ix, cabä Judéabä jäya'ayhajxy hānajty miøødnijootpaadyii ja'a Samáriabä jäya'ayhajxy.) ¹⁰Mänit Jesús yhadsooyy:

—Coo häxøpy mnajuø'ø y tii mayhajt Dios tiunaamby maa miičhcøxpän y pønčh høøčh coočh ja'a nøø tøø nja yujwa'añ, mänitøch cu xmiäyujwaañ ja'a nøø ja'a ni mänaa ca'a tøøtpä.

¹¹Mänitä to'oxiøjc yhadsooyy: —Tsäguhm, cøøc hädaa nøøjut. Caj miičh tii mmøødä coo ja'a nøø myajwohmbädsømtät. Maa tyijy miičh ja'a nøø mbäädät, ja'a ni mänaa ca'a tøøtpä. ¹²Nejy, maas mõctäm miičh cuhdujt mmøødä quejee Jacob cuhdujt jegyhajty miøødä, ja'a hajxy hijty nhaphajjt ndeedyhåjtäm. Je'e hädaa nøøjut xyajmämähmøøyyäm. Yaa jecy ñøøhuucy møødä yhuunghajxy møødä yhanimalhajxy.

¹³Mänit Jesús yhadsooyy: —Coo hädaa nøø hajxy yhu'ugy, najxp tiødsø'øhajxy jaduhñ. Mänit hajxy tiødsø'øbáatägumbä cujaboom cumaaxc. ¹⁴Høøčh, nyéjpiøch ja'a nøø, ja'a ni mänaa ca'a tøøtpä. Coo hajxy yhú'ugät, ni mänaa ja'a tødsø'ø hajxy quia'a paattägåjtsänät. Cøjxta'axiøø hajxy jaduhñ jiugyhada'añ nebiä Dios jiugyhatiän.

¹⁵Cahnä to'oxiøjc ja'a mädia'agy hānajty wyiinjuø'øyñä nebiä Jesús ja'a nøø ñägapxiän. Jue'e Jesús jaduhñ ñänøøm ja'a mayhajt

ja'a Dios jaduhñ tiunaamby maa højtscøxpän. Mänit to'oxiøjc miānaañ:

—Høøčhä nøø móoyyác nébiøch tødsø'ø xquia'a páatnät. Jaduhñhøch yaa miñ nga'a nøøwóhñnät.

¹⁶Mänit Jesús miānaañ: —Nøcx ja'a mnihyhap mõjya'ax; mänit yaa mwoomínät.

¹⁷Mänit to'oxiøjc yhadsooyy: —Cábøch mnihyhap.

Mänit Jesús miānaañ: —Tehm tiøyhajjt miičh jaduhñ mmäna'añ coo nihyhap mga'a møødä. ¹⁸Mägoøxcä mnihyhap tøø mmøødtsäna'ay, y yø'ø ya'adiøjc xim mmøødpä, tøyhajt, ca'a myiichä mhamdsoo nihyhap yø'ø.

¹⁹Mänit to'oxiøjc miānaañ: —Tsäguhm, nyo'mädóobiøch jaduhñ coo miičh ja'a Dioshespíritu mmøødä. ²⁰Jim højts nhap ndeedy ja'a Dios hajxy hijty jecy wyiingudsähgø'ø y maa yø'ø tunän. Pero mijts mänaamb coo hajxy jim nwiingudsähgøøyyämät jim Jerusalén.

²¹Mänit Jesús yhadsooyy: —Muuxy, mabøjcägøch nmädia'agy. Habaadäännäp je'ejän coo mijts ja'a Diosteedy homiaajä mwiingudsähgø'øwaañnä. Ca'a ñä'ä jiiyyä hajtiä mwiingudsähgø'øwa'añ maa yø'ø tunän ni jim Jerusalén.

²²Hoy Dios hajxy mja wiingudsähgø'ø y, cab hajxy mhixiä. Højts, nhixy højts ja'a Dios. Jaduhñ ja'a Diosmädia'agy miāna'añ coo ja'a judíos jäya'ay tu'ug yajnähwa'ads yajcuhwa'adsa'añ. ²³Pøn ja'a Dios tehñ tiøyhajjt wiingudsähgøøñäp, je'eds

hamuumdu'joot wiingudsähgøøby. Jadúhñäts ja'a Dios chocy coo wyiingudsähgø'øwøød hamuumdu'joot. ²⁴Jaduhñä Dios nebiä poj nebiä täxa'ajän. Tsipecøxp hit ja'a Dios hajxy nwiingudsähgøøyyämät.

²⁵Mänit to'oxiøjc miänaañ:

—Ja'a Cristo, ja'a Dios quiexaambiä, je'e højts nhahíxäm. Coø je'e quiäda'aga'añ, mänit højts je'e cøxiä xyhawaanäänäm.

²⁶Mänit Jesús miänaañ:

—Høøchäts je'e ja'a Cristo.

²⁷Mänit Jesús jiamiøødhajxy miehch. Coø hajxy yhiixy coø Jesús ja'a to'oxiøjc hänajty miøødmädia'agy, yagjuøøyy hajxy jaduhñ. Pero cab hajxy yajtøøyy tiiguixpä Jesús ja'a to'oxiøjc hänajty coø miøødmädia'agy.

²⁸Mänitä to'oxiøjc jiiby chohñ maa hajxy hänajty miädia'aguiän. Jiibiä miajt nähgueecy, ñøcxy je'e cajptooty, hoy ja'a cu'ughajxy ñäma'ayii:

²⁹—Jam jäya'ay hajxy tu'ug huug híxäm. Tøøch je'e xñajuø'øy nebiátyhöch haxøøgpä tøø nduñ. Jadúhñhöch je'e tøø xyhawaanä. Je'e ndijjiäda'a je'e ja'a Cristo.

³⁰Mänitä cu'ughajxy tiu'ubøjcy cajptooty, ñänøcxy ja'a Jesús hajxy.

³¹Jimä Jesús hänajty ñäma'ayii ja'a jiamiøødhajxy:

—Wiindsón, cay.

³²Mänit Jesús yhadsooyy:

—Xiích jøø'xypøcy nmøødä. Cab hajxy mnajuø'øy tii je'eduhñ.

³³Mänitä jiamiøødhajxy ñiñämaayyä:

—Nejy, tøø jiøø'xypøquiäda'a yajméjtsäxä.

³⁴Mänit Jesús miänaañ:

—Cooch jaduhñ nmänaañ cooçh jøø'xypøcy nmøødä, je'eçh hänajty jaduhñ nnänøømby cooçh njootcujä, cooçh ngudiünät nébiøch Dios tøø xyhane'emiän, cooçh tiuung nyajmäayyät; je'eçh jaduhñ tøø xquiexy. ³⁵Huug hix yø'øya'ay hajxy xii mänajpä. Xmiäbøgäänäböch nmädia'agy hajxy yø'ø. Jaduhñ mäwíinäts høøchä nmädia'agy nebiä tøømd paquiä miayø'øyän. Tehm quiähxø'p jaduhñ. Cab hajxy jaduhñ mdehm miäná'anät nebiä niippädøjc-hajxy miäna'añän cooc mädaaxpo'o yhabety, mänítäc hajxy je'e yajpäðø'øga'añ. ³⁶Pónhöch jäya'ay ja'a nmädia'agy xyajmäbøgäänäp, xoonða'agaamb hajxy je'e coø hajxy je'e may miäbøga'añ. Quipxy hajxy miøødxoonða'aga'añ ja'a Diosmädia'agy hajxy jayøbajt yaghawa'xøøchóhñäbä. Ja'a hajxy yajmäbøgäänäbä, je'edshajxy cøjxta'axiøø jugyhadaamb nebiä Dios jiugyhatiän. ³⁷Tøyhajt je'eduhñ nebiä jäya'ayhajxy miäna'añän: “Wiingpä je'e niip, y wiingpä je'e yajpäðø'p.” ³⁸Tøøch mijts nwiinguexy coø mijts jäya'ay ja'a Diosmädia'agy hajxy myajmäbøgät, ja'a hajxy hijty tøø miädoyhátibä. Wiingpä hajxy jayøbajt yajmädoyhajt; mijts høxhaam myajmäbøgaamb —nom Jesús miänaañ.

³⁹Ja'a Sicarpä jäya'ayhajxy, nämay hajxy je'eduhñ miäbøjcä ja'a Jesús miädia'agy. Paady hajxy je'eduhñ miäbøjcy coø ja'a to'oxiøjc hänajty jaduhñ tøø ñägapxy cooc yhaxøøgwiinmahñdy cøjx

ñajuóoyäxä, mөөd cooc cөjx yhawaandóowäxä. Jimä Sicarpä jäya'ayhajxy hänäjty xióonaxy Samarianaaxooty. ⁴⁰Mänit Jesús hoy miänuu'xta'agyii coo jim miähmó'owät maa quiajpthajxiän. Mänit jiaančh mähmөөy. Mejtsxөө je'eduhñ jim yhiyty. ⁴¹Coo Jesús jiaac yajmөөdmädiaacy ja'a jäya'ayhajxy, nämay ja'a miädia'agy jiaac mäbójcäxä. ⁴²Mänitä to'oxiөjс hajxy ñämaayy:

—Hөxtahmьds miičh jim hoy mnägapxiän cajptooty, cab hөjts tu'joot nmäböjcy. Pero coo hөjts jiiby ngädaacy, mänit hөjts je'e xtiehm yhamdsoo möөdmädiaacy. Mänit hөjts nmäböjcy. Mänit hөjts nnajuөөy coo yö'öyá'adiäm Cristohaty. Yө'өds hajxy xyajnähwá'ads xyajcuhwá'adsáanäm nägөxiä mäduhñtiä hajxy yaa ndsänáayyäm hädaa yaabä naaxwiin.

⁴³Nägooyyä mejtsxөө yhabejty, mänit Jesús hajxy tiu'uböjnä, ñөcxnä hajxy jim Galilea. ⁴⁴Hamdsoo Jesús je'eduhñ miänaañ cooc hajxy quia'a wiingudsähgө'yii maa yhamdsoo cajptän, ja'a Diosmädia'agy hajxy yaghawa'xөөbiä. ⁴⁵Pero coo Jesús jim miejch Galilea maa yhamdsoo cajptän, mänit yajpoo'xä haxi'ig haxón. Paadiä Jesús yajpoo'xä, coo jäya'ayhajxy hänäjty tөө yhixy hoy-yagjuөөñäjatypä, nebiaty Jesús jim tөө tiuñ tөө yajcähxө'ogy Jerusalén ja'a pascuaxөөjooty.

⁴⁶Mänit Jesús jim jadähooc miéjtscumbä Canä de Galilea maa ja'a nөө hänäjty tөө yajwa'añguiojjiän vino. Jimä

gobiernä mioonsä hänäjty tu'ug tөө miech. Tu'ugä yhuung hänäjty tөө pia'ambety jim Capernaum.

⁴⁷Coo ja'a gobiernä mioonsä miädoyhajty coo Jesús hänäjty tөө miech jim Galilea, mänit Jesús hoy miänuu'xta'agyii coo yhuung nөcxy yajmөcpójcäxä. Mөjta'agy yhuung hänäjty. ⁴⁸Mänitä gobiernä mioonsä ñämaayyä:

—Mijts, cahnä hajxy mmäböcyñä, hoy hajxy tөө mja mädoyhaty cooč hoy-yagjuөөñäjatypä tөө nduñ. Mänit hajxy mmäböga'añ coo hajxy mhuuc tehñ yhixa'añ.

⁴⁹Mänitä gobiernä mioonsä miänaañ:

—Tsögäm, jam hadө'өchä; chámhöch nhuung yho'ogaannä.

⁵⁰Mänit Jesús miänaañ:

—Wiimbit jootcujc. Cabä mhuung yho'oga'añ.

Mänit Jesús miädia'agy jiaančh mäböjсäxä. Mänit gobiernä mioonsä jiaančh wiimbijty.

⁵¹Tu'haamhädaacpä ja'a mioonsähajxy jiөjcubaadөөyyä. Mänit yhawáanäxä cooc yhuung hänäjty tөө jiaančh möcpөcy.

⁵²Mänit yajtөөy mäduñäjtä hänäjty tөө miөcpөcy. Mänit ñämaayyä:

—Häxөөy ja'a tioy tiөjch cujyxiөөho'ogy.

⁵³Mänit ja'a gobiernä mioonsä jiaančh jahmiejch coo Jesús hänäjty häxөөhajty cujyxiөөho'ogy tөө miäna'añ cooc yhuung miөcpөгa'añ. Mänit Jesús ja'a miädia'agy cөjx miäböjсäxä mäduhñtiä hajxy tiu'ugtөjсä.

⁵⁴Miämetsc-hoөcpä Jesús je'eduhñ yajcähxө'cy ja'a

hoy-yagjuøøñajatypä jim Galilea. Mänit je'eduhñ yajcähxø'cy coo hänäjty tøø yhoy Judea.

5 Mänit Jesús ñøcxumbä jim Jerusalén xøøhajpä. Ja'a judíos xiøøhajxy hänäjty jadäänäp. ²Jimä tsiidaact jaduhñ tu'ug xiøhaty Betzata, ja'a hebreohayuuc-haamby. Jimä tsiidaact mädøyyä maa ja'a meegtøotaactän. Mägooxc-hit ja'a tøjwiing wäditiä jim maa ja'a tsiidaactän. ³Mayyä pa'amjäya'ay hänäjty jim quio'na'ay møødä wiindspä møødä tecymia'adpä møødä tecymiucypä. Jim hajxy hänäjty yhahixy coo ja'a nøø jaduhñ jädsenyó'oyät. ⁴Wiingumänaa ja'a Dios mioonsä tsajpootypä hänäjty tu'ug quiiäda'agy nøøyagjädsenyohbiä maa ja'a tsiidaactän. Pero cab hänäjty quiiähxø'ogy. Nägooyyä ja'a nøø hajxy hänäjty jaduhñ yhixy tiägø'øy jädsenyohbiä, mänitä pa'amjäya'ayhajxy tiägø'øy nøøjooty. Ja'a hänäjty jayøbajt tehñ tiägøøçhohmbä, je'eds hänäjty jaduhñ møcpøjp nidiuhñ. Hoy tyii pa'amä hänäjty jia møødä, yajnaxyp je'e. ⁵Jim jäya'ay hänäjty tu'ug pia'amgo'na'ay. Miähii'xmajmocxtägøøggjumøjtpä hänäjty jim tøø yhity. ⁶Coo Jesús ja'a pa'amjäya'ay jaduhñ yhiixy, mänit Jesús yajtøoyy:

—Nejy, mmøcpøgaambä.

⁷Mänitä pa'amjäya'ay yhadsooyy:
—Cábøch nbøn põñhøch xpiädá'agäp nøøjooty coo ja'a nøø tiägø'øy jädsenyohbiä. Cooch hänäjty jiiby nja tægø'owa'añ, tøø wiingpä hänäjty tiägøøñä.

⁸Mänit Jesús miänaañ:
—Pädø'øg, yajpädø'øg mdo'ogy, yohñä.

⁹Mänitiä pa'amjäya'ay jaduhñ jiaançh møcpøjcy. Mänitä miaabejt jiaançh yajpadø'cy yo'oyø'cy. Poo'xxiøøjooty hänäjty je'e.

¹⁰Mänitä judiøshajxy miänaañ, ñämaayyä ja'a craa ja'a hänäjty tøø yajmøcpøgyiijäbä:

—Poo'xxiøø jäda'a. Cabä cuhdujt jaduhñ myiñ coo yø'ø mdo'ogy jäda'a mgapwädität.

¹¹Mänit jäya'ay yhadsooyy ja'a hänäjty tøø miøcpøquiäbä:

—Jaayá'ayhøch tøø xyajmøcpøquiäbä, je'eçh jaduhñ xñämaayy cooch ndo'ogy nyajpädø'øgät.

¹²Mänit miäyajtøowa:
—Pøn jaduhñ tøø xñäma'ay coo mdo'ogy myajpädø'øgät, coo myo'oyø'øgät.

¹³Cabä mähdiojc ñä'a hadsooyy. Hix, jaançh tehñ ñämay jäya'ayhajxy hänäjty jim. Tøø Jesús hänäjty yhiixtägøoyyänä. Paadiä mähdiojc hänäjty quia'a najuø'øy waamb yhadsówät. ¹⁴Mänit cueeñtiä, mänit Jesús yhiixcumbä maa ja'a tsajtøjc hamøjpän. Mänit Jesús miänaañ:

—Huuc mädown, chaa miiech nnämä'awät, tøø miiech mmøcpøcy. Ca'a tii pojpä cädieey mduñ coo maas haxøøg mjädät.

¹⁵Mänitä mähdiojc hoy ñägäpaxy maa ja'a judiøshajxiän cóodäm Jesús je'e, ja'a hänäjty tøø miäyajmøcpøquiäbä. ¹⁶Coo Jesús ja'a hoy-yagjuøøñajatypä yajcähxø'cy ja'a poo'xxiøøjooty, paadiä judíos Jesús hajxy

miädsiphajty; paady hajxy wyiinmaayy nebiä Jesús hajxy yaghó'ogät. ¹⁷Mänit Jesús miänaañ, ñämaayyä ja'a judiöshajxy:

—Cábøch nDeedy mänaa tiuumbädø'øy. Jäda'anäbaadyñä tiuñ. Páadyhöch jaduhñ nbaduumbä, hoy jaduhñ jia poo'xxiøøjootiä.

¹⁸Paady hajxy jia wiinmaayy nebiä Jesús hajxy yaghó'ogät, coo Jesús ja'a hoy-yagjuøøñäjatypä yajcähxø'cy ja'a poo'xxiøøjooty, møød coo jaduhñ miänaañ cooc Dios Tieedyhaty, møød coo yajnimiäbaatä nebiä Diosän.

¹⁹Mänit Jesús miänaañ, ñämaayyä ja'a judiöshajxy:

—Chaads mijts tehñ tiøyhajt nnämä'awät, cábøch nhamdsoo tuung nduñ; jadúhñhöch nduñ nébiøch nDeedy jim tiuñän. Nebiátyhöch nDeedy tiuñ, jadúhñhöch nduumbä. ²⁰Xchójpøch nDeedy. Xyajñähixøøbiøch nebiaty je'e tiuñ. Maas hoy-yagjuøøñätyhöch nDeedy xyajñähixøø'owa'añ neby hajxy myagjuø'owät.

²¹Yagjujypiøjpiøch nDeedy ja'a ho'ogyjiäya'ay. Jaaná jadúhñhöch nyagjujypiøgaambä, pønjátyhöch nyajñähdíjap. ²²NDéedyhöch, cab je'e pøn yajcumädowa'añ. Høøch je'e tøø xquiuhdujtmø'oy coöch jäya'ay nyajcumädówät, ja'a hajxy ca'a mädia'agymiäbøjpä. ²³Páadyhöch jaduhñ tøø xquiuhdujtmø'oy coöchä jäya'ayhajxy ween xwyiingudsähgø'øy nébiøch nDeedy wyiingudsähgø'øyijän. Pønjátyhöch hajxy xquia'a wiingudsähgøøby, ni nDéedyhöch hajxy xquia'a wiingudsähgøøyyäbä, ja'aäch tøø xquiexiäbä.

²⁴Chaads mijts tehñ tiøyhajt nnämä'awät, pønjaty højts nmädia'agy hajxy xmiäbøgåanäp møødhöch nDeedy, tøø ja'a haxøøgpä hajxy quiøxy najtshixøøñä. Je'eds hajxy cøjxta'axiøø jugyhadaamb nebiä Dios jiugyhatiän. Cab hajxy je'e mänaa quiumädowa'añ. ²⁵Ja'a hajxy ca'a mäbøjpä, tøø yhabaady coöchä nmädia'agy hajxy xmiäbøgaanä. Coochä nmädia'agy hajxy jaduhñ xmiäbøjcät, jaduhñ hajxy jiugyhada'añ cøjxta'axiøø nebiä Dios jiugyhatiän.

²⁶Miøødhöch nDeedy cuhdujt coo jäya'ayhajxy ñämä'awät coo hajxy jaduhñ jiugyhádat tsajpootyp cøjxta'axiøø. Je'eäch cuhdujt tøø xmio'oy coöchä jäya'ayhajxy jaduhñ nnämä'awät coo hajxy jim yhidät cøjxta'axiøø. ²⁷Cooch je'eduhñ tøø xwyiinguexy, páadyhöch jaduhñ tøø xquiuhdujtmø'oy coöch nyajñähdíjät nebiaty jäya'ayhajxy jíädät. ²⁸Ca'a hajxy myagjuø'øy. Habaadaamb je'e coöchä ho'ogyjiäya'ayhajxy nyaaxpädsøma'añ. Mänitøch nmädia'agy hajxy xmiädowaanä. ²⁹Mänit hajxy nägøxiä quiøxy jutpädsøma'añ mäduhñtiä hajxy hänäjty tøø yho'ogy. Ja'aäch nmädia'agy hajxy hänäjty tøø xmiäbøjcäbä, je'eds hajxy nøcxaamb tsajpootyp. Ja'aäch nmädia'agy hajxy hänäjty tøø xquia'a mäbøjcäbä, je'eds hajxy ca'awaamb haxøøgtuum.

³⁰Nyajtødiägøøbiøch nébiøch nDeedy xñäma'ayän. Ca'a yhöøchä nhamdsoo wiinmahñdy nyaghijpy. Ngudiúumbiøch jaduhñ nébiøch

nDeedy xmiägapxy xyhane'emiän. Cooč jaduhñ ngudiñ, páadyhöch ja'a tøyhajt nyecy cooč nyajtödiägø'oy. ³¹Cooč häxøpy hamdsoo nniñägapxyii, mänit hajxy cu mmänaañ coočhä tøyhajt nga'a mädia'agy. ³²Jiichä wiingpä xñägapxy; nnajuøøbiøch coo ja'a tøyhajt je'eduhñ yecy. Dióshøch je'e xñägapx. ³³Tøøch mijts hoy xyajtøy maa Juangän pø Dióshøch tøø xjiaančh quexy. Mänitã Juan ja'a tøyhajt hajxy xmiooyy. ³⁴Pero høøch, ca'a jïäyá'ayhöch tøø xyhawaanã cooč Dios tøø xquiexy. Nyagjahmiéjhpøch mijts nebiã Juan hajxy tøø xyhawaanã cooč Dios tøø xquiexy, neby hajxy jaduhñ mnähwa'ads mguhwá'adsät. ³⁵Yajwa'xyp ja'a Juan ja'a Diosmädia'agy hijty. Xyajnähixøøby hajxy hijty neby hajxy mnähwa'ads mguhwá'adsät. Hoy ja'a miädia'agy hajxy hijty mmädóowä. Pero cabã miädia'agy hajxy hijty mmäbøgaanã. ³⁶Ndúumbiøch nébiøch nDeedy tøø xyhane'emiän. Cooč jaduhñ nduñ, cähxø'p jaduhñ cooč nDeedy tøyhajt tøø xquiexy. Cooč hajxy jaduhñ xyhixy nébiøch nduñän, páquiøch nmädia'agy hajxy xmiäbøjçät, hoy ja'a Juan ja'a miädia'agy hajxy tøø mga'a ja mæbøjcã ja'a høøchcøxpã cooč xñägapxy. ³⁷Ja'a nDéedyhöch, ja'ačh tøø xquiéxiäbã, høøchcøxpã jiiby tøø xyajcujaayii maa Diosmädia'aguian. Pero cab hajxy mnajuø'øy cooč nDeedy ja'a miädia'agy jaduhñ nmädiaacã. Cab hajxy mnajuø'øy cooč jaduhñ nduñ nébiøch nDeedy tiuñän. ³⁸Pero cábøch

mijts nDeedy ja'a miädia'agy tøø xmiäbøjcã, ja'ačh tøø xquiéxiäbã. Coo hajxy häxøpy tøø mmäbøcy, cu xmiäbøjçøch mijts ja'a nmädia'agy. ³⁹Myajmädiaac-ho'py ja'a Diosmädia'agy hajxy, ja'a jecy mähmøøyyäbã cujaay. Paady hajxy jaduhñ myajmädiaac-ho'ogy coo tyijy hajxy jaduhñ mjugyhádat nebiã Dios jiugyhatiän. Chaads mijts hajxy nnämä'awät, cooč nmädia'agy hajxy xyajtúunät, mänit hajxy jaduhñ mjugyhádat. Pero hóyhøch Diosmädia'agy xjia nägapxy, ⁴⁰cábøch mijts ja'a nmädia'agy xmiäbøgaanã. Cooč mijts nmädia'agy hamuumdu'joot xmiäbøjçät, mänit hajxy mæbøcy mjugyhádat nebiã Dios jiugyhatiän. ⁴¹'Cábøch nmøjpäda'agy, hóyhøch jäya'ayhajxy xquia'a ja wiingudsähgø'øy. ⁴²Nnajuøøbiøch coo mijts Dios mga'a tsoy. ⁴³NDéedyhöch tøø xjia hamdsoo quexy. Pero cábøch mijts nmädia'agy xmiäbøgaanã. Coo wiingpä miédsät, je'eds mijts ja'a miädia'agy paquiã mmäbøgáanãp. ⁴⁴Cábøch mijts nmädia'agy hoy xmiäbøgaanã. Jia tsojpy ja'a mjoothajxy jaduhñ coo jäya'ay hajxy xwyiingudsähgø'øwät. Pero cabã mjoothajxy chocy coo Dios hajxy xchögät. ⁴⁵Ca'a yhøøchã mijts jimñ nnäxø'øwø'øwaamby maa Dios wyiinduumän. Ja'a Moisésäts mijts jaduhñ xñäxø'øwø'øwaamb. Mmänaamb hajxy jaduhñ coo tyijy Diosmädia'agy hajxy mmäbøcy, ja'a Moisés jecy quiujáhyyäbã. ⁴⁶Coo mijts cu mjaančh mæbøjcy, cu xmiäbøjçøch nmädia'agy hajxypã. Høøchcøxpã Moisés jaduhñ jecy

quiujahy. ⁴⁷ Pero pø cab hajxy mmäbøga'añ nebiä Moisés jecy quiujahyyän, ni høøçhä nmädia'agy hajxy xquia'a mäbøgáañäbä.

6 Cumejtspo'o cudägøøgp'o

Jesús jim̄ ñøcxy mejyhawiimb. Mejtstu'u ja'a mejy xiøhaty Galilea møød Tiberias. ²Nämay Jesús hänäjty pianøcxyii jäya'ayhajxy.

Paady hänäjty pianøcxyii coo hoy-yagjuøøñäjatypä hänäjty tøø yajcähxø'øgy, møød coo pa'amjäya'ay hänäjty tøø yajmøcpøcy. ³Mänit Jesús hajxy jim̄ wyiimbejty maa ja'a tunguhduumän møødä jiamiødhajxy. Mänit hajxy jim̄ yhøxtaacy tunguhduum.

⁴Mäwiingomb ja'a pascuaxøø hänäjty, ja'a judfoshajxy yagjåjtäbä. ⁵Mänit Jesús wyiinheel'ppejty coo jäya'ay hänäjty may pianøcxyii. Mänit Jesús ja'a Felipe ñämaayy:

—Maa ja'a caayyøøc hajxy nbáatämät coo yø'øya'ay hajxy nyajcáayyämät nämay.

⁶Paadiä Jesús jaduhñ miänaañ, yhuuc nä'ä mädia'agyhixaamby hänäjty waambä Felipe hänäjty yhadsowa'añ. Tøø Jesús hänäjty hamdsoo wyiinmay nebiä jäya'ayhajxy hänäjty yajcaya'añii.

⁷Mänitä Felipe yhadsooyy:

—Ni mejtsmägo'x denariojuy ja'a tsajcaagy quia'a mäðøyhädät, hoy hajxy tu'lii'xyjaty cu nja móoyyäm.

⁸Andrés ja'a Jesús ja'a jiamiøød hänäjty tu'ug xiøhaty, ja'a Simón Pedro piuhya'ay. Mänitä Andrés ja'a Jesús ñämaayy:

⁹—Chadsä pigäna'c ja'a cebadatsajcaagy miøødä mägoøxcä, møødä hacx metscä. Pero

cab jaduhñ miäðøyhädät. Hix, majiäya'ay yø'øduhñ.

¹⁰Mänit Jesús miänaañ:

—Näma'aw hajxy ween hajxy yhøxta'agy.

Møj jim̄ miøøjootä. Jim̄ hajxy yhøxtaacy ja'a mägoøxmilpä ya'adiøjc-hajxy møødä to'oxiøjc-hajxy hawiing. ¹¹Mänit Jesús ja'a tsajcaagy quioondsooyy. Mänit Jesús Dios jaduhñ ñämaayy: “Dioscujú'uyäp.” Mänit Jesús ja'a jiamiøød ja'a tsajcaagy miooyy. Mänitä jiamiøød ja'a tsajcaagy hajxy tiägøøyy yajwa'xpä maa jäya'ayhajxy hänäjty yhäña'ayän. Møødä hacx hajxy yajmäwa'xøøbiä. Jaduhñtiä jäya'ayhajxy miooyyä mäduhñtiä hajxy hänäjty quiaya'añ.

¹²Coo hajxy quiaabiädøøyy, mänit Jesús ja'a jiamiøød ñämaayy:

—Yajpäðø'øg tsajcaagyquiaadiuc hajxy møødä hacxtsu'tstuc, neby hajxy jaduhñ nga'a nähguéecämät.

¹³Mänit ja'a tsajcaagyquiaadiuc hajxy cøjx yajpäðø'øgy møødä hacxtsu'tstuc. Majmetscach hajxy yaghujch ja'a tsajcaagyquiaadiuc.

¹⁴Coo jäya'ayhajxy yhiijxy nebiä Jesús ja'a tsajcaagy hänäjty tøø yajwa'añguiojjiän, mänit hajxy tiägøøyy mänaambä:

—Pues tehñ tiøyhajt, yø'øds je'e, ja'a hajxy hijty nhahíjxämbä coo hajxy hijty xñämedsáañäm nebiä Diosmädia'agy miäna'añän.

¹⁵Coo Jesús ñajuøøyy coo hänäjty nøcxy piäda'aga'añii gobiernä mädsibø'øbä, mänit jim̄ chohñnä. Mänit jim̄ ñøcxnä nidiuhñ tunjoot.

¹⁶Coo chuujøøyy, mänitä Jesús jiamiøødhajxy yhädaacy mejypia'a.

¹⁷Mänit hajxy tiägøøyy barcojooty.

Mänit hajxy tiu'ubøjcy. Jim Capernaum hajxy hänajty ñöcxa'añ mejyhawiimb. Wiingoods hänajty. Cahnä Jesús ja'a jiamiøød hänajty piadyñä. ¹⁸Mänitä poj piädø'cy møc. Mänitä mejy chajcuju cøxp. ¹⁹Mägooxkilómetro tädujkilómetro hajxy hänajty tøø ñöcxy, mänitä Jesús hajxy yhijxy coo ja'a barco hänajty tøø ñajtspaadø'oy. Yohby Jesús hänajty mejywyiing. Mänitä jiamiøødhajxy chähgøøbiøjcy.

²⁰Mänit hajxy ñämaayyá:
—Ca'a hajxy mdsähgø'oy;
Jesúshøch høøch.

²¹Mänit hajxy jiootcugøøyy. Mänitä Jesús yajtägøøyyä barcojooty. Mänitiä hajxy jim miejtsnä mejypia'a maa hajxy hänajty ñöcxiän.

²²Cujaboom, jimnä majiäya'ayhajxy hänajty mejyhawiimbnä, maa hajxy hänajty tøø yajcayijän. Ñajuøøby hajxy hänajty coo Jesús hänajty tøø quia'a møødtu'ubøgyii ja'a jiamiøødhajxy quipxy. Hijxä ja'a Jesús jiamiøødhajxy coo hajxy tiu'ubøjcy barcojooty ja'a majiäya'ayhajxy. Jagoo barco hänajty tu'ug; je'e hajxy hänajty tøø yajtu'ubøcy. ²³Mänitä barco hajxy yajmejch wiingpä, ja'a Tiberiastsohmä. Jim hajxy miedsøøyy maa jäya'ayhajxy hänajty tøø chajcaagyquiayän, mänaa Jesús ja'a Dioscujú'uyäp yequiän. ²⁴Coo ja'a majiäya'ayhajxy yhijxy coo Jesús hajxy quia'a jijän, mänit hajxy tiägøøyy barcojooty. Mänit hajxy tiu'ubøjcy Jesús høxtaabiä. Jim hajxy ñöcxy mejyhawiimb jim Capernaum.

²⁵Coo hajxy jim miejch mejyhawiimb, mänitä Jesús hajxy jim piaaty. Mänit Jesús hajxy ñämaayy:

—Wiindsøn, mänaa mmejch.

²⁶Mänit Jesús miänaañ:

—Chaads mijts tehñ tiøyhajt nnämä'awät, páadyhöch mijts hijty xyhøxta'ay coöch mijts je'e cu'uxiä nyajcaayy. Cáböch mijts je'e xmiäyajtøwa'añ tiiguiøxpøch ja'a hoy-yagjuøøñäbä coo nyajcähxø'cy.

²⁷Paady hajxy mduñ, jaduhñä cay hu'ugy hajxy mbaady. Pero chaads mijts nnämä'awät jadunajtä coo hajxy mhøxtá'awät neby hajxy mjuyhádát nebiä Dios juygathiän. Høøch mijts cuhdujt nmo'owaamby coo hajxy jaduhñ mjuyhádát. Páadyhöch mijts jaduhñ nmo'owa'añ, coöchä Dios tøø xquiuhdujtmø'oy, høøch ja'a Diosquexypä.

²⁸Mänit Jesús miäyajtøøwa:

—Neby højts ngudiúnát nebiä Dios choquiän.

²⁹Mänit Jesús yhadsooyy:

—Chojpy ja'a Dios coöch mijts ja'a nmädia'agy xmiäbøjcät, ja'aäch tøø xquiéxiäbä.

³⁰Mänitä Jesús

miäyajtøøwägumbä:

—Tii hijxtahñd hoy-yagjuøøñäbä myajcähxø'øgaamby neby højts miäch ja'a mmädia'agy jaduhñ nmäbøjcät coo miäch ja'a Dios tøø xquiexy. ³¹Ja'a hajxy hijty nhaphájtäm ndeedyhájtäm ja'a jecypia, jimä maná hajxy quiaayy maa hänajty pøn quia'a tsána'ayän. Moisés ja'a maná yajwa'añguioj. Ja'a maná, nebiä tsajcaaguiän je'e. Jiiby jaduhñ myiñ cujaay maa ja'a

Diosmädia'aguiän: “Yajcaayyä jäya'ayhajxy ja'a tsajcaagyhajpä ja'a tsajpootyptsohmbä. Dios jaduñ quejx.”

³²Mänitä Jesús yhadsooyy:

—Chaads mijts tehñ tiøyhajt nnämä'awät: Caha Mioisésä mijts ja'a tsajcaagy xyajnäguejx ja'a tsajpootyptsohmbä. Dios, je'eds hajxy je'e xyajnäguejx. Je'eds hajxy je'e xquihdujtm'owaamb coo hajxy jim mdägó'owät tsajpootyp.

³³Ja'a Dios tøø quiéxiäbä, jim tsajpootyp je'e tøø chooñ. Paady je'e yaa tøø quiäda'agy nejy mijts xquihdujtm'owät coo hajxy mjgyhádat nebiä Dios jigyhatiän.

³⁴Mänitä Jesús nãmaayyä:

—Højts yø'ø tsajcaagy móoyyäc cøjxta'axiøøbä, ja'a tsajpootyptsohmbä.

Paady hajxy jaduñ miänaañ coo hajxy quia'a wiinjuøøyy coo Jesús jaduñ ñiñänøøma hamdsoo coo je'e tøø quiexyii ja'a Dios.

³⁵Mänitä Jesús miänaañ:

—Høøch je'e, ja'a Dios tøø quiéxiäbä. Cuhdujtyéjpøch coo hajxy jim tiägó'owät tsajpootyp pønjátyhöch ja'a nmädia'agy xmiäböjçäp. Cøjxta'axiøø hajxy jim yhidät. ³⁶Pero mijts, cábøch ja'a nmädia'agy hajxy tøø xmiäböjçä, hoy hajxy tøø mja hixy coöchä hoy-yagjuøøñäbä tøø nja yajcähxø'øgy. ³⁷Pønjátyhöch ja'a nDeedy jaduñ xyajcø'øwaanø'øby, je'eächä nmädia'agy xmiäbögåanäp. Nguhbøgåambiøch hajxy je'e.

³⁸Páadyhöch tøø ndsooñ tsajpootyp coöch ngudiúnät nébiøch nDeedy xyhane'emiän, ja'aäch tøø xquiéxiäbä. Cábøch ja'a nhamdsoo

wiinmahñdy nyaghida'añ.

³⁹Cábøchä nDeedy miäna'añ coo hajxy haxøøgtuum quiá'awät, ja'aäch hajxy tøø xyajcø'øwaanø'øybä, coo ja'a xøø jumøjt jaduñ yhabéjñät. Pero jaduñ miäna'añ coöch hajxy nyajnøcxät tsajpootyp.

⁴⁰Jadúñhöch ja'a nDeedy miäna'añ coo hajxy cøjxta'axiøø jigyhádat neby jaaya'ay jigyhatiän, pønjaty jaduñ najuøøby coöchä Dios xyHuunghaty, pønjátyhöch ja'a nmädia'agy xmiäböjçäp. Je'eäch hajxy jim nyajnøcxaamby tsajpootyp coo ja'a xøø jumøjt yhabéjñät.

⁴¹Coo Jesús miädiaacpádøøyy, mänit tiägøøyyä wiingapxpéjtäbä ja'a judíoshajxy. Paadiä wyiingapxpejtä coo hänäjty tøø miäna'añ coo jim chooñ tsajpootyp.

⁴²Jaduñ hajxy ñiñãmaayyä:

—Jesús yø'øya'ay xiøhaty; José yhuung yø'ø. Nhixyhájtäm ja'a tiaj tieedy yø'ø. Høhndaacp yø'øduñ cooc tyijy jim tøø chooñ tsajpootyp.

⁴³Mänitä Jesús ja'a judíos yhojy:

—Ca'a hajxy mgapxtägoonä.

⁴⁴Pøñhöch ja'a nDeedy yajnähdijpy, je'eächä nmädia'agy xmiäbögåanäp. Je'eäch nyajnøcxaamby tsajpootyp coo ja'a xøø jumøjt yhabéjñät.

⁴⁵Jiiby jaduñ myiñ cujaay maa ja'a Diosmädia'aguiän coo Dios jäya'ay nägøxiä yajnähixø'øwa'añ. Pønjátyhöch ja'a nDeedy ja'a miädia'agy tøø xwyiinjuøøyyä tøø xyhabøjçä, jé'edshøch ja'a nmädia'agy tøø xmiäböjçä.

⁴⁶Cábøch nDeedy mänaa yhixyii jäyá'ayäm; høøch nidiuhñ tøø nhixy. Jímhöch ndsooñ Dioswiinduum. ⁴⁷Chaads

mijts teh̄m tiøyhajt nnámá'awät, pónhøch nmädia'agy xmiäbøjcäp, je'eds jugyhadaamb cøjxta'axiøø nebiä Dios jjugyhatiän.

⁴⁸Høøch hajxy jaduh̄n jim nyajtägø'øwaamby. ⁴⁹Ja'a nhaphájtäm ndeedyhájtämhajxy, ho'c hajxy je'e, hoy ja'a maná hajxy jia caayy pactuum. Ja'a maná, mäjaayejc jaduh̄n. Pero paquiä ja'a miäjaahajxy quiøjxy.

⁵⁰⁻⁵¹Høøch, páadyhøch tøø ndsooñ jim tsajpooty nébiøch jäya'ayhajxy jim nyajtägø'øwät. Jim hajxy yhida'añ cøjxta'axiøø pønjátyhøch nmädia'agy xmiäbøjcäp. Nnähdugáambiøch ja'a nni'x ja'a ngopc. Nnähho'tu'udáambiøch jäya'ayhajxy nägøxiä.

⁵²Mänitä judíoshajxy yajcapxiøøyy ja'a Jesús ja'a miädia'agy:

—Nejy, xmio'owáanäm yø'øya'ay ñi'x quiopcäda'a coo ndsú'tsämädä.

⁵³Mänitä Jesús ñämaayy ja'a judíoshajxy:

—Chaads mijts teh̄m tiøyhajt nnámá'awät, høøch ja'a Diosquexypä, cooçh mijts ja'a nni'x ja'a ngopc xquia'a tsú'tsät, cooçh mijts ja'a nnø'ty ja'a njoot xquia'a húucät, cab hajxy jim mdägø'øwät maa Dioswiinduumän.

⁵⁴Pønjátyhøch ja'a nni'x ja'a ngopc xchú'tsáp, pønjátyhøch ja'a nnø'ty ja'a njoot xyhúucäp, je'eds je'e hidaamb cøjxta'axiøø jim tsajpootyp. ⁵⁵Tsu'tsøc-høch ja'a nni'x ja'a ngopc; huucøc-høch ja'a nnø'ty ja'a njoot. ⁵⁶Pønjátyhøch ja'a nni'x ja'a ngopc xchú'tsáp, pønjátyhøch ja'a nnø'ty ja'a

njoot xyhúucäp, je'eçh jaduh̄n nnänøømby ja'a nmädiá'agyhøch hajxy xmiäbøjcäp. Je'eçh hajxy nguhdujtmø'owaamby coo hajxy yhídät cøjxta'axiøø jim tsajpootyp. Tu'ugmädiá'agyhøch hajxy nmøødhida'añ. ⁵⁷⁻⁵⁸Ja'a nDéedyhøch, ja'açh tøø xquiéxiäbä, je'eçh jaduh̄n tøø xquiuhdujtmø'oy cooçh jäya'ayhajxy jim nyajnøcxät tsajpootyp, pønjátyhøch ja'a nmädia'agy xmiäbøjcäp. Jim hajxy yhida'añ cøjxta'axiøø. Ja'a nhaphájtäm ja'a ndeedyhájtäm, ho'c hajxy je'e jequiän, hoy ja'a maná hajxy jia caayy. Pero pønjátyhøch ja'a nmädia'agy xmiäbøjcäp, cab hajxy quia'awa'añ haxøøgtuum mänaa.

⁵⁹Jaduh̄n Jesús jim miädiaacy Capernaum coo hänäjty yajnähixø'øyy tsajtøgooty maa ja'a judíos ja'a Dios hajxy hänäjty wyiingudsähgø'øyän.

⁶⁰Coo Jesús ja'a jiamioødhajxy jaduh̄n jim miädooyy, mänit hajxy näje'e miänaañ:

—Cab hajxy jaduh̄n nguhbøjcämät; tsip xex yø'ø mädia'agy jaduh̄n.

⁶¹Ñajuøøyy Jesús jaduh̄n nebiaty hajxy hänäjty miädia'aguiän. Mänit hajxy ñämaayyä:

—Nejy, cábøçhä nmädia'agy hajxy xjiøjpøgø'øwáañjä. ⁶²Cooçh mijts xyhíxät cooçh hänäjty jim nnøcxy tsajpootyp, mänítøch mijts ja'a nmädia'agy xmiäbøgaanä cooçh jim ndsooñ tsajpootyp, høøch ja'a Diosquexypä. ⁶³Ja'a mjuøhñdyhajxy, je'eds hajxy yaa xyagjugyhajp. Ja'a mni'x ja'a mgopc-hajxy, cab hajxy je'e yaa xyagjugyhaty. Cooçh mijts

ja'a nmädia'agy xmiäbójcät, mänit hajxy mdägó'owät jim tsajpootyp.

⁶⁴Pero cahnä hajxy nägøxiä mmäbøcyñä.

Paadiä Jesús jaduhñ miänaañ, ñajuøøby hänajty jaduhñ pønjaty hänajty je'e ca'a mädia'agymiäbøgaamb. Ñajuøøby hänajty je'ebä pøn hänajty yegáañäp ho'cøøc. Jäguemiä Jesús jaduhñ ñajuøøyy mänaa ja'a miägu'ughajpähajxy tiägø'oyän yajnähixøöbiä. ⁶⁵Mänit Jesús miänaangumbä:

—Páadyhöch mijts jaduhñ nnämaayy: “Pónhöch ja'a nDeedy yajnähdijpy, je'echä nmädia'agy xmiäbøgáañäp.”

⁶⁶Coo Jesús jaduhñ miädiaacpädøøyy, mänitä jiamiøødhajxy nämay wyiimbijnä. Cabä Jesús hajxy hänajty miøødwäditaañä. ⁶⁷Mänitä Jesús ja'a jiamiøød miäyajtøøyy ja'a nämajmetspähajxy:

—Nejy, xpiuhwa'adsáambøch mijtspä.

⁶⁸Mänitä Simón Pedro yhadsooyy:

—Wiindsøn, caj. Tii højts miich coo nnä'a puhwá'adsät. Miich højts je'e xyajnähixøøby neby højts jim ndägó'owät tsajpootyp.

⁶⁹Nmäbójcäp højts miichä mmädia'agy. Nñajuøøby højts coo jim tøø mdsoñ maa Diosän, coo mGristähaty, ja'a højts hijty nhahijxypä, ja'a Dios hijty quíexaambiä.

⁷⁰Mänitä Jesús yhadsooyy:

—Páadyhöch mijts tøø nwiimbij nébiøch hajxy jaduhñ xmiøødwädítät, mijts ja'a nämajmetspä. Pero xii

hajxy tu'jäya'ay mmøødä, ja'a møjcu'uwiinmahñdymøødpä.

⁷¹Ja'a Judas jaduhñ nänøøma, ja'a Simón Iscariote yhuung. Ja'a Judas, je'edsä Jesús hänajty yegaamb ho'cøøc, hoy ja'a Judas ja'a Jesús hänajty jia møødwädity møødä nämajtu'ugpähajxy.

7 Mänitä Jesús tiägøøyy cajthayohbiä jim Galilea. Cab hänajty jim wiäditaañä jim Judea, je'eguiøxpä coo ja'a judíoshajxy hänajty yhöxta'ay nebiä Jesús hajxy yaghó'ogät. ²Jadáañäp ja'a judíos xiøøhajxy hänajty coo ja'a ramada hajxy yhädiuñ. Jim hänajty jiada'añii Jerusalén. ³Mänitä Jesús ñämaayy yhuchhajxy:

—Ca'a yaa mmähmø'oy. Nøcx jim Judea. Ween ja'a mmägu'ughajpähajxy jim bā yhuug hijxpä nejy miich ja'a hoy-yagjuøøñäjatypä myajcähxø'oguiän. ⁴Myajcähxø'py miich hijty maa jäya'ay quia'a mayyän. Pero pø chojpy ja'a mjoot jaduhñ coo ja'a mmädia'agy wiädítät ja'a miichcøxpä, mänit hijxwiinduum myajcähxø'ogät majiäya'ayhagujc.

⁵Cabä Jesús ja'a miädia'agy hänajty miäbójcäxä ni ja'a yhamdsoo huchhajxy. Paady hajxy jaduhñ miänaañ. ⁶Mänitä Jesús miänaañ:

—Cahnä yhabaadyñä coöch jäya'ayhajxy nhawáañät pónhöch høøch. Pero mijts, homiänaajä hajxy jim mnøcxät Jerusalén. ⁷Caj mijts cu'ug xmiähahaty. Pero høøch, xmiähahájpyoch cu'ug. Páadyhöch hajxy xmiähahaty coöch nnägapy coo hajxy

yhaxøøgwädity. ⁸Nøcx mijts xøøhat. Cábøch nnøcxa'añ høøch. Cahnä yhabaadyñä cooč jäya'ayhajxy nhawáañät põnhøch høøch.

⁹Mänit Jesús miädiaacpädøøñä. Mänit jim jiaančh mähmøøñä jim Galilea.

¹⁰Mänit Jesús yhuchhajxy jim ñøcxy xøøhjäpä Jerusalén. Mänit Jesús jim pianøcxy hamee'ch.

¹¹Jimä judíos ja'a Jesús hajxy hánajty yhøxta'ay maa ja'a xøø hánajty jiadyijän. Jaduhñ hajxy hánajty miäna'añ:

—Maada'a tyjy je'e.

¹²Mädiáacäp ja'a Jesús hánajty ja'a majiäya'ayhajxy. Näje'e hajxy hánajty miäna'añ cooc yhojiäya'ayä. Näje'e hajxy hánajty miänaambä cooc tyjy yhaxøøgjäya'ayä, cooc tyjy hánajty wiädity cu'ugwiinhøhmbä.

¹³Pero hamee'ch hajxy hánajty miädia'agy. Hix, chähgøøby hajxy hánajty ja'a judíos wyiindsønñhajxy.

¹⁴Mägujnä xøø hánajty jiadyii, mänit Jesús tiägøøyy tsajtøgooty yajñähixøøbiä. ¹⁵Mänitä judiøshajxy jagjuøøyy, miänaañ hajxy:

—Tii yø'øya'ayäda'a coo jiaančh tehñ jiaty madiu'u y caj yhøxpøquiä.

¹⁶Mänit Jesús yhadsooyy:

—Ca'a yhøøchä nhamdsoo mädia'agy hädaa; nDéedyhøch miädia'agy hädaa jaduhñ, ja'ačh tøø xquiéxiäbä. ¹⁷Pøn jaduhñ cudiunaamb nebiä Dios miäna'añän, je'e najuø'øwaamb coo quia'a yhøøchä nhamdsoo mädia'agy hädaa, coo Diosmädia'agy hädaa. ¹⁸Pøn jioot jaduhñ tsojp coo yajcumáyät, je'edsä

yhamdsoo mädia'agy mädiaacp. Pero chójpjøch njoot coo Dios wyiingudsähgø'øwøøjät, ja'ačh tøø xquiéxiäbä. Nmøødhøch ja'a tøyhajt; cábøch nhøhnda'agy.

¹⁹Tøyhajt coo Moisés ja'a ñocy jecy jejcy, túhmäts. Jiiby jaduhñ miäna'añ ñocyjiooty coo hajxy hoy mjäya'ayhädät. Pero cab hajxy mgudiuñ. Mmänaamb hajxy jaduhñ cooč hajxy xyagho'oga'añ.

²⁰Mänitä cu'ug yhadsooyy: —Nej, mguhmäñøøbiä coo jaduhñ mmäna'añ coo højts miičh nyagho'oga'añ. Pøndsän miičh xyagho'ogaamb.

²¹Mänitä Jesús miänáangumbä: —Tähøoc-høch ja'a hoybä tøø nduñ ja'a poo'xxiøøjooty; mänit hajxy myagjuøøyy nägøxiä. Mmänaamb hajxy jaduhñ coo hajxy tii nga'a túunämät ja'a poo'xxiøøjooty; paady hajxy myagjuøøyy. ²²Moisés ja'a cuhdujt jecy jecy coo hajxy mnicircuncidarhadøøjät. (Ca'a Mioisésä yajtsohndaac; yhaphjäpä tieedyhjäpähajxy jecy yajtsohndaac.) Paadiä mhuung hajxy mcircuncidarhaty hoy jia poo'xxiøøjootiä. ²³Mgudiumby hajxy jaduhñ nebiä Moisés ja'a cuhdujt jecy jejquiän; pero mjootma'p hajxy coöchä jäya'ay tøø nyajmøcpøcy ja'a poo'xxiøøjooty. ²⁴Cabä jäya'ay hajxy paquiä mwiinmahñdyhíxät nebiä wyiinmahñdy je'e. Coø jejcy mmøødhídät, mänitäs ja'a wyiinmahñdy je'e mhíjxät. Coöchä pa'amjäya'ay tøø nyajmøcpøcy ja'a poo'xxiøøjooty, paady hajxy jaduhñ mmäna'añ cógøch tyjy ja'a haxøøgwiinmahñdy nmøødä.

Mmänaamb hajxy jaduhñ coo tii nga'a túunämät ja'a poo'xxiøøjooty. Pero Dios mänaamb coo yhahixø'øy coo hajxy ndúunämät.

²⁵Mänitá Jerusaléngpä jáya'ayhajxy näje'e tiägøøyy mänaambä:

—Yø'øds hajxy yhøxtaaby coo hajxy yagho'oga'añ. ²⁶Xiidsä quiapxy majiäya'ayhaguyc, y caj waamb ñäma'ayii. Nej, mänaamb højts nwiindsønhtämhajxiäda'a coo yø'ø Miesíasä, ja'a hajxy nhahíjxämbä. ²⁷Nnajuøøyyäm hajxy maa yø'øya'ay chooñ. Pero ja'a Mesías, ja'a gobiernähadaambä, cab hánajty yajnajuø'øwa'añ maa hánajty chooñ.

²⁸Jiibiä Jesús hánajty yajnähixø'øy tsajtøgooty. Coo jaduhñ miädooy waambaty hajxy hánajty miäna'añ, mänitá møc miänaañ:

—Xyhíxyhájpøch hajxy. Mnajuøøby hajxy maaçh ndsooñ. Pero ca'a yhøøchä hamdsoo tøø nwiinmay cooçh yaa ngädá'agät. Ja'a nDéedyhøch tøø xquiexy. Pero cab hajxy mnajuø'øy. ²⁹Nhíxyhøch je'e. Jímhøch ndsooñ. Je'eçh jaduhñ tøø xquiexy.

³⁰Coo Jesús jaduhñ miänaañ, mänitá jia madsaanä. Pero caj ñä'a yajmajch. Cajnä hánajty yhabaadyñä coo Jesús yagho'ogøøjät. ³¹Hoy ja'a Jesús hánajty jia madsa'añii, nämay ja'a Jesús ja'a miädia'agy hánajty miäböjçäxä. Mänit hajxy miänaañ:

—Coo ja'a Mesías jaduhñ miédsät, ja'a hajxy nhahíjxämbä, nej, maas hoy-yagjuøøñajaty ja'a Mesíasäda'a

yajçähxø'øga'añ quejee nej yø'øya'ay jaduhñ yajçähxø'øguiän.

³²Mänitá fariseoshajxy jaduhñ miädoyhajty waambaty Jesús hánajty miädia'agyii. Mänitá policíahajxy quiejxä coo Jesús hajxy miädsät. Ja'a fariseoshajxy jaduhñ mäguejx møødä teedywiindsønhtajxy. ³³Mänitá Jesús miänaañ:

—Cábøch mijts jejcy nmøødhidaañä. Nøcxaannäbøch maaçhä ndsohñän. ³⁴Xjia høxta'awáambøch hajxy, pero cábøch hajxy xpiaada'añ. Cab hajxy jim hoy mnøcxät maaçh nhida'añän.

³⁵Mänitá judíoshajxy ñiñämaayyä:

—Maa yø'øya'ayäda'a ñøcxa'añ coo hajxy jaduhñ nga'a páatämät. Nej, nøcxaambäda'a jim maa ja'a judíoshajxy wa'xyjaty çhänä'ayän maa ja'a hajxy ca'a Israelpähajpän, coo Diosmädia'agy yajnähixø'øwät ja'a hajxy ca'a judíoshajpä. ³⁶Tiida'a tyijy coo miäna'añ cooc hajxy nja høxta'awáañäm, pero cábäc hajxy nbaadääñäm, y cooc hajxy hoy nga'a nøcxämät maa yhida'añän.

³⁷Coo ja'a xøø hánajty miayaañä, ja'a mõjxøøjooty, mänitá Jesús tiänaayyø'cy. Mänitá møc miänaañ:

—Pøn tødsøøyyäp, ween yaa myiñ maaçh høøchän, ween min yhu'ugy mädyíibøch nmo'owaamby.

Jaduhñ Jesús yajnimiäbaatä nebiä mõjnøøgopcän. Mänitá miänáangumbä:

³⁸—Pønjátyhøch ja'a nmädia'agy xmiäböjçäp, je'eçhä nmädia'agy xyajwa'xtägájtšäp, nebiä Diosmädia'agy miäna'añän.

³⁹Jaduhñ Jesús miänaañ, pønjaty ja'a miädia'agy mabøgáanäp, mänitã Dioshespíritu mio'owa'añii. Cahnã Dioshespíritu hãnajty quiäda'agynã. Cahnã Jesús hãnajty yagho'ogyii; cahnã hãnajty yhoodiägachñã maa ja'a Tieediän.

⁴⁰Coo ja'a cu'ughajxy jaduhñ miädooyy nebiã Jesús hãnajty tøø miädia'aguiän, mänit hajxy näje'e miänaañ:

—Tehmñ tiøyhajt ja'a Dios ja'a quiugapxy yø'ø, ja'a Dios hijty quiexaambiã.

⁴¹Näje'e hajxy miänaambã:

—Ja'a Mesías yø'ø, ja'a gobiernähadaambã.

Pero näje'ehajxy miänaambã:

—Pero cabã Mesías jimñ choona'añ Galilea. ⁴²Jaduhñ Diosmädia'agy miäna'añ cooc ja'a Mesías ja'a David yhaphada'añ tieedyhada'añ, y cooc jimñ choona'añ Belén maa ja'a David jecy chãnaayyän.

⁴³Coo hajxy hãnajty jaduhñ miädia'agy, cab hajxy hãnajty tu'ugmädia'agy ñibiaadyii ja'a Jesúscøxpã. ⁴⁴Näje'e ja'a Jesús hajxy hãnajty jia madsa'añ, pero caj pønñ ñã'a majch.

⁴⁵Mänitã policíahajxy wyiimbijty maa ja'a teedywiindsønñhajxiän, maa ja'a fariseoshajxiän. Mänitã policíahajxy ñãmaayyã:

—Tii hajxy coo mga'a yajmejch.

⁴⁶Mänit hajxy yhadsooyy:

—Cab jaduhñ pønñ mänaa miädia'agy nej yø'øya'ay miädia'aguiän.

⁴⁷Mänitã fariseoshajxy miänaañ:

—Cab jaduhñ yhoyyã coo mijts jaduhñ tøø myajwiinhøhmbã.

⁴⁸Caj yø'øya'ay ja'a miädia'agy

miäbøjcäxã ja'a wiindsønñhajxy møødã fariseoshajxy. ⁴⁹Pero yø'ø cu'ughajxy, cabã jecyquihdujt hajxy jiaty. Ween hajxy chaächpøcy.

⁵⁰Jimã Nicodemo hãnajty, ja'a Jesús hãnajty tøø ñähóyyãbã. Fariseohajp hãnajty je'ebã. Mänitã Nicodemo miänaañ:

⁵¹—Cab højts nguhdujthãjtãm jaduhñ myiñãm coo jäya'ay nyajcumädóowãmät coo hãnajty tøø nga'a mädia'agymiädóowãm jayøjp.

⁵²Mänitã Nicodemo wyiinwohñã ñãmaayyã:

—Jaduhñ miich mbamädiaacpä nebiã Galileabã jäya'ayhajxy miädia'aguiän. Huuc tehñ yajmädia'ag ja'a Diosmädia'agy. Cab jaduhñ jiiby maa myiñ coo ja'a Dios ja'a quiugapxy jimñ choona'añ Galilea.

⁵³Mänit hajxy ñøcxnã maa ja'a tiøjc-hajxiän.

8 Mänitã Jesús jimñ ñøcxy maa ja'a tunñ jaduhñ xiøhatiän Olivos. ²Cujaboom jopyjiajjø'øgyñã, mänitã Jesús ñøcxy maa ja'a tsajtøjcän. Mänitã Jesús ja'a cu'ug ñãmejtsã. Mänitã Jesús yhänaaguiädaacy, tiägøoyy yajñähixøøbiã. ³Mänitã to'oxiøjc tu'ug yajmejtsã maa Jesúsän. Ja'a cuhdujtyajñähixøøbiãhajxy mäyajmejts møødã fariseoshajxy. Paadiã to'oxiøjc hãnajty tøø miächii coo hãnajty tøø tiu'uma'ady tøø tiu'udägoy. Mänitã to'oxiøjc jimñ yajñøcxã maa ja'a cu'ughagujcän. ⁴Mänitã cu'ug ja'a Jesús hajxy ñãmaayy:

—Wiindsønñ, paady hädaa to'oxiøjc tøø miächii coo tøø piadyii

wiingya'adiøjmøød. ⁵Jiiby maa ja'a Diosmädia'aguiän, jiiä Moisés hajxy xyhanéhäm coo ja'a to'oxiøjc jaduħmbä hajxy nguhgá'tsämät. Míičhäts, waamb miič mmánaambä.

⁶Paady hajxy jaduħn yajtøøyy, coo hajxy hánajty miädowa'añ øø tu'ugmädia'agy ja'a Jesús hánajty møødä Diosmädia'agy. Yhøxtaaby hajxy hánajty nebiä Jesús hajxy ñähwaambédät coo häxøpy quia'a tu'ugmädia'aguiä. Pero cabä Jesús waamb yhadsooyy. Mänitä Jesús ñaaxcooyy. Mänitä tiägøøyy jahbiä cø'øhaam naaxwiin. ⁷Mänitä Jesús jaduħn miäyajtøøwägumbä. Mänit yhänaaguiugøøyy. Mänit miänaañ: —Pønä pojpä cädieey ca'a møød, ween quia'tstsoñ.

⁸Mänitä Jesús ñaaxcøogumbä. Mänit tiägøøguiumbä jahbiä naaxwiin. ⁹Coo hajxy jaduħn miädooyy nebiä Jesús hánajty tøø miäna'añän, mänit hajxy je'e tiu'ubøjnä hanidiuhmjaty. Ja'a mõjpä, je'e jawyiin tehñ tiu'ubøjtsohn. Niñajuøøyyä hajxy hamdsoo coo ja'a pojpä cädieey hajxy hánajty miøødä, paady hajxy tiu'ubøjcy. Mänämetscä Jesús ja'a to'oxiøjc miøødmähmøøyy. Jimä to'oxiøjc hánajty tiäna'ay Jesús ja'a wyiinduum. ¹⁰Mänitä Jesús yhänaaguiugøøyy. Mänitä Jesús ja'a to'oxiøjc ñämaayy:

—Maa jaaya'ayhajxy, ja'a hajxy hijty xquiuhga'adsaambä. Nej, caj pøn tøø xñä'a cuhga'ačhä.

¹¹Mänitä to'oxiøjc yhadsooyy: —Wiindsøn, caj.

Mänitä Jesús miänaañ: —Ni høøch jaduħn nga'a mänaambä coo miič

myajcuhgá'adsät. Nøcx; cab jaduħn häxøøg mjatcøøñät.

¹²Mänitä Jesús miänaangumbä: —Jaduħn mäwfiinhøch nyajnimiäbaadyii nebiä jøønän coočhä jäya'ayhajxy nyajñähixø'øy ja'a tu'u hoybä. Pønjaty ja'a nmädia'agy xpianøcxáanäp, cab jaduħn wiädita'añ hagoonstuum. Cøjxta'axiøø jim yhida'añ tsajpootyp.

¹³Mänitä fariseos ja'a Jesús hajxy ñämaayy:

—Hamdsoo miič mniñänømyii. Pero caj miič mnä'a tømiädia'agy.

¹⁴Mänitä Jesús yhadsooyy: —Tømiädiáacpøch, hóyhøch hamdsoo nja niñänømyii.

Nnajuøøbiøch maač ndsooñ maač nnøxy. Pero mijts, cab hajxy mnajuø'øy. ¹⁵Nä'a nägøobøch mijts xñä'a nähwaambety. Pero høøchä, cábøch jäya'ay nä'a nägoobä nnähwaambety. ¹⁶Tøyhájhøch nnä'ägädä mädia'agy. Ca'a yhøøchä nhamdsoo mädia'agy hädaa; ja'a nDéedyhøchä miädia'agy hädaa, ja'ačh tøø xquiexiäbä.

¹⁷Miimb jaduħn cujaay maa ja'a Diosmädia'aguiän, coo jäya'ayhajxy tiu'ugmädia'aguiä nämetscä, pues tøyhajt hajxy jaduħn jeypy.

¹⁸Pues højts, tu'ugmädia'agy højts mõødhøch nDeedy cooč je'e tøø xquiexy.

¹⁹Mänitä fariseoshajxy miänaañ: —Maa mDeedy.

Mänitä Jesús yhadsooyy: —Cábøch mijts xñajuø'øy; ni ja'a nDéedyhøch hajxy xquia'a najuøøyyä. Coočh mijts häxøpy xñajuø'øy, xñajuøøyyäbøch ja'a nDeedy hajxy häxøpy.

²⁰Yajnáhixøøguiujc ja'a Jesús jaduhñ miánaañ jii by tsajtøgooty, jii by mädøyyä maa ja'a cajän maa ja'a xädø'ñ hajxy hänäjty yajnáhgäda'aguiän. Pero cabä Jesús hänäjty pøn miadsa'añii, hoy hänäjty jia mädia'agy cu'ughagujc. Cahnä hänäjty yhabaady coo je'e miadsøjät.

²¹Mänitä Jesús miánaangumbä: —Nøcxáannøbøch høøch. Xjia høxta'awáambøch mijts, pero cábøch hajxy xpiaada'añ. Cab hajxy hoy mnøcxät maaçh nnøcxa'añän. Coo hajxy mho'oga'añ, jii by hajxy mga'awa'añ haxøøgtuum.

²²Mänitä judiøshajxy ñiñämaayyä:

—Nej, hamdsooda'a ñiyagho'oga'añii, coo hajxy jaduhñ nga'a nõcxämät maa ñøcxä'añän.

²³Mänitä Jesús miánaañ:

—Yaa mijts mdsooñ, hädaa yaabä naaxwiin. Pero høøch, tsajpóotypøch ndsooñ, ca'a yaajä.

²⁴Tøøch mijts jaduhñ nnäma'ay, coo hajxy hänäjty tøø mho'ogy, cahnä mbojpa mgädieey hajxy hänäjty xñähwa'açhñä. Cabä mbojpa mgädieey hajxy xñähwa'adsa'añ cooçhä nmädia'agy hajxy xquia'a mäbøjcät pøn høch høøch.

²⁵Mänitä Jesús hajxy miäyajtøoyy:

—Pønäsän miiçh.

Mänitä Jesús yhadsooyy:

—Tøøch mijts nja hawáañäm pøn høch høøch. ²⁶Madiú'ujøch nnägápxät coo hajxy haxøøg mjäya'ayhaty. Cábøch mijts ja'a nmädia'agy xmiäbøjcä. Nhawáañäm mijts jaduhñ nebiátyhøch jaaya'ay tøø

xñajtscapxøøyyän, ja'açh tøø xquiéxiäbä.

²⁷Pero cab hajxy wyiinjuøøyy coo Jesús ja'a Tieedy jaduhñ ñägäpxy.

²⁸Mänitä Jesús miánaañ:

—Cooçh mijts hänäjty tøø xmiøjpahbety, mänit hajxy mnajuø'øwa'añ pøn høch høøch, y cooçhä nhamdsoo cuhdujt nga'a yajtuñ. Pero jaduhñ nhawáañäm nebiátyhøch ja'a nDeedy tøø xyajnáhixø'øy. ²⁹Xmiøødwädíjpøch je'e, ja'açh tøø xquiéxiäbä.

Cábøch nidiuhñ tøø xñähgue'egy je'leguiøxpä cooçh homiánaajä ngudiuhñ nébiøch tøø xyhane'emiän.

³⁰Coo ja'a Jesús jaduhñ miädiaacy, mänitä miädia'agy miäbøjcäxä nämay.

³¹Mänitä Jesús ñämaayy ja'a judiøshajxy, ja'a Jesús ja'a miädia'agy hajxy hänäjty tøø miäbøjcäbä:

—Cooçh mijts ja'a nmädia'agy xquiudiúunät homiánaajä, mänitøch mijts hamuumdu'joot xmiøødwädítät. ³²Jaduhñdsä tøyhajt hajxy mmøødhädät cooçh ja'a Dios tøø xquiexy. Jaduhñdsä mhaxøøgwiinmahñdy hajxy mnajtshixø'øwät, nebiä møjcu'ugong hajxy jaduhñ xquia'a hané'emät.

³³Mänitä judiøshajxy yhadsooyy:

—Abraham højts hijty nhaphajpy ndeedyhajpy. Cab højts pøn xyhane'emy. Tii jaduhñ coo mmána'añ coo højts ja'a møjcu'ugong xquia'a hané'emät.

³⁴Mänitä Jesús yhadsooyy:

—Chaads mijts tehñ tiøyhajt nnämä'awät, pøn jaty ja'a pojpa cädieey jaduhñ møød, møjcu'ugong

jaduhñ hanehmb. ³⁵Ja'a moonsähajxy, cab hajxy jim yhity cøjxta'axiøø maa hajxy quiuduñän. Pero ja'a cumoonsä yhuungä, je'eds jim nä'ägä hijp maa ja'a tiøjcän. ³⁶Høøch, nbuhbédäbøch mijts jaduhñ nebiä mhaxøøgwiinmahñdy hajxy mnajtshixø'øwät, nebiä møjcu'ugong hajxy jaduhñ xquia'a hané'emät. ³⁷Nnajuøøbiøch jaduhñ coo Abraham hajxy hijty mhaphaty mdeedyhaty. Pero xyagho'ogáambøch mijts, je'eguiøxpä coo hajxy tu'joot mga'a tuna'añ nébiøch mijts nja nämä'ayän. ³⁸Nmädiácypioch nébiøch ja'a nDeedy tøø xyajmøødmädia'aguiän. Pero mijts, jaduhñ mijts mjäya'ayhaty nebiä mdeedy yaa jäya'ayhatiän hädaa yaabä naaxwiin, nebiä cu'ug yhane'emiän.

³⁹Mänit hajxy yhadsooyy:
—Abraham højts hijty nhaphajpy ndeedyhajpy.

Mänitä Jesús miänaañ:
—Pø tøyhajt ja'a Abraham hajxy hijty mhaphaty mdeedyhaty, jaduhñ hajxy mjäya'ayhájpat nebiä Abraham jecy jäya'ayhajtjän.

⁴⁰Pero xyagho'ogáambøch mijts, hóyhøch mijts ja'a tøyhajt tøø nja yajmøødmädia'agy, mädyíibøch ja'a Dios tøø xyajmøødmädia'agy. Cábøchä Abraham häxøpy xyagho'oga'añ. Caj mijts mjäya'ayhaty nebiä Abraham jecy jäya'ayhajtjän. ⁴¹Jaduhñ mijts mjäya'ayhaty nebiä mdeedyhajxy jäya'ayhatiän.

Mänitä Jesús ñämaayyä:
—Tøyhajt højts ja'a Abraham hijty nhaphaty ndeedyhaty. Jaduhñ højts

njäya'ayhaty nebiä Abraham jecy jäya'ayhajtjän. Tu'ug højts nDeedy; Dios je'e.

⁴²Mänitä Jesús miänaañ:

—Coo Dios hajxy häxøpy tøyhajt mDeedyhaty, xchøjpøch mijts häxøpy yaabä. Jímhøch tøø ndsooñ maa Diosän; pero yaaçh nhijnä hädaa yaabä naaxwiin. Ca'a yhamdsoo jóothøch yaa tøø ngäda'agy. Diøshøch xquiejx. ⁴³Xiøøbøch yaa nja mädia'agy; cábøch mijts ja'a nmädia'agy xñä'ä cudiunaanä. ⁴⁴Ja'a møjcu'ugong hajxy mdeedyhajpy. Jaduhñ hajxy mjäya'ayhaty nebiä mdeedy jäya'ayhatiän. Mänit je'e tiägøyy jäya'ay-yagho'pä mänaabä naaxwiin yhawijy tiøø'xta'aguiän. Cabä tiømiädia'agy. Cabä hädaa yaabä naaxwiin hoy jäya'ayhaty. Høhñdaacp je'e; jaduhñ ñä'ägä cuhdujthaty. Jaduhñ jäya'ayhajxy yaa yajnähixø'øyii ja'a møjcu'uwiinmahñdy. ⁴⁵Pero høøch, cooçh mijts ja'a tøyhajt nyajmøødmädia'agy, cábøch nmädia'agy hajxy xmiäbøjcä. ⁴⁶Hopiønä ñajuø'øy cooçhä pojpä cädieey nga'a møødä. Jaduhñ hajxy mnajuø'øwät cooçhä tøyhajt nmädia'agy. ⁴⁷Ja'a Dios ja'a yhuungä, miädóowäp je'e ja'a Dios ja'a miädia'agy. Pero mijtsä, caj mijts Dios xyhuunghaty; paadiä Dios miädia'agy hajxy mga'a mädowaanä.

⁴⁸Mänitä Jesús ñämaayyä ja'a judiøshajxy:

—Nej, cab jaduhñ tiøyyä coo jim mdsooñ Samaria, coo møjcu'ugong tøø xyajtägø'øyä.

⁴⁹Mänitä Jesús yhadsooyy:

—Cábøçhä møjcu'ugong tøø xyajtägø'øy. Nwiinguhdsähgøøbiøch ja'a nDeedy. Pero cábøch mijts xwyiingudsähgø'øy. ⁵⁰Cábøch hamdsoo nmäna'añ cooçh hajxy xwyiingudsähgø'øwät. Ja'a nDéedyhøch jaduñ mänaamb. Yajcumädowaamb by je'e pøn'høch haxøøg xñänøømb. ⁵¹Chaads mijts tehñ tiøyhajt nnämá'awät, cooçhä nmädia'agy pøn xmiäbøjcät, ni mänaa quia'a hó'ogät.

⁵²Mänitä judiøshajxy yhadsooyy:

—Hoora sí, tøø højts nnajuø'øy coo møjcu'ugong tøø xyajtägø'øy. Tøø ja'a Abraham yho'ogy møødä Dios ja'a quiugapxyhajxy. Pero miich mänaamb coo mmädia'agy pøn xmiäbøjcät, ni mänaa quia'a hó'ogät. ⁵³Nej, maas møc miichä cuhdujt mmøødä quejee ja'a Abraham jecy miøødhajty, ja'a hajxy hijty nhaphájtäm ndeedyhájtämbä. Tøø je'e yho'ogy. Jaduhñ ja'a Dios ja'a quiugapxyhajxy tøø yho'pä. Pøn tyijy miich coo jaduñ mniñänømyii.

⁵⁴Mänitä Jesús yhadsooyy:

—Cab jaduñ yahixø'øy cooçh hamdsoo nniguiumayøøjät. Pero Diøshøch xquiumaaby, ja'a tyijy mijts mDiøshajpy. ⁵⁵Cáhnøch nDeedy hajxy xñajuøøyyä. Pero høøçh, nhixyhøch høøçh. Cooçh nmäná'anät cooçh nga'a hixiä, hønðä'agäbøch jaduñ nej mijts mhønðä'aguiän. Pero nhixyhøch høøçh. Nmäbøjcäbøch ja'a miädia'agy je'e. ⁵⁶Ja'a Abraham, ja'a hajxy jecy nhaphájtäm ja'a ndeedyhájtämbä, xoonðacp je'e hijty cooçh hänajty xyhixa'añ mänájøch hänajty nhida'añän

hädaa yaabä naaxwiin. Tøøçh je'e xjiaançh hixy. Mänit jiaançh xoonðacy.

⁵⁷Mänitä Jesús ñämaayyä ja'a judiøshajxy:

—Je'enä jaduñ mdsaanä. Nej, tøø ja'a Abraham mhixiä.

⁵⁸Mänitä Jesús yhadsooyy:

—Chaads mijts tehñ tiøyhajt nnämá'awät, jiiyyämøch hänajty; cahnä Abraham hänajty jiinä.

⁵⁹Mänitä tsaahajxy

quionø'cy; Jesús hajxy hänajty quiuhga'adsaamby. Pero tøø ja'a Jesús hänajty ñiguiu'üchii. Mänit piädsøømnä tsajtøgooty.

9 Jimä Jesús hänajty ñaxy.

Mänitä wiindspä tu'ug yhiixy. Jaduhñä mähdiøjc ñä'ägä maaxhuunghajty wiinma'ad.

²Mänitä Jesús ñämaayyä ja'a jiamioødhajxy:

—Wiindsøn, tii yø'øya'ay wyiinäda'a coo mia'adä. Pønä pojpa cädieeyäda'a tøø tiuñ, yø'øya'ayä, tøgä tiaj tieediä.

³Mänitä Jesús yhadsooyy:

—Ni pøn. Paady yø'øya'ay wyiin mia'adä nebiä Dios ja'a miäjaa jaduñ quiähxø'ogät maa yø'øya'aguiøxpän. ⁴Tsøc Diostuunğ hajxy túunäm, ja'açh tøø xquiëxiäbä, mäduhñtiä jugyhajt hajxy nmøødhájtäm. Coo hajxy nhó'cänät, cab hajxy jaduñ mänaa ndúunänät. ⁵Cooçh yaa nhity hädaa yaabä naaxwiin, nyajcähxø'piøch jäya'ay piojpa quiädieeyhajxy.

⁶Mänitä Jesús ñajtsujøøyy naaxwiin. Mänitä chujy yajmo'ondscojy. Mänitä pyiinø'cy. Mänitä wiindspä yajwiingupiinøøyy ja'a chujy, ja'a hänajty tøø

mio'ondscójjíabä. ⁷Mänitä Jesús ja'a wiindspä ñämaayy:

—Nøcx niwiiimbujøø maa ja'a tsiidaact jaduñ xiøhatiän Siloé — je'e jaduñ ñänøømbby, Quexy.

Mänitä wiindspä hoy jiaanč niwiiimbujyii. Coö wyiimbijnä, tøø hänäjty wyiindøø'xø'nä. ⁸Mänitä mähdiøjc yhiixä ja'a miädøjc-hajxy møødä hajxy hijty yhiixypä coö hänäjty xiädøøñyujwa'añ. Mänitä hajxy miänaañ:

—Nej, caj jie'e yø'øjä, ja'a hijty naxy xädøøñyujwaambä häña'a.

⁹Näje'e hajxy hänäjty miäna'añ:

—Jaanč je'e yø'ø.

Näje'e hajxy hänäjty miäna'añ:

—Ca'a jie'ejä; pero tehñ jiaduñ quiahxø'øgy.

Pero ja'a mähdiøjc, hamdsoo hänäjty ñiñänømyii:

—Høøch je'e hijty wiinds.

¹⁰Mänitä miäyajtøøwa:

—Nejy mwiindøø'xø'cy.

¹¹Mänit yhadsooyy:

—Jaaya'ay ja'a Jesúshajpä, jaaya'ay ja'a chujy yajmo'ondscoj. Mänitøch xyajwiingubiinøoyy. Mänitøch xñämaayy coöch nøcx nniwiiimbujyii maa ja'a tsiidaact jaduñ xiøhatiän Siloé. Mänitøch hoy njaanč niwiiimbujyii.

Mänitøch nwiindøø'xø'cy.

¹²Mänitä miäyajtøøwägumbä:

—Maa jaaya'ayäda'a.

Mänit yhadsooyy:

—Pämáadädä.

¹³Mänitä mähdiøjc yajnøcxä maa ja'a fariseos wyiinduuhajxiän, ja'a hänäjty tøø wyiindøø'xø'øguiäbä.

¹⁴Poo'xxiøøjooty ja'a Jesús

ja'a chujy yajmo'ondscoj, yajwiindøø'xø'cy ja'a

wiindspä. ¹⁵Mänitä mähdiøjc miäyajtøøwägumbä ja'a fariseoshajxy:

—Nejy mwiindøø'xø'cy.

Mänit yhadsooyy:

—Chujy jaaya'ay yajmo'ondscoj; je'ečh je'e xyajwiingubiinøoyy. Mänitøch hoy nniwiiimbujyii. Mänitøch nwiindøø'xø'nä.

¹⁶Mänitä fariseoshajxy näje'e miänaañ:

—Ca'a yø'øya'ay Dyiosquexiä.

Tuumb yø'øduñ poo'xxiøøjooty. Cabä cuhdujt miøødä coö jaduñ tiünät poo'xxiøøjooty.

Pero näje'e hajxy hänäjty miäna'añ:

—Pero nebiä cuboj

cugädieejäya'ay ja'a

hoy-yagjuøøñäjatypä jaduñ ñä'a yajcähxø'øgät.

Cab hajxy hänäjty tu'ugmädia'agy ñibiaadyii. ¹⁷Mänitä mähdiøjc ñämaayy, ja'a hänäjty tøø wyiindøø'xø'øguiäbä:

—Míichäts, waamb

míich mmäna'añ. Nejy

yø'øya'ay mnänøømy, ja'a tøø

xyaghijxø'øguiäbä.

Mänit yhadsooyy:

—Dios je'e tøø quiexy.

¹⁸Cabä judíoshajxy hänäjty miäbøga'añ coö jaaya'ay hijty wyiindsä, coö jaaya'ay hijty tøø wyiindøø'xø'øgy. Paady hajxy miøjyaaxy jaaya'ay tiaj tieedy.

¹⁹Mänit hajxy miäyajtøøwa:

—Nej, mijts ja'a mhuung yø'ø, ja'a hajxy mnänøømbiä coö hijty wiinds tøø miaaxhuunghatiä. Nebiäda'a tøø yhiixø'øgy.

²⁰Mänitä tiaj tieedyhajxy yhadsooyy:

—Højts nhuung jaančh yø'ø.
 Wiinds jiaančh maaxhuunghajty.
²¹ Pero cab højts nnajuø'øy nejy
 tøø yhijxø'øgy o pøn jaduhñ tøø
 yaghijxø'øgy. Yø'ø hajxy mäyajtøw.
 Møj yø'øjän. Ween hamdsoo
 ñägäpxy.

²² Paady hajxy jaduhñ miänaañ,
 coo ja'a teedywiindsøn hajxy
 hänajty chähgø'øy. Tøø ja'a
 teedywiindsøn hajxy hänajty
 quiojyquiapxyhaty coo hajxy
 hänajty yajpädsøma'añ tsajtøgooty
 pøn jaduhñ mäna'anaamb cooc
 Jesús Miesíashaty. Nägooyä hajxy
 hänajty yajtøjpädsøma'añ, cab
 hajxy hänajty yajtøjtägø'owaannä
 tsajtøgooty. ²³ Paady jaaya'ay tiaj
 tieedyhajxy miänaañ: “Yø'ø hajxy
 mäyajtøw. Møj yø'øjän.”

²⁴ Mänitä mähdiøjc
 miøjyáaxägumbä, ja'a hänajty tøø
 yhijxø'øguiäbä. Mänitä ñämaayyä:
 —Højts tøyhajt móoyyác.
 Nnajuøøby højts coo Jesús quiuboj
 quiugädieeyä.

²⁵ Mänit yhadsooyy:
 —Cábøch nnajuø'øy pø cuboj pø
 cugädieey je'e. Pero nnajuøøbiøch
 cooçh tøø nhijxø'øgy, hóyhøch hijty
 nja wiindsä.

²⁶ Mänit ñämaayyä:

—Nej xyaghijxø'cy.

²⁷ Mänit yhadsooyy:

—Tøøds mijts nja hawáanäm.
 Pero cab hajxy mmäbøjcy. Tii
 hajxy coo mmädozáangombä. Nej,
 mbanøcxáanäp ja'a miädia'agy
 hajxypä.

²⁸ Mänit yhojjä ñämaayyä:

—Miičh jaduhñ mbanøcxäp
 ja'a miädia'agy. Højtsä, Moisés
 ja'a miädia'agy nbanøcxäp.

²⁹ Nnajuøøby højts coo Dios ja'a
 Moisés miøødmädiaacy jequiän.
 Pero jaaya'ayä, cab højts nnajuø'øy
 maa chooñ.

³⁰ Mänitä mähdiøjc yhadsooyy:

—Hoy-yagjuøøñä jaduhñ. Cab
 hajxy mnajuø'øy maa jaaya'ay
 chooñ, hóyhøch tøø xjia
 yaghijxø'øgy. ³¹ Hoy piønä jaduhñ
 ñajuø'øy coo Dios jaduhñ quia'a
 mädoowa ja'a miädia'agy ja'a
 cuboj ja'a cugädieey. Pero pøn ja'a
 Dios jaduhñ wiingudsähgøøby,
 pøn jaduhñ cudiuumb nebiä Dios
 yhane'emiän, je'e ja'a miädia'agy
 jaduhñ mädoowäxäp ja'a Diósäm.

³² Høxtahmðs ja'a naaxwiin
 yhawijy tiøø'xta'aguiän, ni mänaa
 jaduhñ quia'a yajmädoxyhaty
 coo jäya'ay yaghijxø'øgyii, ja'a
 wiinds tøø miaaxhuunghátiäbä,
 høxtä jäda'anäbaady. ³³ Coo
 jaaya'ay häxøpy quia'a Diosquexiä,
 cab jaaya'ay cu yajcähxø'cy
 hoy-yagjuøøñäbä.

³⁴ Mänitä mähdiøjc yhojjä:

—Nej, xyajnähixø'øwaamb højts
 miičhä. Pojpäuum cädieedium
 miičh tøø mmaaxhuunghaty.

Mänitä mähdiøjc je'e
 yajpädsøøma tsajtøgooty.

³⁵ Mänitä Jesús miädoxyhajty
 coo ja'a mähdiøjc hänajty tøø
 yajpädsømyii tsajtøgooty. Mänitä
 Jesús ja'a mähdiøjc yhøxtaayy.
 Mänit jiaančh paaty. Mänitä Jesús
 miänaañ:

—Nej, mmäbøjcäp ja'a miädia'agy,
 ja'a Dios tøø quiexiäbä.

³⁶ Mänitä mähdiøjc yhadsooyy:

—Wiindsøn, pøn jaduhñ
 mnänøømby. Høøçh hawáanäc
 nébiøch ja'a miädia'agy nmäbøjcät.

³⁷ Mänitá Jesús miánaañ:

—Tøø je'e mhixy. Høøch je'e.

³⁸ Mänitá mähdiojc miánaañ:

—Wiindsón, mäböjpc.

Mänitá Jesús wyiinjjcádaacá, wyiingudsähgøyyä.

³⁹ Mänitá Jesús miánaañ:

—Páadyhöch yaa tøø ngäda'agy hädaa yaabä naaxwiin neby hajxy jaduhñ yhiyxó'ögät, ja'a hajxy hijpä nebiä wiindspän; møød neby hajxy jaduhñ wyiindsó'owät, ja'a hajxy hijpä nebiä hijxpän.

⁴⁰ Jimä fariseoshajxy hänajty näje'e tiäna'ay maa Jesús hänajty mädooyän. Coö hajxy jaduhñ miädooy nebiä Jesús miánaañän, mänitá Jesús hajxy ñämaayy:

—Nej, mmänaamb miiçh jaduhñä coö højts jaduhñ nhijpä nebiä wiindspän.

⁴¹ Mänitá Jesús yhadsooyy:

—Coö hajxy häxøpy mhity nebiä wiindspän, cabä pojpä cädieey hajxy häxøpy mhixyhaty. Pero coö hajxy jaduhñ mmäna'añ coö hajxy mhity nebiä hijxpän, paadiä mbojpä ja'a mgädieey hajxy xquia'a nähwa'açhñä.

10 Mänitá Jesús miánaangombä:

—Chaads mijts tehñ tiøyhajt nnämä'awät: cabä mee'tspähajxy jiiby tiägø'owø'øyy maa ja'a meegcuraahaawän. Wiingtuum hajxy je'e tiägø'owø'øyy maa ja'a curaahaaw quia'a hitiän. ² Pero ja'a cumeeg, je'eds jiiby tägø'owøøby maa ja'a curaahaawän. ³ Yajtägøøby ja'a curaagüendähajpä ja'a cumeeg jiiby curaajooty. Coö hänajty mieegmøjya'axa'añ, mänitá mieeg quiøxy xøøguya'axy. Yo'mädooby

ja'a meeg ja'a wyiindsón hajxy. Mänitá cumeeg yhöxwoobädsømy.

⁴ Coö ja'a meeghajxy hänajty tøø piädsømy, mänitá wyiindsón hajxy cøjx piadu'ubøcy. Paady hajxy jaduhñ piadu'ubøcy coö ja'a wyiindsón hajxy yo'mädooy. ⁵ Cabä wiingjäya'ay hajxy pianøcxa'añ. Coö wiingjäya'ay hajxy yo'mädooy, cøjx hajxy chähgø'øbäyø'ogy.

⁶ Ja'a Jesús, yajmäbaadyhaam hänajty miädia'agy; pero cabä miädia'agy hänajty wyiinjuøøyyäxä.

⁷ Mänitá Jesús miánaangumbä:

—Chaads mijts tehñ tøyhajt nnämä'awät: Øøch, jaduhñ mäwíinhøch nebiä curaahaawän maa ja'a meeghajxy tiägø'owø'øyyän.

⁸ Cahnøch hänajty nmech, tøø jäya'ayhajxy hänajty may miech høhndaacpä. Jaduhñ hajxy ñibiäda'agyii nebiä Diosqueypän. Jaduhñ mäwíinäts hajxy miäbaady nebiä meegmee'tspän. Pero cabä miädia'agyhajxy miäböjçäxä.

Jaaya'ayädshajxy jaduhñ ca'a mäböjç, pønjätyhöch nmädia'agy xmiäböjçäp. Jaduhñ mäwíinäts hajxy je'e miäbaatpä nebiä meeg mädia'agymiäböjçän.

⁹ Ja'a meeghajxy, jii hajxy je'e tiägø'owø'øyy maa ja'a curaahaawän. Høøch, jaduhñ mäwíinhøch nebiä curaahaawän. Pønñhöch ja'a nmädia'agy xmiäböjçäp, je'eçh ngüeendähadaamby.

¹⁰ Ja'a hajxy jäya'awyiinhøhmbä, Diosmädiá'aguiäc tyijy hajxy je'e yajwa'xyp. Yhamdsoo copcooty ja'a mädia'agy hajxy hänajty yajpädsømy. Pero høøch, páadyhöch tøø ngäda'agy hädaa yaabä naaxwiin nebiä jäya'ayhajxy jaduhñ

jim nõcxät tsajpootyp, neby hajxy
 jaduñ jim yhidät cõjxta'axioø.
¹¹Ja'a cumeeg, cwieendähajpy ja'a
 mieeg je'e. Jaduñ mäwiinhøch
 je'e, ngüeendähadaambiøch ja'açh
 nmädia'agy hajxy xmiäbõjçäbä.
 Jaaya'ay ja'a meeg jaançh tehñ
 chojpä, høxtä nähho'tú'udäp ja'a
 mieeg. ¹²⁻¹³Ja'a moonsähajxy, cabä
 meeg hajxy tu'joot cwieendähaty.
 Paady hajxy je'e tu'joot quia'a
 cueendähaty, coo hajxy je'e quia'a
 yhamdsoo je'ejä. Mäjuy hajxy
 je'e jia cuduñ. Coo ja'a pahuc
 miech meegtsu'tspä, mänitä
 moonsähajxy piäyø'øgy. Mänitä
 meeg mähdijc-hajxy nä'ägä machii.
 Mänit hajxy chähgø'øbäyø'øgy.
¹⁴⁻¹⁵Pero høøch, jaduñ
 mäwiinhøch nebiä jäya'ay meeg
 hajxy jaançh tehñ chojpän.
 Xyhiyhájpøch ja'a nDeedy, y
 nhixyhájpøch je'ebä. Jaanä
 jaduñds je'e, jaanä nhixyhájpøch
 pønjátyhøch nmädia'agy hajxy
 xmiäbõjçäp. Nähho'tu'udáambiøch
 hajxy je'e. ¹⁶Jaanä
 xmiäbõgaañbøch ja'a nmädia'agy
 hajxy, ja'a jäya'ayhajxy tsánaabiä
 wiinghagajpt. Tu'ugmädia'agy
 hajxy yhida'añ møød hädaa
 jäya'ayhajxy yaabä. Tu'cuhdúthøch
 ja'a nmädia'agy hajxy xmiäbõgaañä
 nägøxiä.
¹⁷Páadyhøch ja'a nDeedy xchocy
 coøch jaduñ nmána'añ coøch
 häna'c ween xyagho'ogy nébiøch
 jaduñ njujypiøgät jadähooc.
¹⁸Høøch, hamdsooch nmána'añ
 coøchä jäya'ay xyagho'ogät. Coøch
 häxøpy nga'a mänaambä, cábøchä
 jäya'ay häxøpy xyagho'oga'añ.
 Nmøødhøch cuhdujt coøch

nhó'ogät; y nmøødhøch cuhdujt
 coøch njujypiøgät jadähooc.
 Páadyhøch ja'a nDeedy tøø
 xwyiinguexy coøch nhó'ogät, coøch
 njujypiøgät.

¹⁹Coo Jesús jaduñ miädiaacy,
 paadiä judíoshajxy tu'ugmädia'agy
 quia'a nibiaatä. ²⁰Mänit hajxy
 nämay miánaañ:
 —Møjcu'uda'a miøød.
 Cuhmäñøøbiäda'a jaduñ. Tii yøø
 miädia'agy hajxy coo mmädoowaanä.

²¹Mänit hajxy näje'e miánaañ:
 —Cabä møjcu'umøødpä jaduñ
 miädiá'agät. Cabä møjcu'u ja'a
 wiindspä jaduñ yaghixø'ogät.

²²Jájtäbä xøø hanaajty jim
 Jerusalén, ja'a xøhajpä ja'a
 Dedicación. Tøøchpojooty
 hanaajty. ²³Jiibiä Jesús hanaajty
 wiädity tsajtøgooty, jiiby maa
 ja'a tøjwiingän, ja'a xøhajpä
 Salomón. ²⁴Mänitä judíoshajxy jim
 yhamugøøyy maa Jesús hanaajty
 wiäditiän. Mänitä Jesús nämaayyä:
 —Mánaa højts xyhawaanaañä pø
 tøyhajt mMesíashaty.

²⁵Mänitä Jesús yhadsooyy:
 —Tøøds mijts nja hawáañäm, pero
 cab hajxy mmäbøjcy. Coøch jaduñ
 ngudiuñ nébiøch ja'a nDeedy
 tøø xyhane'emiän, cähxø'pøch
 jaduñ coøch nGristohaty. ²⁶Pero,
 coøch mijts ja'a nmädia'agy hajxy
 xquia'a panøcxä, páadyhøch
 ja'a nmädia'agy hajxy xquia'a
 mäbõgaañä. ²⁷Nhixyhájpøch
 pønñhøch ja'a nmädia'agy
 xmiäbõjçäp; je'eçh ja'a nmädia'agy
 xpianøcxäp. ²⁸Nyajnøcxáambiøch
 hajxy jim tsajpootyp. Jim hajxy
 yhida'añ cõjxta'axioø. Cáboch hajxy
 je'e pøn xpíøjçät. ²⁹Miøødhøch ja'a

nDeedy ja'a mäjaa. Cabä pøn ja'a mäjaa jaduhñ miøødä nébiøch ja'a nDeedy miøødän. Ja'a nDeedyhøch jaduhñ tøø miäna'añ cooçh jaaya'ay ja'a nmädia'agy hajxy xmiäbøjcät. Cábøch ja'a nDeedy jaaya'ayhajxy mänaa piøgáanaxä. ³⁰Høøch móødhøch ja'a nDeedy, tu'ugmädia'agy højts nhity.

³¹Mänitä judíoshajxy tiägóøguiombä tsaagonøpä. Jesús hajxy hänäjty quia'adsaamby. ³²Mänitä Jesús ja'a judíos ñämaayy: —Madiú'ujøch ja'a hoybä tøø ngudiuñ nébiøch ja'a nDeedy tøø xyhane'emiän. Tiiguiøxpøch mijts coo xquia'adsa'añ.

³³Mänit hajxy yhadsooyy: —Paady højts miiçh nga'adsa'añ coo Dios haxøøg mnänømy, coo mnibiäda'agyii nebiä Diosän; ca'a jie'eguiøxpä coo hodiung jaduhñ tøø mduñ.

³⁴Mänitä Jesús yhadsooyy: —Jiiby jaduhñ myiñ maa mijts mguhdujtän coo Dios jaduhñ miänaañ: “Mdioshajp hajxy.” ³⁵Tøyhajt ja'a Diosmädia'agy jaduhñ ñä'ägädä mädia'agy. Jaduhñ miäna'añ cooc hajxy jaduhñ dyioshaty, ja'a jäya'ayhajxy tøø wyiingpóquiäbä ja'a Diosmädia'agy.

³⁶Hoorä, Diøshøch tøø xquiunu'xy tøø xpiäda'agy. Yaaçh tøø xquiexy hädaa yaabä naaxwiin. Cábøch Dios tøø nwiingapxpety cooçh nmänaañ cooçhä Dios xyHuunghaty. Tøyhájthøch jaduhñ xyHuunghaty. ³⁷Cooçh häxøpy nga'a tuñ nébiøch ja'a nDeedy tiuñän, cábøçhä nmädia'agy hajxy häxøpy xmiäbøjcä. ³⁸Pero jaançh túumbøch jaduhñ. Mmäbøgäp hajxy

jaduhñ cooçhä Dios tøø xquiexy, hóyhøçhä nmädia'agy hajxy xquia'a ja mäbøjcä. Jaduhñds hajxy mnajuøñät coo højts tu'ugjäya'ay nhity móødhøçhä nDeedy.

³⁹Mänitä Jesús jia madsáanägumbä. Pero cabä ñä'ä yajmajch.

⁴⁰Mänitä miøjnøønájxcumbä ja'a Jordángpä møjnøøbä maa ja'a Juan miäyajnabejtsohñän. ⁴¹Mänitä Jesús hajxy ñämejch nämay. Mänit hajxy miänaañ:

—Cabä Juan ja'a hoy-yagjuøñäbäjtaty ñä'ä yajcähxø'cy. Pero tøyhajt jaduhñ cøxiä nebiä Juan yø'øya'ay tøø ñägäpxiän.

⁴²Mänitä Jesús ja'a miädia'agy hajxy jim miäbøjcä nämay.

11 Tu'ug jäya'ay hänäjty xiøhaty Lázaro. Tøø hänäjty pia'ambety. Jim hänäjty çhäna'ay Betania møødä piuhdo'oxyhajxy, ja'a María møødä Marta. ²Cahnä hänäjty yhabaady mänaa María ja'a Jesús ja'a perfume hänäjty yajtecytia'xø'øwa'añ, mänaa María ja'a Jesús hänäjty tiecymie'exa'añ ja'a quiuhwaayhaam. ³Coo Lázaro hänäjty tøø pia'ambety, mänitä piuhdo'oxy ja'a capxy hajxy quiejxy maa Jesúsän coogä Lázaro tøø pia'ambety. Jesús ja'a miägu'ughajpä hänäjty je'e. ⁴Coo Jesús ja'a mädia'agy jaduhñ miädooyy, mänit miänaañ:

—Cabä mähdijc tiehñ yho'oga'añ. Paady tøø pia'ambety neby jaduhñ quiähxø'øgät coo Dios miøjjä jiaançhä, neby jaduhñ quiähxø'øgät cooçh nmøjjä njaançhä. Diøshøch xyHuunghajp.

⁵Hoy ja'a Jesús hánajty jia jaančh teh̄m miøðdnijootpaadyii ja'a Lázaro hajxy, ⁶mejtsxøø jim̄ jiaag hijty maa hánajty ñá'ägä hitiän. ⁷Mänitá Jesús ja'a jiamiøøð ñämaayy:

—Jam̄ds hajxy jadähooc Judea.

⁸Mänitá Jesús hajxy ñämaayy:
—Wiindsón̄, cahnä jieğø'øy mänaa ja'a judíoshajxy xjia cuhga'adsa'añän. Tii jim̄ coo mnøcxtägatsa'añ.

⁹⁻¹⁰Mänitá Jesús yhadsooyy:
—Ja'a Diostuung hajxy tuumbä, coo ja'a tiuunghajxy je'e quia'a mayñä, cahnä hajxy je'e yho'oga'añ. Jaduh̄n mäwíinäts hajxy je'e nebiä xøømbä tiu'uyo'oyän. Cab hajxy je'e quiuhnepy. Hoy hajxy je'e yhixy.

¹¹Mänitá miänáangombä:
—Tøø højts nmägu'ughajpä Lázaro miaahó'cäm. Nøcxáambøch cham̄ nyuxa'añ.

¹²Mänitá jiamiøøðhajxy miänaañ:
—Pero, wiindsón̄, pø nä'ä maaho'c jaduh̄n, møcpøjtägatsaambäda'a jaduh̄n, cabä.

¹³Coo Jesús jaduh̄n miänaañ cooc Lázaro miaaho'cy, jaduh̄n hánajty miäna'anaañ cooc tøø yho'ogy. Pero cabä jiamiøøðhajxy jaduh̄n wyiinjuøøyy coo Lázaro tøø yho'ogy. Jaduh̄n hajxy wyiinjuøøyy coo tøø miaaho'ogy. ¹⁴Mänitá Jesús howyiinjuøøñä tieh̄m ñägapxnä:

—Tøø ja'a Lázaro yho'ogy.

¹⁵Xoondáacpøch jaduh̄n cooch hánajty nga'a jim̄ä. Coo hajxy jaduh̄n mhixa'añ nébiøch nduna'añän, mänitøch mijts ja'a nmädia'agy xmiaas mabøgaanä. Páadyhøch jaduh̄n nxoonda'agy. Jam̄ds hajxy jim̄ maa Lázaran.

¹⁶Tu'ugä Jesús ja'a jiamiøøð hánajty xiøhaty Tomás, ja'a hajxy hánajty ñänøømbiä hametsc-huung. Mänitá Tomás ñämaayy ja'a jiamiøøðhajxy:

—Jam̄xä Jesús hajxy møøðhó'cäm.

¹⁷Coo hajxy jim̄ miejch Betania, mänitá Jesús yhawáanäxä coo ja'a Lázaro hánajty jiiby tøø yhity mädaaxxøø jutjooty maa cabäsaantän. ¹⁸Mäwiingón̄ Betania hánajty jim̄ Jerusalén. Jaduh̄nda'a jiäguema, mejtskilómetro ja cupcäda'a.

¹⁹Nämay ja'a judíoshajxy hánajty tøø ñämech ja'a Marta møødä María. Capxmøcpøgáanäp hajxy hánajty coo ja'a piuhya'ayhajxy hánajty tøø yho'ogy. ²⁰Coo ja'a Marta jaduh̄n miädoyhajty coo Jesús hánajty miäwiingonñ, mänit hoy jiojcubaadø'øy. Pero María, jiiby miähmøøyy maa ja'a tiøgootyhajxiän. ²¹Mänitá Marta ja'a Jesús ñämaayy:

—Wiindsón̄, coo häxøpy myaajä, cábøčhä nbuhya'ay häxøpy tøø yho'ogy. ²²Nnajuøøbiøch jaduh̄n, hoytyijä Dios mmäyujwá'anät, xmió'owäp je'e.

²³Mänitá Jesús ja'a Marta ñämaayy:

—Jujypioğaambä mbuhya'ay.

²⁴Mänitá Marta miänaañ:
—Nnajuøøbiøch coo jiuujypioğa'añ coo ja'a naaxwiimbä hánajty wyiimbida'añ, coo hajxy nägøxiä njujypioğáanäm.

²⁵⁻²⁶Mänitá Jesús miänaañ:

—Nyagjujypioğáambiøch hajxy je'e pønjátyhøch ja'a nmädia'agy xmiäbøjcäp. Nyajnøcxáambiøch hajxy je'e jim̄ tsajpootyp, hoy

hajxy hánajty jia jujcyñä, hoy hajxy hánajty tøø jia ho'ogy. Nejy, mmäbøjpy jaduhñä.

²⁷Mänitä Marta miänaañ:

—Wiindsón, nmäbøjpiøch coo miich ja'a Dios xyHuunghaty, coo mMesíashaty, coo miich ja'a Dios tøø xquiexy hädaa yaabä naaxwiin.

²⁸Mänitä Marta ja'a piuhdo'oxy hamee'ch hoy ñäma'ay:

—Tøø ja'a nWiindsónhajtäm miejtsäm. Miičh xyajtøøb.

²⁹Coo ja'a María miädooyy, mänitiä tiänaayyø'cy. Mänitä María ja'a Jesús ñänøxy. ³⁰Jimä Jesús hánajty tøø miähmø'øy maa ja'a Marta hánajty hoy tøø miøødmädia'aguiän. Cahnä Jesús hánajty quiajptägø'øy. ³¹Ja'a judíoshajxy hánajty jiiby maa ja'a María tiøgootyhajxiän, coo hajxy yhiyx coo María tiänaayyø'cy, coo tiøjpadšøømy, mänitä María hajxy piadøjpadšøømy. Jim tyijy María hánajty ñøxy cabäsaantä jøøbiä xuu'tspä.

³²Coo ja'a María jim miejch maa ja'a Jesús hánajty tøø miähmø'øyän, mänitä Jesús yhiyx. Mänitä María ja'a Jesús wyiinjiicädaacy. Mänitä María miänaañ:

—Wiindsón, coo miich häxøpy myaajä, cábøchä nbuhy'a'ay häxøpy tøø yho'ogy.

³³Coo Jesús jaduhñ yhiyx coo María hánajty jiø'øy møødä judíoshajxy, ja'a hánajty tøø piamečhíjábä, mänitä Jesús jiootmabiøjcy. ³⁴Mänit miänaañ:

—Maa hajxy tøø myajnaaxtägø'øy.

Mänitä Jesús ñämaayyä:

—Wiindsón, jam nyajñähixø'øy.

³⁵Mänitä Jesús jiøøyy. ³⁶Mänitä judíoshajxy miänaañ:

—Høxtahmðs jiø'øy coo Lázaro hijty jiaančh tehñ miøødnijiootpaadyii.

³⁷Mänit hajxy näje'e miänaañ:

—Tisän yø'øya'ay ja'a Lázaro coo quia'a yajmøcpøjcy. Tøø yø'øya'ay ja'a wiindspä yaghijxø'ogy, túhmäts.

³⁸Mänitä Jesús jiootmabiøjcombä. Mänit jim ñøxy maa ja'a naaxjutän maa ja'a Lázaro hánajty tøø ñaaxtägø'øyän. Jimä tsaa ja'a jut hánajty yhadäguéc-haty. ³⁹Mänitä Jesús ñämaayy ja'a hajxy hánajty jim tänaabiä juthaguum:

—Hadäguejtu'ud yøø jut hajxy.

Jimä cuhäyohnd hánajty tiänaabiä, ja'a Martahajpä. Mänitä Marta ja'a Jesús ñämaayy:

—Wiindsón, pero mädaaxxøø jiiby tøø yhity jutjooty.

Haxøøgxuu'päda'a yø'øjän.

⁴⁰Mänitä Jesús ja'a Marta ñämaayy:

—Tøøch miičh nhawáanäm, coo mmäbøgät, mänit mhíxät coo Dios miøjjä jiaančh.

⁴¹Mänitä jut hajxy jiaančh yhadäguejtuuty. Mänitä Jesús chajhee'py. Mänit miänaañ:

—Teedy, Dioscujú'uyäp cooçh miičh ja'a nmädia'agy tøø xmiädoowa. ⁴²Nnajuøøbiøch jaduhñ cooçh miičh ja'a nmädia'agy hoymiänaajä xmiädoowa. Páadyhöch miičh tøø nnäma'ay “Dioscujú'uyäp” neby hajxy miäbøgät cooçh miičh tøø xquiexy, yø'øya'ayhajxy xii tänaabiä.

⁴³Mänitä Jesús møc yaaxy:

—iLázaro, pädsómäts!

⁴⁴Mänitä Lázaro jiaančh pädsøømy, ja'a hānajty tøø yhó'oguiäbä. Nähbity nähmoch piädsøømy. Mänitä Jesús nāmaayy ja'a hajxy hānajty jim tanaabiä:

—Nāhbijtu'ud yø'ø hajxy. Ween ñøcxy maa ja'a tiøjcän.

Mänitä Lázaro hajxy jiaančh nähbijtuuty. Mänit ñøcxy maa ja'a tiøjcän.

⁴⁵Mänitä Jesús ja'a miädia'agy miäbøjcäxä nämay ja'a judiøshajxy, ja'a María hajxy hānajty tøø miøødhitiäbä maa ja'a tiøjc-hajxiän, ja'a hajxy hānajty tøø yhiäxiäbä coo ja'a Jesús ja'a ho'ogyjiäya'ay yagjujypiøjcy. ⁴⁶Pero cab judíos hajxy näje'le miäbøjcy. Paady ja'a fariseos hajxy hoy yhawaanä nebiä Jesús hānajty tøø tiuñ. ⁴⁷Mänitä teedywiindsøn'hajxy yhamugøøyy møødä fariseoshajxy møødä tuungmøødpähajxy. Mänit hajxy ñiñāmaayyä:

—Neby hajxy nwiinmahñdyhajtämät. Madiu'u jaaya'ay ja'a hoy-yagjuøøñäbäjaty tøø yajcähxø'øgy. ⁴⁸Coo hajxy nga'a mājtsämät, mänitä miädia'agy miäbøgānāxä nägøxiä. Minaambä romano jäya'ayhajxy ja'a møjcuhdujtmøødpä. Mänitä ndsajtøjc hajxy xyajma'adāanäm. Mänitä nguhdujt hajxy xpiøgāanäm.

⁴⁹Caifás ja'a teedywiindsøn hānajty xiøhaty ja'a møjcuhdujtmøødpä. Mänit miānaañ:

—Cab hajxy tii mjaty mnajuø'øy.

⁵⁰Cab hajxy mwiinjuø'øy coo maas hoy hit jaduhñ coo ja'a cu'ug tuljäya'ay xñähho'tútämät.

Cab hajxy jaduhñ nägøxiä nguhdägøøyyämät.

⁵¹Ca'a Quiaifás ja'a yhamdsoo wiinmahñdy jaduhñ. Pero coo hānajty tiuñ teedywiindsøn møjcuhdujtmøødpä, paadiä Dios ja'a Caifás jaduhñ yajnägapxy coo ja'a Jesús ja'a judíos hānajty ñähho'tu'uda'añ, ⁵²møød hajxy nägøxiä, ja'a Dios hānajty tøø wyiimbíyyäbä, ja'a wiinghagajptjatypä. ⁵³Mänitä møjcuhdujtmøødpähajxy quiojyquiapxyhajty coo Jesús hajxy hānajty yagho'oga'añ.

⁵⁴Paadiä Jesús hānajty jim quia'a wäditaannä mayjiäya'ayhagujc maa ja'a Israelpähajxiän. Mänitä Jesúshajxy jim chohñ jim Judea, ñøcxy hajxy jim maa ja'a cajpt jaduhñ xiøhatiän Efraín. Jimä Jesúshajxy miähmøøyy møødä jiamioødhajxy. Mäwiingön ja'a cajpt hānajty tø'ødsnähgäp.

⁵⁵Habaadāannäp ja'a pascuaxøø hānajty, ja'a judiøshajxy yagjajtäbä. Nämay hajxy jim ñøcxy xøøhajpä jim Jerusalén, ja'a hajxy jim tsohmä maa ja'a cajpthuungän. Cahnä xøø hānajty jim chohñda'agy coo hajxy jim quioo'ty. Jayøjp hajxy hānajty yhuuc tsi'iwa'añ. Jaduhñäc tyijy hajxy hānajty ñähwa'adsa'añ ja'a piojpä quiädieey. ⁵⁶Jiibiä Israelpäjäya'ay ja'a Jesús hajxy hānajty yajcopcø'øy tsajtøgooty. Jiiby hajxy hānajty ñimiäyajtøyii: —Nej, cabä Jesúsäda'a miedsa'añ xøøhájpäjä.

⁵⁷Tøø ja'a teedywiindsøn'hajxy hānajty yhane'emy møødä fariseoshajxy, coo Jesús pøn yhiät,

mänit hajxy ñägápxät, nebiä Jesús hajxy jaduñ miádsät.

12 Ja tädujxøø ja'a pascuaxøø hänajty quia'a habaady. Mänitä Jesús jim ñøcxy Betania, maa Lázaro hänajty chána'ayän, ja'a Jesús hänajty tøø yagjuyjpiøquiäbä coo hänajty tøø yho'ogy. ²Nämayyä jäya'ayhajxy jiiby yhamugøøyy tsugaabiä ja'a Jesúsøxpä. Ja'a Marta hänajty texyhabøgøøby. Jiibiä Lázaro ja'a Jesús hänajty miøødtsugay tøgooty. ³Mänitä María ja'a perfume quionmejch cuplitro. Haagä nardopøjy ja'a perfume hänajty ja'a tsojwatypä. Mänitä María ja'a Jesús yajtecytia'xøøyy ja'a perfume. Mänitä María ja'a Jesús tiecymieexy quihwaayhaam. Mänitä perfume tiägøøyy pu'xø'pä tøgooty. ⁴Jiibiä Judas hänajty, ja'a Simón Iscariote yhuung. Jesús ja'a jiamiøød hänajty je'ebä. Je'edsä Jesús hänajty yegaamb coo hänajty yajcø'ødägø'øwa'añii maa ja'a soldadohajxiän. Mänitä Judas miänaañ:

⁵—Maas hoy hijty coo yø'ø perfume cu ndóocäm nebiä häyoobädøjc ja'a xädø'øñ cu nnä'ä móoyyäm.

⁶Pero cabä Judas ja'a häyoobädøjc hänajty ñä'ägädä näxuuch. Je'e ja'a xädø'øñ hänajty yajconwädjítäp. Pero hamdsoo hänajty wyi'i yajpádsømy. Paady jaduñ miänaañ coo ja'a perfume hajxy cu tioo'cy nebiä xädø'øñ jaduñ miéedsät.

⁷Mänitä Jesús ja'a Judas ñämaayy: —Ween yø'ø to'oxiøjc yhity. Ca'a waamb mnäma'ay. Ween yø'ø perfume yaghity høxtä cóonøch

nhó'ogät. Mänitøch yø'ø perfume xyajnájháaxät. ⁸Hoymiänaajä mijts ja'a häyoobädøjc xmiøødhida'añ. Pero høøch, cábøch mijts hajxy jejcy nmøødhida'añ.

⁹Nämayyä Israelpä jäya'ayhajxy miädoyhajty coogä Jesús hänajty jim tøø mieh Betania. Mänitä Jesús hajxy hoy yhixy møødä Lázaro, ja'a Jesús hänajty tøø yagjuyjpiøquiäbä. ¹⁰⁻¹¹Coo Jesús ja'a Lázaro hänajty tøø yagjuyjpiøcy, paadiä Israelpä jäya'ay ja'a Jesús hajxy hänajty tøø piadu'ubøcy nämay. Y paadiä Jesús ja'a miädia'agy hajxy hänajty tøø miäbøjcäxä nämay. Coo ja'a teedywiindsøn ja'a miädia'agyhajxy hänajty quia'a jaty panøcxäxä, paady hajxy quiojyquiapxytiuuñ coo ja'a Lázaro hajxy ween yagho'ogy nebiä Jesús hajxy hänajty yagho'oga'añän.

¹²Nämayyä jäya'ayhajxy hänajty jim tøø mieh Jerusalén pascuaxøøhajpä. Cujaboom hajxy miädoyhajty coo ja'a Jesús hänajty miedsa'añ cajptooty. ¹³Mänitä xi'iwhaay hajxy hoy piuxy. Mänitä Jesús hajxy hoy jiojcubaadø'øy xi'iwhaaguiaip. Yáaxäp ja'a Jesús hajxy hänajty ñänøcxy:

—iViva Jesús! Tsøc yø'øya'ay hajxy wiingudsähgøøyyäm, yø'ø Dios tøø quiéxiäbä. Paadiä Dios tøø quiexy coo hajxy ngobiernähjätämät, højts ja'a Israelpäjäya'ayhajtäm.

¹⁴Mänitä Jesús ja'a burrohuung tu'ug piaaty. Mänit yajpejty. Jaduñ jiiby myiñ cujaay maa ja'a Diosmädia'aguian:

¹⁵Ca'a hajxy mdsähgø'øy, mijts jim tsänaabiä Jerusalén. Huug hix hajxy, xiidsä mgobiernähajxy piety burrohuungnähgøxp.

¹⁶Cabä Jesús ja'a jiamiøødhajxy hänäjty ñajuø'oy pøn jaduhñ ñänøømby coo miedsa'añ burrohuungnähgøxp, ja'a Dios quixaambiä. Pero cujegy, coo Jesús hänäjty tøø juijyipiøjnä, coo hänäjty tøø ñøcxnä tsajpootyp, mänitä jiamiøødhajxy jiahmiejtstaacnä coo jaduhñ jiaančh miñ cujaay ja'a Jesúscøxpä y coo Jesús hajxy hänäjty tøø piuhbety.

¹⁷Mädiaacp hajxy hänäjty neby hajxy hänäjty jim tøø yhixy mänaa Jesús ja'a Lázaro jiiby yhøxyaaxpädsømiän tsaajutjooty. Ja'a hajxy hänäjty tøø quia'a yhixiäbä, je'eds hajxy hänäjty miøødmädiaacpyp. ¹⁸Coo jaduhñ yajmädoyhajty nebiä Jesús ja'a Lázaro hänäjty tøø yagjujyipiøquiän, paadiä Jesús hajxy hänäjty nøcxy jiojcubaadø'oy mayjiäya'ay.

¹⁹Mänitä fariseoshajxy ñiñämaayyä:

—Nejy yø'øya'ay ndúunämät coo jaduhñ piawädityii nägøxiä.

²⁰Tøø ja'a ca'a Israelpähajpähajxy hänäjty näje'e quioo'pä xøøhajpä. Dioswiingudsähgøøbiä hajxy hänäjty tøø quioody. ²¹Mänitä Felipe hajxy hoy ñämech. Betsaida Felipe hänäjty choon jim Galileanaaxooty. Mänitä Felipe ñämaayyä:

—Tsäguhm, maa ja'a Jesús. Je'eds højts nja møødmädia'agaan.

²²Mänitä Felipe ja'a Andrés hoy yhawaanä coogä Jesús hajxy hänäjty hoy tøø jia møødmädia'aga'añ. Mänitä Felipe ja'a Jesús hajxy hoy yhawaandägajtsä møødä Andrés.

²³Mänitä Jesús miänaañ:

—Tøø yhabaady coočh nhø'ogät. Páadyhøch Dios tøø xquiexy.

²⁴Chaads mijts tehñ tiøyhajt nnämä'awät, coo jäya'ay ja'a trigo hajxy ñi'iby, mänitä tøømd tyictspädsømy yhaabiädsømy. Coo jaduhñ tyictspädsømtät yhaabiädsømtät, mänit hoy tiägøøñä yee'pä. Mayø'øb ja'a trigo jaduhñ. Pero coo quia'a tiictspädsømtät quia'a haabiädsømtät, jaduhyyä piú'udsät. Cabä miúxät. Cabä trigo miayø'owät. ²⁵Pønjätyhøchä nmädia'agy xquia'a mabøgáanäp, cab hajxy jim ñøcxät tsajpootyp. Páadyhøchä nmädia'agy hajxy xquia'a mabøgaanä coo hajxy chähgø'oy coo hajxy yagho'oga'añii. Pønjätyhøchä nmädia'agy xmiäbøjcäp, je'eds hajxy jim nøcxaamb tsajpootyp, hoy hajxy jia yagho'ogyii ja'a høøchcøxpä. ²⁶Pø xWyiindsønhadáambøch hajxy je'e, wéenhøchä nmädia'agy hajxy xpianøcxä. Nwøwhídäbøch hajxy je'e. NDéedyhøch päda'agaamb coo hajxy wyiingudsähgø'owøød wiingjäya'aybä.

²⁷Jootmayhájpøch cham. Cab jaduhñ yhahixø'oy coočh nDeedy nnämä'awät ween xyajtso'ogy coočh hänäjty yaa nho'oga'añ hädaa yaabä naaxwiin. Páadyhøch yaa tøø ngäda'agy coočh yaa nhø'ogät. ²⁸Teedy, yajcähxø'og ja'a mmäjaa.

Mänitä Dios jim yhadsooyy tsajpootyp:

—Tøøch tähooc nyajcähxø'ogy. Nyajcähxø'ogáambiøch jadähooc.

²⁹Ja'a hajxy hänäjty jim tänaabiä nämay maa ja'a Jesús ja'a wyiinduumän, jia mädoow hajxy,

pero cab hajxy wyiinjuøøyy. Näje'e hajxy miänaañ cooc tyijy hänee yaaxy. Näje'e hajxy miänaañ cooc tyijy ja'a Dios ja'a mioonsä jim tsajpootyp tu'ug quiapxy. ³⁰Mänitä Jesús miänaañ:

—Ca'a yhøøhcøxpä ja'a Dios jaduhñ miänaañ. Paady jaduhñ miänaañ nej mijts mnajuó'owät cooch jaduhñ xmiägapxy.

³¹Cooch nhó'ogät, cábøch ja'a møjcu'ugong nyajmäjäda'aga'añ, jaaya'ay hanehmbä hädaa yaabä naaxwiin. Dios jaduhñ mänaamb coo hajxy ween yajcumädoy, ja'a høøchä nmädia'agy hajxy xquia'a mäbøjcäbä. ³²Høøch, cooch nyajmøjpahbédät cruzcøxp, mänithøchä nmädia'agy hajxy xmiäbøgaanä, ja'a hajxy tsänaabiä wiinduhmyhagajpt.

³³Paadiä Jesús jaduhñ miänaañ, neby hajxy ñajuó'owät neby hänajty yagho'oga'añii. ³⁴Mänitä Jesús ñämaayyä:

—Jiiby jaduhñ myiñ maa højts nguhdujtän coo jaaya'ay hänajty yhane'ema'añ mayjiomøjt, ja'a Dios quiexaambiä, ja'a højts nhahixypä. Pero miich jaduhñ mänaamb coo tsipcøxp ja'a Diosquexypä yajmøjpahbeda'añ cruzcøxp. Pøn miich jaduhñ mnänøømby ja'a Diosquexypä.

³⁵⁻³⁶Mänitä Jesús miänaañ:

—Cábøch mijts hajxy jecy nmøødhida'añ. Jaduhñ mäwíinhøch mijts ngudøø'xy nebiä jøønän. Mäbøjcägøch ja'a nmädia'agy hajxy, mädúhñtiøch hädaa yaabä naaxwiin nhídät, nébyhøch mijts jaduhñ hoy xpianøcxät, neby hajxy mga'a hídät hagoonstuum. Pøn

hajxy jaduhñ hijp hagoonstuum, tãgodium hajxy ñä'ägädä hity. Høøch, nøcxáannäbøch. Cábøch ja'a nmädia'agy hajxy xmiädowáanänä.

Coo ja'a Jesús jaduhñ miädiaacpädøøyy, mänitä tiu'ubøjnä. Mänit ñiguii'tsä.

³⁷Cabä Jesús ja'a miädia'agy hänajty miäbøgáanäxä, hoy hänajty madiu'u hoy-yagjuøøñäjaty tøø jia yajcähxø'ogy. ³⁸Paady hajxy hänajty quia'a mäbøga'añ nebiä profeta Isaías ja'a miädia'agy jaduhñ tiøjiádät, nebiä jecy quiujahyyän:

Dios, cab højts ja'a nmädia'agy pøn tøø xmiäbøjcä.

Tøø ja'a mmäjaa mja yajcähxø'ogy, pero cab hajxy tøø xmiøjpäda'agy.

³⁹Cabä Jesús ja'a miädia'agy miäbøgáanäxä nebiä Isaías wiingtuum quiujahyyän:

⁴⁰Tøø ja'a Dios miäna'añ:

Tøøchä quiopc-hajxy nyajxejxä nébyhøchä nmädia'agy hajxy xquia'a wiinjuøøyyät, nebiä yhaxøøgwiiinmahñdy hajxy quia'a najtshixø'owät. Cábøch ja'a piojpä quiädieey hajxy nyajnhwáatsät.

⁴¹Jaduhñä Isaías jecy quiujahy nebiä Isaías ja'a Jesús hänajty tøø yhiñän tsajpootyp. Cahnä Jesús hänajty yaa quiäda'agy hädaa yaabä naaxwiin.

⁴²Stémpräm ja'a Israelpä jäya'ay ja'a Jesús ja'a miädia'agy hajxy miäbøjcä, møødä copc-hajpähajxy nämay. Pero hamee'ch hajxy miäbøjcy. Cabä Jesús hajxy hänajty quiapxpaady mayjiäya'ayhagujc. Tsähgøøby hajxy hänajty coo

hajxy yajpádsómøød maa ja'a chajtøjc-hajxiän ja'a fariseoshajxy. ⁴³Ja'a judíoshajxy, cab hajxy chocy coo hajxy quiumayøød ja'a Dios. Je'e hajxy chojpy coo hajxy ween wyingudsähgø'oyii ja'a cu'ug.

⁴⁴Mänitá Jesús møc miänaañ:

—Pønhøch ja'a nmädia'agy xmiäbøjcäp, jaaná xmiäbøjcäbøchä nDeedy ja'a miädia'agy hajxypä, ja'a'ch yaa tøø xquiéxiäbä hädaa yaabä naaxwiin. ⁴⁵Pønhøch jaduhñ xyhijxp, jaaná xyhíjxäbøchä nDeedy hajxypä. ⁴⁶Páadyhøch yaa tøø ngäda'agy hädaa yaabä naaxwiin, neby hajxy quia'a mähmø'owät hagoodstuum pønjátyhøch nmädia'agy hajxy xmiäbøjcäp. Jaduhñ mäwíinhøch ngudøø'xy nebiä jøønän neby hajxy hoy yhíxät. ⁴⁷Ca'a yhøøchä hajxy nyajcumädowaamby, ja'a nmädiá'agyhøch hajxy xquia'a mäbøjcäbä, hoy hajxy jaduhñ tøø jia mädoxyaty. Páadyhøch yaa tøø ngäda'agy hädaa yaabä naaxwiin, nébyhøch ja'a jäya'ayhajxy jaduhñ nnähho'tú'udät. Ca'a yhøøchä hajxy je'e nyajcumädowaamby. ⁴⁸Pønhøchä nmädia'agy hajxy xquia'a mäbøjcäp, mänit hajxy quiumädowa'añ coo ja'a naaxwiimbä hänajty wyiimbida'añ. Paady hajxy quiumädowa'añ, coo'chä nmädia'agy hajxy hänajty tøø xquia'a mäbøjcä. ⁴⁹Ca'a yhøøchä nhamdsoo mädia'agy jaduhñ tøø nyaghity. Ja'a nDéedyhøch, ja'a'ch tøø xquiéxiäbä, je'e'ch jaduhñ tøø xyhane'emy nebiátyhøch nmädiá'agät. ⁵⁰Høøchä, nmøødhøch ja'a tøyhajt jaduhñ coo hajxy jim yhida'añ tsajpootyp

cøjxta'axiøø, pønjátyhøch ja'a nDeedy ja'a miädia'agy mäbøjcäp. Nmädiáacypiøch nébyhøchä nDeedy tøø xyhane'emiän.

13 Mänitá pascuaxøø hänajty tiehm yhadsoo'øy. Tøø ja'a Jesús hänajty ñajuø'øy coo hänajty tøø yhabaady coo hänajty yaa choonaanä hädaa yaabä naaxwiin, coo hänajty jim ñøcxaanä maa ja'a Tieediän. Chojpy ja'a Jesús ja'a jiamíøød hänajty hamuumdu'joot hädaa yaabä naaxwiin.

²Coo ja'a Jesúshajxy hänajty chuugaya'añ, tøø Judas hänajty wyiinmahñdyhaty, ja'a Simón Iscariote yhuung, coo Jesús hänajty yajcø'øwaanø'owa'añii maa ja'a soldadohajxiän. Ja'a møjcu'ugong ja'a Judas jaduhñ yajwiinmahñdiagooyy. ³Ñajuøøbiä Jesús hänajty nebiaty ja'a cuhdujt hänajty tøø mio'oyii ja'a Tieedy. Ñajuøøby hänajty coo hänajty jim tøø choon maa ja'a Tieediän, coo hänajty jim ñøcxáangombä jadähooc. ⁴Coo hajxy hänajty tøø chuugaabiädøøñä, mänitá Jesús tiänaayyø'cy. Mänitá wyit chijy. Mänitá cuhbe'en tu'ug yajnimioxmäguitøøyyä. ⁵Mänitá nøø quudemøøyy palanganajooty. Mänitá Jesús tiägøøyy tecypiujpä ja'a jiamíøød. Coo tiecypiujpäðøøyy, mänit tiecymiéxcombä.

⁶Coo ja'a Jesús ja'a Simón Pedro hänajty tiecypiuja'añ, mänitá Simón Pedro miänaañ:

—Nej, xtiēcypiujáambøch høøchpäjä.

⁷Mänitá Jesús yhadsooyy:

—Mii'ch, caj miich mnajuø'øy tiiguiøxpøch miich coo ndecypiujujy.

Mänit jaduḡn mnajuø'owa'añ cooçh jaduḡn njádät nhabétät.

⁸Mänitä Pedro miänaañ:

—Cab jaduḡn yhahixø'oy cooçh miich jaduḡn xtieczyiújät.

Mänitä Jesús yhadsooy:

—Pø cájtäm miich

myajtecyiujaja'añ, cájtämøch miich hoy xjiamiødhadaannä.

⁹Mänitä Simón Pedro miänaañ:

—Bueno, Wiindsón, cóxiøch jaduḡn xpiújät móødhøçhä ndecy, móødhøçhä ngø'ø, móødhøçhä ngopc.

¹⁰Mänitä Jesús yhadsooy:

—Pøn tøø çh'i'y, wa'ads ja'a ñi'x ja'a quiopc je'e. Jagoo ja'a tiecy piújät. Mijts, mwa'ads mijts hajxy, pero cab hajxy nägøxiä mwa'adsä.

¹¹Ñajuøøbiä Jesús hänäjty pøn hänäjty yajcø'owaanø'owáañäp. Paady jaduḡn miänaañ coo tu'ljaya'ay hänäjty quia'a wa'adsä.

¹²Coo ja'a Jesús çøjx

tieczyiujpädø'oy ja'a jiamiøødhajxy, mänitä Jesús wyitpägøøñä. Mänit yhøxtaecnä. Mänit miänaañ:

—Chójpiøçhä njoot jaduḡn coo hajxy mnajuø'owät tiiguiøxpøch mijts coo tøø ndecyuijy.

¹³Hoy jaduḡn cooçh mijts jaduḡn xñäma'ay: “Wiindsón.” Tøyhájtøch mijts hajxy jaduḡn xWyiindsønhaty.

¹⁴Tøøçh mijts hajxy ndecyuijy, hóyhøch Wiindsón nja tuñ. Jaaná jaduḡn mijtpä, mnidiecyiujøøb hajxy hamiñ haxøpy. ¹⁵Mbahíxäp hajxy jaduḡn nebiátyhøch mijts tøø nduñ. ¹⁶Chaads mijts tehḡ tiøyhajt nnámá'awät, cabä moonsä cuhdujt møc miøødä quejee ja'a wyiindsón. Jaaná jaduḡn je'ebä ja'a tøø quiexyiijäbä, cabä cuhdujt

je'e møc miøødäbä quejee ja'a tøø miäguéxiäbä. ¹⁷Cooçhä nmädia'agy hajxy xwyiinjuøyyät, coo hajxy jaduḡn mgudiúnät, jootcuje hajxy jaduḡn mhídät.

¹⁸Cábøch mijts nägøxiä nnägapxy. Nnajuøøbiøch pønjátyhøch tøø nwiimbiy. Pero tøjiajpä Diosmädia'agy maa jaduḡn miäna'añän: “Ja'a craaçh tu'ugmucy xmiøødcaabiä, tøøçh je'e xmiädsibø'oy.” ¹⁹Jäguémioch mijts chaa nhawáañäm cooçh haxøøg njada'añ nhabeta'añ. Cooçh jaduḡn njaançh jádät njaançh habétät, mänit hajxy mhuuc mäbøgät cooçhä Dios tøyhajt tøø xjiaançh quexy. ²⁰Chaads mijts tehḡ tiøyhajt nnámá'awät, pøn hajxy mägu'ugpøgaamb ja'açh nguexaambiä, møød høøçh jaduḡn xmiägu'ugpøgaambä. Jaaná jaduḡnds je'ebä, pøñhøch je'e xmiägu'ugpøgaamb, møødä Dios jaduḡn miägu'ugpøgaambä, ja'açh tøø xquiéxiäbä.

²¹Coo ja'a Jesús miädiaacpädøøñä, mänit jiootmadiägøøñä. Mänit miänaañ:

—Chaads mijts tehḡ tiøyhajt nnámá'awät cooçh mijts ja'a mjamiøød tu'ug xyega'añ ho'cøøc.

²²Mänitä jiamiøødhajxy ñiwyiinhee'ppejtä. Cab hajxy hänäjty ñajuø'oy pøn ja'a Jesús hänäjty jaduḡn ñänøømby. ²³Jimä Jesús ja'a jiamiøød hänäjty yhäña'ay tiehḡ ñähmøjc. Jaançh tehḡ yhoy ja'a Jesús hänäjty miøødnijiootpaadyii.

²⁴Mänitä Simón Pedro ja'a craa miäwø'xy. Mänit hamee'ch ñämaayy:

—Huuc mäyajtøw pøn jaduḡn ñänøømby.

²⁵Mänitá craa ja'a Jesús tiaatsmägowøøyy. Mänit miäyajtøøyy:

—Pøn jaduhñ mnänøømby.

²⁶Mänitá Jesús yhadsooy:

—Nbama'tsnaxáambiøch hádaa tsajcaagyhaguijt. Mänitøch ja'a craa nmo'owa'añ, ja'ačh xyegaambä ho'cøøc.

Mänitá Jesús ja'a tsajcaagyhaguijt jiaančh pama'tsnajxy. Mänitá Judas yajcø'øgonøøyy, ja'a Simón Iscariote yhuung. ²⁷Tuunä Judas ja'a tsajcaagy ñä'a coondsooy, mänitiä miøjcu'ujoočtägøøyyä. Mänitá Jesús ja'a Judas ñämaayy:

—Tsógäm. Nøcx jatcø'øw nejt mjatcø'øwa'añän.

²⁸Ja'a hajxy hänäjty jim caabiä, cab hajxy hänäjty ñajuø'øy tiiguøxpä Jesús jaduhñ coo miänaañ. ²⁹Näje'e hajxy hänäjty wyiinmahñdyhaty coo tyijy ja'a Jesús ja'a Judas hänäjty quiexy juubiä mädyijaty tyijy hänäjty yajtunaamby xøøjooty. Näje'e hajxy hänäjty wyiinmahñdyhajpä coo tyijy Jesús ja'a Judas ja'a häyoobäya'ay hänäjty yajmo'owa'añ xädø'øñ. Paady hajxy hänäjty wyiinmahñdyhaty, coo ja'a Judas ja'a xädø'øñ hänäjty yajwijtswädityii. ³⁰Tuunä Judas ja'a tsajcaagy ñä'a coondsooy, mänitiä tiøjpädsøømy. Tøø hänäjty quioodsøøñä.

³¹Coo ja'a Judas tiøjpädsøømy, mänitá Jesús miänaañ:

—Tøø yhabaady cooçh ngähxø'øga'añ cooçh nmøjjä njaančhä. Høøčhøxpä Dios jaduhñ quiahxø'øga'añ coo miøjjä jiaančhä. Dióshøch tøø xwyiinguexy.

³²Nyajcähxø'øgáambiøch ja'a Dios coo miøjjä jiaančhä. Mobädájpøch ja'a Dios xyajcähxø'øgaambä cooçh nmøjjä njaančhä.

³³Mägu'ughajpäðjç, cábøch mijts jejcy nmøødhida'añ. Xjia høxta'awáambøch mijts, pero cábøch hajxy xpiaada'añ.

Chaads mijts hajxy nnámá'awät nébyhøčhä Israelpä jäya'ayhajxy tøø nnäma'ayän: Cab hajxy jim hoy mnøcxät maačh nhida'añän.

³⁴Chaads mijts hajxy ja'a hawiinjemyguiuhdujt nmó'owät coo hajxy hamiñ haxøpy mničhogøøð nébyhøch mijts ndsoquiän.

³⁵Coo hajxy mničhogøøð mnibia'häyowøøð, cähxø'øgäp jaduhñ cooçh mijts ja'a nmädia'agy xjiaančh panøcxä. Xyhíxäp ja'a jäya'ayhajxy jii nägøxiä.

³⁶Mänitá Simón Pedro ja'a Jesús miäyajtøøyy:

—Wiindsøn, maa mnøcxa'añ.

Mänitá Jesús yhadsooy:

—Cábøch miičh jadunajtä hoy xpianøcxät maačh nnøcxa'añän. Miičh, høxhaam miičh mnøcxät.

³⁷Mänitá Pedro ja'a Jesús miäyajtøøgumbä:

—Tiičh miičhäda'a jadunajtä hoy coo nga'a panøcxät.

Nnähhø'tú'udäbøch miičh häyaa.

³⁸Mänitá Jesús yhadsooy:

—Jaančhä; cabä ndijy miičhäda'a xñähhø'tú'udät. Chaads miičh jadunajtä nnámá'awät, cahnä tseej hänäjty ya'axyñä, tøø miičh hänäjty tægøøghooc mnijjøgapxyii cooçh tyijy miičh hänäjty xquia'a hixiä.

14 Mänitá Jesús miänaañ:

—Ca'a hajxy mwi'i tiajy mwi'i miay. Mäbøjcä ja'a

Dios ja'a miädia'agy hajxy, y määbójcägöch ja'a nmädia'agy hajxypä. ²Jim tsajpootyp maačhä nDeediän, mayyá tsäna'awöhhñdy jim. Coö häxöpy quia'a töyyä, cab hajxy cu nhawáañäm.

Nöcxáamböch ja'a tsäna'awöhhñdy nbäda'aga'añ nahix hahixøø maa mijts mhídat. ³Coočh jim nnöcxá'añ, cádaactägatsáamböch jadähóocägumbä. Mänitöch mijts jim ngöxy woonöcxá'añ maačh nhida'añän. Näguipxy hajxy jim nhidáañäm. ⁴Mnajuøøby hajxy maačh nnöcxá'añ. Jaduhñ hajxy mnajuøøbiä neby hajxy jim mnöcxät.

⁵Mänitá Tomás ja'a Jesús ñämaayy:

—Wiindsón, pero cab hójts nnajuøøy maa miičh mnöcxá'añ. Neby hójts jaduhñ jim nnä'a nöcxät.

⁶Mänitá Jesús yhadsooyy:

—Jaduhñ mäwiinhöch hөөөch nebiä tu'ujän. Hөөөchöxpä hajxy jim mgooda'añ pönjátyhöch ja'a nmädia'agy xmiäbójcäp. Hөөөchöxpä hajxy jim mhida'añ cöjxta'axiøø. Paady hajxy jim mhida'añ coöčhä töyhajt nyajcähxøøgy ja'a Dioscöxpä.

⁷Pönjátyhöch je'e xyhixyhajp, jaaná xyhixyhájtäböch ja'a nDeedy je'ebä. Tøø hajxy mhixy.

⁸Pero cab hajxy wyiinjuøøyy waambä Jesús jaduhñ jia mänaañ. Mänitá Felipe ja'a Jesús ñämaayy:

—Wiindsón, ween hójts ja'a mDeedy xyhuuc yaghixät. Mänit hójts jootcujc nmähmøøwät.

⁹Mänitá Jesús yhadsooyy:

—Felipe, tii jaduhñ coö mmäna'añ. Tөөөch miičh jejcy xpiawädity.

Xyhixyhájpöch miičh jaduhñ. Pönčh xyhijxp, jaaná xyhíjxäböch ja'a nDeedy je'ebä. Tiičh miičh jaduhñ coö xñäma'ay coöch mijts ja'a nDeedy nyaghixät. ¹⁰Nej, cab jaduhñ mmäbøquiiä coöčhä nDeedy tu'ugmädia'agy nmøødhity. Ja'a nDéedyhöch miädia'agy, je'ečh jaduhñ nmädiäacäp; ca'a yhööčhä nhamdsoo mädia'agy nmädiäacopy. Ja'a nDéedyhöch ja'a mäjaa jaduhñ xmiöoby; je'ečh ja'a tiuung jaduhñ ndúunäp. ¹¹Määbójcägöch ja'a nmädia'agy hajxy coöčhä nDeedy jaduhñ tu'ugmädia'agy nmøødhity. Hoy hajxy mwiiinjuøøy mga'a ja wiiinjuøøy, mmäbögäp hit hajxy jaduhñ. Páadyhöch hit hajxy ja'a nmädia'agy xmiäbójcät, coöch hoy-yagjuøøñäjatypä nyajcähxøøgy. ¹²Chaads mijts tehñ tiöyhajt nnämäaguiombä, pönhöch ja'a nmädia'agy xmiäbójcäp, jaaná yajcähxøøgaamby je'ebä ja'a hoy-yagjuøøñäjaty. Maas hoy-yagjuøøñäjatypä je'e yajcähxøøga'añ quejeech nyajcähxøøgy. Paady jaduhñ yajcähxøøga'añ coöčh jim nnöcxá'añ maačhä nDeediän. ¹³⁻¹⁴Coo hajxy mmäbögät coöch ja'a cuhdujt töyhajt nmøødä, coo hajxy hänäjty tii myujwa'ana'añ, ngudiünäböch jaduhñ neby jaduhñ quiahxøøgät coöčhä nDeedy je'eduhñ miøjjä jiaañhä.

¹⁵Pø xchöjpöch mijts, mänitöch mijts ja'a nmädia'agy xquiudiünät nebiätöhöch mijts tøø nmägäpxy tøø nhane'emiän. ¹⁶Nnämäabiöch ja'a nDeedy coo mijts ja'a jootcapxmöcpöjpä wiingpä xyajnäguéxät, ja'a tömiädiäacpä.

Ja'a Dioshespíritu je'e. Cøjxta'axiøø hajxy jaduhñ xmiøødhida'añ. ¹⁷Pøjaty ja'a Diosmädia'agy ca'a mäbøjp, cabä Dioshespíritu hajxy choga'añ. Cab hajxy mänaa yhixyhada'añ. Pero mijts, mobädajpä hajxy je'e mhixyhada'añ. Xmiøødhidáannäp hajxy je'e. Jiiby hajxy mmøødhada'añ mjoodootyhajxy. ¹⁸Cábøch mijts je'e nnähgue'ega'añ nidiuhm nämetsc. Cädaactägatsáambøch yaa jadähooc maa mijtsän. ¹⁹Mejtsxøø tägøøgxøøch ja'a jäya'ayhajxy xjiaag hixa'añ. Cábøch hajxy hänäjty yaa xyhixaannä cooçh yaa ndsoonaannä. Cooçh cøjxta'axiøø nhida'añ, paady mijts cøjxta'axiøø mhidaambä. ²⁰Mobädajpä hajxy jaduhñ mnajuø'owa'añ cooçhä nDeedy tu'ugmädia'agy nmøødhity. Jaanä tu'ugmädia'agy hajxy jaduhñ nhidáañambä. ²¹Pøjátyhøch ja'a nmädia'agy xquiudiúunäp nébiøch tøø nmägapxy tøø nhane'emiän, xchójpøch je'e. Jaanä ndsojpy højts je'ebä møødhøch ja'a nDeedy. Nyaghixáambøch ja'a nwiinmahñdy hajxy.

²²Jii Jesús ja'a jiamøød hänäjty tu'ug xiøhaty Judas. Pero ca'a je'e yhIscariote. Mänitä Judas ja'a Jesús miäyajtøoyy:

—Wiindsón, tii højts ja'a mwiinmahñdy coo xyaghixa'añ, pero cabä cu'ughajxy myaghixa'añ.

²³Mänitä Jesús yhadsooyy:

—Pønhøch xchojpy, xquiudiúunäbøch ja'a nmädia'agy je'e. Y chójpiøçhä nDeedy je'ebä. Tu'ugmädia'agy højts nmøødhida'añ møødhøch ja'a nDeedy. ²⁴Pønhøch jaduhñ

xquia'a tsojpy, cábøçhä nmädia'agy xyajtuunä. Ca'a yhøøçhä nhamdsoo mädia'agy hädaa, hädaa hajxy nyajmøødmädiaacypiä. Ja'a nDeedyhøch miädia'agy hädaa, ja'açh tøø xquiéxiäbä.

²⁵Mijts, nyajmøødmädiacypiøch mijts jaduhñ mäduhñtiä hajxy yaa nmøødhitiän. ²⁶Nägøoyyøch nnøcxaannä ndu'ubøgaannä, mänitøch ja'a nDeedy yhEspíritu quiexa'añ maa mijtsän. Je'eçh jaduhñ nguwitshadaamby. Mijts jaduhñ xjiootcapxmøcpøgaamb. Cøxaamb hajxy

xyajnähixø'owa'añ. Cøxaamb hajxy xyagjahmiejtsta'aga'añ nebiátyhøch mijts yaa tøø nyajmøødx'i'igy tøø nyajmøødmädia'agy.

²⁷Jootcújc-høch mijts nyajmähmø'owa'añ. Cab mijtsä cu'ug xyagjootcugø'owät nébiøch mijts jootcuje tøø nyaghitiän. Ca'a hajxy tii mnädajy mnämay. Ca'a hajxy mdsähgø'oy mdsähdiuñ.

²⁸Tøøch mijts nhawáañäm cooçh nnøcxa'añ ndu'ubøga'añ. Pero cädaactägatsáambøch jadähooc. Pø xchójpøch mijts tøyhajt, mxoondá'agäp hajxy coo nhawáañäm cooçh jim nnøcxa'añ maaçhä nDeediän. Miaas møødä mäjaa je'e quejeeçh nmøødä. ²⁹Tøøch mijts jäguemiä nhawáañäm nébiøch yaa njada'añ hädaa yaabä naaxwiin y cooçh jim nnøcxaannä maaçhä nDeediän. Cooçh jaduhñ njádät, cooçh jim nnøcçät, mänit hajxy mhuuc tehñ miäböçgät.

³⁰Tu'habáquiøch mijts nhuuc jaac møødmädia'agyñä. Medsaambä møjcu'ugong, ja'a yaa

cu'ughanehmbä; pero cabä cuhdujt miøødä maačh høøchcøxpän.

³¹Ngudiunáannäbøch nébiøch ja'a nDeedy tøø xmiägapxy tøø xyhane'emiän. Páadyhøch jaduhñ ngudiuna'añ neby jaduhñ quiähxø'øgät coočhä nDeedy tøyhajt njaančh tsoy. Tänäaayø'øg hajxy. Jam hajxiän.

15 ¹Høøch, jaduhñ mäwíinhøch høøch nebiä tsaatyptequiän ja'a tøyhajt pä. Ja'a nDéedyhøch, jaduhñ je'e nebiä cudsaaitypcamän. ²Ja'a nDéedyhøch, xhøxpújxäbøch ja'a nhaads mädyii ca'a tømbejp; pero mädyiids jaduhñ tømbejp, je'eds jaduhñ weenjaty yhøxpuyxyp, nebiä maas majiaty tiøømbédät.

³Coo hajxy jaduhñ tøø mmäbøcy nebiátyhøch mijts je'e tøø nyajnáhixø'øyän, jadúhñhøch ja'a nDeedy mijts tøø xyajnáhwa'ačh ja'a mhaxøøgwiinmahñdyhajxy. Jaduhñ mäwíinäts je'e nebiä tsaatyp hajxy jijpuxiän.

⁴Tehngájñøch ja'a nmädia'agy hajxy xpianøcxät; tehngájñøch mijts nbuhbeda'añ. Ja'a tsaatyphaads, cab je'e tiøømbeda'añ coo ja'a yhøjxä tiecy hánajty quia'a hity. Jaduhñ mäwíinäts mijtspä, pø cábøch ja'a nmädia'agy hajxy tehngajnä xpianøcxaanä, cab hajxy hoy mwädítät.

⁵Høøch, jaduhñ mäwíinhøch høøch nebiä tsaatyptequiän. Høøch mijts jaduhñ nhaadshajpy. Coočhä nmädia'agy hajxy tehngajnä xpianøcxät, mänit hajxy hoy mwädítät. Nbuhbédäbøch mijts jaduhñ. Coočh mijts nga'a puhbédät, cab hajxy tii hoy mduna'añ.

⁶Pøñhøchä nmädia'agy xquia'a panøcxäp, jaduhñ mäwíinäts je'e nebiä tsaatyphaads hajxy yhøxpuxiän. Coo jaduhñ tiø'øch, mänit hajxy yajpädø'ogy; mänit hajxy ño'ogy.

⁷Coočhä nmädia'agy hajxy tehngajnä xpianøcxät, coo hajxy mga'a jahdiägóyyät nebiátyhøch mijts tøø nyajnáhixø'øy, ngudiunäbøch jaduhñ mädyiibäjaty mijts xmiäyujwa'anaamb. ⁸Coo hajxy hoy mwädítät, cähxø'øgäp jaduhñ coočhä nmädia'agy hajxy tøyhajt xpianøcxä. Jaanä cähxø'øgaamb jaduhmbä coočhä nDeedy je'e miøjjä jiaančhä.

⁹⁻¹⁰Nébiøchä nDeedy xchoquiän, jadúhñhøch mijts ndsojpä. Coočhä nmädia'agy hajxy xyajtúunät, ngumáyäbøch mijts jaduhñ; hoy miänájøch mijts ndsógät. Jadúhñhøchä nDeedy xchocy coočhä miädia'agy nyajtúunäbä.

¹¹Páadyhøch mijts jaduhñ nyajmøødx'i'igy nyajmøødmädia'agy coo hajxy tehngajnä mxoondá'agät nébiøch nxoonða'aguiän.

¹²Míjtshøch jaduhñ nmägapxyp nhanehmbý coo hajxy hamiñ haxøpy mničhogøød mnibia'häyowøød nébiøch mijts ndsoquiän. ¹³Pøñ jaduhñ jaančh tehñ chójcäp, coo hánajty yagho'oga'añii, nähho'tu'udøøb je'e ja'a miägu'ughajpä. ¹⁴Coo hajxy mgudiünät nebiátyhøch mijts tøø nmägapxy tøø nhane'emy, xmiägu'ughájñøch mijts hánajty jaduhñ. ¹⁵Cábøch mijts nnäma'awaanä “moonsä.” Ja'a moonsä, cabä ñajuø'øy tii ja'a wyiindsøn tiuumby. Pero mijts, tøø

mijts ngøxy hawáaṅäm nebiátyhøch ja'a nDeedy je'e tøø xyhawaṅä. Páadyhøch mijts nnäma'awaṅnä "mägu'ughajpä." ¹⁶Ca'a yhøøch mijts je'e tøø xwyiimbiy; høøch mijts je'e tøø nwiimbiy. Tøøch mijts jaduḅḅ nwiinguexy coo hajxy hoy mwädítät, coo Diosmädia'agy hajxy myajwá'xät, neby hajxy jaduḅḅ mmayø'øwät. Weenä Diosmädia'agy hajxy tehḅgajnä pianøcxpä; ween hajxy hoy wiädijpä. Jadúḅḅhøch mijts nDeedy xmió'owät tijaty mijts hānajtḅ mdsogaamby, cooçhä nmädia'agy hajxy hānajtḅ xmiäbøjcä. ¹⁷Chámhøch mijts jadāhooc nmägapxy nhane'emy coo hajxy mniçhogøød mnibia'häyowøød hamiñ haxøpy.

¹⁸Mijts, xmiähanhadaamb ja'a tsaan ja'a cu'ug hajxy. Moorä høøch hajxy tøø xmiähanhajpä. ¹⁹Xmiähanhadaamb mijts je'e, ja'a hajxy haxøøgwädijpä. Paady mijts xmiähanhada'añ coo mijts ja'a haxøøgpä tøø mgøxy najtshixøøñä. Tøø mijts ja'a mbojpä mgädieey nyajñhwáatsäm. Coo mijts häxøpy tøø mga'a najtshixø'øpy ja'a haxøøgpä, cu xmiägu'ughajtḅ jäya'ay hajxy may. ²⁰Huuc jahmiets hajxy nejy mijts tøø nnäma'ayän, cabä moonsähajxy quiuhdujtmøød quejee wyiindsønḅhajxy. Cooçhä jäya'ayhajxy näje'e xmiädsiphaty, paady mijts hajxy xmiädsiphadaambä. Y cooçhä nmädia'agy hajxy näje'e xmiäbøjcä, paady mijts ja'a mmädia'agy hajxy xmiäbøgáanäbä. ²¹Høøchcøxpä mijts ja'a cu'ug xmiädsiphada'añ, je'eguiøxpä cooçhä nDeedy hajxy xquia'a hiçyhajtä, ja'açh tøø xquiéxiäbä.

²²Tøøch jäya'ay ja'a nmädia'agy hajxy hoy nyajmädoyhaty. Cooçhä nmädia'agy hajxy tøø xquia'a mäbøjcä, paady hajxy quiumädowa'añ. Cooçhä nmädia'agy hajxy häxøpy tøø xquia'a mädoyhajtä, cab hajxy häxøpy quiumädowa'añ. ²³Pøñhøch xmiähanhajp, jadúḅḅhøçhä nDeedy xmiähanhajtäbä. ²⁴Tøøçhä hoy-yagjuøøñäjatypä nyajcähxø'øgy. Caj pøn jaduhḅ yajcähxø'øgy hädaa yaabä naaxwiimbä. Hoy jäya'ayhajxy tøø jia hiçy tøø jia mädoy, xmiähanhajp højts møødhøçhä nDeedy. Paady hajxy je'e quiumädowa'añ. Cooçhä hoy-yagjuøøñäjatypä häxøpy tøø nga'a yajcähxø'øgy, cab hajxy häxøpy quiumädowa'añ. ²⁵Cooçhä jäya'ayhajxy xmiähanḅhaty, tøjiajp jaduḅḅ nebiä Diosmädia'agy myiñän, neby hajxy jecy quiujahyyän: "Pues, nä'a nägøobøch hajxy xmiähanḅhaty."

²⁶'Nguexáambiøch ja'a Dioshespíritu, ja'a mijts xjiootcapxmøcpxøgaambä, ja'a tømíädiaacpä. Jim jaduhḅ choona'añ maachä nDeediän. Coo quiäda'aga'añ, mänítøch je'e xñägapxa'añ. ²⁷Jadúḅḅhøch mijts xñägapxaambä, nebiátyhøch mijts yaa tøø nmøødwädity. Høxtáhmdsøçhä jäya'ayhajxy nyajñähixøøçhoønän, quípçyhøch mijts nmøødtägøøyy wädijpä høxtä jäda'anäbaadyñä.

16 'Páadyhøch mijts cham nyajmøødxi'igy nyajmøødmadia'agy, cooçh mijts ja'a nmädia'agy ni mänaa xquia'a najtshixøøyyät, hoy mijts jäya'ay

mäduhñtiä xjia mädsiphaty xjia mähanhaty. ²Xyajpädsømaamb mijts je'e tsajtøgooty. Høxtä habaadaamb jaduhñ coo mijts xyagho'oga'añ je'eguiøxpä cooc tyijy ja'a Diosmädia'agy hajxy quiudiuñ. ³Paady mijts je'e xmiädsiphada'añ coo højts je'e xquia'a hixiä mōødhøchä nDeedy. ⁴Coo hajxy jaduhñ mjádät mhabétät, mänit hajxy jaduhñ mjahmiédsät coo hajxy nhawáañäm. Paady cham nhawáañäm.

'Cooch mijts hijty quipxy nmøødwädity, paady hajxy hijty nga'a hawáañäm. ⁵Nøcxáannäbøch jim maaçhä nDeediän, ja'açh tøø xquiéxiäbä. Jímhøch nhidaannä. Pero cábøch mijts xmiäyajtøø maaçh nnøcxa'añ. ⁶Mjootmayhajt mijts jaduhñ cooch mijts jaduhñ tøø nyajmøødmädia'agy. ⁷Chaads mijts tehñ tiøyhajt nnämä'awät, hoyø'øwaamb jaduhñ mijtsøxpä cooch nnøcxa'añ. Nguexáambiøch pøn mijts xjootcapxmøcpøgaamb. Cooch nga'a nøcxät, cab jaduhñ quiädá'agät maa mijtsän. ⁸⁻⁹Tsipøxp jaduhñ ñä'ägä cäda'aga'añ. Mänitä jäya'ayhajxy yajwiinjuø'owa'añii coo pojpä cädieey hajxy tøyhajt jiaançh møødá. Paady hajxy miøødä, coochä nmädia'agy hajxy tøø xquia'a mabøjçä. Paady hajxy yajcumädowa'añii ja'a Diósäm. ¹⁰Jaduhñ hajxy yajwiinjuø'owáañäbä cooch ja'a pojpä cädieey nga'a møødá. Nøcxáambøch jim maaçhä nDeediän; cábøch mijts yaa xyhixaannä. ¹¹Jaduhñ hajxy yajwiinjuø'owáañäbä coo hajxy

yajcumädowa'añii ja'a Diósäm, pønjaty ja'a møjcu'ugong ja'a miädia'agy panøcxäp, ja'a yaa hanehmbä hädaa yaabä naaxwiin. Tøø ja'a Dios miäna'añ coo ja'a møjcu'ugong quiumädowa'añ.

¹²Madiu'u mijts nja hawaanáañäm, pero cab hajxy mwiiñjuø'owät. ¹³Coo ja'a Dioshèspíritu hánajty quiäda'aga'añ, mänit mijts ja'a tøyhajt xquiøxy yajwiinjuø'owa'añ. Ca'a yhamdsoo mädia'agy je'e miädia'agaamby. Piamädia'agaamby jaduhñ nebiaty je'e tøø miädoy. Je'e mijts xyajmädoyhadaamb tijaty jadaañ tunáañäp. ¹⁴Xñägapxáambøch je'e cooch nmøjjä njaançhä. Mijts xyajmädoyhadaamb nebiátyhøch je'e tøø nnäma'ayän. ¹⁵Coo højts nhity tu'ugmädia'agy mōødhøchä nDeedy, páadyhøch mijts cham nnäma'ay coo mijts ja'a Dioshèspíritu xyajmädoyhada'añ nebiátyhøch je'e tøø nnäma'ay.

¹⁶'Mobädájpech jim nnøcxaannä maaçhä nDeediän. Pero cábøch njega'añ; mänítøch mijts hánajty xyhijxtägatsa'añ.

¹⁷Mänitä Jesús ja'a jiamioødhajxy näje'le ñiñämaayyä:

—Pätiidä yø'øya'ay jaduhñ coo ñä'ä mäna'añ cooc mobädajpä ñøcxaannä; cábäc jaduhñ jiega'añ. Mänítäc nhixáañägombä. Pätiidä coo ñä'ä mäna'añ cooc ñøcxa'añ maa ja'a Tieediän. ¹⁸Pätiidä coo ñä'ä mäna'añ “mobädajpä.” Päwaambtä jaduhñ jia mäna'ana'añ.

¹⁹Ñajuøøbiä Jesús hánajty coo hánajty miäyajtøwa'añii. Mänit miänaañ:

—Xmiäyajtøwáambøch mijts tijátyhøch jaduhñ tøø nja mädia'agy,

túhñámäts. ²⁰Chaads mijts tehñ tiøyhajt nnámá'awät, mjø'owaamb mXuudsaañb mijts ja'a høøçhcøxpä. Pero yø'ø cu'ughajxy, jaançh tehñ xioonnda'agaamb hajxy. Pero cab hajxy jejcy mjootmayhada'añ. Paquiä hajxy mjootcugø'øwáangombä. ²¹Coo ja'a to'oxiøjc ja'a xiøøbio'ohajxy piedyii, mänitä jioothajxy piädø'øgø'øgy. Nägooyä ja'a yhuunghajxy je'e miejtsnä, hagädaacp ja'a jioothajxy je'e. Cab hajxy je'e jiahmiejtsnä coo ja'a jioothajxy hñanjty tøø piädø'øgy. Xoondáacnöp hajxy coo yhuunghajxy hoy ween tøø myiñ tøø quia'ay. ²²Jaduhñ mäwiinäts hajxy mjootmayhaty nebiä to'oxiøjc ja'a jioothajxy piädø'øguiän. Pero nägooyä højts nniyhíxägumbä, mänit mijts mXoonnda'aga'añ. Caj mijts pøn xyagjootmayhadaannä.

²³Cábøch mijts hñanjty tii xmiäyujwa'anaannä. Chaads mijts tehñ tiøyhajt nnámá'awät, cooçh mijts nDeedy hñanjty tijaty xmiäyujwa'anaannä, xmio'owaamb mijts je'e ja'a høøçhcøxpä. ²⁴Cahnä hajxy tii mhuuc yujwa'añ ja'a høøçhcøxpä. Coo hajxy tijaty myujwá'anät, xñä'ägä mo'owaamb hajxy je'e. Jaduhñ hajxy hoy jootcujc mhídät.

²⁵Yajmäbaadyháamhøch mijts tøø nmøødmädia'agy. Habáatnöp jaduhñ cooçh nga'a mädia'agaannä yajmäbaadyhaam. Howyiinjuøøñøch ja'a nDeedy nmädia'agaannä. ²⁶⁻²⁷Mänitøch mijts ja'a nDeedy hoy tyiijä xmiäyujwa'anaannä ja'a høøçhcøxpä. Mänit hajxy xmio'owa'añ. NDéedyhøch mijts xyhamdsoo

mäyujwa'anáanöp je'eguiøxpä cooçh mijts nDeedy xjiaançh tehñ chocy. Paady mijts xchocy cooçh mijts xchojpä, cooçh mijts ja'a nmädia'agy hajxy tøø xmiäbøjcä cooçh jim tøø ndsooñ maaçhä nDeediän. Hamdsoo hajxy mmäyujwa'ana'añ; cábøch waamb nmäna'ana'añ. ²⁸Høøçh, jimhøch tøø ndsooñ maaçhä nDeediän. Yaaçh tøø ngäda'agy hädaa yaabä naaxwiin. Pero tsoonáambøch yaa jadáhøocägumbä. Nøcxtägatsáambøch jimägumbä maaçhä nDeediän.

²⁹Mänitä Jesús ja'a jiamiøødhajxy miänaañ, ñämaayä Jesús: —Hoorá sí, howyiinjuøøñä miich mmädiaacnä. ³⁰Tøø højts nnajuø'øy. Cab højts miich tii nmäyajtøwaannä. Nmäbøjnöp højts jaduhñ cóodäm miich jim mjaançh tsooñ maa Diosän.

³¹Mänitä Jesús yhadsooy: —Mjaançh mäbøjpiäda'a tyijy hajxiä. ³²Habáatnöp jaduhñ coo mijts ja'a cu'ug xquiøxy päboowia'xa'añ. Mänit hajxy jim mnøcxaannä maa mdøjc-hajxiän. Nidiühmhøch hajxy yaa xñähgue'egaannä. Pero cábøch nidiuhñ tøyhajt nhida'añ. Ja'a nDéedyhøch jaduhñ xmiøødhidaamb. ³³Páadyhøch mijts jaduhñ cham nyajwiinxiic nyajwiingapxø'øy coo mijts ween jootcujc mhíjnät cooçhä nmädia'agy hajxy xmiäbøjcät. Mbaadaambiä tsaachpa peenä hajxy hädaa yaabä naaxwiin. Pero ca'a hajxy tii mdajy mmay; cábøçhä mõjcu'ugong nyajmäjada'aga'añ.

17 Nägooyä Jesús miädiaacpäðøyy, mänit

yuughee'py tsajpootyp. Mänit miänaañ:

—Teedy, tøø yhabaatnä. Huuc yajcähxø'og cooçh nmøjjä cooçh njaançhä. Jadúhñhøch nyajcähxø'øgaambä coo miich mmøjjä coo miich mjaançhä. ²Tøøch miich cuhdujt jaduñ xmiø'oy cooçhä jäya'ayhajxy nägøxiä nguuhdujtmó'owät coo hajxy jim jaduñ ween yhity maa miichän cøjxta'axiøø, pønjätyhøch miich tøø xyajcø'øwaanø'øy. ³Jaduñ hajxy jim cøjxta'axiøø yhida'añ maa miichän, coo højts ja'a nmädia'agy jaduñ xmiäbøjcämät coo miich nidiuhm mDioshaty, coo miich mdømiädia'agy, cooçh miich yaa tøø xquiexy hädaa yaabä naaxwiin.

⁴Høøch, ngudiúumbiøch hädaa yaabä naaxwiin nébiøch miich tøø xyhane'emiän. Nyajcähxø'piøch jaduñ coo miich ja'a mäjaa tøyhajt mmøødä. ⁵Teedy, høøchä nmäjaa yajcähxø'cäc jim maa miichä mwiinduumän nébiøchä mäjaa hijty jim nmøødän mänaabä hädaa yaabä naaxwiin yhawijy tiøø'xta'aguiän.

⁶Pønjaty miich yaa tøø mwiimbijy hädaa yaabä naaxwiin, je'eçh hajxy jayøjp nyajmädoyhajt coo miich nidiuhm mDioshaty, coo miich mdømiädia'agy. Miichä mgø'øjooty hajxy je'e hijty. Pero jadähóoc-høch miich je'e tøø xyajcø'øwaanøøguiumbä. Tøø ja'a mmädia'agy hajxy je'e xmiäbøjcä xquiudiuunä.

⁷Najuøøñäp hajxy cooçh miich jaduñ tøø xmiø'oy mäduhñtiøch nmøødä. ⁸Tøøch hajxy ngøxy yajnähixø'øy nebiättyhøch miich tøø xyajnähixøøbiän. Najuøøñäp hajxy

cooçh jim tøyhajt ndsooñ maa miichän. Tøøchä nmädia'agy hajxy jaduñ xmiäbøjcä cooçh miich tøø xquiexy.

⁹Teedy, tunä mayhajt. Cueendähat hädaa jäya'ayhajxy, hädájøch miich tøø xyajcø'øwaanø'øyäbä. Ca'a jie'emøødøch jaduñ nnänømy ja'a mmädia'agy hajxy tøø xquia'a mäbøjcäbä. ¹⁰Højts hädaa jäya'ay nje'ehajmújcäm; páadyhøch miich nnäma'ay coo mgüeendähädät. Hädaa jäya'aguiøxpä jaduñ quiähxø'øga'añ coo højts nmøjhajtäm coo højts njaançhajtäm.

¹¹Cábøch yaa nhidaannä hädaa yaabä naaxwiin. Nøcxáannäbøch jim maa miichän. Pero yaaçhä njamiøødhajxy miähmø'øwa'añ. Cueendähat hajxy neby hajxy jaduñ yhidät tu'ugmädia'agy neby højts nhijtäm tu'ugmädia'agy. Miichä mmäjaagøxpä mgüeendähädät. Míichhøch hajxy tøø xyajcø'øwaanø'øy. Jaançh tehñ wia'ads miichä mjoot miichä mwiinmahñdy.

¹²Høxtä jäda'anábáadyñøch hajxy ngüeendähaty miichä mmäjaagøxpä. Caj miichä mmädia'agy hajxy nägøxiä tøø xñajtshixøøyyä. Jagooyyä tu'jäya'ay ja'a mmädia'agy tøø xñajtshixøøyyä, ja'a hijty nä'ägä tu'udägoyyaambä. Paady jaduñ tiu'udägooyy nebiä mmädia'agy jaduñ tiøjiädät nebiä cujaaybä miähmøøyyän.

¹³Høøch, nøcxáannäbøch jim maa miichän. Páadyhøch miich jaduñ cham nyajmøødmädia'agy hädaa jäya'ay wyiinduumhajxy

neby hajxy jaduhñ xioondáacpät nébiøch nxoonda'aguiän. ¹⁴Tøøch miičhä mmädia'agy hädaa jäya'ayhajxy nyajmøødmädia'agy. Paady hajxy yaa miähanhadyii hädaa yaabä naaxwiin, coo hajxy haxøøgtuum quia'a wädiñä. Høøch hajxy xpiahijxp cooçh haxøøgtuum nga'a wädity. ¹⁵Chaads miičh nnämä'awät coo miičh hädaa jäya'ayhajxy mgüeendähädät maa ja'a møjcu'ugongän. Cábøch jaduhñ nmäna'añ coo hajxy yaa choonät hädaa yaabä naaxwiin. ¹⁶Hoy hajxy jaduhñ wiädity nébiøch nwäditian. ¹⁷Cunuu'x hädaa jäya'ayhajxy ja'a miičhä mhomiädia'agyhaam nebiä mmädia'agy hajxy tehngajnä xpianøcxät xquiudiúunät. Mäduhñtiä miičhä mmädia'aguiä, tøyhajt je'e. ¹⁸Høøch, hädaa yaabä naaxwíinhøch miičh tøø xquiexy nébiøch miičh ja'a jäya'ay ja'a mmädia'agy hajxy nyajmädoyhädät. Jadúhñhøch yø'øya'ayhajxy nwiinguexaambä nebiä mmädia'agy hajxy xyaghawa'xøøyyät. ¹⁹Nnähho'tu'udáambiøch hädaa jäya'ayhajxy nejy miičhä mmädia'agy hajxy tehngajnä xpianøcxät xquiudiúunät. ²⁰⁻²¹Jadúhñhøch nmánaambä coo jäya'ayhajxy ween yhity tu'ugmädia'agy nägøxiä mäduhñtiøch ja'a nmädia'agy hajxy xmiäbøgaanä majatyhagájpthøchä njamiøød ja'a nmädia'agy hajxy xyajwa'xaanä. Ween hajxy xmiøødhíjtäm tu'ugmädia'agy neby højts nhíjtäm tu'ugmädia'agy. Jaduhñdsä jäya'ayhajxy miäbøga'añ cooçh miičh tøyhajt tøø xjiaančh quexy. ²²Tøøch

hajxy nguhdujtmø'oy coo hajxy yhídät tu'ugmädia'agy, nébiøch miičh tøø xquiuhdujtmø'oyän coo nhíjtämät tu'ugmädia'agy. ²³Tu'ugmädiá'agyhøch hajxy xmiøødhity nébiøch miičh nmøødhitiän tu'ugmädia'agy. Nägøxiä hajxy jaduhñ yhídät tu'ugmädia'agy, ja'a nmädiá'agyhøch hajxy tøø xmiäbøjcäbä. Jaduhñdsä jäya'ayhajxy ñajuø'øwa'añ nägøxiä cooçh miičh tøø xquiexy, coo miičh hajxy jaduhñ mdsocy nébiøch miičh xchoquiän.

²⁴Teedy, mänáambøch jaduhñ cooçh hajxy jim ween xmiøødhity maačh nhida'añän, ja'ačh miičh tøø xyajcø'øwaanø'øyabä. Jadúhñhøch nmánaambä coo ja'a mäjaa hajxy ween yhixy, ja'ačh miičh tøø xmió'oyabä. Xjiaančh tehñ chójpøch miičh hānajty mānaabä hädaa yaabä naaxwiin yhawijy tiøø'xta'aguiän. Høxtä jäda'anäbáadyñøch miičh xchocyñä. ²⁵Teedy, tøyhajt miičh mnä'ägädä mädia'agy. Ja'a cu'ughajxy, cab hajxy wyiinjuø'øy coo miičh mdømiädia'agy. Pero høøch, nhíxyhøch miičh. Hädaa njamiøødhøch hajxy chaa tānaabiä, ñajuøøby hajxy je'e cooçh miičh tøø xquiexy. ²⁶Tøøch hajxy je'e nyajmøødmädia'agy coo miičh nidiuhñ mDioshaty, coo miičh mdømiädia'agy. Tehngájñøch jaduhñ nyajmøødmädia'aga'añ neby hajxy jaduhñ ñiçhogøød ñibia'häyowøød nébiøch miičh xchoquiän. Wéenhøch hajxy tu'ugmädia'agy xmiøødhity.

Mänitä Jesús miädiaacpädøøyy.

18 Coo Jesús miädiaacpädøøyy, mänitä Jesúsahajxy chohñ cajptooty mөөdä jiamiөөdhajxy. Mänitä woc hajxy yajnajxy, ja'a hānajty xōhajpā Cedron. Mänit hajxy tiägøøyy olivocamjooty. ²Ja'a Judas, yhixy hānajty je'e jiiby olivocamjooty. Mayhooc ja'a Jesúsahajxy hānajty jiiby tөө yhamugø'øy. Ja'a Judas ja'a Jesús hānajty yegaamb. Ja'a Jesús ja'a miädsiphajxy hānajty yajcø'ødägø'owāanāp. ³Mänitä Judas ja'a soldadohajxy hoy wioy. Mөөdä policíahajxy hoy wioy maa ja'a teedywiindsøn'hajxiän, maa ja'a fariseoshajxiän. Mänitä Jesús jiiby nāgādaacā olivocamjooty, ja'a Judashajxy mөөdä soldado mөөdä policíā. Tөө hānajty quioodsøññā. Mөөdä jioøn mөөdä quiuhmd hajxy quiādaacy. ⁴Ja'a Jesús, nājuøøby hānajty je'e nebiaty hānajty je'e tiuna'añii. Mänitä Jesús hoy jiojcuyo'oyø'øy ja'a Judashajxy. Mänit miäyajtøøyy:

—Pøn hajxy mhøxtaaby.

⁵Mänit hajxy yhadsooyy:

—Jesús Nazaretpā hōjts nhøxtaaby.

Mänitä Jesús miānaañ:

—Høøch jaduhñ xōhajp.

⁶Coo ja'a soldadohajxy jaduhñ miädooyy, mänit hajxy jaduhyyā yhøxtägø'owa'cy. Jaduhyyā hajxy cøjx quiāday. ⁷Mänit Jesús miäyajtøøgumbä:

—Pøn hajxy mhøxtaaby.

Mänitä Judashajxy yhadsoogumbä:

—Ja'a Jesús Nazaretpā hōjts

nhøxtaaby.

⁸Mänit Jesús miānaañ:

—Tөөds mijts nja hawāanām.

Høøchāmäts je'e. Pø hōøçhtiäm

mijts xyhøxtaaby, wéenhøçhā njamiөөdhajxy wyiimbity.

⁹Paadiä Jesús jaduhñ miānaañ neby jaduhñ tiøjiädät nebiä Teedy hānajty tөө nāma'ayän: “Pøn høch miiçh tөө xyajcø'owaanø'øy, cábøch pøn xpiøgaanā. Cab hajxy nej jiada'añ.” ¹⁰Mänitä Simón Pedro ja'a espada jiädujpädsøømy. Mänitä teedywiindsøn ja'a mioonsä tiaatsc nā'ä pūjxäxä, ja'a hahoodiaatsc. Malco hānajty xiøhaty. ¹¹Mänitä Jesús ja'a Pedro yhojy:

—Cuyuugø'ow yø'ø mhespada. Tsipcøxpøch nho'oga'añ nébiøçhā nDeedy tөө xñama'ayän.

¹²Mänitä Jesús miajtsä quiø'øxojtsä. Ja'a soldadohajxy jaduhñ jatcøøyy mөөdä wyiindsøn'hajxy mөөdä policíahajxy, ja'a judíoshajxy hānajty tөө quiéxiäbä. ¹³Mänitä Jesús yajnøcxä maa ja'a Anás ja'a tiøjcän. Ja'a Anás ja'a Caifás hānajty miø'ød'hajpy. Teedywiindsøn ja'a Caifás hānajty tiuumby. ¹⁴Ja'a Caifás, je'e ja'a judíoshajxy hānajty tөө nāma'ay cooc yhahixø'øy jaduhñ coo tu'ljäya'ay ja'a cu'ug nāhho'tú'udät.

¹⁵Høxhaam ja'a Simón Pedro ja'a Jesús hajxy hānajty pianøcxy nāmetscä. Ja'a Jesús ja'a jiamiөөdhajxy nāmetscä. Ja'a Simón Pedro miägu'ughajpā, yhixy ja'a teedywiindsøn hānajty je'e. Mänit Jesús piädägøøyyä ja'a Simón Pedro miägu'ughajpā maa ja'a teedywiindsøn tiøghawa'adsän. ¹⁶Ja'a Pedro, jim je'e miähmøøyy tøghawa'adshaguum. Mänitä Pedro miägu'ughajpā piädsøømy. Mänitä to'oxymoonsä miägapxy ja'a tøjcueendāhajpā. Mänitä Pedro

quiuwowóøyyäbä tøghawa'ads
ja'a yhamdsoo mägu'ughajpä.

¹⁷Mänitä to'oxymoonsä ja'a Pedro
miäyajtøøyy:

—Miičh yø'øya'ay mmøødwädiipy,
túhñämäts.

Mänitä Pedro yhadsooyy:

—Ca'a yhøøčhä.

¹⁸Jimä policíahajxy hänajty
jiøømba'axamy møødä
moonsähajxy. Tøøchc hänajty.
Paady hajxy hänajty tøø
jiøønyajmøjjø'øy. Jimä Pedro
hänajty jiøømba'axaambä.

¹⁹Mänitä Jesús miäyajtøøwa
ja'a jiamiøødcøxpä møødä
miädia'agyquioxpä. Ja'a
teedywiindsøn jaduhñ yajtøøw.

²⁰Mänitä Jesús yhadsooyy:

—Jimhøch hijty tøø nmädia'agy
majiäya'ayhagujc. Jimhøch hijty
nmäyajnähixø'øy Diostøgooty møød
tsajtøgooty maa ja'a judíoshajxy
naxy yhamugø'øyän. Cábøch jim
mänaa pactuum tøø nmädia'agy.

²¹Tiičh miičh coo xmiäyajtøy.

Yø'øya'ayhajxy mmäyajtøwäp
yø'ø nmädiá'agyhøch hajxy tøø
xmiädóowäbä. Yø'øhajxy je'e
najuøøby nebiátyhøch jim tøø
nmädia'aguiän.

²²Tuunä Jesús jaduhñ ñä'ä
hadsooyy, mänit yhala'abø'cä.

Policía jaduhñ tu'ug jatcøøyy.
Mänitä policía Jesús ñämaayy:

—Cab jaduhñ yhoyyä coo ja'a
teedywiindsøn jaduhñ mhadsówät.

²³Mänitä Jesús miänaañ:

—Pø tøøch ngapxtägoy, yec ja'a
tøyhajt yaa. Pø caj, cab jaduhñ
yhoyyä cooçh miičh nä'ä nägoobä
xnä'ä hala'abø'øgät.

²⁴Mänitä Anás ja'a Jesús quiejxy
cø'øxoch maa ja'a Caifás ja'a
wyiinduuman. Caifás hänajty
teedywiindsøn tuumb.

²⁵Ja'a Simón Pedro, jim hänajty
jiøømba'axamy. Mänit miäyajtøøwa:
—Miičh yø'øya'ay mmøødwädiipy,
túhñämäts.

Mänitä Pedro ñiguiugapxä:

—Ca'a yhøøčhä.

²⁶Mänitä Pedro
miäyajtøøwägumbä:

—Tøøch miičh jiiby nhixy
olivocamjooty møød yø'øya'ay,
túhñämäts.

Ja'a teedywiindsøn ja'a mioonsä
jaduhñ mäyajtøøw, jaaya'ayä jiuju
miägu'ug ja'a tiaatsc hänajty tøø
ñä'ä pújxäxä ja'a Pedro. ²⁷Mänitä
Pedro ñiguiugápaxägumbä. Tuunä
jaduhñ ñä'ä mänaañ, mänitä tseej
yaaxy.

²⁸Mänitä Jesús yajnøcxä maa
ja'a gobernador tiøjcän. Pilato
hänajty tuumb gobernador.
Jobø'øwaamb hänajty. Coø hajxy jim
quioo'ty, cabä teedywiindsøn hajxy
ñä'ä tøjtagøøyy. Cabä Israelpä
quihdujthajxy hänajty jaduhñ
myiñ coo hajxy jiiby tiøjtägø'øwät
maa ja'a tiøjc-hajxiän, ja'a
hajxy ca'a Israelpähajpä, ja'a
pascuaxøøjooty. Coø hajxy
jiiby tiøjtägø'øwät, cädiéeyäp
hajxy jaduhñ. Coø hajxy jaduhñ
quiädiéeyät, cab hajxy miägáyät
ja'a pascuaxøøjooty. Paady hajxy
jiiby quia'a tägøøyy Pilato tiøgooty.
²⁹Coo Pilato miädooyy coo hajxy
hänajty tøø quioody, mänit hajxy
ñädøjpädsøøma. Mänitä Pilato
miänaañ:

—Tii mijts yø'øya'ay
myajcuxø'øwø'øwaamby.

³⁰Mänit hajxy yhadsooyy:

—Coo hädaa jäya'ay häxøpy tøø
quia'a cädieey, cab højts miich
häxøpy tøø nyajnägöody.

³¹Mänitä Pilato miänaangumbä:

—Yajwiimbit yø'øya'ay hajxy. Nøcx
mijts mädia'agymiadow nej mijts ja'a
mguhdujt myiñän pø tøø quiädieey.

Mänitä judiøshajxy yhadsooyy:

—Ja mäná'anäp højts jaduñ coo
yagho'ogøød; pero højts, cab højts
ja'a cuhdujt jaduñ nmøødä coo
højts jäya'ay nyaghó'ogät.

³²Paady hajxy jaduñ yhadsooyy,
ween ja'a Pilato jaduñ ñägäpxy

pø tøø Jesús tøyhajt jiaanč
cädieey. Tøjiajt jaduñ nebiä
Jesús hänajty tøø miäna'añän
coo hänajty yega'añii maa ja'a
ca'a Israelpähajxiän, coo hänajty
yagho'oga'añii cruzcøp. ³³Mänitä
Pilato tiøjtägøøyy. Mänitä Jesús
quiuyaaxøøyyä tøgooty. Mänit
miäyajtøøwa:

—Nej, miichä judiøshajxy
xguobiernähajpä.

³⁴Mänitä Jesús yhadsooyy:

—Pøn jaduñ xñämaayy. Tøgä
miichä mhamdsoo copcooty mnä'a
yajcojjiä.

³⁵Mänitä Pilato jadähooc
yhadsóogumbä:

—Tiich nyajnajú'øb. Ca'a
yhøøchä Israelpäjäya'ay. Miichä
mhamdsoo mägunäaxhøch
miich tøø xyajnägoody møødä
teedywiindsøn'hajxy. Tii jaduñ tøø
mgädieey.

³⁶Mänitä Jesús yhadsooyy:

—Høøch, cáboch yaa nduñ
gobiernä hädaa yaabä naaxwiin.

Cooč häxøpy nduñ, tøøchä
nmoonsähajxy häxøpy xñäwa'añ.
Cábøchä judiøshajxy häxøpy tøø
xñä'a mach. Cáboch yaa nduñ
gobiernä.

³⁷Mänitä Pilato miänaañ:

—Mduumbäda'a gobiernä.

Mänitä Jesús miänaañ:

—Jexioo, túumbøch jaduñ.

Høøch, nmädiácypioch ja'a tøyhajt
hädaa yaabä naaxwiin. Páadyhøch
yaa tøø nmiñ tøø nga'ay. Pønjaty
ja'a tømiaadia'agy mäbøjp, je'ečhä
nmädia'agy xmiäböjcap.

³⁸Mänitä Pilato miänaañ:

—Pätiidä miich jaduñ
mnänøømby ja'a tøyhajt.

Mänitä Pilato tiøjpädsøømgumbä.

Mänitä judiøshajxy ñämaayyä:

—Høøch, cáboch yø'øya'ay tøø
nhamdsoo hixy tøø nhamdsoo
paady pø tøø quiädieey. ³⁹Jii mijtsä
mguhdujt jaduñ cooč mijts
ja'a jäya'ay tu'ug nhøxmäjtsämät
ja'a pascuaxøøjooty. Nej,
mmänaamb hajxy jaduñä coo ja'a
mgobiernähajxy nhøxmäjtsämät.

⁴⁰Mänit hajxy møc yhadsooyy:

—iCa'a yø'øya'ay mhøxmach!
iHøxmats ja'a craa Barrabáshajpä!

Paadiä Barrabás hänajty
chumyčhäna'ay coo hänajty tøø
mieeč tøø pioty. Mänitä Pilato
tiøjtägøøñä.

19 Mänitä Pilato ja'a Jesús
yajwojpä. ²Mänitä soldado
ja'a wädsatscorona hajxy yhädiuñ.
Mänitä Jesús ja'a quiuhduum
piädäacäxä. Mänitä Jesús ja'a
hucywyit yajnähgäjenøøyyä nebiä
gobiernähajxy hänajty wyithatiän.
Paadiä Jesús jaduñ tiuñä, neby
hajxy hänajty ñä'a wi'i ñäxi'iga'añ

ñä'a wi'i ñäya'axa'añ. Paady hajxy hänäjty ñä'a wi'i ñäxi'iga'añ coo ja'a Pilato hänäjty tøø miäna'añ coogä Jesús hänäjty guiobiernähaty.

³Mänitä Jesús miäwiingoonä.

Mänit ñäxiicä:

—iA poco miičh tuumb gobiernäjä!

Mänitä Jesús tiägøøyyä coxhó'cäbä.

⁴Mänitä Pilato tiøjpädsøømgumbä.

Mänitä judíoshajxy ñämaayyä:

—Nyajtøjpädsøømbiøch yø'øya'ay nebiä tøyhajt hajxy jaduñ mmøødhädät cooçh tøø nhixy tøø nbaady coo tøø quia'a cädieey.

⁵Mänitä Jesús piadøjpädsøømy hucywyitmøød, coronamøød.

Mänitä Pilato ñämaayy ja'a Israelpäjäya'ayhajxy:

—Xiids yø'øya'ay tøø tiøjpädsøømy.

⁶Coo Jesús jaduñ yhiixä ja'a teedywiindsøn'hajxy møødä policíahajxy, mänit hajxy ñäyaaxøøyy:

—iMøjpahbétäts hajxy cruzcøxp! iMøjpahbétäts hajxy!

Mänitä Pilato miänaañ:

—Hamdsoo hajxy mmøjpahbédät. Høøch, cáboch jaduñ nmäna'añ coo tøø quiädieey.

⁷Mänitä Israelpäya'ayhajxy yhadsooyy:

—Jaduñ højts nguhdujt myiñ coo yø'øya'ay ween yagho'ogyii je'eguiøxpä coo tøø miäna'añ coogä Dios Tieedyhaty.

⁸Coo Pilato jaduñ miädooyy, mänitä chähgøøbiøjcy. ⁹Mänitä Pilato ja'a Jesús miøødtøjtägøøñä. Mänitä miäyajtøøyy:

—Maa miičh mjaančh tsooñ.

Pero cabä Jesús waamb miänaañ.

¹⁰Mänitä Pilato miänáangumbä:

—Nej, cáboch xñä'ägä hadsowa'añä. Nej, caj miičh mnajuø'øya cooçh cuhdujt nmøødä cooçh miičh nhøxmádsät, ó cooçh miičh nyajmøjpahbedøød.

¹¹Mänit Jesús yhadsooyy:

—Coo Dios miičh cuhdujt häxøpy tøø xquia'a mo'oy, caj miičh ja'a cuhdujt häxøpy mmøødä maaçh høøchcøxpän. Paady miičh ja'a pojpa caj mjaty møødä quejee ja'a teedywiindsøn, ja'a høøch yaa tøø xyajméchäbä maa miičh mwiinduumän.

¹²Mänit Pilato jia

wiinmahñdyhajty nebiä Jesús yhøxmádsät. Pero mänitä Israelpäya'ayhajxy ñäyaaxøøguiumbä:

—iPø mmägu'ughajpy miičh ja'a gobiernä César, caj miičh yø'ø craa mhøxmádsät! Pøn jaduñ wi'i ñibiädäcäp nebiä gobiernän, je'edsä gobiernä César møøtnimiädsiphájtäp.

¹³Coo Pilato jaduñ

miädooyy, mänitä Jesús miøødtøjpädsøømägumbä. Mänitä Pilato yhøxtaacy häñaabiejtcøxp maa hajxy hänäjty xiøhdaacthatiän. Jue'e hänäjty jim xiøhaty Gabata, hebreohayuuc-haamby. Je'eduhñ ñänøømby “maa ja'a tsaä quiøøñä'ayän.” ¹⁴Tøø hänäjty quiujyxiøøj'øy. Hadsuujø'øwaambä pascuaxøø hänäjty. Mänitä Pilato ñämaayy ja'a Israelpäya'ayhajxy: —iXiidsä mgobiernähajxy!

¹⁵Mänit hajxy ñäyaaxøøguiumbä: —iWeen yho'ogy! iWeen yho'ogy! iNøcx hajxy møjpahbet!

Mänit Pilato miänaaṅ:

—Nej, mmänä'anäp mijts jaduhṅä coo mijts ja'a mgobiernä nmøjpahbéjtämät.

Mänit teedywiindsøṅhajxy yhadsooy:

—César højts ngobiernähajpy. Ca'a wyiinghāna'cä.

¹⁶Mänitä Pilato Jesús yajcø'ødägøøyy maa ja'a Israelpähajxiän, coo Jesús miøjpahbedøød.

¹⁷Mänitä Jesús jim yajnøcxä maa jaduhṅ xiøhatiän “Maa ja'a Ho'ogyjiäya'aguiopcän.” Gólgota jim xiøhaty hebreohayuuc-haamby. Yhamdsoo cruz je'le yajquejyquiaphajtä. ¹⁸Jimä Jesús hoy miøjpahbedyii. Metscä jäya'ay jim miøjpahbéjtäbä Jesús ja'a nähmøjc. Cujc ja'a Jesús quiuba'awøøyyä. ¹⁹Mänitä Pilato yagjahyyä pu'uyhuungcøxp: “Jesús Nazaretpä, ja'a Israelpäjäya'ay ja'a guobiernähajxy.”

Mänitä pu'uyhuung yajyujpahwa cruzcuhduum.

²⁰Tägøøghayuuc-haamby jaduhṅ yagjahyyä, møødä hebreo, møødä griego, møødä latín. Cajptmäwiingón Jesús miøjpahbejtä. Paadiä judíoshajxy nämay yajmädiaacy nebiä Pilato hänajty tøø yajyuugjaayiyän cruzcøxp. Mänitä teedywiindsøṅ ja'a Pilato hajxy ñämaayy:

²¹—Cab hijty jaduhṅ yhahixø'øy coo jaduhṅ cu mjahy: “Ja'a Israelpäjäya'ay ja'a guobiernähajxy.” Jaduhṅ cu mjahy: “Nä'a nibiädäacäp jaduhṅ nebiä Israelpäjäya'ay ja'a guobiernähajxiän.”

²²Mänitä Pilato yhadsooy: —Tøøch jaduhṅ njaay; cáboch nyajtägatsa'añ.

²³Coo Jesús hänajty tøø miøjpahbedyii, mänitä soldado ja'a Jesús ja'a wyit hajxy yajpädø'cä. Nämädaaxc ja'a soldadohajxy hänajty. Mänitä wit hajxy yajwa'xy cødu'ug. Jii Jesús ja'a yoñwit hänajty tu'ug. Tu'ugwit hänajty tøø quiojy; cab hänajty maa xiuyyä.

²⁴Mänitä soldadohajxy ñiñämaayyä:

—Cab jaduhṅ yhooyä coo hädaa wit hajxy nhagøødsøøyyämät. Tsøg hajxy häyø'cäm. Pøṅ hädaa wit jaduhṅ cuhäyø'øgäp, je'le jaduhṅ je'ehädäp.

Mänitä soldadohajxy jaduhṅ jiaanč häyø'cy. Jaduhṅdsä Diosmädia'agy tiøjiajty maa jaduhṅ cujaay myiñän: “Xyajwá'xøch ja'a nwit hajxy; xquihäyø'cøch ja'a nwit hajxy jaduhṅ.”

²⁵Jimä Jesús ja'a tiaj hänajty tiäna'ay maa hänajty mädøyyä tøø miøjpahbedyijän, chaadsä tiaj ja'a piuhdo'oxy, chaadsä María ja'a Cleofas ja'a tio'oxiøjc, chaadsä María Magdalena. Jimä Jesús ja'a miägu'ughajpä hänajty tu'ug tiäna'ay maa ja'a Jesús tiaj mädøyyän, ja'a Jesús hänajty jiaanč tehṁ chojpiä. ²⁶Coo hajxy yhixä ja'a Jesús, mänitä Jesús ja'a tiaj ñämaayy:

—Maam, hädaads mhunghädäp.

²⁷Mänitä Jesús ja'a miägu'ughajpä ñämaayy:

—Hädaads mdajhädäp, ja'a høøchä ndaj.

Mänit jiaanč tajnäbøjcy.

²⁸Mänitä Jesús miänaaṅ:

—Tødsóøyyäböch.

Tøjiajt ja'a Diosmädia'agy jaduhñ. Najuøøbiä Jesús hänäjty coo hänäjty tøø yhabejnä. ²⁹ Jimä texy hänäjty tu'ug quiøøñä'ay vinoxunmøød. Mänitä xo'od hajxy quiugonøøyy vinojooty. Cøjx je'e chomø'øy. Mänitä paxy hajxy yagjøjwøønøøyy ja'a xo'od. Mänitä Jesús ja'a xo'od hajxy yaghayuugøøyy. ³⁰ Coo Jesús ja'a vino miuu'cy, mänitä miänaañ:

—Tøøds jaduhñ miaañä.

Mänitä quiopc yagjänaañnä. Mänit yho'nä.

³¹ Mänaa ja'a Jesús yho'oguiän, ja'a pascuaxøø hänäjty tehñ yhadsuujøøby. Cujaboom ja'a mõjpascuaxøø hänäjty jiada'añii, poo'xxiøøjooty. Jaduhñdsä judíošhajxy hänäjty quiuhdujthaty, cabä ho'ogyjiäya'ay hajxy hänäjty jim yajmähmø'øy cruzcøxp ja'a poo'xxiøøjooty. Mänitä Israelpä ja'a Pilato hajxy hoy ñäma'ay coo soldado quiéxät weenä Jesús ja'a tiecyhajxy nøcxy tiøjjäxä neby hajxy paquiä yho'ogät. Nägooyä hajxy jaduhñ yho'ogät, mänit hajxy yajmänacøød cruzcøxp. ³²⁻³³ Mänitä Pilato ja'a soldado jiaanč quejxy. Coo ja'a soldadohajxy jim miejch, mänit hajxy yhijxy coo ja'a Jesús hänäjty tøø yho'ogy. Cabä tiecy hajxy je'e ñä'a tøjjä. Mänitä ñähmøjcpähajxy tiecytiøjjä nämetsä. Cahnä hajxy hänäjty yho'ogy.

³⁴ Mänitä Jesús quiaächmägumøøyyä cuhmdhaam. Soldado jaduhñ tu'ug jatcøøyy. Mänitä nø'ty piädsøømy chaadsä nøø. ³⁵ Høøch, tøyhájthøch jaduhñ

tøø nhixy. Páadyhøch mijts jaduhñ nyajmädohyaty neby hajxy jaduhñ mmäbögat. ³⁶⁻³⁷ Jecy hajxy jaduhñ quiujahy Diosmädia'agyjiooty ja'a Jesúscøxpä: “Cabä piajc tiøjáañäxä.” Jaduhñ hajxy quiujahbiä ja'a Jesúscøxpä: “Wyiinhee'ppedaamby hajxy, ja'a hajxy hänäjty tøø quiúmiäbä.” Coo ja'a Jesús ja'a tiecy jaduhñ quia'a jaanč tøjjäxä, coo jaduhñ jiaanč cuuma, tøjiajt ja'a Diosmädia'agy jaduhñ.

³⁸ Tu'ugä jäya'ay hänäjty jim choñ Arimatea. José hänäjty xiøhaty. Hamee'ch ja'a Jesús hänäjty miøødnimiägu'ughadyii. Chähgøøbiä José ja'a judíos hänäjty. Paadiä Jesús hänäjty hijxwiinduum quia'a møødwädityii. Mänitä José ja'a cuhdujt hoy yajpädsømy maa ja'a Pilatän coo ja'a Jesús yajmänaca'añ cruzcøxp. Mänitä Pilato ja'a cuhdujt jiaanč yejcy. Mänitä José ja'a Jesús yajmänajcy cruzcøxp. ³⁹ Mänitä Nicodemo ja'a perfume miämejch hii'xmajc kilo. Mäyabicø'øy miämejch møødä mirra møødä áloes. Tøø hänäjty jiegø'øy coo ja'a Nicodemo hänäjty tøø yhuug hoobiä coods maa ja'a Jesúsän. ⁴⁰ Mänitä José ja'a Jesús hajxy ñähbijty møødä Nicodemo. Jiibiä perfume hajxy yajmänähbidøøyy. Jaduhñdsä judíošhajxy hänäjty quiuhdujthaty. Perfumemänähbidø'øy ja'a ho'ogyjiäya'ay hajxy hänäjty yajnaaxtägø'øy. ⁴¹ Jimä olivocam hänäjty tu'ug mäwiingón maa ja'a Jesús hänäjty tøø miøjpahbedyijän. Jiibiä tsaajut hänäjty tu'ug olivocamjooty wiinmøjtuum. Naamba'ay ja'a tsaajut hänäjty.

Cahnä ho'ogyjiäya'ay hänajty jii by piädaactsooñiinä. ⁴²Ja'a judíoshajxy, tsuu ja'a pioo'xxiøø hajxy hänajty yajtsohnda'agy. Cab hajxy hänajty quiuhdujthaty coo hajxy tii tiúnät ja'a poo'xxiøøjooty. Ja ween ja'a poo'xxiøø hänajty quia'a habaady, paadiä Joséhajxy quia'a nábaadøøyyä coo hajxy hoy jäguem cu yajnaaxtägøøyy. Paady hajxy jimäi nãä pädaacy tsaajutjooty ja'a olivocamjootypä.

20 Cumaaxc, näxøø hänajty je'le. Mänitä María Magdalenahajxy jim ñøcxy maa ja'a tsaajutän, maa ja'a Jesús hänajty tøø ñaaxtägø'øyän. Cahnä hänajty hoy jiajjø'ogyñä. Coodsjuøøbyñä hänajty. Mänit hajxy yhijsy coo ja'a tsaajutjooty. ²Coo ja'a María yhijsy coo ja'a tsaajutjooty. Mänit wyiimbijty päyø'øguiä. Mänitä Simón Pedrohajxy piaatä chaadsä Jesús ja'a miägu'ughajpä, ja'a Jesús hänajty jiaanč tehñ chojpiä. Mänitä María miänaañ:

—Tøø ja'a nWiindsøñhajtäm hajxy xyajpadsøømä tsaajutjooty. Cab højts nnajuø'øy pämaadä hajxy tøø piäda'agy.

³Coo ja'a Pedrohajxy jaduñ miädooyy, mänit hajxy jim ñøcxy päyø'øguiä maa ja'a tsaajutän. Mänitä María jadähooc pianøxcumbä. ⁴Mänitä Pedro yhöxpäyø'cä. Jayøjp ja'a Pedro jiamiøød jim miejch maa ja'a tsaajutän. ⁵Mänit jii by quiuwoodsøøyy tsaajutjooty. Mänitä wit yhijsy coo jii by yhöxna'ay jutjooty. Pero cab jii by tiehñ tiägøøyy. Nää cuhixøøyy

jaduñ. ⁶Mänitä Simón Pedro høxhaam jiaac mejch. Tu'uda'aquiiä jii by tiägøøyy tsaajutjooty. Jaduñä wit yhijsy coo jii by yhöxna'ay. ⁷Mänitä paayy yhijsy, ja'a Jesús hajxy hänajty tøø yajcuhmäguftiäbä. Hawiing hänajty jim ñe'na'ay.

⁸Mänitä Pedro jiamiøød piädägøøbiä, ja'a hänajty jayøjp tøø miéchäbä. Mänitä paayy yhijsy coo hawiing ñe'na'ay. Paady jaduñ miäbøjcy coo ja'a Jesús hänajty tøø jiuypioøcy. ⁹Cahnä Diosmädia'agy hajxy hänajty hoy wyiinjuø'øyñä ja'a jecypiä maa jaduñ myiñän coo ja'a Jesús hänajty jiuypioøga'añ coo hänajty tøø yho'ogy. ¹⁰Mänitä Pedrohajxy wyiimbijnä, ñøcxnä hajxy maa ja'a tiøjc-hajxiän.

¹¹Tøø ja'a María hänajty piaméjtscombä høxhaam maa ja'a tsaajutän. Coo ja'a Pedrohajxy wyiimbijnä, mähmøøyy ja'a María jim nidiuhñ. Wi'i jioøby hänajty. Mänit jii by quiuwoodsøøguiumbä tsaajutjooty. ¹²Mänitä Diosmoonsä metsc yhijsy, ja'a tsajpootyptsohmbä. Haagä nähboobwit hajxy hänajty. Jii by hajxy hänajty yhäña'ay maa ja'a Jesús hänajty tøø wyijtsna'ayän. Tu'jäya'ay hänajty yhäña'ay maa ja'a Jesús ja'a quiopc hänajty tøø quioonna'ayän. Y tu'jäya'ay hänajty yhäña'ay maa ja'a Jesús ja'a tiecy hänajty tøø quiajpna'ayän. ¹³Mänitä María miäyajtøøwa:

—Muuxy, tii coo mwi'i jioø'øy.

Mänitä María yhadsooyy:

—Tøøchä nWiindsøñ hajxy xyajpadsøømä. Pämaadä hajxy tøø piäda'agy.

¹⁴⁻¹⁵Tuunä María jaduñ nãä hadsooyy, mänitä wia'wiimbijty.

Mänitá Jesús yhi^jxy. Jim hánajty tiána'ay; pero cab jadhun̄ yhøxcajpy. Olivocam̄güeendáhajpä je'le yhajoodhajt. Mänitá Jesús miánaañ: —Muuxy, tii coo mwi'i jiø'øy. Pøn mhøxtaaby.

Mänitá Maríá yhadsooyy: —Tsäguhm̄, pø miičh tøø myajpádsømy, høøch hawáanäc maa tøø mbáda'agy nébiøch häyaa nøcxy nyajpádø'øgy.

¹⁶Mänitá Jesús yhadsooyy: —iMaría!

Tuunä Maríá jadhun̄ nã'ä nãmaayyá, mänitá wyiinhee'ppejty. Mänitá yhøxcajpy coo je'le Jiesúsä. Mänitá jadhun̄ miánaañ hebrehayuuc-haamby:

—iRaboni! —je'le jadhun̄ nãnøømby “Wiindsøn̄.”

¹⁷Mänitá Maríá ja'a Jesús jia mats jia mänenaañ. Mänitá Jesús miánaañ:

—Ca'ačh xmiach. Cáhnoch jim̄ nhoyñä maačhä nDeediän. Nøcxhøčhä njamiøødhajxy hawáanäc cooçh jim̄ nnøcxa'añ maačhä nDeediän, maačhä nDiosän. Jaaná je'le mijts mDeedyhajpä mDioshajpä.

¹⁸Mänitá Maríá ja'a Jesús ja'a jiamiøødhajxy hoy jiaančh nãma'ay: —Tøøch je'le nhixy, ja'a hajxy nWiindsøn̄hájttämbä.

Mänit hajxy çøjx yhawáanäxä nebiaty ja'a Maríá hánajty tøø nãma'ayii.

¹⁹Coo quioodsøøñä, mänitá Jesús ja'a jiamiøødhajxy ñiyhagøøyyänä. Hix, chähgøøby ja'a judíos hajxy je'le hánajty; paady hajxy ñiyhagøøyyä. Mänitá Jesús jiiby

ñäguехtøø'xy hagu^jc hawa'ads.

Mänitá Jesús miánaañ:

—Mäguieppe hajxy. Ca'a hajxy tii mdajy mmay.

²⁰Mänitá Jesús yajcähxø'cy ja'a quiø'øjoot møødä quiaačhac maa hánajty tøø jiotiän. Coø hajxy yhi^jxy, mänit hajxy ñajuøøyy coo je'le Jiesúsä. Mänit hajxy xioondaacy. ²¹Mänitá Jesús miánaañ:

—Ca'a hajxy tii mdajy mmay. Nébiøčhä nDeedy tøø xwyiinguexiän, jaaná jadúhnhøch mijts nwiinguexaam̄bä.

²²Mänitá Jesús nãbäxuyj ja'a jiamiøødhajxy. Mänitá miánaañ:

—Wiingpøc ja'a Dioshespíritu hajxy. ²³Høøch mijts ja'a mäjaa nmo'owaam̄by. Pøn^jaty mijts mhawáanäp coo Dios ja'a piojpä quiädieeyhajxy tøø yajnähwa'ačh, pues tøyhajt jadhun̄ coo Dios tøø yajnähwa'ačh. Pøn^jaty mijts mhawáanäp coo Dios tøø quia'a yajnähwa'ačh, pues tøyhajt jadhun̄ coo Dios tøø quia'a yajnähwa'ačh.

²⁴Majmetscjäya'ay ja'a Jesús hánajty tøø miøødwädity. Tu'ug hánajty xiøhaty Tomás, ja'a hajxy hánajty nãnøøm^biiä “Hametsc-huung.” Mänaa ja'a Jesús ñäguехtøø'xtsooñän jayøbajt, cabä Tomás hánajty jim̄. ²⁵Mänitá Tomás nãmaayyá ja'a jiamiøødhajxy: —Tøø højts nhixy, ja'a hajxy nWiindsøn̄hájttämbä.

Mänitá Tomás miánaañ:

—Mänitøch nmäbøgät cooçh ndehm̄ yhixät pø jaančh jot ja'a quiø'ø, cooçhä ngø'ø jiiby nhuuc teh̄m̄ piädá'agät maa ja'a

quiaächmøjc juutän. Pø cabä, cáböch jaduhñ nnä'ägä mábögät.

²⁶Cuctujxøø, jiibiä Jesús ja'a jiamiøødhajxy hänäjty tøgóotiägumbä. Jiibiä Tomás hänäjtypä. Tøø ja'a tøjc hajxy hänäjty yhagøøguiumbä. Mänitä Jesús jiiby ñäguehxtøø'xcumbä haguyc hawa'ads. Mänitä miänaañ: —Mäguieppe hajxy. Ca'a hajxy tii mdajy mmay.

²⁷Mänitä Tomás ñämaayy: —Tehm quiudsiiwø'øw yø'ø mgø'ø yaaby ngø'øjóotyhøch maa ja'a clavoahaawän. Híjxägøch hádaa ngø'ø. Päda'ag yø'ø mgø'ø yaaby ngaaächmøjc-høch. Miičh, caj miičh hijty mmäböcy. Chaačh miičh nnämä'awät coo mmäböğät.

²⁸Mänitä Tomás yhadsooyy: —Miičhhøch nWiindsøn'hajpy, nDioshajpy.

²⁹Mänitä Jesús miänaañ: —Coočh miičh tøø xyhixy, paady jaduhñ mmäböcy. Jootujc hajxy je'e, ja'a hajxy tøø miäböquiäbä, hóyhøch hajxy je'e tøø xquia'a ja hixy.

³⁰Madiu'u ja'a Jesús ja'a hoy-yagjuøøñäjätypä yajcähxø'cy ja'a jiamiøødä wyiinduuhajxy. Cab yam cøxiä quiujaayä hádaa librocøxp. Cujwa'xy je'e yam quiujaayä. ³¹Paady yam quiujaayä neby hajxy jaduhñ mmäböğät coo Jesús ja'a Dios Tiededyhaty, coo Jesús je'e Miesiashaty, coo ja'a Dios jaduhñ tøø quiexy. Coo ja'a Jesús ja'a miädia'agy hajxy mmäböjcat, mhídäp hajxy jim tsajpootyp cøjxta'axiøø.

21 Jadähooc ja'a Jesús yhíjxägumbä ja'a

jiamiøødhajxy jim mejypia'a ja'a xøhajpä Tiberias. ²Jimä Simón Pedrohajxy hänäjty møødä Tomás, ja'a hajxy hänäjty ñänøømbiä “Hametsc-huung”, møødä Natanael ja'a Canä de Galilea tsohmbä, møødä Zebedeo yhuunghajxy, møød hajxy jaac nämetspä. Haagä Jesús ja'a jiamiøødhajxy jaduhñ. ³Mänitä Simón Pedro miänaañ:

—Nøcxy nhuuc jaac hacxmach.

Mänitä jiamiøødhajxy miänaañ:

—Ween hajxy nnöcxäm.

Mänit hajxy jiaančh nøcxy mejypia'a. Mänit hajxy biarcotägøøyy. Mänit hajxy hoy jia hacxmadsa'añ. Tu'tsuhm hajxy jaduhñ jia wädijty. Pero cab hajxy tii ñä'ägä paaty. ⁴Coo jjobøøyy, jimä Jesús hänäjty tiäna'ay pu'uwiing. Pero cabä Jesús yhøxcajpä ja'a jiamiøødhajxy.

⁵Mänitä Jesús miänaañ:

—Mägu'ughajpädøjc, nej, cab hajxy tii tøø mnä'ägä paadiä.

Mänit hajxy yhadsooyy:

—Joom mägu'ughajpä, cab højts tii tøø nnä'ägä paady.

⁶Mänitä Jesús miänaañ:

—Päda'ag yø'ø mdsaa y hajxy jimhaamby ja'a barcohaooyhaampiä pa'ahaam. Mänit hajxy jaduhñ mbáadät.

Mänitä chaay hajxy jim jiaančh pädaacy. May ja'a hacx hajxy jiaančh tehñ yaghadujcy. Cab hajxy hänäjty miaya'añii coo ja'a tsaay hajxy hänäjty jia wijtspädsøma'añ nøøjooty. ⁷Mänitä Pedro ñämaayyä ja'a Jesús ja'a jiamiøød, ja'a Jesús hänäjty jiaančh tehñ chojpiä:

—iJa'a nWiindsøn'hájtämhajxy yø'ø!

Tuunä Pedro jaduñ nã'ä mädooy coo je'e Jiesúsä, mänitã wyitpägøoy. Høxyø'øhuungmøød hajxy hãnajty yhacxmach. Mänitã quiuhtøpxnajxy nõøjooty. Nøcxaamb hãnajty pu'uwiing maa ja'a Jiesúsän. ⁸Ja'a jiamiøødhajxy, jiiby hajxy miähmøøyy barcojooty. Mejypia'a mäwiingon hajxy hãnajty yhacxjoomy. Jaduñnäda'a ja'a mejypia'a hajxy hãnajty tøø ñähgue'egy mägo'xmetro. Hujts ja'a tsaay ja'a hacx hãnajty miøødä. Mänitã tsaay hajxy pawich yajnøcxy mejypia'a barcojooty. ⁹Mänit hajxy biarcopädsøømy. Mänitã juhñdy hajxy yhiixy coo jim wyi'i tioy pu'uwiing. Jimä Jiesús hãnajty yhacxtsa'ay. Jimä tsajcaagy hãnajty yajcoonna'ay. ¹⁰Mänitã Jiesús miãnaañ:

—Mämín ja'a hacx hajxy mejtstägøøg, ja'a hajxy tøø mmáchäbä.

¹¹Mänitã Pedro tiägøøguiumbä barcojooty. Mänitã tsaay pawich yajmejch mejypia'a. Mägo'x cu juxychägui'xmajtägøøg ja'a hacx hãnajty jiiby tsaajiooty, haagä majatypä. Hujts ja'a tsaay hãnajty, pero cabä hacx yajcøø'ch. ¹²Mänitã Jiesús miãnaañ:

—Minds hajxy cay.

Cab hajxy miäyajtøøyy pøn je'e. Tøø hajxy hãnajty yhøxcapy coo je'e Jiesúsä. ¹³Mänitã Jiesús ja'a jiamiøød ja'a tsajcaagy hajxy miooy møødä hacxtsa'ay.

¹⁴Miädägøøghoocpä ja'a Jiesús hajxy hãnajty tøø yhiixy mänaa hãnajty tøø jiuypioquiän.

¹⁵Coo hajxy quiaabiädøøyy, mänitã Jiesús ja'a Simón Pedro ñãmaayy:

—Simón, Juan miich mdeedyhajxy. Pøñhøchäda'a xmiaas tsojp, yø'ø njamiøødhajtãm o miich.

Mänitã Pedro yhadsooyy:

—Mnajuøøby miich cooçh miich njuø'øy nebiä hajch nebiä puhya'ayän.

Mänitã Jiesús miãnaañ:

—Yaghójcägøøchä nmeeghuunghajxy.

Ca'a mieeghuungä ja'a Jiesús jaduñ tiehm ñänøøm. Je'eduhñ ñänøøm coo ja'a Simón Pedro ja'a jäya'ayhajxy yajnähixø'owät, ja'a Jiesús ja'a miädia'agy hajxy panøcxäbä. ¹⁶Mänitã Jiesús miänáangumbä:

—Simón, nej, xchójpøch miichä.

Mänitã Pedro yhadsooyy:

—Mnajuøøby miich cooçh miich njuø'øy nebiä hajch nebiä puhya'ayän.

Mänitã Jiesús miãnaañ:

—Cueendähajtägøøchä nmeeghajxy.

¹⁷Ja'a miädägøøghoocpä ja'a Simón Pedro ñãmáayyägumbä:

—Simón, nej, jaduñch xjwiø'øyä nebiä hajch nebiä puhya'ayän.

Mänitã Pedro jiootmadiägøøyy coo miäyajtøøwa ja'a miädägøøghoocpä.

Mänitã Pedro yhadsooyy:

—Cøxiä miich mnajuø'øy.

Mnajuøøby jaduñ cooçh miich njuø'øy nebiä hajch nebiä puhya'ayän.

Mänitã Jiesús miänáangumbä:

—Pues, yaghójcägøøch ja'a nmeeghajxy. ¹⁸Tehm tiøyhájthøch miich chaa nnámá'awät, coo hijty mdsucywiajyhatyñä, hamdsoo ja'a mwit hijty mbägø'øy. Mwädiij hijty maa ja'a mjoot

hijty choquiän. Pero coo hänäjty tøø mmäjaanä, mänit mgø'ø mxajtøwa'añ. Mänitä wiinghäna'c ja'a mwit xyajpägø'øwa'añ. Mänit xyajnøcxa'añ maa ja'a mjoot hänäjty quia'a tsoquiän.

¹⁹Paadiä Jesús jaduññ miänaañ nebiä Pedro jaduññ ñajuø'øwät neby hänäjty yagho'oga'añii, nebiä Dios ja'a miäjaa jaduññ yajcähxø'øgät ja'a Pedrocøxpä. Mänitä Jesús ja'a Pedro ñämaayy: —Jam hajxy wädijtäm.

²⁰Mänitä Pedro quioowiimbijty. Mänitøch xyhijxy coočhä Jesús hänäjty nbanøc xpä. Høøch, Juá nghøch høøch. Høøchä Jesús hijty xjiaanč tehñ chojp. Høøch je'e häñaayy ja'a Jesús ja'a ñähmøjc mänaa højts ndsuugayyän. Høøch jaduññ nyajtøw: “Wiindsøn, pøn miich jaduññ xyegaamb.” ²¹Coočhä Pedro xyhijxy, mänitä Jesús miäyajtøoyy:

—Wiindsøn, yø'øya'ayäts, nej yø'øya'ay jiada'añ.

²²Mänitä Jesús yhadsooyy:

—Ca'a myiichä mgüentä yø'ø pø chójpiøchä njoot jaduññ coo yø'øya'ay hänäjty jiinä coočhä ngädaactägätsät. Pero miich, panøcxägøch ja'a nmädia'agy.

²³Mänitä mädia'agy jii wiädijty maa ja'a jäya'ayhajxiän ja'a Diosmädia'agy hajxy panøc xpä cóogøch tyijy nga'a ho'oga'añ. Pero cabä Jesús jaduññ miänaañ cóogøch nga'a ho'oga'añ. Nøm jaduññ miänaañ: “Ca'a myiichä mgüentä yø'ø pø chójpiøch ja'a njoot jaduññ coo yø'øya'ay hänäjty jiinä coočhä ngädaactägätsät.”

²⁴Høøch, Juá nghøch høøch. Tehñ tiøyhájthøch jaduññ tøø nhixy nébiøch chaa ngujaayän. Ñajuøøbiøchä njamiøødhajxy coočhä tøyhajt nmøødä.

²⁵Madiu'u ja'a Jesús jaduññ jiaanč tuuñ. Cábøch yam cøxiä tøø ngujaay. Cooch häxøpy cøxiä tøø ngujaay, cabä ndijy hädaa naaxwiimbä miädøyhädät. Amén.

Hechos

1 Mägu'ughajpä Teófilo, mänáajøch miich jayøbajt nnäjaayø'øyän, mänitøch ngøxy cujahy nebiatiä Jesús yaa wiädijty hädaa yaabä naaxwiin, møød nebiaty yajnähiøøyy, ²⁻⁴mänaa jaduhñ tiägø'øyän wädiǰp häxtä coonä hänajty ñøcxtägatsa'añ tsajpootyp. Cahnä Jesús hänajty yho'ogyñä, tøøyyämä jiamiøød hänajty wyiinguexy coo miädia'agy yajwá'xäxät wiinduhmyhagajpt. Coó Jesús yho'cy, mänit jiuypioǰtägajch. Coó Jesús jaduhñ yhiǰxä ja'a jiamiøødhajxy, jaduhñä tøyhajt hajxy miøødhajty coo Jesús hänajty tøø jiaančh juypioǰtägach. Coó Jesús jaduhñ jiuypioǰtägajch, mänitä jiamiøød jiaac møødwädiǰty juxychägui'xxøø. Jaduhñä Jesús hänajty yajnähiøø'øy coo Dios hajxy xyhanéhäm ja'a miøcmäjaahaam. Coó juxychägui'xxøø yhabejty, mänitä Jesús ja'a jiamiøød miøødhamugøøyy maa tun hänajty xiøhatiän Olivostún. Mänitä Jesús tiägøøyy hanehmä ja'a Dioshëpíritu miäjaahaam. Mänit miänaañ:

—Coo hajxy jim mnøcxtägätsät Jerusalén, cab hajxy jim mdsohnädägätsät. Jim hajxy jaduhñ

mjøbhíxøt cooč mijtsä nDeedy ja'a yhEspíritu xyajnäguéxät nej mijts tøø nnäma'ayän. Tøøch mijtsä nDeedy xyhuuc yajwiinwaanøøbiä coo hajxy jaduhñ xyajnäguexa'añ. ⁵Ja'a Juan, nøøhaam hijty miäyajnäbety. Tøyhajt jaduhñ. Pero jaboom juxtøpc mijtsä Dios ja'a yhEspíritu xjiaančh yajnäguexa'añ. Ja'a yhEspírituhaam hajxy jaduhñ xyajnäbeta'añ —nømä Jesús ja'a jiamiøød ñämaayy, ja'a hajxy hänajty tøø yhamugø'øyäbä.

⁶Mänitä Jesús miäyajtøøwä: —Wiindsøn, nej, jaduhñ miich tøø mwiiinmahñdyhatiä coo højtsä nmädsip mga'a yajmäjädáacnädä, højts judíos, møød coo højtsä nhamdsoo mägunaaǰ ngobiernähájñät.

⁷Mänitä Jesús yhadsooyy: —Ja'a nDéedyhøčhä tøyhajt møød mänaa jaduhñ yajtøjiada'añ nej mijts myajtøyyän. Je'e cuhdujt nidiuhm møød coo jaduhñ yajtøjiädät. Pero mijts, caj yhähiøø'øy coo mijtsä tøyhajt mmøødhädät. ⁸Coo mijtsä Dioshëpíritu xñägädá'agät, mänitä mäjaa hajxy xmiowa'añ. Mänitøch hajxy jim xmiädiá'agät Jerusalén cooč tøø njuypioǰtägach, hóyhøch

hänajty tøø nja ho'ogy. Møød jim hajxy xmiädiáacpät Judea-naaxooty, møød jim Samaria-naaxooty, møød jim wiinduhmyhagajpt høxtä mäduhñtiä cajpt quiugøxø'øyän.

⁹Mänitä Jesús

miädiacpädøøyy. Jimä Jesús hänajty wyiinhee'ppedyii ja'a jiamiøødhajxy, mänitä Jesús nä'ä nägoobä chajpejty. Mänit hoy tiägø'øy jocjooty. Mänitä Jesús yhiixtägooyä ja'a jiamiøødhajxy.

¹⁰Jim hajxy hänajty chajheebyñä, mänitä jäya'ayhajxy metsc nägüehxtøø'xy jim maa Jesús ja'a jiamiøødä wyiinduumhaxjiän. Nähboobwit hajxy hänajty nämetsc.

¹¹Mänitä Jesús ja'a jiamiøødhajxy nämaayyä:

—Mägu'ughajpädøjc, jim hajxy mdsoon Galilea maa Jesús choonän. Mijtsä mmägunaax yø'ø. Quipxy hajxy hijty mmøødwädity. Ca'a hajxy mwi'i yuugheeby. Ca'a hajxy mwi'i tiajy mwi'i miay. Tøø Jesús jaduhñ ñøcxnä tsajpootyp. Pero coo yhabáadät, mänit jaduhñ wyiimbijtagatsa'añ neby hajxy tøø mhijxnøcxian.

¹²Mänitä Jesús ja'a jiamiøødhajxy jim chohñ maa tun hänajty xiøhatiän Olivos. Mänit hajxy ñøcxy Jerusalén. Tu'kilómetro hänajty jiäguemä. ¹³Jue'le Jesús ja'a jiamiøødhajxy hänajty xiøhaty: Pedro, Juan, Andrés, Felipe, Tomás, Bartolomé, Mateo, Simón ja'a Celote, møødä Judas. Nämetsc hajxy hänajty xiøhaty Santiago. Judas ja'a piuhya'ay je'le ja'a tu'jäya'aybä. Alfeo ja'a Judas ja'a tiedyhajxy hänajty xiøhaty.

¹⁴Naxy hajxy hänajty yhamugø'øy

Diospa'yaaxpä nägøxiä, näguipxy møødä Jesús ja'a tiaj María, møødä Jesús ja'a piuhya'ayhajxy, møødä to'oxiøjc-hajxy, ja'a Jesús hänajty quipxy tøø piawädityíjibä.

¹⁵Cujaboom cumaaxc, mänitä mäbøjpädøjc-hajxy yhamugøøyy. Nämägo'x-cu-ii'x hajxy hänajty. Mänitä Pedro tiänaayyø'cy. Mänit miänaañ:

¹⁶⁻²⁰—Mägu'ughajpädøjc, jéquiänä

David quiujahy salmosjooty ja'a Judascøxpä, nebiatiä Dioshespíritu ñajtsapxøøyyä: Pactsäcä tiøjc jiada'añ; caj pøn jim chäna'awaannä. Ja'a Judas ja'a tiøjc jaduhñ nänøømäxä. Jaduhñ jim miänaambä coogä Judas wiingjäya'ay hänajty ñähduundu'uda'añii. Jaančh tøjiajt jaduhñ ja'a Judascøxpä nebiatiä David jecy quiujahyyän. Näguipxy højtsä Judas hijty xmiøødwädijtäm. Näguipxy højts hijty xmiøødtuunmújcäm. Mänitä Judas wyiinmahñdyhajty coo Jesús ñähdúgät. Mänitä Judas ja'a jäya'ay wioomejch maa Jesús hänajtiän, ja'a Jesús hajxy hänajty madsaambä. Coo Judas jaduhñ haxøøg jiatcøøyy, mänit miäjuuyyä. Mänitä naax hoy jiuy. Mänit hoy quiuhgahnaxy cuhmänac. Coo mioxtsäbijty, mänitä tyiinčh yhøxhänøømbädsøømy. Coo jäya'ayhajxy jaduhñ miädoyhajty, ja'a hajxy hänajty jim tsänaabiä Jerusalén, coo ja'a Judas hänajty tøø yho'ogy, mänitä naax hajxy yajxøbejty Acéldama, ja'a Judas hänajty tøø jiuyyabä; jaduhñ miädiä'agytiägø'øy yhamdsoo hayuuc-haambyhajxy, Nø'ñaax.

²¹⁻²²Jii hõjtsä nmägu'ughajpähjätäm, näguipxy hajxy tøø xmiøødwädjätäm mänaa Jesús hijty jiijän, mänaa Juan ja'a Jesús yajnäbetiän, hõxtä coo Jesús chajpejty cøxp. Hahixøøby jaduħ coo hajxy tu'ljäya'ay nwiinguéjxämät, ja'a Judas nähduundu'udaambä. Näguipxiä mädia'agy hajxy xmiøødyajwá'xämät coo Jesús tøø juijypiøcy —nømä Pedro miänaañ.

²³Mänitä jäya'ay metsc nänøømä.

Tu'ug hänajty xiøhaty Matías. Jatu'ugpä, tægøøgtu'u hänajty xiøhaty: José, Barsabás, Justo.

²⁴Mänitä Pedrohajxy tiægøøyy Diospa'yaaxpä:

—Teedy, miich mnajuøøby neby hõjts nägøxiä nwiinmahñdyhatiän. Hõjts hawáañac mädyii miich tøø mwiimbiy hädaahajxy nämetspä, ²⁵mädyiibä Judas jaduħ nähduundu'udäp. Coo Judas jaduħ quiädiehy, paadiä tiuung yajtägooyy. Paady jii by yhädaacy haxøøgtuum —jaduħnä Dios hajxy pia'yaaxy.

²⁶Mänit hajxy yhäyø'cy suertehaam mädyii hänajty tuungtägø'øwaamb. Mänitä Matías piaatä. Mänitä Matías hajxy quiumaayy, ja'a hajxy hänajty nämajtu'ugpä.

2 Coo Pentecostés-xøø yhabaaty, mänitä mähøjpädøjc-hajxy nägøxiä yhamugøøyy. ²Jiiby hajxy hänajty tøgooty yhäña'ay. Mänit hajxy miädooyy nebiä poj yhamuuyän coo møc piojy. Cøxp jaduħ chohndaacy. Møc jii by yhawaandsøøyy tøgooty.

³Mänit hajxy nägøxiä nägädaacä

hanidiuħmjaty ja'a Dioshespíritäm. Jaduħ hänajty quiähxø'øgy nebiä tootsän, nebiä jøønhaayän. ⁴Mänit hajxy nägøxiä yhadägøøyyä jioottägøøyyä ja'a Dioshespíritäm. Mänit hajxy tiægøøyy mädiaacpä wiinghayuucjaty. Ja'a Dioshespíritu hänajty jaduħ yajmädiaacp.

⁵Tøø judiøshajxy hänajty nämay miech Jerusalén xøøhajpä. Wiinduhmyhagajpt hajxy hänajty chooñ. Paady hajxy miehch Jerusalén xøøjooty, quiudiunaambiä quiuhdujt hajxy hänajty jaduħ neby hajxy hänajty quiuhdujthatiän.

⁶⁻⁷Coo judiøshajxy miädooyy coo poj hänajty møc yhamuuy jii by tøgooty maa mähøjpädøjc-hajxy hänajty tøø yhamugø'øyan, mänitä judiøshajxy jii by tiøjtägøøyy. Coo judiøshajxy jaduħ miädooyy coo mähøjpädøjc-hajxy hänajty quiapxy miädia'agy wiinghayuucjaty, mänitä judiøshajxy wyiinjuøøyy yhamdsoo hayuuc-haamby neby hajxy hänajty miädia'aguiän majaty hajxy hänajty chooñ wiinduhmyhagajpt. Coo hajxy jaduħ miädooyy, mänit hajxy jiaanč tehñ yagjuøøyy nägø'ø nädecypiä. Mänit hajxy ñiñamaayyä:

—Yø'ø jäya'ayhajxy xiiby capxpä mädiaacpä, haagä Galilea yø'ø hajxy chooñ. ⁸Tii hajxiäda'a coo tøø nmädóowäm nebiaty hajxy cøjwiinghayuuc tøø nmámín tøø nmäga'awøøyyäm. ⁹Hix, wiinduhmyhagajpt hajxy ndsóhñäm, Partia, Media, Elam, Mesopotamia, Judea, Capadocia, Ponto, Asia, ¹⁰Frigia, Panfilia, Egipto, møød jim Libia, Cirene

mäwiingón. Høxtä Roma hajxy näje'e ndsóhñäm, ¹¹møød Creta, mõød Arabia. Näje'e hajxy judíos nmámín nmäga'awóøyyäm. Näje'e ja'a judíos quiuhdujt wyiinmahñdy hajxy tøø njøjpøgóøyyäm neby hajxy quiuhdujthatiän. Coø yø'ø Galileabä-jäya'ayhajxy jaduhñ tøø quiapxy tøø miädia'agy wiinghayuucjaty nebiatiä Dios ja'a hoy-yagjuøøñäbä tøø yajcähxø'øgy, jaduhñ hajxy tøø nwiinjuøøyyäm ja'a nhamdsoo hayuuc-haamby cøjwiinduum —nømä judíoshajxy ñiñämaayyä.

¹²Coo judíoshajxy jaduhñ wyiinjuøøyy ja'a yhamdsoo hayuuc-haamby, paady hajxy jiaanč tehñ yagjuøøyy nägø'ø nädecypiä. Mänit hajxy ñimiäyajtøøwä:
—Tii yø'ø jäya'ayhajxy coo quiapxy coo miädia'agy wiinghayuucjaty, yø'ø hajxy tsohm̄bä Galilea.

¹³Mänit hajxy näje'e yhadsooyy xi'igy hanähaty:

—Múucäp hajxiäda'a.

¹⁴⁻¹⁵Mänitä Pedrohajxy tiänaayyø'cy mõødä jiamiøødhajxy ja'a nämajtu'ugpä, ja'a hajxy hänäjty jaduhñ Dioswiinguexyä. Mänitä Pedro mõc tiägøøyy mädiaacpä:

—Mägu'ughajpädøjc, nägøxiä hajxy njudíoshájtäm mäduhñtiä hajxy yaa nyajpáatäm, mäduhñtiä hajxy jäguem̄ mdsooñ, mõød mijts yaa tsohm̄bä Jerusalén. Näje'e mijts mmäna'añ cooc tyijy højts nmu'ugyii. Pero cab jaduhñ tiøyyä. Cab jaduhñ pøn̄ yhu'ugy jopynä. ¹⁶Coo hajxy tøø mhixy tøø mmädoy coo højts tøø ngapxy

tøø nmädia'agy wiinghayuucjaty, jaanč tøjiajt jaduhñ nebiä Joel jecy quiujahyyän ja'a Dioscøxpä. Diosquexiä Joel hänäjty. Jaduhñä Joel jecy quiujahy:

¹⁷Jaduhñä Dios miänaañ: Coø hänäjty yhabaadaañnä coø naaxwiimbä hänäjty wyiimbidaañnä, mänithøchä nhEspiritu nguexa'añ maa jäya'ayhajxy nägøxiän, mäduhñtiä hajxy yaa yhyt hädaa yaabä naaxwiin.

Y mijtsä mmøøx mmajc-hajxy, mänithøchä nmädia'agy hajxy xyajwa'xaañä.

Ja'a høxcujc-häna'c-hajxy, hoy-yagjuøøñjätyhøch hänäjty nyajwiinhixa'añ.

Jaanä jaduhñä majjäya'adiøjc-hajxypä, nyajcuma'awäämbiøch hajxy hänäjty hoy-yagjuøøñjäty.

¹⁸Coo hänäjty yhabaada'añ, mänithøchä nhEspiritu nyajnäguexaambä ja'a nmoonsähajxy, ja'a ya'aybä, ja'a to'oxypä.

Mänithøchä nmädia'agy hajxy xyajwa'xaañäbä.

¹⁹Nyajcähxø'øgäämbiøchä hijxtahñd hoy-yagjuøøñjätyä jim tsajtcøxp mõød hädaa yaabä naaxwiin.

Hochähgøøñjätyhøch jaduhñ nyajcähxø'øga'añ nebiä nø'tiän, nebiä jøønän, nebiä jøønjočan.

²⁰Wiingoodsø'øwaambä xøø hänäjty.

Ja'a po'o, tsapts hänäjty yhana'añ nebiä nø'tiän.

Ja ween hänajty
 quia'a habaadyñä
 cooçhä naaxwiimbä
 nyajwiimbidaannä, cooçhä
 nHuung Jesucristo yaa
 quiädaactägatsa'añ hädaa
 yaabä naaxwiin.
 Mänitä jäya'ayhajxy nägøxiä
 yajtøyhajtyega'añii.
 Jadúhñhøçhä nmøcmäjaa
 hänajty nyajcähxø'øga'añ.
²¹ Pønjataiä Jesucristo hänajty
 capxpaadaamb, je'e hänajty
 hodium mähmø'øwaamb,
 nømä Dios miänaañ. Jim jaduhñ
 myiñ maa Joel jecy quiujahyyän.
²² Mijts israelitas, huuc
 hamädoowhit hajxy hoy. Mnajuøøby
 hajxy jaduhñ coo Dios ja'a Jesús
 ja'a Nazarettsohmä wyiinguejxy
 coo jii tiünät maa mijtsän. Madiu'u
 ja'a Jesús hijxtahñd yajcähxø'cy
 hoy-yagjuøøñäjatypä maa mijtsä
 mwiinduumhajxiän. ²³ Tøø Dios
 hänajty yajnähdiyy coo mijtsä Jesús
 mmädsät. Mänitä cahwiindøyhäna'c
 hajxy hoy myajcø'ødägø'øy. Mänitä
 Jesús hoy miøjpahbedyii cruzcøxp.
 Mänit yho'cy. ²⁴ Pero mänitä Dios
 ja'a Jesús yagjuypijøjtägajch.
 Jaduhñä Dios hänajty tøø miäna'añ
 coogä Jesús tsipcøxp jiuypijøgät.
²⁵ Hiç, jaduhñä David jecy
 miädiaacy ja'a Jesúscøxpä:
 Nnajuøøbiøch jaduhñ cooçh
 homiänaajä xpiuhbety.
 Homiänáajøch jaduhñ
 xcwieendähaty, jadúhñhøch
 pøn xquia'a hadsähgø'øwøt.
²⁶ Páadyhøch jootcujc njaançh
 tehñ ñijjävø'øyii.
 Páadyhøçhä Dios jootcujc
 nba'ya'axy.

Cábøçhä nho'og ndsähgø'øy
 je'eguiøxpä cooçhä njuøhñdy
 nbäda'agy maa Diosän.
²⁷ Xyagjuypijøgáambøch miich
 jaduhñ.
 Cábøch miich jiiby jutjooty
 xyajmähmø'øwa'añ cooçh
 jiiby nbú'udsät,
 je'eguiøxpä cooçh miich
 xyHuunghaty.
²⁸ Xyagjugyhadaámboch miich
 cøjxta'axiøø nej miich
 homiänaajä mjogyhatiän.
 Cooçh miich jaduhñ
 xmiøødhida'añ tehngajnä,
 páadyhøch jootcujc
 nnijjävø'øwa'añii.
²⁹ Mänitä Pedro miänáangumbä:
 —Mägu'ughajpädøjc,
 nmøødhájtämä tøyhajt hajxy
 jaduhñ coo David jaduhñ jecy
 quia'a nimiädiaacä hamdsoo. Hiç,
 coo David jecy yho'cy, mänit hoy
 ñaaxtägø'øy. Jiiby jaduhñ yhityñä
 jutjooty høxtä jäda'anäbaadyñä.
³⁰ Coo David jaduhñ jecy miädiaacy,
 ñajuøøby hänajty jaduhñ coo
 yhapä yhoc hänajty tu'ug
 wyiinguexáanäxä ja'a Diósäm,
 møød coo hänajty yhane'emaambä
 nebiä David jecy yhanehmiän.
 Tøøyyämä Dios hänajty miäna'añ
 coo hänajty yajtøjiada'añ coo
 David ja'a yhapä yhoc hänajty
 tu'ug wiindsøn tiuna'añ. ³¹ Jaduhñä
 David tøyhajt jecy miøødhajty
 coo Dios ja'a wyiinguexypä
 yagjuypijøga'añ coo hänajty tøø
 yho'ogy, møød coo hänajty quia'a
 mähmø'øwa'añ jutjooty, møød coo
 ñi'xä quiopc hänajty jiiiby quia'a
 pu'uda'añ. ³² Ja'a Jesúscøxpä
 David jecy miädiaacy coo Jesús

hänajty jiuypiojtägatsa'añ.
 Tøø højts nhamdsoo hixy coo
 jiaančh juyypiojcy. ³³Mänitä
 Jesús jim miøjyaaxä maa Tieediä
 wyiinduumän. Mänit nämaayyā
 coo jim yhøxtá'agät maa Tieediä
 yhahooyhaampiän. Mänitä
 Jesús jaa Tieediä yhEspiritu
 miooyyā nebiä Tieedy hänajty
 tøø yajwiinwaanø'oyiijän. Mänitä
 Jesús ja'a Tieediä yhEspiritu
 yaghawa'xøoyyā. Je'e hajxy jaduhñ
 tøø mhixy tøø mmädoy. ³⁴Ja'a
 Jesúsäts jim møjyaaxä tsajpootyp,
 ca'a Diavitä. Hix, jaduhñä David
 jecy miänaambä:

Ja'a høøčhä nWiindsón, je'e
 jaduhñ nämaayyā ja'a
 Tiéediäm:

“Min yaa hāña'aw maačh
 nhahooyhaampiän.

³⁵Nmo'owāambiøch miičh cuhdujt
 jaduhñ coo mmädsip mga'a
 yajmäjäädá'agät.” Jaduhñä
 Dios ja'a yHuung nämaayy.

³⁶Mänitä Pedro miänángumbä:

—Jaduhñds je'e, ja'a Jesús, ja'a
 mijts mmøjpahbéjtäbä cruzøxp,
 je'e ja'a Dios jaduhñ wyiinguejx
 coo hajxy nWiindsøn'hájtämät, coo
 hajxy xyajnáhwáatsämät. Tøyhajt
 jaduhñ. Hahixøøby jaduhñ coo hajxy
 nägøxiä mmäböğät ja'a Jesúscøxpä,
 mijts israelitas. Ca'a hajxy mga'a
 mäböcy —nømä Pedro miänaañ.

³⁷Ja'a jäya'ayhajxy hänajty jüby
 hamädoowhijpä, coo hajxy jaduhñ
 miädooyy, mänit hajxy tiägøøyy
 tajpä maabiä hoyhoy. Mänitä
 Pedrohajxy nämaayyā møødä
 jiamiøødtøjc:

—Mägu'ughajpäðøjc, neby jaduhñ
 yhahixø'øy højts nguđiünät.

³⁸Mänitä Pedro yhadsooyy:

—Najtshixø'øw ja'a
 mhaxøøgcuhdujt hajxy.
 Jøjpøgøøyyä ja'a Dios ja'a
 quiuhdujt hajxy. Näbet hajxy ja'a
 Jesucristocøxpä. Jaduhñä Dios
 ja'a mbojpä mgädieeybä hajxy
 xyajnáhwáatsät. Jaduhñä yhEspiritu
 hajxy xmióobiät. ³⁹Pønjetiä
 Dios ja'a nWiindsøn'hájtämbä
 miøjyaaxyp, jé'egädsä piojpä
 quiädieeybä yajnáhwáatsäxäp,
 jé'egädsä Dios yhEspiritu
 mio'owaamby, møød mijts, møødä
 mhap møødä mhoc-hajxy, møød
 pønjaty jäguem tsänaaby. Jaduhñ
 hajxy xyajwiinwaanø'oyyäm —
 nømä Pedro miänaañ.

⁴⁰Madiu'ujä Pedro jiaac mädiaacy.
 Mänit jiaac tehñ miänaañ:

—Yø'ø cahwiindøjjiäya'ayhajxy,
 ca'a hajxy tehngajnä mbahixy neby
 hajxy quiuhdujthatiän, coo hajxy
 jaduhñ mnälä padägóyyät —nømä
 Pedro miägapy yhanehmy.

⁴¹Mänitä Pedro miädia'agy
 miäböjçäxä nädägøøgmil-jäya'ay.
 Mänit hajxy hoy nägøxiä näbety.

⁴²Hamuumdu'joot hajxy hänajty
 miäböcy nägøxiä neby hajxy
 hänajty yajnáhixø'oyiijän ja'a
 apóstoldøjçäm. Naxy hajxy hänajty
 yhamugø'øy tsajcaagyquiaamiujpä,
 møød hajxy hänajty Dyiospa'ya'axy.
 Tu'ugjoot tu'ugwiinmahñdy hajxy
 hänajty yhity. Hamiñ haxøpy hajxy
 hänajty niñbiuhbedyi.

⁴³Madiu'ujä apóstoldøjçø
 hijxtahñd hajxy hänajty
 yajçähxø'øgy hoy-yagjuøøñäjaty.
 Jiaančh tehñ yagjuøøbiä
 mäböjpäðøjc-hajxy hänajty
 neby hajxy hänajty yhiñän.

⁴⁴Tu'ugmädia'agy hajxy hänäjty yhity mäduhñtiä hajxy hänäjty miäböcy. Yajtuunmujpy hajxy hänäjty tijaty hajxy hänäjty miøød. ⁴⁵Mänit hajxy nägøxiä tiägøöyy too'pä tijaty hajxy hänäjty miøød. Pønjetiä xädø'õñ hänäjty yajmaajajp, mänitä xädø'õñ hajxy hänäjty mio'oyii mäduhñjaty hajxy hänäjty yajmaajaty. ⁴⁶Jabom-jabom hajxy hänäjty yhamugø'öy maa mõjtsajtøjcän Diospa'yaaxpä. Jootcuyc hajxy hänäjty quiaamiucy yhuucmucy maa yhamdsoo tøjc-hajxiän. Hojioot hajxy hänäjty miøød. ⁴⁷Wyiingudsähgøøbiä Dios hajxy hänäjty. Møødä cu'ug hajxy hänäjty wyiingudsähgøøbiä. Jabom-jabomä mäbøjpädøjc-hajxy hänäjty yajmayø'oyii ja'a Diósäm. Jaduhñ hajxy hänäjty yajñahwa'açhii.

3 Tu'ugxøøbä Pedrohajxy hänäjty ñøcxy tsajtøgooty møødä Juan. Mänacyxiøø hänäjty je'e. Jaduhñ hajxy hänäjty quihdujthaty jabom-jabom coo hajxy mänacyxiøø Dyiospa'ya'axy. ²Jimä pa'amjäya'ay hänäjty tu'ug yhäña'ay maa tsajtøghaawän. Tecymia'adä mähdiojc hänäjty tøø myiñ tøø quia'ay. Jabom-jabom hänäjty jim yajmeçhii maa tsajtøjcän xädø'õñyujwaambä. Jim hänäjty jabom-jabom ñajtshäña'awø'oyii maa tsajtøghaawän, ja'a hänäjty xøhajpä ja'a yajxonbä. Pønjaty hänäjty jiiby tägøøby, mänitä xädø'õñ hajxy hänäjty miäyujwa'añii ja'a pa'amjäya'ay. ³Coo Pedrohajxy hänäjty jiiby tiøjtägø'øwa'añ tsajtøgooty, mänit hajxy yhiixä ja'a

pa'amjäya'ay. Mänitä xädø'õñ hajxy miäyujwaanä. ⁴Mänitä Pedro ja'a mähdiojc ñaaxcuheebøöyy maa hänäjty yhäña'ayän. Mänitä Pedro miänaañ:

—Højts wiinhee'ppéjtäc.

⁵Mänitä Pedrohajxy jiaançh wiinhee'ppejtä. Jaduhñä mähdiojçä yhaa jioot hänäjty yagjaty coo xädø'õñ hänäjty mio'owa'añii.

⁶Mänitä Pedro miänäängumbä:

—Cab højtsä xädø'õñ nnä'a møødä tii højts miiçh nnä'a mó'owäp. Pero ndunaamby højtsä mayhajt maa miiçhøxpän. Jaduhñ højts miiçh nnäma'ay coo mbädø'ögät, coo myo'oyø'ögät. Ja'a Jesucristocøxpä højts miiçh jaduhñ nnäma'ay, ja'a hijty jim tsohmbä Nazaret.

⁷⁻⁸Mänitä Pedro ja'a mähdiojçä yhahooguiø'ø miajtsä. Mänitiä ja'a mähdiojçä tiecy miøgøöyy møødä tiecy-yo't. Coo Pedro wyidsø'cy, mänitä pa'amjäya'ay tiøpxø'cy. Mänit yo'oyø'cy. Mänitä Pedrohajxy jiiby miøødtøjtägøöyyä tsajtøgooty. Tøpxäp júhyyp ja'a craa tiøjtägøöyy, ja'a hänäjty tøø miøcpøquiäbä. Mänit tiägøöyy Dioscapxapatpä. ⁹Jiibiä jäya'ayhajxy hänäjty nämay tsajtøgooty. Mänit hajxy yhiixy coo craa hänäjty yo'oy, møød coo Dios hänäjty quiapxpaady. ¹⁰Mänitä craa yhøxajpä coo hänäjty je'e jie'ejä, ja'a hänäjty jim tøø xiädø'õñyujwá'añbä maa tsajtøghaawän, ja'a hajxy hänäjty tyjipiä ja'a jaançh tehñ yajxonbä. Mänitä jäya'ayhajxy jiaançh tehñ yagjuøöyy nägø'ø nädecypiä coo craa hänäjty tøø miøcpøcy.

¹¹Jimä Pedrohajxy hänäjty tiäna'ay maa hajxy hänäjty tyjijiän

Pórtico de Salomón, mөөдä Juan, mөөдä craa ja'a hänäjty tөө miөcпóquiäba. Cabä Pedrohajxy hänäjty piuhwa'adsa'añii. Mänitä jäya'ayhajxy jim ñөcxөөyy yagjuөөyyäp maa Pedrohajxy hänäjty tiäna'ayän. ¹²Coo Pedro jaduhñ yhiixy coo jäya'ayhajxy hänäjty yagjuө'өy, mänitä jäya'ay ñämaaby:

—Mägu'ughajpädөjc, israelitadөjc, tii hajxy jaduhñ coo mwil'i yagjuө'өy. Tii höjts jaduhñ coo xwyl'i yheeb. Coo hädaa craa tөө miäbөcy ja'a Jesúsөxpä, paady jaduhñ tөө yo'oyө'ögy, ca'a jie'eguiөxpä coo höjts mäjaa nmөөдä, ni quia'a jie'eguiөxpä coo höjtsä Dios hoy nwiingudsähgө'өy. ¹³⁻¹⁵Jue'e hajxy jecy nhaphájtäm ndeedyhájtäm, ja'a Abrahamhajpä, mөөдä Isaac-hajpä, mөөдä Jacobhajpä. Wyiingudsähgөөbiä Abraham ja'a Dios hajxy hänäjty jegyhajty. Pero coo Dios ja'a yHuung Jesús yaa quiejxy hädaa yaabä naaxwiin, cab hajxy mwiingudsähgөөyy. Mänit hajxy hoy mmach. Mänitä tuungmөөdpä hajxy hoy myajcө'ödägө'өy. Mänitä Pilato ja'a Jesús jia yaghөxmdsaanä. Pero mijts, caj mijts jaduhñ mmänaañ coo Jesús yhөxmdsөöjät, hoyyá Jesús tii pojpä tii cädieey hänäjty quia'a jagä mөөдä. Mänit mijtsä haxөoghäna'c mnä'ägä nähdujcy coo yhөxmdsөöjät, ja'a hänäjty tөө jiäya'ay-yaghó'oguiäbä. Mänit hajxy mmänaañ coo Jesús yagho'ogөöjät. Coo Jesús jaduhñ yho'cy, xyajnáhwáatsäm hajxy jaduhñ; jaanä jaduhñ hajxy

xyagjugyhadáanäm cөjxta'axiөө neby je'e jjugyhatiän. Mänitä Dios ja'a Jesús yagjujypiojtägajch. Jaduhñä Dios ja'a Jesús yajmөjtägөөyy. Coo Jesús hänäjty tөө jiuypiojcy, mänit höjts nhixy, paady höjts төyhajt jaduhñ nmөөдä. ¹⁶Hoorä, hädaa craa, mnajuөөby hajxy hijty coo hijty tiecymia'adä. Mhíjxnäp hajxy jaduhñ coo tөө choocnä. Paady tөө cho'ogy coo tөө miäbөcy ja'a Jesúsөxpä, coo Jesús mөcmäjaa miөөдä, mөөдä mөccuhdujt.

¹⁷Mägu'ughajpädөjc, huuc mäadow hajxy. Nnajuөөbiөch jaduhñ coo mijts hänäjty mga'a najuө'өy coo Jesús Dyioswiinguexiä, paady hajxy myajyagho'cä. Ni ja'a mwiindsөnhajxy hänäjty quia'a najuө'өy coo je'e Dyiosquexiä. ¹⁸Jéquiänä Dios ja'a profetadөjc ñajtsapxөөyy coo Mesías hänäjty tsipcөxp yho'oga'añ, ja'a Dios hänäjty tөө wyiinguéxiäbä. Jaduhñä profetadөjc-hajxy jiaančh cujahy. Y coo Jesús jaduhñ jiaančh ho'cy, jaduhñä Dios yajtөjiajty neby hänäjty jecy tөө miäna'añän. ¹⁹Paadiä mhaxөөгcuhdujt hajxy mnajtshixө'өwät. Jөjtägөөyyä ja'a Dios ja'a miädia'agy hajxy. Jaduhñä Dios ja'a mbojpä mgädieeybä hajxy xyajnáhwáatsät. Y jaduhñä hoybä weenbä hajxy xmió'owät. ²⁰Coo yhabáadät, mänitä Dios ja'a Jesús yaa quiejxtägatsa'añ hädaa yaabä naaxwiin, ja'a tөө wyiinguéxiäbä coo mijts xyajnáhwá'adsät. ²¹Cahnä yhabaady coo Jesús jim chohndägátsät tsajpootyp, coo yaa miänajtägátsät hädaa yaabä naaxwiin. Jim jaduhñ yhida'añnä

høxtä coonä yhabaadät coo Dios yaghoyøødiägätsät tijaty yaa hijp hädaa yaabä naaxwiin. Jaduhñä Dios ja'a profetadøjc jecy ñämaayy coo hajxy quiujäyät, ja'a Dios hänajty tøø wyiinguéxiäbä.

²²Hix, jéquiänä Moisés jaduhñ ñämaayy ja'a nhaphájtäm ja'a ndeedyhájtäm: “Tøøchä Dios xwyiinguexy coochä profeta ndúnät. Coo yhabaadät, mänitä Dios tul'jäya'ay wyiinguexa'añ, ja'a højts nmägunáaxäm. Jaduhñ je'le tiunaambä profeta nébiøch nduñän. Nebiaty mijts xyhane'ema'añ, mgudiúunäbä miädia'agy hajxy. ²³Pønjaty hänajty ca'a mäbøgaamb, yajcuhdägoyyáanäp hajxy hänajty ja'a cú'ugäm”, nømä Moisés jecy miänaañ.

²⁴Jaduhñä profetadøjc-hajxy jecy miädiaacy nägøxiä nebiaty jäda'ahaty jiadyii tiuñii, møødä Samuel, møød hajxy jaac túuñäbä profeta. ²⁵Ja'a hajxy jecy túuñäbä profeta, mänitä Dios hajxy ñajtscapxøøyyä coo mijtsä Dios xñämaayy coogä Dios ja'a Mesías hänajty wyiinguexa'añ mijtsøxpä. Jaanä jaduhñduhmä, jéquiänä Dios yajcuhdujcy møød højtsä nhaphájtäm møød højtsä ndeedyhájtäm coo Mesías hänajty wyiinguexa'añ mijtsøxpä. Hix, jaduhñä Dios ja'a Abraham jecy ñämaayy: “Ja'a miičhä mhapä mhoccøxpä tu'ug, jaduhñhøčhä jäya'ay nägøxiä ngunuu'xa'añ wiinduhmyhagajpt”, nømä Dios jecy miänaañ. ²⁶Y coo Dios ja'a yHuung yagjujypiøjtägajch mänaa hänajty tøø yho'oguiän, mijts jayøjp xyajnäguejx. Paady mijts

jaduhñ xyajnäguejxy coo mijts jaduhñ xquiunúu'xät, coo weenä mhaxøøgcuhdujt hajxy jaduhñ nägøxiä mnajtshixø'øwät, —nømä Pedro miänaañ.

4 ¹⁻²Jimä Pedro ja'a cu'ug hänajty miøødmädia'agyñä tsajtøgooty, mänitä teedyhajxy miädoyhajty møødä saduceodøjc coogä Pedro ja'a cu'ug hajxy hänajty yajnähixø'øy coogä Jesús hänajty tøø jujypiøjtägach mänaa hänajty tøø yho'oguiän. Coogä Jesús jaduhñ jujypiøjcy, jaduhñägä Pedro tøyhajt hajxy hänajty miøødä coogä ho'ogyjiäya'ayhajxy hänajty jujypiøgaambä. Coo teedyhajxy jaduhñ miädoyhajty coogä Pedrohajxy hänajty jaduhñ yajnähixø'øy, mänitä teedyhajxy jiaanč tehñ jiootma'ty møødä saduceodøjc-hajxy, møødä tsajtøjcueendähajpä wyiindsøn'hajxy. Mänitä Pedrohajxy ñämejtsä møødä Juan. ³Mänitä Pedrohajxy hoy chumyii. Tøø hänajty chuujø'øy. Mänit hajxy jilby yhiyty pujxtøgooty tu'tsuhñ. ⁴Mänitä jäya'ayhajxy nämay miäbøjcy ja'a Jesúsøxpä, ja'a hajxy hänajty tøø miädóyyäbä nebiä Pedrohajxy yajnähixøøyyän tsajtøgooty. Nämägooxmil ja'a mäbøjpädøjc-hajxy jaduhñ jiajty, haagä ya'adiøjc.

⁵Cujaboom, mänitä judíos wyiindsøn'hajxy jim yhamugøøyy Jerusalén, møødä majjäya'adiøjc-hajxy, møødä cuhdujtyajnähixøøbiädøjc-hajxy, ⁶møødä Anás, ja'a hänajty tuumbä teedywiindsøn, møødä Caifás, møødä Juan, møødä Alejandro, møødä teedywiindsøn jujy

miägu'ughajxy. ⁷Mänitä Pedrohajxy yajnöcxä möödä Juan jim maa judíos wyiindsönhajxy hänajty tøø yhamugø'øyän. Mänitä Pedrohajxy piädaacä cujc. Mänit hajxy miäyajtøøwä:

—Coo mijts hädaa craa tecymia'adpä tøø myajts'o'ogy, pønä quiuhdujthaam, pønä miäjaahaam hajxy jaduhñ myajts'oocy.

⁸Haa ja'a Pedro, miöödä Dioshespíritu hänajty je'e. Mänitä Pedro miänaañ:

—Mijts cu'ugwiindsöndöjc, mijts majjäya'adiöjc, ⁹mijts höjts jaduhñ xmiäyajtøøb neby höjts hädaa mähdiöjc tøø nyajts'o'ogy, hädaa hijty tecymia'adpä. ¹⁰Huuc tunä mayhajt hajxy, huuc hamädoowhit hajxy weeñtiä neby höjts cham nmädia'aga'añän maa mijtsä mwiinduumhajxiän. Jaduhñä tøyhajt hajxy nägøxiä mmöødhädät möödä israelitadöjc-hajxy nägøxiä neby hädaa mähdiöjc miöcpöjcy, hädaa hijty tecymia'adpä, hädaa yaa tänaabiä mijtsä mwiinduum. Ja'a Jesucristo jaduhñ yajmøcpöjc, ca'a yhöjtsä. Nazaret ja'a

Jesucristo hijty chooñ. Mänit mijts myajmøjpahbejtä cruzcøxp. Mänitä Dios yagjuypiöjtägajch.

¹¹Jaduhñ jim myiñ cujaay maa Diosmädia'aguian: “Jaa tsaa mädyiibä töjcojpadöjc-hajxy quia'a cumaayy, je'eds jaduhñ jayöjp pädaactsohñä jim töjteec.” Haa jaa Jesucristo, jaduhñ je'e miäbaady nebiä tsajän, ja'a jayöjp jim pädaactsóhñäbä teectuam. Pero mijts, cab hajxy mgumaayy, paady hajxy myajyagho'cä. ¹²Jaaya'ay hajxy jaduhñ xyajñahwaats

xyajcuhwäatsäm. Ja'a Dios jaduhñ mänaañ coo Jesús hajxy jaduhñ xyajñahwaats xyajcuhwäatsämät — nömä Pedro miänaañ.

¹³Coo Pedrohajxy hänajty quiapxy hamøj jootmøj, paadia möjtöjc-hajxy hänajty yagjuø'øy. Hix, ñajuøöbiä möjtöjc-hajxy hänajty coo Pedrohajxy hänajty quia'a høxpøquiä. Mänitä möjtöjc-hajxy ñajuøöyy coo Pedro ja'a Jesús hänajty tøø piawädity, paady hajxy hänajty quiapxy hamøj jootmøj. ¹⁴Cabä Pedrohajxy hänajty hoy quiapxhaduga'añii, je'eguiøxpä coo hajxy hänajty piuhdäna'awø'oyii ja'a craa ja'a hänajty tøø chó'oguiäbä.

¹⁵Mänitä Pedrohajxy jiiby yhöxquejxpädsøömä. Mänitä teedyhajxy tiägøöyy yajcapxiøöbiä:

¹⁶—Neby hajxiäda'a nnä'a jatcøöyyämät maa yø'ø häna'cøxpän. Mäduhñtiä cu'ughajxy yaa chäna'ay Jerusalén, quiøxy hixy quiøxy mädooy hajxy jaduhñ coo yø'ø häna'c yø'ø tecymia'adpä hajxy tøø yajts'o'ogy. Neby hajxy jaduhñ nnä'a mänáañämät coo jaduhñ quia'a töyyä neby yø'ø häna'c yø'ø tecymia'adpä hajxy tøø yajts'o'oguiän. Pero cab jaduhñ yhahixø'øy coo yø'ø capxy coo yø'ø mädia'agy jaduhñ tehngahnä yhawa'xø'owät. ¹⁷Hahixøöby jaduhñ coo hajxy nhadsähgøöyyämät, jaduhñä dijuuntä Jesús hajxy tehngahnä quia'a ja wi'i quiapxpäädät —nömä teedyhajxy ñiñamaayyä.

¹⁸Mänitä Pedrohajxy yajmøjyaaxä möödä Juan. Mänit hajxy yhanehmä coo Jesús hajxy quia'a

capxpáatnät, coo cu'ug hajxy quia'a yajnáhixóõñät ja'a Jesúscoxpä.

¹⁹Mänitá Pedrohajxy yhadsooyy:

—Huuc wiinmahñdyhat hajxy waambä Diosäda'a miäna'añ, pø hahixøøby jaduhñ coo højts mijtsä mmädia'agy ngudiúunämät, cahnä højtsä Dios ja'a miädia'agy hänajty ngudiuunä. ²⁰Caj pues, cab jaduhñ yhahixø'oy coo højts mijtsä mmädia'agy ngudiúunämät, cahnä højtsä Dios ja'a miädia'agy hänajty ngudiuunä. Hoorä, jaduhñ højtsä Dios tøø xyhane'emy coo højtsä miädia'agy tehngahnä ngapxwá'xät coo højtsä Jesús tøø nhijxjuypioçy, coo højts tøø nmädoy nebiatiä Jesús tøø yajnáhixø'oyän. Paady højts jaduhñ nga'a hamona'añ —nømä Pedrohajxy miänaañ.

²¹⁻²²Mänitá Pedrohajxy jadähooc yhadsähgøøyyä. Mänit hajxy yhøxmajtsä. Paady hajxy jaduhñ yhøxmajtsä coo teedywiindsønñhajxy hänajty quia'a najuø'oy nebiä Pedrohajxy ñä'ä tsaächttiunøøjät. Hix, chähgøøbiä teedywiindsønä cu'ug hajxy hänajty je'eguiøxpä coo cu'ugä Dios hajxy hänajty tehngahnä wyl'i quiapxpaady coo mähdiøjc tøø cho'ogy, ja'a hänajty tøø myiñ tøø quia'ayäbä tecymia'ad. Jiaanç tehñ yagjuøøbiä cu'ughajxy hänajty jaduhñ, je'eguiøxpä coo mähdiøjc juxychägui'x naxy jomøjt hänajty miøødä, ja'a tøø chó'oguiäbä.

²³Coo Pedrohajxy yhøxmájtsänä møødä Juan, mänit hajxy jim ñøcxy maa jiamiøødhajxiän. Mänit hajxy quioxy mädiaacy waambatiä teedywiindsønñhajxy hänajty tøø miäna'añ, møødä majtøjc-hajxy.

²⁴Coo jiamiøødhajxy jaduhñ miädooyy, mänit hajxy nägøxiä tiägøøyy Diospa'yaaxpä:

—Diosteedy, miich højts nWiindsønñhajpy. Miichä tsajt jaduhñ mhädiuun møød hädaa yaabä naaxwiin, møødä mejy, møød tijaty jim hijp tsajtcøxp, møød hädaa yaabä naaxwiin, møød jiiby mejjiooty. ²⁵⁻²⁶Jaduhñ miichä David jecy mnajtsapxøøyyä ja'a mhEspirituhaam:

Nä'ä nägoobä jäya'ayhajxy yhawa'anda'agy, ja'a Dios hajxy ca'a wiingudsähgøøbiä.

Xiøøbä hajxy ñä'ä wiinmahñdyhaty, cab hajxy tii yhoýøøyyäxä.

Mänitá gobiernähajxy yhamugøøyy, ja'a hajxy yaa hanehmbä hädaa yaabä naaxwiin.

Mänitá Dios hajxy jia näbädø'cy.

Jaanä Mesías jaduhñ ja näbädø'cäbä, ja'a Dios hänajty wyinguexaambiä,

nømä David jecy miänaañ, ja'a miich jecy mmoonsähájtäbä, ja'a højts jecy nhaphajt ndeedyhájtäbä.

²⁷Coo Jesús jaduhñ mijajtsä, mänitá Herodeshajxy yaa yhamugøøyy juntahajpä yaa Jerusalén, møødä Poncio Pilato, møødä israelitahajxy, møødä jäya'ayhajxy ca'a israelitabä. Jaduhñ jiaanç tøjiajty nebiä David jecy jiaanç mänaañän. Mänitá Herodes ja'a Jesús hajxy ñähwaambejty, hoyyä Jesús hänajty tii cädieey quia'a jagä møødä. Miichä mHuung je'e. Miich je'e mwiinguejx coo Mesías tiünät.

²⁸Tøøyyäm miich hänajty jaduhñ

mmäna'añ coo Jesús hänäjty jaduhñ tsipcøxp jiada'añ yhabeta'añ, paady miich jaduhñ waamb mga'a mänaañ coo Jesús jaduhñ jiaanč hajty jiaanč habejty. ²⁹Hoorä, Diosteedy, mnajuøøby miich jaduhñ coo højtsä teedywiindsøndøjc tøø xjia hadsähgø'øy. Højts miich jaduhñ xmioonsähajp. Højtsä mäjaa jaac móoyäc, jaduhñ højts miichä mmädia'agy jaduhñ hoy njaac yaghawa'xøøyyät hamøj jootmøj. ³⁰Højts jaac puhbéjtäc, jaduhñ højtsä pa'amjäya'ay nyajmøcpøgät ja'a miichä mHuungä miäjaagøxpä, ja'a Jesúshajpä, weenä cu'ughajxy jaduhñ jiaanč tehñ yagjuø'øy nej mijtsä møcmäjaa hajxy mjaanč tehñ miøødä —nømä Pedro ja'a Dios hajxy pia'yaaxy.

³¹Coo Pedrohajxy jaduhñ Dyiospa'yaaxpäðøyy, mänit jim chäyuuyy maa hajxy hänäjty tøø yhamugø'øyøn. Mänitä Dioshespíritu hajxy nägøxiä yhadägøøyyä jioottägøøyyä. Mänitä Diosmädia'agy hajxy tiägøøyy yajwa'xpä hamøj jootmøj.

³²Tu'ugjoot tu'ugwiinmahñdiä mabøjpädøjc-hajxy hänäjty nägøxiä. Mäduhñjaty hajxy hänäjty miøødä cøxiä wiinä, tu'ugmucy hajxy hänäjty yajtuunmucy. Cab hänäjty pøn miäna'añ coo hänäjty nidiuhñ jie'ehaty. ³³Haa ja'a apóstoldøjc-hajxy, Diosmäjaamøød hajxy hänäjty quiapxy miädia'agy coogä Jesús hänäjty tøø jiuypioçy, ja'a hajxy nWiindsøn'hájtämbä. Jaanč tehñ piuhbéjtäp hajxy hänäjty nägøxiä ja'a Diósäm. ³⁴Cab hänäjty pøn tii yajmaajiaty. Hix, pønjatiä naax hänäjty møød, møødä

tøjc, tioo'py hajxy hänäjty. Pønjaty hänäjty tøø ñaaxtoogy tøø tiøjtøogy, ³⁵mänitä xädø'øn hajxy hänäjty yecy maa apóstoldøjc-hajxiän. Mänitä mabøjpädøjcä xädø'øn hajxy hänäjty yajniñawa'xø'oyii pønjaty hänäjty yajmaajiajp. ³⁶Jimä mabøjpä hänäjty tu'ug xiøhaty José. Chiprenaaxooty hänäjty choon. Ja'a Leví ja'a José hänäjty jegyhajty tøø yhaphaty tøø tieedyhaty. Bernabé ja'a José yajxøbejtä ja'a apóstoldøjcäm. (Jue'e Bernabé miädia'agytiägø'øy hahebreohaam, “mäjootcapxmøcpøjp.”) ³⁷Jimä José naaxcam hänäjty miøødä. Mänitä tioo'cy. Mänitä xädø'øn hoy yecy maa apóstoldøjc-hajxiän.

5 Jimä jäya'ay hänäjty tu'ug xiøhaty Ananías. Safira ja'a tio'oxiøjc hänäjty xiøhaty. Mänitä ñaax hajxy je'e piadoo'pä. ²Tøø hajxy hänäjty quiøjyquiapxytiunñ møødä tio'oxiøjc coogä xädø'øn hajxy hänäjty cujjiä yega'añ maa apóstoldøjc-hajxiän. Cújjiäc hajxy hänäjty miämähmø'owa'añ. Coo Ananías ja'a Pedro ja'a xädø'øn yajnämejch, mänitä Ananías miänaañ cooc tyijy ja'a xädø'øn hänäjty tøø quiøxy yecy mäduhñtiä hänäjty tøø tioogy. ³⁻⁴Mänitä Pedro miänaañ:

—Ananías, coo miichä mnaax tøø mdoogy, cujjiä xädø'øn tøø mmämähmø'øy mäduhñtiä tøø xquiujuuyyä. Cooch miichä xädø'øn cujjiä tøø xmio'oy, jaduhñ miich tøø mmäna'añ cooch tyijy cøxiä tøø xmio'oy. Coo naax hänäjty mga'a toogyñä, mje'ehajpyñä hänäjtyñä. Coo tøø mdoo'nä, miich mje'e hijty je'e ja'a naaxtsow. Coo jaduhñ tøø

mhøhnda'agy, mgädiehy jaduñ. Ja'a Dios miich mja wiinhønaañ, ca'a yhojtsä. Ja'a møjcu'ugong miich jaduñ xyajcapxtägooyy, paadiä Dioshespíritu jaduñ mja wiinhønaañ —nømä Ananías ñämaayyä.

⁵Coo Ananías jaduñ miädooyy, mäniä ho'ogy quiädaayy. Pønjaty jaduñ mädoyhajt coo Ananías jaduñ yho'cy, mäniä hajxy chähgøøbiøjcy. ⁶Mäniä høxcujc-häna'c-hajxy näje'e miehch. Mäniä ho'ogyjiäya'ay hajxy ñähbijty. Mäniä hajxy hoy jajnaaxtägø'øy.

⁷Cudägøøghorä, mäniä Ananías tio'oxiøjc piamejtspä, ja'a hänajty xøhjäpä Safira. Cahnä Safira hänajty miädoyhatyñä coo ñihyhap hänajty tøø yho'ogy. Mäniä Safira tiøjtägøøyy maa Pedro hänajtiän. ⁸Mäniä Pedro ja'a Safira miäyajtøøyy:

—Nej, jaduñä mnaax hajxy mjaanč yejquiä, neby hajxy tøø mnägapxiän.

—Jaduñ —nømä Safira yhadsooyy.

⁹Mäniä Pedro miänängumbä:

—Tii hajxy coo mja cojyquiapxytiuuñ coo hajxy hänajty mhøhnda'aga'añ. Nej, cab hajxy mnajuø'øyä coo Dioshespíritu hotyijä yajcopcø'øy. Cab hajxy jaduñ hoy mwiihøønät. Coo mnihyhap yhøhndaacy, paady tøø yho'ogy. Xii häna'c-hajxy je'e tiøjtägø'øy, ja'a hajxy hoy tøø miäyajnaaxtägø'øyäbä. Nøcxaamb miich yø'ø häna'c xyajnaaxtägø'øwaambä —nømä Safira ñämaayyä.

¹⁰Tuunä Safira jaduñ ñä'ä mädooyy, mäniä Pedro tiocyquiädawøøyyä ho'ogy. Coo høxcujc-häna'c-hajxy tiøjtägøøyy, mäniä Safira hajxy yhiyxy coo hänajty tøø yho'ogy. Mäniä hajxy yhøxcøøbiädsøømy. Mäniä hajxy hoy jajnaaxtägø'øy maa ñihyhapä ñähmøjcän. ¹¹Pønjaty jaduñ mädoyhajt nebiä Ananías hajxy hänajty tøø jiaty tøø yhabetiän, mäniä hajxy nägøxiä chähgøøbiøjcy, møødä mäbøjpädøjc-hajxy nägøxiä.

¹²Mäniä apóstoldøjc-hajxy jim tiägøøyy mäba'amajnajxpä cajptooty. Jaanč tehñ yhoy-yagjuøøñä hajxy hänajty tiuñ. Jaduñ hajxy hänajty yajcähxø'øgy coo Dios mäjaa jiaanč tehñ miøødä. Jimä mäbøjpädøjc-hajxy hänajty yhamugø'øyhaty tsajtøogooty maa hänajty xiøhatiän ja'a Pórtico de Salomón. ¹³⁻¹⁴Tehngahnä mäbøjpädøjc-hajxy hänajty miayø'øy näya'ay-nädo'oxy, ja'a hajxy hänajty mäbøjpä ja'a Jesucristocøxpä. Haa ja'a jäya'ayhajxy hänajty ca'a mäbøjpä, cab hajxy hänajty jim ñä'ägädä nøcxy maa mäbøjpädøjc-hajxy hänajty naxy yhamugø'øyän, hoyyä mäbøjpädøjc-hajxy hänajty jiaanč tehñ quiumayii ja'a cú'ugäm. Paady hajxy hänajty jim quia'a nøcxa'añ, ja'a hajxy hänajty ca'a mäbøjpä, coo hajxy hänajty chähgø'øy. ¹⁵Coo apóstoldøjcä pa'amjäya'ay hajxy hänajty may yajmøcpøcy, paadiä pa'amjäya'ayhajxy hänajty jim quiøñøcxyii tu'haam maa Pedro hänajty ñaxø'owa'añän. Jadúhñägä pa'amjäya'ayhajxy jaduñ näje'e miøcpøgät coogä

Pedro y hahapc hajxy ñä'ä päatät maa hajxy hänäjty quio'na'ayän cøjxcøxp, møød to'ogyquiøxp.

¹⁶Mayyä pa'amjäya'ayhajxy hänäjty jim yajmečhii Jerusalén, møød ja'a hajxy haxøøgpä ca'a hoybä møødpä, ja'a hajxy hänäjty tsohm̄bä Jerusaléncajtpa'a mäwiingón. Nägøxiä hajxy hänäjty yajmøcpøgyii.

¹⁷Coo teedywiindsøn hajxy jaduñ miädoyhajty coo pa'amjäya'ayhajxy hänäjty may tøø wyl'i miøcpøcy, mänit hajxy nägø'ø nädecypä jiootma'ty, møødä saduceodøjc-hajxy. Hix, cabä apóstoldøjc-hajxy hänäjty yajmädsogyii coo hajxy hänäjty tehngahnä wyl'i yajnähiçø'øy ja'a Jesúsçøxpä. ¹⁸Mänitä apóstoldøjc-hajxy hoy chumyii. ¹⁹Mänitcoodsä Diosmoonsä ja'a pujxtøghaaw hoy yaghawa'ačh. Mänitä apóstoldøjc-hajxy yhøxwoobädsøømä ja'a Diosmoonsäm. ²⁰Mänit hajxy ñämaayyä:

—Coo jioobø'øwät, mänit hajxy jim mnøcxät maa tsajtøjcän. Jimä cu'ug hajxy myajnähiçø'øwät neby hajxy ñähwä'adsät, neby hajxy jaduñ jiuçyhädät cøjxta'axiøø nebiä Dios jiuçyhatiän —nømä Diosmoonsä miänaañ.

²¹Coo jioobøyy, mänitä apóstoldøjc-hajxy jim jiaančh nøçxy tsajtøgooty neby hajxy hänäjty tøø ñäma'ayiiän ja'a Diosmoonsäm. Mänitä cu'ug hajxy tiägøøyy yajnähiçøøbiä.

Mänitä teedywiindsøn hajxy miänaañ coo hajxy nägøxiä yhamugø'øwät juntahajpä,

møødä majtøjc-hajxy israelítabä.

Mänit hajxy miänaañ coo tsumyhäna'c-hajxy jim yajmedsøøjtät maa junta hajxy hänäjty yagjadyiiän. ²²Coo policíashajxy jim miejch maa pujxtøjcän, cab pøn hänäjty jiiibiän. Mänitä policíashajxy wyiimbijty. ²³Mänit hajxy miänaañ:

—Coo højts jim nmejch maa pujxtøjcän, je'enä hänäjty hoy yhaawguiiçhä. Jimä soldadohajxy hänäjty yhadäna'ayñä maa pujxtøghaawän. Pero coo højts jiiiby nja tøjtagøøyy, cab pøn hänäjty jiiibiän —nømä policíashajxy miänaañ.

²⁴Coo teedywiindsøn hajxy jaduñ miädooyy, møødä tsajtøjcueendähajpä wyiindsøn hajxy, møødä mõjteedywiindsøn, mänit hajxy jiaančh tehñ yagjuøøyy. Cab hajxy hänäjty ñajuø'øy tii hänäjty jajtäp túuñäp. ²⁵Mänitä jäya'ay tu'ug miejch maa teedywiindsøn hajxy hänäjty jiuñtahiän. Mänitä craa miänaañ:

—Ximä cu'ug wyl'i yajnähiçøøyyägumbä tsajtøgooty —nømä teedywiindsøn hajxy ñämaayyä.

²⁶Mänitä apóstoldøjc-hajxy hoy wioyii. Ja'a tsajtøjcueendähajpä hajxy hoy miäwoy møødä policíashajxy. Hahoy haweenä apóstoldøjc-hajxy jaduñ jim yajmejtsä maa junta hänäjty jiadyiiän. Hix, tsähgøøbiø policíashajxy hänäjty coo hajxy ñä'ä paga'ads ñä'ä pawobøøjtät ja'a cú'ugäm. ²⁷Coo apóstoldøjc-hajxy jim wioomejtsä maa junta

hänajty jiadyiijän, mänit hajxy jim yajnøcxä maa møjteedywiindsønä wyiinduumän. Mänitä apøstoldøjc-hajxy nāmaayyā:

²⁸—Tøø højts mijts nja nāma'ay coo hajxy mga'a nā'ägädä yajnahixøñät ja'a dijuuntä Jesúscøxpä. Pero cab højts mijtsä nmädia'agy tøø xquiudiuunä. Tøø cu'ug hajxy jaduñ mgøxy yajnahixø'y, mäduñtiä hajxy yaa chāna'ay Jerusalén. Y højts mijts jaduñ xjia wi'i yajnahdsømaamb cooc tyijy højtsä dijunto Jesús nyajyagho'cä.

²⁹Mänitä Pedrohajxy yhadsooyy møødä jiamiøødhajxy:

—Cab yhahixø'y coo højtsä jāya'ay miädia'agy ngudiúunät, cahnä højtsä Dios miädia'agy hänajty ngudiúunä. ³⁰Coo mijtsä Jesús myajyujmänoönä cruzcøxp, mänitä Dios ja'a Jesús yagjujyipiøjtägajch, ja'a højtsä nhapä ndeedyhájtäm jecy wyiingudsähgøyyäbä. ³¹Mänitä Dios ja'a Jesús cuhdujt miooyy coo Jesús jim miāhané'emät tsajpootyp maa Dios yhahooyhaampiän. Coo judíos ja'a yhaxøøgcuhdujt hajxy ñajtshixø'øwät, jaduñä piojpä quiädieeybä hajxy jaduñ yajnahwaats yajcuhwáatsäxät Jesúsäm. ³²Højtsä tøyhajt nyejpy coo Jesús jiujyipiøjtägajch coo hänajty tøø yho'ogy. Jaanä jaduñä Dioshespíritu tøyhajt yejpä coo Jesús jiujyipiøjcy. Pønjatä Dios ja'a miädia'agy jaduñ cudiúunäp, je'e ja'a Dios ja'a yhEspíritu miooby — jaduñä Pedrohajxy miānaañ.

³³Coo teedywiindsønähajxy jaduñ miädooyy, mänit hajxy jiaanč

teñ jiootma'ty. Mänit hajxy jaduñ jia mänaañ coo Pedrohajxy yagho'ogøøjät. ³⁴Jimä fariseo hänajty tu'ug teedywiindsønähagujc. Jue'e hänajty xiøhaty Gamaliel. Ley-yajnahixøöbiä hänajty tiuunghajpy. Jaanč tehñ wyiingudsähgøyyäp hänajty je'e ja'a cú'ugäm. Mänit tiānaayyø'cy. Mänit yhanehmy coo apøstoldøjc-hajxy nøcxy yajpädsømyii tu'habaquiä. ³⁵Mänitä Gamaliel ja'a jiamiøødtøjc nāmaayy:

—Mägu'ughajpädøjc, huuc wiinmahñdyhat hajxy hodiägaamby neby yø'ø häna'c hajxy mduna'añ.

³⁶Huuc jahmiets hajxy nebiä Teudas jecy jiajtiän. Mänit jootmøj ñibiädaacä. Mänit ñiñänøømä cooc tyijy miøjjäya'ay jiaančhjäya'ayä. Mänit piadu'ubøjca nāmādaaxmägo'x jäya'ay. Mänitä Teudashajxy tiägøyy tsiptuumbä. Mänitä Teudas yagho'cä. Ja'a soldadohajxy jaduñ mäyagho'c. Mänitä Teudas jiamiøødhajxy xii yaa ñøcxøyy. Mänitä tsip jaduñ yhamaadiujnä. ³⁷Mänitä tsip wiingpä jadähooc chohñdáaccumbä mänaa censo hajxy hänajty yajpädø'øguiän. Ja'a craa Judas ja'a tsip jaduñ yajtsohñdaac, ja'a hänajty jim tsohmbä Galilea. Mänitä cu'ug may piadu'ubøjca. Mänitä Judas yaghó'cäbä ja'a soldadohajxy. Jaduñä Judas jiamiøødhajxy xii yaa ñøcxøöbiä.

³⁸Paady, høxmats yø'ø häna'c hajxy. Cab jaduñ yhahixø'y coo hajxy nej mdünät. Hix, pø yhamdsoo wiinmahñdy hajxy jaduñ yajtuumby, cab jaduñ yhojó'øwät;

tu'umá'adäp jaduhñ. ³⁹Pero pø yø'ø häna'cä Dios wyiinmahñdy hajxy yajtúunäp, cab hajxy jaduhñ hoy ngapxhadúgät. Hix, jaduhñ quiähxø'øgät nejpiä Dios hajxy hänäjty mmädsiphajpiän —jaduhñä teedywiindsønñhajxy ñämaayyá.

Jiaančh mábøjc hajxy jaduhñ nebiä Gamaliel miänaañän.

⁴⁰Mänitä apóstoldøjc-hajxy jadähooc quiuyaaxøøyyä tøgooty. Mänit hajxy wiobho'cä. Mänit hajxy yhanehmä coo Jesús hajxy quia'a capxpáatnät. Mänit hajxy ñajtsmadsøøyyä. ⁴¹Xoondáacäp hajxy tiøjpädsøømy maa junta hänäjty jiadyiijän. Paady hajxy hänäjty xioonda'agy, hix, hahixøøby hänäjty jaduhñ coo hajxy hočhähdiiunnä chaačhpøgät ja'a Jesúscøxpä. ⁴²Mänit hajxy tiägøøguiumbä yajñähixøøbiä ja'a Jesúscøxpä, tsajtøgooty møød tøgootypaady. Tehngahnä hajxy hänäjty yajñähixø'ø y jøjwidsø'ø.

6 Tehngahnä mábøjpädøjc-hajxy hänäjty jiaančh tehñ miayø'øy. Jaduhñ hajxy hänäjty quiuhdujthaty coo yaamgto'oxy cay hu'ugy hajxy jabom-jabom mio'owøøjät. Cujwa'xiä mábøjpädøjc-hajxy hänäjty quiapxy hagriego. Cujwa'xiä hajxy hänäjty quiapxy hahebreo. Ja'a hajxy hänäjty capxpä hagriego, mänit hajxy tiägøøyy mänaambä coo yaamgto'oxy cay hu'ugy hajxy hänäjty pedyii quia'a móoyänä, ja'a hajxy hänäjty capxpä hagriego. Høxtä yajtsip yajma'adøøby hajxy hänäjty ja'a yaamgto'oxycøxpä. ²Mänitä apóstoldøjc ja'a nämajmetspähajxy

miänaañ coo mábøjpädøjc hajxy nägøxiä yhamugø'owät. Mänitä apóstoldøjc-hajxy miänaañ:

—Mägu'ughajpädøjc, cab jaduhñ yhahixø'øy coo højtsä cay hu'ugy njaac yajwá'xät tehngahnä.

Hix, cab højtsä Diosmädia'agy jaduhñ hoy ngapxwa'xaannä.

³Paadiä, hahixøøby jaduhñ coo hajxy mniwiyiimbiwøøjät näjxutujc coo cay hu'ugy hajxy yajwá'xät. Jue'e hajxy mwiimbiwäp mädyii hoyhäna'c, mädyii Dioshespíritumøød, mädyii jajp najuøøby. ⁴Y højts ja'a nämajmetspä, tehngahnä højtsä Dios nba'ya'axa'añ. Tehngahnä højtsä miädia'agy nyajñähixø'øwaanä —nømä apóstoldøjc-hajxy miänaañ.

⁵Mänitä mábøjpädøjc-hajxy nägøxiä cojyquiapxy miähmøøyy pønjaty hajxy hänäjty wyiimbiwaamby. Jue'e hajxy jaduhñ wiimbiiwä, ja'a Esteban, møødä Felipe, møødä Prócoro, møødä Nicanor, møødä Timón, møødä Parmenas, møødä Nicolás. Haa ja'a Esteban, hoyyä Diosmädia'agy hänäjty jiaančh tehñ miäböcy. Miøødä Dioshespíritu hänäjty je'e. Haa ja'a Nicolás, Antioquíä hänäjty chooñ. Coo hänäjty tøø miøjjø'øy, mänit jaduhñ tiägøøyy maa judíos quiuhdujthajxiän. ⁶Mänitä näjxutujpähajxy jim wioonøcxä apóstolwiinduumhajxy. Coo näjxutujpähajxy jim miejch, mänit hajxy quiø'ønähgajpä ja'a apóstoldøjc. Mänitä apóstoldøjcä Dios hajxy pia'yaaxy coo näjxutujpä cuhdajt hajxy mio'owøøjät

coo hajxy jaduhñ tiúnät nebiä apóstoldøjc-hajxy hänäjty tiuñän.

⁷Tehngahnä Diosmädia'agy hänäjty yhawa'xø'oy. Mayøøbyñä ja'a mäbøjpädøjc-hajxy hänäjty tehngahnä jim Jerusalén. Mayyä teedywiindsøn

⁸Haa ja'a Esteban, miøødä Diosmäjaa hänäjty je'e. Dioswiinguexy hänäjty jaduhñ. Mänit tiägøøyy pa'amyajnajxpä maa cu'ugän. Hoy-yagjuøñä hänäjty jaduhñ wyi'i tiuñ. ⁹Mänitä judíos ja'a Esteban hajxy näje'e tiägøøyy yajcapxiøøbiä nebiatiä Esteban hänäjty yajnähi^{xø'}oy. Tøø hajxy hänäjty yhity nebiä cudoogø'oybän. Pero tøø hajxy hänäjty yhøxmäjsänä. Jimä yhamdsoo tsajtøjc hajxy hänäjty miøødä. Jäguembaady hajxy hänäjty chooñ wiinghagajptjaty, møød jim Cirene, møød jim Cilicia-naaxooty, møød jim Asia-naaxooty. ¹⁰Pero cab hajxy hänäjty miäjäda'aga'añ je'eguiøxpä coo Esteban hänäjty jiaançh tehñ jiaty mädia'ag. Hix, miøødä Esteban ja'a Dioswiinmahñdy hänäjty nebiaty hänäjty mio'oyii ja'a Dioshespiritäm. ¹¹Mänitä judíoshajxy quiojyquiapxytiuuñ coo wiinghäna'c hajxy miäjúyät coo weenä Esteban nähwaambedyii cooc tyijy ja'a Moisés hänäjty haxøøg tøø nänømyii møødä Dios. ¹²Coo Esteban jaduhñ nähwaambejtä, mänitä cu'ughajxy hoyhoy jiootma'ty, møødä majtøjc-hajxy, møødä ley-yajnähi^{xøø}biädøjc-hajxy. Mänitä Esteban yajmujcä. Mänit miajtsä. Mänit yajnøcxä maa

teedywiindsønwiinduumhajxiän, maa junta hajxy hänäjty yagjadyiijän. ¹³Mänitä wiinghäna'c-hajxy yajmejtsä maa junta hänäjty jiadyiijän. Mänitä Esteban tiägøøyyä nähwaambéjtäbä:

—Tehngahnä yø'ø craa hädaa tsajtøjc haxøøg nänømy maa Dios hajxy nwiingudsähgøøyyämän. Jaduhñä ley haxøøg nänøømbä, ja'a Moisés jecy quiujáhyyäbä. ¹⁴Jaduhñ højts nmädooyy coo jäya'ayhajxy miänaambä cooc tyijy ja'a Jesús Nazaretpä hädaa tsajtøjc yajma'ada'añ, cooc tyijy ja'a cuhdujt yajtägatsa'añ, ja'a Moisés hajxy jecy xyajmänähgueegøøyyämbä —nømä Esteban nähwaambejtä.

¹⁵Mänitä tuungmøødpä Esteban hajxy wyiinhee'ppejty, mäduhñtiä hajxy hänäjty jim yhäña'ay maa junta hänäjty jiadyiijän. Haamb tsämaambä Esteban wyiin jiojpp hänäjty quiähxø'ogy nebiä Diosmoonsä wyiin jiojphajxy quiähxø'oguiän, ja'a hajxy jim hijpä tsajpootyp.

7 Mänitä teedywiindsønä Esteban miäyajtøøyy:

—Nej, jaançh tøyhajt jaduhñä nej miich yø'ø häna'c xñänømiän.

²Mänitä Esteban yhadsooyy:

—Majtøjc, puhya'adiøjc, høøchä nmädia'agy hajxy huuc hamädoowhjtäc. Ja'a Abraham hajxy jecy nhaphajt ndeedyhjtäm. Jim hänäjty chäna'ayñä Mesopotamia-naaxooty maa Caldeabä-jäya'ayhajxy hänäjty chäna'ayän. Cahnä Abraham hänäjty jim jio**baj**naxyñä maa naax hänäjty xiøhatiän Harán.

Mänitá Dios tsajpootypá jim ñäguehxtøø'xy maa Abraham wyiinduumän. ³Mänitá Dios ja'a Abraham ñämaayy: “Mdsóonáp yaa maa mnaax maa mgajptän. Mnähgué'egäbä mjujy mmägu'ug. Jim mnøcxät maačh miičh nwoonøcxa'añän. Mänitøch miičh jim nyajnáhixø'owät maa mdsánaadiaacpøgät”, nomä Abraham jecy nämaayyä. ⁴Mänitá Abraham jim jiaančh tsohñnä Mesopotamia. Mänit jim ñøcxy tsánaadiaacpøjpä Harán-naaxooty. Pero cab jim jecy yhiyty Harán-naaxooty. Coo Abraham tieedy yho'cy, mänit jim chøhngumbä. Mänitá Dios ja'a Abraham yaa wiomejch hädaa yaabä naax hädaa yaabä cajpt maa hajxy jäda'ahaty nhíjtäm. ⁵Pero cabä Dios ja'a Abraham cuhdujt ñä'ägä mooyy ni weeñtiä coo yaa chánaadiaacpøgät. Jaduhñä Abraham cuhdujt ñä'ä mooyyä coo yaa ñä'ä hahídät. Mänitá Dios ja'a Abraham yajwiinwaanøøyy coogä cuhdujt hánajty mio'owa'añ coo yhap yhoc-hajxy yaa chánaañät coo Abraham hánajty tøø yho'ogy, hoyyä Abraham yhuung hánajty quia'a jagä jiijä mänaa jaduhñ yajwiinwaanøøyyän. ⁶Jaduhñä Dios jiaac mänaañ coogä Abraham yhap yhoc-hajxy hánajty wiingnaaxooty nøcxy yhadsána'awa'añ, møød coog hajxy hánajty yhida'añ nebiä cudoogø'øybän mädaaxmägo'xjumøjt, møød coog hajxy tsaačhtiuñ yhida'añ. ⁷Mänitá Dios miánaangumbä: “Coo miičhä mhapä mhoc-hajxy hánajty tøø yagjaamduñ tøø

yajtsaačhtiuñ, mänithøchä jäya'ay nyajcumädowa'añ, ja'a miičhä mhapä mhoc hánajty tøø xjiaamduun tøø xhaačhtiuñäbä. Mänitá mhapä mhoc-hajxy jim choona'añ. Mänit hajxy yaa myina'añ. Yaačh hajxy jaduhñ xwyyiingudsähgø'owa'añ.” ⁸Coo Dios ja'a Abraham jaduhñ yajmøødmädiaacy, yajcuhdujc hajxy jaduhñ neby hajxy jaduhñ miädiaaquiän. Mänitá Dios ja'a Abraham yhanemy coo Abrahamhajxy yajcircuncidarhädät, møødä yhuunghajxy, møødä yhapä yhoc-hajxy. Jaduhñä hijxtahñd miähmøøyy coo Dios ja'a Abraham jaduhñ miøødyajcuhdujcy. Paadiä, coo Abraham yhuung Isaac jiaančh miiñ jiaančh cahy, cuductujxøø ja'a Abraham ja'a yhuung jiaančh circuncidarhajty. Y coo Isaac hánajty tøø miøjjø'øy, jaduhñä yhuung Jacob tiuumbä. Y ja'a Jacob, jaanä jaduhñä ñøøx miajc yajpanøcxpä, ja'a nämajmetspä, ja'a højts jecy nhaphajt ndeedyhájtämbä.

⁹Jue'e Jacob yhuung hánajty tu'ug xiøhaty José. Coo José hánajty jiaančh tehñ chogyii ja'a tiéediäm, paadiä José yhajchhajxy jiootma'ty. Mänitá José jim quidoogøøyyä Egipto-naaxooty. José yhajchhajxy jaduhñ jatcøøyy. Pero tehngahnä Dios ja'a José hánajty cwieendähaty. ¹⁰Coo José hánajty hoyhoy tøø chaachtiüñii, mänit yajnáhwaatsä ja'a Diósäm. Mänitá José wiinmahñdy miooyyä. Mänitá Dios miánaañ coo José quiumayøøjät ja'a Faraóngäm, ja'a hánajty jim tuumbä gobiernä Egipto-naaxooty. Mänitá Faraón

ja'a José wyiinguejxy coo José jim yhané'emät mäduhñtiä Egipto-naax, mөөд jimbaady maa Faraón tiöjcän.

¹¹Mänitä yuuxөө hoyhoy jiajtä jim Egipto mөөд jim Canaán-naaxooty. Mänit höjtsä nhapä ndeedyhajxy jiaanč tehм chaačhpöjcy ja'a yuugöxpä, coo cay hu'ugy hänajty jim quia'a hijnä. ¹²Pero coo Jacob jaduһн miädoyhajty coo trigo hänajty jim yajpaady Egipto, mänitä ñөөх miajc jim quiejxy trigojuubiä. Coo Jacob yhuunghajxy yhoočhohñ jayöbajt, cabä José choj hөxcajpä ja'a yhäjchäm.

¹³Coo hajxy miämetsc-hoocpä yhoodiägajch, mänitä José ñiñägäpxä. Mänit yhöxcájpänä.

Mänitä Faraón ñajuөөñä coo José yhäjchhajxy hänajty je'e.

¹⁴Mänitä José quiapxyñäguejxy coo tieedyhajxy jiiby ween miänacy Egipto, mөөдä jiuju miägu'ughajxy nägөxiä. Jue'e hajxy hänajty nägөxiä, nädägөөghii'xcumajmocx.

¹⁵Mänitä Jacobhajxy jiiby jiaanč hädaacnä Egipto mөөдä yhuunghajxy. Jiiby hajxy nägөxiä yho'taacy, ja'a hajxy jecy nhaphajt ndeedyhajtämbä. ¹⁶Cujequiä Jacob piajc-hajxy yagjөdsoһнnäjxäxä mөөдä José piajc. Jimä piajc-hajxy yajnөcxäxä maa cajpt hänajty xiөhatiän Siquem. Jim hajxy hoy ñaaxtägөөdiägach maa Abraham ja'a naax hänajty tөө jiuyyän. Ja'a Hamor yhuungä naax hajxy too'c.

¹⁷Coo hänajty yhabaadaannä coo Dios hänajty yajtöjiada'añ nebiä Abraham hänajty tөө yajwiinwaanө'öyijän, tөө höjtsä nhaphajtämä ndeedyhajtämhajxy hänajty

miayөөñä jim Egipto. ¹⁸Mänitä wiinggobiernä jim tiägөөyy tuumbä Egipto-naaxooty. Cabä gobiernä miөjpädaacy nebiä José hänajty tөө tiuñän. ¹⁹Mänit höjtsä nhaphajtämä ndeedyhajtämhajxy wyiinhөһнä. Ja'a gobiernä jaduһн mäwiinhөһн. Mänit hajxy jiaamduunä chaačhtiuunä. Mänit hajxy yhanehmä hadsip coo yhuung hajxy yhöxtséenät yhöxcönät, ja'a naammiñ ja'a naammechpä, coo hajxy jaduһн ween yho'ogy. ²⁰Mänitä Moisés myiiñguiahy. Yajxon jiaanč tehм miaaxhuunghajty. Cabä Moisés yhöxtseһнä nebiä gobiernä hänajty tөө jia hane'emiän. Yu'üchä Moisés yaghijtä tägөөgpo'o tөгooty. ²¹Coo Moisés hänajty hoy yu'üch quia'a hidaannä, mänitä gobiernä tio'oxyhuungä Moisés yohbiaaty. Mänit yajtsoocy nebiä hamdsoo huungän. ²²Coo Moisés miөjjөөyy, mänitä cuhdujt cөxiä yajwiinhixөөyyä nebiä egipcioshajxy hänajty quiuhdujthatiän. Jaanč tehм jiajp jaduһн piädsөөmy. Jaanč tehм yajxon hänajty quiapxy miädia'agy nebiä jajp nebiä najuөөbiän. Jaanč tehм yhoy hänajty miähane'emy.

²³Coo Moisés jiumөjt juxychägui'x yhabejty, mänit wyiinmaadiaacy coo ja'a miägunaax nөcxy quiuhixa'añ. ²⁴Jimä Moisés ja'a miägunaax hänajty tu'ug chaačhtiuñii ja'a egipcio-jäyá'ayäm. Coo Moisés jaduһн yhijxy, mänitä miägunaax ñäwaañ. Mänitä egipcio-jäya'ay yagho'cy, ja'a hänajty mädsaačhtiuumbä. ²⁵Paadiä Moisés jaduһн jiatcөөyy,

jaduhñ hánajty tiajy miay coo miägunaaxhájxy hánajty tøø miábøcy coo Moisés hánajty tøø wyiinguexyii ja'a Diósám coo miägunaax jaduhñ yajnähwá'adsät. Pero cab hájxy jaduhñ ñä'ä mábøjcy. ²⁶Cujaboom, jimä israelitahájxy hánajty nämetsc ñiguioxyii. Coö Moisés jaduhñ yhiájxy, mänit jia mänaañ coo hájxy ñiyhöxmdadsøjät. Mänit miänaañ: “Mägu'ughajpádøjc, jue'e mijts jaduhñ, mdu'ugcunaax mijts jaduhñ. Cab jaduhñ yahixø'øcy coo hájxy jaduhñ mniguioxøjät.” ²⁷Mänitä Moisés yhöxjahmä tu'jäya'ay, ja'a hánajty mäjäda'agaambä. Mänitä Moisés ñämaayy: “Pøn miich tøø xpiäda'agy coo højts miich xyhané'emät. ²⁸Nej, jaduhñ miich mdaj mmaabiä cooč miich xyagho'ogaambä nej miichä egipcio-jäya'ay häxøøyy myagho'quiän.” ²⁹Coo Moisés jaduhñ miädooyy, mänit piäyø'cy. Mänit jim ñøcxy jäguem maa naax hánajty xiøhatiän Madián. Mänit jim tiägøøyy hadsänaabiä. Mänitä jäya'ay wyiingpøjcy. Mänitä huung hájxy metsc piaaty.

³⁰Coo Moisés hánajty jim tøø yhiñä Madián juxychägu'xjumøjt, mänit jim tiägøøyy wädijpä pactuum, jim mädøyyä maa ja'a tuñ hánajty xiøhatiän Sinaí. Mänitä Moisés yhiájxy coo ja'a wädsats hánajty tioy. Mänitä Diosmoonsä tu'ug ñägüehxtøø'xy jøønhaajiooty. Tsajpootyp hánajty tøø choon. ³¹Coo ja'a Moisés jaduhñ yhiájxy, mänit jaduhñ jiaanč tehñ yagjuøøyy. Mänitä Dios ja'a Moisés ñämaayy: ³²“Høøch

Dioshajp. Høøchä Abrahamhájxy jecy xwyiingudsähgøøyy, møødä Isaac, møødä Jacob, ja'a miich jecy mhaphajt mdeedyhájtabä.” Mänitä Moisés tiägøøyy tsäyuubiä. Jaanč tehñ chähgøøby hánajty jaduhñ. Cab hánajty jim ñä'ägä møjheeba'añ maa hánajty miägapxyijän. ³³Mänitä Moisés ñämáayyägumbä: “Jen yø'ø mgø'øg. Høøch nwiinduum miich yaa mdäna'ay. ³⁴Tøøch nhixy coöchä ngu'ughájxy jim jiaanč tehñ chaačpøcy Egipto-naaxooty. Tøøch nmädoy coo hájxy wyi'i jio'øcy wyi'i xiuuč. Páadyhöch yaa tøø ngäda'agy hädaa yaabä naaxwiin, ja'a ngú'ughöch nyajnähwa'ads nyajcuhwa'adsaamby. Miič jim nguexaamby Egipto yajnähwaatpä”, nømä Dios miänaañ.

³⁵Mänitä Esteban jiaac mädiaacy: —Tøø ja'a Moisés ja'a miädia'agy hánajty quia'a mábøjcäxä. Ja'a yhamdsoo miägunaaxhájxy hánajty tøø quia'a mábøcy. Mänit hájxy miänaañ: “Pøn miich tøø xwyiinguexy coo mmøjhädät, coo mmahané'emät.” Hoyyä Moisés hánajty jaduhñ tøø jia nämä'ayii, mänitä Dios ja'a Moisés wyiinguejxy wiindsønhajpä maa ja'a quiu'ugän, coo hájxy jaduhñ ñähwa'ads quiuhwá'adsät. Ja'a Diosmoonsä ja'a Moisés jaduhñ najtsapxøøyyä, ja'a hánajty tøø ñägüehxtøø'xiäbä maa ja'a wädsats hánajty tioyyän. ³⁶Mänitä Moisés ja'a hoy-yagjuøøñäjatypä may yajcähxø'cy jim Egipto-naaxooty. Mänitä miägunaax jim hoy wioobädsømy. Majatiä Moiséshájxy hánajty wiädity, yajcähxø'piä

Moisés ja'a hoy-yagjuøøñäjatypä hänäjty, møød jim̄ maa ja'a Tsaptsmejjiän, møød jim̄ pactuum. Juxychägui'xjumøjt hajxy jim̄ wiädijty pactuum. ³⁷Mänitä Moisés ja'a miägunaax̄ ñämaayy: “Nébiøchä Dios tøø xwyiinguexiän coo mijts nyajñähwá'adsät, jaanä jaduñä Dios wiinghänal'c wyiinguexaambä, ja'a jaac miimbä ja'a jaac cahbä. Mijtsä mmägunaax̄ jaduñ pädsmäamb. Naxiä miädia'agy hajxy mdehm̄ quiudiúunät waambaty hänäjty miäna'ana'añ”, nømä Moisés jecy miänaañ. ³⁸Hanäguipxiä Moisés ja'a miägunaax̄ jim̄ miøødwädijty pactuum, ja'a højts nhaphajt ndeedyhajtäm. Coø hajxy jim̄ miehch maa ja'a tun̄ hänäjty xiøhatiän Sinaí, mänitä Diosmoonsä ja'a Moisés jim̄ tu'ug miägapxy, ja'a hänäjty jim̄ tsohm̄bä tsajpootyp. Mänitä Moisés ja'a Diosmädia'agy ñajtscapxøøyyä. Paady jaduñ ñajtscapxøøyyä, coo højts jaduñ xyajmännähgueegøøyyämät. Ja'a Diosmädia'agy, cab jaduñ mänaaxøø quiuhdägoyya'añ.

³⁹'Pero cabä Moisés ja'a miädia'agy hänäjty yajtunäänäxä. Ja'a højts nhaphajt ndeedyhajtämhajxy hänäjty ca'a cudiunaamb. Jaduñä jioot hajxy hänäjty tøø piäda'agy coo hajxy hänäjty wyiimbida'añ, coo hajxy hänäjty jim̄ ñøcxtägatsa'añ Egipto. ⁴⁰Jim̄ä Moisés ja'a piuhya'ay hänäjty tu'ug xiøhaty Aarón. Coø ja'a Moisés hänäjty tøø ñøcxy tun̄møjc, mänitä cu'ugä Aarón hajxy ñämaayy: “Huuc tunä mayhajt, højtsä saandä mejtstägøøg

hädiúunäc, jaduñ højts nwiingudsähgø'øwät. Je'e højts jaduñ xwyiinwówäp. Ja'a Moisés, ja'a højts tøø xwioobädsøømāmbä jim̄ Egipto-naaxooty, cab jaduñ yajñajuø'oy neby jaduñ tøø jiaty tøø yhabety”, nømä Aarón ñämaayyä. ⁴¹Mänitä saandä hajxy yhädiuun̄ wajhuunghahädiuunnaxy. Mänitä saandä hajxy tiägøøyy wiingudsähgøøbiä. Mänitä animal hajxy tiägøøyy yojxpä ja'a saandäcøxpä. Mänitä saandä hajxy wyiinxoondaacy, ja'a hajxy hänäjty hamdsoo tøø yhädiúñäbä. ⁴²Mänitä Dios ja'a tsaangu'ug piuhwaatsnä. Mänit ñähgueecnä, je'eguiøxpä coo ja'a xøø hajxy hänäjty tøø tiägø'oy wiingudsähgøøbiä møødä po'o møødä madsa'a. Hix, jaduñ jim̄ myiñ cujaay maa ja'a profeta jecy quiujahyyän:

Mijts Israelpäjäya'ay, mänaa hajxy jecy mwäditiän pactuum juxychägui'xjumøjt, ca'a yhøøchcøxpä ja'a animal hajxy mwi'i yojxy, ca'a yhøøchä mijts xwyiingudsähgøøyy.

⁴³Caj pues, ca'a yhøøchä. Je'e hajxy mwiingudsähgøøyy ja'a saandä hänäjty xøhjäpä Moloc. Je'e chajtøjc-hahädiuunnaxy hajxy mmädajnaxä, møødä saandä Renfán ja'a miadsa'ahahädiuunnaxy. Hamdsoohaambiä saandä hajxy mhädiuun̄ neby hajxy jaduñ mwiingudsähgø'øwät. Coø hajxy jaduñ mjatcø'oy, paady mijts nhøxquejxpädsmā'añ maa ja'a mhamdsoo naaxhajxiän.

Jäguem mijts nguexa'añ
 Babilonia-nänaxy.
 Jaduñ jim myiñ cujaay maa ja'a
 Diosmädia'aguiañ.
 44'Hoorä, mänaa højts nhaphajt
 ndeedyhajtämhajxy jecy wiäditiän
 pactuum, carpa-tøbia'cä Dios
 hajxy hänajty wyiingudsähgø'øy.
 Tsajtøjcä carpa-tøy hajxy hänajty
 wia'añ. Hoy ñä'ä majatiä carpa
 hajxy hänajty ñä'ä tøy. Jaduhñä
 carpa-tøy hajxy yhädiuunñ nebiä
 Dios ja'a Moisés ja'a hijxtahñd
 jecy yaghijxiän coo jaduñ
 piahädiúnät. 45Ja'a nhaphajt ja'a
 ndeedyhajtämhajxy, ja'a hajxy jaac
 púhwäbä jaac hí'cäbä, tehngahnä
 cuhdujt hajxy hänajty jiaac
 panøcxy coo ja'a Dios hajxy hänajty
 wyiingudsähgø'øy carpa-tøbia'c.
 Jaduñ hajxy hänajty jiaac
 paduññä mänaa ja'a Josué hajxy
 jim wioonøcxyijän wiinghagajpt
 maa ja'a wiingjäya'ayhajxy hänajty
 chäna'ayän. Coo ja'a nhaphajt
 ja'a ndeedyhajtämä naax hajxy
 ñädägøøyy tsiptuumbä, ja'a
 Dioscøxpä hajxy miäjädaacy. Ja'a
 miädsiphajxy, cøjxä ñaax hajxy
 yhöxpäyø'øgy. Y coo ja'a David
 cujegy tiägøøyy gobiernähajpä,
 je'enä ja'a nhaphajt ja'a
 ndeedyhajtämä cuhdujt hajxy
 hänajty jiaac paduñ coo ja'a Dios
 hajxy hänajty wyiingudsähgø'øy
 carpa-tøbia'c, ja'a hajxy hänajty
 tøø jiaac tehñ piú'uyäbä, ja'a
 hajxy hänajty tøø jiaac tehñ
 yhi'iguiäbä. 46Ja'a David, jaančh
 tehñ quiumaabiädsøøm jaaya'ay
 maa ja'a Diosän. Mäniä David ja'a
 Dios cuhdujt miäyujwaañ coo ja'a
 tsajtøjc yhädiúnät maa ja'a Jacob

yhap yhoc ja'a Dios hajxy jaduñ
 pia'yá'axät. 47Ca'a Diavitä ja'a
 tsajtøjc hädiuun ja'a Dioscøxpä. Ja'a
 David ja'a yhuung Salomón, je'edsä
 tsajtøjc jaančh hädiuun. 48Pero ja'a
 Dios tsajpootypä, cab jaduñ tiehm
 yhity tsajtøgooty, ja'a jäya'ayhajxy
 yhädiuumbiä. Jaduhñä profeta
 tu'ug jecy quiujahy coogä Dios
 miänaañ:

49Høøch Dioshajp. Yaačh nhäña'ay
 tsajpootyp.

Yaačh nmähane'emy. Jiiby
 naaxwiin, jiihyhøchä ndecy
 nyaghity.

Cábøchä tøjc nyajmaajiaty
 maačh nbóo'xät. Cab jaduñ
 yhahixø'øy coo mijtsä tøjc
 xquiójjät.

Tiičhä tøjc jaduñ nnä'ä wá'anät.

50Haa ca'a, høøch cøxiä tøø
 nhuuc hädiuumbä mäduhñtiä
 yaa tsajpootypä møød jiiiby
 naaxwiin,

nømä Dios miänaañ.

51Mäniä Esteban jiaac miänaañ:

—Ja'a mijtsä mhapä mdeedyhajxy
 ja'a jecypiä haampiä, jaančh
 tehñ quiuhxex hajxy hijty, nebiä
 Diosmädia'agy hajxy ca'a mäbøjpän.
 Jaanä jaduñ mijtpä, caj mijtsä
 Diosmädia'agy mmäbøgaambä.
 Høxtä Dioshespiritupaady hajxy
 jaduñ homiänaajä mmädsiphaty.

52Ja'a mijtsä mhapä mdeedyhajxy
 ja'a jecypiä haampiä, quiøxy
 jaamduun quiøxy tsaächtiiuun ja'a
 profetadøjc hajxy jecy, ja'a Dios
 hänajty tøø wyiinguéxiäbä coo
 ja'a mädia'agy hajxy yajwá'xät
 coogä Dios ja'a yHuung hänajty
 yaa quixa'añ hädaa yaabä
 naaxwiin, ja'a poppä cädieey ca'a

møødpä. Høxtä yagho'cä ja'a profetadøjc-hajxy jaduñ. Y coo ja'a Dios yHuung yaa jiaanč cädaacy, mänit mijts mgø'øyejcy coo yagho'ogøøjät. ⁵³Coo ja'a Dios ja'a Moisés cuhdujt jecy mioooy, ja'a Diosmoonsä ja'a Moisés najtscapxøøyyä, ja'a jim tsohmbä tsajpootyp, mänit mijtsä mhapä mdeedy ja'a cuhdujt hajxy jaduñ mioodiägajtsä. Hoyyä Diosmoonsä ja'a cuhdujt hajxy jia yejcy, cab hajxy jaduñ mgudiuñ —nømä Esteban miädiaacpäðøoyy.

⁵⁴Coo ja'a teedywiindsøn hajxy jaduñ miädooyy nebiä Esteban hänajty miädia'aguiän, mänitä Esteban hajxy jaduñ jiaanč tehñ miäjootma'ty. Høxtä tøøtsädajp hajxy hänajty. ⁵⁵Pero cabä Esteban jaduñ ñä'ä møjpädaacy. Hix, miøødhajpiä Esteban ja'a Dioshèspiritu hänajty. Mänitä Esteban yuughee'py tsajpootyp. Mänit jaduñ yhiijxy coo jim jiaanč tehñ yajxonä maa ja'a Dios yhäña'ayän. Mänitä Jesús jaduñ yhiixäbä coo jim yhäñaabiä maa ja'a Dios ñähmøjcän yahooyhaamby. ⁵⁶Mänitä Esteban miänaañ:

—Huug hix hajxy.

Jadúñhøchä tsajt nhixy nebiä hawa'adspän. Ximä Jesucristo yhäña'ay Diosñähmøjc maa yahooyhaampiän.

⁵⁷Mäduhñtiä jäya'ayhajxy hänajty yhamädoowhity, mänit hajxy ñidiaatsmo'xä; haa ca'a, cab hajxy hänajty tehñgahnä miädoowaannä nebiatiä Esteban hänajty miädia'agy. Mänit hajxy tiägøøyy yaaxpä jöjpä møcjaty. Mänitä Esteban yajmujcä.

⁵⁸Mänit yajnøcxä cajtpa'a hadsip. Ja'a häna'cä Esteban hajxy hänajty tøø ñähwaambétiäbä, mänitä jiocxwit hajxy nägøxiä yhøxchijy. Jimä høxcujc-häna'c hänajty tu'ug piädäna'ay, ja'a hänajty xøhajpä Saulo. Mänitä Saulo ñämaayyä coo ja'a jiocxwithajxy cwieendähjätäxät. Mänitä Esteban tiägøøyyä ca'adshø'cäbä. ⁵⁹Jimä Esteban hänajty quia'adsho'ogyii, mänit tiägøøyy Diospa'yaaxpä. Mänit miänaañ:

—Wiindsøn Jesús, tunä mayhajt, høøch njuøhñdy jim wiingpøjcäc tsajpootyp.

⁶⁰Mänitä Esteban jyijcädaacy. Mänit møc yaaxy:

—Dios, ca'a jaduñ mmøjpäda'agy nébiøch yø'ø häna'c xchaačhtiuñän, hoy jia møjpoj jia møjcädieeyä.

Coo ja'a Esteban jaduñ jiaac tehñ quiapxy, mänit yho'nä.

8 Y ja'a Saulo, quiumaayy je'eduhñ coo ja'a Esteban yagho'cä.

Ja'a mänitxøøbä ja'a mabøjpädøjc-hajxy tiägøøyyä jaamduun tsaächtiuñäbä jim Jerusalén. Mänit hajxy xii yaa ñøcxøøyy. Näje'e hajxy miähmøøyy Judea-naaxooty wiinduhmyhagajpt. Näje'e hajxy ñøcxøøbiä Samaria-naaxooty. Jagooyyä ja'a apóstolädøjc-hajxy jim jiaac mähmøøyy Jerusalén. ²Mänitä dijuuntä Esteban hoy yajnaaxtägø'øyii. Näje'e jäya'ayhajxy hoy miäyajnaaxtägø'øy, pønjetiä hojioot hänajty møøð. Hoyhoyyä Esteban ñäjøøyy ñäxuu'tsä. ³Y ja'a Saulo, tehñgahnä ja'a mabøjpädøjc hänajty jiaamduñ

chaachtuñ wiinduhmyhagajpt. Høxtä jäya'adiogootypaadiä Saulo hänajty tiägø'øy. Pønjaty hänajty yajpaatp tiögooty, mänit hajxy hänajty yhøxwich yhøxwooñii, ja'a ya'adiøjc ja'a to'oxiøjc.

⁴Y ja'a mäbøjpädøjc-hajxy, ja'a hajxy hänajty tøø chóoñäbä Jerusalén, je'enä ja'a Diosmädia'agy hajxy hänajty tehngahnä yajwa'xy ja'a Jesúscøxpä, majaty hajxy hänajty wiädity. ⁵Høxtähmdsä craa Felipehajpä, coo jim chohñ Jerusalén, mänit jim ñøcxy Samaria-cajptooty. Coo jim miejch, mänit jaduñ tiägøøyy mädiaacpä ja'a Jesúscøxpä, coo hänajty je'e Dyiosquexiä. ⁶Mayyä jäya'ayhajxy hänajty yhamugø'øy mädia'agyhamädoowhijpä waambatiä Felipe hänajty miäna'añ. Madiu'u ja'a Felipe hoy-yagjuøøñäjatypä hänajty yajcähxø'øgy, paadiä miädia'agy hänajty jiaanč tehñ yhamädoowhijtäxä. ⁷Pønjatia haxøøgpä ca'a hoybä hänajty møød, mänit hajxy nämay pia'amnajxy. Yáaxäp jójcäbä haxøøgpä ca'a hoybähajxy hänajty piädsømy. Jaduhñä cø'ømucypä tecymiucypähajxy hänajty miøcpøjpä møødä tecymia'adpähajxy. ⁸Paadiä cu'ughajxy hänajty jiaanč tehñ xioonda'agy jim Samaria.

⁹⁻¹¹Jimä jäya'ay hänajty tu'ug xiøhaty Simón. Tøø ja'a magia-wiinmahñdy hänajty jecy tiuñ jim Samaria. Tøø ja'a Simón ja'a jäya'ay hänajty jim may jiaanč tehñ wyiinhøøñ. Jaduhñä Simón hänajty ñänømyii cooc

tyijy jiaanč tehñ miøj jiaanč tehñ jiaančhä, je'eguiøxpä cooc tyijy ja'a magia hänajty jiaanč tehñ jiaty. Madiu'u ja'a Simón ja'a hoy-yagjuøøñäjatypä hänajty jiaanč tehñ yajcähxø'øgy, paadiä miädia'agy hänajty jiaanč tehñ miäbøjcäxä nägøxiä høxtä ja'a møjtøjcpaady:

—Yø'ø Simón, jue'eda'a yø'ø, Dioswiinguexiäda'a yø'ø, paadiä møcmäjaa jaduñ jiaanč tehñ miøødä.

Jaduñä Simón hänajty ñänømyii ja'a cú'ugäm. ¹²Jaduñä Felipe hänajty yajnähixø'øy coogä Dios yhane'emy ja'a miøcmäjaahaam, møød coogä Jesús Dyioswiinguexiä. Mänitä jäya'ayhajxy may miäbøjcy näya'ay nädo'oxy. Mänit hajxy nägøxiä hoy ñäbety. ¹³Y ja'a Simón, miäbøjc je'eduhmbä. Mänit hoy pianäbejpä. Mänitä Simón ja'a Felipe tiägøøyy møødwädiä. Yagjuøøbiä Simón hänajty nebiä Felipe ja'a hoy-yagjuøøñäbä hänajty yajcähxø'øguiän.

¹⁴Y ja'a apóstoldøjc-hajxy, ja'a hajxy hänajty tøø miähmø'øyäbä Jerusalén. Mänit hajxy miädoyhajty coogä cu'ug ja'a Diosmädia'agy hajxy hänajty tøø jøjppøgø'øy jim Samaria. Mänitä Pedrohajxy jim quiejxä møødä Juan. ¹⁵Coo hajxy jim miejch Samaria, mänit hajxy tiägøøyy Diospa'yaaxpä ja'a mäbøjpädøjcøxpähajxy, weenä Dioshespíritu hajxy nägøxiä yhadägø'øy jioottägø'øyii. ¹⁶Hix, cahnä Dioshespíritu hänajty pøn yhadägø'øy jioottägø'øyii. Tøø hajxy hänajty jia näbety ja'a Jesúscøxpä. Cahnä hajxy hänajty miädohyatynä

ja'a Dioshespíritucøxpä. ¹⁷ Coo ja'a Pedrohajxy Dyiospa'yaaxpädøøyy møødä Juan, mänitä mäbøjpädøjc-hajxy quiø'ønähxajjä. Mänit hajxy yhadägøøyy jioottägøøyyä ja'a Dioshespíritäm.

¹⁸ Y ja'a Simón, coo jaduhñ yhjy, mänitä Pedro xädø'øn hajxy jia yajmähawaanøøyyä. ¹⁹ Mänitä Simón miänaañ:

—Høøch yø'ø mäjaa jaduhmbä yaghabøjcäc. Hix, coöch pøn jaduhñ ngø'ønähxäjät, tehñ jiaduhñ je'le yhadägøøyy jioottägøøyyäbät ja'a Dioshespíritäm.

²⁰ Mänitä Pedro yhadsooyy:

—Coo miich jaduhñ mwi'i tiajy mwi'i miay coo højts miich ja'a Diosmäjaa nyaghabøgät juyhaam, paady miichä Dios xyajcuhdägoyya'añ møødä mxädø'øn. Hix, ñä'ä yepjiä Dios jaa miäjaa jaduhñ, caj pøn yajmädoogy. ²¹ Caj miich cuhdujt mnä'ägädä møødä coo højts miich ja'a Diostuung xmiøødtünät, je'eguiøxpä coo miichä mwiinmahñdy quia'a nä'ägädä hoyyä ja'a Diosøxpä. ²² Najtshixø'ow ja'a mhaxøøgwiiinmahñdy jaduhñ. Jímbädä Dios xñä'ä mämée'xät coo mmänuu'xtá'agät. ²³ Tøøch miich nhøxcapy coo miichä mhaa mjoot jiaanč tehñ yhaxøøgä, møød coo miich haxøøg mjaanč tehñ tiajy mjaanč tehñ miay mjoodooty mgopcooty.

²⁴ Mänitä Simón yhadsooyy:

—Huuc tunä mayhajt hajxy, huuc Diospa'ya'ax hajxy ja'a høøchcøxpä, jadúhñhøchä Dios xquia'a yajcumädówät nébiøch hajxy tøø

xyajmøødmädia'aguiän —nømä Simón miänaañ.

²⁵ Jímä Pedrohajxy hänäjty jiaac capxy jiaac mädia'agy ja'a Jesúsøxpä møødä Juan, nebiaty hajxy hänäjty tøø yhamdsoo yajnähixø'oyii ja'a Jesúsäm. Mänit hajxy wyiimbijnä, mänit hajxy jím ñøcxtägajch Jerusalén näguipxy møødä Felipe. Tu'haamnøcxpä, nøødänáayyap tu'udänáayyap hajxy hänäjty ñøcxy. Majatiä cajpthuung jím Samaria-naaxooty, jaduhñä Diosmädia'agy hajxy hänäjty yajwa'xy nebiä cu'ugä piojpä quiädieeybä ñähwa'ads quiuhwá'adsät.

²⁶ Coo hajxy jím quioo'ty Jerusalén, mänitä Felipe ja'a Diosmóonsäm tu'ug ñämaayyä, ja'a jím tsohmbä tsajpootyp:

—Nøcxø'ow jím jøømboj mänajpä. Ja'a møjtu'u mbanøcxäp, ja'a jím nøcxpä maa ja'a cajpt jaduhñ xiøhatiän Gaza.

Ja'a møjtu'u jaduhmbä, pactuum jaduhñ ñøcxø'oy. ²⁷⁻²⁸ Mänitä Felipe jiaanč tu'ubøjcy. Ja'a tu'haamnøcxpä, mänitä Felipe ja'a jäya'ay tu'ug piaaty, ja'a hänäjty tsohmbä Etiopía. Tøø jaaya'ay hänäjty yhoy Jerusalén Dioswiingudsähgøøbiä. Quiajptooty hänäjty ñøcxnä. Eunuco je'le. Møjtuung hänäjty jím miøød maa ja'a ñaax maa ja'a quiajptän. Xädø'ønngwiendähajpä hänäjty jím tiuumby. Ja'a reina mioonsä hänäjty je'eduhñ, ja'a hänäjty jím mähanehmbä Etiopía. Carretajooty jaaya'ay hänäjty ñøcxy nocyhée'páp. Jue'le hänäjty quiapxy, ja'a nocy ja'a Isaías jecy quijáhyyäbä, ja'a jecy túunäbä profeta.

²⁹Mänitā Felipe nāmaayyā ja'a Dioshespīritām coo jim miōjwá'agät carretawiinduum. ³⁰Coo ja'a Felipe jim jiaančh mōjwa'cy carretawiinduum, mänitā Felipe miädooy coo ja'a Etiopíabā jāya'ay ja'a nocy hānajty quiapxy, ja'a Isafās jecy quiujáhyyäbā. Mänitā Felipe jaaya'ay miäyajtøoyy:

—Nej, mwijnjuøøby miič jaduhñä nebiaty mgapxiän.

³¹Mänitā jaaya'ay yhadsooyy:

—Cábøch nwiinjuø'oy. Cábøch pøn nmøødä pōñhøch jaduhñ xquiapxtøøwäp.

Mänitā Felipe nāmaayyā coo jim piédät carretajooty, coo jim yhøxtá'agät maa ja'a Etiopíabā jāya'ay nāhmøjcän. ³²Jaduhñä jaaya'ay hānajty quiapxy:

Hadsipä mähdiøjc yajnøcxä maa ja'a yagho'taactän, jaduhñ nebiä meeg yajnøcxyijän maa ja'a yagho'taactän.

Cabä mähdiøjc waamb nā'ägädä capxy;

jaduhñ hamoñ yhiyty nebiä meeg hamoñ yhitiän coo nāhme'xyii.

³³Høchähdiuunnä ja'a mähdiøjc yagho'cä.

Cab jaduhñ pøn nāhgapxtuuty.

Cabä nøøxä miajc miøødhajty; hix, tøø ja'a juggyhajt hānajty yaa quiøjxnä hädaa yaabä naaxwiin.

³⁴Mänitā Felipe nāmaayyā:

—Tunä mayhajt, høøch huuc hawāanäc, coo ja'a Isafās jaduhñ jecy quiujahy, pøn jaduhñ miädiaac, wiingjāya'ay tøgä je'eguiøxpä — nomä Etiopíabā jāya'ay yajtøoyy.

³⁵Mänitā Felipe tiägøoyy capxtøøbä waambaty hānajty

jaduhñ miädia'agytiägø'oy. Mänit miädiaacy ja'a Jesúscøxpä, coo hajxy hoy xñähho'túütäm.

³⁶Weeñtiä hajxy jaduhñ jiaac yohy carretajooty, mänitā nøø hajxy piaaty. Mänitā Etiopíabā jāya'ay miānaañ:

—Xii nøø. Nej, cab jaduhñ yhahixø'oyä cooçh nnäbétädä.

³⁷Mänitā Felipe yhadsooyy:

—Hahixøøby jaduhñ pø tøyhajt jaduhñ mmäbøcy hamuumdu'joot.

Mänitā Felipe yhadsoowä:

—Nmäbøjpiøch jaduhñ coo ja'a Jesucristo Dyioshuungä.

³⁸Mänitā Etiopíabā jāya'ay ja'a carreta yajyajtānaaxiøjpä.

Mänitā Felipehajxy nāmetsc quiarretamānajcy, møødä Etiopíabā jāya'ay. Mänit hajxy nāmetsc nøødägøoyy. Mänitā Etiopíabā jāya'ay nābejty. ³⁹Coo hajxy nøøbädsøømgumbä, mänitā Felipe wiingtuum yajnøcxä ja'a Dioshespīritām. Cabä Felipe yhiyxtägäjtänä ja'a Etiopíabā jāyá'ayäm. Xoondáacäp ja'a Etiopíabā jāya'ay nøcxnä. ⁴⁰Y ja'a Felipe, mänit jim miejch maa ja'a cajpt hānajty xiøhatiän Azoto. Mänit tiägøoyy wädiypä cajpt-cajpt. Yajwa'xypä Felipe ja'a Diosmädia'agy hānajty nebiä cu'ugä piojpä quiädieeybä nāhwa'ads quiuhwä'adsät. Mänit jim miejch Cesarea.

9 Y ja'a Saulo, tehngahnä ja'a mäbøjpadøjc hānajty yhadsähgø'oy yhajuø'oy coo hajxy hānajty yagho'oga'añii, pønjaty hānajty mäbøjp ja'a Jesúscøxpä. Coo ja'a Saulo hānajty jaduhñ tehngahnä jia wi'i

miähadsähgø'owa'añ, paady jim ñøcxy maa ja'a teedywiindsønän. ²Mänitä Saulo cuhdujt miooyä nocyhaam coo jim ñøcxät Damasco, coo ja'a mabøjpädøjc-hajxy jim yhöxta'awøøjät wiinduhmčhajtøjc, majatiä judíoshajxy hänäjty yhamugø'øyän. Jaduhnä Saulo hänäjty tiajy miay coo ja'a mabøjpädøjc-hajxy hänäjty jim nøcxy chuma'añii Jerusalén, ya'adiøjcä tio'oxiøjcä. ³Mänitä Saulohajxy tiu'ubøjcy møødä jiamiøød nämetsc nädägøøg. Ja ween hajxy hänäjty jim quia'a mech Damasco, mänitä Saulo jøøn møc quiuhjajcädaacä wäditiä. Tsajpootypä jøøn chohndaacy. ⁴Mänitä Saulo quiädaayy. Mänit miädooyy coo jäya'ay hänäjty tu'ug quiapxy:
—Saulo, Saulo, tiich miich jaduhn coo xwyi'i miädsibø'øy.
⁵Mänitä Saulo yajtøoyy:
—Wiindsøn, pøn miich jaduhn.
Mänit yhadsoowä:
—Jesúshøch høøch. Høøch miich jaduhn xwyi'i miädsibøøby. Cooch miich jaduhn xwyi'i miädsibø'øy, hamdsoo miich jaduhn mničhaächtiüñii.
⁶Tsähgøoyy tsäyúuyyabä Saulo yajtøøgumbä:
—Wiindsøn, neby yahixø'øy njatcø'øwädøch.
Mänit yhadsoowägumbä:
—Pädø'øg, nøcx cajptooty. Jim häna'c xyhawáañät nej njatcø'øwät.
⁷Y ja'a Saulo jiamiøødhajxy, coo hajxy jaduhn miädooyy nebiatiä Saulo hänäjty tøø miägapxyiijän, jaančh tehñ chähgøoyy hajxy jaduhn. Hiç, cab hajxy pøn yhiçxy.

Høxtä hahuum høxtä hawiinds hajxy miähmøoyy. ⁸Mänitä Saulo jiaančh tänaayyø'cy. Coo jaduhn jia wiindøø'xy, cab jaduhn tii yhiçxy. Hiç, tøø hänäjty wyiinoočh. Coo hajxy jaduhn tiu'ubøjtägajch, wichhaamä Saulo jim yajmejtsä Damasco. ⁹Tägøøgxøø ja'a Saulo jim yhiçty wiinxoods Damasco. Ni quia'a cay ni quia'a hu'ugy hänäjty tii.

¹⁰Jimä jäya'ay hänäjty tu'ug chäna'ay Damasco, ja'a hänäjty xøhajpä Ananías. Tøø ja'a Diosmädia'agy hänäjty miäböcy. Mänitä Ananías ja'a Jesús wyiinhiçxy haguma'ayhaam. Mänitä Ananías miägapxä:

—Ananías.

Mänit yhadsooyy:

—Wiindsøn, chaačh høøch, tisän.

¹¹Mänitä Jesús miänaañ:

—Pädø'øg. Nøcx jim maa ja'a møjtu'u jaduhn xiøhatiän Tødiu'u. Jimä jäya'ay tu'ug chäna'ay, ja'a xøhajpä Judas. Jimä craa tu'ug yhahity, ja'a xøhajpä Saulo. Jim je'le choon maa ja'a cajpt xiøhatiän Tarso. Diospa'yaaxp jim jadunajtä maa ja'a Judas tiøjcän. Coo jim mmédsät, mänitä Saulo myajtøwät. ¹²Tøø miichä Saulo xwyiinhiçxy haguma'ayhaam coo miich hoy mnähdoñ, jaduhn yhiçxtägätsät.

¹³Coo ja'a Ananías jaduhn miädooyy, mänit miänaañ:
—Wiindsøn, tøøch jaduhn mayhooc nmädoyhaty nebiä craa Saulo naxy jiatcø'øy jim Jerusalén. Näxiägä mabøjpädøjc-hajxy jim jiaamduñ chaačhtiüñii, ja'a miichä mmädia'agy hajxy xmiäbøjcäbä. ¹⁴Jadúhnhøch tøø nmädoyhajpä

coogä cuhdujt jim miooyä coo ja'a mäbøjpädøjc-hajxy yaabä yajnøcxøøjät jim Jerusalén, coo hajxy jim chúumäbät, pønjaty miich jaduhñ yaa xquiapxpaatp. Ja'a teedywiindsønä cuhdujt hajxy jaduhñ yejc. Hoorä, tøø ja'a Saulo yaa miejtsnä Damasco —nømä Ananías miänaañ.

¹⁵Mänitä Jesús ja'a Ananías ñämáaguumbä:

—Tsógäm, nøcx cudiúñ nébiøch miich tøø nhane'emiän. Tøøchä Saulo nyajnähdijy coo miädia'agät ja'a høøchcøxpä jim maa ja'a israelitahajxiän, møød jim maa ja'a ca'a israelitahajxypän, møød jim maa ja'a guiobiernähajxiän.

¹⁶Høøchä Saulo nyajnähdijaamby mäduhñtiä jaduhñ yhahixø'øy chaaçhpøgät ja'a høøchcøxpä.

¹⁷Mänitä Ananías jiaançh nøcxy maa ja'a Saulo hänajty tøø miejtsta'aguiän. Coo ja'a Ananías tiøjtägøøyy, mänitä Saulo quiø'onähgajpä. Mänit ñämaayyä:

—Mägu'ughajpä Saulo, ja'a Jesús miich jaduhñ jim mhijx tu'haammiimbä. Jaayá'ayhøch jaduhñ yaa tøø xquiexy nej miich jaduhñ mhijxø'tägätsät hoy. Y jaduhñ miichä Dioshespíritu xyhadägø'ow xjioottägø'owät.

¹⁸Tuunä ja'a Ananías jaduhñ ñä'a mänaañ, mänitä Saulo wyingahduutä nebiä tsaamghacän. Mänitä yhijxø'tägajch. Mänit tiänaayyø'cy. Mänit hoy ñäbety.

¹⁹Mänit quiaayy yhuucy. Møcpøjc je'e jaduhñ. Mänit jim jiaac mähmøøyy mejtsxøø tægøøgxøø Damasco maa ja'a mäbøjpädøjc-hajxiän.

²⁰Mänitä Saulo tiägøøyy mädia'agy-yajwa'xpä wiinduhmçhajtøjc jim Damasco maa ja'a judíos chajtøjc-hajxiän. Jaduhñ hänajty miädia'agy coogä Jesús Dyioshuungä. ²¹Pønjaty ja'a Saulo miädia'agy hänajty hamädoowhíjtäp, jiaançh tehñ yagjuøøby hajxy hänajty jaduhñ nebiä Saulo hänajty miädia'aguiän ja'a Jesúsøxpä. Mänit hajxy tiägøøyy niñämáayyäbä:

—Yø'ø craa Saulo, jue'e yø'ø, yø'ø ja'a mäbøjpädøjc jim wi'i miädsibøøby Jerusalén, pønjatia Jesús capxpaatp. Paady yø'ø yaa tøø piejpä Damasco coo ja'a mäbøjpädøjc-hajxy yaa miájtsäbät, møød coo hajxy jim yajnøcxøød Jerusalén hadsip, jaduhñ hajxy jim nøcxy quiø'øyegyii maa ja'a teedywiindsønñhajxiän —nømä Saulo ñänøømä.

²²Y ja'a Saulo, tehngahnä hänajty hamøj jootmøj jiaty coo ja'a tsaanä cu'ug hänajty yajwiinxiic yajwiingapxø'øy coogä Jesús Dyioswiinguexiä. Jaançh tehñ homiäbøjnä hänajty miädia'agy. Y ja'a judíoshajxy, ja'a hajxy hänajty jim tsänaabiä Damasco, cabä Saulo hajxy hänajty hoy quiapxhaduga'añ, je'eguiøxpä coo Saulo hänajty miädia'agy hamøj jootmøj.

²³Cujecy, mänitä judíoshajxy jim yhamugøøyy. Mänit hajxy quiojyquiapxytiuuñ coogä Saulo hajxy hänajty yagho'oga'añ.

²⁴Xøømdsuhmä Saulo hänajty miäxojna'ayii mäduhñjatiä tægø'owøødiaactän maa ja'a Damasco-cajpt jiuhamu'tswäditiän. Mänitä Saulo jaduhñ miädoyhajty

cooc hänajty yagho'oga'añii.

²⁵Mänitä mabøjpädøjcä Saulo hajxy coods piädaacy möjcatchooty. Mänit hajxy quihdøñajxy maa ja'a cajpt hänajty piquiä yhamuudsø'øguiän. Jaduhndsä Saulo piäyø'cy.

²⁶Coo Saulo jim chohñ Damasco, mänit jim ñøcxtägajch Jerusalén. Coo jim quioo'ty, mänit jim ñøcxøøyy maa ja'a mabøjpädøjc-hajxiän. Pero je'enä ja'a Saulo hajxy hänajty nägøxiä jiaanč tehñ chähgø'øy. Hiñ, cab hajxy hänajty ñajuø'øy øø mabøjp hänajty je'ebä. ²⁷Jimä mabøjpä hänajty tu'ug xiøhaty Bernabé. Je'e mabøcypiä, cab hänajty chähgø'øy. Mänitä Bernabé ja'a Saulo wioonøcxy maa ja'a apóstoldøjc-hajxiän. Mänitä Bernabé ja'a apóstoldøjc yajmøødmädiaacy coogä Saulo ja'a Jesús hänajty tøø wyiinhixy tu'haamnøcxpä jim Damasco-mäwiingón, møød coogä Jesús ja'a Saulo jim miägapxy, møød coogä Saulo tiägøøyy mädiaacpä hamøj jootmøj jim Damasco ja'a Jesúscøxpä. Jaduhñä Bernabé ja'a apóstoldøjc yajmøødmädiaacy ja'a Saulocøxpä. ²⁸Mähmøøyy ja'a Saulo jim Jerusalén. Mänitä Saulo ja'a apóstoldøjc tiägøøyy møødwädijpä. Mänitä mädia'agy tiägøøyy yajwa'xpä ja'a Jesúscøxpä hamøj jootmøj. ²⁹Jimä judiøshajxy hänajty näje'e, hagriego hajxy hänajty yhayuuc-hajpy. Mänitä Saulo tiägøøyy møødyajcapxiøøbiä ja'a Jesúscøxpä. Pero cabä judiøshajxy jaduhñ yhojiäwøøyy. Mänit hajxy wyiinmaayy coo ja'a

Saulo hajxy yaghó'ogät. ³⁰Coo ja'a mabøjpädøjc-hajxy jaduhñ miädoyhajty coogä Saulo hänajty yagho'oga'añii, mänitä Saulo hajxy miøødnøcxy jim Cesarea. Coo hajxy jim miejch, mänitä Saulo hajxy quiejxtägajch Tarso.

³¹Mänitä tsip jaduhñ yhamaadiujnä ja'a mabøjpädøjcøxpähajxy, mäduhñjaty hajxy hänajty xii yaa chäna'ay, møød jim Judea, jim Galilea, jim Samaria. Tehngahnä møcmäjaa hajxy hänajty mio'oyii jøjwidsø'ø ja'a Dioshøspiritäm, paady hajxy hänajty jabom-jabom miayø'øy.

³²Y ja'a Pedro, wiinduhñchajtøjc hänajty wiädity mäduhñjatiä mabøjpädøjc-hajxy hänajty chäna'ay. Mänit jim ñøcxøøbiä maa ja'a cajpt hänajty xiøhatiän Lida. Jimä mabøjpädøjc-hajxy hänajty chänaabiä. ³³Jimä jäya'ay hänajty tu'ug pia'amgo'na'ay, ja'a hänajty xøhajpä Eneas. Tuctujcumøjt hänajty tøø piøgyii. Jue'e hänajty je'e, cø'ømucy tecymiucy. Coo ja'a Pedro jim miejch Lida, mänit jim ñøcxy maa Eneas tiøjcän. ³⁴Mänitä Pedro miänaañ:

—Eneas, ja'a Jesucristo miich xyajmøcpøgaamb. Pädø'øg. Pädit yø'ø mgøjxt.

Tuunä ja'a Eneas jaduhñ ñä'ä nämäayy, mänitiä jiaanč pädø'cy. ³⁵Mäduhñtiä jäya'ayhajxy hänajty chäna'ay jim Lida møød jim maa ja'a joy hänajty xiøhatiän Sarón, coo hajxy jaduhñ miädoyhajty coogä Eneas hänajty tøø pia'amnaxy, mänitä Eneas hajxy nägøxiä hoy yhixy coo tøø jiaanč møcpøcy. Mänitä Diosmädia'agy

hajxy tiägøøyy mabøjpä ja'a Jesúscøxpä. Mänitä yhamdsoo cuhdujt hajxy ñajtshixøøñä.

³⁶ Jimä tadjäya'ay hänajty tu'ug chäna'ay maa ja'a cajpt hänajty xiøhatiän Jope. Tabita ja'a tadjäya'ay hänajty xiøhaty arameo-ayuuuc-haamby. Hagriegohaamby, jue'e hajxy hänajty tyijy Dorcas. Jaduhn miädia'agytiägø'øy "Gacela." Hoorä, ja'a Dorcas, miäbøjpiä Diosmädia'agy hänajty je'e, paadia häyoobädøjc hänajty naxy piuhbety, pønjaty hänajty tii yajmaajajp. Jaanč tehñ yhooyä Dorcas hänajty jiaäya'ayhaty. ³⁷ Mänitä Dorcas pia'ambejty. Mänit yho'cy. Mänitä ho'ogyjiäya'ay hajxy yajtsiyy. Mänit hajxy hoy piäda'agy cøxp nähbettøgooty. ³⁸ Jim Jope, wiingón hänajty jim Lida maa ja'a Pedro hänajty yhtiän. Hoorä, ja'a mabøjpädøjc-hajxy hänajty jim tsänaabiä Jope, coo hajxy jaduhn miädoyhajty coogä Pedro hänajty jim wiädityñä Lida, mänitä cugapxy hajxy metsc quiejxy coo Pedro paquiä yhuuc nõcxät jim Jope maa ja'a Dorcas hänajty tøø yho'oguiän.

³⁹ Mänitä Pedro jiaanč panøcxy. Coo hajxy jim miejch Jope, mänitä Pedro wioonøcxä nähbettøgooty maa ja'a ho'ogyjiäya'ay hänajty wyijtsna'ayän. Piquiä ja'a yaamgto'oxy ja'a ho'ogyjiäya'ay hajxy hänajty tøø piäda'agy. Wi'i jioøby wi'i xiuu'tsp hajxy hänajty. Mänitä Pedro ja'a wit tucxy yaghixä mädyijiatä Dorcas hänajty tøø yhädiuñ. ⁴⁰ Mänitä Pedro ja'a jäya'ay nägøxiä yhøxquejxpädsøømy. Mänitä Pedro jyjicädaacy.

Mänit Dyiospa'yaaxy. Mänitä ho'ogyjiäya'ay wyiinhee'ppejty. Mänit miänaañ:

—Tabita, pädø'og.

Mänitä Dorcas wyiindøø'xø'cy. Coo ja'a Dorcas ja'a Pedro yhijxy, mänitä Dorcas yhänaayyø'cy. ⁴¹ Mänitä Pedro ja'a Dorcas wyidsø'cy. Mänitä Pedro ja'a mabøjpadøjc quiuyaaxøøyy tøgooty møødä yaamgto'oxy. Coo hajxy tiøjtägøøyy, mänit hajxy yhijxy coo ja'a Dorcas hänajty tøø jiuujpionä. ⁴² Mänitä mädia'agy paquiä wia'xy jim Jope cooc jaduhn tøø jiuujpiøcy. Mänitä jäya'ayhajxy may jiaanč mabøjcy ja'a Jesúscøxpä. ⁴³ Mänitä Pedro jim jiaac mähmøøyy Jope maxiøø. Jim hänajty miejsta'agy maa ja'a Simón tiøjcän, ja'a wajhacyajtøøtspä.

10 Jimä jäya'ay hänajty tu'ug chäna'ay Cesarea, ja'a hänajty xøhajpä Cornelio. Soldado-wiindsøn hänajty tiuumby. Italia ja'a soldadohajxy hänajty choon. Nämäyyä soldadohajxy hänajty jim yhity Cesarea. ² Hoyyä Cornelio ja'a Dios hajxy hänajty wyiingudsähgø'øy møødä yhuung møødä tio'oxy. Hojiootä Cornelio hänajty jiaanč tehñ miøød. Naxiä judiøshajxy hänajty piuhbedyii xädø'øñhaam, ja'a hajxy hänajty häyoobä. Jabom-jabomä Cornelio hänajty Dyiospa'ya'axy. ³ Mänacyxiøø hänajty jaduhn, jimä Cornelio hänajty tiuñ xiajy tøgooty, mänitä Diosmoonsä tu'ug näguehxtøø'xy maa Cornelio hänajtiän. Tsajpootyp ja'a Diosmoonsä hänajty tøø chohnda'agy. Mänitä Diosmoonsä ja'a Cornelio nämäaayy:

—Cornelio.

⁴Coo ja'a Cornelio ja'a Diosmoonsä jaduhñ yhijsy, chähgøøyy jaduhñ. Jejcy-juøøby miähee'pnaayy. Mänit miäyajtøøyy: —Wiindsón, tii mdsojpy.

Mänitä Diosmoonsä yhadsooyy: —Xquiumaaby miichä Dios jaduhñ coo miich tehngahnä mba'ya'axy, møød coo miichä häyoobäjäya'ay naxy mbuhbety. ⁵⁻⁶Jim Jope, jimä jäya'ay tu'ug chäna'ay mejypia'a, ja'a xøhajpä Simón. Jue'e Simón tiuunghajpy, wajhacyajtøøtsp. Jimä craa tu'ug yhahäna'ay maa ja'a Simón tiøjcän. Mejtstu'u ja'a craa xiøø, Simón møød Pedro. Jimä cugapxy mejtstägøøg mguéxät Jope, weenä Pedro jaduhñ nøcxy ñäma'ayii cooc miich yaa min xquiuhixy. Jaaya'ay jaduhñ xyhawáanäp tii miichä Dios xyajmädsojpy coo mgudiúnät — nømä Diosmoonsä miänaañ.

⁷Coo ja'a Diosmoonsä wyiimbijnä, mänitä Cornelio ja'a mioonsä metsc quiuyaaxøøyy møødä soldado tu'ug. Dioswiingudsähgøøbiä soldado hänäjty. Miøødnijiootpäatäbä Cornelio ja'a soldado hänäjty.

⁸Mänitä Cornelio quiøxy yajmøødmädiaacy waambaty hänäjty tøø ñäma'ayii ja'a Diosmoonsäm. Mänitä Cornelio ja'a mioonsä jim quiejxy Jope nädägøøg møødä soldado.

⁹Cujaboom cujyxioø, jim hajxy hänäjty tiu'uyo'oyñä. Ja ween hajxy hänäjty jim quia'a mech Jope. Y ja'a Pedro, mänit jim wyiimbejty tøjnähgøxp Diospa'yaaxpä.

¹⁰Jaanč tehñ yähó'cäbä Pedro hänäjty. Jaguiay hänäjty je'eduhñ.

Jimä quiai hänäjty yaghoyøøyyäxä. Mänit jaduhñ wyiinhijxy ¹¹coo ja'a tsajt hänäjty tøø yhawa'ačh. Mänit jaduhñ yhijsy coo tii jaduhñ quiuhdøøñaxyii nebiä poobwit crutypän. Mädaaxc-hitä poobwit hänäjty xiojtsø'øguiä. Jaduhñ hänäjty miänoonna'ay.

¹²Madiu'u animalhajxy hänäjty jim quiahxø'øgy poobwittøguiøxp, møødä hamädaaxtecpyiähajxy, møødä tsahñdy, møødä muuxy.

¹³Mänitä Dios ja'a Pedro ñämaayy: —Pedro, pädø'og. Yagho'og yø'ø animal maybä. Mänit mdsú'udsät.

¹⁴Mänitä Pedro yhadsooyy: —Wiindsón, caj; cáboch yø'ø animal jaduhmbä mänaa ndsu'üch. Hix, cab højts nguhdujt jaduhñ myiñ coo højts animal hoñä'ä mädyiibä ndsú'udsät.

¹⁵Mänitä Pedro ñämäayyägumbä: —Tijátyhöch nyajnähdijsy coo hajxy mdsú'udsät, cab jaduhñ yhahixø'øy coo hajxy mwiingápxät —nømä Dios miänaañ.

¹⁶Tägøøghoocä Pedro jaduhñ miägäpxä, mänit yhijsy coo ja'a poobwit chajpécumbä tsajpootyp.

¹⁷Wyi'i tiajpy wyi'i miaabiä Pedro hänäjty tiiguiøxpä hänäjty jaduhñ coo tøø wyiinhixy. Y ja'a Cornelio quiugapxyhajxy, tøø ja'a Simón ja'a tiøjc hajxy hänäjty piáatänä.

¹⁸Mänit hajxy møc quiugapxøøyy pø jiiä Simón Pedro jiaanč hity.

¹⁹Y ja'a Pedro, je'enä hänäjty wyi'i tiajpy wyi'i miay tiiguiøxpä hänäjty jaduhñ coo tøø wyiinhixy. Mänitä Dioshéspiritu ja'a Pedro ñämaayy:

—Mäadow, xiiby miich häna'c nädägøøg xyhøxta'ay. ²⁰Mänac,

nøcx yø'ø häna'c yajtøjtägø'ow. Hoy jaduhñ coo mbanøcxät coo hajxy hänajty wyiimbida'añ. Hix, høøch yø'ø häna'c jaduhñ tøø nguexy coo miich jaduhñ xwioonøcxät maa ja'a quiajpthajxiän.

²¹Mänitä Pedro jiaančh mänajcy. Mänitä Pedro ja'a häna'c nädägøøgpä ñämaayy:

—Høøch Pedrohajp. Høøch mijts xyhøxtaaby. Tiičh mijts xwia'ana'añ.

²²Mänit hajxy yhadsooyy:

—Ja'a Cornelio højts tøø xquiexy, ja'a soldado-wiindsøn. Jaančh tehñ yhojiäya'ay je'e. Dioswiingudsähgøøby je'e. Jiaančh tehñ chojpiä judíos ja'a Cornelio hajxy. Jiaančh tehñ quiumaaby hajxy jaduhñ —nømä Pedro ñämaayyä.

²³Mänitä Pedro ja'a häna'c nädägøøgpä ñämaayy coo hajxy tiøjtägø'owät, møød coo hajxy jim miejststä'agät. Cujaboom hajxy wyiimbijnä näguipxy møødä Pedro. Näje'e ja'a mabøjpädøjc-hajxy pianøcxpä, ja'a hajxy hänajty jim tsänaabiä Jope.

²⁴Cumaaxc hajxy jim miejch Cesarea. Jimä Cornelio hänajty yhahixy, møødä juijy møødä miägu'ug, møødä miägu'ughajpähajxy.

²⁵Coo ja'a Pedro jim miejch maa ja'a Cornelio tiøjcän, mänitä Cornelio ja'a Pedro yajpoo'xy. Mänitä Cornelio ja'a Pedro wyiinjiçädaacy. Wyiingudsähgø'owaambä Cornelio ja'a Pedro hänajty jaduhñ. ²⁶Mänitä Pedro ja'a Cornelio ñämaayy:

—Tänaayyø'og, ca'ačh nDiosä. Nä'a pajäya'ayhájpøch høøch nej miichän. Cab jaduhñ yhahixø'oy cooçh miich xwyiingudsähgø'owät.

²⁷Mänitä Cornelio jiaančh tänaayyø'cy. Mänit hajxy paquiä miädiaacy. Mänit hajxy tiøjtägøøyy maa ja'a Cornelio miägu'ughajpähajxy hänajty nämay tøø yhamugø'oyän. ²⁸Mänitä Pedro miänaañ:

—Højts judíos-jäya'ay, jaduhñ højts nguhdujt myiñ coo højts jiiby nga'a tøjtagø'owät maa jäya'ay tiøjc-hajxiän, ja'a hajxy ca'a judiøspä, nébiøch chaa tøø ndøjtägø'oyän. Cooçhä Dios jaduhñ xyajwiinhijxy, jaduhñhöch tøø xyajwiinjuø'oy coo jaduhñ quia'a hahixø'oy cooçh pøn nbéxät.

²⁹Paady, cooçhä Cornelio tøø xyajmøjya'axyii, páadyhöch jaduhñ tøø nga'a mäna'añ cooçh hänajty nga'a mina'añ. Huuc tunä mayhajt, høøch huuc hawáanac tiičh jaduhñ coo tøø xyajmøjya'axyii.

³⁰Mänitä Cornelio yhadsooyy: —Maaxtøjcy mädägøøyy, yáabiøch hänajty nDiospa'ya'axy tøgooty. Mänacyxiøø hänajty je'e. Mänitä jäya'ay tu'ug nägüehxtø'oxy høøch nwiinduum. Jaančh tehñ yhaambä wyit hänajty.

³¹Mänitøch xñämaayy: “Cornelio, tøø miichä Dios xmiädoy coo jaduhñ jabom-jabom mba'ya'axy. Xquiumaaby miichä Dios jaduhñ coo miichä häyoobädøjc mnäxuuch.

³²Capxyñäguex ja'a Simón Pedro jim Jope coo ween yaa myiñ. Jim jaduhñ yhahäña'ay maa ja'a craa Simónhajpä tiøjcän, ja'a wajhacyajtøøtspä. Mejypia'a mädøyyä chäna'ay. Coo ja'a Simón Pedro yaa miédsät, mänit miich jaduhñ xmiøødmädia'aga'añ.”

³³Mänitøch häna'c jim njaančh

quejxy coo miich nõcxy xwioy.
 Hoy jaduħn coo tøø mmiñ. Paady
 højts yaa tøø nhamugø'oy coo
 højts miich mgapxy mmädia'agy
 nhamädoowhidäänäm
 nebiaty miichä Dios tøø
 xñajtsapxøøyyän coo højts jaduħn
 xyajmøødmädiaactägätsät. Xyhijxp
 højtsä Dios jaduħn coo højts
 hamuumdu'joot nmäbøga'añ —
 nomä Pedro ñämaayyä.

³⁴Mänitä Pedro tiägøøyy
 mädiaacpä:

—Tøøch nwiinjüøñä coo højtsä
 Dios tu'cuhdujt xchójcäm. Cabä
 Dios pøn hixy heeby piäda'agy.
 Tøyhajt jaduħn. ³⁵Pønjatia
 Dios jaduħn wiingudsähgøøby
 hamuumdu'joot, pønjaty hojioot
 møød, je'edsä Dios quiumaaby,
 homiädyii cajptä hajxy jia
 tsooñ. ³⁶⁻³⁷Mänaa ja'a Juan
 tiägø'oyän mäyajnäbejpä, mänitä
 mädia'agy jim tiägøøyy yajwa'xpä
 Galilea-naaxooty cooc ja'a Dios
 ja'a Jesucristo hänajty quiexa'añ
 maa ja'a israelita-jäya'ayhajxiän,
 majaty hajxy hänajty chäna'ay,
 jaduħnä piojpä quiädieeybä hajxy
 ñähwa'ads quiuhwä'adsät. Jaaya'ay
 hajxy nägøxiä nWiindsønähjätäm.
³⁸Nazaret ja'a Jesús hänajty
 chooñ. Mänitä Dios ja'a Jesús ja'a
 yhEspiritu miooyy møødä mäjaa.
 Jaduħnä Jesús wyiinguejxä coo
 wiädítät mayhajtuumbä. Pønjaty
 hänajty pøjcäp, yajpa'amnäxjap
 hajxy hänajty. Pønjatia haxøøgpä
 ca'a hoybä hänajty møød,
 yajnähwäatsäp hajxy hänajty.
 Puhbéjtäbä Jesús hänajty ja'a
 Diósäm. ³⁹Højts, hamdsoo højts
 nhijxy tijatiä Jesús jim tiuun

Judea-naaxooty møød jim Jerusalén.
 Paady højtsä tøyhajt nmøødä coo
 tiøyyä. Mänitä Jesús miøjpahbejtä
 cruzcøxp. Jaduħn yho'cy. ⁴⁰⁻⁴¹Pero
 cumaaxcä Dios ja'a Jesús
 yagjuypiojcy. Mänit højtsä Dios
 ja'a Jesús xyaghijxy coo hänajty tøø
 jiaančh juypiøcy. Cabä jäya'ayhajxy
 nägøxiä yhijxy. Jagooyyä højts
 nhijxy. Paady højtsä Dios xyaghijxy
 coo højts hänajty jaduħn tøø
 xyajnähdijy. Mänit højtsä Jesús
 nmøødcaayy nmøødhuucy. ⁴²Mänit
 højtsä Jesús xwyiinguejxy coo
 højtsä Diosmädia'agy nõcxy
 nyajwa'xy wiinduhmyhagajpt ja'a
 Jesúscøxpä, coo ja'a Dios ja'a Jesús
 tøø piäda'agy coo jäya'ayhajxy
 nägøxiä yajtøyhajtjegøøjät,
 yho'oguiä, jiujuquiä. ⁴³Jaduħnä
 profetadøjc-hajxy jecy quiujahy
 coogä jäya'ayä piojpä quiädieey
 hajxy yajnähwä'ačh yajcuhwä'ačhi,
 pønjatia Jesús ja'a miädia'agy
 mabøjcäp.

⁴⁴Cahnä ja'a Pedro hänajty
 miädiaacpäðø'oyñä, mänit hajxy
 nägøxiä yhadägøøyy jioottägøøyyä
 ja'a Dioshespíritäm, pønjatia
 Pedro ja'a miädia'agy hänajty
 hamädoowhjtäp. ⁴⁵Y ja'a
 judíoshajxy, ja'a Pedro hajxy hänajty
 tøø piamečhíjibä, ja'a hajxy hänajty
 mabøjpä, coo hajxy jaduħn yhijxy
 coo ja'a jäya'ayhajxy ca'a judíoshajpä
 yhadägøøyy jioottägøøyyä, mänit
 hajxy jiaančh tehñ yagjuøøyy. ⁴⁶Hix,
 miädoow ja'a judíoshajxy jaduħn
 coo ja'a ca'a judíospähajxy hänajty
 wiinghayuuc miädia'agy. Jaduħnä
 Dios hajxy hänajty quiapxpaady coo
 miøjjä coo jiaančh. ⁴⁷Mänitä Pedro
 ja'a judíos ñämaayy:

—Neby hõjtsä Dioshespíritu xyhadägøøyy xjioottägøøyyäm, jaanä jaduñ hädaa jäya'ayhajxy yaabä tøø yhadägøøyy tøø jioottägøøyyäbä, hädaa ca'a judíoshajxypä. Hahixøøby jaduñ coo hajxy ñábéjpat.

⁴⁸Mänitä Pedro ja'a jäya'ay ca'a judíospä jiaančh nämäaay coo hajxy ñábétät ja'a Jesucristocøxpä. Mänit hajxy hoy jiaančh näbety. Mänitä Cornelio ja'a Pedro ñämäaay coo Pedro jim jiaac hídät mejtsxøø tægøøgxøø maa ja'a Cornelio tiøjcän.

11 Mänitä mädia'agy jim wia'xy Judea-naaxooty wiinduhmyhagajpt coogä jäya'ayä Diosmädia'agy hajxy hänäjty tøø jiojppøgø'øy, ja'a hajxy ca'a judíospä. Jaduhñä apóstoldøjc-hajxy miädoyhajty møødä mäbøjpädøjc-hajxy. ²⁻³Pero coo ja'a Pedro jim ñøcxtägajch Jerusalén, mänit ñähøjjä:

—Tii miichä jäya'ay hoy coo tøø mguhixy, ja'a hajxy ca'a judíospä. Tii hoy coo tøø mmøødcay coo tøø mmøødhu'ugy.

Ja'a mäbøjpädøjc-hajxy jaduñ mänaan, ja'a hajxy hänäjty mänaambä coo ja'a ca'a judíoshajxy tsipcøxp yajcircuncidarhájpat nebiä judíoshajxy quiuhdujthatiän. ⁴Mänitä Pedro quiøxy mädiaacy tiiguiøxpä hänäjty coo tøø yhoy Cesarea:

⁵—Jímhøch hänäjty nDiospa'ya'axy maa ja'a cajpt xiøhatiän Jope, mänitøch nwiinhijxy coo tii hänäjty quiuhdøøñaxyii tsajpootyp nebiä poobwit crutypän. Mädaaxc-hit

hänäjty xiojtsø'øguiä. Jaduhñ hänäjty miänoonna'ay. Coo jaduñ ñäaxcädaacy maačh hänäjtiän, ⁶mänitøch jii by nguheebøøyy poobwittøjiooty. Mänithøchä animal madiu'u nhijxy møødä hamädaaxtecpipiähajxy, møødä hawa'anjatypä, møødä tsahñdy, møødä muuxy. ⁷Mänithøchä Dios xñämaay: “Pedro, pädø'øg. Yagho'og yø'ø animal. Mänit mdsú'udsät.” ⁸Mänitøch nhadsooyy: “Wiindsøn, caj, cábøch yø'ø animalduhmbä mänaa ndsu'učh. Hix, cab hõjts nguhdujt jaduñ myiñ coo hõjtsä animal hoñä'ä mädyiibä ndsú'udsät.” ⁹Mänithøchä Dios jadähooc xñämäaguiumbä: “Tijátyhøch nyajnähdiipyy coo hajxy mdsú'udsät, cab jaduñ yhahixø'øy coo hajxy mwiingápaxät.” ¹⁰Tægøøghøoc-høchä Dios jaduñ xñämaay, mänithøchä poobwit nhijxy coo chajpéjcumbä tsajpootyp. ¹¹Mänithøchä häna'c nädägøøg xñämejch maačh hänäjty nmejtsta'aguian. Jim hajxy hänäjty tøø chohnda'agy Cesarea. ¹²Mänithøchä Dioshespíritu xñämaay coočh tähoocapxiä nbadu'ubøgät. Mänitøch njaančh møødnøcxy. Mänit hädaa mäbøjpädøjc-hajxy nädädujc piadu'ubøjpä. Jope hajxy chooñ. Coo hõjts jim nmejch Cesarea, mänit hõjts jim ndøjtägøøyy maa ja'a craa Corneliohajpät tiøjcän. ¹³Mänit hõjtsä Cornelio xyajmøødmädiaacy nébiägä Diosmoonsä tsajpootypä ñäguehtøø'xiän ja'a Cornelio wyiinduum. Mänitägä Diosmoonsä ja'a Cornelio ñämaay: “Jimä

craa tu'ug yhity Jope, ja'a xøhajpä Simón Pedro. Capxyñäguex ja'a craa jaduħn coo yaa myñät.

¹⁴Coo yaa miédsät, mänit miičh xyhawaañaanä nebiä mbojpä mgädieeybä hajxy mnähwa'ads mguhwá'adsät, møødä mhuung møødä mdo'oxy.” ¹⁵Coočh ndägøøyy mädiaacpä, mänitä Corneliohajxy yhadägøøyy jioottägøøyyä ja'a Dioshéspiritäm, neby højts jayøbajt xyhuuc nägädäacambän. ¹⁶Mänitøch njahmiejtstaacy nebiä Jesús tähooc miänaañän: “Ja'a Juan, nøøhaam hijty miäyajnäbety. Tøyhajt jaduħn. Pero mijts jaduħn xyajnäbetaamb ja'a Dios yhEspirituhaam”, nøm højtsä Jesús xñämaayy. ¹⁷Y coo hajxy tøø nmäbøjcäm ja'a Jesucristocøxpä, paadiä Dios ja'a yhEspiritu hajxy tøø xmióoyyäm. Hoorä, ja'a jäya'ayhajxy ca'a judiøspä, tøø ja'a Dios ja'a yhEspiritu mioobiä, neby hajxy tøø xmióoyyambän. Pønħøch høøch coočhä Dios jaduħn nnä'a capxadügät —nømä Pedro miädiaacy.

¹⁸Coo ja'a mäbøjpadøjc-hajxy jaduħn miädoyhajty jim Jerusalem, mänit hajxy hamoñ haducy miähmøøyy. Mänitä Dios hajxy pia'yaaxy coo miøj coo jiaančhä. Mänit hajxy miänaañ:

—Ja'a jäya'ayhajxy ca'a judiøspä, tøø ja'a cuhdujt hajxy mióoyyabä coo ja'a Dios hajxy jiøjpoğø'øwät, møød coo ja'a yhaxøøgcuhdujt hajxy ñajtshixø'øwät, jaduħn hajxy cøjxta'axiøø jigyhadät nebiä Dios jiguyhatiän.

¹⁹Tøøyyämä Esteban hänajty jim yagho'ogyii Jerusalem, mänitä

mäbøjpadøjc-hajxy jim tiägøøyyä jaamdúunäbä tsaächtiúunäbä. Coo hajxy jim choñ, näje'e hajxy jäguembaady ñøcxøøyy, Fenicia, Chipre, Antioquía. Coo ja'a Diosmädia'agy hajxy hänajty yajwa'xy ja'a Jesucristocøxpä homiaajä, jagooyyä judíos ja'a Diosmädia'agy hajxy hänajty yajnähixø'oyii. Pønajaty hänajty ca'a judíos, cab hajxy hänajty yajnähixø'oyii. ²⁰Ja'a mäbøjpadøjc-hajxy hänajty jim tsohmä Chipre møød Cirene, coo hajxy näje'e miejch maa ja'a cajpt hänajty xiøhatiän Antioquía, hopiønä Diosmädia'agy yajnähixøøyyä ja'a Jesúsøxpä, møødä judiøshajxy, møødä ca'a judiøshajxypä. Jaduħn hajxy yajnähixøøyyä coo ja'a Jesús hajxy nWiindsønħájtäm. ²¹Ja'a mäbøjpadøjc-hajxy, miøødhájtäbä Dios ja'a miøcmäjaa hajxy hänajty. Mänitä jäya'ay ja'a jicyquiuhdujt hajxy nämay ñajtshixøøyy. Mänitä Dios hajxy jiøjpoğøøyy.

²²Ja'a mäbøjpadøjc-hajxy, ja'a hajxy hänajty hijpä Jerusalén, coo hajxy jaduħn miädoyhajty coo ja'a mäbøjpadøjc-hajxy hänajty jim miayø'øyy Antioquía, mänitä Bernabé hajxy jim quiejxy.

²³Coo ja'a Bernabé jim miejch Antioquía, mänit yhiyxy coo ja'a Dios ja'a mayhajt hänajty møj tøø tiuñ, coo ja'a mäbøjpadøjc-hajxy hänajty tøø jiaanč mayø'øyy. Mänitä Bernabé jiaanč tehñ xioondaacpøjcy. Mänitä Bernabé ja'a mäbøjpadøjc ñämaayy coo ja'a Diosmädia'agy hajxy tehngahnä miäbøgät hamuumdu'joot ja'a

Jesucristocøxpä. ²⁴Hojjootä Bernabé hänajty jiaanč tehñ miøød. Jiaanč tehñ miøødä Dioshespíritu hänajty je'eduhñ. Hamuumdu'ljootä Diosmädia'agy hänajty miäböcy. Paadiä mäsöpädøjc-hajxy hänajty jaduñ tehñgahnä miayø'oy, ja'a hajxy hänajty mäsöjpä ja'a Jesúsøxpä.

²⁵Coo ja'a Bernabé jim chohñ Antioquía, mänitä Saulo hoy piaady. Mänit hajxy jim nämetsc ñøcxtägajch Antioquía. ²⁶Tu'jumøjtä Bernabéhajxy jim yhiyty møødä Saulo maa ja'a mäsöpädøjc-hajxiän. Jimä cu'ugä Diosmädia'agy hajxy nämay yajwiingapxøyyä. Jim Antioquía, jimä mäsöpädøjc-hajxy yajxøbejtsohnä cristianos, je'eguiøxpä coo ja'a Jesucristo hajxy hänajty tøø jiojöpøø'oy.

²⁷Mänitä jäya'ayhajxy näje'e jiiby quüidaacy Antioquía. Jerusalén hajxy hänajty tøø chohnda'agy. Tøø hajxy hänajty ñajtsapxøyyä ja'a Diósäm. ²⁸Tu'jäya'ay hänajty xiøhaty Agabo. Tøø ja'a mäsöpädøjc-hajxy hänajty yhamugø'oy. Mänitä Agabo tiänaayyø'cy jäya'ayhagujc. Mänit miänaañ coogä yuuxøø hänajty jejcy jiada'añii wiinduhmyhagajpt. Mänit jaduñ jiaanč tojiajty cujegy mänaa ja'a Claudio hänajty jim tiuungmøødän Roma. ²⁹Mänitä mäsöpädøjc-hajxy quiojyquiapxytiuuñ jim Antioquía coo ja'a xädø'øñ hajxy hänajty jim quixea'añ Judea maa ja'a mäsöpädøjc-hajxy jim bän. Jaduhñ hajxy haniduhmjaty jejcy, mäduhñtiä xädø'øñ hajxy

hänajty miøødä. ³⁰Mänitä xädø'øñ hajxy jaduñ jiaanč quejxy. Ja'a Bernabéhajxy jim mänøcx Judea møødä Saulo. Mänitä majjäya'adiøjc ja'a xädø'øñ hajxy hoy mio'oyii, ja'a hajxy hänajty tsänaabiä jim Judea.

12 Mänitä mäsöpädøjc-hajxy näje'e tiägøyyä jaamdúunäbä tsaačhtiúunäbä. Ja'a Herodes jaduñ jatcøyy, ja'a hänajty tuumbä gobiernä jim Judea. ²Mänitä Herodes ja'a Santiago yajyagho'cä espadaahaam, ja'a Juan yhajch. ³Coo ja'a Herodes jaduñ yhiixy coo ja'a judíoshajxy hänajty xioonda'agy je'eguiøxpä coo ja'a Santiago hänajty tøø yagho'ogyii, mänitä Herodes ja'a Pedro yajmajtsä. Ja'a xøø hänajty jájtäp mänaa ja'a judíos ja'a tsajcaagy hajxy hänajty quiayyän, ja'a ca'a tsoomiøødpä. ⁴Coo ja'a Pedro jaduñ yajmajch, mänit chuümä. Xøømdsuhñ ja'a Pedro hänajty cwieendähadyii ja'a soldádäm. Tädujc-horajatiä soldadohajxy hänajty nämädaaxcjaty yhadäna'ay. Niguiuwíjtsäp hajxy hänajty. Tøø ja'a Herodes hänajty wyiinmay coo ja'a Pedro hänajty xøønaxy yajtøyhajtyega'añii cu'ughagujc. ⁵Hoyyä Pedro hänajty jia tsumiä, tehngahnä mäsöpädøjc ja'a Dios hajxy hänajty pia'ya'axy ja'a Pedrocøxpä, coo yhøxmadsojät. ⁶Cujaboomä Herodes ja'a Pedro hänajty yajnøcxa'añ cu'ughagujc, jimä Pedro hänajty mia'ay pujxtøgooty. Coods hänajty jaduñ. Soldadohajxy hänajty mia'ay. Cø'øxoch hänajty jaduñ mejtsnax. Jimä soldadohajxy hänajty yhadäna'ay pujxtøghaawjooty.

⁷Mänitá Diosmoonsä tu'ug näguehxtø'xy ja'a Pedro wyiinduum. Mänitá jøøn jii by yagajøøyy pujxtøgooty. Mänitá Diosmoonsä ja'a Pedro jiahmyu'xy. Mänitá Pedro ñämaayyá:

—Tsógäm, päðø'og.

Mänitá Pedro ja'a cadena quiø'ogahduutá. ⁸Mänitá Diosmoonsä miänáangumbä, ja'a hänäjty jim tshombä tsajpootyp: —Niwiøhnda'adsøø. Päðø'ow yø'ø mgø'og.

Coo ja'a Pedro jaduñ quiudiuñ, mänit ñämäayyägumba:

—Päðø'ow yø'ø mjocxwit. Høøch pajámäc.

⁹Mänitá Pedro ja'a Diosmoonsä jiaanč padu'ubøjcy. Cabä Pedro hänäjty ñajuø'oy pø tøyyä ja'a Diosmoonsä jiaanč hijxy, tögä ñälä wiinhijx jaduñ. ¹⁰Mänitá Pedrohajxy jim ñajxy maa ja'a soldado jayøjpä hänäjty yhadäna'ayän. Mänit hajxy ñajxy maa ja'a miämetspän. Coo hajxy jim miejch maa tehñ piujxtøghaawän, mänit yhawaach hamdsoo. Coo hajxy piädsøømy, mänit hajxy weentiä jiaac nøxcy. Mänitá Diosmoonsä yhadägyøøñä. Nidiuhmä Pedro jaduñ miähmøøyy.

¹¹Mänitá Pedro wyiinmahñmejtsnä. Mänit miänaañ quiopcooty:

—Tøyhajt jaduñ coöchä Dios ja'a mioonsä tøø xyajnäguexy. Tøøch jaduñ xyajñahwa'ačh ja'a Herodescøxpä møødä judfoshajxy.

¹²Mänitá Pedro jim ñøxcy maa ja'a María tiøjcän, ja'a Juan ja'a tiaj. Jaduñä Juan hajxy hänäjty

tyijpä Marcos. Tøø jäya'ayhajxy hänäjty may yhamugø'oy tøgooty Diospa'yaaxpä. ¹³Coo ja'a Pedro jim miejch, mänitá tøgħaaw quiojxnøjcy. Mänitá quixy tu'ug jim miejch maa ja'a tøgħaawän, ja'a hänäjty xøhajpä Rode. Miädowaambiä Rode hänäjty jaduñ pønä tøjc cojxnøj. ¹⁴Coo ja'a Rode ja'a Pedro yo'mädooyy, mänitá Rode päyø'oguiä wyiimbijty xoondáacäp. Cabä Rode ja'a tøjc ñälä yaghawaach. Mänit hoy ñägäpxy coogä Pedro hänäjty jim tiäna'ay tøguuy. ¹⁵Mänitá Rode ñämaayyá:

—Tøø miičhäda'a mguħhiñ.

Pero tehngahnä Rode hänäjty miäna'añ cooc hänäjty jie'ejä ja'a Pedro. Mänit hajxy yhadsooyy:

—Ca'ada'a yø'ø jie'ejä. Ja'a yhaañämadah yø'ø.

¹⁶Jimä Pedro ja'a tøgħaaw hänäjty tehngahnä jia wi'i quiojxnocy. Coo hajxy hoy yaghawa'ačh, mänit hajxy yhiijxy coo hänäjty jiaanč jie'ejä. ¹⁷Mänitá Pedro seña tiuñ quiø'øhaam coo hajxy yhamónät. Mänit jaduñ miädiaacy neby hänäjty tøø yajpädsømyii pujxtøgooty ja'a Diósäm. Mänit jiaac mänaañ:

—Nøcxä Santiago hajxy hawaanä møødä mäbøjpädøjc coöch tøø nnähwa'ačh.

Coo ja'a Pedro jaduñ miädiaacpäðøøyy, mänit wiingtuum ñøcxnä.

¹⁸Coo jibøøñä, mänitá soldadohajxy jiaanč tehñ yagjuøøyy coo ja'a Pedro hänäjty quia'a jii biän pujxtøgooty. ¹⁹Mänitá Herodes yhanehmy coo ja'a Pedro

yhøxta'awøøjät. Coo ja'a Pedro maa quia'a yajpaaty, mänitä soldadohajxy yajnähdsøømä, ja'a hajxy hänajty tøø yhadaná'ayäbä maa ja'a pujxtøjcän. Mänitä Herodes yhanehmy coo ja'a soldadohajxy yagho'ogøøjät. Mänitä Herodes jim chohñ Judea. Mänit jim ñøcxy tsänaabiä Cesarea.

²⁰Mänitä Herodes ja'a cu'ug jiaanč tehñ miäjootma'ty, ja'a hajxy hänajty tsänaabiä jim Tiro møød jim Sidón. Mänitä cu'ughajxy nägøxiä quiojyquiapxytiuuñ coo hajxy nägøxiä jim ñøcxät ja'a Herodes wyiinduum. Jimä Herodes ja'a mioonsä hänajty tu'ug xiøhaty Blasto. Møjtuungä Blasto hänajty jim miøød maa ja'a Herodes wyiinduumän. Mänitä cu'ugä Blasto hajxy miäjuuyy coo ja'a Blasto ja'a cu'ug piuhbédät, weenä tsip jaduñ ñaxy miay. Hix, jimä cu'ughajxy hänajty tiuundaacthaty maa ja'a Herodes ñaaxootiän.

²¹Coo hajxy hänajty tøø yajcuhducy mänaa hajxy hänajty jim yhamugø'owa'añän maa ja'a Herodes wyiinduumän, mänitä Herodes ja'a reewyit piägøøyy. Mänit jim yhøxtaacy maa ja'a yhänaabiejtän, maa ja'a cu'ughajxy hänajty tøø yhamugø'oyän. Mänitä Herodes ja'a cu'ug tiägøøyy møødmädiacpä. ²²Mänitä cu'ughajxy tiägøøyy yaaxpä: —Yø'ø craa xim capxpä, jue'le yø'ø, Diosäda'a yø'ø; ca'ada'a yø'ø jiäya'ayä neby højtshájtäm.

²³Tuunä hajxy jaduñ ñä'a mänaañ, mänitä ja'a Diosmoonsä ja'a Herodes yajpa'ambejty. Paady jaduñ yajpa'ambejtä je'eguiøxpä

coo ja'a Dios hänajty tøø quia'a wiingudsähgø'øy. Mänitä Herodes tiøngcuhdusu'tsä. Mänit yho'nä.

²⁴Pero ja'a Diosmädia'agy, tehngahnä hänajty jaduñ wia'xy wiinduhmyñaax wiinduhmyguiajpt.

²⁵Hoorä, coo ja'a Bernabé møødä Saulo ja'a majjäya'adiøjc ja'a xädø'øñ hajxy hänajty tøø mio'oy jim Jerusalén, mänit hajxy wyiimbijnä. Mänit hajxy ñøcxtägajch jim Antioquía. Quipxiä Juan Marcos pianøcxy.

13 Jim Antioquía, jimä jäya'ayhajxy hänajty may tøø yhamugø'øy Jesúswiingudsähgøøbiä. Näje'le hajxy hänajty tiuñ Diosmädia'agy-yajwiingapxøøbiä. Näje'le hajxy hänajty tiuumbä yajnähixøøbiä. Ja'a hajxy hänajty jaduñ tuumbä, jue'le hajxy hänajty xiøhaty: Bernabé, Simón ja'a humybiä, Lucio ja'a Cirene-tsohmbä, Saulo, møød Manaén. Quipxiä Manaén ja'a Herodes hänajty tøø miøødmuutsc-haty, ja'a hänajty jim tøø guiobiernähátiäbä Galilea. ²Jiibiä Dios hajxy hänajty wyiingudsähgø'øy jaguiay jayhu'ugy maa ja'a chajtøjc-hajxiän. Mänit hajxy ñämaayyä ja'a Dioshespíritäm:

—Tøøchä Bernabé møødä Saulo nyajnähdijy coöchä nduung hajxy xtiuunät. Mwiinguéxäp hajxy jaduñ.

³Coo ja'a mabøjpädøjc-hajxy jaduñ Dyiospa'yaaxpädøøyy, mänitä Bernabéhajxy quio'ønähgajpä møødä Saulo. Mänitä Bernabéhajxy tiu'ubøjnä møødä Saulo.

⁴Mänitä Bernabéhajxy wyinguejxä ja'a Dioshespíritäm coo hajxy wiädítät Diosmädia'agy-yajwa'xpä. Mänit hajxy jiiby yhädaacy maa ja'a cajpt hänajty xiøhatiän Seleucia. Mänit hajxy hoy biarcotägø'oy. Mänit hajxy ñöcxxy mejyhawiimb maa ja'a naax hänajty xiøhatiän Chipre, ja'a mejyhagujpä. ⁵Coo hajxy jim miejch, mänit hajxy jim biarcomänajcy maa ja'a cajpt hänajty xiøhatiän Salamina. Mänit hajxy tiägøøyy Diosmädia'agy-yajwiingapxøöbiä maa ja'a judíos chajtöjc-hajxiän. Jimä Juan Marcos hänajty piawädijpä nä'ä jamiøød.

⁶Coo ja'a Bernabé ja'a cajpthuung hajxy hänajty tøø quiøxy hawädity jim Chipre, mänit hajxy miejch maa ja'a cajpt hänajty xiøhatiän Pafos. Jimä jäya'ay hänajty tu'ug wiädijpä, ja'a hänajty xøhajpä Barjesús. Judío hänajty je'e. Wiinmahñmøød hänajty je'e. Jaduhñ hänajty yhöñda'agy cooc tyijy hänajty je'e Dyiosquexiä.

⁷Hoyyä Barjesús ja'a Sergio Paulo hänajty miøødnimiägu'ughadyii, ja'a hänajty tuumbä gobernador. Coo ja'a Sergio Saulo jaduhñ miädoyhajty coo ja'a Bernabé ja'a Diosmädia'agy hajxy hänajty miäwädity, mänitä Bernabéhajxy miøjyaaxä møødä Saulo. Miädowáambiägä Sergio Paulo ja'a Diosmädia'agy hänajty. ⁸Haa ja'a Barjesús, Elimas hänajty xiøhaty hagriegoaam. Hoorä, coo ja'a Elimas jaduhñ miädoyhajty coogä Sergio Paulo ja'a Diosmädia'agy hänajty miädowa'añ, cabä Elimas

jaduhñ yhojiäwøøyy. Mänitä Elimas ja'a Sergio Paulo jia jöjcapxøøyy coo quia'a mabögät. ⁹Haa ja'a Saulo, mejtstu'u hänajty je'e xiøhajpä møødä Pablo. Hoorä, miøødä Pablo ja'a Dioshespíritu hänajty. Mänitä Pablo ja'a Elimas wyiinhee'ppejty. ¹⁰Mänit yhojy:

—Møjcu'uhuung, mjaančh tehñ yhöñdaacp miičh. Jaančh tehñ yhaxøøg miičhä mwiiinmahñdy. Caj miičh myajmädsocy coo jäya'ayhajxy hoy quiuhdujthädät. Tii miičh jaduhñ coo mwil'i miäna'añ cooc tyijy ja'a Diosmädia'agy quia'a tøyyä. ¹¹Xyajcumädowaamb miičhä Dios. Xyajwiinwoodsaaamb miičhä jaduhñ. Jejcy miičh wiinds mmähmø'owa'añ. Caj miičhä jajpä mdsoj hixa'añ, —nømä Elimas ñämaayyä.

Mänitä Elimas jiaančh wiinxoo'ch. Hobiänejpiä hänajty tioonnda'ay maa ñöcxø'owät. Yhöxtaaby hänajty jaduhñ pøn jaduhñ wiinwidsäp.

¹²Coo ja'a Sergio Paulo jaduhñ yhiijxy nebiä Elimas hänajty tøø jiaty tøø yhabetiän, mänit yagjuøøyy. Mänitä Diosmädia'agy jiaančh mabøjcy coo tiøyyä.

¹³Mänitä Pablohajxy jim biarcotägøøguiumbä, møødä Bernabé, møødä Juan Marcos. Mänit hajxy miejynájxcumbä. Mänit hajxy miejch maa ja'a cajpt hänajty xiøhatiän Perga, jim maa ja'a naax hänajty xiøhatiän Panfilia. Jimä Juan Marcos wyiimbijnä nidiuhñ. Mänit yhädaacnä Jerusalén. ¹⁴Coo ja'a Pablohajxy jim chohñ Perga, møødä Bernabé, mänit hajxy jiaac nøcxxy maa ja'a cajpt hänajty

xiøhatiän Antioquía, jim maa ja'a naax hánajty xiøhatiän Pisidia. Coo ja'a poo'xxiø yhabaaty, mänitá Pablohajxy chajtøjtägøøyy maa ja'a judíos chajtøjc-hajxiän. Mänit hajxy jiiby yhänaaguiädaacy. ¹⁵Ja'a häna'c-hajxy hánajty jiiby tuumbä tsajtøgooty, mänitá Diosmädia'agy hajxy quiapxy maa ja'a Moisés jecy quiujahyyän, møød maa ja'a profetahajxy jecy quiujahyyän. Mänitá Pablohajxy nãmaayyá:

—Mägu'ughajpædøjc, pø jii mijts mädia'agy hajxy mmädia'aga'añ, huuc capx hajxy, weenä cu'ughajxy miädoy.

¹⁶Mänitá Pablo tiänaayyø'cy. Mänitá quiøø chajtsihy, weenä cu'ughajxy jaduhñ yhamädoowhity. Mänit miänaañ:

—Huuc hamädoowhit hajxy nägøxiä, mijts israelitashajxy, møød mijts ca'a israelítabä. Mhaagä wiingudsähgøøbiä Dios hajxy.

¹⁷Højts israelítabä, Dios højts nDioshajpy. Jegyhajty højtsä nhapä ndeedyhajxy hijty jim yhadsäna'ay maa ja'a naax xiøhatiän Egipto. Mänit hajxy jaduhñ yajnáhdijjá ja'a Diósäm coo hajxy hánajty quiu'ughada'añii ja'a Diósäm. Mänit hajxy jim Egipto yhøxwoobädsøømä ja'a Diósäm. Jaduhñä Dios ja'a miäjaa yajcähxø'cy. ¹⁸Coo hajxy jim wiomejtsä pactuum maa hánajty pøn quia'a tsäna'ayän, jim hajxy miähmøøyy juxychägüi'xjomøjt. Míe'e'xtujpiä Dios hánajty jaduhñ, hoyyá miädia'agy hánajty quia'a jagä yajtúunäxä. ¹⁹Mänitá israelitashajxy jim ñøcxy maa ja'a naax hánajty xiøhatiän Canaán. Ja'a jäya'ayhajxy hánajty jim

tsänaabiä, ja'a näjuxtujc-hagajtpä, cøjx hajxy yajcuhdägoyyii ja'a Diósäm. Mänit højtsä nhapä ndeedyhajxy nãaxpaatnä.

²⁰Mädaaxmägo'xjomøjt ja cupc hánajty tøø yhity coo hajxy hánajty tøø choon Egipto.

'Mänitá Dios miänaañ coo cuduung hajxy miøødhädät. Jaduhñ hajxy jecy miøødhajty. Ja'a Samuel, je'eds jaac tehñ tiuun cuduung.

²¹Mänitá cu'ughajxy miänaañ coo gobiernä hajxy mio'owøøjät, coo hajxy jaduhñ yhane'emøøjät.

Mänitá Dios ja'a Saúl yajnáhdijy coo je'e tiúnät gobiernä, ja'a Cis yhuung. Benjamín ja'a Cis hánajty jegyhajty tøø yhaphaty tøø tieedyhaty. Juxychägüi'xjomøjtä Saúl jaduhñ tiuun gobiernä.

²²Mänitá Dios miänaannä coo Saúl jaduhñ quia'a túunnät gobiernä. Jaduhñ miänaannä coo David jaduhñ ween tiuunnä gobiernä: “Njaançh tehñ quiuämäbiøçhä David jaduhñ, ja'a Isaí yhuung. Cøxaamb jaduhñ quiudiuna'añ waambátyhøch nnäma'awa'añ”, nømä Dios ja'a David jecy nänøømy. ²³Mänitá Jesús cujecy jiaac mejch. Ja'a Jesús ja'a David jecy yhaphajt tieedyhajt. Paadiä Dios ja'a Jesús quiejxy coo ja'a israelitashajxy jaduhñ ween min yajnáhwa'açhii. Jéquiänä Dios hajxy jaduhñ yajwiinwaanøøyyä coogä yajnáhwaatpä hánajty quiexa'añ. ²⁴Cahnä Jesús hánajty tiägø'øyñä wädijpä, jimä Juan ja'a israelitas ja'a Diosmädia'agy hánajty yajwiingapxø'øy coo ja'a yhaxøøgcuhdujt hajxy nägøxiä ñajtshixø'owät, møød coo ja'a

Dios hajxy hamuumdu'joot wyiingudsähgø'owät, møød coo hajxy ñäbétät. ²⁵Coo ja'a Juan hänäjty tiuumädø'owaannä, mänit miänaañ: “Jaduhñhöch mijtsäda'a xñänomy cooc tyjy høøch nGristo. Ca'ačh nje'ejä. Jímhøchä njamiøød tu'ug jiaac medsa'añ. Maas møcmäjaamøød je'e miedsa'añ queečh høøch. Cábøch cuhdujt jaduñ njaty møødä nebiä cuhdujt je'e miøødän ja'a jaac medsaambä.”

²⁶Mägu'ughajpädøjc, højtsä Abraham jecy nhaphajt ndeedyháltäm; møød mijts ca'a judíospä, mwiingudsähgøøbiä Dios hajxypä. Nägøxiä ja'a Dios hajxy tøø xyajnähdíjjäm coo hajxy nägøxiä xyajnähwa'adsáanam. ²⁷Coo ja'a Jesús quioo'ty Jerusalén, cabä cu'ughajxy hänäjty ñajuø'øy coo hänäjty je'e Dyiosquexiä. Ni ja'a teedywiindsøn'hajxy hänäjty quia'a najuøøbiä. Coo ja'a Jesús hajxy yajyagho'cä, jaduñnä Diosmädia'agy hajxy yajtøjiajty nej myiñän cujaay coo ja'a Diosquexy hänäjty yagho'oga'añii. Ja'a profetadøjc-hajxy jaduñ jecy cujahy, ja'a Diosmädia'agy hajxy hänäjty jegyhajty mäwädíjpä. Hoyyä cu'ugä Diosmädia'agy hänäjty jia mädoy wiingusábadohaam nebiä profetadøjc ja'a Diosquexy hajxy hänäjty jia mädia'aguiän, cabä cu'ughajxy hänäjty ñajuø'øy coo ja'a Jesús hänäjty Dyiosquexiä. ²⁸Jaduñnä cu'ughajxy hänäjty tehngajnä ñä'ägä mänaañ cooc tyjy ja'a Jesús hänäjty hanaxiä tøø quiädieey. Pero cab hänäjty jaduñ ñä'a tóyyäbä. Hoy hänäjty

quia'a jagä tóyyä, tehngajnä cu'ug ja'a Pilato hajxy jaduñ ñämaayy coo ja'a Pilato ja'a Jesús yajyagho'ogøøjät. ²⁹Coo ja'a Jesús jaduñ jiaanč ho'cy, cøjx jaduñ tiøjiajty nebiaty jim miädia'agyiijän maa ja'a Diosmädia'agy myiñän. Mänit yajmänaajcä cruzcøxp. Mänit hoy yajnaaxtägø'oyii. ³⁰Mänitä Dios ja'a Jesús yagjujypiøjtägajch. ³¹Mayhoocä Jesús jaduñ jiaac hijxä ja'a jiamiøødhajxy, ja'a hajxy hänäjty quipxy tøø piadsohndá'aguiäbä jim Galilea. Quipxiä Jesús hajxy piagoo'ty Jerusalén. Hoorä, jäda'ahatiä Jesús hajxy miädiaacpä maa ja'a judíoshaxiän coogä Jesús Quiäristo. ³²Paady højts mijts jaduñ nyajwiingapxø'øy ja'a Jesúsøxpä. Jequiän højts nhap ndeedyhajxy yhawáanäxä ja'a Diósäm coogä Dios ja'a yajnähwaatspä hänäjty quixa'añ. ³³Coo ja'a Jesús hajxy tøø xñäho'túutäm, møød coo jiuypyiøjtägajch, jaduñnä Jesús hajxy tøø xjiaanč yajnähwáatsäm. Jaduñnä Dios ja'a miädia'agy yajtøjiajty neby højts nhap ndeedyhajxy jecy yhawáanäxäm coogä Dios ja'a yajnähwaatspä hänäjty quixa'añ. Jaduñ jim myiñ cujaay maa ja'a salmo miämetspän: “Høøch miičh nHuunghajpy. Jäda'ačh miičh tøø nyagjujypiøjtägach.” ³⁴Jéquiänä Dios jaduñ miänaañ coogä yHuung hänäjty yagjujypiøjtägatsa'añ, jaduhñäc je'e quia'a pú'udsät. Jaduñ jim myiimbä cujaay maa ja'a Diosmädia'aguiän: “Míjtshøch ngunuu'xaamby nébiøchä David tøø nyajnäma'ayän. Nyajtøjiadámbiøch

jaduhn.” ³⁵ Jaduhn jim myiimbä cujaay wiingsalmojooty: “Caj miich mmäna'ana'añ coo ja'a mHuungä ñi'xä quiopc piú'udsät, coo hänäjty tøø yho'ogy. Myagjujypiøjtägatsaamby miich jaduhn”, nømä Dios ñämaayyä. ³⁶ Hoorä, coo ja'a David jecy miähanehmbädøøyy nebiä Dios hänäjty tøø yajnädhijjiän, mänit David yho'nä tiägoonä. Mänit hoy ñaaxtägø'oy. Mänit piuutsnä. Tøyhajt jaduhn. ³⁷ Pero ja'a Jesús, coo je'e yho'cy, cab je'e piuuch, je'eguiøxpä coo yagjujypiøjtägajtsä. ³⁸⁻³⁹ Mägu'ughajpädøjc, huuc hamädoowhit hajxy, jaduhn højts mijts nyajwiingapxø'oy coo ja'a Jesús hajxy nägøxiä tøø xñähho'túütäm, møød coo jadähooc jiuypyiøjtägajch. Pønjaty jaduhn mabøjp, nähwa'adsaamb hajxy je'e; hawa'adstuum hajxy miähmø'øwa'añ. Hoyyä jecyquihdujt hajxy hijty nja wi'i quiudiunáañäm, ja'a Moisés jecy quiujähyyäbä, cab hajxy hoy pedyii ngudiunáañäm, paady hajxy hijty nga'a nähwa'adsáañäm. ⁴⁰ Naxy hädaa mädia'agy hajxy mdehm miäbøgät neby højts mijts cham nyajwiingapxø'oyän. Pø caj, wehndä hajxy mjat mhabetät nebiä profetadøjc-hajxy jecy quiujahyyän: ⁴¹ Huuc mädo w hajxy, pønjaty jaduhn mäwiingapxpejp, myagjuø'øwäp hajxy jaduhn; mniguiu'uds mniguiuhhämeedø'øwøøjöp hajxy. Hix, hoy-yagjuøøñoch jaduhn njaançh tehñ yajcähxø'øga'añ maa mijts mwiinduuhajxiän.

Pero cab hajxy jaduhn miäbøga'añ, ja'a hajxy hamdsoo ca'a hixaambä, nømä Dios jecy miänaañ. ⁴²⁻⁴³ Mänitä Pablo miädiaacpädøñä. Coo ja'a Pablohajxy chajtøjpädsøømy møødä Bernabé, mänit hajxy ñämaayyä coo hajxy jadähooc ween min miädia'agy ja'a sábadø hänäjty jaac miimbä, neby hajxy hänäjty tøø yhuuc mädiaacpän. Mänitä Pablo jäya'ay hajxy may piadu'ubøjcä, møødä judiøshajxy, møødä ca'a judiøspähajxy, ja'a Diosmädia'agy hajxy hänäjty mabøjpä. Mänitä Pablohajxy miänaañ coo ja'a jäya'ayä Dios hajxy homiänaajä yhajodhädät. ⁴⁴ Coo ja'a sábadø hänäjty jadähooc yhabaatcumbä, mänitä cu'ughajxy jim miejch maa ja'a judiøshajxy chajtøjc-hajxiän. Tøø ja'a cu'ughajxy hänäjty miädoyhaty coo ja'a Pablo ja'a Diosmädia'agy hänäjty jadähooc miädia'agáangumbä. ⁴⁵ Coo ja'a judiøshajxy wiyiindsøn hajxy jaduhn yhiixy coo ja'a cu'ughajxy hänäjty jaançh tehñ miay tøø miech Diosmädia'agyhamädoowhiipä, mänit hajxy jiootma'ty. Mänit hajxy tiägøøyy mänaambä cooc tyijy ja'a Pablohajxy hänäjty yhøhnda'agy. Wiingapxpejtäbä Pablohajxy hänäjty jaduhn. ⁴⁶⁻⁴⁷ Pero cabä Pablohajxy ñä'ägä møjpädaacy. Mänit hajxy yhadsooyy: —Jaduhn højtsä Dios tøø xwyiinguexy coo højts mijts judiøspä jayøjp nyajwiingapxø'øwät ja'a mädia'agy ja'a Jesúcøxpä. Pero caj mijts hädaa mädia'agy

mnä'ägä mädowna'añ. Coo hajxy jaduhñ mga'a mabøga'añ, paady jaduhñ quia'a hawiinmatsä coo hajxy homiänaajä mjugyhádät nebiä Dios homiänaajä jjugyhatiän. Cab højts mijts hädaa mädia'agy nyajmøødmädia'agaannä. Jim højtsä jäya'ay nøcxy nnä'ägä yajwiingapxø'øwaannä, ja'a hajxy ca'a judiöspä. Jaduhñ jim myiñ cujaay maa ja'a Diosmädia'aguiän.

⁴⁸Coo hajxy jaduhñ miädooyy, ja'a hajxy ca'a judiöspä, mänit hajxy xioondaacpøjcy. Mänit hajxy tiägøøyy mänaambä coogä Diosmädia'agy ja'a Jesúscøxpä jiaanč tehñ yhooyä. Mänit hajxy nägøxiä miäbøjcy, pønjatiä Dios hänajty tøø yajnähdijy coo hajxy jjugyhada'añ homiänaajä neby je'e jjugyhatiän. ⁴⁹Mänitä Diosmädia'agy ja'a Jesúscøxpä tiägøøyy wa'xpä wiinduhmyhagajpt.

⁵⁰Mänitä mäyøøjäya'ayhajxy jjojcaxpøøyyä møødä to'oxiøjc-hajxy, ja'a hajxy hänajty Dioswiingudsähgøøbiä. Jaduhñ hajxy ñämaayyä coo ja'a Pablo miädia'agyhajxy quia'a mabøjcäxät. Ja'a judiöswiindsønñhajxy jaduhñ mänaan. Jaduhñ hajxy hänajty miänaambä coo ja'a Pablohajxy yhøxpäbo'owøøjät. ⁵¹⁻⁵²Mänitä Pablo ja'a tiecy hajxy wyiinxiyty wyiinwojpy, weenä naaxoc jaduhñ quiøxy ca'ay. Hijxtahñd hajxy jaduhñ yajcähxø'c coo ja'a jäya'ay ja'a Diosmädia'agy hajxy hänajty nämay quia'a mabøga'añ. Pero ja'a jäya'ayhajxy hänajty mabøjpä, jaanč tehñ xioondaacp hajxy hänajty. Høxtä piaatypä Dioshespiritu hajxy hänajty. Mänitä

Pablohajxy jim chohñnä møødä Bernabé. Mänit hajxy jim ñøcxy maa ja'a cajpt hänajty xiøhatiän Iconio.

14 Mänitä Pablohajxy jim miejch Iconio. Coo sábado yhabaaty, mänit hajxy ñøcxy maa ja'a judiös ja'a chajtøjc-hajxiän. Mänitä Pablo ja'a Diosmädia'agy hajxy yajwiingapxøøyy. Mänitä jäya'ayhajxy may miäbøjcy, møødä judiöshajxy, møød hajxy ca'a judiöspä. ²Pero cabä judiöshajxy nägøxiä miäbøjcy. Mänitä jäya'ayhajxy jjojcaxpøøyyä, ja'a hajxy hänajty ca'a judiöspä, ja'a hajxy hänajty mabøjpä. Jaduhñ hajxy jjojcaxpøøyyä coo ja'a Pablo miädia'agy hajxy quia'a mabøjcäxät. Ja'a judiöshajxy jaduhñ mänaan, ja'a hajxy hänajty ca'a mabøjpä. Jaduhñ hajxy hänajty miänaambä coo ja'a Pablohajxy wyiingapxpedøøjät. ³Jejquia Pablohajxy jim jiaac hijty Iconio. Cabä Diosmädia'agy hajxy hänajty tsähgø'ø-tsähgø'ø ñä'a mädia'agy. Jaduhñ hajxy hänajty miädia'agy coogä Dios hajxy xjiaanč tehñ chøjcäm. Madiu'u ja'a Pablo pa'am hajxy hänajty yajnaxy. Hijxtahñd hajxy hänajty yajcähxø'py jaduhñ coo ja'a Pablo ja'a Jesús ja'a miäjaa hajxy hänajty tøø mio'oyii. Hiñ, ja'a Jesús ja'a miäjaahaamä pa'am hajxy hänajty yajnaxy. Jaduhñä cu'ughajxy hänajty ñajuø'øy coo ja'a Dios hajxy tøyhajt xjiaanč tsøjcäm. ⁴Pero cabä cu'ughajxy hänajty tiu'ugmädia'aguiä. Näje'e ja'a judiös miädia'agy hajxy hänajty miäbøjcä. Näje'e ja'a Pablo miädia'agy hajxy hänajty miäbøjcä.

Dioswiinguexiä Pablohajxy hänäjty tiuumby mөөdä Bernabé. ⁵Mänitä möjtuungmөөdpähajxy quiojyquiapxytiuuñ coo ja'a Pablohajxy quihuga'adsöøjät. Jaduhñä judioshajxy piamánaambä mөөd hajxy ca'a judiospä. ⁶Coo ja'a Pablohajxy jaduñ miädooyy, mänit hajxy jim piäyö'cy. Mänit hajxy ñöcxy maa ja'a naax hänäjty xiöhatiän Licaonia, mөөd maa ja'a cajpt hänäjty xiöhatiän Listra mөөd Derbe. ⁷Mänitä Diosmädia'agy hajxy jim tiägöøyy yajwiingapxöobiä Licaonia-naaxooty wiinduhmyhagajpt.

⁸Jimä pa'amjäya'ay hänäjty tu'ug chäna'ay Listra. Tecymiuquiä mähdiöjc hänäjty tөө myiñ tөө quia'ay. Cahnä hänäjty mänaa yo'oyö'ögy. ⁹Jiaanč tehñ yhamädoowhijpiä mähdiöjc hänäjty waambatiä Pablohajxy hänäjty miädia'agy. Coo ja'a Pablo ja'a mähdiöjc jaduñ yhijxy coo ja'a mähdiöjcä jioot hänäjty tөө piäda'agy coo miöcpögät, mөөd coo hänäjty miäböcy coo ja'a Pablo ja'a Jesús miäjaa hänäjty miöödhajtä, ¹⁰mänitä Pablo ja'a mähdiöjc ñämaayy:

—Pädö'ög, tänaayyö'ög.

Möcä Pablo jaduñ miänaañ. Mänitä craa jiaanč tänaayyö'cy. Mänit hoy tiägöñä yohbiä. ¹¹⁻¹²Coo ja'a cu'ugä craa hajxy jaduñ yhijxy coo hänäjty tөө miöcpöcy, mänit hajxy tiägöøyy yaaxpä yhamdsoo hayuuc-haambyhajxy:

—Tөө ja'a Zeus hajxy xñägädäacäm mөөdä Hermes, ja'a hajxy nwiingudsähgöøyyämbä.

Tөө hajxy jaduñ ñibiäda'agyii neby jäya'ayän —nömä Pablohajxy ñänöömä.

Jaduñä Bernabé hänäjty yhajodhadyii nebiä Zeusän. Haa ja'a Pablo, jaduñ hänäjty je'e yhajodhajtäbä nebiä Hérmesän, je'eguiöxpä coo ja'a Pablo hänäjty jiaanč tehñ miädia'agy. ¹³⁻¹⁴Pero cabä Pablohajxy hänäjty wyiinjuö'öy waambaty hajxy hänäjty ñänömyii. Hoorä, jimä tsajtöjc hänäjty tu'ug cajtpa'a maa ja'a cu'ugä Zeus hajxy hänäjty wyiingudsähgö'öyän. Ja'a jäya'ay hänäjty jim tuumbä teedy, mänitä waj may yajmejch maa ja'a Pablohajxy hänäjty cajtpa'a tөө miähmö'öyän. Mayyä pöjy jaduñ yajmejtpä. Mänitä Pablohajxy tiägöøyyä wiingudsähgöøyyäbä. Ja'a cu'ughajxy mөөdä teedy, je'e hajxy hänäjty mäwiingudsähgöøby. Mänitä teedyhajxy tiägöøyy mänaambä coogä waj hajxy hänäjty yoxa'añ ja'a Pablocöxpähajxy. Hagriegohaam hajxy jaduñ miänaañ. Coo ja'a Pablohajxy jaduñ wyiinjuöñä nebiä cu'ughajxy hänäjty jiatcö'owa'añ, mänitä Pablohajxy tiägöøyy tajpä maabiä. Mänitä wyit hajxy quioö'ch. Mänit hajxy jim tiägöøyy cu'ughagujc. Mänit hajxy yaaxy:

¹⁵—Mägu'ughajpädöjc, ca'a höjts xwyiingudsähgö'öy. Jäya'ay höjts nej mijtsän. Paady höjts yaa tөө nmech maa mijts mgajptän, coo höjts mijtsä Diosmädia'agy nyajwiingapxö'öwät, jaduñä Dios juppiä ja'a miädia'agy hajxy mmäböjät. Jéquiänä Dios ja'a tsajt yhädiuuñ, mөөdä naaxwiin,

møødä mejy, møød tijaty jaac jii, cøxiä. Jaduhnä Dios miäna'añ coo hajxy je'e mwiingudsähgøøñät, coo ja'a mhamdsoo cuhdujt hajxy mnajtshixøøñät, ja'a ca'a tsoobaatpä. ¹⁶Hijty, jaduñä Dios hijty miäna'añ coo ja'a jäya'ayä yhamdsoo cuhdujt hajxy ween yajtuñ. ¹⁷Homiänaajä ja'a Dios yajcähxø'øgy coo hojioot jiaanč tehñ miøødä maa mijtsøxpän, møød coo yajtu'uy coo yajta'xy, møød coo ja'a camä tu'u yaghoyø'øy, jaduñ hajxy ngaayy nhúucäm jootcujc —nømä Pablohajxy miänaañ.

¹⁸Hobiänejpjia ja'a Pablo ja'a cu'ug hajxy jaduñ yajmøbøjcy coo ja'a waj hajxy quia'a yóxät, coo ja'a Pablohajxy jaduñ quia'a wiingudsähgø'øwøød møødä Bernabé.

¹⁹Mänitä judíoshajxy näjele miejch. Antioquía hajxy hánajty chooñ møød Iconio. Mänitä cu'ug hajxy yajmøbøjtägajch cooc tyijy ja'a Pablohajxy hánajty yhøhnda'agy møødä Bernabé. Mänitä cu'ugä Pablo hajxy jaduñ jia ca'ch. Jaduñ hajxy hánajty yhajodhaty coo ja'a Pablo hánajty tøø yho'ogy, pero cab hánajty tøø ñä'a ho'pä. Mänitä Pablo hajxy hoy yhøxwich cajtpa'a.

²⁰Ja'a jäya'ayä Diosmädia'agy hajxy hánajty jaduñ tøø miäböquiäbä, mänitä Pablo hajxy hoy jiuhmugø'øy. Mänitä Pablo jadähooc wyiinmahñmejch. Mänitä Pablohajxy jaduñ jiiby tiägøøguiumbä cajptooty møødä mäßøjpädøjc. Cujaboomä Pablohajxy jim chohñ møødä

Bernabé. Mänit hajxy ñøcxy maa ja'a cajpt hánajty jaduñ xiøhatiän Derbe.

²¹Coo ja'a Pablohajxy jim miejch Derbe, mänitä Diosmädia'agy hajxy tiägøøyy hawaan hayaaxøöbiä. Coo ja'a cu'ughajxy jaduñ miädooyy, mänit hajxy may miäböjcy. Mänitä Pablohajxy jim wyiimbjçumbä. Mänit hajxy jim ñøcxtägajch Listra, møød jim Iconio, møød jim Antioquía, majaty hajxy hánajty tøø yhuuc hoobiän.

²²Ja'a jäya'ayä Diosmädia'agy hajxy hánajty tøø miäböquiäbä, mänit hajxy wyiingapxøøyyä coo ja'a Diosmädia'agy hajxy hamuumdu'joot pianøcxät tehngahnä, hoy hajxy jaduñ cu jia mänax cu jia yajnax ja'a tsaächpä ja'a peenä. Mänit hajxy jaduñ jim ñøcxät Dioswiinduum. ²³Majatiä Pablohajxy hánajty wiädity, wyiinguejxyp hajxy hánajty pøn jaduñ jim túnäp wiindsón maa ja'a tsajtøjcän. Mänitä Pablo ja'a Dios hajxy pia'yaaxy coo hajxy jaduñ quiuweendähadøøjät ja'a Díósäm, ja'a hajxy hánajty tøø miäböquiäbä. Jaguiay jayhu'uguiä Dios hajxy hánajty miänuu'xta'agy.

²⁴Mänitä Pablohajxy jim ñaxøøyy møødä Bernabé maa ja'a naax hánajty xiøhatiän Pisidia. Møød hajxy jim yhoobiä maa ja'a naax hánajty xiøhjäpän Panfilia. ²⁵Mänitä Pablohajxy jim jadähooc miéjtscumbä Perge. Jimä Diosmädia'agy hajxy jadähooc yajwä'xcumbä. Mänit hajxy ñøcxy jadähooc Atalia. ²⁶Jim hajxy jadähooc hoy biarcotägø'øy. Mänit hajxy jim ñøcxumbä

Antioquía maa hajxy hánajty jaduhñ tøø yhuuc tsohndaacpän, maa hajxy hánajty jaduhñ tøø wyiinguexyijän coo ja'a Dios ja'a tiuung hajxy tiuunät. Coo hajxy jaduhñ jim miejstägajch Antioquía, yaghabejt hajxy jaduhñ nebiä Dios hánajty tøø yhane'emiän coo hajxy jaduhñ tiúnät. ²⁷Coo hajxy jim miejch Antioquía, mänitä Pablo ja'a mabøjpädøjc hajxy wioomuicy. Mänit hajxy miädiaacy nebiatiä Dios hajxy hánajty tøø piuhbedyiijän, møød coo ja'a Dios cuhdujt jaduhñ tøø yecy coo ja'a jäya'ayhajxy jaduhñ miäbøjpät, ja'a hajxy hánajty jaduhñ ca'a judíospä. ²⁸Jejquiä Pablohajxy jim yhiyty Antioquía. Xyiicy xioondaacy hajxy jaduhñ møødä mabøjpädøjc-hajxy.

15 Mänitä jäya'ayhajxy jaduhñ jim näje'e miejch Antioquía. Judea hajxy hánajty tøø chohnda'agy. Mänitä mabøjpädøjc-hajxy yajnähihöøyyä coo hajxy jaduhñ quiudiúnät nebiä Moisés hánajty jegyhajty tøø yhane'emiän, coo hajxy yajcircuncidarhádät. Coo hajxy jaduhñ quia'a cudiúnät, cábäc hajxy jaduhñ nähwá'adsät. Ja'a jäya'ayhajxy hánajty jim tsohmbä Judea, je'edsä mabøjpädøjc hajxy jaduhñ yajnähihöøyy. ²⁻³Pero cabä Pablohajxy jaduhñ quiumaayy coo ja'a mabøjpädøjc-hajxy jaduhñ yajnähihöøwøøjät. Mänitä Pablo ja'a mädia'agy hajxy jaduhñ yajcapxihöøyy coo ja'a mabøjpädøjc-hajxy jaduhñ quia'a mabøgät neby hajxy hánajty tøø yajnähihöøyiijän coo hajxy tsipcøxp yajcircuncidarhádät.

Mänitä Pablohajxy jim quiejxä Jerusalén møødä Bernabé, møødä wiinghäna'c-hajxy. Ja'a mabøjpädøjc-hajxy jaduhñ mäguejx coo ja'a tsip ja'a pleetä jaduhñ ween nøcxy yajcøxy yajmay. Ja'a jäya'ayhajxy hánajty jim tuumbä Jerusalén maa ja'a tsajtøjcän, je'edsä tsip ja'a pleetä hajxy hánajty miøødyajcøxaamby miøødyajmayaamby, jaduhñ hajxy quia'a tsipyajpádø'nät. Coo ja'a Pablohajxy jim tiu'ubøjcy Antioquía, mänit hajxy jim ñaxøøyy maa ja'a naax hánajty xiøhatiän Fenicia, møød jim maa ja'a naax hánajty xiøhatiän Samaria. Jimä Pablo ja'a mabøjpädøjc hajxy miøødmädiaacy, ja'a hajxy hánajty tsänaabiä jim Fenicia møød jim Samaria. Jaduhñä Pablohajxy miädiaacy coogä jäya'ayä Diosmädia'agy hajxy hánajty tøø piadu'ubøcy, ja'a hajxy hánajty ca'a judíospä, møød coogä yhamdsoo cuhdujt hajxy hánajty tøø ñajtshixøøñä. Coo ja'a mabøjpädøjc-hajxy jaduhñ miädooyy, mänit hajxy jaduhñ jiaanč tehñ xioondaacy.

⁴Coo ja'a Pablohajxy jim miejch Jerusalén møødä Bernabé, mänitä mabøjpädøjc-hajxy jim yhamugøøyy maa ja'a tsajtøjcän, møødä Dioswiinguexpähajxy, møødä tsajtøjc-wiindsøñhajxy. Mänitä Pablohajxy miädiaacy nebiatiä Dios hajxy hánajty tøø piuhbedyiijän.

⁵Jimä fariseoshajxy näje'ebä. Tøø ja'a Diosmädia'agy hajxy hánajty miäbøjpä ja'a Jesucristocøxpä. Mänit hajxy tiänaayyø'cy. Mänit hajxy miänaañ:

—Tsipcøxpä mabøjpädøjc-hajxy yajcircuncidarhápät, hoy hajxy

jaduhñ quia'a jagä judíospä; weenä mädia'agy hajxy jaduhñ quiudiúñ nebiä Moisés jecy yhanehmiän — nõmä fariseoshajxy miänaañ.

⁶Mänitä Dioswiingueyxypähajxy yhamugøøyy møødä tsajtøjc-wiindsøn'hajxy. Mänit hajxy tiägøøyy mädiaacpä waambatiä fariseoshajxy tøø miäna'añ.

⁷Mänitä Pedro tiänaayyø'cy mädiaaccujc. Mänit yajcapxøøyy:

—Puhya'adiøjc, mnajuøøby hajxy jaduhñ coočhä Dios jecy xwyiinguejxy coočhä jäya'ayä Diosmädia'agy nyajwiingapxø'øwät, ja'a hajxy ca'a judíospä, coo hajxy miäbögät, jaduhñ hajxy ñähwa'ads quiuhwä'adsät.

⁸Haa ja'a Dios, xyhixyhájtämä njootä njuøhñdyhajxy. Coo ja'a Diosmädia'agy hajxy jaduhñ miäbøjcy, ja'a ca'a judíospä, mänitä Dioshèspiritu hajxy miøøyyäbä, nebiä Dios ja'a yhEspíritu hajxy tøø xmiøøyyäm højtshájtäm. Jaduhñä tøyhajt hajxy nmøødhájtäm coo ja'a nähwaatstaact hajxy jaduhñ paaatpä, neby højts tøø nbáatäm.

⁹Tu'cuhdujtä Dios hajxy tøø xyajñhwaats tøø xyajcuhwäatsäm møødä cajpä judíospähajxy. Coo hajxy jaduhñ tøø miäbøjpä, paadiä piojpä quiädieeyhajxy tøø ñähwaatspä. ¹⁰Pero jaduhñ mijts mja mäna'añ coo ja'a cajpä judíospä ja'a mädia'agy hajxy jaduhñ quiudiúumbät nebiä Moisés jecy yhanehmiän. Ni højts pedyii nga'a cudiúunäm, højts judíoshájtäm. Ni højtsä nhapä ndeedyhajxy hijty jegyhajty hoy quia'a cudiúunämbä. Coo mijts jaduhñ mja mäna'añ coo ja'a cajpä

judíoshajxy jaduhñ quiudiúumbät, jaduhñ hajxy myajcähxø'øgy nebiä Dios ja'a mädia'agy hajxy mga'a mäßøjcäbän. ¹¹Pero jaduhñ hajxy nnajuøøyyäm coo ja'a Jesús hajxy tøø xñä'a yajñhwaatsäm tu'cuhdujt, møød højts judíospähájtäm, møødä cajpä judíoshajxy. Hojiootä Jesús jaduhñ miøødhajpy maa højtscøxphájtäm —nõmä Pedro miänaañ.

¹²Mänitä mäßøjpädøjc-hajxy miädiaacpädøøyy, ja'a hajxy hñajty jim tsänaabiä Jerusalén. Mänitä Pablohajxy tiägøøyy mädiaacpä møødä Bernabé nebiatiä Dios ja'a miäjaa hñajty tøø yajcähxø'øgy maa ja'a jäya'aguiøxpähajxiän, ja'a cajpä judíospähajxy, møød nebiatiä Pablo ja'a hoy-yagjuøøñäjatypä hajxy hñajty tøø tiuñ. ¹³Coo ja'a Pablohajxy jaduhñ miädiaacpädøøyy, mänitä Santiago miänaañ:

—Puhya'adiøjc, huuc tunä mayhajt hajxy, huuc hamädoowhit hädaa mädia'agy hajxy. ¹⁴Jaduhñä Simón tøø miädia'agy coo ja'a Dios ja'a hojioot miøødhajnä maa ja'a jäya'aguiøxpähajxiän, ja'a hajxy cajpä judíospä, møød coo ja'a Dios wyiimbiy pønjaty jaduhñ quiu'ughädäp. ¹⁵Jaduhñ jim myiñ cujaay maa ja'a Diosmädia'aguiän nebiä profetadøjc-hajxy jecy quiapxy miädiaaquian coo ja'a Dios hojioot hñajty miøødhada'añ maa ja'a jäya'aguiøxpähajxiän, ja'a hajxy cajpä judíospä. Jaduhñä profeta Amós jecy quiujahy quiuguee'ch ¹⁶coo ja'a Dios jaduhñ miänaañ:

Nguexáambiøchä nguguexy
coo ween jaduhñ yhanehmbä
nebiä David jecy yhanehmiän,

¹⁷ jadúhñhøchä jäya'ayhajxy
xwyiingudsähgø'owät,
ja'a hajxy cajpä judfospä,
pønjátyhøch tøø nwiimbiy
cooçh je'e ngu'ughädät.

¹⁸ Jéquiänä Dios jaduhñ miänaañ
coo jaduhñ yajtøjiada'añ.

¹⁹ Mänitä Santiago jiaac mänaañ:
—Tøyhajt jaduhñ nebiä

Diosmädia'agy miäna'añän. Cab
jaduhñ yhäxixø'oy coo ja'a
mäbøjpädøjc hajxy nhanéhmämät,
ja'a hajxy ca'a judfospä. Cab
hajxy nnämäaayänät coo højtsä
nguhdujt hajxy xpiahíxämät, højts
judfoshájtäm. ²⁰ Jaduhñ mäbøcypä,
tsøc hajxy yajnäaayøøyyäm coo
hajxy jaduhñ quia'a tsú'udsät
tijatiä jäya'ayhajxy tøø yoxy
quepychechwiinduum, møød
coo wiingto'oxiøjc hajxy quia'a
møødmá'awät, møød coo
animal hajxy quia'a tsú'udsät
ja'a jañø'xiee'xypä, møød
coo animalnø'ty hajxy quia'a
hu'ug quia'a jøø'xät. ²¹ Jaduhñä
Moisés jecy quiujahy coo højts
jaduhñ nguhdujthájtämät,
højts judfoshájtäm. Jaduhñ
højts wiindu'ugpoo'xxiøø
nyajnahixøøyyäm maa ja'a
tsajtøjcän wiinduhmyhagajpt.

²² Mänitä mäbøjpädøjc-hajxy
nägøxiä quiojyquiapxyhajty møødä
Dioswiinguexpähajxy, møødä
tsajtøjc-wiindsønñhajxy, coo ja'a
cunocy hajxy jim quiéxät Antioquía,
coo ja'a Pablohajxy miødhadøøjat
møødä Bernabé. Mänitä Judashajxy
jaduhñ wyiinguejxä møødä Silas
coo hajxy jaduhñ quiunocyhädät.
Jimä Judashajxy hänäjty
quiopc-haty møødä Silas maa ja'a

tsajtøjcän. Mejtstu'u ja'a Judas
hänäjty xiøhaty møødä Barsabás.

²³ Mänitä mäbøjpädøjcä nocy hajxy
yhädiuñ. Mänitä Pablo ja'a nocy
hajxy yajcø'ødägøøyyä coo hajxy
miänøcxät Antioquía. Jaduhñä nocy
hajxy quiujahy:

“Puhya'adiøjc, mijts hädaa nocy
nyajnäguejxyp, mijts ca'a judfospä,
coo ja'a Diosmädia'agy hajxy tøø
mmäbøcy, pønjaty jim tsänaaby
Antioquía, møød jim Siria, møød
jim Cilicia. Højts hädaa nocy
tøø nhädiuñ, højts mäbøjpädøjc
yaa hijpä Jerusalén, møødä
Dioswiinguexpähajxy, møødä
tsajtøjc-wiindsønñhajxy. ²⁴ Tøø
højts jaduhñ nmädoxyhaty coo
højtsä nmägu'ughajpähajxy näje'e
jim tøø yhoy maa mijtsän. Ca'a
yhøjts jaduhñ nguejx; hamdsoo
joot hajxy jim tøø ñøcxy. Jaduhñ
højts tøø nmädoxyhaty coo mijtsä
häna'c xjia wi'i wyiinhøøna'añ,
ja'a hajxy jim tøø yhöyyäbä maa
mijtsän, møød coo mijts näje'e tøø
myajwiinhøøñ. ²⁵ Coö mijtsä häna'c
jaduhñ xjia wi'i wyiinhøøna'añ,
paady højts tøø ngojyquiapxyhaty
coo højtsä nmägu'ughajpä nämetsc
jim nguéxät maa mijtsän näguipxy
møødä Pablo møødä Bernabé.
Højtsä Pablo njaanç tehñ chojpy
njaanç tehñ pia'häyooby møødä
Bernabé. ²⁶ Jaanç tehñ yhooyä
Pablo ja'a Jesucristo hajxy
miäduñ. Coö hajxy jaduhñ hoy
miäduñ, paady hajxy mayhooc
tøø jia wi'i yagho'oga'añii. ²⁷ Ja'a
Judas højts nwiinguejxyp møødä
Silas coo hajxy jim ñøcxät maa
mijtsän. Hajäya'ayhaam mijts
jaduhñ xmiøødmädia'aga'añ

waambaty hõjts cham njaay
ngueečhän nocyquioxp.
28-29 Jaduhñ hõjtsä Dioshespíritu
tøø xmiøødojyquiapxyhaty
coo mijts nhané'emät coo hajxy
mga'a tsú'udsät mädyiijaty
animal ja'a häna'c tøø yoxy
quepychechwiinduum, møød coo
animal hajxy mga'a tsú'udsät
ja'a jañø'xiee'xypä, møød coo
wiingto'oxiøjc hajxy mga'a
møødmá'awät. Coö hajxy
jaduhñ mgudiünät, jaduhñ hajxy
mniyaghoyø'øwøøjät. Cabä
wiingcuhdujt yaghane'ema'añ. Ja'a
Dios hajxy jaduhñ xcwieendähädäp.”
Jaduhñä mähøjpädøjcä nocy hajxy
yhädiuñ, ja'a hajxy hänajty jim
hijpä Jerusalén.

³⁰Mänitä Pablohajxy jim
tiu'ubøjcy møødä Bernabé,
møødä Judas, møødä Silas. Mänit
hajxy jim ñøcxy Antioquía.
Coo hajxy jim miejch, mänitä
mähøjpädøjc-hajxy nägøxiä jim
yhamugøøyy maa ja'a tsajtøjcän.
Mänitä Pablo ja'a mähøjpädøjcä
nocy hajxy yajcø'ødägøøyy.
³¹Mänitä mähøjpädøjcä nocy hajxy
quiapxy. Mänit hajxy jiaanč tehñ
jiootcugøøyy je'eguiøxpä coo hajxy
jaduhñ quiapxmøcpøjcä nocyhaam.
³²Mänitä Diosmädia'agy hajxy
yajwiingapxøøyyä. Ja'a Judashajxy
jaduhñ capx møødä Silas. Yoñ
hajxy jaduhñ quiapxy miädiaacy.
Diosquexiä Judashajxy hänajty
møødä Silas nämetsc. ³³Maxiøø ja'a
Judashajxy jim yhijty Antioquía
møødä Silas. Coö hajxy hänajty
wyiimbidaannä, mänit hajxy
ñämaayyä coo ja'a Dioscujú'uuyäp
hajxy jim nøcxy yecy Jerusalén.

Mänitä Judashajxy ñøcxnä
Jerusalén maa hajxy hänajty
tøø yhuuc tshõndaacpä. ³⁴Pero
cabä Silas ja'a Judas pianøcxy.
Jim miähmøøyy Antioquía
³⁵näguipxy møødä Pablo møødä
Bernabé. Mänitä Diosmädia'agy
hajxy tiägøøyy yajwiingapxøøbiä
näguipxy møødä mähøjpädøjc-hajxy
nämäybiä.

³⁶Mänitä Pablo ja'a Bernabé
cujecy ñämaayy:
—Jam jadähooc wädjttäm majatiä
Diosmädia'agy hoy nyajwá'xäm.
Jamä mähøjpädøjc cuhíjxäm pø
tehngahnä ja'a Diosmädia'agy hajxy
hoy pianøcxy.

³⁷Jia nähadssoow ja'a Bernabé
jaduhñ. Mänit jaduhñ jia mänaañ
coo ja'a Juan Marcos hajxy cu
miødhajty. ³⁸Pero cabä Pablo
jaduhñ miänaañ coo ja'a Juan
Marcos hajxy jaduhñ miødhädät
je'eguiøxpä coo ja'a Juan Marcos
hajxy hänajty tøø piuhwa'ačhii
mänaa hajxy hänajty jim wiäditiän
Panfilia maa ja'a Diosmädia'agy
hajxy hänajty yajwa'xiän.

³⁹Coo ja'a Pablo hänajty quia'a
tu'ugmädia'aguiä møødä Bernabé,
paady hajxy mänit ñiwiä'xä.
Mänitä Bernabé ja'a Marcos
wiowø'cy. Mänit hajxy tiägøøyy
barcojooty. Mänit hajxy jim ñøcxy
mejyhawiimb maa ja'a naax hänajty
xiøhatiän Chipre. ⁴⁰Haa ja'a Pablo,
mänit je'eduhñ miänaañ cooc
ja'a Silas hänajty miøødwädita'añ.
Mänitä mähøjpädøjcä Dios hajxy
miänuu'xtaacy coo ja'a Pablohajxy
piuhbedøøjät. Mänitä Pablohajxy
tiu'ubøjnä møødä Silas. ⁴¹Mänit
hajxy jim ñaxøøyy Siria møød jim

Cilicia. Majatiä Pablohajxy hänajty wiädity, jimä mabøjpädøjc hajxy hänajty quiapxmøpcøcy.

16 Mänitä Pablohajxy jim ñøcxy Derbe. Coø hajxy jim tiu'ubøjcumbä, mänit hajxy jim ñøcxumbä Litra. Jimä craa hajxy tu'ug hoy piaady. Timoteo ja'a craa hänajty xiøhaty. Miäbøjpiä Timoteo ja'a Diosmädia'agy hänajty. Ja'a Timoteo ja'a tiajjä, judía hänajty je'e. Jaanä miäbøjpiä Diosmädia'agy hänajty je'ebä. Ja'a Timoteo ja'a tieediä, ca'a hänajty je'e judíosä.

²Quiumaabiä mabøjpädøjcä Timoteo hajxy hänajty, ja'a hajxy hänajty jim tsänaabiä Litra møød jim Iconio. ³Mänitä Pablo ja'a Timoteo ñämaayy coø hänajty miøødwädita'añ. Pero cahnä Timoteo hänajty yajcircuncidarhaty. Mänitä Pablo ja'a Timoteo yajcircuncidarhajtä, jaduñä judíoshajxy jaduñä quia'a jootmä'adät. Hiñ, ñajuøøbiä judíoshajxy hänajty nägøxiä coø ja'a Timoteo hänajty quia'a yajcircuncidarhatyñä. Coø ja'a Timoteo ja'a tieedy hänajty quia'a yajcircuncidarhatyñä.

⁴Mänitä Pablohajxy tiägøøyy wädijpä cajpt-cajpt møødä Silas møødä Timoteo. Majaty hajxy hänajty wiädity, jimä mabøjpädøjc hajxy hänajty yajmädoyhaty waambatiä Dioswiinguexypähajxy hänajty tøø yhane'emiän, møødä tsajtøjc-wiindsøñhajxy, ja'a hajxy hänajty jim hijpä Jerusalén. ⁵Jaanä jaduñä Pablo ja'a mabøjpädøjc hajxy hänajty quiapxmøcpøjpä wiinduhmyhagajpt, paadiä

mabøjpädøjcä Diosmädia'agy hajxy hänajty hoy jiaac tehñ miäbøcy. Møød hajxy hänajty jiaac tehñ miayøøy jabom-jabom.

⁶Pero cabä Pablo cuhdujt hajxy choj mooyyä ja'a Dioshespiritäm coø ja'a Diosmädia'agy hajxy jim nøcxy yajwa'xy Asia. Paady hajxy jim jiaac wädijty Frigia møød jim Galacia. ⁷Mänit hajxy jim miejch maa ja'a naax hänajty xiøhatiän Misia. Mänit hajxy jia mänaañ coø hajxy jim ñøcxät maa ja'a naax hänajty xiøhatiän Bitinia. Pero cabä Jesús yhEspiritu jaduñä miänaañ coø hajxy jim ñøcxät. ⁸Coo hajxy jim ñaxøøyy Misia, mänit hajxy jim miejch maa ja'a cajpt hänajty xiøhatiän Troas. ⁹Mänitcoodsä Pablo jäya'ay tu'ug wyiinhijxy. Jim hänajty choon maa ja'a naax hänajty xiøhatiän Macedonia. Tänaaby hänajty jaduñä. Mänitä Pablo ñämaayy: "Huuc tunä mayhajt, jam højtsä Diosmädia'agy yajwiingapxøøyyäc jim Macedonia."

¹⁰Coo ja'a Pablo jaduñä wyiinhijxy, mänit højts jaduñä nwiinmaayy coø højts jim njaançh nøcxät Macedonia. Jaduñä højts hänajty nwiinjuøøy coø højtsä Dios hänajty tøø xwyiinguexy coø højtsä Diosmädia'agy jim nøcxy nyajwa'xy.

¹¹Mänit højts hoy nbarcotägøøy. Mänit højts jim ndsohñ Troas. Mänit højts nnøcxy mejyhawiimb maa ja'a naax hänajty xiøhatiän Samotracia. Mejihagujcä naax jaduñä. Cujaboom højts jadähooc nbarcotägøøguiumbä. Mänit højts njaac nøcxy mejyhawiimb maa ja'a cajpt hänajty jaduñä

xiøhatiän Neápolis. Coo højts jim nmejch mejyhawiimb, mänit højts nbarcopädsømnä. ¹²Mänit højts nnøxcumbä maa ja'a cajpt hänajty jaduhñ xiøhatiän Filipos, jim Macedonia-naaxpa'a. Jimä Rómabä jäya'ayhajxy hänajty nämay chäna'ay. Jim højts jaduhñ maxiøø nhijnä. ¹³Coo ja'a poo'xxiøø yhabaaty, mänit højts jim nnøcxy møjnøøba'a, jim cajptpa'a. Jimä judíos ja'a Dios hajxy hänajty naxy pia'ya'axy. Jimä to'oxiøjc-hajxy hänajty näje'e tøø yhamugø'øy. Mänit højts jim nhøxtaacy. Mänit højtsä jäya'ay ndägøøyy yajmøødmädiaacpä ja'a Diosmädia'agy, ja'a hajxy hänajty tøø yhamugø'øyäbä. Haagä to'oxiøjc hajxy hänajty je'e. ¹⁴Tu'jäya'ay hänajty xiøhatty Lidia. Jim hänajty choon maa ja'a cajpt hänajty xiøhatiän Tiatira. Hucywyit hänajty tioo'py, ja'a hojiatypä. Wyiingudsähgøøbiä Lidia ja'a Dios hänajty. Mänitä Dios ja'a Lidia yajmäbøjcy waambatiä Pablo hänajty yajnähixø'øy. ¹⁵Mänitä Lidiahajxy hoy näbety nägøxiä mäduhñtiä hajxy hänajty jim yhity maa ja'a tiøjcän. Mänit højtsä Lidia xñämaayy:

—Pø mmänaamb hajxy jaduhñ cooähä Dios ja'a miädia'agy hamuumdu'joot nmäbøjca, jam hajxy jim mejtsta'ag maächä ndøjcän —nøm højts jaduhñ xñämaayyho'cy.

Mänit højts jim hoy nmejtsta'agy.

¹⁶Wiinghooc højts hänajty jim nnøcxy maa ja'a Dios hajxy hänajty pia'ya'axiän. Tu'haamnøcxpä, jim højtsä cäxyiihäna'c tu'ug

hoy nbaady. Cudoogø'øy hänajty je'eduhñ. Ja'a haxøøgpä hänajty miøød. Cuwiinmahñdy hänajty je'eduhñ. Cøxiä hänajty jaduhñ ñajuø'øy tijaty hänajty jadaänäp tunäänäp. Majiatiä xädø'øñ hänajty ñämechii coo hänajty jaduhñ cøxiä ñajuø'øy. Coo xädø'øñ hänajty mio'oyii, cøxiä wyiindsøn hänajty miodiägach, mäduhñtiä hänajty quianarhatty. ¹⁷Mänit højtsä cäxyiihäna'c xpiadu'ubøjcy høxhaam. Mänit tiägøøyy yaaxpä jojpä:

—Yø'ø jäya'ayhajxy, ja'a Dios hajxy miäduumby, ja'a maas møc cuhdujt møødpä. Mijts hajxy xyajwiingapxø'owaamb neby hajxy mnähwa'ads mguhwá'adsät.

¹⁸Maxiøø højtsä quixy jaduhñ xpiawädiyty yäaxäp wáañäp. Coo ja'a Pablo jaduhñ chíjpanä coo ja'a quixy jaduhñ wyi'i ya'axy, mänitä Pablo ñäwa'wiimbijty. Mänitä Pablo ja'a haxøøgpä yhøxquejxy:

—Ja'a Jesucristocøxpøch miich nhøxquexy; pädsøm jilby maa yø'ø cäxyiihäna'cän —nømä Pablo miänaañ.

Mänitä haxøøgpä jaduhñ jiaanch pädsømy.

¹⁹Coo ja'a quixiä wyiindsøn hajxy jaduhñ yhiixy coo ja'a quixy hänajty jaduhñ tøø ñähwa'ächii, mänit hajxy jaduhñ ñajuøøyy coo ja'a quixy hänajty jaduhñ quia'a canarhadaannä, møød coo xädø'øñ hajxy hänajty quia'a mo'owáañänä. Mänitä Pablohajxy miajtsä møødä Silas. Mänit hajxy yajnøcxä haguyc. ²⁰Mänit hajxy jaduhñ näxø'owøøyyä: —Hädaa judíoshajxy, cajptyajma'p hajxy jaduhñ. ²¹Wiingcuhdujt højts

xjia wi'li yajnahixø'owáanäm. Cab hajxy hawiinmats nmäbøjcämät, je'eguiøxpä coo hajxy jim ndsøhnäm Roma —nömä Pablohajxy nänøömä.

Ja'a quixiä wyiindsønhajxy jaduhñ mänaañ.

²²Mänitä Pablohajxy nábädø'cä ja'a cú'ugäm. Mänitä cuduunghajxy miänaañ coo ja'a Pablo ja'a wyithajxy yajtsijjxät, møød coo hajxy wiobho'ogóøjt paxyhaam. ²³Coo ja'a Pablohajxy hánajty tøø wiobho'ogyii, mänit hajxy hoy chumyii. Mänitä tsumyjiäya'agwieendähajpä yhanehmä coo ja'a Pablohajxy hoy cwieendähadøøjtät. ²⁴Mänit hajxy hoy piäda'agyii hadsihtuum jiiby pujxtøgooty. Pu'uyhawa'adsootä tiecyhajxy jaduhñ yhame'mújcäxä.

²⁵Cuptsuhmdä hánajty jaduhñ, jiibiä Pablo ja'a Dios hajxy hánajty pia'høy pia'ya'axy. Jiibiä miädsuymyjiäya'ayhajxy hánajty jaduhñ yhamädoowhity. ²⁶Mänitä hujx møc nájxy. Høxtä tsäyuuyy ja'a pujxtøjc jaduhñ. Cøjxä tøghaaw jaduhñ yhawa'aäch. Møødä cadena jaduhñ cøjx pioty maa ja'a tsumyjiäya'ayhajxy hánajty jaduhñ quiuxochän. ²⁷Coo ja'a tsumyjiäya'agwieendähajpä mia'abiädø'cy, mänit jaduhñ yhjy coo ja'a tøghagø'ow hánajty jaduhñ tøø quiøxy hawa'aäch. Mänit jaduhñ miänaañ cooc tyijy ja'a tsumyjiäya'ayhajxy tøø quiøxy päyø'ogy. Mänitä espada jiuu'ty. Niyagho'ogáanäp hánajty jaduhñ hamdsoo je'eguiøxpä coo hajxy cu piäyø'cy. ²⁸Mänitä Pablo yaaxy:

—Ca'a jaduhñ mniyagho'ogyii. Chaa højts jaduhñ nägøxiä. Caj

pøn tøø piäyø'ogy —nömä tsumyjiäya'agwieendähajpä nāmaayyā.

²⁹Jaanč tehñ chähgøøby hánajty je'eduhñ. Høxtä tsäyuuby hánajty je'eduhñ. Mänitä jøøn hoy quioñ. Päyø'oguiä tiøjtägøøguiumbä. Mänitä Pablohajxy hoy wyiinjjcäda'agyii møødä Silas. ³⁰Mänit hajxy yhøxwoobädsøömä pujxtøgooty. Mänit hajxy miäyajtøwä: —Wiindsøndøjc, ja wi'li nāhwa'adsāmbøch høøch. Nébyhøch jaduhñ njatcø'owat.

Ja'a tsumyjiäya'agwieendähajpä jaduhñ mänaañ. ³¹Mänitä Pablohajxy yhadsooyy:

—Coo hajxy jaduhñ mmäbøgät ja'a Wiindsøñ Jesúsøxpä, jaduhñ hajxy mnāhwá'adsät mäduhñtiä hajxy jim mhity maa ja'a mdøjcän.

³²Mänitä tsumyjiäya'agwieendähajpä ja'a Dioscapxy ja'a Diosmädia'agy hajxy hoy yajwiingapxø'oyii mäduhñtiä hajxy hánajty jim yhity maa ja'a jøøn maa ja'a tiøjcän. Ja'a Pablohajxy jaduhñ mäyajwiingapxøøyy. ³³Moññä hánajty jaduhñ. Mänitä Pablohajxy hoy yajtsi'iyii møødä Silas majaty hajxy hánajty jaduhñ tøø chaačø'oyän. Ja'a tsumyjiäya'agwieendähajpä jaduhñ mäyajtsiiw. Mänit hajxy nägøxiä hoy nábety mäduhñtiä hajxy hánajty jiiby yhity maa ja'a jøøn maa ja'a tiøjcän. ³⁴Mänitä Pablohajxy jim wioonøcxä maa ja'a craa tiøjcän. Mänit hajxy yajcaayy yaghuucä. Jaanč tehñ xioondaac ja'a craahajxy jaduhñ

je'eguiøxpä coo ja'a Dioscapxy ja'a Diosmädia'agy hajxy hänäjty tøø miäböcy.

³⁵Coo jobøøyy, mänitä cuduungä policia hajxy quiejxy maa ja'a puixtøjcän. Mänitä policia ja'a tsumyjiäya'agwieendähajpä hajxy hoy näma'ay coo ja'a Pablohajxy ween yhøxmačhii møødä Silas. ³⁶Mänitä Pablo hoy nämaadiägachii:

—Tøøchä cuduunghajxy jaduhñ xyhane'emy cooçh mijts nhøxmädsät. Nøcx hajxy jaduhñ jootcujc.

³⁷Mänitä Pablo ja'a policia nämaayy:

—Højts, Roma højts nxønaxy. Jaduhñ højts cuhdujt nmøødä nebiä Rómabä jäya'ayhajxy miøødän. Hoy højts jim nja xønaxy Roma, tøø højtsä cuduung xyajwobho'ogyii hijxwiinduum. Hoy højts tii pojpä tii cädieey nga'a jagä møødä, tøø højts xyajtsumyii. Hoorä, tsähdiuumbä cuduunghajxy jaduhñ coo højts jaduhñ tøø xchaächtiunñ. Paady højts hamee'ch xjia wi'li yaghøxmdasa'añii. Ween højts min xyhamdsoo høxmach —nømä policiahajxy nämaayyä.

³⁸Mänitä cuduunghajxy hoy yhawáanäxä waambatiä Pablo hänäjty tøø miäna'añ. Coo ja'a cuduunghajxy jaduhñ miädooyy coogä Pablohajxy hänäjty jim xiønaxy Roma, mänit hajxy chähgøbiøjcy. ³⁹Mänitä Pablohajxy hoy näma'ayii møødä Silas:

—Huuc tunä mayhajt hajxy, højts huuc mämée'xäc —nømä cuduunghajxy hoy miäna'añ.

Mänitä Pablohajxy yhøxmäjtsänä. Mänit hajxy miänuu'xtaacä coo

hajxy jim chónät Filipos. ⁴⁰Coo ja'a Pablohajxy puixtøjpdädsøømy, mänit hajxy jim nøcxy maa ja'a Lidia tiøjcän. Mänitä mäbøjpdøjc-hajxy jim yhamugøøyy. Mänit hajxy quiapxmøcpøjcä ja'a Pablo. Mänitä Pablohajxy jim chohnnä møødä Silas.

17 Mayhagajptä Pablohajxy näxøøyy, møød jim Anfípolis, møød jim Apolonia. Mänit hajxy jim miejch maa ja'a cajpt hänäjty xiøhatiän Tesalónica. Jimä judíos ja'a chajtøjc-hajxy hänäjty tu'ug. ²Jaduhñä Pablo hänäjty quiuhdujthaty coo jaduhñ chajtøjyo'oy. Wiindu'ugpoo'xxiøø hänäjty jaduhñ jim nøcxy maa ja'a tsajtøjcän. Tägøøghoocä Pablo jim yhooyy maa ja'a tsajtøjcän jim Tesalónica. Jimä Pablo ja'a jäya'ay hänäjty miøødcapxy miøødmädia'agy. Ja'a Diosmädia'agy hajxy hänäjty yajcapxiøøby. ³Jaduhñä Pablo hänäjty quiapxtøy coo jaduhñ jim myiñ cujaay maa ja'a Diosmädia'aguiän coogä Dios ja'a Mesías hänäjty yaa quixea'añ hädaa yaabä naaxwiin, møød cooc hänäjty yho'oga'añ, møød cooc hänäjty jiijyipiøjtägatsa'añ:

—Ja'a Jesúshøch mijts nyajmøødmädiaacyy. Jue'e je'e, ja'a Mesías je'e, ja'a Dios jecy nänøømäbä cooc hänäjty yaa quixea'añ ho'pä —nømä Pablo miänaañ.

⁴Näje'e ja'a judíoshajxy miäbøjcy. Nämayyä jäya'ayhajxy miäbøjpä, ja'a hajxy hänäjty ca'a judíospä, ja'a Dios hajxy hänäjty wiingudsähgøøbiä. Nämayyä to'oxiøjc-hajxy miäbøjpä,

pønjatiä ñihyhaphajxy hñanjty jim tuungmøød haguyc. Mänitä Pablohajxy miägu'ugpøjcä møødä Silas, ja'a jäya'ayhajxy hñanjty tøø miäbøquiäbä. ⁵Coo ja'a Pablohajxy jaduñ miägu'ugpøjcä, mänitä judíoshajxy jiootma'ty, ja'a hajxy hñanjty ca'a mábøjpä. Mänitä haxøøghäna'c-hajxy hoy wioomugyii. Mänit hajxy ñämaayyä coo hajxy ween quiajptyajma'ady. Mänitä haxøøgjäya'ayhajxy miädoyhajty cooc tyijy ja'a Pablohajxy hñanjty jim tøø miech maa ja'a Jasón ja'a tiøjcän. Jue'e ja'a haxøøgjäya'ayhajxy hñanjty jiatcø'owa'añ møødä judíoshajxy, jimä Pablohajxy hñanjty yajnøcxa'añii haguyc. Mänitä Jasón ja'a tiøjc hadsip yhajahmdúutäxä.

⁶Coo ja'a Pablohajxy jim quia'a paatä, mänitä Jasónhajxy jim wyitsnøcxä haguyc hadsip, møødä mábøjpädøjc-hajxy näje'e. Mänitä judíoshajxy tiägøøyy yaaxpä jojpä, ja'a hajxy hñanjty ca'a mábøjpä:

—Ja'a Pablohajxy, cajptyajma'pä hajxy jaduñ wiädity homiaajä. Tøø hajxy yaa miejtspä. ⁷Jim hajxy miejtsa'agy maa ja'a Jasón ja'a tiøjcän, paadiä Jasón ja'a pojpä miøødäbä. Homiaajä Pablohajxy jaduñ wiädity, jaduñä cu'ug hajxy jiojcapxø'øy coo ja'a gobiernä miädia'agy hajxy quia'a mábøjcänät, ja'a jim møjhajpä Roma. Jaduñä Pablohajxy yhøñdaacpä cooc tyijy ja'a Jesús jaduñ miøjhajpä nebiä gobiernän —nømä judíoshajxy miänaañ, ja'a hajxy hñanjty ca'a mábøjpä.

⁸Coo ja'a cu'ughajxy jaduñ miädooyy møødä møjhajpähajxy, mänit hajxy tiägøøyy yaaxpä

waambä. ⁹Mänitä Jasónhajxy ñiñähjuudiuutä møødä mábøjpädøjc-hajxy, ja'a hajxy hñanjty tøø miächijäbä. Mänit hajxy yhøxmájtsänä.

¹⁰Coo quioodsøyy, mänitä Pablohajxy ñämaayyä møødä Silas coo hajxy jim choonät, coo hajxy ñøcxät jim maa ja'a cajpt hñanjty xiøhatiän Berea. Ja'a mábøjpädøjc-hajxy jaduñ mänaañ. Mänitä Pablohajxy jim jiaanç nøcxy Berea. Coo hajxy jim miejch, mänit hajxy ñøcxy maa ja'a judíos chajtøjc-hajxiän.

¹¹Mänitä Diosmädia'agy hajxy tiägøøyy yajnähiøøbiä. Coo ja'a judíoshajxy jaduñ miädooyy, mänit hajxy jaduñ jiootcugøøyy. Cab hajxy jaduñ jiootma'ty nebiä miäjjudíoshajxy hñanjty tøø jiootma'adiän jim Tesalónica. Mänitä Diosmädia'agy hajxy tiägøøyy capxtaacpä jabom-jabom pø jaanç tøyhajt hñanjty jaduñ nebiä Pablo hajxy hñanjty miädia'aguiän. ¹²Paady hajxy jaduñ may miäbøjcy. Møødä jäya'ayhajxy may miäbøjpä, ja'a hajxy hñanjty ca'a judíospä, møødä møjhajpädøjc-hajxy, ya'adiøjc-hajxy møødä to'oxiøjc-hajxy. ¹³Ja'a jäya'ayhajxy hñanjty jim tsänaabiä Tesalónica, ja'a hajxy judíospä, coo hajxy jaduñ miädoyhajty coo ja'a Pablo ja'a Diosmädia'agy hñanjty jim yajwa'xy Berea, mänit hajxy jiootma'ty. Mänitä jäya'ayhajxy Beréabä hoy jiojcapxø'øyii coo ja'a Pablo ja'a miädia'agy quia'a mábøjcäxät. ¹⁴Ja'a jäya'ayä Diosmädia'agy hajxy hñanjty mábøjpä jim Berea, mänit hajxy

miänaaŋ coo ja'a Pablo jim chóonät, coo wiingtuum ñócxät mejypia'a. Paady hajxy jaduhñ miänaaŋ je'eguiøxpä coo hajxy hänäjty chähgø'oy coo ja'a Pablo cøxypänejpä tiunóøjät. Coo ja'a Pablo jim jiaančh tsohñ Berea, jimä Silashajxy miähmøøyy møødä Timoteo. ¹⁵Yajmøødquejxä ja'a Pablo ja'a mäbøjpädøjc nämetsc nädägøøg. Coo ja'a Pablohajxy jim miejch mejypia'a, mänit hajxy biarcotägøøyy. Mänit hajxy ñøcxy barcojooty maa ja'a cajpt hänäjty xiøhatiän Atenas. Coo hajxy jim miejch, mänitä Pablo jiamiøødhajxy wyiimbijnä. Mänitä Pablo capxy jim quiejxy Berea coo ja'a Silashajxy jim paquiä ñócxpät Atenas møødä Timoteo, coo ja'a Pablo hajxy jim piáadät.

¹⁶Jimä Pablo ja'a Silas hänäjty yhahixy Atenas møødä Timoteo, mänitä Pablo yhijsy coo tsaasaandä hänäjty jim jiaančh tehñ miayyä cajptooty. Je'e ja'a cu'ughajxy hänäjty wyiingudsähgøøby. Coo ja'a Pablo jaduhñ yhijsy, mänit jiaančh tehñ jootmayhajty. ¹⁷Naxiä Pablo hänäjty jim ñøcxy maa ja'a judíos chajtøjc-hajxiän. Ja'a Jesucristocøxpä ja'a Pablo hänäjty jim yajcapxy yajmädia'aguiø'oy møødä judíoshajxy, møødä jäya'ayhajxy ca'a judíospä, ja'a Dios hajxy hänäjty wiingudsähgøøbiä. Jabom-jabomä Pablo hänäjty jim ñøcxy cajptcujc. Møød jimä Pablo ja'a Jesucristocøxpä hänäjty yajcapxy yajmädia'aguiøøbiä møødä cu'ug, ja'a hajxy hänäjty jim yohby najxpä. ¹⁸Mänitä jäya'ayä Pablo hajxy näje'e

wyiingumedsøøyy. Cujwa'xy hajxy hänäjty yhabøcy ja'a epicureodøjcä miädia'agy. Møød kujwa'xy hajxy hänäjty yhabøjpä ja'a estoicodøjcä miädia'agy. Mänit hajxy näje'e miänaaŋ:

—Yø'ø craa, jaančh tehñ yajcumayaamb yø'øduhñ cooc tyijy jiaančh tehñ yhøxpøquiä. Pero cap yø'øduhñ tii ñä'ägädä jaty —nømä Pablo jaduhñ ñänøømä.

Mänitä wiinghäna'c-hajxy miänaaŋ:

—Jäguem yø'ø craa chooñ. Wiingdiosäda'a miädiaacyy.

Paady hajxy jaduhñ miänaaŋ, je'eguiøxpä coo ja'a Pablo ja'a Jesucristo hänäjty miädia'agy, cooc hajxy hoy xñähho'túutäm, møød cooc jadähooc jiuypiojtägajch. ¹⁹Mänitä Pablo jim wioonøcxä maa ja'a tunhuung hänäjty xiøhatiän Areópago. Jimä jäya'ayhajxy hänäjty may tøø yhamugø'oy. Mänitä Pablo ñämaayyä:

—Højts hawáanäc tii miich jaduhñ mmädiaacyy hawiinjemybiä.

²⁰Jaančh tehñ wyiing miich jaduhñ mmädia'agy. Højts capxwíjjäc neby jaduhñ miädia'agytiägø'oyän —nømä Pablo miäyajtøøwä.

²¹Hix, ja'a jäya'ayhajxy hänäjty jim tsänaabiä Atenas, møødä jäya'ayhajxy hänäjty jim hadsänaabiä, jaduhñ hajxy hänäjty quiuhdujthaty coo hajxy hänäjty cøxiä wiinä miädowa'añ, ja'a hänäjty hawiinjemybiä.

²²Mänitä Pablo tiänaayyø'cy cu'ughagujc. Mänit miänaaŋ:

—Mägu'ughajpädøjc, mijts yaa tsänaabiä Atenas, tøøch jaduhñ nhixy coo mijtsä tsaasaandä

madiu'u mwiingudsähgø'øy.

²³Mayhitä wiingudsähgøødiaact hajxy mmøødä. Tøøchä altar tu'ug nhixy coo letra jaduñ yuugjaay miøødä: "Jii ja'a Diosäda'a tu'ug, cahnä pøn yhixyñä. Je'e yhaltar hädaa." Hoorä, mwiingudsähgøøby yø'ø Dios hajxy jaduñ, hoy hajxy mga'a jagä hixyhatyñä. Pues je'ečh mijts jaduñ nyajmøødmädiaacypy.

²⁴Ja'a Dióshøch jaduñ nmädiaacypiä, cøxiä je'e yhädiuñ møød hädaa yaabä naaxwiimbä, møød tijaty yaa hijp. Wiindsøn hajp je'e jim tsajpootyp møød hädaa yaabä naaxwiin. Cøxiä wiinä jaduñ yhane'emy homiaajä. Cab jaduñ jiiby chäna'ay tsajtøgooty, ja'a jäya'ayhajxy jaduñ yhädiuumbiä. ²⁵Cabä Dios tii yajmaajaty. Cab jaduñ miäna'añ coo højts nbuhbéjtämät. Pero jaaya'ay hajxy cøxiä xmióoyyäm tijaty hajxy nyajmaajíjtäm, møødä jogyhajt, møødä poj, cøxiä.

²⁶Tu'ug jäya'ay ja'a Dios jecy yhädiuundsohñ. Je'e hajxy nägøxiä nhøjxhíjtäm ndecyhíjtäm mäduhñtiä hajxy yaa ndsänáyyäm hädaa yaabä naaxwiin wiinduhmyhagajpt. Cahnä Dios hajxy hänajty xyhädiuunäm, tøøyyäm hajxy hänajty xyajnähdíjjäm mänaa hajxy nmiin ngáhwämät, maa hajxy ndsánaayy nhäyóowämät.

²⁷Chojpiä Dios ja'a jioot jaduñ coo hajxy nwiingudsähgøøyyämät, paady hajxy tøø xyhädiuunäm. Coo ja'a Dios hajxy hamuumdu'joot nba'yáaxämät, xyhadsóowäm hajxy jaduñ. ²⁸Hix, jaaya'ay hajxy xyagjyghíjtäm. Jaduñ hajxy tøø

xquiunúu'xäm coo hajxy ndsánaayy nhäyóowämät, møød coo hajxy nyohy nnáxxämät. Jaduñä yaabä jäya'ayhajxy näje'e tøø quiujaay coogä Dios hajxy xyhuunghíjtäm.

²⁹Tøyhajt jaduñ coo ja'a Dios hajxy xyhuunghíjtäm. Pero coo jäya'ayä jäya'ayhahädiuunnaxy hajxy yhädiuñ, jue'e hajxy yajtuumbi, oro, møødä poobhoro, møødä tsaa. Cab jaduñ yhahixø'øy coo jaduñbä jäya'ayhahädiuunnaxy hajxy nwiingudsähgøøyyämät. Hix, ca'a Dyiosä je'e jaduñ.

³⁰Jegyhajty, cabä jäya'ayhajxy hijty näjuø'øy pø jii Dios. Y cabä Dios hijty miøjpäda'agy coo hijty quia'a wiingudsähgø'øyii. Pero jäda'ahaty, tøø ja'a Dios hajxy xyhanéhmäm coo ja'a nhaxøøgcuhdujt hajxy nägøxiä nnajtshixøøyyämät, mäduhñtiä hajxy yaa ndsänáyyäm hädaa yaabä naaxwiin. ³¹Hix, tøø ja'a Dios wyiinmay coo hajxy nägøxiä xyajtøyhajtyegáañäm. Jaanä jaduñ tøø wyiinmaabiä mänaa hajxy jaduñ xyajtøyhajtyegáañäm. Tøø ja'a Dios tu'jäya'ay yajnähdijy coo hajxy mänitxøøbä xyajcueendäyegáañäm. Coo tu'jäya'ay jaduñ yho'cy, mäniitä Dios jaaya'ay yagjuypiøjtägajch jadähooc. Coo jaaya'ay jaduñ jiaanč juypiøjtägajch, jaduñä tøyhajt hajxy nmøødhíjtäm coo jaaya'ay hajxy tøyhajt xyajcueendäyegáañäm mänitxøøbä —nømä Pablo miänaañ.

³²Coo ja'a cu'ughajxy jaduñ miädooyy coo ja'a Pablo jaduñ miänaañ cooc tu'jäya'ay hänajty tøø jiiuypiøjtägach, ja'a hänajty

tøø yh'oguiäbä, mänitä Pablo hajxy näje'e näxiicy. Mänit wiinghäna'c-hajxy näje'e miänaaň:

—Mmínäp yaa jadähooc. Njaac mädownaamby højts jaduhñ nej mii'ch mmädia'aguiän —nømä Pablo ñämaayyä.

³³Mänitä Pablo wyiimbijnä.

³⁴Näje'e jäya'ayä Pablo hajxy pianøcxy. Miäböjc hajxy jaduhñ. Tu'jäya'ay hänajty xiøhaty Dionisio. Møjhajp hänajty je'e jim maa ja'a Areópagon. Jaaná jaduhñä to'oxiøjc tu'ug miäböjpä. Dámaris hänajty xiøhaty. Nämay hajxy jaduhñ miäböjcy.

18 Mänitä Pablo jim chohñ Atenas. Mänit wiingtuum ñøcxy maa ja'a cajpt hänajty xiøhatiän Corinto. ²Jimä Pablo ja'a judío tu'ug miøodnibiaatä. Jue'e ja'a judío hänajty xiøhaty Aquila. Jim hänajty chooň maa ja'a naax hänajty xiøhatiän Ponto. Jue'e tio'oxiøjc hänajty xiøhaty Priscila. Naam mech hajxy hänajty jim Corinto. Jim hajxy hänajty tøø chohñda'agy maa ja'a naax hänajty xiøhatiän Italia. Paady hajxy jim chohñ Italia, je'eguiøxpä coo ja'a gobiernä Claudio hänajty tøø yhane'emy coo ja'a judíoshajxy jim quiøxy tsóonät Roma. Mänitä Pablo jim ñøcxy cuhixpä maa ja'a Aquilahajxy hänajty yhahäña'ayän. ³Jue'e Aquilahajxy hänajty tiuunghajpy, loondøy hajxy hänajty yhädiuumby. Y ja'a Pablo, jaaná jaduhñ hänajty tiuungmøødäbä. Paadiä Aquila ja'a Pablo ñämaayy coo ja'a Pablo jim miøødtúnät. Mänitä Pablo jim miähmøøñä. ⁴Wiindu'ugäsábado

ja'a Pablo hänajty jim ñøcxy maa ja'a judíos chajtøjc-hajxiän. Jiibiä Pablo ja'a Diosmädia'agy hänajty yajwiingapxø'øy ja'a Jesucristocøxpä, weenä jäya'ayhajxy jaduhñ miäböcy, møødä judíoshajxy, møødä ca'a judíoshajxypä.

⁵Mänitä Silashajxy jim miejch Corinto møødä Timoteo. Macedonia hajxy hänajty tøø chohñda'agy. Mänitä Pablo jaduhñ wyiinmaayy coo tu'tu'uyyä hänajty tiunaannä, coo ja'a Diosmädia'agyhajtä hänajty miäwäditaannä. Mänitä Pablo ja'a judíos tiägøyy yajmøødmäiaacpä coogä Jesús hänajty ja'a Mesías, ja'a Dios hänajty jecy tøø yajnähdfjiäbä coo hänajty quiexa'añ yajnähwaatspä.

⁶Mänitä judíoshajxy jiootma'ty. Mänit hajxy miänaaň cooc tyijy ja'a Pablo hänajty yhøhñda'agy. Mänitä Pablo ja'a wyit wyiinxiyty. Jaduhñä hijxtahñd yejcy coo ja'a judíos wyiinmahñdyhajxy hänajty quia'a hoyyä. Mänitä Pablo miänaaň:

—Hamsooyyä pojpä hajxy jaduhñ mmøødä coo hajxy jaduhñ mga'a nähwa'adsa'añ. Paady hajxy jaduhñ mga'a nähwa'adsa'añ coo haxøøgwiinmahñdy hajxy mmøødä. Ca'a yhøøchä pojpä jaduhñ nmøød coo hajxy mga'a nähwa'adsa'añ. Cábøch mijtsä Diosmädia'agy nyajwiingapxø'øwaannä.

Ja'a jäya'ayhajxy ca'a judíospä, je'e'ch hajxy jaduhñ nyajwiingapxø'øwáannäp —nømä Pablo ja'a judíos ñämaayy.

⁷Mänitä Pablo chajtøjpdäsøømy. Mänit jim ñøcxy maa ja'a craa Ticio Justo tiøjcän, jim tsajtøjnähmøjc. Wyiingudsähgøøbiä Ticio Justo ja'a

Dios hänajty, hoy hänajty je'e quia'la jagä judfosä. ⁸Jimä jäya'ay hänajty tu'ug xiøhaty Crispo. Jue'e hänajty tiuumby tsajtøjwiindsøn. Mänitä Crispo ja'a Diosmädia'agy hajxy miäbøjcy nägøxiä, mөөdä yhuung mөөdä tio'oxy. Nämäyyä jäya'ayä Diosmädia'agy hajxy miäbøjpä, ja'a hajxy hänajty jim tsänaabiä Corinto. Mänit hajxy hoy näbety. ⁹Mänitä Pablo ja'a Jesucristo wyiinhihxy coods. Mänitä Jesucristo miänaañ:

—Ca'a pøn mdsähgø'oy. Hөөчһ nmädia'agy tehngajnä yajwá'xäc. Caj mhamónät. ¹⁰Hөөчһ miich ngüeendähajpy. Caj miich pøn nej xtiuna'añ. Hiḅ, nämáyhöčhä jäya'ay ja'a ngapxy ja'a nmädia'agy hajxy yaa xmiäbøjcä maa hädaa cajptän —nømä Pablo nämaayyä.

¹¹Tu'jomøjtä cupcä Pablo jim yhihxy Corinto. Jue'e ja'a Pablo hänajty jaduhñ näl'ägädä tuunghajpy, ja'a Diosmädia'agy-yajwa'xyiibä.

¹²Pero coo ja'a craa Galiön jim tiägøøyy tuumbä gobernador maa ja'a naax hänajty xiøhatiän Acaya, mänitä judíos ja'a Pablo hajxy tiägøøyy mädsibøøbiä. Mänit hajxy jim yajnøcxy hagujc maa ja'a Galiön hänajty tiuñän. ¹³Mänitä judíos ja'a Galiön hajxy nämaayy:

—Jue'e hädaa craa jiatcø'oy, jiojcapxøøby hädaa craa ja'a cu'ug coo højts nguhdujt hajxy xquia'a yajtuunät neby højtsä Dios nwiingudsähgø'øyän. Wiingwiinmahñdy jaduhñ yajnähihøøby coo højtsä Dios wiing nwiingudsähgø'øwät —nømä Pablo nähwaambejtä.

¹⁴Coo ja'a Pablo hänajty yhadsowa'añ, mänitä Galiön yaghadsowøøyy:

—Coo hädaa craa häxøpy tөө quiädieey, mänitøch mijtsä mmädia'agy häxøpy nmädowaanä. ¹⁵Pero ja'a mhamdsoo cuhdujt hajxy jaduhñ myajtsibøøby. Ja'a mhamdsoo mädia'agy hajxy jaduhñ myajcapxiøøby pøn jaduhñ xøhajp ja'a Mesías. Hamdsoo mijts myajtødiägø'øwät. Cábøch jaduhmbä nmädowa'añ —nømä judiøshajxy yhojjä.

¹⁶Mänitä Galiön ja'a judíos yhöxquejxy maa ja'a hagujtøjcän. ¹⁷Jimä jäya'ay hänajty tu'ug xiøhaty Sóstenes. Copc-hajp hänajty je'e maa ja'a judíos chajtøjc-hajxiän. Mänitä cu'ugä Sóstenes hajxy miajch. Mänit hajxy jim yajnøcxy hagujc. Mänit hajxy jim quioxho'cy. Pero cabä Galiön jaduhñ miøjpädaacy.

¹⁸Y ja'a Pablo, maxiøø je'e jim jiaag hijty Corinto. Mänitä Pablo ja'a mäbøjpädøjc nämaayy coo hänajty jim choonaanä. Jim hänajty ñøcxa'añ Siria barcojooty näguipxy mөөdä Priscila mөөdä Aquila. Cahnä hajxy hänajty jim biarcotägø'øy Cencrea, mänitä Pablo cuhdøø'x yajcuhme'xy. Paady jaduhñ yajcuhme'xy coo ja'a Dios hänajty cøxiä wiinä tөө miäyujwa'añ. Mänitä Pablohajxy tiu'ubøjnä barcojooty. ¹⁹Mänit hajxy meyhawiimb näjxy. Mänit hajxy jim miejch maa ja'a cajpt hänajty xiøhatiän Efeso. Jimä Pablohajxy ñibiuhyohdiúutänä mөөdä Priscila mөөdä Aquila. Mänitä Pablo jim ñøcxy nidiuhm maa ja'a judíos chajtøjc-hajxiän. Mänitä Pablo ja'a judíos tiägøøyy mөөdmädiaacpä. ²⁰Mänitä judiøshajxy jia mänaañ

coo ja'a Pablo jim jecy yhidät. Pero cabä Pablo jaduñ miänaañ. ²¹Mänit miänaañ: "Nøcxáambøch cham Jerusalén xøøhajpä. Pero coo ja'a Dios jaduñ miäná'anät, mänitøch yaa nmiindägátsät maa mijtsän."

Coo ja'a Pablo jaduñ quiapxpädøøyy, mänit jadähooc biarcotägøøguiumbä. Mänit jim chohñ Efeso. ²²Mänit jim nøcxy barcojooty maa ja'a cajpt hänäjty xiøhatiän Cesarea. Coo jim miejch, mänit biarcopädsøømy. Mänit nøcxy Jerusalén. Coo jim quioo'ty, mänitä mäbøjpädøjc-hajxy hoy quihixy. Mänitä Pablo jim nøcxy Antioquía. ²³Maxiøø jim yhiyty. Mänit jim tiu'ubøjcumbä. Mänit jim nøcxy maa ja'a naax hänäjty xiøhatiän Galacia møød jim Frigia. Majatiä Pablo hänäjty wiädity, jimä mäbøjpädøjc-hajxy hänäjty quiapxmøcpøgyii nebiä Diosmädia'agy hajxy jaduñ hoy yajnøcxät.

²⁴Mänitä judíos jim tu'ug miejch Efeso. Apolos hänäjty xiøhaty. Jue'e hänäjty choñ Alejandría maa ja'a naax hänäjty xiøhatiän Egipto. Jøjwidsø'ø hänäjty quiapxy miädia'agy. Ca'xiä Diosmädia'agy hänäjty jiaanč tehñ jiaty. ²⁵Tøø ja'a Diostu'u hänäjty jaduñ hoy yhabøcy. Hamuumdu'joot hänäjty yajnähixø'øy ja'a Jesúsøxpä, neby hänäjty tøø jiaty tøø yhabetiän. Ñajuøøbiä Apolos hänäjty jaduñ coo ja'a Juan hänäjty tøø miäyajnäbety. Pero cahnä Apolos hänäjty miädoyhatyñä coo ja'a mäbøjpädøjc-hajxy hänäjty ñäbejnä ja'a Jesucristocøxpä. ²⁶Mänitä

Apolos jim nøcxy maa ja'a judíos chajtøjc-hajxiän. Mänitä Apolos ja'a Diosmädia'agy tiägøøyy yajwiingapx yajwiinmädiaagøøbiä. Møcjoot hänäjty miøød.

Jimä Priscilahajxy hänäjty yhamädoowhity tsajtøgooty møødä Aquila. Coo ja'a Apolos jaduñ miädiaacpädøøyy, mänitä Priscila ja'a Apolos hajxy hawiing wioonøcxy. Mänitä Apolos hajxy ca'xy yajmøødmädiaacy nebiä Apolos ja'a Diosmädia'agy jaduñ maas hoy yajnøcxät. ²⁷Mänitä Apolos miänaañ coo hänäjty jim nøcxa'añ Acaya. Mänitä mäbøjpädøjc-hajxy jaduñ piamänaañ coo ja'a Apolos jim nøcxät. Mänitä mäbøjpädøjc nocy hajxy yhädiuun coo ja'a Apolos jim piuhbedøøjät Acaya. Ja'a mäbøjpädøjc-hajxy hänäjty jim hijpä Acaya, je'edsä Apolos hajxy puhbédäp. Mänitä Apolos jim chohñ Efeso. Mänit jim nøcxy Acaya. Coo jim miejch, mänitä mäbøjpädøjcä Apolos hajxy piuhbejty nägø'ø nädecypä. Paady hajxy hänäjty tøø miäbøcy ja'a Jesucristocøxpä, je'eguiøxpä coo ja'a Dios hojiot jiaanč tehñ miøødä. ²⁸Majatiä Apolos ja'a judíos ja'a Diosmädia'agy hänäjty miøødyajcapxiø'øy cu'ughagujc, cabä judíoshajxy hänäjty yajmäjäda'agyii. Jaduñä Apolos yajnähixø'øy coogä Jesús hänäjty je'e Miesíasä, ja'a Dios hänäjty jecy tøø yajnähdñjiäbä coo hänäjty yaa quixa'añ hädaa yaabä naaxwiin. Jaduñä Apolos hänäjty yajnähixøøbiä coo jaduñ jim myiñ cujaay maa ja'a Diosmädia'aguiän

coo ja'a Dios jaduhñ jecy tøø miäna'añ coogä Mesías hänajty yaa quixa'añ.

19 Jimä Apolos hänajty yhitynä Corinto, mänitä Pablo jim chohñ Antioquía. Mänit jim ñaxøøyy tunjoot. Mänit jim miejch Efeso. Jimä Pablo ja'a mabøjpädøjc may piaaty. ²Mänitä Pablo miänaañ:

—Mänaa mijtsä Diosmädia'agy mmäbøquiän, nej, mänitiä ja'a Dioshespíritu hajxy xquiorazóngtägøøyyä —nømä mabøjpädøjc-hajxy miäyajtøøwä.

Mänit hajxy yhadsooyy:

—Tii jaduhñ mnänøømby ja'a Dioshespíritu. Cahnä højts jaduhñ nmädoyhatyñä.

³Mänitä Pablo miänáangumbä:

—Mänaa mijts mnäbetiän, pønä quiuhdujt hajxy myajtuunä.

Mänit hajxy yhadsooyy:

—Ja'a Juan quiuhdujt højts nyajtuunä.

⁴Mänitä Pablo jiaac

mänáangumbä:

—Jue'e ja'a Juan hänajty yajnäbejpy, pønjatiä yhaxøøgwiinmahñdy hänajty tøø ñajtshixø'øy. Jaduhñä Juan hänajty yajnähixøøbiä coo ja'a Jesús ja'a miädia'agy miäbøjcäxät, ja'a hänajty jaac medsaambä —nømä Pablo ja'a mabøjpädøjc ñämaayy.

⁵Coo hajxy jaduhñ miädooyy, mänit hajxy hoy ñäbety ja'a Jesucristocøxpä. ⁶Mänitä Pablo ja'a mabøjpädøjc tiägøøyy cø'øghxajpä hanidiuhmjaty. Mänitä Dioshespíritu hajxy ñähgädaacä. Mänit hajxy tiägøøyy capxpä wiinghayuuc-haamby. Mänitä Dios

ja'a miädia'agy hajxy tiägøøyyä najtsapxøøyyäbä. ⁷Nämajmetscä mabøjpädøjc-hajxy hänajty.

⁸⁻⁹Mänitä Pablo tiägøøyy nøcxpä maa ja'a judíos chajtøjc-hajxiän jim Efeso. Sábadohaam hänajty ñøcxy. Mänitä Pablo ja'a judíos ja'a Diosmädia'agy tiägøøyy yajwiingapx yajwiinmädiaagøøbiä nebiatiä Dios yhane'emiän. Møcjootä Pablo miøødhajt. Jia wi'i yajmäbøgaambiä Pablo ja'a judíos hänajty. Jia mabøjc hajxy jaduhñ näje'e. Pero cab hajxy nägøxiä miäbøjcy. Ja'a hajxy hänajty ca'a mabøjpä, mänit hajxy haxøøgjaty ñä'ägä mänaannä jäya'ayhagujc. Haxøøgä Diostu'u hajxy piädaacnä. Mänitä Pablo wyiinmaayy coo hänajty jim quia'a nøcxaannä maa ja'a judíos chajtøjc-hajxiän. Tägøøgpø'o hänajty tøø yhabety coo ja'a Pablo jim tiägøøyy nøcxpä. Coo ja'a Pablo jim chohñ, mänitä Pablo ja'a mabøjpädøjc jiaac møødnøcxy. Mänit hajxy tiägøøyy hamugøøbiä maa ja'a Tirano tiøjcän. Hamøj ja'a Tirano tiøjc hänajty. Jabom-jabomä Pablohajxy hänajty jim ñøcxy capxpä mädiaacpä. ¹⁰Mejtsjomøjtä Pablo jim jiaac yajnähixøøyy. Nämayyä jäya'ayä Diosmädia'agy hajxy jaduhñ jim miädooyy maa ja'a naax hänajty xiøhatiän Asia, wiinduhmyhagajpt, møødä judioshajxy, møød hajxy hänajty ca'a judiospä. ¹¹Madiu'ujä Pablo pa'am jim yajnajxy ja'a Dios miäjaahaam. Hoy-yagjuøøñajatiä Pablo jaduhñ tiuun. ¹²Coo ja'a Pablo wyit hänajty ñähdóonäxä, høxtä najxpä pia'amhajxy hänajty, høxtä nähwäätsäp ja'a haxøøgpøj hajxy hänajty.

¹³Jimä judíoshajxy hánajty näje'e wiädity. Jáya'ay hajxy hánajty yajnähwaachp, ja'a hajxy hánajty haxøøgpjømøødpä. Coö ja'a judíoshajxy jaduhñ miädooyy cooc ja'a Pablo jáya'ay haxøøgpj hánajty yajnähwa'ačh ja'a Jesús miäjaagøxpä, mänit hajxy wyiinmaadiaacy coö ja'a Pablo hajxy hánajty jaduhñ piahixaambä. Mänitä haxøøgpj hajxy tiägøøyy nämäabiä:

—Ja'a Jesús miäjaagøxpä, ja'a Pablo näxy miädiaacypiä, jaduhñ miich nhane'emy coö miich jiiby mjøwá'adsät.

¹⁴⁻¹⁵Jaduhñä Esceva yhuunghajxy hánajty jiatcøøbiä, ja'a hajxy hánajty näjuxtupä. Teedywiindsønä Esceva hánajty tiuumby maa ja'a judíos chajtøjc-hajxiän. Mänitä jáya'ay hajxy tu'ug piaaty. Haxøøgpj hánajty miøød. Mänitä haxøøgpj hajxy ñämaayy:

—Ja'a Jesús miäjaagøxpä miich nhane'emy coö miich jiiby mjøwá'adsät.

Mänitä haxøøgpj yhadsooyy:

—Nhíxyhøčhä Jesús.

Nnajuøøbiøch pøn je'e ja'a Pablo. Pero mijts, caj mijts nhixiä — jaduhñä Esceva yhuunghajxy yhadsoowä.

¹⁶Mänit hajxy hoyhoy quioxho'cä. Ja'a craa jaduhñ jatcøøyy, ja'a haxøøgpj hánajty møødpä. Hoyhoy hajxy jaduhñ chaačhøøyy. Nähwa'ads høxwa'ads hajxy jaduhñ piädaacä. Mänit hajxy jiiby yhøxpäbooyy maa craa tiøjcän. ¹⁷Mänitä mädia'agy jim wiädijty Efeso nebiä Esceva

yhuunghajxy jiajty yhabejty. Nägøxiä jáya'ayhajxy jaduhñ miädooyhajty, møødä judíoshajxy, møødä ca'a judíoshajxypä. Jaančh tehñ chähgøøyy ja'a cu'ughajxy jaduhñ. Mänitä Jesús hajxy tiägøøyy wiingudsähgøøbiä nägø'ø nädecypiä, ja'a hajxy nWiindsøn'hájtämbä.

¹⁸Mänitä mæbøjpädøjc-hajxy nämay hoy ñägäpaxxy cu'ughagujc nebiaty hajxy hánajty haxøøg tøø jäya'ayhaty. ¹⁹Ja'a jáya'ayhajxy hánajty tøø tiúnäbä magiahaam, mänitä magianocy hajxy quiøxy yajmejch. Mänit hajxy quiøxy no'cy hijxwiinduum. Jue'egä noquiäda'a hánajty tøø choobaady juxychägüi'xmajcmil. ²⁰Coö ja'a ñocy hajxy jaduhñ ño'cy, jaduhñä hijxtahnd hajxy yejcy coö ja'a Diosmädia'agy hajxy hánajty hoy tøø miäböcy. Tehngajnä ja'a Diosmädia'agy hajxy jim jiaac yajwa'xy wiinduhmyhagajpt.

²¹Mänitä Pablo wyiinmaadiaacy coö hánajty jim nøcxy wiädita'añ Macedonia møød jim Acaya. Coö hánajty jim tøø quiøxy wädity, mänit hánajty jim ñøcxa'añ Jerusalén. Mänit miänaañ: —Coočh hánajty tøø nhoy Jerusalén, mänitøch jim nnøcxa'añ Roma.

²²Jimä Pablo jiamioød hánajty miøødä nämetsc, ja'a Timoteo møødä Erasto. Mänit ja'a Pablo ja'a jiamioød jim quiejxø'cy Macedonia. Haa ja'a Pablo, maxiøø jim jiaag hijty Asia.

²³Mänitä jáya'ayä tsip hajxy näje'e jim yajpädø'cy Efeso. Paady hajxy jaduhñ yajpädø'cy je'egüiøxpä

coo ja'a Diosmädia'agy hajxy
 hänajty quia'a tsocy. ²⁴Jimä jäya'ay
 hänajty tu'ug xiøhatty Demetrio.
 Saandätøjc-hahädiuunnaxiä Demetrio
 hänajty yhädiuumby poobhorohaam
 maa ja'a saandä hänajty yhtiän, ja'a
 xøhajpä Artemisa. Mayyä Demetrio
 moonsä hänajty miøødä. Jaančh tehñ
 quianarhajp hajxy hänajty jaduhñ coo
 ja'a saandätøjc-hahädiuunnaxy hajxy
 hänajty tioogy. ²⁵Mänitä Demetrio ja'a
 mioonsä miøødhamugøøyy nägøxiä
 møød pønjaty hänajty hawiing
 saandähädiuumbä. Mänitä Demetrio
 miänaañ:

—Mägu'ughajpädøjc, coo
 hädaaduhmbä tuung hajxy
 nduunäm, paady hajxy njaančh tehñ
 quianarhajtäm. Tøyhajt jaduhñ. ²⁶Tøø
 hajxy mhixy, tøø hajxy mmädoy
 coo ja'a Pablo jii wiädity, coo jii
 quiapxy coo jii miädia'agy cooc tyijy
 højtsä nsaandä quia'a jújquiam. Tøø
 jäya'ayhajxy may miäböcy; ca'a yaayyä
 Efeso, pero cøxiä wiinduhmyhagajpt
 yaa Asianaaxooty. ²⁷Coo jäya'ayhajxy
 maas may jiaac mäböğät, cab
 hajxy majiaty nganarhajtänät.
 Y cabä jäya'ayä nsaandähajxy
 xwyiingudsähgø'owäänänä, ni
 ja'a saandätøjc maa yhtiän.
 Jiahdägoyyaamby hajxy jaduhñän.
 Wiinduhmyhagajptä saandä Artemisa
 wyiingudsähgø'oyii yaa Asianaaxooty
 møød jäguembaady.

²⁸Coo ja'a jäya'ayhajxy jaduhñ
 miädooyy, mänit hajxy jiootma'ty.
 Mänit hajxy tiägøøyy yaaxpä jojpä.

—iViva Artemisa, viva! Højtsä
 Artemisa yaa nsaandähajtäm yaa
 Efeso.

²⁹Coo ja'a cu'ughajxy jaduhñ
 miädooyy coo ja'a Demetrio

mioonsähajxy hänajty jaduhñ wyi'i
 ya'axy wyi'i jiocy cajptooty, mänitä
 cu'ughajxy tiägøøyy haamhajpä.
 Jimä Pablohajxy hänajty wiädity
 cajptooty. Jue'e ja'a jiamiøødhajxy
 hänajty xiøhatty, Gayo møød
 Aristarco. Macedonia hajxy hänajty
 nämetsc chooñ. Mänitä Gayohajxy
 miajtsä møødä Aristarco. Ja'a
 cu'ughajxy jaduhñ mämajts. Mänitä
 Gayohajxy piawijtsä piäjägujčä
 maa ja'a hamugøødiaactän. Mänit
 hajxy jimä näxø'owøøyyä. ³⁰Haa
 ja'a Pablo, coo jaduhñ miädoyhajty
 coo ja'a jiamiøød jaduhñ miäjtsäxä,
 mänit jiiby jia wi'i tiägø'owaañ
 jäya'ayhagujc. Ja'a jiamiøød hänajty
 jia wi'i nähgapxtu'udaamby. Pero
 cabä mäböjpädøjcä Pablo hajxy
 jaduhñ quiejxy. ³¹Jimä Pablo
 ja'a miägu'ughajpähajxy näje'e
 miøjhatty Asia. Mänitä Pablo
 nocy yajnäguejčä coo jiiby quia'a
 tägø'owät jäya'ayhagujc. ³²Jaančh
 tehñ yaaxp jaančh tehñ jiojpa
 cu'ughajxy hänajty jimä maa
 hajxy hänajty tøø yhamugø'oyän.
 Wiingjaty hajxy hänajty ya'axy.
 Cab hajxy hänajty tu'cuhdujt
 ya'axy. Ni quia'a najuø'oy hajxy
 hänajty tii hajxy hänajty jaduhñ
 tøø nähhamugø'oy. ³³Jimä judíos
 hänajty tu'ug xiøhatty Alejandro.
 Mänitä Alejandro jaduhñ piajahmä
 jäya'ayhagujc. Ja'a miägunaaxhajxy
 jaduhñ näje'e jatcøøyy. Mänitä
 Alejandro yhawäänäxä tiiguiøxpä
 yøø jäya'ayhajxy hänajty
 jaduhñ coo wyi'i yhaamhatty.
 Mänitä Alejandro ja'a judíos jia
 nähgapxtu'udaañ jäya'ayhagujc.
³⁴Coo ja'a cu'ugä Alejandro
 hajxy jaduhñ yhøxcajpy coo

hänajty je'e juudíospä, mänit hajxy tiägøøguiumbä yaaxpä jojpä.

—iViva Artemisa, viva! Højtsä Artemisa yaa nsaandähájtäm yaa Efeso.

Mejtshora hajxy jaduhñ jiaac yaaxy jiaac jojcy.

³⁵Hobiä nejpiä ja'a secretario ja'a cu'ug yaghamooñ. Mänit miänaañ:

—Mägu'ughajpädøjc, mijts yaa tsänaabiä Efeso, jéquiänä tsa tu'ug quiahy tsajtwiing. Artemisa hajxy nyajxøhájtäm. Je'e hajxy yaa nwiingudsähgøøyyäm yaa Efeso. Tøø ja'a tiøjc hajxy jaduhñ nhädiúunäm coo jaduhñ jiiby yhidät jiiby tiøgooty. Højtsä cuhdujt jaduhñ nmøød'ájtäm coo højtsä Artemisa ngüeendähájtäm.

³⁶Tøyhajt jaduhñ. Hopiønä jaduhñ miäna'añ. Hoorä, huuc tunä mayhajt hajxy. Huuc hamón hajxy. Hoy hajxy jaduhñ mhuuc tehñ tiaj mhuuc tehñ miáyät jayøjp tii hajxy mdunaamby. ³⁷Hädaa mähdiøjc hajxy tøø mmáchäbä, cabä tii pojpä tii cädieey hajxy hädaa tøø tiuñ. Cabä Artemisa hajxy tøø miägapxtägoy, ni cab hajxy tii tøø mieech maa ja'a Artemisa tiøgootiän. ³⁸Pø tøø hädaa mähdiøjc-hajxy jaduhñ jiaançh cädieey nebiä Demetrioahajxy ñäxø'øwø'øyän, weenä Demetrioahajxy jim nøcxy ñäxø'øwø'øy maa ja'a hagujtøjcän. Jaduhñä cuhdujt ñä'ägä miñ. Paadiä cuduung yhuuc jimäbä. ³⁹Pø jimä tsip wiingpä hajxy jaduhñ mjaac møødä, mänit hajxy mnägápxät coo junta hänajty jiaac jada'añii. ⁴⁰Cab jaduhñ yhahixø'øy coo hajxy jaduhñ nwi'i yaamhájtäm nä'a

nägoobä, coo tsip hajxy jaduhñ nä'a nägoobä nyajpädø'cäm. Coo ja'a gobiernä Rómabä jaduhñ miädoyhädät neby hajxy jäda'a tøø njatcøøyyäm, wehñdä häyaa xñäxø'øwøøyyämät. Neby hajxy häyaa nnä'a hadsóowämät.

⁴¹Mänitä secretario quiapxpädøøñä. Mänit miänaañ coo ja'a jäya'ayhajxy wyiimbijnät.

20 Coo ja'a jäya'ayhajxy hänajty tøø mioon tøø tiujnä, mänitä Pablo ja'a mähøjpädøjc miøjyaaxy. Mänitä Pablo miägapxy yhanehmy. Mänit miänaañ coo hänajty jim wyiimbidaannä, møød coo hänajty jim ñøcxaannä Macedonia. ²Coo jim miejch, mänit jim tiägøøyy wädijpä cajpt-cajpt. Majaty hänajty wiädity, jimä mähøjpädøjc hänajty miägapxy yhane'emy. Mänitä Pablo jim chóhngumbä Macedonia. Mänit jim ñøcxy Grecia. ³Coo jim miejch, mänit jim yhiyty tægøøgpø'o. Coo hänajty jim choonángumbä, mänit hänajty jim ñøcxa'añ Siria barcojooty. Cahnä Pablo hänajty biarcotägø'øyñä, mänit miädoyhajty coogä judíoshajxy hänajty tøø quiojyquiapxytiuñ coogä Pablo hajxy hänajty miadsa'añ, nägøoyyäsä Pablo jiiby tiägø'øwät barcojooty. Mänitä Pablo wyiinmahñdyhajty coo hänajty quia'a tu'ubøgaannä barcojooty. Jaduhñ wyiinmahñdyhajnä coo jim ñøcxø'øwät Macedonia tecy-yo'oyhaam. ⁴Nämayyä Pablo miägu'ughajpähajxy jim miøødnøcxy Asia, møødä Timoteo, møødä Sópater, ja'a hänajty jim tsohmbä Berea, ja'a

Pirro yhuung, mөөдä Gayo, ja'a hänäjty jim̄ tsohm̄bä Derbe, mөөдä Aristarco, mөөдä Segundo, mөөдä Tíquico, mөөдä Trófimo. Tesalónica ja'a Aristarcohajxy hänäjty chooñ mөөдä Segundo. Asia ja'a Tíquicohajxy hänäjty chooñ mөөдä Trófimo. ⁵Coo ja'a Pablohajxy jim̄ miejch Filipos mөөдä jiamioөdhajxy, mänithöçhä Pablo jim̄ nbaattägajch, hөөçh Lucas. Hөөçh hädaa nocy jaduhñ nhädiuumby. Mänitä Pablo jiamioөdhajxy jim̄ ñöcxø'cy Troas. Jim̄ hөjts hänäjty xyhahixa'añ, hөөçh mөөдä Pablo. ⁶Paady hөjts jim̄ nmähmөөyy Filipos, coo ja'a judíos ja'a xiөshajxy hänäjty jiada'añii mänaa ja'a judíos ja'a tsajcaagy hajxy quiayyän, ja'a ca'a levadura mөөdpä. Coo ja'a xөө jaduhñ miaaayy, mänit hөjts jim̄ nbarcotägөөyy. Mänit hөjts jim̄ ndsohn̄nä Filipos barcojooty. Mägooxxөө hөjts mejjiooty nyohy. Mänit hөjts jim̄ nmejch Troas. Mänit hөjtsä Pablo ja'a jiamioөd jim̄ nbaattägajch, ja'a hөjts hänäjty jim̄ xyhahijxpä. Jim̄ hөjts njaac hijty juxtuxөө nägөxiä. ⁷Coo näxөө jaduhñ yhabaaty, mänit hөjts nhamugөөyy, hөjts mähөjpädөjc. Mänit hөjtsä Santa Cena nyagajtä. Mänit hөjtsä Pablo xtiägөөyy yajnähiхөөbiä. Jejcy jaduhñ miädiaacy je'eguiөxpä coo hänäjty cujaboom tiu'ubөgaannä. Cuptsuhmdä hänäjty төө jiaty, jim̄nä ja'a Pablo hänäjty miädia'agyñä. ⁸Maa hөjts hänäjty төө nhamugө'yän, nähbettөjtөгooty hänäjty jaduhñ jim̄. Jiibiä jөөн hänäjty may tioy.

⁹Jim̄ä hөxcujc-häna'c hänäjty tu'ug yhäña'ay ventanahaguuy nähbettөjñähgөxp ja'a miädägөgpisobä. Eutico ja'a craa hänäjty xiөhaty. Jim̄ Eutico ja'a Pablo hänäjty yhamädoowhity. Tөө ja'a Pablo hänäjty jejcy miädiaacnä. Mänitä Eutico jim̄ miaaho'cy maa hänäjty yhäña'ayän ventanahaguuy. Mänit jim̄ quiuhgahnajxy. Ho'ogy hoy wyidsø'cänä. ¹⁰Coo ja'a Pablo jaduhñ yhiyxy, mänit jiiby yhädaacy naaxyp maa ja'a Eutico hänäjty төө quia'ayän. Mänitä Pablo ja'a Eutico miäneenø'cy. Mänit hөjtsä Pablo xñämaayy:

—Ca'a hajxy mdsähgө'yө. Jujcyñä hädaa craa jaduhñ.

¹¹⁻¹²Jujcy ja'a craa jiaançh yajnөcxä maa ja'a tiөjcän. Mänitä mähөjpädөjc-hajxy jiaançh tehñ xioondaacy. Mänitä Pablo jim̄ ñөcxtägajch cөxp maa hänäjty yajnähiхө'yän. Mänitä Pablo ja'a tsajcaagy yajwa'xy. Mänit hөjts ngaayy nhuucy nägөxiä. Mänitä Pablo jiaac tägөөyy yajnähiхөөbiä. Jim̄ hөjts jaduhñ ngujöbөөyy. Mänitä Pablo miädiaacpädөөñä. Mänit jim̄ chohn̄nä Troas.

¹³⁻¹⁴Tөө hөjtsä Pablo hänäjty xñäma'ay cooc hänäjty tecy-yo'oyhaam ñөcxa'añ jim̄ maa ja'a cajpt hänäjty xiөhatiän Aso. Pero hөjts, barcojooty hөjts jim̄ nnөcxy, hөөçh Lucas mөөдä Pablo jiamioөdhajxy. Coo hөjts jim̄ nmejch Aso, mänitä Pablo jim̄ tiägөөbiä barcojooty. Mänit hөjts jim̄ ndu'ubөjcumbä Aso näguipxy mөөдä Pablo. Mänit hөjts jim̄ nägөxiä nnөcxy maa ja'a cajpt hänäjty xiөhatiän Mitilene. ¹⁵Coo

højts jim ndsóhngumbä, mänit højts
 cujaboom nnaxøøyy jim mädøyyä
 maa ja'a naax hänajty xiøhatiän
 Quío. Mänit højts jim cujaboom
 nmejch maa ja'a cajpt hänajty
 xiøhatiän Samos. Coö højts jim
 ndsóhngumbä, cujaboom højts jim
 nméjtscumbä maa ja'a cajpt hänajty
 xiøhatiän Mileto. ¹⁶Tøø ja'a Pablo
 hänajty wyiinmay coö hänajty jim
 quia'a näxø'owáangumbä Efeso.
 Hix, cabä Pablo hänajty jim jejcy
 wiädita'añ Asianaaxooty. Paady
 hänajty jim quia'a wädita'añ Asia
 coö hänajty jim ñøcxa'añ Jerusalén.
 Mobädajpä ja'a Pentecostésxøø
 hänajty jim jiada'añii. Paadiä
 Pablo hänajty yhadø'øch, jaduhñä
 Pentcostés-xøø mädøyyä piáadät.

¹⁷Jimnä højts hänajty nhityñä
 Mileto, mänitä Pablo capxy
 jim quiejxy Efeso coö ja'a
 tsajtøjwiindsøn'hajxy jim ñøcxät
 Mileto, ja'a hajxy hänajty jim
 tuumbä Efeso. ¹⁸Coö hajxy
 jim miejch Mileto, mänit hajxy
 ñämaayyä:

—Mänáajøch jim nhitiän
 maa mijtsän jim Asianaaxooty,
 jaançh tehñ yhöyhøch jim
 nduun mädúhñtiøch jim nhijty.
 Mnajuøøby hajxy jaduhñ cooçh
 jaduhñ nga'a hønnda'agy.
¹⁹Jaançh tehñ yhöyhøchä Jesús
 ja'a tiuung hänajty nduunä,
 ja'a hajxy nWiindsøn'hájtämbä.
 Mee'xxiéemyhøch hänajty nduñ.
 Náxyhøch hänajty njootmayhaty
 cooçhä nmägunaaxä Jesús ja'a
 miädia'agy hajxy hänajty quia'a
 mäbögaanä. Mayhooç hajxy jaduhñ
 quiojyquiapxytiuun cooçh hajxy
 hänajty xjia wi'i yagho'oga'añ.

²⁰Cóxyhøch mijts hänajty
 nyajwiinxiic nyajwiingapxø'øyy neby
 hajxy hoy mhídät. Homiänáajøch
 mijts hänajty nyajnähixø'øyy, møød
 jim jäya'ayhagujc, møød jim maa
 ja'a mdøjc-hajxiän. ²¹Jadúhñhøch
 mijts hänajty nmägapxy nhane'emy
 coö ja'a mhaxøøgcuhdujt hajxy
 jaduhñ mnajtshixø'owät, møød
 coö ja'a Diosmädia'agy hajxy
 mmäböçgät ja'a Jesúscøxpä, ja'a
 hajxy nWiindsøn'hájtämbä.
 Nägøxiøch mijts hänajty jaduhñ
 nmøødmädia'agy, møød mijts
 judíoshajxy, møød mijts cajpä
 judíospä. ²²Hoorä, tøøçhä
 Dioshespíritu xñäma'ay cooçh
 jim nnøcxät Jerusalén. Pero
 cábøch nnajuø'øyy nébyhøch jim
 njada'añ nhabet'añ. ²³Jagóoyyøch
 jaduhñ nnajuø'øyy cooçh jim
 nyajtsuma'añ, cooçhä tsaächpä
 peenä jim nbaada'añ. Majátyhøch
 jaduhñ tøø nwädity, jadúhñhøçhä
 Dioshespíritu tøø xyhawaanä
 cooçh jaduhñ njada'añ nhabet'añ.
²⁴Pero cábøch tii ndajy nmay. Cabä
 cueentä jaduhñ cooçh nnä'ä hó'ogät.
 Je'eyyähájtjøch nbøcjuøøby
 cooçhä nduung nyajmayaannä, ja'a
 Jesúshøch xmióoyyabä, ja'a hajxy
 nWiindsøn'hájtämbä. Jadúhñhøch
 xtiuungmooyy cooçhä mädia'agy
 jaduhñ nyajwá'xät coö ja'a Dios
 hojioot jiaançh tehñ miøøødä.

²⁵Tøøch mijts nyajwiinxiic
 nyajwiingapxø'øyy coö ja'a Dios
 yhane'ema'añ ja'a miøcmäjaahaam.
 Hoorä, cábøch mijts mänaa
 xyhijxtägatsaannä. Tøyhajt jaduhñ.
²⁶Coö mijtsä Diosmädia'agy
 mga'a mäböçgät nébyhøch tøø nja
 mädia'aguiän, ca'a yhøøçhä pojpä

jaduhñ nmøød. ²⁷Hix, pedyíjoch mijts tøø nyajmøødmädia'agy nebiatiä Dios tøø yhane'emiän. ²⁸Mniyajcopcø'øwøøjäp hajxy. Mgüeendähädäbä mabøjpädøjc hajxy nägøxiä. Ja'a Dioshespíritu hajxy jaduhñ xpiädaac coo hajxy jaduhñ mgüeendähädät. Coo ja'a Jesucristo hajxy tøø xñähho'túutäm, paadiä Dios hajxy jaduhñ xyhuunghájtäm, coo ja'a miädia'agy hajxy nmäbøjcäm. ²⁹Cooch mijts jaduhñ nbuhwa'adsaannä, mänitä wiinghäna'c-hajxy yaa miedsa'añ maa mijtsän. Mäwiinhøhmbä hajxy jaduhñ miedsa'añ. Xjia wi'i jiojcapxø'øwaamb mijts jaduhñ coo ja'a Diosmädia'agy hajxy mnajtshixø'øwät. Jaduhñ mäwíinäts hajxy jiatcø'øwa'añ nebiä pahucä meeg hajxy chu'u'chän. Tøyhajt jaduhñ. ³⁰Høxtä mijtsä mjamiøød näje'e tiägø'øwaambä høhndaacpä. Näje'e ja'a mabøjpädøjc-hajxy jaduhñ yajtägoyyáañäbä nebiä høhndaacpähajxy tiägoyya'añän. ³¹Naxy hajxy jaduhñ mdehmñ ñiyajcopcø'øwøøjät. Tägøøgjomøjthøch mijts jaduhñ nmägapxy nhanehmñ xøømdsuhñ. Jaanç tehñ chaaçhpøjpøch hänäjty. Naxy hajxy jaduhñ mdehmñ jiahmiédsät.

³²'Hoorä, mabøjpädøjc, mijtsä Dios nyajcø'øwaanøøby ween hajxy jaduhñ xcwieendähaty. Jaduhñä Diosmädia'agy miäna'añ cooc ja'a Dios hojioot jiaanç tehñ miøødä. Coo ja'a Diosmädia'agy hajxy hamuumdu'joot mmäbøgät, jaduhñä Dios hajxy xjiaac tehñ piuhbédät ja'a miäjaahaam. Møød hodium hajxy jaduhñ xpiädá'agät

näguipxy møød pønjaty ja'a Dios yhuunghajpy. ³³Cábøch pønä wiyitä xiädø'øn tøø nhadsojcä. ³⁴Ja'a nhamdsoo cø'øháamhøch jaduhñ tøø nniyhixyii. Jadúhñhøchä nmägu'ughajpä tøø nbuhbejpä. Tøyhajt jaduhñ. ³⁵Homiänáajøch mijts tøø nmägapxy tøø nhane'emy coo hajxy mniguiudúunäxät, møød coo ja'a pa'amjäya'ay hajxy jaduhñ mbuhbédät møødä häyoobäjäya'ay. Mjahmiédsäp hajxy jaduhñ coo ja'a Jesús jaduhñ jecy miänaañ: "Coo wiinghäna'c mbuhbédät, jaduhñds jootcujc mhídät. Pø mnä'ä yajpuhbedaamb jaduhñ, cab jaduhñ jootcujc mhídät."

³⁶Coo ja'a Pablo jaduhñ quiapxpädøøyy miädiaacpädøøyy, mänit hajxy nägøxiä jiyicädaacy näguipxy møødä Pablo. Mänit hajxy tiägøøyy Diospa'yaaxpä. ³⁷Mänit hajxy tiägøøyy jøøbiä xuu'tspä coo ja'a Pablo hajxy hänäjty piuhwa'adsáañänä. Mänitä Pablo hajxy miajch miäneenñ. Mänitä Pablo hajxy chu'xy. ³⁸Jaanç tehñ jiootmayhajp hajxy hänäjty je'eguiøxpä coo ja'a Pablo hänäjty tøø miäna'añ cooc ja'a Pablo hajxy hänäjty quia'a hijxtägatsaannä. Mänitä Pablo hajxy hoy ñajtshixøøñä maa ja'a Pablo hänäjty biarcotägø'øwa'añän.

21 Mänit højtsä mabøjpädøjc nbuhwaatsnä. Mänit højts nbarcotägøøyy. Mänit højts jimñ ndsohñnä Mileto. Mänit højts jimñ tu'uda'aquiä nnøcxy maa ja'a cajpt hänäjty xiøhatiän Cos. Cujaboom højts njaac nøcxy maa ja'a naax hänäjty xiøhatiän Rodas. Coo højts jimñ ndsøhngumbä, mänit

højts jim njaac nocy maa ja'a cajpt hänajty xiøhatiän Pátara. ²Jim højtsä barco wiingpä hoy nbaady. Jim hänajty ñöcxa'añ maa ja'a naax hänajty xiøhatiän Fenicia. Mänit højts ndu'ubójcumbä wiingbarcojooty. ³Mänit højtsä naax nnäheebøyy, ja'a hänajty xøhajpä Chipre. Hahooyhaamby højts jim nwiinnajxy jäguemjuøøby. Jim højts hänajty nnöcxø'oy maa ja'a naax hänajty xiøhatiän Siria. Coø højts jim nmejch, mänit højts jim nbarcopädsøømy maa ja'a cajpt hänajty xiøhatiän Tiro. Paadiä barco jim miedsøøyy Tiro coø tsømy hajxy hänajty jim ñähdsøømdu'uda'añ. ⁴Jim højtsä mabøjpädøjc näje'e nbaaty. Mänit højts jim nhijty Tiro juxtujxøø maa ja'a mabøjpädøjc-hajxiän. Mänitä Pablo hajxy jia nämaayy coø jim quia'a jaac nöcxät Jerusalén. Jadúhñäc hajxy hänajty tøø ñajtsapxø'oyii ja'a Dioshëspiritäm. Pero cabä Pablo jaduhñ ñä'a möjpädaacy. ⁵Coø juxtujxøø yhabejty, mänit højts jim ndu'ubójcumbä. Mänit højtsä mabøjpädøjc nägøxiä hoy xñajtshixø'oy cajtpa'a møødä yhuung møødä tio'oxy. Mänit højts jim njicädaacy pu'uwiing. Mänit højts nDiospa'yaaxy. ⁶Mänit højtsä mabøjpädøjc xpiuhwaatsnä. Mänit hajxy wyiimbijnä maa ja'a tiøjc-hajxiän. Mänit højts ndägøødiägajch barcojooty. ⁷Mänit højts jim ndsöñgumbä Tiro. Mänit højts jim njaac nocy maa ja'a cajpt hänajty xiøhatiän Tolemaida. Coø højts jim nmejch, mänit højtsä mabøjpädøjc hoy

nguhixy. Tu'tsuhñ højts jim nhijty maa ja'a mabøjpädøjc-hajxiän. ⁸Cujaboom højts jim ndu'ubójcumbä. Mänit højts jim nnöcxy maa ja'a cajpt hänajty xiøhatiän Cesarea. Coø højts jim nmejch, mänit højts jim nnöcxøøyy maa ja'a Felipe tiøjcän. Mänit højtsä Felipe xñämaayy coø højts jim nmejtstä'agät maa ja'a tiøjcän. Jue'e ja'a Felipe hänajty tiuunghajpy, ja'a Diosmädia'agy hänajty jajwa'xyp. Tøø hänajty jaduhñ wyiinguexyii coø ja'a mabøjpädøjc piuhbédät. Näjxutjuc hajxy hänajty jaduhñ wyiinguejxä coø hajxy jaduhñ miäbuhbédät. ⁹Mädaaxcä Felipe yhuung hänajty haagä cäxyii. Nämädaaxcä Diosmädia'agy hajxy hänajty ñajtsapxø'oy. ¹⁰Maxiøø højts hänajty jim tøø nhity maa ja'a Felipe tiøjcän, mänitä jäya'ay tu'ug miehch. Agabo hänajty xiøhaty. Jim hänajty choøn Judea. Ñajtsapxøøbiä Diosmädia'agy hänajty je'ebä. ¹¹Coø ja'a Agabo jim miehch maa højts hänajty nmejtsta'aguiän, mänitä Pablo ja'a wiøøn wiähájtäxä. Mänitä Agabo hamdsoo ñiguiø'øxojts ñidiecyxiojts ja'a Pablo ja'a wiøønhaam. Mänitä Agabo ja'a Pablo ñämaayy: —Jadúhñhöchä Dioshëspiritu tøø xñäma'ay coöch miich nnajtsapxøøyyät. Jadúhñäc miichä judíos xquiø'øxots xtiocyiodsaambä jim Jerusalén nébyhöch cham tøø nhamayyän. Mänitäc miich xyajcø'ødägø'owa'añ ja'a soldadohajxy Rómabä. ¹²Coø højts jaduhñ nmädooyy, møødä mabøjpädøjc-hajxy, mänit

højtsä Pablo nja nämaayy coo jim quia'a nõcxät Jerusalén. ¹³Mänitä Pablo yhadsooyy:

—Tii hajxy coo mjø'øy coo mxuuch. Tiič hajxy coo xyagjootmayhaty. Cabä cueentä jaduhñ coočhä häna'c jaduhñ jim xquio'øxots xtiocyxiódsät Jerusalén. Cabä cueentä jaduhñ cooč häna'c jim xyaghó'ogät ja'a Jesúscoxpä, ja'a hajxy nWiindsøn'hájtämbä — nõmä Pablo miänaañ.

¹⁴Coo højts jaduhñ nhijxy coo ja'a Pablo hänajty quia'a mabøga'añ, mänit højts nmänaannä:

—Ween jaduhñ jiadyii nebiä Dios tøø miäna'añän.

Mänit højts nhamoonnä.

¹⁵Mänit højts nhadsøømbøjcy, høøch møødä Pablo. Mänit højts jim nnøxcy Jerusalén. ¹⁶Näje'e højtsä mabøjpädøjc jim xpianøxcy, ja'a hajxy hänajty jim tsohmbä Cesarea. Coo højts jim nmejch Jerusalén, mänit højts hoy xñajtswowø'øy maa ja'a Mnasón ja'a tiøjcän. Jimä Mnasón hänajty jecy tøø chohnda'agy Chipre. Tøø hänajty jiegø'øy coo ja'a Mnasón ja'a Diosmädia'agy hänajty tøø miäbøcy. Jim højts nmejtstaacy maa ja'a Mnasón ja'a tiøjcän.

¹⁷Coo højts jim nmejch maa ja'a mabøjpädøjc-hajxiän, mänit højts xquioñdymooyy xoondáacäp. ¹⁸Cujaboom højtsä Pablo jim xmiødhajty maa ja'a tsajtøjcän. Jimä Santiago hänajty møødä tsajtøjwiindsøn'hajxy nägøxiä. ¹⁹Mänitä Santiagohajxy miøødnijajpoo'xä ja'a Pablo. Mänitä Pablo tiägøøyy mädiaacpä nebiatia Diosmädia'agy hänajty

tøø yajwa'xiän maa ja'a cajpa judiøshajxiän, cooc jaduhñ quiapxy miädiaacy ja'a Dios miäjaahaam.

²⁰Coo ja'a Santiagohajxy jaduhñ miädooyy, mänitä Dios hajxy wyiingudsähgøøyy. Mänitä Pablo hajxy nämaayy:

—Mägu'ughajpä Pablo, mnajuøøby miič jaduhñ coo ja'a judíos ja'a Jesús ja'a miädia'agy hajxy nämay tøø miäbøjcä. Jaduhñ hajxy nägøxiä miäna'añ coo ja'a cuhdujt hajxy tsipcøxp ngudiúunämät, ja'a Moisés jecy yhanéhmäbä. ²¹Tøø hajxy jaduhñ miädoyhaty cooc tyijy miičhä judíos wiingcuhdujt tøø myajnähixø'øy, ja'a hajxy jäguembaady hadsänaabiä.

Jadúhñäc tyijy tøø myajnähixø'øy coo cuhdujt hajxy näjtshixø'øwät, ja'a Moisés jecy yhanéhmäbä. Jadúhñäc tyijy tøø myajnähixøøbiä coo højts ja'a nguhtuýt nga'a cudiúunänät, højts judíos, møød coo højts nhuung nga'a circuncidarhájtänät. ²²Coo ja'a cu'ughajxy jaduhñ miädoyhadät coo miič yaa tøø mgøody Jerusalén, mänitä tøyhajt hajxy choga'añ pø tøyhajt jaduhñ coo miičhä judíos jaduhñ tøø mjaanč yajnähixø'øy, ja'a hajxy jäguembaady hadsänaabiä. ²³Tøø højts ja'a wiinmahñdy tu'ug nbaady nej miič myajniyhoyø'øwøøjät. Jii højtsä nmägu'ughajpä nämädaaxcä. Tøø xøø hajxy yhagapxtucy coo meeg hajxy hänajty yoxa'añ nebiä Moisés jecy yhanehmiän coo hajxy jaduhñ nguhtuýtjátmät. ²⁴Mmødhädäp miič yø'ø häna'c yø'ø nämädaaxpä. Jaduhñ miič mnämäjuyø'øwät coo meeg hajxy hänajty yoxa'añ.

Jaanä jaduhñ miičhä meeg tu'ug myójxpät. Coó miičhä jaduhñ mnämäjuyó'owät, jaduhñ hajxy hoy yajcuhmé'xät. Coó miičhä jaduhñ mguhdujthádät, jaduhñ miičhä cu'ug xyhíxät coó miičhä cuhdujt jaduhñ mgudiuumbä, ja'a Moisés jecy yhanéhmäbä. Jaduhñä cu'ugä tøyhajt hajxy miøødhada'añ coó miičhä wiingcuhdujt tøyhajt mga'a yajnáhixó'oy. ²⁵Pero ja'a jáya'ayhajxy ca'a judíospä, ja'a hajxy mäbøjpä, tøø højtsä nocy nyajnájaayó'oy. Jaduhñ højts tøø nmägapxy tøø nhane'emy coó hajxy quia'a tsú'udsät mädyiibä häna'c tøø yoxy quepychechwiinduum, møød coó hajxy quia'a tsú'tspät ja'a tøø quia'a nø'xiée'xiäbä, møød coó wiingto'oxiøjc hajxy quia'a møødmá'awät —nømä Pablo ñämaayyä.

²⁶Mänitä Pablo ja'a häna'c miødhajty ja'a nämädaaxpä. Mänit hajxy cujaboom hoy quiudiuñ nebiä judíos quiuhdujthajxy hänäjty myiñän. Mänit hajxy tiøjtägøøyy tsajtøgooty. Mänit hajxy ñägapxy cooc juxtujxøø hänäjty quia'a habetyñä neby hajxy hänäjty tøø yhagapxtuquiän coó meeg hajxy hänäjty yoxa'añ.

²⁷⁻³⁰Ja weenjaty hänäjty quia'a habety ja'a juxtujxøøbä. Mänitä jáya'ayhajxy näje'e tiägøøyy tsajtøgooty. Jim hajxy hänäjty chooñ Asia. Coó ja'a Pablo hajxy jiiby yhiixy tsajtøgooty, mänit hajxy tiägøøyy yaaxpä cooc ja'a Pablo hänäjty jiiby wiädity:

—Judíostøjc, højts puhbéjtäc. Xiids yø'ø craa Pablo wiädity. Yø'ødsä wiingcuhdujt homiajaty

nøcxy yajwiinhixó'oy. Jaduhñ yø'ø craa ja'a cu'ug jiojcapxó'oy coó højtsä nguhdujt hajxy xquia'a cudiúunämät, nebiä Moisés jecy jia hanéhmäñ. Jaduhñ yø'ø craa yajwiinhixøøbiä cooc tyijy hädaa tsajtøjc jaduhñ quia'a tsoobaady. Maas hanaxiä haxøøg tøø jiatcø'oy coó jáya'ay yaa tøø miøødtägø'oy tsajtøgooty, ja'a hajxy ca'a judíospä. Hix, cabä cuhdujt jaduhñ ñä'ägä miñ coó hajxy yaa tiägó'owät tsajtøgooty, pønjaty ca'a judíos.

Paady hajxy jaduhñ miänaañ, je'leguiøxpä coó ja'a Pablo hänäjty tøø yhiixyii cajptooty coó ja'a Trófimo hänäjty miøødä. Jaduhñä Asiabäjäya'ayhajxy hänäjty miäna'añ cooc tyijy ja'a Pablo ja'a Trófimo hänäjty tøø miøødtägøøyy tsajtøgooty. Efeso ja'a Trófimo hänäjty chooñ. Ca'a judíosä hänäjty je'le. Hoorä, coó ja'a cu'ughajxy jaduhñ miädooyy cooc ja'a Pablo hänäjty jiiby wiädity tsajtøgooty, mänit hajxy tiägøøyy haamhájpä. Mänitä Pablo hajxy miajch. Mänit hajxy piawijch piäjädujty jim tsajtøghaguuy. Mänitiä tsajtøjc hajxy yhagøøyy.

³¹Jimä cu'ugä Pablo hajxy hänäjty ñä'ägä yagho'ogaannä, mänitä soldado-wiindsønä mädia'agy ñämejtsä coogä cu'ughajxy hänäjty jim wyl'i yhaamhaty Jerusalén. Roma ja'a soldadohajxy hänäjty chooñ. ³²Tuunä ja'a soldado-wiindsøn jaduhñ ñä'ä mädooyy, mänitä soldadohajxy yhamugøøyy. Mänit hajxy päyø'øguiä yhädaacy maa ja'a cu'ughajxy hänäjty yhaamhatiän. Coó ja'a cu'ugä soldado hajxy

jaduhñ jìjcuheebøoyy coo ja'a soldadohajxy hānajtý miānacy maa ja'a Pablo hānajtý wiobho'ogyiijān, mānitā Pablo yhøxmajtšā.

³³Coo ja'a soldado-wiindsōñ jiiiby quiādaacy, mānitā Pablo chuumā. Hamejtscadena quiø'oxojts tiecyxiojtsā. Mānitā soldado-wiindsōñā cu'ug miāyajtøoyy pōñā Pablo, møød tii hānajtý coo tøø wiobho'ogyii.

³⁴Mānitā jāya'ayhajxy may yhadsooyy haagā wiingjaty. Cab hajxy hānajtý tiu'ugmādia'aguīā. Coo ja'a cu'ughajxy hānajtý jaduhñ wyi'i ya'axy, cabā soldado-wiindsōñā tøyhajt hānajtý hoy piaada'añ. Mānit miānaañ coo ja'a Pablo jim yajnøcxøjät maa ja'a cuartelān. ³⁵Coo ja'a soldado ja'a Pablo hajxy jim miøødcoo'ty maa ja'a escalera jaduhñ chohnda'aguīān, mānitā Pablo hajxy quiøyø'cy. Paady hajxy jaduhñ quiøyø'cy coo ja'a cu'ugā Pablo hajxy hānajtý jia wi'i yagho'oga'añ. ³⁶Høxhaamā cu'ugā soldado hajxy hānajtý pianøcxy yāaxāp coo ja'a Pablo yagho'ogøjät.

³⁷Jimā soldado ja'a Pablo hajxy hānajtý miøødtägø'øwa'añ cuarteltøgooty, mānitā Pablo ja'a soldado-wiindsōñ nāmaayy:

—Huuc miñ, nhuuc møødmādiā'agyhøch miich paquiā.

Hagriegoahaamā Pablo jaduhñ miānaañ. Mānitā soldado-wiindsōñ yhadsooyy:

—Mjājpytiāmā hagriego jaduhñā.

³⁸Cājtām miičh jim mdsōñ Egipto-naaxootiā. Tøø jiegø'øy coo hāna'c tsip jim tøø yajpādøgy Egipto. Nāmādaaxmilā jiamiøød

hānajtý, haagā cahwiindøyhāna'c. Mānit hajxy piäyø'cy. Mānit hajxy jim ñøcxøoyy pactuum maa pōñ quia'a tsāna'ayān.

³⁹Mānitā Pablo miānāangumbā: —Cābøch jim ndsooñ Egipto.

Judío jāyā'ayhøch høøčh. Jímhøch ndsooñ maa ja'a cajpt jaduhñ xiøhatiān Tarso jim Cilicianaxooty. Møjjuøøbyhøch ngajpt. Huuc tunā mayhajt, nhuuc cøxy møødmādiā'agyhøch yø'ø cu'ug.

⁴⁰Mānitā soldado-wiindsōñā Pablo cuhdujt miooyy coo quiāpxät. Mānitā Pablo piejty escaleracøxp. Mānitā quiø'ø chajxajy. Mānitā cu'ughajxy cøjx yhamoñ. Mānit tiägøoyy xiicpā mādiaacpā hebreoh ayuuc-haamby:

22 —Māgu'ughajpādøjc, huuc hamādoowhit hajxy hoy; mijts nmøødmādiā'agaamby.

²Coo ja'a cu'ughajxy jaduhñ miādooyy coo ja'a Pablo hānajtý quiapxy miādiā'agy hebreohayuuc-haamby, tehngajñā hajxy hānajtý hoy yhamādoowhity. Mānitā Pablo jiaac mādiaacy:

³—Judío jāyā'ayhøch høøčh. Jímhøch nnaaxque'exā Tarso, jim Cilicianaxooty. Múutsnøch yaa ngoo'ty Jerusalén. Ja'a teedyhap Gamaliélhøch yaa xyajcapxtaac. Jaančh tehñ yhóyhøch xyajñāhixøoyy ja'a jecyquiuhdujt. Jaančh tehñ yhóyhøčhā Dioscuhdujt hijty nbaduñ hamuumdu'joot nej mijts jāda'ahaty mbaduñān.

⁴Nyajtsaačhpøjpiøčhā jāya'ay hijty, ja'a Diosmādiā'agy hajxy mābøjpa ja'a Jesúscøxpā, to'oxiøjcā, ya'adiøjcā. Høxtā nyaghø'piøch

hijty tähoocjaty. Pawíchhøch hijty pujxtøgooty nyajnxøcxy cø'øxoch tecyxioch. ⁵Ja'a teedywiindsøn yaa tuumbä Jerusalén, coo hajxy jaduhñ mmäyajtówät pø tøyhájthøch jaduhñ tøø njatcø'øy, xmió'owäbä tøyhajt hajxy jaduhñ. Jaanä jaduhñä majtøjcä tøyhajt hajxy yéjpat coo hajxy jaduhñ mmäyajtówät. Yø'øchä nocy hajxy tøø xyajmägüexy coo højts nmägunaax jim nmó'owät maa ja'a cajpt jaduhñ xiøhatiän Damasco. Jímhøchä jäya'ay hänäjty nøcxy nhøxta'awa'añ Damasco pønhatiä Diosmädia'agy mäbøjp ja'a Jesúscoxpä. Je'eçh hänäjty nøcxy nmadsa'añ. Yaaçh hänäjty nyajmänaca'añ Jerusalén. Yaaçh hänäjty min ndsaächtiuna'añ.

⁶Jim tu'haamnøcxpä, ja weenjátyhøch hänäjty jim nga'a coody Damasco, mänitä jøøn quiuhjajcädaacy jaançh tehñ miøc, mädúhñtiøch hänäjty nyo'oy. Cujyxiøøho'ogy hänäjty jaduhñ.

⁷Túunøchä jøøn jaduhñ nnä'ä hijxy, mänitiøch jaduhñ ngädaayy.

Mänitøch nmädooyy cooçh häna'c hänäjty xxiøøguya'axy: "Saulo, Saulo, tiich jaduhñ coo xwyi'i miädsibø'øy." ⁸Mänitøch nmäyajtøoyy: "Wiindsøn, pøn miich." Mänitøch xyhadsooyy: "Jesúshøch høøch. Nazaréthøch hijty ndsoñ. Høøch miich jaduhñ xmiädsibøøby." ⁹Pønjátýhøch hänäjty nmøødnøcxyp, yhjx ja'a jøøn hajxy. Pero cab hajxy miädooyy cooçhä Jesús jaduhñ xmiägapxy. ¹⁰Mänitøchä Jesús nmäyajtøøgumbä: "Wiindsøn, tiich jaduhñ ndúnäp." Mänitøch

xyhadsøogumbä: "Tánaayyø'øg. Jaac nøcx jim Damasco. Coo miich jim mgóodät, mänit miich häna'c jim xyhawaanaañä tijaty miichä Dios jaduhñ xyajtunaamb." ¹¹Hoorä, cooçhä jøøn nhijxy, wiinxóotshøch jaduhñ. Cábøch hänäjty hoy nhijxnä. Ja'a njamiøødhøch hajxy jim xjiaac witscoo't Damasco.

¹²Jimä jäya'ay hänäjty tu'ug chäna'ay. Ananías hänäjty xiøhaty. Jaançh tehñ yhooyä Ananías ja'a cuhdujt hänäjty piaduñ nebiä Moisés jecy yhanehmiän. Jimä judíoshajxy hänäjty näje'e chänaabiä Damasco. Jiaançh tehñ quiumaabiä judíos ja'a Ananías hajxy hänäjty jaduhñ.

¹³Hoorä, cooçh jim ngoo'ty Damasco, mänitøchä Ananías hoy xquiuhixy. Mänitøch xñämaayy: "Puhy'a'y Saulo, hijxø'øg jadähooc cham jaduhñajtä." Tuunä ja'a Ananías jaduhñ nñä'ä mänaañ, mänitiøch jaduhñ njaançh hijxø'cy. ¹⁴Mänitøchä Ananías xñämáaguiumbä:

"Ja'a nhaphájtämhajxy ja'a ndeedyhájtämhajxy ja'a jecypiä haampiä, ja'a Dios hajxy hijty wyiingudsähgøøby jegyhajty. Jaaya'ay miich jaduhñ tøø xyajnáhdijy coo jaduhñ mdúnät neby je'e jioot choquiän, møød coo ja'a Jesús mhamdsoo híxät coo mhamdsoo mädo'wät nebiaty je'e miädia'agy. ¹⁵Nøcxaamb miich mmädia'aga'añ wiinduhmyhagajpt ja'a Jesúscoxpä, nebiaty tøø mhixy nebiaty tøø mmädooy. ¹⁶Hoorä, tsógänämäts, nøcx näbejnä. Jaduhñä Jesús mmänuu'xtá'agät coo weenä mbojpa mgädieey xyajnáhwaats xyajcuhwáatsät", nømhøchä Ananías xñämaayy.

17-18 Mänítøch yaa nwiimbijtagajch Jerusalén. Mänítøch nnøcxy tsajtøgooty Diospa'yaaxpä. Mänítøchä Jesús nwiinhijxy, ja'a hajxy nWiindsønähájtämbä. Mänítøchä Jesús xñämaayy: “Tsógänämäts, mdsóonäp yaa. Caj miichä cu'ugä mmädia'agy yaa xmiäbøgaanä cooch miich yaa xjia wi'i miädia'aga'añ.” 19 Mänítøch nhadsooyy: “Wiindsøn, ñajuøøbiä cu'ughajxy cooch hijty nwädity wiinduhmyhagajpt maa ja'a judíos chajtøjc-hajxiän, coochä jäya'ay hijty nyajnøcxy pujxtøgooty pønjiatiä mmädia'agy xmiäbøjcäp. Náxyhøch hijty nyajwobyii. 20 Y coo ja'a Esteban yagho'cä, jímhøch hánajty nbadsóonäbä. Møødhøch hánajty nbamánaambä coo yagho'ogøøjät. Ja'a häna'cä Esteban hajxy yaghó'cäbä, høøchä wyit ngüeendähajtä. Paadiä Esteban jaduhñ yagho'cä je'leguixpä coo miichä mmädia'agy hánajty xyajwa'xä.” 21 Mänítøchä Jesús xñämáaguiumbä: “Cabä cuentä jaduhñ. Nøcxnä. Jäguémhøch miich nguexa'añ maa ja'a jäya'ayhajxy chána'ayän, ja'a hajxy ca'a judíospä.”

22 Mäduhñjatiä Pablo hánajty miädia'agy, hamädoowhíjtäxäbä miädia'agy hánajty jaduhñ. Pero coo jaduhñ miänaañ cooc hánajty jäguem quixa'añii maa ja'a jäya'ayhajxy chána'ayän, ja'a hajxy ca'a judíospä, cabä cu'ugä Pablo ja'a miädia'agy hajxy hánajty yhamädoowhidáanänä. Mänitä cu'ughajxy tiägøøyy yaaxpä jojpä: —Ween yøø craa yho'ogy. Yagho'og yøø craa hajxy.

23 Tehngajnä hajxy hánajty jaduhñ wyi'i ya'axy wyi'i jiocy. Yamä wyit hajxy hánajty wyi'i

chajyemy. Yamä naaxoc hajxy hánajty wyi'i chajwøjy. Paady hajxy hánajty jaduhñ wyi'i jiatcø'øy coo ja'a Pablo hajxy hánajty jiaanch tehñ miädsiphaty. 24 Mänitä soldado-wiindsøn miänaañ coo ja'a Pablo jiiby yajtøjtägø'øwøøjät cuarteltøgooty. Mänit jiaac mänaañ coo ja'a Pablo wiobho'ogøøjät, ween jaduhñ quixy nägapxy tiiguiøxpä cu'ugä Pablo hajxy hánajty coo tøø wyi'i ñäya'axy. 25 Mänitä soldado ja'a Pablo hajxy quiø'øxojch. Wiobho'ogaambiä Pablo hajxy hánajty. Mänitä Pablo ja'a capitán miägapxy, ja'a hánajty jim tanaabiä wiinduum:

—Caj mijts cuhdujt mmøødä cooch mijts xwióbät nä'a nägoobä. Cab hajxy mnajuø'øy pø tøøch ngädieey. Høøch, jadúhñhøchä cuhdujt nmøødä nebiä Rómabä jäya'ayhajxy miøødän —nømä Pablo ja'a capitán ñämaayy.

26 Coo ja'a capitán jaduhñ miädooyy, mänitä wyiindsøn ñämaayy:

—Ca'a hajxy jaduhñ mwopy. Jadúhñäc yøø craa cuhdujt miøødä nebiä Rómabä jäya'ayhajxy miøødän.

27 Mänitä soldado-wiindsønä Pablo hoy miäyajtøy:

—Nej, tøyhajt jaduhñ coo miichä cuhdujt jaduhñ mmøødä nebiä Rómabä jäya'ayhajxy miøødänä.

Mänitä Pablo yhadsooyy:

—Tøyhajt jaduhñ.

28 Mänitä soldado-wiindsøn miänaañ:

—Jadúhñhøchä cuhdujt nmøødäbä nebiä Rómabä jäya'ayhajxy miøødän. Pero

jaančh tehñ chów̄høch jaduhñ
tøø xyhabädsøømä coočhä cuhdujt
jaduhñ tøø njuy.

Mänitä Pablo miänaañ:

—Coočh jim̄ nnaaxque'exä

Tarso, páadyhøchhä cuhdujt jaduhñ
nmøødä nebiä Rómabä jäya'ayhajxy
miøødän.

²⁹Ja'a soldadohajxy hänäjty
mäwobaambä, coo hajxy jaduhñ
miädooy coogä Pablo cuhdujt
hänäjty jaduhñ miøødä nebiä
Rómabä jäya'ayhajxy hänäjty
miøødän, mänitä Pablo hajxy
piuhwaach. Y ja'a soldado-wiindsøn,
coo je'e jaduhñ miädooy,
tsähgøoy je'eduhñ je'eguiøxpä coo
ja'a Pablo hänäjty tøø quiø'oxochii
tøø tiecyxiochii.

³⁰Cujaboomä soldado-wiindsøn
jaduhñ miänaañ coo ja'a Pablo
quiø'øguejøjät. Mänit miänaañ
coo ja'a teedywiindsøn hajxy
yhamugø'owät møødä majtøjc-hajxy.
Mänitä Pablo jim̄ yajnøcxä maa ja'a
teedywiindsøn hajxy hänäjty tøø
yhamugø'øyän. Mänitä Pablo jim̄
yajtánaaguiädaacä cu'ugwiinduum.
Miädownaambiä soldado-wiindsøn
hänäjty jaduhñ tiiguiøxpä judíos
ja'a Pablo hajxy hänäjty coo tøø
ñäxø'owø'øy.

23 Mänitä
teedywiindsøn hajxy
wyiinhee'ppejtä ja'a Pábläm.
Mänitä Pablo miänaañ:

—Mägu'ughajpädøjc, Diøshøch
jaduhñ xyhijxp coočh homiänaajä
nhojiäya'ayhaty.

²Coo ja'a Pablo jaduhñ miänaañ,
mänitä häna'c-hajxy ñämaayyä
coo ja'a Pablo hajxy yhapo'xø'ögät,
ja'a häna'c-hajxy hänäjty jim̄

tänaabiä Pablo wyiinduum. Ja'a
Ananías jaduhñ mänaañ coo hajxy
jaduhñ jiatcø'owät. Møjhajpä
Ananías hänäjty jim̄ maa ja'a
teedywiindsøn hajxiän. ³Mänitä
Pablo ja'a Ananías ñämaayy:

—Dios miičh jaduhñ
xyajcumädowaamb. Caj miičh hoy
mduñ. Jaduhñ miičh mduungmøødä
coočh miičh xyajtøyhajtyégät
hoy yajxón nebiä cuhdujt myiñän.
Pero coo miičh jaduhñ tøø
mmäna'añ coočh häna'c xquióxät,
myajcähxø'py miičh jaduhñ coo
miičhä cuhdujt hoy mga'a yajtuñ.

⁴Ja'a häna'c-hajxy hänäjty jim̄
tänaabiä, mänitä Pablo hajxy
ñämaayy:

—Tøø miičh jaduhñ ngapxtägoy
coo yø'ø mõjteedywiindsøn jaduhñ
tøø mwiingapxety. Haa ca'a, Dios
yø'øduhñ tøø yhuuc pädaacpä.

⁵Mänitä Pablo yhadsooy:
—Mägu'ughajpädøjc, huuc mee'x
hajxy, cábøch hijty nnajuø'øy coo
yø'ø jaduhñ tiuñ mõjteedywiindsøn.
Jaduhñ jim̄ myiñ cujaay maa ja'a
Diosmädia'aguiän coo hajxy nga'a
nänómät haxøøg, pønjataiä tuung
møød maa ja'a tsaan maa ja'a
cu'ugän.

⁶Mänitä Pablo jaduhñ yhijxy coo
häna'c-hajxy hänäjty mejtstu'u tøø
yhamugø'øy, møødä saduceoshajxy,
møødä fariseoshajxy. Mänitä Pablo
møc quiapxy:

—Mägu'ughajpädøjc, høøch,
jue'ečh høøch, fariséoshøch
høøch. Haagä fariseos højts
jaduhñ. Coočh jaduhñ nmäböcy
coo ja'a ho'oguiäya'ayhajxy jaduhñ
jiujypiøjtägatsa'añ, páadyhøchhä
häna'c jaduhñ tøø xñäxø'owø'øy.

⁷ Coo ja'a Pablo jaduñ miänaañ, mänitä fariseoshajxy tiägøøyy yajcapxiøøbiä møødä saduceoshajxy. Cabä miädia'agyhajxy hänajty nïbiaadyii. ⁸ Hiḡ, jaduñä fariseoshajxy hänajty miäböcy cooc ja'a ho'oguiäya'ayhajxy jiuypiojtägatsa'añ. Jaduñ hajxy hänajty miäböjpä cooc ja'a Dios ja'a mioonsä jim miøødä tsajpootyp, møød cooc ja'a nhaañämähájtámhajxy quia'a hó'cäm. Pero cabä saduceoshajxy hänajty miäböcy nebiä fariseoshajxy hänajty miäböquiän. ⁹ Tehngajnä hajxy hänajty miaas nämayøøy haamhájpä. Tehngajnä hajxy hänajty yhamböcy. Mänitä fariseoshajxy näjele tiänaayyø'cy, ja'a hajxy hänajty yajnähiḡøøbiä maa ja'a tsajtöjcän. Mänit hajxy miänaañ: —Yø'ø craa, cap tii pojpä cädieey miøødä. Jímädä Diosmoonsä tøø miägaxyii, o háañämä.

¹⁰ Maas hanaxiä hajxy hänajty yhamböcy. Tsähgøøbiä soldado-wiindsøn hänajty coo ja'a Pablo hänajty yagho'oga'añii. Mänitä soldado-wiindsønä soldado miøjyaaxy coo ja'a soldado ja'a Pablo hajxy jii by wyitstöönät, møød coo hajxy jim yajnøcxät maa ja'a cuartelän.

¹¹ Mänitcoodsä Jesús jii by nägüehxtøø'xy maa ja'a Pablo wiiinduumän. Mänitä Jesús ja'a Pablo nämaayy: “Ca'a mdsähgøøy. Nébyhöch miich yaa tøø xmiädia'aguiän Jerusalén, jaanä jadúhñhöch miich jim nøcxy xmiädia'agáangumbä Roma.”

¹² Cujaboomä judíoshajxy näjele hoy quiojyquiapxyhaty coo ja'a

Pablo hajxy yagho'ogät. Mänit hajxy nïnämaayyä:

—Mäduñtiä Pablo jiaac jugyhaty, cab hajxy nnä'ägä caayy nnä'ägä húucämät.

¹³ Näjuxychägui'xnaxy hajxy hänajty je'eduhñ, ja'a hajxy hänajty jaduñ tøø quiojyquiapxyhátiäbä.

¹⁴ Mänit hajxy hoy nägapxy maa ja'a majtöjc-hajxiän:

—Tøø höjts jaduñ ngojyquiapxyhaty coo höjtsä Pablo nyagho'ogät. Høxtä mänit höjts ngaya'añ nhu'uga'añnä. ¹⁵ Hoorä, mijts, nøcxä soldado-wiindsøn hajxy jaduñ nämaw'aw coo weenä Pablo yaa yajmechii mijts mwiinduum. Jaduñ hajxy mwiinhøönät coo tyijy ja'a Pablo hajxy mjaac tehñ miäyajtowa'añ. Cahnä Pablo hänajty yaa quioody maa mijts mwiinduumän, jim höjts nyagho'ogät tu'haam —nøñä teedywiindsøñhajxy nãmaayyä.

¹⁶ Mänitä Pablo chojmajc jaduñ miädoyhajty coogä Pablo hänajty yagho'oga'añii. Mänitä Pablo hoy yhawáañäxä maa hänajty chumiän.

¹⁷ Mänitä Pablo ja'a capitán tu'ug miøjyaaxy. Mänit nãmaayy:

—Huuc tuñä mayhajt, huuc woonøcx hädaa craa jim maa ja'a mwiindsønän. Jim jaduñ miøødmädia'aga'añ.

¹⁸ Mänitä Pablo chojmajc wioonøcxäxä maa ja'a soldado-wiindsønän. Mänitä capitán ja'a soldado-wiindsøn nãmaayy:

—Ja'a Pábløch jaduñ tøø xñama'ay coöch hädaa craa yaa nwoominät maa miichän. Míichäch jaduñ xmiøødmädia'agaamb.

¹⁹Mänitä Pablo chojmajc wiingtuum wyitsnócxäxä. Mänitä soldado-wiindsón miänaañ:

—Tiičh jaduñ xyhawaanānāp —nómä Pablo chojmajc miäyajtówäxä.

²⁰Mänitä Pablo chojmajc yhadsooy:

—Tøø ja'a judíoshajxy näje'e quiojyquiapxytiun̄ cooc miich xñāma'awa'añ coo miichä Pablo jaboom ween mguexy maa ja'a teedywiindsónä wyiinduumhajxiän. Jadúñäc miich xwyiinhøøna'añ cooc tyjy ja'a Pablo hajxy cøxiä wiinä jiaac tehñ miäyajtowa'añ.

²¹Caj miich jaduñ mmäböğät. Näjuxychägui'xnaxiä jäya'ayhajxy jaduhñ tøø quiojyquiapxyhaty coo ja'a Pablo hajxy yaghó'ogät tu'haamnøcxpä. Cábäc hajxy jaduhñ nã'ägä caya'añ nã'ägä hu'uga'añ. Høxtä coogä Pablo hajxy yaghó'ogät, mänitác hajxy quiaya'añ yhu'uga'aññä. Miičhác hajxy xyhuuc jaac hahixp cooc miich jaduñ mmäná'anät pø mgudiunaamby jaduhñ —nómä soldado-wiindsón nãmaayyä.

²²Mänitä Pablo chojmajc nãmaayyäxä coo quia'a nãgäpxät wiingtuum waambaty hánajty jaduhñ tøø miädia'agy. Mänitä soldado-wiindsón jaduñ miänaañ coo ja'a Pablo chojmajc wyiimbijnät.

²³⁻²⁴Mänitä soldado-wiindsónä capitán metsc miöjyaaxy. Mänit hajxy wyiinguejxä coo ja'a Pablo hajxy coods jim yajnócxät Cesarea. Nãmayyä soldadohajxy hánajty pianøcxa'añ. Námejtsmägo'x hajxy hánajty ñøcxa'añ tecy-yo'oyhaam; møød nädägøøghii'xcumajc hajxy

hánajty ñøcxa'añ cuaañähgøxp; møød námejtsmägo'x hajxy hánajty ñøcxaambä cuhñdcaap. Jaduhñä capitánhajxy nãmáayyäbä coo ja'a Pablo cuaañähgøxp ñøcxät, møød coo hoy cwieendähadøøjät, jaduñ nejy quia'a jat quia'a habétät. Jaduhñä soldado-wiindsón yhanehmbä coo ja'a Pablo ja'a gobernador Félix yajcø'ødägø'owøøjät.

²⁵Mänitä soldado-wiindsónä nocy yhädiuun̄. Ja'a gobernador Félix hánajty yajnägüexaamby. Jaduhñ soldado-wiindsón quiujahy:

²⁶“Høøch hädaa nocy nhädiuumby, høøch Claudio Lisias. Wiindsón Félix, miich jaduñ cham nyajpoo'xyp. ²⁷Hädaa jäyá'ayhøch miich nyajnägüejxyp. Pablo jaduñ xiøhaty. Häxøøyy maaxtøjquiä Pablo yaa miajtsä Jerusalén. Ja'a judíoshajxy jaduhñ mãmajts. Yagho'ogáañäbä Pablo hánajty. Pero cooč jaduhñ nmädoyhajty coo ja'a Pablo cuhdujt jaduhñ miøødä nebiä Rómabä jäya'ayhajxy miøødän, mänitøchä soldado ja'a Pablo hoy nmøødyajnähwa'ačh.

²⁸Je'ečh hánajty nmädoowaamby tiiguiøxpä Pablo hánajty coo tøø miächii, páadyhøch jiiby nmøødhädaacy maa ja'a judíos ja'a junta hajxy hánajty yagjadyiijän.

²⁹Mänitøch nmädooy coogä Pablo tii pojpä tii cädieey quia'a møødä. Je'eduhñ yajcumadsøøyyä coo ja'a judíos ja'a quiuhdujthajxy wyiingjatiä. Páadyhøch jaduhñ nga'a mänaañ coo ja'a Pablo yagho'ogøøjät, ni coo chumøøjät.

³⁰Cooč jaduhñ nmädoyhajty coo ja'a judíoshajxy hánajty

näje'e tøø quiojyquiapxyhaty coo ja'a Pablo hajxy hänäjty yagho'oga'añ, mänitöch jaduhñ nwiinmaayy cooçh miich jaduhñ nyajnäguéxät. Ja'a hänä'cä Pablo hajxy ja wi'i yagho'ogaambä, tøøch nnäma'ay coo ja'a Pablo jim nõcxy ñäxø'owø'oyii miich mwiinduum.”

³¹Mänitä soldadohajxy jiaançh cudiuuñ nebiä wyiindsõñ hajxy hänäjty tøø ñäma'ayijän. Mänitä Pablo hajxy jim coods yajnõcxy maa ja'a cajpt hänäjty xiøhatiän Antípatris. ³²Cujaboomä soldadohajxy wyiimbijty, ja'a hajxy hänäjty tøø nõcxy tecy-yo'oyhaam. Ja'a hajxy hänäjty cuaañhgøxpä, je'edsä Pablo hajxy jaac møødnõcxnä. ³³Mänitä hajxy jim quioo'ty Cesarea. Mänitä Pablo ja'a Félix hoy yajcø'ødägø'yii møødä nocy, ja'a soldado-wiindsõñ hänäjty tøø quiéxiäbä. ³⁴Mänitä Félix ja'a nocy quiapxy. Mänitä Félix ja'a Pablo miäyajtøøyy maa je'e chooñ. Mänitä Pablo yhadsooyy coo hänäjty jim chooñ Cilicianaaxooty. ³⁵Coo ja'a Félix jaduhñ miädooyy, mänitä Pablo ñämaayy:

—Weenä jäya'ayhajxy yhuuc mech, ja'a miich hajxy jaduhñ xñäxø'owø'owaambä, mänitöçhä tøyhajt nmädowa'añ ja'a miichcøxpä.

Mänitä Félix ja'a soldado ñämaayy coo ja'a Pablo piäda'agøøjät mõjtøgooty, ja'a hänäjty xøhajpä Palacio de Herodes. Jaanä jaduhñä Félix miänaambä coo ja'a Pablo hoy cwieendähadøøjät.

24 Cumägooxxøø ja'a Ananíashajxy jim quioo'ty

Cesarea. Møjteedywiindsõnä Ananías hänäjty tiuumby jim Jerusalén. Näguipxiä majtøjc-hajxy näje'e piagoo'pä møødä licenciadä tu'ug, ja'a hänäjty xøhajpä Tértulo. Mänitä hajxy jim nõcxy maa ja'a gobernador Félix hänäjty tiuñän. Mänitä Félix hajxy ñämaayy coo ja'a Pablo hajxy hänäjty ñäxø'owø'owa'añ. ²⁻³Mänitä Félix miänaañ coo ja'a Pablo yajmedsøøjät maa ja'a Félix wyiinduumän. Coo Pablo jaduhñ yajmejtsä, mänitä Tértulo ja'a Pablo tiägøøyy näxø'owøøbiä:

—Wiindsõñ Félix, hoy højts njaançh tehñ ñijjävø'oyii maa miichcøxpän, coo miich hoy mjaançh tehñ tiuñ. Tøø højts miichä nnaaxä ngajpt xjiaançh tehñ yaghoyøøyyä. Cabä tsip cabä pleetä jaduhñ maa yajpaady. Coo miich jaduhñ hoy mjaançh tehñ tiuñ, paady højts Dioscujú'uyäbä njaançh tehñ yecy maa miichcøxpän. ⁴Cábøch miich jejcy nhadsiba'añ. Huuc tunä mayhajt, højtsä nmädia'agy hamädoowhíjtäc. Paquiä højts jaduhñ nmädia'aga'añ. ⁵Yø'ø craa Pablohajpä, nmøødhajpy højtsä tøyhajt jaduhñ coo yø'ø højts xjiaançh tehñ miädsibø'oy majaty højts nhity, højts judíoshajpä. Jaduhñ højts xjia wi'i jìøjcapxø'oy coo højtsä nguhdujt nnajtsxixø'owät. Jaduhñä tsip homiaajä yajpädø'ogy. Ja'a jäya'ayä Jesús Nazaretpä miädia'agy hajxy panócxäbä, je'e ja'a Pablo hajxy wiindsõñhajp. ⁶Mänitä Pablo jäya'ay nämädaaxc miøødtøjtägøøyy maa højtsä nmøjtsajtøgootiän. Ja'a hajxy nämädaaxpä, ca'a hajxy

je'e jiidósä. Cab højtsä nguहुदुत jaduhñ myiñ coo wiingjäya'ay jiiby tiägó'owät. Mänit højtsä Pablo nyajmajtsä. Nyajcumädowaamby højts hänäjty, tii hänäjty jiiby tiuumby tsajtögooty. Jaduhñ højtsä nguहुदुत myiñ coo jaduhñ quiumädówät. ⁷Mänitá soldado-wiindsón piayajcahw piayajpögøøyy, ja'a xøhjäpä Lisias. Mänit højtsä Pablo mädsib'øbä xpíjca. ⁸Mänit højtsä Lisias xñämaayy coo højts yaa nmínät maa miichä mwiinduumän, coo højtsä Pablo yaa nnäxø'owó'owät. Hoorä, hamdsoo miichä Pablo mmäyajtówät pø tøyhajt jaduhñ neby højts cham nnäxø'owó'oyän — nömä Tértulo ja'a Félix ñämaayy.

⁹Jaduhñä judíoshajxy piamänaambä. ¹⁰Mänitá gobernador Félix ja'a Pablo miäwø'xy coo ja'a Pablo miädiá'agät. Mänitá Pablo miänaañ: —Wiindsón Félix, jaanč tehñ jiootcújc-høch cham nniijäwø'oyii cooçh yaa nniguiugapxa'añii miichä mwiinduum. Hix, nnajuó'obiøch jaduhñ coo miich mõjtuung jejcy yaa tøø mmøødhaty maa højtsä nnaax maa højtsä ngajptän.

¹¹Chaanä miajmetxøøhaty cooçh jim ngoo'ty Jerusalén. Jímhøçhä Dios hänäjty nwiingudsähgø'owa'añ tsajtögooty. Tøyhajt jaduhñ. Hoy piönä jaduhñ miäna'añ. ¹²Pero cábøçhä tsip jim nhøxtaayy. Cábøçhä tsip ni maa nhøxtaayy, majátyhøch tøø nwädity, ni jiiby mõjtsajtögooty, ni jiiby muutstsajtögooty, ni jim cajptooty. Cábøch pøn jim nmøødyajcapxiøøyy.

¹³Hoorä, yø'ø häna'c-hajxy xim

xwyiingapxpéjpoçhä, hønndaacp hajxy yø'ø. Cab hajxy tøyä ñä'a mädia'agy. ¹⁴Pero jaduhñ mäböcypä, nwiingudsähgø'obiøçhä Dios. Nebiä jecyjäya'ayä Dios hajxy wyiingudsähgøøyyän, jadúhñhøch nwiingudsähgø'obiä. Cooçhä Dios jaduhñ nwiingudsähgø'oy, páadyhøçhä yHuung Jesús ja'a miädia'agy jaduhñ nbanøcxä. Yø'ø häna'c-hajxy ximbä, cabä Jesús ja'a miädia'agy hajxy wyiinjuøøyyä. Cábäc tyjy jaduhñ tiøyyä. Pero nmäböjpiøçhä jecymiädia'agy, ja'a Moisés hajxy jecy quijähyyäbä møødä profetadøc-hajxy. ¹⁵Yø'ø häna'c-hajxy, jaduhñ hajxy miäböcy cooc ja'a ho'oguiäya'ayhajxy nägøxiä jiuujpiøjtägatsa'añ, hoyhäna'cä, haxøøghäna'cä. Jaanä jadúhñhøch nmäböjpä. Coo ja'a Dios jaduhñ miänaañ cooc hajxy nägøxiä xyagjujpiøjtägatsaanäm, tøy jaduhñ. ¹⁶Cooçh jaduhñ nmäböcy, páadyhøçhä njoot homiänaajä nbäda'agy cooçhä Diosmädia'agy hoy tehngajnä nbadúnät. Jadúhñhøçhä Dios xquiumáyät. Jaanä jadúhñhøçhä cu'ug xquiumáabiät.

¹⁷Mänáajøch hoy nwäditiän jäguembaady mejtsjomøjt tægøøgjomøjt, mänitøch jim nmejststägajch Jerusalén. Xädó'ønñhøch jaduhñ nmämejts. Ja'a nmägunaaxhøch hänäjty nmo'owaamby. Møødhøçhä meeg hänäjty nyoxa'añ ja'a Diosøxpä.

¹⁸Jadúhñhøch hänäjty jiiby nguहुदुtthaty mõjtsajtögooty, mänithøçhä judíoshajxy näje'e xyhijxy, ja'a hajxy jim tsohmä Asia. Tøøçh hänäjty ngudiuñ neby

højtsä nguhdujt myiñän. Cábøchä häna'c hänajty nämay nmøødä. Cab højts hänajty nhaamhaty. ¹⁹Ja'a jäya'ay højts jaduhñ xyhíjxäbä møjtsajtøgooty, je'eds jaduhñ hahixøøby xñäxø'øwø'owäbøch yaa miichä mwiinduum, pø tøøch hajxy jaduhñ xyhixy cooçh ngädiehy.

²⁰Yø'ø häna'c-hajxy jim tänaabiä, ween yø'øhajxy jaduhñ ñägapxy pø tøøch hänajty ngädieey mänaachä häna'c jim xyajmechän maa ja'a teedywiindsønä wyiinduumhajxiän jim Jerusalén. ²¹Wéhñdøch mänit ngapxtägooyy cooçh nmänaañ cooçh nmäbøcy coo ja'a ho'oguiäya'ayhajxy jiuypioğa'añ. Møc-høch jaduhñ nmänaañ.

Mänitä Pablo quiapxpädøøñä.

²²Coo ja'a Félix jaduhñ miädooyy, mänit jaduhñ wyiinmahñdyhajty coo ja'a tsip hänajty quia'a tsoj yajtødiägø'owa'añ ja'a Pablocøxpä. Hix, ñajuøøbiä Félix hänajty jaduhñ coo ja'a jäya'ayhajxy hänajty hoy quiuhdujthaty, ja'a Jesús ja'a miädia'agy hajxy hänajty panøcxäbä. Mänitä Félix ja'a judíos ñämaayy:

—Mhahíxäbä Lisias hajxy. Coo je'e yaa quiädá'agät, mänitøchä mdsiphajxy nyajtødiägøoyyät — nømä Félix miänaañ.

²³Mänitä Félix ja'a capitán ñämaayy coo ja'a Pablo jiaac yaghidøøjät tsumy, møød coo quia'a tsaächtiunøøjät ni weeñtiä. Jaduhñä Félix miänaambä coo ja'a Pablo quiuhixøøjät ja'a miägu'ughajpädøjc, møød coo hoy tyijä ween yajnämechii.

²⁴Cumejtsxøø cudägøøgxøø ja'a Félix ja'a tio'oxiøjc miøødmejch

maa haguçän. Drusila hänajty xiøhaty. Judía hänajty je'e. Mänitä Félix miänaañ coo ja'a Pablo yajmedsøøjät maa ja'a Félix wyinduumhajxiän. Miädowaambiä Félixhajxy hänajty tiiguiøxpä Pablo ja'a Jesús ja'a miädia'agy hänajty coo pianøcxä. ²⁵Mänitä Pablo tiägøoyy mädiaacpä coo hajxy hoy njäya'ayhajtämät, møød coo hajxy hoy nguhdujthajtämät, møød coo ja'a Dios hajxy cøxiä xyajnägapxäänäm nebiaty hajxy hänajty tøø njäya'ayhajtäm. Coo ja'a Félix jaduhñ miädooyy, mänit chähgøøbiøjcy. Mänitä Félix ja'a Pablo ñämaayy:

—Ween tiuhñä. Tøø ja'a mmädia'agy nmädøowäm. Nøcxnä. Coo jadähooc ñäbaadø'owät, mänit miich jadähooc nyajmøjya'axøøjät —nømä Félix ja'a Pablo ñämaayy.

²⁶Jaduhñä Félix hänajty miäna'añ cooc tyijy xädø'øñ mio'owa'añii Pábläm, cooc tyijy ja'a Pablo jaduhñ yajpädsømmøøjät pujxtøgooty. Paadiä Félix ja'a Pablo hänajty ja naañhooc yajmøjya'axyii coo hänajty miøødmädia'aga'añii.

²⁷Mejtsjomøjtä Pablo hänajty jim tøø chumyçhäna'ay Cesarea, mänitä gobernadorhajxy ñiguiuwijtsä. Coo ja'a Félix piädsøømy, mänit wiinghäna'c tiägøøguiumbä. Porcio Festo hänajty xiøhaty. Cabä Félix ja'a judíos hänajty yagjootma'ada'añ, paadiä Félix miänaañ coo ja'a Pablo jaduhñ jiaac hídät tsumy.

25 Mänitä Festo tiägøoyy tuumbä gobernador jim Cesarea. Cudägøøgxøø jim ñøcxy Jerusalén. ²Coo jim quioo'ty,

mänitá teedywiindsønajxy jim miejch maa ja'a Festo wyiinduumän, møødä møjhajpä judíoshajxy. Mänitá Pablo hajxy tiägøøyy näxø'owwøöbiä. ³Mänitá Festo hajxy miänuu'xtaacy coo mayhajt cu tiuuñ, coo cu yhanehmy coo ja'a Pablo jim cu quiejä Jerusalén. Hix, tøø ja'a judíoshajxy hánajty quiojyquiapxyhaty coo ja'a Pablo hajxy yaghó'ogät tu'haamnøcxpä. ⁴Pero cabä Festo jaduhñ nähadsooyy. Mänit miänaañ coo ja'a Pablo hánajty jiiby chumyčhána'ay Cesarea. Jaduhñä Festo miänaambä coo hánajty paquiä jim yhida'añ Jerusalén, møød coo hánajty jiiby yháda'agáangumbä Cesarea.

⁵—Pøn cuhdujt møød maa mijsän, wéenhøch hajxy jiiby xpiaháda'agy Cesarea. Y pø tøødsä Pablo jaduhñ jiaanč cädieey, jiiby jaduhñ nähxø'owwø'owwøjät —nømä Festo ja'a judíos nähmaayy.

⁶Tuctujxøø ja'a Festo jim jiaac hijty Jerusalén. Mänit jiiby yhádaactägajch Cesarea. Coo jiiby quiädaacy, mänit jim tiägøøyy tuumbä haguyc. Mänit miänaañ coo ja'a Pablo jim yajmedsøøjät. ⁷Coo ja'a Pablo jim miejch haguyc, mänitá judíos ja'a Pablo hajxy piquiä piädaacy, ja'a hajxy hánajty tøø chohndá'aguiäbä Jerusalén. Mänitá Pablo hajxy cøxypänejpy nähwaambejty. ⁸Mänitá Pablo ñijjogapxä:

—Cábøchä cädieey jaduhñ maa nmøødä, ni jim maa ja'a judíos quihdujthajxiän, ni jim maa ja'a chajtøjc-hajxiän, ni jim Roma maa ja'a gobiernä yhane'emiän.

⁹Mänitá Festo ja'a Pablo nähmaayy:

—Nej, mmänaamb miičh jaduhñä coo højts jim nnøcxämät Jerusalén, coo miičh jim mdøyhajtyégät maačhä nwiinduumän.

Paadiä Pablo jaduhñ nähmaayyä, je'eguiøxpä coo ja'a Festo ja'a judíos hánajty quia'a yagjootma'ada'añ.

¹⁰Mänitá Pablo yhadsooyy:

—Cab jaduhñ yhawiinmatsä coočh jim ndøyhajtyégät Jerusalén. Hix, cábøch tii cädieey nmøødä maa yø'ø judíoshajxiän. Mnajuøøby miičh jaduhñ. Jaduhñ mábøcypiä yhawiinmatsä coočh yaa ndøyhajtyégät maa ja'a gobiernä yhane'emiän, ja'a jim tuumbä Roma.

¹¹Coočh häxøpy tøø ngädieey, hahixøøby hijty jaduhñ coočh nhó'ogät. Pero cábøch tøø ngädieey, hoy yø'ø judíoshajxy jaduhñ tøø xjia nähwaambety. Cab jaduhñ yhahixø'oy coočh pøn xyégät maa yø'ø judíoshajxiän. Jadúhñhöch nja mäna'añ coočh jim ndøyhajtyégät maa ja'a gobiernä wyiinduumän jim Roma —nømä Pablo miänaañ.

¹²Mänitá Festo ja'a jiamioød miäyajtøøyy neby jaduhñ wyiinmahñdyhádät ja'a Pablocøxpä. Mänitá Festo ja'a Pablo nähmaayy:

—Miičh jaduhñ tøø mmäna'añ coo miičh jim nøcxy mdøyhajtyega'añ jim Roma maa ja'a gobiernä wyiinduumän. Pues jimhöch miičh njaanč quexa'añ Roma tøyhajtyejpä.

¹³Cumejtspo'o cudägøøgpø'o, mänitá Agripahajxy jim miejch Cesarea møødä tio'oxiøjc Berenice. Gobiernä ja'a Agripa hánajty tiuumby wiingtuum. Mänitá

Agripa ja'a Festo hajxy yajpoo'xy.
¹⁴Maxiøø ja'a Agripahajxy hānajtjy jim yhida'añ maa ja'a Festo tiøjcān. Mānitā Festo ja'a Agripa ñāmaayy:
 —Jimā jāya'ay tu'ug chumyčhāna'ay. Pablo jaduhñ xiøhaty. Coø ja'a Félix yaa piādsøømy tuumbā, jimā Pablo jaduhñ jiaac mähmøøyy tsumy. ¹⁵Mānāajøch jim nhoyyān Jerusalén, mānītøchā judíosahajxy xñāhooyy, ja'a hajxy hānajtjy møjhājpā, møødā teedywiindsøn'hajxy. Mānitā judíos ja'a Pablo hajxy ñāxø'øwøøyy maačh nwiinduumān. Mānitā judíosahajxy miānaañ coø ja'a Pablo cu yagho'cā. ¹⁶Mānītøch nhadsooyy: “Jaduhñ hajxy jim quiuhdujthaty Roma, cab jaduhñ pøn yagho'ogyii, pø cahñā hānajtjy ñijjogapxyii maa ja'a jāya'ayā wyiinduumhajxiān, ja'a hajxy hānajtjy mānāxø'øwøøbiā”, nømhøčhā judíos nnāmaayy.
¹⁷Hoorā, coøch yaa ngādaactāgajch Cesarea, mānītøchā judíos xpiamānajcy. Cujabóomhøch ndägøøyy tuumbā. Mānītøchā Pablo nyajmøjyaaxā. ¹⁸Coo ja'a judíosahajxy jim miejch maačh nwiinduumān, mānitā Pablo hajxy tiägøøyy nāxø'øwøøbiā. Haxøøgaty ndijy ja'a Pablo hānajtjy ñāxø'øwø'øwa'añii. Pero cabā Pablo jaduhñ haxøøgaty ñā'a nānøømā.
¹⁹Jue'e ja'a judíosahajxy hānajtjy yajcāpxiøøby, nebiatiā quiuhdujt hajxy yaghity, møød coogā Pablo hoy quia'a cudiuñ. Møød hajxy hānajtjy yajtsibøøbiā pø tøø ja'a Jesús jiaañch jujypjøjtāgach, ja'a hānajtjy tøø yhø'oguiābā. Jaduhñā

Pablo yhajodhaty coogā Jesús tøyhajt tøø jiuypjøcy. ²⁰Høøch, cābøch hānajtjy nnajuø'øy nébiøčhā capxy mādia'agy jaduhñ nyajtødiägø'øwāt. Mānītøchā Pablo nmāyajtøøyy pø nøcxaamb hānajtjy jim Jerusalén coø jim cu tiøyhajtyejcy. ²¹Mānitā Pablo yhadsooyy cooc hānajtjy jim quia'a nøcxa'añ Jerusalén. Mānit miānaañ cooc hānajtjy jim nøcxy yajtøyhajtyega'añii Roma maa ja'a gobiernā tiuñān. Coø jaduhñ yhadsooyy, páadyhøch jaduhñ nmānaañ coø yaa jiaac hídāt tsumy. Coø jaduhñ ñābaadø'øwāt, mānītøch jim nguexa'añ Roma, ween jim nøcxy tiøyhajtyecy maa ja'a gobiernā wyiinduumān —nømā Festo quiapxy miādiaacy.

²²Mānitā Agripa ja'a Festo ñāmaayy:

—Nmādowāambiøch høøčhpā waambā craa jaduhñ miādia'aga'añ.

Mānitā Festo yhadsooyy:

—Jaboom mmādōwāt —nømā Agripa ñāmaayyā.

²³Cujaboomā Agripahajxy jim miejch hāgajc møødā Berenice. Wiinxu'uxy wiinwopy hajxy jim miejch. Mānit hajxy jiiby tiøjtāgøøyy maa ja'a Festo hānajtjy tiuñān, nāguipxy møødā soldado-wiindsøn'hajxy, møødā møjtojc-hajxy. Mānitā Festo ja'a Pablo yajmøjyaaxā. ²⁴Coo ja'a Pablo jiiby tiägøøyy, mānitā Festo miānaañ:

—Wiindsøn Agripa, møød pønajaty yaa tøø miech maa højts nwiinduumān, mĩjtsāts jaduhñ nmāgapxyp. Yø'ø craa xii tānaabiā, yø'øds jaduhñ xøhājp Pablo. Yø'ødsā

judíoshajxy tøø wyi'li ñäxø'øwø'øy yaa Cesarea møøð jim Jerusalén. Jadhun hajxy tøø wyi'li ya'axy tøø wyi'li jiocy coo yø'ø Pablo ween yho'ogy. ²⁵Pero høøch, cábøch jadhun nmäna'añ coo tøø quiädieey. Páadyhøch jadhun nmäna'añ coo quia'a hó'ogät. Pero hamdsoo yø'øduhn tøø miäna'añ coo jim ñøcxät Roma, coo jim nøcxy yajtøyhajtyega'añii maa ja'a gobiernä wyiinduumän. Páadyhøch jadhun jim nguexa'añ. ²⁶⁻²⁷Cábøch nnajuø'øy waambátyhøchä gobiernä Rómabä nnocyñäjaayø'øwät ja'a Pablocøxpä. Cab jadhun yhawiinmatsä cooçhä Pablo jim nguéxät Roma tsumy, pø cábøch tøyhajt nmøødä pø tøø jiaanç cädieey. Hoorä, páadyhøchä Pablo yaa tøø nyajmech coo mijts jadhun ween myajtøyhajtyecy. Miich, Wiindsøn Agripa, miich mjaanç tehñ jiajpy mjaanç tehñ ñajuøøby. Coø mijts hänäjty tøø myajtøyhajtyecy nebiaty jadhun tøø jiaanç cädieey, mänitøch mabøcy nnajuø'øwät nébiøch njäyät — nømä Festo miänaañ.

26 Mänitä Agripa ja'a Pablo ñämaayy:

—Hahixøøby jadhun coo miich hamdsoo mnijjogapxøøjät.

Mänitä Pablo ja'a quiø'ø chajxajy. Mänit tiägøøyy mädiaacpä:

²—Wiindsøn Agripa, chamhøch nnijjogapxa'añii nebiátyhøchä judíoshajxy tøø xñähwaambety. Jootcújc-høch jadhun nnijjävø'øyii cooçhä yaa nmädia'aga'añ miich mwiinduum. ³Páadyhøch jootcujc nnijjävø'øyii je'eguiøxpä coo miich mjaanç tehñ jiaty mjaanç

tehñ ñajuø'øy nebiatiä judíoshajxy quiuhdujthaty, møøð tijaty hajxy naxy yajtsibøøby. Høøch huuc mé'e'xác. Høøchä nmädia'agy huuc hamädoowhjtäc.

⁴Ñajuøøbiä judíoshajxy jadhun nägøxiä cooçhä quiuhdujthajxy hoy ngudiuunä homiänaajä, møøð jim maachä nhamdsoo cajptän, møøð jim Jerusalén. Múutsnøch hänäjty jadhun cooçhä quiuhdujthajxy jadhun nbadu'ubøjcä. ⁵Jaana jadhunä judíoshajxy ñajuøøbiä cooçhä fariseos quiuhdujthajxy hoy nyajtúunäbä. Múutsnøch hänäjty jaduhmbä cooçhä ndägøøyy habøjpä. Miøødä judíos ja'a tøyhajt hajxy jadhun. Hahixøøby jadhun coo hajxy jadhun ñägápxät. Ja'a fariseoshajxy, ca'xiä cuhdujt hajxy yajnøcxy nebiä judíoshajxy yajnähixø'øyän. ⁶⁻⁷Jéquiänä Dios jadhun miänaañ coogä ho'ogyjiäya'ay yagjujypiøga'añ. Højts judíos, jadhun højtsä nhapä ndeedyhajxy jecy xyajwiinwaanøøyyä ja'a Diósäm. Nägøxiä højts jadhun njøbhixy coo ja'a Dios jadhun yajtøjiada'añ neby jecy miänaañän, højts ja'a majmetsc-hagajtpä. Paady højtsä Dios xøømdsuhñ nwiingudsähgø'øy. Hoorä, Wiindsøn Agripa, cooçhä jadhun nmäbøcy coo ja'a Dios ja'a ho'ogyjiäya'ay yagjujypiøga'añ, páadyhøch yø'ø judíoshajxy cham xñäxø'øwø'øy miich mwiinduum — nømä Pablo ja'a Agripa ñämaayy.

⁸Mänitä Pablo ja'a judíos ñämaayy:
—Tii hajxy jadhun coo mga'a mabøga'añ coo ja'a Dios ja'a ho'ogyjiäya'ay yagjujypiøga'añ.

⁹Mänitá Pablo jiaac mänaañ:

—Bueno, jadúhñhøch hijty nmäna'añ coo hijty yhahixø'oy coočhä jäya'ayhajxy ndsaačhtiúnät, ja'a Jesús Nazaretpä ja'a miädia'agy hajxy hänäjty panócxäbä.

¹⁰Jadúhñhøch jim njaanč jatcøøyy Jerusalén. Ja'a teedywiindsónhøčhä cuhdujt hajxy jim xmiøøyy coočhä jäya'ayhajxy nyajtsumøød, ja'a Jesucristo miädia'agy hajxy hänäjty panócxäbä. Námáyhøch hajxy jaduhñ njaanč yajtsuumä. Y coo hajxy yagho'cä, jadúhñhøch hänäjty nbamänaambä coo hajxy yagho'ogójtät. ¹¹Ja naañhöc-høch hajxy tøø nyajtsaačhtiunii coo hajxy ñijjogapxøjtät ja'a Jesúsøcxpä. Wiinduhmyčhajtójc-høch hijty ndsaačhtiunñ. Hanáxiøch hajxy hijty nmäjootma'ady, páadyhøch hajxy hijty jäguembäady ndsaačhtiunñ.

¹²Mäníthøčhä

teedywiindsønñhajxy jim xwyiinguejxy Damasco coočhä mabøjpädøjc jim nyajtsaačhtiunøjtät.

¹³Tu'haamnøcxpä, mänit højtsä jøøn xquihjajcädaacy jaanč tehñ miøc. Cujyxioøho'ogy hänäjty je'e. Cabä xøø hänäjty miäbaady nebiä jøøn hänäjty jiajjiän. Høxtä xquihjajwädjät højts jaduhñ. ¹⁴Coo højtsä jøøn jaduhñ nhijxy, mänit højts nägøxiä ngädaayy. Mänítøch nidiuhñ nmädooyy coočhä häna'c xmiägapy hahebreohaam. Mänítøch xñämaayy: “Saulo, Saulo, tiich miich jaduhñ coo xwyi'i miädsibø'oy. Coočh miich jaduhñ xwyi'i miädsibø'oy, hamdsoo miich jaduhñ mničhaačhtiunii.”

¹⁵Mänítøch nmänaañ: “Wiindsønñ,

pøn miich.” Mänítøch xyhadsooyy:

“Jesúshøch høøčh. Høøčh miich jaduhñ xmiädsibøøby.

¹⁶Tänaayyø'og. Páadyhøch jaduhñ tøø nnäguehxtøø'xy ja'a miichøcxpä, miichhøch nwiinguexaamby coo ja'a mädia'agy jaduhñ myajwá'xät nebiátyhøch tøø xyhixy, møød nebiátyhøch miich njaac yajnáhixø'owa'añ.

¹⁷Nnäwa'anáambiøch miich majaty miich mwädita'añ, jim maa ja'a judiøshajxiän, jim møød maa ja'a wiingjäya'ayhajxiän, ja'a hajxy ca'a judiøspä. Jímhøch miich jaduhñ nguexa'añ maa ja'a wiingjäya'ayhajxiän. ¹⁸Páadyhøch miich jim nguexa'añ, jaduhñ miichhä Diosmädia'agy myajwiingapxø'owät, jaduhñä yhaxøøgcuhdujt hajxy ñajtshixø'owät. Cabä møjcu'ugong ja'a miädia'agy jaduhñ miäbøjcäxät. Ja'a Diosmädia'agy hajxy jaduhñ miäbøgäp. Y coočhä nmädia'agy hajxy jaduhñ xmiäbøjcäbät, jadúhñhøch nyajnáhwá'adsät ja'a piojpa quiädieeyhajxy, jaduhñ hajxy miähmø'owät hawa'adstuum”, nõmhøčhä Jesús xñämaayy.

¹⁹Wiindsønñ Agripa, coočhä Jesús jaduhñ jim xmiägapy tsajpootyp, páadyhøčhä miädia'agy jaduhñ ngudiunä. ²⁰Mänítøčhä Diosmädia'agy ndägøøyy yajwa'xpä coo jäya'ayä yhaxøøgcuhdujt hajxy ñajtshixø'owät, coo ja'a Diosmädia'agy hajxy piadu'ubøgät. Coo hajxy jaduhñ yhojjiäya'ayhadät, jaduhñ hajxy yajcähxø'ogät coo yhaxøøgcuhdujt hajxy tøø jiaanč najtshixø'oy. Jímhøčhä Diosmädia'agy nyajwa'xtsohñ Damasco. Mänítøch jim njaac

yajwa'xy Jerusalén, mөөd jim Judeanaaxooty wiinduhmyhagajpt. Mänitöchä jäya'ayhajxy njaac yajnahixөөy, ja'a hajxy ca'a judíospä. ²¹Coochä jäya'ayhajxy jaduhñ nyajnahixөөy, ja'a hajxy ca'a judíospä, páadyhöchä judíoshajxy näje'e jim xjia majch möjtsajtөгooty, jim Jerusalén. Cooch hajxy jaduhñ xmiajch, mänitöch hajxy xjia yagho'ogaañ. ²²⁻²³Pero Dióshöch xpiuhbejp. Tehngájnochä Diosmädia'agy nyajwa'xy höxtä jäda'anäbaady, ja'a Jesúscөxpä. Nägөxiöchä jäya'ayhajxy jaduhñ nyajnahixө'өy, möjtөjc, häyoobädөjc. Jaduhñhöch nnä'ägä mädia'agyhaty neby jim cujaay myiñän nocyjiooty, ja'a profetadөjc-hajxy jecy yhädiúunäbä, ja'a Moisés jecy yhädiúunäbä. Jaduhñ hajxy jecy quiujahy coogä Dios ja'a wyiinguexypä hánajty quiexa'añ, ja'a xөhajpä Cristo. Jaduhñ hajxy jecy quiujahbiä coogä Cristo hánajty yho'oga'añ. Jaayá'ayäc hánajty jayөjp juyypiogaamb. Jaduhñägä jäya'ayhajxy hánajty yajnahwa'adsa'añii, mөөdä judíoshajxy, mөөdä wiingjäya'ayhajxy. Hoorä, coo ja'a Jesús yaa yhooyy hädaa yaabä naaxwiin, Dios jaduhñ wiinguejx. Jaduhñ tiөjiajty nebiä profetadөjc-hajxy jecy quiujahyyän, nebiä Moisés jecy quiujahyyän — nomä Pablo ñijögapxä.

²⁴Mänitä Festo yaaxy:

—Pablo, tөө miičh jaduhñ mguhiñ. Coo hanaxiä tөө mgapxta'agy, je'e tөө xyajcuhiñ.

²⁵Mänitä Pablo yhadsooyy:

—Wiindsón Festo, cáboch nguhiñ. Ja'a tөyhajt, je'ečh nmädiaacpy. Homiäböjnөch jaduhñ nmädia'agy.

²⁶Mänitä Pablo ja'a Agripa ñämaayy:

—Wiindsón Agripa, cóxiөch cham nmädia'agy maa miičh mwiinduumän. Nmөdhdөchä tөyhajt jaduhñ coo miičh jaduhñ mgөxy najuөөbiä nebiätyhöch cham nmädia'agy. Hijxwiinduum jaduhñ tөө jiadyii tөө tiuñii, ca'a yhayu'učh ca'a yhamee'chä. ²⁷Wiindsón Agripa, nnajuөөbiөch jaduhñ coo miičh mädia'agy mmäböcy, ja'a profetadөjc-hajxy jecy yhädiúunäbä.

²⁸Mänitä Agripa yhadsooyy:

—Ja weenjátyhöch miičh xquia'a yajniñähdujcä cooch jaduhñ nmäbögät ja'a Jesúscөxpä.

²⁹Mänitä Pablo miänaañ:

—Hoy jia weenjaty hoy jia möjjaty hajxy mga'a mäböcyñä, chojpiä Dios ja'a jioot jaduhñ coo ja'a miädia'agy hajxy nägөxiä mmäböjcät ja'a Jesúscөxpä nébiөch nmäböquiän, mäduhñtiä hajxy yaa mhamädoowhity, mөөd miičh Wiindsón Agripa. Pero cáboch jaduhñ nmäna'añ coo hajxy tsumy mhídät nébiөch höөchän.

³⁰Mänitä Agripahajxy tiänaayyө'cy, mөөdä Festo, mөөdä Berenice, mөөdä jäya'ayhajxy nägөxiä. ³¹Mänitä hajxy tiөjpädsөөmy. Mänitä Agripahajxy hawiing ñiñämaayyä mөөdä Festohajxy:

—Caj yө'ө craa tii cádieey miөөdä. Cab jaduhñ yhahixө'өy coo tsumy jiaac hídät ni coo yagho'ogöөjät.

³²Mänitä Agripa ja'a Festo ñämaayy:

—Coo yø'ø craa häxøpy tøø quia'a mäna'añ coo jim̄ nõcxy yajtøyhajtyega'añii Roma maa ja'a gobiernä wyiinduuman, tøø häxøpy yhöxmaçhii.

27 Mänitä Festo wyiinmahñdyhajty coo ja'a Pablohajxy jim̄ quixøøjät Italia barcojooty møød jiamioðdhajxy, ja'a hajxy hänajty tsumybiä. Mänitä Julio ja'a tsumyhäna'c yajcø'ødägøøyyä. Capitán ja'a Julio hänajty tiuumby maa ja'a Augusto biatallóngän. Høøch Lucas, høøchä Pablo hänajty nbanøcxaamby. ²Mänit højts hoy nbarcotägø'øy. Jimä barco hänajty tøø chohnda'agy maa ja'a cajpt hänajty xiøhatiän Adramitio. Tänaayyaambiä barco hänajty ñøcxa'añ majatiä cajpt hänajty miejypia'ajän jim̄ Asianaaxooty. Jimä jäya'ay hänajty tu'ug piadsoonä. Aristarco hänajty xiøhaty. Jim̄ hänajty quiunaaxä Tesalónica, jim̄ Macedonia-naaxooty. Mänit højts ndu'ubøjnä barcojooty. ³Cujaboom højts nmejch maa ja'a cajpt hänajty xiøhatiän Sidón. Jaançh tehñ yhojiootä Julio hänajty miøød ja'a Pablocøxpä. Paadiä Julio ja'a Pablo cuhdujt miooyy coo ja'a Pablo ja'a miägu'ughajpä nõcxy quiuhixy cajptooty, weenä Pablo jaduñ piuhbedyii. ⁴Mänit højts jim̄ jadähooc ndu'ubøjcumbä Sidón barcojooty. Møc højts hänajty xjiøjcubojø'øy. Paady højts Chiprenaaxooty hahooyhaamby nwiinnajxy maa hänajty mõc quia'a jaty pojjiän. ⁵Mänit højts jim̄ nnaxøøyy Cilicia-naaxooty møød Panfilia-naaxooty. Mänit højts

jim̄ nmejch maa ja'a cajpt hänajty xiøhatiän Mira, jim̄ Licea-naaxooty.

⁶Jimä Julio wiingbarco hoy piaady, ja'a hänajty nõcxaambä Italia. Alejandría ja'a barco hänajty tøø chohnda'agy. Mänit højts barcojooty hoy ndägøødiägach. Mänit højts ndägøøyy tu'uyohbiä jadähooc. ⁷Je'enä højts hänajty mõc xjiøjcubojø'øy, paady højts hänajty hodiägaamby ndu'uyo'oy. Mädaaxxøø mägoøxxøø højts hänajty tøø njaac nõcxy coo højts jim̄ nmejch mäwiingón maa ja'a cajpt hänajty xiøhatiän Gnido. Hobiänejpiä højts jim̄ nmejch. Cab højts hänajty hoy ndu'uyo'oyaannä. Je'enä højts hänajty mõc xjiøjcubojø'øy. Mänit højts wiingtuum nnøcxøøyy maa ja'a naax hänajty xiøhatiän Creta. Coo højts jim̄ nnaxøøyy mäwiingón maa hänajty xiøhatiän Cabo Salmón, mänit højts Creta hanajtyhaamby nnøcxøøyy maa hänajty mõc quia'a jaty pojjiän. ⁸Hamäjaa højts jim̄ nmejypia'ayohy. Mänit højts jim̄ nmejch maa ja'a cajpt hänajty xiøhatiän Buenos Puertos, jim̄ mäwiingón maa ja'a cajpt hänajty xiøhatiän Lasea.

⁹Maxiøø højts jim̄ nhijty. Tøø højts hänajty hanaxiä nhøxhaamø'øy. Mäjahn ja'a tu'uyo'oyiibä hänajty tøø jiajnä je'leguixpä coo tøøchpoj hänajty tøø piädsøømnä. Mänitä Pablo miänaañ:

¹⁰—Wiindsøndøjc, mäjahnädiägøøbiøchä tu'uyo'oyiibä jaduñ nhijxnä coo tøøchpoj tøø piädsøømnä. Wehñdä barco jaduñ miä'adät møødä tsømydiagy cøxiä. Wehñdä højts jaduñ nhó'cämät.

¹¹ Pero cabä Julio ja'a Pablo ja'a miädia'agy ñä'ä yajtuunä. Jue'e ja'a miädia'agyhajxy yajtuunäxä, ja'a barcoyajyohbiä mөөдä cubarco.

Jaduhñ hajxy hänäjty tөө miäna'añ cooc tyijy hänäjty quia'a mäjahñä.

¹² Cab hänäjty yhäxixө'öy coo hөjts tөөchpoj jim nyajnáxät Buenos Puertos. Mänit hajxy nämay miänaañ coo hөjts jadähooc ndu'ubөjcumbät barcojooty. Jim hajxy hänäjty ñaxa'añ maa ja'a cajpt hänäjty xiөhatiän Fenice. Creta-naaxooty hänäjty je'le mejypia'a. Cab hänäjty jim jiaty mäjahñä je'eguiөxpä coo jim mөc quia'a pojy. Paadiä tөөchpoj hajxy hänäjty jim yajnaxa'añ.

¹³ Mänitä jөөmboj yuung piädsөөmy. Mänit hajxy miänaañ cooc hajxy hoy jiaac tu'uyo'oya'añ barcojooty. Mänit hөjts njaančh tu'ubөjcumbä. Jim hөjts njaac mejypia'ayohy Creta. ¹⁴ Weeñtiä hөjts hänäjty tөө njaac tu'uyo'oy, mänitä tsuxpoj mөc piädsөөmy.

¹⁵ Mөc hөjts hänäjty xjiөjcubojө'öy. Coo ja'a barcoyajyohbiä jaduhñ yhijxy coo hänäjty quia'a mäjäda'aga'añ, mänit hajxy ñiñämaayyä coo ja'a barco ween piabojy. ¹⁶ Mänit hөjts jim nmejch maa ja'a naax mejyquiujc chuucpäñ, ja'a hänäjty xөhjäpä Cauda. Mänit hөjts jim nnaxөөyy hanajtyhaamby maa hänäjty mөc quia'a pojjiän. Jim hөjtsä barcohuung hänäjty nbawich. Hobiänejpä hөjtsä barcohuung jiiby nyuugjädujty möjbarcojooty.

¹⁷ Coo hajxy yajwiimbejty, mänitä barco hajxy yagjuhmäguiwädijty laansähaam, jaduhñä barco quia'a má'adät. Coo ja'a mejy hänäjty

jim quia'a jaty hagamä, paadiä barcoyajyohbiähajxy hänäjty chähgө'öy coo ja'a barco jiiby jie'xät tsäbiu'ujooty nөөba'c. Mänitä wit pojyohbiä hajxy yajmäñajcy, ja'a barco hänäjty quiuhdөyhajpiä. Mänit hajxy miänaañ coo ja'a barco ween jaduhyyä piabojy. ¹⁸ Cujaboom, je'enä hänäjty mөc piojy. Mөcä barco hänäjty miөjpojpedyii. Ja'a tsөmydiajy ja'a barco hänäjty yajnөcxypä, mänit hajxy ñөөjuip ñөөpөгөyy mejjiooty. ¹⁹ Cujaboom hөjtsä tuumbejt njaac nөөjuip njaac nөөpөгөyy, mөөдä wit pojyohbiä, ja'a barco hänäjty quiuhdөyhajpiä, mөөдä wittөөbiejt. ²⁰ Maxiөө hөjts jaduhñ nmänajxy nyajnajxy. Tehngajnä hänäjty mөc piojy. Jaančh tehñ wyiimbөcy hänäjty. Cabä xөө cabä madsa'a hänäjty quiähxө'ögy ni weeñtiä. Cab hөjts hänäjty nnajuө'öy maa hөjtsä poj hänäjty xchөmnөcxy. Jaančh tehñ chähgөөby hөjts hänäjty coo hөjts nhө'ogät.

²¹ Tөө hөjts hänäjty maxiөө nhity jaguiay. Mänitä Pablo tiänaayyө'cy jäya'ayhagujc. Mänit miänaañ:

— Wiindsөndөjc, coočhä nmädia'agy hajxy häxөpy tөө xyajtuunä, cab hajxy häxөpy jim tөө mdsoon Creta, y cabä tsө'ty cabä häyohn hajxy häxөpy tөө nbäatäm. ²² Pero, ca'a hajxy mdsähgө'öy. Caj pөñ yho'oga'añ, hoyyä barco cu jia ma'ad. ²³ Hix, haamyquiödshөchä Diosmoonsä tu'ug nwiinhijxy. Jim choon Dioswiinduum. Nwiingudsähgөөbiөchä Dios. Je'ečh jaduhñ xwyiinguejx. ²⁴ Mänithөchä Diosmoonsä xñämaayy: “Pablo, ca'a

mdsähgø'øy. Tsipecøxp yhahixø'øy
 coo miich jim mmédsät Roma
 maa ja'a gobiernä wyiinduumän.
 Miihcøxpä ja'a Dios tøø miäna'añ
 cooc pøn quia'a ho'oga'añ
 mäduhñtiä hajxy jiiby mnøcxy
 barcojooty”, nómhøchä Diosmoonsä
 xñämaayy. ²⁵Paady, ca'a hajxy
 mdsähgø'øy. Nmäbøjcäbøchä
 Dios ja'a miädia'agy jaduhñ cooc
 hajxy xyajnähoa'adsaanäm,
 nebiätyhøchä Diosmoonsä
 tøø xyajmøødmädia'agy. ²⁶Jim
 mejyquiujc, jimä naaxhuung tu'ug.
 Jim højts nøcxy nmøjpojpedaanäm.
 Tøyhajt jaduhñ —nömä Pablo
 miänaañ.

²⁷Majmactsxøø højts hänajty tøø
 nbabojy barcojooty jim maa ja'a
 mejy hänajty xiøhatiän Adriática.
 Cuptsuhm hänajty jaduhñ, mänitä
 barcoyajyohbiähajxy ñajuøøyy
 coo højts hänajty naaxpa'a
 tøø nmäwiingoñ. ²⁸Mänitä
 nøø hajxy qyipyx mäduhñtiä
 quiøøcä. Jue'e hänajty quiøøcä,
 hii'xmajmoxmetro. Cooc hajxy
 weeñtiä jiaac nøcxy, mänit hajxy
 qyipxcumbä. Jue'e hänajty quiøøcä,
 hii'xjuxtujmetro. ²⁹Tsähgøøby hajxy
 hänajty coo ja'a barco tsaa nøøba'c
 miøjpohmbédät, paadiä pujxthajo'c
 hajxy mädaaxc ñøøjuipøøyy
 barcohøxhaam. Cuxodsø'öyä
 pujxthajo'c hänajty. Paady hajxy
 jaduhñ ñøøjuipøøyy coo ja'a barco
 jaduhñ jiiby wiohnmähmø'øwøøjat.
 Jaanç tehñ jiootmayhajp hajxy
 hänajty. Jaduhñ hajxy hänajty
 miäna'añ coo paquiä cu jioøøyy.
³⁰Mänitä barcoyajyohbiä ja'a
 barcohuung hajxy quiuhdøøñajxy
 nøøjooty. Jaduhñ hajxy hänajty

yajnänaoma'añ cooc tyijy ja'a
 pujxthajo'c hänajty ñøøjuipø'owa'añ
 barcojøbhaam. Ja wi'i
 piäyø'øgaambä barcoyajyohbiähajxy
 hänajty jaduhñ ja'a barcohuungooty.
³¹Pero cabä Pablo yajwiinhøñ.

Mänitä Juliohajxy ñämaayyä
 møødä soldadohajxy:

—Coo yø'ø yajyohbiädøjc-hajxy
 häyaa piäyø'ögät, mhø'ögäp hajxy
 jaduhñ —nömä Pablo miänaañ.

³²Mänitä soldado ja'a
 barcohuung hajxy miäbuxøøyy.
 Mänitä barcohuung chømnøcxä
 nähgapjooty. ³³⁻³⁴Jobø'owaamb
 hänajty jaduhñ, mänitä Pablo
 jäya'ay ñämaayy:

—Joom, huuc wiingaañaxäts
 hajxy hii. Majmactsxøø hajxy tøø
 mhity jaguiay jamia'ay. Cab jaduhñ
 yhooyä coo hajxy jaguiay mjaac
 hídät, coo hajxy jaduhñ mnä'ä
 päma'ayø'owät. Hix, cab hajxy nej
 mjada'añ.

³⁵Coo ja'a Pablo jaduhñ
 quiapxpädøøyy, mänitä tsajcaagy
 quionø'cy. Mänitä Dios ñämaayy
 “Dioscujú'uyäp” jiamiøødwiinduum.
 Mänitä tsajcaagy yhaguidøøyy.
 Mänit tiägøøyy caabiä. ³⁶Coo ja'a
 Pablo jaduhñ yhiixä coo hänajty
 quiaay, mänitä jiamiøødhajxy
 jiootcugøøyy. Mänit hajxy
 piädägøøbiä caabiä. ³⁷Jue'e
 højts hänajty nhity barcojooty
 nämejtsmägo'xcudägøøghii'x cu
 majmoxtu'ug. ³⁸Coo hajxy jaduhñ
 quiaabiädøøyy, mänitä trigo hajxy
 miejjwyipøøyy, jaduhñä barco
 ween pie'tiø'øy.

³⁹Coo jioøøyy, cabä
 barcoyajyohbiädøjc-hajxy hänajty
 yhajuø'oyii. Mänitä laguun hajxy

yhijxy mejypia'a. Pa'adsäbiu'u hänäjty je'e. Mänit hajxy miänaañ coo ja'a barco hajxy jim yajnöcxät pu'uwiiing, coo hajxy jim yajmøyjädsujtspédät. ⁴⁰Mänitä pujxthajo'c hajxy miäbuxøøyy. Jiiby jaduñ miähmøøyy mejjiooty. Mänitä barcoaa'pt hajxy yajyuungøøyy, jaduñä barco hoy yó'oyät. Mänitä wit hajxy yujxojch barcojøbhaam, ja'a barco hänäjty quihdøyhajpiä. Mänitä barco tiägøøyy yohbiä. Jim ñöcxøøyy pu'uwiiing. ⁴¹Mänitä barco jie'xy nõøba'c tsäbiu'ujooty maa nõø hänäjty quia'a comän. Ja'a barcojøbhaam jaduñ je'x. Mänitä barcohøxhaam tiägøøyyä möjcujpéjtäbä. Mänit tiägøøyy ma'pä tsaybiig.

⁴²Coo ja'a soldadohajxy jaduñ yhijxy coo ja'a barco hänäjty mia'ada'añ, mänitä tsumyhäna'c-hajxy jia yagho'ogaanä, jaduñ hajxy cu quia'a päyø'cy yáhwäp. ⁴³Pero cabä Julio jaduñ miänaañ coo ja'a tsumyhäna'c-hajxy yagho'ogøøjät. Paady jaduñ miänaañ je'eguiøxpä coo ja'a Julio ja'a Pablo hänäjty yajnähwa'adsa'añ. Mänitä Julio miänaañ coo hajxy ñøøga'awó'owät, pønjatya yaaw hänäjty jajp, jaduñ hajxy ñöcxät tø'ødstuum yáhwäp. ⁴⁴Pønjatya hänäjty ca'a yaawjajp, wéenac hajxy ñöcxxy pu'uñähgøxp, møødä barcohadøjcøxp. Jaduñ højts nägøxiä ndsoocy tø'ødstuum.

28 Coo højts jaduñ nägøxiä ndø'ødspädsøømy, mänit højts nmädooyy coo ja'a naax hänäjty xiøhaty Malta. ²Mänit højtsä jäya'ay xñäxuu'ch, ja'a hajxy

hänäjty jim nä'ägä tsänaabiä. Tuub hänäjty; tøøhc hänäjty jaduñ. Mänitä jøøn hajxy yajmøjjøøyy. Mänit højts xñämaayy coo højts njøømba'axámät. ³Mänitä Pablo ja'axy tø'ødspä miämejch tu'tso'oy. Jiibiä Pablo ja'axy hänäjty piäda'agy jøønhaajiooty. Mänitä hawa'andsahñdy tu'ug piädsøømy jøønhaajiooty. Mänitä Pablo quiø'omäwødsøøyyä. ⁴Coo ja'a jäya'ayhajxy jaduñ yhijxy coo ja'a Pablo tsahñdy hänäjty miøødä quiø'ogøxp, mänit hajxy ñiñämaayyä:

—Tøø yø'ø craada'a miäjäya'ay-yagho'ogy. Coo jaduñ tøø quiädieey, paady jaduñ tsipcøxp yho'oga'añ, hoy jaduñ tøø jia tso'ogy mejjiooty.

⁵Mänitä Pablo ja'a quiø'ø xiädipty. Mänitä tsahñdy hoy quia'ay jøønhaajiooty. Cabä Pablo nej jiajty. ⁶Nømä jäya'ayhajxy hänäjty miäna'añ coog ja'a Pablo quiø'ø cu qyixta'ch, o cooc cu yho'cy. Pero coo hajxy yhijxy coo ja'a Pablo nej quia'a jajty, mänit hajxy miänaañnä cooc tyijy ja'a Pablo Dyiosä.

⁷Jimä jäya'ay hänäjty tu'ug chäna'ay mäwiingón maa højts hänäjty njøømba'axamian. Publio hänäjty xiøhaty. Gobernador ja'a Publio hänäjty jim tiuumby Malta. Coo højts jim nmejch maa ja'a tiøjcän, mänit højts jim xyajmejtstaacy tägøøgxøø.

⁸Jimä Publio tieedy hänäjty pia'amgo'na'ay. Tóoyyap hänäjty jaduñ møødä nø'tiø'onøø hänäjty miøødä. Mänitä Pablo jiiby tiøjtägøøyy maa ja'a Publio tieedy hänäjty pia'amgo'na'ayän.

Mänitä Pablo ja'a Dios pia'yaaxy.
 Mänitä Pablo ja'a pa'amjäya'ay
 ñähdoon. Mänit pia'amyajnajxä.
⁹Coo ja'a pa'amjäya'ayhajxy jaduhñ
 jim miädoyhajty Malta, mänit
 hajxy hoy yajmøcpøjcäbä nägøxiä.
¹⁰⁻¹¹Mänit højts madiu'u xñä'ä
 mooyy cøxiä wiinä. Jimä barco
 hänajty tu'ug tiøøchpojnaxy. Jue'e
 ja'a barco hänajty xiøhaty: "Ja'a
 Hametsc-huung." Alejandría ja'a
 barco hänajty tøø chohnda'agy.
 Coo højts hänajty jim tøø nhity
 Malta tägøøgpo'o, mänit højts
 nbejty barcojooty, ja'a hänajty
 xøhajpä: "Ja'a Ametsc-huung."
 Mänit højtsä jäya'ay xjiaac mooyy
 tijaty højts hänajty nmänøcxaamby
 barcojooty. Ja'a jäya'ayhajxy
 hänajty tøø miøcpøquiäbä, je'e
 hajxy jaduhñ xmiooyy. Mänit højts
 jim ndu'ubøjnä Malta.

¹²Mänit højts nmejch maa ja'a
 cajpt hänajty xiøhatiän Siracusa.
 Jim højts njaac hijty tägøøgxøø.

¹³Coo højts jim ndu'ubøjcumbä,
 mänit højts njaac mejypia'ayohy.
 Mänit højts jim nmejch maa
 ja'a cajpt hänajty xiøhatiän
 Regio. Cujaboomä jøømboj
 piädsøømy. Mänit højts jadähooc
 ndu'ubøjcumbä. Cumaaxc højts
 jim nmejch maa ja'a cajpt hänajty
 xiøhatiän Puteoli. Jim højtsä
 barco nnähmänajtuutnä. ¹⁴Mänit
 højtsä jäya'ay näje'e nbaaty. Ja'a
 Diosmädia'agy hajxy hänajty
 miäbøjpy. Mänit højts xñämaayy
 coo højts jim nmejtstä'agät maa ja'a
 tiøjc-hajxiän. Juxtujxøø højts jim
 nhijty. Mänit højts jim ndu'ubøjcy
 tecy-yo'oyhaam. Jaduhñ højts
 hänajty jim njaac nøcxa'añ Roma.

¹⁵Mänitä mäbøjpädøjc-hajxy
 Rómabä miädoyhajty coo højts
 hänajty jim nnøcxy Roma. Mänit
 højts näje'e hoy xjiøjcubaadø'øy jim
 maa hänajty xiøhatiän Foro de Apio.
 Näje'e højts hoy xjiøjcubadøøbiä
 maa hänajty xiøhatiän Tres
 Tabernas. Coo ja'a Pablo jaduhñ
 yhiixy, mänitä Dioscujú'uyäp
 yejcy. Mänit jiootcugøøyy. ¹⁶Coo
 højts jim ngoo'nä Roma, mänitä
 Pablo cuhdujt miooyyä coo ja'a
 yhamdsoo tøjc yhøxtá'awät maa
 jaduhñ yhidät. Mänitä soldado
 tu'ug yajcø'øwaanøøyyä coo ja'a
 Pablo cwieendähadøøjät, coo
 ja'a Pablo jaduhñ ñä'ä päyø'øgät.
 Mänitä tsumyhäna'c-hajxy
 jiaac yajcø'ødägøøyyäbä ja'a
 soldado-wiindsøn, ja'a copc-hajpä.

¹⁷Cudägøøgxøø ja'a Pablo
 ja'a judíos yajmøjyaaxä, ja'a
 hajxy hänajty møjhajpä maa ja'a
 chajtøjc-hajxiän. Coo hajxy hänajty
 tøø yhamugø'øy, mänit hajxy
 ñämaayyä:

—Mägu'ughajpädøjc, mänääjoch
 jim nhitiän Jerusalén, jimhöch
 häna'c näje'e xmiajch, hóyhøch
 hänajty tøø nga'a jagä cädieey,
 hóyhøchä cuhdujt hänajty
 pedyii tøø nja cudiuñ nebiä
 nhaphájtämä ndeedyhájtämhajxy
 jecy yajtsohndaäquiän. Ja'a
 nmägunaaxhájtämhajxy
 jaduhñ xmiajts. Mänitøch
 hajxy xquiø'øyejcy maa ja'a
 soldadohajxiän, ja'a hajxy yaa
 tsohmbä Roma. ¹⁸Coochä
 soldadoshajxy hänajty tøø
 xyajtøyhajtyecy, mänit hajxy jaduhñ
 ñajuøøyy cooch hänajty tøø nga'a
 cädieey. Mänit hajxy jia mänaañ

cooĉ hajxy jaduhñ xyhøxmádsät.

¹⁹Pero cabä judíoshajxy jaduhñ miánaambä cooĉ nyaghøxmádsät. Mänítøch nwiinmahñdyhajxy coo jaduhñ yhahixø'øyy cooĉ yaa ndøyhajtyégät Roma maa ja'a gobiernä wyiinduumän. Pero cáboch hánajty nmána'añ cooĉhä nmägunaaxhajxy nnäxø'øwø'øwät.

²⁰Hoorä, cooĉ jaduhñ tøø njaty tøø nhabety, páadyhøch mijts jaduhñ nmøødmädia'aga'añ. Páadyhøch cham̄ ndsumyhäña'ay coo højts judíos nmäbøjcam̄ coo ja'a ho'ogyjiäya'ayhajxy jiuypio'ga'añ — nømä Pablo miánaañ.

²¹Mänitä judíos ja'a Pablo hajxy ñämaayy:

—Cab højts tii capxy tii mädia'agy tøø nmädoyhaty maa miichcøxpän. Caj miich pøn̄ waamb tøø xñänømy, ja'a hajxy jim̄ tsohm̄bä Judea.

²²Jaduhñ højts tøø nmädoyhaty coo jäya'ayhajxy wiinduhmyhagajpt miädsiphadyii, ja'a hajxy jaduhñ mäbøjpä coo ja'a Jesús Dyiosquexiä. Paady højts nhamädoowhida'añ nej miich mwiinmayyän —nømä judíoshajxy miánaañ.

²³Mänitä judíos ja'a Pablo hajxy miøødcojyquiapxytiuuñ mänaa hajxy jadähooc ñøcxät maa ja'a Pablo hánajty yhitian. Coo yhabaaty, mänitä jäya'ayä Pablo hajxy nämay jiaanĉ nämejch. Tu'xøø ja'a Pablo jäya'ayä Diosmädia'agy yajwiingapxøøyy ja'a Jesúsøxpä, coo ja'a Dios ja'a Jesús hánajty tøø quiexy, nebiä Moisés jecy quiujahyyän, nebiä profetadøjc-hajxy jecy quiujahyyän. Jia wi'i yajniñähdugáañbä Pablo ja'a jäya'ay hánajty coo hánajty

tøyhajt miädia'agy ja'a Jesúsøxpä.

²⁴Näje'e hajxy miäbøjcy nebiatiä Pablo hánajty tøø miädia'aguiän. Näje'e hajxy quia'a mäbøjcy.

²⁵Mänitä mädia'agy hajxy tiägøøyy yajcapxiøøbiä nebiä Pablo hánajty tøø miädia'aguiän. Coo ja'a miädia'agy hajxy quia'a yajnibiaatä, mänit hajxy tiägøøyy wiimbijpä.

Mänitä Pablo miánaañ:

—Jéquiänä Dioshøspiritu ja'a profeta Isaías miägapxy. Mänit højtsä nhaphájtämä ndeedyhájttámhajxy miägapxtägajtsä:

²⁶Nøcx yø'ø jäya'ay näma'aw:

Hoy hajxy mja mädowna'añ, cab hajxy mwiinjuø'owa'añ.

Hoy hajxy mja hixa'añ, cab hajxy mmäbøga'añ.

²⁷Tøø hajxy mguhxexy. Jaduhñ hajxy mnibiäda'agyii nebiä wiindspän nebiä cuhnatpän.

Coo hajxy häxøpy tøø mga'a cuhxexy, cu mwiinjuøøyy hajxy.

Jaduhñä mhaxøøgwiinmahñdy hajxy cu mnajtshixøøyy.

Jaduhñ hajxy cu nyajnähwaach, nømä Dioshøspiritu jecy miánaañ. Tøyhajt jaduhñ miánaañ.

²⁸Mänitä Pablo jaduhñ jiaac mänaañ:

—Huuc mädown hajxy, ja'a jäya'ayhajxy ca'a judíospä, yajwiingapxø'øwáañbä Diosmädia'agy hajxy je'e coo hajxy yajñähwa'adsáañbä. Je'e hajxy mäbøcypiä mäbøgaamb.

²⁹Coo ja'a Pablo jaduhñ quiapxpädøøyy, mänitä judíoshajxy quiøxy wiimbijnä.

³⁰Mejtsjomøjtä Pablo jim̄ jiaag hijty maa ja'a tøjc hánajty

yhajoodiuquiän. Pønjaty
hänajty jim mejtsp tøghayohbiä,
mioobiä Pablo hãñaabiejt
hänajty. ³¹Hagujc jootcujcä
Pablo ja'a Diosmädia'agy hänajty

yajwiingapxø'øy ja'a Jesúscøxpä
coo ja'a Dios ja'a Jesús hänajty
yaa tøø quiexy hädaa yaabä
naaxwiin. Cabä Pablo hänajty
yhagapxtugyii ni pøn.

Romanos

1 Høøch hädaa nocy njahby, høøch Pablohajpä. Høøchä Jesucristo xyajtuumb nebiä moonsän. Hamuumdu'jóothøchä miädia'agy jaduhñ nyajtuunä. Dióshøch jaduhñ xpiädaac cooçh ndúnät apóstol. Cooçh jaduhñ nduñ apóstol, je'eduhñ nänøømby cooçhä Dios xwyiinguejxy cooçhä miädia'agy nmäwädíjtät ja'a yHuungcøxpä, coo hajxy yaa hoy xñähho'túutäm.

²Jéquiänä Dios jaduhñ miänaañ cooc ja'a yHuung hänäjty yaa quixa'añ hädaa yaabä naaxwiin. Jim jaduhñ myiñ cujaay maa ja'a Diosmädia'aguiän. Ja'a jäya'ayä Diosmädia'agy hajxy jecy yajwá'xäbä, jaaya'ayhajxy jaduhñ jecy cujahy. ³Ja'a Jesucristo ja'a Dios jaduhñ yHuunghajpy, ja'a hajxy nWiindsøn'hájtämbä. Jäya'ayhajt je'e hädaa yaabä naaxwiin neby højtshájtäm. Ja'a rey David yhap yhoc hänäjty je'e.

⁴Y coo ja'a Jesucristo yho'cy, mänit jiuypiojtagajch ja'a yEspirituhaam. Coo jaduhñ jiuypiojtagajch, jaduhñ yajnajuø'ø y coo je'e ja'a Dios yHuunghadyii, coo møcmäjaa jiaançh tehñ miøødä, coo ja'a Dioshespiritu jiaançh tehñ miøødä.

⁵Coo ja'a Jesucristo hajxy xñähho'túutäm, coo jiuypiojtagajch, páadyhøchä Dios tøø xquiexy wiinduhmyhagajpt mädia'agy-yajwa'xpä ja'a Jesucristocøxpä, weenä jäya'ayä Diosmädia'agy hajxy miäböcy, ween hajxy hoy yajtuñ, weenä Jesucristo hajxy jaduhñ wyiingudsähgø'øy. Cooçhä Dios jaduhñ tøø xquiexy, yajcähxø'py je'eduhñ cooçh jaduhñ xquiumay.

⁶Møød mijtsä Dios xyajnähdijpä coo ja'a Jesucristo miädia'agy hajxy mbanøcxäbät, mijts jim hijpä maa ja'a cajpt jaduhñ xiøhatiän Roma. ⁷Mijts hädaa nocy nyajnäjaayøøby, pønjetiä Dios yaghijpy quiø'øjooty jim Roma. Jaaya'ay mijts jaduhñ xyajnähdij coo ja'a miädia'agy hajxy mmäbøjçät. Xjiaançh tehñ chojp mijts jaaya'ay jaduhñ. Ween mijtsä hoyhajtä weenhajt xmio'oy møødä yHuung Jesucristo, ja'a hajxy nWiindsøn'hájtämbä. Ja'a Dios hajxy nDeedyhájtäm.

⁸Jayøjphøchä Dios Dioscujú'uyäp nmo'oy. Coo ja'a Dioscujú'uyäp hajxy jaduhñ nyéçäm, mänitä Jesucristo hajxy jaduhñ xñähgapxtúutäm. Wiinduhmyhagajptä mädia'agy

wiädity cooc mijtsä Diosmädia'agy
 hoy mjaančh teh̄m miäbøcy
 nägøxiä. Páadyhøchä Dioscujú'uyäp
 nyecy. ⁹Najuøøbiä Dios
 cooçh tøy nmädia'agy cooçh
 nmäna'añ coo mijts homiänaajä
 njahmiech cooçhä Dios naxy
 nba'ya'axy. Hamuumdu'jóothøchä
 Dios nmøødtuñ cooçhä
 miädia'agy nyajwa'xä ja'a
 yHuungcøxpä. ¹⁰Mayhøoc-høch
 jim̄ tøø nja nøcxa'añ maa mijtsän.
 Jadúhnhøchä Dios nja wi'i
 ñäma'ay cooçh jim̄ xyajnøcxät.
 Wehndä jaduñ miänáan̄nät.
¹¹Páadyhøch jim̄ nja wi'i ñøcxa'añ
 maa mijtsän, jaduñ mijts hoy
 nbuhédät ja'a Dioshespíritucøxpä,
 jaduñä Diosmädia'agy hajxy
 maas hoy mmäbøgät. ¹²Coo ja'a
 Diosmädia'agy hajxy näguipxy
 nmäbøjcäm, páadyhøch jim̄ nja
 wi'i ñøcxa'añ maa mijtsän,
 jaduñ hajxy hoy hamiñ haxøpy
 nnijjootcapxmøcpøjcämät.
¹³Mägu'ughajpädøjc, jadúhnhøch
 nja wi'i miäna'añ cooçh jim̄ nja
 wi'i ñøcxa'añ maa mijtsän, cábøch
 jaduñ nnä'a yajnabaadø'øy.
 Páadyhøch jim̄ nja wi'i ñøcxa'añ,
 chójpiøchä njoot jaduñ coo
 hajxy mjaac mayø'øwät maa ja'a
 Diosmädia'agy hajxy mmäbøquiän,
 nebiä mäbøjpädøjc-hajxy tøø
 miayø'øyän wiingtuumjaty,
 majátyhøchä Diosmädia'agy tøø
 nyajwa'xiän. ¹⁴Jadúhnhøchä
 Dios xwyiinguejxy cooçhä
 miädia'agy nyajwa'xät ja'a
 yHuungcøxpä wiinduhmyhagajpt
 majatiä jäya'ayhajxy griegohaam
 miädia'aguiän, møød majatiä
 jäya'ayhajxy griegohaam quia'a

mädia'aguiän. Jadúhnhøch tøø
 xwyiinguejxpä cooçhä jäya'ay
 jaduñ nägøxiä nyajwiingapxø'øwät,
 hoy hajxy jia høxpøquiä, hoy
 hajxy quia'a jagä høxpøquiä.
¹⁵Páadyhøch jim̄ nja wi'i
 ñøcxaambä Roma maa mijtsän,
 jim̄høchä jäya'ayä Diosmädia'agy
 nyajwiingapxø'øwaambä.

¹⁶Hiç, cábøchä Diosmädia'agy
 nmädsähdiuñ ja'a
 Jesucristocøxpä, je'eguiøxpä
 coo jäya'ayhajxy nägøxiä
 piäda'aga'añii hawa'adstuum
 ja'a Dios miäjaahaam, pønjetiä
 Diosmädia'agy mäbøjp ja'a
 Jesucristocøxpä. Højts judíos,
 højts ja'a Diosmädia'agy jayøjp
 nmädoodsoñ. Høxhaamä
 jäya'ayhajxy jiaac mädooyy,
 ja'a hajxy ca'a judíospä. ¹⁷Ja'a
 miädia'agyhaamä Dios hajxy
 xyajwiinjuøøyyäm coo piäda'aga'añ
 hawa'adstuum pønjaty jaduñ
 mäbøgaamb coo ja'a Dios
 yajtøjiada'añ waambaty tøø quiapxy
 tøø miädia'agy. Pøn jaduñ ca'a
 mäbøgaamb, cab je'e piäda'aga'añii
 hawa'adstuum. Jaduhñ jim̄ myiñ
 cujaay maa ja'a Diosmädia'aguiän:
 “Pønjaty jaduñ mäbøgaamb coo
 ja'a Dios yajtøjiada'añ waambaty
 tøø quiapxy tøø miädia'agy, je'e
 ja'a Dios jaduñ piäda'agaamby
 hawa'adstuum. Je'e jaduñ
 nøcxaamb Dioswiinduum.”

¹⁸Hoy piønä jaduñ ñajuø'øy
 coo ja'a Dios tsajpootypä
 yajcumädowa'añ pønjetiä Dios
 ca'a wiingudsähgøøby, møød
 pønjetiä joot ca'a tsojp coo ja'a
 Dios wyiingudsähgø'øwøøjat
 wiinghäna'c. Paadiä jioothajxy

jaduhñ quia'a tsoçy je'eguiøxpä
 coo hajxy haxøøg jiaac
 jatcø'øwa'añ. ¹⁹ Cabä tøyhajtpä
 hajxy chocy, hoyyä Dios hajxy
 tøø jia yajwiinjua'øyii nebiatiä
 Dios jaduhñ wyiinmahñdyhaty.
²⁰ Jéquiänä Dios cøxiä yhädiuunñ,
 møød yø'ø tsajt, møød hädaa
 yaabä naaxwiin, cøxiä. Coo
 hajxy jaduhñ nhíjxäm tijaty ja'a
 Dios jaduhñ tøø yhädiuunñ, paadiä
 tøyhajtpä hajxy nmøødhájtäm
 coo ja'a Dios møcmäjaa miøødä
 homiänaajä, møød coo cøxiä wiinä
 yhane'emy, hoyyä Dios hajxy nga'a
 jagä híjxäm. Jaduhñä tøyhajtpä
 hajxy nmøødhájtäm coo ja'a Dios
 hajxy nwiingudsähgøøyyämät. Cab
 jaduhñ pøn hawiinmats miäná'anät
 cooc tyijy hajxy quia'a najuø'øy coo
 ja'a Dios jyijjä. ²¹ Ja'a häna'c-hajxy
 jaduhñ haxøøg jatcøøbiä, cabä
 Dios hajxy wyiingudsähgø'øy,
 hoy hajxy jaduhñ jia najuø'øy
 coo ja'a Dios jyijjä. Ni cabä Dios
 Dioscujú'uyäp hajxy mio'oy.
 Paadiä wyiinmahñdyhajxy quia'a
 tsoobaada'añ. Y paady hajxy
 tehngajnä wyiinmahñdyhada'añ
 haxøøg. Cabä howyiinmahñdy
 hajxy hoy miøødhadaannä. ²² Hoy
 hajxy jia nibiäda'agyii nebiä
 jaanç tehñ jiajpän, cab hajxy
 tii ñä'ägädä jaty. ²³ Ja'a Dios,
 møj jaanç je'e. Hoy miänaajä
 yhity. Cab jaduhñ mänaa yho'ogy.
 Pero cabä haxøøghäna'cä Dios
 hajxy wyiingudsähgø'øwa'añ.
 Jáya'ayhahädiuunnaçy hajxy
 wyiingudsähgøøby, hoyyä
 jáya'ayhajxy jia ho'ogy; møødä
 muuxyhahädiuunnaçy hajxy
 wyiingudsähgøøbiä, møødä

tsahñdyhahädiuunnaçy, møødä
 animalhahädiuunnaçy ja'a
 hamädaaxteçpiä.

²⁴ Paady, cabä Dios waamb
 miäna'anaannä, weenä jáya'ayhajxy
 haxøøg wyiinmahñdyhaty nebiä
 jioot hajxy choquiän, coo hajxy
 cøxypänejpiä ween ñidiuunii
 hoçhähdiuunnä, ²⁵ je'eguiøxpä
 coo ja'a tøyhajtpä hajxy tøø
 quia'a mäbøcy ja'a Dioscøxpä.
 Ja'a hønnda'agymiädia'agy hajxy
 jaduhñ miäbøjpy. Cabä Dios hajxy
 wyiingudsähgø'øy. Jue'e hajxy
 wyiingudsähgøøby, tijatiä Dios
 yaa tøø quiunuu'xy hädaa yaabä
 naaxwiin. Pero, hahixøøby coo ja'a
 Dios hajxy nwiingudsähgøøyyämät
 homiänaajä. Tøyhajt jaduhñ.

²⁶ Coo häna'cä Dios hajxy quia'a
 wiingudsähgø'øwa'añ, paadiä Dios
 waamb quia'a mäna'ana'añ, ween
 hajxy hoçhähdiuunnä ñidiuünänä.
 Høxtä to'oxiøjpaadyhajxy jaduhñ
 jiatcø'øy. Cabä ñihyhap hajxy näje'e
 miøødtsäna'awaannä; quipxyjatiä
 to'oxiøjc-hajxy cøxypänejpiä
 ñidiuunii hoçhähdiuunnä.

²⁷ Jaanä jaduhñä ya'adiøjc-hajxy
 näje'ebä, cabä tio'oxiøjc
 hajxy miøødtsäna'awaannä.
 Quipxyjatiä ya'adiøjc-hajxy
 ñimiøødtsäna'awaañii.
 Hoçhähdiuunnä hajxy jaduhñ
 ñidiuunii cøxypänejpiä. Coo hajxy
 jaduhñ jiatcø'øy, paady hajxy quia'a
 niyaghoyø'øyii maa ja'a ñi'xcøxp
 maa ja'a quiopcøxphajxiän, møød
 maa ja'a wiinmahñdyçøxphajxiän.

²⁸ Coo ja'a haxøøghäna'cä
 Dios hajxy jaduhñ quia'a
 wiingudsähgø'øwa'añ, paady hajxy
 ñajtshixø'øyii ja'a Diösäm. Ja'a Dios,

cab jaduḥḥ waamb miäna'anaannä, weenä yhaxøøgwiinmahñdy hajxy tiuñ, ween hajxy jaduḥḥ jiaac jatcø'øy haxøøg. ²⁹Madiu'u hajxy haxøøg jiatcø'øy cøxypänejpäiä. Miøødtsänaabiä cuhhiñdo'oxiøjc hajxy. Møødä jäya'ajie'e hajxy yhadsoy. Cab hajxy hojiäwø'øy pø jimä miägu'ughajpähajxy cøxiä wiinä miøødä. Høxtä niyaghó'cäp hajxy. Nimiädsiphájtäp hajxy. Høhndaacp hajxy. Niñähøønøøyyäp hajxy. ³⁰Niwyiingapxéjtäp hajxy. Møødä Dios hajxy miähahaty. Nibiéjxäp hajxy. Yajcumayaamb hajxy. Hawiinjembybiä haxøøgwiinmahñdy hajxy yajcojpy. Cabä tiaj, cabä tieediä miädia'agy hajxy miäböjca. ³¹Jaanch tehḥ quiuhxex hajxy. Ni ja'a yhamdsoo mädia'agy hajxy quia'a cudiuna'añ. Cab hajxy pøn chocy miee'xy. Ni cab hajxy pøn miee'xa'añ. Cabä hojioot hajxy ñä'ägädä møødä. ³²Najuøøby hajxy jaduḥḥ coo ja'a Dios tøø yhane'emy coo hajxy haxøøgjaty quia'a jatcø'øwät nébiøch naamnä tøø nmädia'aguiän. Jaanä jaduḥḥ hajxy ñajuøøbiä, pøn jaduḥḥ haxøøg jatcøøby, quiumädownaambby hajxy je'e tehngajnä. Pero nägø'ø nädecypäiä hajxy jaduḥḥ jiatcø'øy, hoy hajxy jaduḥḥ jia najuø'øy. Høxtä xoonäacp hajxy jaduḥḥ coo wiinghäna'c-hajxy jaduḥḥ haxøøg pijaatcøøbiä.

2 ¹⁻³Najuøøyyäm hajxy jaduḥḥ coo jaduḥḥ yhahixø'øy coo ja'a Dios hajxy nägøxiä xyajcumädóowämät je'eguiøxpä coo hajxy nägøxiä haxøøg njatcøøyyäm. Cab jaduḥḥ yhahixø'øy coo

højtsä jäya'ay nnänøømämät coo hajxy hoy quia'a hity, coo hajxy ween quiumädooy. Caj pues, haa ca'a, jaduḥḥ højts haxøøg nbajatcøøyyämbä. Hix, ni pøn jaduḥḥ hahixøøby quia'a mäná'anät cooc tyijy hoy tiehḥ yhity. Paady jaduḥḥ yhahixø'øy coo ja'a Dios hajxy nägøxiä xyajcumädóowämät, je'eguiøxpä coo hajxy hoy nga'a hoyhidáanäm. ⁴Pero hojiootä Dios jiaanč tehḥ miøød, paady hajxy xquia'a tsoj tsaächtiúunäm. Chojiä jioot jaduḥḥ coo howyiinmahñdy hajxy nbadu'ubójcänät, coo ja'a nhaxøøgwiinmahñdy hajxy nnajtshixøøyyänät. ⁵Pero jii jäya'ayhajxy näje'e, jaanch tehḥ xiexä quiopca tiaatsc-hajxy. Cabä yhaxøøgwiinmahñdy hajxy ñajtsixø'øwa'añ. Y coo hajxy jaduḥḥ tehngajnä quia'a mabóögät, mänit hajxy hänäjty hanaxiä chaačhpøga'añ coo yhabaadät coo ja'a Dios ja'a cahwiindøyhäna'c hänäjty chaačhtiuna'añ. ⁶⁻¹⁰Pønä jioot nägø'ø nädecypäiä tsoj coo hoy yhidät, pønä jioot pädaacp coo jim ñöcxät Dioswiinduum, coo ja'a hoyhajtä weenhajt jim piäadät, coo jim quimayøøjät ja'a Diósäm, pues je'edsä Dios jim yajnøcxaambby. Mio'owaambiä Dios je'e ja'a hoyhajtä weenhajt. Quimayaambiä Dios jaduḥḥ. Yaghidaambiä Dios je'e jootcujc homiänaajä, hopiønä, hoy jia judíosä, hoy quia'a jagä judíosä. Pero hoyhoyyä Dios chaačhtiuna'añ pøn haxøøg jatcøøby, pønä Diosmädia'agy ca'a cudiunaamb, pøn ca'a yajmägapx ca'a yaghane'emaamb waambatiä Dios hajxy jaduḥḥ xjia hanéhäm.

Hopiõnä jaduhñ chaaçhpøga'añ, pøn̄jaty jaduhñ haxøøg jatcøøby, hoy hajxy jia judíospä, hoy hajxy quia'a jagä judíospä.

¹¹Hix, cabä Dios miøjpäda'agy pø mjudio miich, pø caj. Je'e yajcopcøøby pø mhoyhäna'c, pø caj. ¹²⁻¹⁵Højts judíoshajpä, jequiän højtsä Dios xyhanehmy neby højts hoy nguhdujthädät. Mänitä Moisés ja'a mädia'agy jaduhñ quiujahy nebiaty højts hoy nguhdujthädät. Hoorä, ja'a häna'c-hajxy ca'a judíospä, cabä mädia'agy hajxy miädooyä nebiä Moisés jecy quiujahyyän. Pero hoy hajxy quia'a jagä mädooyä, coo hajxy hamdsoojoot hoy quiudiúnät nebiä Dios jioot jia tsoquiän, cähxø'øgäp jaduhñ coo hajxy yhawáanäxä ja'a Diósäm ja'a wyiinmahñdyhaamhajxy. Jaduhñ hajxy hamdsoo ñajuø'øy pø hoy hajxy quiudiunñ, pø caj. Jaduhñ hajxy yajtuungpaady néjjiäm hajxy häxøpy tøø miädoy ja'a mädia'agy ja'a Moisés jecy quiujáhyyäbä. Y coo hajxy hoy quia'a cudiúnät neby hajxy ñajuø'øy ja'a wyiinmahñdyhaamhajxy, mänit hajxy quiumädowa'añ. Jaanä jaduhñ højtspä, højts judíospä, coo højts nga'a cudiúnät neby højtsä Dios jecy xyhanehmiän, nebiä Moisés ja'a mädia'agy jecy quiujahyyän, jaduhñ højts ngumädowaambä. Hix, pøn̄ jaduhñ cudiuum̄b nebiä Dios yhane'emiän, je'e ja'a Dios piäda'agaamby hawa'adstuum, hoyyä mädia'agy tøø quia'a jagä mädooyä nebiä Moisés jecy quiujahyyän. Pero pøn̄ jaduhñ ca'a cudiuum̄b, hoyyä mädia'agy

tøø jia mädooyä nebiä Moisés jecy quiujahyyän, cab je'eduhñ hawa'adstuum piäda'aga'añii ja'a Diósäm. Jaduhñds je'e, nägøxiä ja'a cahwiindøyhäna'c-hajxy quiumädowa'añ, hoy hajxy jia judíospä, hoy hajxy quia'a jagä judíospä. ¹⁶Mänit hajxy jaduhñ quiumädowa'añ coo ja'a Dios ja'a Jesucristo hänajty yaa quiejxtägatsa'añ hädaa yaabä naaxwiin. Mänitä jäya'ayhajxy yhixa'añii ja'a Jesucristäm nebiaty hajxy hänajty yaa tøø jiatcø'oy. Mänit hajxy yagjahmiejtsta'aga'añii nebiaty hajxy hänajty tøø wyiinmahñdyhaty hamee'ch. Jaduhñä Diosmädia'agy miäna'añ ja'a Jesucristocøxpä, ja'açh nyajwa'xypä.

¹⁷Højts judíoshajpä, naxy højts nniguiumayii coo højts njudioshaty, coo højtsä mädia'agy nmäbøcy ja'a Moisés jecy quiujáhyyäbä. Jaduhñ højts nniguiumáayyäbä coo højtsä Dios tøyhajt xquiu'ughaty, højtsyähajtiä, højts judíoshajpä. ¹⁸Nnajuøøby højts jaduhñ nebiatiä Dios jioot chocy coo højts nhoyhäna'c-hädät. Y ja'a mädia'agy ja'a Moisés jecy quiujáhyyäbä, je'e højts jaduhñ xyhawáanäp neby højts nwiimbíwät tii hoy tii mäbaad. ¹⁹⁻²⁰Niyhajuøøyyäp højts coo højts häna'c hoy nyajnähixø'øwa'añ, ja'a häna'cä Diosmädia'agy hajxy ca'a jajpä ca'a najuøøbiä. Jim̄ højtsä tøyhajt nbaady maa ja'a mädia'aguian, ja'a Moisés jecy quiujáhyyäbä. ²¹Hoorä, coo højts häna'c jaduhñ nyajnähixø'øy ja'a Diosmädia'agy, hahixøøby jaduhñ coo højtsä

Diosmädia'agy hoy ngudiúnät. Cábøchä nmägunaaxhajxy näje'e hoy quiuidiüñ. Y coo hõjts häna'c nmägapxy nhane'emy coo hajxy quia'a méedsät, hahixøby jaduhñ coo hõjts nga'a méé'tspät. Jadúhñhøchä nmägunaaxhajxy näje'e jiatcø'øy. ²²Y coo hõjts häna'c nmägapxy nhane'emy coo wiinghäna'cä tio'oxiøjc hajxy quia'a møødtsänáayyät, cab jaduhñ yhahixø'øy coo hõjts jaduhñ njatcøøbiät. Jadúhñhøchä nmägunaaxhajxy näje'e jiatcø'øy. Cab hõjts quepychech naaxpoch nwiingudsähgø'øy. Pero cab jaduhñ yhahixø'øy coo hõjts xädø'øñ nméedsät tsajtøgooty maa ja'a quepychech naaxpoch yhitiän. Jadúhñhøchä nmägunaaxhajxy näje'e jiatcø'øy. ²³Niguiumáayyap hõjts jaduhñ coo hõjtsä mädia'agy nmäbøcy ja'a Moisés jecy quiujáhyyäbä. Pero näje'eächä nmägunaaxhajxy, cab hajxy hoy quiuidiüñ. Jaduhñ hajxy yajcähxø'øgy coo ja'a Dios hajxy tøyhajt quia'a wiingudsähgø'øy. ²⁴Jaduhñ jim myiñ cujaay maa ja'a Diosmädia'aguian: "mijts judíoshajpä, coo ja'a Diosmädia'agy hajxy hoy mga'a cudiüñ, paadia Dios haxøøgjaty ñähojyii ja'a häna'c-hajxy ca'a judíospä." Tøyhajt jaduhñ.

²⁵Hõjts, judíos hõjts nmäminø'øy nmäga'awø'øy. Mänit hõjtsä Dios xquiumáyät coo hõjtsä mädia'agy hoy ngudiúnät, ja'a Moisés jecy quiujáhyyäbä. Pero coo hõjts jaduhñ hoy nga'a cudiúnät, cab hõjtsä Dios jaduhñ xquiumaya'añ.

²⁶Hoorä, ja'a häna'c-hajxy ca'a

judíospä, coo hajxy hoy quiuidiúnät nebiä Dios yhane'emiän, mänit hajxy quiumaya'añii ja'a Diósäm. ²⁷Näje'eächä nmägunaaxhajxy, cab hajxy hoy quiuidiüñ nebiä Dios yhane'emiän, hoy hajxy judíos jia mäminø'øy jia mäga'awø'øy, hoyyä mädia'agy hajxy jia mädooyä, ja'a Moisés jecy quiujáhyyäbä. Je'ehajxy mäbøcypii ca'a cumayáanap ja'a Diósäm. ²⁸Pønjaty hoy cudiumb nebiä Dios yhane'emiän, je'edsä Dios quiu'ughajpy, hoy hajxy judíos quia'a jagä mäminø'øy quia'a jagä mäga'awø'øy, hoyyä hijxtahñd hajxy quia'a jagä møødä maa ja'a ñi'xcøxphajxiän neby hõjts judíos nmøødän. ²⁹Hix, coo pøn hoy quiuidiúnät hamuumdu'joot nebiä Dios choquiän, mänit hajxy quiu'ughada'añii ja'a Diósäm, hoyyä judíoshajxy näje'e quia'a ja mäna'añ cooc tyijy hajxy jaduhñ quia'a cu'ughadyii ja'a Diósäm. Hix, quiumaabiä Dios jaduhñ pøn jaduhñ cudiumb hamuumdu'joot.

3 ¹⁻²Xchoobáatap hõjts jaduhñ madiu'u coo hõjts judíos nmäminø'øy nmäga'awø'øy, coo hõjtsä hijxtahñd nyajpäda'agy maa hõjts nni'xcøxpän, ja'a jaduhñ yajcähxø'pä coo hõjtsä Dios xquiu'ughaty. Tøyhajt jaduhñ. Haa ca'a, Dios hõjts nhap ndeedy jecy xyajcø'dägøøyyä ja'a mädia'agy ja'a Moisés jecy quiujáhyyäbä. Mänit hajxy ñämaayyä ja'a Diósäm coog hajxy hänäjty quiu'ughada'añii. ³⁻⁴Y je'enä hõjtsä Dios xquiu'ughatyñä neby hõjts jecy xyajwiinwaanøøyyän, hoy hõjts nhap ndeedy nämay hoy quia'a jagä cudiüñ neby hajxy hänäjty

tøø yhane'emyiijän ja'a Diósäm. Tøyhajt jaduñ coo ja'a Dios tiömiädia'agy. Cabä Dios mänaa yhöñda'agy, hoy hajxy nägøxiä cu nja mänáanäm cooc tyijy ja'a Dios quia'a yajtøjiaty waambaty hajxy tøø xyajwiinwaanøøyyäm. Jaduhñ jim myiñ cujaay maa ja'a Diosmädia'aguiän:

Diosteedy, hopiønä jaduñ
ñajuø'øy coo miich
myajtøjiaty waambaty højts
miich tøø xyajwiinwaanø'øy.
Coo miich põñ xñäxø'øwø'owät
cooc tyijy miich jaduñ mga'a
yajtøjiaty waambaty miich
tøø mmädia'agy,
cähxø'øgaamb jaduñ coo
je'e yhöñda'agy, ja'a miich
jaduhñ xñäxø'øwøøbiä.

⁵Jaanch tehñ yhooyä Dios yhity. Pero højts, cab højts hoy nnä'ägä hjtäm. Tøyhajt jaduñ. Paadiä, cähxø'p jaduñ coo ja'a Dios jiaanch tehñ hoyyä. Hiñ, coo højts häxøpy nhjtäm hoy, cab jaduñ häxøpy quiähxø'øgy coo ja'a Dios jaduñ hoy jiaanch tehñ yhity. Pero jaduñä jäya'ayhajxy näje'e miäna'añ cooc tyijy ja'a Dios howyiinmahñdy quia'a møødä, je'eguiøxpä coo hajxy xyajcumädoöwanäm. ⁶Pero hahixøøby jaduñ coo ja'a Dios hajxy xyajcumädoöwämät. Haa ca'a, coo ja'a Dios häxøpy hoy quia'a hity, cabä cuhdujt häxøpy miøødä coo hajxy jaduñ xyajcumädoöwämät.

⁷Hoyyä jäya'ayhajxy näje'e jia mäna'añ cooc tyijy ja'a Dios quia'a yajtøjiaty waambaty tøø quiapxy tøø miädia'agy, yajnajuøøby jaduñ coo ja'a Dios tøyhajt mänaa quia'a

höñda'agy. Jaduhñä jäya'ayhajxy nägøxiä ñajuø'øwa'añ coo jaduñ yhahixø'øy coo ja'a Dios hajxy nwiingudsähgøøyyämät. Pero coo põñä Dios jaduñ ñänómät cooc tyijy quia'a yajtøjiaty waambaty tøø quiapxy tøø miädia'agy, hahixøøby jaduñ coo je'e quiumädöwät. ⁸Näje'eächä jäya'ayhajxy xñähøøno'øy cóogøch tyijy nmäna'añ cooc tyijy jaduñ yhahixø'øy coo hajxy haxøøg njatcøøyyämät, jaduhñäc tyijy maas hoy quiähxø'øga'añ coo ja'a Dios jiaanch tehñ yhooyä. Ja'a hänä'c-høch hajxy jaduñ xñähøønoøøbiä, höñdaacp hajxy jaduñ. Hahixøøby jaduñ coo hajxy quiumädöwät.

⁹Jaanch jaduñ højts judiöspä, cab højtsä Diosmädia'agy maas hoy ngudiuñ quejee ja'a häna'c-hajxy ca'a judiöspä. Haa ca'a, tøøch nhuuc mänaambä coo hajxy jaduñ hoy nga'a nä'ägä hojiäya'ayhjtäm, coo ni põñä Diosmädia'agy hoy quia'a nä'ägä cudiuñ, ni højts judiös, ni ja'a häna'c-hajxy ca'a judiöspä. Hamdsoojoot hajxy jaduñ hoy nga'a jäya'ayhjtäm. ¹⁰Jaduñ jim myiñ cujaay maa ja'a Diosmädia'aguiän:

Ni põñ hoy quia'a wädity.

¹¹Ni põñ jaduñ quia'a wiinjuø'øwa'añ nebiä Dios wyiinmahñdyhatiän.

Ni põñä jioot quia'a päda'agy maa ja'a Diosän.

¹²Tøø ja'a jäya'ayä Diosmädia'agy hajxy nägøxiä ñajtshixøøñä. Cøjnøø cøjtu'u hajxy tøø piadu'ubøjnä. Haxøøg hajxy jiäya'ayhajnä nägøxiä.

¹³ Jaančh tehṃ yhaxøøg hajxy
 quiapxy miädia'agy.
 Jaduhñä yhaawhajxy tiocxuugy
 nebiä ho'oguiäya'ajiu
 tiocxuuguiän, ja'a tøø
 yhawá'ačhäbä.
 Jaančh tehṃ yhøhñdaacp hajxy.
 Jaduhñä haxøøgpä hajxy
 yaghity yhaawjooty nebiä
 haxøøgtsahñdyhaawän.
 Jaančh tehṃ miägapxpoj hajxy.

¹⁴ Jaančh tehṃ quiapxtägooby
 hajxy hoñejpiä nebiä jioot
 hajxy yajmädsøquiän.
 Jaančh tehṃ yhaxøøg hajxy
 ñiñänømyii.

¹⁵ Jaančh tehṃ piaquiä jootma'ad
 hajxy piaadyii, mäniä
 miäya'adiøjc hajxy nøcxy
 yagho'oga'añ.

¹⁶ Jaančh tehṃ chipyajpädø'p
 hajxy majaty hajxy wiädity.
 Chaačhtiuumbiä cu'ug hajxy
 jaduhñ.

¹⁷ Jaančh tehṃ chiptsoj hajxy.

¹⁸ Cab hajxy tiajy miay pø
 yajcumädowáanäbä Dios
 hajxy.

¹⁹ Jaduhñds je'e,
 yajcumädowaambiä Dios ja'a
 jäya'ay nägøxiä, pønä miädia'agy
 hoy ca'a cudiuunäp, møød højts
 judíos, møødä häna'c-hajxy ca'a
 judíospä. Højts judíos, højtsä pojpa
 nmaas møød, je'eguiøxpä coo
 højtsä Dios ja'a nhapä ndeedy jecy
 xjia hanehmä coo hajxy haxøøgaty
 quia'a jatcø'øwät nébiøch naamñä
 tøø ngujaayän. Pero cab højts
 jaduhñ nnä'ägädä cudiuna'añ.
²⁰ Jéquiänä Dios ja'a Moisés
 yhanehmy coo ja'a miädia'agy
 quiujáhyyäxät. Jaduhñ hajxy

nnajuøøyyäm coo hajxy nägøxiä
 hoy nga'a jäya'ayhajtäm. Ni pøn
 jaduhñ hoy quia'a cudiuna'añ ja'a
 Diosmädia'agy. Coo ja'a Jesucristo
 hajxy tøø xñähho'túütäm, paadiä
 Dios hajxy xpiäda'agáanäm
 hawa'adstuum, caj jie'eguiøxpä
 cooc tyijy ja'a mädia'agy hajxy
 hoy ngudiúunäm, ja'a Moisés jecy
 quiujáhyyäbä.

²¹⁻²⁶ Hoorä, nnajuøøyyäm
 hajxy jaduhñ coo hajxy nägøxiä
 haxøøg njatcøøyyäm, mäduhñtiä
 hajxy yaa ndsänáyyäm hädaa
 yaabä naaxwiin, møød højts
 judíos, møødä häna'c-hajxy ca'a
 judíospä. Cabä Dios pøn ñä'ägädä
 cumay. Jaduhñä jäya'ayhajxy
 näje'e miäna'añ cooc tyijy hajxy
 piäda'aga'añii hawa'adstuum
 coogä jecymiädia'agy hajxy hoy
 quiudiúnät, ja'a Moisés jecy
 quiujáhyyäbä. Pero tøø hajxy
 nhíjxäm coo ni pøn jaduhñ quia'a
 päda'aga'añii hawa'adstuum. Hoorä,
 jéquiänä Dios wyiinmaayy coo
 ja'a yHuung hänajty yaa quiexa'añ
 maa højtshajtäm. Mayhajtä
 Dios hänajty tiunaamby maa
 højtshajtäm. Jaduhñ hajxy hänajty
 xpiäda'agáanäm hawa'adstuum.
 Jim jaduhñ myiñ cujaay maa
 ja'a jecymiädia'aguiän, ja'a
 Moisés jecy quiujáhyyäbä. Pero
 cabä jecyjiäya'ayhajxy hänajty
 wyiinjuø'øy. Hojiootä Dios miøød
 coo ja'a jecyjiäya'ayhajxy quia'a
 pädaacä haxøøgtuum, hoy hänajty
 jia hawiinmatsä coo hajxy jim cu
 piädaacä, je'eguiøxpä coo hajxy
 hänajty haxøøg jiatcø'øy. Paadiä
 Dios ja'a yHuung nähdujcy,
 jaduhñä jäya'ayä pojpa quiädieey

hajxy nãhwá'adsät. Jaduhñ quiãhxø'øgy coo ja'a Jesucristo ja'a jecyjiäya'ay yajnãhwaach ja'a piojpä quiãdieeyhajxy. Høxtä jãda'anãbaadyñã ja'a Dios hajxy xyajwiinjuøøyyãm neby hajxy xpiädáacãm hawa'adstuum. Jaaná jaduhñ hajxy xyajwiinjuøøyyãmbã coo hajxy piãda'aga'añii haxøøgtuum pønjaty haxøøg jatcøøby jãda'ahaty. Paadiã Dios ja'a yHuung nãhdujcy, ja'a Jesucristo, neby hajxy jaduhñ xñãhho'túutãmät. Y coo hajxy jaduhñ nmãbøjcãmät coo ja'a Jesucristo hajxy tøø xjiaančh nãhho'túutãm, jaduhñã Dios ja'a nbojpä ngãdieey hajxy xyajñãhwáatsãm, jaduhñ hajxy xpiädáacãm hawa'adstuum, hopiønã, møød højts judíos, nãguipxy møødã hãna'c-hajxy ca'a judíospä. Mayhajtã Dios jaduhñ tiuun maa højtshãjtãm coo hajxy jaduhñ xpiädáacãm hawa'adstuum.

²⁷⁻²⁸ Cab jaduhñ yhawiinmatsã coo hajxy hamdsoo nniguiumáayyãmät. Hiḅ, coo hajxy nmãbøjcãmät coo ja'a Jesucristo hajxy tøø xñãhho'túutãm, paadiã Dios hajxy xpiãda'agãanãm hawa'adstuum, hoy hajxy nga'a jagã panøcxãm nebiã Moisés jecy quiujahyyãn. Coo ja'a Dios hajxy hãxøpy xpiädáacãm hawa'adstuum je'eguiøxpã coo ja'a jecymiãdia'agy hajxy ngudiúunãm, ja'a Moisés jecy quiujáhyyãbã, mãnit hajxy mãbøcy cu nniguiumáayyãm hamdsoo. Pero caj pøn jaduhñ piãda'aga'añii hawa'adstuum hamdsoohaam.

²⁹⁻³⁰ Tu'uquiã Dios jaduhñ. Tu'cuhdujtã Dios hajxy xyhíjxãm

nãgøxiã, møød højts judíos, møødã hãna'c-hajxy ca'a judíospä. Tøyhajt jaduhñ. Coo hajxy nãgøxiã nmãbøjcãmät coo ja'a Jesucristo hajxy tøø xñãhho'túutãm, paadiã Dios hajxy jim xpiädáacãmät hawa'adstuum nãgøxiã. ³¹ Pero cábøch nmãna'ana'añ coo ja'a jecymiãdia'agy quia'a tøyyã, ja'a Moisés jecy quiujáhyyãbã, hoy hajxy nja wiinjuøøyyãnã coo ja'a Jesucristo hajxy xpiädáacãm hawa'adstuum mãnaa hajxy tøø xñãhho'túutãm. Hiḅ, maas hoy hajxy jaduhñ nwiinjuøøyyãnã coo ja'a jecymiãdia'agy jaduhñ jiaančh tøyyã, ja'a Moisés jecy quiujáhyyãbã. Coo hajxy nmãbøjcãm coo ja'a Jesucristo hajxy tøø xñãhho'túutãm, paady hajxy xpiädáacãm hawa'adstuum, caj jie'eguiøxpã cooc tyijy ja'a jecymiãdia'agy hajxy jaduhñ hoy ngudiúunãm. Tøø hajxy jaduhñ nwiinjuøøyyãnã coo jaduhñ tiøyhajtã.

4 Højts judíos, højtsã Abraham jecy nhaphajt ndeedyhajt. ² Hoyyã Abraham hijty jiäya'ayhaty jegyhajty. Hoorã, coo ja'a Dios ja'a Abraham hãxøpy tøø piãda'agy hawa'adstuum je'eguiøxpã coo ja'a Abraham hoy jia jäya'ayhajty, mãnitã Abraham cu ñiguiumaayyã. ³ Hiḅ, paadiã Dios ja'a Abraham piãdaacy hawa'adstuum, coo ja'a Abraham ja'a Dios miãdia'agy miãbøjcã cooc ja'a Dios yajtøjiaty waambaty tøø quiapxy tøø miãdia'agy, ca'a jie'eguiøxpã coo ja'a Abraham hoy jiäya'ayhajty. Jaduhñ jim myiñ cujaay maa ja'a Diosmãdia'aguiãn. ⁴ Hoorã,

ja'a cuduum**äd**öjc, paady hajxy miäjuyii coo hajxy quiuduñ, cab jaduhñ ñä'ä mayhajtä. Jaduhñ miäbaady nebiä jäya'ayhajxy näje'e wyiinmahñdyhatiän. Yajcumayaamb hajxy ja'a Diósäm, paady hajxy jia wi'i yhojiäya'ayhada'añ. ⁵Pero pønjaty tøø miäböcy coo ja'a Dios yajtöjiaty waambaty tøø quiapxy tøø miädia'agy, je'edshajxy jaduhñ hawa'adstuum päda'agáañäp. Paady hajxy jim piäda'aga'añii coo hajxy jaduhñ miäböcy, ca'a jie'eguiöxpä coo hajxy hoy jia jäya'ayhaty. Jim hajxy jaduhñ piäda'aga'añii, hoy hajxy haxøög tøø jia jatcø'öy. Tiuumbiä Dios mayhajt jaduhñ. Coo ja'a Dios hajxy häxøpy xpiädáacäm hawa'adstuum je'eguiöxpä cooc tyijy hajxy hoy njäya'ayhajtäm, cab hajxy häxøpy nmänáañäm cooc ja'a Dios mayhajt tiuñ. ⁶Jaduhñä David jecy miänaañ cooc hajxy jootcuje yhida'añ, pønjaty jaduhñ najuøöby coo ja'a Dios hajxy xpiädáacäm hawa'adstuum ja'a miayahajthaam, hoy hajxy hänajty haxøög tøø jia jatcø'öy. Hiñ, cabä Dios miöjpäda'agy pø cabä häna'c hänajty hoy tøø jiäya'ayhaty.

⁷⁻⁸ Coo jaduhñ yhabáatnät coo Dios ja'a jäya'ay yajtøyhajtyega'añ nebiaty hajxy hänajty tøø quiädieeyän, mänit hajxy jootcuje yhida'añ pønjatiä Dios piädaacypy hawa'adstuum, pønjatiä Dios miee'xyp, pønjatiä piojhajpiä ja'a quiädieeyhajpiä hajxy yajnahwáatsäxä, nõmä David jecy miänaañ.

⁹ Jue'e ja'a David jecy ñänøøm cooc hajxy jootcuje yhida'añ, pønjatiä Dios piädaacypy hawa'adstuum, hopiønä, møødä judíoshajxy, ja'a Dios quiu'ughajpiä, møødä cajpä judíoshajxy. Je'edshajxy ca'a cu'ughajtäp ja'a Dios. Hiñ, jaduhñ myiñ cujaay maa ja'a Diosmädia'aguiän: "Coo ja'a Abraham ja'a Dios miädia'agy miäböjcä cooc ja'a Dios mänaa quia'a hõhnda'agy, paady piädaacä hawa'adstuum."

¹⁰ Hoorä, jaduhñä judíoshajxy quiuhdujthaty, yajcircuncidarhajpä ya'adiöjc-hajxy. Jaduhñ miädia'agytiägø'öy coo hijxtahnd hajxy piädáacäxä maa ja'a ñi'xcøxphajxiän. Hoorä ja'a Abraham, tøyöyäm hänajty je'e piädáacänä hawa'adstuum, cajnä hijxtahnd hänajty jaduhñ piädáacäxä maa ja'a ñi'xcøxpän. Jaduhñä tøyhajt hajxy nmøødhajtäm coo häna'c-hajxy piäda'agyii hawa'adstuum je'eguiöxpä coo ja'a Dios miädia'agy hajxy miäböjcä cooc ja'a Dios yajtöjiaty waambaty je'e tøø quiapxy tøø miädia'agy, hoyyä hijxtahnd hajxy quia'a jagä møødä maa ja'a ñi'xcøxphajxiän. ¹¹ Paadiä Abraham hijxtahnd jaduhñ piädáacäxä maa ja'a ñi'xcøxpän, jaduhñ yajnajuø'öy coo ja'a Abraham hänajty tøø piäda'agyii hawa'adstuum. Paady jim piädaacä coo ja'a Dios ja'a miädia'agy hänajty tøø miäböjcäxä. Jaduhñä Abraham piädaactsohñä hawa'adstuum, hoyyä hijxtahnd hänajty jaduhñ quia'a jagä pädáacäxänä maa ja'a ñi'xcøxpän. Pønjaty jaduhñ

mäbøjp nebiä Abraham jecy miäbøjqüiän, jaanä jaduhñ hajxy yhixáañäbä ja'a Dios nebiä Dios ja'a Abraham jecy yhiixiän, hoy hajxy quia'a jagä judíospä. Coo hajxy jaduhñ nmäbøjcäm nebiä Abraham jecy miäbøjqüiän, jaduhñ quiähxø'øgy coo ja'a Abraham hajxy nhøjxhájtäm ndecyhájtäm. ¹²Højts judíos hajxy, højtsä Abraham jecy nhaphajt ndeedyhajt. Jaaya'ay jaduhñ pädaactsohñä hawa'adstuum je'eguiøxpä coo jaduhñ miäbøjcy coo ja'a Dios yajtøjiaty waambaty hänäjty tøø quiapxy tøø miädia'agy. Tøyhajt jaduhñ. Højts judíos, jaduhñ højts nyajcuncidarhaty nebiä Abraham jecy yajcuncidarhajtjän. Pero tøyöyämä Abraham ja'a Dios ja'a miädia'agy hänäjty miäbøjcä, cahnä hänäjty yajcuncidarhaty. Højts judíos, højts jaduhñ mäbøj pä, jaanä jaduhñ højts nmäbøj pä nebiä Abraham jecy miäbøjqüiän. Jaduhñä tøyhajt hajxy nmøødhájtäm coo højtsä Abraham jecy nhøjxhajty ndecyhajty, coo højts jaduhñ nmäbøcy, højts judíos.

¹³Jéquiänä Dios ja'a Abraham ñämaayy cooc hänäjty yaa miähane'ema'añ hädaa yaabä naaxwiin näguipxy møødä yhap møødä yhoc. Ja'a Dios jaduhñ mänaañ. Paadiä Abraham jaduhñ ñämaayyä je'eguiøxpä coo ja'a Abraham ja'a Dios miädia'agy hajxy miäbøjcä, ca'a jie'eguiøxpä cooc tyijy ja'a Abraham jia cudiuuñ nebiaty hänäjty tøø yhane'emyii. Pero coo ja'a Abraham jaduhñ miäbøjcy coo ja'a Dios yajtøjiaty waambaty hänäjty tøø quiapxy tøø

miädia'agy, paadiä Abraham jaduhñ ñämaayyä coo ja'a Abraham hajxy hänäjty yaa miähane'ema'añ hädaa yaabä naaxwiin, møødä yhaphajxy, møødä yhoc-hajxy. ¹⁴Haa ca'a, jaduhñä Dios miänaañ cooc hajxy yaa miähane'ema'añ hädaa yaabä naaxwiin pønjaty jaduhñ mäbøjp coo ja'a Dios yajtøjiaty waambaty hänäjty tøø miäna'añ. Jaduhñ miädia'agytiägø'øgy coo ja'a Dios ja'a hoybä weenbä hajxy xmio'owáañäm je'eguiøxpä coo hajxy jaduhñ nmäbøjcäm. Pero coo ja'a hoybä weenbä hajxy häxøpy nbáatäm je'eguiøxpä coo ja'a jecymiädia'agy hajxy hoy ngudiúunäm, ja'a Moisés jecy quiujáhyyäbä, cab jaduhñ cu choobaaty coo ja'a Dios hajxy jaduhñ tøø xñämáayyäm coogä mayhajt hänäjty tiuna'añ coo ja'a hoybä weenbä hajxy xmio'owáañäm. Ni jaduhñ cu quia'a tsoobaaty coo højts cu nmäbøjcäm coo ja'a Dios jaduhñ yajtøjiaty waambaty tøø quiapxy tøø miädia'agy. ¹⁵Hix, cabä jecymiädia'agy hajxy hoy ngudiúunäm, ja'a Moisés jecy quiujáhyyäbä. Cooc hajxy jaduhñ nga'a cudiúunäm, paady hajxy ngädiéhyyäm. Y paady jaduhñ yhahixø'øgy coo hajxy ngumädóowämät. Pero pønjaty ja'a jecymiädia'agy tøø quia'a mädoy, ja'a Moisés jecy quiujáhyyäbä, cab hajxy jaduhñ quiümädoowa'añ, hoy hajxy tøø quia'a jagä tuñ nebiä Moisés jecy yhanehmiän.

¹⁶Coo ja'a Abraham jaduhñ jecy miäbøjcä ja'a Dios miädia'agy coo ñämaayyä coogä Abraham hajxy

hänajty yaa miähane'ema'añ hädaa yaabä naaxwiin, mөөdä yhap mөөdä yhoc-hajxy, paadiä tøyhajt hajxy nmөөdhájtäm coo ja'a Dios ja'a hoybä weenbä hajxy nägөxiä xmio'owáañäm nä'a mayhajt, coo ja'a Abraham hajxy nbamäbөjcämät coo ja'a Dios yajtөjiaty waambaty tөө miäna'añ, mөөd hөjts judíos, mөөd mijts ca'a judíospä. Coo ja'a Abraham hajxy jaduhñ nbamäbөjcämät, jaduhñ mäwiin hajxy nägөxiä xyajmäbáatäm nebiä Abraham hajxy xyhaphájtäm xyhoc-hájtäm. Jaduhñ quiähxө'ogy coo ja'a Abraham hajxy nhөjxhájtäm ndecyhájtäm. ¹⁷Hix, jaduhñ jim myiñ cujaay maa ja'a Diosmädia'aguiän cooc ja'a Dios ja'a Abraham piädaacy coo ja'a jäya'ayhajxy mayhagajtpä yhaphat yhoc-hadөjät ja'a Abraham. Y miäbөjc ja'a Abraham jaduhñ coo jaduhñ ñämaayyä coogä tio'oxiөjc hänajty quio'na'awa'añ, hoy hajxy hänajty tөө jia miäjaanä. Paadiä Abraham jaduhñ miäbөjcy, ñajuөөby hänajty jaduhñ coo ja'a Dios mäjaa miөөdä coo ja'a ho'oguiäya'ay yagjuypiojtägátsät, y coo mäjaa miөөdäbä coo ja'a jäya'ay quiunúu'xät ja'a hajxy hänajty ca'a miimb ca'a cahbnä. Y coo ja'a Abraham hajxy jaduhñ nbamäbөjcäm, jaduhñ mäwiin hajxy nmäbáatäm nebiä Abraham hajxy xyhaphájtäm xyhoc-hájtäm. Jaduhñ quiähxө'ogy coo ja'a Abraham hajxy nhөjxhájtäm ndecyhájtäm.

¹⁸⁻²¹Coo ja'a Dios ja'a Abraham jaduhñ jecy ñämaayy coogä mayhagajtpä-jäya'ayhajxy hänajty

yhaphada'añ tieedyhada'añ ja'a Abraham, tөө ja'a Abrahamhajxy hänajty miäjaanä mөөdä tio'oxiөjc. Mägo'x-jomөjtä Abraham hänajty miөөdä. Y ja'a tio'oxiөjc, ja'a Sarahajpä, cahnä hänajty ñä'ägädä huungpaadyñä, hoyyä jomөjt hänajty tөө jia nөcxnä coo yhuungpáadät. Pero cabä Abraham jaduhñ ñä'ägädä möjpädaacy coo hajxy hänajty tөө miäjaanä. Hamuumdu'jootä Abraham jaduhñ miäbөjcy nägө'ө nädecypiä neby hänajty tөө ñäma'ayijän ja'a Diosäm coog hänajty jäya'ay may yhaphat yhoc-hada'añii. Paady jaduhñ tiөjiaty. Jaduhñ jim myiimbä cujaay maa ja'a Diosmädia'aguiän cooc ja'a Abraham yhap yhoc-hajxy hänajty jiaančh tehñ miayө'owa'añ. Paadiä Abraham jaduhñ miäbөjcy, ñajuөөby hänajty jaduhñ coo ja'a Dios mäjaa miөөdä coo jaduhñ yajtөjiädät waambaty hänajty tөө quiapxy tөө miädia'agy. Mänitä Abraham ja'a Dios jaduhñ miөjpädaacy jiaančhpädaacy. ²²Coo ja'a Abraham jaduhñ miäbөjcy, paady hawa'adstuum piädaacä.

²³Jaduhñ jim myiñ cujaay maa ja'a Diosmädia'aguiän coo ja'a Abraham piädaacä hawa'adstuum je'eguiөxpä coo ja'a Dios miädia'agy miäbөjcäxä coogä Dios yajtөjiaty waambaty tөө quiapxy tөө miädia'agy. ²⁴Jaanä jaduhñ hөjtsä Diosmädia'agy xñänөmämä. Coo ja'a Dios ja'a miädia'agy hajxy jaduhñ nmäbөjcämbät, jaduhñä Dios hajxy xpiädácämbät hawa'adstuum, je'eguiөxpä coo ja'a Dios ja'a Jesucristo

yagjuypiojtägajch. Ja'a Jesucristo, je'e hajxy nWiindsøn'hájtám.

²⁵Jaaya'ay jaduñ nähdujcä coo hajxy xñähho'túutám. Jaduñnä nbojphájtám ja'a ngädieeyhájtám hajxy xyajnáhwáatsám. Y coo ja'a Jesucristo jaduñ yagjuypiojtägajtsä, jaduñ hajxy nmähmóyyänä hawa'adstuum.

5 Hoorä, coo hajxy nmäbójcäm coo ja'a Jesucristo hajxy tøø xñähho'túutám, paadiä Dios hajxy tøø xyajnáhwáatsám ja'a nbojphájtám ja'a ngädieeyhájtám. Paady hajxy xpiädáacäm hawa'adstuum. Jootcujcä Dios hajxy jaduñ xmiøødhájtám.

²Coo ja'a Jesucristo hajxy jaduñ tøø xñähho'túutám, coo je'e jiuypiojtägajch, paadiä Dios hajxy xquiumáayyänä. Paady hajxy nxoondáacäm. Y coo jaa tøyhajt hajxy jaduñ nmøødhájtám coo ja'a Dios hajxy jim xyajnöcxáanäm maa ja'a wyiinduumän, paady hajxy jootcujc nhájtám. ³⁻⁴Jaanä jaduñduhmä, xoondáacäm hajxy hädaa yaabä naaxwiin, hoy hajxy yaa nja tsaächpójcäm. Coo hajxy nmee'xtújcämät, jaduñnä Diosmädia'agy hajxy hoy ngudiúunämät. Y coo hajxy jaduñ hoy ngudiúunämät, jaduñnä tøyhajt hajxy nmøødhájtám coo ja'a Dios hajxy jim xyajnöcxáanäm maa ja'a wyiinduumän. Coo hajxy jaduñ nnajuóyyäm coo hajxy jim xyajnöcxáanäm, paady hajxy yaa nxoondáacäm, hoy hajxy yaa nja tsaächpójcäm. ⁵Coo ja'a Dios jaduñ miäna'añ coog hajxy jim xyajnöcxáanäm maa ja'a wyiinduumän, yejpiä Dios ja'a

tøyhajt jaduñ. Cab hajxy jaduñ xwyiinhóhñäm. Hix, tøø ja'a Dioshespíritu hajxy xyhadägóoyy xjiottägóoyyäm. Jaduñ hajxy xyajnáhuóoyyäm coo hajxy xjiaanč tehñ chójcäm hamuumdu'joot.

⁶Coo ja'a Dios yajnähdiij coo hánajty tøø yhabaatnä, mänitä Jesucristo hajxy hoy xñähho'túutám. Jaduñnä nbojhájtámä ngädieeyhájtám hajxy xyajnáhwáatsám. Cab hajxy hánajty hoy nnähwa'adsáanäm hamdsoo je'eguiøxpä coo hajxy hánajty ngahwiindøyhájtám. ⁷Hix, caj miich põñ xchoj nähho'tú'udät, hoy miich hánajty mja hojiäya'ayhaty.

⁸Pero ja'a Dios hajxy xjiaanč tehñ chójcäm, paadiä Jesucristo hajxy hoy xñähho'túutám, hoy hajxy hánajty nja cuboj nja cugädieeyhájtám. ⁹Hoorä, coo ja'a Jesucristo hajxy tøø xñähho'túutám, coo ja'a Dios hajxy tøø xpiädáacäm hawa'adstuum, jaduñnä tøyhajt hajxy nmøødhájtám coo ja'a Dios hajxy xquia'a yajcumäadowáanäm.

¹⁰Coo hajxy hijty cøxypänejpiä njäya'ayhájtám, jaduñ mäwiin hijty piaady néjjiäm coo ja'a Dios hajxy hijty nmädsiphájtám. Pero coo ja'a yHuung Jesucristo hajxy hoy tøø xñähho'túutám, ja'a hajxy nWiindsøn'hájtámä, paady cabä Dios hajxy nmädsiphájtänä. Hoyyä Dios hajxy xyhuunghájtänä. Tu'ugjoot tu'ugwiinmahñdiä Dios hajxy nmøødhájtänä. Y coo ja'a Jesucristo jiuypiojtägajch, coo jim ñöcxtägajch maa ja'a Tieddiän, jaduñnä tøyhajt hajxy nmøødhájtám coo hajxy jim xyajnöcxáanämä.

¹¹Jaduñnä tøyhajt hajxy

nmøødhájtämbä coo ja'a Dios hajxy xquiumáayyänä. Paady hajxy jaduhñ xquiumáayyänä coo ja'a Jesucristo ja'a nbojpä ngädieey hajxy tøø xyajñähwáatsäm. Tsøcxä hajxy jaduhñ xoondáacäm.

¹²Hoorä, tu'jäya'ay jecy quia'a cudiuundsohñ neby hánajty tøø yhane'emyijän ja'a Diósäm. Ja'a Adánhøch jaduhñ nnänøømby, ja'a hajxy jecy nhaphájtäm ndeedyhájtäm. Jaduhñä pojpä cädieey yaa chohñdaacy hádaa yaabä naaxwiin. Y coo ja'a Adán jaduhñ jecy quiädiehy, paady jaduhñ yhuuc ho'tsohmä. Y coo ja'a Adán hajxy jaduhñ jecy nhaphájtäm ndeedyhájtäm nägøxiä, paady hajxy nbagädiéhyäm, paady hajxy nbahó'cäm. ¹³⁻¹⁴Høxtä jecyjäya'abiaady hajxy haxøøg jia'ya'ayhajty, paady hajxy nägøxiä yho'cy, hoyyä Moisés hánajty quia'a jagä miññä, quia'a jagä ca'ayñä, hoyyä Dios hánajty quia'a jagä hane'emyñä coo ja'a jäya'ayhajxy hoy jia'ya'ayhádät nebiä Moisés jecy quiujahyyän, hoy hajxy hánajty quia'a jagä pagädiehbiä nebiä Adán hánajty tøø quiädieeyän. Hoyyä Dios hánajty quia'a jagä hane'emyñä coo ja'a jäya'ayhajxy hoy jia'ya'ayhádät, nägøxiä jäya'ayä pojpä cädieey hajxy hánajty miøødá. Y ja'a Adán, jaduhñ je'e jecy ñamaayyä cooc hánajty yho'oga'añ, pø cab hánajty jaduhñ quiudiuna'añ nebiä Dios hánajty tøø yhane'emiän. Y coo ja'a Moisés jaduhñ cujecy quiujahy nebiatiä Dios hánajty tøø yhane'emiän, jaduhñä jäya'ayhajxy nägøxiä ñamáayyäbä coogä Adán hajxy

hánajty nägøxiä piaho'ogaambä, pø cab hajxy hánajty quiudiuna'añ nebiä Dios hánajty tøø yhane'emiän. Ja'a jecyjäya'ayhajxy hánajty jiiibä, cahnä Moisés hánajty quiujaayñä nebiatiä Dios hánajty tøø yhane'emy, cab hajxy hánajty jaduhñ nämay ñajuø'øy coo hajxy hánajty yho'oga'añ, pø haxøøg hajxy hánajty jia'ya'ayhaty.

¹⁵Coo ja'a Adán ja'a Dios miädia'agy jaduhñ jecy quia'a cudiuunä, paady hajxy nägøxiä nhó'cäm. Pero coo ja'a Jesucristo ja'a Tieediä miädia'agy jaduhñ quiudiunä, paady hajxy nnähwaats nguhwáatsäm. Coo ja'a Jesucristo hajxy jaduhñ hoy xñähho'túutäm, paadiä Dios hajxy xpiädäacäm hawa'adstuum. Møjmayhajtä Dios jaduhñ tiuun maa højtshájtäm, pønhatiä miädia'agy tøø miäböjca ja'a Jesucristocøxpä. Paady hajxy jim xyajñøcxäänäm maa ja'a wyiinduumän. ¹⁶Coo ja'a Jesucristo hajxy hoy tøø xñähho'túutäm, jaduhñä tøyhajt hajxy nmøødhájtäm coo ja'a nbojpä ngädieey hajxy jaduhñ xyajñähwáatsäm nägøxiä, pønhaty tøø miäböcy ja'a Jesucristocøxpä. Paadiä Dios hajxy xpiädäacäm hawa'adstuum. Paady hajxy jim xyajñøcxäänäm maa ja'a wyiinduumän. ¹⁷Jaduhñds je'e, coo ja'a Adán ja'a Dios miädia'agy jecy quia'a cudiuunä, paady hijty yhawiinmatsä coo ja'a Dios hajxy xpiädäacämät haxøøgtuum. Pero tøø ja'a Jesucristo hajxy xyajñähwaats xyajcuhwáatsäm. Møjmayhajtä Dios jaduhñ tiuun. Paadiä Dios hajxy xquia'a päda'agäänäm haxøøgtuum,

pønjaty hawa'adstuum. Y paady hõjtsä hoyhajtä weenhajt yaa nbaadaañäm hädaa yaabä naaxwiin je'eguiøxpä coo ja'a Jesucristo hajxy tøø xyajnähwaats tøø xyajcuhwäätsäm.

¹⁸⁻¹⁹Mänaa ja'a Jesucristo yaa yhitiän hädaa yaabä naaxwiin, ca'xiä Tieediä miädia'agy quiuidiuunä mäduhñtiä yaa yhiyty. Y coo hajxy jaduhñ xñähho'túutäm, ja'a Tieediä miädia'agy jaduhñ quiuidiuunä. Jaduhñ hajxy xyajnähwäätsäm. Coo hajxy jaduhñ nmäbójcämät coo ja'a Jesucristo hajxy tøø xjiaančh nähho'túutäm, mänitä Dios hajxy xpiädáacämät hawa'adstuum. Hoorä, ja'a Adán, haxøøg je'e jecy jiäya'ayhajty. Cabä Adán ja'a Dios miädia'agy jecy nã'ägädä cudiuunä. Y coo ja'a Adán hajxy jecy nhaphájtäm ndeedyhájtäm, paadiä Dios miädia'agy hajxy nga'a nä'ägädä cudiunáañäm. Coo hajxy jaduhñ nga'a cudiunáañäm, paady hijty yhawiinmatsä coo ja'a Dios hajxy jiiby cu xpiädáacäm haxøøgtuum. Pero coo ja'a Jesucristo hajxy tøø xñähho'túutäm, paady hajxy jim xyajnöcxáañäm Dioswiinduum. Jaduhñä Dios mayhajt mõj jiaančh tehñ tiuuñ maa hõjtshájtäm.

²⁰⁻²¹Coo ja'a Dios jecy yhanehmy coo ja'a jäya'ayhajty hoy jiäya'ayhädät, mänitä Moisés jaduhñ quiujahy. Y coo ja'a nocy hajxy ngápxämät, ja'a Moisés jecy quiujáhyyäbä, jaduhñ hajxy nnajuóøyyämät coo hajxy njaančh cädiéhyäm. Hoy hajxy jaduhñ nja najuóøyyäm, cab hajxy nmäbójcäm. Pero xjiaančh tehñ näxúu'tsämä

Dios. Paadiä mõjmayhajt jiaančh tehñ tiuuñ maa hõjtshájtäm.

Jaduhñds je'e, coo hajxy ngädiéhyäm, paady hajxy nhó'cäm. Pero coo ja'a Dios hajxy xñäxúu'tsäm, paadiä Jesucristo hajxy hoy xñähho'túutäm, ja'a hajxy nWiindsøn hájtämbä. Jaduhñä Dios hajxy xpiädáacäm hawa'adstuum. Mänit hajxy xyagjugyhadáañäm cõjxta'axiøø nebiä Dios jiugyhatiän.

6 Cab jaduhñ nã'ägädä hahixø'øy coo hajxy nmänáañämät: "Tsøg hajxy cädiéhyäm tehngajnä. Haa ca'a, tehngajnä Dios hajxy xñäxuudsáañäm." ²Caj pues, cab jaduhñ yhahixø'øy coo hajxy tehngajnä ngädiéhyämät. Haa ca'a, tøø ja'a pojpä cädieey hajxy nnajtshixøøyyänä coo ja'a Diosmädia'agy hajxy tøø nmäbójcäm ja'a Jesucristocøxpä. ³⁻⁵Tøgä cab hajxy mnajuø'øyä coo ja'a Jesucristo hajxy nmøødhájtäm tu'ugjoot tu'ugwiinmahñdy coo hajxy tøø nnäbéjtäm ja'a Jesucristocøxpä. Y coo hajxy jaduhñ tøø nnäbéjtäm ja'a Jesucristocøxpä, jaduhñ mäwiin piaady néjjiämä Jesucristo hajxy häxøpy näguipxy tøø nmøødhó'cäm. Jaanä jaduhñ mäwiin piaatpä néjjiämä Jesucristo hajxy häxøpy näguipxy tøø nmøødnaaxtägøøyyäm. Coo ja'a pojpä cädieey hajxy tøø nnajtshixøøyyänä, jaduhñ miädia'agytiägø'øy coo hajxy jaduhñ ween nga'a jatcøøyyänä haxøøg. Y coo ja'a Dios ja'a Jesucristo yagjujypjøjtägajch ja'a miäjaahaam, mänitä Jesucristo

jugyhajt hawiinjemybiä miøødhajty. Jaaná jaduññ højtshájtämbä, coo hajxy nnäbéjtäm, jaduññ mäwiin piaady néjjiämä Jesucristo hajxy häxøpy näguipxy tøø nmøødjujypiøjtägájtäm. Paadiä jugyhajt hajxy hawiinjemybiä nmøødhájtämbä. Tøyhajt jaduññ. Jaduññä hojiootä howyiinmahñdy hajxy nmøødhájtämät. Jaduññ miädia'agytiägø'øy coo ja'a Dios hajxy xyagjugyhadaänäm cøjxta'axiøø neby je'e jugyhatiän. ⁶Coo ja'a Jesucristo hajxy tøø xñähho'túutäm cruzcøxp, mänitä nhaxøøgwiinmahñdyhajxy quiuhdägóoyyänä nebiä haxøøgwiinmahñdy hajxy nägøxiä hijty nmøødhájtäm. Coo ja'a nhaxøøgwiinmahñdyhajxy jaduññ quiuhdägóoyyänä, paadiä Jesucristo hajxy nmøødhájtänä tu'ugjoot tu'ugwiinmahñdy. Paady hajxy jaduññ tøø xñähho'túutäm, jaduññä nhaxøøgwiinmahñdyhajxy jaduññ quiuhdägóoyyänä. Jaduññä njoot hajxy nga'a pädáacänät maa ja'a haxøøgpän. ⁷Pøñä Jesucristo hánajty møødhijp tu'ugjoot tu'ugwiinmahñdy mänaa ja'a Jesucristo yho'oguiän, cabä jioot piädaacnä maa ja'a haxøøgpän. ⁸Coo hajxy nmäbøjcäm coo ja'a Jesucristo hajxy jaduññ tøø xñähho'túutäm møød coo jadähooc jiuypipøjcy, jaduññ mäwiin miäbaady néjjiäm coo ja'a Jesucristo hajxy häxøpy näguipxy tøø nmøødjujypiøjçäm. Paady hajxy jaduññ njugyhadaänäm cøjxta'axiøø neby je'e jugyhatiän. ⁹Coo ja'a Jesucristo jiuypipøjtägajch, cab jaduññ mänaa yho'tägatsaännä.

Homiänaaxøøjä homiänaadsuujä jiugyhada'añ. Tøyhajt jaduññ. ¹⁰Hix, táhoocnähho'tu'utiä ja'a Jesucristo hajxy xñähho'túutäm. Jaduññä nbojpä ngädieey hajxy tøø xyajnahwáatsäm. Y coo ja'a Jesucristo tøø jiuypipøjtägajtsnä, paady homiänaaxøøjä homiänaadsuujä ja'a Dios miøødhidaännä. ¹¹Jaanä jaduññ højtshájtämbä, coo ja'a Jesucristo hajxy nmøødhájtänä tu'ugmädia'agy, tsøg hajxy jahmiejtstáacäm coo ja'a nhaxøøgwiinmahñdyhajxy tøø quiuhdägóoyyänä. Jaduññ hajxy tsøc jahmiejtstáacämbä coo hawiinjemybiä jugyhajt hajxy nmøødhájtänä nebiä Jesucristo hánajty miøødhatiän mänaa jiuypipøjtägachän. Paadiä Dios hajxy nmøødhájtämbä tu'ugmädia'agy. ¹²Cab hajxy cøxypänejpä tsøc jatcøøyyänä. Cabä njootä ngøpc hajxy nbädáacänät maa ja'a haxøøgpän. ¹³Cabä ngø'ø ndecy hajxy nyaghanájxänät, ni ja'a nhaawhájttäm. Tsøgä Diosmädia'agy hajxy hamuumdu'joot cudiúunäm. Coo ja'a Jesucristo hajxy hánajty nmøødhájtäm tu'ugjoot tu'ugwiinmahñdy mänaa yho'oguiän, møød mänaa jiuypipøjtägachän, paadiä Dios hajxy nmøødhájtänä tu'ugjoot tu'ugwiinmahñdy. ¹⁴⁻¹⁵Paadiä Dios hajxy xquiumáayyäm coo mayhajt tøø tiuññ maa højtshájtäm, ca'a jie'eguiøxpä coo ja'a mädia'agy hajxy nja wi'l' quiudiunáanäm, ja'a Moisés jecy quiujáhyyäbä. Coo ja'a Dios mayhajt jaduññ tiuññ maa højtshájtäm, je'eçh jaduññ nnänøømby coo hajxy

xyajnáhwaats, coo hajxy
 xyajcuhwáatsám. Hoyyá Dios
 mayhajt jaduhñ tiuunñ maa
 hõjtshájtäm, cab jaduhñ nã'ägä
 hahixø'øy coo hajxy haxøøg
 njatcøøyyämät tehngajnä. ¹⁶Tsøg
 hajxy paquiä mädiáacäm neby
 hajxy yaa nguhdujthájtäm
 hädaa yaabä naaxwiin. Jaduhñä
 cuhdujt hajxy nmøødhájtäm
 coo hajxy nwiimbíiwämät
 pøn jaduhñ nmädunáanäm. Y
 jaduhñ hajxy ngudiúunäm
 nebiatiä nwiindsønhájtäm hajxy
 xyhanéhmäm. Jaaná jaduhñä
 cuhdujt hajxy nmøødhájtämbä coo
 hajxy nwiimbíiwämät mädyii hajxy
 nyajtunáanäm, ja'a Diosmädia'agy,
 o ja'a nhaxøøgwiinmahñdyhájtäm.
 Coo ja'a Diosmädia'agy hajxy
 nyajtuunämät, mäniä Dios hajxy
 jaduhñ xquiumáayyämät. Pero coo
 ja'a nhaxøøgwiinmahñdy hajxy
 nyajtuunämät, cabä Dios hajxy
 jaduhñ nmøødhájtämät tu'ugjoot
 tu'ugwiinmahñdy. Mäniä Dios
 hajxy xpiadáacämät haxøøgtuum.
 Tøyhajt jaduhñ. ¹⁷Dioscujú'uyäp
 ja'a Dios coo mijtsä Diosmädia'agy
 hamuumdu'joot myajtuunä neby
 hajxy tøø mmäbøquiän. Cahnä
 Diosmädia'agy hajxy mmädyõnä,
 haxøøg hajxy hijty mjäya'ayhaty.
¹⁸Coo mijts tøø mmäbøcy coo ja'a
 Jesucristo hajxy tøø xñähho'túutäm,
 paadiä mhaxøøgwiinmahñdy
 hajxy tøø mnajtshixøøñä. Tøø ja'a
 mjoot hajxy mbäda'agy coo hajxy
 hamuumdu'joot mhojiäya'ayhánät.
¹⁹(Páadyhöch jaduhñ nmädia'agy
 neby hajxy yaa nguhdujthájtäm
 hädaa yaabä naaxwiin, jaduhñ
 hajxy hoy mwiinjuø'owät. Cab hajxy

jaduhyyä hoy mwiinjuø'owa'añ.)
 Hijty, jaançh tehñ yhaxøøgjaty
 hajxy hijty mjäya'ayhaty.
 Cøxypänejpiä hajxy hijty mjaançh
 tehñ jiatcø'øy. Maas hanaxiä hajxy
 hánajty mjatcø'owa'añ tehngajnä.
 Pero tøø ja'a Diosmädia'agy hajxy
 mmäbøjnä ja'a Jesucristocøxpä,
 paadiä Diosmädia'agy hajxy
 myajtuunät nägø'ø nädecypiä.
²⁰Coo ja'a mhaxøøgwiinmahñdy
 hajxy hijty myajtuñ, cabä
 mjoothajxy hijty chocy coo hajxy
 hoy mjäya'ayhädät. Coo hajxy
 häxøpy tøø mhojiäya'ayhaty, tøø
 ja'a Dios hajxy häxøpy xquiumay.
²¹Hoçhähdiiuunä hajxy hijty
 mjatcø'øy. Cabä tii hoybä hajxy
 hijty mbaady. Haxøøgtuum hajxy
 hijty mnä'ägädä häda'aga'añ.
²²Paadiä Jesucristo hajxy
 tøø xñähho'túutäm, coo ja'a
 mhaxøøgwiinmahñdy hajxy
 jaduhñ mnajtshixø'owät. Tøyhajt
 jaduhñ. Paadiä Jesucristo
 hajxy mmøødhijnä tu'ugjoot
 tu'ugwiinmahñdy. Coo ja'a
 mjoot hajxy hamuumdu'joot tøø
 mbäda'agy coo ja'a Dios hajxy
 mmøødtuna'añ, paadiä hoyhajtä
 weenhajt hajxy mbaada'añ. Jaduhñ
 miädia'agytiägø'øy, coo mijtsä
 Dios hoyhänä'c xyagjada'añ nebiä
 Jesucristo yhoyhänä'c-hatiän,
 paadiä Dios hajxy xyagjugyhada'añ
 cøjxta'axiøø neby je'e jjugyhatiän.
²³Coo hajxy cøxypänejpiä
 njatcøøyyämät, cabä Dios
 hajxy jaduhñ nmøødhájtämät
 tu'ugmädia'agy, møød haxøøgtuum
 hajxy nhädáacämät. Pero tøø
 ja'a Dios mayhajt tiuñ coo
 ja'a yHuang hajxy yaa tøø

xyajnäguéjxäm, ja'a Jesucristo, ja'a hajxy nWiindsøn'hájtämbä. Hoyyä Jesucristo hajxy tøø xñähho'túútäm. Jaduhñä Dios hajxy xpiädáacäm hawa'adstuum. Coö hajxy jaduhñ nmäbójcämät, mänitä Dios hajxy xyagjugyhájtämät cøjxta'axiøø neby je'le jiugyhatiän.

7 Mägu'ughajpädøjc, mnajuøøby hajxy jaduhñ nebiä cuhdujt yaa myiñ hädaa yaabä naaxwiin. Ja'a häna'c-hajxy møjcuhdujtmøødpä, ja'a häna'c hajxy jaduhñ xyhanéhäm mäduhñtiä hajxy yaa njugyhájtäm, túhmäts. Pero coö hajxy nhó'cänä, cab hajxy jaduhñ xyhanéhmänä. ²⁻³Høxtahmdsä to'oxiøjc ja'a ya'adiøjcmøødpä, jaduhñä cuhdujt myiñ coö hajxy ñimiøødtsäna'awøøjät mäduhñtiä hajxy nämetsc jiugyhaty. Hoorä, coö ja'a to'oxiøjc wiingya'adiøjc miøødtsäná'awät, y je'enä ñihyhap jiugyhatyñä, haxøøgä to'oxiøjc jaduhñ jiatcø'owät. Hi_x, cabä cuhdujt jaduhñ myiñ coö jaduhñ jiatcø'owät. Pero coodsä ñihyhap yhó'ogät, mänitä quixy cuhdujt miøødänä coö piøjtägätsät, y cab jaduhñ ñejpiä.

⁴Hoorä, mägu'ughajpädøjc, coö mijtsä Jesucristo hänajty mmøødhity tu'ugjoot tu'ugwiinmahñdy mänaa yho'oguiän, paadiä jecymiädia'agy hajxy xquia'a hanehmñä, ja'a Moisés jecy quiujáhyyäbä. Jaanä jaduhñduhmbä, tu'ugjoot tu'ugwiinmahñdiä Jesucristo hajxy hänajty mmøødhíjtäbä mänaa juijypiøjtägachän. Tøø ja'a mjoot hajxy mbäda'agy coö jaaya'ay

hajxy mmøødtúnät. Jaduhñä Dios hajxy mmøødtúumbät. ⁵Cahnä hajxy hänajty nmäbójcäm coö ja'a Jesucristo hajxy hoy xñähho'túútäm, jaduhñä njoot hajxy hänajty nnä'ägädä pädáacäm coö hajxy hänajty jaduhñ njatcø'owáañäm hoñejpiä. Paady hajxy hijty nhäda'agáañäm jiiby møjcu'uhaam. Jaançh tehñ yhaxøøg hajxy hänajty nwiinmahñdyhájtäm. Hoyyä mädia'agy hajxy hänajty nja mädoowäm, ja'a Dios ja'a Moisés jecy ñajtsapxøøyyäbä, cab hajxy hänajty nyajtunáañäm. ⁶Cahnä Diosmädia'agy hajxy hänajty nmäbójcäm ja'a Jesucristocøxpä, tehngajnä ja'a jecymiädia'agy hajxy hänajty nja wi'i quiudiunáañäm, ja'a Moisés jecy quiujáhyyäbä. Jadúhñäc tyijy hajxy hänajty nnähwa'adsáañäm. Pero coö ja'a Jesucristo hajxy tøø xñähho'túútäm, paadiä jecymiädia'agy jaduhmbä xquia'a hanéhññä. Coö ja'a Jesucristo hajxy tøø xyajñähwáatsäm, jaduhñ hajxy xyagjugyhadaañäm cøjxta'axiøø neby jaaya'ay jiugyhatiän. Y xpiuhbéjtämä Dioshespíritu hajxy nebiä Dios hajxy hoy nmøødtúunämät.

⁷⁻⁹Cáhnøçhä jecymiädia'agy hänajty nmädoynä, ja'a Moisés jecy quiujáhyyäbä, cáboch hänajty nnajuø'øy cooçh hänajty hoy nga'a jäya'ayhaty. Pero cooçh jecymiädia'agy jaduhñ nwiinjuøøñä, páadyhøch nnajuøøñä cooçh cøxpänejpiä njatcø'øy hoñejpiä. Cooçhä haxøøgwiinmahñdy jaduhñ njaançh tehñ miøødä, páadyhøçhä njoot hijty chocy

cooĉ cøxpänejpiä njatcø'owät hoñejpiä nebiatiä jecymiädia'agy hajxy xjia hanéhäm coo hajxy nga'a jatcøöyyämät, ja'a Moisés jecy quiujáhyyäbä. Y cooĉhä jecymiädia'agy jaduhñ nmädooy, maas hanáxiøch cøxpänejpiä njaac jatcø'oy tehngajnä. Páadyhøĉhä tøyhajt nmøødä cooĉ hijty nga'awa'añ haxøøgtuum. ¹⁰Hóyhøch ndijy jaduhñ ngudiuna'añ ja'a jecymiädia'agy, ja'a Moisés jecy quiujáhyyäbä. Y cooĉ häxøpy hoy ngudiuñ, hawa'adstúmhøĉhä Dios cu xpiädaacy. Pero cápøĉhä jecymiädia'agy jaduhñ hoy nnä'ägädä cudiuna'añ, páadyhøch hawiinmats nhädá'agät haxøøgtuum. ¹¹Hoy ndíjyhøĉhä jecymiädia'agy hánajty nyajtuna'añ, ja'a Moisés jecy quiujáhyyäbä. Jaduhñ ndíjyhøĉhä Dios ja'a hoyhajtä weenhajt xmio'owa'añ. Pero cápøĉhä tøyhajt hánajty nnä'ägä møødä. Cooĉhä haxøøgwiinmahñdy hánajty nmøødä, páadyhøĉhä jecymiädia'agy hánajty hoy nga'a yajtuñ, ja'a Moisés jecy quiujáhyyäbä. Páadyhøch hánajty nga'awa'añ haxøøgtuum.

¹²Ja'a jecymiädia'agy ja'a Moisés jecy quiujáhyyäbä, je'e hajxy xyhanéhäm coo hajxy hoy njäya'ayháltämät. Jaduhñ miädia'agy neby hajxy hoy njäya'ayháltämät. Xyajnajuøöyyäm hajxy jaduhñ coo ja'a Dios howyiinmahñdy jiaanĉ tehñ miøødä. ¹³Paadiä jecymiädia'agy jaduhñ yhooyä, ja'a Moisés jecy quiujáhyyäbä. Pero

hóyhøch hánajty tøø nja mädooy, tehngájnoĉ hánajty haxøøg nwi'i jjäya'ayhatyñä. Páadyhøch hijty jii by nga'awa'añ haxøøgtuum. Hix, cápøĉhä nwiinmahñdy hánajty yhooyä. Y cooĉhä jecymiädia'agy jaduhñ nmädooy, ja'a Moisés jecy quiujáhyyäbä, maas hanáxiøch hánajty haxøøg njatcø'owa'añ.

¹⁴Jaduhñä tøyhajt hajxy nmøødháltäm coo ja'a jecymiädia'agy hajxy xyhawáanäm coo ja'a Dios howyiinmahñdy jiaanĉ tehñ miøødä. Jaanä jaduhñ hajxy xyhawáanämbä coo Dios ja'a jioot chocy coo hajxy hoy njäya'ayháltämät. Pero højts, cab højts hoy nnä'ägädä jjäya'ayháltäm, je'eguiøxpä coo højts hädaa yaabä naaxwiimbä wiinmahñdy nmøødháltäm. Hamdsoojoot hajxy jaduhñ haxøøg njatcøöyyäm. ¹⁵Jaduhñä njoothajxy jia wi'i chójcäm coo hajxy hoy njäya'ayháltämät, pero cab hajxy nnä'ägädä jadáanäm hojiäya'ayhat. Pätiidä hajxy jaduhñ coo nga'a jadáanäm. Cøxpänejpiä hajxy nwi'i jiatcøöyyäm, hoy hajxy nja najuøöyyäm coo jaduhñ yhaxøøgä. ¹⁶Nnajuøöyyäm hajxy jaduhñ coo ja'a jecymiädia'agy yhooyä, ja'a Moisés jecy quiujáhyyäbä. Jaduhñä njoothajxy jia tsójcäm coo hajxy ngudiunämät nebiatiä jecymiädia'agy hajxy xyhanéhäm. Pero cab hajxy hoy nnä'ägädä cudiunánäm. ¹⁷Pero, ca'a yhamdsoojoot hajxy jaduhñ haxøøg njatcøöyyäm. Ja'a nhaxøøgwiinmahñdy hajxy jaduhñ xyagjatcøöyyäm haxøøg. ¹⁸⁻¹⁹Cabä Diosmädia'agy hajxy

hoy ngudiunáanám hamdsoojoot, hoyyá njoothajxy jia tsójcám coo hajxy ngudiúunámät. Haxøøg hajxy njatcøøyyäm, hoyyá njoothajxy jaduñ quia'a jagä tsójcám coo hajxy jaduñ njatcøøyyämät.

²⁰⁻²¹ Hix, ja'a nhaxøøgwiinmahñdy hajxy haxøøg xyagjatkøøyyäm, ca'a yhamdsoojootä. ²² Jaduhñä Diosmädia'agy hajxy xyhanéhmäm nebiaty hajxy hoy njäya'ayhájtämät. Njoodóotyhøch ngopcóotyhøch jaduñ njuø'øy coo ja'a Diosmädia'agy jiaanç tehñ yhooyä. ²³ Nnajuøøbiøch jaduñ coöchä haxøøgwiinmahñdy njaanç tehñ miøødá. Páadyhøchä howyiinmahñdy hoy nga'a nä'ägädä yajtuna'añ. Hix, ja'a nhaxøøgwiinmähñdyhøch haxøøg xyagjäya'ayhajp. Y cábøch hoy nnä'ägädä najtshixø'owa'añ.

²⁴ Cooçh häxøpy pøn hoy xquia'a yajnähwa'adsa'añ ja'a nhaxøøgwiinmähñdyhøch, cábøchä Dios häxøpy hoy nmøødhida'añ tu'ugjoot tu'ugwiinmahñdy. Jíibyhøch häxøpy nhäda'aga'añ møjcu'uhaam. Jaanç tehñ yhoñäxúu'tsnøch häxøpy nhity. ²⁵ Pero nmóobiøchä Dios Dioscujú'uyäp coöchä Jesucristo tøø xyajnähwa'açh, ja'a hajxy nWiindsøn hájtämbä. Páadyhøchä Diosmädia'agy hoy nyajtuna'añ ja'a nhowyiinmahñdyháamhøch, hóyhøchä haxøøgwiinmahñdy nja møødnä. Je'eçh tähoocjaty haxøøg xyagjatkøøby.

8 Hoorä, hawa'adstuum hajxy nmähmøøyyänä coo ja'a Jesucristo hajxy nmøødhíjtäm tu'ugmädia'agy. Jaduhñ hajxy

ngudiúunám nebiä Diosmädia'agy hajxy xyhanéhmäm. Cab hajxy cøxypänejpiä njatcøøyyänä.

² Coo ja'a Jesucristo hajxy tøø xñähho'túutäm, paady hajxy xmiøødhíjtäm tu'ugjoot tu'ugwiinmahñdy. Paadiä Dioshespíritu hajxy xyagjyhadáanám cøjxta'axiøø nebiä Dios juygathiän. Paadiä Dios hajxy tu'ugjoot tu'ugwiinmahñdy xmiøødhidáanám homiänaajä.

Coo ja'a Jesucristo ja'a nhaxøøgwiinmahñdy hajxy tøø xyajnähwáatsäm, paady hajxy jiiiby nga'a häda'agáanänä haxøøgtuum.

³⁻⁴ Coo ja'a Dios ja'a yHuung yaa quiejxy hädaa yaabä naaxwiin, jaduñ yaa jiäya'ayhajty neby højtshájtäm. Jesucristo je'e. Pero cabä Jesucristo haxøøg jiäya'ayhajty neby højtshájtäm. Mänitä Jesucristo hajxy xñähho'túutäm. Hoyyá Jesucristo ja'a jecymiädia'agy quiudiuuñ, ja'a Moisés jecy quiujáhyyäbä. Pero højtshájtäm, cab hajxy jaduñ ngudiúunám. Paady jaduñ yahixø'øy coo hajxy ngumädóowämät. Coo ja'a Jesucristo hajxy xñähho'túutäm, quiumädoow je'e ja'a højtscøxphájtäm jaduñ. Paadiä jecymiädia'agy hajxy xquia'a hanéhmänä, ja'a Moisés jecy quiujáhyyäbä. Ja'a Dioshespíritu hajxy xpiuhbéjtänä coo ja'a Dios hajxy xmiøødhíjtämät tu'ugjoot tu'ugwiinmahñdy. Jaduhñ hajxy xpiuhbéjtämbä coo hajxy haxøøg nga'a jäya'ayhájtänät.

⁵ Y coo ja'a Dioshespíritu hajxy jaduñ xpiuhbéjtäm, paady hajxy nxiictaac nmädiaactäcäm nebiä

Diosmädia'agy hajxy maas hoy nyajtúunämät. Pero ja'a jäya'ay ja'a Dioshespíritu ja'a miädia'agy hajxy ca'a cudiunáanäbä, jaduuh hajxy xyiicta'agy miädiaacta'agy nebiä yhamdsoo wiinmahñdy hajxy yajtuñ. ⁶Põn jaduuh xiictaapc mädiaactaapc nebiä Dioshespíritu ja'a miädia'agy maas hoy miäböjcat, je'e ja'a Dios jaduuh miøødhijpy tu'ugjoot tu'ugwiinmahñdy. Je'eduh nõcxaamb Dioswiinduum. Jootcuje je'e jim yhida'añ møødä Dios. Pero põnä yhamdsoo wiinmahñdy wi'i yajtunaamb, ja'a Dios ja'a miädsip je'eduh. Haxøøgtuum je'eduh ñäl'ägä häda'aga'añ, ⁷⁻⁸je'eguiøxpä coo ja'a Dios miädsiphaty. Cabä Diosmädia'agy hoy yajtuna'añ, ni ja'a jioot jaduuh quia'a tsocy coo yajtúnät. Y cab jaduuh quiumayii ja'a Diósäm.

⁹Põnä Dioshespíritu ca'a møødhijp tu'ugmädia'agy, cabä Diosmädia'agy miäböcy ja'a Jesucristocøxpä. Coö mijts jaduuh mjaançh mäböcy, paady mijtsä Dioshespíritu mmøødhity tu'ugmädia'agy. Y coö ja'a Dioshespíritu hajxy jaduuh mmøødhity, paadiä mhaxøøgwiinmahñdy hajxy tøø mhøxhijxnä. ¹⁰Tøyhajt jaduuh coö hajxy nho'ogáanäm, je'eguiøxpä coö ja'a Adán jecy quiädiehy, ja'a hajxy jecy nhaphájtäm ndeedyhájtäm. Pero coö mijtsä Dios tøø xpäda'agy hawa'adstuum, y coö ja'a Jesucristo hajxy mmøødhity tu'ugmädia'agy, paady mijtsä Dioshespíritu xyagjughada'añ

homiänaajä nebiä Dios jiugyhatiän. Jim hajxy xyajnøcxa'añ Dioswiinduum. ¹¹Coö ja'a Dioshespíritu hajxy xmiøødhíjtäm tu'ugmädia'agy, paadiä Dios hajxy xyagjujypiøjtägatsaanäm ja'a yhEspirituhaam coö hajxy hánajty tøø nhó'cäm. Jaduuh hajxy xyagjujypiøjtägatsaanäm nebiä Jesucristo yagjujypiøjtägajtsän.

¹²Mägu'ughajpädøjc, jaduuhnds je'e, hahixøøby jaduuh coö ja'a Dioshespíritu miädia'agy hajxy nyajtúunämät. Cab jaduuh yhahixø'øy coö ja'a nhamdsoo wiinmahñdy hajxy nyajtúunänät tehngahnä. ¹³Hix, coö hajxy tehngahnä haxøøg njatcøøyyänät, cabä Dios hajxy hoy nmøødhíjtämät tu'ugjoot tu'ugwiinmahñdy. Mänit hajxy jiiby nhädäacämät haxøøgtuum. Pero coö ja'a nhaxøøgwiinmahñdy hajxy nnajtshixøøyyämät ja'a Dioshespirituhaam, jaduuhä Dios hajxy hoy nmøødhíjtänät tu'ugjoot tu'ugwiinmahñdy.

¹⁴Hix, põnjaty jaduuh puhbéjtäp ja'a Dioshespíritu nebiä Diosmädia'agy hajxy jaduuh hoy yajtúnät, Dios yhuung hajxy je'e. ¹⁵Haa ca'a, ja'a yhEspirituhaamä Dios hajxy xyhuunghájtäm, paady hajxy nnämäaayäm: "Diosteedy." Y coö ja'a Dios hajxy xyhuunghájtäm, paadiä Dios hajxy nga'a tsähgøøyyänä neby hajxy hijty ndsähgøøyyäm coö hajxy hijty xquia'a pädáacämnä hawa'adstuum. ¹⁶Y coö ja'a Dioshespíritu hajxy jaduuh xmiøødhíjtäm, jaduuhä tøyhajt hajxy xmióoyäm coö ja'a Dios hajxy xyhuunghájtänä. ¹⁷Coö

ja'a Dios hajxy xyhuunghájtám náguipxy mөөдä Jesucristo, paadiä Jesucristo hajxy jim xyajnöcxáanäm Dioswiinduum. Paadiä Dios hajxy madiu'u xquiunuu'xáanäm náguipxy mөөдä Jesucristo, nebiä Dios jecy miänaañän cooc hajxy xquiunuu'xáanäm. Y coo hajxy ndsaačhpójcämät ja'a Dioscөxpä nebiä Jesucristo chaačhpøjquiän, mänitä Dios hajxy mөj jaanč xpiädáacämät náguipxy mөөдä Jesucristo.

¹⁸Hөөч jaduhñ mänaamb coo hajxy yaa weeñtiä ndsaačhpójcäm hädaa yaabä naaxwiin. Pero cab jaduhñ ñä'ägädä mäbaady ni weeñtiä nebiä Dios ja'a hoyhajtä weenhajt hajxy jim xmio'owáanäm maa je'le wyiinduumän. ¹⁹Tijatiä Dios yaa tөө quiunuu'xy hädaa yaabä naaxwiin, jia wi'i jiöbhijxyp hajxy jaduhñ coo yhabáadät coo ja'a Dios ja'a hoyhajtä weenhajt mio'owa'añ pөnjaty jaduhñ yhuunghajpy. Mänitä Dios jaduhñ miäna'ana'añ coo hajxy nga'a tsaachpөгáanänä. ²⁰⁻²¹Coo ja'a Adán jaduhñ jecy jawyiinhajt quiädiehčohñ, ja'a hajxy jecy nhaphajt ndeedyhajtämbä, paadiä Dios ja'a tsө'ty ja'a häyohn yaa quiejxy hädaa yaabä naaxwiin. Mäduhñtiä Dios yaa tөө quiunuu'xy cөxiä hädaa yaabä naaxwiin, cөxaamb jaduhñ quiuhdägoyya'añ. Pero cabä pojpa hajxy tii miөөдä. Ca'a jie'eguiөxpä ja'a Dios ja'a tsө'ty ja'a häyohn yaa quiejxy. Hiç, jagooyyä jäya'ay pojpa cädieey hajxy miөөдä, paadiä Dios tsө'ty häyohn yaa quiejxy. Jéquiänä Dios jaduhñ wyiinmaayy coo

cөxiä wiinä chaačhpөгät náguipxy mөөдä jäya'ayhajxy, tijatiä Dios yaa tөө quiunuu'xy, hөxtä coonä yhabáadät coo ja'a Dios hajxy xquia'a yajtsaačhtiunáanänä. Mänitä Dios ja'a hoyhajtä weenhajt hajxy nägөxiä xmio'owáanäm, hөjts Dioshuung, náguipxy mөөдө tijaty ja'a Dios yaa tөө quiunuu'xy. ²²Hiç, tijatiä Dios yaa tөө quiunuu'xy hädaa yaabä naaxwiin, jia wi'i jiöbhijxyp hajxy jaduhñ coo yhabáadät coo ja'a Dioshuung ja'a hoyhajtä weenhajt hajxy mio'owa'añii. Tөyhajt jaduhñ. Pero cahnä yhabaady, jaanč tehñ chaačhpөjп hajxy jaduhñ. ²³Jaanä jaduhñ hөjtshájtämbä, jaduhñ hөjts ndsaačhpójcämbä, jaduhñ hөjts nja wi'i jiöbhíjxämbä coo yhabáadät coo ja'a Dios hajxy pedyii xmio'owáanäm ja'a hoyhajtä weenhajt. Coo Dios hajxy xyhuunghájtám, paady hajxy jaduhñ xmio'owáanäm. Mänitä Dios ja'a hawiinjemybiä ni'xcөpс xmio'owáanäm, ja'a mänaa ca'a ma'p ca'a tägoobiä. Coo ja'a Dios ja'a yhEspíritu hajxy tөө xyajnäguéjxäm, jaduhñä tөyhajt hajxy nmөөdhájtám coo ja'a Dios hajxy xjiaanč huunghájtám. Jaanä jaduhñä tөyhajt hajxy nmөөdhájtämbä coo ja'a Dios ja'a hoyhajtä weenhajt hajxy pedyii xmio'owáanäm. ²⁴Coo ja'a Diosmädia'agy hajxy tөө nmäbөjсäm ja'a Jesucristocөxpä, paady hajxy nnähwaats nguhwáatsäm, paadiä Dios hajxy xmioөdhíjtänä tu'ugjoot tu'ugwiinmahñdy. Y paady hajxy nja wi'i jiöbhíjxäm coo yhabáadät

coo ja'a Dios hajxy xmio'owáanäm ja'a hoyhajtä weenhajt cøxiä. Cahnä yhabaady, paady hajxy nja wi'i jìbħíjxämnä. Coo häxøpy tøø yhabaatnä, cab hajxy häxøpy njøbhíjxänä. ²⁵Coo hajxy hamuumdu'joot nmäbøjcäm coo ja'a Dios hajxy tøyhajt xmio'owáanäm tijaty hajxy xyajmädsójcäm, paady hajxy tsøc mee'xtújcäm mäduhñtiä hajxy yaa njaac jøbhíjxäm, hoy hajxy nej nja jajt nja habéjtäm.

²⁶Y xpiuhbéjtämä Dioshespíritu hajxy nebiaty hajxy hamdsoo nga'a jadáanäm. Hix, coo ja'a Dios hajxy naxy nja wi'i pia'ya'axáanäm, cab hajxy naxy nnajuóøyyäm tijatiä Dios hajxy nmäyujwáanämb, waambatiä Dios hajxy nmänuu'xtáacämät. Naxy hajxy jaduhñ njájtäm coo ja'a capxy ja'a mädia'agy hajxy hoy xquia'a habädsømáanäm. Nä'a møcxéjjäm nä'a ho'ogyxiéjjäm hajxy jaduhñ. Pero coo hajxy nga'a najuóøyyämät nebiä Dios hajxy nmänuu'xtáacämät, mäniä Dioshespíritu hajxy xpiuhbéjtämät. ²⁷Piuhbejpiä Dioshespíritu pønjetiä Diosmädia'agy tøø miäbøcy. Hoorä, ñajuøøbiä Dioshespíritu jaduhñ waambatiä Dios jioot chocy coo ja'a Dios hajxy nmänuu'xtáacämät. Jaduhñä Dioshespíritu hajxy xyajxiic xyajmädiäacäm ja'a ngopcootyhájtäm. Y ñajuøøbiä Dios jaduhñ waambaty hajxy nxiic nmädiäacäm ja'a ngopcootyhájtäm.

²⁸Hoorä, cab hajxy njootmayhájtämät coo Dios ja'a tsaachpä peenä hajxy xmióoyyämät. Haa ca'a, nnajuóøyyäm hajxy jaduhñ coo Dios quiøxy najuø'øy

nebiaty hajxy njajt nhabéjtäm, pønjetiä Dios tsojp. Nnajuóøyyäm hajxy jaduhñ coo Dios wyiinmay coo hajxy ween xyhoyóøyyäm cøxiä wiinä. Tøø hajxy xyajnähdíjjäm coo hajxy njäya'ayhájtämät nebiä jioot choquiän. Jaanä jaduhñ hajxy xyhawáanämbä cooc hajxy xyhuunghadáanäm. ²⁹Hix, jéquiänä Dios yhuuc najuøøbiä pønjetiä miädia'agy hänäjty mäbøgáanäxäp. Je'ehajxy jaduhñ yajnähdiä coo hajxy yhojiäya'ayhadät nebiä Jesucristo yhojiäya'ayhatiän, ja'a Dios yHuung. Jaduhñä Dios hajxy nägøxiä xyhixáanänä nebiä Jesucristo yhuchän. Højts jaduhñ xñänøømäm coo Jesucristo hajxy nbuhya'ayhadáanäm, je'leguioøxpä coo Dios hajxy xyhuunghájtäm. ³⁰Coo Dios hajxy jecy xyajnähdíjjäm coo miädia'agy hajxy nmäbøjcämät, paady hajxy tøø xyhawáanäm cooc hajxy xyhuunghadáanäm. Y coo miädia'agy hajxy jaduhñ tøø njaançh mäbøjcäm, mäniä hajxy xpiädiäacäm hawa'adstuum. Jaduhñ tøø miänaambä coogä cuhdujt hajxy nmøødhadáanäm nebiä Jesucristo miøødan.

³¹Homiädoonä hädaa mädia'agy, túhmäts. Coo Dios hajxy jecy xyajnähdíjjäm coo hajxy xyhuunghájtäm, ni pøn jaduhñ xquia'a yajtu'udägóoyyämät. Tøyhajt jaduhñ coo Dios yajtøjiada'añ tijaty tøø wyiinmay ja'a højtscøxphájtäm. ³²Xjiaançh tehñ chójcämä Dios jaduhñ. Høxtä ñähdujc ja'a yhamdsoo Uung coo hajxy hoy xñähho'tútäm nägøxiä. Jaançh tehñ miøjjä

Dios mayhajt jaduhñ tiuuñ ja'a hõjtsçxphájtám. Jaduhñä tøyhajt hajxy nmøødhájtám coo ja'a mayhajt jaduhñ tehngajnä jiaac tuna'añ. ³³Coo Dios hajxy tøø xyajñáhdíjjám coo miädia'agy hajxy nmäbõjcämät, paady hajxy pøn hoy xquia'a näxø'owø'owáanäm maa Dioswiinduumän. Haa ca'a, tøø Dios hajxy xpiädáacäm hawa'adstuum. ³⁴Ni pøn hajxy jaduhñ hoy xquia'a päda'agáanäm haxøøgtuum. Haa ca'a, jimä Jesucristo hajxy xñähgaxptúutäm Dioswiinduum. Ja'a Dios yhahooyhaambiä Jesucristo yhäña'ay. Møj jaançh jim yhity. Paady hajxy jim xñähgaxptúutäm, coo hajxy hoy tøø xñähho'túutäm, møød coo hoy tøø jiuypjøjtägach. Jaduhñ hajxy tøø xyajñähwaats tøø xyajcuhwáatsäm. ³⁵Xjiaançh tehñ chójcämä Jesucristo hajxy jaduhñ nägø'ø nädecypiä. Nnä'ägädä møødhájtämä tøyhajt hajxy jaduhñ coo hajxy mänaa xquia'a nähgue'egáanäm, hoyyä tsaachpä peenä hajxy cu nja páatäm, hoy hajxy pøn cu xjia tsaächtiúunäm ja'a Diosmädia'agyquiøxpä, hoyyä yuu hajxy cu xjia páatäm, hoyyä wit tucxy hajxy cu nja yajmaajiájtäm, hoy hajxy mäjähñdiuum cu nja wädíjtäm, hoyyä cahwiindøyhána'c hajxy cu xjia yaghó'cäm. ³⁶Jaduhñ jim myiñ cujaay maa Diosmädia'aguiän:

Xøømsuhñ hõjtsä
 cahwiindøyhána'c xjia wi'i
 yagho'oga'añ ja'a miich
 mmädia'agyquiøxpä;
 ho'cøøc hõjts xñä'ägädä
 wa'ana'añ,

nømä Dios ñämaayyä.

³⁷Hoy hajxy jaduhñ cu nja jajt, hoy hajxy jaduhñ cu nja habéjtäm, nnä'ägädä mee'xtugáanäm hajxy jaduhñ. Ja'a Jesucristo hajxy jaduhñ xñä'ägädä puhbéjtäm, je'eguiøxpä coo hajxy xjiaançh tehñ chójcäm. Naamgahnä hajxy tii xjiájtäm xyhabéjtäm, jaduhñä Jesucristo hajxy maas hoy nbanócxämät hamuumdu'joot. ³⁸⁻³⁹Coo Dios hajxy xjiaançh tehñ chójcäm, jaduhñä tøyhajt hajxy njaançh tehñ miøødhájtám coo Jesucristo hajxy tehngajnä xñä'ägädä puhbedáanäm, hoy ñejpiä hajxy cu nja jajt cu nja habéjtäm, hoy yhádaa yaabä naaxwiinä, hoy hajxy cu nja hó'cäm, hoy hajxy cu nja tågóoyyäm, hoy hajxy cu nja jaac jugyhájtäm, hoy hajxy cu nja jaac tsuxc-hájtäm, hoyyä mõjcuhdujtmøødpädøjc hajxy cu xjia mädsiphájtäm, ja'a pojhajpä täxa'ahajpä, hoyyä mõjcu'ugong hajxy cu xjia mädsiphájtäm, hoy miaajä hajxy jia hity, hoy yhádaa yaabä naaxwiinä, hoy jyim tsajpootypä, hoy jyiiby mõjcu'uhaamä. Pero cabä cuhdujt hajxy ñä'ägädä møødä maa Jesucristocøxpän, ja'a hajxy nWiindsøn'hájtämbä. Paadiä Jesucristo hajxy homiänaajä xchójcäm; paady hajxy homiänaajä xcwieendähájtäm.

9 ¹⁻³Jaançh tehñ jiootmayhájpøchä judiøscøxpähajxy je'eguiøxpä coo hajxy quia'a mäbøga'añ coo ja'a Jesucristo hajxy tøø ñähho'tu'udyii. Høøch nmägunaaxhajxy je'e. Jaançh tehñ chaachøøbiøch njoot jaduhñ coo hajxy quia'a mäbøga'añ.

Tøyhøch jaduḡn nmädia'agy. Coočhä Jesucristo nmøødhity tu'ugjoot tu'ugwiinmahñdy, jaduḡnä tøyhajt hajxy mmøødhädät coočḡ nga'a høhnda'agy. Ja'a nhamdsoo juøhñdyháamhøch jaduḡn nnajuø'oy coočḡ nga'a høhnda'agy, møød coo Dioshespřitu jaduḡn miänaambä. Jaančḡ tehḡm chaačhøøbiøch njoot jaduḡn coočḡ nmägunaaxhajxy quia'a mábøga'añ; høxtä cu nja nähhädaactu'udáanḡhøch hajxy jiiby haxøøgtuum coo Dios jaduḡn cu miänaañ. Jadúhḡnhøch nmäna'ana'añ coočḡ Jesucristo cu xquia'a yajnähwaach, pero coočḡ nmägunaaxhajxy cu yajnähwaatsä. Hoorä, ja'a Israel, højts nhap ndeedy hijty je'e jegyhajty. ⁴Jéquiänä Dios ja'a Israel miøødyajcuhdujcy coo Israel yhap yhoc-hajxy hänäjty piuhbedáañäxä. Jaančḡ huunghajtä hajxy je'eduhḡ ja'a Diósäm. Je'eduhḡ ñänøømby coo hajxy jaduḡn quiu'ughajtä ja'a Diósäm. Yhijx hajxy jaduḡn coo Dios ja'a miäjaa yajcähxø'cy jim mädøyyä maa Diostøjcän. Jaduhḡ hänäjty quiahxø'ogy nebiä jocän. Mänitä Dios hajxy yhanemä madiu'u. Mänitä Moisés quiujahy nebiatiä Dios hänäjty tøø yhane'emiän. Mänitä Dios cuhdujt yejcy nebiatiä Dios hajxy jaduḡn jim wyiingudsähgø'owät. Mänitä Dios tøyhajt yejcy coo ja'a yajnähwaatspä hajxy hänäjty yajnäguexa'añii. Coočḡ jaduḡn nnänømy coo hajxy yhaphaty yhoc-hadyii ja'a Israel, højts jaduḡn niñänøømäp, højts judiøshajxy. ⁵Højtsä jecyjiäya'ay nhaphajt

ndeedyhajt, ja'a Abraham møødä Isaac møødä Jacobo. Cumaayyä ja'a jecyjiäya'ayhajxy jaduḡn ja'a Diósäm. Y coo Cristo yaa hoy jiäya'ayhaty hädaa yaabä naaxwiin neby højtshájtäm, jaanä jaduḡn je'e yhaphájtäbä yhoc-hájtäbä ja'a Israel. Dioshajpä Cristo. Cøxiä wiinä je'eduhḡ yhane'emy homiaajä. Tsøc hajxy wiingudsähgøøyyäm homiänaaxøøjä coo miøjjä coo jiaančḡ. Tøyhajt jaduḡn.

⁶Coočḡ nmäna'añ coočḡ nmägunaaxhajxy quia'a mábøga'añ coo Jesucristo hajxy tøø xñähho'túutäm, cábøch jaduḡn nmäna'ana'añ cooc tyijy ja'a Dios ja'a miädia'agy tøø quia'a yajtøjiaty coo jecy miänaañ coogä Israel yhap yhoc-hajxy hänäjty yajnähwa'adsa'añii. Hix, coo Dios ja'a Israel jecy ñämaayy coo yhap yhoc-hajxy hänäjty yajnähwa'ads yajcuhwa'adsáañäxä, cabä Dios hänäjty miäna'ana'añ cooc tyijy hajxy hänäjty nägøxiä ñähwa'ads quiuhwa'adsa'añ. Jue'e hänäjty ñänøømby pønjaty mábøjp coo Dios yajtøjiaty waambaty tøø quiapxy tøø miädia'agy. Hix, cabä Israel yhap yhoc-hajxy nämay miábøcy coo hajxy tøø ñähho'tu'udyii ja'a Jesucristäm. Pønjaty jaduḡn mábøjp, je'eds hajxy jaduḡn tøyhajt haphájtäp hoc-hájtäp ja'a Israel. Pønjaty jaduḡn ca'a mábøjp, cab hajxy tøyhajt yhaphaty yhoc-hadyii ja'a Israéläm. ⁷Jaanä jaduḡnä Abraham ja'a yhuunghajxy je'ebä. Tu'quiiä jaduḡn ñänøømä ja'a Diósäm coo hoyhajt weenhajt hänäjty mio'owáañäbä nebiä Abraham hänäjty mio'owa'añiiän.

Ja'a Abraham ja'a yhuung tu'ugpä, cab je'e jaduñ nänøømä coo tii mio'owa'añii. Jaduñ jim myiñ cujaay maa Diosmädia'aguiän: “Ja'a miich mhuung Isaac, je'e yhap yhoc-höch jaduñ nhixäänäp nej miich mhap nej miich mhocän”, nømä Dios ja'a Abraham jecy nãmaayy. ⁸Jaduñä tøyhajt hajxy nmøødhájtäm coo Isaac yhap yhoc-hajxy quiu'ughájtäxä ja'a Diósäm. Paadiä Isaac yhap yhoc-hajxy jaduñ quiu'ughájtäxä ja'a Diósäm coo Abraham jecy yhawaanä coo tio'oxiøjc hánajty yhuungpaada'añ. Coo ja'a Abraham jaduñ yhawáanäxä, tøø ja'a Sara hánajty miäjay, y cabä yhuung hánajty ni tu'ugtä. ⁹Hix, cahnä Sara hánajty yhuungpaadyñä, tøyymä Dios ja'a Abraham hánajty jaduñ nãma'ay: “Coo jaduñ yhabáadät, mänit miich mhixa'añ coočhä nmädia'agy nyajtøjiada'añ. Co'na'awaambä mdo'oxiøjc Sara. Ya'ayhäna'c jaduñ minaañb ca'awaamb”, nømä Dios ja'a Abraham jecy nãmäaguumbä. Ja'a Isaac jaduñ nänøømä coo hánajty myina'añ quia'awa'añ.

¹⁰Jaana jaduñä Rebécabä, ja'a Isaac tio'oxiøjc, coo je'e quio'naabiä, mänitä pigäna'c-hajxy myiñguiah tähoocmechpä. ¹¹⁻¹²Cahnä Rebeca hánajty quio'na'ayñä, tøyym hánajty nãma'ayii ja'a Diósäm coo ja'a Jacobo ja'a Esau hánajty yhane'ema'añ, hoyyä Esau jayøjp jia mejch, hoyyä Jacobo jia jaac tehñ miejch høxhaam. Paadiä Dios jaduñ miänaañ, tøyym hánajty wyiinmahñdyhaty

coo Jacobo yhap yhoc-hajxy hánajty quiu'ughadäänäxä ja'a Diósäm, møød coo Esau yhap yhoc-hajxy hánajty jaduñ quia'a cu'ughadäänäxä, hoy hánajty quia'a jagä cähxø'ogyñä pø hoyhäna'c-hadaambä Rebeca yhuunghajxy hánajty, pø caj. Hix, hamdsoojootä Dios jaduñ wyiinmahñdyhajty nebiä Jacobo hánajty yhixa'añ, nebiä Esau hánajty yhixa'añ. ¹³Jaduñ jim myiimbä cujaay maa Diosmädia'aguiän: “Ndsøjc-höchä Jacobo møødä yhap møødä yhoc-hajxy, páadyhöch hajxy nnäxuudsa'añ. Pero ja'a Jacobo yhajch, ja'a Esau, cábøch je'e nnäxuudsa'añ. Ni cábøchä yhap yhoc-hajxy jaduñ nnäxuudsäänäbä”, nømä Dios cujecy miänaañ.

¹⁴Pero cab hajxy hawiinmats waamb nmänäänämät cooc tyijy Dios hoy quia'a wiinmahñdyhajty coo miänaañ coogä Jacobo yhap yhoc-hajxy hánajty piuhbedäänäxä, møød coogä Esau yhap yhoc-hajxy hánajty quia'a puhbedäänäxä. Caj pues. Haa ca'a, hoyyä Dios jaduñ wyiinmahñdyhaty homiänaaxøøjä. ¹⁵Hix, jaduñä Dios ja'a Moises jecy nãmaayy: “Nnäxú'chpøch nba'häyøobiøch pønjätyhöch njoot chojpy cooč jaduñ nnäxúdsät, cooč jaduñ nba'häyówät. Cábøch nnäxuudsa'añ pønhöch njoot quia'a tsojpy cooč nnäxúdsät.” ¹⁶Coo Dios jaduñ miänäxuuch, jaduñ hajxy nyajnajuøyym coo hojiot jiaanč tehñ miøødä. Hamdsoo nãgapxy pøn nãxuudsaañby. Hamdsoojoot jaduñ miänäxuuch,

caj jie'eguiøxpä coo hajxy cu nja nämáayyäm coo hajxy ween xñäxú'utsäm, coo hajxy ween xpia'häyóowäm. Ni quia'a je'eguiøxpä coo njoot hajxy nbädáacäm coo hajxy hoy njäya'ayhájätäm. 17-18 Hix, ñäxuu'chpä Dios pøn ñäxuudsaaaby. Jaanä jaduhnduhmbä, yajnähdiipiä Dios coo quiopc-hajxy xiéxät pønä Dios jaduhñ yajmädsopy coo quiopc-hajxy jaduhñ xiéxät. Jaduhñä Dios ja'a gobiernä ja'a quiopc jecy yajxexä, ja'a hñajty jim hanehmbä Egiptonaaxooty. Tøyhajt jaduhñ. Haa ca'a, jaduhñ jim myiñ cujaay maa Diosmädia'aguiän coo Dios ja'a gobiernä jaduhñ ñämaayy: “Páadyhöch miöch tøø nyajmøjtägø'øy, tøøch hñajty nwiinmay coöchä nmäjaa hñajty nyajcähxø'øga'añ maa mijts mnaax maa mijts mgajptän. Cooch ngu'ug jim nhøxwoobädsómät maa mijts mnaax maa mijts mgajptän, jaduhñhöch nmäjaa njaanç tehñ yajcähxø'øga'añ. Jaduhñä mädia'agy wiädita'añ wiinduhmyhagajpt ja'a høøchcøxpä coöch njaanç tehñ miøjjä coöch njaanç tehñ jiaançhä”, nømä gobiernä jecy ñämaayy.

19 Jii häna'c-hajxiäda'a näjele miäna'ana'añ: “Cabä Dios wyiinhandy yhoyyä je'eguiøxpä coo hajxy xñäxø'øwøyyäm cooc højts pojpä cädieey nmøødhájätäm. Haa ca'a, hamdsoo højts ngopc tøø xyajxéjäm. Paady højts pojpä cädieey nmøødhájätäm.” 20 Pero cab jaduhñ yhahixø'øy coo pøn jaduhñ miäná'anät. Tøyhajt jaduhñ.

Caj pues. Haa ca'a, yaa hajxy njäya'ayhájätäm. Cabä cuhdujt hajxy nnä'ägädä møødhájätäm ni weeñtiä coo Dios hajxy nhadsóowämät. Hix, jaduhñ mäwíinäts højts Dios xyajnähdiijäm nebiä tu'tspojtspädøjc-hajxy piochän nebiä jioot hajxy yajmädsociän. Coo tu'ts quiapxø'ögät, cabä pojtspä hawiinmats ñämä'awät: “Tiich yajxón coo xquia'a pojch.” Caj pues, cab jaduhñ yhahixø'øy coo tu'ts jaduhñ miäná'anät. 21 Haa ca'a, miøødä tu'tspojtspädøjc cuhdujt hajxy jaduhñ coo tu'tsnaax hajxy yajtúnät nebiä jioot hajxy yajmädsociän. Pø chojpiä jioothajxy jaduhñ coo tsowdu'ts hajxy piódsät, pues miøødä cuhdujt hajxy jaduhñ coo hajxy jaduhñ piódsät. Y pø chojpiä jioothajxy jaduhñ coo cuhga'aybä hajxy piódsät, jaduhñä cuhdujt hajxy miøødäbä coo hajxy jaduhñ piódsät. Jaduhñ mäwíinädsä Dios cuhdujt miøødäbä coo hajxy xyajnähdiijämät nebiä jioot choquiän. Coo jioot jaduhñ chógät coo hajxy xpiädáacämät hawa'adstuum, pues miøødä cuhdujt jaduhñ coo hajxy jim xpiädáacämät. Y coo jioot jaduhñ chógät coo hajxy xpiädáacämät haxøøgtuum, jaduhñä cuhdujt miøødäbä coo hajxy jaduhñ jim xpiädáacämät.

22 Y jaanä jaduhñä Dios cuhdujt miøødäbä coo jaduhñ miee'xtujcy ja'a cahwiindøjiäya'aguiøxpä. Miøødä Dios cuhdujt jaduhñ coo ja'a cahwiindøjiäya'ayhajxy yajcumädwøøjät. Pero cab hajxy choj cumädowa'añ, hoy

hajxy tøø jia cädieey hanaxiä.
 Hawiinmats hit jaduñ coo hajxy
 paquiä quiümädöwät. Y coo Dios
 hänäjty yajcumädowa'añ ja'a
 quiädieeguiøxpähajxy, hijxtahñdä
 Dios jaduñ yajcähxø'øgaamby
 coo mäjaa møc miøødä.
 Jaduñ yajcähxø'øgaambä coo
 haxøøghäna'c-hajxy tehngajnä
 quia'a mee'xtuga'añii. ²³⁻²⁴ Coo Dios
 jaduñ jecy wyiinmahñdyhajty coo
 haxøøghäna'c yajcumädowa'añ,
 paady jaduñ wyiinmahñdyhajty
 neby højts jaduñ hoy
 nwiinjuøyyämät coo jaduñ
 yhawiinmatsä coo haxøøghäna'cä
 quiädieey hajxy quiümädöwät.
 Jaanä jaduñduhmbä, paadiä Dios
 jäya'ay näje'e quia'a yajcumädoy,
 je'eguiøxpä coo hajxy ñäxuučhii
 ja'a Diósäm, hoy hajxy hänäjty
 tøø jia cädieey. Jequiän hajxy
 jaduñ yajnähdiijä coo hajxy
 jim ñøcxät Dioswiinduum.
 Højts jaduñ xñänøømäm coo
 Dios hajxy tøø xyajnähdijjäm
 coo hajxy jim xyajñøcxäänäm
 wyiinduum, pønjaty hajxy
 tøø xyajwiinwaanøøyyäm
 coo hajxy xyhuunghadaänäm,
 møødä judíoshajxy, møødä
 cajpä judíoshajxy. Jaduñ
 hajxy nwiinjuøyyäm coo
 Dios møjmayhajt tøø tiuñ maa
 højtsøxphájtäm, møød coo hojioot
 jiaanč tehñ miøødä. ²⁵ Maa Oseas
 nocy jecy quiujahyyän, jaduñ
 jim myiñ cujaay coo Dios jaduñ
 miänaañ:

Yø'ø jäya'ayhajxy cajpä judíos,
 cábøch hijty ngu'ughaty.
 Cáboch hijty ndsocy. Pero
 tøøch nyajnähdijnä

cooçh ngu'ughadaänä.

Ndsójnäbøch jaduñ.

²⁶ Wiingtuum miänáangumbä:

“Cábøch mijts hijty
 ngu'ughaty.”

Pero jaduñhájtøch mijts
 nhuunghadaänä, homiaajä
 hajxy mhity,

nømä Dios miänaañ. Homiänaajä
 Dios yhyty. ²⁷ Y ja'a Isaías, jaduñ
 je'e jecy quiujahy: “Yø'ø judíoshajxy,
 hoy hajxy jaduñ jia nämayyä
 nebiä tsäbiu'ujän, näweeñtiä
 hajxy jaduñ cho'oga'añ. ²⁸ Ja'a
 jäya'ayhajxy yaa cädiehbiä hädaa
 yaabä naaxwiin, mobädajpä hajxy
 yajcumädowa'añii ja'a Diósäm.
 Tähooc-yajcumädoybä hajxy
 yajcumädowa'añii hoyhoy.” ²⁹ Jaanä
 jaduñä Isaías jecy miädiáaccumbä
 ja'a judíoscøxpähajxy:

Cøxiä wiinä Dios yhane'emy
 homiaajä. Coo højtsä
 Dios häxøpy tøø xquia'a
 näxúu'tsäm,
 tøø højts häxøpy ngøxy
 cuhdägóoyyäm, nebiä
 jäya'ayhajxy jecy
 quiuhdägooyyän,
 ja'a hajxy hijty jegyhajty
 tsänaabiä maa cajpt hijty
 xiøhatiän Sodoma møød
 Gomorra.

³⁰ Nébiøch cham tøø ngujaayän,
 jequiän højtsä Dios xyajnähdijy coo
 højts hänäjty xquiu'ughada'añ, højts
 judíoshajpä. Pero, ja'a jäya'ayhajxy
 cajpä judíos, cabä Dios hijty je'e
 ñäxuučh. Ni ja'a jäya'ayhajxy hijty
 quia'a näxúu'tsäbä, ja'a hajxy
 hänäjty ca'a tajp ca'a maabiä maa
 ñähwaatstaact hajxy piáadät. Pero
 cahnä jiegø'øy coo mädia'agy

hajxy tøø miädoonä coogä
 Dios ja'a Jesucristo yaa quiejxy,
 cooc ja'a Jesucristo hajxy hoy
 xñähho'túutäm. Cooc hajxy jaduhñ
 miädooy, näje'e hajxy miäbøjcy;
 paady hajxy tøø nähwa'aäch, paady
 hajxy tøø quiuhwa'aäch. ³¹⁻³²Pero
 yø'ø judíoshajxy, jadúhñäc
 tyijy hajxy hijty nähwa'adsa'añ
 je'eguiøxpä cooc tyijy hajxy
 hoy quiudiuñ nebiä Moisés jecy
 quiujahyyän. Pero cab hajxy jaduhñ
 ñälä nähwaach je'eguiøxpä coo
 tøyhajt hajxy quia'a møødä coo Dios
 miäyajnähwa'aäch je'eguiøxpä coo
 hojioot miøødä, ca'a jie'eguiøxpä
 coo jäya'ayhajxy hoy jia wi'i
 jäya'ayhada'añ. Paadiä judíoshajxy
 quia'a nähwaach je'eguiøxpä coo
 hajxy quia'a mäßøjcy coo hajtjä
 Jesucristo xñähho'túutäm. Jaduhñ
 mäwiin hajxy jiaty nebiä häna'c
 quiuhnepiän tsaanähgøxp päyø'cujc.
 Cab hajxy ñä'ägä mech maa
 hajxy hänajty jia wi'i ñøcxa'añän.
³³Tøøyyämä Dios hänajty ñajuø'øy
 coo judíoshajxy hänajty quia'a
 mäßøga'añ coo Dios ja'a Jesucristo
 yaa quiejxy hädaa yaabä naaxwiin.
 Jimä cajpt tu'ug xiøhaty Sión. Jimä
 judíoshajxy chána'ay, ja'a Dios
 quiu'ughajpiä. Jaduhñ jim myiñ
 cujaay maa Diosmädia'aguiän:

Jímhøch ngu'ug chána'ay maa
 cajpt jaduhñ xiøhatiän Sión.
 Jímhøchä tsa tu'ug
 nbäda'aga'añ, weenä
 jäya'ayhajxy jim quiuhnepy
 maa tsaajän, ween hajxy jim
 quiäday.

Ja'a Jesucristo jaduhñ mäbaat
 neby yø'ø tsaajän. Hix, pøn jaduhñ
 ca'a mäßøjcy coo hajtjä Jesucristo

hoy xñähho'túutäm, jaduhñ je'e
 miäbaady nebiä häna'c cuhnejpän.
 Quiumädoowaamby je'e. Pero
 pøn jaduhñ jaančh mäßøjcy ja'a
 Jesucristocøxpä, je'eds hodium
 päda'agäänäp.

10 Mägu'ughajpädøjc, jia
 tsójpiøch njoot jaduhñ
 coo judíoshajxy nähwá'adsät.
 Jadúhñhøchä Dios nja pa'ya'axy
 jaaya'aguiøxpä. Haa ca'a,
 judíohájpyøch høøchpä. ²Jia wi'i
 quiudiunaambiä Diosmädia'agy
 hajxy. Tøyhajt jaduhñ. Pero
 cabä Diosmädia'agy hajxy hoy
 wyiinjuø'øy. ³Hamdsoo hajxy jia
 wi'i jajniñähwa'adsa'añii yhamdsoo
 cuhdujtcøxpä. Hix, cab hajxy
 jaduhñ wyiinjuø'øy tiiguiøxpä
 Dios ja'a jäya'ay piäda'agy
 hawa'adstuum. Paady hajxy jim
 piäda'agyii coo Dios ja'a miädia'agy
 hajxy miäßøjcyä coo hajxy jaduhñ
 nähwa'adsa'añii. ⁴Pønajaty mäßøjcy
 coo hajxy tøø nähho'tu'udyii ja'a
 Jesucristäm, je'edsä Dios ñäxuu'chp.
 Cooc Jesucristo hajxy cu xquia'a
 nähho'túutäm, ngumädowäänäm
 hajxy hijty, je'eguiøxpä coo
 jecymiädia'agy hajxy tøø nga'a
 cudiuunäm, ja'a Moisés jecy
 quiujáhyyäbä. Ja'a Jesucristo
 mäßøcypiä, ca'xiä jecymiädia'agy
 quiudiuñ, ja'a Moisés jecy
 quiujáhyyäbä, nebiä Dios
 hänajty tøø yhane'emiän. Jaančh
 tehñ yhooyä Jesucristo jaduhñ
 yhäna'c-hajty. Cabä pojpä cädieey
 hänajty ñä'ägädä møødä ni weentiä.
 Paady hijty jaduhñ quia'a hahixø'øy
 coo jaduhñ cu yho'cy. Pero coo ja'a
 Jesucristo hajxy hoy xñähho'túutäm,
 paady yø'ø jecymiädia'agy hajxy

jaduhñ xquia'a hanéhmänä, ja'a Moisés jecy quiujáhyyäbä.

⁵Jaduhñä Moisés jecy quiujahy coo judíoshajxy pedyii quiudiúnät nebiaty hánajty tøø quiujaay. Jaduhñägä hoyhajtä weenhajt hajxy piáadät. ⁶Coo hajxy nmäbójcämät maa Jesucristocøxpän, jaduhñä hoyhajtä weenhajt hajxy nbáatämät. Ja'a Diosmädia'agy jaduhñ mänaamb. Pero cab hajxy ndaj nmáayyämät: “Pøn jim nõcxäp tsajpootyp coo yajnáhwaatspä wiomänácät.” ⁷Ni jaduhñ hajxy nga'a taj nga'a máayyämät: “Pøn jiiby hädá'agäp mõjcu'uhaam coo ja'a yajnáhwaatspä wiobédät, jiiby maa ho'ogyjiäya'ay yháañämähajxy yhitiän.” Paady hajxy jaduhñ nga'a taj nga'a máayyämät je'eguiøxpä coo Jesucristo yaa tøø yhoonä hädaa yaabä naaxwiin, coo hajxy hoy tøø xñähho'túutänä, møød coo jadähooc jiuypjøjtägajch. Hiñ, jaduhñ hajxy tøø xyajnáhwaats tøø xyajcuhwáatsäm. ⁸Nägooyyá hajxy jaduhñ nmäbójcämät coo Jesucristo hajxy tøø xñähho'túutäm, jaduhñ hajxy nnähwáatsämät. Cab hajxy jaduhñ pøn xñámáayyämät coo nähwaatstaact hajxy wiingtuum nhøxtáayyämät. Cab hädaa mädia'agy jaduhñ ñä'ägä tsipä. Howyiinjüøñä hädaa mädia'agy jaduhñ. Jaduhñ højts nnä'ägä yajnáhixø'øyhaty. ⁹Coo hajxy mejtstu'u ngudiúunämät, mänit hajxy nnähwáatsämät. Je'eçh jaduhñ nnänøømby mejtstu'u, coo hajxy nnägäpxämät cu'ughagujc coo Jesucristo hajxy nWiindsøn'hájtäm, møød coo hajxy nmäbójcämät

hamuumdu'joot coo Dios ja'a Jesucristo yagjuypjøjtägajch mänaabä hánajty tøø yho'oguiän. Coo Dios ja'a Jesucristo jaduhñ yagjuypjøjtägajch, jaduhñ hajxy nnajuøøyyäm coo Dios ja'a Jesucristo quimay, møød pønjaty ja'a Diosmädia'agy mäbøjp ja'a Jesucristocøxpä. ¹⁰Coo hajxy jaduhñ nnä'ägä mäbójcämät hamuumdu'joot, jaduhñä Dios hajxy xquimáayyämät. Y coo Jesucristo hajxy nmädiácämät cu'ughagujc coo hajxy nWiindsøn'hájtäm, mänit hajxy nnähwáatsämät.

¹¹Jaduhñä Diosmädia'agy miäna'añ: “Pøn jaduhñ jaançh mäbøjp ja'a Jesucristocøxpä, je'eds jaduhñ päda'agáañäp hodiuum ja'a Diósäm.” ¹²Hiñ, tu'cuhdujt højtsä Jesucristo xyhíjxäm, møødä judíoshajxy, møødä ca'a judíoshajxypä. Tu'cuhdujt højtsä Jesucristo jaduhñ xyhuunghájtäm. Coo højtsä Jesucristo nba'yáaxämät coo nbojpä ngädieey hajxy xyajnáhwaatsämät, tsipcøxp højts jaduhñ xñäxúu'tsämät, tsipcøxpä mayhajt jaduhñ tiúnät maa højtscøxphájtäm. ¹³Jaduhñä Diosmädia'agy miänáangumbä: “Pønä Jesucristo pa'yaaxp, hodiuum je'eduhñ piäda'aga'añii ja'a Diósäm.” ¹⁴Pønjaty ca'a mädoobnä ja'a Jesucristocøxpä, cabä Jesucristo hajxy jaduhñ hoy miänuu'xta'aga'añ. Tøyhajt jaduhñ. Pø cahnä hajxy jaduhñ miädoyhaty coogä Jesucristo hajxy tøø xñähho'túutäm, cab hajxy hoy miäbøga'añ. Pø cahnä hajxy yajwiingapxø'øyii ja'a Jesucristocøxpä, cab hajxy hoy

miädowa'añ. ¹⁵Ja'a Diósädsä cugapxy quejx coo ja'a miädia'agy yajwá'xäxät maa jäya'ayhaxiän, ja'a cahnä hajxy hänajty miädoybä. Jaduhñ jim myiñ cujaay maa Diosmädia'aguiän: “Pønjetiä Diosmädia'agy tøø miädoy coogä Dios yajnahwa'açh pønjetiä Dios pa'yaaxp, paady hajxy xioonda'agy coo hajxy jaduhñ tøø miädoonä. Jaançh tehñ yhoy jaduhñ coo Diosmädia'agy jaduhñ wia'xy.”

¹⁶Pero cabä jäya'ayä

Diosmädia'agy hajxy nägøxiä tøø miäbøcy ja'a Jesucristocøxpä. Jaduhñä Isaiás jecy quiujahy: “Dios, tøø miiçh mmädia'agy nja yajwa'xä, pero cab pøn tøø miäbøcy.”

¹⁷Mayhagajptä Diosmädia'agy tøø wia'xy ja'a Jesucristocøxpä. Tøø jäya'ayhajxy may miädoonä. Näje'e hajxy hoy tøø wyiinjuø'øy. Je'eds hajxy jaduhñ tøø miäbøcy. Coo hajxy quia'a mädo'wät, cab hajxy jaduhñ miäbøgät.

¹⁸Hoorä, ja'a judíoshajxy, tøyhajt jaduhñ coo hajxy je'e miädóyyäbä. Haa ca'a, jaduhñ jim myiñ cujaay maa Diosmädiá'aguiänä: “Wiinduhmyhagajptä mädia'agy tøø wia'xy ja'a Dioscøxpä.” ¹⁹Y jia wiinjuøyy ja'a judíos ja'a mädia'agy hajxy jaduhñ ja'a Jesucristocøxpä. Pero cab hajxy miäbøjcy. Ja'a jäya'ayhajxy ca'a judiöspä, je'eds hajxy jaduhñ mäbøjc. Jaduhñä Moisés jecy quiujahy coogä judíoshajxy nämaayyä ja'a Diósäm:

Mbejxyp mijts pønjaty ca'a judíoshajpä cóogøch tyijy nga'a cu'ughaty.

Pero ngu'ughadáambiøch hajxy je'e. Jaduhñ mijts mnänømy

cooc tyijy hajxy tii quia'a jaty quia'a najuø'øy.

Pero nnäxuudsáambiøch hajxy je'e, paady mijts mjootma'ada'añ,

nømä judíoshajxy jecy nämaayyä.

²⁰Mäniä Isaiás høxhaam jiaac cujahy coogä Dios miänaañ:

Pønjetiä nähwaatstaact hijty ca'a høxtaaby, tøøçhä nmädia'agy hajxy xmiäbøjcänä.

Cábøch hajxy hijty xyajtøy, pero tøøçh hajxy nyajwiinjuøñä cooçh hojiot njaançh tehñ miøødä.

²¹Jadúhñägä Dios miänángumbä:

“Yø'ø judíoshajxy, tøøçh hajxy jaduhñ nja wi'i miänuu'xta'agy cooçh nmädia'agy hajxy xmiäbøjcät. Pero cab hajxy jaduhñ ñä'ägä mäbøga'añ. Jaançh tehñ xiexä quiopcä tiaatsc-hajxy jaduhñ”, nømä Dios jecy miänaañ.

11 Pero cábøch nmäna'ana'añ coo judíoshajxy tøø ñajtshixø'oyii ja'a Diósäm. Caj pues, caj tiähoocnajtshixø'oyyä; paquiä hajxy ñajtshixø'oyyä. Haa ca'a, judíoshájpcøch høøçhpä. Abrahámhøch nhaphajt ndeedyhajt. Y ja'a Benjamínhajpä, møød je'eçh nhaphajty ndeedyhajty. Ja'a Abraham yhap yhoc je'ebä, ja'a Benjamínhajpä. ²Cab højtsä Dios tøø xñajtshixø'øy, højts judíoshajpä. Hix, jequiän højtsä Dios xyajnáhdijy coo højts hänajty xquiu'ughada'añ. Jaduhñ jim myiñ cujaay maa Diosmädia'aguiän coogä Elías ja'a miägunaax jecy ñäxø'øwøoyy, ja'a judíoshajxy, ja'a Diosmädia'agy hajxy hänajty

quia'a mábøgaambiä. Ja'a Elías, jequiän je'e quiuguexyhajtä Diósäm. Pia'yaaxypä Elías ja'a Dios hänajty coo jaduhñ miänäxø'øwøøyy: ³“Dios, yø'ø judíosahajxy, haxøøg hajxy tøø jiatcø'øy. Tøø miich mguguexyhajxy xyagho'cä. Tøø tsaamaa'xy hajxy yajma'ady maa animalho'ogy hajxy hijty ño'oguiän coo miich hajxy hijty xwyiingudsähgø'øy. Nägøxiä jäya'ayhajxy tøø yagho'ogyii, ja'a miich hajxy hijty xwyiingudsähgøøbiä. Nidiúhñhøch tøø nmähmø'øy jujcy. Høøchpaady hajxy xjia wi'i yagho'ogaambä”, nømä Elías ja'a Dios jecy ñämaayy. ⁴Mänitä Dios yhadsooy: “Caj tiøyyä cooçh miich nidiuhñ xjiaac wiingudsähgø'øyñä. Jé'enøçhä jäya'ayhajxy xwyiingudsähgø'øyñä ja'a hajxy näjuxtujmilpä. Cabä Baal hajxy wyiingudsähgø'øy. Quepychech je'e ja'a Baalhajpä”, nømä Dios jecy miänaañ. ⁵Ja'a judíosahajxy, jequiän hajxy jaduhñ yajnähdiijä ja'a Diósäm coo hajxy hänajty quiu'ughada'añii. Paady hajxy jaduhñ quiu'ughadyii coo Dios hojioot jiaançh tehñ miøødä. Pero näweeñtiä judíos ja'a Dios miädia'agy hajxy miäbøjcä, caj ñämayyä. Jäda'anäbaadyñä, jiinä judíos ja'a Dios miädia'agy hajxy näje'e miäbøjcä. Je'enä hajxy quiu'ughadyiinä ja'a Diósäm. Coo hajxy jaduhñ ñäxuuçhii, paady hajxy je'enä wioowhidyyii, jaduhñä Dios miädia'agy tehñgajnä miäbøjcäxät. ⁶Jaduhñä judíosahajxy yajnähdiijä coo ja'a Dios miädia'agy hajxy miäbøjcät ja'a Jesucristocøxpä. Paady hajxy

jaduhñ yajnähdiijä je'eguiøxpä coo Dios hojioot miøødä, ca'a jie'eguiøxpä coo hajxy hoy jiäya'ayhaty. Coo jäya'ayhajxy häxøpy ñäxuuçhii ja'a Diósäm je'eguiøxpä cooc tyijy hajxy hoy jiäya'ayhaty, cab hajxy jaduhñ cu nmänáañäm coo Dios hojioot miøødä.

⁷Hix, näje'e judíosahajxy yajnähdiijä coo hajxy ñähwá'adsät näweeñtiä. Jaduhñä Dios miädia'agy hajxy miäbøjcä ja'a Jesucristocøxpä. Ja'a judíosahajxy nämaybä, cab hajxy jaduhñ yajnähdiijä, hoy hajxy hänajty jaduhñ jia wi'i ñähwa'adsa'añ. Hix, xejx ja'a quiopcä tiaatsc-hajxy jaduhñ. Cabä Dios miädia'agy hajxy miäbøjcä ja'a Jesucristocøxpä.

⁸Jaduhñ jim myiñ cujaay maa Diosmädia'aguiän: “Tøø quiopcä tiaatsc-hajxy yajxéjxäxä ja'a Diósäm. Jaduhñ hajxy yhity nebiä wiindspän nebiä cuhnatpän høxtä jäda'anäbaadyñä.” ⁹Jaduhñä David jecy quiujahbiä:

Xøødsuu ja'a judíosahajxy naxy yagjájtáp. Jaduhñäc tyijy ja'a Diosmädia'agy hajxy hoy quiudiuñ.

Jaduhñäc tyijy hajxy quiumayii ja'a Diósäm. Pero ween hajxy hoy quiumädoy. Hix, cab hajxy tøyhajt miäbøga'añ.

¹⁰Ween hajxy jaduhñ jiaty nebiä wiindspän nebiä xoodspän.

Ween hajxy ni mänaa quia'a wiinjuø'øy nebiä piojpä quiädieeyhajxy ñähwá'adsät.

Jaduhñä David jecy quiujahy.

¹¹Hoorä, nämayyä judíosahajxy tøø quia'a mábøcy ja'a

Jesucristocøxpä. Pero cab hajxy nägøxiä ñajtshixø'owa'añii ja'a Diósäm. Cab hajxy nägøxiä quiumädowa'añ. Pero jaduñä Dios wyiinmaayy coo jäya'ayhajxy ween miäbøcy ja'a Jesucristocøxpä, ja'a hajxy ca'a judíospä. Coö ja'a ca'a judíoshajxy ñähwaatsnä, paadiä judíoshajxy näje'e jia mänaambä coö hajxy ween ñähwáatspät.

¹²Coö judíoshajxy quia'a mäbøjcy ja'a Jesucristocøxpä, paady hajxy paquii ñajtshixøyyä ja'a Diósäm. Pero mänitä Dios wyiinmaayy coö jäya'ayhajxy ween ñähwa'aäch wiinduhmyhagajpt, ja'a hajxy cajpä judíos. Paadiä judíos ja'a quiopcä tiaatsc-hajxy yajxéjxäxä ja'a Diósäm. Paadiä hoyhajtä weenhajt hajxy quia'a mooyyä ja'a Diósäm. Cu miooyyä hajxy jaduñ coö hajxy cu miäbøjcy ja'a Jesucristocøxpä. Pero ja'a jäya'ayhajxy ca'a judíospä, ja'a hajxy jim tsänaabiä wiinduhmyhagajpt, je'edsä hoyhajtä weenhajt mäbøcypii mooyyä. Hoorä, habaadaamb jaduñ coö judíoshajxy miäbøgaambä ja'a Jesucristocøxpä. Mänit hajxy je'e ñähwa'adsaambä. Jaançh tehñ jiootcujc hajxy jaduñ yhidáannäbä. Mänitä jäya'ayä hoyhajtä weenhajt hajxy maas may jiaac mo'owa'añii wiinduhmyhagajpt.

¹³Mijts jaduñ ca'a judíoshajpä, mijts nyajwiinmädiaagøøñäp. Dióshøch jaduñ tøø xwyiinguexy coöchä miädia'agy jim nyajwá'xät maa mijtsän. Xtiunngmóoyyhøçhä Dios jaduñ. Nägøø nädécypiøçhä nduunng jaduñ nnä'ägä tuñ,
¹⁴ween mijts nämay mmäbøcy ja'a Jesucristocøxpä, ween mijtsä

judíos jaduñ xpiahixy. Coö mijtsä judíos jaduñ xyhíxät coö mijtsä Dios ja'a hoyhajtä weenhajt tøø xmio'oy, mänitä judíoshajxy miäbøgaambä ja'a Jesucristocøxpä. Høøçh nmägunaaxhajxy je'e ja'a judíoshajxy. Ween hajxy jaduñ ñähwáatspät neby mijts tøø mnähwa'açhän. ¹⁵Coö judíoshajxy quia'a mäbøjcy ja'a Jesucristocøxpä, paady hajxy ñajtshixøyyä ja'a Diósäm. Paadiä Dios hänäjty tøø wyiinmay coö mijtsä miädia'agy mmäbøjçänät, pønjaty jaduñ ca'a judíospä. Y coö judíoshajxy jaduñ miäbøjpät ja'a Jesucristocøxpä, mänit hajxy quiuhbøgáanägumbä ja'a Diósäm. Mänit hajxy yagjugyhada'añii homiänaajä ja'a Diósäm neby jaaya'ay jiugyhatiän. ¹⁶Ja'a judíoshajxy, ja'a Abraham hajxy jecy yhaphajt tieedyhajt. Yhaadshajt tyictshajt ja'a Abraham hajxy jaduñ. Jéquiänä Dios ja'a Abraham quiu'ughajty. Paadiä judíoshajxy jäda'ahaty quiu'ughajtäbä ja'a Diósäm. Jaduñ mäwiinä Abraham miäbaady nebiä quepytyictsän. Y ja'a judíoshajxy, jaduñ mäwiin hajxy miäbaatpä nebiä quepyhaa'xän.

¹⁷Hoorä, nämayyä judíoshajxy tøø quia'a mäbøcy ja'a Jesucristocøxpä. Paady hajxy tøø ñajtshixø'oyii ja'a Diósäm. Jaduñ mäwiin hajxy miäbaady nebiä olivohaa'x tøø piuhdøjjiän. Jaduñ miädia'agytiägø'oy coö judíos ja'a hoyhajtä weenhajt hajxy quia'a mo'owáanänä ja'a Diósäm. Y mijts ca'a judíospä, jaduñ mäwiin hajxy mmäbaatpä nebiä yuuc-holivohaa'xän

coo tøø yagjøjheedsø'øy maa olivohaa'x tøø piuhdøjjiän. Coo hajxy tøø mmäbøjnä, paadiä Dios hajxy xmioönä ja'a hoyhajtä weenhajt. ¹⁸Pero caj mijtsä judíos hawiinmats mbéxät. Ca'a hajxy mniguiumayii. Cab hajxy mmäná'anät: "Cabä judíoshajxy quiu'ughájtänä ja'a Diósäm. Højtsä Dios xqui'ughájtänäp, højts ca'a judíospä." Hix, Dios mijts jaduhñ tøø xquiunuu'xy je'eguiøxpä coo Abraham jecy quiunuu'xä møødä yhap møødä yhoc, ja'a judíoshajxy. Coo Dios ja'a Abraham jecy cu quia'a cunuu'xy, ni mijts hijty xquia'a cunuu'xaambä.

¹⁹Wehñdä pøn miäná'anät: "Yø'ø judíoshajxy tøø quia'a mabøquiäbä ja'a Jesucristocøxpä, høøchcøxpä hajxy tøø ñajtshixø'øyii ja'a Diósäm. Hix, páadyhøchä Dios xchocy coöch nga'a judíosä. Cabä judíoshajxy chójcänä ja'a Diósäm." ²⁰Tøyhajt jaduhñ. Paadiä judíoshajxy tøø ñajtshixø'øyii ja'a Diósäm coo hajxy tøø quia'a mabøcy ja'a Jesucristocøxpä. Y mijts, coo hajxy tøø mmäbøcy, paady mijtsä Dios tøø xquiunuu'xy. Pero ca'a hajxy mniguiumayii coo Dios hajxy jaduhñ xñä'ä najtshixøøbiät. Hix, caj mijts hijty hoy mjäya'ayhaty. Coo Dios hojioot miøødä, paady hajxy xquiunuu'xy. ²¹Jaanč tehñ yajcumayaambä judíoshajxy jaduhñ. Paady hajxy jaduhñ ñiguiumayii coo hajxy tøø quia'a mabøcy coo hajxy tsipcøxpä ñäxuudsøøjät ja'a Diósäm. Paady hajxy ñajtshixøøyyä ja'a Diósäm, hoyyä Abraham hajxy jecy jia haphajty jia teedyhajty. Jaanä jaduhñ mijtspä, mijts

ca'a judíospä, coo mijts jaduhñ mniguiumáayyabät, mänitä Dios hajxy jaduhñ xñajtshixøøbiät. ²²Hix, jiaanč tehñ quiunuu'xypä Dios ja'a quiu'ug. Pero pønhatiä Dios tøø ñajtshixø'øy, je'eds hajxy jaduhñ jaanč tehñ yajcumäadowáanäp ja'a Diósäm. Paady mijtsä Dios xjiaanč tehñ quiunuu'xy, coo hajxy mmäbøcy. Pero pø cab hajxy jaduhñ mmäbøgaannä, mänitä Dios hajxy xyajcumäadowaambä. ²³Hoorä, ja'a judíoshajxy tøø quia'a mabøquiäbä, coo hajxy jaduhñ miäbøjpät, mänit hajxy jadähoc quiu'ughájtägumbät ja'a Diósäm. Haa ca'a, miøødä Dios mäjaa jaduhñ coo hajxy jaduhñ quiu'ughájtägumbät. ²⁴Hix, ja'a judíoshajxy, Abraham hajxy jecy yhaphajt tieedyhajt. Jéquiänä Abrahamhajxy yajnähdiijä ja'a Diósäm coog hajxy jaduhñ quiu'ughadøøjät ja'a Diósäm, møødä Abraham yhap yhoc-hajxy, ja'a judíoshajxy. Tøyhajt jaduhñ, paadiä Abrahamhajxy paquiä hoy quiu'ughadäänägumbä Diósäm. Y mijts, jaanä jaduhñ mijtsä Dios xqui'ughájnäbä, hoy mijts hijty jegyhajty xquia'a cu'ughaty. Paady, ca'a hajxy mmäna'añ cooc tyijy ja'a judíoshajxy quia'a cu'ughajtägatsa'añii ja'a Diósäm.

²⁵⁻²⁶Mägu'ughajpädøjc, nébiøch chamñ nmädia'aga'añän, náamñøchä Dios tøø xñajtscapxøøyyä. Cahnä jäya'ay hädaa mädia'agy hajxy nämay miädoynä. Paady mijts jaduhñ nhawäänäm, jaduhñ hajxy mga'a niguiumayøøjät, hoyyä Dios hajxy tøø xjia cu'ughaty. Tøyhajt jaduhñ coo judíoshajxy nämay tøø

quia'a mábøcy ja'a Jesucristocøxpä. Pero habaadaamb jaduhñ coo hajxy nägøxiä miäbøgaannä. Mänit hajxy jaduhñ miäbøga'añ coo mijts hänajty tøø mmäbøcy, ja'a mijts ca'a judiöspä, mäduhñtiä hajxy hänajty mmäbøga'añ. Jaduhñ jim myiñ maa Diosmädia'aguiän:

Mänitä yajnähwatpä
jim choona'añ maa cajpt
jaduhñ xiøhatiän Siön, maa
judiöshajxy chäna'ayän.

Cøxaambä judiöshajxy
jaduhñ miäbøga'añ ja'a
yajnähwatpæcøxpä.
Cøxaambä piojpä quiädieeybä
hajxy nähwa'adsa'añ.

²⁷ Cooch hajxy jaduhñ
nyajnähwá'adsät, mänit
jaduhñ tiøjiada'añ
nébiøch hajxy hijty tøø
nyajwiinwaanø'øyän
mänáajøch hajxy
nmøødyajcuhduquiän
hawiinjemy,

nømä Dios miänaañ.

²⁸ Coo judiöshajxy tøø quia'a mábøcy ja'a Jesucristocøxpä, paady hajxy tøø näjtshixø'øyii ja'a Diösäm. Y coo hajxy jaduhñ tøø näjtshixø'øyii, paady mijtsä Dios tøø xyajnähdijy coo hajxy mmäbøgät ja'a Jesucristocøxpä, mijts ca'a judiöspä. Pero, hoyyä judiöshajxy tøø quia'a jagä mábøcy, tsøjcäpnä hajxy jaduhñ ja'a Diösäm je'eguiøxpä coo yhapä tieedyhajxy jecy yajnähdíjjäxä ja'a Diösäm coo hajxy quiu'ughadøøjät. ²⁹ Hix, cabä Dios mänaa yhøhnda'agy. Homiänaajä yajtøjiaty waambaty quiapxy miädia'agy. Y coo Dios jaduhñ

jecy miänaañ coogä judiöshajxy homiänaajä quiu'ughada'añii, yejcä Dios ja'a tøyhajt jaduhñ. Hix, cabä Dios ja'a miädia'agy mänaa yajtägach. Jaduhñä tøyhajt hajxy nmøødhájtäm coo Dios jiaančh yajtøjiada'añ waambaty tøø miäna'añ ja'a judiöscøxpähajxy. ³⁰ Mijts ja'a ca'a judiöspä, cabä Diosmädia'agy hajxy hijty mmädoyyä. Cabä Dios hajxy hijty mwiingudsähgø'øy. Y coo judiöshajxy tøø quia'a mábøcy ja'a Jesucristocøxpä, paadiä Dios hojiot miøødä ja'a mijtsøcøxpä. ³¹ Jäda'anäbaadyñä, cabä judiös ja'a Dios miädia'agy jäda'ahaty miäbøgaanä ja'a Jesucristocøxpä. Coo hajxy jaduhñ quia'a mäbøga'añ, paady mijtsä Dios nñäxuu'tsnä, mijts ca'a judiöspä. Hoorä, coo mijtsä judiös xyhíxät coo mijtsä Dios nñäxuučh, mänit hajxy jaduhñ miäbøgaambä ja'a Jesucristocøxpä. Mänit hajxy nñäxuudsáanäbä ja'a Diösäm. ³² Jéquiänä Dios jäya'ay yhawaanä nägøxiä coo pojpa cädieey hajxy miøødä, møødä judiöshajxy, møødä ca'a judiöshajxypä. Jaduhñ hajxy jecy yhawáanäxä coo hajxy hawiinmats quiumädówät. Hix, paadiä Dios jaduhñ miänaañ, je'eguiøxpä coo jäya'ayhajxy hänajty nägøxiä nñäxuuds'añii tu'cuhdujt, møødä judiöshajxy, møødä ca'a judiöshajxypä. Coo Dios hajxy häxøpy tøø xquia'a näxúu'tsäm, nägøxiä hajxy hijty ngumädowáanäm.

³³ Jaančh tehñ jiajp, jaančh tehñ nñajuøöbiä Dios. Cab hajxy hoy nnä'ägä wiinjuø'owáanäm nebiatiä

Dios wyiinmay. Hix, hojiotä Dios jiaančh teh̄m miøød coo hajxy nägøxiä tøø xñäxúu'tsäm, møødä judíoshajxy, møød cajpä judíoshajxy. Nägøxiä ja'a hoyhajtä weenhajt hajxy xmi'owáañäm tu'cuhdujt. ³⁴Jaduh̄n jim̄ myiñ cujaay maa Diosmädia'aguiän: “Cabä Dios ja'a wyiinmahñdy pøn̄ ñajuøyyäxä. Cabä Dios pøn̄ miäyajtøy nebiä wyiinmahñdyhädät. ³⁵Cabä Dios pøn̄ miänuu'xyhaty.”

³⁶Hamdsoojootä Dios ja'a naaxwiimbä jecy yhädiuun̄ møødä jäya'ay nägøxiä. Tijaty yaa jájtäp túun̄äp hädaa yaabä naaxwiin, ja'a Dios jaduh̄n hanehm̄b coo jaduh̄n jiadøøjät, coo jaduh̄n tiunøøjät. Y tijaty jaduh̄n jadaañäpnä tunääñäpnä, ja'a Dios jaduh̄n yajtøjiadaamb nebiaty hñanjty tøø wyiinmay. Tsögä Dios hajxy mõj jaančh pädaacäm homiänaajä. Tsög hajxy homiänaajä wiingudsähgøyyäm. Amén.

12 Mägu'ughajpädøjc, miøødä Dios hojiot maa højtscøphajtäm. Chamčh mijts nhane'emy coo hajxy hamuumdu'joot mniyegøøjät Dios quiø'øjooty tiecyjooty. Jaduh̄nä Diosmädia'agy hajxy hoy mgudiúnät hamuumdu'joot. Jaduh̄nä Dios hajxy hoy mwiingudsähgø'øwät nebiä Dios hajxy xyajmädsoquiän. ²Ca'a hädaa wiinmahñdy hajxy myajtuñ̄ nebiä jäya'ay wyiinmahñdyhajxy yaajän. Pøn̄jatiä Dios quia'a cu'ughajpy, je'eds hädaa yaabä wiinmahñdy hajxy yajtuumb. Cabä yhaxøøgwiiinmahñdy hajxy ñajtshixø'øwa'añ. Ca'a

hajxy mbahixy. Hawiinjemybiä wiinmahñdy hajxy jaduh̄n mmøødhájñäp, je'eguiøxpä coo Jesucristo hajxy mmøødhijnä tu'ugjoot tu'ugwiinmahñdy. Jaduh̄nä tøyhajt hajxy mmøødhädät tijatiä Dios hajxy xyajmädsojp coo hajxy mdúnät. Homiänaajä Dios hajxy xyajmädsøjcäm coo hajxy hoy njäya'ayhajtämät, coo hajxy hoy ndúunämät. Coo hawiinjemybiä wiinmahñdy hajxy jaduh̄n nmøødhajtämät, jaduh̄nä tøyhajt hajxy jaduh̄n nmøødhajtämät tijatiä Dios hajxy xyajmädsøjcäm coo hajxy ndúunämät.

³Mayhajtä Dios jaduh̄n ñä'ä tuun̄ ja'a høøchcøxpä coočhā cuhdujt jaduh̄n xmiiooy coočhā mijts nmägäp̄x nhané'emät. Ca'a hajxy mniguiumayii cooc tyijy hajxy cøxiä wiinä mjaančh teh̄m jiaty. Tijatiä tuungä Dios hajxy tøø xmi'oy, je'eds hajxy mmøjpädä'agäp. Ca'a wiingtuung hajxy mmøjpäda'agy. Hoy hajxy mdúnät nebiatiä Dios hajxy tøø xyajñähdiy. ⁴Hix, nägøxiä ni'xcopc hajxy nmøødhajtäm møødä cø'ødecy, møødä wiinjøjp, møødä copctaatsc. Cab hajxy tiu'ugtuungä; haagä hawiiingjaty hajxy tiuñ̄. Pero haagä tuungpaatp hajxy jaduh̄n. ⁵Jaduh̄n mäwiin højts nmäbátäm nebiä tu'ugni'x tu'ugcöpcän coo hajxy tu'cuhdujt nmäbøjcäm ja'a Jesucristocøxpä, hoy hajxy nja nämayhajtäm. Jaduh̄n hajxy hawiiingjaty ndúunäm. Jaduh̄n hajxy nnibiuhbéjtäm hamiñ̄ haxøpy. ⁶Tsög hädaa tuung hajxy hoy yajnøcxäm nebiatiä Dios hajxy tøø xyhanéhäm. Mayhajtä Dios

jaduhñ tiuun coo wiinmahñdy
hajxy cøjwiinduum xmióoyäm
nebiaty hajxy ndúunämät. Pønjaty
tøø tiuungmo'oyii coo Dios ja'a
miädia'agy hajxy yajwá'xät nebiaty
hajxy hänäjty tøø ñajtsapxóoyäxä,
ween hajxy jaduhñ yajwa'xy
nebiaty hajxy hänäjty piuhbedyii.

⁷Pønjaty tøø tiuungmo'oyii
coo hajxy miäbuhbédät, ween
hajxy hamuumdu'joot tiuñ.
Pønjaty tøø tiuungmo'oyii coo
Diosmädia'agy hajxy yajwá'xät,
ween hajxy hoy yajwa'xy.

⁸Pønjaty tøø tiuungmo'oyii coo
hajxy miäjootcapxmøcpógät,
ween hajxy hoy tiuñ. Pønjaty
mäyøø, weenä häyoobä hajxy
piuhbety hamuumdu'joot. Pønjaty
tøø tiuungmo'oyii coo hajxy
miähané'emät maa tsajtøjcän, ween
hajxy hoy miähane'emy. Hix, Dios
ja'a cuhdujt jaduhñ yejc coo hajxy
jaduhñ miähané'emät. Pønjaty tøø
tiuungmo'oyii coo mayhajt hajxy
tiúnät maa häyoobädøjcän, møød
maa yaamgto'oxyhajxiän, ween
hajxy hamuumdu'joot piuhbety.
Møød weenä pa'amjäya'ay hajxy
quihixy.

⁹Tsøg hajxy hamuumdu'joot
nichøjcäm nibia'häyóowäm. Tsøgä
haxøøgpä hajxy najtshixóoyäm.
Tehngajnä howyiinmahñdy hajxy
tsøc tsøjcäm. ¹⁰Hamiñ haxøpy hajxy
mniçhogøøjat mnibia'häyowøøjat
neby tu'ugpuhya'ay neby
tu'ugpuhdo'oxypän. Hamiñ haxøpy
hajxy mniwyingudsähgø'øwøøjat.
Cab hajxy mnibixøøjat.

¹¹Hamuumdu'jootä Wiindsøn
Jesucristo hajxy mmädúnät.
Jootcujc hajxy jaduhñ mdúnät.

Cab hajxy jaduhñ mänaa
mnänuuxø'øwät.

¹²Coo hajxy pøn xchaaçhtiúnät,
cab hajxy mmøjpädá'agät;
mmee'xtúgäp hajxy jaduhñ.
Mnajuøøby hajxy jaduhñ coo
hajxy jim mnøcxa'añ maa
Dioswiinduumän. Paady hajxy
jaduhñ mxoondá'agät. Homiänaajä
Dios hajxy mba'yá'axät.

¹³Coo pøn tii yajmaajiadät, naxy
hajxy mdehm piuhbédät. Je'eçh
jaduhñ nnänøømby pøn jaduhñ
mäbøjp ja'a Jesucristocøxpä.
Pønjaty jaduhñ mejtsp maa
mdøjc-hajxiän, myajtøjtägø'øwäp
hajxy je'e. Myajcáyäp myaghú'ugäp
hajxy jaduhñ.

¹⁴Coo hajxy pøn xchaaçhtiúnät,
cab hajxy mmähanhädät. Pero
mmänuu'xtá'agäp ja'a Dios hajxy
coo hajxy ween nähwa'açh.

¹⁵Pønjaty xoondaacp,
mmøødxoondá'agäp hajxy je'e.
Pønjaty jøøby xuu'tsp, mmøødjø'øw
mmøødxúudsäp hajxy je'ebä.

¹⁶Tu'ugcøpc tu'ugwiinmahñdy
hajxy mnimiøødhidøøjat. Cab hajxy
pøn mbéxät. Jootcujc hajxy mhídät,
hoyyä øøjtuung hajxy mga'a
jagä møødä. Cab hajxy mänaa
mniguiumayøøjat.

¹⁷Coo häna'c hajxy
xyhäyoowhíxät, cab hajxy
myaghawiimbijtägätsät. Hoy hajxy
mjäya'ayhädät, jaduhñä Dios hajxy
jaduhñ xquiumáyät; jaduhñ mijtsä
cu'ug waamb xquia'a nänómät.
Pero xwyingudsähgø'øwäbä
cu'ug hajxy jaduhñ. ¹⁸Coo mijtsä
cu'ug xjia wi'i jiojcapxø'øwät coo
hajxy jaduhñ mbahixät nebiaty
hajxy haxøøg jiatcø'øyän, cab

hajxy jaduhñ mbahíxät. Pero coo hajxy waamb xquia'a nämá'awät, mänit hajxy hoy yajxón mmøødmädiá'agät. Cab hajxy pøn mmädsiphádät. ¹⁹Mägu'ughajpádøjc, coo hajxy pøn xyhäyoowhíxät, cab hajxy myaghawiimbijtagátsät. Dios jaduhñ yaghawiimbídäp. Jaduhñ jim myiñ cujaay maa Diosmädiá'aguiän coogä Dios jaduhñ miänaañ:

“Høøch jaduhñ nyaghawiimbídäp.”

²⁰Coo hajxy pøn xmiädsiphádät, cab hajxy mmädsiphajtagátsät. Jaduhñä Diosmädiá'agy miäna'añ: “Pø yähó'cäbä häna'c ja'a miich hänäjty jaduhñ xmiädsiphajpä, myajcáyäp myaghú'ugäp jaduhñ. Pø tødsøøyyäp, mmó'owäbä nøø. Coo jaduhñ mgudiúnät, hoyhoyä häna'c chähdiúnät, ja'a miich hänäjty jaduhñ xmiädsiphajpä.” ²¹Nägüeentä hajxy mhídät, cabä haxøøgpä hajxy myaghawiimbijtagátsät. Coo hajxy jaduhñ mjatcø'owät, myajcähxø'ogäp hajxy jaduhñ coo mhaxøøgwiinmahñdy hajxy hänäjty tøø mbadu'ubøjcumbä. Pero coo häna'c hoy yajxón mmägápxät, ja'a mijts hänäjty xmiädsiphajpä, jaduhñ hajxy myajcähxø'ogät coo hawiinjemybiä wiinmahñdy hajxy hänäjty mmøødhajnä. Mänitä Dios jaduhñ xquiumáyät.

13 Tsøg hajxy nägøxiä cuðiunäm nebiatiä cuduung hajxy xyhanéhäm. Hix, Dios ja'a cuhdujt møc møød. Je'e ja'a cuhdujt yejp jadähooc. Pønä cuhdujt møød, paady jaduhñ miøødä coo tøø mio'oyii ja'a Diósäm. ²Pøn jaduhñ ca'a cudiuanaamb nebiatiä cuduung jia

hane'emiän, quiumädowaamb hajxy je'e. Hix, ja'a Dios ja'a cuduung pädaac coo yhané'emät. Jaduhñds je'e, pø cab hajxy jaduhñ mgudiuna'añ nebiatiä cuduung yhane'emiän, jaduhñ miäbaady coo Dios miädiá'agy hajxy mga'a cudiuanaañ. ³Pønjaty hoy wädiip, cabä cuduung hajxy chähgø'øy. Pero pønjaty hoy ca'a wädiip, je'eds mäbøcypii tsähgøøby. Coo hajxy hoy mwädítät, mänitä cuduung hajxy xquiumáyät. Cab hajxy jaduhñ xchaaçhtiúnät. ⁴Hix, ja'a cuduunghajxy, moonsähjätöp hajxy je'e ja'a Diósäm. Paady hajxy jaduhñ tiuñ, coo mijts hajxy jaduhñ xwiowhídät. Jaduhñä cuhdujt hajxy tøø miøoyyabä coo mijts hajxy xyajcumädówät coo mijts hänäjty tøø mgädieey. Paady hajxy jaduhñ mdsähgø'owät. ⁵Naxy hajxy mdehñ quiudiúnät nebiatiä cuduung hajxy xyhane'emiän, coo Dios hajxy jaduhñ xñä'a yajcumädówät. Jaanä jaduhñduhmbä, coo hajxy hamdsoo mnajuø'øy coo jaduhñ yhahixø'øy coo hajxy hoy mwädítät, paady hajxy jaduhñ mgudiúnät waambatiä cuduung hajxy xyhane'emiän. Coo hajxy jaduhñ mga'a cuðiúnät, cab hajxy jootcuje mhídät, je'eguiøxpä coo hajxy hänäjty mnajuø'øy hamdsoo coo hajxy hänäjty tøø mgädieey. ⁶Jaanä jaduhñduhmbä, tsipcøxp hajxy mnähjuudiú'udät tijaty häna'c hajxy xyajnämaaby coo hajxy mnähjuudiú'udät. Hix, ja'a Dios ja'a cuhdujt jaduhñ yejc coo mijtsä häna'c jaduhñ xyagjúyät. ⁷Hahixøøby jaduhñ coo cuduung hajxy mmäjúyät nebiaty hajxy

xyajnáma'ay. Jaaná jaduhñ yhahixøöbiä coo cuduung hajxy mwiingudsähgø'owät, miøjjä miuutscä.

⁸Naxiä mnuu'xy hajxy mdehm̄ jahmiédsät. Naxy hajxy mniçhogø'jät nebiä tu'ugpuhya'aybän, nebiä tu'ugpuhdo'oxypän. Hix, pøn wiinghäna'c tsojp, hoy jaduhñ quiuiduñ nebiatiä Dios hajxy xyhanéhäm. ⁹Jaduhñä Diosmädia'agy miäna'añ: "Pø jim̄ miiç mdo'oxiøjc, cabä wiingpä mmøødhídät. Cab mmäyaghó'ogät. Cab mméedsät. Cabä mmädøjcä jie'e mhadsójcät." Hoorä, coo wiinghäna'c mdsógät hamuumdu'joot, hoy jaduhñ mgudiúnät nébiøch naamnä tøø nmädia'aguian. ¹⁰Hix, pøn wiinghäna'c jaançh tsojp hamuumdu'joot, cab jaduhñ mänaa yhäyoowhixa'añ. Hoorä, coo wiinghäna'c mjaançh tsógät hamuumdu'joot, hoy ca'xy mgudiúnät nebiä Dios yhane'emiän.

¹¹Naxy hajxy jaduhñ mdehm̄ ñiçhogø'jät. Hix, mnajuøøby hajxy jaduhñ coo tøø jiecy mänaa hajxy tøø mmäbøquiän. Habáatnäp jaduhñ coo Jesucristo hajxy min̄ xyajpädø'ogáanäm, coo hajxy jim̄ xyajncxáanäm tsajpootyp. Nägüeentä hajxy jaduhñ mwädítät. Hix, cab hajxy nnajuøøyyäm mänaa Jesucristo yaa quiädaactägatsa'añ, coo hajxy jaduhñ xñä'a nähgädaacpéjtämät. Hix, coo jaduhñ quiädaactägátsät, mänit hajxy xyajtøyhajtyegáanäm. ¹²Habáatnäp jaduhñ coo hajxy yaa ndsoonáanäm, coo hajxy jim̄

nnøcxáanäm tsajpootyp. Tsøcxä ja'a haxøøgpä hajxy najtshixøøyyäm neby hajxy yaa tøø njäya'ayháltäm, cahnä Dios hajxy hánajty nwiingudsähgøøyyäm. ¹³Tøø Dios hajxy xyajnähdíjjäm coo hajxy homiänaajä njugyháltämät neby je'e jjugyhatiän. Paadiä Diosmädia'agy hajxy hoy nbanøcxáanäm. Tsøcxä hajxy hoy wädíjtäm, ca'a jiaduhñä nebiä häna'c-hajxy hagoonstuum wädijpän. Cab hajxy mhaxøøghu'ug mhaxøøgjø'xät. Cab hajxy comjaty mhú'ugät. Cab hajxy jim̄ mnøcxät maa cuhñindo'oxiøjc-hajxiän. Tsøgä to'oxiøjc hajxy wiingudsähgøøyyäm. Hix, ja'a cu'ug hajxy xyhíjxäm neby hajxy njäya'ayháltäm, pø hoy, pø caj. Cab hajxy haxøøg mnä'ägä jatcø'owät. Cab hajxy pøn mmähanhádät, hoy hajxy jia mäyøøjä que mijts. Cab hajxy tii mmädsibø'owät. ¹⁴Ja'a Jesucristo hajxy nWiindsøn'háltäm. Je'e hajxy xyhanéhäm. Jaançh tehñ yhoy je'e wyiinmahñdyhaty. Naxy hajxy jaduhñ mdehm̄ miøødhídät tu'ugjoot tu'ugwiinmahñdy. Jaduhñä mhaxøøgwiinmahñdy hajxy hoy mhøxhíxät. Jaduhñ hajxy hoy mhäna'c-hádät.

14 Jii jäya'ayhajxy näje'e, cahnä Diosmädia'agy hajxy hoy yhabøcyñä, hoy hajxy tøø jia mäbøcy ja'a Jesucristocøxpä. Hahixøøby jaduhñ coo hajxy mmägu'ughádät. Pero cab jaduhñ yhahixø'øy coo mädia'agy hajxy mmøødyajyónät ja'a cuhdujtcøxpä. ²Pønhatiä Diosmädia'agy hoy tøø yhabøcy, ñajuøøby hajxy je'eduhñ coo jaduhñ yhawiinmatsä coo hotyijä mgáyät. Pero pønjaty hoy

tøø quia'a habøcy, cábac tyijy yhooyä coo tsu'u'uch ndsú'tsämät. Páadiäc tyijy quia'a hoyyä coo tsu'u'uch ndsú'tsämät, yajnajuøøby jaduhñ coo häna'c ja'a tsu'u'uch hajxy hänäjty tøø quiunuu'xy maa habojsnaxy wyiinduumän. Jaduhñäc tyijy miäbaady néjjiämä habojsnaxy jaduhñ mwiiingudsähgøøbiän. ³Hoorä, pø mdsu'chp miichä tsu'u'uch, cab jaduhñ mbéxät ja'a häna'cä tsu'u'uch ca'a tsu'tspä. Jaanä jaduhñduhmbä, pønä tsu'u'uch ca'a tsu'tsp, cab jaduhñ waamb nãmá'awät ja'a häna'cä tsu'u'uch tsu'tspä cooc tyijy jaduhñ quiädieey. Haa ca'a, ja'a Dios yhuung je'ebä. ⁴Cabä cuhdujt jaduhñ myiñ coo waamb mnãmá'awät pønä Diosmädia'agy panøcxp. Haa ca'a, ja'a Dios ja'a mioonsä je'ebä. Jagooyyä Dios cuhdujt jaduhñ miøødä coo miäná'anät pø hoyyä mioonsä quiuidiuñ, pø caj. Hamdsoojä Dios jaduhñ nãmá'awät neby hoy wiädítät. Haa ca'a, ja'a Dios je'e hanehmb.

⁵Näje'ejä jäya'ayhajxy miäna'añ coo poo'xxiøø jyijjä mädyii hajxy yhamajtsç-hádäp. Näje'e hajxy miänaambä coo Dios hajxy homiänaajä nwiingudsähgøøyyämät. Pero mijts, jaduhñ hajxy mgudiúnät nebiä Dios hajxy hamdsoo tøø xyajwiinjuø'øyän. ⁶Hix, pønjaty jaduhñ mänaamb coogä poo'xxiøø jyijjä, nägüeentä hajxy jaduhñ wiädity ja'a poo'xxiøøjooty. Jaduhñä Dios hajxy wyiingudsähgøø'øy. Jaanä jaduhñduhmbä, pønjaty jaduhñ

mänaamb cooc jaduhñ quia'a cädieeyä coo tsu'u'uch ndsú'tsämät, hoy hänäjty tøø jia cunuu'xyii maa habojsnaxy wyiinduumän, mioobiä Dios Dioscujú'uyäp jaduhñ coo jaduhñ yajcayii. Jaanä jaduhñduhmbä, pøn jaduhñ mänaamb cooc jaduhñ quia'a hoyyä coo tsu'u'uch ndsú'tsämät, jaanä jaduhñä Dios Dioscujú'uyäp mioobiä coo jaduhñ yajcayii.

⁷Coo Diosmädia'agy hajxy nmäbøjcäm ja'a Jesucristocøxpä, paady hajxy xmioonsähjätäm. Paady jaduhñ quia'a hahixø'øy coo hajxy njäya'ayhájätämät nebiä nhamdsoojoot hajxy chójcäm. Ni ja'a cuhdujt hajxy nga'a møødhájätäm coo hajxy hamdsoo nniyajnähdíjjämät mänaa hajxy nho'ogáanäm ndägoyyáanäm. ⁸Ja'a Jesucristo hajxy xmioonsähjätäm mäduhñtiä hajxy yaa njugyhájätäm, hoy ñejpiä hajxy cu nja jajt cu nja habéjtäm. Y coo hajxy nho'c coo hajxy ndägóoyyämät, je'enä hajxy hänäjty xmioonsähadäanäm homiänaajä. ⁹Coo ja'a Jesucristo hajxy xñähho'túutäm, mänit jadähooc jiuypiojtägajch. Jaduhñ hajxy xquiu'ughájätäm, pønjaty jaduhñ mäbøjp, møød hajxy tøø yhó'oguiäbä, møød hajxy jaac jujcypiä jaac tsuxpä. Jaanä jaduhñ hajxy xyhanéhmbä.

¹⁰Cabä mmägu'ughajpä hajxy hawiinmats mbéxät, hoyyä Diosmädia'agy hajxy hoy quia'a jagä habøcyñä. Cab hajxy pøn mnãmá'awät cooc tyijy hajxy hoy quia'a cudiuñ, hoyyä wiingcuhdujt hajxy jia panøcxy. Hix, coo Jesucristo yaa quiädaactägätsät,

mānit hajxy nāgøxiā jim
nnaxø'øwāānām ja'a Jesucristo
wyiinduum tøyhajtyejpä. ¹¹Jaduhñ
jim myiñ maa Diosmädia'aguian:

Nägøxiøchä jäya'ayhajxy nõcxy
xwyiinijjna'awa'añ.

Xwyiingudsähgø'øwáambøch
hajxy jaduhñ. Jadúñhøch
hajxy xquiapxpaadaambä
cooch nidiuhñ nDioshaty.

Tøyhajt jaduhñ,

nømä Dios miānaañ. ¹²Jaduhñ
hajxy nyajnuøøyyām coo
hajxy nāgøxiā jim nõcxy
ndøyhajtyegānām Dioswiinduum.

¹³Cab hajxy tsøc niñānøømānā
cooc tyijy ja'a Diosmädia'agy
hajxy hoy nga'a panøcxām.
Pero jaduhñ tsøc cudiúunām
nebiatiä mabøjpädøjc-hajxy
quiuidiuñän, jaduhñ hajxy
waamb xquia'a nānøømāmät.
Pøn jaduhñ mänaamb cooc tyijy
quia'a hawiinmatsä coo tsu'učh
ndsú'tsämät, pues, hahixøøby
jaduhñ coo mga'a tsú'udsät coo
hänajty mmøødhity. Hix, wehñdä
miich jaduhñ xpiaadsú'udsät. Co
miich jaduhñ xjiaančh padsú'udsät,
cädiéeyäp je'eduhñ. ¹⁴Cab jaduhñ
quiädieeyä coo tsu'učh ndsú'tsämät,
hoy hänajty tøø jia cunuu'xyii
maa habojsnaxy wyiinduumän.
Nmøødhøchä tøyhajt jaduhñ. Hix,
tu'ugmädiä'agyhøchä Jesucristo
nmøødhity, ja'a nWiindsøn'hajtāmbä.
Pero jii jäya'ayhajxy näjele
miāna'añ cooc tyijy quia'a hoyyā
coo tsu'učh ndsú'tsämät. Co
hajxy jaduhñ jiaančh tsú'udsät,
ja'a hajxy jaduhñ mänaambä,
pues, cädiéeyäp hajxy jaduhñ.

¹⁵Hoorä, coo miichä tsu'učh jaduhñ

mdsú'udsät, y coo jaaya'ay jaduhñ
xpiahíxät, ja'a jaduhñ mänaambä
cooc tyijy quia'a hoyyā coogä
tsu'učh mdsú'udsät, myajcädiéeyäp
miich je'eduhñ. Pø jaančh tøy
mdsocy, cab jaduhñ myajcädiéeyät,
je'eguiøxpä coo Diosmädia'agy
miäbøcy. Hix, ja'a Jesucristo
jaaya'ay tøø nāhho'tu'udy. Pero coo
myajcädiéeyät, wehñdä Jesucristo
miädia'agy ñajtshixøøyyäxät. ¹⁶Y
coo jaaya'ay jaduhñ myajcädiéeyät,
wehñdä miich myajnänømät. Y
wehñdä jaaya'ay yajnänøømbät,
ja'a Jesucristo miädia'agy tøø
ñajtshixøøyyäbä. Jaduhñds je'e,
maas hoy hit jaduhñ coo tsu'učh
mga'a nä'ägä tsú'udsät, hoy
jaduhñ mja najuø'øy coo jaduhñ
quia'a cädieeyä coo mdsú'udsät.

¹⁷Coo hajxy tøø nmabøjcām
ja'a Jesucristocøxpä, paadiä
Dios hajxy xyhanéhmānā. Hix,
cabä Dios waamb miāna'añ coo
hajxy hotyijjā ngaayy nhúucām;
ni jaduhñ quia'a mänaambä
coo hajxy tii nga'a caayy nga'a
húucāmät. Co Dios hajxy tøø
xpiädäcām hawa'adstuum, paady
hajxy hoy njäya'ayhajtām, paady
hajxy jootcujc nnimiøødhíjtām,
paadiä Dioshespíritu hajxy
xyajxoondäcām. ¹⁸Hoorä, pønä
Jesucristo miädia'agy jaduhñ
cudiunānāp, cumayānāp je'e ja'a
Diósām møødä cú'ugām. Tsøcxä
hajxy jaduhñ cudiúunām nebiä
mabøjpädøjc-hajxy quiuidiuñän.

¹⁹Mägu'ughajpädøjc, tsøgä
hoybä hajxy tehngajnā
høxtäayyām, jaduhñ hajxy jootcujc
nnimiøødhíjtāmät, jaduhñ hajxy
hoy nniguiapxmøcpøjcāmät,

jaduhñä Jesucristo miädia'agy hajxy hoy ngudiüunämät hamuumdu'joot. ²⁰⁻²¹Cab jaduhñ quiädieeyä coo hajxy hotyijä ngaayy nhúucämät. Pero pø jii mabøjpädøjc-hajxy jaduhñ näje'e miäna'añ cooc tyijy ja'a tsu'uçh hajxy nga'a tsú'tsämät, cooc tyijy ja'a vino hajxy nga'a húucämät, pues, maas hoy jaduhñ coo mga'a tsú'udsät, coo mga'a hú'ugät. ^{Hix}, coo hajxy jaduhñ xyhíxät coo hánajty jaduhñ mgay mh'u'ugy, wehñdä hajxy jaduhñ xpiahíxät. Y coo hajxy jaduhñ xpiahíxät, cädieeyäp hajxy jaduhñ. Jaduhñ quiähxø'øgät coo miich hánajty tøø myajcädieey. Y cab jaduhñ yhooyä coo mabøjpädøjc myajcädieeyät hoy ñä'ä tiiguiøxpä. ^{Hix}, jia wi'i pianøcxáañäbä Jesucristo miädia'agy hajxy jaduhñ, y coo hajxy jaduhñ quiädieeyät, cab hajxy jaduhñ hoy pianøcxät. ²²Hoy miich mja najuø'øy coo quia'a cädieeyä coo hotyijä mgay mhú'ugät, cab jaduhñ yhooyä coo wiinghána'c mmøødyajtsibø'øwät. Ja'a Dios miich jaduhñ xyhijxp coo hoy mgudiunñ. Pøn jaduhñ najuøøby coo quiumayii ja'a Diósäm nebiä quiuhdujthaty, jootcujc je'eduhñ yhity. ²³Pero pøn jaduhñ ca'a najuøøby pø yejpiä Dios cuhdujt jaduhñ coo tsu'uçh ndsú'tsämät, pø caj, coo je'e jiaançh tsú'udsät, cädieeyäp je'eduhñ, hoy hamdsoo jaduhñ jia mäna'añ cooc tyijy ja'a Dios tøø miäna'añ coo hajxy nga'a tsú'tsämät. Paady jaduhñ miäna'añ, wehñdä tsu'uçh hánajty tøø quiunuu'xyii maa habojsnaxiä wyiinduumän. Jaaná jaduhñduhmbä, hoy ñä'ä tiiguiøxpä,

pøn jaduhñ ca'a najuøøby pø tøø Dios cuhdujt yecy je'eguiøxpä, o pø caj, coo jaduhñ jiaançh jatcø'øwät, cädieeyäp jaduhñbä.

15 ¹⁻²Nnajuøøyyäm højts jaduhñ coo quia'a cädieeyä coo hajxy hotyijä ngaayy nhúucämät. Pero tsøgä nmägu'ughajpädøjc ja'a Diosmädia'agy jaac yajmabøjcäm, ja'a hajxy naamdägø'øy habøjpä, ja'a hajxy jaduhñ mänaambä cooc tyijy quia'a hawiinmatsä coogä tsu'uçh ndsú'tsämät, coogä vino nhúucämät. Cabä nhamdsoo cuhdujthajtiä hajxy nyaghíjtämät; møødä Dioscuhdujt hajxy nyaghíjtämät. ³Hix, mänaa Jesucristo yaa yhitiän hädaa yaabä naaxwiin, cabä yhamdsoo cuhdujt hánajty yaghity. Ja'a Tieediä miädia'agy jaduhñ quiudiuunä, paady jaduhñ chaachpøjcy. Jaduhñ jim myiñ cujaay maa Diosmädia'aguiän: “Pønjaty miich haxøøg xñänøømb, jaduhñ mäwiin miäbaady néjjiäm høøch xñänøømbän”, nømä Jesucristo ja'a Tieedy ñämaayy. ⁴Ja'a højtscøxpä Dios ja'a miädia'agy jecy yajcujahyyä, jaduhñ hajxy hoy ngapxtäacämät. Jaduhñ højtsä tøyhajt nmøødhájtäm coo Dios yajtøjiada'añ neby jecy yajcujahyyän coo højts jim xyajncxáañäm maa wyiinduumän. Cooc hajxy jaduhñ nnajuøøyyäm coo hajxy jim nnøcxáañäm, paady hajxy hotyijä nmee'xtújcämät. Cab hajxy tsøc jootmayhájtäm, hoy hajxy cøxypänejpiä cu nja jajt cu nja habéjtäm. ⁵Ja'a Dios hajxy jaduhñ xpiuhbéjtäm coo hajxy

jaduhñ nme'e'xtújcámät, coo hajxy
jaduhñ nga'a jootmayháltämät.
Ween mijtsä Dios xpiuhbety coo
hajxy jaduhñ mbahíxät nebiä
Jesucristo hoy yhitiän. Jootcujc
hajxy jaduhñ mnimiødhdidøjät
tu'ugmädia'agy. ⁶Jaduhñ hajxy
tu'ugmädia'agy mhídät coo Dios
hajxy mgapxpáadät møj jaančh. Ja'a
Dios, ja'a Jesucristo Tieedy je'e. Ja'a
Jesucristo hajxy nWiindsøn'háltäm.

⁷Hoorä, nebiä Jesucristo hajxy
xchójcäm, jaanä jaduhñ hajxy
hamuumdu'joot nničhójcämbät.
Coo cu'ug hajxy jaduhñ xyhíjxämät
coo hajxy hänäjty nničhójcäm,
jaduhñä cu'ughajxy ñajuø'øwaambä
coo Dios miøjjä jiaančhä. ⁸Jéquiänä
Dios jaduhñ miänaañ coogä
yajnähwaats yajcuhwaatspä
quiexa'añ maa judíošhajxiän. Ja'a
judíos ja'a yhapä tieedy hajxy,
je'eds hajxy jaduhñ jecy hawáanäxä,
møødä Abraham, møødä Isaac,
møødä Jacob. Coo Jesucristo yaa
quiejxä hädaa yaabä naaxwiin,
hoyyä judíošhajxy piuhbodyii.
Tøjiajt jaduhñ nebiä Dios jecy
miänaañän coo yajnähwaats
yajcuhwaatspä hänäjty quiexa'añ.
Hix, tømiädiaacpä Dios. Caj mänaa
yhøhnda'agy. Tøyhajt jaduhñ.
⁹Jaanä jaduhñduhmbä, paadiä
Jesucristo yaa quiejxä, hoyyä
jäya'ayhajxy piuhbéjtäbä, ja'a hajxy
ca'a judíošpä. Coo hajxy jaduhñ
ñäxúu'tsábä ja'a Diósäm, paadiä
Dios hajxy møj jaančh quiapxpaady.
Jaduhñ jim myiñ cujaay maa
Diosmädia'aguiän:

Miičh ngapxpaadaamby møj
jaančh näguipxy møød hajxy
ca'a judíošpä.

Høyháamhøch miičh
nwiingudsähgø'øwa'añ,
nømä Dios ñämaayyä.
¹⁰Wiingtuumä Diosmädia'agy
myíngumbä cujaay:
Mijts ca'a judíošpä, xoonnda'ag
hajxy møødä Dios
quiu'ughajxy näguipxy.
¹¹Jaduhñ cujaay myíngumbä
wiingtuum:
Mijts ca'a judíošpä, weenä Dios
hajxy møj jaančh mgapxpaady
wiinduhmyhagajpt.
¹²Wiingtuumä Isaías jecy
quiu'jähguiumbä:
Ja'a Isaí yhapä yhoc, minaamb
je'e miähane'ema'añ.
Ja'a jäya'ayhajxy ca'a judíošpä,
je'eds hajxy jaduhñ
hane'emáanäp.
Jaaya'ay hajxy jaduhñ jiøbhijxyp
coo hajxy min yajnähwa'ads
yajcuhwa'adsa'añii,
nømä Jesucristo jecy ñänøømä,
møødä jäya'ayhajxy ca'a judíošpä.
¹³Hoorä mijts, coo Diosmädia'agy
hajxy tøø mmäbøcy, weenä Dios
hajxy hoyhoy xyajxoonnda'agy,
ween hajxy xyaghity jootcujc.
Hix, tøø Dios hajxy xyhawáanäm
coogä hoyhajtä weenhajt
hajxy xmio'owáanäm ca'xy
pedyii. Hamuumdu'joot hajxy
jaduhñ mjøbhíxät. Xpiuhbédbä
Dioshespíritu hajxy jaduhñ ja'a
miäjaahaam.
¹⁴Mägu'ughajpädøjc,
nmøødhøčhä tøyhajt jaduhñ
coo hajxy hamuumdu'joot
mničhocy mnibia'häyoyii, møød
coo hojioot hajxy mmøødä,
møød coo Diosmädia'agy hajxy
hoy mwiinjuø'øy, møød coo

hajxy mjaty mägapx hane'em.
¹⁵⁻¹⁶Nébiøch hädaa nocy cham
 ngujaayän, hamøc hadsaačh mijts
 tøø nmägapxy tøø nhane'emy.
 Nyagjahmiejchp mijts jaduñ
 jadähooc. Nmóødhøčhä cuhdujt
 jaduñ coočh mijts nyagjahmiédsät.
 Hiç, ja'a Dióshøch jaduñ tøø
 xtiuungmo'oy coočhä miädia'agy
 nyajwá'xät ja'a Jesucristocøxpä
 jim maa mijtsän, mäduhñtiä hajxy
 mga'a judíoshaty. Coø jäya'ayhajxy
 nämay miäbøgät hamuumdu'joot
 ja'a DioshEspíritu miäjaahaam,
 mänit hajxy quiumaya'añii ja'a
 Diósäm.

¹⁷Jootcújc-høch jaduñ
 nnijwiø'oyii coočhä nduung
 tøø yhoø'øy, ja'a Dióshøch tøø
 xmió'oyäbä. Ja'a Jesucristøch
 jaduñ xpiuhbejp, páadyhøch
 nduung tøø yhoø'øy. ¹⁸Jayóoyyøch
 cham nmädia'aga'añ nebiátyhøčhä
 Jesucristo xpiuhbejty mänäabøčhä
 jäya'ay ja'a Diosmädia'agy
 nyajmäbøquiän, ja'a hajxy ca'a
 judíospä. Cábøch nmädia'aga'añ
 nebiatiä wiinghäna'c-hajxy tøø
 tiuñ. Mädia'agyháamhøčhä
 jaaya'ay nyajmäbøjcy, møød
 coočhä hoy-yagjuøñäbä hänajty
 nyajcähxø'øgy. ¹⁹Ja'a Dios, ja'a
 miäjaahaamä hijxtahnd tøø
 yajcähxø'øgy hoy-yagjuøñä.
 Ja'a yhEspírituhaamä
 jäya'ay tøø yajmäbøcy.
 Wiinduhmyhagájpthøčhä
 Diosmädia'agy hoy nyajwa'xy ja'a
 Jesucristocøxpä, coø jaaya'ay hajxy
 hoy xñähho'túutäm. Jímhøch
 ndägøøyy wädijpä Jerusalén.
 Jäguémhøch hoy nwädity. Høxtä
 jímhøch hoy nwädity maa naax

xiøhatiän Iliria. ²⁰Jayóoyyøch
 jim tøø nwädity majatiä
 Jesucristo hänajty tøø quia'a
 mädoyhadyiijän. Jadúhñhøch
 nnä'ägä wädityhaty. Hiç, cábøčhä
 Dios xtiuungmooyy coočh nwädität
 maa wiinghäna'cä Diosmädia'agy
 hänajty tøø yajwa'xiän. ²¹Pønjetiä
 Diosmädia'agy tøø quia'a mädoy,
 je'ečh tøø nyajwiingapxø'øy. Jaduhñ
 jim myiñ cujaay jaaya'aguixøxpä
 maa Diosmädia'aguian, ja'a hänajty
 cahnä miädoybä:

Pønjaty ca'a mädoobnä coo
 Dios ja'a yajnähwaatspä tøø
 quixy, je'edshajxy jaduñ
 mädoyhadaamb.

Ja'a jäya'ayä Diosmädia'agy
 hajxy hijty ca'a
 mädoobnä, jaduñ hajxy
 yajmøødmädia'aga'añii coo
 hajxy näxuuchii ja'a Diósäm.

²²Tøøch jim mayhooc nja
 nøcxa'añ maa mijtsän jim Roma.
 Pero cábøch hijty xñäbaadøøyyä
 coočh jim nnøcxät. Hiç, ja'a
 Diosmädiá'agyhøch hijty
 nyajwa'xyp wiinduhmyhagajpt.
²³Pero tøøch nwädijpädøøñä
 wiinduhmyhagajpt. Mobädájpnøch
 jim nnøcxaannä maa mijtsän. Tøø
 jaduñ majiomøjt yhiñä coočh
 jim tøø nja wi'i nøcxa'añ maa
 mijtsän. ²⁴Coočh mäbøcy hänajty
 jim nnøcxa'añ España, mänitøch
 mäbøcy jim ndu'unaxø'owät
 maa mijtsän. Jootcújc-høch
 jaduñ nnijwiø'øwøøjät coočh
 mijts jaduñ nguhixät. Mänitøch
 njaac tu'uyó'oyät coočh hänajty
 jim nnøcxa'añ España. Mänitäts
 mijts hii xpiuhbédät. ²⁵⁻²⁶Pero
 cab jaduñ choj näbaadø'owa'añ

cooĉ jim nnócxät maa mijtsän. Hix, Jerusalénhöch jayöjp nnócx'a'än. Xädó'öñhöch jim nocy nyega'än. Ja'a häyoobädöjc-höch nocy nmo'owa'än, ja'a hajxy mäböjpä. Ja'a mäböjpädöjc-hajxy jim tsänaabiä Macedonia mөөд jim Acaya, jaaya'ayä xädó'öñ hajxy yajmujc. Hööchä xädó'öñ hajxy xyajmäguexaamb cooĉ hänajty jim nnócx'a'än Jerusalén. ²⁷Hamdsoojoot hajxy yajmujcy, ca'a yhööchä nnämaayy coo hajxy yajmügät. Hawiinmats jaduñ coo mäböjpädöjc-hajxy piuhbedöjät, ja'a hajxy jim tsänaabiä Jerusalén. Hix, judíoshajp hajxy je'e. Jaaya'ayä Diosmädia'agy hajxy jim mäböjtsoñ Jerusalén mänaabä Diosmädia'agy tiägö'yän wädijpä ja'a Jesucristocöxpä. Mänitä jäya'ayhajxy höxhaam jiaac mädoyhajty, ja'a hajxy ca'a judíospä. Miäböjc hajxy je'ebä. Paady jaduñ yhawiinmatsä coo ja'a judíoshajxy piuhbedöjät ja'a jäya'ayhäjxiäm, ja'a hajxy ca'a judíospä. ²⁸Hoorä, cooĉä xädó'öñ hänajty jim hoy tö nyecy Jerusalén, mänítöch mäböcy jim nnócx'a'än España. Mänítöch jim ndu'unaxó'owät maa mijtsän jim Roma. ²⁹Y cooĉ jim nmédsät maa mijtsän, nägö'ö nädécyiöĉhä Jesucristo xpiuhbeda'än cooĉ mijtsä Diosmädia'agy nyajnhixó'owät, jaduñ hajxy tu'ugmucy nhíjtämät jootcujc. Nmöödhöĉhä töyhajt jaduñ.

³⁰Mägu'ughajpädöjc, tu'ugmädia'aguüä Jesucristo hajxy nmöödhíjtämbä, ja'a hajxy nWiindsöñhájtäm. Ja'a Dioshespíritu hajxy xyajniĉhöcäm.

Huuc tunä mayhajt hajxy maaĉ hööchcöxpän. Tsögä Dios hajxy hamuumdu'joot mänuu'xtäacäm maaĉ hööchcöxpän ³¹cooĉhä Dios jim xñäwá'anät Judeanaaxooty maa jäya'ayhajxy ca'a mäböjpän. Jaduhñä Dios hajxy nmänuu'xtäacämbät cooĉhä mäböjpädöjc-hajxy jim jootcujc xtiöjmó'owät jim Jerusalén cooĉ jim nmédsät xädó'öñeyepä. ³²Y coo Dios jaduñ miäná'anät, mänítöch jim nwiimbídät, mänítöch jim jootcujc nnócxät maa mijtsän. Jootcújc-höch jaduñ jim nbóo'xät. Hamiñ haxöpy hajxy mänit nniijootcapxmöpcöjämät. ³³Xmióoyämä Dios ja'a hoyhajtä weenhajt hajxy. Wéenäts mijts nägöxiä xpiuhbety.

16 Jímhöĉhä nmägu'ughajpä tu'ug chäna'ay maa cajpt xiöhatiän Cencrea. Febe xiöhaty. Diosmädia'agymiäböjp je'ebä. To'oxiöjc je'eduhñ. Mäbuhbejp jaduñ maa tsajtöjcän. ²Coo Febe jim miédsät maa mijtsän, naxy hajxy jootcujc mdehm miägu'ugpögät ja'a Jesucristocöxpä. Hawiinmats coo hajxy jaduñ mmägu'ugpögät pönjatiä Diosmädia'agy mäböjp. Mmó'owäbä Febe hajxy jaduñ tijaty yajmaajajpy. Hix, náxyhöch jaduñ xpiuhbety. Nämaj hajxy jaduñ töö piuhbedyii.

³Nyajpóo'xypöĉhä Prisca möödä Aquila. Tööĉ hajxy jaduñ xmiöödtuñ ja'a Jesucristocöxpä.

⁴Tööĉ hajxy jaduñ jim xñäwa'än mäjahñdiuum. Páadyhöĉhä Dioscujú'uyäp nmo'oy. Jaduhñä mäböjpädöjcä Dioscujú'uyäp hajxy

yejpä, ja'a hajxy ca'a judíospä, wiinduhmyhagajpt. ⁵Móodhøchä jäya'ay jaduhñ nyajpoo'xpä, pønjaty jaduhñ hamugøøby Dioswiingudsähgøøbiä maa Prisca tiøjc-hajxiän. Móodhøchä Epeneto nyajpoo'xpä. Jaanč tehñ yhöyhøch je'eduhñ xmiägu'ughaty. Jaayá'ayäts jim mäbøjtsohn ja'a Jesucristocøxpä maa naax jaduhñ xiøhatiän Asia. ⁶Nyajpoo'xypøchä Maríabä. Jaanč tehñ yhoj jim tiuñ maa mijtsän. ⁷Nyajpoo'xypøchä Andrónico møødä Junias. Høøch nmägunaaxhajxy je'e. Näguipxyhøch hajxy hijty xmiøødtsumyčhána'ay. Hoy piønä jaduhñ ñajuø'øy coo hajxy Dyiosquexiä. Paady hajxy jaduhñ quiejxä, coo Diosmädia'agy hajxy jaduhñ yajwá'xät. Jayøjp hajxy miäbøjcy ja'a Jesucristocøxpä. Høøch høxhaam njaac mäbøjc.

⁸Nyajpoo'xypøchä Ampliato. Høyhøch je'e xmiøødnijiootpaadyii ja'a Jesucristocøxpä, ja'a hajxy nWiindsøn'hájtäm. ⁹Nyajpoo'xypøchä Urbano. Näguipxy hajxy je'e xmiøødtuunäm ja'a Jesucristocøxpä.

Nyajpoo'xypøchä Estaquis. Høyhøch je'eduhñ xmiägu'ughaty. ¹⁰Nyajpoo'xypøchä Apeles. Tøø jiaanč tehñ miee'xtucy ja'a Jesucristocøxpä. Nyajpoo'xypøch pønjaty jaduhñ jim tsánaaby maa Aristóbulo tiøjcän, ja'a hajxy mäbøjpä. ¹¹Nyajpoo'xypøchä Herodión. Høøch nmägunaax je'ebä. Nyajpoo'xypøch pønjaty jaduhñ jim tsánaaby maa Narciso tiøjcän, ja'a hajxy mäbøjpä. ¹²Nyajpoo'xypøchä Trifena møødä Trifosa. Tuumb

hajxy jaduhñ ja'a Jesucristocøxpä, ja'a hajxy nWiindsøn'hájtämbä. Nyajpoo'xypøchä Pérsida. Jaanč tehñ chójcäp je'e. Hoy jiaanč tehñ tiuumbä maa Jesucristocøxpän. ¹³Nyajpoo'xypøchä Rufo møødä tiaj. Jaanč tehñ yhooyä Rufo ja'a Jesucristo miädia'agy pianøcxä. Jadúhñhøchä tiaj njuøøyyä nébiøch nhamdsoo tadjän. ¹⁴Nyajpoo'xypøchä Asíncrito, møødä Flegonte, møødä Hermas, møødä Patrobas, møødä Hermes, møødä mäbøjpädøjc jaac jimä. ¹⁵Nyajpoo'xypøchä Filólogo, møødä Julia, møødä Nereo møødä piuhdo'oxy, møødä Olimpas, møødä Diosmädia'agymiäbøjpähajxy jaac jimä.

¹⁶Xi'ig xon hajxy mniyajpoo'xóøjät ja'a Jesucristocøxpä. Xyajpoo'xp mijtspä, ja'a hajxy mäbøjpä ja'a Jesucristocøxpä wiinduhmyhagajpt.

¹⁷Mägu'ughajpädøjc, jii jäya'ayhajxy näjele wiädity, wiing hajxy yajnähixø'øy; cab hajxy yajnähixø'øy nej mijts tøø mhabøquiän ja'a Jesucristocøxpä. Cabä jioot hajxy xyajmädsocy coo mijts tu'ugmädia'agy mhídat maa Diosmädia'agyquiøxpän. Jaduhñ hajxy yajnähixø'øy coo wiingmädia'agy hajxy mbadu'ubögät. Naxy hajxy mdehñ ñigwieendähadóøjät maa jaaya'ayhajxy jaduhmbän. Cab hajxy jim mnøcxø'øwät maa jaaya'ayhajxy jaduhmbän. ¹⁸Hix, cabä Diosmädia'agy hajxy yajnähixø'øy ja'a Jesucristocøxpä. Jaduhñ hajxy yajnähixø'øy nebiä cu'ughajxy jia mädowa'añän. Paady hajxy jaduhñ yajnähixø'øy,

yajmäjuyaamb hajxy jaduhñ;
 jaduhñ hajxy hoy jiatcø'øwa'añ
 nebiä jioot hajxy choquiän. Hoy
 yajxon hajxy jia capxy jia mädia'agy.
 Pero xjia wi'i yajtägoyyaamb mijts
 jaduhñ. ¹⁹Hopiönä tøø miädoyhaty
 coo mijtsä Diosmädia'agy
 hamuumdu'joot mmäbøcy ja'a
 Jesucristocøxpä; páadyhøch jootcujc
 mnijäwø'oyii ja'a mijtsøxpä.
 Jaduhñ mijts nyajmädsocy coo
 hajxy mnijajcopcø'owøjät, jaduhñ
 hajxy hoy mwädítät, jaduhñ hajxy
 haxøøg mga'a jäya'ayhádät. ²⁰Ja'a
 Dios hajxy xyaghidaamb jootcujc.
 Coo hajxy mga'a møjpädá'agät
 waambatiä høhndaacpä hajxy xjia
 wi'i yajnähixø'øwa'añ, jaduhñä
 Dios ja'a møjcu'ugong quia'a
 yajmäjädá'agät. Y cabä møjcu'ugong
 hajxy nej xtiúunnät. Ween mijtsä
 Jesucristo ja'a hoyhajtä weenhajt
 tehngajnä xmiø'oy, ja'a hajxy
 nWiindsøn'hájtämbä.

²¹Xyajpoo'xp mijtsä Timoteo.
 Høøch jaduhñ xmiøødtuumb.
 Jaanä xyajpoo'xp mijts jaduhñ
 ja'a Lúciobä, møødä Jasón,
 møødä Sosípater. Haagä høøch
 nmägunaaxhajxy je'e.

²²Høøch Tercio, høøch hädaa
 nocy ngujahby. Jaanä høøch mijts
 nyajpoo'xpä ja'a Jesucristocøxpä.

²³Xyajpoo'xp mijtsä Gayo.
 Yaaçh jaduhñ nhity ja'a Gayo
 tiøgooty. Yejpä tiøjc jaduhñ
 coo mäbøjpädøjc-hajxy
 yaa yhamugø'owät

Dioswiingudsähgøøbiä. Xyajpoo'xp
 mijtsä Erasto. Jim je'e tiuñ haguic.
 Xädø'øngwieendähajp jim. Møødä
 hermano Cuarto hajxy xyajpoo'xpä.

²⁴Ween mijtsä Jesucristo ja'a
 hoyhajtä weenhajt xmiø'oy nägøxiä.
 Amén.

²⁵Hoorä, tsøgä Dios hajxy møj
 jaançh capxpáatäm. Jaaya'ay mijts
 hamuumdu'joot xjiaac yajmäböögäp
 ja'a Jesucristocøxpä. Jaduhñhøch
 nnä'ägä yajnähixø'oyhaty coo
 Dios ja'a Jesucristo quiejxy.
 Jaduhñä Jesucristo hajxy hoy
 xyajnähwáatsäm nägøxiä, møødä
 judíoshajxy, näguipxy møødä
 ca'a judíoshajxypä. Tøyhajt
 jaduhñ. Jéquiänä Dios jaduhñ
 wyiinmaayy, pero cab jaduhñ choj
 yajtøjiajty. Paady hajxy nga'a tsoj
 wiinjuøoyyäm. ²⁶Pero jim jaduhñ
 myiñ cujaay maa Diosquexyhajxy
 jecy quiujahyyän. Jim jaduhñ
 cøxiä quiapxtøy. Naamnä hajxy
 jaduhñ tøø nwiinjuøoyyäm. Paadiä
 Dios jaduhñ yhanehmnä coo
 mädia'agy ja'a Jesucristocøxpä
 wiá'xät wiinduhmyhagajpt,
 jaduhñä jäya'ayhajxy nägøxiä
 miäböögät, jaduhñ hajxy
 quiudiúumbät. Homiänaajä Dios
 yhity.

²⁷Jagooyyä Dios tøø wyiinmay
 coo hajxy xyajnähwáatsäm,
 coo hoyhajtä weenhajt hajxy
 xmiøoyyäm. Ja'a Jesucristocøxpä
 Dios møj jaançh quiapxpaadyii
 cøjxta'axiøø. Amén.

1 Corintios

1 ¹⁻²Høøch Pablo hädaa nocy cham njahby. Dióshøch xwyiinguejx coöchä Jesucristo xquiuguexyhädät. Mijts hädaa nocy cham nyajnjahby, pønjaty ja'a Diosmädia'agy mäbøjp maa ja'a cajpt jaduhñ xiøhatiän Corinto. Dios ja'a Jesucristo jaduhñ quejx coo hajxy hoy xñähho'túutäm, pønjaty ja'a Jesucristo miädia'agy mäbøjcäp wiinduhmyhagajpt. Jaaya'ay hajxy nWiindsøn'hájtäm. Dios hajxy xyajnhädfjäm coo ja'a Jesucristo hajxy xñähho'túutämät. Ja'a hermano Sóstenes, xyajpoo'xp mijts je'ebä. ³Weenä Dios hoyhajt weenhajt hajxy xmio'oy møødä Jesucristo. Ja'a Dios hajxy nDeedyhájtäm.

⁴Homiänáajøch ja'a Dios nnäma'ay Dioscujú'uyäp je'eguiøxpä coo Dios mayhajt tiuñ maa mijtsøxpän. Paadiä Dios mayhajt jaduhñ tiuñ, coo Jesucristo hajxy tu'ugmädia'agy mmøødhity. ⁵Coo hajxy jaduhñ mmøødhity, paadiä Dios hajxy tøø xpiuhbety møj may, jaduhñ hajxy hoy mgápxät, jaduhñ hajxy hoy mwiinjuø'øwät cøxiä. ⁶Coo højts mijts ja'a mädia'agy tøø nyajwiingapxø'oy coo Jesucristo hajxy xñähho'túutäm,

paadiä Diosmädia'agy hajxy hamuumdu'joot mmäbøjnä. ⁷Coo hajxy jaduhñ mmäbøjnä hamuumdu'joot, paadiä Dios mäjaa hajxy xjiaançh tehñ mio'oy coo hajxy mgudiuñ waambaty hajxy xyhane'emy. Mjøbhijxyp mhajuøøbiä Jesucristo hajxy jaduhñ coo quiädaactägatsa'añ. ⁸Dios hajxy xpiuhbedaamb coo miädia'agy hajxy hoy mgudiúunät. Paady mijts Dios hänajty xpiäda'aga'añ hawa'adstuum coo ja'a Jesucristo ja'a haxøøgjäya'ay hänajty yajcumädoowaannä. ⁹Tøyhajt ja'a Dios miädia'agy jaduhñ. Cabä Dios mänaa yhøhnda'agy. Jaaya'ay hajxy tøø xyajnhädiijy coo yHuung hajxy mmøødhjätät tu'ugmädia'agy. Ja'a Jesucristo je'e.

¹⁰Hermanodøjc, ja'a Jesucristo miädiä'agyhøch mijts cham nyajmøødcapx nyajmøødmädiaactägatsaamby coo hajxy tu'ugjoot tu'ugwiinmahñdy mhídät maa tsajtojcän. Cab hajxy tii myajtsibø'øwät. ¹¹Páadyhøch jaduhñ nmäna'añ, tøøchä hermanohajxy xyajmädooyhaty coog hajxy mnimiädsibø'øyii. Jim hajxy choon maa Cloé tiøjcän. ¹²Wiingátägä mädia'agy hajxy

mbanøcxy. Näje'e hajxy miäna'añ cóogøch høøch nmädia'agy hajxy xpianøcxä. Näje'e hajxy miänaambä coogä Apolos miädia'agy hajxy pianøcxä. Näje'e hajxy miänaambä coogä Pedro miädia'agy hajxy pianøcxä. Y näje'e hajxy miänáangombä coogä Jesucristo miädia'agy hajxy pianøcxä. ¹³Pero cabä Jesucristo miädia'agy hajxy madiu'u xyajnáhixøyyäm. Hix, jaaya'ay mijts jaduñ xñähho'tuut cruzcøxp, ca'a yhøøch mijts nnähho'tuut. Paady hajxy mnäbejty coo Jesucristo miädia'agy hajxy mbanøcxä, ca'a jie'eguiøxpä cooçh høøch nmädia'agy hajxy xpianøcxä. ¹⁴⁻¹⁵Jagóoyyøch ja'a craa Crispo nyajnäbejty maa mijtsän møødä craa Gayo. Cábøchä wiinghäna'c jim nnä'ä yajnäbejty. Cab hajxy jaduñ mmäná'anät cooc xtyijy nyajnäbejty. Páadyhøchä Dios jaduñ nnäma'ay Dioscujú'uyäp. ¹⁶(Jexioo, chamçh njahmiejtstáacombä cooçh Estéfanashajxy nyajnäbejpä, møødä yhuung møødä tio'oxy. Cab ndijy wiinghäna'c njaac yajnäbejty.) ¹⁷Ca'a jäya'ay-yajnäbéjpoçh Jesucristo xquiejxy. Diosmädia'agy-yajwá'xpøch xquiejxy coo hajxy xñähho'túutäm cruzcøxp. Cooçh jaduñ nwädity Diosmädia'agy-yajwá'xpä, howyiinjuøñøch hänäjty ngapxy nmädia'agy. Páadyhøch jaduñ ngapxy nmädia'agy howyiinjuøñä, chójpiøch njoot jaduñ coo hajxy hoy mwijnjuø'øwät ja'a Jesucristocøxpä. Cábøch njoot chocy cooçh nmädia'agy hajxy xquiumáayyät je'eguiøxpä cóogøch tyijy yajxon ngapxy nmädia'agy.

¹⁸Nmäbøjcäm ja'a mädia'agy hajxy jaduñ coo Jesucristo hajxy xñähho'túutäm cruzcøxp. Pønjaty häda'agaamb möjcu'uhaam, coo hajxy miädooy coo Jesucristo hajxy tøø xñähho'túutäm cruzcøxp, näxiicypy hajxy jaduñ je'eguiøxpä cooc tyijy jagooyyä cädieeyhäna'c-hajxy yagho'ogyii cruzcøxp. ¹⁹Jaduñ jim myiñ cujaay maa Diosmädia'aguiän:

Ja'a häna'c-hajxy
cuwiinmahñdypä,
ja'a tyijy hajxy
howyiinmahñdymøødpä,
cábøchä wyiinmahñdyhajxy
nyajtsoobaadaanä,

nømä Dios miänaañ. ²⁰Hoorä, yajcähxø'piä Dios coo jäya'ay wyiinmahñdyhajxy quia'a tsoobaada'añ, ja'a hajxy niñänøømäbä cuwiinmahñdy, ja'a tyijy hajxy howyiinmahñdymøødpä. Näxiicypiä Dios jaduñ. ²¹Jaanch tehñ quiuwiinmahñdiä Dios tu'uquiiä. Je'e jaduñ mänaañ coo højts ja'a miädia'agy nyajwá'xämät coo Jesucristo hajxy xñähho'túutäm. Pønjaty jaduñ mäbøjp, Dios jaduñ wiinmahñdyhajt coo hajxy jaduñ yajnäwha'adsøøjät ja'a piojpä quiädieeyhajxy, hoyyä jäya'ayhajxy näje'e jia näxi'igy. Ca'a yhøjts nhamdsoo wiinmahñdyhaam ja'a Dios ja'a miädia'agy hajxy xyajwiinjuøyyäm. Jaduñä Dios miänaañ.

²²Ja'a judíoshajxy, coogä hoy-yagjuøñäbä hajxy yhixät, mänitác tyijy hajxy jaduñ miäböga'añ. Y ja'a griegohajxy, mänitác tyijy hajxy jaduñ miäböga'añ coogä jäya'ay

miädia'agy hajxy miädóowät, ja'a hajxy niñänóomäbä cuwiinmahñdy, ja'a tyijy hajxy howyiinmahñdymøødpä. ²³Pero højtshájtäm, jaduñ højts nmädiáacäm coo Jesucristo hajxy xñähho'túutäm cruzcøxp. Cabä judíosahajxy jaduñ miäböcy. Cab hajxy jaduñ miäna'añ cooc tyijy Jesucristo quia'a Dioshuungä. Hix, nõm hajxy miäna'añ cooc tyijy ja'a Dioshuung quia'a ho'oga'añ cruzcøxp. Hoorä, ja'a jäya'ayhajxy ca'a judiöspä, ni je'e hajxy quia'a mäböjpä. Hoñäxiicnä Diosmädia'agy hajxy miädoy. ²⁴Pero coo Dios hajxy tøø xwyiimbíiwäm, paady hajxy nmäböjcäm coo Jesucristo hajxy xñähho'túutäm, hoy hajxy nja judiösäm. Cooc hajxy jaduñ xñähho'túutäm, jaduñä Dios yajcähxø'cy coo mäjaa miøødä, coo quiuwiinmahñdiä. ²⁵Coo Dios ja'a yHuung nähdujcy coo yagho'ogøøjät, paadiä jäya'ayhajxy näje'e miäna'añ cooc tyijy Dios quia'a cuwiinmahñdiä, cooc tyijy mäjaa quia'a møødä. Cabä Diosmädia'agy hajxy miäböcy, paady hajxy jaduñ miäna'añ. Hoyyä Dios ja'a wiinmahñdy häxøpy weeñtiä jia møødä, ni jaduñä jäya'ay wyiinmahñdyhajxy häxøpy quia'a najtspaadøøyyä. Jaaná jaduñduhmbä, hoyyä Dios ja'a mäjaa häxøpy weeñtiä jia møødä, ni jaduñä jäya'ay miäjaahajxy häxøpy quia'a najtspaadøøyyä.

²⁶Hermanodøjc, huuc mädown hajxy, mänaa mijts Dios xwyiimbiiyyän, cab hajxy hänäjty

nämay mhøxpøquiä, näje'eyyäm; cab hajxy hänäjty nämay mmäyøøjä, näje'eyyäm; cabä møjcuहुdujt hajxy hänäjty nämay mmøødä, näje'eyyäm. ²⁷⁻²⁸Nmäböjcäm ja'a Diosmädia'agy hajxy. Xpiéjxäm jäya'ay hajxy hijty coo hajxy hijty nga'a høxpøquiäm, coo hajxy hijty nga'a mäyøøjäm, coo møjcuहुdujt hajxy hijty nga'a møødhájtäm. Xxiøøghájtäm ja'a jäya'ay hajxy hijty jaduñ. Pero coo Dios hajxy xwyiimbíiwäm, jaduñä Dios ja'a jäya'ay yajtsähdiuundägajch, ja'a hajxy hijty xpiéjxämbä. Jaduñä Dios yajcähxø'cy coo hajxy hänäjty tøyhajt quia'a høxpøquiä, coo hajxy hänäjty tøyhajt quia'a mäyøøjä, coo møjcuहुdujt hajxy hänäjty tøyhajt quia'a møødä. ²⁹Hix, cab jaduñ põñ jim ñiguiumayaañänä Dioswiinduum. ³⁰Dios hajxy jaduñ xpiädáacäm tu'ugmädia'agy møødä Jesucristo. Jaduñä Dios yajcähxø'cy coo quiuwiinmahñdiä coo Jesucristo yaa quiejxy hädaa yaabä naaxwiin, coo hajxy hoy xñähho'túutäm. Jaduñ hajxy xyajnáhwáatsäm ja'a nbojpä ngädieeyhájtäm. Jaduñ hajxy xpiädáacäm hawa'adstuum.

³¹Jaduñä Diosmädia'agy miäna'añ: “Cab hajxy hamdsoo nniguiumáayyämät. Tsøgä Dios hajxy møj jaanç pädáacäm.”

2 Hermanodøjc, mänájøch mijts nnähooçhoönän, mänájøch mijts ja'a Diosmädia'agy nyajwiingapxøøçhoönän, cab mijts yajxón nmøødmäiaacy. ²Cooçh hänäjty jim nnøcxa'añ maa mijtsän, tøøçh hänäjty nwiinmahñdyhaty coo Jesucristo hajxy hänäjty

nyajmøødmädia'aga'añ, coo hajxy hänäjty je'le tøø xñähho'túutäm cruzcøxp. Cábøch wiingmädia'agy hänäjty nmädia'aga'añ.

³Nnajuøøbiøch hänäjty cooøch hänäjty hoy nga'a capxa'añ ja'a nhamdsoo copc-háamhøch. Høxtä tsähgøøbiøch hänäjty; høxtä tsäyúubiøch hänäjty. ⁴Hóyhøch hänäjty yajxon nga'a jagä mädia'agy, xpiuhbéjpoøch ja'a Dioshespíritu hänäjty ja'a miäjaahaam neby hajxy jaduhñ ca'xy mwiinjuø'owät.

⁵Hix, chojpiä Dios ja'a jioot jaduhñ coo miädia'agy hajxy mmäbøjcät. Ja'a miäjaahaamä Dios hajxy xyajmäböcy, ca'a quiuwiinmahñdyhäna'c hajxy jaduhñ xyajmäbøjp.

⁶⁻⁷Ja'a häna'c-hajxy cuwiinmahñdypä hädaa yaabä naaxwiimbä, cábøch hajxy jaduhñ xñänømy cooøch nguwiinmahñdiä. Jadúhñhøch häna'c-hajxy xñänøombä cooøch nga'a cuwiinmahñdiä, ja'a møjcuhdujtmøødpähajxy ja'a hädaa yaabä naaxwiimbä, ja'a Diosmädia'agy hajxy ca'a mäbøjpa. Mänitä miäjaahajxy piøgáanäxä møødä wyiinmahñdyhajxy coo hädaa yaabä naaxwiimbä hänäjty quiuhdägoyya'añ. Pønjatia Diosmädia'agy ca'xy cudiuumb, ñajuøøby hajxy jaduhñ coo Dios tøyhajt quiuwiinmahñdiä. Paady hajxy jaduhñ ñajuø'øy cooøch jaduhñ tøø nyajmøødmädia'agy coo Jesucristo hajxy tøø xñähho'túutäm, møød coo hajxy jim nnøcxáanäm Dioswiinduum. Jequiän ja'a Dios jaduhñ wyiinmaayy. Cahnä naaxwiimbä hänäjty yhawijy

tiøø'xta'agy. Cabä Dios ja'a wyiinmahñdy choj yajwiingähxø'cy. Cahnä hajxy xyajwiinjuøøyyäm høxtä jäda'anäbaadyñä. ⁸Pero cabä møjcuhdujtmøødpähajxy jaduhñ wyiinjuø'owa'añ. Coo hajxy cu wyiinjuøøyy, cabä Jesucristo hajxy cu miøjpahbejty cruzcøxp. Piädaac ja'a Dios ja'a yHuung jaduhñ coo yaa wyiingudsähgø'owøøjät hädaa yaabä naaxwiin. ⁹Jaduhñä Diosmädia'agy miäna'añ:

Ni pøn quia'a hixyñä, ni quia'a mädoynä,
ni quia'a wiinmayñä nebiatiä
Dios hoyhajt weenhajt
mio'owa'añ pøn jaduhñ
chojpy.

¹⁰Ja'a højtshájtäm, tøø Dios hajxy xyajwiinjuøøyyäm ja'a yhEspírituhaam nebiaty jaduhñ wyiinmahñdyhajty. Yhøxtaabiä yhEspíritu jaduhñ neby hajxy hoy xyajwiinjuøøyyämät.

¹¹Cabä wiinghäna'c jaduhñ xñajuøøyyät nebiaty hänäjty mwiinmay. Jagooyyä miich mhamdsoo juøhñdy jaduhñ ñajuø'owät. Jaanä jaduhñä Diospä, cab jaduhñ pøn ñajuøøbiä nebiatiä Dios wyiinmay. Jagooyyä Dios yhamdsoo Espíritu jaduhñ ñajuø'øy. ¹²Tøø Dios ja'a yhEspíritu hajxy xmióoyyäm coo højts ja'a miädia'agy jaduhñ nmäbøjcäm. Ja'a yaabä juøhñdy, cab jaduhñ miäbaady nebiä Dios ja'a yhEspíritän. Paady hajxy jaduhñ xmióoyyäm, jaduhñ hajxy xyajnajuøøyyäm coo hoyhajt weenhajt hajxy xñä'a móoyyäm. ¹³Jaduhñä jäya'ay hajxy nhawaandägájtäm coo

hajxy jaduhñ xñä'ä móoyyäm. Jaduhñ hajxy nhawáañäm nebiatiä Dioshespíritu hajxy xyajwiinjuóoyyäm. Jaduhñ hajxy nyajwiinjuóödiägájsäm je'eguióxpä coo Dioshespíritu hajxy mióödhajpä. Ja'a häna'c-hajxy tyijy cuwiinmahñdypä, cabä wiinmahñdy hajxy ca'xy mióödá coo tijaty mädia'agy hajxy hánajty xyajmóödmädia'aga'añ. Paadiä wiinmahñdy hajxy ca'xy quia'a móödá coo Dioshespíritu hajxy quia'a móödá. Pero hójts, cab hójts nmädiáacäm ja'a nhamdsoo wiinmahñdyhaam.

¹⁴Pønjetiä Dioshespíritu ca'a móöð, cab hajxy wyiinjuó'øy nebiatiä Dioshespíritu hajxy jia wi'i yajmóödmädia'aga'añii. Cábäc tyijy jaduhñ choobaady. Hix, coo Dioshespíritu hánajty mga'a móödá, cab jaduhñ mnä'ägädä wiinjuó'ówät nebiä Dioswiinmahñdy. ¹⁵Pønjetiä Dioshespíritu móöð, quióxy wyiinjuóøby hajxy jaduhñ. Pønä Dioshespíritu ca'a móöð, cabä cuhdujt hajxy mióödá coo hajxy miäná'anät cooc tyijy jäya'ay ja'a Diosmädia'agy hajxy hoy quia'a yajnáhixó'øy, ja'a jäya'ay ja'a Dioshespíritu hajxy móödpä.

¹⁶Jaduhñ jim myiñ cujaay maa Diosmädia'aguian: “Cabä Dios wyiinmahñdy pøn ñajuóoyyá. Cabä Dios pøn yajnáhixó'oyii.” Pero nmóödhájtäm ja'a Jesucristo wyiinmahñdy hajxy jaduhñ.

3 ¹⁻²Hermanodøjc, coöch jim nhooçhohñ maa mijtsän, cáböch mijts tsipjaty nyajnáhixóøyy. Ja'a ca'a tsipjátypøch mijts jaduhñ nyajnáhixóøyy. Hix,

je'enä hajxy hánajty mhityñä nebiä naamdägø'oybän maa Jesucristocøxpän. Jaduhñ hajxy hánajty mhity nebiä Diosmädia'agy ca'a mábøjpän. Cahnä hajxy hánajty may mwiinjuó'øyñä maa Dioshespíritucøxpän. Y høxtä jäda'anäbaadyñä, cahnä hajxy jaduhñ may mwiinjuó'øyñä.

³Je'enä hajxy mniwyiinhecy mniwyiinoyiinä coo hajxy mga'a hity tu'ugmädia'agy. Cab hajxy jaduhñ mniçhocy mniemie'xyii. Je'enä hajxy jaduhñ mjäya'ayhaty nebiä Diosmädia'agy ca'a mábøjpän. ⁴Näje'e hajxy mmäna'añ: “Høöch ja'a Pablo miädia'agy nbanócxäp.” Näje'e hajxy mmänaambä: “Høöch ja'a Apolos miädia'agy nbanócxäp.” Coo hajxy jaduhñ mga'a hity tu'ugmädia'agy, cähxø'p jaduhñ coo hajxy jaduhñ mjäya'ayhatyñä nebiä Diosmädia'agy ca'a mábøjpän.

⁵Høöch Pablo, cáböch møjcuhdujt nmóöðä. Ni ja'a Apolos jaduhñ quiaa móöðäbä. Cab jaduhñ yhähixó'øy coo hójts nmädia'agy hajxy jaduhñ xyajtsibóøyyät. Jue'e hójts, Dios hójts jaduhñ xñä'ä moonsähajp. Dios hójts jaduhñ xquiejx coo mijts jaduhñ nyajnáhixó'ówät. Jaduhñ hajxy mmábøjcy ja'a Dioscøxpä. Cøjwiinduum hójts ja'a Dios ja'a tuung xmiooyy. ⁶Høöch mijts ja'a Diosmädia'agy nyajnáhixóøçhohñ. Mänitä Apolos hajxy jaduhñ xjiaac yajnáhixóøyy. Pero Dios, je'e mijts jaduhñ xyajmábøjc. Y tehngahnä hajxy xjiaac yajmábøga'añ. Tehngahnä hajxy xjiaac yajmayø'owa'añ. ⁷Høöch Pablo, cáböch møjcuhdujt nmóöðä. Ni

ja'a Apolos jaduhñ quia'a mʊdʌbä. Jagooyä Dios mʊjcuहुdujt miʊdä. Je'eduhñ tu'ug xyajmäbʊgäp. Je'eduhñ tu'ug xyajmayʊ'owäp. ⁸Tu'ugmädiä'agyhöch ja'a Apolos nmʊdʌhity, hoy höjts cʊjwiingtuuñg nja mʊdä. Coö höjts hoy ndúnät, mänitä Dios mʊjmayhajt tiúnät maa höjtsçxpän. Pero coö höjts hamuumdu'joot nga'a túnät, mänitä Dios mayhajt hänäjty weeñtiä tiunaambä maa höjtsçxpän. ⁹Höjts ja'a Dios nmʊdʌtuumby. Y coö mijts hoy mjäya'ayhaty, jaduhñä jäya'ay tøyhajt hajxy miʊdä coö Dios hajxy hoy xyagjäya'ayhaty. Mijts ja'a Dios ja'a mwiinmahñdy xyajtägäjsäp neby hajxy jaduhñ mhidät nebiatiä jioot chocy.

¹⁰⁻¹¹Tʊöchä Dios xwyiinguexy coö mijts ja'a miädia'agy nyajñähixʊʊyyät ja'a Jesucristocʊxpä. Xmióoyyhöchä wiinmahñdy jaduhñ nébiöch mijts jaduhñ hoy nyajñähixʊ'öd. Cabä cuहुdujt jaduhñ myiñ coö pʊñ ja'a Dios miädia'agy yajtägäjsät ja'a Jesucristocʊxpä. Ween hajxy jaduhñ yajñähixʊöbiä nébiöch tʊö nyajñähixʊ'oyän. ¹²Pʊñjatiä Diosmädia'agy mäbʊjp, jaduhñ hajxy tiuunghaty nebiä jäya'ayhajxy jaduhñ miädoyhädät ja'a Jesucristocʊxpä. Näje'e hermanodʊjc-hajxy hoy tiuñ. Paady hajxy jiaançh tehñ quiumayii. Jiiby hajxy näje'e, cab hajxy hoy tiuñ. Paady hajxy jaduhñ quia'a cumayii. ¹³⁻¹⁴Coö Jesucristo hänäjty yaa quiädaactägatsa'añ, mänit jaduhñ quiähxʊ'öga'añ pʊñjaty hänäjty hoy tʊö tiuñ. Cʊjxta'axiʊö ja'a Dios jiahmiedsa'añ neby

hajxy hänäjty hoy tʊö tiuñäbä. Mʊjmayhajt ja'a Dios tiunaambä maa häna'c hoy tʊö tiuñän. Jaduhñ je'e quiähxʊ'ögaambä pʊñjaty hänäjty hoy tʊö quia'a tuñ. Cabä Dios mayhajt tiuna'añ maa häna'c hoy tʊö quia'a tünäbän. ¹⁵Hawa'adstuum hajxy yaghida'añii, pero hobiä nejpiä.

¹⁶Jaduhñ hajxy nmäbäatäm hädaa hajxy njoothäjtämbä nebiä Diostʊjcän coö Dioshespíritu hajxy nmʊdʌhajtäm maa hädaa njoodootyhajxiän. Mnajuʊöby hajxy jaduhñ, túhmäts. ¹⁷Pʊñjaty haxʊög nä'ägädä jäya'ayhajp, hoyyä Dioshespíritu hajxy jia mʊdä jioodooty, päda'agäänäp hajxy hajʊöxc. Hix, coö ja'a Dioshespíritu hajxy mmʊdä ja'a mjoodooty, páadiäts mjoot hajxy wa'ads myaghidät. Hix, cabä Dioshespíritu hoñä'ä maajä yhida'añ majaty hänäjty quia'a wa'adsä.

¹⁸⁻¹⁹Näje'eg tyijy mijts madiu'u mnajuʊ'öy neby hädaa yaabä naaxwiimbä wiinmahñdy myiñ. Cab hajxy hamdsoo mniguiumayʊöd coö hajxy mjaty coö hajxy mnajuʊ'öy. Nʊmä Dios miäna'añ cooc hädaa yaabä naaxwiimbä wiinmahñdy quia'a tsoobaady. Hahixʊöby jaduhñ coö mhamdsoo wiinmahñdy hajxy mnajtshixʊöñät, coö hajxy jaduhñ mnibiäda'agʊʊjät nebiä ca'a wiinjuʊöbiän. Jaduhñ ja'a Dioswiinmahñdy hajxy hoy mwiinjuʊ'öwät nebiä tiʊyyän. Jaduhñ jim myiñ cujaay maa Diosmädia'aguiän: “Dios yajcumädowaamb ja'a häna'c jaançh tehñ jiajpä mäwiinhöön.”

²⁰Jaduhñ jim myiimbä cujaay maa Diosmädia'aguiän: “Ñajuøøbiä Dios coo jäya'ay wyiinmahñdyhajxy quia'a tsoobaady, ja'a hajxy tyijpiä cuwiinmahñdy.”

²¹⁻²²Näje'e jäya'ayhajxy ñiguiumayii je'eguiøxpä coo jäya'ay miädia'agy hajxy pianøcxä ja'a tyijy tøyhajtmoødpä. Cab hajxy jaduhñ mbahíxät. Mijtsøxpä Dios cøxiä yhädiuuñ tijaty yaa hijp hädaa yaabä naaxwiin. Møød højts ja'a Dios jaduhñ xyhädiuumbä ja'a mijtsøxpä, højts yajñähixøøbiädøjc, møød høøch, møødä Apolos, møødä Pedro. Paadiä Dios jugyhajt hajxy xmióoyyäm neby hajxy jaduhñ hoy nyajtuungpaatämät. Hoy hajxy cu nja hó'cäm, hoy hajxy nyajtuungpaadaänäm tijaty jäda'ahaty jájtáp túunäp, chaads tijaty jadäänäp tunäänäp, je'eguiøxpä coo Diosmädia'agy hajxy nbanøcxäm. ²³Hix, coo Jesucristo hajxy mWiindsønhaty, paadiä miädia'agy hajxy myajtuunä. Y jaduhñä Jesucristobä, yajtuunäbä Tieedy miädia'agy je'ebä.

4 Cab højts møjcuहुdujt jaduhñ nmøødä, ni høøch ni Apolos; xñä'ä moonsähajp højts ja'a Jesucristo jaduhñ. Dios højts jaduhñ tøø xwyiinguexy coo højts ja'a Diosmädia'agy ca'xy ngapxtówät, mädyijjaty ja'a jäya'ayhajxy hijty jegyhajty quia'a wiinjuøøby. ²Mäduhñtiä jäya'ay mioonsähadyii, tsipcøxp hajxy quiudiúnät neby hajxy yhane'emyii. Paady højts jaduhñ ngudiunaambä neby højts ja'a Dios tøø xwyiinguexy. ³⁻⁴Pero høøch, cábøch jaduhñ tii nmøjpäda'agy

cooçh pøn waambaty xñänómät pø hóyhøch nyajñähixø'øy, pø caj. Hóyhøch cu nja mäna'an cooçh hoy nyajñähixø'øy, cab jaduhñ choobaada'añ. Tu'uquiiä Jesucristo jaduhñ ñajuø'øy pø hóyhøch njaançh yajñähixø'øy. Y høøch, cooçh hamdsoo nniñänømøøjät pø hóyhøch nyajñähixø'øy, pø caj, cábøch nmädia'agy jaduhñ choobäadät. Cábøch nnajuø'øy pø hóyhøch tøø nyajñähixø'øy, pø caj. Pero, cab jaduhñ ñejpiä pø nnajuøøbiøch, pø cábøch nnajuø'øy. Ja'a Jesucristo tu'uquiiä nägapxaamb pø hóyhøch tøø nyajñähixø'øy, pø caj. ⁵Caj pøn nä'ä nägoobä mnä'ä nänómät coo tøø quiädieey pø cabä tøyhajt hänäjty mnä'ä møødä. Coo Jesucristo yaa quiädaactägätsät, mänit hänäjty jaduhñ yajcähxø'øga'añ neby hajxy nwiinmahñdyhajtäm, nebiaty hajxy hänäjty hamee'ch tøø njäya'ayhajtäm. Mänitä Dios hajxy xquiumayäänäm coo hajxy hänäjty hoy tøø ngudiúunäm.

⁶Päadyhøch cham tøø nmädia'agy ja'a høøchøxpä møødä Apolosøxpä neby højts nyajñähixø'øy, cábøch njoot jaduhñ chocy coo hajxy jaduhñ mnänómät coo tu'jäya'ay jiaty, coo tu'jäya'ay quia'a jaty. Pønjetiä Diosmädia'agy yajñähixøøby, je'eçh jaduhñ nnänøømby coo hajxy jaduhñ mga'a nänómät. ⁷Cab jaduhñ yhooyä coo hajxy mniguiumayøøjät. Hix, Dios mäjaa hajxy jaduhñ xmiooby neby hajxy jaduhñ hoy mmädúnät. Cab jaduhñ yhooyä coo hajxy mmäná'anät coo hajxy hamdsoohaamby mbaady. Caj

mijts pøn xñänømy cooc tyijy mijts mjaanč teh̄m miøj mjaanč teh̄m jiaančhä.

⁸Nøm mijtsäda'a hamdsoo mniñänømyii cooc tyijy Jesucristo mmäbaatnä nej yhojiäya'ayhatiän, y cooc tyijy ja'a Diosmäjaa hajxy mjaanč teh̄m miøødä. Jaduh̄n mäwiin mijts mnibiädäacänä nebiä jäya'ayhajxy hanehm̄bän, cooc tyijy mijts cuhdujt mmaas møødä que hõjts. Pero mgapxtägooby hajxy jaduh̄n. Hoy hijty jaduh̄n coo hajxy cu mhanehmy. Näguipxy hajxy jaduh̄n cu nhanéh̄mäm.

⁹Pero hõjts Diosquexypä, jaduh̄n mäwiinhõch ndijy hõjts Dios xpiädaacy nebiä cuhdujtmøød ca'a hidaambän. Jaduh̄n mäwiin hõjts xpiädaacpä nebiä cädieeyhänä'c yagho'oga'añiijän. Hijxwiinduum hõjts jaduh̄n njaanč teh̄m chaačhpøcy. Ja'a Diosmoonsähajxy tsajpootypä, je'e hõjts jaduh̄n xyhijxp, møødä jäya'ayhajxy hädaa yaabä naaxwiimbä. ¹⁰Nømä jäya'ayhajxy miäna'añ cooc tyijy hõjts tii nga'a jaty nga'a najuø'øy. Paady hõjts jaduh̄n xñänømy coo hõjts ja'a Jesucristo miädia'agy nyajwa'xä. Pero mijts, mjaanč teh̄m ñiguiumáayypä hajxy jaduh̄n cooc tyijy mijts ja'a Dios xjiaanč teh̄m yajwiinjuø'øy ja'a Jesucristocøxpä. Jaduh̄n hõjts jäya'ayhajxy xñänøombä cooc tyijy hõjts Diosmäjaa nga'a møødä. Pero mijts, mjaanč teh̄m miøød ja'a Diosmäjaa tyijy. Mijts ja'a jäya'ayhajxy xñä'ägä wiingudsähgøoby. Pero hõjts jäya'ay xjiaanč teh̄m piejxp xjiaanč teh̄m tiehm̄b cooc tyijy

hõjts tii nga'a jaty nga'a najuø'øy.

¹¹Jaguiay jayhu'ugy hõjts naxy nhity homiänaaxøøjä. Hagøødsø'øy hõjts nwit nducxy naxy nmäwädity. Xjiaanč teh̄m chaačhtiuumb hõjts jäya'ayhajxy yaa homiänaaxøøjä. Cab hõjts tsänaadiaact maa tøø nmøødhaty ni mänaa. ¹²Hamdsoo cø'øhaam hamdsoo tecyhaam hõjts nduñ nxajy. Jaduh̄n hõjts nnägaayyøoc nbaady. Cooc hõjts jäya'ay naxy xñänømy haxøøgjaty, cab hõjts ndsippäda'agy nma'adpäda'agy. Yajxon hõjts nhadsoy. Cooc hõjts jäya'ay naxy xyajtsaačhpøcy, nmeex̄tuyjy hõjts jaduh̄n. Cab hõjts waamb jaduh̄n nnä'ägädä mäna'añ. ¹³Coo hõjts jäya'ay naxy xñähwaambety nä'ä nägoobä, mee'xxieemy hõjts jaduh̄n njaanč teh̄m yhadsoy. Høxtä jäda'anäbaadyñä hõjts jäya'ay xyhixy nebiä hujts nebiä haayän.

¹⁴Hermanodøjc, jadúh̄nhõch mijts njuøøñä nebiä hamdsoo huungän. Páadyhõch mijts jaduh̄n nmägapxy nhane'emy. Cábõch mijts jaduh̄n nyajtsähdiuna'añ. ¹⁵Hoy mijts häna'c xjia yajnähixø'øy nämay ja'a Jesucristocøxpä, høøch mijts jaduh̄n tu'uquiä xtieedyhajp ja'a Jesucristocøxpä, je'eguiøxpä cooçh mijts jayøbajt nyajnähixøøyy coo Jesucristo hajxy tøø xñähho'túütäm, y coo jadähooç jiuypiojtägajch.

¹⁶Jadúh̄nhõch mijts nja näma'ay cooçh hajxy jaduh̄n xpiahixät.

¹⁷Y ja'a Timoteo, jadúh̄nhõch je'e ndsocy nébiõch nhamdsoo huungän ja'a Jesucristocøxpä. Pedyii jaduh̄n jiaanč teh̄m quiudiuñ ja'a Diosmädia'agy. Páadyhõch jim tøø nguexy maa mijtsän nébiõch

mijts jaduhñ xjiahmiejtstá'agät coočhä Jesucristo nbanøcxy. Wiinduhmyhagájpthøchä Jesucristo miädia'agy nyajwiingapxøyyä maa tsajtøjcän. ¹⁸⁻¹⁹Høøch, mobädájpøch jimñ nnøcxaambä maa mijtsän coo Dios jaduhñ miáná'anät. Cabä jäya'ayhajxy näje'e miäbøcy cooc tyijy jaduhñ jimñ nga'a nøcxa'añ, je'eguiøxpä cooc tyijy njaanč tehñ chähgø'øy. Paady hajxy jiaanč tehñ ñiguiumayii. Howiaambaty hajxy jiaanč tehñ miána'añ. Pero cooč jimñ jaduhñ njaanč nõcxät maa mijtsän, mänitøch jaduhñ jimñ nhixa'añ pø jaanč tøyhajt ja'a Diosmäjaa hajxy jiaanč møødä, ja'a hajxy jaduhñ niguiumáayyäbä. Paady hajxy ñiguiumayii cooc tyijy ja'a Diosmäjaa hajxy jiaanč tehñ miøødä. ²⁰Je'e jaduhñ jaanč tehñ choobaatp coo Diosmädia'agy hajxy hoy mgudiúnät. Cab jaduhñ choobaady coo hajxy nä'a nägoobä mnä'a xi'ig mnä'a mädiá'agät. ²¹Nøcxáambøch jimñ maa mijtsän. Coo mhaxøøgcuhdujt hajxy mnajtshixø'owät, mänitøch hajxy hoy yajxónñ nmøødmädiá'agät. Pero pø cabä mhaxøøgcuhdujt hajxy nnajtshixø'owa'añ, nmøødhøch cuhdujt jaduhñ coo hajxy nyajcumädówät.

5 Tøøch nmädoyhaty coo tu'jäya'ay haxøøg jiaanč tehñ jiatcø'øy maa mijtsän, hoyyä Diosmädia'agy hajxy mja mäbøcy. Yhamdsoo huudájjäc jaduhñ miøødtsánaaby. Ni pønñ jaduhñ quia'a jatcø'øy, ni ja'a cajpä jjudfoshajxy. ²Hahixøøby jaduhñ coo yø'øya'ay hajxy mga'a mägu'ughájnät. Cu mhojy

hajxy jaduhñ. Jaduhñ hajxy cu mjootmayhajty. Pero cab hajxiäda'a waamb tøø mnä'ägädä nämä'ay. Höchähdiuunnä jaduhñ coo hajxy mga'a hojy. Cab jaduhñ yhooyä coo hajxy mniguiumayii. ³⁻⁴Hóyhøch jimñ nga'a jagä hity maa mijtsän, nmøødhøch cuhdujt jaduhñ cooč mijts nhané'emät ja'a Jesucristocøxpä coo jaaya'ay hajxy mga'a mägu'ughájnät, ja'a yhamdsoo huudaj jaduhñ miøødtsánaabiä. Mänit hajxy myajpäsómät coo hajxy hánajty mhamugø'øy. Dióshøch ja'a cuhdujt jaduhñ xmioooy cooč mijts jaduhñ nhané'emät. ⁵Cab hajxy jimñ myajméjtsnät maa tsajtøjcän. Ween jaduhñ chaächtiüñii ja'a møjcu'ugóngäm. Wehñdä jaduhñ yhuuc tehñ wyiinmahñmédsät coo haxøøg jiatcø'øy. Mänit jaduhñ ñähwá'adsät ja'a piojpä quiädieey. Mänit jaduhñ jimñ ñøcxpät tsajpootyp coo Jesucristo yaa quiädaactägátsät, ja'a nWiindsøn'hájtämbä.

⁶Cab jaduhñ yhooyä coo hajxy myajcumáyät. Huuc mädown hajxy, coo jäya'ay tsajcaagy hajxy yajcojy, mänitä chooy hajxy piädaacä harinajooty. Mänit hajxy yajmätijwäditø'øy. Mänitä harina chooy yajtägø'øyii. ⁷Paadiä craa hajxy mga'a yajméjtsnät maa tsajtøjcän coo mijts jaduhñ mnä'a pahíjxpät ja'a haxøøgpä. Jaduhñ mijts jaduhñ mga'a padu'udägóobiät. Hix, tøø Jesucristo hajxy xñähho'túutäm. Jaduhñ nbojhájtäm ngädieeyhájtäm hajxy xyajñähwáatsäm. ⁸Jaduhñds je'e, tsøgä haxøøgpä hajxy

najtshixóoyäm. Tsögä tøyhajtpä hajxy hamuumdu'joot hoy yajtu'uyóhyäm.

⁹Tøöch mijts ja'a nocy tu'ug nyajnajaayø'øy coo hajxy mga'a mägu'ughädät ja'a jäya'ayhajxy haxøøgwädijpä. ¹⁰⁻¹³Je'e'ch jaduhñ nnänøømby pøn'da'a tyijy tuumb hermano. Cab hajxy jaduhñ mmägu'ughädät ja'a hajxy wiingto'oxiøjc pawädijpä, møød hajxy jäya'ajie'e hadsojpä, møød ja'a quepychech hajxy wiingudsähgøöbiä, møød hajxy jäya'añähwaambejpä, møød hajxy jaduhñ múucäp wädijpä, møødä jäya'ayhajxy mee'tspä. Ni jäya'ay jaduhmbä hajxy mga'a møødcáyät, pøn tyijy jaduhñ tuumb hermano. Tsipcøxp hajxy jaduhñ jim mhøxquejxpädsómät maa tsajtøjcän, pønjaty jaduhñ haxøøgwädijp. Pero cab højts cuhdujt nmøødhájtäm maa jäya'aguixpähajxiän, ja'a hajxy ca'a tuumbä hermano, hoy hajxy jaduhñ jia wädijpä haxøøg. Dios jaduhñ najuøøby nebiä tsaächpä hajxy mio'owa'añii. Homiajatiä jäya'ay hajxy nbáatäm ja'a hajxy haxøøgwädijpä, møød ja'a jäya'ajie'e hajxy hadsojpä, møød ja'a mee'tspähajxy, møød ja'a quepychech hajxy wiingudsähgøöbiä.

6 Hermanodøjc, coo mijts hänajty mniñäxø'øwø'øwa'añii, jim hajxy mnøcxät maa Dios quiu'ugän; cab hajxy jim mnøcxät maa cuduunghajxiän, ja'a Diosmädia'agy hajxy ca'a mabøjpä. Jaduhñä hermanohajxy näje'e jiatcø'øy. ²Tøgä cab hajxy mnajuø'øyä

coo højts jäya'ayhajxy nägøxiä nyajtøyhajtyegáanäm ja'a hädaa yaabä naaxwiimbä, coo Jesucristo quiädaactägätsät. Paady hajxy hänajty jaduhñ ndunáanäm coo Dios hajxy xquiu'ughájtäm. Hoorä, pø myajtøyhajtyegaamby hajxy hänajty jaduhñä, tii hajxy coo mga'a jajpä yajtøyhajtyec mädyiibä ca'a tsipjaty. ³Tøgä cab hajxy mnajuø'øyä coo Diosmoonsäbaady hajxy nyajtøyhajtyegáanämbä, ja'a hajxy jim hijpä Dioswiinduum. Jaduhñds je'e, hoy hajxy jaduhñ nyajtøyhajtyéjcämät mädyiijaty hädaa yaabä naaxwiimbä. ⁴Pø jii hajxy tijaty myajtsibø'øy ja'a hädaa yaabä naaxwiimbä, tii hajxy jim coo nøcxy myajtødiägø'øy maa hajxy ca'a mabøjpän. ⁵Höchähdiuunnä hajxy jaduhñ mjatcø'øy. Jii jajpähana'cäda'aduhñ maa mijtsän tu'ug metsc. Je'eduhñ xyajtødiägøøyyäp ja'a mdsiphajxy, hermanodøjc. ⁶Cab jaduhñ yhooyä coo hajxy hamiñ haxøpy mniñäxø'øwø'øwø'øjät maa cuduun'gän, ja'a Diosmädia'agy ca'a mabøjpä.

⁷Coo hajxy hänajty tijaty myajtsibø'øy, myajcähxø'py hajxy hänajty jaduhñ coo Diosmädia'agy hajxy hoy mga'a cudiuñ. Maas hoy hit jaduhñ coo pøn xmiägädiéeyät, coo pøn xmiäméedsät, cab hajxy mnäxø'øwø'øwät. ⁸Pero cab jaduhñ yhooyä coo hajxy mnimiägädieeyø'øjät, coo hajxy mnimiäméedsø'øjät, haagä hermanodøjc.

⁹Tøgä cab hajxy mnajuø'øyä coo haxøøghäna'c-hajxy jim quia'a tægø'øwa'añ maa Dioswiinduumän.

Tøyhajt jaduhñ. Jue'ečh jaduhñ nnänømbý ja'a haxøøgjäya'ayhajxy, ja'a hajxy nimioødtsánaayyäbä jabiøcy, møød hajxy quepychech naaxpoch wiingudsähgøøbiä, møød hajxy wiingjäya'ay tio'oxiøjc møødtsánaabiä, møødä jäya'ay miäya'adiøjc møødtsánaabiä, ¹⁰møødä mee'tspähajxy, møød hajxy jäya'ajie'e hadsojpä, møød hajxy múucäp wädijpä, møød hajxy wi'i quiapxpä, møød hajxy mee'tspä hønnda'agyhaam. Pønjatý jaduhñ jatcøøby, cab hajxy jim tiägø'øwa'añ maa Dioswiinduumän. ¹¹Jaduhñ hajxy hijty näje'e mbajatcøøbiä. Pero tøø Dios ja'a mbojpä mgädieeyhajxy xyajnäwha'ačh ja'a yhEspirituhaam maa Jesucristocøxpän, ja'a hajxy nWiindsønähjätämbä. Jaduhñä Dios hajxy tøø xpiädáacäm coo hajxy hoy nwädjítämät, coo hajxy hoy njäya'ayhájítämät nebiä jioot jaduhñ chocy.

¹²Jaduhñä jäya'ayhajxy näje'e miäna'añ coogä cuhdujt jaduhñ myiñ cooc hajxy hotyijatiä ndúunämät nnájxämät. Tøyhajt jaduhñ. Pero cab jaduhñ xyhahixøøyyämät coo hajxy cøxiä wiinä ndúunämät nnájxämät. Y cab hajxy ndehm yaghanájxämät nebiä nwiinmahñdy hajxy hoy nhøxhíjxämät. ¹³Paadiä Dios jøø'xytiøjc caadiøjc hajxy xmiøoyyäm coo hajxy jaduhñ ngáayyämät coo hajxy jaduhñ nhúucämät. Pero nä'a mäðøyyä hajxy ngáayyämät nhúucämät, cab hajxy ngaayyhanájxämät. Pero cab jaduhñ ñejpiä pø cáayyäm pø ca'a ngáayyäm; hix, nä'ägädä

yajcuhdägoyyaambiä Dios je'e. Paadiä Dios hajxy xpiädáacäm coo miädia'agy hajxy ngudiúunämät. Pero cabä jioot jaduhñ chocy coo hajxy haxøøg nwädjítämät. ¹⁴Nebiä Dios ja'a yHuung yagjujypiøjquiän, jaanä jaduhñ højts xyagjujypiøgáanämbä ja'a miäjaahaam.

¹⁵Huuc mäðow hajxy, coo Jesucristo hajxy nWiindsønähjätäm, paady jaduhñ quia'a nä'ägädä hoyyä coo cuhñindo'oxiøjc hajxy nmøødmáawämät. ¹⁶Jaduhñä Diosmädia'agy miäna'añ, coo jäya'ayhajxy ñimioødma'awøøjät, jaduhñä Dios yhixy nebiä tu'ugpä jäya'ayän. Jaduhñds je'e, coo cuhñindo'oxiøjc hajxy nmøødmáawämät, jaduhñä Dios hajxy xyhíjxäm nebiä tu'ugpä jäya'ayän. ¹⁷Pero coo Jesucristo miädia'agy hajxy nbanøcxämät, tu'ugjoot tu'ugwiinmahñdy ja'a Jesucristo hajxy jaduhñ nmøødhíjítämät.

¹⁸Cabä cuhñindo'oxiøjc hajxy mmøødmá'awät; haxøøg jaduhñ. Hoy hajxy nej cu mja jatcø'øw, cabä mni'x cabä mgopc nej jiaty jádät. Pero coo cuhñindo'oxiøjc hajxy mmøødmá'awät, mnä'ägädä mägädiehbiä mhamdsoo ni'x ja'a mhamdsoo copc hajxy jaduhñ. ¹⁹Nej, cab hajxy mnajuø'øyyä coo Dioshespíritu jiiby yhyty mjuøhñdiotyhajxiä. Dios hajxy jaduhñ xmiøoyy. Jaaya'ay hajxy jaduhñ xyhuunghajp, paadiä miädia'agy hajxy myajtúnät; cabä mhamdsoo cuhdujt hajxy myajtúnät. ²⁰Paady hajxy xyhuunghaty coo yHuung hajxy xñähho'tuuty. Paady

hajxy hoy mwädítät, jaduñ hajxy maycähxó'ogät coo Dios miøjjä jiaančhä.

7 Hoorä, tsög hajxy mädiáacäm waambátyhöch mijts xmiäyajtøyy nocyhaam. Hoy hit jaduñ coo ya'adiøjc ja'a to'oxiøjc quia'a møødtsänä'awät. ²Pero coo hajxy hánajty mga'a mee'xtuga'añ, maas hoy hit jaduñ coo to'oxiøjc hajxy mnä'ägädä pógät, y weenä to'oxiøjc ja'a ñihyap miøødhájpät. ³⁻⁴Ja'a pøcyjiäya'ayhajxy, hamiñ haxøpy hajxy ñimiøødma'awøøjät. Cabä cuhdujt hajxy mmøødä maa mhamdsoo ni'xhaxiän. Hiç, pø xmiøødma'awaambä mjamiøød jaduñ, naxy mdehm miøødma'awät, cab jaduñ mnimiøjjø'ogøøjät. ⁵Jaduñ hajxy mnä'ägädä cuhdujthädät coo møjcu'ugong hajxy xñä'ä yajtu'udägóyyät. Coo hajxy jaduñ nämetsc mmänä'anät coo Dios hajxy mba'ya'axät, mänit jaduñ yhooyä coo hajxy mga'a nimioødma'awøøjät hamiñ haxøpy. Hoorä, coo Dios hajxy hánajty tøø mba'ya'axy, mänit hajxy mnimiøødma'awägombät. Mänitä møjcu'ugong hajxy jaduñ xquia'a yajtu'udägóyyät.

⁶Cábøch jaduñ nmäna'añ coo hajxy mädsibø'øbä mbógät. Nnä'ä móobiøchä cuhdujt jaduñ. ⁷Maas hoy hit jaduñ coo hajxy jaduñ mnä'ägädä hídät nidiuhm nébiøch höøch jaduñ nhitiän. Pero cøjhaminø'øy ja'a Dios hajxy tøø xpiädáacäm. Naje'e hajxy tøø xpiädáacäm coo hajxy nidiuhm nhíjtämät, naje'e caj.

⁸Jaduñds je'e, pøn jaduñ nidiuhmhajpnä, jaduñ

ñä'ägädä mähmø'owät nidiuhm nébiøch höøch nhitiän. Y jaanä jaduñduhmbä, ja'a yaamgto'oxyhajxy, cab hajxy piøjtägätsät. ⁹Pero pø cab hajxy mmee'xtuga'añ, maas hoy hit jaduñ coo hajxy mbógät, coo cuhñdo'oxiøjc hajxy xñä'ä yajcuhhínät.

¹⁰Pero pønajty jaduñ tøø piøjnä, cham hajxy nmägapxy nhane'emy. Ca'a yhöøch nhamdsoo mädiá'agy hädaa; Diosmädiá'agy hädaa. Cab jaduñ yhooyä coo to'oxiøjc ja'a ñihyap piuhwá'adsät. ¹¹Pero coods jaduñ piuhwá'adsät, cabä wiingya'adiøjc wyiingpógät. Maas hoy coo ñihyap ñä'ägädä nämejtstägätsät. Y ja'a ya'adiøjc, jaanä jaduñ je'ebä, cabä tio'oxiøjc yhöxmädsät.

¹²Chámhöch njaac mädiá'aga'añ. Ja'a nhamdsoo mädiá'agyhøch hädaa; cab jaduñ jim myiñ cujaay maa Diosmädiá'aguiän. Pø jii ya'adiøjc tu'ug mäbøjpä, pø cabä tio'oxiøjc miäböcy, cabä tio'oxiøjc yhöxmädsät pø jaac møødtsäna'awáanäp ja'a tio'oxiøjcäm. ¹³Jaanä jaduñduhmbä, pø jii to'oxiøjc mäbøjpä, pø cabä ñihyap miäböcy, cabä ñihyap ñähué'egät pø jaac møødtsäna'awáanäp ja'a ñihyhápäm. ¹⁴Coo ya'adiøjc ja'a Diosmädiá'agy hánajty quia'a mäböcy, yaghoyøøyyäp je'le ja'a tio'oxiøjcäm je'eguiøxpä coo tio'oxiøjc miäböcy. Jaanä jaduñduhmbä, coo to'oxiøjc ja'a Diosmädiá'agy hánajty quia'a mäböcy, yaghoyøøyyäp je'ebä ja'a ñihyhápäm je'eguiøxpä coo

ñihyhap miäbøcy. Coo hajxy jaduhñ yhodiiumä, paadiä yhuunghajxy jaduhñ yhodiiumäbä. Pø cabä tiaj tieedy häxøpy nidu'jäya'adiä quia'a mäbøcy, cab hajxy häxøpy yhodiiumäbä. ¹⁵Pøñ jaduhñ mäbøjp, coo jiamiøød ja'a ca'a mäbøjpä hadsip miäná'anät coo hajxy ñiyhøxmadsoøjät, ween hajxy jaduhñ ñiyhøxmaçhi. Jaduhñ jiájcombät nebiä tøø quia'a pøquiäbä. Hiç, chojpiä Dios jioot jaduhñ coo hajxy hoy nhíjtämät. ¹⁶Pøñ jaduhñ mäbøjp, cab jaduhñ yajnajuo'øy pø yajmäbøgaambytiä ja'a jiamiøød ja'a ca'a mäbøjpä. ¹⁷Cøjhaminø'øy ja'a Dios hajxy tøø xpiädáacäm. Jaduhñ hajxy jootucj njaac híjtämät neby hajxy hánajty nhíjtäm mänaa Dios hajxy xyajnáhdíjjäm coo hajxy nmädúuñämät. Hädaa mädiä'agyhøch homiaajä nyajnáhixøøby majatiä hermanodøjc-hajxy yhamugø'øyän Dioswiingudsähgøøbiä. ¹⁸Højts judíos, coo Jesucristo miädia'agy hajxy nbanøcxäm, cab hajxy ndsähdiuñämät, hoy hajxy nja judíoshájtäm. Y ja'a jäya'ayhajxy ca'a judíospä, ja'a Jesucristo miädia'agy hajxy panøcxpä, ni je'ehajxy quia'a tsähdiünät, hoy hajxy quia'a ja judíoshaty. ¹⁹Cab jaduhñ ñejpiä pø mjudíoshájp, pø caj. Je'e nä'ägädä tsoobaatp coo Dios miädia'agy mgudiuñät. ²⁰Jaduhñ hajxy mjaac hídät neby hajxy hánajty mhitiän mänaa Dios hajxy xyajnáhdíjjäm coo miädia'agy hajxy mmäbøjcät. ²¹Näje'e mijts jäya'ay xje'ehaty nebiä waj nebiä cuaayän, hoyyá

Diosmädia'agy hajxy mja panøcxy. Cab hajxy jaduhñ mmøjpädá'agät. Pero pø cabä mwiindsøn hajxy xyajtunaannä, ween hajxy xyhøxmajtsnä. ²²Tøø mijts ja'a Dios xyajnáhdíjy coo miädia'agy hajxy mmäbøjcät, hoyyá jäya'ay hajxy hánajty xjia je'ehaty nebiä waj nebiä cuaayän. Hiç, tøø Jesucristo hajxy xyajnáhwáatsäm ja'a nbojphájtäm ja'a ngädieyhájtäm. Hoorä, pønjaty hánajty ca'a je'ehájtäp jaduhñ nebiä waj nebiä cuaayän mänaa hajxy yajnáhdíjyijän ja'a Diósäm coo miädia'agy hajxy miäbøjcät, moonsä hajxy je'e tiünäp ja'a Jesucristocøxpä. ²³Tøø Jesucristo hajxy xñähho'túutäm, paadiä Dios miädia'agy hajxy nmäbøjcänä. Cabä jäya'ay miädia'agy hajxy nmäbøjcänät. ²⁴Jaduhñds je'e, hermanodøjc, jaduhñ hajxy mjaac hídät neby hajxy hánajty mhitiän mänaa Dios hajxy xyajnáhdíjjäm coo miädia'agy hajxy mmäbøjcät. Jaduhñä Dios hajxy hoy mmädúnät. ²⁵Myajtøøw hajxy jaduhñ pø hahixøøby jaduhñ coo cäxyiihäna'c-hajxy piógät. Høøch nhamdsoo mädia'agy hädaa; cab jaduhñ jim myiñ cjaay maa Diosmädia'aguian. Pero hahixøøby jaduhñ coøch mijts nmädia'agy xmiäbøjcät; hiç, Dióshøch jaduhñ tøø xyajnáhdíjy coøch nmädúnät. ²⁶Pues høøch jaduhñ mänaamb coo jaduhñ yhahixø'øy coo hajxy mga'a pógät, je'eguiøxpä coo tsø'ty häyohn wiädijnä jäda'ahaty. ²⁷Pø jii mdo'oxiøjc, caj mhøxmädsät. Y pø cabä to'oxiøjc mmøødä, ca'a mhøxta'ay. ²⁸Cab jaduhñ yhaxøøgä

coo mbógät; y coo cäxyiihäna'c jaduhñ piógät, ni jaduhñ quia'a haxóögä. Pero coo hajxy jaduhñ piógät, maas hamájaa jiugyhajt hajxy miánaxa'añ. Páadyhöch jaduhñ nja mäna'añ coo hajxy quia'a pógät.

²⁹Hermanodöjc, jue'eëh jaduhñ nja mäna'ana'añ, ja ween quia'a habaady coo Jesucristo yaa quiiädaactägatsa'añ hädaa yaabä naaxwiin. Cab hajxy yaa jejcy njaac tunáanam. Jaduhñds je'e, pønjaty to'oxiøjmøød, jaduhñ hajxy xyiicta'ag miädiaactá'agät nebiä Dios hajxy hoy miädúnät. Cabä yhuung tio'oxy hajxy ñädaj ñämäañät. ³⁰Pønjaty jaduhñ jootmayhajt, ween hajxy jaduhñ quia'a jootmayhajnä. Pønjaty jaduhñ xoonäacp, ween hajxy jaduhñ quia'a xoonäacnä. Y ja'a hajuubiädöjc-hajxy, ween hajxy jaduhñ yhity nebiä toogy hajxy ca'a møødpän. ³¹Pønjaty jaduhñ yaa tsánaaby häyooob hädaa yaabä naaxwiin, ween hajxy jaduhñ yhity neby hajxy tii ca'a møødpän. Hix, hädaa yaabä naaxwiin, neby hajxy cham nhíjxäm, cøxaamb hädaaduhñ quiuhdägoyya'añ.

³²Jadúhñhöch njoot chocy coo hajxy tii mga'a nádaj mga'a námáyät. Ja'a ya'adiöjc nidiuhmhajpä, caj tii ñädajy ñamay. Jagoo tiajy miay nebiä Dios hoy miädúnät. ³³Pero ja'a craa to'oxiøjmøødpä, je'e tiajpy miaaby nebiä yhuung nebiä tio'oxy hoy miøødhídät. ³⁴Y cabä Dios hoy miäduna'añ. Jaaná jaduhñä cäxyiihäna'c-hajxypä, cab hajxy tii tiajy miay. Jagoo hajxy tiajy miay

nebiä Dios hajxy hoy miädúnät. Hamuumdu'jootä Diosmädia'agy hajxy quiudiuna'añ. Pero ja'a to'oxiöjc ja'a ya'adiöjmøødpä, nebiä ñihyhap hoy miøødhídät, je'eyyá ñä'a tajpy ñä'a maaby.

³⁵Páadyhöch jaduhñ nmäna'añ, mijts jaduhñ nja puhbedaan. Caj mijts jaduhñ nhane'ema'añ. Pero chójpiöch njoot jaduhñ coo hajxy hoy yajxón mwädítät, coo Diosmädia'agy hajxy hamuumdu'joot mgudiúnät.

³⁶Pø jii mhuunghajxy tøø quiäxyiijö'öy, ween hajxy piöcy, pø chojpy mjoothajxy jaduhñ. Cab jaduhñ yhaxóögä coo hajxy jaduhñ piógät. ³⁷Pero pø cabä mjoothajxy chocy coo hajxy piógät, ween hajxy jaduhñ quia'a pöcy. Hix, cabä cuhdajt pøn miøødä coo miich xyhané'emät maa mhuungcøxpän. ³⁸Hoy jaduhñ coo mhuung myajpógät. Jaaná hoy jaduhmbä coo mga'a yajpógät; cab jaduhñ ñejpiä.

³⁹Ja'a to'oxiöjc ya'adiöjmøødpä, cabä cuhdajt miøødä coo wiingpä miøødsáná'awät. Pero coo ñihyhap yhö'ogät, mänit maböcy wyiingpógät pøn jaduhñ chojpy. Pero tsipcøxpä hermano wyiingpógät. ⁴⁰Pero maas jootucj yhidät coo quia'a nä'ägädä pøjtägätsät. Höøch jaduhñ mänaamb. Ja'a Dioshespiritöch ndijy jaduhñ xñajtsapxøöyyäp.

8 Naje'eëh hajxy tøø xmiäyajtøy pø hoy jaduhñ coo animalho'ogy hajxy ndsú'tsamät ja'a häna'c-hajxy quepychewiinduum yojxypä. Tøyhajt jaduhñ coo hajxy nägöxiä

tøø nmädoyhåjtäm hädaagøxpä. Cab jaduñ yhooyä coo hajxy nmánaañämät cooc tyijy hajxy cøxiä nwiinjuøøyyäm. Jaduñnä häna'c-hajxy näje'e miánaambä, ja'a hajxy yajcumayaambä. Pero coo hajxy hamiñ haxøpy nniçhojc nnimié'e xämät, mänitä Diosmädia'agy hajxy maas hoy nmäbøjcämät. ²Pøñ jaduñ mänaamb cooc tyijy hotyijä jiaty, høñdaacp jaduñ. Cab jaduñ tiøyyä coo hotyijä jiaty. Ween jaduñ jiaac habøcy. ³Pøñä Dios jaduñ wiingudsähgøøby, ñajuøøbiä Dios jaduñ pøn je'e.

⁴Tsøg hajxy jadähooc jaac mädiáacäm pø hoy jaduñ coo animalho'ogy hajxy ndsú'tsämät, ja'a häna'c-hajxy quepychechwiinduum yojxypä. Bueno, nnajuøøyyäm hajxy coo quepychech naaxpoch quia'a jujyquiä. Y nnajuøøyyäm hajxy coo Dios tiu'ugä. ⁵Mayyä jäya'ayhajxy jaduñ miána'añ cooc tyijy ja'a Dioshajxy miayyä jim tsajpootyp chaads yaa hädaa yaabä naaxwiin. Je'eg hajxy jaduñ jiaanç wiingudsähgøøby. ⁶Pero højts jaduñ mänánañäm coo Dios tiu'ugä, ja'a nDeedyhåjtäm. Je'e jaduñ hädiuun cøxiä näguipxy møødä yHuung. Paady hajxy jaduñ xquiunú'xäm xpiädáacäm coo hajxy jaduñ ween nwiingudsähgøøyyäm. Jaduñ hajxy nmánaañäm coo Jesucristo hajxy nWiindsønåjtäm. Cabä wiingpä hajxy nwiindsønåjtäm. Møød je'e cøxiä yhädiuumbä. Høxtä højtspaadyhåjtäm hajxy xquiunú'xäm.

⁷Pero cabä jäya'ayhajxy nägøxiä miäbøcy coo quepychech quia'a jujyquiä, coo naaxpoch quia'a jujyquiä. Näje'e jäya'ay quepychech naaxpoch hajxy wyiingudsähgø'øyyä. Y coo hajxy jaduñ chú'udsät tijaty jäya'ayhajxy yojxyp quepychechwiinduum, jootmayhåp hajxy jaduñ cooc tyijy jaduñ quia'a hoyyä coo hajxy chú'udsät. Hix, je'enä hajxy jaduñ miäbøcyñä cooc tyijy quepychech jiujyquiä. ⁸Nnajuøøyyäm hajxy coo Dios quia'a mõjpäda'agy pø ndsú'tsäm pø caj ndsú'tsäm. Cab jaduñ ñejpiä pø ndsú'tsäm pø caj ndsú'tsäm. ⁹Pero hoy hajxy nja najuøøyyäm jaduñ coo quia'a nejpiä pø ndsú'tsäm pø caj ndsú'tsäm, maas hoy hit jaduñ coo nga'a tsú'tsämät, pø jii hermanohajxy näje'e quia'a najuøøbiä coo jaduñ quia'a nejpiä coo hajxy ndsú'tsämät. ¹⁰Tsøc mädiáacäm coo miäch mnajuø'øy coo jaduñ quia'a nejpiä coo yø'øduhmä tsu'uäch mdsú'udsät. Hoorä, tsøc mänánañäm coo miäch yø'øduhmä tsu'uäch hänajty mdsu'uäch maa quepychechwiinduumän. Hoorä, coo hermano jaduñ tu'ug xyhíxät, ja'a ca'a najuøøbiä coo jaduñ quia'a nejpiä coo miäch jaduñ mdsú'udsät, weñdä je'e xpiadsú'tspät. Weñdä miána'anät cooc tyijy jaduñ tøø quiädieey coo jaduñ tøø xpiadsu'uäch. ¹¹Y coo jaduñ quiädiéyät, miächä pojpä hänajty mmøød je'eguiøxpä coo miäch hänajty jim mgay. Hix, tøø mähdiøjc ñähho'tu'udyii ja'a Jesucristäm. ¹²Y coo miächä

mähdiøjc jaduhñ myajcädiéeyät, jaduhñ hänäjty tøø piaady nejpä miichä Jesucristo hänäjty tøø mmägadieeyän. ¹³Hoorä, pø cädieeyaambä hermano tu'ug je'eguiøxpä cooçh høøçh yøøduhmbä tsu'uçh ndsu'uçh, cáboçh jaduhñ nnä'ägädä tsú'udsät mänaa, coo hermano ñä'ä cädiéeyät.

9 Cáboçh pøn xyhane'emy, túhmäts. Dióshøch xwyiinguejx, túhmäts. Hamdsoočhä Jesucristo nhijxy, túhmäts, ja'a hajxy nWiindsøn'hájtämbä. Mijts ja'a Diosmädia'agy nyajmäbøjc, túhmäts. ²Näje'e jäya'ayhajxy miäna'añ cooc tyijy høøçhä Dios tøø xquia'a wiinguexy. Pero mmøødä tøyhajt hajxy jaduhñ cooçhä Dios tøø xwyiinguexy, je'eguiøxpä cooçh mijts nyajmäbøjcy ja'a Diosmädia'agy.

³Cooçh pøn mänaa xñäma'ay cooc tyijy høøçhä Dios tøø xquia'a wiinguexy, jaduhñhøch naxy nhadsoy: ⁴Nmøødhøch ndijy cuhdujt jaduhñ cooçh mijts cay hu'ugy nmäyujwá'anät je'eguiøxpä cooçhä Diostuung nduñ. ⁵Ja'a Jesucristo yhuchhajxy, miøødä cuhdujt hajxy je'e coo hajxy wiädítät to'oxiøjmmøød. Jaduhñä Pedro miøødäbä, møødä Dioswiinguexypähajxy. Jaduhñhøch cuhdujt nmøødäbä, hoyyä jäya'ayhajxy näje'e jia mäna'añ cooc tyijy høøçh nga'a møødä. ⁶Tøgä mmänaamb mijts jaduhñä coo højts cuhdujt nga'a møødä coo højts nduung nnajtshixó'owät, coo højts ja'a Diosmädia'agy nyajwá'xät, høøçh møødä Bernabé.

Ja'a Diosquexyhajxy nägøxiä, tøø tiuung hajxy ñajtshixø'oy coo Diosmädia'agy hajxy yajwa'xy. ⁷Yajmäjuuby hajxy je'e, y jaduhñ højts nyajmäjuyaambä. Hix, yajmäjuubiä soldadohajxy. Y jaanä jaduhñduhmbä, ja'a cudsaaatycamhajxy, jiøø'xypä tsaatyptsa'am hajxy. Y jaanä jaduhñduhmbä, ja'a meegcueendähajpähajxy, yhuucypiä meegtsi'tsnøø hajxy. ⁸Ca'a yhøøçh nhamdsoo mädia'agy hädaa; jaduhñä mädia'agy miänaambä ja'a Moisés jecy quiujáhyyäbä. ⁹⁻¹⁰Jaduhñ jim myiñ cujaay: "Cabä waj mxahuu'tsø'ogät coo trigopajc hänäjty tiehñjo'oçh." Coo Dios jaduhñ jecy miänaañ, jaduhñ miänaañ coo højts nyajmäjúyät. Hix, ja'a häna'c naaxpuhbähajxy møødä tsijpädøjc-hajxy, ñajuøøby hajxy jaduhñ coo hajxy yajmäjuya'añ. Jaanä jaduhñ højtspä, jaduhñ højts nyajmäjúubiät. ¹¹Coo højts mijtsä Diosmädia'agy tøø nyajnähixø'oy, paady hajxy xmiäjúyät.

¹²Mmäjuubiä Diosquexy hajxy, túhmäts; maas may højts cuhdujt nmøødä coo højts mijts xmiäjúubiät.

Pero cahnä højts mänaa nmäna'añnä coo højts nyajmäjúyät. Chojpy højts njoot jaduhñ coo Diosmädia'agy wiá'xät, ja'a Jesucristocøxpä, paady højts nhity jamiäjuy. ¹³Pero nmøød højts cuhdujt jaduhñ coo højts nyajmäjúyät. Hix, ja'a häna'c-hajxy jim tuumbä tsajtøgooty, miøødä cuhdujt hajxy je'e coo hajxy quiáyät tijatiä cu'ughajxy jim quiuyoxøøby maa altarän. ¹⁴Jaanä jaduhñduhmbä, tøø Dios yhane'emy

coo Diosmädia'agy-yajwa'xpähajxy yajmäjuyät. Ja'a jäya'ayhajxy mädoobä, je'eds hajxy jaduhñ mäjüyäp. ¹⁵Pero hөөч, cábөч mänaa tөө nmäna'añ cooč mijs xmiäjuyät. Jadúhñhөч njoot chocy cooč jamiäjuy ndúnät. Y cooč häyaa nnä'a yuuh'ogät, cab jaduhñ ñejpiä, nägooč hänäjty tөө nduñ jamiäjuy.

¹⁶Näje'e jäya'ayhajxy yajcumaya'añ je'eguiөxpä coo Diosmädia'agy hajxy yajwa'xy. Pero Dióshөч xwyiinguejx cooč nyajwá'xät hөөч; cábөч hamdsoojoot nyajwa'xy. Paady, cábөч nyajcumaya'añ. Y coočhä Diosmädia'agy jaduhñ nga'a yajwá'xät, xyajcumädówäbөчhä Dios jaduhñ. ¹⁷Cábөч hamdsoojoot ndägөөyy Diosmädia'agy-yajwa'xpä. Dióshөч jaduhñ xwyiinguejx cooč miädia'agy nyajwá'xät. Cooč häxөpy tөө ndägө'oy hamdsoojoot, mänítөч cu nyajmäjuuy. ¹⁸Jaanč tehñ xioondáacpөч jaduhñ coočhä Diosmädia'agy nyajwa'xy jamiäjuy, hөyhөчhä cuhdujt nja mөөdä cooč cu nyajmäjuuy.

¹⁹Hix, cooč jaduhñ nduñ jamiäjuy, cábөч pөн xyhane'emy. Pero chójpiөч njoot jaduhñ cooč hoy piөnä xyhané'emät, nägoo Diosmädia'agy hajxy miäbögät. ²⁰Cooč jim nhijty maa judíoshajxiän, jadúhñhөч nguhdujthajpä nebiä judíoshajxy quiuhdujthatiän, weenä Diosmädia'agy hajxy jaduhñ cu miäbөjcy. Y cooč jim nhijty maa jäya'ayhajxy hänäjty yhane'emyiän ja'a Diosmädia'agy,

ja'a Moisés jecy quiujáhyyäbä, jadúhñhөч nyaghanehmbä neby hajxy hänäjty yaghanehmbän, weenä Diosmädia'agy hajxy jaduhñ cu miäbөjcy, hөyhөчhä cuhdujt nja nmөөdä cooč nga'a yaghané'emät. ²¹Y cooč jim nhijty maa jäya'ayhajxiän, ja'a cajpä judíospä, ja'a mädia'agy hajxy ca'a cudiuumbä, ja'a Moisés jecy quiujáhyyäbä, jadúhñhөч nguhdujthajpä neby hajxy hänäjty quiuhdujthatiän, weenä Diosmädia'agy hajxy jaduhñ cu miäbөjpä. Cáбөч nmäna'ana'añ coočhä Dios ja'a miädia'agy hänäjty nga'a mäbөjcä. Hix, nmäbөjcäbөчhä Jesucristo miädia'agy jaduhñ. ²²Y cooč jim nhijty maa hermanohajxiän, ja'a Diosmädia'agy hajxy ca'xy ca'a wiinjuөbiä, jadúhñhөч nbaguhdujthajpä neby hajxy hänäjty quiuhdujthatiän, je'eguiөxpä cooč hänäjty nyajnähixө'owa'añ nebiä Diosmädia'agy hajxy maas hoy wyiinjuө'owät. Majátyhөч jaduhñ nwädity Diosmädia'agy-yajwa'xpä, cábөчhä jäya'ayhajxy jaduhñ nyagjootma'ady, weenä Diosmädia'agy hajxy jaduhñ miäbөcy. ²³Páadyhөч jaduhñ nguhdujthaty, jadúhñhөчhä Diosmädia'agy hoy nyajwá'xät. Y coočhä jäya'ayhajxy may nyajmäbögät, mänítөч jaduhñ nxoondá'agät.

²⁴Coo jäya'ayhajxy naxy ñiyhөxpäyө'ogyii, tu'jäya'ay jaduhñ nөcxy quiuhäyө'ogy, ca'a ñägөxiä. Tөyhajt jaduhñ. Jaduhñ mäwiin hөjtshäjtäm, coo Diosmädia'agy hajxy nbanөcxäm, naxy hajxy

hoy ndehm̄ quiudiúunämät, jaduhñ hajxy jim̄ nnócxämät Dioswiinduum. ²⁵Hóxtahm̄dsä häyø'pádøjc-hajxy, tu'jøjpiä jioot ja'a wyiinmahñdy hajxy naxy piäda'agy coo hajxy jaduhñ quiuhäyø'ögät, túhm̄äts. Paadiä haxøøgpä hajxy jaduhñ quia'a nä'ägä nähdoñ. Premio hajxy jaduhñ móoyyap, y cab jaduhñ ñä'ä jecy. Pero højtshájtäm, coo Diosmädia'agy hajxy hoy njaančh tehñ quiudiúunämät, mänit hajxy jaduhñ jim̄ nnócxämät Dioswiinduum. Jim̄ds hajxy jaduhñ nhíjtämät cøjxta'axiøø. ²⁶Ja'a häna'c cuhäyø'pádøjc-hajxy, tøyyä hajxy jaduhñ ñä'ä päyø'ogy, cab hajxy jaduhñ yhimybiäyø'ogy miaamybiäyø'ogy. Ja'a boxeadorhajxy jajpä mägox mädex, cab hajxy jaduhñ ñä'ä yemy ñä'ä wopy. Jaduhñ mäwíinäts høøch, tu'jøjpiøchä Diosmädia'agy nbanøcxy. ²⁷Cábøchä haxøøgpä jaduhñ nnä'ägä nähdoñ.

Ngudiúumbiøchä Diosmädia'agy jaančh tehñ yhoy. Páadyhøchä Dios jim̄ xyajnöcxa'añ maa wyiinduumän. Y cooçh jaduhñ hoy nga'a cudiúnät, cábøch jim̄ xyajnöcxät, hóyhøchä jäya'ayhajxy hánajty tøø nja yajwiinhixø'oy.

10 Hermanodøjc, huuc mädown hajxy jaduhñ. Jéquiänä Dios ja'a joc ja'a nämä'a jaduhñ quiejxy maa nhaphájtäm maa ndeedyhájtämhajxy hánajtiän, møødä Moisés. Mänit hajxy jaduhñ jecy piadu'ubøjcy nägøxiä näwiinä. Mänit hajxy nägøxiä ñøønajxy coo Tsaptsmejy paquiä tiøøch. ²Ja'a Moisés hajxy hánajty näguipxy

miøødwädijpy nägøxiä maa joc hajxy hánajty piawäditiän, maa hajxy ñøønajxiän Tsaptsmejjiooty. ³Mänitä Dios hajxy miooyyä ja'a cay ja'a hu'ugy. Mänit hajxy quiaaay nägøxiä. ⁴Mänitä Dios ja'a tsa tu'ug yajtsäbijty. Mänitä nøø tiägøøyy xee'xpä. Mänit hajxy nägøxiä ñøøhuucy. Jaduhñ mäwíinäts ja'a Cristo neby yø'ø tsaajän. Hix, puhbéjtäp hajxy hánajty ja'a Crístäm majaty hajxy hánajty wiädity. Ja'a Cristo, Dios yHuung je'e. ⁵Pero cabä Diosmädia'agy hajxy hoy nämay quiudiuuñ. Cabä Dios hajxy jaduhñ quiumaayyä. Paady hajxy jim̄ tiu'uhø'cy pactuum.

⁶⁻⁷Paady hajxy jaduhñ jiajty yhabejty coo haxøøgpä hajxy yhadsojcy, coo quepychech ja'a naaxpoch hajxy wyiingudsähgøøyy. Hijxtahnd jaduhñ coo hajxy nga'a pahijx nga'a padúunämät. Jaduhñ jim̄ myiñ cujaay maa Diosmädia'aguiän: "Mänit hajxy quiaaay yhuucy quepychechwiinduum; mänit hajxy yhejch piujty quepychechwiinduum."

⁸Näje'e hajxy haxøøg jiatøøyy. Paady hajxy nähii'xtägøøg mil yho'cy tu'xøøbä. Paady hajxy jaduhñ nga'a pahijx nga'a padúunämät. ⁹Näje'e Dios hajxy yhiixmajch øø tøyhajt hajxy hánajty yajcumädowa'añijäm ja'a Dios. Mänit hajxy chahñchu'tsä. Cøjx hajxy je'e yho'ogy. Paady hajxy jaduhñ nga'a pahijx nga'a padúunämät. ¹⁰Näje'e hajxy hánajty jootcujc quia'a hity, je'eguiøxpä coo hajxy hánajty quia'a mäbøcy. Paadiä Dios ja'a mioonsä quiejxy, hoy hajxy yagho'ogyii.

¹¹ Paady hajxy jaduhñ jiajty yhabejty, hijxtahñd jaduhñ coo hajxy nga'a pahijx nga'a padúunámät. Paady cujaay yhity. Hiñ, habáatnáp jaduhñ coo Jesucristo yaa quiádaactägatsa'añ.

¹² Põñ jaduhñ niñänóòmáp coo hamuumdu'joot miábocy, naxy tiehñ ñiyajcopcø'owóøjät coo ñä'ä tu'udägóyyät.

¹³ Mijts ja'a mõjcu'ugong xjia wil'i yajtu'udägoyyaamb. Hoy piõnä jaduhñ jia yagjatcø'owa'añii haxøøg. Pero jaduhñä Dios miäna'añ cooc hajxy xpiuhbedáanäm, neby hajxy jaduhñ nga'a tu'udägóoyyämät. Tøyhajt jaduhñ coo hajxy xpiuhbedáanäm. Hiñ, cabä mõjcu'ugongä miäjaa jaduhñ miäbaady nebiä Dios mäjaa miøødän.

¹⁴ Jaduhñds je'e, hermanodøjc, cabä quepychech, cabä naaxpoch hajxy mwiingudsähgø'owät.

¹⁵ Mnajuøøby hajxy jaduhñ cooch tøyhajt nmädia'agy. Hiñ, mwiinjuøøby hajxy hädaaduhñ.

¹⁶ Coo tsugay nyagjáltäm mänaa vino hajxy nhúucäm, mäniitä Diosujú'uyáp hajxy nyéjcäm. Je'e jaduhñ ñänøømby coo hajxy tu'ugcopc tu'ugwiinmahñdy nhíjtäm, je'eguiøxpä coo Jesucristo ñø'ty jiaançh tehñ yaghäyooyy mänaa hajxy je'e xñähho'túutäm maa hädaa yaabä naaxwiinän. Y coo tsajcaagy hajxy nyajniñäguidøøyyäm, je'e jaduhñ ñänøømgumbä coo hajxy tu'ugcopc tu'ugwiinmahñdy nhíjtäm, je'eguiøxpä coo Jesucristo ja'a ñi'x ja quiopc ñähdujcy mänaa hajxy je'e xñähho'túutäm. ¹⁷ Coo tu'ugpä

tsajcaagy hajxy ngaamiújcäm, paady hajxy tu'ugcopc tu'ugwiinmahñdy nhíjtäm, hoy hajxy nja nämáyyäm.

¹⁸ Jaduhñä judíoshajxy yhiñpä tu'ugcopc tu'ugwiinmahñdy møødä Dios mänaa animal hajxy chu'uçhän, ja'a jäya'ayhajxy yojxypä altarwiinduum.

¹⁹ Jaduhñhøch nmäna'añ coo quepychech naaxpoch quia'a jujyquiä. Jaduhñhøch nmänaambä coo animal quia'a cunuu'xiä ja'a jäya'ayhajxy yojxypä quepychechwiinduum. ²⁰ Caj pues. Ja'a jäya'ay ja'a Diosmädia'agy hajxy ca'a mäbøjpä, coo animal hajxy yoxy quepychechwiinduum, ja'a mõjcu'ugong hajxy jaduhñ wyiingudsähgøøby, ca'a Dyiosä. Cábøch njoot chocy coo jäya'ay hajxy mmøødhídtä tu'ugwiinmahñdy, ja'a mõjcu'ugong hajxy wyiingudsähgøøbiä. ²¹ Pø mh'uugaambiä vino hajxy ja'a Dioscøxpä, cab hajxy hoy mhú'ugät ja'a mõjcu'ugongcøxpä. Pø mgayaambiä tsajcaagy hajxy ja'a Dioscøxpä, cab hajxy hoy mgáyät ja'a mõjcu'ugongcøxpä. ²² Cab jaduhñ yhooyä coo Dios hajxy nyagjootmá'tämät. Hiñ, maas mäjaamøødä Dios que højtshtëjtäm.

²³ Jaduhñä jäya'ayhajxy miäna'añ cooc cuhdujt hajxy nmøødhájtäm hoy ñejpiä. Tøyhajt jaduhñ. Pero cab jaduhñ yhawwiinmatsä coo hajxy hoy ñejpiä njatcøøyyämät. Hiñ, coo hajxy hoy ñejpiä njatcøøyyämät, cabä Diosmädia'agy hajxy hoy nyajtu'uyóhyyyämät. ²⁴ Naje'e jäya'ayhajxy yhøxta'ay coo hajxy chäná'awät coo hajxy yhäyówät.

Pero maas hoy jaduḥḥ coo nmädøjc hajxy nbuhbéjtämät.

²⁵Tsu'udsä tsu'učḥ hajxy jaduḥḥ mädyijaty jim tóo'cäp halaplazpa'c. Pero cab hajxy myajtówät pø tøø jäya'ay animal hajxy xoxy quepychechwiinduum. Cab hajxy je'eduhḥ mnä'ä taj mnä'ä máyät ja'a tsu'učhcøxpä. ²⁶Hix, jaduḥḥä Diosmädia'agy miädia'agy: “Dios jie'e hädaa cøxiä maa hädaa yaabä naaxwiimbän.”

²⁷Coo pøn hajxy jaduḥḥ xwiówät mägaabiä, hoy jaduḥḥ coo hajxy mnøcxät, hoyyä craa ja'a Diosmädia'agy hänäjty quia'a jagä mæbøcy. Y cab hajxy myajtówät pø tøø animal hänäjty quepychechwiinduum xoxyii. Cab hajxy mdaj cab hajxy mmáyät ja'a tsu'učhcøxpä. ²⁸Pero coo pøn hajxy jaduḥḥ xyhawáanät coo häna'c yø'ø animal hänäjty tøø xoxy quepychechwiinduum, cab hajxy jaduḥḥ mdsú'udsät, weenä craa jaduḥḥ quia'a jootma'ady ja'a hajxy tøø xyhawáanäbä. Jaduhḥä craada'a tiajy miay coo jaduḥḥ quia'a hoyyä coo yø'øduhmä tsu'učḥ hajxy ndsú'tsämät, ja'a häna'c yojxypä quepychechwiinduum. ²⁹Ja'a craa tøø xyhawáanäbä, je'ečḥ jaduḥḥ nnänøømby coo wehḥnä jootma'ada'añ. Cábøch jaduḥḥ nmäna'ana'añ coo mijts mjootma'ada'añ.

Näje'e jäya'ayhajxiäda'a miäna'ana'añ: “Ween yø'ø craa jaduḥḥ nä'ä jootma'ady, nmøødhøch cuhdujt jaduḥḥ coočḥä animal ndsú'udsät, hoy häna'c tøø jia xoxy quepychechwiinduum.

³⁰Haa ca'a, nnämäabiøčḥä Dios Dioscujú'uyäp coočḥä tsu'učḥ hänäjty tøø ndsu'učḥ. Tiičḥ yø'ø craa jaduḥḥ coo xñä'ä năma'ay coočḥ nga'a tsú'udsät.” ³¹Jaduḥḥds je'e, tsøgä mädia'agy hajxy hoy yajxon yajtuun yaghjítäm homiädyiibä coo hajxy ngaaxy coo hajxy nhúucäm. Coo jäya'ay hajxy jaduḥḥ xyhjxämät coo mädia'agy hajxy hänäjty hoy yajxon nyajtuun nyaghjítäm homiädyiibä, mänitä Dios hajxy miøjpdä'aga'añ jiaančhpäda'aga'añ. ³²Hix, coo mädia'agy hajxy hoy yajxon nyajtuun nyaghjítämät homiädyiibä, ni pøn jaduḥḥ quia'a jootmä'adät, ni ja'a judiøshajxy, ni ja'a jäya'ayhajxy cajpä judiøshajpä, ni ja'a jäya'ayhajxy ja'a Diosmädia'agy mæbøjpä. ³³Jaduhḥnhøch høøčhpä, hoy yajxonhøčḥä nyajtuñ nyaghity homiädyiibä nébiøčḥä jäya'ayhajxy jaduḥḥ xquiumáyät. Cábøch pøn jaduḥḥ nyagjootma'ady. Hix, chøjpiøch njoot jaduḥḥ coo jäya'ayhajxy nägøxiä năhwá'adsät ja'a piojpä ja'a quidiieyhajxy. Cábøch njoot chocy coočḥ nidiuhḥ nbáadät ja'a hoybä ja'a weenbä.

11 Nébiøčḥä Jesucristo nbahixiän, jaduhḥnhøch mijts xpiahjxpät.

²Hermanodøjc, xoondáacpøch jaduḥḥ coočḥ mijts xjiahmiejtsta'agy homiänaajä, y coo Diosmädia'agy hajxy homiänaajä myajtuñ nebiátyhøch hajxy tøø nnajtsapxøøyyäm. ³Chøjpiøch njoot jaduḥḥ coo hajxy mwiinjú'øwät coo Jesucristo ja'a Dios Wyiindsønhaty y coo højtsä Jesucristo nWiindsønhtëmbä,

højts ya'adiøjc-hájtäm. Jaaná jaduhñä ndo'oxiøjc-hájtäm hajxy xwyiindsønñhájttäm, højts ya'adiøjc-hájtäm. ⁴Maa hermanodøjc-hajxy yhamugø'øyän tsajtøgooty, coo ya'adiøjc jim tu'ug Dyiospa'yá'axät cuhjupmøød, cabä Jesucristo hamuumdu'joot wyiingudsähgø'øy; ni jaduhñ coo Diosmädia'agy cuhjupmøød yajwiinhixø'øwät. ⁵Jaanä jaduhñduhmbä, coo to'oxiøjc-hajxy jiiby Dyiospa'yá'axät cuhwa'ads tsajtøgooty, o coo Diosmädia'agy hajxy jiiby yajwiinhixø'øwät cuhwa'ads, hočhähdiiuunnä hajxy je'eduhñ. Jaduhñ je'eduhñ piaady nejpiän yø'ø to'oxiøjc quihwaay hajxy yhøxme'xypän. ⁶Jaduhñds je'e, pø cabä to'oxiøjc-hajxy tiägø'owa'añ tsajtøgooty cuhjuuxy, ween hajxy jaduhñ ñä'ägä yajcuhme'xy. Y pø tsähdiuumb hajxy jaduhñ cuhme'xy, ween hajxy ñiguiuhjuuxy. ⁷Pero ja'a ya'adiøjc-hajxy, cab hajxy je'e ween tsajtøgooty cuhjupmøød tiägøøbiä. Hix, jaduhñä Dios ja'a ya'adiøjc yhädiuunñ nebiä Diosän. Ja'a ya'adiøjc-cøxpä jaduhñ quiähxø'øgy coo Dios mäjaa jiaanč tehñ miøødä. Pero ja'a to'oxiøjc-cøxpä quiähxø'øgy coo ya'adiøjc mäjaa miøødäbä. ⁸Coo Dios ja'a to'oxiøjc jecy yhädiuunñ, jayøjpä ya'adiøjc ja'a quiaač tu'ug piøjcäxä. Mänitä to'oxiøjc yajwa'añguiojjä caačhaam. Jaduhñ jim myiñ cujaay maa Diosmädia'aguiän. Pero cab jaduhñ miäna'añ coo ya'adiøjc yajwa'añguiojjä ja'a to'oxiøjc quiaačhaam. ⁹Ja'a ya'adiøjc-cøxpä ja'a to'oxiøjc yhädiuunbä. Cab

hajxy nmänaañämät coo ya'adiøjc yhädiuunä ja'a to'oxiøjc-cøxpä. ¹⁰Páadiädsä to'oxiøjc-hajxy wiädítät cuhjuuxy, jaduhñ hajxy yajcähxø'øgät coo hajxy yhane'emyii ya'adiøjcäm. Jaduhñä Diosmoonsähajxy quiumay, ja'a hajxy jim tsajpootypä. ¹¹Pero jaduhñä Dios hajxy jecy xquiunú'xäm ya'adio'oxy. ¹²Hix, jéquiänä to'oxiøjc yajwa'añguiojjä ja'a ya'adiøjc quiaačhaam. Jaaná jaduhñduhmbä, ja'a to'oxiøjc-cøxpä ja'a ya'adiøjc myiñguia'ay. ¹³Huuc mäna'an mijts pø hawiinmats jaduhñ coo to'oxiøjc-hajxy cuhwa'ads Dyiospa'yá'axät tsajtøgooty. ¹⁴Hočhähdiiuunnä jaduhñ coo ya'adiøjc quihwaayhajxy yoñ yajyéegät. Hoy piønä jaduhñ miäna'añ. ¹⁵Pero hahixø'øyyäp ja'a to'oxiøjc-hajxy jaduhñ coo quihwaay hajxy yajyéegät yoñ; jaduhñ je'eduhñ miäbaady nebiä cuhmochpä. ¹⁶Jaduhñ højts nnä'ägädä yajñähixø'øy coo to'oxiøjc-hajxy cuhmoch Dyiospa'yá'axät tsajtøgooty. Y jaduhñä hermanohajxy nägøxiä yajñähixøøbiä tsajtøgooty wiinduhmyhagajpt. Hoorä, pønjaty jaduhñ mänaamb cooc tyijy jaduhñ quia'a nejpiä coo to'oxiøjc-hajxy jaguiuhmoch tsajtøgooty Dyiospa'yá'axät, cabä tøyhajt hajxy ñä'ägädä møødä. ¹⁷⁻¹⁹Tøøch nmädoxyhaty coo hajxy näje'e haxøøgtøjiämuum mniäna'ayii maa hajxy tsajtøgooty mhamugø'øyän. Tøyhajtäda'a jaduhñ. Cab jaduhñ yhoyyä y cábøch jaduhñ ngumay,

hóyhøch jaduhñ nja najuø'øyy coo jáya'ayhajxy yhixa'añ pønjaty tøyhajt hoy wädiñp. ²⁰ Coo Jesucristo hánajty yagho'oga'añii, mänitá jiamiøød ñämaayy coo hajxy chuugaamiúgät ja'a Jesucristocøxpä. Pero mijts, coo hajxy naxy tsajtøgooty mhamugø'øyy, coo hajxy naxy mdsuugaamiucy, cabä Jesucristo hajxy naxy mjahmiech. ²¹ Hanidiuhmjaty hajxy naxy mgay. Cab hajxy naxy mdajy mmay pø jii mmägu'ughajpä caayøøc hajxy miøødä quia'a møødä. Näje'e hajxy naxy mmu'ugyii. ²² Jim hajxy hawiinmats mgay mhú'ugät maa mhamdsoo tøjc-hajxiän. Cab jaduhñ yhooyä coo hajxy jaduhñ mjatcø'øyy maa Diostøjcän. Myajtsähdiuumbiä häyoobäya'ay hajxy jaduhñ. Cábøch mijts jaduhñ nnä'ägädä cumay coo hajxy jaduhñ mjatcø'øyy.

²³ Hamdsoočhä Jesucristo xyajñähixøøyy nébiøch mijts tøø nnajtscapxøøyyäm: Hoorä, mänittsuu, coo Jesucristo hánajty tiooga'añii, mänitá Jesucristohajxy tiägøøyy tsuugaabiä møødä jiamiøødhajxy. Mänitá Jesucristo tsajcaagy quionø'cy. ²⁴ Mänit Dioscujú'uyäp yejcy. Mänitá tsajcaagy yhaguidøøyy. Mänit miänaañ: "Huuc cay hajxy. Høøch nni'x høøch ngopc hädaa. Mijtsøxpøchä häna'c xtiooga'añ. Cooch mijts mänaa xjiahmiejtstá'agät, jaduhñä tsajcaagy hajxy mgáyät."

²⁵ Y coo hajxy hánajty tøø chuugaabiädøøñä, mänitá Jesús vino quionø'cy copajooty. Mänit miänáangombä: "Cooch mijts nnähho'tu'udaannä, cooch nnø'ty

nyaghäyowaannä, hawiinjemybiä Dios hajxy xmiøødyajcuhduga'añ. Hoorä, hädaa vino, hijxtahñd jaduhñ miähmø'øwa'añ nébiøch nnø'tiän. Y naaghooc hädaa vino hajxy mhu'ugy, mänitøch hajxy xjiahmiejtstá'agät." ²⁶ Homiänaajä hädaa tsajcaagy hajxy hánajty mgaya'añ, homiänaajä hädaa vino hajxy hánajty mhu'uga'añ, myajcøhxø'py hajxy hánajty coo Jesucristo hajxy tøø xñähho'túutäm. Hix, wiimbijtägatsaambä Jesucristo. Yaa jadähooç quiädaactägatsa'añ hädaa yaabä naaxwiin.

²⁷ Nebiä Jesucristo jiamiøødhajxy miøødcaayy miøødhuuquiän, jaduhñäc hajxy ngaayy, jaduhñäc hajxy nhúucämbät. Pønjetiä howyiinmahñdy hánajty ca'a møød coo hánajty jaduhñ quiaya'añ, coo hánajty jaduhñ yhu'uga'añ, haxøøg hajxy jaduhñ jiatcø'øyy ja'a Jesucristo ñi'xcøxpä ñø'tycøxpä. ²⁸ Jaduhñds je'e, coo hajxy hánajty mgaya'añ ja'a Jesucristocøxpä, coo hajxy hánajty mhu'uga'añ ja'a Jesucristocøxpä, naxy hajxy jayøjpiä mdehm ñiñajuø'øwøøjtät pø howyiinmahñdy hajxy hánajty mjaanç møød. ²⁹ Pønjaty jaduhñ caaby huucp ja'a Jesucristocøxpä, coo hajxy jaduhñ quia'a møjpdá'agät coo Jesucristo hajxy xñähho'túutäm, yajcumädowáanäp hajxy jaduhñ. ³⁰ Näje'e hajxy mba'ambety; näje'e hajxy mga'a majaanmøødä. Høxtä näje'ejaty hajxy jaduhñ tøø yho'ogy. Paady hajxy jaduhñ mjaty mhabety coo hajxy mga'a møjpdá'agy coo Jesucristo hajxy tøø xñähho'túutäm. ³¹ Pero cabä Dios hajxy xyajcumädóowämät

coo howyiinmahñdy hajxy hñajty nmøødhájtäm coo hajxy hñajty ngayáanäm ja'a Jesucristocøxpä, coo hajxy hñajty nhu'ugáanäm ja'a Jesucristocøxpä. ³²Paadiä Dios hajxy táhoogaty xyajcumädóowäm, jaduñ hajxy xyajnajuóoyyäm coo miädia'agy hajxy hñajty hoy nga'a yajtúunäm. Y coo miädia'agy hajxy hoy nyajtúunämät, cab hajxy jiiby nnä'ä hädáacämät møjcu'uhaam maa jäya'ayhajxy yháda'aga'añän, ja'a hajxy ca'a mäbøjpä.

³³Jaduhñds je'e, hermanodøjc, coo hajxy hñajty mänaa mgaamiuga'añ ja'a Jesucristocøxpä, coo hajxy hñajty mänaa mhuucmuga'añ ja'a Jesucristocøxpä, naxy hajxy tu'cuhdujt mdehm quiaačhóonät. Mniyhahixø'owóøjöp hajxy jaduñ. ³⁴Pø myähó'cäp hajxy hñajty, jayøjp hajxy mnä'ägä cáyät maa mdøjc-hajxiän. Jaduhñä Dios hajxy xquia'a yajcumädówät coo hajxy hñajty mgaamiuga'añ ja'a Jesucristocøxpä, coo hajxy hñajty mhuucmuga'añ ja'a Jesucristocøxpä. Madiu'uch hajxy tøø xjiaac mäyajtøy. Cooč jim nnócxät maa mijtsän, mänítøch jim nyajtødiägø'owät.

12 Hermanodøjc, tsøg hajxy mädiáacäm nebiatiä Dioshespíritu hajxy xpiuhbéjtäm, coo hawiingatiä tuung hajxy xmióoyyäm. Naxy hajxy jaduñ mdehm wyiinjuø'owät.

²Mnajuøøby hajxy jaduñ, coo Diosmädia'agy hajxy hñajty mga'a panøcxyñä, je'enä quepychech naaxpoch hajxy hñajty mwiingudsähgø'oyñä. Cabä quepychech naaxpoch quiapxy

miädia'agy. Jaduhñ hajxy hñajty mwädity nebiä tu'udägoybän.

³Huuc wiinjuø'ow hádaa mädia'agy hajxy. Pønjetiä Dioshespíritu jaduñ najtscapxøóyyäp, cabä Jesús hajxy je'e haxøøg nñanømy. Y pønjetiä Dioshespíritu jaduñ ca'a najtscapxøóyyäp, cab hajxy hoy miäna'ana'añ coo Jesús hajxy nWiindsøn'hájtäm.

⁴Coo Diostuung hajxy jaduñ ndúunäm, hawiingatiä Diostuung hajxy jaduñ xpiáatäm. Pero ja'a Dios ja'a yhEspírituhajtiä hajxy jaduñ xtiuungmóoyyäm. ⁵Madiu'u ja'a Diostuung hajxy jaduñ njaančh túunäm, pero tu'jäya'ayyä hajxy jaduñ nWiindsøn'hájtäm. Ja'a Jesucristo je'e. ⁶Ja'a Dios hajxy xpiuhbéjtäm coo tiuung hajxy ndúunämät, nebiatiä tiuung hajxy xpiáatäm. ⁷Paadiä Dioshespíritu hajxy hawiingaty xtiuungmóoyyäm, jaduñ hajxy hoy nnibiuhbéjtämät hamiñ haxøpy. ⁸Hix, näje'e hermanohajxy tiuungmo'oyii ja'a Dioshespíritäm coo hajxy quiapx coo hajxy miädiá'agät nebiä jajpä häna'cän. ⁹Näje'e hermanohajxy piuhbedyii ja'a Dioshespíritäm coo hajxy hoy jiaančh tehñ miábögät ja'a Diosmädia'agy. Näje'e hajxy miäjaamo'oyii nebiä jäya'ay hajxy yajmøcpógät, ja'a pøjc ja'a híjxäbä. ¹⁰Näje'e hermanohajxy piuhbedyii ja'a Dioshespíritäm coo hajxy hoy-yagjuøñä tiuñ ja'a Diosmäjaagøxpä. Näje'e hajxy tiuungmo'oyii coo Diosmädia'agy hajxy yajwá'xät. Näje'e hajxy tiuungmóoyyäbä coo hajxy yhøxcábät pøn najtscapxøóyyäp ja'a Dioshespíritäm, pøn

najtsapxóøyyäp ja'a mójcu'ugóngäm. Näje'e hajxy piaadyii coo hajxy quiápxät wiinghayuucjaty. Näje'e hajxy piáatäbä coo hajxy quiapxhoyó'owät waambatiä hermanohajxy tøø quiapxy wiinghayuucjaty. ¹¹Haniduihmjatiä Dioshespíritu hajxy xtiuungmóoyyäm, nebiä jioot chocy. Tu'uquiiä ja'a Dioshespíritu jaduhñ.

¹²Ja'a tu'ugpä ni'x, ja'a tu'ugpä copc, madiu'u pajc miøødä. Pero tu'ugpä ni'x tu'ugpä copc hajxy jaduhñ nmøødhájtäm. Jaduhñ mäwiin højtshájtäm, tu'ugmädia'agy hajxy nhíjtäm coo Jesucristo hajxy nWiindsøn'hájtäm, hoy hajxy nja nämayahájtäm.

¹³Coo hajxy nnábéjtäm, jaduhñä Dioshespíritu hajxy xpiädáacäm tu'ugmädia'agy nägøxiä, møødä judíoshajxy, møødä cajpä judíoshajxy, møødä jäya'ayhajxy je'ehájtäbä wiinghänä'cäm, møødä jäya'ayhajxy hijpä hawa'adstuum. Nägøxiä ja'a Dioshespíritu hajxy nmøødhájtäm.

¹⁴Ja'a tu'ugpä ni'x ja'a tu'ugpä copc, madiu'u pajc hajxy nmøødhájtäm. ¹⁵Coods yø'ø tecy jaduhñ ñä'ä mäná'anät: “Cábøch tii nmach cábøch tii nnähdoñ nej yø'ø cø'øjän, páadyhøch miich jaduhñ xquia'a yajtuna'añ”, cab jaduhñ ñä'ä tóyyäbä; haa ca'a, nyajyohy nyajnájxäm ja'a tecy jaduhmbä. ¹⁶Jaanä jaduhñduhmbä, coo yø'ø taatsc jaduhñ miänáambät: “Cábøch jaduhñ nhixy nej yø'ø wiinän, páadyhøch miich jaduhñ xquia'a yajtuna'añ”, cab jaduhñ ñä'ä tóyyäbä; haa ca'a, nyajmädóowäm

ja'a taatsc jaduhmbä. ¹⁷Coo hajxy häxøpy nhaagä wiinhájtäm, cab hajxy häxøpy nmädóowäm. Y coo hajxy häxøpy nhaagä mädohndhájtäm, cab hajxy häxøpy tii xjijøxuugóøyyäm. ¹⁸Jaduhñä Dios hajxy xquiunú'u'xäm nebiaty hajxy xyajmädsójcäm. Paadiä ni'x ja'a copc hajxy nmøødhájtäm, paadiä cø'ø ja'a tecy hajxy nmøødhájtäm. ¹⁹Coo hajxy häxøpy nhaagä pajc-hájtäm, cabä nni'x ja'a ngopc-hajxy häxøpy yhíjtäm. ²⁰Madiu'u ja'a pajc hajxy nmøødhájtäm ja'a tu'ugpä jäya'ay. Tu'ugni'x tu'ugcopc hajxy jaduhñ nmøødhájtäm.

²¹Coo wiin häxøpy quiapxy, cabä cø'ø jaduhñ ñämá'awät: “Cábøch miich nyajmaajiaty.” Jaaná jaduhñä copcpä, coo häxøpy quiapxy, cabä tecy jaduhñ ñämáabiät: “Cábøch miich nyajmaajiaty.” ²²Pero nhaagä yajtuungpáatäm ja'a ni'x ja'a copc cøxiä, hoyyä pajc näje'e quia'a jagä møcä. ²³Cabä ni'x ja'a copc hajxy teeñmuum nyajcähxø'ogáanäm, paadiä wit hajxy nmøødhájtäm. ²⁴Pero ja'a nwiin ja'a njøjphájtämhajxy, cab jaduhñ ñejpiä coo hajxy nyajcähxø'cämät. Jadúhñhøch cham tøø nmädia'agy nebiä Dios ja'a nni'x ja'a ngopc-hájtämhajxy xquiunú'u'xäm tu'ughamuum. Hoorä, jaduhñ mäwiin højtshájtäm, tu'ugmädia'agy hajxy nnimøødhíjtäm coo Diosmädia'agy hajxy näguipxy nmäbójcäm, coo Jesucristo hajxy näguipxy nWiindsøn'hájtäm. Jaduhñä Dios hajxy xquiunú'u'xäm coo hermanodøjc hajxy

nwiingudsáhgóøyyámät, hoy hajxy jia xoñ jia häyoy. ²⁵Jaduhñä Dios quiumay coo hajxy nhíjtámät tu'ugjoot tu'ugcopc, coo hajxy nniçhojc coo hajxy nnimiée'xámät hamiñ haxøpy. ²⁶Coo tu'ljåya'ay chaaçhpógät, mänit hajxy nägøxiä njootmayhájttámät. Jaaná jaduhñduhmbä, coo tu'ljåya'ay wyiingudsáhgóøwóøjät, mänit hajxy nägøxiä nxoondáacámät.

²⁷Nwiindsønhájtámä

Jesucristo hajxy nägøxiä pønhatiä Diosmädia'agy mäbøjp. Hawiingatiä Dios hajxy tøø xquiunúu'xäm.

²⁸Näje'e hermanohajxy tøø tiuungmo'oyii ja'a Diósäm. Ja'a Dios quiuguexyhájtäbä, je'e hajxy jayøjp tuungpaat. Mänit hajxy je'e tiuungpaatpä, ja'a Diosmädia'agy-yajwa'xpähajxy, møødä Diosmädia'agy-yaj wiinhixøøbiähajxy. Näje'e hermanohajxy hoy-yagjuøøñä tiuñ ja'a Diosmäjaagøxpä. Näje'e hermanohajxy yajmøcpøcy ja'a jäya'ayhajxy nähba'amguhba'ambä. Näje'e hermanohajxy miäbuhbety. Näje'e hajxy jaduhñ miägapxy yhane'emy. Näje'e hajxy piaadyii coo wiinghayuucjaty hajxy quiápxät. ²⁹Hoorä, cabä Dios hajxy nägøxiä xquiuguexyhájtäm. Cabä Diosmädia'agy hajxy nägøxiä nyajwá'xäm. Cab hajxy nägøxiä nyajñähixøøyyäm. Cab hajxy nägøxiä ndúunäm hoy-yagjuøøñä ja'a Diosmäjaagøxpä. ³⁰Cab hajxy nägøxiä nba'amyajñäxäm. Cab hajxy nägøxiä tøø xpíáatäm coo ngápxámät wiinghayuucjaty. Y cab hajxy nägøxiä tøø xpíáatäm coo hajxy ngapxhoyóøyyámät

waambatiä hermano tøø quiapxy wiinghayuucjaty. ³¹Tsøgä njoot hajxy pädáacäm hamuumdu'joot coo Dios tuung hajxy ween xmióoyäm ja'a maas tsoobaatpä. Chámhøçhä mädia'agy hajxy nyajñähixøøwa'añ nebiä Dios miädia'agy hajxy hoy mmaas yajtu'uyó'oyät.

13 Coo nmädøjc hajxy nga'a tsojc nga'a méé'xámät, cabä Diosmädia'agy hajxy hånajty hoy ngudiúunäm, hoy hajxy cu nja capx cu nja mädiáacäm madiu'u nebiä jäya'ayhajxy yaa jia capxiän hädaa yaabä naaxwiin, nebiä Diosmoonsähajxy jim jia capxiän tsajpootyp. ²Coo nmädøjc hajxy nga'a tsojc nga'a méé'xámät, cab hajxy nnä'ägädä tsoobáatämät, hoy hajxy cu nja najuøøyyäm tii jadaañäp tii tunäänäp, hoy hajxy cøxiä wiinä cu nja najuøøyy cu nja jahmiéjtsäm, hoyyä møcmäjaa hajxy cu nja jaançh tehñ miøødhájtäm hoy ñä'ä tiigøxpä. ³Coo nmädøjc hajxy nga'a tsojc nga'a méé'xámät, cab hajxy nnä'ägädä tsoobáatämät, hoyyä häyoobäjäya'ay hajxy cøxiä wiinä cu nja móoyäm mäduhñtiä hajxy nmøødhájtäm, hoyyä jäya'ay hajxy cu nja nähho'túütäm.

⁴Pønä miädøjc tsojp mee'xp, mee'xxieemy hajxy jaduhñ yhity. Hoy hajxy jaduhñ miädøjc-haty. Cabä hadsocywyiinmahñdy hajxy miøødä. Cab hajxy yajcumaya'añ. ⁵Pønä miädøjc tsojp mee'xp, cab hajxy chähdiuhñdägoyyä. Cab hajxy wyiinducä. Cab hajxy jiootma'ady, hoy hajxy cøxypänejpiä cu jia tunøø. ⁶Cabä haxøøgpä hajxy

chocy; ja'a tøyhajtpä hajxy jaduhñ chojpy. ⁷Pønä miädøjc tsojp mee'xp, miee'xtujpy hajxy. Coö hajxy cøxypänejpiä tiunóøjtät ja'a miädøjcäm, cab hajxy jiootma'ady. Cab hajxy ñähøøwø'øy, cab hajxy ñähøøwø'øy. Hoy hajxy miäxi'igy, hoy hajxy miägäpaxy, weenä craa ja'a tøø quiädiéeyäbä jaduhñ yhuuc wiinmahñmech coö jaduhñ tøø quiädieey.

⁸Habaadaamb jaduhñ coö jäya'ayä Diosmädia'agy hajxy hänajty quia'a yajwa'xaanä. Habaadaamb jaduhñ coö jäya'ayhajxy hänajty quia'a capx quia'a mädia'agaanä wiinghayuucjaty. Habaadaamb jaduhñ coö quia'a tsoobaadaanä tijatiä jäya'ayhajxy yaa ñajuøøby hädaa yaabä naaxwiin. Pero cøjxta'axiøø hajxy nniçhoc nnimiee'xäänäm. ⁹Cahnä hajxy hoy nwiinjuøøyyäm je'leguiøxpä coö hajxy yaa nhíjtämnä hädaa yaabä naaxwiin. Cahnä Diosmädia'agy hajxy hoy nhabøjcäm coö hajxy nyajwá'xämät.

¹⁰Habaadaamb jaduhñ coö Diosmädia'agy hajxy maas ca'xy nwiinjuø'owäänäm, paady hänajty pøn quia'a wäditaanä Diosmädia'agy-yajwa'xpä.

¹¹Coö hajxy nmuutsc-hájtämnä, cahnä hajxy hänajty nwiinmahñméjtsäm. Pero coö hajxy nmøjjøøyyänä, mänit hajxy nnajuøøyyänä. Tøø hajxy nwiinmahñméjtsänä; cab hajxy nwiinmahñdyháltänä neby hajxy tøø nmuutsc-hájtäm. ¹²Jaduhñ mäwiinäts je'e, coö hajxy yaa nhíjtäm hädaa yaabä naaxwiin,

cahnä Diosmädia'agy hajxy hoy nwiinjuøøyyänäm. Cahnä Dios hajxy nhixyháltäm. Pero coö hajxy jim nnøcxäänäm tsajpootyp, mänitä Dios hajxy nhixyhäänäm neby hajxy je'e yxihixyháltäm. Mänitä miädia'agy hajxy ca'xy nwiinjuø'owäänäm. ¹³Tägøøgtu'u ja'a Dios hajxy xyhanéhäm; coö miädia'agy hajxy nmäbøjcämät coö tiøyhajtä, chaads coö Jesucristo hajxy njøbhíxämät coö yaa quiädaactägatsa'añ, chaads coö nmädøjc hajxy ndsojc nmée'xämät. Hädaa høxhaambä jaduhñ maas tsoobaadaamb coö nmädøjc hajxy ndsojc nmée'xämät.

14 Naxy hajxy ndehm ñiçhojc ndehm ñimiee'xämät hoy miänaajä. Je'e maas tsoobaatp. Jaanä jaduhñduhmä, tsøgä Dios hajxy nämáayyäm coö mäjaa hajxy ween xmiøoyyäm coö tiuung hajxy jaduhñ nduunämät. Je'e tsoobaatp coö hermano ja'a Diosmädia'agy hajxy yajwa'xy. ²Näje'e hermanohajxy, coö hajxy hänajty quiapxa'añ tsajtøgooty, cab hajxy howyiinjuøøñä miädia'agy. Hiç, ja'a Dios hajxy jaduhñ miøødmädiacypy, ca'a yhøjtsháltäm, je'leguiøxpä coö Dioshajtä wyiinjuø'øy. Cab højts jaduhñ nnä'ägädä wiinjuøøyyäm. Najtscapxøøyyäp hajxy jaduhñ ja'a Dioshespíritäm. Jagooyä Dios jaduhñ ñajuø'øy waambaty hajxy jaduhñ miädia'agy. ³Pero coö Diosmädia'agy hajxy ngäpxämät nebiä jäya'ayhajxy jaduhñ wyiinjuø'owät, mänitä jäya'ay ja'a Diosmädia'agy hajxy hoy nyajwiingapxøøyyämät, hoy hajxy

jaduhñ nmägäp̄x nhané'emät, hoy hajxy jaduhñ ngäp̄xm̄öcp̄öjcämät. ⁴P̄ñ Dioshajtiä nä'ä m̄ödm̄ädiäacp̄, je'e mäjaa nidiuhñ mööyyäp̄ nebiä Diosmädiä'agy maas hoy jiaac wiinjuó'öwät. Hix, cabä jäya'ayhajxy jaduhñ wyiinjuó'öy waambaty jaduhñ miädiä'agy. Pero coo hermanodöjc ja'a Diosmädiä'agy hajxy nyajwiingap̄xöyyämät howyiinjuóöñä, mänit hajxy miäjaamo'owöjät nebiä Diosmädiä'agy hajxy jaduhñ maas hoy jiaac wiinjuó'öwät. ⁵Maas tsoobaatp̄ jaduhñ coo Diosmädiä'agy hajxy ngáp̄xämät howyiinjuóöñä; jaduhñä hermanohajxy nägöxiä wyiinjuó'öwät, ja'a hajxy mädoobä. Hoy hit jaduhñ coo Dioshajtiä hajxy nägöxiä mm̄ödm̄ädiä'agät. Mänit mäböcy yhoyó'öwät coo hajxy mgap̄xhoyó'öwät, jaduhñä hermanohajxy nägöxiä wyiinjuó'öwät. ⁶Hermanodöjc, coöchä Dioshajtiä nnä'ä m̄ödm̄ädiä'agät maa mijtsän, cab hajxy jaduhñ hoy mwiiinjuó'öwät. Pero mänit hajxy jaduhñ mwiiinjuó'öwät coöch mijtsä Diosmädiä'agy hoy nyajwiinhixó'öwät nebiätyhöchä Dios ja'a miädiä'agy hänäjty xñajtsap̄xööyyä. ⁷Höxtähmädsä xuuxp̄ädöjc-hajxy, coo hajxy hoy quia'a xú'uxät, nägoodä hajxy nöcx̄y ñä'ä yajxu'uxy ñä'ä yajp̄ögö'öy, y cab hoy yajmädoy. ⁸Jaanä jaduhñduhmbä maa jäya'ayhajxy chiptuñän, coo soldado ja'a corneta hoy quia'a yajxú'uxät,

cabä jiamioödhajxy jaduhñ hoy chiptúnät. Nä'ä himybiäyö'ög n̄ö'ö maamybiäyö'ögäp̄ hajxy jaduhñ. ⁹Jaduhñ mäwiiinäts höjtshájtäm, coo Dioshajtiä hajxy nm̄ödm̄ädiäacämät, cabä nm̄ädiä'agy hajxy jaduhñ nniwyiinjuóöyyämät hamiñ haxöpy. Xiöbä hajxy jaduhñ nnä'ä capx nnä'ä mädiäacämät. ¹⁰Madiu'u hayuuc hajxy yaa ngáp̄xäm hädaa yaabä naaxwiin. Hawiingaty hayuuc hajxy nniwyiinjuóöyyäm. ¹¹Y coo mädiä'agy hajxy hamiñ haxöpy nga'a nniwyiinjuóöyyämät hawiingjaty, cab hajxy jaduhñ hoy nnimiödm̄ädiäacämät. ¹²Jaduhñ mäwiiinäts mijts, mjaançh tehñ miänaamb mijts jaduhñ coo Dioshëp̄iritu hajxy xtiungmó'öwät. Y myujwá'anäp̄ ja'a tuung hajxy mädyii maas tsoobaatp̄. Jaduhñä hermanodöjc hajxy maas hoy myajwiingap̄xó'öwät nebiä Diosmädiä'agy hajxy jaduhñ maas hoy wyiinjuó'öwät. ¹³Jaduhñds je'e, p̄ñ jaduhñ howyiinjuóöñä ca'a capxp̄ ca'a mädiäacp̄, weenä Dios jaduhñ ñäma'ay coo miäjaamo'owöjät nebiä miädiä'agy quiap̄xhoyó'öwät. ¹⁴Coo Dios hajxy nba'yáaxämät ja'a hayuuc-haamby mädyii Dioshajtiä wyiinjuóöbiä, cab hajxy nwiinjuóöyyämät, hoy hajxy cu nja mädiäacäm wiinmahñdyhaam. Y cab hajxy jaduhñ nnä'ägädä wiinjuóöyyäm. ¹⁵Jaduhñds je'e, tsöcxä Dios hajxy pa'yáaxäm juöhhñdyhaam, pero howyiinjuóöñä. Tsöcxä Dioshöy hajxy hööwäm juöhhñdyhaam, pero howyiinjuóöñä. ¹⁶Coo Dios hajxy nnämáayyämät

“Dioscujú'uyäp”, ja'a hayuuc-haamby mädyii Dioshajtiä wyiinjuøøby, cab hajxy hamdsoo nwiinjuøøyyämät. Y ja'a jäya'ayhajxy jii mädoobä, ni je'le hajxy jaduhñ quia'a wiinjuø'owät. Y cab hajxy hoy piamaná'anät “Dioscujú'uyäp.” ¹⁷Hoyyä Dios hajxy yajxon cu nja nämáayyäm “Dioscujú'uyäp”, ja'a jäya'ayhajxy jii mädoobä, cab hajxy wyiinjuø'owät. Y cabä Diosmädia'agy hajxy jaduhñ jiaac wiinjuø'owät. ¹⁸Høøch, nnämáabiøchä Dios “Dioscujú'uyäp” je'eguiøxpä cooçh pøn jaduhñ xquia'a najtspaadø'oy nébiøch hayuuc-haamby ngapxiän, ja'a Dioshajtiä wyiinjuøøbiä. ¹⁹Pero maa hajxy nhamugøøyyämän tsajtøgooty Dioswiingudsähgøøbiä, tsoobaatp jaduhñ cooçh howyiinjuøøñä ngápxät, hoy jia weeñtiä. Cab jaduhñ jiaty tsoobáadät cooçh hayuuc-haamby ngápxät ja'a Dioshajtiä wyiinjuøøbiä, hóyhøch yoñ cu nja capx. Hiç, cooçh howyiinjuøøñä ngápxät, wyiinjuø'owäp ja'a hermanohajxy jaduhñ, jaduhñhøchä Diosmädia'agy hajxy hoy nyajwiingapxø'owät.

²⁰Hermanodøjc, tsøg hädaa mädia'agy hajxy hoy wiinjuøøyyäm nebiä møjhäna'c-hajxy hoy wyiinjuø'oyän. Yø'ø pigäna'c-hajxy, cahnä hajxy wyiinmahñmechñä. Pero cahnä haxøøgpä hajxy yhiçy yhabaadyñä. ²¹Jaduhñä Diosmädia'agy jecy miänaañ: “Ja'a judfoshajxy, cábøchä nmädia'agy hajxy xmiäbøgaanä. Nguexáambiøchä jäguembä jäya'ay jim maa judfoshajxiän. Mänit hajxy miøødmädia'aga'añii

wiinghayuuc-haamby. Pero ni jaduhñhøchä nmädia'agy hajxy xquia'a mäbøgaanä, nõmä Dios miäna'añ.” ²²Ja'a jäya'ay ja'a Diosmädia'agy hajxy ca'a mäbøjpä, je'eguiøxpä højtç hayuuc-haamby ngápxäm, ja'a Dioshajtiä wyiinjuøøbiä, ca'a je'eguiøxpä ja'a jäya'ayhajxy ja'a Diosmädia'agy mäbøjpä. Coø hajxy naxxy ngápxäm ja'a hayuuc-haamby mädyii Dioshajtiä wyiinjuøøby, jaduhñä Dios hijxtahnd xii yecy coø jäya'ay tsaachpä peenä hajxy piaada'añ, ja'a Diosmädia'agy hajxy ca'a mäbøjpä. Pero coø Diosmädia'agy hajxy naxxy ngápxäm howyiinjuøøñä, jaduhñä Dios hijxtahnd xii yecy coø jäya'ay hoybä weenbä hajxy piaada'añ, ja'a Diosmädia'agy hajxy mäbøjpä. ²³Hiç, coø hajxy nägøxiä ngápxämät ja'a hayuuc-haamby mädyii Dioshajtiä wyiinjuøøby maa hajxy hänäjty nhamugøøyyämän tsajtøgooty Dioswiingudsähgøøbiä, y coø jäya'ayhajxy jim tiägø'owät, ja'a Diosmädia'agy hajxy ca'a mäbøjpä, jaduhñda'a hajxy miäná'anät cooc tyijy hajxy nguhññäm. ²⁴⁻²⁵Pero coø Diosmädia'agy hajxy nägøxiä ngápxämät howyiinjuøøñä, mänitä jäya'ayhajxy wyiinjuø'owät, ja'a hajxy ca'a mäbøjpä. Mänit hajxy yhuuc tehñ wyiinmahñmédsät. Mänit hajxy hamdsooyyä ñiñajuø'owøøjät coø hajxy hänäjty hoy tøø quia'a jäya'ayhaty. Mänit hajxy jaduhñ jyijcädä'agät. Mänitä Dios hajxy yhuuc tehñ wyiingudsähgø'owät. Mänit hajxy yhuuc tehñ miäná'anät coø Dios

hajxy hánajty tøy xjiaanč teh̄m miøðhjtäm.

²⁶Hermanodøjc, maa hajxy nhamugøøyyämän tsajtøgooty Dioswiingudsähgøøbiä, tsøg hajxy yajxon̄ yagjáltäm nägøxiä, jaduñnä Diosmädia'agy hajxy maas hoy nmaas mäbøjcämät. Näje'e Dioshøy hajxy yhøwa'añ. Näje'e hajxy yajnähixø'øwa'añ. Näje'e hajxy miädia'aga'añ waambatiä Diosmädia'agy hajxy hánajty tøø ñajtsapxø'øyii ja'a Diósäm. Näje'e hermanohajxy quiapxa'añ hayuuc-haamby mädyii Dioshajtiä wyiinjuøøby. Y näje'e hermanohajxy quiapxhoyø'øwa'añ waambatiä hermanohajxy hánajty tøø quiapxy ja'a hayuuc-haamby ja'a Dioshajtiä wyiinjuøøbiä. ²⁷Coo hajxy mänaa ngápämät ja'a hayuuc-haamby ja'a Dioshajtiä wyiinjuøøbiä maa hajxy hánajty nhamugøøyyämän tsajtøgooty Dioswiingudsähgøøbiä, nämetsyä nädägøøquiä hajxy ngápämät hanidiuhmjaty. Mänitä hermano tu'jája'ay xquiapxhoyøøyyämät. ²⁸Pero pø cabä hermanohajxy jim̄ näje'e jiaty capxhoyø'øw, mejor ween hajxy jim̄ nga'a nä'ägädä cápxämät tsajtøgooty ja'a hayuuc-haamby mädyii Dioshajtiä wyiinjuøøby. Wiingtuum hajxy nõcxy nnä'ägädä cápxäm jaduññ hanidiuhmjaty. Xmiädóowämäp ja'a Dios hajxy jaduññ. ²⁹Jaaná jaduññduhmbä, coo hermanohajxy hánajty quiapxa'añ waambaty hajxy hánajty ñajtsapxø'øyii ja'a Diósäm, ween hajxy nämetsyä nädägøøquiä quiapxy. Y ja'a hermanohajxy jaac jiiä, mänit

hajxy jaduññ miäna'anät pø tøø hajxy hoy miädoy, pø caj. ³⁰Y coo wiinghermano hánajty quiapxa'añ waambaty hánajty ñajtsapxø'øyii ja'a Diósäm, weenä hermano yhuuc hamoñ, ja'a hánajty capxpä.

³¹Hanidiuhmjaty hajxy ngápämät nägøxiä waambatiä Dios hajxy hánajty xñajtsapxøøyyäm. Jaduññ hajxy nägøxiä maas hoy nhabøjcämät; jaduññ hajxy nägøxiä nnguiapxwíjjämät.

³²Hix, coo miič hánajty mgapxa'añ waambaty miičhä Dios hánajty xñajtsapxø'øwaanä, mänit mgápät coo hánajty tøø xyhabaatä. ³³⁻³⁴Jaduññä Dios quiumay coo hajxy hanidiuhmjaty ngápämät. Cab jaduññ quiumay coo hajxy nägøxiä nxiicmujc nmädiaacmújcämät tsajtøgooty.

Cab jaduññ yhooyä coo to'oxiøjc-hajxy jiiby quiápxät tsajtøgooty maa Dios hajxy hánajty nwiingudsähgøøyyämän. Cabä Dios jaduññ miäna'añ coo hajxy jiiby quiápxät. Jaduññä hermanohajxy nägøxiä quiuhdujthaty wiinduhmyhagajpt. Jaduññä Diosmädia'agy miäna'añ coo to'oxiøjc-hajxy miädia'agymiäbögät.

³⁵Hočähdiuunnä jaduññ coo to'oxiøjc-hajxy jiiby quiápxät tsajtøgooty. Pø cabä Diosmädia'agy hajxy hánajty tøø wyiinjuø'øy tsajtøgooty, jim̄ä ñihyap hajxy miäyajtówät maa yhamdsoo tøgootyhajxiän.

³⁶Jaduññä hermanodøjc-hajxy nägøxiä miäna'añ wiinduhmyhagajpt coo to'oxiøjc-hajxy jiiby quia'a capx quia'a mädiá'agät tsajtøgooty

nebiä Diosmädia'agy miäna'añ. Y mijts jim hijpä Corintos, jaduñ mijts mbaguhdujthájpät. Caj mijts mhamdsoo cuhdujt myajtúnät. ³⁷Nébiøch cham ngujaay, Diosmädia'agy hädaaduñ. Naxy hajxy jaduñ mdehm miäbøgät, pønjaty jaduñ niñänøømäp coo Dios hajxy ñajtscapxøyyäxä, coo Dioshèspiritu piuhbedyii. ³⁸Pønjaty hajxy jaduñ ca'a mäbøgaamb, cabä Dios hajxy jaduñ quiumaya'añii.

³⁹Jaduñds je'e, hermanodøjc, tsøgä Dios hajxy nämáayyäm coo hajxy tehngajnä ween xpiuhbéjtämät, coo miädia'agy hajxy xñajtscapxøyyämät. Jaduñnä miädia'agy hajxy hoy nyajwä'xämät. Pøn jaduñ capxaamb mädia'agaamb ja'a hayuuc-haamby ja'a Dioshajtjä wyiinjuøöbiä, ween hajxy jaduñ quiapxy, ween hajxy jaduñ miädia'agy. ⁴⁰Pero tsøgä Diosmädia'agy hajxy hoy yajxón yagjåjtäm tsajtøgooty.

15 ¹⁻²Hermanodøjc, tsøg hajxy jahmiejtstääcäm coo Jesucristo hajxy tøø xñäho'túútäm. Jadúñhøch mijts tøø nyajwiingapxø'øy. Tøø hajxy jaduñ nmäbøjcäm. Coo hajxy tehngajnä nmäbøjcämät hamuumdu'joot, mänit hajxy jim nnøcxämät Dioswiinduum. Pero coo hajxy jaduñ nga'a mäbøjcämät, cab hajxy jim nnä'ägädä nõcxämät.

³Jadúñhøch mijts tøø nyajwiingapxø'øy nebiätýhøchä Dios tøø xñajtscapxøyyä. Jaanç tehñ choobaatp hädaa Diosmädia'agy jaduñ. Tøø Jesucristo hajxy xñäho'túútäm; jaduñnä nbojpa ngädieeyhåjtäm

hajxy tøø xyajnähwäätsäm. Jaduñ jim myiñ cujaay maa Diosmädia'aguiän. ⁴Coo Jesucristo hñajty tøø yho'ogy, mänit hoy ñaaxtägø'øy. Mänit hoy jiuypjøjtägach cumaaxc. Jaduñ jim myiingombä cujaay maa Diosmädia'aguiän. ⁵Mänitä Pedro ja'a Jesucristo hoy wyiinguhixø'øy. Mänitä Jesucristo hoy wyiinguhixø'øyyägumbä ja'a jiamioødhajxy, ja'a nämajmetspäjäya'ayhajxy. ⁶Mänit hoy wyiinguhixø'øyyägombä ja'a miägu'ughajpähajxy nämägooxmägo'xnaxiä. Näje'eyyä hajxy tøø yho'nä, caj ñämayyä. ⁷Mänitä Jacobo ja'a Jesucristo jadähooc wyiinguhixøøguiombä. Mänitä Jesucristo hoy wyiinguhixø'øyyägombä ja'a jiamioødhajxy nägøxiä.

⁸Høøch, høxháamhøchä Jesucristo njaac tehñ yhiixy. Pero cábøch mähdiøjc jaduñ nnä'ägädä tsoobaady. ⁹Cábøch cuhdujt møc nmøødä nej yø'ø Dioscugexypä cuhdujt hajxy møc jiaanç tehñ mioødän. Cábøch mähdiøjc nhawiinmatsä cooch mähdiøjc jaduñ nniñänømøøjtät cooch Dios xquiuguexyhåjpä. Hix, haxøøghøch hijty njäya'ayhaty. Nyajtsaaçhpjøpiøchä jäya'ayhajxy hijty, ja'a Diosmädia'agy hajxy hijty panøcxpä. ¹⁰Pero coochä Dios xjiaanç cuguexyhaty, páadyhøch jaduñ xpiuhbety. Hóyhøch nduñ. Maas máyhøchä Diosmädia'agy tøø nyajwa'xy ja'a nmädia'agyháamhøch que ja'a Dios quiuguexypähajxy tøø yajwa'xy, ja'a hajxy jaac jimä.

Ca'a yhøøch jaduhñ tøø nnä'ä piy ngopcóotyhøch; Dióshøchä wiinmahñdy tøø xmio'oy. Jadúhñhøchä Dios xpiuhbety ja'a miäjaahaam. ¹¹ Pero cab jaduhñ ñejpiä pønjaty mijtsä Diosmädia'agy tøø xyajwiingapxø'oy, pø høøch, pø wiinghäna'c. Tu'ugmädia'agy højtsä Diosmädia'agy nyajwa'xy. Y tøø mijtsä Diosmädia'agy mmäböcy.

¹² Jaduhñ højtsä mädia'agy nyajwa'xy coo Jesucristo jiuypiojtägajch coo hänajty tøø yho'ogy. Mayyä jäya'ayhajxy jaduhñ quia'a mäböcy cooc tyijy ja'a ho'oguiäya'ayhajxy quia'a juypioğa'añ. Cabä tøyhajt hajxy jaduhñ ñä'ä møødä. ¹³ Pø cab häxøpy jaduhñ tiøyyä coo ho'oguiäya'ayhajxy jiuypioğa'añ, cabä Jesucristo cu jiuypiojcy. ¹⁴ Y coo Jesucristo häxøpy tøø quia'a juypioçy, cajxä hädaa mädia'agy häxøpy choobaady neby højts jaduhñ nja yajwa'xy. Y nej mijtsä mädia'agy hajxy mja mäböcy, ni je'e häxøpy quia'a tsoobaady.

¹⁵ Jaduhñ højtsä Diosmädia'agy nyajwa'xy coo Dios ja'a Jesucristo yagjuypiojcy. Pø cab häxøpy jaduhñ tiøyyä, hønñdaacp højts häxøpy ja'a Dioscøxpä. Hiç, pø cab häxøpy jaduhñ tiøyyä coo ho'oguiäya'ayhajxy jiuypioğa'añ, cabä Dios ja'a Jesucristo cu yagjuypiojcy. ¹⁶ Pø cab häxøpy jaduhñ tiøyyä coo ho'oguiäya'ayhajxy jiuypioğa'añ, cabä Jesucristo cu jiuypiojcy.

¹⁷ Y coo Jesucristo cu quia'a juypiojcy, cabä mädia'agy häxøpy choobaady neby hajxy nmäböçäm. Y cabä nbojpä ngädieeyhajxy

häxøpy ñähwäatsäm. ¹⁸ Y tøø ho'oguiäya'ayhajxy häxøpy yhäda'agy møjcu'uhaam, hoy hajxy cu jia mäböç ja'a Jesucristo miädia'agy. ¹⁹ Coo Jesucristo cu quia'a juypiojcy, cab hajxy häxøpy jim nnøcxäänäm tsajpootyp. Tøø hajxy häxøpy nniwyiinhóhñäm hamiñ haxøpy. Hoñäxuu'tsnä jäya'ay hajxy häxøpy xyhíxäm.

²⁰ Pero tøyhajt jaduhñ coo Jesucristo jiuypiojtägajch. Jayøjp je'e jiuypiojtsohñ. Høxhaam hajxy njaac juypioğäänäm. ²¹ Tu'jäya'ay jecy yho'tsohñ hädaa yaabä naaxwiin, ja'a craa Adánhájtäbä. Paadiä Adán jecy yho'cy, coo Dios ja'a miädia'agy quia'a cudiuunä. Y jaanä jaduhñduhmbä, tu'jäya'ay jiuypiojtsohñ; ja'a Jesucristo je'e. ²² Ja'a Adán, højts nhaphajt ndeedyhájtäm je'e, paady hajxy nägøxiä nbaho'ogäänäm. Y jaanä jaduhñduhmbä, nägøxiä hajxy njuypioğäänämbä, pønjatia Jesucristo miädia'agy mäböçäp.

²³ Coo Jesucristo hänajty tøø jiuypiojtägach, mänit jim ñøcxcombä maa Tieediän. Coo jim quioo'ty, mänit tiägøoy hanehmbä. Y coo yaa quiädaactägätsät hädaa yaabä naaxwiin, mänitä ho'oguiäya'ayhajxy jiuypiojtägatsa'añ, ja'a Jesucristo miädia'agy hajxy hänajty tøø miäböçäbä. ²⁴⁻²⁶ Mänitä Jesucristo miäjäda'aga'añ. Mänitä Dios ja'a miädsip ja'a quiuhdujthajxy piøğäänäxä nägøxiä. Mänitä jäya'ayhajxy quia'a ho'ogaannä ni mänaa. Mänitä Jesucristo ja'a Dios cuhdujt yajcø'ødägø'owa'añ neby jäda'ahaty yhane'emiän. Mänitä

naaxwiimbä wyiimbidaannä:
²⁷“Tøø Dios ja'a Jesucristo
 cuhdujt mio'oy coo jäya'ay cøxiä
 yhané'emät.” Nømä Diosmädia'agy
 jecy miänaañ. Mänit jaduñ
 tiøjiajty mänaa Jesucristo
 tiägø'øyän jäya'ayhanehmbä.
 Pero cabä Diosmädia'agy jecy
 miänaañ coo Dios yaghane'emy.
 Hix, jaaya'ayä cuhdujt yejc
 coo Jesucristo jäya'ay cøxiä
 yhané'emät. ²⁸Coo Jesucristo ja'a
 miädsip hänajty tøø quia'a cøxy
 yajmäjäda'agy, mänitä Tieedy
 cuhdujt quiøxy yajcø'ødägø'øwa'añ
 mäduhñtiä cuhdujt hänajty tøø
 mio'oyii. Jaduhñä Jesucristo
 yhane'ema'añii ja'a Tiéediäm.
 Jaduhñä Dios cøxiä yhane'ema'añ.

²⁹Näje'e jäya'ayhajxy ñäbety
 ho'oguiäya'aguiøxpä. Pø cab
 häxøpy jaduñ tiøyyä coo
 ho'oguiäya'ayhajxy jiuypioğa'añ,
 tiiguiøxpä jäya'ayhajxy jaduñ coo
 ñäbety ho'oguiäya'aguiøxpä.

³⁰Nmäbøjpy højts jaduñ coo
 hajxy njuypioğaanäm, paady højts
 nga'a møjpäda'agy, hoy højts nja
 wädity mäjähñdium homiänaajä.

³¹Cooçh nmäna'añ cooçh jaduñ
 nwädity mäjähñdium, je'eçh
 jaduñ nnänøømby cooçhä
 ca'awiindøyhäna'c-hajxy xjia
 wi'i yagho'oga'añ homiänaajä.
 Hermanodøjc, tehñ tiøyhajt jaduñ
 cooçh nxoonäda'agy mijtscøxpä,
 je'eguiøxpä coo Jesucristo
 miädia'agy hajxy mmäbøjcä, ja'a
 hajxy nWiindsønhtëmbä. Hoorä,
 jaanä tøyhajt je'eduhmbä cooçh
 nwädity mäjähñdium homiänaajä.

³²Tøøçhä ca'awiindøyhäna'c-hajxy
 mayhooc xjia wi'i yagho'oga'añ yaa

Efeso ja'a Diosmädia'agyquiøxpä.
 Cooçh häxøpy nga'a mäbøcy coo
 ho'oguiäya'ayhajxy jiuypioğa'añ,
 cábøçhä Diosmädia'agy häxøpy
 nyajwa'xy. Coo häxøpy jaduñ
 quia'a tøyyä coo ho'oguiäya'ayhajxy
 jiuypioğa'añ, cu nmänáanäm hajxy
 jaduñ: “Tsøg hajxy jaac cáayyäm,
 tsøg hajxy jaac húucäm, coo hajxy
 jaboom nho'ogáanäm.”

³³Cab hajxy myajwiinhóønät.
 Cab hajxy mmøødwäidijmúgät
 ja'a häna'c-hajxy mänaambä cooc
 tyjy ho'oguiäya'ayhajxy quia'a
 juypioğa'añ coo hajxy jaduñ
 xyajtu'udägóyyät. ³⁴Najtshixø'øw
 yø'ø mhaxøøgcuhdujt hajxy. Hoy
 hajxy myohy, hoy hajxy mnájxnät.
 Näje'e yø'ø mjamiøødhajxy quia'a
 mäbøcyñä ja'a Diosmädia'agy.
 Hoçhähdiumnä je'eduhñ.

³⁵Näje'e jäya'ayhajxy yajtøwa'añ:
 “Nebiä ho'oguiäya'ayhajxy
 jiuypioğa'añ. Tii ni'x tii copc hajxy
 miøødhadaamby.” ³⁶Hoy piønä
 jaduñ ñajuø'øy. Coo mädyii tøømd
 mní'ibät, hoy trigo, tsipcøxp jaduñ
 piu'udy; pø caj, cab jaduñ ñä'ä
 muxy. ³⁷Y ja'a tøømd jaduñmbä,
 coo mní'ibät, wiing jaduñ jiajnä
 coo miuxy. ³⁸Dios jaduñ tøø
 wyiinmay nebiatiä tøømd jiädät.
 Wiingatiä tøømd quiunuu'xy.

³⁹Jaanä wiingatiä Dios ja'a nni'x
 ja'a ngopc-hajxy xquiunú'xämbä. Y
 wiingatiä animal ñi'x quiopc-hajxy
 quiunú'xäxäbä, møødä
 animalhajxy ja'a tøødstuum
 tsänaabiä, møødä muuxyhajxy,
 møødä hacxhajxy. ⁴⁰Ja'a hajxy
 jim hijpä tsajtøxp, wiing hajxy
 jaduñ quiahxø'øgy. Cab hajxy
 jaduñ quiahxø'øgy neby hajxy

yaa quiähxø'øguiän, ja'a hajxy
yaa hijpä hädaa yaabä naaxwiin.
⁴¹Haagä hajajp ja'a xøø møødä
po'o møødä madsa'a, pero haagä
wiingaty yhajajy. Jaanä jaduñ ja'a
madsa'abä, haagä wiingaty yhajajpä.
⁴²⁻⁴⁴Jaduñ mäwiinäts højtshájtäm,
coo hajxy nho'c coo hajxy
ndägóoyyäm, cabä mäjaa hajxy
nmøødhájtänä. Mänit hajxy nõcxy
nnaaxtägøøyyänä. Ja'a naaxni'x
ja'a naaxcøp jaduñ naaxtägøøby.
Mänit hajxy ngøxy yajxee'xtúütänä
jutjooty. Mänit hajxy njájtänä
hoxiøøghajnä. Pero coo Jesucristo
yaa quiädaactägatsáangombä
hädaa yaabä naaxwiin, mänit
hajxy njujypiøjtägatsáanägombä,
coo hajxy hánajty tøø nho'c coo
hajxy hánajty tøø ndägóoyyäm.
Wiing hajxy jaduñ njadáanänä
coo hajxy jim nnøcxáanänä
Dioswiinduum. Hoy yajxón
hajxy hánajty njadáanäm haagä
mäjaamøød. Y cab hajxy hánajty
mänaa nho'tägatsáanänä. Wiing
hajxy yaa nhíjtäm hädaa yaabä
naaxwiin; wiing hajxy hánajty jim
nhidáanänä Dioswiinduum.
⁴⁵Jaduñä Diosmädia'agy
miäna'añ: "Coo Adán jaduñ
quiunu'xtsohnä, mänitä jugyhajt
miooyyä." Pero coo Jesucristo
jiujypiøjtägajch, paadiä tøyhajt
hajxy nmøødhájtäm coo hajxy
nbajuyypiøjtägatsáanämbä.
⁴⁶Jawyiin hajxy yaa nhíjtäm
hädaa yaabä naaxwiin. Coo
hajxy njujypiøjtägatsáanäm,
mänit hajxy jim nnøcxáanäm
Dioswiinduum. ⁴⁷⁻⁴⁹Ja'a craa
Adánhájtäbä, jecy je'eduhñ
quiunu'xtsohnä naaxoc-haam.

Yaa jaduñ jecy chánaabiä hädaa
yaabä naaxwiin. Jaanä jaduñ
højtshájtämbä, naaxoc hajxy
nni'xhájtäm ngøpc-hájtäm nebiä
Adángän. Hix, je'e højts nhaphajt
ndeedyhájtäm. Haa ja'a Jesucristo,
jim je'eduhñ choññ tsajpootyp.
Coo yaa quiädaactägatsa'añ
hädaa yaabä naaxwiin, mänit
hajxy njujypiøgáanäm, pønjatiä
miädia'agy hánajty tøø miäbøjcä.
Jaduñ hajxy jim nhidáanäm
tsajpootyp nebiä Jesucristo jim
yhitiän.

⁵⁰Hermanodøjc, huuc mädown
hajxy, cab hajxy jim hoy nnøcxämät
Dioswiinduum ni'xcøpcmøød
nebiä nni'xä ngøpc hajxy yaa
nmøødhájtäm hädaa yaabä
naaxwiin, je'eguiøxpä coo hajxy
nho'og coo hajxy ndägoyyáanäm.
Coo hajxy ndägájtsämät nebiä
Jesucristo yhitiän, mänit mábøcy
hajxy jim nnøcxämät tsajpootyp.

⁵¹Huuc mädown hajxy nébiøchä
Dios jaduñ xñajtsapxøoyyä. Coo
Jesucristo quiädaactägatsa'añ,
cahnä hajxy hánajty nägøxiä
nho'c ndägóoyyäm. Näje'e hajxy
hánajty njújquiämnä. Pero
nägøxiä hajxy ndägatsáanäm,
møødä jucypia mäødä ho'ogypia.

⁵²Nägooyyä Diosmoonsä ja'a
corneta hánajty høxhaam jiaac
yajxuuxmaya'añ, ja'a tsajpootypä,
mänitä ho'oguiäya'ayhajxy
jiujypiøjtägatsa'añ. Cab hajxy
hánajty mänaa yho'tägatsaanä.
Mänitiä hajxy nägøxiä
ndägatsáanäm, møød hajxy hánajty
yaabä jucypia, møød hajxy hánajty
tøø yho'oguiäbä. ⁵³Hädaa naaxni'x
hajxy nmøødhájtämbä, nä'ägädä

ho'og nä'ägädä tägoyyáanäm hajxy jaduhñ. Tsipcøxp hädaa nni'x hädaa ngopc-hajxy tiägatsáanäm, mänit hajxy jim nnøcxáanäm Dioswiinduum. Y cab hajxy hánajty nho'tägatsáanänä ni mänaa.

⁵⁴Y coo hajxy jaduhñ njadáanäm, mänitä Diosmädia'agy tiøjiada'añ coo jaduhñ miána'añ: "Cabä jáya'ayhajxy hánajty mänaa yho'og tiägoyyaanä." Coo Jesucristo hajxy tøø xñähho'túutäm, paady hajxy jiiby nga'a häda'agáanäm møjcu'uhaam. ⁵⁵Y coo hajxy jiiby nga'a häda'agáanäm, paady hajxy nga'a tsähgøøyyänä coo hajxy hánajty nho'ogáanäm. ⁵⁶Hoorä, coo Diosmädia'agy hajxy hoy nga'a cudiúunäm, paady hajxy ngädiéhyäm, paady hajxy nhó'cäm.

⁵⁷Tsøgä Dios hajxy nämáayyäm "Dioscujú'uyäp", je'leguixpä coo Jesucristo hajxy xñähho'túutäm, ja'a hajxy nWiindsøñhájtañbä. Coo hajxy xñähho'túutäm, paady hajxy jiiby nga'a häda'agáanäm møjcu'uhaam.

⁵⁸Jaduhñds je'e, hermanodøjc, tsøg hajxy hoy túunäm hamuumdu'joot ja'a Dioscøxpä. Cabä miädia'agy hajxy mänaa nnajtshixøøyyämät, howyiaambatiä jáya'ay hajxy cu xjia nämáayyäm. Nnajúøøyyäm hajxy jaduhñ coo Dios hajxy xpiuhbedáanäm.

16 Mguexaambiä xädø'øn hajxy jim Judeanaaxooty maa hermanodøjc-hajxiän. Jaduhñ hajxy myajmújpät nébiøchä hermanodøjc-hajxy nhanehmy jim Galacianaaxooty. ²Näxøøbaadiä xädø'øn hajxy mbuhgónät mäduhñtiä hajxy hánajty tøø

mguduñ. Hawiing hajxy jaduhñ myaghídät. Mänitøch hajxy xmió'owät cooçh jim nmédsät maa mijtsän neby hajxy jaduhñ mänit møc hadø'øchä nga'a wädijta'agät. ³Mänitä hermano hajxy mwiimbíwät pønjátyhøchä xädø'øn hánajty nyajmäguexaamby jim Jerusalén maa hermanodøjc-hajxiän. Nocymiøød hajxy ñøcxät nebiä hermanohajxy jim ñajuø'owät cooçh hánajty tøø nguexy. ⁴Pø hahixøøby hánajty cooçh jim nnøcxät, mänitøch hajxy xpianøcxät.

⁵Cooçh hánajty jim nnøcxa'añ Corintos, tu'unaxáambøch jim Macedonia. ⁶⁻⁷Coo Dios jaduhñ miáná'anät, jégäbøch jim maa mijtsän. Wéhndøch jim nga'a tsoj wiimbídät høxtä coo tøøchpoj hánajty tøø ñaxy. Jadúhñhøch mijts jejcy nguhíxät. Jadúhñhøch hajxy xpiuhbedät majátyhøch hánajty njaac wädita'añ. ⁸Pero cábøch yaa ndsoj tu'ubøga'añ yaa Efeso. Coo Pentecostéxsøø hánajty tøø yhabaady, mänitøch ndu'ubøga'añ.

⁹Hix, jaanç tehñ miäbøgaambä jáya'ayhajxy yaa, hóyhøch nmädsiphajxy jia nämayyä.

¹⁰Coo Timoteo jim miédsät maa mijtsän, hoy yajxón hajxy myajmédsät. Hix, jaduhñä Diostuung tiuumbä nébiøch nduñän. ¹¹Cab hajxy jaduhñ mbéxät. Mbuhbedäp hajxy jaduhñ nebiaduhñ jootcujc jiaac mínät yaa maaçh høøchän. Nja wi'i jibhijxyp højts yaa møødä hermanodøjc-hajxy.

¹²Y ja'a hermano Apolos, nja mänuu'xtäac-høch je'e coo hermanodøjc cu miøødnøcxy maa

mijtsän, pero cab jäda'a tiehñ
ñöcxa'añ. Cooc ñäbaad'öwáañäxä,
mänítnäc hänäjty ñöcxa'añ.

¹³Mniyajcopc'öwó'jöp hajxy.
Hoyyä Diosmädia'agy hajxy
myajtu'uyó'oyät. Cab hajxy pøn
mdsähg'öwät. Mmee'xtúgáp hajxy.
¹⁴Mniçhoc mnimiee'xó'jöp hajxy
hamuumdu'joot.

¹⁵Hermanodøjc, mnajuøøby hajxy
coo Estéfanas ja'a Diosmädia'agy
hajxy jayøjp miäbøjtsohñ jim
Acayanaaxooty, møødä yhuung
møødä tio'oxy. Jimä hermanodøjc
hajxy piuhbety. ¹⁶Jadúhñhøçhä
njoot chocy coo hajxy mbahix
mbadúnät nebiä Estéfanashajxy
tiuñän. ¹⁷Xoondáacpøch jaduhñ
coo Estéfanashajxy tøø miech
møødä Fortunato møødä Acaico.
Nnäjootmayhájpíoch mijts coo hajxy
mjäguemä. Pero coo Estéfanashajxy
tøø miech, paady cáböch
njootmayhajnä. ¹⁸Tøøçhä njoot
hajxy xyajmøcpøjcä. Jadúhñhøçhä

mjoothajxy nyajmøcpøgáañäbä.
Mnaju'öwäp hajxy jaduhñ coo
Estéfanashajxy hoy tiuñ.

¹⁹Mijtsä hermanodøjc-hajxy
xyajpoo'xp ja'a hajxy jim
tsänaabiä Asianaaxooty.
Xyajpoo'xp mijtsä Aquilahajxypä
ja'a Dioscøxpä, møødä Priscila,
møødä hermanodøjc-hajxy
jim hamugøøbiä

Dioswiingudsähgøøbiä maa
tiøjc-hajxiän. ²⁰Xyajpoo'xp mijtsä
hermanodøjc-hajxy nägøxiä. Hoy
yajxon hajxy mniyajpoo'xó'jät.

²¹Nhamdsoo cø'øháamhøch
hädaa nocy njahmiay, høøçh Pablo.

²²Pønä Jesucristo ca'a tsojp, ja'a
hajxy nWiindsøn'hájtämbä, ween
haxøøgtuum ñöcxy. Wiindsøn, min
hadø'øçhä.

²³Weenä Jesucristo hajxy xmio'oy
ja'a hoyhajt ja'a weenhajt, ja'a hajxy
nWiindsøn'hájtämbä. ²⁴Ndsójpíoch
mijts nägøxiä ja'a Jesucristocøxpä.
Amén.

2 Corintios

1 Høøch Pablo hädaa nocy njahby. Jesucristøch tøø xwyiinguexy coöch ja'a miädia'agy nyajwá'xät. Ja'a Dios jaduhñ mänaamb coöch nyajwá'xät. Ja'a hermano Timoteo, tu'ugwiinmáhñdyhöch je'e xmiøødhity coöch hädaa nocy njaay. Mijts hädaa nocy nyajnäguexaamby pønjaty Diosmädia'agymiäbøjp maa ja'a cajpt xiøhatiän Corinto, møød maa ja'a naax xiøhatiän Acaya wiinduhmyhagajpt. ²Ween mijts ja'a Dios hoyhajt weenhajt xmiø'oy møødä Jesucristo. Dios hajxy nDeedyhájtäm. Jesucristo hajxy nWiindsønähájtäm.

³Tsøgä Dios hajxy tehngajnä wiingudsähgøøyyäm. Tsøc hajxy tehngajnä nämáayyäm Dioscujú'uyäp. Ja'a Jesucristo Tieedy je'e. Jaançh tehñ yhojioot ja'a Dios miøød. Xjiootcapxmøcpøjcäm hajxy homiänaajä, ⁴hoy ñebiaty hajxy cu nja jajt cu nja habéjtäm. Paady hajxy jaduhñ xjiootcapxmøcpøjcäm, jaduhñ hajxy hoy njootcapxmøcpøjtägájtšämd pønjaty häyohmbaatp. ⁵Hix, nebiä Jesucristo chaaçhpøjquiän, jaanä jaduhñ hajxy ndsaaçhpøjcämbä.

Y coo ja'a Jesucristo hajxy nmøødhíjtäm tu'ugmädia'agy, paadiä Dios hajxy xjiaançh tehñ jiootcapxmøcpøjcäm. ⁶Coo højts ndsaaçhpøcy, mänit højts Dios xjiootcapxmøcpøcy. Y jaduhñ mijts njootcapxmøcpøjtägajtpä. Y jaduhñ mijts Diosmädia'agy nyajwiingapxø'øwät neby hajxy jaduhñ mnähwá'adsät. Coo mijts mdsaaçhpøjpät neby højts ndsaaçhpøquiän, mänit mijts njootcapxmøcpøgät neby hajxy jaduhñ hoy mmee'xtügät. ⁷Nnajuøøby højts coo mijts mmee'xtuga'añ, coo mijts Dios xjiootcapxmøcpøga'añ, hoy miäduhñtiä mijts cu mja tsaachpøc neby højts ndsaaçhpøquiän. Nmøød højts ja'a tøyhajt jaduhñ.

⁸Mägu'ughajpädøjc, chojpy højts njoot coo hajxy mnajuø'øwät nebiaty højts jim ndsaaçhpøjcy maa ja'a naax jaduhñ xiøhatiän Asia. Hanaxiä højts jim njajty nhabejty. Jaançh tehñ jiootmayhajt højts hänajty. Høxtä mänaañ højts jaduhñ coo ndijy højts hänajty jim nho'oga'añ, ⁹coo ndijy häna'c hänajty tøø quiojyquiapxytiuñ coo højts hänajty xyagho'oga'añ. Paady højts jaduhñ njajty nhabejty, jaduhñ

højts nnajuó'owät coo jagooyä
 Dios xñáwá'anät, cab højts hamdsoo
 hoy nniñáwa'anóøjät. Haa ca'a,
 Dios jaduñ yagujypiojtägajtsp ja'a
 tøø yho'oguiäbä. ¹⁰Xñáwaan højts
 ja'a Dios coo højts häna'c hánajty
 jim xjia yagho'oga'añ. Homiänaajä
 højts jaduñ xñáwa'ana'añ. Nmøød
 højts ja'a tøyhajt jaduñ. ¹¹Naxy
 mijts ja'a Dios mdehm pia'yá'axät
 maa højtsçxpän. Jaduñ højts
 mijts hoy xpiuhbédat. Coo
 jäya'ayhajxy nämay Dyiospa'yá'axät
 maa højtsçxpän, mänit højts ja'a
 Dios xñáwa'ana'añ, mänitä jäya'ay
 ja'a Dios hajxy nämay ñäma'awa'añ
 “Dioscujú'uyäp”, je'eguiøxpä coo
 højts Dios hoyhajt weenhajt xmio'oy.

¹²Jootcujc højts nnijäwø'oyii coo
 højts hoy tøø njäya'ayhaty maa
 mijtsän hädaa yaabä naaxwiin.
 Dios højts jaduñ xpiädaac coo
 højts hoy njäya'ayhädät. Jaaya'ay
 højts xyhijxp coo højts hoy
 njaanč jäya'ayhaty. Xpiuhbejp
 højts jaduñ neby højts hoy
 njaac jäya'ayhädät. Cab højts
 hamdsoo hoy nhojiäya'ayhädät.
¹³⁻¹⁴Hix, howyiinjuøñä mijts tøø
 nnäjaayø'oy, caj chipjatiä. Caj
 mijts mänaa tøø nwiinhøøñ. Tøø
 højts nmädia'agy hajxy siémpräm
 xwyiinjuøyyä. Chojpy højts njoot
 coo hajxy ca'xy mwiinjuó'owät,
 jaduñ hajxy mxoondá'agät maa
 højtsçxpän coo ja'a Jesucristo
 hánajty quiädaactägatsa'añ. Je'
 hajxy nWiindsøn'hájtäm. Mänit
 højts nxoonda'agaambä maa
 mijtsçxpän.

¹⁵Nmøødhøch tøyhajt jaduñ
 coo højts nmädia'agy hajxy ca'xy
 xwyiinjuó'owaanä, páadyhøch hijty

tøø nja wiinmay coo mijts jadähooc
 nøcxy cu nguhijxy. Jaduñ
 hajxy jadähooc cu nxoondäacäm
 nägøxiä. ¹⁶Hix, nøcxáambøch
 hijty jim maa ja'a naax jaduñ
 xiøhatiän Macedonia, y jim mijts
 hijty ndu'uguhixa'añ Corinto.
 Y cooç hijty nwiimbidaannä
 Macedonia, mänit mijts hijty
 jadähooc ndu'uguhixáangombä
 cooç hijty jim nnøcxa'añ maa ja'a
 naax jaduñ xiøhatiän Judea. Jim
 mijts jaduñ cu xpiuhbejty. ¹⁷Pero
 cabä Dios jaduñ miänaañ cooç
 jim cu nminøoyy maa mijtsän. Ca'a
 yhamdsoojoøtøch jim tøø nga'a
 naxø'oy. Cab jaduñ yhooyä coo
 hajxy mmäná'anät cóogøch tyijy
 jaduñ ndu'ugcapxy nmetscapxy,
 cooç jim tøø nga'a naxø'oy. Ja'a
 häna'c-hajxy ca'a mäbøjpä, je'eds
 hajxy tu'ugcapxp metscapxp, ca'a
 yhøøçhä. ¹⁸Dios højts xyhijxp coo
 højts nga'a høhnda'agy. Cab højts
 mijts mänaa tøø nmøødtu'ugcapxy
 tøø nmøødmetscapxy. ¹⁹Hix, ja'a
 Jesucristo, ja'a Dioshuung, cab
 je'eduñ mänaa tiu'ugcapxy
 mietscapxy. Homiänaajä
 tiømiädia'agy. Y coo højts
 mijts nyajwiingapxøoyy ja'a
 Jesucristocøxpä, paady højts nga'a
 tu'ugcapxy nga'a metscapxy, ni
 høøçh Pablo, ni hermano Silvano,
 ni hermano Timoteo. ²⁰Waambatiä
 Dios jecy miänaañ coo hánajty
 yajtøjiada'añ, øjx jaduñ tiøjiaty
 ja'a Jesucristocøxpä. Y coo højts
 ja'a mädia'agy nmäbøjcäm ja'a
 Jesucristocøxpä, jaduñä Dios
 møj jaanč nbädaacäm. ²¹Pero
 ja'a Dios hajxy xpiuhbéjtäm
 nebiä Jesucristo hajxy jaduñ

nmøodhíjtämd tu'ugmädia'agy tehngajnä, møød højts møød mijts nägøxiä. Jaanä Dios højts jaduñ xwiinguejxpä coo højts ja'a miädia'agy nyajwá'xät. ²²Xyaghijp højts ja'a Dios quiø'øjooty ja'a yhEspírituhaam. Xyhuunghajp højts jaduñ. Xmióoyyäm ja'a tøyhajt hajxy jaduñ coo hajxy homiänaajä xcwieendähadaañäm.

²³Dios ja'a tøyhajt møød cooçh nga'a hòhnda'agy. Páadyhöch jim tøø nga'a naxø'øy Corinto maa mijtsän, cábøch njoot hánajty chocy coo mijts nhójtät. ²⁴Pero cab højts mijts nhane'ema'añ nebiatiä Diosmädia'agy hajxy mmäbögät. Hix, nnajuøøby højts jaduñ coo hajxy hamuumdu'joot mmäböcy. Nja wi'i piuhbedaamby højts mijts jaduñ nebiä Diosmädia'agy hajxy maas hoy mbanócxät. Jaduñ hajxy maas jootcujc mhídät.

2 Mänájøch jim nhuug hoobiän maa mijtsän, mänítøch mijts nhojy je'eguiøxpä coo hajxy hánajty hoy mga'a tuñ. Jootmayhájtäbøch jim nwiimbijty. Hoorä, tøøch nmädoyhájcombä coo hajxy hoy mga'a túuñgombä. Tøøch nwiinmahñdyhaty cooçh jim nga'a tsoj nøcxtägatsa'añ maa mijtsän, coo mijts jim nnä'a hojtägätsät. ²Hix, coo mijts nhojtägätsät, mänítøch jadähooc njootmayhada'añ. Pero chójpiøch njoot jaduñ coo hajxy hoy mdúnät. Jadúhñhöch jootcujc nhídät. ³⁻⁴Mänájøch mijts jayøbajt nhuuc näjaayøøbiän, mänit mijts nmägapxy nhanehmy coo ja'a mhaxøøgcuhdujt hajxy mnajtshixø'øwät. Jaançh tehñ

jootmayhájpøch hánajty coo ja'a Diosmädia'agy hajxy hánajty hoy mga'a panøcxy. Høxtä jóøyyhöch jaduñ. Paady mijts jaduñ nmägapxy nhane'emy nocyhaam, njaançh tehñ chojpy mijts jaduñ. Cábøch njoot chocy coo hajxy mjootmayhädät. Coo ja'a mhaxøøgcuhdujt hajxy mnajtshixø'øwät nébiøch cham nmägapxy nhane'emiän nocyhaam, mänítøch jim jootcujc nnøcxa'añ maa mijtsän. Coo mijts ja'a Diosmädia'agy hoy cu mbanøcxy, cábøch jaduñ mänaa cu njootmayhajty. Nnajuøøbiøch jaduñ coo ja'a Diosmädia'agy hajxy hoy mja wi'i pianøcxa'añ. Y coo hajxy jaduñ hoy mbanócxät, jaduñ hajxy nägøxiä jootcujc nhíjtämd, møød høøçh møød mijts.

⁵Ja'a mijts mmägu'ughajpä ja'a tøø quiädiéeyäbä, nägøxiä hajxy jaduñ tøø xñägädieeyøyyäm, ca'a yhöøçhähajtiä nidiuhm. Pero cábøch nmäna'añ coo hanaxiä tøø quiädieey. Hix, cábøch hanaxiä nyajtsähdiuna'añ. ⁶Hoorä, tøø ja'a mmägu'ughajpähajxy chaachpøcy. Tu'ugwiinmahñdy hajxy mnibiaatä, paadiä mmägu'ughajpä hajxy myajcumädooyy. Hoorä, tøø jaduñ chaachpøjnä. ⁷Hahixøøby hajxy jaduñ mmämée'xnät. Jaduñ hoy jootcugøøguiumbät, y cab jaduñ hanaxiä jootmayhädät. ⁸Coo hajxy jaduñ mmämée'xnät, myajcøxø'øgaamby hajxy jaduñ coo hajxy mjaançh tehñ chocy. ⁹Paady mijts jayøbajt nnäjaayøøyy, nhixmajts mijts jaduñ pø tøyhájtøch nmädia'agy hajxy hánajty xmiäbögaañä

hamuumdu'joot. ¹⁰Pønjaty mijts mmäme'e'xyp, jaanä jadúhñhøch nmäme'e'xaambä. Haa ca'a, pø tøøch häna'c nmäme'e'xy, páadyhøch tøø nmäme'e'xy, jaduhñ mijts jootcuje mhídät. Jesucristøch jaduhñ xyhijxp cooçh nga'a høhnda'agy. ¹¹Coo hajxy jaduhñ nnimiämée'xämd, cabä møjcu'ugong miäjädä'agät maa højtsøxphájtäm. Nnajuøøyyäm hajxy coo ja'a møjcu'ugong jiaançh tehñ miäwiinhøøñ.

¹²Cooçh jim nmejch maa ja'a cajpt jaduhñ xiøhatiän Troas Diosmädia'agy-yajwa'xpä ja'a Jesucristocøxpä, nbáathøch hawa'adspä cooçh jim ndägø'owät Diosmädia'agy-yajwa'xpä. ¹³Pero cooçhä hermano Tito jim nga'a paaty maa ja'a hermanodøjc-hajxiän, mänítøch ndägøøyy jootmayhajpä. Mänítøch nwiimbijnä. Mänítøch nnøcxy maa ja'a naax jaduhñ xiøhatiän Macedonia.

¹⁴Dioscujú'uyäp ja'a Dios coo højts xpiuhbety, coo højts xyaghity tu'ugmädia'agy møødä Jesucristo. Jaduhñ højts ja'a Dios xpiuhbety coo højts ja'a møjcu'ugong nga'a yajmäjädä'agy majaty højts ja'a Diosmädia'agy nyajwa'xy ja'a Jesucristocøxpä. Homiädoonä ja'a jäya'ayhajxy miädoxy nebiaty højts nyajwiingapxø'øy. ¹⁵⁻¹⁶Xquiumaaby højts ja'a Dios coo højts ja'a miädia'agy nyajwa'xä ja'a Jesucristocøxpä. Pønjaty hoy mädoob, pønjaty mæbøjp, je'eds nähwa'adsaamb. Jugyhadaamb hajxy je'eduhñ cøjxta'axiøø nebiä Dios jiugyhatiän. Pero pønjaty hoy

ca'a mädoob, pønjaty ca'a mæbøjp, cab hajxy jaduhñ nähwa'adsa'añ. Je'eds hajxy haxøøgtuum nøcxy miähmø'owa'añ. Caj pøn yhamdsoo jada'añ Diosmädia'agy-yajwa'x.

¹⁷Højts mæbøcypiä njajpy je'eguiøxpä coo højts ja'a Dios xwyiinguejxy. Hamuumdu'joot højts nduñ je'eguiøxpä coo højts ja'a Jesucristo tu'ugmädia'agy nmøødhity. Xyhijxp højts ja'a Dios jaduhñ coo højts hoy nduñ. Jii häna'c näje'e, cab hajxy hoy tiuñ. Ja'a Diosmädia'agy tyijy hajxy yajwa'xyp. Pero yhamdsoo mädia'agy hajxy wyi'i miädiaacyy, je'eguiøxpä coo hajxy jia wi'i quiänaarhada'añ. Højts, cab højts jaduhñ nbahixy.

3 Cab hajxy mmäná'anät coo tyijy højts nniguiumayii nebiä häna'c ñiguiumayijän, ja'a yhamdsoo mädia'agy hajxy miäwädiipjä. Coo hajxy hänajty maa ñøcxa'añ, mänitä hermanodøjc hajxy ñäma'ay coo nocy hajxy jaduhñ ween yhädiuünäxä cooc tyijy ja'a Diosmädia'agy hajxy hoy tøø yajwa'xy. Pero højts, cab højts jaduhmbä nocy nyajmaajiaty, ni coo mijts nyaghíxät, ni coo mijts xmió'owät. ²Hoy piønä ñajuø'øy coo højts ja'a Diosmädia'agy hoy nyajwa'xy. Haa ca'a, tøø ja'a Diosmädia'agy hajxy mmæbøcy mänaa højts jim hoy nyajnähiø'øyän. Hiç, njaançh tehñ chojpy højts mijts hamuumdu'joot. Homiänaajä højts mijts njahmiejtsta'agy. ³Coo ja'a Diosmädia'agy hajxy tøø mmæbøcy, jaduhñä cu'ug ja'a tøyhajt hajxy miøødä coo højts ja'a Jesucristo

jaduhñ xwyiinguejxy maa mijtscøxpän, coo hõjts mijts ja'a Diosmädia'agy nyajwiingapxø'owät. Jujcy ja'a Dios. YhEspirituhaam ja'a Dios hajxy xyajmäbøjcy. Jaduhñ miäbaady coo ja'a Jesucristo tøø yuugjaay maa ja'a jäya'ay quiorazoncøxpahjxiän. Cab jaduhñ tøø yuugjaay tsaagøxp tintahaam nebiä Dios jecy yuugjahyyän tsaagøxp maa ja'a tun xihatiän Sinái.

⁴Paady hõjts jaduhñ nmäna'añ, nmøød hõjts ja'a tøyhajt coo hõjts ja'a Jesucristo xwyiinguejxy. ⁵Pero cab hõjts tii njada'añ hamdsoo. Dios hõjts jaduhñ xpiuhbejp coo hõjts njádät. ⁶Jaaya'ay hõjts jaduhñ tøø xyajnähdijy coo hõjts ja'a hawiinjemybiä mädia'agy nyajwá'xät ja'a Jesucristocøxpä. Hädaa hawiinjemybiä mädia'agy, yhEspirituhaam hõjts ja'a Dios tøø xmio'oy. Cabä Dios tøø jiahñä tsaagøxp nebiä jecyquihdujt jecy jiahyyän tsaagøxp. Yø'ø jecyquihdujt, cab jaduhñ pøn hoy quiudiuna'añ, paady hijty pøn quia'a pädsøma'añ haxøøgtuum. Pero coo ja'a hawiinjemyädia'agy hajxy mmäbøgät, mänitä Dios hajxy xyagjugyhádät cøjxta'axiøø yhEspirituhaam neby je'e jjugyhatiän.

⁷Hoorä, coo ja'a Dios ja'a jecyquihdujt jiahy tsaagøxp, hõxtä haamb hõxtä tsämaamb ja'a Moisés ja'a wyiin jjøjp hänajty, hõxtä cabä israelita ja'a Moisés ja'a wyiin jjøjp hajxy hänajty hoy yhebaanä. Pero paquiä ja'a Moisés ja'a wyiin jjøjp jaduhñ ñä'ä haañ ñä'ä tsämaamy. Paadiä

Moisés ja'a wyiin jjøjp hänajty yhañ chämamy, tøø ja'a Moisés hänajty yhoy jim Dioswiinduum maa ja'a Dios hänajty tøø quiäda'aguiän jim tungøxp. Y møcmäjaa ja'a Dios jiaanç tehñ miøød. Hoorä, yø'ø jecyquihdujt, cab jaduhñ pøn hoy quiudiuna'añ, paady hijty pøn quia'a pädsøma'añ haxøøgtuum. ⁸⁻⁹Hoorä, coo ja'a Dios ja'a Moisés ja'a wyiin jjøjp jecy yaghaanä yajtsämaamä, jaduhñä Dios yajcähxø'cy coo møcmäjaa miøødä. Y coo ja'a Dios ja'a hawiinjemyädia'agy tøø yejnä coo hajxy tøø xpiädäacäm hawa'adstuum, ja'a yhEspirituhaam ja'a Dios ja'a hawiinjemyädia'agy tøø yecy. Jaduhñä Dios maas hoy tøø yajcähxø'øgy coo møcmäjaa miøødä. Hix, hoy-yagjuøøñä ja'a Moisés ja'a wyiin jjøjp jecy yhaañ chämaamy. Maas hanaxiä ja'a hawiinjemyädia'agy yhoy-yagjuøøñä, ja'a hõjts nyajwa'xypä. ¹⁰⁻¹¹Jaduhñ quiähxø'øgy coo ja'a jecyquihdujt jaduhñ quia'a jaty tsoobaatnä. Ja'a hawiinjemyädia'agy ja'a Jesucristocøxpä, je'eds jaduhñ tsoobaatnäp. Y cab jaduhñ mänaa tiägoyya'añ.

¹²Tøyhajt jaduhñ, paady hõjts nga'a tsähdiuñ mänaa hõjts ja'a Diosmädia'agy nyajwa'xiän, ni nga'a mädsähdiuñii hõjts jaduhñ. ¹³Hix, haamb tsämaambä Moisés ja'a wyiin jjøjp hänajty coo ja'a Dios ja'a Moisés ja'a miädia'agy miooyy. Mänitä Moisés ja'a cu'ug ja'a Diosmädia'agy yajwiingapxøøyy. Coo ja'a Moisés miädiaacpædøoyy, mänitä wit ñiyajwiinguwidsooyyä,

je'eguiøxpä coo ja'a wyiin jiøjp hänäjty jejcy quia'a hanaannä quia'a tsämamaannä. Paady jaduhñ miädsähdiuunnä. Hiḡ, yhixaambiä israelita ja'a Moisés hajxy hänäjty coo ja'a Moisés ja'a wyiin jiøjp hänäjty quia'a haannä quia'a tsämaamnä. ¹⁴⁻¹⁶ Pero ja'a israelitahajxy, jaančh tehñ quiuhxex hajxy hänäjty, cab hajxy hänäjty miädia'agywyiinjuø'øy. Høxtä chamnäbaadyñä hajxy jaduhñ quiuhxexä. Coo ja'a jecyquiuhdujt hajxy mänaa miädoy, cab hajxy jaduhñ wyiinjuø'øy, ja'a Moisés jecy miädiäacäbä. Mänit hajxy jaduhñ wyiinjuø'øwät coo hajxy hänäjty tøø miäbøcy hamuumdu'joot ja'a Jesucristocøxpä. Je'e hajxy nWiindsøn'hájtäm. ¹⁷ Hoorä, tu'ugjuøhñdy ja'a Jesucristo yhity møødä Tieediä yhEspíritu. Y coo hajxy nmäbøjcäm ja'a Jesucristocøxpä, jaduhñä cuhdujt hajxy xmióoyyäm coo Dios hajxy nba'yáaxämd. ¹⁸ Hoorä, pønjaty jaduhñ hamuumdu'joot mäsøjp ja'a Jesucristocøxpä, tøø hajxy ngøxy wiinjuø'oyyäm coo ja'a Jesucristo miøjjä jiaančh. Tehngajnä ja'a Jesucristo hajxy xyaghaguipxyjatiøoyyäm neby je'e yhitiän. Hiḡ, tu'ugjuøhñdy je'e yhity møødä Tieediä yhEspíritu.

4 Hojioot ja'a Dios jiaančh tehñ miøød, paady højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Paady højts nga'a jootmayhaty ni mänaa. ² Nyejpy højts ja'a tøyhajt coo højts ja'a Diosmädia'agy nyajwa'xy. Cab højts jaduhñ mänaa nhøhnda'agy.

Ñajuøøbiä cu'ughajxy jaduhñ coo højts mänaa nga'a nhøhnda'agy. Xyhijxp højts ja'a Dios jaduhñ. Ja'a häna'c-hajxy høhndaacpä, cabä Diosmädia'agy hajxy ca'xy yajwa'xy. Yhamdsoo mädia'agy hajxy jaduhñ yajmämädiaagøøby magämaa. Hočhähdiuunnä hajxy jaduhñ jiatcø'øy. Pero højts, ja'a tøyhajt højts nmädiaacy. ³ Cabä jäya'ay ja'a mädia'agy hajxy nägøxiä wyiinjuø'øy, ja'a højts jaduhñ nyajwa'xypä ja'a Jesucristocøxpä. Paady hajxy jaduhñ quia'a wiinjuø'øy coo hajxy haxøøgtuum wiädity. ⁴ Paadiä Diosmädia'agy hajxy quia'a mäbøga'añ, tøø ja'a wyiinmahñdyhajxy piädäacäxä haxøøgtuum ja'a møjcu'ugóngäm, ja'a yaa hanehmbä hädaa yaabä naaxwiin. Coo ja'a wyiinmahñdyhajxy tøø piädäacäxä haxøøgtuum, paadiä Diosmädia'agy hajxy hoy quia'a wiinjuø'owa'añ maa jaduhñ myiñän cujaay coo ja'a Jesucristo møcmäjaa miøødä. Tu'ugmädia'agy ja'a Jesucristo yhity møødä Tieedy. ⁵ Coo højts ja'a Diosmädia'agy nyajwa'xy, ja'a Jesucristo højts nmädiaacy coo hajxy nägøxiä nWiindsøn'hájtäm. Cab højts jaduhñ nyajcumaya'añ. Jaduhñ højts njoot chocy coo højts mijts nbuhbédät, je'eguiøxpä coo højts ja'a Jesucristo nWiindsønhaty. ⁶ Dios jecy mänaan coo jøøn jiájät hagoostuum. Cahnä ja'a naaxwiimbä hänäjty yhoyø'øy. Jaaya'ay højts ja'a miädia'agy jaduhñ tøø xyajwiinjuø'øy coo je'e møcmäjaa miøødä. Coo ja'a Jesucristo hajxy tøø xyajnahwaats tøø xyajcuhwáatsäm,

jaduhñ hajxy nyajnajuoøyyäm coo ja'a Dios mœcmäjaa miøødä.

⁷Jaaya'ay højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Jaanč tehñ choobaatp ja'a miädia'agy jaduhñ. Højts, cab højts mœcmäjaa nhamdsoo møødä. Dios højts jaduhñ xpiuhbejp coo højts ja'a miädia'agy nyajwá'xät. Coo højts jaduhñ xpiuhbety, jaduhñ yajnajuoøy coo ja'a Dios mœcmäjaa jiaanč tehñ miøødä. ⁸Tøø højts häyohn may nmänaxy nyajnaxy, pero cab jaduhñ tiehñ yhanaxiä. Naxy højts nga'a najuoøy neby højts njatcól'owät, pero cab højts hanaxiä njootmayhaty.

⁹Tøø højts häna'c mayhooc xjia wi'i chaačhtiuna'añ, pero cab højts ja'a Dios mänaa xñajtshixø'oy. Hoy højts häna'c mayhooc tøø xjia häyoowhixy, cab højts nmøjpäda'agy. Hix, homiänaajä højts ja'a Dios jaduhñ xcwieendähaty. ¹⁰⁻¹¹Nebiä Jesucristo hijty mäjähñdiuum wiäditiän jabom-jabom, jaanä jaduhñ højts mäjähñdiuum nwädijpä homiänaajä. Ja'a Jesucristocøxpä højts häna'c xjia wi'i yagho'oga'añ. Pero cab højts Jesucristo xñä'ägä nähducy. Hix, coo ja'a Jesucristo yho'cy, mänit jiuypiojtägajch. Mänit jim ñöcxy maa ja'a Tieediä wyiinduumän. Jimä mœcmäjaa jada'ahaty miøødänä. Paady højts jaduhñ homiänaajä xcwieendähaty. ¹²Paady højts mäjähñdiuum nwädity coo højts Diosmädia'agy nyajwa'xy. Coo ja'a Jesucristo jiuqyhaty, paady hajxy xcwieendähjätäm homiänaajä.

¹³Jaduhñ jim myiñ cujaay maa ja'a Diosmädia'aguian coo tu'jäya'ay jecy miänaañ: “Nmäbøjpiøch

ja'a Diosmädia'agy, päadyhöch ja'a Dios ngapxpaady”; jaanä jaduhñ højts ja'a Diosmädia'agy nmäbøjpä, paady højts ja'a Dios ngapxpaatpä. ¹⁴Coo ja'a Dios ja'a Jesucristo yagjuypiojtägajch, ja'a nWiindsønähjätäm, jaduhñ højts ja'a tøyhajt nmøødä coo højts xyagjuypiojtägatsaambä näguipxy møød mijts. Paadiä Dios hajxy xyagjuypiojtägatsaanäm coo hajxy nhjätäm tu'ugmädia'agy møødä Jesucristo. Mänitä Dios hajxy nägøxiä xyajnøcxäänäm jim maa ja'a wyiinduumän näguipxy møød mijts. ¹⁵Paady højts häyohn nmänaxy nyajnaxy, chojpy højts njoot jaduhñ coo mijts ja'a Diosmädia'agy hamuumdu'joot mmäbøgät cooc ja'a Jesucristo hajxy tøø xñähho'túutäm. Jaanä jaduhñ højts njoot chojpä coo ja'a jäya'ayhajxy maas nämay jiaac mäbøgät, weenä Dios hajxy nämay ñäma'ay: “Dioscujú'uyäp”, je'leguioxpä coo ja'a Dios hojioot jiaanč tehñ miøødä. Y weenä Dios hajxy nämay ñämaabiä coo mœcmäjaa jiaanč tehñ miøødä.

¹⁶Nnajuøøby højts jaduhñ coo ja'a Dios hajxy xyagjuypiojgäänäm, paady højts nga'a jootmayhaty. Tehngajnä højts ja'a Dios mœcmäjaa xjiaac mo'oy maa højts njuøhñdycøxpän, hoy højts nni'x ngopc tehngajnä jia mäjay. ¹⁷Neby højts häyohn yaa nmänaxy nyajnaxiän, cab højts jecy nmänax nyajnaxa'añ. Y cab højts jaduhñ njaty tsaächpøcy. Coo højts jaduhñ tøø njaty tøø nhabety, paadiä Dios ja'a mayhajt møj may tiuna'añ maa højtsøxpän cøjxta'axiøø.

¹⁸ Pero cab hõjts jaduñ nmõjpäda'agy coo hõjts jaduñ yaa njaty nhabety hädaa yaabä naaxwiin. Hix, paquiä hõjts nnä'ä jaty nnä'ä habety. Jim hõjts njoot nbäda'agy maa ja'a Dios ja'a wyiinduumän. Cõjxta'axiøø hajxy jim xyaghidäänäm.

5 Tsipcõxp hajxy nho'ogäänäm ndägoyyäänäm. Pero nmøødhjätäm ja'a tõyhajt hajxy jaduñ coo ja'a Dios hajxy tøø xyajnähdjijäm cooc hajxy jim xyaghidäänäm maa ja'a wyiinduumän cõjxta'axiøø. Diósäts hajxy jim xyaghidäänäm, ca'a wyiingjäya'ayä hajxy jim xyaghidäänäm. ² Coo hajxy yaa ndsaaçhpõjcäm hädaa yaabä naaxwiin, paadiä njoot hajxy jaduñ tøø nbädäacäm coo hajxy jim nnõcxäänäm tsajpootyp. ³ Coo hajxy jim ngõo'täm, jaançh tehñ jiootcuje hajxy jim nniijäwø'owäänäm jim Dioswiinduum. ⁴ Mäduhñtiä hajxy yaa njaac hjätäm hädaa yaabä naaxwiin, cab hajxy jootcuje nhjätäm je'eguiõxpä coo hajxy yaa ndsaaçhpõjcäm. Pero cab hajxy ndsõjcäm coo hajxy paquiä nho'c ndägõoyyäm. Je'e hajxy ndsõjcäm coo njugyhjätäm cõjxta'axiøø nebiä Dios jjugyhatiän. ⁵ Ja'a Diósäts hajxy jaduñ xyajnähdjijäm coo hajxy jim xyajnõcxäänäm maa ja'a wyiinduumän. Tøø ja'a yhEspiritu hajxy jaduñ xyajnäguéjäm coo hajxy jaduñ xmiøødhjätäm tu'ugmucy. Jaduñä tõyhajt hajxy nmøødhjätäm coo ja'a Dios hajxy tõyhajt xjiaançh yagjugyhadaäänäm cõjxta'axiøø neby je'e jjugyhatiän.

⁶ Paady hõjts jootcuje nhity jabom-jabom. Mäduhñtiä hõjts yaa njaac jugyhaty hädaa yaabä naaxwiin, cab hõjts jim ndsoj nõcxa'añ maa ja'a Jesucristo wyiinduumän. Tõyhajt jaduñ. ⁷ Hoy hõjts ja'a Jesucristo yaa nga'a ja hixy hajujcy, nmäbõjcäp hõjts ja'a miädia'agy jaduñ. ⁸ Cab hõjts nnä'ägä jootmayhaty ni weeñtiä. Choippy hõjts ja'a njoot coo hõjts nhó'ogät, coo hõjts jim nnõcxät maa ja'a Jesucristo wyiinduumän. ⁹ Cab hõjts nmõjpäda'agy pø ho'ogaamb hõjts, ó pø cab hõjts ndsoj ho'oga'añ. Pero choippy hõjts njoot jaduñ coo hõjts ja'a Jesucristo miädia'agy hoy ngudiüünät. Jaduñ hõjts ja'a Jesucristo xquiumáyät. ¹⁰ Hix, nägõxiä ja'a Jesucristo hajxy nõcxy nwiindána'awäänäm. Mänit jaaya'ay ñägäpaxa'añ pøn hänäjty hoy tøø quiudiuñ, pøn hänäjty hoy tøø quia'a cudiuñ. Pønjaty hänäjty hoy tøø quiudiuñ, je'eds ja'a hoyhajt ja'a weenhajt hajxy paadaamb. Pero pønjaty hänäjty hoy tøø quia'a cudiuñ, quiumädowaamby hajxy je'e.

¹¹ Nwiingudsähgøøby hõjts ja'a Jesucristo. Jia wi'i choippy hõjts ja'a njoot jaduñ coo hõjts xquiumáyät. Nja wi'i yajmäggaamby hõjts ja'a cu'ughajxy coo hõjts ja'a Jesucristo tõyhajt tøø xwyiinguexy. Ñajuøøbiä Dios coo hõjts ja'a miädia'agy hamuumdu'joot ngudiüünä. Chõjpiøçhä njoot jaduñ coo mijts mnajuøøbiät coo hõjts ja'a Diosmiädia'agy hamuumdu'joot ngudiuñ. ¹² Cab hõjts nyajcumaya'añ, hoy hõjts jaduñ nja niänømyii

coo hõjts ja'a Jesucristo tøø xwyiinguexy. Paady hõjts mijts jaduhñ nhawáañäm, jaduhñ mijts mnajuó'owät neby hõjts mijts xpiuhgapxó'owät coo hõjts häna'c hänäjty jaduhñ tøø xñähwaambety. Ja'a häna'c-hajxy jaduhmbä, je'e hajxy yajcopcøøby pø hoy yhamdsoo cuhdujt hajxy quiudiuñ. Cab hajxy ñä'ägädä wiinjuø'øy coo ja'a wyiimahñdyhajxy quia'a nä'ägädä hoyyá. ¹³Jaduhñ hõjts häna'c xñänømy cooc tyijy hõjts nguhmäñø'øy coo hõjts ja'a Dios ndsocy. Diósäts hõjts xñajuøøby coo hõjts nga'a cuhhiñ coo hõjts nga'a cuhmäñø'øy. Hix, chojpy hõjts ja'a ñjoot jaduhñ coo mijts ja'a Dios ja'a hoyhajt ja'a weenhajt xmió'owät.

¹⁴Coo hõjts ja'a Jesucristo xjiaanč tehñ chójcäm, paady hõjts ja'a miädia'agy ngudiúunäm hamuumdu'joot. Nmøødhájtäm ja'a tøyhajt hajxy jaduhñ coo jaaya'ay hajxy hoy xñähho'túutäm nägøxiä. Xyajñähwáatsäm ja'a nbojpä ngädieyhajtämhajxy. ¹⁵Coo ja'a Jesucristo hajxy hoy xñähho'túutäm, paadiä nhamdsoo cuhdujt hajxy nga'a yajtúunänä. Tsøgä miädia'agy hajxy jaduhñ cudiúunäm mäduhñtiä hajxy yaa njaac jugyhájtäm. Y coo ja'a Jesucristo jiuypiojtägajch, jaduhñä tøyhajt hajxy nmøødhájtäm coo hajxy xyagjugyhadaañäm çøjxta'axiøø nebiä Tieedy jiuigyhatiän.

¹⁶Cab hõjts pøn nyajcopcøøñä pø mäyøøhajxy, pø häyoobhajxy. Ja'a Jesucristo, jaduhñ hõjts hijty nhixy nebiä pajäya'ayän. Pero cab hõjts jaduhñ nhixnä nebiä pajäya'ayän.

¹⁷Hoorä, pønjaty ja'a Jesucristo

tu'ugjoot tu'ugjuøhñdy møødhájnäp, hawiinjembä wiimahñdy hajxy jaduhñ miøødhájnäp. Tøø ja'a yhaxøøgwiimahñdy hajxy jaduhñ yhøxhixnä.

¹⁸⁻¹⁹Ja'a Dios jaduhñ mänaan coo hawiinjembä wiimahñdy hajxy nmøødhájtäm. Y coo ja'a Jesucristo hajxy hoy xñähho'túutäm, jaduhñä Dios ja'a nbojpä ngädiey hajxy xyajñähwáatsäm. Jaduhñ hajxy xmiøødnijootpaatäm. Y hõjts jaduhñ tøø xwyiinguexy coo hõjts ja'a miädia'agy jaduhñ nyajwá'xät coo ja'a Jesucristo hajxy tøø xñähho'túutäm, y coo ja'a Dios hajxy xyajñähwáatsäm, y coo ja'a Dios hajxy jaduhñ xmiøødnijootpaadaañäm. ²⁰Ja'a Dios hõjts tøø xwyiinguexy coo hõjts ja'a Jesucristo miädia'agy nyajwá'xät. Jaduhñ hõjts tøø xñäma'ay coo hõjts mijts nmänuu'xtá'agät coo miädia'agy hajxy mmäbójcät. Jaduhñä Dios hajxy xyajñähwá'adsät. Jaduhñ hajxy ween xmiøødnijootpaadøøjät.

²¹Cabä Jesucristo ja'a Dios mänaa miägädiehy. Pero coo Dios hajxy xjiaanč tehñ chójcäm, paady miänaañ coo ja'a Jesucristo ja'a nbojpä ngädieyhajxy xchømó'cäm. Y coo ja'a Jesucristo hajxy xñähho'túutäm, jaduhñä Dios hajxy xyajñähwáatsäm. Jaduhñ hajxy xpiädáacäm hawa'adstuum.

6 Tøø ja'a Diosmädia'agy hajxy mmäböcy, paadiä Dios ja'a hoyhajt ja'a weenhajt hajxy tøø xmiø'oy. Hõjts mijts nmänuu'xtaacy coo ja'a Diosmädia'agy hajxy hoy mgudiúnät. Paady mijts jaduhñ

nmānuu'xta'agy, coo højts ja'a Dios
nmøødtuñ. ²Hix, jaduħn ĵim myiñ
cujaay maa ja'a Diosmädia'aguian:

Tøøch nyajnahdijy mänääjoch
miičh ja'a hoyhajt ja'a
weenhajt hawiinmats
nmó'owät.

Cooch miičh mänit xpia'yá'axät,
mänitoch miičh nmädówät.

Mänit nbuhbédät.

Mänit nyajnahwa'ads
nyajcuhwá'adsät,

nømä Diosmädia'agy miäna'añ.

Hoorä, tøø yhabaatnä coo

ja'a Dios hajxy nba'yáaxämd.

Jaduħnä Dios hajxy xyajnahwaats
xyajcuhwáatsämd.

³Maa højts ja'a Diostuung
nduñän, hoy højts njäya'ayhaty.
Hix, cab højts ndsocy coo højts
pøn xñähwaambédät. ⁴Hoy
højts ja'a Diostuung njaančh tuñ.
Nmee'xtujpy højts hoy tyijä, hoy
ñejpiä højts nja jaty nja habety.
Hanaxiä højts tøø ndsaačhpocy.
Tøø højts häyohn mayhooc
nmänaxy nyajnaxy. ⁵Tøø højts
mayhooc nyajwobho'ogy. Tøø højts
mayhooc nyajtsumy. Tøø højts
ja'a cu'ug mayhooc xñäbädø'ogy.
Tøø højts mayhooc nhanuu'xø'øy
ja'a Diosmädia'agyquiøxpä. Tøø
højts jamia'ay nhity mayhooc
ja'a Diosmädia'agyquiøxpä. Tøø
højts mayhooc jaguiay jayhu'ugy
nhijpä. ⁶Coo højts ja'a Diostuung
nduñ, cab højts haxøøgwiinmahñdy
nnä'ägä møødä. Nwiinjuøøby
højts ja'a Diosmädia'agy.
Mee'xxieemy højts nhity, cab højts
tii nmøjpdä'agy. Hojioot højts
nmøød. Hix, ja'a Dioshespíritu
højts nmøød. Hamuumdu'joot højts

jäya'ay jaduħn ndsocy nba'häyoy.

⁷Nyajwa'xyp højts ja'a tøyhajt. Ja'a
Diosmäjaa højts nmøød. Jaančh
tehñ yhoy højts njäya'ayhaty nebiä
Dios choquiän. Jaduħn højts ja'a
haxøøgpä nga'a yajmäjäda'agy.

⁸Näje'eyyä højts jäya'ay jaduħn
xwyiingudsähgø'øy. Näje'e højts
xquia'a tsocy xquia'a mee'xy.
Näje'e højts xquiumay, näje'e højts
xñähojy. Tømiädiaacp højts, hoy
højts jäya'ay näje'e xjia nänømy
cooc tyijy højts nhøhnda'agy. ⁹Hoy
højts ja'a tsaangu'ug xjia hixyhaty,
cab højts häna'c näje'e xmiämøj
xmiämayø'øy. Mäjahñdiuum højts
njaančh tehñ wiädity, høxtä
xyagho'ogaamb højts jäya'ay. Pero
ja'a Dios højts jaduħn xcwieendhajt.
Tøø højts ja'a Dios xyajcumädoy,
pero cabä Dios jaduħn miäna'añ
coo højts nhó'ogät. ¹⁰Jootcujc
højts nnäl'ägä hity homiänaajä, hoy
højts wiingumänaajaty nja mänaxy
nja yajnaxy. Hoy højts nja häyoy,
nyajnahixøøby højts ja'a jäya'ay
ja'a Diosmädia'agy nämay, jaduħnä
hoyhajt ja'a weenhajt hajxy piäadät.
Hoy højts tii nga'a ja møødä,
Dios højts xmiooby tijaty højts
nyajmaajiajpy.

¹¹Mägu'ughajpäðøjc, ja'a mijts ĵim
hijpä Corintos, mijts jaduħn nmägapxyp.
Tøø mijts ngøxy hawäänäm nebiaty
højts ja'a mädia'agy nmøødä. Njaančh
tehñ chojpy højts mijts jaduħn. ¹²Nja
wi'i miøødnijootpaadäänäp højts mijts.
Cab højts nnajuø'øy pø jaduħn mijts
xjiäwøøbiä. ¹³Tunä mayhajt hajxy, tsøc
hajxy nijiootpáatäm. Jaduħn mijts
nmägapxy nebiä huungän.

¹⁴Cab hajxy mmøødwäðijmúgät
pøn ja'a Diosmädia'agy ca'a mäbøjp,

coo hajxy jaduhñ mnä'ä pahíjxpät neby hajxy yhaxøøgwäditiän. Hix, pønjaty ja'a Diosmädia'agy mäbøjp, hoy hajxy quiuidiuñ. Hawa'adstuum hajxy je'e. Pero pønjaty ca'a mäbøjp, cab hajxy quiuidiuñ. Wiing ja'a wyiinmahñdyhajxy. Haxøøgtuum hajxy je'ebä. ¹⁵Hix, cabä Jesucristo tu'ugmädia'agy yhity møødä möjcu'ugong. Jaanä jäduhñduhmbä, pøn ja'a Diosmädia'agy mäbøjp, cab hajxy tu'ugmädia'agy yhiipä møød ja'a Diosmädia'agy hajxy ca'a mäbøjpä. ¹⁶Cabä cuhdujt jaduhñ myiñ coo häna'c quepychech naaxpoch hajxy wyiingudsähgø'owät maa ja'a Diostøjcän. Cabä quepychech naaxpoch jiujuquiä. Ja'a Diósäts mäböcy jujcy. Y coo ja'a Diosmädia'agy hajxy nmäbøjcäm, jaduhñ mäwiin hajxy nmäbáatäm nebiä Diostøjcän, je'leguiøxpä coo ja'a Dioshespíritu hajxy nmøødhájtäm. Jaduhñä Dios jecy miänaañ:

Pønjátyhøchä nmädia'agy xmiøbøjcäp, je'eçhä nhEspíritu nmo'owaamby. Nwoowhidáambiøch hajxy je'e.

Xwyiingudsähgø'owáambiøch hajxy je'e.

Ngu'ughadáambiøch hajxy je'e,

nømä Dios hajxy jecy xmiädiáacäm.

¹⁷Jaduhñä Dios jecy miänaambä:

Puhwaatsnä hajxy ja'a häna'c ja'a quepychech hajxy wiingudsähgøøbiä, ja'a häna'c ja'a naaxpoch hajxy wiingudsähgøøbiä.

Cab hajxy mmøødwädijmúnät.

Høxhix ja'a haxøøgpä hajxy. Mänítøch mijts xquiø'ødägøøñät.

¹⁸XTieedyhadáambiøch mijts hänajtiän. Nnøøxhadáambiøch nmajc-hadáambiøch mijts hänajtiän,

nømä Dios jecy miänaañ. Møccuhdujt ja'a Dios miøød. Hoy piønä jaduhñ yhane'emy.

7 Mägu'ughajpädøjc, tøyhajt jaduhñ coo ja'a Dios hajxy xyhuunghájtäm. Tsøcxä haxøøgwiiinmahñdy hajxy najtshixøøyyäm cøxiä. Yø'ø haxøøgwiiinmahñdy, xyajmä'täp ja'a mni'x ja'a mjuøhñdy jaduhñ. Tsøgä Dios hajxy wiingudsähgøøyyäm. Tsøgä njoot hajxy pädáacäm maa ja'a Diosøxpän.

²Cham højts mijts

nnämäaguiumbä, tunä mayhajt hajxy, tsøc hajxy nijjootpáatäm. Cab højts pøn tøø nhäyoowhixy, cab højts pøn haxøøgwiiinmahñdy tøø nyajnähixø'øy, cab højts pøn tøø nwiinhøøñ. ³Pero cábøch nmäna'añ cooch pøn tøø xñähøøñø'øy.

Njaanç tehñ chojpy højts mijts jaduhñ mäduhñtiä hajxy yaa njaac jugyhájtäm hädaa yaabä naaxwiin. Jaduhñ mijts hijty tøø nhuuc nämaabiä. ⁴Nnajuøøbiøch coo mijts ca'xy mgudiuna'añ waambátyhøch mijts tøø nmägäpaxy tøø nhane'emy. Ngumáabiøch mijts jaduhñ. Jootcújc-høch njaanç tehñ niijiäwø'øyii maa mijtsøxpän. Jaanç tehñ xioondáacpøch, hoy højts madiu'u nja tsaächpøcy.

⁵Coo hõjts ja'a hermano Tito jim nga'a paaty maa ja'a cajpt jaduñ xihatiän Troas, paady hõjts jim nwiimbijty. Y coo hõjts yaa nmejch Macedonia-naaxooty, ni yaa hõjts ja'a hermano Tito nga'a paatpä. Coo hõjts yaa nga'a tsoj paaty, paady hõjts hijty jootcujc nga'a nä'ägädä nijiäwø'oyii. Xmiädsiphajp hõjts jäya'ayhajxy hijty ja'a Diosmädia'agyquiøxpä. Jootmayhajp hõjts hijty je'eguiøxpä cooc tyijy mijts jaduñ mga'a mäbøga'añ. ⁶Ja'a Dios, yagjootmøcpøjpy je'e pønjaty jaduñ jootmayhajp. Y coo ja'a hermano Tito jiaanč mejch, mänit hõjts ja'a Dios xyagjootmøcpøjcy. ⁷Xjiaanč tehñ yagjootmøcpøjc hõjts ja'a Dios jaduñ coo hõjts ja'a hermano Tito xyhawaanä coo mijts je'e myagjootmøcpøjcy mänaa jim yhitiän maa mijtsän. Cøjx hõjts xyhawaanä cóogøch mijts xjia wi'i jibhixy cooçh jim nnøcxät maa mijtsän. Jaduñ hõjts tøø xyhawaanäbä cooc mijts mjootmayhaty je'eguiøxpä cooçh mijts hijty tøø xyhuuc yagjootmayhajp. Y jaduñ hõjts tøø xyhawaanäbä cóogøch mijts xjiaanč tehñ jiahmiejsta'agy. Coo hõjts jaduñ tøø xquiøxy hawaanä, páadyhöch njaanč tehñ xioonda'agy.

⁸Mänájøch mijts ja'a nocy jawyiinhajtpä nyajnäguexiän, nhójjøch mijts jaduñ siémpräm. Paady hajxy weeñtiä mjootmayhajty. Jootmayhájthøch høøch wéeñtiäbä coo mijts nhojy. ⁹Coo mijts nhojy, paadiä mhaxøøgcuhdujt hajxy mhøxhijxy. Xquiumaayy

mijts ja'a Dios jaduñ coo hajxy jaduñ mhøxhijxy. Coo hajxy jaduñ mhøxhijxy, páadyhöch nxoonäda'agy, ca'a jie'eguiøxpä coo hajxy mjootmayhajty. ¹⁰Pønjaty yhaxøøgcuhdujt høxhijxp, je'edshajxy hodium mähmø'owäp. Cumay hajxy jaduñ piädsómät maa ja'a Diosän. Y cab hajxy jaduñ jootmayháñät. Pero pønjaty yhaxøøgcuhdujt ca'a høxhijxp, haxøøgtuum hajxy miähmø'owät. Hoy miänaaxøø hajxy jaduñ jootmayhada'añ. ¹¹Pero mijts, hamuumdu'joot hajxy mgudiuñ nebiaty mijts tøø nmägäpax tøø nhane'emiän mänájøch ja'a jayøbajtpä nocy nguexiän. Mjaanč høxhijx ja'a mhaxøøgcuhdujt hajxy nebiä Diosmädia'agy yhane'emiän. Mjootmayhajt hajxy jaduñ coo hajxy hijty tøø mgädieey. Y mdsähgøøyy hajxy jaduñ weeñtiä. Chøjpy ja'a mjoothajxy coo mijts ngumáyät, paadiä craa hajxy mhøxquejxpädsøømy, ja'a haxøøgjatcøøyyäbä. Tøø hajxy myajcähxø'nø coo hajxy tii pojpa tii cädieey mga'a møødän. ¹²Paady hõjts ja'a nocy jim nguejxy maa mijtsän, coo häna'c-hajxy haxøøg tøø ñidiuñii. Ca'a jie'eguiøxphajtiä hõjts yø'ø nocy nguejxy. Paady hõjts nguejxpä, chojpy hõjts ja'a njoot hänajty coo hajxy myajcähxø'øgät coo hõjts mijts xchocyñä. Xyhijxp hõjts ja'a Dios jaduñ coo hõjts nga'a høhnda'agy. ¹³Coo hõjts mijts jaduñ xchocyñä, paady hõjts nxoonäda'agy.

¹⁴Xoonäacp hõjts jaduñmä coo ja'a hermano Tito xioondaacpä. Paady xioonda'agy coo ja'a

Diosmädia'agy hajxy hänajty hoy mbanøcxyñä nägøxiä mänaa jim yhitiän maa mijtsän. Tøøchä hermano Tito hijty nnäma'ay coo mijts ja'a Diosmädia'agy hoy mgudiuñ. Y tøyhajt hajxy mjaančh cudiuñ. ¹⁵Hamuumdu'joot mijts ja'a hermano Tito xjiaančh tehñ chocy, je'eguiøxpä coo mijts ja'a miädia'agy mmäbøjcä hamuumdu'joot nebiaty mijts xyhanehmiän. ¹⁶Nnajuøøbiøch coo mijts ja'a Diosmädia'agy hoy mbanøcxaannä; páadyhøch nxoonda'agy.

8 Hoorä, mägu'ughajpädøjc, cham højts mijts nyajmøødmädia'aga'añ nebiaty ja'a Dios mayhajt tøø tiuñ ja'a mäbøjpädøjcøxpähajxy, ja'a hajxy jim tsänaabiä Macedonia-naaxooty. ²Jaančh tehñ xioondaacp hajxy, hoy hajxy jaduñ tøø jia tsaächpøcy hoyhoy, hoy hajxy jaduñ jia häyoy hanaxiä. Coo hajxy jaduñ jiaančh tehñ xioonda'agy, paadiä xädø'øñ hajxy may tøø yajmucy. Hojioot hajxy jiaančh tehñ miøød, paady hajxy may tøø yajmucy. Tøø ja'a häyoobäjäya'ay xädø'øñ hajxy mio'oyii; ja'a hermanodøjc-hajxy jaduñ tøø yecy. ³Hamuumdu'joot hajxy jaduñ tøø yecy, ca'a yhadspä, ca'a yhajootma'adä. Tøøch nhamdsoo hixy coo hojioot hajxy jaduñ jiaančh tehñ miøødä. Høxtä yejnaxypä xiädø'øñ hajxy jaduñ näjootpä. ⁴Coo hajxy miädoyhajty coo højts ja'a häyoobäjäya'ay hänajty nbuhbeda'añ xädø'øñhaam, ja'a Diosmädia'agy hajxy mäbøjpä, mänit højts xñämaayy coogä

xädø'øñ hajxy jaduñ quiexaambä, ja'a hajxy jim tsänaabiä Macedonia. Hamuumdu'jootäc hajxy jaduñ quiexa'añ. ⁵Xoondaac højts jaduñ coo ja'a hermanodøjc xädø'øñ hajxy may yecy, ja'a hajxy jim tsänaabiä Macedonia. Y coo hajxy miänaañ coo ja'a Dios ja'a miädia'agy hajxy hamuumdu'joot quiudiunaanä, paady højts maas hanaxiä nxoondaacy. Dios jaduñ mänaañ coo hajxy jaduñ quiudiünät. Jaduñ hajxy miänaambä cooc højts ja'a nmädia'agy hajxy xquiudiunäänäbä. ⁶Mänaa ja'a hermano Tito jim jayøbajt yhooyän maa mijtsän, mänit hajxy xñämaayy coo xädø'øñ hajxy myajmügät. Hoorä, jim højts ja'a hermano Tito nguejxtägatsaambä maa mijtsän, weenä xädø'øñ hajxy mgøxy yajmucy. Mänit hajxy jim mguéxät maa ja'a häyoobäjäya'ayhajxiän, ja'a Diosmädia'agy hajxy mäbøjpä. ⁷Jaančh tehñ yhooy ja'a Diosmädia'agy hajxy mmäbøcy. Jaančh tehñ yhooy hajxy myajwiingapxø'øy. Jaančh tehñ yhooy hajxy mwiinjüø'y. Hamuumdu'joot hajxy jaduñ mmäbøcy. Xjiaančh tehñ chojpy højts mijts. Hoorä, chojpy højts ja'a njoot coo mijts ja'a häyoobäjäya'ay mjaančh tehñ piuhbédät hamuumdu'joot xädø'øñhaam. ⁸Cäbøch mijts ndehñ yhane'emy coo hajxy mbuhbédät. Paady mijts jaduñ nyajmøødmädia'agy nebiatiä wiingjäya'ayhajxy tøø miäbuhbetiän, ween hajxy jaduñ mbahjxpät. Jaduñ hajxy myajcähxø'øgät coo hajxy tøyhajt

mjaančh mädsojpä. ⁹Tøyhajt jaduhñ coo ja'a Jesucristo hojioot jiaančh tehñ miøødä, ja'a nWiindsønñhajtämhajxy. Cahnä hänajty yaa quiäda'agyñä hädaa yaabä naaxwiin nebiä pajäya'ayän, jim hijty mœc yhane'emy maa ja'a Tieedy ja'a wyiinduumän. Pero coo yaa quiädaacy, mänit jaduhñ jiajty nebiä hädaa yaabä jäya'ayhajxiän, neby hajxy yaa nhäyóowäm. Jaduhñ hajxy hoy xñähho'túutäm. Y coo hajxy jaduhñ tøø xñähho'túutäm, paady hajxy jim xyajnœcxäänäm maa ja'a Tieediä wyiinduumän, pønjataiä miädia'agy jaduhñ mábójcäp.

¹⁰⁻¹² Cham mijts nwiingapx njøjcapxø'owa'añ coo ja'a xädø'õñ hajxy myajpedøød neby hajxy hadojumøjt mwiinmahñdyhajtjän coo hajxy hänajty myajmuga'añ. Mja nähmajts hajxy jaduhñ, pero cahnä hajxy myajpedyii. Hahixøøby jaduhñ coo hajxy myajpedøød, jaduhñ hajxy myajcähxø'ögät coo hojioot hajxy tøyhajt mjaančh møødä. Mijts jaduhñ mwiinmahñdyhajtsohñ coo xädø'õñ hajxy hänajty myajmuga'añ. Jaduhñ hajxy myégät neby hajxy mmäjäda'aga'añ. Mädyyyä jaduhñ. Cab jaduhñ yahixø'oy coo hajxy hanaxiä myégät. Hiñ, jaduhñä Dios ja'a jioot chocy coo hajxy myajcähxø'ögät coo hojioot hajxy jaduhñ mjaančh møødä.

¹³Cábøch nmäna'añ coo hajxy mhäyoodägø'owät, páadyhøch tøø nmäna'añ coo hajxy hanaxiä mga'a yégät. ¹⁴Jaduhñhøchä njoot chocy coo pøn tii quia'a yajmaajiädät. Jaduhñds je'e, hahixøøby jaduhñ

coo mijts ja'a häyoojäjäya'ay mbuhbédät, je'eguiøxpä coo mijts nä'a tægø'øbä mmøødä jäda'ahaty. Y coo mijts hänajty tøø mhäyoodägø'oy, mänit mijts xpiuhbejtägätsät, pø jim hajxy hänajty miøødä nä'a tægø'øbä. ¹⁵Jaduhñ jim myiñ cujaay maa ja'a Diosmädia'aguiän: “Pønjatai may yajpädø'c, piuhmooy hajxy je'e pønjatai weentiä yajpädø'c. Yaghaguipxyjatiøoy hajxy jaduhñ tu'cuhdujt.”

¹⁶Dios ja'a hermano Tito jaduhñ tøø yajnähdiy coo hojioot miøødhädät maa mijtsœxpä, neby højts hojioot nmøødän maa mijtsœxpän. Dioscujú'uyäp ja'a Dios jaduhñ. ¹⁷Coo højts ja'a hermano Tito nnämaay coo jim ñøcxät maa mijtsän, jootcugøoy je'e coo højts jaduhñ nnämaay coo jim ñøcxät. Hiñ, hamdsoojoot hijty jaduhñ ñä'ägä nœcxa'añ.

¹⁸Nyajmäguexø'owaamby højts ja'a hermano Tito ja'a mägu'ughajpä wiingpä. Wiinduhmčhajtøjc tøø yajmädohyaty coo ja'a Diosmädia'agy hoy yajwa'xy ja'a Jesucristocœxpä. ¹⁹Jaduhñä mábøjpdäjäc-hajxy tøø miänaambä coo højts nmøødhädät majaty højts ja'a xädø'õñ nyajmucy mänaa højts ja'a häyoojäjäya'ayhajxy hänajty nœcxy nmo'owa'añän. Cähxø'øgaamb jaduhñ coo ja'a Dios miøjjä jiaančhä. Jaduhñ quiähxø'øgaambä coo højts hojioot nmøødä. ²⁰Paady højts nämetsc nädägøøg nwädity xädø'õñyajmujpä, cab højts ndsocy coo højts pøn xñänómät cooc tyijy højts nje'ehada'añ. Hiñ, majiaty højts

xädø'õñ nyajmucy. ²¹Chojpy højts ja'a njoot jaduhñ coo højts ja'a jäya'ayhajxy xquiumáyät neby højts ja'a Dios xquiumáyyän.

²²Chaads højts ja'a mägu'ughajpä mäwiingpä nguexáangumbä møødá hermano Titohajxy. Mayhooc højts hoy tøø xmiøødtuñ hoy ñä'ä mädyii tuungä. Hamuumdu'joot jim ñöcxa'añ maa mijtsän. Hix, ñajuøøby jaduhñ coo mijts hoy myajtøjtägø'øwa'añ. ²³Naxiä hermano Tito hajxy hoy mdehm yajtøjtägø'øwät coo hajxy jim miédsät. Haa ja'a hermano Tito, hoy miänáajøch jaduhñ xñä'ägä møødtuñ, páadyhöch jim nguexa'añ maa mijtsän. Y ja'a jiamioødhajxy nämetspä, ja'a mæbøjpadøjc-hajxy yaabä, jaduhñ hajxy tøø miänaambä coo hajxy jim ñöcxät. Hoyyá Jesucristo hajxy wyiingudsähgø'øy. ²⁴Coo mijts ja'a hermano Tito hoy myajtøjtägø'øwät møødá jiamioødhajxy, jaduhñ mijts ja'a mæbøjpadøjc hajxy xyhíxät coo hajxy tøyhajt mjaanèh mädsocy. Tøjiádäp jaduhñ neby højts mijts tøø nmädia'aguian coo mijts hojiot mjaanèh tehñ miøødá.

9 Høøch mijts jaduhñ nnä'ä jaac näjaayøøby. Nnajuøøbiøch jaduhñ coo mijts ja'a häyoobäjäya'ayhajxy mbuhbeda'añ, ja'a Diosmädia'agy hajxy mæbøjpä. ²Hix, nnajuøøbiøch coo hajxy hamuumdu'joot mbuhbeda'añ. Jadúhñhöchä mæbøjpadøjc-hajxy tøø nhawaanä, ja'a hajxy jim tsänaabiä Macedonia-naaxooty. Jadúhñhöch hajxy tøø nhawaanä coo mijts hadøjumøjt mdägøøyy xädø'øñyajmujpä, pønjatia

Diosmädia'agy jim mæbøjp Acaya-naaxooty. Y coo mijts jayøjp mnähmajch, paadiä Macedóniabä jäya'ayhajxy nämay xpiahixaambä. Jaduhñ hajxy hamuumdu'joot miäbuhbedaambä nej mijts mmäbuhbeda'añän hamuumdu'joot. ³Páadyhöchä hermano Titohajxy jim nguejxø'øga'añ maa mijtsän, weenä xädø'õñ hajxy paquia myajmujpadø'øy. Jaduhñds je'e, coöch jim nnöcxät, tøø ja'a xädø'õñ hajxy hänajty mgøxy yajmujnä. Haa ca'a, tøøchä Macedoniabähajxy nhawaanä coo mijts ja'a xädø'õñ myajmuga'añä. ⁴Hix, wéhñdøchä Macedóniabä jäya'ayhajxy näje'e nmødhädät jim maa mijtsän. Y coo hajxy jaduhñ xyhíxät coo ja'a xädø'õñ hajxy hänajty mga'a cøxy yajmucyñä, mdsähdiunaamb hajxy jaduhñ. Jadúhñhöch ndsähdiuumbät je'leguixp coöch mijts tøø nmädia'agy coo ja'a xädø'õñ hajxy hänajty myajmuga'añ. ⁵Páadyhöch jaduhñ nwiinmaayy coo hijty yhahixø'øy coöchä hermano Titohajxy jawyiin nguejxø'øgät maa mijtsän, jaduhñ mijts jim xpuihbédät maa ja'a xädø'õñ hajxy myajmuquian. Jaduhñä xädø'õñ hajxy myaghídät nähix hahixø'ø coöch jim nmédsät, neby hajxy jaduhñ tøø mmäna'añän coo hajxy myaghida'añ. Jaduhñ hajxy myajcähxø'øgät coo ja'a xädø'õñ hajxy myega'añ hojiotcøxpä. Cab pøn jaduhñ miäná'anät cooc tyijy mijts hadsip tøø nhane'emy coo hajxy myégät. ⁶Jaduhñds je'e, pønjaty jaduhñ wiinduc wiindsaach, cabä hoyhajt hajxy piaada'añ. Pero pønjatia

häyoo**ä**jäy**a'**ay näxuut**s**p, je'edsä hoyhajt hajxy jaduh**ñ** paada**am**b. Tøyhajt jaduh**ñ**. ⁷Jootcu**j**c hajxy myégät hamuumdu'joot neby hajxy hänäjty myega'añ**än**, ca'a yhad**s**ipä ca'a yhajootma'adä, ca'a hajxy tii mnaj**tsh**äyowø'oy. Hi**x**, je'e ja'a Dios chojpy pøn**j**aty jaduh**ñ** jootcu**j**c yej**p**. ⁸Møj jaan**ch**ä Dios. Xmió'owäp mijts ja'a hoyhajt ja'a weenhajt mõj may, jaduh**ñ** hajxy tii m**g**a'a yajmaaj**i**ädät ni mänaa. Nä'ä t**äg**ø'øbä hajxy jaduh**ñ** xmió'owät, jaduh**ñ**ä wiingj**ä**y**a'**ay hajxy hoy mbuhbejt**äg**ätsät hoy ñe**j**piä.

⁹Jaduh**ñ** jim myi**ñ** cujaay maa ja'a Diosmä**dia'**agui**än**:

Pø**ñ** hojiäy**a'**ay, mõj mayy**ä**
häyoo**ä**jäy**a'**ay piuhbety.

Hoy miänaaxøø ja'a Dios jaduh**ñ**
piuhbejt**äg**atsa'añ.

¹⁰Ja'a Dios, yejpy je'e ja'a tøø**m**d mädyii m**n**i'ibäp, mädyii mdúnäp. Yajmayøøby jaduh**ñ** nebiä m**g**áyät nebiä mhú'ugät. Jaanä jädu**hñ**du**h**m**b**ä, xmió'owäp mijts ja'a Dios nä'ä t**äg**ø'øbä tijaty hajxy hänäjty myajmaaj**i**ajpy, jaduh**ñ** mijts ja'a häyoo**ä**jäy**a'**ay mmoodi**äg**ätsät.

¹¹Y coo mijts ja'a häyoo**ä**jäy**a'**ay jaduh**ñ** hamuumdu'joot mbuh**b**édät, mänit mijts ja'a Dios ja'a hoyhajt ja'a weenhajt mõj may xmió'owät. Y coo højts ja'a häyoo**ä**jäy**a'**ay xädø'ø**ñ** nøcxy nmo'oy, ja'a mijts hänäjty tøø myéquiäbä, mänitä häyoo**ä**jäy**a'**ay ja'a Dios hajxy ñäma'awa'añ: “Dioscu**j**ú'uyäp.”

¹²Hi**x**, coo mijts ja'a häyoo**ä**jäy**a'**ay jaduh**ñ** mbuh**b**édät, mejt**s**tu'ja ja'a hoybä hajxy jaduh**ñ** mduna'añ. Piaada**am**biä häyoo**ä**jäy**a'**ayhajxy tijaty hajxy hänäjty yajmaaj**i**ajpy, y

te**h**ngaj**nä** ja'a Dios hajxy jaduh**ñ** ñäma'awa'añ: “Dioscu**j**ú'uyäp.”
¹³Coo mijts ja'a häyoo**ä**jäy**a'**ay jaduh**ñ** mbuh**b**édät jootcu**j**c hoy miädyii caj**t**ä, myajc**ä**hxø'øga**am**by hajxy jaduh**ñ** coo ja'a Dios ja'a miä**dia'**agy hajxy mgudi**u**unä ja'a Jesucristocøxpä. Jaduh**ñ**ä häyoo**ä**jäy**a'**ay ja'a Dios hajxy mõj jaan**ch** ñäma'awa'añ, je'egu**i**øxpä coo mijts ja'a Dios ja'a miä**dia'**agy mgudi**u**unä, møød coo ho**j**ioot hajxy mjaan**ch** te**h**m miøødä ja'a häyoo**ä**jäy**a'**aguiøxpä**h**ajxy. ¹⁴Coo mijts ja'a Dios ja'a hoyhajt ja'a weenhajt mõj may tøø xmiø'oy, paady mijts ja'a häyoo**ä**jäy**a'**ay xchoga'añ xpia'häyowa'añ, møødä Dios hajxy pia'ya'axa'añ ja'a mijts**c**øxpä. ¹⁵Tsøcxä ja'a Dios hajxy nägø**x**iä nämäay**ä**m: “Dioscu**j**ú'uyäp”, je'egu**i**øxpä coo ja'a yHuung yaa quiejxy hädaa yaabä naaxwiin, coo hajxy hoy xñähho'túutäm. Møjmayhajt ja'a Dios jaduh**ñ** tiuun hoy-yagjuøø**ñ**ä.

10 Høø**ch** mijts cham
nmägap**xa**amby
nhane'ema**am**by, høø**ch** Pablo**h**ajpä. Mänaa ja'a Jesucristo yaa wiädit**i**än hädaa yaabä naaxwiin, jaan**ch** te**h**m miøødä ho**j**ioot hänäjty. Mee'xxieemy hänäjty jiaan**ch** te**h**m wiädity. Jadú**hñ**hö**ch** je'e nja pahixaa**ñ** coo**ch** mijts jaduh**ñ** nmägap**xa'**añ nhane'ema'añ. Ja'a nmädsiphø**ch**hajxy, jadú**hñ**hö**ch** hajxy xñänø**my** cooc tyjy mijts hänäjty tsähgø'ø tsähgø'ø nmägap**xy** nhane'emy mänäajø**ch** jim nhitiän maa mijtsän, pero cooc tyjy høø**ch** nga'a tsähgøø**ñ**ä coo mijts nmägap**xy** nhane'emy

nocyhaam. Cab jaduñ tiöyyä, nä'a höhndaacp hajxy jaduñ. ²Mägu'ughajpádøjc, huuc tunä mayhajt hajxy, høxhiχ ja'a haxøøgpä ja'a ca'a hoybä hajxy. Coö hajxy jaduñ mhøxhíxät, cab mijts jim waamb nnámá'awät coöch jim nnócxät maa mijtsän. Pero põñ jaduñ mänaamb cooc tyijy højts hoy nga'a wädity nebiä hädaa jäya'ayhajxy hoy quia'a wäditiän hädaa yaabä naaxwiin, je'ečh mabøcy hajxy nhójàp hajäya'ayhaam. Nyajcähxó'øgäbøch jaduñ coöch hänäjty tøyhajt nga'a tsähgø'øy. ³⁻⁴Hoy højts yaa nja tsäna'ay hädaa yaabä naaxwiin, cab højts ja'a nhamdsoo wiinmahñdy nyajtuñ nebiä yaabä jäya'ayhajxy yajtuñän. Ja'a Dios højts xpiuhbejp ja'a miäjaahaam, cab højts ja'a Dios ja'a miädsip jaduñ nyajmäjädaacä. ⁵Jii jäya'ayhajxy näje'e wiädity, yajcumayaamb hajxy, höhndaacp hajxy. Cabä jioothajxy yajmädsocy coö wiinghäna'c ja'a Dios hajxy pia'häyówät. Nyajcähxø'py højts jaduñ coö yø'ø häna'c-hajxy jaduñ yhöhnda'agy. Y coö højts hänäjty tøø nga'a yajmäjäda'agy, mänit højts nyajmäböga'añ ja'a Jesucristocøxpä, coö ja'a miädia'agy hajxy ween quiudiuunä. ⁶Y coö mijts hänäjty hoy tøø mgudiun, cab højts mijts hänäjty waamb nnäma'awaannä. Pero põnjaty jaduñ ca'a nä'ägädä cudiunaamb, je'eds højts hahoy nhøxquexaamb by maa ja'a tsajtøjcän.

⁷Pønjaty jaduñ najuøøby coö hajxy tøø wyiinguexyji ja'a Jesucristäm, ween hajxy ñajuøøbiä coöch ja'a Jesucristo

tøø xwyiinguejxpä. Tøyhajt jaduñ. Hoy piönä jaduñ ñajuø'øy. ⁸Ja'a Jesucristo højts ja'a cuhdujt jaduñ tøø xmio'oy coö højts mijts nmägäp x nhané'emät. Chøjpiä jioot jaduñ coö mijts ja'a miädia'agy mjaac mabójcät. Cabä jioot chocy coö hajxy mdu'udägóyyät. Tøyhajt jaduñ coöchä Jesucristo ja'a cuhdujt jaduñmbä tøø xmio'oy. Coöch jaduñ nniänømyii, cábøch ndsähdiuna'añ, hóyhøch häna'c jaduñ xjia nänømy coögøch tyijy nyajcumaya'añ hanaxiä. ⁹Cábøch mijts nhadsähgø'øwa'añ, hoy mijts nocy naxy nja yajnäguexy. ¹⁰Ja'a nmädsiphøchhajxy, jaduñ hajxy miäna'añ cooc tyijy mijts møc nhane'emy nocyhaam. Pero jaduñ hajxy miänaambä cooc tyijy hänäjty møc nga'a hane'emy mänäagøch jim nhitiän maa mijtsän, cooc tyijy hänäjty weenjaty ndsähgø'øy. ¹¹Pero põnjaty jaduñ mänaamb, cabä tøyhajt hajxy miøødä. Jaduhñdsä tøyhajtpä, neby højts mijts møc nhane'emiän nocyhaam, jaanä jaduñ mijts møc nhane'emaambä coö højts jim nnøcxtägätsät maa mijtsän.

¹²Jii häna'c-hajxy näje'e, jaančh tehñ yajcumayaamb hajxy cooc tyijy hajxy jiaančh tehñ jiaty jiaančh tehñ ñajuø'øy. Hamiñ haxøpy hajxy jaduñ ñiguiumayii. Y cabä wiinghäna'c hajxy quiumay. Pero cabä tøyhajt hajxy miøødä. Højts, cab højts jaduñ nhäna'c-haty. Cab højts jaduñ niguiumayii. ¹³Caj pues, cab højts nyajcumaya'añ. Jaduhñ højts nduna'añ neby højts ja'a Dios tøø xyajnähdiijiän coö højts ndúnät.

Jaduhñ hõjts tøø xyajñähdijy coo hõjts jim̄ ndúnät hõxtä jim̄baady maa mijtsän. ¹⁴Coo hõjts jim̄ nduñ maa mijtsän, ngudiuumby hõjts jaduhñ neby hõjts ja'a Dios tøø xñäma'ayän. Hix̄, hõjts ja'a Diosmädia'agy jim̄ nyajwa'xtsohn maa mijtsän, ja'a Jesucristocøxpä. ¹⁵Majaty wiinghäna'c jaduhñ tøø tiuundsooñän, cab hõjts jaduhñ nmäna'añ coo hõjts jim̄ tøø nduñ. Cab hõjts jaduhñ nguhdujthaty. Pero chojpy hõjts ja'a njoot coo mijts ja'a Diosmädia'agy maas hoy mmäbøgät, jaduhñ hõjts maas hoy njaac tehñ tiúnät maa mijtsän. ¹⁶Y jaduhñ hõjts ja'a Diosmädia'agy hoy nyajwá'xät jäguembaady maa pøn ja'a Diosmädia'agy quia'a mädoynän. Hix̄, cab hõjts nduna'añ maa wiinghäna'c jaduhñ tøø tiuundsooñän. Hix̄, cab hõjts jaduhñ nyajcumaya'añ.

¹⁷Jaduhñ jim̄ myiñ cujaay maa ja'a Diosmädia'aguian: “Cab jaduhñ yhahixø'oy coo hamdsoo mniguiumayøøjät. Pero jaduhñ yhahixø'oy coo ja'a Dios hajxy mõj jaančh mnänømat.” ¹⁸Je'eduhñ tsoobaatp coo ja'a Dios jaduhñ xquiumáyät. Cab jaduhñ choobaady coo hamdsoo mniguiumayøøjät.

11 Huuc tunä mayhajt hajxy, huuc mee'x hajxy weeñtiä. Chámhøch weeñtiä nhuuc mädia'aga'añ nebiä jäya'ayhajxy yajcumayaambän. Coočh jaduhñ weeñtiä nniguiumayii, jaduhñ yajmädoynä nebiä cuhhiimbähajxy miädia'aguian. ²Nej mijts ja'a Dios xchoquiän, jaduhñhøch mijts ndsojpä, je'eguiøxpä coočh mijts ja'a Diosmädia'agy tøø nyajmäbøcy

ja'a Jesucristocøxpä. Chõjpiøchä njoot jaduhñ coo ja'a mjoot hajxy mbädá'agät hamuumdu'joot maa ja'a Jesucristocøxpän. Cabä mjoot hajxy wiingtuum mbädá'agät. ³Mnigwieendähadøøjäp hajxy, jaduhñ hajxy pøn xquia'a jøjcapxø'øwät, coo hajxy xyagjahdiägóyyät ja'a Jesucristo. Jii häna'c-hajxy näje'e wiädity mäwiinhøhmbä. Cab mijts xyajmädsocy coo ja'a Jesucristo hajxy hamuumdu'joot mbanøcxnät. Paquiä hajxy jaduhñ xwyiinhøønät. Haa ca'a, jaduhñä Eva jecy yhuuc wiinhøhnäbä ja'a mõjcu'ugóngäm mänaa ja'a mõjcu'ugong ñibiäda'agyijän nebiä tsahñdiän. Siémprämä mõjcu'ugong quiuwiinmahñdiä. Paquiä ja'a Eva yajwiinhøhñ. ⁴Paquiä mijts ja'a miädia'agyhajxy jaduhñ mmäbøjcø'cä pønjaty mijts jaduhñ wiing xyajñähixøøby ja'a Jesucristocøxpä. Cab hajxy jaduhñ yajñähixø'oy neby hõjts ja'a Diosmädia'agy nyajñähixø'oyän ja'a Jesucristocøxpä. Cab hajxy jaduhñ yajñähixø'oy ja'a Dioshespíritucøxpä neby hõjts nyajñähixø'oyän. Paquiä mijts ja'a miädia'agyhajxy jaduhñ mbadu'ubøjca. ⁵Yø'ø häna'c-hajxy jaduhñ wiing yajñähixøøbiä ja'a Jesucristocøxpä, jaduhñ hajxy ñiñänømyii nebiä Dioswiinguexypän, neby jaančh tehñ jiajpän. Cab jaduhñ yhooyä coo hajxy mmäná'anät cooc tyijy hajxy miaas jaty queečh høøčh njaty. ⁶Wehñdäda'a jaduhñ tiøyyä coočh hoy yajxón nga'a xi'igy nga'a mädia'agy; cab jaduhñ

ñeipiä. Pero tøyhajt jaduhñ cooçh madiu'u njaty nnajuø'øy ja'a Diosmädia'agyquioxpä. Homiänaajä højts mijts ja'a tøyhajt nmo'oy hoy ñä'ä tiiguioxpä.

⁷Mänáajøch mijts ja'a Diosmädia'agy nyajwiingapxø'øyän, cáboch mijts jaduhñ mänaa nnämaayy cooçh mijts xmiäjúyät. Niguuidúunäböch hänäjty hamdsoo, je'eguioxpä cooçhä njoot hänäjty chocy coo mijts ja'a Diosmädia'agy maas hoy mmäböçgät. Y cooçh hänäjty hamdsoo nniguuidúunäxä, páadyhöçhä jäya'ayhajxy näje'e xñänømy cóogøch tyijy hänäjty hoy nga'a cudiuñ. Pero cab jaduhñ tiöyyä. ⁸Wiingjäya'ayhöçhhajxy hänäjty xpiuhbejp, ja'a Diosmädia'agy hajxy hänäjty mäböçpä wiingtuumjaty. Páadyhöçh hajxy hänäjty xpiuhbety cooçh mijts ja'a Diosmädia'agy hänäjty nyajwiingapx nyajwiinmädiaagø'øy. ⁹Mänáajøch jimñ nhitiän maa mijtsän, cáboch hänäjty pønñnäma'ay cooçh hajxy xpiuhbédat xädø'ønhaam, hóyhøch hänäjty tii nja yajmaajiaty tähoocjaty. Hix, xpiuhbéjöpøçhä jäya'ayhajxy hänäjty, ja'a Diosmädia'agy hajxy hänäjty mäböçpä, ja'a hajxy hänäjty jimñ tsohmä Macedonia-naaxooty. Xmióobiøch hajxy hänäjty tijátyhöçh hänäjty nyajmaajijpy. Y cáboch mijts mänaa nnäma'awa'añ cooçh mijts xpiuhbédat xädø'ønhaam. ¹⁰Tømiädiáacpøch jaduhñ nebiä Jesucristo tiømiädia'aguiän. Cáboçhä xädø'øn pønñ nmäyujwa'añ jimñ maa mijts mdsäna'ayän Acaya-naaxooty. ¹¹Coo pønñ jaduhñ miäná'anät

cóogøch tyijy mijts nga'a tsoçy, høhñdaacp hajxy jaduhñ. Ja'a Dios jaduhñ najuøøby cooçh mijts njaançh tehñ chocy njaançh tehñ pia'häyoy.

¹²⁻¹³Jii häna'c-hajxy näje'e wiädity mäwiinhøhmbä. Ja'a Jesucristäc tyijy hajxy tøø wyiinguexyii coo ja'a Diosmädia'agy hajxy yajwá'xät maa ja'a mäböçpädøc-hajxiän, neby højts ja'a Jesucristo tøø xwyiinguexiän coo højts ja'a Diosmädia'agy nyajwá'xät. Pero høhñdaacp hajxy; cab hajxy tøyhajt tøø wyiinguexyii ja'a Jesucristäm. Paady hajxy jaduhñ yhöhñda'agy coo hajxy yajcumaya'añ. ¹⁴⁻¹⁵Yø'ø häna'c-hajxy, ja'a mõjcu'ugong hajxy wyiindsønhaajpy. Jaaya'ay hajxy jaduhñ piahijxyp. Nnajuøøyyäm hajxy coo ja'a mõjcu'ugong ñibiäda'agyii nebiä jaançh tehñ yhöybän, nebiä Diosmoonsän. Hoorä, cab jaduhñ yhöy-yagjuøøñä coo ja'a mõjcu'ugongä mioonsähajxy piajatcø'øy, coo hajxy yhöhñda'agy cooc tyijy hajxy tøø wyiinguexyii ja'a Jesucristäm. Y coo hajxy jaduhñ haxøøg jäya'ayhaty, je'e hajxy jaduhñ quiümädoowaamby. ¹⁶Hoorä, chámhöçh mijts nmägápxcombä. Cab hajxy jaduhñ mmäná'anät cóogøch tyijy tøø nguhhiñ, hóyhøch weeñtiä nja niguiumayii. Pero, pønñjaançh mänaamb hajxy jaduhñ cóogøch tyijy tøø nguhhiñ, huuc tunä mayhajt hajxy, høøçhä nmädia'agy hajxy weeñtiä huuc hamädoowhijtät. Nhuuc nimiädia'agyíjøch weeñtiä. Nhuuc niguiumayíjøch weeñtiä. ¹⁷Cáboch

nmána'añ coočhä Dios ja'a cuhdujt tøø xmio'oy coočhä jaduhñ nniguiumayøøjät. Jaduhñhöch nniguiumayii nebiä cuhhiimbän. ¹⁸Hix, ja'a jäya'ayhajxy nämaybä, miäniguiumáayyap hajxy tijaty hajxy yaa miøød hädaa yaabä naaxwiin, møød tijaty hajxy jaduhñ tøø tiuñ. Jaduhñch höøčhpä, wéēntiøch cham nmäniguiumayáañäbä tijátyhöch tøø nduumbä. ¹⁹Jaduhñ mijts mjaančh tehñ ñibiäda'agyii nebiä jaančh tehñ jiajpän nebiä jaančh tehñ ñajuøøbiän. Paady mijts ja'a cuhhiimbähäna'cä miädia'agyhajxy mhamädoowhidaañä. Pero cab hajxy tøyhajt mjaančh jaty mjaančh najuø'oy. ²⁰Hix, mmee'xtujpy hajxy hoy ñä'a tijatiä, hoy mijts yø'ø häna'c-hajxy hoy ñebiatia xjia häyoowhixy, yø'ø häna'c-hajxy höhñdaacpä, yø'ø miädia'agy hajxy mjaančh tehñ yhamädoowhidáañäbä. Xyhanehm̄b mijts jaduhñ nebiä moonsän. Y xñägáayyap xñähúucäp mijts ja'a mxädø'øñ. Xwyiinöhmb mijts yø'ø häna'c. Xpiejx mijts yø'ø häna'c. Høxtä xquiojxp mijts yø'ø häna'c, y cab hajxy waamb mmána'añ. Cab mijts yø'ø häna'c xyhixy nebiä jäya'ayän. ²¹Pero højts, cab mijts jaduhñ mänaa nhäyoowhixy neby mijts yø'ø häna'c xyhäyoowhixiän, yø'ø häna'c-hajxy höhñdaacpä. Cab højts jaduhñ njootmøjjä.

Chámhøch weēntiä nhuuc mädia'agáangumbä nebiä cuhhiimbän. Tijaty yø'ø häna'c-hajxy miäniguiumáayyap, nmøødhøchhä cuhdujt höøčhpä coočhä jaduhñ nmäniguiumáayyäbät.

²²Niguiumáayyap hajxy je'eguiøxpä coo hajxy yhebreojäya'ayä, coo ja'a Abraham hajxy jecy yhaphajty tieedyhajty møødä Israel. Pies jaanä jaduhñch höøčhpä, jaduhñch nniänñøømäbä coočhä Abraham tøø nhaphajpä tøø ndeedyhajpä. ²³Jaduhñ hajxy ñiguiumáayyäbä je'eguiøxpä cooc tyijy hajxy mioonsähadyii ja'a Jesucristøm. Pies xmioonsähájprøchä Jesucristo höøčhpä. Y maas hóyhøch nduñ que yø'ø häna'c-hajxy tiuñ. Coočhä jaduhñ weēntiä nniguiumayii, jaduhñ yajmädooy nebiä cuhhiimbähajxy miädia'aguiän. Maas móc-høch tøø nduñ que yø'ø häna'c-hajxy tøø tiuñ. Mayhöoc-høch tøø nyajtsumy tøø nyajmach. Ni pøn jaduhñ quia'a yajtsumy quia'a yajmachñä nébiøch tøø nyajtsumiän. Mayhöoc-høchä häna'c tøø xjiaančh tehñ wiobho'ogy. Mayhöoc-høchä häna'c ja'a weenjaty tøø xquia'a yagho'ogy. ²⁴Mägøøxc-høoc-høchä judiøshajxy tøø xjiu'xy hii'xmajmocxmädaaxcø'ø. ²⁵Tägøøghøoc-høchä häna'c tøø xwiopy paxyhaam. Tähøoc-høchä häna'c xjia ca'ch; xquiuhga'adsáambøch hajxy hánajty. Tägøøghøoc-høchä barco tøø xmiäma'adø'oy mejjiooty. Xjia møødnøøguguññhøch jaduhñ. Mänájøchä barco tähooc xmiäguiññän, tu'xøøch jiiy nhijty mejywyiing møød tu'tsuhñ. ²⁶Mayhöoc-høchä yoñdiu'u tøø ndu'uyo'oy. Mayhöoc-høch ja weenjaty tøø nga'a nøøho'ogø'oy møjnøøgujc. Tøøchä mee'tspädøjc mayhooc nyohbiaady. Tøøchä

nhamdsoo mägunaax mayhooc xjia yagho'oga'añ. Tøøchä wiinghäna'c xjia yagho'ogaambä; ca'a yhøøchä nmägunaaxhajxy je'e. Tøøch nwädity mäjähndium jim cajptooty, møød jim pactuum, møød jim mejjooty. Tøøchä häna'c mayhooc xchaaçhtiuñ, ja'a hajxy jaduhñ mänaambä cooc tyijy hajxy miäböcy. ²⁷Tøøchä tuung mayhooc xyaghanuu'xø'ø; høxtä xyajtsaaçhpøjc-høch jaduhñ. Mayhøoc-høch tøø ndsunaxy jamia'ay jayhity. Tøøchä yuu mayhooc nmänaxy nyajnaxy møødä tødsø'ø. Tøøch mayhooc nhity jaguiay jayhu'ugy. Tøøchä tøøchpä mayhooc nmänaxy nyajnaxy. Nja yajmaajijpiøchä wit tucxy hänajty.

²⁸Tøøch madiu'u ndsaaçhpøcy, pero cáböch jaduhnajtä ngøxy mädia'aga'añ. Je'eçh nmädia'agaamby cooçhä mäböjpädøjc jabom-jabom nnädajy nnämay wiinduhmçhajtøjc, pø hoy pø ween hajxy yhity. Hix, høøchä ngø'øjooty hajxy jaduhñ yhity. ²⁹Pønä Diosmädia'agy hoy ca'a cudiunaamb, hoy hajxy jia mäböcy, nnäjootmayhájpiøch hajxy jaduhñ. Pøn jaduhñ cädiehby je'eguiøxpä coo tøø wyiinhøøñii, nmäjootma'adhájpiøchä häna'c ja'a tøø miäwiinhøøñbä. ³⁰Høøch, cáböch nyajcumaya'añ. Pero cooçh häxøpy nyajcumaya'añ, je'eçh häxøpy nyajniuiumayáanap cooçhä häyohn mayhooc tøø nmänaxy tøø nyajnaxy. ³¹Ja'a Dióshøch jaduhñ xñajuøøby cooçh nga'a hønnda'agy. Ja'a Jesucristo ja'a Tieedy je'e. Tsøgä Dios hajxy çøjxta'axiøø wiingudsähgøøyyäm.

Ja'a Jesucristo hajxy nWiindsøn hájtäm. ³²Mänaa ja'a Aretas hänajty tiuñän gobiernä, mänitøchä mioonsä xjia yajmadsaañ jim maa ja'a cajpt jaduhñ xiøhatiän Damasco. Juhmuu'tswäditiä cajpt hänajty jaduhñ. Jia pädaac ja'a hadänaabiä hajxy majatiä tægø'øwøødiaact nébiøch jaduhñ nga'a pädsómät. ³³Pero päyø'c-høch. Ja'a nmägu'ughajpøchhajxy hoy xquiuhdøøñaxy cachjooty maa ja'a muuçh hänajty jiuñän.

12 Cab jaduhñ yhahixø'øy cooçh nyajcumáyät. Pero nébiøch chamñ nmädia'aga'añän, jaduhñ yajmädowa'añ nébiøch nyajcumaya'añän. Je'eçh chamñ nmädia'agaamby nebiátyhøchä Jesucristo hijxtahnd tøø xyajwiinhixiän. ²⁻³Nmøødhjpiøchä Jesucristo tu'ugmädia'agy. Tøø yhiñnä majmactsjumøjt cooçhä Dios jim tøø xyaghoy tsajpootyp maa ja'a wyiinduumän. Cáböch nnajuø'øy pø ni'xhaam pø copc-háamhøch jimñ nhooyy, o pø juøhñdyhaam. Ja'a Dios jaduhñ nidiuhmñ najuøøby. ⁴Madiú'ujøchä hoy-yagjuøøñäjatypä jimñ nmädooyy tsajpootyp. Cáböchä cuhdajt nmøødä cooçh nmädiaactägätsät. ⁵Coo wiinghäna'c häxøpy jim tøø yhoy tsajpootyp, mänitøch häxøpy nmøjpäda'aga'añ. Pero høøch, cáböch hamdsoo nniguiumaya'añii. Jagóoyyøch nmädia'aga'añ nebiátyhøchä häyohn tøø nmänaxy tøø nyajnaxy. ⁶Nmøødhøchä cuhdajt jaduhñ cooçh nmädiä'agät nebiátyhøchä Dios tøø nmøøduñ. Hix, tøyhájthøchä Dios jaduhñ tøø nmøøduñ. Cáböch nmädia'aga'añ

cooĉ jim̄ nhooy tsajpootyp, je'eguiõxpä cooĉhä njoot quia'a tsoy cooĉ põn xmiõjpädá'agät. Cooĉhä jäya'ayhajxy xyhíxät cooĉ hoy njäya'ayhaty, cooĉ hajxy xmiädówät cooĉ hoy ngapxy nmädia'agy, mänítõch hajxy xquiumáyät.

⁷Jaanĉ teh̄m yhoy-yagjuõõñájatyhõch jim̄ nwiinhijxy tsajpootyp. Pero cabä Dios ja'a jioot chocy cooĉ nniguiumayõjät. Paadiä Dios miänaañ cooĉhä mõjcu'ugong ja'a tsaachpä xyajpáadät, jadúhnhõch hamdsoo nga'a niguiumayõjät. ⁸Tägõõghóoc-hõchä Jesucristo nja mänuu'xtaacy cooĉ cu xyajnáhwaach. ⁹Mänítõch xyhadsooy: "Njaanĉ teh̄m chojpy njaanĉ teh̄m pia'häyóobiõch miich. Páadyhõch miichä mdsaaĉpä nga'a yajnáhwa'adsa'añ, nyajcähxõ'õgáambõch jaduhñ coo miich mduñ ja'a hõõchä nmäjaagõxpä", nõmhõchä Jesucristo xñämaayy. Xoondáacpõch jaduhñ cooĉhä ndsaaĉpä xquia'a yajnáhwa'adsaannä, je'eguiõxpä cooĉ tõõ xñäma'ay cóogõch xyajtuna'añ ja'a miäjaagõxpä. ¹⁰Xoondáacpõch jaduhñ cooĉhä Jesucristo xyajtuñ, hóyhõchä tsaachpä nja paady madiu'u. Náxyhõchä häna'c xyhäyoowhixy. Náxyhõch cõxiä wiinä nyajmaajiaty. Náxyhõchä häna'c xchaaĉhtiuñ ja'a Diosmädia'agyquioxpä. Náxyhõchä häyohn nmänaxy nyajnaxy. Pero cábõch nnä'ägä mõjpáda'agy cooĉ jaduhñ njaty nhabety. Hix, cooĉ jaduhñ njaty nhabety, cähxõ'p

jaduhñ cooĉ tii nga'a tuñ ja'a nhamdsoo mäjaaháamhõch; ja'a Jesucristo miäjaaháamhõch jaduhñ nduñ.

¹¹Hoorä, hóyhõch tii nga'a ja jada'añ hamdsoo, nmaas jájpiõch hõõch quejee yõ'õ häna'c-hajxy, yõ'õ hajxy jaduhñ niñänõõmábä cooc tyijy hajxy Dyioswiinguexiä. Cábac tyijy põn jaduhñ jiaty nébiac hajxy jiatian. Y cooĉ yõ'õ häna'c-hajxy jaduhñ tõõ xñähwaambety, tiiĉ mijts jaduhñ coo tõõ xquia'a nähgapxtu'udy. Cooĉ mijts tõõ xquia'a nähgapxtu'udy, páadyhõch cham̄ hamdsoo nniñähgapxtu'udyii. Jaduhñ weenjaty yajmädooy nebiä yajcumayaambän. ¹²Mänájõch jim̄ nhitiän maa mijtsän, mäníthõchä hijxtahñd madiu'u nyajcähxõ'cy hoy-yagjuõõñájatypä. Ja'a Diosmäjaaháamhõch jaduhñ nyajcähxõ'cy. Nyajcähxõ'c-hõch jaduhñ cooĉhä Dios jaduhñ tøyhajt tõõ xwyiinguexy. Mee'xtújpõch hánajty. ¹³Jaanĉ teh̄m yhóyhõch nduñ hoy miädyii tsajtõgootiä. Jaanä jadúhnhõch jim̄ hoy nduumbä maa mijtsä mdsajtõjcän. Pero je'e mijts mga'a hojiäwõõby cooĉ mijtsä xäð'õñ tõõ nga'a mäyujwa'añ nébiõch wiingtuumjaty nyujwa'añän. Jaanĉ teh̄m wyiingä wiinmahñdy hajxy mmõõdä. Põ tõõch mijts nyagjootma'ady, hõõch hajxy huuc mé'e'xäc.

¹⁴Metsc-hóoc-hõch jim̄ tõõ nhooñä maa mijtsän. Miädägõõghóocpõch cham̄ nnõcxáangumbä. Cáboch mijts tii nmäyujwa'ana'añ. Cáboĉhä njoot chocy coo hajxy tii

xmió'owät. Jaduhñ mijts ndsocy nebiä hamdsoo huungpäñ, paady mijts jaduññ nbuhbeda'añ. Pero cáboch nmäna'añ cooch mijts xpiuhbejtägätsät xädø'õñhaam. ¹⁵Tøøchä njoot hamuumdu'joot nbäda'agy maa mijtsän coo mijts nbuhbédät hoy ñejiä, hóyhøch cøxypänejiä cu nja jat cu nja habet maa mijtscøxpän. Njaanç tehñ chojpy mijts jaduññ; pätiidä mijts jaduññ coo xquia'a tsojtägach.

¹⁶Mänáajøch jim nhoyyän maa mijtsän, cab mijtsä xädø'õñ nmäyujwaañ. Mnajuøøby hajxy jaduññ, tuhñds. Pero näje'e mijts jaduññ mmäna'añ cóogøch tyijy mijts tøø nwiinhøõñ ¹⁷mänáajøchä nmägu'ughajpähajxy jim nguexiän maa mijtsän xädø'õñyajmujpä. Jadúhñägäts tyijy mijts tøø nmämeech. Pero cab jaduññ tiøyyä. ¹⁸Mänáajøchä hermano Titohajxy jim nguexiän maa mijtsän møødä mägu'ughajpä tu'ugpä, ni je'e mijts xquia'a mäme'e'tspä. Hix, jaduññä hermano Tito howyiinmahñdy hajxy mióødäbä nébiøch nmøødän. Hoguiuhdujt hajxy mióødäbä nébiøch nmøødän.

¹⁹Jaduññ mijtsäda'a mmäna'añhaty cooc tyijy højts nja wi'i ñiñähgapxtu'uda'añii maa mijtscøxpän. Pero cab jaduññ tiøyyä. Ja'a Dios højts xyhijxp coo højts ja'a Jesucristo tu'ugmädia'agy nmøødhity. Mägu'ughajpädøjc, paady højts mijts ja'a Diosmädia'agy jaduññ nyajwiingapxø'øy, chojpy højtsä njoot jaduññ coo mijts hamuumdu'joot mjaac mábøgat. ²⁰Cooch jim nnøcxtägätsät maa mijtsän, mänítøch jootcuje

nhídät pø hoy hajxy hänäjty mwädity. Jaduhñ hajxy jootcuje mhíjpät ja'a høøchcøxpä. Pero pø cab hajxy hänäjty hoy mwädity, jootmayhádäbøch jaduññ. Jaanä jaduññ mijts mjootmayhájpat. Je'eçh jaduññ cham nnädaj nnämaaby. Je'eçh jaduññ nnänøømby ja'a ca'a howiädit, pø mnimiädsibóøyyäp hajxy hänäjty, pø cab hajxy hänäjty myajniyajmädsogyii, pø mnimiäjootmä'täp hajxy hänäjty, pø mnimiädsiphájtäp hajxy hänäjty, pø mniwyiingapxépéjtäp hajxy hänäjty, pø mniñänøømäp hajxy hänäjty cøxypä waamb, pø mniguiumäayyäp hajxy hänäjty, pø mdsipyagjájtäp hajxy hänäjty. ²¹Pø jaduññ hajxy hänäjty mjaanç jootcø'øy cooch jim nnøcxtägätsät maa mijtsän, wéhñdøchä Dios weenjaty xyajtsähdiünät maa mijtscøxpän. Je'eçh cham nnädaj nnämaaby. Nñäjootmayhádäbøch hajxy je'e, pønjetiä yhaxøøgcuhdujt hajxy hänäjty tøø quia'a najtshixø'øy. Je'eçh jaduññ nnänøømby coo wiingto'oxiøjc hajxy piawädity tehñgajnä.

13 Miädägøøghøocpøch jim nnøcxa'añ maa mijtsän. Jaduhñä cuhdujt myiñ, coo hajxy hänäjty pøn mnäxø'øwø'owa'añ, tsipcøxpä testigo hajxy myajcähxø'øgat mejtstägøøg. ²Mänáajøch jim nhuug hoobiän maa mijtsän ja'a miämetsc-hoocpä, mänítøch hajxy nyajcuhojøøyy coo hajxy haxøøg quia'a jootcøøñät, pønjetiä hänäjty haxøøgwädijp. Y chámhøch mijts jadähooc nnäma'awáangumbä

nägøxiä coo hajxy mga'a
 haxøøgwädítät. Y pø je'enä
 hajxy hänajty mhaxøøgwädity
 cooçh jim nnøcxtägätsät maa
 mijtsän, tsipcøxpøch mijts nøcxy
 nyajcumädowa'añ. ³Jadúhnhøch
 nyajcähxø'øga'añ cooçhä
 Jesucristo miädia'agy tøyhajt
 nyajnaxä. Haa ca'a, jadúhnhøch
 mijts tøø xyhuuc nämaabiä cooçh
 jaduhñ nyajcähxø'øgät. Hix,
 møcmäjaahaamä Jesucristo hajxy
 xyajcumädówät coo hajxy hoy
 mga'a wädítät. ⁴Coo ja'a Jesucristo
 miøjpahbejtä cruzcøxp, cabä
 miøcmäjaa hänajty yajcähxø'øgy.
 Pero coo jiuypiojtägajch, coo jim
 ñøcxtägajch maa ja'a Tieediän,
 jímäts jaduhñ yhiñjä ja'a Tieediä
 miøcmäjaahaam. Nebiä Jesucristo
 ja'a miøcmäjaa hijty quia'a
 yajcähxø'øguiän, jaduhñ højts
 mäjaa nga'a møødäbä hamdsoo.
 Pero coo højtsä Jesucristo
 nmøødhity tu'ugmädia'agy, paady
 højts mijts hoy nhane'ema'añ ja'a
 Dios ja'a miøcmäjaahaam.

⁵Huuc niñajuø'owøø hajxy
 hamdsoo. Coo ja'a Jesucristo ja'a
 miädia'agy hajxy hoy mbanøcxät,
 jaduhñ hajxy myajnajuø'owät
 coo ja'a Jesucristo hajxy tøyhajt
 mjaançh møødhity tu'ugmädia'agy.
 Pero coo hajxy hoy mga'a panøcxät,
 cabä Jesucristo hajxy tøyhajt
 mmøødhidät tu'ugmädia'agy.
⁶Chojpy højtsä njoot coo hajxy
 mnajuø'owät coo højtsä Jesucristo
 tøyhajt nmøødhity tu'ugmädia'agy.
 Cab højts jaduhñ nhøhnda'agy.
⁷Nmänuu'xtaacypy højtsä Dios
 coo hajxy hoy mwädítät, coo
 hajxy haxøøg mga'a jäya'ayhädät.

Pø mwädiyp hajxy hänajty hoy
 coo højts jim nnøcxtägätsät
 maa mijtsän, cab højts hänajty
 nyajcähxø'øga'añ coo højtsä
 Jesucristo ja'a cuhdujt tøø xmio'oy
 coo højts mijts nyajcumädówät.
 Y coo højts jaduhñ nga'a
 yajcähxø'øgät coo højtsä Jesucristo
 ja'a cuhdujt jaduhñ tøø xmio'oy,
 cab jaduhñ ñejpiä. Je'e højtsä njoot
 chojpy coo hajxy hoy mwädítät. ⁸Pø
 mjaançh wädiyp hajxy hänajty hoy
 coo højts jim nnøcxät, cab højts
 mijts hänajty waamb nnäma'awa'añ.
 Chojpy højtsä njoot coo hajxy
 tøyhajt hoy mwädítät. Pero pø
 cab hajxy hänajty tøyhajt hoy
 mwädity, mänit højts mijts mæböcy
 nhoja'añ. ⁹Coo hajxy hoy mwädítät,
 xoondá'agäp højts jaduhñ. Cab højts
 jaduhñ nyajcähxø'øgät coo højtsä
 Jesucristo ja'a cuhdujt hänajty tøø
 xmio'oy coo højts mijts jaduhñ
 nyajcumädówät. Nmänuu'xtaacypy
 højtsä Dios jaduhñ coo ja'a
 mhaxøøgcuhdujt hajxy mgøxy
 najtshixø'owät, coo ja'a hoguiuhdujt
 hajxy hamuumdu'joot mjaac
 panøcxät tehngajnä. ¹⁰Páadyhøch
 mijts cham weenjaty nhojy
 nocyhaam, jadúhnhøçhä njoot
 chocy coo hajxy hoy mwädítät. Ja'a
 Jesucristøçhä cuhdujt jaduhñ tøø
 xmio'oy maa mijtsøxpän, weenä
 miädia'agy hajxy maas hoy mjaac
 mæböjçä. Cabä Jesucristo jioot
 chocy coo hajxy mdu'udägóyyät. Y
 pø mjaançh wädiyp hajxy hänajty
 hoy cooçh jim nnøcxtägätsät
 maa mijtsän, cábøch mijts
 hänajty waamb nnäma'awa'añ.
 Pø caj, mänit højts mijts mæböcy
 nyajcumädówät.

¹¹Hoorä, mägu'ughajpädøjc, chámhøch jaduñ nyajmayaannä maa hajxy cham nmägapxy nhane'emiän. Huuc cudiún hajxy jaduñ nébiøch cham nnäma'ayän. Yaghoyø'ow ja'a mdu'lu hajxy. Ca'a haxøøgtu'lu hajxy mbanøcxnä. Tsøc hajxy jaduñ nimiøødhíjtäm tu'ugmädia'agy. Cab hajxy tii myajtsip myajma'adóøñät. Jaduñä Dios hajxy xmiøødhíjnät. Xchójcäm ja'a Dios hajxy. Chojpiä joot jaduñ coo hajxy jootcujc

nhíjtämät. ¹²Mniyajpoo'xóøjäp hajxy hamuumdu'joot, ween jaduñ quiähxø'øgy coo ja'a Diosmädia'agy hajxy mmäböcy. ¹³Xyajpoo'xp mijtsä hermanodøjc-hajxy yaabä, ja'a Diosmädia'agy hajxy yaa mäböjpä.

¹⁴Weenä Jesucristo hajxy nägøxiä xmio'oy ja'a hoyhajt ja'a weenhajt. Je'e hajxy nWiindsøn hájtäm. Weenä Dios hajxy xchójcäm homiänaajä. Weenä Dioshespíritu hajxy xmiøødhíjtäm nägøxiä. Amén.

Gálatas

1 ¹⁻²Høøch Pablo, hädaa nócyhøch nhädiuumby mөөдä hermanohajxy yaabä nägøxiä. Mijts hädaa nocy nyajnäguejxyp, mijts hermanodøjc jim tsänaabiä Galacia. Cab hajxy mmäná'anät cooch jäya'ay tøø xwyiinguexy. Jesucristøch xwyiinguexy mөөдä Dios ja'a nDeedyhåjtäm. Jaayá'ayädsä Jesucristo yagjujypiøjc. ³Weenä Dios ja'a nDeedyhåjtäm hajxy xmio'oy ja'a hoyhajt ja'a weenhajt mөөдä Jesucristo ja'a nWiindsønhåjtäm. ⁴Jaaya'ay hajxy xñähho'túutäm ja'a nbojpä ngädieeyhåjtäm nebiä Dios ja'a nDeedyhåjtäm tøø miäna'añän. Paadiä Jesucristo hajxy xñähho'túutäm nebiä haxøøgpä hajxy yaa xñähwáatsämät hädaa yaabä naaxwiin. ⁵Tsøgä Dios hajxy møj jaançh pädáacäm cøjxta'axiøø. Amén.

⁶Hermanodøjc, Dios hajxy xmiojyáaxäm je'eguiøxpä coo ja'a Jesucristo hajxy xchójcäm. Pero tøøch nmädoyhaty coo ja'a Diosmädia'agy hajxy mga'a panøcxnä je'eguiøxpä coo ja'a wiingmädia'agy hajxy tøø mbadu'ubøjnä. Nyagjuøøbiøch jaduhñ coo ja'a Dios hajxy

paquiä tøø mnajtshixøøñä. ⁷Pero cabä wiingmädia'agy jii neby hajxy mnähwá'adsät. Jaduhñä häna'c-hajxy näje'e wiädity yajnähixøøbiä. Xjia jøjcaxø'øwaamb mijts jaduhñ. Ja'a høhnda'agymiädia'agy mijts hajxy xyajnähixøøby ja'a Jesucristocøxpä. ⁸⁻⁹Tøøch mijts jaduhñ nhuuc nämaabiä, y chaach jadähooc nmänáangumbä, tøøch mijts ja'a Diosmädia'agy nyajnähixøøby neby hajxy jaduhñ mnähwá'adsät. Pero coo mijts pøn wiingmädia'agy xyajnähixøøwät, jiiby nøcxy quia'awa'añ haxøøgtuum, hoy piønä, hoy yhøøchä, hoy jim jia tsoon tsajpootyp.

¹⁰Ndsøjpiøch coochä Dios xquiumáyät. Cábøch ndsocy coochä cu'ughajxy xquiumáyät. Cooch häxøpy jaduhñ ndsocy, cábøchä Jesucristo häxøpy hoy nbanøcxnä.

¹¹⁻¹²Hermanodøjc, huuc wiinjuø'ow hajxy jaduhñ, hädaa mädiá'agyhøch mijts nyajwiingapxøøbiä, ja'a Jesucristøch xmiooy; ca'a jiäya'ayä xmiooy hädaa yaabä naaxwiimbä.

¹³Tøø hajxy mmädoyhaty nébyhøch hijty nwädity, mänájøchä judíos miädia'agy hajxy hänajty

nbanócxänä. Mnajuøøby hajxy nébyhøçhä jäya'ayhajxy hijty ndsaaçhtiuñ nägø'ø nädecypiä, ja'a Diosmädia'agy hajxy panøcxpä. Páadyhøch hijty ndsaaçhtiuñ nebiä Diosmädia'agy hajxy jaduhñ ñajtshixó'øwät. ¹⁴Maa yø'ø judíos miädia'agyhajxy myiñän, maas hóyhøch hijty nbanøcxy. Cábøch nmägunaax pøn hijty xyhabexy, ja'a høøch nmädu'ugyee'taact. Hix, maas pedyíijøch hijty ngudiuñ ja'a nhap ndeedy quiuhdujthajxy ja'a jecypiä. ¹⁵Pero tøøçhä Dios hijty xwyiimbiy, cáhnøch hánajty nmiñ nga'aynä. Páadyhøch tøø xmiøjya'axy cooçh xjiaançh tehñ chocy. ¹⁶Mänitä Dios miänaañ cooçhä yHuung nhixyhájtät, nébiøçhä miädia'agy jaduhñ nyajwiingapxøøyyät ja'a hajxy ca'a judíospä, neby hajxy jaduhñ ñähwá'adsät. Cooçh jaduhñ njajty, cábøch hoy pøn tøø nyajmøødmädia'agy, ¹⁷ni ja'a hermanodøjc-hajxy jim hijpä Jerusalén, ja'a hajxy hijty tøø wyiinguexyíijäbä ja'a Dios. Pero jímhøch nnøcxtøøyy Arabianaaxooty. Mänitøch nwiimbijty, nmejstägajch maa ja'a cajpt xiøhatiän Damasco.

¹⁸Coo tægøøgjomøjt hánajty tøø ñajxnä, mänitøch jim nnøcxy Jerusalén. Jímhøçhä Pedro hoy nhixyhaty. Mänitøch nmøødhijty majmocxxøø. ¹⁹Jímhøçhä Jacobo nhixyhajpä ja'a nWiindsøn'hájtämä piuhya'ay. Pero cábøçhä hermano wiingpä nhijxy, ja'a wiingexypä. ²⁰Tehñ tiøyhajt jaduhñ nébiøch cham njaayän. Cábøch nhøhnda'agy. Dióshøch jaduhñ xyhixp cooçh nga'a høhnda'agy.

²¹Mänitøch hoy nwädity Sirianaaxooty møødä Cilicianaaxooty. ²²Ja'a hermanodøjc-hajxy jim hijpä Judeanaaxooty, ja'a Jesucristo miädia'agy hajxy hánajty panøcxäbä, cáhnøch hajxy hánajty nhixyhatyñä. ²³Jagooyyä hajxy hánajty miädoyyä cooçhä Diosmädia'agy hánajty nyajwa'xnä. Tøø hajxy hijty miädoyhaty cooçhä hermanohajxy hijty ndsaaçhtiuñ, nebiä Diosmädia'agy hajxy ñajtshixó'øwät. Pero cooçhä Diosmädia'agy hánajty nyajwa'xnä høøçhpä, ²⁴paadiä Dios hajxy miooyy Dioscujú'uyäp ja'a høøchcøxpä.

2 Coo majmactsjomøjt hánajty tøø ñajxnä, mänitøch hoy ngoo'nä Jerusalén møødä Bernabé møødä Tito. ²Dióshøch jim xquiejx. Jímhøçhä Jacobo nmøødhamugøøyy hamee'ch møødä Pedro møødä Juan. Jim hajxy hánajty quiopc-haty maa ja'a hermanodøjc-hajxiän. Mänitøch hajxy nyajmøødmädiaacy nebiátyhøçhä jäya'ay ja'a Diosmädia'agy hajxy nyajwiingapxø'øy, ja'a hajxy ca'a judíospä, neby hajxy hoy ñähwá'adsät. Páadyhøçhä copc-hajpådøjc jawyiin nyajmøødmädiaacy, nébiøch hajxy jaduhñ xquia'a jøjcapxó'øwät. ³⁻⁵Xjiøjpøgøøyy højts jaduhñ; cab højts waamb xnämaayy. Tøø häna'c-hajxy näje'e yajtägø'øy maa ja'a hermanodøjc-hajxiän; nøm hajxy hánajty miäna'añ cooc tyjy hajxy pianøcxpä; pero cab hajxy hánajty tøyhajt pianøcxy. Højts

hajxy xjia jøjcapxø'øwaan. Coó hõjtsä Jesucristo miädia'agy hänäjty nbanøcxänä, cab hõjtsä judiöspä cuhdujt hänäjty nbanøcxnä. Pero cab hõjts nmøjpädaacy, neby hõjts mijts hoy njaac yajwiingapxø'øwät ja'a tøyhajt, nej mijts jaduhñ hoy mnähwá'adsät. Jaduhñ hajxy hänäjty jia mänaambä coo ja'a Tito ween yajcircuncidarhaty nebiä judiöshajxy quihdujthatiän, hoyyä Tito hänäjty quia'a ja judiöspä. Cabä copc-hajpähajxy miänaañ coo ja'a Tito yajcircuncidarhädät.

⁶⁻⁹Cábøchä Jacobohajxy hänäjty nmøjpäda'agy, hoy hajxy hänäjty tøø jia päda'agyii copc-hajpä. Hix, cabä Dios hajxy xmiøjpädaacäm, hoyyä mõjtuung hajxy nja møødhájtäm. Mänitøch hajxy xyhixyhajty coöchä Dios hänäjty tøø xwyiinguexy, coöchä miädia'agy nyajwiingapxø'øyyät ja'a ca'a judiöspähajxy, nebiä Pedro hänäjty tøø wyiinguexyijän coo ja'a judiöshajxy yajwiingapxø'øwät. Mänit hõjts ja'a copc-hajpähajxy xjijøjpøgøøyy møødá Bernabé. Mänit hõjts tu'ugmädia'agy nmähmøøyy coo hõjts nwädítät maa ja'a ca'a judiöspän, chaads häna'c-hajxy jaduhñ wiädítät maa ja'a judiöspän. Y cábøch hajxy nej xyhanehmy.

¹⁰Jagooyyä hõjts xñämaayy coo hõjtsä häyoobäya'ayhajxy nbuhbédät. Jaduhñch nnä'ägä cuhdujthaty.

¹¹⁻¹⁴Mänitøchä Bernabé nmøødhädaacy maa ja'a cajpt xiøhatiän Antioquía. Cujecy hõjtsä Pedro xpiagädaacy. Mänitä Pedro tiägøøyy caamiupä møødá hermanodøjc ja'a ca'a judiöspä.

Mänitä Jacobo miägu'ughajpähajxy näje'e quiädaacpä. Mänitä Pedro quia'a møødcaamiüjcänä ja'a hajxy ca'a judiöspä. Hix, chähgøøbiä Pedro hänäjty coo ja'a hermanodøjc-hajxy miädoyhädät jim Jerusalén, ja'a hajxy hänäjty jaac panøcxpä ja'a judiöscuhdujt. Mänitä Bernabé piajatcøøbiä møødá hermanodøjc-hajxy nägøxiä ja'a judiös, coo hajxy quia'a møødcaamiugaannä ja'a hajxy ca'a judiöspä. Hix, mejtstu'u ja'a wyiinmahñdyhajxy hänäjty. Y coöch nhijxy neby hajxy hänäjty jiatcø'øyän, coodsä tøyhajt hajxy quia'a panøcxnä, ja'a Diosmädia'agy, mänitøchä Pedro njøjcuhojøøyy ja'a hermanodøjc wyiinduumhajxy. “Jue'e miich, mjudiös miich, y caj miich hijty nbanøcxy ja'a judiöscuhdujt. Caj miichä cuhdujt mnä'ägä møødá coo miichä wiinghana'c mädsibø'øbä mnämä'awät coo hajxy pianøcxät ja'a judiöscuhdujt.” Páadyhöchä Pedro jaduhñ nhojy coo je'le ja'a pojpä hänäjty miøødá.

¹⁵Jue'e hõjtshájtäm, judiös hõjts nmiin ngáhwäm. Caj tyijy hõjts ngahwiindøyyä nebiä wiingjäya'ayhajxiän. ¹⁶Pero, paadiä Dios hajxy xpiädaacäm hawa'adstuum je'leguiøxpä coo ja'a Jesucristo miädia'agy hajxy hamuumdu'joot nmäbøjcäm, ca'a jie'leguiøxpä coo hajxy ngudiúunäm nebiä jecyquihdujt myiñän. Coo ja'a Jesucristo miädia'agy mga'a mäbøjcät, cabä Dios xpiädá'agät hawa'adstuum, hoy mja cudiuñ nebiä jecyquihdujt myiñän.

¹⁷Pero tsøc mänánañäm, coo jaduhñ quiähxø'øgät coo hõjts

ngahwiindóyyäbä, hoyyä Jesucristo miädia'agy nja mäbójcäm, cab hajxy nmánaanämät cooc tyijy ja'a Jesucristo tøø xyajtu'udägóoyyäm. ¹⁸Coo hõjtsä jecyquihdujt nnajtshixøøyyämät, cab jaduhñ yhoyyä coo hajxy jadähooc nbadu'ubójcämät. Hix, cähxó'ögäp jaduhñ coo hõjts ja'a pojpä cädieey nmøødhájtäm. ¹⁹Pero høøch, cábøchä jecyquihdujt nbanøcxnä. Tøøch nnajtshixøøñä, nébiøchä Dios hamuumdu'joot jaduhñ nbanøcxnät. ²⁰Coo ja'a Jesucristo hajxy tøø xñähho'túutäm cruzcøxp, páadyhøch je'e hamuumdu'joot nbanøcxy; cábøch nhamdsoo wiinmahñdy nyajtunaannä. Tu'ugmädiá'agyhøchä Jesucristo xmiøødhijnä. Xchójpøch je'eduhñ, páadyhøch tøø xñähho'tu'udy. ²¹Paadiä Dios hajxy xpiädäacäm hawa'adstuum je'leguiøxpä coo ja'a Jesucristo miädia'agy hajxy nmäbójcäm; ca'a jie'leguiøxpä coo ja'a jecyquihdujt hajxy ngudiúunäm. Coo häxøpy quia'a jaduhñä, xiøøbä ja'a Cristo häxøpy tøø ñä'a ho'ogy. Paady, cábøchä hoyhajt nnajtshixøøwa'añ mädyíjøchä Dios tøø xmiø'oy.

3 ¹⁻⁵Mijts hermanodøjc, nej, mguhmañøøby hajxy jaduhñä coo ja'a Diosmädia'agy hajxy mga'a panøcxaannä. Nej, mbanøcxtägatsaambiä jecyquihdujt hajxy jadähoocä. Mnajuøøby hajxy coo ja'a Jesucristo hajxy tøø xñähho'túutäm. Coo mijtsä Jesucristo miädia'agy tøø mmäbójcä, paadiä Dios ja'a yhEspiritu hajxy tøø xmiø'oy, paadiä hoy-yagjuøøñäjatypä

tøø yajnaxy maa mijtsän. Ca'a jie'leguiøxpä coo ja'a jecyquihdujt hajxy hijty mgudiunñ. Pero cabä ndijy ja'a Diosmädia'agy hajxy tøyhajt mnajtshixøøwa'añ.

⁶Ja'a Abraham, ja'a hajxy nhaphájtäm ja'a hajxy ndeedyhájtämbä, miäbøjc je'e ja'a Diosmädia'agy. Paadiä piädaacä hawa'adstuum. ⁷Y coo hõjtsä Diosmädia'agy nbamäbójcämät, mänitä Dios hajxy xpiädäacämät nebiä Abraham yhap yhocän. Mänit hõjts xpiädäacänät hawa'adstuum. ⁸Jéquiänä Dios ja'a Abraham ñämaayy: “Miiçhcøxpøchä jäya'ayhajxy nbuhbeda'añ nägøxiä ja'a wiinduhmyhagajtpä je'leguiøxpä coo miich tøø mmäbøcy.” Jiiby jaduhñ myiñ cujaay maa ja'a Diosmädia'aguiän. Jaduhñ hajxy nyajnajuøøyyäm coo ja'a Dios hajxy xpiäda'agáañäm hawa'adstuum pønjaty mäbøjp, hoy hajxy quia'a ja judíosä. ⁹Entonces, ja'a hajxy mäbøjpä, jaduhñ hajxy piuhbedyii nebiä Abraham jecy piuhbejtän.

¹⁰Ja'a hajxy jaduhñ mänaambä cooc tyijy hajxy ñähwa'adsa'añ je'leguiøxpä coo ja'a jecyquihdujt hajxy quiidiunñ, haxøøgtuum hajxy je'e piäda'aga'añii. Jaduhñ jiiby myiñ cujaay maa ja'a jecyquihdujtän, “Haxøøgtuum piäda'aga'añii pønjaty hoy ca'a cudiuumb nebiaty hädaa libro xyhanéhmäm.” ¹¹Jaduhñ jiiby myiimbä cujaay maa ja'a Diosmädia'aguiän: “Coo ja'a Diosmädia'agy hajxy nmäbójcämät, mänitä Dios hajxy xyajnähwäatsämät.” Ca'a

jie'eguiøxpä cooc tyijy hajxy ngudiúunäm ja'a jecyquihdujht.

¹²Pero jaduhnä jecyquihdujht miäna'añ: “Pønä jecyquihdujht cudiuumb, hawa'adstuum piäda'aga'añii.”

¹³Coodsä jecyquihdujht hajxy hijty hoy nga'a cudiunáanäm, haxøøgtuumä Dios hajxy hijty xpiäda'agáanäm. Pero xñäxúu'tsämä Dios hajxy jaduhn; paadiä Jesucristo hajxy xñähho'túutäm; paadiä Dios hajxy xpiädáacäm hawa'adstuum. Jaduhnä jiiby myiñ cujaay maa ja'a Diosmädia'aguiän: “Pøn möjpahbéjtäp quepyquixp, tøø hánajty piäda'agyii haxøøgtuum.”

¹⁴Paadiä Jesucristo hajxy tøø xñähho'túutäm, nebiä jäya'ayhajxy jaduhn piuhbéjtäbät, ja'a hajxy ca'a judíospä, nebiä Abraham jecy piuhbejtän. Y coo hajxy nmäbøjcämät, mänitä Dios ja'a yhEspíritu hajxy xmio'owáanäm nägøxiä neby hajxy jecy xyajwiinwaanøøyyäm cooc hajxy xmio'owáanäm.

¹⁵Hermanodøjc, tsøg hajxy mädiáacäm neby hajxy yaa nguuhdujhtájtäm hädaa yaabä naaxwiin. Cooc pøn tii yajcuhdúgät maa ja'a hagujtøjcän, coo fyirmarhadät, ni pøn jaduhn quia'a yajtagátsät, ni quia'a mäná'anät coo quia'a hoyyá.

¹⁶Bueno, coo ja'a Dios ja'a Abraham miøødyajcuhdujcy cooc hoy miänaajä piuhbeda'añ, jaduhn miänaambä cooc ja'a Abraham yhap yhoc miøødyajcuhdújcäbä. Jaduhn jiiby myiñ cujaay maa ja'a Diosmädia'aguiän. (Cab

jaduhn myiñ cooc hajxy nämay miøødyajcuhdujcyä.) Cooc jaduhn miäna'añ: “Abraham yhap yhoc”, ja'a Jesucristo jaduhn nänøømäp. ¹⁷Y coo mädaaxmägo'xcuhii'xmajcjomøjt hánajty tøø ñaxy, mänitä jecyquihdujht piädaacä. Pero cab jaduhn yajtagajch nebiä Dios ja'a Abraham hánajty tøø miøødyajcuhduquiän. ¹⁸Coo häxøpy quia'a tøyhajtä jaduhn, cab häxøpy tiuñ nebiä Dios jecy yajcuhdujquiän.

¹⁹Paadiä Dios ja'a jecyquihdujht yejcy neby jaduhn quiahxø'øgät coo ja'a pojpä cädieey hajxy nmøødhájtäm. Pero coo ja'a Jesucristo yaa tøø yhoy hädaa yaabä naaxwiin, ja'a hánajty tøø miøødyajcuhdugyíjábä, cabä jecyquihdujht jaduhn tiunaannä. Bueno, coo ja'a Dios ja'a jecyquihdujht piädaacy, mänitä mioonsä tsajpootypä ja'a Moisés hoy mio'oy. Mänitä Moisés jiyeynajxy. ²⁰Pero hamdsoo ja'a Dios ja'a Abraham miøødyajcuhdujcy; cabä jiyeynajxpä jaduhn ñälä yajtuuñ.

²¹Cab hajxy nmänáanämät coo ja'a jecyquihdujht yajtagajch nebiä Dios hánajty tøø yajcuhduquiän. Cooc ja'a Dios häxøpy tøø miäna'añ coo hajxy cu nnähwáatsäm maa ja'a jecyquihdujtän, pues tøø ja'a jecyquihdujht hajxy häxøpy xyajnáhwáatsäm ja'a nbojpä ngädieeyhájtäm. ²²Ja'a Diosmädia'agy jaduhn mänaamb coo hajxy nägøxiä nhíjtäm haxøøgtuum je'eguiøxpä coo ja'a pojpä cädieey hajxy nmøødhájtäm. Pero coo ja'a Jesucristo miädia'agy

hajxy nmäbójcämät, mänitä Dios hajxy jaduñ xyhuunghájtämät nebiä jecy jajcuñdujquiän.

²³⁻²⁵Tuungpaatpä jecyquihdujt hijty. Tsipcøxp hõjts hijty ngudiúunäm. Pero coo ja'a Jesucristo tøø yhoy, cab hõjtsä jecyquihdujt nbanócxänä. Coo ja'a Jesucristo miädia'agy hajxy nmäbójcämät, jaduñä Dios hajxy xyhuunghájtämät.

²⁶Y xjiaančh huunghajp mijts ja'a Dios je'eguiøxpä coo ja'a Jesucristo miädia'agy hajxy mmäbójcä, coo ja'a Jesucristo hajxy mmøødhity tu'ugmädia'agy. ²⁷Y coo hajxy jaduñ mmøødhídät, coo hajxy jaduñ mnäbétät, mänitä Dios hajxy xyhuunghádät, nebiä Dios ja'a Jesucristo yHuunghatiän.

²⁸Tu'ugmädia'agy hajxy mhijnä møødä Jesucristo. Cabä Dios tiehm yajtøy pø mjudios, pø caj, pø mmäyøø, pø caj mmäyøøjä. Cabä Dios yajtøy ja'a haagä tehñ ya'adiøjcpä, ja'a haagä tehñ tio'oxiøjcpä. Jøjwa'achä yajtøy. Jaduñä Dios hajxy xyhijxnä nebiä yhamdsoo huungän. ²⁹Y coo ja'a Jesucristo hajxy mmøødhity tu'ugmädia'agy, paadiä Dios hajxy xyhuunghaty, nebiä Dios ja'a Abraham jecy yhuunghajtiän.

4 ¹⁻²Jaduñds je'e, coo jäya'ayhajxy hänäjty näje'e yho'ogaanä, mänit hajxy miäna'añ coo yhuunghajxy yhiñxäxät ja'a miägu'ughajpähajxy. Coo ja'a yhuunghajxy miøjjøøñät, mänit nädeedy hajxy miämähmøøñät. Pero coo hajxy hänäjty miuutsnä, jaduñ hajxy yhane'emyii nebiä moonsän, høxtä coonä

hajxy hänäjty tøø miøjjøøñä. ³Y hõjtshájtäm, coo ja'a Jesús hajxy hänäjty nga'a hixyhájtämñä, jaduñ mäwíinäts hajxy hijty nhájtäm nebiä hane'emybiän coo ja'a jecyquihdujt hajxy hijty tehngajnä nbanócxäm. ⁴Pero coo yhabaaty, mänitä Dios ja'a yHuung quiejxy; Jesucristo je'e. Hoy je'e miñguia'ay neby hõjtshájtämän yaa judíosnaaxooty, maa ja'a jecyquihdujt tiuñän. ⁵Paadiä Jesús quiejxä neby hõjts jaduñ xñähho'túutämät, je'eguiøxpä coo hõjts ja'a jecyquihdujt hijty nbanócxäm tehngajnä. Coo hajxy xñähho'túutäm, xyhuunghájtäm ja'a Dios hajxy jaduñ.

⁶⁻⁷Xmio'owáanäm hajxy jaduñ nebiaty nãgapxy. Cab hajxy nhájtänä nebiä hane'emybiän. Coo ja'a Dios hajxy xyhuunghájtäm, paadiä yHespíritu hajxy xyajnäguéjxäm. Paady hajxy je'e nnämäayyäm: "Teedy" hamuumdu'joot.

⁸Jue'e mijts hijty mwi'i wyiingudsähgøøby, quepychech naaxpoch. Cahnä ja'a Dios hajxy hänäjty mhixyhatyñä. ⁹Pero coo ja'a Dios hajxy tøø xwyiimbiy, paady hajxy mhixyhajnä. Cab jaduñ yhahixø'øy coo ja'a jecyquihdujt hajxy jadähooc mbadu'ubójcombät. Cab hajxy nyaghanéhmanät maa ja'a jecyquihdujtän. ¹⁰Pero mijts, je'enä xøø hajxy mwi'i yagjadyii. Jaduñ tyijy hajxy mnähwa'adsa'añ. ¹¹Nej, xiøøbøch mijts ja'a Diosmädia'agy tøø nja yajwiinhixø'øyä. Pø tøyhajt jaduñ, njaančh tehñ yagjuøøbiøch jaduñ.

12-14 Hermanodøjc,
 nnámá'awábøch mijts cooçh
 mijts xpiahíxät. Najtshixø'ow
 ja'a jecyquihdujt hajxy
 nébiøch tøø nnajtshixø'øyän.
 Mánáajøch mijtsä Diosmädia'agy
 nyajwiingapxøøçhooñän, hóyhøch
 mijts xmiägu'ugpøjcy. Jadúhnhøch
 hajxy xjiøjpøgøøyy nebiä
 Diosquexiän, nebiä Jesucristän.
 Cábøch hajxy xxiøøghajty,
 hóyhøchä pa'am hánajty nja møødä,
 hóyhøch mijts hoxiøøghajnä
 hánajty xjia hixy. Cooçhä pa'am
 hánajty nmøødä, páadyhøch
 jim nmähmøøyy maa mijtsän.
 15 Pero mijts, cab hajxy jootcujc
 mhijnä. Pänebiä hajxy tøø mjaty.
 Mánáajøch jim nhitiän maa
 mijtsän, høøchcøxpä mijts hánajty
 mduñ hoy miädyii mayhajtä.
 Xmióobiøch mijts hánajty hoy tyiijä.
 16 Páadyhøch mijtsäda'a xquia'a
 mägu'ughadaannä cooçh mijts tøø
 nhawáañäm ja'a tøyhajt.

17 Y häna'c-hajxy
 høhñdaacpä, paady mijts hajxy
 xmiägu'ughada'añ nébiøch mijts
 jaduñ xquia'a panøcxnät. Pero
 caj mijts hajxy hamuumdu'joot
 xmiägu'ughada'añ. Xñä'ä
 wiinhøønaamb mijts hajxy jaduñ.

18 Hoy hit jaduñ coo mijts pøn
 hamuumdu'joot xmiägu'ughádät
 hoy miánaajä, hóyhøch hánajty
 jim nga'a ja hity maa mijtsän.

19 Mägu'ughajpä, jaançh tehñ
 jiootmayhájpøch jadähooc ja'a
 mijtsøxpä. Jiaançh tehñ chójpiøch
 njoot coo mijts ja'a Jesucristo
 mmøødhídät tu'ugmädia'agy. 20 Cu
 nnøcxyhøch jim maa mijtsän. Cu
 nmøødmädiäacyhøch mijts jaduñ

yajxón. Cooçh mijts hoy nga'a
 møødmädia'aga'añ hajäya'ayhaam,
 cábøch nnajuø'øy nébiøch ndaj
 nmáyät ja'a mijtsøxpä.

21 Hoorä, pø chojpiä mjoothajxy
 tehngajnä coo ja'a jecyquihdujt
 hajxy mbanøcxa'añ, huuc mäadow
 hajxy neby jiiby myiñän maa
 ja'a jecyquihdujtän. 22-23 Metscä
 Abraham yhuung hánajty. Tu'ug
 hánajty xiøhajty Isaac. Tøø
 Dios Abraham hánajty jaduñ
 yajwiinwaanø'øy coo ja'a Isaac
 hánajty myina'añ quia'awa'añ.
 Abraham yhamdsoo huunghajxy
 je'eduhñ møødä tio'oxiøjc. Jatu'ugpä,
 Ismael je'e xiøhajpä. Jaduhyä
 je'e ñä'ä miiñ ñä'ä cahy. Moonsä
 je'e tiajhajt. 24-25 Hädaa mädia'agy,
 nebiä hijxtahñdän hädaa jaduñ.
 Ja'a Ismael tiaj, ja'a Agarhajpä,
 moonsähajp hánajty je'e. Cabä
 yhamdsoo cuhdujt hánajty yaghity.
 Hoorä, coo ja'a Dios ja'a cuhdujt
 yejcy maa ja'a tun hánajty xiøhatiän
 Sinaí, jim Arabianaaxooty, jaduñ
 mäwíinäts hajxy nhíjtäm nebiä
 Agar hánajty mioonsähatiän. Cabä
 nhamdsoo cuhdujt hajxy nyaghíjtäm.
 Mejtstu'ua ja'a tun hánajty xiøhaty.
 Xøhajp hánajty Sinaí, møødä
 hánajty xiøhaty Agar. Ja'a cajpt
 jaduñ xøhajpä Jerusalén, ja'a
 hädaa yaabä naaxwiimbä, jaduñ
 mäwíinäts je'e nebiä Agarän. Hix,
 cabä Jerusalénpä-jäya'ay yhamdsoo
 cuhdujt hajxy yaghity. 26 Jaduñ
 ja'a cajpt jim xiøhajpä tsajpootyp
 Jerusalén. Jim hajxy nxøonájxäm.
 Cabä jecyquihdujt jim tiuunnä nebiä
 Dios yejquiän Sinaí. Jemyguiuhdújtäts
 jim túunnäp. 27 Jaduñ jiiby myiñ
 cujaay maa ja'a Diosmädia'aguiän:

Huuc xoon̄da'ag, hoyyá huung
mga'a ja paadyñá, Maas may
miičh huung mbaada'añ.

Cabá mmoonsá may jiaty
paada'añ.

²⁸Hoorá, hermanodøjc, tøø ja'a
Dios hajxy xyajnáhdíjjám coo hajxy
xyhuunghadáanám, nebiá Isaac
yajnáhdíjján. ²⁹Dios ja'a yhEspíritu
ja'a Isaac yajmágunuu'xøøyy
coo myínát. Cabá Ismael
yajmádsojcy coo ja'a Abraham
ja'a Isaac yhuunghádát. Jaduhñ
máwíináts højtsá jáya'ayhajxy
xquia'a yajmádsójcám coo ja'a
Dios hajxy xyhuunghájtámát.

³⁰Jaduhñ jiiby myiimbá cujaay
maa ja'a Diosmádia'aguian̄:
“Høxquejxpádsøm yø'ø
to'oxymoosá møødá
yhuung.” Cabá moonsá yhuung
ñäl'ägädá puhmo'owa'añii
ñádeedy. Pero yhamdsoo
to'oxiøjc yhuung, je'eds jaduhñ
mio'owaamby. ³¹Hermanodøjc,
coo ja'a Diosmádia'agy hajxy
hamuumdu'joot ndsójcám, jaduhñ
máwíináts hajxy nhíjtám nebiá
Isaac jecy yhijtian̄. Pero ja'a hajxy
ca'a tsojpa, jaduhñ máwíináts hajxy
je'e nebiá Ismaelán, ja'a moonsá
yhuung.

5 Coo ja'a Dioscuhdajt hajxy
nyaghíjtám, mádyii ja'a
Moisés jecy miáhooyy, jaduhñ
máwíináts hajxy hijty nhíjtám
neby hajxy hadsip yajtuñíjjábán.
Coo ja'a Jesucristo quiádaacy,
mánit hajxy xñámáayyám coo
ja'a jecyquihdujt hajxy nga'a
møjppádaacánát. Xyhawáanám hajxy
jaduhñ neby hajxy nnáhwáatsámát.
Hamuumdu'jootá Jesucristo

miádia'agy hajxy mbanócxát.
Cabá Moisés jecyquihdujt hajxy
mbadu'ubójcát jadáhooc.

²Huuc hamádoowhit hajxy. Coo
hajxy nyajcircuncidarhájtámát
cooc tyijy hajxy jaduhñ
nnáhwa'adsáanám, xiøøbá ja'a
Jesucristo hajxy háxøpy tøø xñá'ä
náhho'túútám. Høøčh jaduhñ
mánaamb, Pablo. Diosquéyhøch
høøčh. ³Jaduhñhøch jadáhooc
nmánaangombá, pønjaty mánaamb
coo hajxy yajcircuncidarhádt,
tsipcøxp hajxy quiudiúnát
nebiatiá Moisés jecyquihdujt
yajnáhdíjy coo hajxy quiudiúnát.

⁴Jii hána'c-hajxy náje'e miána'añ:
“Páadyhøch nnáhwa'adsa'añ
coočhá Moisés jecyquihdujt
hoy ngudiuná.” Pero cab jaduhñ
tiøyyá coo hajxy ñáhwa'adsa'añ.
Hiç, cabá Jesucristo hajxy
miøødhijná tu'ugmádia'agy.
⁵Pero nmábójcám højts coo
hajxy nnáhwa'adsáanám ja'a
Jesucristocøxpá. Ja'a DioshEspíritu
hajxy xpiuhbedáanám. ⁶Coo ja'a
Jesucristo hajxy tu'ugmádia'agy
nmøødhíjtámát, cab jaduhñ ñejpiá
pø tøø hajxy nyajcircuncidarhájtám,
o pø caj. Je'eduhñ tsoobaatp
coo ja'a Jesucristo miádia'agy
hajxy nmábójcámát y coo hajxy
hamiñ háxøpy nničhójcámát nebiá
Jesucristo hajxy xchójcám.

⁷Hoy ja'a Diosmádia'agy hajxy
hijty mbanøcxy. Pátiidá hajxy coo
tøø mnajtshixø'øy. Pábøndá hajxy
tøø xwyiinhøøñ. ⁸Ca'a Dyiosá
hajxy xyajnajtshixøøyy. Jaaya'ay
hajxy xyajnáhdíjjám coo ja'a
miádia'agy hajxy nbanócxámát.

⁹Jaduhñá jáya'ayhajxy

miäna'añ: "Coo tsajcaagychooy weeñtiä nbädáacämät, cõxiä harina yajtägø'oyii." Jaduhñ mäwíinäts højtshájtäm coo häna'c høhnda'agymiädia'agy hajxy xyajnähiçøyyämät; nägøxiä hajxy jaduhñ nmá'tämät. ¹⁰Nbädáacypiøçhä njuøhñdy ja'a Dioscøxpä coo wiingmädia'agy hajxy mga'a mábøgät. Dios jaduhñ yajcumädowaamb pøn mijts høhnda'agymiädia'agy xyajnähiçøby.

¹¹Tehngájnoçhä Diosmädia'agy nyajwa'xy coo ja'a jäya'ayhajxy ween miäbøcy; je'leguiøxpä coo ja'a Jesucristo hajxy tøø xñähho'túutäm cruzcøxp. Páadyhøçhä jäya'ayhajxy xmiähanhaty. Näje'le hajxy miäna'añ cooc tyjy høøçhä mädia'agy nyajwa'xy coo hajxy ween ñiseñapäda'agyii. Pero cab jaduhñ ñä'a tøyyä. Cooçhä mädia'agy häxøpy nyajwa'xy coo hajxy yajcircuncidarhádät, cábøçhä jäya'ayhajxy häxøpy xmiähanhaty. ¹²Yø'ø häna'c mijts xjia wi'i ñämaabiä coo hajxy myajcircuncidarhádät, ween hajxy jaduhñ xpiuhwaatsnä.

¹³Tøø mijts ja'a Dios xyajnähdijy coo ja'a Moisés jiecycuiuhdujt hajxy mnajtshixøyyät. Pero cabä Dios jaduhñ miäna'añ coo hajxy cøxypänejpiä mjäya'ayhádät. Jaduhñ miäna'añ coo hajxy yajxøn mniçhogøøjät, coo hajxy yajxøn mnibuhbedøøjät. ¹⁴Jaduhñä Dios jiecycuiuhdujt miäna'añ coo hajxy hoy piønä mdsoc mba'häyówät hädaa yaabä naaxwiin nebiä mhamdsoo ni'x nebiä mhamdsoo copc hajxy mdsocuiän. ¹⁵Cab

jaduhñ yhooyä coo hajxy mnimiähanhadøøjät tu'ugpä tsajtøjc, jaduhñ hajxy mga'a niyajtägoyyøøjät.

¹⁶Hoy hajxy mwädítät ja'a Diosmäjaagøxpä. Cabä mhamdsoo wiinmahñdy hajxy myaghíjnät, hoyyä mjoothajxy hänäjty tii jia tsocy. ¹⁷Ja'a Diosmäjaa, cabä tu'ugjuøhñdy yhity møødä haxøøgcuhdujt. Coo hänäjty haxøøg mjatcø'owa'añ, Dios xyhadujp mga'a jatcø'oy jaduhñ cøxypänejpiä. Hoorä, coo ja'a mjoot hänäjty chocy coo hänäjty hoy mwädita'añ, ja'a mhaxøøgwiinmahñdy jaduhñ xyhadujp. ¹⁸Pø chojpiä mjoot jaduhñ coo ja'a Diosmäjaagøxpä mwädítät, cabä Moisés jiecycuiuhdujt mbanøcxänät.

¹⁹Madiu'u ja'a jäya'ayhajxy yhaxøøgcuhdujthaty: jabiøcy hajxy ñimiøødsäna'ayii; cøxypänejpiä hajxy jäya'ayhaty; haxøøg hajxy wiädity, hoy hajxy jia to'oxiøjcmøødä; ²⁰wyiingudsähgøøbiä quepychech naaxpoch hajxy; mähijxp mábäxujp hajxy; nimiädsiphájtäp hajxy; yhadsojpy hajxy mädyijatiä miägu'ughajpähajxy miøød; paquiä hajxy ñimiäjootma'adyii; wiinduc-ho'p hajxy; nibiuhyohdiúutäp hajxy; cab hajxy tiu'ugmädia'aguüä; ²¹hadsojt hajxy wyi'i miøød; jäya'ay-yagho'p hajxy; haxøøghuucp hajxy, haxøøgjøø'xp hajxy; madiu'u hajxy jaduhñ jiatcø'oy. Tøøds mijts nja yagjahmiech, chaads jadähooc nhawáanäm: pøn haxøøgcuhdujt møød, cab jim ñøcxa'añ tsajpootyp.

²²Pero coo ja'a Diosmäjaagøxpä hajxy nwädíjtämät, Dios hajxy

jaduh_n xpiuhbéjtäm coo ja'a jäya'ay hajxy hoy nmägu'ughájtämät, coo hajxy nxoondáacämät, coo hajxy jootcuje nhíjtämät, coo hajxy nmee'xtújcämät, coo ja'a nmäjøøn coo ja'a nmädøjc hajxy yajxón nmägu'ughájtämät, coo ja'a hojioot hajxy nmøødhájtämät, coo hajxy nga'a hønhdáacämät, ²³ coo hajxy mee'xxieemy nhíjtämät, coo hajxy jootxeemy nhíjtämät. Coo hajxy jadu_hn njäya'ayhájtämät, cab hajxy pøn waamb xñámáayyämät. ²⁴ Pønä Jesucristo miädia'agy panøcxäp hamuumdu'joot, tøø ja'a yhaxøøgcuhdujt yhøxhixy, y cab jadu_hn jiahmiejtsnä. ²⁵ Pøø mänäänäm hajxy jadu_hn coo ja'a Diosmäjaagøxpä hajxy nhíjtäm, tsøøg hajxy hamuumdu'joot pawädíjtäm.

²⁶ Cab hajxy nyajcumáayyämät; cab hajxy nniyagjootmá'tämät hamiñ haxøpy; cab hajxy cøxiä wiinä nniyhadsójcämät.

6 Hermanodøjc, coo pøn tiu'udägóyyät, mee'xxieemy hajxy mmägäp mhané'emät, nej mijtsä Diosmäjaa mmøødän, weenä yhaxøøgpä yhøxhijxnä. Pero mnigwieendähadøøjpä hajxy coo mijts jaduh_n mnä'a tu'udägóobiät. ² Nibiuhbedøø hajxy neby hajxy jaduh_n mmäjädá'agät, neby hajxy jaduh_n mga'a tu'udägóyyät. Jaduh_ndsä Jesucristo miädia'agy hajxy mgudiúunät.

³ Pøn yajcumayaamb je'eguiøxpä cooc tyijy miøjjä, caj ñä'a tøyyä coo miøjjä. Nä'a niwyiinhøhnäp jaduh_n. ⁴ Cøjwiinduum hajxy mniyhixøøjtät pø hoy hajxy tøø mgudiúñ. Y pø tøø hajxy hoy mgudiúñ, mänit hajxy mxoondá'agät.

Pø tøø ja'a mmägu'ughajpä hajxy mbexy, cab hajxy nøcxy mniguiumayii. ⁵ Cøjwiinduum hajxy mniyajcopcø'owøøjtät pø hoy hajxy mgudiúñ.

⁶ Pøn jadu_hn yajnahixøøyyäp ja'a Diosmädia'agy, tsipcøxpä ofrenda hajxy yégät, mio'owøøjtät ja'a yajnahixøøbiä.

⁷ Ca'a hajxy myajwiinhøøñ; ñajuøøbiä Dios neby hajxy nwiinmahñdyhájtäm. Nej tøø mjäya'ayhatiän, høxtä jaduh_n mguhbédät. ⁸ Pønä Dioshespíritu panøcxp, je'e cøjxta'axiøø jugyhadaamb nebiä Dios jugyhatiän; pero pøn yhamdsoo cuhdujt yajtuumb, cab jaduh_n jugyhada'añ nebiä Dios jugyhatiän. ⁹ Tsøögä njoot hajxy møc pädáacäm; coo hajxy tehngajnä hoy nwädíjtämät, mänit hajxy jim nnøcxämät tsajpootyp coo yhabáatnät. ¹⁰ Hoy miänaajä ja'a jäya'ay hajxy mbuhbédät nägøxiä. Tsipcøxpädsä hermanodøjc hajxy mnä'ägädä puhbédät.

¹¹ Hamdsójoøch hädaa letra nhädiúñ, paady miøjjatiä. ¹² Pønjaty mijts xjia wi'i ñämaaby coo hajxy myajcuncidarhädät, paady hajxy jaduh_n miäna'añ coo hajxy wyl'i yajcumaya'añ cu'ughagujc. Hix, tsähgøøby hajxy jaduh_n coo hajxy miädsibø'owøøjtät ja'a homiädia'agyquiøxpä, coo ja'a Jesucristo hajxy tøø xñäho'túütäm cruzcøxp. ¹³ Hoy hajxy näje'e tøø jia yajcuncidarhaty, cabä Moisés jiecycuiuhdujt hajxy yajtuunä. Paady mijts hajxy xjia wi'i ñäma'ay coo hajxy myajcuncidarhájpät, yajcumayaamb hajxy jaduh_n ja'a

mijtsçxpä. ¹⁴Pero høøch, cábøch nmána'añ coo mädyii miøjjä jiaančhä. Jagóoyyøch nmána'añ coo miøjjä jiaančhä coočhä Jesucristo tøø xñähho'tu'udy cruzcøxp. Cábočhä njoot yaa nbádaacnä hádaa yaabä naaxwiin. Hoyyä jäya'ay hajxy waambaty jia mäná'anät, cáboch tii nmøjpádaacnä. Cáboch tii hadsojt nmøødän hádaa yaabä naaxwiin. ¹⁵Cab jaduñ ñejpiä pø tøø myajcircuncidarhaty o pø caj.

Je'eduhñ tsoobáatnäp coo ja'a Dios hajxy tøø xpiádaacäm hawiinjemy.

¹⁶Pønä Diosmädia'agy hoy cudiuumb, je'eds hoyhajt weenhajt mo'owáañäp.

¹⁷Páadyhøch chaa nnähxäguuäch nguhxäguuächä coočhä Jesucristo miädia'agy tøø nmädiaacä. Y cooč jaduhñ tøø ngudiuñ, páadyhøchä cuhdujt nmøødän. Páadyhøch hajxy tii xquia'a yajnámáañät.

¹⁸Hermanodøjc, weenä Jesucristo hajxy xcwieendähaty. Amén.

Efesios

1 Høøch xøhajt Pablo. Høøch hädaa nocy njahby. Ja'a Dios jaduhñ mänaañ coöchä Jesucristo xwyiinguéxät. Mijts hädaa nocy nyajnäjaayøøby pønhatiä Diosmädia'agy mäbøjp jim maa ja'a cajpt jaduhñ xiøhatiän Efeso, pønhatiä Jesucristo miädia'agy jim hoy yajtúunäp. ²Weenä Dios hajxy xmiø'oy ja'a hoyhajt ja'a weenhajt, møødä Jesucristo. Ja'a Dios hajxy nDeedyhájtäm. Ja'a Jesucristo hajxy nWiindsønhájtäm.

³Tsögä Dios hajxy wiingudsähgøøyyäm. Ja'a Jesucristo, Dyioshajpiä Dios je'eduhmbä; y jaduhñ je'e Tieedyhajpä. Coø ja'a Jesucristo hajxy xmiøødhíjtäm tu'ugmädia'agy, paadiä Dios tsajpootypä ja'a mayhajt madiu'u tiuñ ja'a højtscøxphájtäm. ⁴Cahnä hädaa yaabä naaxwiin hånajty chohnda'agy, tøøyyämä Dios hajxy hånajty xwyiimbiiwäm coø ja'a Jesucristo hajxy xmiøødhíjtämät tu'ugmädia'agy. Jaanä jaduhñ hajxy xwyiimbiiwämbä coø hajxy hoy njäya'ayhájtämät, coø hajxy nga'a cädiéhyyämät, jaduhñ hajxy wa'ads hoy nhíjtämät maa ja'a Dioswiinduumän. ⁵Coo ja'a

Dios hajxy xchójcäm, paadiä Jesucristo yaa quiejxä hädaa yaabä naaxwiin ja'a højtscøxphájtäm. Paadiä Dios ja'a Jesucristo yaa quiejxy coø ja'a Dios hånajty tøø wyiinmay coø hajxy xyhuunghadáanäm. Hamdsoojootä Dios jaduhñ miänaañ coø hajxy xyhuunghájtämät. ⁶Tsøcxä Dios hajxy wiingudsähgøøyyäm coø hajxy xjiaanč tehñ chójcäm, coø ja'a Jesucristo yaa quiejxä maa højtshájtäm. Jaduhñä Dios ja'a mayhajt møj tiuñ ja'a højtscøxphájtäm. Paady hajxy xchójcäm coø ja'a Jesucristo hajxy xmiøødhíjtäm tu'ugmädia'agy. Hix, jaanč tehñ chójcäbä Jesucristo ja'a Tiéediäm. ⁷Coo ja'a Dios hajxy jaduhñ xjiaanč tehñ chójcäm, paadiä Jesucristo hajxy yaa hoy tøø xñähho'túütäm, jaduhñä nbojpä ngädieey hajxy xyajnahwaats xyajcuhwäätsäm. Jaduhñä Dios hajxy xmiée'xäm. ⁸Coo hajxy jaduhñ xjiaanč tehñ chójcäm, paady hajxy hoy tøø xyajwiinjuøøyyäm nebiaty jaduhñ tøø wyiinmay ja'a højtscøxpä. ⁹Tøø ja'a wyiinmahñdy hajxy xyhawáanäm ja'a hijty jaduhñ quiuyu'chpä. Hamdsoojootä Dios

jaduhñ tøø wyiinmahñdyhaty. Chojiä jioot hñajty jaduñ coo ja'a mayhajt hñajty tiuna'añ ja'a højtscøphájtäm. ¹⁰Jaduhñä Dios tøø wyiinmahñdyhaty coo ja'a Jesucristo Wyiindsønhadóøjtät cøxiä tijaty jim tsajpootyp, møødä tijaty yaa hädaa yaabä naaxwiin. Coo ja'a Dios jaduñ yaghabáadät, mänit hñajty tiøjiada'añ coo ja'a Jesucristo jaduñ Wyiindsønhadá'añii.

¹¹Ja'a Dios, yajtøjiajpy je'eduhñ nebiaty je'e wyiinmay. Hoorä, jéquiänä Dios wyiinmaay coo højts ja'a yHuung xyajñahwa'ads xyajcuhwá'adsät, højts judíospä, coo højts jaduñ nmøødhidät tu'ugmädia'agy. ¹²Jequiän højts ja'a nhap ja'a ndeedy ja'a Dios ja'a miädia'agy hajxy tiägøøyyä mábøjcäbä coo højts xyajñahwa'ads xyajcuhwá'adsät. Hoorä, paadiä Dios jaduñ jecy wyiinmaay coo højts ja'a yHuung xyajñahwa'ads xyajcuhwá'adsät, jaduñä jäya'ayä Dios hajxy nägøxiä wyiingudsähgø'owät coo jiaanč tehñ miøjjä coo jiaanč tehñ jiaančhä. ¹³Y mijts ja'a ca'a judíospä, jaanä jaduñä Dios tøø wyiinmaabiä coo mijts ja'a yHuung xyajñahwaats xyajcuhwáatspä. Y jaduñ hajxy tøø mmábøjpä coo ja'a yHuung hajxy tøø xyajñahwaats tøø xyajcuhwaatspä. Jaanč tehñ tiømiädiaacpä Dios jaduñ. Coo hajxy jaduñ nmábøjcäm, paadiä Dios ja'a yhEspíritu yaa tøø quixy maa højtshájtäm, jaduñä tøyhajt hajxy nmøødhájtäm coo ja'a Jesucristo hajxy tøø xjiaanč yajñahwaats

tøø xjiaanč yajcuhwáatsäm. Hix, jéquiänä Dios jaduñ miänaañ cooc ja'a yhEspíritu hñajty quixea'añ maa ja'a jäya'ayhajxiän, ja'a miädia'agy hajxy hñajty mábøjcäbä coo hajxy hñajty yajñahwa'ads yajcuhwa'adsa'añii. Jaduñä Dios ja'a tøyhajt hajxy xmióoyyäm coo hajxy hoy miänaajä xcwieendähadäänäm. ¹⁴Y coo ja'a Dios ja'a yhEspíritu tøø jiaanč quejxnä maa højtshájtäm, jaduñä tøyhajt hajxy nmøødhájtämbä coo hajxy jim xyajñøcxäänäm maa ja'a wyiinduumän. Jaduñä Dios hEspíritu hajxy xmiøødhidäänäm høxtä coonä yhabáadät coo ja'a Dios hajxy jim xyajñøcxämät maa ja'a wyiinduumän, y coo ja'a Dios ja'a mayhajt jaduñ tiuñ ja'a højtscøphájtäm, páadiäts hajxy nwiingudsähgøøyyämät coo jiaanč tehñ miøjjä coo jiaanč tehñ jiaančhä.

¹⁵Nmädóyhøch jaduñ coo ja'a Jesús ja'a miädia'agy hajxy tøø mmábøjcä, ja'a hajxy nWiindsønhájtämbä. Jadúñhøch nmädóyyäbä coo hajxy mdsocy mba'häyoy pønjatai Diosmädia'agy panøcxp. ¹⁶Cooch jaduñ nmädóyyä, páadyhøch Dios Dioscuju'uyäp nmo'oy ja'a mijtsøcxpä hoy miänaajä, cooch hñajty nDiospa'ya'axy ja'a mijtsøcxpä. ¹⁷Nmänuu'xtáacypiøchä Dios coo ja'a wyiinmahñdy hajxy jaduñ ween xmiø'oy ja'a yhEspírituhaam, y coo ja'a wyiinmahñdy hajxy jaduñ ween xyajwiinjuø'oy. Dioshájtäbä Dios ja'a Jesucristäm,

ja'a hajxy nWiindsønhájtämbä. NDioshájttämä Dios hajxy. Møj jaančh je'e. Hawiinmats hajxy jaduhñ nwiingudsähgöøyyämät. ¹⁸Jadúhñhøčhä Dios nmänuu'xtaacpä coo hajxy ween xyajwiinjuø'øy coo je'e tøø wyiinmay coo hajxy jim xyajnøcxáanäm maa ja'a wyiinduumän. Paady hajxy jim xyajnøcxáanäm coo hajxy xyhuunghájttäm. Jaančh tehñ yhoy jaančh tehñ yajxon hajxy jim nhidáanäm. ¹⁹Weenä Dios hajxy xyajwiinjuøöbiä coo mõcmäjaa jiaančh tehñ miøødä, coo ja'a miäjaahaam hajxy xpiuhbéttäm coo ja'a miädia'agy hajxy nmäbójcäm coo tiømiädia'agy. ²⁰Jaanä miäjaahaamä yHuung jaduhñ yagjujypiøjtägajtspä. Mänit jim yajnøcxy maa ja'a wyiinduumän. Mänit ñämaayy coo yhöxtá'agät maa ja'a quiø'ø hahooyhaampiän. Jimä Jesucristo ja'a Tieedy miøødhanehññä. ²¹Ni põñä cuhdujt jaduhñ quia'a nä'ägädä møødä nebiä Jesucristo mõjcuhtdujt miøødän, ni jim tsajpootyp, ni hädaa yaabä naaxwiin. Ni põñä cuhdujt mänaa quia'a møødhada'añ nebiä Jesucristo mõjcuhtdujt miøødän. ²²Jaduhñä Jesucristo piädaacä coo cøxiä wiinä yhané'emät hoy miaajä. Jaduhñ je'e piädäacäbä coo højts nWiindsønhájtämät coo ja'a miädia'agy hajxy nmäbójcäm coo tiømiädia'agy. ²³Hoyyä Jesucristo cøxiä wiinä jia hane'emy hoy miaajä, coo hajxy jaduhñ nmäbójcäm, xjiotcädäacäm hajxy jaduhñ coo hajxy xmiøødhájttämät

tu'ugmädia'agy. Ni tii jaduhñ quia'a jootcädaacy neby højts xjiotcädäacäm.

2 Jue'e mijts hijty, cabä Dios hajxy hijty mwiingudsähgø'øy, je'leguøxpä coo ja'a pojpä cädieey hajxy hijty mmøødä, coo ja'a Diosmädia'agy hajxy hijty mga'a cudiuñ. ²Jaančh tehñ yhaxøøgtuum hajxy hijty mnä'ägädä hity. Jaduhñdsä jäya'ayhajxy yhity ja'a Diosmädia'agy hajxy ca'a mabøjpä. Ja'a mõjcu'ugong ja'a miädia'agy hajxy hijty mmäbójcäp. Jaayá'ayäts mõjtuungmøød tsajtcøxp. Yhanehñby jaduhñ põnjatiä Diosmädia'agy ca'a mabøjp. ³Jaduhñ hajxy hijty nägøxiä njatcøøyyämbä. Haxøøg hajxy hijty nwädíttäm nebiä njootä ngopc-hajxy hijty chójcäm. Paadiä Dios hajxy hijty xyajcumäadowáanäm nägøxiä näguipxy møødä haxøøggjäya'ayhajxy. ⁴Pero hojiootä Dios jiaančh tehñ miøød. Xjiaančh tehñ chójcäm hajxy. ⁵Hoyyä Dios ja'a miädia'agy hajxy hijty nga'a ja cudiuñäm, ja'a miäjaahaamä Dios ja'a nwiinmahñdyhajxy tøø xyajtägátsäm, nebiä miädia'agy hajxy jaduhñ hoy ngudiuñämät, nebiä Jesucristo yagjujypiøjtcän ja'a Tieediä miäjaahaam. Coo ja'a Dios hajxy xjiaančh tehñ chójcäm, paady hajxy tøø xpiädäacäm hawa'adstuum. ⁶Nebiä Dios ja'a Jesucristo yagjujypiøjtägajchän, jaanä jaduhñ højts xyagjujypiøjtägatsáanämbä. Tøø hajxy xpiädäacäm coo ja'a Jesucristo hajxy nmøødhájttämät tu'ugmädia'agy. Y nebiä Dios ja'a

Jesucristo ja'a cuhdujt miooyän coo jim miähané'emät tsajpootyp, jaanä jaduñ højtsä cuhdujt xmiowáanämbä. ⁷Paadiä Dios ja'a cuhdujt hajxy jaduñ xmiöoyäm, jaduñ yajcähxø'øga'añ coo hojioot jiaanč tehñ miøødä maa højtsøxpän, coo hajxy xjiaanč tehñ chójcäm. Paadiä Jesucristo yaa quiejxä hädaa yaabä naaxwiin; paady hajxy hoy xñähho'túutäm. Jimä Dios hajxy hoy miänaajä xyaghidáanäm maa ja'a wyiinduumän. ⁸Cab hajxy hamdsoo tøø nhawa'adspädsøömäm. Ja'a Dios hajxy tøø xpiädáacäm hawa'adstuum. Paady hajxy xyaghawa'adspädsøömäm coo hojioot jiaanč tehñ miøødä, coo hajxy nmäbójcäm coo hojioot miøødä. ⁹Coo ja'a nbojpä ngädieey hajxy hamdsoo tøø nga'a yajniñähwáatsäm, paady hajxy hamdsoo nga'a niguiumáayyämät, hoy hajxy tøø nja hojiäya'ayhajtäm. ¹⁰Hix, tøø ja'a Dios ja'a nwiinmahñdyhajxy xyajtägájsäm coo ja'a Jesucristo hajxy xmiøødhjítäm tu'ugmädia'agy. Tøø ja'a Dios ja'a mäjaa hajxy xmiöoyäm neby hajxy hoy nhjítämät. Jéquiänä Dios jaduñ wyiinmaayy coo hajxy jaduñ hoy nhjítämät.

¹¹Hoorä, højts judíospä, yajcumaaby højts jaduñ coo højts nyajcuncidarhaty. Jaduñ højts tyijy nyajcähxø'øgy coo højtsä Dios xquiu'ughaty. Coo højts jaduñ nyajcuncidarhaty, je'eduhñ nänøømby coo højtsä seña nbäda'agy maa højtsä nni'xcøxpän. Paady højts mijts nxøøghaty, mijts

ca'a judíospä, coo hajxy mga'a yajcuncidarhappä. Tøyhajt jaduñ. ¹²Hix, højts judíospä, ja'a Dios højts jecy xquiu'ughajt. Jaduñ højtsä Dios xmiøødyajcuhdujcy coo højts hänäjty xyajñähwa'ads xyajcuhwa'adsa'añ. Pero mijts ca'a judíospä, caj mijtsä Dios xñämaayy coo mijts xquiu'ughada'añ, coo mijts xyajñähwa'ads xyajcuhwa'adsa'añ. Hix, cahnä Diosmädia'agy hajxy hänäjty mmädoyñä ja'a Cristocøxpä. Paady hajxy hijty mga'a najuø'øy coo mijts ja'a Dios xyajñähwa'ads xyajcuhwa'adsaambä. ¹³Caj mijtsä Dios hijty xquiu'ughaty. Cabä Diosmädia'agy hajxy hijty mmädooyä. Pero coo ja'a Jesucristo hajxy tøø xñähho'tu'udy, paadiä Dios hajxy xquiu'ughajnä. ¹⁴Coo ja'a Jesucristo hajxy tøø xñähho'túutäm, jaduñ hajxy tøø xpiädáacäm tu'ugmädia'agy nägøxiä, møød højts judíospä näguipxy møød mijts ca'a judíospä. Hamiñ haxøpy hajxy hijty nnimiädsiphajtäm. Pero tøø hajxy nnimiägapxø'cänä je'eguiøxpä coo ja'a Jesucristo hajxy tøø xñähho'túutäm. ¹⁵Højts judíospä, mijts hijty nmøødnimiädsiphajtäp, mijts ca'a judíospä. Hix, højtsä Dios jecy xyhanehñ madiu'u, ca'a myijtsä. Mänitä Moisés quijahy nebiaty højtsä Dios xyhanehmy, y coo ja'a Jesucristo hajxy hoy xñähho'túutäm, paadiä Dios ja'a mädia'agy yaghamaadiujnä nebiä Moisés hänäjty jecy tøø quiujaayän. Jaduñä Jesucristo hajxy tøø xpiädáacäm tu'ugmädia'agy møød je'e, møød højts judíospä näguipxy

møød mijts ca'a judíospä. Paady hajxy nga'a nimiädsiphájtänä hamiñ haxopy neby hijtiän, højts judíospä møød mijts ca'a judíospä. ¹⁶Coo ja'a Jesucristo hajxy tøø xñähho'túutäm cruzcøxp, paadiä Dios hajxy tu'ugmädia'agy xmiøødhíjtänä, møød højts judíospä näguipxy møød mijts ca'a judíospä. Cabä Dios hajxy jaduhñ nmädsiphájtänä.

¹⁷Hoyyä Jesucristo hajxy xyhawáanäm coogä Dios ja'a jioot quia'a tsoy coo ja'a Dios hajxy nga'a mädsiphájtänät. Jadúhñägä jioot chocy coo hajxy nmøødhíjtänät tu'ugmädia'agy nägøxiä, møød højts judíospä näguipxy møød mijts ca'a judíospä.

¹⁸Hix, coo ja'a Jesucristo hajxy nägøxiä tøø xñähho'túutäm, paadiä Dios hajxy nägøxiä nmøødhíjtänä tu'ugmädia'agy, møød højts judíospä näguipxy møød mijts ca'a judíospä. Ja'a yhEspirituhaam hajxy jaduhñ xyajmøødhíjtäm tu'ugmädia'agy nägøxiä. ¹⁹Xquiu'ughájnáp mijtsä Dios møødä jäya'ayahajxy nägøxiä, ja'a Diosmädia'agy hajxy mäbøjpä, hoy hajxy mga'a jagä judíospä. Xyhuunghájnäbä Dios hajxy jaduhñ. Cabä Dios hajxy hijty xquiu'ughaty xyhuunghaty, coo ja'a miädia'agy hajxy hijty mga'a mäbøjcä. ²⁰Coo ja'a Jesucristo hajxy hoy tøø xñähho'túutäm, mänit je'e hoy jiuypiojtägach. Mänitä Diosquexy ja'a Diosmädia'agy hajxy tiägøoyy yajwa'xpä. Mänitä Diosmädia'agy hajxy nmäbøjcäm. ²¹⁻²²Paadiä Jesucristo hajxy xmiøødhíjtäm tu'ugjoot tu'ugwiinmahñdy coo ja'a Diosmädia'agy hajxy

näguipxy nmäbøjcäm, møød højts judíospä, møød mijts ca'a judíospä. Hix, tøø ja'a Dios hajxy xyajnähwaats xyajcuhwáatsäm ja'a nbojpä ngädieeyhájtäm. Ja'a yhEspirituhaam hajxy jaduhñ xyajmøødhíjtäm tu'ugjoot tu'ugwiinmahñdy.

3 Høøch Pablo, páadyhöch chaa ndsumyčhänä'ay coočhä Jesucristo miädia'agy nyajwa'xä maa mijtsän, mijts ca'a judíospä. Coo ja'a Jesucristo hajxy tøø xpiädáacäm tu'ugmädia'agy nägøxiä, páadyhöchä Dios nba'ya'axy ja'a mijtscøxpä. ²Tøø hajxiäda'a mmädoyhaty coočhä Dios tøø xwyiinguexy coo mijtsä Diosmädia'agy nyajwiingapxø'owät, coo ja'a Dios ja'a hojioot miøødä ja'a mijtscøxpä. ³Jéquiänä Dios wyiinmaayy coo højtsä nbojpä ngädieey xyajnähwaats xyajcuhwáatsät, højts judíospä. Nnajuøøby højts hijty jaduhñ. Pero cuyu'uchä Dios hijty yaghity coo hänajty tøø wyiinmaabiä coo mijts xyajnähwa'ads xyajcuhwa'adsaambä, mijts ca'a judíospä. Hoorä, tøøchä Dios hädaa mädia'agy xyajwiinjuøøñä nébiøch hädaa mädia'agy weenjaty cham njaayän. ⁴Coo hädaa mädia'agy hajxy mgápät, jaduhñ hajxy mnajuø'owa'añ coočhä Dios ja'a mädia'agy tøø xyajwiinjuø'oy, ja'a Jesucristocøxpä, ja'a cuyu'uch tøø yhítiäbä. ⁵Cab hädaa mädia'agy hijty pøn miädooyy. Pero tøø ja'a Dios ja'a wyiinguexyhajxy yajwiinjuøøñä. Ja'a yhEspirituhaam jaduhñ yajwiinjuøøyy. ⁶Jaduhñ hajxy nnajuøøyyäm coo ja'a Dios

jecy wyiinmaayy coo ja'a Jesucristo hajxy hānajtŷ xñāhho'tu'udāānām, coo hānajtŷ jiuypiojtāgatsa'añ. Y coo ja'a Diosmādia'agy hajxy nmābōjcām, paadiā Jesucristo hajxy nāgōxiā nmōødhj̄tām tu'ugjoot tu'ugwiinmahñdy, mōød hōjts judíospā nāguipxy mōød mijts ca'a judíospā. Jaduhñā Dios hajxy nāgōxiā xyhuunghāj̄tām. Tu'ugmādia'aguiā Dios hajxy jaduhñ xyaghj̄tām ja'a Jesucristocōxpā. Paadiā Dios hajxy jaduhñ xyajñahwaats xyajcuhwáatsām coo ja'a Jesucristo hajxy hoy tōø xñāhho'túutām. Jéquiānā Dios jaduhñ wyiinmaayy.

⁷⁻⁸ Ja'a miøcmājaahāamhōchā Dios tōø xtiuungmo'oy cooçh ja'a miādia'agy nyajwá'xāt maa ja'a ca'a judíoshajxypān. Xtiuungmóoyhōchā Dios jaduhñ cooçhā judíoshajxy nyajwiingapxō'øwāt coo Dios ja'a mayhajt mōj may tiuna'añ ja'a hōjtsçøxphāj̄tām, je'eguiøxpā coo ja'a Jesucristo hajxy hoy tōø xñāhho'túutām. Hojiootā Dios miøød, páadyhōch jaduhñ xtiuungmooyy, hōyhōch nga'a jagā māna'añ cooçh nga'a tsoobaady cooçh jaduhñ ndúnāt, hōyhōch nja māna'añ coo ja'a Dioshuunghajxy miaas tsoobāadāt, coo hajxy jaduhñ tiúnāt. ⁹ Jaanā jadūhñhōchā Dios tōø xtiuungmoobiā cooçhā jāya'ayhajxy nāgōxiā nyajwiinjuō'øwāt coo ja'a Dios jecy wyiinmaayy coo mijtsā Jesucristo hānajtŷ xyajñahwa'ads xyajcuhwa'adsaambā, mijts ca'a judíospā. Mānitā Dios jaduhñ wyiinmaayy mānaa cōxiā wiinā

yhādiuññā. Cab hajxy xchoj yajwiinjuōøyyām. Jecy jaduhñ yaghijty cuyu'uçh. ¹⁰ Hoorā, coo ja'a Jesucristo hajxy nāgōxiā tōø xyajñahwaats tōø xyajcuhwáatsām, mōød hōjts judíospā nāguipxy mōød mijts ca'a judíospā, coo ja'a Diosmādia'agy hajxy nāguipxy nmābōjcām coo tiømiādia'agy, jaduhñā Diosmoonsā hajxy jim ñajuøññā tsajpootyp coo ja'a Dios jiaançh tehñ quiuwiinmahñdiā madiu'u. Haa ca'a, xyhíjxāmā Diosmoonsā hajxy coo hajxy tu'ugmādia'agy jaduhñ nhj̄tānā. ¹¹ Jaduhñā Dios ñā'ägädā wiinmaayy jequiān, jajtŷ hādaa naaxwiin yhādiuuñ. Jaduhñ yajtōjiajty coo ja'a Jesucristo hajxy hoy xñāhho'túutām, ja'a hajxy nWiindsøn'hāj̄tāmbā. ¹² Coo ja'a Jesucristo hajxy nmøødhj̄tām tu'ugmādia'agy, coo ja'a miādia'agy hajxy nmābōjcām, jaduhñā tøyhajt hajxy nmøødhāj̄tām coo ja'a cuhdujt hajxy nmøødhāj̄tām coo ja'a Dios hajxy nba'yáaxāmāt. Jaduhñā tøyhajt hajxy nmøødhāj̄tāmbā coo hajxy xmiädóowām. ¹³ Mijts nmānuu'xtaacy py coo hajxy mga'a jootmayhādāt, hōyhōch yaa nja tsaächpøcy. Páadyhōch chaa ndsaächpøcy cooçhā Diosmādia'agy nyajwa'xy maa mijtsān. Páadiāts hajxy jaduhñ mxoondá'agāt. ¹⁴⁻¹⁶ Ja'a nWiindsøn'hāj̄tām Jesucristo, Dios je'e Tieedyhajpy. Tieedyhajpiā Dios hajxy je'ebā pønjatŷ jim tsānaaby tsajtcøxp mōød pønjatŷ yaa tsānaaby hādaa yaabā naaxwiin. Coo ja'a Jesucristo hajxy tōø xpiädācām

tu'ugmädia'agy mөөд һөјts judíospä năguipxy mөөд mijts ca'a judíospä, päadyhөчhä Dios hamuumdu'joot nmănuu'xta'agy coo mijtsä mäjaa ween xmio'oy ja'a yhEspírituhaam, neby hajxy jaduhñä mjuөһñdyhaam mme'e'xtúgät. Xpiuhbédäbä Dios hajxy jaduhñ je'eguiөxpä coo je'e miөjjä jiaančhä. ¹⁷Jadúhñhөчhä Dios nmănuu'xtaäcpä coo ja'a Jesucristo yhEspíritu hajxy ween mjaac mөөdhajtä, je'eguiөxpä coo ja'a miädia'agy hajxy mmäböjcä. Jaduhñ hajxy hoy yajxón mničhoc mnimiee'xөöjät hoy miänaaxөöjä. ¹⁸⁻¹⁹Y jaduhñ hajxy mwiinjuөbiät coo ja'a Jesucristo hajxy xjiaanč tehñ chöjcäm möj may. Hanaxiä hajxy jaduhñ xjiaanč tehñ chöjcäm. Cab hajxy ca'xy nwiinjuөyyäm nebiaty hajxy jaduhñ xjia tsöjcäm. Cab hajxy pedyi nwiinjuөyyäm. Coo hajxy hoy nwiinjuөyyämät, hoyyä nwiinmahñdyhajxy jiadäänäm nebiä Dios ja'a wyiinmahñdiän.

²⁰Jaanch tehñ miäjaamөөдä Dios. Ja'a miäjaahaamä nwiinmahñdyhajxy xyajtägäjtsäm. Jaanä miäjaahaamä mayhajt möj may tiuumbä ja'a һөјtsөxphájtäm. Hөxtä cab hajxy hoy nwiinjuөwäänäm nebiatiä mayhajt jaduhñ tiuunñ. Mөj mayyä mayhajt jaduhñ tiuunñ, hoy hajxy nga'a jagä mäyujwäänäm.

²¹Tsögä Dios hajxy hoy miänaajä wiingudsähgөyyäm, coo ja'a miädia'agy hajxy nmäböjcäm, je'eguiөxpä coo ja'a Jesucristo hajxy tөө xñähho'tútütäm. Tөyhajt jaduhñ.

4

Coočhä Jesucristocөxpä nduñ, päadyhөch chaa

ndsumyčhäna'ay. Coo mijtsä Dios tөө xyajñähdijy coo hajxy hoy mwädítät, paady hajxy jaduhñ mgudiúnät. ²Cab hajxy myajcumáyät. Mee'xxieemy hajxy mhídät. Mmee'xtúgäp hajxy jaduhñ. Hamiñ haxөpy hajxy mničhoc mnimiee'xөöjät. ³Naxy hajxy tu'ugcopc tu'ugwiinmahñdy mdehm yhídät. Ja'a DioshEspíritu hajxy jaduhñ xyaghídäp tu'ugmädia'agy. ⁴Tu'ugmuquiä Jesucristo miädia'agy hajxy nbanөcxäm, mөөд һөјts judíospä năguipxy mөөд mijts ca'a judíospä. Tu'ugmuquiä DioshEspíritu hajxy nmөөdhájtäm. Nägөxiä Dios hajxy xyajñähdíjjäm coo hajxy jim xyajñөcxäänäm maa ja'a wyiinduumän. Tu'ugmucy hajxy jaduhñ njөbhíjxäm. ⁵Tu'ugmuquiä Jesucristo hajxy nWiindsөñhájtäm. Tu'ugmuquiä miädia'agy hajxy nmäböjcäm coo tiөmiädia'agy. Ja'a Jesucristocөxpä hajxy nägөxiä nnäbéjtäm. ⁶Tu'ugmuquiä Dios hajxy nDeedyhájtäm nägөxiä. Jaaya'ay hajxy xyhanéhäm nägөxiä. Ja'a һөјtsөxphájtäm jaaya'ayä mayhajt tiuunñ nägөxiä. Jaaya'ay hajxy hoy xmiөdhíjtäm nägөxiä.

⁷Cөjhawiingatiä Jesucristo hajxy tөө xyajñähdíjjäm nebiaty hajxy ndúunämät. ⁸Jaduhñä Diosmädia'agy miäna'añ:

Coo jim ñөcxy tsajpootyp, tsumiä miädsip yajnөcxy, ja'a hajxy hänäjty tөө quia'a mäjädá'aguiäbä.

Mänitä jiamiөөд madiu'u miooy cөxiä wiinä.

⁹⁻¹⁰Coo jaduhñ miäna'añ coo ja'a Jesucristo ñөcxy tsajpootyp, jaduhñ

miäna'ana'añ coo hänäjty yaa tøø yhoy hädaa yaabä naaxwiin. Jim hänäjty tøø yhuuc tsohndaacpä tsajpootyp. Y coo jim ñcxtägajch Dioswiinduum, jim mõj jaančh yhjñä. Jim jaduhñ yhanehmñä tsajpootyp mөөd hädaa yaabä naaxwiin. ¹¹Ja'a Jesucristo hõjts xpiädaac coo hõjts madiu'u ndúnät jaaya'aguiõxpä. Näje'e hõjts xyajñdhijy coo hõjts ndúnät apóstol. Je'ečh jaduhñ nnänöömby coo hõjtsä Jesucristo xquiejxsohñ Diosmädia'agy-yajwa'xpä wiinduhmyhagajpt. Näje'e hajxy yajñähdijjábä coo ja'a Diosmädia'agy hajxy jiaac yajwá'xät. Näje'e hajxy yajñähdijjábä coo ja'a Diosmädia'agy hajxy yajwiingapxó'owät. Näje'e hajxy yajñähdijjábä coo ja'a Diosmädia'agy hajxy yajñähixó'owät. Näje'e hajxy yajñähdijjábä coo hajxy quiopc-hádät maa ja'a hermanodõjc-hajxy yhamugó'oyän Dioswiingudsähgöobiä. ¹²Paady hajxy jaduhñ tiuñ, jaduhñä Diosmädia'agy hajxy maas hoy quiudiünät coo ja'a Diosmädia'agy hajxy miäböcy. Jaanä jaduhñ hajxy tiúumbät ja'a Diosõxpä. Jaduhñ hajxy maas hoy wiädítät nägõxiä coo ja'a Jesucristo hajxy pianõcxy. ¹³Jaduhñä Dios ja'a miädia'agy hajxy tu'ugmucy hoy nmäbõjcämät nägõxiä coo tiõmiädia'agy ja'a Jesucristocõxpä. Y jaduhñä Jesucristo hajxy hoy nmөөdhjítämät tu'ugmädia'agy, ja'a Dioshuung. Jaduhñä Diosmädia'agy hajxy maas hoy nwiinjuóyyämät. Jaduhñ hajxy maas hoy

nyajtúunämät. Mänit hajxy hoy nwiinmäayyämät nebiä Jesucristo wyiinmayyän. Y jaduhñ hajxy hoy nwädjítämät nebiä Jesucristo hoy wiäditiän. ¹⁴Põnjatiä Diosmädia'agy hoy ca'a wiinjuóbyñä, jaančh tehñ piaquiä hajxy yajwiinhöõñ. Hoy tyii mädia'aguiä hajxy miäböga'añ. Hix, ja'a häna'c-hajxy mäwiinhõhmbä, jiaančh tehñ jiajpy hajxy mäwiinhöõn. Jaančh tehñ piaquiä hajxy jaduhñ xwyiinhöönät. Pero hõjtsähjtäm, cab hõjts jaduhñ nyajwiinhõhñämät. ¹⁵Pero, tsög hajxy tøgüäpxäm, tsög hajxy tömiädiäacäm. Tsög hajxy tsõjcäm, tsög hajxy méé'xäm põnjaty hajxy nmөөdmädiäacäm. Jaduhñ hajxy hoy nwädjítämät nebiä Jesucristo hoy wiäditiän, ja'a hajxy nWiindsõnhjítämbä. ¹⁶Coo hajxy nhjítämät tu'ugmädia'agy, coo hajxy nnibiuhbéjtämät hamiñ haxõpy nebiatiä Dios hajxy tøø xtiuungmóoyyäm, jaduhñä Jesucristo hajxy xpiuhbéjtämät, neby hajxy jaduhñ maas hoy nničhojc nnimieé'xämät hamiñ haxõpy, nebiä Diosmädia'agy hajxy jaduhñ maas hoy nwiinjuóyyämät, neby hajxy jaduhñ maas hoy ngudiúunämät.

¹⁷⁻¹⁹Põnjatiä Diosmädia'agy ca'a panõcxy, cab hajxy miõjpäda'agy tijaty jaduhñ tsoobaatp. Cab hajxy tii wyiinjuó'oy. Jaančh tehñ xixä jiootä quiopc-hajxy; paady hajxy quia'a wiinjuó'oy coo ja'a Dios ja'a mõjmayhajt tøø tiuñ ja'a hõjtsõxphjítäm, paady hajxy quia'a cumayii ja'a Diósäm. Tsähdiuhndägoy hajxy jaduhñ. Hanaxiä hajxy yhaxõõgjatcø'oy

cøxypänejpiä. Paady mijts jaduhñ nmägapxy nhane'emy ja'a Jesucristocøxpä coo hajxy jaduhñ mga'a pajatcøøbiät. ²⁰Coo hajxy tøø mhabøcy ja'a Jesucristocøxpä, paady hajxy mnajuø'øy coo jaduhñ quia'a hoyyā coo hajxy jaduhñ mga'a haxøøgwädijnät, neby hajxy naamnä tøø nmägapxy tøø nhane'emiän. ²¹Tøyhajt jaduhñ coo hajxy tøø mhabøcy ja'a Jesucristocøxpä. Jaaya'ay hajxy xyajñähixøøyy ja'a yHespírituhaam. Hix, tøgüiäxp tømíäiaacp je'e.

²²Jaduhñ hajxy xyajñähixøøyy coo ja'a mhaxøøgcuhdujt hajxy mnajtshixø'øwät neby hajxy hijty mhaxøøgjäya'ayhatiän. Mdu'udägoyyaamb hajxy hijty je'egüiøxpä coo hajxy hijty cøxiä wiinä mhadsocy, cooc tyjy hajxy hijty jaduhñ mbaada'añ ja'a hoyhajtä weenhajt. Pero myajwiinhøhm hajxy hijty. Hix, cabä hoyhajtä weenhajt hajxy jaduhñ mbáadät. ²³Pero, yajtägatsä mjootä mwiinmahñdy hajxy. ²⁴Tøø ja'a Dios hajxy xmióoyyäm ja'a hawiinjembäiä howyiinmahñdy nebiä Dios hajxy jaduhñ hoy nbahíxämät. Jaduhñ hajxy tøyhajt hoy mjäya'ayhädät. Jaduhñ hajxy tøyhajt haxøøg mga'a wädijnät.

²⁵Jaduhñds je'e, cab hajxy mhøhñdáacnät. Tøyhajt hajxy mmädiäacnät. Hix, tu'ugmädia'agy hajxy nhíjtäm.

²⁶⁻²⁷Coo hajxy tähoocjaty mnimiäjootma'adøøjät, paquiä hajxy jadähooc mnimiägäpø'cägumbät, coo ja'a møjcu'ugong hajxy jaduhñ paquiä xñä'a yajcädiéeyät.

²⁸Pønjaty mee'tsp, cab hajxy miée'tsnät. Ween hajxy tiuunnä, jaduhñä wiingjäya'ay hajxy piuhbédät pøn jaduhñ yajmaajajp.

²⁹Cab hajxy mhaxøøgcápxät. Coo hajxy hoy mgäpx mmädiä'agät, jiaac wiinjuø'øwaambiä jäya'ayhajxy, ja'a homiädia'agy hajxy hoy mädoobä. Jaduhñä Dios ja'a mayhajt tiúnät jaaya'agüiøxpähajxy, ja'a hajxy jaduhñ mädoobä.

³⁰Cabä Dioshespíritu hajxy myagjootmädiägø'øwät. Hix, jaaya'ay hajxy jaduhñ xcwieendähadäänäm høxtä coonä ja'a Jesucristo hänäjty yaa quiädaactägatsa'añ. Mänit jaduhñ quiäxø'øga'añ coo hajxy hänäjty tøø xyajñähwaats tøø xyajcuhwäatsäm, møød coo hajxy hänäjty tøø xyajpädsøømäm haxøøgtuum.

³¹Cab hajxy mnixiøøghájtänät. Cab hajxy mnimiädsiphájtänät. Cab hajxy mnimiäjootmä'tänät. Cab hajxy mniyhójjänät. Cab hajxy mniñähójjänät. Cab hajxy mnimiähänhájtänät. ³²Pero, mniçhoc mnimiee'xøøjäp hajxy hamíñ haxøpy. Mniñäxuudsøøjäp hajxy jaduhñ. Mnimiee'xøøjäp hajxy jaduhñ. Hix, jaduhñä Dios hajxy tøø xmiée'xäm ja'a Jesucristocøxpä.

5 Xyhuunghájtämä Dios hajxy; xchójcäm hajxy jaduhñ. Naxiä Dios hajxy ndehm piähíxämät.

²Mniçhoc mnimiee'xøøjäp hajxy nebiä Jesucristo hajxy xchójcäm. Coo hajxy jaduhñ xchójcäm, paady hajxy tøø xñähho'tútäm. Quiumaayy ja'a Dios jaduhñ.

³Coo ja'a Dios hajxy xyhuunghájtäm, paady hajxy

haxøøg mga'a nä'ägädä jatc'owät. Ni mga'a hadsógät jäya'adio'oxiøjc hajxy. Jaanä jaduñ mijts to'oxiøjc-hajxypä, caj mijts wiingya'adiøjc mmøødmáabät. Ni mga'a hadsójcät hajxy ja'a mmädo'oxiøjcä ñihyhap. Ni cab hajxy mhaxøøgcápät. ⁴Cabä haxøøghaaw hajxy mmøødhádät. Cab hajxy mguhhiñmädiá'agät. Cab hajxy mhanähádät. Cab jaduñ yhawiinmatsä coo hajxy jaduñ mjatc'owät. Pero ja'a Dios hajxy mnámá'awäp: "Dioscuj'uyäp." ⁵Tøyhajt jaduñ, pøn haxøøg jatcøøby, pøn jäya'ajie'e jaanč tehñ yhadsojp, cab jim tiägø'owa'añ maa ja'a Jesucristo wyiinduumän, maa ja'a Dios ja'a wyiinduumän. Hix, pøn jäya'ajie'e hadsojp, cabä Dios hoy wyiingudsähgø'øy. ⁶Cab hajxy nyajwiinhøñmät coo jäya'ay hajxy hänajty xjia nämáayämät cooc tyijy yhooyä coo hajxy haxøøg njatcøøyyämät, nébiäts naamñä tøø nmägapxy tøø nhane'emiän. Ja'a häna'c-hajxy ca'a mäbøjpä, ja'a häna'c-hajxy jaduñ haxøøg jatcøøbiä, nébiäts naamñä tøø nmägapxy tøø nhane'emiän, yajcumädo'wáanäp hajxy je'eduhñ ja'a Diósäm. ⁷Paady jaduñ, tsoc ca'a møødjatcøøyyäm näguipxy. ⁸Mijts, cabä Diosmädia'agy hajxy hijty mmädooyä. Mhaxøøgwädijp hajxy hijty, møød hajxy hijty haxøøgjaty mjatcø'øy. Pero coo ja'a Jesucristo miädia'agy hajxy tøø mmäbøjcnä, paadiä mwiinmahñdy hajxy mmøødan hawa'adstuum. Jaduhñä mwiinmahñdy hajxy mjaac yaghídät. ⁹Pønjatiä wyiinmahñdy hawa'adstuum, hojiot hajxy

miøød. Hoy hajxy jiäya'ayhaty. Tøguiapxp tømíadiaacp hajxy je'e. ¹⁰Mjaac habøgäp hajxy jaduñ nebiatiä Dios hajxy xyajñähixø'øy neby hajxy jaduñ maas hoy mjäya'ayhádät. Jaduhñä Jesucristo hajxy xmiaas cumáyät. ¹¹Ja'a häna'cä Diosmädia'agy hajxy ca'a mäbøjpä, cab hajxy hoy jiäya'ayhaty. Cab hajxy jaduñ cøxypänejpä mmøødjatc'owät; pero mwiinguhoj'owäp hajxy jaduñ. ¹²Jaanč tehñ yhočähdiuunnä hajxy hamee'ch jiatcø'øy; páadyhöch nga'a nägapxa'añ nebiaty hajxy jaduñ jiatcø'øy. ¹³Coo jäya'ay hajxy nwiinguhoj'øyyämät coo hajxy yhaxøøgwädity, nebiä Diosmädia'agy miäna'añän, mänit hajxy jaduñ yhooc tehñ ñajuø'owät coo hajxy tøyhajt yhaxøøgwädity. ¹⁴Jaduhñä jäya'ayhajxy näje'e miäna'añ:

Pøn jaduñ maab, ma'abiädø'øg hajxy;
 pøn jaduñ tøø yho'ogy,
 mjujyipiøjtägätsäp hajxy.
 Ja'a Jesucristo mijts
 xquiujajaamb
 xquiudøø'xaamb.

Jaduhñ miädia'agytiägø'øy, pønä Diosmädia'agy ca'a mäbøjp, ween hajxy miäböcy. Jaduhñä Jesucristo hajxy xyajwiinjuø'owät coo je'eyyä jaduñ tu'uquüä ja'a mbojpa mgädieey hajxy xyajñähwäatsät.

¹⁵Jaduhñds je'e, nägüeentä hajxy mwädítät. Cab hajxy mnibiäda'agøøjtät nebiä jäya'ayä Diosmädia'agy hajxy ca'a wiinjuøøbiän. Paady hajxy hoy mwädítät coo ja'a Diosmädia'agy

hajxy mwiinjuø'øy. ¹⁶Naxý hajxy hoy mdehm wiädítät. Hix, jiaançh tehñ miäwädijpiä jäya'ayä haxøøgwinnmahñdy hajxy jäda'ahaty. ¹⁷Hoorä, cab hajxy mnibiäda'agøøjät nebiä jäya'ayhajxy ca'a jajpäñ. Naxiä Dios ja'a miädia'agy hajxy mdehm wyiinjuøøyyät mdehm wyiinnädóowät nebiatiä jioot chocy coo hajxy mgudiúunät. ¹⁸Cab jaduhñ yhooyä coo hajxy mmu'ugøøjät; yajtägoobiä jocnøø jaduhñ. Pero weenä Dioshespíritu hajxy xjiaac puhbéjtäm coo ja'a miädia'agy hajxy jaduhñ njaac cudiúunäm. ¹⁹Coo ja'a Dioshespíritu hajxy xpiuhbéjtäm, jaduhñ hajxy nnijiootcapxmøøpcjäm ja'a Dioshøyhaam. Jaduhñä Dios hajxy hamuumdu'joot mwiinhøw mwiinyá'axät. ²⁰Hoy miäduhñajtä Dios hajxy mnämá'awät: "Dioscujú'uyäp", ja'a Jesucristocøxpä, ja'a hajxy nWiindsøn'hájtämbä. Paadiä Dios hajxy jaduhñ mnämá'awät: "Dioscujú'uyäp", coo ja'a hoyhajtä weenhajt hajxy je'e xmióoyyäm. Hix, je'e hajxy nDeedyhájtäm.

²¹Hoorä, coo ja'a mmähermano waamb xyhané'emät, hamuumdu'jootä miädia'agy mgudiúunät, je'eguiøxpä coo ja'a Jesucristo hajxy hoy nwiingudsähgøøyyäm.

²²Mijts to'oxiøjc-hajxy, mgudiúunäbä mnihyhapä miädia'agy hajxy. Jaduhñä Jesucristo hajxy xyhane'emy, ja'a hajxy nWiindsøn'hájtämbä. ²³Coo ja'a mnihyhaphajxy quiopc-haty

maa mijtsän, jaduhñ mäwiin miäbaady coo ja'a Jesucristo hajxy nWiindsøn'hájtäm coo ja'a miädia'agy hajxy hoy nmäbøjcäm. Jaaya'ay hajxy xyajñhwáatsäm.

²⁴Coo ja'a Jesucristo miädia'agy hajxy ngudiúunäm, jaduhñ mijtsä mnihyhapä miädia'agy mgudiúunäbät, waambaty hajxy jaduhñ xyhane'emy.

²⁵Hoorä, mijts ya'adiøjc-hajxy, mdsógäp mmé'e'xäbä mdo'oxiøjc hajxy nebiä Jesucristo hajxy xchøjcäm. Hix, tøø hajxy xñähho'túutäm. ²⁶Paady hajxy tøø xñähho'túutäm, jaduhñ hajxy tøø xyajñhwáatsäm ja'a nbojpä ngädieeyhájtäm. Paady hajxy jaduhñ tøø xyajñhwáatsäm coo ja'a miädia'agy hajxy tøø nmäbøjcäm. Y coo hajxy nnäbéjtäm, jaduhñ hajxy nmänáanäm coo ja'a nbojpä ngädieey hajxy tøø xñähwáatsäm. ²⁷Paadiä Jesucristo hajxy tøø xñähho'túutäm, jaduhñ hajxy hoy yajxón xyhíjxämät nebiä pujoy nebiä je'eçhpän coo hänäjty yaa quiädaactägatsa'añ. Hix, tøø ja'a nbojpä ngädieey hajxy hänäjty xyajñhwáatsäm. ²⁸Jaduhñds je'e, mijts ya'adiøjc-hajxy, mdsógäp mmé'e'xäbä mdo'oxiøjc hajxy nebiä mhamdsoo ni'x nebiä mhamdsoo copc hajxy mjuø'øyän. Pønä tio'oxiøjc tsojp mee'xp, jaduhñ miäbaady nebiä yhamdsoo ni'x nebiä yhamdsoo copc choquiän. Hix, tu'ugni'x tu'ugcopc hajxy jiaty coo to'oxiøjc hajxy wyiingpøcy. ²⁹Hix, cap pønä yhamdsoo ni'x yhamdsoo copc xiøøghaty. Pero ngüeendähájtämä nni'x ja'a ngopc-hájtäm hajxy; jaduhñ

mäwíinäts miäbaady nebiä
Jesucristo hajxy xcwieendáhjätäm.

³⁰Hix, tu'ugjoot tu'ugwiinmahñdiä
Jesucristo hajxy xmiøødhjätäm
coo hajxy nWiindsøn'hjätäm.

³¹Jaduhñä Diosmädia'agy miäna'añ:
“Jaduhñds je'e, coo ja'a ya'adiøjc
to'oxiøjc piaady, mäniä tiaj
tieedy piuhyoohdiuutnä. Jaduhñ
mäwíinädsä ya'adiøjc-hajxy jiaty
møødä tio'oxiøjc nebiä tu'ugni'x
nebiä tu'ugcopcän.” ³²Jaanch
tehñ yajxon hädaa mädia'agy
jaduhñ. Cabä Dios hajxy hijty
xchoj yajwiinjuøoyyäm. Jaduhñch
nwiinjuøoy, coo ja'a ya'adiøjcä
tio'oxiøjc miøødhity tu'ugmädia'agy,
coo jaduhñ miøødhity tu'ugni'x
tu'ugcopc, jaduhñ mäwíinäts
miäbaady coo ja'a Jesucristo hajxy
xmiøødhjätämbä tu'ugmädia'agy
coo ja'a miädia'agy hajxy
nmäbøjcäm. ³³Jaduhñds je'e,
jaduhñä mdo'oxiøjc hajxy mdsoc
mmée'xät nebiä mhamdsoo ni'x
nebiä mhamdsoo copc hajxy
mdsoquiän. Y mijts to'oxiøjc-hajxy,
jaanä jaduhñä mnihyhap hajxy
mwiingudsähgøøbiät.

6 Mijts pigäna'tøjc-hajxy,
mgudiúunäbä mdajjä
mdeediä miädia'agy hajxy
ja'a Jesucristocøxpä, ja'a
hajxy nWiindsøn'hjätämbä.
Hahixøøby jaduhñ coo hajxy
jaduhñ mgudiúnät. ²⁻³Jaduhñä
Diosmädia'agy miäna'añ: “Pønjatia
tiaj tieedy wiingudsähgøøby, je'eçh
hajxy hoy nyajtsäna'awaamby
nyaghäyowaamby hädaa yaabä
naaxwiin; je'eçh hajxy jecy
nyagjugyhadaamby”, nõmä
Diosmädia'agy miäna'añ. Coo

ja'a Dios hajxy jaduhñ jecy
xyhanéhmäm, mäniä jaduhñ
miänaandsohñ coo ja'a
mayhajt hänäjty tiuna'añ ja'a
højtscøxphjätäm.

⁴Mijts taj teedyhajxy, cabä mnøøx
cabä mmajc hajxy hanaxiä mhójat
coo hajxy xmiähahñdät. Jaduhñä
mhuung hajxy mmägäpax mhané'emät
coo hajxy hoy wiädität. Jaduhñ hajxy
quiumayøøjat ja'a Jesucristäm, ja'a
hajxy nWiindsøn'hjätämbä.

⁵Näje'e mijtsä jäya'ayhajxy
xjie'ehaty nebiä waj nebiä cuaayän.
Mgudiúunäbä mwiindsønä
miädia'agy hajxy hamuumdu'joot,
ja'a hajxy hädaa yaabä naaxwiimbä.
Mwiingudsähgø'owäp hajxy
jaduhñ nebiä Jesucristo hajxy
nwiingudsähgøoyyäm. ⁶⁻⁷Hoyyä
jäya'ayhajxy tiuñ coo ja'a wyiindsøn
hajxy hänäjty wyiindäna'ayii
neby hajxy jaduhñ quiumayøøjat
ja'a wyiindsønäm. Pero näje'e
jäya'ayhajxy hoy quia'a tuñ coo ja'a
wyiindsøn'hajxy hänäjty quia'a jimä.
Mijts, cab hajxy jaduhñ mbahixät.
Hamuumdu'jootä mwiindsøn hajxy
mmädúnät. Jaduhñ hajxy hoy
myajcähxø'ogät coo ja'a Jesucristo
hajxy hoy mjaanch mäduñ. Jaaya'ay
hajxy nmaas Wiindsøn'hjätäm.
Jaduhñä Dios chojpä. Ja'a
Jesucristocøxpä hajxy jaduhñ
mdúnät. Ca'a jäya'aguiøxpähajtia
hajxy mdúnät. ⁸Mjahmiédsäp hajxy
jaduhñ, coo ja'a nwiindsøn hajxy
hoy nmädúunämät, hoy hajxy xjia
je'ehjätäm nebiä waj nebiä cuaayän,
mäniä Jesucristo ja'a hoyhajtä
weenhajt hajxy xmióoyyämät.

⁹Jaduhñ mijtspä, cumoonsädøjc,
mnäxúudsäbä mmoonsä hajxy

jaduhñ. Cab hajxy mhadsähg'owät. Haa ca'a, jaduññ mijsä Dios hajxy xyhanehmbä nebiä mmoonsä hajxy xyhanéhmbän ja'a Diósäm, ja'a jim tsajpootypä. Haa ca'a, cabä Dios hajxy wiing xyhíjxäm. Haa ca'a, tu'ugjäya'ayhájtäm hajxy nägøxiä.

¹⁰⁻¹¹Hoorä, mänuu'xta'agä Dios hajxy coo hajxy ween xpiuhbety ja'a miäjaahaam; jaduññä miädia'agy hajxy maas hoy mjaac mäbøjcät. Hix, jaançh tehñ miäwiinhøhmbä møjcu'ugong. Pero jiaançh tehñ miøødä Dios mäjaa. Y coo hajxy jaduññ xpiuhbédät, cabä møjcu'ugong hajxy jaduññ myajmäjädá'agät.

¹²Hix, ja'a møjcu'ugong hajxy yaa xmiädsibøyyäm møødä mioonsä hajxy, ca'a jäya'ayhaxiä ja'a hädaa yaabä naaxwiimbä. Haxøögä møjcu'uhajxy jäya'ayhaty. Pojhaam hajxy wiädity. Cabä ni'x copc hajxy tiehñ miøødä neby højtshájtäm. Møcä mäjaa hajxy jiaançh tehñ miøødä. Ja'a hädaa yaabä naaxwiimbä haxøögjäya'ayhajxy hanéhmbä møjcu'ugóngäm. Hoy chajtøxpä ja'a møjcu'uhajxy wiädity. ¹³Paadiä Dios hajxy mmänuu'xtá'agät coo hajxy ween xpiuhbety ja'a miäjaahaam. Jaduññä møjcu'ugong hajxy hoy mjøjtáná'awät. Jaduññ hajxy mga'a yajmäjädá'agät. ¹⁴Jøjtána'awxä ja'a møjcu'ugong hajxy. Naxy hajxy hoy miänaaxøøjä mdehñ tiømiädiá'agät. Jaduññ hajxy hoy mmee'xtúgät. Jaduññ mäwíinäts miäbaady nebiä soldadohajxy møc ñiwiøhnta'açhiiñ coo hajxy hánajty chiptuna'añ. Naxy hajxy hoy yajxon mdehñ

wiädítät. Jaduññä Dios hajxy xñäwá'anät. Jaduññ mäwíinäts miäbaady nebiä soldado latapujxt hajxy yajniugiaaachjubøyijñ. Jaduññ hajxy hoy miäjäda'aga'añ. ¹⁵Niyhahixø'owøø hajxy nebiä Diosmädia'agy hajxy jaduññ hoy mmäwädítät. Coo jäya'ayä Diosmädia'agy hajxy miäbøgät, jaduññ hajxy jootcuje yhidät. Jaduññ mäwíinäts miäbaady nebiä soldadohajxy ñiyhahixø'yijñ coo ja'a quiø'og hajxy piägø'oy. ¹⁶Naçiä Dios ja'a miädia'agy hajxy mdehñ miäbøjcät coo ja'a Jesucristo hajxy tøø xyajnáhwäatsäm. Jaduññä møjcu'ugong hajxy mga'a yajmäjädá'agät. Jaduññ mäwíinäts miäbaady nebiä soldado escudo hajxy yajniyhawähajtugyijñ neby hajxy jaduññ quia'a tøpxøøjät ja'a tøpxquepty tóoyyap queecpä. ¹⁷Naçiä Diosmädia'agy hajxy mdehñ miäbøgät coo ja'a Jesucristo hajxy tøø xñähho'túütäm. Jaduññ mäwíinäts miäbaady nebiä soldado pujxcuhjup hajxy miøødän. Naçiä Diosmädia'agy hajxy mdehñ yhabøgät nebiä Dioshespíritu hajxy xyajnáhixøyyäm. Jaduññ mäwíinäts miäbaady nebiä soldadohajxy espadacap chiptuñän. ¹⁸Coo ja'a Dios hajxy mba'yá'axät, mmäyujwá'anäp hajxy tijaty hajxy hánajty myajmaajjajpy. Mmäyajtøwäbä Dios hajxy ja'a yhEspírituhaam tijaty hajxy mmäyujwá'anäp. Mmänuu'xtá'agäbä Dios hajxy ja'a jäya'aguiøxpä, ja'a Diosmädia'agy hajxy panøcxpä. Cab hajxy mnänuuxø'owät coo ja'a Dios hajxy hánajty mba'ya'axa'añ.

19-20 Møød høøchcøxpøchä
 Dios hajxy xpia'yáaxäbät
 coöchä Dios nñajtsapxøøyyät
 waambátyhøch ngapx nmädiá'agät
 coöchä miädia'agy hänäjty
 nyajwa'xä, ja'a hijty yaghijpiä
 cuyu'učh. Ja'a Dióshøch
 jaduhn xwyiinguejx coöchä
 miädia'agy jaduhn nyajwá'xät.
 Páadyhøch chaa ndsumyčhänä'ay
 ja'a Diosmädia'agyquiøxpä.
 Jadúhnhøchä Dios hajxy
 xpia'yáaxäbät coöch nga'a
 tsähgø'øwät coöchä miädia'agy
 hänäjty nyajwa'xä, nébiøch jaduhn
 hoy ngudiúnät.

21-22 Nguexáambiøchä hermano
 Tíquico jim maa mijtsän. Coö
 jim miédsät, jim hajxy jaduhn
 xyhawáanät nebiaty hõjts chaa
 ngudiunñ nguñaxy, coö hõjts

hoy ween nhity, neby hajxy
 jaduhn mga'a jootmayhájnät ja'a
 hõjtsçøxpä. Hóyhøchä hermano
 Tíquico nmøødnijootpaadyii.
 Hóyhøch jaduhn xmiøødtuñ ja'a
 Jesucristocøxpä.

23 Ween mijtsä Diosteedy hajxy
 xmiø'oy ja'a hoyhajtä weenhajt
 møødä Jesucristo, ja'a hajxy
 nWiindsøn hájtämbä. Weenä
 Dios hajxy xpiuhbety nebiä
 miädia'agy hajxy maas hoy
 mjaac mábøjcät, neby hajxy
 jaduhn maas hoy mničhoc
 mnimiee'xøøjät. 24 Weenä Dios ja'a
 mayhajt tiuñ ja'a hõjtsçøxphájtäm
 nägøxiä coö ja'a Jesucristo
 hajxy nwiingudsähgøøyyäm
 hamuumdu'joot, ja'a hajxy
 nWiindsøn hájtämbä. Tøyhajt
 jaduhn. Amén.

Filipenses

1 Jesucristo hõjts xmioonsähajp, hõõch Pablo mõõdä Timoteo. Hõjts mijts hädaa nocy nyajnäjaayõõby mäduhñtiä mijts ja'a Diosmädia'agy hajxy jim mbanõcxy maa ja'a cajpt xiõhatiän Filipos, nägõxiä mõõdä mwiindsõnhajpä jii by tsajtõgootypä, mõõd hajxy jii by puhbejpä. ²Weenä Dios hajxy xmio'oy hoyhajt weenhajt, ja'a nDeedyhãjtãm hajxy jim tsajpootypä mõõdä Jesucristo hajxy nWiindsõnhãjtãmbä.

³Naaghõoc-hõch mijts njahmiejtsta'agy, nnämáabiõch ja'a Dios “Dioscujú'uyäp” maa ja'a mijtscõxpän. ⁴Naaghõoc-hõch ja'a Dios nba'ya'axy, nmäyujwáambiõch hoyhajt weenhajt ja'a mijtscõxpä. Coochä Dios hãnajty nba'ya'axy ja'a mijtscõxpä, jootcújc-hõch hãnajty nnijjãwõ'yii, ⁵je'eguiõxpä coo ja'a Diosmädia'agy hajxy näguipxy tõõ nyajwá'xãm, mänaa hajxy tõõ mmãdoodsoõnãn hõxtä je'enä jäda'anãbaadyñä. ⁶Ja'a Dios ja'a hodiung yajtsohndaac ja'a mijtscõxpä. Nmõõdhõchä tõyhajt jaduhñ coo ja'a Dios ja'a tiung hoy yajtu'uyo'oya'ã hõxtä coonã Jesucristo hãnajty quiãdaactãgatsa'ã. ⁷Pãdyhõchä

tõyhajt nmõõdä cooch mijts njaanõch tehñ chocy njaanõch tehñ pia'hãyoy, coo ja'a Dios hajxy xpiuhbãjtãm näguipxy, homiãajõch nhity, hoy piujxtõgootiä, hoy yhagujcä, cooch hãnajty nmãdia'agy coo ja'a Diosmädia'agy tiõyyä. ⁸Nãjuõõbiä Dios cooch mijts njaanõch tehñ chocy njaanõch tehñ pia'hãyoy nägõxiä, nebiä Jesucristo hajxy xchõjcãm. ⁹Nmãnuu'xtãacypioõchä Dios coo hajxy hamuumdu'joot mjaac niõhoc mjaac nibia'hãyowõõjät, coo hajxy hoy mguhwijiyhãdät, ¹⁰neby hajxy jaduhñ mnãjuõ'õwät mwiimbwät ja'a hojiatypä hajxy. Jaduhñ hajxy mhãdät hawa'adstuum nebiä Dios hajxy xyajmädsõjcãm, hõxtä coonã Jesucristo hãnajty quiãdaactãgatsa'ã. ¹¹Xpiuhbãdãp ja'a Jesucristo hajxy neby hajxy jaduhñ hoy mwãdõtät. Jaduhñdsä Dios hoy quiãhxõ'õgät coo miõjjä coo jiaanõchä.

¹²Hermanodõjc, huuc wiinjuõ'õw hajxy jaduhñ; cooch yaa ndsumyõchãna'ay, maas hõyhõchä Diosmädia'agy jaduhñ yaa nyajwa'xy. ¹³Nãgõxiä cu'ughajxy tõõ miãdoyhaty coochä Jesucristo miãdia'agy

ngudsumyčhänä'awøoyyā, nāgøxiā, møødä soldadohajxy jim hadānaabiā maa ja'a gobernador tiøjcān. ¹⁴Ja'a Jesucristo miādiā'agyhøch ngudsumyčhänä'awøøby. Cábøch ndajy nmay. Coočh nga'a tajy nga'a may, paadiā hermanodøjc-hajxy nāmay quia'a nā'ägädä taj quia'a nā'ägädä maabiā coo ja'a Diosmädia'agy hajxy yajwa'xy, hoy hajxy cu jia tsúumäbä. Cab hajxy nā'ägädä tsāhgøøy ni weeñtiā. Hix, høøch hajxy jaduñ xpiahijxp.

¹⁵⁻¹⁷Paadiā Diosmädia'agy hajxy yajwa'xy cooçh hajxy xchocy xpia'häyoy. Hojioot hajxy jiaančh tehñ miøød. Najuøøby hajxy jaduñ cooçhā Diosmädia'agy ngudsumyčhänä'awøøy. Pero jii hajxy naje'ebä, paadiā Diosmädia'agy hajxy yajwa'xy, cooçh hajxy xmiädsiphaty. Tøyhajt jaduñ. Je'ečh hajxy xyajmädsøjp cooçh yaa ndsaačhpögät pujxtøgooty. Cabä hojioot hajxy nā'ägädä møødä ja'a høøchcøxpä. ¹⁸Pero cábøch jaduñ nmøjpäda'agy, høyhøch hajxy jaduñ xjia mädsiphaty.

Xoondäacpøch jaduñ coo ja'a Jesucristo hajxy miādia'agy, hoy hojioot hajxy quia'a ja møødä ja'a høøchcøxpä. ¹⁹Y jaac xoonäda'agāambøch jaduñ. Nnajuøøbiøch cooçh hodiuum nmähmøøwa'añ. Hix, mijts ja'a Dios hoyhajt weenhajt mmäyujwaamb ja'a høøchcøxpä. Y xpuihbéjpøçhā Dioshespíritu ja'a Jesucristocøxpä. ²⁰Cábøçhā njoot nā'ägädä tsoy cooçh ndsāhgøøwät mänāajøçhā

Jesucristo hānajty nmādia'aguiān. Cábøch mänaa ndsāhgøøy ndsāhdiuñ. Chójpjøch njoot jaduñ cooçhā Jesucristo nyajcāhxø'øgät coo miøjjä coo jiaančhā, høyhøch njadehm quiuho'ogø'owät.

²¹Madúhñtiøch yaa njaac jugyhaty, nyajcāhxø'øgäbøçhā Jesucristo coo miøjjä coo jiaančhā. Y cooçh nhó'nät, maas hoy hānajty quiahxø'øgaannä coo miøjjä coo jiaančhā. Mänitøch jim nnøcxaannä maa je'le wyiinduumän. ²²⁻²³Mejstú'ujøçhā njoot nyajmøødmädia'agy. Cooçh nhó'ogät, mänitøch cu nnøcxnä maa ja'a Jesucristän. Maas jootcújc-høch jim nnijäwøøyyänät. Pero cooçh yaa njaac jugyhädät, maas høyhøçhā Jesucristo jaduñ njaac mädúnät. Cábøch ndehm yhoñajuøøy pø maas hoy cooçh nhó'nät, o pø caj. ²⁴Høøch jaduñ mänaamb cooçh hit nga'a tsoj hó'ogät; jadúhñhøch mijts ja'a Diosmädia'agy tehngajnä njaac yajnähixø'owät. ²⁵Nmøødhøçhā tøyhajt jaduñ cooçh mijts njaac møødhida'añ. Njaac yajnähixø'owäämbiøch mijts tehngajnä, neby hajxy jaduñ maas hoy mmäbøgät, neby hajxy jaduñ mjaac xoonäacpøgät. ²⁶Cooçhā Jesucristo jim xyajnöcxtägätsät maa mijtsän, mänit hajxy mmāna'ana'añ coo tiøyyä coo Jesucristo miøjjä jiaančhā.

²⁷Naxiā Jesucristo miādia'agy hajxy mdehm yajtúunät. Jaduñnä Diosmädia'agy hajxy näguipxy myajwá'xät tehngajnä, høyhøch jim nga'a ja nöcxät maa mijtsän. ²⁸Cabä mmädsip hajxy

mnä'ägädä tsähgó'owät. Jaduhñ hajxy ñajuø'owa'añ coo hajxy haxøøgtuum yajca'awa'añijäm ja'a Diósäm, møød coo mijts ja'a Dios xpiäda'aga'añ hodiium. ²⁹⁻³⁰Tiuumbiä Dios ja'a mayhajt coo hajxy xyajnähdijy coo ja'a miädia'agy hajxy mmäbójcät ja'a Jesucristocøxpä, nébiøch cham ndsaaçhpøquiän. Tøøch hajxy hamdsoo xyhixy xmiädoy cooçh yaa ndsaaçhpøcy ja'a Jesucristocø xpä.

2 Coo mijts ja'a Jesucristo xchocy, paady hajxy xjiootcapxmøcpøcy. Coo mijts ja'a Dioshespíritu tu'ugmädia'agy mmøødhity, paady hajxy hamiñ haxøpy mniçhocy mnibia'häyoyii. ²Jadúñhøch njoot jiaançh tehñ chocy coo hajxy tu'ugmädia'agy mhídät. Coo hajxy mniçhoc mnibia'häyowóøjät, maas hóyhøch nnijiiäwø'owóøjät. ³Ca'a mhamdsoo wiinmahñdy hajxy mwi'i yajtuñ. Ca'a hajxy mniguiumayii. Jaduhñ hajxy mmäná'anät coo ja'a mmägu'ughajpä miaas jaty quejee miich. ⁴Hamiñ haxøpy hajxy mnigwieendähadóøjät.

⁵Mbahixäp ja'a Jesucristo hajxy neby je'e jecy wiädiñtiän. ⁶Hoyyä Jesucristo jia Dioshuungä, caj jiootma'ty coo ñämaayyä coo yaa jiäya'ayhädät hädaa yaabä naaxwiin. ⁷Coo yaa jiäya'ayhajty, yhøxhijx yhamdsoo cuhdajt jaduhñän. Jaduhñ ñibiädaacänä nebiä moonsän. Cab hänajty hamdsooyyä miøjhada'añ. ⁸Mänitä Dios miädia'agy quiudiuunä coo yhó'ogät. Hoçhähdiuunnä jim cruzcøxp miøjpahbejtä. ⁹Coo

ja'a Jesucristo quiudiuunñ neby ñämaayyän, paadiä yajmøjhajtä ja'a Diósäm. Ni pøn jaduhñ quia'a mabaady nebiä Jesucristän. ¹⁰Weenä Jesucristo hajxy nägøxiä wyiingudsähgø'øy, jim tsajpootyp, møød hädaa yaabä naaxwiin, homiaajä. ¹¹Weenä Jesucristo hajxy nägøxiä quiapxpaady coo hajxy wyiindsønhaty. Jaduhñä Dios jim quiähxó'ogät mõj jaançh, ja'a nDeedyhájtäm.

¹²Mägu'ughajpädøjc, mänáajøch jim nhitiän maa mijtshajxiän, xmiäbójcäbøçhä nmädia'agy hajxy hänajty. Hoorä, cooçh yaa jäguem nhijnä, miaas tsøjpiøch njoot cooçh nmädia'agy hajxy tehngajnä xmiäbójcät. Naxiä Diosmädia'agy hajxy mdehm miäbógät, neby hajxy jaduhñ hodiium mmähmó'owät. Naxiä Dios hajxy mdehm wyiingudsähgó'owät. Cab hajxy nä'ä nägoodä mnä'ä niguiumayóøjät. ¹³Jaduhñä Dios jioot chocy coo hajxy hoy mwädítät. Xpiuhbédäp ja'a Dios hajxy jaduhñ.

¹⁴Hoy hajxy mwädítät. Cab hajxy tii mwi'i chippädá'agät. Cab hajxy tijaty myajniguiuhøj'owóøjät. ¹⁵⁻¹⁶Jaduhñ hajxy hoy mwädítät nebiä Dioshuungän maa ja'a ca'awiindøyhäna'c-hagujcän. Coo ja'a Diosmädia'agy hajxy myajnähixó'owät, jaduhñ hajxy mwädítät nebiä jøøn yhajjiiän hagoonstuum; coo jäya'ayhajxy jaduhñ miäbógät, mänit hajxy hodiium piäda'agóøjät. Coo hajxy mgudiúnät neby hajxy chaa nnäma'ayän, mänitøch nxoondá'agät, mänaa ja'a Jesucristo hänajty jadähooc

quiädaactägatsa'añän.
 Cähxø'øgaamb jaduhñ cooçh
 hänajty hoy tøø nduñ maa
 mijtsøxpän. ¹⁷Coo Diosmädia'agy
 hajxy hamuumdu'joot mmäböcy,
 páadyhöch nxoonda'agy, hóyhöch
 cu nja ho'og. Chójpjoch njoot coo
 hajxy nmøødxoondá'agät. ¹⁸Tsøgxä
 hajxy jaduhñ xoondáacäm.

¹⁹Coo ja'a Jesucristo ja'a
 nWiindsøn'hájtäm jaduhñ
 miáná'anät, mobädájpøch mijts
 ja'a Timoteo nyajnäguexa'añ.
 Cooçhä Timoteo min jadähooc
 xyhawaanä coo mijts hoy mhity,
 hóyhöch hänajty nnijiäwø'øwa'añii.

²⁰Páadyhöçhä Timoteo jim
 nguexa'añ cooçh je'e nidiuhm
 xmiøødhity tu'ugmädia'agy maa
 mijtsøxpän. Xpiuhbedaamb
 mijts jaduhñ hamuumdu'joot.

²¹Ja'a häna'c-hajxy jaac yaabä,
 yhamdsoo tuung hajxy tiuumby.
 Cabä Jesucristo tiuung hajxy
 hamuumdu'joot tiunaanä.

²²Mnajuøøby hajxy jaduhñ cooçhä
 Timoteo hoy xmiøødtuñ maa ja'a
 Diosmädia'agy myiñän, nébiøch
 nhamdsoo huungän. ²³Mänítøçhä
 Timoteo nguexät cooçh hänajty
 tøø nnajuø'øy pø pädsømäambøch.

²⁴Coo ja'a Dios jaduhñ miáná'anät,
 mobädájpøch jim nnøcxa'añ maa
 mijtsän.

²⁵Tøøch mijts ja'a hermano
 Epafrodito hijty xyajnäguexy
 cooçh jaduhñ xpiuhbédät.
 Hóyhöch jaduhñ xjiaançh
 møødtuñ cooçhä Diosmädia'agy
 nyajwa'xy. Hahixøøby cooçh
 mijts nyajnäguejxtägätsät,
²⁶je'eguiøxpä coo mijts xjia
 wi'i quiuhijxtägatsa'añ. Jaançh

tehm tiajp jaançh tehm miáabiäc
 je'eduhñ coo mijts tøø mmädohyaty
 coo hijty piøgyii. ²⁷Tøyhajt hijty
 piøgyii. Ja weenjaty jaduhñ
 quia'a ho'cy. Miøødhajt ja'a Dios
 hojioot ja'a Epafroditoøxpä
 møød høøçhcøxpä. Coo
 häxøpy tøø yho'ogy, maas
 hanáxiøch häxøpy njootmayhaty.
²⁸Páadyhöch mijts ja'a Epafrodito
 nyajnäguejxtägatsa'añ, neby hajxy
 jaduhñ mxoondá'agät coo mijts
 jadähooc xñämejtstägatsa'añ.
 Coo hajxy jaduhñ mxoondá'agät,
 mänítøch jaduhñ hoy
 nnijiäwø'øyyäbät. ²⁹Coo jim
 miédsät maa mijtsän, xi'ig
 xoñ hajxy myajpøø'xät nebiä
 hermanän. Homianaajä hajxy
 mwiingudsähgø'øwät pønjiatiä
 Diosmädia'agy pawädijp nebiä
 Epafrodito piawäditiän. ³⁰Paady
 je'e ja weenjaty quia'a ho'cy
 cooçh jaduhñ xmiøødtuñ maa ja'a
 Diosmädia'agy myiñän. Pero cabä
 miøjpäda'agy coo ja weenjaty tøø
 quia'a ho'ogy. Cooçh yaa xpiuhbety,
 mijts yaa xñähduunduutp. Hix,
 cábøch mijts hoy yaa xpiuhbeda'añ;
 jäguem mijts jaduhñ xpiaatä.

3 Hermanodøjc, tsøg
 hajxy xoondáacäm ja'a
 Diosøxpä. Chaa hajxy jadähooc
 nhawaandägätsänäm neby hajxy
 tøø nhuuc nämaabiän. Coo hädaa
 mädia'agy hajxy jaduhñ myajtúnät,
 cab hajxy myajwiinhøønät.
 Ni mänájøch jaduhñ nga'a
 nänuuxø'øy, hoñaaghoocä
 hajxy jaduhñ nhawáanämät.
²Mnigwieendähadøøjpä hajxy
 maa häna'c-hajxy jaançh tehm
 quia'awiindøybän, ja'a hajxy

jaduhñ mānaambā coo hajxy tsipcøxp nyajcircuncidarhajtāmät. ³Tøyhajtä Dios hajxy xjiaančh circuncidarhajtām coo hajxy nwiingudsähgøyyām. YhEspřrituhaam hajxy nwiingudsähgøyyām. Jootcujc hajxy jaduhñ nnijiäwøyyām ja'a Jesucristocøxpä. Cab hajxy nmānāanām coo ja'a jecyquihdujt hajxy xyajñähwáatsäm. ⁴Høøch, jadúhñhøch hijty nmānaambā cooc tyijy ja'a jecyquihdujt hajxy xyajñähwáatsäm. Pedyíijøch hijty ngudiuñ nej yhane'emiän. Cab jaduhñ pøn ñä'ägä cudiuñ nébiøch hijty ngudiuñän. ⁵Judíoshøch høøch. Judíospøch hijty ndajhajpy ndeedyhajpy. Benjamínhøch hijty nhaphajpy ndeedyhajpy. Mānāajøch nmiñ nga'ayän, cuductujxøjøch hoy nyajcircuncidarhaty, nebiä judíoshajxy quihdujthatiän. Ja'a fariseos miädiá'agyhøch hijty nbanøcxäp. ⁶Nägø'ø nädécypjøch hijty ngudiuñ, høxtä ja'a hermanobáadyhøch hijty nyajtsaächpøcy. Jaančh tehñ piedyíijøchä ley hijty ngudiuñ; cábøch hijty pøn waamb xñāma'ay. ⁷Jaančh tehñ ñiguiumáayäbøch hijty cooçh hijty jaduhñ hoy ngudiuñ. Pero cábøch nniguiumayāanänä, je'eguiøxpä cooçhä Jesucristo miädia'agy tøø nbadu'ubøjcänä. ⁸Cøjxhøch nnajtshixøøñä mädyíijátýhøch hijty nyajtuumb. Páadyhøch tøø nnajtshixøøñä, nébiøchä Jesucristo miädia'agy jaduhñ hoy nbanøcxät. Maas tsoobáatnöp hädaa cooçhä Jesucristo tu'ugmädia'agy nmøødhijnä ja'a nWiindsønñajpiä.

⁹Cooçhä Jesucristo miädia'agy nmäbøjcä, páadyhøchä Dios tøø xyajñähwa'ačh. Cáboch nmānaanä coogøch tyijy ja'a jecyquihdujt xyajñähwá'adsät. ¹⁰Chøjpiøch njoot cooçhä Jesucristo tu'ugmädia'agy nmøødhijnät. Coo ja'a Jesucristo jadähooc jiuypijøjcy, paadiä mäjaa jaduhñ miooyyä cooçh jaduhñ xpuihbédät. Chogáambiøch njoot cooçh ndsaaçhpøgät ja'a Jesucristocøxpä. Høxtä ho'ogáambøch jaduhñ neby je'e yho'quiän. ¹¹Páadyhøch njoot jaduhñ chocy coo ja'a Dios jaduhñ ween miāna'añ cooçh xyagjuypijøjtägätsät.

¹²⁻¹⁴Hermanodøjc, cábøch jaduhñ nmāna'añ cooçh tøø nyajpedyíi. Cáboch njahmiejtsnä nébiøch hijty nwädity. Cooçhä Jesucristo xmioonsähaty, páadyhøch miädia'agy nyajcopcøyyänä, nébiøch jaduhñ ca'xy ngudiúunänät. Ñä'ägädä tsøjpiøch njoot nägø'ø nädécypjä cooçh ca'xy ngudiúnät. Jadúhñhøchä Dios jim xmiøjyá'axät tsajpootyp, je'eguiøxpä cooçhä Jesucristo tøø xyajñähwa'ačh.

¹⁵Tsøg hajxy tu'ugcopc hjítäm nébiøch jaduhñ naamnä ngujaayän, pønjaty ca'xy cudiuumb. Pønjaty xquia'a møødhjítäm tu'ugcopc, weenä tøyhajt hajxy mio'oyíjäm ja'a Díosäm. ¹⁶Tsøg hajxy tehngajnä yajtu'uyóhyyäm nebiä Dios hajxy xyajñähixøyyäm.

¹⁷Hermanodøjc, xpiahíxäbøch hajxy jaduhñ nébiøch hoy nwäditiän. Xpiahíxpøch hajxy jaduhñ nämay. Mbahíxäp hajxy je'eduhmbä. ¹⁸Tøøch mijts mayhooc nnāma'ay coo ja'a hønñdaacpähajxy

may wiädity. Cábäc tyijy jaduñ tiöyyä coo ja'a Jesucristo hajxy tøø xñähho'túútäm cruzcøxp. Cháajäts jadähooç nnämäaguuiumbä. Jaančh tehñ hoñäjøøñä jaduñ. ¹⁹Haxøøgtuum hajxy yhida'añ cøjxta'axiøø. Hiç, cabä Dios hajxy wyiingudsähgø'øy. Yhamdsoo cuhdujt hajxy yajtuumbý. Tijaty maas hoçhähdiuunnä, je'e hajxy ñä'ägä cumaaby. Je'e hajxy jaduñ wyi'i chojpy coo hoyhajt weenhajt hajxy cu piaaty hädaa yaabä naaxwiin. ²⁰Pero højtshájtäm, jim højts njoot hamuumdu'joot nbädäacäm tsajpootyp. Ja'a Jesucristo, ja'a hajxy nWiindsøñhájtämbä, je'e hajxy xyajñähwáatsäm. Je'e hajxy nhahíçxäm coo jim choona'añ tsajpootyp, coo yaa miänaca'añ hädaa yaabä naaxwiin. ²¹Mänitä nnaaxni'xhajxy xyhädiuundägatsáañänä. Jaduñ hajxy yajxón ngähxø'øgáañäm nebiä Jesucristo yhamdsoo ni'x yhamdsoo copcän. Miøødä Jesucristo cuhdujt jim cøxp møød hädaa yaabä naaxwiin homiaajä. Paadiä nnaaxni'xhajxy xyhädiuundägatsáañäm coo cuhdujt jaduñ miøødä.

4 Hermanodøjc, njaančh tehñ chojpy njaančh tehñ pia'häyóobiøch mijts jaduñ. Páadyhöch nja wi'i ñøcxa'añ maa mijtsän. Jaančh tehñ xioonďäacpøch jaduñ ja'a mijtsøxpä, je'eguiøxpä coo mijts ja'a Diosmädia'agy jaančh tehñ yhoy mgudiun, coo hajxy jim mnøcxa'añ tsajpootyp. Tehngajnä ja'a Dios hajxy mmøødhídät tu'ugmädia'agy.

²Evodia møødä Síntique, mijts nmänuu'xtaacypy coo hajxy mhídät tu'ugmädia'agy. Jaduñnä Diosmädia'agy hajxy hoy myajtuunmúgät. ³Chaads miich mägu'ughajpä, hóyhøch miich xjiaančh tehñ jiamiøødhaty, tunä mayhajt, mmägäpæp mhané'emæp ja'a Evodia møødä Síntique coo hajxy tu'ugmädia'agy yhíçñät. Näguípxyhøchä Diosmädia'agy hajxy hoy nmøødyajwa'xy, møødä Clemente møødä hermanodøjc-hajxy may. Jim hajxy nøcxy yhidaannä tsajpootyp cøjxta'axiøø.

⁴Tehngajnä hajxy homiänaajä mxoondá'agät ja'a Dioscøxpä. ⁵Hoy hajxy mjaančh tehñ jiäya'ayhádat cu'ughagujc. Mäwiingoomb jaduñ coo ja'a Jesucristo quiädaactägatsa'añ. ⁶Cab hajxy tii mdaj mmáyät. Dios hajxy mmäyujwá'anæp coo hajxy xpiuhbédät. Mnämä'awæp ja'a Dios hajxy jaduñ "Dioscujú'uyæp." ⁷Mänitä Dios hajxy xmió'owät hoyhajt weenhajt. Jaduñ hajxy tii mga'a taj mga'a máañät. Jagoo hajxy jaduñ mjaac taj mjaac máyät ja'a Jesucristocøxpä. Ni pøn jaduñ xquia'a puhbédät nebiä Dios hajxy xpiuhbetiän.

⁸Hermanodøjc, chaačhä nocyhädiún nyajmayaannä. Je'e hajxy myajcopcø'øwæp mädyiijaty jaduñ tøyhajt, mädyiijaty jaduñ howyiingudsähgøøñä, mädyiijaty jaduñ hoy, mädyiijaty jaduñ yajxón, mädyiijaty jaduñ hoguiumaañä.

⁹Tehngajnä hajxy hoy mgudiúnät neby hajxy tøø nyajñähixø'øyän.

Jadúhnhøch hajxy xpiahíxät nébiøch hoy ngudiuñän. Jaduhñä Dios hajxy xmiøødhídät tu'ugmädia'agy. Jaduhñ hoyhajt weenhajt hajxy xmió'owät.

¹⁰Xoondáacpøch je'eguiøxpä cooçh mijts jadähooc xpiuhbéjcumbä xädø'øñhaam. Páadyhøchä Dios jaduhñ nnäma'ay “Dioscujú'uyäp.” Jia tsojc ja'a mjoothajxy cooçh hajxy cu xpiuhbejty, pero cab hajxy xñä'ä näbaadøyyä. ¹¹Cábøch hänäjty ndsippäda'agy, hóyhøch hänäjty tii nja yajmaajiaty. Tøøch nhabøjnä nébiøch jootcujc nhíjnät, hóyhøch hänäjty tijaty nja yajmaajiaty. ¹²Cábøch nmøjpädaacnä mädyijátyhøch nyajmaajiajpy. Cábøch nøcxy nniguiumayii cooçhä Dios xpiuhbety. ¹³Hotyíjyøch njada'añ. Ja'a Jesucristøch homiänaajä xpiuhbejp. ¹⁴Hoyøøyy cooçh mijts xpiuhbejty xädø'øñhaam.

¹⁵Pero jadúhnhøch mijts naxy xñä'ägädä puhbetyhaty. Cooçh hänäjty jim ndsoona'añ Macedonianaaxooty, mänítøchä xädø'øñ hajxy hoy xmiø'oy. Páadyhøch hajxy hoy xmiø'oy cooçhä Diosmädia'agy jim hoy njaançh tehñ yajwa'xy jim maa mijtsän jim Filiposcajptooty. Cábøch wiinghäna'c-hajxy

hänäjty tii xñä'ägädä mo'owa'añ. ¹⁶Mänáajøch hänäjty jim nhityñä maa ja'a cajpt xiøhatiän Tesalónica, coo hajxy mmädoyhajty cooçh hänäjty nyajmaajiaty, metsc-hooc tægøøghooc-høch xädø'øñ hajxy jim xyajnäguejxy. ¹⁷Cab hajxy mmäná'anät cóogøch tyijy xädø'øñ nwi'i quiuhbøcjuø'øy. Cooçh mijts xpiuhbety, paadiä Dios hajxy xmiø'owa'añ hoyhajt weenhajt. Høøch, páadyhøch nxoonda'agy. ¹⁸Cábøch tii nyajmaajiajnä. Nä'ä tægø'øbøch mijts xyajnäguejxy, ja'a Epafrodito miäméjtsäbä. Xjiaançh tehñ quiumaabiä Dios hajxy jaduhñ cooçh hajxy xjiaançh tehñ piuhbety. ¹⁹Coo hajxy hänäjty tii myajmaajiaty, xmió'owäp ja'a Dios hajxy ja'a Jesucristocøxpä. Jim cøxiä miøødä tsajpootyp. ²⁰Tsögä Dios hajxy nämáayyäm cøjxta'axiøø coo miøjjä coo jiaançhä; je'e hajxy nDeedyhajtäm. Amén.

²¹Ja'a hermanodøjc-hajxy yaabä, højts mijts nyajpoo'xyp pønjetiä Diosmädia'agy jim mäbøjp Filipos. ²²Pønjetiä Diosmädia'agy yaa mäbøjp, je'eds mijts xyajpoo'xp, møød hajxy yaa tuumbä maa ja'a gobiernä tiøjcän.

²³Weenä Jesucristo hajxy xmiø'oy hoyhajt weenhajt. Je'e hajxy nWiindsønhtëjtäm. Amén.

Colosenses

1 ¹⁻²Høöch jaduhñ xøhajt Pablo. Jesucristøch xquiuguexyhajp. Ja'a Dios jaduhñ mänaañ cooöch jaduhñ xquiuguexyhádát. Højts hädaa nocy nhädiuumby mөөdä mägu'ughajpä Timoteo. Mijts jaduhñ nnocynñjaayøøby, pønjatia Diosmädia'agy jim mäßøjp maa ja'a cajpt xiøhatiän Colosas. Tu'ugmädia'agy mijtsä Jesucristo mmөөdhity. Weenä Dios ja'a hoyhajtä weenhajt hajxy xmiø'oy. Hix, jaaya'ay hajxy jaduhñ nDeedyhajtäm.

³Naaghooc højtsä Dios jaduhñ mba'ya'axy ja'a mijtsøøxpä, nnämaaby højtsä Dios “Dioscujú'uyäp.” Haa ja'a Jesucristo, ja'a hajxy nWiindsønähajtämbä, ja'a Dioshuung je'e. ⁴Tøø højts jaduhñ nmädoyhaty coo mijtsä Jesucristo miädia'agy mmäßøjcä, mөөd coo mijtsä mäßøjpädøjc nägøxiä mdsocy, ja'a Diosmädia'agy hajxy mäßøjpä. ⁵Tøø ja'a mjoot hajxy jim mbäda'agy tsajpootyp coo hajxy jim nøcxy mhida'añ cøjxta'axiøø. Mänitä mjoot hajxy jim mdehm piädaacy mänaa ja'a Diosmädia'agy hajxy mmädoodsoönän, ja'a jaanöch tehñ tiøyhajtpä. ⁶Wiinduhmyhagajptä

Diosmädia'agy wia'xnä. Jaduhñä jäya'ayhajxy wiinduhmyhagajpt miäßøjnäbä. Jaduhñ mijts tøø mmäßøjpä coo ja'a Dios hajxy tøyhajt xchójcäm. ⁷Højts nmägu'ughajpä Epafras, jaaya'ayä Diosmädia'agy hoy yajwa'xtsoön maa mijtsän. Jaanä Jesucristo quiuguexy je'ebä. Hoy højts jaduhñ xmiøødtuñ. ⁸Je'e højts hoy xyhawaanä cooc mijtsä mäßøjpädøjc mjaanöch tehñ chocy mjaanöch tehñ pia'häyoy ja'a Dioshøspiritucøøxpä.

⁹Jajty højts jaduhñ nmädoyhajty cooc hajxy hoy mjaanöch tehñ miäßøcy, jabom-jabom højtsä Dios nba'ya'axy ja'a mijtsøøxpä, ween hajxy jaduhñ mnajuø'øy tii ja'a Dios hajxy xyajmädsojp, mөөd weenä Dios ja'a miädia'agy hajxy cøxiä xyajwiinjuø'øy. ¹⁰Jaduhñ højtsä Dios nba'yaaxpä coo hajxy hoy mwädität. Jaduhñä Jesucristo hajxy xquiumáyät. Jaduhñä hoybä hajxy madiu'u mgudiünät. Maas hoyyä Dios hajxy jaduhñ mmөөdhidät tu'ugmädia'agy, mөөd jaduhñ hajxy xquiumääbiät. ¹¹Jaduhñ højtsä Dios nba'yaaxpä coo ja'a Dios hajxy ween xpiuhbety ja'a miäjaagøøxpä ja'a jim miøødpä tsajpootyp.

Jaduhñ hajxy hoy mmee'xtúgät, hoy häna'c hajxy nebiaty cu xjia tun. Tehngajnä hajxy jaduhñ mxoondá'agät, hoy hajxy nej cu mja jat cu mja habet. ¹²Tehngajnä ja'a nDeedyhájtäm hajxy jaduhñ mnámá'awät "Dioscujú'uyäp." Hix, jaaya'ay hajxy hawa'adstuum xpiädáacäm mөөдä jäya'ayhajxy nägөxiä, ja'a miädia'agy hajxy mäbөjсäbä. ¹³Tөө ja'a Dios hajxy xyajpädsөmäm hagoodstuum. Hodiium hajxy hoy nmähmөyyäm maa ja'a yHuung yhane'emiän. Jiaanç tehñ chojpiä Dios ja'a yHuung jaduhñ. ¹⁴Jaayá'ayäts hajxy jaduhñ xñähho'túütäm; jaduhñä nbojpä ngädieey hajxy xyajñähwäatsäm.

¹⁵Haa ja'a Jesucristo, jíiyyäm hänäjty je'e mänaa hädaa yaabä naaxwiin yhawijy tiөө'xta'aguiän. Tu'uquyä Jesucristo jaduhñ mөөдä Dios. Mänitä Jesucristo hoy yaa jäya'ayhaty hädaa yaabä naaxwiin. Nhíjxäm hajxy jaduhñ. Haa ja'a Dios, cab hajxy mänaa nhíjxäm. ¹⁶Cөxiä Jesucristo yhädiuunñ jim tsajpootyp mөөд yaa hädaa yaabä naaxwiin, tijaty hajxy yaa nhíjxäm, mөөд tijaty hajxy yaa nga'a híjxäm, mөөдä poj mөөдä täxa'a, ja'a jim mähanehmbä tsajcөxp, mөөд pөnjaty yaa mähanehmb hädaa yaabä naaxwiin, mөөд pөnjaty jim jaac mähanehmb tsajpootyp. Paadiä Jesucristo jaduhñ cөxiä yhädiuunñ coo hänäjty jaduhñ төө yhane'emyii ja'a Tieedy. Madiu'u ja'a tuung jim tsajpootyp maa ja'a Jesucristo ja'a Diosmoonsä hoy piäda'aguiän. Hamdsoo ja'a Jesucristo jaduhñ cөxiä ñiyhädiuunäxä. ¹⁷Jíiyyäm

hänäjty je'e mänaa hädaa yaabä naaxwiin yhawijy tiөө'xta'aguiän. Je'enä yaghityñä tijaty yhädiuun. ¹⁸Jaayá'ayäts jaduhñ cope-hajp maa ja'a Diosmädia'agy hajxy nmäbөjсäm. Coö hajxy hoy xñähho'túütäm, coö jadähooc jiuypijөjtägajch, paady möj jaanç yhiñä. Hix, jayөjp je'e jiuypijөjcy. Y coö jaduhñ jiuypijөjtsohñ, paady möjсuhdujt miөөдän. ¹⁹Nebiä Dios jim yhitiän tsajpootyp, jaanä jaduhñä Jesucristo jim yhiñäbä. Jaduhñä Dios ja'a yHuung Jesucristo yajmädsөjcy coö ja'a Jesucristo pedyii Dyioshädät nebiä Tieedy Dyioshatiän. ²⁰Jaduhñä Dios ja'a jioot jia tsojpä coö hoy piөnä miөөdhädät, mөөд coö ja'a Dios hajxy jaduhñ nga'a mädsiphäjtänät. Paadiä Dios ja'a yHuung yaa quiejxy coö hajxy jaduhñ xñähho'túütämät cruzcөxp.

²¹Mijts, cabä Dios hajxy hijty mmөөdhity tu'ugmädia'agy. Mmädsiphajpiä Dios hajxy hijty jaduhñ. Haxөөг hajxy hijty mwädity. ²²Coö ja'a Jesucristo hoy yaa jäya'ayhaty hädaa yaabä naaxwiin, coö hajxy hoy xñähho'túütäm, tu'ugmädia'agy hajxy jaduhñ xmiөөdhíjtänä. Jaduhñä nbojpä ngädieey hajxy xyajñähwäatsäm. Jaduhñä Tieedy төө yhawaanä coö hajxy төө nnähwäatsäm. ²³Hoyyä Jesucristo hajxy төө xjia yajñähwäatsäm, pө cabä Diosmädia'agy hajxy hoy ngudiunäänäm, cabä Dios hajxy jaduhñ xquiumáayyämät. Paadiä Diosmädia'agy hajxy hamuumdu'joot mgudiünät nebiä Epafras hajxy xyajñähixөyyän.

Cab hajxy mnajtshixó'owät. Jaduhñ hajxy jim mnócxät tsajpootyp. Wiinduhmyhagajptä Diosmädia'agy jäda'ahaty wia'xnä. Hóöch jaduhñ nyajwa'xyp, hóöch Pablo.

²⁴Xoondáacpøch je'eguiøxp cooçh jaduhñ ndsaaçhpøcy ja'a mijtscøxpä pønhatiä Jesucristo miädia'agy mabójcäp. Jaduhñä Jesucristo hajxy maas hoy mmøødhídät tu'ugmädia'agy. Jaduhñçh ndsaaçhpøjpä nebiä Jesucristo chaaçhpøjqüiän.

²⁵Jaayá'ayhöch jaduhñ xpiädaac coods mijtsä Diosmädia'agy ca'xiä ngøxy yajnáhixó'owät. Jaduhñçh xpiädaacpä cooçhä jäya'ay nägøxiä nbuhbédät, ja'a miädia'agy hajxy jaduhñ mabójcäbä. ²⁶Cabä Dios ja'a wyiinmahñdy choj yajwiingähxø'cy. Cujecy hajxy jaduhñ tøø xyajmädoyhájtäm pønhatiä miädia'agy mabójcäp.

²⁷Jaduhñä Dios wyiinmahñdyhajty coo ja'a Jesucristo hajxy nägøxiä nmøødhíjtämät tu'ugmädia'agy møød mijts ca'a judióspä. Mänit hajxy nägøxiä jim mnøcxaanñä tsajpootyp. Hoy-yagjuøñä ja'a Dios jaduhñ wyiinmahñdyhajty.

²⁸Hoy miaajä højts Jesucristocøxpä nwädity yajnáhixøøbiä coo jäya'ayä yhaxøøgcuhdujt hajxy ñajtshixó'owät, møød coo ja'a Jesucristo miädia'agy hajxy cøxiä ween yajtuungpaatä. Ja'a Dios højtsä wiinmahñdy xmioby nebiaty højts nyajnáhixó'owät. Jaduhñ højtsä Jesucristo nhawaanä coo ja'a jäya'ayä Jesucristo miädia'agy hajxy hoy yajtuúnänä. Cumayaanäp hajxy jaduhñ ja'a

Jesucristo. ²⁹Hamuumdu'jóothøch jaduhñ nduunghaty nägø'ø nädecypiä. Ja'a Jesucristøch xpiuhbejp. Je'echä mäjaa xmioby pedyii.

2 Jabom-jabómhøçhä Dios møc-møc nmänuu'xta'agy ja'a mijtscøxpä møødä mabøjpdøjcøxpähajxy, ja'a hajxy jim tsánaabiä Laodicea, møødä mabøjpdøjc-hajxy nägøxiä pønjátyhöch xquia'a hixyhajpnä. ²Ween mijtsä Dios xquiapxmøcpøcy. Jaduhñä Jesucristo hajxy maas hoy mmøødhídät. Ween hajxy hamiñ haxøpy mniçhocy mnibia'häyoyii. Mmøødhájnäbä tøyhajt hajxy jaduhñ coo ja'a Jesucristo hajxy xmiøødhijnä tu'ugmädia'agy. Ween hajxy jaduhñ tehngajnä mjaac habøcy. ³Y coo ja'a Jesucristo hajxy tu'ugmädia'agy xmiøødhijnä, jaduhñ hajxy mnajuøñä nebiatiä Dios wyiinmahñdyhaty, coo cøxiä wiinä jiaançh tehñ ñajuø'oy, coo cøxiä wiinä jiaançh tehñ jiaty.

⁴Paady mijts jaduhñ nhawaanäm, jaduhñ hajxy mga'a yajwiinhøønät, hoy häna'c hajxy yajxón cu xjia møødmädia'ag. ⁵Hóyhøch jim nga'a ja hity maa mijtsän hajäya'ayhaam, njahmiejchp mijts jaduhñ. Xoondáacpøch jaduhñ coo ja'a Jesucristo miädia'agy hajxy hamuumdu'joot mmabøjcä, møød coo hajxy tu'ugmädia'agy mhity.

⁶Tøø ja'a Jesucristo miädia'agy hajxy mmabøjcä, ja'a hajxy nWiindsønhájtämbä. Paady hajxy mmøødhíjnät tu'ugmädia'agy. Paadiä miädia'agy hajxy pedyii mgudiúünänät. ⁷Ca'xy hajxy jaduhñ mgudiúnät nebiä

Epafras hajxy xyajnáhixøøyyän. Mijts, mmäbójcäbä Jesucristo miädia'agy hajxy. Tsipecxpä Dios hajxy jabom̄-jabom̄ mnämá'awät "Dioscujú'uyäp." Hix, coo ja'a Jesucristo hajxy tøø xyajnáhwa'aäh, paady hajxy jaduhñ mmäbógät.

⁸Mnigwieendähadóójäp hajxy. Cabä häna'cä miädia'agy hajxy mmäbójcät, ja'a häna'cä Jesucristo hajxy ca'a capxpaatpä. Höñndaacpä hajxy jaduhñ wiädity. Cab tii tøyhajt hajxy näl'ägädä yecy.

⁹Nebiä Dios jim̄ yhitiän cøxp, jaanä jaduhñä Jesucristo jim̄ yhijpä. Hix, pedyii ja'a Jesucristo Dyioshaty nebiä Tieedy Dyioshatiän. ¹⁰Coo ja'a Jesucristo hajxy xmiøødhijnä tu'ugmädia'agy, jaduhñä Dios hajxy xmiøødhijpä. Haa ja'a Jesucristo, nägøxiä ja'a Diosmoonsähajxy jim̄ yhanéhmänä tsajpootyp ja'a Jesucristo. ¹¹Coo ja'a Jesucristo hajxy jaduhñ xmiøødhíjtäm tu'ugjoot tu'ugwiinmahñdy, jaduhñ hajxy xyhíjxäm nejiän coo hajxy häxøpy tøø nyajcircuncidarhíjtäm, je'eguiøxp coo ja'a nhaxøøgwiinmahñdy hajxy tøø nhøxhíjxäm. Jaduhñä jáya'ayhajxy näje'e jia wi'i miäna'añ coo hajxy nyajcircuncidarhíjtämät, hójts ya'adiøjc-híjtäm. Coo ja'a Jesucristo ja'a nbojpä ngädieey hajxy häxøpy tøø xquia'a yajnáhwáatsäm, cabä circuncisión häxøpy tiuun̄gpaady. ¹²Coo hajxy nnäbéjtäm, jaduhñ hajxy ngähxó'cäm coo ja'a nhaxøøgcuhdajt hajxy tøø nnajtshixøøyyänä, møød coo ja'a Diosmädia'agy hajxy nmäbójcänä coo ja'a Jesucristo

hajxy xñähho'túutäm, møød coo yagjujypiojtägajtsä ja'a Dios. ¹³⁻¹⁴Jaduhñ mäwíinäts hajxy hijty nhíjtäm nebiä ho'ogyipiän coo ja'a pojpä cädieey hajxy hijty njaanč tehñ miøødhíjtäm coo hajxy hijty haxøøg njaanč tehñ jiäya'ayhíjtäm. Jéquiänä Moisés hajxy xyhanéhmäm nebiä hoguiuhdujt hajxy ngudiúunämät. Pero cab hajxy hoy ngudiunáanäm. Paadiä Moisés jecy miänaañ coo hajxy cu ngumädóowäm. Mänitä Dios miänaañ coo ja'a Jesucristo hajxy xñähho'túutämät cruzcøxp. Jaduhñä nbojpä ngädieey hajxy cøjx xyajnáhwáatsäm. Jaduhñä Jesucristo hajxy tu'ugmädia'agy nmøødhíjtänä. ¹⁵Coo ja'a Jesucristo hajxy jaduhñ xñähho'túutäm cruzcøxp, mänitä møjcu'ugongä quiuhdujt hajxy quiøxy pójcäxä ja'a hójtscøxpä. Tøø ja'a Dios jaduhñ yajcähxø'ogy coo ja'a Jesucristo ja'a møjcu'ugong hoyhoy tøø quia'a yajmäjädä'agy.

¹⁶Coo mijts pøn xjia wi'i yhane'emá'anät coo ja'a quiuhdujt hajxy myajtúunät, cab hajxy mnäl'ägädä møjpadá'agät. Madiu'u cuhdajt hajxy miøødä, coo hajxy tijaty mga'a hu'ug mga'a cáyät, møød coo ja'a xøø hajxy myagjadóójät, ja'a jomøjthaambä, ja'a po'ohaambä, ja'a poo'xxiøøhaambä. Cabä cuhdajt jaduhñbä hajxy mgudiünät. ¹⁷Hix, cab jaduhñ tiuun̄nä, je'eguiøxpä coo ja'a Jesucristo yaa yhooy hädaa yaabä naaxwiin. Jaayá'ayädsä quiuhdujt jaduhñ túun̄näp. ¹⁸Näje'e jáya'ayä Diosmoonsä hajxy wyiingudsähgø'oy. Páadiäc

hajxy jaduhñ wyiingudsähgø'øy je'eguiøxp cooc tyijy hajxy quia'a jada'añ nebiä Dios hajxy wyiingudsähgø'owät. Haxøøg hajxy jiaančh tehñ wyiinmahñdyhaty. Jaančh tehñ ñiguiumáayyap hajxy je'eguiøxp cooc tyijy hajxy naxy cøxiä wiinä wyiinhixy. Cooc mijts xjia wi'i yhane'emá'anät coo hajxy mbahíxät, cab hajxy mnä'ägädä yajwiinhóønät. ¹⁹Yhøxhijxypä Jesucristo hajxy jaduhñ. Haa ca'a, je'e hajxy ngopc-hájtäm nägøxiä, mäduhñtiä Diosmädia'agy hajxy nmäbójcäm. Tu'ugmädia'agy hajxy xmiøødhíjtäm. Je'e ja'a mäjaa hajxy xmióoyyäm nebiä Diosmädia'agy hajxy jaduhñ maas hoy ngudiúunämät, neby hajxy jaduhñ tu'ugmädia'agy nnimiøødhíjtämät hamiñ haxøpy. Chojpiä Dios ja'a jioot jaduhñ.

²⁰Tøø ja'a Jesucristo hajxy xñähho'túutäm. Paadiä mhamdsoo wiinmahñdy hajxy tøø mnajtshixø'øy. Tii hajxy coo mwil'i quiuhdujthatyñä nebiä häna'c-hajxy yhuuc cuhdujthatiän, ja'a hajxy ca'a mäbøjpa. ²¹Madiu'u hajxy jaduhñ jiaančh tehñ quiuhdujthaty. Jaduhñ hajxy miäna'añ coo hajxy tijaty mga'a nä'a jøø'xät, møød coo hajxy tijaty mga'a nä'a nähdonät, je'eguiøxp cooc tyijy quia'a hoyyä. ²²Yhamdsoo cuhdujt hajxy jaduhñ yaghijpy coo hajxy jaduhñ miäna'añ coo hajxy tijaty nga'a jøø'xämät, coo hajxy tijaty nga'a nähdonämät. Hiñ, cab tii jaduhñ nä'ägädä jecy. Paadiä cuhdujt jaduhmbä quia'a jegaambä. ²³Coo hajxy jaduhñ quiuhdujthaty, hamuumdu'joot hajxy jaduhñ

quiudiuñ nägø'ø nädecypiä. Jaduhñ hajxy jia nibiäda'agyii nebiä jaančh tehñ jiootxeemybiän. Hamdsoo hajxy jia ničhaačhtiuñii, cooc tyijy yhaxøøgwiinmahñdy hajxy jaduhñ hoy yhøxhixa'añ. Tøyhajt jaduhñ coo ja'a cuhdujt jaduhmbä hoy jia cähxø'øgy; pero cab jaduhñ nä'ägädä tuungpaady.

3 ¹⁻²Coo ja'a Jesucristo jiuypiojcy, paady hajxy jim nnøcxäänäm maa yhäña'ayän, jim hahooyhaamby maa ja'a Dios yhäña'ayän. Tsøcxä Diosmädia'agy hajxy hamuumdu'joot mäbójcäm. Cab hajxy nyajcopcøøyyämät ja'a hädaa yaabä naaxwiimbä. ³Tøø hajxy jaduhmbä nnajtshixøøyyänä je'eguiøxp coo ja'a Jesucristo hajxy xñähho'túutäm. Cooc hajxy tu'ugmädia'agy nmøødhíjtäm, paadiä Dios hajxy jim xyaghidäänäm maa je'e yhitiän. Tøø ja'a hawiinjemywyiinmahñdy hajxy xmióoyyäm. ⁴Y coo ja'a Jesucristo yaa quiädaactägatsa'añ, mänit hajxy miñ xyajpædø'øgäänäm. Mänit hajxy jim xyajnnøcxäänäm tsajpootyp. Hoy miänaajä hajxy jim xyaghidäänäm.

⁵Paadiä mguhdujt hajxy naxy mdehmñ najtshixø'owät, ja'a hajxy yaa myajtuumbiä hädaa yaabä naaxwiin. Cabä to'oxiojce hajxy nä'a nägoobä mnä'ä møødtsäná'awät jabiøcy. Cab hajxy haxøøg mjäya'ayhadät. Cabä mjoot hajxy mbädá'agät maa haxøøg ca'a hoybän. Cabä mmäjøønä mmädøjc hajxy tijaty mhadsójcät. Jaančh tehñ yhaxøøg jaduhñ. Jaduhñ miäbaady nej coo jäya'ayä quepychechä naaxpoch

hajxy wyiingudsáhghø'øy. ⁶Coo hajxy jaduhñ jiatcø'øy, ja'a hajxy ca'a mähøjpä, paady hajxy yajcumädowa'añii ja'a Dios. ⁷Jaduhñ hajxy hijty mbajatcøøbiä haxøøg. ⁸Coo ja'a Jesucristo hajxy xñähho'túútäm, hahixøøby jaduhñ coo ja'a mhaxøøgcuhdujt hajxy mnajtshixø'øwät. Cab hajxy mnimiäjootma'adøøjät. Cab hajxy mniyhøjøjät. Cab hajxy haxøøg mniñänømøøjät. Cab hajxy mhaxøøgcapx mhaxøøgmädiä'agät. ⁹Cab hajxy hamiñ haxøpy mniwyiinhhøøñøjät. Jaduhñ hajxy hijty mjatcø'øy. Cab hajxy jaduhñ mjatcøøñät. ¹⁰Ja'a hawiinjemywyiinmahñdy hajxy mhabøjñäp, jaduhñä Dios hajxy hoy mbahijx mbadúunnät, je'eguiøxp coo hajxy tu'ugmädia'agy nmøødhíjtäm. Paadiä Jesucristo ja'a hawiinjemywyiinmahñdy hajxy xmiöoyyäm tehngajnä, jaduhñ hajxy maas hoy nbahíjxämät. ¹¹Je'eduhñ tsoobaatp coo ja'a Jesucristo hajxy nmøødhíjtäm tu'ugjoot tu'ugwiinmahñdy, je'eguiøxp coo hajxy nägøxiä xñähho'túútäm wiinduhmyhagajpt, hoy piønä. Cabä Jesucristo hajxy wiingaty xquiunúu'xäm. Tu'cuhdujt hajxy xquiunúu'xäm haagä hawa'adstuum. Cab jaduhñ miøjpäda'agy pø judíøshájtäm hajxy, pø caj. Cab jaduhñ ñejpiä pø høxpøcyhájtäm hajxy, pø caj. Cab jaduhñ ñejpiä pø cudoogø'øyhájtäm hajxy, pø caj. ¹²Mijtsä Dios tøø xyajñahdijy coo ja'a tiuung hajxy jaduhñ mdúunnät. Paady hajxy xjiaanč tehñ chocy. Naxiä hojioot hajxy

mdehm miøødhádät. Naxy hajxy jaduhñ mhídät mee'xxieemy. Mmee'xtúgäp hajxy jaduhñ. ¹³Cab hajxy tii mdsippädá'agät, cab hajxy tii mma'adpädá'agät. Coo hajxy mniñägädieeyø'øwøøjät, mnimiämee'xøøjap hajxy jaduhñ, nebiä Jesucristo hajxy xmié'e'xäm. Coo hajxy jaduhñ xmié'e'xäm, paady hajxy mmämé'e'xät pøn xñägädieeyøøby. ¹⁴Hamiñ haxøpy hajxy mniçhogøøjät. Jaduhñ hajxy hoy mjaanč tehñ yhídät tu'ugmädia'agy. ¹⁵Weenä Jesucristo hajxy jaduhñ jootcuyc xyaghíjtäm tu'ugmädia'agy neby hajxy yaa tøø xpiädáacäm. Jabom-jabom hajxy tsøc híjtäm jootcuyc. Tsøgä Dios hajxy nämáayyäm “Dioscujú'uyäp.” ¹⁶⁻¹⁷Mhabøjcäbä Jesucristo miädia'agy hajxy cøxiä. Myajtuungpáadäp hajxy jaduhñ. Ja'a Dioswiinmahñdyhaam hajxy myajniñähixø'øwøøjät. Jaanä jaduhñ hajxy mnijiootcapxmøcpøjçäbät. Hamuumdu'jootä Dioshøy hajxy mhøwät. Naxiä Diostedy hajxy mdehm ñämá'awät “Dioscujú'uyäp”, je'eguiøxp coo ja'a Jesucristo hajxy xñähho'túútäm. Je'e hajxy nWiindsøn'hájtäm. Ja'a Jesucristocøxpä hajxy tijaty mdúnät. ¹⁸Mijts to'oxiøjc hajxy, tsipcøxpä mnihyhäpä miädia'agy hajxy mmähøjçät. Cähxø'øgaamb hänäjty jaduhñ coo ja'a Diosmädia'agy hajxy mmähøcy. Chøjpiä Dios ja'a jioot jaduhñ coo hajxy jaduhñ mgudiúnät. ¹⁹Mijts, ya'adiøjc-hajxy, yajxonä mdo'oxiøjc hajxy jaduhñ mdsoc mba'häyøwät. Cab hajxy mnä'ägä hójät. ²⁰Pønajaty

høxcujc-hajp, mmäbøjcäbä mdajjä mdeediä miädia'agy hajxy jaduhñ cøxiä. Xquiumáyäbä Dios hajxy jaduhñ. ²¹Jaanaä jaduhñ mijts teedyhajpä, cabä mnøøxä mmajc hajxy nä'a nägoobä mnä'a yagjootmä'adät, coo hajxy jaduhñ nä'a jootmayhädät. ²²Jaanaä jaduhñ mijtspä, mijts moonsähajpä, hamuumdul'jootä mwiiindsønä miädia'agy hajxy mgudiuun mguñájxät, nebiaty hajxy xyhane'emy. Jaduhñä häna'c-hajxy näje'e jiatcø'øy, coo ja'a wyiindsøn hajxy hänäjty jim tiäna'ay, mänit hajxy hänäjty jøjwidsø'ø tiägø'øy tuumbä. Yajcumayaamb hajxy hänäjty coo hajxy hänäjty jiaanç tehñ tiuñ. Caj mijts jaduhñ mjatcøøbiät. Coo hajxy hoy mdúnät, cähxø'ögäp jaduhñ coo ja'a Dios hajxy hoy mwiingudsähgø'øy. ²³Hamuumdul'joot hajxy mdúnät hoy tiehñ miädyii tuungä, jaduhñä Dios hajxy xquiumáyät. Cab hajxy mnä'a yajcumayá'anät cu'ughagujc. ²⁴Paady hajxy jaduhñ hoy mdúnät, tøø hajxy mnajuø'øy coo ja'a Dios hajxy jim xyajnöcxa'añ tsajpootyp, je'eguiøxp coo ja'a Jesucristo hajxy mmäduñ. Hiñ, tøyhajt hajxy jaduhñ mnä'ägädä Wiindsønhaty. ²⁵Pøn hoy ca'a jäya'ayahajp, tsipcøxp jaduhñ nøcxy quiumädowa'añ. Hoy jia mäyøøjä, cabä Dios miøjpäda'agy.

4 Hoorä, pønjaty moonsämøød, hoyyä moonsä hajxy myajtúnät. Cab hajxy mdsaaçhtiúnät nä'a nägoobä. Naxy hajxy mdehñ jahmiédsät coo mijtsä mWiindsøn jyijäbä, ja'a jim hijpä tsajpootyp.

²Tehngajnä Dios hajxy mba'yá'axät hamuumdul'joot. Ca'a Diosmädia'agy hajxy mmäniyhøxmaaho'ogyii. Mnämä'awäbä Dios hajxy "Dioscujú'uyäp." ³Mba'yá'axäbä Dios hajxy ja'a højtsçøxpä coo højts ween xyajyajnäbaadø'øy coo højtsä miädia'agy njaac mädiäacät ja'a Jesucristocøxpä, ja'a naam yajmädoyhátiäbä. Cooçh jaduhñ tøø nmädia'agy, páadyhöch yaa ndsumyhäña'ay. ⁴Pa'ya'axä Dios hajxy ja'a høøçhcøxpä, jaduhñçhä Diosmädia'agy howyiinjuøñä nyajnähiçø'øwät. Jaduhñä Dios jiaanç tehñ quiumay.

⁵⁻⁶Ja'a häna'cä Diosmädia'agy hajxy ca'a mäbøjpä, hoy yajxón hajxy mmøødmädiá'agät hoy miänaajä. Cab hajxy mmädsip, cab hajxy mmäma'adø'øwät. Coo ja'a Dios jaduhñ miäná'anät, naxy hajxy mdehñ quiudiúnät. Jaduhñ hajxy paquiä mnajuø'øwät neby hajxy hoy mhadsówät hoy tiehñ piønä.

⁷Haa ja'a mägu'ughajpä Tíquico, jaanç tehñ yhöyhøch je'e xmiøødtuñ ja'a Dioscøxpä. Coo jim miédsät maa mijtsän, mänit hajxy xyhawaanaañä cøxiä ja'a høøçhcøxpä. ⁸Mänit hajxy xjiootcapxmçpøga'añ. ⁹Quipxiä Onésimo miødhada'añii. Høyhöch je'e xmiøødtuumbä. Jim je'e chohmbä maa mijtsän. Xyhawaanaañäp mijts jaduhñ nebiaty yaa jiadyii.

¹⁰Haa ja'a Aristarco, yaaçh je'e xmiøødtsumçhänäabiä. Xyajpoo'xp mijts je'ebä. Møødä Marcos hajxy xyajpoo'xpä. Ja'a Bernabé jiuju miägu'ug je'eduhñ.

Tøø mijts nnocynãjaayø'øy ja'a Marcoscøxpä. Coö jim miédsät maa mijtsän, mänit hajxy hoy yajxon̄ mwiingudsähgø'owät. ¹¹Jaduhñä Jesús Justo hajxy xyajpoo'xpä. Haa ja'a judiøshajxy yaabä, ja'a Diosmädia'agy hajxy tøø miäbøquiäbä, cábøchä Diosmädia'agy hajxy xmiøødyajwa'xa'añ. Jagóoyyøchä Aristarcohajxy xmiøødtuñ, møødä Marcos, møødä Jesús Justo. Hóyhøch hajxy jaduhñ xpiuhbety. ¹²⁻¹³Xyajpoo'xp mijtsä Epafra jadahmbä. Ja'a Jesucristo tiuung je'e tiúunäbä. Jim je'e chohmbä maa mijtsän. Høøchä tøyhajt nmøød coö ja'a Epafra ja'a Dios jiaanç tehñ miänuu'xta'agy ja'a mijtsøxpä, møødä mäbøjpädøjcøxpähajxy, ja'a hajxy jim tsänaabiä Laodicea, møød jim Hierápolis. Jaduhñä Epafra ja'a Dios miänuu'xta'agy coö mijtsä Diosmädia'agy pedyii myajtúnät hamuumdu'joot. Jaduhñä Dios

hajxy xquiumáyät. ¹⁴Jaduhñ mijts ja'a Demas xyajpoo'xpä, møødä Lucas ja'a mädsøoyøøbiä.

¹⁵Huuc yajpoo'xä mäbøjpädøjc hajxy, ja'a hajxy jim hijpä Laodicea. Jaduhñä hermana Ninfä hajxy myajpoo'xpät, møødä mäbøjpädøjc-hajxy, ja'a hajxy jim nøcxpä Dioswiingudsähgøøbiä maa ja'a Ninfas tiøjcän. ¹⁶Coö hädaa nocy hajxy hñanjty tøø mgapxy, mänit hajxy jim mguejxtägátsät Laodicea, weenä mäbøjpädøjc-hajxy jim quiápxpät. Mänitä nocy hajxy mgápxpät, ja'açh jim tøø nguéxiäbä Laodicea. ¹⁷Huuc näma'awä Arquipo hajxy jaduhñ coö naxy hoy tiehñ quiudiúnät nebiaty tøø yhane'emyii ja'a Dios.

¹⁸Hamdsøø cø'øjaayháambyhøch hädaa nocy nyajmaya'añ. Huuc pa'ya'axä Dios hajxy ja'a høøchcøxpä coöch ween xpiuhbety maaçh yaa ndsumyçhänä'ayän. Weenä Dios ja'a hoyhajtä weenhajt hajxy xmio'oy. Amén.

1 Tesalonicenses

1 Chaa hõjts hädaa nocy nhädiuunmuga'añ, hõõch Pablo, mõödä Silvano, mõödä Timoteo. Mijts hädaa nocy nyajnajaayøøby, pønjatiä Diosmädia'agy jim mabøjp Tesalónica. Mwiingudsähgøøbiä Diosteedy hajxy mõödä Jesucristo, ja'a hajxy nWiindsøn'hájtämbä. Tu'ugmädia'agy hajxy mmøødhity. Weenä Dios ja'a hoyhajtä weenhajt hajxy xmio'oy mõödä Jesucristo.

²⁻³Tehngajnä hõjtsä Dios nnäma'ay “Dioscujú'uyäp” ja'a mijtsçxpä nägøxiä. Jaanä mijtsçxpä hõjtsä Diosteedy nmänuu'xta'agy tehngajnä. Jaduhñ hõjtsä Dios nnäma'ay coo mijtsä miädia'agy hamuumdu'joot mmäbøjcä, paady hajxy hoy mjaançh tehñ quiudiuunä. Paady hajxy jaduhñ mgudiunñ, coo ja'a Dios hajxy mjaançh tehñ chocy. Coo ja'a Jesucristo hajxy hamuumdu'joot mjøbhixy, paady hajxy nägøø nädecypiä mme'e'xtucy. ⁴Mägu'ughajpädøjc, xchojpa Dios hajxy jaduhñ. Nnajuøøby hõjts jaduhñ coo ja'a Dios hajxy tøø xwyiimbiy. ⁵Hix, coo hõjts mijts nyajwiingapxøøyy coo ja'a Jesucristo hajxy tøø

xñähho'túutäm, ja'a Dioshespíritu hõjtsä mäjaa hänajty xmiooby. Cab hõjts hänajty nä'ä nägoobä nnä'ä capxy nnä'ä mädia'agy. Coo hõjtsä mäjaa jaduhñ xmiooyy, paady hõjts hänajty nnajuø'øyy cooçhä tøyhajt hänajty nyecy. Mänaa hõjts jim nhitiän maa mijtsän, hoy hõjts jim nhijty. Paady hõjts jaduhñ hoy nhijty coo hõjts mijts hänajty jaduhñ hoy ween xpiahity. Mjahmiejchp hajxy jaduhñ, túhmäts.

⁶Jaduhñ hõjts mijts hoy xjiaançh pahity. Jaduhñä Wiindsøn Jesucristo hajxy hoy tøø mbahijxpä. Yajxonä mädia'agy hajxy jaduhñ mmädooyy, ja'a hõjts mijts nyajwiingapxøøyyäbä ja'a Jesucristocøxpä, ja'a hõjtsä Dios xñajtsçapxøøyyäbä. Mxoondaac hajxy jaduhñ coo hajxy jaduhñ mmädooyy, hoy hajxy hänajty jaduhñ hanaxiä mja tsaachpøcy. Ja'a Dios hajxy jaduhñ xyajxoondaac. ⁷Coo ja'a Diosmädia'agy hajxy tøø mmäbøcy, hoy hajxy hänajty mja tsaachpøcy, paadiä mabøjpdøjc-hajxy hoy miäbøjpa nägøxiä, ja'a hajxy jim tsänaabiä maa ja'a naax xiøhatiän Macedonia

møød Acaya. ⁸Ca'a jyimiähajtiä ja'a Diosmädia'agy jaduñ tø wia'xy ja'a Jesucristocøxpä. Wiinduhmyhagajpt jaduñ wia'xnä. Jaanä jaduñnä mädia'agy wia'xpä wiinduhmyhagajpt coo mijtsä Diosmädia'agy mmäbøjtsoñ. Coo ja'a mäbøjpädøjc-hajxy jaduñ tø miädoyhajnä, paady højts jaduñ nga'a nägapxy. ⁹Hix, majaty højts nwädity, jaduñ højtsä mäbøjpädøjc xñama'ay coog højts mijts hoy yajxón xyajtøjtägøøyy mänaa højts jim nhoyän maa mijtsän, møød coogä quepychechä naaxpoch hajxy tøø mnajtshixøøñä. Páadiäc hajxy tøø mnajtshixø'øy coogä Dios hajxy mwiingudsähgøøñä, møød coogä Diosmädia'agy hajxy hamuumdu'joot myajtuunnä. Tøyhajtä Dios jiujuqiä. Cabä quepychechä naaxpoch jiujuqiä. ¹⁰Møød jaduñ hajxy miänaambä cooc mijtsä Dioshuung Jesucristo hajxy mjøbhixy coo yaa quiädaactägatsa'añ hädaa yaabä naaxwiin. Tsajpootyp chohnda'aga'añ coo hänajty yaa miänaca'añ. Coo ja'a Jesucristo hänajty tøø yho'ogy, mänit yagjujypjøjcä ja'a Tieedy. Mänit jim ñøcxy tsajpootyp. Ja'a Jesucristo hajxy jaduñ xyajñahwa'adsaanäm coo ja'a haxøøgjäya'ayhajxy hänajty yajcumädowa'añii ja'a Dios.

2 ¹⁻²Mägu'ughajpädøjc, coo højts jim nhooyy Filipos Diosmädia'agy-yajwa'xpä, mänit højtsä jäya'ay jim xxiøøghajty. Høxtä xhaačhtiuun højts jaduñ. Pero coo højts mänitiä nnøcxy maa mijtsän, mänit højtsä Dios xjiootcapxmøcøjcy,

hoy højtsä jäya'ay hänajty xjiaanč tehñ miädsiphaty. Y coo højts mijtsä Diosmädia'agy nyajwiingapxøøyy, mänit hajxy mmäbøjcy hamuumdu'joot. Tøyhajt jaduñ, túhmäts. Coo højtsä Dios xpiuhbety, paady højtsä miädia'agy hamøj jootmøj nyajwa'xä. ³Tøyhajtä Diosmädia'agy jaduñ. Hamuumdu'joot højts nyajwa'xy. Cab højts nhøhnda'agy. ⁴Haa ca'a, ja'a Dios højts xwyiinguejx Diosmädia'agy-yajwa'xpä, paady højts hamuumdu'joot nyajwa'xy ca'xy pedyii. Cab højts nyajtägach ni weeñtiä. Ja'a Dios højts xquiumaayy. Jaduñ højtsä njoot chocy coo højts xquiumáyät. Cab højts nmøjpäda'agy pø cab højtsä cu'ug xquiumay. Hix, jaduñnä Dios hajxy xñajuøøyyäm neby hajxy nwiinmahñdhajtäm. ⁵Mänaa højts jim nhoyän maa mijtsän, cab højts mijts hänajty nwiinhøøna'añ. Jii jäya'ayhajxy näje'e, yajxón hajxy miäwiinhøøñ je'eguiøxp coo hajxy yajcumaya'añ. Pero højts, cab højts jaduñ mänaa njatcø'øy. Ni cab højtsä xädø'øñ mänaa nhadsocy. Jii jäya'ayhajxy näje'ebä, yajxón hajxy miäwiinhøøñ, weenä xädø'øñ hajxy jaduñ mio'oyii. Pero højts, cab højts jaduñ njatcø'øy. Tøyhajt jaduñ. Xñajuøøbiøchä Dios jaduñ cooch nga'a høhnda'agy. ⁶Cab højts jaduñ nmäna'añ coo højts pøn xwyiingudsähgø'øwät, ni mijts ni pøn, hoy jaduñ jia hawiinmatsä coo højts cu xwyiingudsähgøøyy, je'eguiøxpä coo højtsä Jesucristo tøø xwyiinguexy. ⁷Pero nnäxuu'chp højts mijts. Mijtsøxpä højtsä hojoot nmøødhaty. Høxtahñdsä

tajjaya'ay ja'a yhuung hajxy cwieendähaty, jaduñ hõjts mijts ngüeendähajpä. ⁸Njaanč tehñ chojpy hõjts mijts, paady hõjts mijtsä Diosmädia'agy hoy nyajwiingapxø'øy. Hõxtä cu nnähho'tuuty hõjts mijts coo ja'a Dios jaduñ cu miänaañ. Hix, hoyhoy hõjts mijts ndsocy nba'häyoy nägø'ø nädecypä. ⁹Mägu'ughajpädøjc, mänaa hõjts mijtsä Diosmädia'agy hoy nyajwiingapxø'øyän, nnajuøøby hõjts hänajty coo mijtsä xädø'øñ hänajty may mga'a møødä. Paady hõjts hänajty møc nduñ nxajy xøømdsuhñ. Mjahniejch hajxy jaduñ, túhmäts. Ja'a nhamdsoo caayyøøc hõjts hänajty nguduumbly nguxajpy. Cab hõjts hänajty nmäna'añ coo hõjts mijtsä caayyøøc xñä'a mó'owät.

¹⁰Mägu'ughajpädøjc, hoy hõjts jim nwädijty maa mijtsän. Cab hõjts jim nmeel'ch nbojty. Cab hõjts jim nduundägooyy nnajxtägooyy. Ni weentiä hõjts jim nga'a cädiehy. Tøyhajt jaduñ, túhmäts. Jaduñ hõjtsä Dios xñajuøøbiä coo tiøyyä. ¹¹Hõxtahñdsä teedyjäya'ayä yhuung hajxy jiootcapxmøcpøcy, jaanä jaduñ hõjts mijts njootcapxmøcpøjpä. Tøyhajt jaduñ, túhmäts. Jaduñ mijts nmägapx nhanehmbä coo hajxy hoy yajxon mjäya'ayhädät. ¹²Jaduñä Dios jioot chocy. Coo hajxy jaduñ hoy yajxon njäya'ayhajtämät, paadiä Dios hajxy jim xyajncxáanäm tsajpootyp maa miähane'emiän, maa wyiingudsähgø'øyijän.

¹³Paady hõjtsä Dios tehngajnä nnäma'ay "Dioscujú'uyäp." Hix,

coo hõjts mijtsä Diosmädia'agy hoy nyajwiingapxø'øy, mänit hajxy hamuumdu'joot mguhbøjcy. Jaduñ hajxy mmäbøjcy coo jiaanč Diosmädia'aguiä. Cab hajxy mmänaañ cooc tyijy jäya'ay tøø yhädiuñ. Tøyhajt jaduñ coo ja'a Dios tøø yhädiuñ. Y coo hajxy jaduñ mmäbøcy, paady hajxy hoy mjäya'ayhajnä. ¹⁴Mägu'ughajpädøjc, coo ja'a mhamdsoo mägunaax hajxy xchaačhtiuuñ, ja'a judíoshajxy, jaduñ hajxy mjajt mhabejpä nebiä mabøjpädøjc-hajxy jim chaačhpøquiän Judea-naaxooty, ja'a hajxy mabøjpä ja'a Diosmädia'agy møødä Jesucristo miädia'agy. Jaduñ hajxy chaačhtiuunäbä ja'a yhamdsoo mägunaaxhajxy, ja'a judíoshajxy. ¹⁵Coo ja'a Wiindsøn Jesucristo yagho'cä, ja'a judíoshajxy jaduñ jatcøøyy. Jaduñä judíos ja'a profetadøjc hajxy jecy yagho'pä. Hõjtspaadiä judíos xjiaac hadsaačhtiuunnajxpä. Coo ja'a judíoshajxy jaduñ haxøøg yhäna'c-haty, paady hajxy quia'a cumayii ja'a Dios. Hoy piønä hajxy jaduñ miädsiphaty. ¹⁶Hix, coo hõjtsä jäya'ayä Diosmädia'agy hänajty nyajmøødmädia'agy, ja'a hajxy ca'a judiospä, ween hajxy jaduñ ñähwaats quihwaatspä, mänit hõjtsä judíos hänajty xjia wi'i yhaduga'añ. Coo ja'a judíoshajxy jaduñ jiatcø'øy, tehngajnä hajxy hanaxiä haxøøg jiaac tehñ jiatcø'øy. Pero mobädajpä hajxy hoyhoy yajcumädowa'añii ja'a Dios.

¹⁷⁻¹⁸Hoorä, mägu'ughajpädøjc, coo hõjts jim nhooyy maa mijtsän, mänit hõjts jim nwiimbjcumä. Mänit hõjts yaa nmänajcy. Pero

cab hõjts hijty yaa njega'añ. Ja wi'i ñõcxtägatsaamb hõjts jim jadähooc maa mijtsän. Hix, jaduñ hõjts mijts njuø'øy nebiä hamdsoo huungpä. Hoy miänaajä mijts njahmiejsta'agy, hoy hajxy nga'a ja nyihjixäm hajujcy. Høøch Pablo, mayhóoc-høch jim tøø nja wi'i ñõcxtägatsa'añ, pero cab hõjtsä møjcu'ugong tøø xyajnäbaadøyyä coo hõjts jim nnõcxtägätsät. ¹⁹⁻²⁰Haa ja'a Jesucristo, ja'a hajxy nWiindsøn'hájtämbä, coo je'e yaa quiädaactägätsät hädaa yaabä naaxwiin, mänit hajxy hänäjty mgähxø'øga'añ maa wyiinduumän coo ja'a Diosmädia'agy hajxy hänäjty hamuumdu'joot tøø mmäbøcy. Paady hõjts njøbhixy coo ja'a Jesucristo yaa quiädaactägatsa'añ. Mänit hõjts jaduñ nxoonda'aga'añ nägø'ø nädecypä ja'a mijtscoxpä. Mänit hõjtsä Dios xquiumaya'añ je'eguiøxp coo ja'a miädia'agy hajxy hoy mgudiuunä mänaabä hõjts mijts hoy nyajwiingapxø'øyän.

3 ¹⁻³Coo hõjts jaduñ nmädoyhajty coog hajxy hijty mjaanč tehñ chaächpøcy, mänitøch njaanč tehñ jootmayhajtøjcy je'eguiøxp coo hõ hänäjty nga'a najuø'øy pø mjøjtänaabiä møjcu'ugong hajxy hänäjty. Páadyhøchä njoot hänäjty jiaanč tehñ chocy coo hõ jim nnõcxät maa mijtsän, nmäyajtøwáambiøch mijts hänäjty pø hoy hajxy hänäjty mmee'xtucy. Pero cab hänäjty näbaadø'øwa'añ coo hõ jim nnõcxät. Mänitøch jaduñ nwiinmahñdyhajty coo hõ hermano Timoteo jim

nguëxät nidiuhñ, y coo hõ jiihy nidiuhñ nmähmø'øwät Atenas. Näguipxy hõjtsä hermano Timoteo xmiøødtuñ Diosmoonsä maa hõjtsä Diosmädia'agy nyajwa'xiän ja'a Jesucristocøxpä. Páadyhøchä hermano Timoteo jim nguejxy maa mijtsän coo mijts jaduñ xjiotcapxmøcpøgät maa hajxy hänäjty mdsaačhpøquiän, weenä Diosmädia'agy hajxy hänäjty jaduñ maas hoy mmäbøcy hamuumdu'joot, møød ween hajxy hänäjty jaduñ mga'a jootmayhaty. Hix, ja'a Dios hajxy jaduñ tøø xyajnähdjjäm coo hajxy jaduñ ndsaačhpøjcämät ja'a Jesucristocøxpä. Tøyhajt jaduñ, túhmäts. ⁴Haa ca'a, mänaa hõjts jim nhoyyän maa mijtsän, mänit hajxy nhawáanäm coo hajxy hänäjty tsipcøxp ndsaačhpøgäänäm. Jaduñ hajxy tøø njaanč jajt tøø njaanč habéjtäm, túhmäts. ⁵Hoorä, coo hõ hänäjty nga'a najuø'øy pø hoyyä møjcu'ugong hänäjty mjøjtäna'ay maa hajxy hänäjty xjia wi'i jijøcapxø'øyän, mänitøch jaduñ nja mänaañ coo hõ jim nnõcxät maa mijtsän. Pero coo hänäjty quia'a näbaadø'øwa'añ coo hõ jim nnõcxät høøch, páadyhøchä hermano Timoteo jim nguejxy, ween mijts jaduñ xmiäyajtø pø hoyyä møjcu'ugong hajxy hänäjty tøø mjøjtäna'ay, pø hoyyä Diosmädia'agy hajxy hänäjty mbanøcxyñä. Hix, ndsähgøøbiøch hänäjty coo ja'a møjcu'ugong hajxy hänäjty tøø xjiøjcapxø'øy. Coo hajxy häxøpy tøø mga'a mee'xtucy, xiøøbä hõjts mijtsä Diosmädia'agy häxøpy hoy tøø nyajwiingapxø'øy.

⁶Coo ja'a Timoteo jim jiaančh hooy maa mijtsän, mänit wyiimbjicumbä. Hoy yaa miejtstägach maa hõjtsän. Mänit hõjts xyhawaanä coogä Diosmädia'agy hajxy tehngajnä mmäbøcy hamuumdu'joot, møød coog hajxy hamiñ haxøpy mničhogyii. Hoxioondaacnä jaduhñ. Jaduhñä Timoteo miänaambä cóogøch mijts hoy miänaajä xjahmiejtsta'agy, møød cóogøch mijts xchocy xpia'häyoy. Jaduhñägøch mijts xjia wi'i yhixa'añ nébiøch mijts nja wi'i yhixa'añän.

⁷Mägu'ughajpädøjc, coo hõjts jaduhñ nmädoyhajty coogä Diosmädia'agy hajxy hänäjty tehngajnä mmäbøcy hamuumdu'joot, mänit hõjts njootcugøøyy, hoy hõjts hänäjty hanaxiä nja tsaächpøcy, hoy hõjts hänäjty mõj may nyajmaajiaty. ⁸Paady hõjts jootucj nnijiäwøøyyänä coo mijtsä Diosmädia'agy tehngajnä mbanøcxy hamuumdu'joot ja'a Jesucristocøxpä. ⁹Coo mijts jaduhñ mmäbøcy tehngajnä, paady hõjts njaančh tehñ xioonda'agy Dioswiinduum, paady hõjtsä Dios hoy miänaajä nnäma'ay "Dioscujú'uyäp."

¹⁰⁻¹¹Xøømdsuhñ hõjtsä Diosteedy mba'ya'axy møødä Wiindsøn Jesucristo. Jaduhñ hõjts nmänuu'xta'agy hamuumdu'joot coo hajxy ween yajnabaadø'øcy coo hõjts jim nnøcxtägätsät maa mijtsän, jaduhñ hõjts mijtsä Diosmädia'agy njaac yajnähixø'owät nebiaty hajxy pedyii

mga'a mäbøcyñä, ¹²møød weenä Jesucristo hajxy xjiaac puhbety coo hajxy hamuumdu'joot mjaac ničhogø'øjät hamiñ haxøpy neby hõjts mijts ndsoquiän, møød coo jäya'ay hajxy jaduhñ nägøxiä mdsoc mba'häyowät, ¹³møød weenä Jesucristo hajxy xjiaac puhbety coo ja'a Diosmädia'agy hajxy hamuumdu'joot mbanøcxät, møød coo hajxy mga'a najtshixø'owät, møød coo hajxy mga'a wädität haxøøg, jaduhñ hajxy mhídät hawa'adstuum, jaduhñ hajxy pøn xquia'a nähwaambédät maa ja'a Diosteedy wyiinduumän coo ja'a Wiindsøn Jesucristo hänäjty yaa tøø quiädaactägach hädaa yaabä naaxwiin. Näguipxiä Jesucristo ja'a mioonsä hänäjty nägøxiä miøødcäda'aga'añ møød pønjetiä Diosmädia'agy hänäjty tøø miäbøcy.

4 Hoorä mägu'ughajpädøjc, ja'a Jesucristocøxpä hõjts mijts cham nmägapxy nhane'emy coo hajxy hoy mjaac tehñ jiäya'ayhädät, jaduhñä Dios hajxy xquiumáyät. Jaduhñ hõjts mijts jayøbajt nyajnähixøøyy. Y jaduhñ hajxy hoy mjaančh jäya'ayhaty.

²Jaduhñ hõjtsä Wiindsøn Jesucristo tøø xñajtsapxø'øcy coo hõjts mijts nyajwiingapxø'owät, túhmäts. ³Jaduhñä Dios hajxy xyajmädsøjcäm coo hajxy hoy ngudiúunämät nebiaty hajxy tøø xyhanéhñäm coo hajxy hoy nwädjítämät, møød coo ja'a haxøøgwiinmahñdy hajxy ngøxy najtshixøøyyämät. ⁴Jaaná jaduhñä Dios hajxy tøø xyhanéhñämbä coo ja'a ndo'oxiøjc hajxy hoy yajxon nmøødtsänáyyämät, møød coo

hajxy nwiingudsähgóoyyämät.

⁵Haa ja'a jäya'ayä Dios hajxy ca'a hixyhajpnä, cabä miädia'agy hajxy jaduhñ quiudiuunä. Hiñ, wiingto'oxiøjc hajxy wyl'i yhadsojpy. Pero mijts, ca'a hajxy jaduhñ mbajatcø'øy. ⁶Ca'a mmäjøøn mmädøjcä tio'oxiøjc hajxy jaduhñ mmägapxtägooyyä. Pønjaty jaduhñ jatcøoby, tsipcøxp hajxy hoyhoy yajcumädowa'añii ja'a Jesucristo. Haa ca'a, jaduhñ højts mijts tøø nhuuc hanehmä. ⁷Hiñ, jaduhñä Dios hajxy tøø xyajnähdíjjäm coo hajxy hoy yajxón njäya'ayháltämät. Cab hajxy jaduhñ xyajmädsójcäm coo hajxy haxøøg nwädíjtämät. ⁸Jaduhñds je'e, paadiä Dios ja'a yhEspíritu tøø xmióoyyäm, jaduhñ hajxy hoy njäya'ayháltämät. Pønjaty jaduhñ ca'a cudiunaamb nébiøch chamñ nmädia'aguiän, ja'a Dios hajxy jaduhñ ñägädieeyøøby, ca'a jäya'ayä.

⁹Mägu'ughajpädøjc, ja'a Dios hajxy jaduhñ tøø xyajnähihixóoyyäm coo hajxy hamiñ haxøpy nniçhójcämät, pønjatia Diosmädia'agy mäbøjp. Hoorä, coo ja'a Dios hajxy jaduhñ tøø xyajnähihixóoyyäm, cab yhadsipä cooçh mijts jaduhñ njaac yajnäjaayø'øwät coo hajxy jaduhñ nniçhójcämät. ¹⁰Tøyhajt jaduhñ coo ja'a mäbøjpädøjc hajxy nägøxiä mdsocy yaa Macedonia-naaxooty wiinduhmyhagajpt. Jaduhñ højts mijts mäbøcy nmänuu'xta'agy coo hajxy maas hamuumdu'joot mmädsögät. ¹¹Jaduhñ højts mijts tøø nhuuc hanehmä coo hajxy hamoñ haducy mhídät, coo hajxy mga'a yajtägø'øwät maa cueendä

hajxy mga'a møødän, møød coo hajxy mniyhixñ mnimiähäyowøøjtät hamdsoohaamby. Jaduhñä mjoot hajxy mbädá'agät coo hajxy jaduhñ mgudiúnät, ¹²jaduhñä cu'ug hajxy xquiumáyät, møød jaduhñ hajxy tii mga'a yajmaajiädät.

¹³Mägu'ughajpädøjc, ja'a jäya'ayhajxy ca'a mäbøjpä, coo ja'a jiuju ja'a miägu'ug hajxy yho'ogy tiägoy, mänit hajxy jiaançh tehñ jiootmayhaty. Paady hajxy jaduhñ jiootmayhaty coo hajxy quia'a najuø'øy coo ja'a Dios ja'a ho'oguiäya'ay yagjujypiøjtägatsa'añ, ja'a hajxy hänajty tøø miäbøquiäbä. Paady højts mijts chamñ nhawáanäm, cab højtsä njoot chocy coo hajxy mjootmayhájpät. ¹⁴Hoorä, coo hajxy jaduhñ nmäbøjcäm coo ja'a Jesucristo jiujypiøjtägajch mänaabä hänajty tøø yho'oguiän, paady hajxy jaduhñ nmäbøjcämbä coo ja'a Dios ja'a ho'oguiäya'ay yagjujypiøjtägatsa'añ, ja'a hajxy hänajty tøø miäbøquiäbä ja'a Jesucristocøxpä, ja'a Jesucristo hajxy møødhijpä tu'ugmädia'agy.

¹⁵⁻¹⁷Hädaa mädia'agy jaduhñmä, ja'a Jesucristøch jaduhñ xñajtsapxøøyyä. Hoorä, coo ja'a Jesucristo hänajty yaa quiädaactägatsa'añ hädaa yaabä naaxwiin, mänit jim choona'añ tsajpootyp. Mänit møc ya'axa'añ nebiä soldadowiindsønñhajxy møc ya'axiän coo hajxy hänajty chiptuna'añ. Mänitä Diosmoonsä møc ya'axaambä, ja'a møjtuung jim møødpä tsajpootyp. Mänitä Dios ja'a xiuuxt yajxu'uxa'añii møc. Mänitä ho'oguiäya'ayhajxy jiujypiøga'añ, ja'a hajxy hänajty tøø

miäbóquiäbä ja'a Jesucristocøxpä. Mänitä mäbøjpädøjc-hajxy nägøxiä chajpeda'añ, pønjaty hänäjty jujyñä tsuxnä, näguipxy møød pønjaty hänäjty tøø yho'ogy, ja'a hajxy hänäjty tøø jiuypiojtägáchäbä. Mänitä Jesucristo hajxy nägøxiä nøcxy njøjcubaadø'owáanäm jim jocjooty, møød pønjaty hänäjty tøø jiuypiojtägach, møød pønjaty hänäjty jujyñä tsuxnä. Hoy miänaajä ja'a Jesucristo hajxy nägøxiä xmiøødhidáanäm. Cab hajxy mänaa xpiuhwa'adsáanäm.

¹⁸Tøyhajt hädaa mädia'agy jaduhñ. Coö hajxy jaduhñ mmäbøcy, jaduhñ hajxy hamiñ haxøpy mnijootcapxmøcpøgøjät.

5 ¹⁻²Mägu'ughajpädøjc, mnajuøøby hajxy jaduhñ coö jaduhñ quia'a yajnajuø'oy mänaa xøø tiempo yhabaada'añ coö ja'a Jesucristo yaa quiädaactägatsa'añ hädaa yaabä naaxwiin. Paady, cab yhadsipä coöch mijts njaac yajnäjaayø'owät mänaa jaduhñ jiada'añii. Pero jaduhñ mäbøcy, mnajuøøby hajxy jaduhñ coö ja'a Jesucristo hajxy xyajcädaacpedáanäm jaguiapxy jamiädia'agy. ³Jaduhñä cu'ughajxy hänäjty miäna'ana'añ: "Jootcujc hajxy nhíjtäm; cab hajxy nej njadáanäm, cab hajxy nej nhabetáanäm", nøm. Mänitä tsø'ty häyohn jaguiapxy jamiädia'agy yhabaada'añ. Paquiä cu'ughajxy jaduhñ jiada'añii tiuna'añii jaduhñ mäwiin nebiä to'oxiojç-hajxy jiaty yhabetiän coö ja'a yhuunghajxy hänäjty myina'añ quia'awa'añ. Cabä cu'ughajxy hänäjty hoy piäyø'oga'añ. ⁴Pero mijts,

mägu'ughajpädøjc, mwiiñjuøøby hajxy jaduhñ. Cab hajxy jaduhñ myagjuø'owa'añ coö ja'a Jesucristo hajxy jaduhñ xyajcädaacpéjtämät jaguiapxy jamiädia'agy. ⁵Hix, coö ja'a Diosmädia'agy hajxy nmäbøjcäm ja'a Jesucristocøxpä, paady hajxy jaduhñ mäwiin nmäbáatäm nebiä jäya'ayhajxy xøøm wädiipän. Hoy hajxy yhixy. Cab hajxy nhíjtäm hagoodstuum. ⁶⁻⁸Coö hajxy jaduhñ nmäbøjcäm ja'a Jesucristocøxpä, tsøcxä hajxy híjtäm nähix hahixø'ø. Tsøc hajxy híjtäm wijy quejy. Jaduhñ hajxy nga'a híjtämät nebiä jäya'ay maabän, nebiä jäya'ay múucäbän. Jaduhñä haxøøgpä hajxy hoy njøjtänäayyämät nebiä soldadohajxy chiptuñän nähbujxt cuhbujxt. Tsøcxä Diosmädia'agy hajxy hamuumdu'joot mäbøjcäm. Tsøgä jäya'ay hajxy nägøxiä tsojc pa'häyóowäm. Tsøgä Jesucristo hajxy jøbhíjxäm coö hajxy xyajnäwha'ads xyajcuhwa'adsáanäm. ⁹Hix, cabä Dios hajxy xyajmädsójcämät. Caj pues. Jaduhñ hajxy tøø xyajnähdíjjäm coö ja'a Wiindsón Jesucristo hajxy xyajnähwaats xyajcuhwáatsämät. ¹⁰Paady hajxy hoy xñähho'túütäm, jaduhñ hajxy hoy xmiøødhidáanäm çøjxta'axiøø. Coö yaa quiädaactägatsa'añ hädaa yaabä naaxwiin, mänit hajxy nägøxiä xwiowø'ogáanäm, møød pønjaty hänäjty jujyñä tsuxnä, møød pønjaty hänäjty tøø yho'ogy tøø tiägoy. ¹¹Hoorä, jaac nijootcapxmøcpøgøø hajxy hamiñ haxøpy. Jaac niyajnähixø'owøø ja'a

Diosmädia'agy hajxy. Jaduhñ hajxy jäda'ahaty mjaančh cudiuñ.

¹²Mägu'ughajpädøjc, mijts nmänuu'xtaacy py coo ja'a wiindsøndøjc hajxy mwiingudsähgø'owät, ja'a hajxy jim tuumbä maa ja'a Diostøjcän, ja'a mijts xwyiingapx xjijøcaxøöbiä. ¹³Coo hajxy jaduñ tiuñ, paady hajxy hamuumdu'joot mdsoc mba'häyowät. Jootcuje hajxy mnimiødhidøjät. Cab hajxy mnimiäjootma'ad mnimiädsiphadøjät.

¹⁴Mägu'ughajpädøjc, jaduñ mijts njaac yajwiinxiic njaac yajwiingapxø'oy coo häna'c hajxy mhøjät, ja'a hajxy naxy nuuxho'pä, coo hajxy ween tiuñ; møød coo häna'c hajxy mjootcapxmøcpøgät, ja'a hajxy jootmayhajpä; møød coo häna'c hajxy mwiingapx mjøcaxø'owät, ja'a hajxy hoy ca'a mäbøgaambä. Mee'xxieemy hajxy jaduñ nägøxiä mmägaxp mhané'emät.

¹⁵Mniyajcopcø'owøøjöp hajxy. Coo pøn nägädieeyø'owøøjät, cab yaghawiimbídät. Jaduhñä mjoot hajxy hoy miänaajä mbädá'agät coo mayhajt hajxy mduñhajtät hoy ñä'a pønä, møødä mäbøjpädøjc-hajxy, møødä cu'ughajxy nägøxiä.

¹⁶Hoy ñä'a mänaajä hajxy mxoondá'agät. ¹⁷Tehngajnä Dios hajxy mba'yá'axät. ¹⁸Mnäám'awäbä Dios hajxy "Dioscujú'uyäp", hoy hajxy nej cu mja jat cu mja habet. Chojiä Dios joot jaduñ coo hajxy jaduñ ngudiúunämät, je'eguiøxp coo ja'a miädia'agy

hajxy nmäbøjcäm ja'a Wiindsøn Jesucristocøxpä.

¹⁹Cabä Dioshespíritu hajxy mänaa mhadúgät. ²⁰Cab hajxy mbéxät pønjetiä Diosmädia'agy najtscapxøöby. ²¹Pero cóxäbä mädia'agy hajxy mmädoomach mädyii hoy mädyii mäbaad. Je'eds hajxy mguhbøgäp hamuumdu'joot. ²²Møødä haxøøgjootä haxøøgwijnmahñdy hajxy mgøxy najtshixø'owät.

²³Ja'a Dios ja'a hoyhajtä weenhajt hajxy xmióoyyäm. Ween hajxy xquiøxy yajnähwa'ačh xquiøxy yajcuhwa'ačh. Ween hajxy xyaghity hawa'adstuum, møødä mjuøhñdyhajxy, møødä mni'xä mgopc-hajxy, høxtä coonä ja'a Wiindsøn Jesucristo yaa quiädaactägätsät hädaa yaabä naaxwiin. ²⁴Ja'a Dios hajxy tøø xwyiimbiiwäm. Jaaya'ay hajxy tsipcøxp xyajnähwa'ads xyajcuhwa'adsaanäm neby hajxy tøø xyajwiinwaanøoyyäm. Tøyhajt jaduñ. Hiñ, cabä Dios mänaa yhøhnda'agy.

²⁵Mägu'ughajpädøjc, huuc Diospa'ya'ax hajxy tehngajnä ja'a højtscøxpä.

²⁶Huuc näma'aw ja'a mäbøjpädøjc hajxy jaduñ nägøxiä coo højts hamuumdu'joot ndsocy nba'häyoy.

²⁷Nañiä mäbøjpädøjc hädaa nocy hajxy mdehm yajwiingapxø'owät nägøxiä. Ja'a Jesucristo jaduñ hanehm.

²⁸Ween mijtsä Wiindsøn Jesucristo ja'a hoyhajtä weenhajt mõj may xmio'oy. Amén.

2 Tesalonicenses

1 Chaa hõjts hädaa nocy nhädiuunmuga'añ, hõõch Pablo, mөөдä Silvano, mөөдä Timoteo. Mijts hädaa nyajnäjaayөөby, pөnjaty jim hamugөөby Dioswiingudsähgөөbiä Tesalónica. Ja'a Dios hajxy nDeedyháltäm, mөөдä Jesucristo hajxy nWiindsөnháltäm. ²Ween mijtsä Dios ja'a tsooctä mayhajt xtiuunä, ween mijtsä hoyhajtä weenhajt xmio'oy. ³Mägu'ughajpädөjc, ja'a mijtscөxpä hõjtsä Dios hoy miänaajä nnäma'ay “Dioscujú'uyäp.” Hawiinmats jaduһn. Hiх, tehngajnä Diosmädia'agy hajxy mjaac mäbөcy, mөөд hajxy tehngajnä mjaac niçhogyii hamiñ haxөpy. ⁴Hoy miajatiä hõjts nwädity maa ja'a Diostөjcän, jaduһn hõjts nmädia'agy ja'a mijtscөxpä coo ja'a Diosmädia'agy hajxy hoy mjaançh tehм miäbөcy, mөөд coo hajxy hoy mjaançh tehм miee'xtucy, hoy hajxy hanaxiä mja tsaächpөcy ja'a Dioscөxpä. ⁵Coo hajxy jaduһn mmee'xtucy, paadiä Dios hajxy jim xpiäda'aga'añ hawa'adstuum coo hänajty miähane'ema'añ. Xyhijxpä Dios hajxy coo hajxy je'e myajcudsaaçhpөгө'oy. Hoy jaduһn coo hajxy jim xpiädá'agät.

⁶Pөnjaty mijts jaduһn xchaaçhtiuumb, yaghawiimbidaambiä Dios jaduһn. Jaduһnä Dios jioot chocy. ⁷Coo ja'a Wiindsөñ Jesucristo yaa miänajtägatsa'añ hädaa yaabä naaxwiin, jim choona'añ tsajpootyp. Ja'a mioonsä miөөdmänacaamby, ja'a hajxy mäjaamөөdpä. Hajájjäbä Jesucristo quiäda'aga'añ. Mänitä Dios hajxy nägөxiä xyajpoo'xáanäm, mөөд hõjts mөөд mijts nägөxiä. Cab hajxy jaduһn xyajtsaaçhtiuanänänä. ⁸Coo ja'a Jesucristo hänajty yaa tөө quiäda'agy, mänitä jäya'ayhajxy quiumädowa'añ pөnjatiä Dios hänajty tөө quia'a möjpädá'aguiäbä, pөnjatiä miädia'agy hänajty tөө quia'a mäbөjcäbä ja'a Wiindsөñ Jesucristocөxpä. ⁹Cөjxta'axiөө hajxy jiiby chaaçhpөгa'añ haxөөgtuum. Cab hajxy jim mänaa yajtägө'owa'añii Dioswiinduum, maa ja'a Dios möj jaançh yhäña'ayän, maa möcmäjaa miөөдän. ¹⁰Coo ja'a Jesucristo hänajty yaa tөө quiäda'agy, mänitä jäya'ayhajxy jiaançh tehм yagjuө'owa'añ, ja'a Diosmädia'agy hajxy hänajty tөө miäbөquiäbä, ja'a hajxy hänajty tөө nähwa'açh tөө

quihwá'achäbä. Mänitá Jesucristo hajxy wyiingudsähgø'øwa'añ. Jim mijts hánajty mbahidaambä je'eguiøxp coo ja'a Diosmädia'agy hajxy hánajty tøø mmäbøjpa neby højts mijts tøø nyajnáhixø'øyän.

¹¹Ja'a mijtsøxpä højtsä Dios hoy miänaajä nba'ya'axy coo ja'a miädia'agy hajxy hoy mgudiúunät, ween hajxy jaduhñ xquiumay. Paady hajxy tøø xyajnáhdijy coo hajxy mnähwa'ads mguhwá'adsät. Ween hajxy xpiuhbety ja'a miäjaahaam coo ja'a miädia'agy hajxy hoy mmäbøjcat, jaduhñä hojioot hajxy mmøødhádät.

¹²Coo ja'a hoybä weenbä hajxy jaduhñ mgudiúnät, jaduhñä cu'ugä Wiindsøn Jesucristo hajxy wyiingudsähgø'øwät, møød jaduhñ mijtsä cu'ug xwyiingudsähgøøbiät. Ja'a nDioshájtäm møødä Wiindsøn Jesucristo, jaaya'ay mijtsä tsooctä mayhajt xtiúunäp.

2 ¹⁻²Mägu'ughajpädøjc, chámhøch nmädia'aga'añ coo ja'a Wiindsøn Jesucristo yaa quiädaactägatsa'añ hádaa yaabä naaxwiin, møød coo hajxy xmiøjya'axáanäm coo hajxy jim nhamugøøyyämät maa je'ejän. Hoorä, coo hajxy mmädoyhádät cooc tyijy tøø yhabaatnä coo ja'a Jesucristo quiädaactägatsaannä, cab hajxy mdsoj mäbøgät. Cab hajxy mjootmayhádät. Cab hajxy mdsähgø'øwät. Hix, jaduhñä häna'c-hajxy näje'e tøø yhøhnda'agy cooc tyijy ja'a Dios jaduhñ tøø miäna'añ, møød cooc tyijy højts jaduhñ tøø nmäna'añ, capxyhaam, nocyhaam. Pero cab jaduhñ nä'a tøyyä. Paady højts mijts

cham nmänuu'xta'agy ³coo hajxy mga'a yajwiinhøønät ni weeñtiä. Hix, cab jaduhñ choj habaada'añ. Jayøjpa jaya'ayä Diosmädia'agy hajxy nämay näjtshixø'øwa'añ.

Mänitá haxøøgjäya'ay wyiingähxø'øga'añ, ja'a hánajty jiiby ca'awaambä haxøøgtuum.

⁴Mänitá haxøøgjäya'ayä Dios miädsibø'øwa'añ møødä jäya'ayhajxy yaa wyiingudsähgøøbiä cøxiä. Jaanç tehñ yajcumayaamb hánajty jaduhñ. Mänitá yhanemdaact jiiby piäda'aga'añ maa Diostøjcän. Jaduhñ hánajty ñibiäda'aga'añii nebiä Diosän. Yajwiingudsähgø'øwaamb hánajty jaduhñ nebiä Diosän.

⁵Mänájøch jim nhitiän maa mijtsän, mänítøch jaduhñ nhuuc hawáanäm coo jaduhñ jiada'añ. Mjahmiejchp hajxy jaduhñ, túhmäts. ⁶Cabä haxøøgjäya'ay jaduhñ choj wiingähxø'øga'añ je'eguiøxp coo yhadugyii høxtä coonä Dios yaghabaadät coo jaduhñ wyiingähxø'øgät. Mnajuøøby hajxy jaduhñ pøn mähaduyp. ⁷Tøø ja'a haxøøgwiinmahñdy tiägøøñä wädijpä. Hamee'ch jaduhñ wiädity. Jaanä jaduhñ je'e yhadújcäbä. Coo yhabaadät coo quia'a hadújcänät, mänitá mähaduypä jiøwa'adsa'añ.

⁸Mänitá haxøøgjäya'ay jaduhñ jiaanç wiingähxø'øga'añ. Mänitnä Wiindsøn Jesucristo yaa quiädaactägatsa'añ mäjaamøød. Mänitá Jesucristo ja'a haxøøgjäya'ay yajcuhdägoyya'añ. Piäxuyjaam jaduhñ yagho'øga'añ.

⁹Coo ja'a haxøøgjäya'ay jaduhñ wyiingähxø'øga'añ, ja'a

møjcu'ugong puhbedaamb.
 Møcmäjaa miøðhadaamb.
 Mänitä hijxtahnd yajcähxø'øga'añ
 hoy-yagjuøøñä. Jaduhñä
 cu'ug hänajty wyiinhøona'añ.
¹⁰Haxøøgwiiinmahñdyhaam
 hänajty miäwiinhøona'añ.
 Ja'a jäya'ayhajxy hänajty
 tu'udägoyyaambä, je'edshajxy
 jaduñ yajwiinhøonaamb. Paady
 hajxy hänajty tiu'udägoyya'añ
 coo ja'a tøyhajt hajxy hänajty
 tøø quia'a tsocy. Paady hajxy
 hänajty quia'a nähwa'ads quia'a
 cuhwa'adsa'añ. ¹¹⁻¹²Pønjatiä
 tøyhajt jaduñ ca'a tsojp, ja'a
 haxøøgpä hajxy wyiinxoondaacypy.
 Jaduhñä Dios miäna'añ coo hajxy
 ween yajwiinhøøn, møød coo
 ja'a hønnda'agymiädia'agy hajxy
 ween miäböcy, jaduñ hajxy jiiby
 quia'awät haxøøgtuum.
¹³Mägu'ughajpädøjc, xjiaančh
 tehñ chojpy mijtsä Dios. Ja'a
 mijtscøxpä højtsä Dios hoy
 miänaajä nnäma'ay “Dioscujú'uyäp.”
 Hawiinmats jaduñ. Paady højts
 jaduñ nnäma'ay je'eguiøxp coo
 ja'a Dios hajxy jecy xyajñhdijy coo
 hajxy mnähwa'ads mguhwá'adsät.
 Cahnä hädaa yaabä naaxwiin
 hänajty yhawijy tiøø'xta'agy coo
 hajxy jaduñ xyajñhdijy. Coo
 ja'a tøyhajt hajxy tøø mmäböcy,
 paadiä Dios hajxy xyajñhwa'ačh
 xyajcuhwa'ačh ja'a yhEspirituhaam.
¹⁴Coo ja'a Dios hajxy jaduñ
 xyajñhdijy, paadiä tøyhajt hajxy
 tøø mmäböcy mänaa højts mijts hoy
 nyajwiingapxø'øyän. Jaduhñ hajxy
 tøø xyajñhdijpä coo ja'a Wiindsøn
 Jesucristo hajxy xmiøødhidät
 cøjxta'axiøø.

¹⁵Mägu'ughajpädøjc, tøø
 højts mijtsä cuhdujt madiu'u
 nyajñähixø'øy capxyhaam møød
 nocyhaam. Hamuumdu'joot hajxy
 jaduñ mmäböğät tehngajnä. Cab
 hajxy nnajtshixø'owät. ¹⁶Xjiaančh
 tehñ chójcäm ja'a Wiindsøn
 Jesucristo hajxy møødä Diosteedy.
 Tøø mayhajt hajxy xtiüünäm coo
 hajxy tøø xyajwiinwaanøøyyäm
 cooc hajxy hoy miänaajä
 xmiøødhidäanäm. ¹⁷Weenä Dios
 hajxy xpiuhbety coo hajxy hoy
 mgudiünät, møød coo hajxy hoy
 mgápxät.

3 Hoorä, mägu'ughajpädøjc,
 huuc pa'ya'axä Dios hajxy ja'a
 højtscøxpä, ween højtsä mädia'agy
 ja'a Jesucristocøxpä paquiä nøcxy
 nyajwa'xy, weenä cu'ughajxy
 miäböcy nej mijts tøø mmäböquiän,
²møød ween højtsä Dios xñäwa'añ
 maa ja'a haxøøghäna'c-hajxiän,
 maa ja'a cahwiindøyhäna'c-hajxiän.
 Hix, cabä jäya'ayhajxy nägøxiä
 miäböcy. ³Perø tømiädiaacpä
 Dios. Xpiuhbedaamb hajxy jaduñ.
 Xñäwa'anaamb hajxy jaduñ
 maa ja'a haxøøgpän. ⁴Jaanä
 jaduñduhmbä, nmäböjcäp højtsä
 Dios ja'a miädia'agy ja'a mijtscøxpä.
 Nnajuøøby højts coo mijtsä cuhdujt
 mgudiuna'añ, ja'a højts mijts cham
 nyajwiingapxø'owaambiä. ⁵Weenä
 Dios hajxy xjiaac yajwiinjuø'øy
 tiiguiøxpä hajxy jaduñ coo
 xchójcäm, møød tiiguiøxpä
 Jesucristo coo miee'xtujcy mänaa
 yaa yhitiän hädaa yaabä naaxwiin.
⁶Mägu'ughajpädøjc, tøø højts
 nmädoxyhaty cooc mijts näje'e
 mwi'i nüuxho'ogy, møød cooc
 hajxy näje'e mga'a nä'ägädä

tuna'añ. Hoorä, jaduñ højts mijts nmägapxy nhane'emy ja'a Wiindsón Jesucristocøxpä coo hajxy mbuhwá'adsät pønjaty jaduñ wi'i ñuuxho'p, ja'a cuhdujt hajxy ca'a cudiunaambä, ja'a højts mijts tøø nyajwiingapxø'øyäbä. ⁷Mnajuøøby hajxy coo højts hawiinmats xpiahíxät neby højts hoy nwädiän. Hi_x, mänaa højts jim nhitiän maa mijtsän, cab højts hänäjty jim nnuuxho'ogy. ⁸Caj pues. Xøømdsuhm højts hänäjty nduñ nxajy. Paady højts hänäjty jaduñ nguhdujthaty, cab højts hänäjty ndsocy coo højts mijts cu xpiuhbejty. Ngujuuby højts hänäjty tijaty højts hänäjty ngaaby. ⁹Paady højts hänäjty jaduñ nguhdujthaty, jaduñ højts hänäjty ndsocy coo højts mijts jaduñ xpiahíxät, hoy højtsä cuhdujt hänäjty nja møødä coo højts mijts cu xpiuhbejty. ¹⁰Mänaa højts jim nhitiän maa mijtsän, jaduñ højts hänäjty nmägapxy nhane'emy coo hajxy nägøxiä mdun mxájät. Pøn jaduñ ca'a tunaamb, cabä caayyøøc hajxy mmó'owät. ¹¹Coo højts jaduñ tøø nmädoyhaty cooc hajxy jaduñ näje'e mwi'i ñuuxho'ogy, møød cooc hajxy näje'e mga'a

nä'ägädä tuna'añ, møød cooc hajxy näje'e mwi'i yajtägø'øy maa cueendä hajxy mga'a møødän, ¹²pønjaty jaduñ jatcøøby, jaduñ højts nmägapxy nhane'emy ja'a Wiindsón Jesucristocøxpä coo hajxy jootcuje ween tiuñ xiajy, jaduñä quiaayyøøc hajxy ñiguiudúunäxät.

¹³Mijts, mägu'ughajpädøjc, cab hajxy mnänuuxó'øwät coo ja'a hoybä weenbä hajxy mdúnät. ¹⁴Pøn jaduñ ca'a cudiunaamb neby højts cham ngujaayän maa hädaa noquiän, myajcopcø'øwäp hajxy jaduñ. Cab hajxy mmøødwädijmúnät. Ween jaduñ chähdiuñ. ¹⁵Pero cab hajxy mmädsiphädät. Jaduñ hajxy mhoj mmägápxät nebiä huch nebiä puhya'ayän.

¹⁶Yejpiä Dios ja'a hoyhajtä weenhajt. Ween mijtsä hoyhajtä weenhajt møj may xmio'oy hoy miänaajä. Ween hajxy nägøxiä xmiøødhity.

¹⁷Høøch Pablo, hamdsoo cø'øháamhøch cham njahmiaya'añ. Jadúñhøch nxøø ngujaay hoy ñä'a mädyii nocyjiootiä: Pablo. ¹⁸Ween mijtsä Wiindsón Jesucristo ja'a tsooctä mayhajt xtiuunä nägøxiä. Amén.

1 Timoteo

1 Pablohájpøch høøch. Ja'a Jesucristøch xquiuguexyhajp. Ja'a Diosteedy møødä Wiindsøn Jesucristo, mänítøch hajxy tøø xyhane'emy coöch jaduhñ ndúnät cuguexy. Ja'a Dios hajxy jaduhñ xyajnáhwaats xyajcuhwáatsäm. Ja'a Jesucristo hajxy njøbhíjxäm coo hajxy hawa'adstuum xpiäda'agáanäm.

²Timoteo, míichhøch hädaa nocy nyajnájaayøøby. Jadúhñhøch miích njuø'øby nebiä hamdsoo huungpän coo ja'a Diosmädia'agy nmäbøjcäm. Tøyhajt jaduhñ. Ja'a Diosteedy møødä Wiindsøn Jesucristo, ween miíchä tsooctä mayhajt hajxy xtiuuñä, ween xñäxuuçh, weenä hoyhajtä weenhajt xmio'oy.

³Hoorä, mänaa højts jim tøø nhíjtäm Efeso, mänítøch nwiinmahñdyhajty coöch jim nnøcxät Macedonia-naaxooty. Mänítøch miích nmänuu'xtaacy coo jim mmähmø'øwät Efeso nidiuhñ, coo jaduhñ jim ween mduñ wiindsøn maa ja'a Diostøjcän. Jadúhñhøch miích cham nnämáaguumbä coo jim mjaac túnät. Hix, jii jäya'ayhajxy näje'e, cabä Diosmädia'agy hajxy hoy yajnáhixø'øby neby højts

nyajnáhixøøyyäm. Wiingaty hajxy yajnáhixø'øby. Mhøjäp jaduhñ coo hajxy jaduhñ wiing quia'a yajnáhixøøñät.

⁴Jaanä jaduhñduhmbä, mhøjäp je'ebä pønjetiä nähap hajxy wi'i miädiaacp, møød pønjaty yajcopcøøby tijatiä jecyjiäya'ayhajxy hijty xiøhaty. Cab jaduhñ choobaady coo jaduhmbä capxy coo jaduhmbä mädia'agy hajxy tehngajnä yajcapxiø'øby. Jue'e tsoobaatp coo ja'a Diosmädia'agy hajxy nmäbøjcäm coo ja'a Dios hajxy xpiädäcäm hawa'adstuum.

⁵Pero jaduhñä Dios jioot chocy coo hajxy hamuumdu'joot nniçhojc nnibia'häyóowämät hamiñ haxøpy. Pønjaty howyiinmahñdy møød, je'ehajxy jaduhñ hamuumdu'joot niçhojc nibia'häyóowäp, møød pønjaty haxøøgwiinmahñdy ca'a møød, møød pønjetiä Diosmädia'agy hamuumdu'joot mähøjp.

⁶Tøø jäya'ayä Diosmädia'agy hajxy ñajtshixøøñä näje'e. Tøø hajxy jaduhñ tiu'udägoonä. Xiøøbä hajxy yajcapxiø'øby mädyii ca'a tsoobaatp.

⁷Jaduhñä jioot hajxy jia wi'i piäda'agy coo ja'a jecyquiuhdujt hajxy yajnáhixø'øwät, ja'a Moisés

jecy quiujáhyyäbä. Pero cab hajxy wyiinjuø'oy neby hajxy jia wi'i yajñähixø'owa'añ cooc tyijy tiøyyä.

⁸Coo ja'a jecyquihdujt hajxy jaduhñ hoy nyajtúunämät, mänit jaduhñ tiuungpaady. Tøyhajt jaduhñ, túhmäts. ⁹Paadiä Dios ja'a jecyquihdujt piädaacy coo ja'a haxøøgjäya'ayhajxy jaduhñ quiumädówät, ca'a jie'eguiøxpä ja'a hojiäya'ayhajxy. Tøyhajt jaduhñ, túhmäts. Jue'eçh jaduhñ nnänøømby ja'a haxøøgjäya'ayhajxy, pønhatiä Diosmädia'agy ca'a mæbøjp, møød pønhatiä Dios ca'a wiingudsähgøøby, møødä cubojpä cugädieebiähajxy, møød pønhatiä haxøøgwiinmahñdy møød, møød pønhatiä Dios mägapxtägooby, møød pønhatiä tiaj tieedy yagho'p, møødä jäya'ay-yagho'pähajxy, ¹⁰møød pønhatiä wiingto'oxiøjc møødtsänaaby, møød pønhatiä miäya'adiøjc møødmaab, møødä jäya'amiee'tspähajxy, møødä hønndaacpähajxy, møødä mänähøønøøbiähajxy, møød pønhatiä hoguiapxiä homiädia'agy hajxy ca'a cudiumb. ¹¹Hädaa hoguiapxy hädaa homiädia'agy hädaaduhmbä, jim jaduhñ myiñ cujaay maa ja'a Diosmädia'aguiän coo ja'a Dios hajxy tøø xpiädaacäm hawa'adstuum. Diøshøch jaduhñ tøø xyajñähdiy coo ja'a miädia'agy nyajwä'xät. Jaançh tehñ jiootcujcä Dios jaduhñ.

¹²Haa ja'a Wiindsón Jesucristo, je'eçhä mäjaa tøø xmio'oy. Páadyhøch jaduhñ nnäma'ay “Dioscujú'uyäp” cooçh tøø xwyiinguexy cooçhä miädia'agy jaduhñ nyajwä'xät.

Xyaghijxnájxhøch jaduhñ cooçh hänajty hoy nduna'añ, ¹³hóyhøch hijty haxøøg nja wiingapxety. Nmädsibøøbiøch hijty. Nhøxpäbøøbiøch hijty pønjaty mæbøjp ja'a Jesucristocøxpä. Pero cábøçhä Dios xyajcumädooyy. Xñäxúu'tshøch jaduhñ je'eguiøxp cooçh hänajty nga'a nnajuø'oyñä cooçh hänajty haxøøg njatcø'oy. ¹⁴Mänitøçhä Dios ja'a tsooctä mayhajt møj may xtiuunä. Mänitøch xpiädaacy tu'ugmädia'agy møødä Jesucristo. Páadyhøçhä Diosmädia'agy nmæbøjnä. Páadyhøçhä jäya'ay nägøxiä ndsojc nba'häyoonä.

¹⁵Paadiä Jesucristo yaa yhooyy hädaa yaabä naaxwiin, ja'a cubojpä ja'a cugädieebiähajxy hoy yajñähwa'açh yajcuhwa'açhii. Tehñ tiøyhajt jaduhñ. Tsøc hajxy hamuumdu'joot mæbøjcäm. Høøch, hanáxiøçhä pojpä cädieey hijty nmøødä may. Cab ndijy pøn hijty xmiäbaady nébiøçhä pojpä cädieey hijty nmøødä. ¹⁶Hóyhøçhä pojpä cädieey hijty may nja møødä hanaxiä, mänitøçhä Dios xñäxuu'ch, jaduhñä Jesucristo yajcähxø'cy cooçh hänajty xjiaançh tehñ miee'xtucy, weenä cubojpä cugädieebiähajxy jaduhñ wyiinjuø'oy coo hajxy hawiinmats miäbøgät ja'a Diosmädia'agy ja'a Jesucristocøxpä, møød ween hajxy jaduhñ wyiinjuøøbiä coo hajxy hoy jiugyhada'añ cøjxta'axiøø nebiä Dios jiugyhatiän. ¹⁷Tsøgä Dios hajxy hoy miänaajä wiingudsähgøøyyäm. Nidiuhñ jaduhñ miähane'emy cøjxta'axiøø. Cab jaduhñ mänaa yho'oga'añ tiägoyya'añ. Cab hajxy

jaduhñ mänaa nhíjxäm. Tehm tiøyhajt jaduhñ.

¹⁸⁻¹⁹Huung Timoteo, chámhøch miičh nwiingapx njøcaxø'øy coo ja'a Diosmädia'agy hamuumdu'joot mmämøjtänä'awät, møød coo tehngajnä mmäbøgät, møød coo hojioot howyiinmahñdy mjaac panøcxät. Jaduhñ miičhä Dioscugapxyhajxy jecy tøø xyhuuc mädiaacpä coo miičh jaduhñ mgudiuna'añ. Najtscapxøøyyä hajxy jaduhñ ja'a Dioshespíritu. Jii jäya'ayhajxy näje'e, coo ja'a yhojiootä yhowyiinmahñdy hajxy tøø ñajtshixø'øy, paady hajxy tøø tiu'udägooñä. Cabä Diosmädia'agy hajxy miäbøjnä. ²⁰Jaduhñä Himeneohajxy tøø jiaty møødä Alejandro. Tøøčhä møjcu'ugong hajxy nyajcø'ødägø'øy, weenä Dios hajxy jaduhñ miänuu'xta'agy coo hajxy miämee'xøøjät, møød coo hajxy ween wyiinjuø'øy coo jaduhñ yhaxøögä coo ja'a Dios hajxy ñähojy.

2 Hoorä, chámhøch nyajwiinxiic nyajwiingapxø'øwa'añ nebiatiä Dios hajxy nba'yaaxmúcämät. Tsøgä Dios hajxy mänuu'xtáacäm ja'a jäya'aguixøpähajxy nägøxiä mäduhñtiä hajxy yaa chána'ay hädaa yaabä naaxwiin. Tsøgä Dios hajxy nämáayyäm “Dioscujú'uyäp.” ²Pønjaty hajxy xyhanéhñäm, je'eguiøxpä Dios hajxy tsøc mänuu'xtáacäm, møødä gobiernähajxy, møødä gobernadorhajxy, møødä cuduunghajxy. Jaduhñ hajxy hagujc jootcujc nhíjtämät. Jaduhñä cu'ug hajxy xquia'a hadsípämät. Jaduhñä Diosmädia'agy hajxy

hoy ngudiúunämät. Jaduhñä Dios hajxy hoy nwiingudsähgøøyyämät. ³Hahixøøby jaduhñ coo ja'a Dios hajxy jaduhñ nmänuu'xtáacämät ja'a gobiernäcxøpähajxy. Jaduhñä Dios hajxy xquiümáayyämät. Jaaya'ay hajxy jaduhñ xyajnahwaats xyajcuhwáatsäm. ⁴Jaduhñä Dios jioot chocy coo hajxy nägøxiä nnähwaats nguhwáatsämät mäduhñtia hajxy yaa ndsänáayyäm hädaa yaabä naaxwiin, møød coo ja'a tøyhajt hajxy nwiinjuøøyyämät ja'a Jesucristocøxpä. ⁵⁻⁶Hix, tu'uquiä Dios hajxy nDeedyhájtäm. Jaanä jaduhñduhmbä, tu'jäya'ay hajxy jim xñähgapxtúutäm Dioswiinduum. Ja'a Jesucristo je'e. Mänitä Dios miänaañ coo ja'a Jesucristo yaa jäya'ayhädat hädaa yaabä naaxwiin. Mänitä Jesucristo hamdsoojoot ñiñähdujca. Mänit hajxy nägøxiä hoy xñähho'túutäm. Jaduhñ nbojpä ngädieey hajxy nägøxiä xyajnahwaats xyajcuhwáatsäm. ⁷Páadyhøčhä Dios xpiädaacy cooçh xquiugexyhádät cooçhä mädia'agy jaduhñ nyajwá'xät coo ja'a Jesucristo hajxy tøø xñähho'túutäm, møød cooçhä jäya'ayä Diosmädia'agy nyajwiingapxø'øwät, ja'a hajxy ca'a judiospä, ween hajxy jaduhñ miäbøcy, møød weenä tøyhajt hajxy jaduhñ wyiinjuø'øy. Tømiädiäacpøch jaduhñ, cábøch nhøhñda'agy.

⁸Jaduhñds je'e, jaduhñhøčhä njoot chocy cooçhä nmäya'adiøjca Dios hajxy pia'yá'axät, hoy ñä'a majatiä hajxy mhamugø'øy Dioswiingudsähgøøbiä. Hojioot howyiinmahñdymøød hajxy

jaduhñ mba'yá'axät, ca'a yhadsip ca'a yhajootma'adä, ca'a yhaxøøgwiiinmahñdymøødä.

⁹Jaanaä jaduhñduhmbä, cábøčhä njoot chocy coo ja'a to'oxiøjc-hajxy hočhädiuunnä ñibiáda'agøøjät.

Cabä quiuhwaay hajxy hanaxiä yajcøpcø'øwät. Cabä oro hajxy piädá'agät ni perlas. Cabä wit tsojaty pä hajxy miäwädítät.

¹⁰Jaduhñä joot hajxy piädá'agät coo ja'a mayhajt hajxy tehngajnä tiúnät, jaduhñ hajxy yajcähxø'ogät coo ja'a Dios hajxy tøyhajt wyiingudsähgø'øy hamuumdu'joot.

¹¹Hamoñ haducy ja'a to'oxiøjc-hajxy jim yhamädoowhídät maa hajxy naxy mhamugø'øyän. Jaduhñä Diosmädia'agy hajxy hoy yhabøgät.

Møød mee'xxieemy hajxy jim yhídät. ¹²Jaduhñhöch nmägäp xnhanehmbä coo ja'a to'oxiøjcä Diosmädia'agy hajxy jim quia'a yajñähixø'øwät maa hajxy naxy mhamugø'øyän. Hamoñ haducy hajxy jim ñä'ägä hídät. Cabä to'oxiøjc cuhdujt hajxy miøødä coo ja'a ya'adiøjc hajxy yhoj yá'axät.

¹³Hix, ja'a Adán, jawyiin je'e yhädiuunnä; høxhaamä Eva jiaac hädiuunnä. ¹⁴Jaanaä jaduhñduhmbä, ja'a Eva jaduhñ wiinhøhnä ja'a mõjcu'ugong, ca'a yhadángä. Jaduhñä Eva quiädiechhöñ.

¹⁵Paadiaä to'oxiøjc-hajxy jiaanč tehñ chaačhpøcy coo yhuunghajxy myiñ miech. Pero coo ja'a Dios ja'a miädia'agy hajxy tehngajnä miäbøjcät, jaduhñä piojpä quiädieey hajxy yajñähwa'ads yajcuhwa'adsaanäxä. Jaduhñä Dios chojpä coo ja'a to'oxiøjcä mäbøjpädøjc hajxy hamuumdu'joot

choc pia'häyøwät, møød coo hojioot howyiinmahñdy hajxy miøødhádät, møød coo hajxy mee'xxieemy yhídät.

3 Hahixøøby jaduhñ coo ja'a mjoot hajxy mbädá'agät coo hajxy mdúnät wiindsøn maa ja'a mäbøjpädøjc-hajxiän. Hodiung jaduhñ. Tehñ tøyhajt jaduhñ. ²Pøñ jaduhñ tuumb wiindsøn maa ja'a Diostøjcän, tsipcøxpä howyiinmahñdy miøødhádät. Jagooyä to'oxiøjc tu'ug yaghídät, ca'a mietsc ca'a tiägøøgä. Cabä vino comjaty yhú'ugät. Cabä haxøøgwiiinmahñdy miøødhádät. Hoy wiädítät. Coo pøñ miésät tøghayohbiä maa ja'a tiøjcän, piu'umió'owäp quioñdymó'owäp jaduhñ. Jiädäp yajñähixø'øw jaduhñ. ³Cab yhu'ug cab jiøø'xät. Cab chiptúnät. Mee'xxieemy jaduhñ quiapx miädiá'agät. Cab tii yajtsiptá'agät. Cabä xädø'øñ yhadsógät. ⁴Pøñ jaduhñ tuumb wiindsøn maa ja'a Diostøjcän, tsipcøxpä yhuungä tio'oxy hoy miägäp x yhané'emät, weenä yhuunghajxy miädia'agymiäbøcy, ween wyiingudsähgø'øyii ja'a yhuung. ⁵Hix, pønä yhamdsoo huungä yhamdsoo to'oxy hoy ca'a hane'emaamb, cab hoy miähane'ema'añ maa ja'a Diostøjcän. ⁶Cab jaduhñ yhahixø'øy coo ja'a naamdägø'øbä tiúnät wiindsøn maa ja'a Diostøjcän, coo jaduhñ ñä'a niguiumayøøjät. Wehñä jaduhñ quiumädówät nebiä mõjcu'ugong quiumädooyän. ⁷Pøñ jaduhñ tuumb wiindsøn maa ja'a Diostøjcän, tsipcøxp jaduhñ hoy wiädítät maa jäya'ayhagujcän, ja'a

hajxy ca'a Diosmädia'agymiäbøjpä. Jaduhñ quia'a nähojðøjät, jaduhñ quia'a yajtu'udägoyyðøjät ja'a möjcu'ugong.

⁸Jaanä jaduhñduhmbä, ja'a ya'adiøjc-hajxy jim mäbuhbejpä maa ja'a Diostøjcän, tsipcøxp hajxy hoy jiäya'ayhädät. Cab hajxy ñä'ä metscapx ñä'ä tägøøgcápät. Cab hajxy yhu'ug cab hajxy jiðø'xät. Cabä jäya'axiädø'øn hajxy yhadsógät. ⁹Tsipcøxpä tøyhajt hajxy miäbøgät ja'a Jesucristocøxpä, ja'a hijty cuyu'u'ühpä. Howyiinmahñdymøød hajxy jaduhñ miäbøgät. ¹⁰Pønjetiä jioot tsojp coo hajxy miäbuhbédät maa ja'a Diostøjcän, cab hajxy mdsoj pädá'agät. Ween hajxy jayøjp mhuuc hijxmach pø hoy hajxy hänäjty tiuna'añ. Coö hajxy hänäjty tøø mhijxmach coo howyiinmahñdy hajxy jiaančh møødä, mänit hajxy mbädá'agät coo hajxy jaduhñ miäbuhbédät. ¹¹Jaanä jaduhñä to'oxiøjc-hajxypä, ja'a hajxy jim mäbuhbejpä maa ja'a tsajtøjcän. tsipcøxp hajxy hoy jiäya'ayhájpät. Cab hajxy pøn ñähøønø'øwät. Cab hajxy yhu'ug cab hajxy jiðø'xät. Hamuumdu'jootä hoybä weenbä hajxy quiudiúnät cøxiä. ¹²Hoorä, ja'a mäbuhbejpädøjc-hajxy, ja'a ya'adiøjc-hajxypä, jagooyyä to'oxiøjc hajxy tu'ug yaghídät. Hoy ja'a yhuungä tio'oxy hajxy miägäp xhané'emät. ¹³Ja'a mäbuhbejpädøjc-hajxy jaduhñ hoy tuumbä, cumayáanäp hajxy jaduhñ ja'a mäbøjpädøjc, møød jaduhñä möjjuøhñdy hajxy miøødhädät coo hajxy hänäjty miädia'aga'añ coog hajxy miäbøcy ja'a Jesucristocøxpä.

¹⁴⁻¹⁵Jaduhñhøchä njoot jia tsocy coöch jim mobädajpä nnøcxät maa miichän. Pero coöch jaduhñ jim nga'a nä'ä tsoj nõcxät, päadyhöch hädaa nocy nyajnäjaayø'øy, jaduhñ mnajuø'owät nebiä mäbøjpädøjc-hajxy jim hoy yhidät maa ja'a Diostøjcän. Hoy miänaajä Dios yhity. Hoy miänaajä Dios ja'a mäbøjpädøjcä tøyhajt yajnähixø'øy ja'a Jesucristocøxpä. Hamuumdu'joot hajxy jaduhñ ñäwa'añii. ¹⁶Jaančh tehñ miøj jaančh tehñ jiaančh hädaa mädia'agy jaduhñ ja'a Jesucristocøxpä, coo hajxy hoy xyajnähwaats xyajcuhwäatsäm. Tehñ tiøyhajt jaduhñ. Cuyu'u'üchä Dios hädaa mädia'agy hijty yaghity. Mänit hajxy jaduhñ tøø xyajwiinjuøøyyäm. Hoorä, coo ja'a Dios jaduhñ miänaañ, mänitä yHuung yaa quiejxy hädaa yaabä naaxwiin. Ja'a Jesucristo je'e. Jaduhñ je'e jiäya'ayhajty neby højtshájtäm. Mänitä Dioshespíritu jaduhñ yajcähxø'cy coo ja'a Jesucristo yhity hawa'adstuum. Mänitä Jesucristo yhijxä ja'a Diosmoonsä, ja'a hajxy jim tsohmbä tsajpootyp. Mänitä Jesucristo jim ñøcxy tsajpootyp. Mänitä mädia'agy wia'xy ja'a Jesucristocøxpä maa ja'a jäya'ayhajxy chäna'ayän, ja'a ca'a judíoshajxypä. Mänitä jäya'ayhajxy yaa may miäbøcy ja'a Jesucristocøxpä hädaa yaabä naaxwiin.

4 ¹⁻²Hoorä, howyiinjuøøñä ja'a Dioshespíritu tøø miäna'añ coogä mäwiinhøhmbähajxy piädø'øga'añ. Jaduhñäc hajxy ñibiäda'aga'añii nebiä hoyhäna'cän.

Pero yhamdsoo cuhdújtác hajxy yajtunaamby. Haxøøgcuhdújtác hajxy miøødhadaamby møødä haxøøgjuøhñdy. Jadúhñägä mäwiinhøhmbähajxy yajtägø'owa'añii ja'a møjcu'u. Jadúhñác hajxy ñajtscapxø'øwáanäxä nébiägä høhnda'agymiädia'agy hajxy yajnahixø'owät. Mänítägä mabøjpädøjcä høhnda'agymiädia'agy hajxy nämay yhamädoowhida'añ. Mänítác hajxy jaduhñ miäbøga'añ. Mänítägä tømiädia'agy ja'a Jesucristocøxpä hajxy ñajtshixø'owa'añ.

³⁻⁴Jadúhñägä mäwiinhøhmbähajxy hñajty yhøhnda'aga'añ cooc tyijy yhaxøøgä coo hajxy nbøjcämät, møød cooc tyijy quia'a hahixø'øy coo hajxy cøxiä wiinä njøø'xämät, hoy ja'a Dios cøxiä wiinä tøø jia päda'agy. Hix, tijatiä Dios tøø piäda'agy, haagä hoy je'e. Hahixøøby jaduhñ coo hajxy nguhbøjcämät, pønñatiä tøyhajt mabøjp ja'a Jesucristocøxpä. Cooc hajxy jaduhñ nguhbøjcäm, jaduhñä Dios hajxy nnämáayyämät “Dioscujú'uyäp.” Y cab jaduhñ yahixø'øy coo hajxy nwiingápxämät. ⁵Coo ja'a Dios jaduhñ tøø miäna'añ, møød coo ja'a Dios hajxy nba'yáaxäm, jaduhñä Dios cøxiä wiinä quiunuu'xy.

⁶Naxy miichä mabøjpädøjc jaduhñ mdehñ ñajtscapxø'owät nébiøch cham nmädia'aguiän, jaduhñä Jesucristo hoy mbuhbédät, jaduhñä homiädia'agy hoy mjaac habøgät ja'a Jesucristocøxpä, ja'a hajxy nmabøjcämbä. Je'e miich mnä'ägä panøcxyhajpy.

⁷Cabä nähapmädia'agy myajcopcø'owät nebiä teedyhaphajxy wyl'i miädia'aguiän. Høhnda'agymiädia'agy je'e jaduhñ. Jimä mjoot mnä'ägä pädá'agät nebiä Diosmädia'agy maas hoy mjaac panøcxät. ⁸Tsoobaatp jaduhñ siémpräm coo nni'xä ngopc hajxy møc nyaghíjtämät. Pero maas nä'ägädä tsoobaatp coo ja'a Diosmädia'agy hajxy tehngajnä nbanøcxämät. Hix, coo hajxy jaduhñ hoy ngudiúunämät, jaduhñä Dios hajxy tøø xyajwiinwaanøøyyäm coo hajxy hodium xyaghidáanäm hoy miänaajä, møød jäda'ahaty, møød miimnä mejtsnä. Jaduhñ hajxy xyagjugyhadáanäm cøjxta'axiøø neby je'e juyghatiän. ⁹Tehñ tiøyhajt hädaa mädia'agy jaduhñ. Tsøg hajxy hamuumdu'joot mabøjcäm. ¹⁰Coo ja'a Dios hajxy jaduhñ xyaghidáanäm hodium hoy miänaajä, paady hajxy møc nduun nxájjäm. Jujquiä Dios. Cooc ja'a miädia'agy hajxy nmabøjcäm coo ja'a Jesucristo ja'a jäya'ay nägøxiä tøø ñähho'tu'udy, paady hajxy xyajnahwa'ads xyajcuhwa'adsáanäm.

¹¹Jaduhñä mabøjpädøjc mwiingapx møjcapxø'owät nébiøch naamnä tøø nmädia'aguiän. ¹²Tehngajnä hoguiuhdujt myaghídät, jaduhñ pøn xquia'a péxät, hoy jomøjt may mga'a ja møødä; møød jaduhñä mabøjpädøjc xpiahíxät. Hoy yajxón mgapx mmädiä'agät. Caj mänaa mgapxtägøyyät. Hoy piønä mdsoc mba'häyówät. Hoy ja'a Diosmädia'agy mmabøgät. Mmøødhádäbä howyiinmahñdy.

¹³Mädúhñtiøch jim nga'a tsoj nõcxy maa miichän, tehngajnä Diosmädia'agy mgapx mmädiá'agät coo hajxy jim naxy mhamugø'øy maa ja'a Diostøjcän. Jaduhñä mabøjpädøjc myajwiinxiic myajwiingapxø'owät.

¹⁴Mänaa miichä majjäya'adiøjc jim xquiø'onähgapiän maa ja'a Diostøjcän, mänit miichä Dioshespíritu xñägapxy cooc miichä Diosmädia'agy myajwa'xa'añ. Mänit miich häna'c jaduhñ xñajtsapxøøyyä. Mänit miichä Dios mäjaa xmioooy coo ja'a miädia'agy jaduhñ myajwá'xät. Naxy mdehm jiahmiejtstá'agät coo ja'a mäjaa jaduhñ xmioooy. Caj mnajtshixø'owät.

¹⁵Jaduhñä mjoot mbädá'agät coo ja'a Diosmädia'agy jaduhñ hamuumduljoot myajwá'xät hoy miänaajä. Coo jaduhñ mgudiún mguñáxät, jaduhñä cu'ug xyhíxät coo jaduhñ hoy myajtu'uyo'oy.

¹⁶Niyajcopcø'owøø nej mwädity, nej myajnáhixø'øy. Tehngajnä jaduhñ mgudiún mguñáxät, jaduhñ mnähwa'ads mguhwá'adsät näguipxy møødä jäya'ayhajxy hamädoowhijpä.

5 Cabä majjäya'adiøjc mhøj myá'axät. Mee'xxieemy mwiiingapx mjøjcaxø'owät nebiä mhamdsoo teediän. Møødä muutsc-häna'c-hajxypä, jaduhñ mmägäpax mhané'emät nebiä mhamdsoo puhya'ayän. ²Jaaná jaduhñä tsø'ødaj mmägäpax mhanéhmbät nebiä mhamdsoo tajjän. Møødä to'oxiøjc-hajxy muutspä, jaduhñ mmägäpax mhanéhmbät nebiä mhamdsoo puhdo'oxiän. Caj mmägäpaxtägöyyät.

³Jii yaamgto'oxyhajxy näje'e, cab hajxy pøn nä'ägädä møødä. Tøyhajt hajxy nidiuhmhaty. Je'eds hajxy mbuhbédäp. ⁴Pero ja'a yaamgto'oxyhajxy jaac jimbä, pø jimä yhuunghajxy, pø jimä yhoc-huunghajxy, ween hajxy jaduhñ piuhbedyii nägøø nädecypiiä ja'a yhamdsoo huunghajxy, ja'a yhamdsoo hoc-huunghajxy. Jaduhñä mabøjpädøjc-hajxy quiumayøøjät ja'a Dios coo tiaj tieedy hajxy jaduhñ piuhbejtägätsät. Jaduhñ hajxy yajcähxø'ögät coo ja'a tiaj tieedy hajxy jiaanč wiingudsähgø'øy. ⁵Hix, ja'a yaamgto'oxyhajxy tehñ tiøyhajt nidiuhmhajpä, ja'a Dios hajxy yhajodhajpy. Xøømdsuhñ hajxy miänuu'xta'agy. ⁶Pero ja'a yaamgto'oxy ja'a Dios hajxy ca'a hajodhajpä, coo ja'a jioot hajxy chögät coo hajxy xyi'ig xioonda'aga'añ, jaduhñä Dios yhixy nebiä ho'ogypiän, hoy hajxy jia jujyñä, hoy hajxy jia tsuxnä. ⁷Jaduhñä mabøjpädøjc mwiingapx mjøjcaxø'owät coo ja'a homiädia'agy hajxy pedyii ween quiuidiun, jaduhñ hajxy quiumayøøjät ja'a cu'ug. ⁸Pønjatiä jiuju miägu'ug ca'a hijxp ca'a mähäyoob møødä yhuung møødä tio'oxy, tøø ja'a Diosmädia'agy hajxy ñajtshixøøñä neby hajxy hijty miäbøquiän ja'a Jesucristocøxpä. Maas haxøøg hajxy jiatcø'øy quejee häna'c-hajxy ca'a nä'ägä mabøjpä.

⁹Mgujáhyyäbä yaamgto'oxiä xiøø hajxy pønjaty hajxy mbuhbedaamby. Je'e xiøøhajxy pédäp pønjaty tägøøghii'x jomøjt tøø yhabéjtäxä, møød

pønjatiä ya'adiøjc tu'uquiä tøø miøødtsäna'ay, ¹⁰møød pønjatiä cu'ughajxy nänøømby coo ja'a mayhajt hajxy tøø tiuunäxä, møød pønjatiä nøøxä miajc hoy yajxón tøø yajtso'ogy tøø yajyeegy, møød pønjaty pu'umiooby coñdymooby ja'a jäya'ayhajxy jim miimb mejtspä maa ja'a tiøjcän, møød pønjatiä mäbøjpädøjc cø'øbuyp tecypiujp, møød pønjaty puhbejp ja'a jäya'ayhajxy häyohmbaatpä, møød pønjatiä jioot tøø piäda'agy coo ja'a hoybä weenbä hajxy quiudiün quiuñäxät hoy nã'ä tiijä. Ja'a yaamgto'oxy hädaa hoguiuhdujt jaduhmbä hajxy yajtuumbä, je'eds hajxy mbuhbédäp.

¹¹⁻¹²Pero ja'a yaamgto'oxy tsaanbä muutspähajxy, cabä xiøøhajxy quiujähyyäxät, cab hajxy mbuhbédät. Hoy hajxy tøø jia mäna'añ coogä Jesucristo hajxy hamuumdu'joot miäduna'añ maa ja'a tsajtøjcän, mänitä jioot hajxy näje'e piäda'agy coo hajxy piøjtägatsa'añ coo hajxy yhuuctägatsa'añ. Cabä Jesucristo hajxy jaduhñ hoy miädunaannä. Y tu'udägöyyäp hajxy jaduhñ.

¹³Jaanä jaduhñä yaamgto'oxy tsaanbä muutspä hajxy näje'e jiajpä, wi'i ñuuxho'p hajxy, tøjc-tøjc hajxy wiädity. Wi'i miädia'agy-yajnajxp hajxy. Nã'ä yaghadsow nã'ä yajpøgø'øy hajxy cøxiä tøø jiaty. Cøxiä hajxy nã'ä pamädia'agy mädyiijaty ca'a jagä hawiinmats.

¹⁴Jaduhñhøchä njoot jia tsocy coo ja'a yaamgto'oxyhajxy piøjtägätsät, ja'a hajxy tsaanbä muutspä, weenä nøøxä miajc hajxy jaduhñ jiaac yajtso'ogy, weenä jiøønä tiøjc hajxy

hoy yajxón cwieendähaty, jaduhñ hajxy quia'a hoj quia'a ya'axøøjät ja'a miädsiphajxy. ¹⁵Hix, tøø hajxy näje'e tiu'udägooñä. Tøø ja'a mõjcu'ugongä miädia'agy hajxy jiojprøgøyyänä.

¹⁶Mijts, puhdo'oxytiøjc, pø jim mijtsä yaamgto'oxy mmøødä maa ja'a mjujy maa ja'a mmägu'ughajxiän, ween hajxy jaduhñ mbuhbety, jaduhñä mäbøjpädøjc-hajxy quia'a taj quia'a máyät neby hajxy jaduhñ piuhbédät. Hix, jaduhñä mäbøjpädøjca yaamgto'oxy hajxy hoy piuhbédät, ja'a hajxy pøn ca'a jaançh møødpä.

¹⁷Ja'a majjäya'adiøjc-hajxy, ja'a hajxy jim hoy tuumbä wiindsøn maa ja'a Diostøjcän, ween hajxy hoy miäjuyii, møødä Diosmädia'agy hajxy yajnähiøøbiä. Ween hajxy nã'ä tægø'øbä miäjuyii. ¹⁸Hix, jaduhñä Diosmädia'agy miäna'añ: "Maa ja'a weeyä trigo hajxy hänäjty myajtehñdse'ediän, weenä weeyä jaduhñ piuhjøø'xy." Jaanä jaduhñ miänaambä: "Weenä cuduumbä cubøjpä miäjuyii."

¹⁹Coo ja'a Diostøgootypä wiindsøn nãxø'øwø'øwøøjät, mänitä mæxøhbä miädia'agy miäbøjcäxät pø jimä capxtøøbä miøødä mejtstägøøg. Pø cab jaduhñ miøødä, cabä miädia'agy jaduhñ miäbøjcäxät. ²⁰Ja'a Diostøgootypä wiindsøn hajxy hoy ca'a wädijpä, mhøjäp my'axäp jaduhñ maa ja'a mäbøjpädøjc-hajxy nägøxiä yhamugø'øyän, weenä miäwiindsøn hajxy jaduhñ chähgø'øy. ²¹Miich nwiingapx njøjcaxpøøby coo hädaa cuhdujt jaduhmbä tsipcøxp mgudiün

mguñáxät. Cabä mmähäna'c nä'ä nägoobä mnä'ä tsaächtiúnät, ni caj nä'ä nägoobä mbuhbédät. Tu'cuhdujtä häna'c mnä'ä híxät, hoy jaduhñ xjia mägu'ughaty, hoy jaduhñ xjia mädsiphaty. Xyhíxäbä Dios jaduhñ mөөдä Jesucristo, mөөдä Diosmoonsähajxy jim tsajpootypä, ja'a hajxy wiimbíyyäbä. ²²Coo pөñ hänäjty tiäg'өwa'añ tuumbä tsajtөjwiindsön, caj mdsoj cө'өнähgábät. Jayөjp mwiinmahñdyhädät hodiägaamby pө hoy hänäjty tiuna'añ, pө caj. Hix, coo jaduhñ nä'ä tu'udägöyyät, wehñdä miichä cu'ug xñänómät cooc tyijy miich tөө mbuhbety. Howyiinmahñdy myaghídäp hoy miänaajä.

²³Timoteo, naxy miich mjootpäd'өgyii. Hahixөөby coo vino weeñtiä mhú'ugät. Cabä nөөyyähajtiä mhúucnät.

²⁴Jii jäya'ayhajxy näje'le, coo hajxy mänaa quiädieey, paquiä jaduhñ wyiingähx'өgy, cahnä hajxy hänäjty miөjya'axyii hagujc. Pero jii wiinghäna'c-hajxy, cabä piojpä quiädieeyhajxy choj wiingähx'өgy, hөxtä coonä hajxy hänäjty tөө miөjya'axyii hagujc. ²⁵Jaanä jaduhñduhmä, jii jäya'ayhajxy näje'ebä, paquiä jaduhñ wyiingähx'өgy coo hojioot hajxy jiaanč tehñ miөөдä. Hoy jaduhñ quia'ja tsaj wyiingähx'өgy, tsipcөxp cujegy wyiingähx'өga'añ.

6 Mijts mähөjpädөjc, nämay hajxy mhity cudoog'өy. Naxiä mwiindsön hajxy mdehñ wyiingudsähg'өwät. Naxy hajxy jaduhñ mdehñ miädia'agymiäböğät. Hix, coo hajxy jaduhñ hoy mga'a

cudiún mga'a cuñáxät, wehñdä mwiindsön ja'a Dios haxөөг nänómät mөөдä Diosmädia'agy. ²Jaanä jaduhñduhmä, pөnjatiä wyiindsönä Diosmädia'agy mähөjp, cabä mwiindsön hajxy mbéxät. Pero hamuumdu'joot hajxy mwiingudsähg'өwät. Maas hoy hajxy jaduhñ mmädia'agymiäböğät je'eguiөxp coo ja'a Diosmädia'agy miähөjpä, mөөд coo hajxy mmөөдničhogyii. Naxiä mähөjpädөjc hädaa cuhdujt jaduhñmä mdehñ wyiingapx mdehñ jiojcapx'өwät.

³Jii häna'c-hajxy näje'le, wiing hajxy yajnähiх'өy. Cabä hoguiapxiä homiädia'agy hajxy wyiinju'өwa'añ neby hajxy nyajnähiх'өyyäm ja'a Wiindsön Jesucristocөxpä coo ja'a hoybä weenbä hajxy jaduhñ nbäatäm. ⁴Ja'a häna'c-hajxy jaduhñ wiing yajnähiх'өöbiä, jaanč tehñ ñiguiumáayyap hajxy jaduhñ cooc tyijy hajxy jiaanč tehñ jiaty, cooc tyijy hajxy jiaanč tehñ ñaju'өy. Pero cab hajxy tii nä'ägädä jaty, cab hajxy tii nä'ägädä naju'өy. Hanaxiä mädia'agy hajxy yajtsip yajma'ad'өy, ja'a ca'a tsoobaatpä. Coo hajxy jaduhñ jiatc'өy, paady hajxy cөxiä wiinä yajcapxi'өy, paady hajxy miänähöön'өy, paady hajxy haxөөгjaty ñiñäma'ayii. ⁵Coo hajxy jaduhñ jiaanč tehñ chiptsocy, paady hajxy jiaanč tehñ ñibiamädsib'өyii. Jaanč tehñ yhaxөөгä wyiinmahñdyhajxy. Tөө ja'a tөyhajt hajxy ñajtshixөөñä. Wi'i yajmäjuyaamb hajxy, paady hajxy ñibiäda'agyii cooc tyijy ja'a Diosmädia'agy hajxy

miäbøcy, cooc tyijy hajxy yajnáhixø'oy. Naxiä häna'c jaduhmbä mdehm̄ piuhwá'adsät. ⁶Coo ja'a Diosmädia'agy hajxy hoy nmäbøjcämät, jaduhñä hoyhajtä weenhajt hajxy mõj may nbáatämät, jaduhñ hajxy jootcujc nhíjtämät. ⁷Haa ca'a, coo hajxy yaa nmiin ngáhwäm hädaa yaabä naaxwiin, cab hajxy tii nmämiin nmägáhwäm. Nähwa'ads hajxy nmaaxhuunghájtäm. Jaaná jaduhñduhmbä, coo hajxy nho'c ndägóoyyäm, mänit hajxy cøjx nhøxhó'cäm tijaty hajxy yaa nmøødhájtäm hädaa yaabä naaxwiin. Cab hajxy tii hoy nmädsoonáañäm. Tehm̄ tiøyhajt jaduhñ. ⁸Hoorä, coo wit tucxy hajxy nmøødhájtäm, coo cay hu'ugy hajxy nmøødhájtäm, paady hajxy jootcujc tsøc híjtäm. ⁹Pero jii häna'c-hajxy näje'e, jaduhñ hajxy wyl'i miäna'añ coo hajxy miäyøøjø'owa'añ. Paadiä haxøøgwiinmahñdy hajxy pianøcxa'añ. Jaduhñ hajxy haxøøgtuum nøcxy quia'awa'añ. Je'e hajxy yhøxtaaby mädyii jaduhñ ca'a howyiinmahñdy. Je'e hajxy jaduhñ quiumädownänpä. ¹⁰Jiyyä haxøøgpä ca'a hoybä ñä'ägädä tshönda'agy coo jäya'ayhajxy wyl'i xiädø'øñhadsocy, møød coo hajxy wyl'i wyiinduc-haty. Paadiä Diosmädia'agy hajxy näje'e tøø ñajtshixø'oy. Paady hajxy jiaanch̄ teh̄m̄ jootmayhajnä.

¹¹Pero miich, coo miichä Dios xquiuguexyhaty, cabä haxøøgpä ca'a hoybä mädyii mgudiün̄ mguñáxät. Ja'a hoybä weenbä jaduhñ mgudiün̄pä. Ja'a Dios mwiingudsähgø'owäp. Mmäbøjcäbä

miädia'agy. Mmädsoc mba'häyöwäp. Mmee'xtügäp hoy mja tsaachpøcy. Mee'xxieemy mhäna'c-hádät.

¹²Hahixøøby coo ja'a Diosmädia'agy hamuumdu'ljoot mmäbøgät, jaduhñä Dios xyagjyghádät cøjxta'axiøø neby je'e juyghatiän. Mänit miichä Dios jaduhñ xyajnáhdijy coo jaduhñ mjyghádät cøjxta'axiøø mänaa miich̄ nnägapxiän cu'ugwiinduum coo ja'a Diosmädia'agy tøø mmäbøcy. ¹³⁻¹⁴Chaads miich̄ nwiingapx njøcaxpø'oy coo ja'a Dioscuhdujt tehngajnä mjaac cudiün̄ mjaac cuñáxät, møød coo mga'a yajtägätsät, jaduhñä Dioscuhdujt quia'a nänømøøjät haxøøg, høxtä coonä yhabáadät coo ja'a Wiindsøn̄ Jesucristo yaa quiädaactägatsa'añ hädaa yaabä naaxwiin. Ja'a Dios hajxy jaduhñ xyhíjxäm møødá Jesucristo. Ja'a Diósädsä juyghajt mooby hoy piøn̄ä hoy tyiijä. Haa ja'a Jesucristo, coo hänäjty jim̄ tøø yajmechii maa ja'a Poncio Pilato wyiinduumän, mänit ñägapxy coogä Dios tøyhajt yHuunghadyii. ¹⁵Ja'a Dios jaduhñ yaghabaadaamb mänaa ja'a Jesucristo yaa quiädaactägatsa'añ hädaa yaabä naaxwiin. Jaanch̄ teh̄m̄ jootcujcä Dios. Nidiuhm̄ tiuñ Wiindsøn̄. Nidiuhm̄ miähane'emy. Ni pøn̄ jaduhñ quia'a mäbaady. Nägøxiä gobiernähajxy yhane'emyii møødá reyhajxy. ¹⁶Hoy miänaajä Dios yhity. Jim̄ maa ja'a Dios yhitiän, jaanch̄ teh̄m̄ miøc jim̄ yhajajy. Paady hajxy jim̄ hoy nga'a wiingumedsøøyyäm. Tsøc hajxy hoy miänaajä Wiindsøn̄hájtäm.

¹⁷Pøn̄jaty mäyøø hädaa yaabä naaxwiin, jaduhñ miich̄

mwiingapx mjøjcapxó'owät coo hajxy quia'a niguiumayó'ojät, møød coo ja'a Dios hajxy yhajodhádät. Møj jaančhä Dios. Cøxiä wiinä hajxy xmióoyyäm, jadhun hajxy jootcuje nhíjtäm. Pero cabä mäyøøjäya'ayä xädø'øn hajxy yhadsógät. Hix cøjxp tägooby ja'a hajxy miämäyøøhajpiä.

¹⁸Jaduhnä mäyøødøjc mwiingapx mjøjcapxó'owät coo hojioot hajxy jiaančh tehñ miøødhádät. Weenä häyoobädøjc hajxy piuhbety. Cab hajxy wyiinduc-hádät. ¹⁹Coo hajxy jaduhñ yaa yhojiäya'ayhádät hädaa yaabä naaxwiin, mänitä hoyhajtä weenhajt hajxy møj may piáadät Dioswiinduum. Y jaduhñ hajxy

cøjxta'axiøø yagjugyhadó'ojät nebiä Dios jiu gyhatiän.

²⁰⁻²¹Timoteo, coo miichä Dios tøø xyajnähdijy coo ja'a miädia'agy myajwá'xät, paady hamuumdu'joot mgudiúnät, paady jaduhñ mnäwá'anät. Hix, tøø jäya'ayä Diosmädia'agy hajxy näje'e ñajtshixø'oy. Wiingmädia'agy hajxy tøø piadu'ubøcy cooc tyijy miaas yajxonä. Pero cabä mädia'agy jaduhmbä tiøyyä. Cab jaduhñ choobaady. Nä'ä nägoobä yhøhnda'agy ja'a Dioscøxpä. Cabä høhnda'agymiädia'agy jaduhmbä mmøjpadá'agät.

Ween miichä Dios ja'a tsooctä mayhajt xtiuunä. Amén.

2 Timoteo

1 Høøch hädaa nocy nhädiuumby, høøch Pablohajpä. Ja'a Jesucristøch jaduhñ xquiuguexyhajp. Ja'a Dios jaduhñ mänaamb cooçh jaduhñ xquiuguexyhädät. Coö ja'a Jesucristo hajxy xmiøødhájtäm tu'ugjoot tu'ugwiinmahñdy, paadiä Dios hajxy tøø xyajwiinwaanøøyyäm coö hajxy cøjxta'axiøø xyagjugyhadáanäm neby je'e jjugyhatiän. ²Miiçh Timoteo, míiçhhøch hädaa nocy nyajnäjaayøøby. Jadúhñhøch miiçh ndsocy nébiøch nhamdsoo huungän. Ween miiçhä Diosteedy mayhajt xtiuunä møødä Wiindsøn Jesucristo. Ween xñäxuuch. Weenä hoyhajtä weenhajt xmiø'oy.

³Hojioot howyiinmahñdymøødhøçhä Dios nwiingudsähgø'øy nébiøçhä nhap nébiøçhä ndeedyhajxy jecy wyiingudsähgøøyyän. Hoy ñaaghøoc-høçhä Dios nba'ya'axy, mänítøch miiçh njahmiejtsta'agy. Mänítøçhä Dios jaduhñ nnäma'ay "Dioscujú'uyäp" ja'a miiçhcøxpä. ⁴Nja wi'i yhiixtagatsáambiøch miiçh, jadúhñhøch nxoondaacpøgät. Xøømdsúhñhøch miiçh njahmiejtsta'agy. Njahmiéjchpøch

jaduhñ coö miiçh hänajty mjaançh tehñ jiootmayhaty mänaa hajxy jim nniwiá'xäm. ⁵Jadúhñhøch njahmiejtspä coö miiçhä Diosmädia'agy hamuumdu'joot mmäbøcy. Ja'a mdajhoc Loida møødä mdaj Eunice, jaaya'ayä Diosmädia'agy hajxy jayøjp mäbøjtsohn. Tøyhajt jaduhñ coö miiçh jaduhñ mbamäbøjpä.

⁶Mänájøch miiçh jim ngø'nähgapiän, mänit miiçhä Dios mayhajt xtiuunä. Jaduhñ miiçh mäjaa xmiøoy coö ja'a tiuung mdúunät. Chamñ nnäma'ay coö mga'a najtshixø'owät ja'a mayhajt ja'a Dios mänit xtiuunäbä, pero ween hamuumdu'joot mjaac yajtuñ. ⁷Hix, jaduhñä Dios hajxy xyajmädsøjcäm coö hajxy nga'a tsähgøøyyämät. Jaduhñ hajxy xyajmädsøjcämbä coö hajxy ndúunämät ja'a miäjaahaam, møød coö hajxy hamiñ haxøpy nniçhojco nnibia'häyøowämät, møød coö hojioot howyiinmahñdy hajxy nyajtuunämät. ⁸Jaduhñds je'e, cab mdsähdiúnät ja'a Diosøxpä coö ja'a miädia'agy hänajty myajwa'xä. Ni jaduhñ mga'a tsähdiúumbät ja'a høøhcøxpä, høyhøch yaa nja tsumyçhäna'ay. Páadyhøch

yaa ndsumyčhänä'ay coočhä Dios ja'a miädia'agy nyajwá'xábä. Cab mdsähg'ó'owät coo mdsaačhpógät ja'a Diosmädia'agyquiøxpä nébiøch ndsaačhpøquiän hoočh. Hix, xpiuhbédába Dios jaduñ ja'a miäjaahaam. ⁹Ja'a Dios hajxy tøø xyajnáhwaats tøø xyajcuhwáatsäm. Jaaya'ay hajxy tøø xpiädáacäm coo ja'a miädia'agy hajxy hoy ngudiúunämät. Paadiä Dios hajxy jaduñ xyajnáhwaats xyajcuhwáatsäm coo hajxy xchójcäm, møød coo mayhajt hajxy jecy xtiúunäm ja'a Jesucristocøxpä; ca'a jie'eguiøxpä cooc tyijy hajxy hoy nguhdujthájtäm. Cahnä hädaa yaabä naaxwiin hánajty yhawijy tiøø'xta'agy, tóyyämä Dios ja'a mayhajt hajxy hánajty jaduñ xtiúunäm. ¹⁰Coo ja'a Jesucristo hajxy yaa hoy tøø xyajnáhwaats tøø xyajcuhwáatsäm, jaduñhä Dios ja'a mayhajt yajwiingähxø'nä, ja'a hajxy jecy xtiúunämbä. Coo ja'a Jesucristo hajxy yaa hoy tøø xñähho'túütäm, jaduñ quiähxø'ogy coo hajxy çøjxta'axiøø xyagjugyhadaänäm neby je'e jjugyhatiän. Jaduñ jiiby myiñ cujaay maa ja'a Diosmädia'aguiän.

¹¹Páadyhøčhä Jesucristo jaduñ xquiugexyhaty coočhä Diosmädia'agy jaduñ nyajwá'xät coo jaaya'ay hajxy jaduñ tøø xyajnáhwaats tøø xyajcuhwáatsäm.

¹²Coočh jaduñ nyajwa'xy, páadyhøch jaduñ ndsaačhpøcy. Pero cáboch ndsähdiuñ. Hix, coočhä Dios ja'a miädia'agy jaduñ nmäbøjcä coočh jaduñ xyajnáhwa'adsa'añ, páadyhøčhä tøyhajt nmøødä coo jaduñ hoy

cwieendähada'añ pønjátyhøch tøø xyajcø'ødägø'oy. Paady jaduñ cwieendähada'añ coo ja'a Jesucristo yaa quiädaactägatsa'añ hädaa yaabä naaxwiin.

¹³Jaac panøcx ja'a hoguiuhdujt, ja'ačh miičh tøø nyajnáhixø'oyäbä. Coo ja'a Jesucristo hajxy nmøødhájtäm tu'ugjoot tu'ugwiinmahñdy, paadiä miädia'agy hamuumdu'joot mmäbøjcät, paadiä jäya'ay hamuumdu'joot mdsoc mba'häyówät, ja'a miičh myajnáhixøøbiä.

¹⁴Hamuumdu'jootä tøyhajt myajwá'xät, ja'a Dios tøø xyajcø'ødägø'oyäbä. Caj myajtägätsät. Coo ja'a Dioshespíritu hajxy nmøødhájtäm, paady miičh jaduñ xpiuhbeda'añ.

¹⁵Tøø miičhäda'a mmädoyhaty coočhä mäbøjpädøjc nämay tøø xpiuhwaatsnä, ja'a hajxy jim tsohmä Asia-naaxooty, näguipxy møødä Figelo møødä Hermógenes.

¹⁶⁻¹⁸Pero cábočhä Onesíforo mäbøcy tøø xmiädsähdiuñ, hóyhøch yaa nja tsumyčhänä'ay. Weenä Dios ja'a Onesíforo ja'a yhuungä tio'oxy ñäxuu'tsä. Coo miejch Roma, mänitøch nägø'ø nädecypiä xyhøxtaayy. Y coočh yaa xpiaaty, mänitøch mayhooc xpiuhbejty. Y hamuumdu'joot hajxy jim xpiuhbéjtäm Efeso, túhmäts. Coo yhabáadät coo ja'a Dios hajxy hánajty xyajtøyhajtyegáanäm, weenä Dios ja'a Onesíforo mänit ñäxuučh.

2 Huung Timoteo, weenä Jesucristo xpiuhbety, jaduñ mga'a tsähg'ó'owät

mānaa. Coo ja'a Jesucristo hajxy jaduhñ nmøødhjítäm tu'ugjoot tu'ugwiinmahñdy, paadiä mayhajt hajxy jaduhñ xtiúunäm. ²Mänáajoch miičhä Diosmädia'agy nyajwiingapxø'øyän, nämayyä jäya'ayhajxy hānajty miāmādoona'ay. Jaduhñ miičh wiinghana'c mnajtsapxøødiägájsät, ja'a hajxy hoy cudiuumbä, ween wiinghāna'c hajxy jiaac tehñ ñajtsapxøødiägájsägumbä.

³Ja'a Jesucristocøxpä mme'e'xtúgät coo hānajty mdsaačhpøcy, nebiä soldadohajxy miee'xtuquiän. ⁴Hix, ja'a soldadohajxiä, jaduhñä jioot hajxy piäda'agy coo hajxy ween quiumayii ja'a wyiindsønhajxy. Cab jaduhñ yhahixø'øy coo wiingtuung hajxy yhøxtá'awät. ⁵Jaanä jaduhñduhmbä, ja'a häyø'pädøjc-hajxiä, coo hajxy jaduhñ hoy yhäyø'ögät nebiä cuhdujt myiñän, mänit hajxy hawiinmats quiuhäyø'ögät. Pero coo hajxy quia'a häyø'ögät, cab hajxy tii piäadät. ⁶Jaanä jaduhñduhmbä, ja'a yuubä pujxpähajxy hoy cuduumbä, je'edshajxy jaduhñ jawyiin mäjúuyyäp. ⁷Jajcopcø'øw hoy nébiøch cham nmāna'añ, weenä Dios jaduhñ xquiøxy yajwiinjuø'øy.

⁸Ja'a Jesucristo, ja'a David jecy yhaphajt yhoc-hajt. Coo ja'a Jesucristo hānajty tøø yho'ogy, mänit jiuypiojtägajch. Ja'a Jesucristocøxpøch nnä'ägädä yajwiingapxø'øyhaty. ⁹Coočhä Jesucristocøxpä jaduhñ nyajñähixø'øy, páadyhøch yaa ndsaačhpøcy. Páadyhøch

yaa ndsumyčhāna'ay nebiä cahwiindøybän. Pero cabä Diosmädia'agy jaduhñ mānaa yhadugyii. Wiinduhmyhagajpt jaduhñ wia'xy. ¹⁰Coo jaduhñ hoy miaajä wia'xy, páadyhøch yaa hoy ñejpiä nme'e'xtucy, weenä jäya'ayhajxy jaduhñ ñāhwaats quiuhwaatspä, ja'a Dios jaduhñ tøø yajñähdjjiäbä coo ja'a Jesucristo hajxy miøødhidät tu'ugjoot tu'ugwiinmahñdy, møød ween hajxy yagjugyhadyii cøjxta'axiøø nebiä Dios jiu gyhatiän.

¹¹Hix, coo hajxy nniñähdjücämät coo hajxy nhó'cämät nebiä Jesucristo yho'quiän, mänit hajxy jaduhñ njugyhájtämät cøjxta'axiøø nebiä Jesucristo jiu gyhatiän. Møød jaduhñ hajxy jim nhidāanäm maa je'le yhitiän. Tehñ tiøyhajt jaduhñ. ¹²Jaanä jaduhñduhmbä, coo hajxy nme'e'xtjücämät, mänitä Jesucristo hajxy jim xmiøødhanéhmmämät. Pero coo hajxy nniijogápxämät cooc tyijy hajxy nga'a hixyhájtäm, cab hajxy jim xyajtägøøyyämät maa je'le yhitiän. ¹³Hoy hajxy nja høhñdáacäm, cabä Jesucristo mānaa yhøhñda'agy. Hoy miānaajä tiømiädia'agyhaty.

¹⁴Myagjahmiejststá'agäbä mabøjpädøjc jaduhñ nébiøch naamñä tøø ngujaayän. Hoorä, jaduhñ myajwiingapxø'øwät coo ja'a capxiä mädia'agy hajxy quia'a yajtsibø'øwät, ja'a ca'a tsoobaatpä. Jaduhñä Dios hajxy xyhanéhmmäm. Cab jaduhñ tiuungpaady coo hajxy jaduhñ yajtsibø'øy. Ja'a jäya'ayhajxy jaduhñ hamädoowhijpä, cabä hoguiapxiä homiädia'agy hajxy jaduhñ hoy

yhabøga'añ. ¹⁵Hamuumdu'jootä tøyhajt myajnähixó'owät ja'a Jesucristocøxpä, jaduñä Dios xquiumáyät, jaduñ mga'a tsähdiúnät. ¹⁶Cabä capxiä mädia'agy myajcapxió'owät, ja'a ca'a tsoobaatpä. Ja'a jäya'ayhajxy jaduñ tehngajnä yajcapxiøøbiä, tehngajnä hajxy jaduñ nøcxy tiu'udägoyya'añ. ¹⁷Y maas nämayyä jäya'ayhajxy jaduñ tiu'udägoyya'añ coo ja'a capxiä mädia'agy hajxy jaduñ miädówät, ja'a jaduñ ca'a tsoobaatpä. Tøø ja'a Himeneo jaduñ tiu'udägoonä møødä Fileto. ¹⁸Tøø ja'a tøyhajt hajxy ñajtshixøøñä. Jaduñ hajxy yhöñda'agy cooc tyijy hajxy nga'a jujypiøjtägatsaanäm. Ja'a mæbøjpädøjc-hajxy näje'e, coo hajxy jaduñ wyiinhøøñii, cabä Diosmädia'agy hajxy jaduñ hoy miäbøgaannä. ¹⁹Pero tøø ja'a Dios hajxy xpiädäacäm coo ja'a miädia'agy hajxy tehngajnä nbanøcxämät. Jaduñä Dios tøø miäna'añ cooc ñajuø'øy pønä miädia'agy hamuumdu'joot mæbøjcäp. Jaduñ tøø miänaambä coo ja'a haxøøgcuhdujt hajxy ween ñajtshixø'øy pønjaty niñänøømæp coogä Diosmädia'agy hajxy miäböcy.

²⁰Maa ja'a mäyøøjäya'ay tiøjcän, madiu'u texy jiiiby. Jiibiä orotexy, møødä platatexy, møødä quepychehtiexy, møødä pochtiexy. Tsoobaatpä orotexy møødä platatexy. Cabä quepychehtiexy jiaty tsoobaady møødä pochtiexy. ²¹Jaana jaduñduhmä, pønjatia haxøøgwiinmahñdy najtshixøøby, hoy ja'a Diosmädia'agy hajxy

jaduñ pianøcxät. Hoy hajxy jaduñ quiudiúnät waambaty hajxy yhane'emyii ja'a Wiindsón Jesucristo. Jaduñ hajxy quiumayøøjat.

²²Pero miich, mnajtshixó'owäbä haxøøgwiinmahñdy nebiä muutsc-häna'c-hajxy naxy yhadsoquiän. Ja'a mæbøjpädøjcä Dios hajxy hamuumdu'joot pa'yaaxpä, howyiinmahñdy hajxy miøød. Miäbøjpiä Diosmädia'agy hajxy. Hamiñ haxøpy hajxy ñiichocy ñibia'häyoyii. Cab hajxy chiptsocy. Jaduñ miich hamuumdu'joot mbahíxät. ²³Caj myajtägó'owät maa häna'cä capxiä mädia'agy hajxy nä'a nägoobä yajcapxiø'øyän, ja'a ca'a tsoobaatpä, ja'a ca'a tungpaatpä. Ja'a capxiä mädia'agy jaduñmä, ja'a tsipä pleetä yhöjx tiecy je'eduhñ, túhmäts. ²⁴Pønjaty yaa moonsähájtäp ja'a Dios hädaa yaabä naaxwiin, cab hajxy tii yajtsiptá'agät. Hojioot hajxy miøødhádäp hoy ñä'a pøngøxpä. Hoy yajxón hajxy yajnähixó'owät. Mee'xtúgäp hajxy jaduñ. Cab hajxy jiootmä'adät. ²⁵Mee'xxieemiä miädsip hajxy yhoj miägápxät. Wehñdä Dios jaduñ miän'anät coo ja'a miädsipä yhaxøøgcuhdujt hajxy ñajtshixó'owät, weenä tøyhajt hajxy jaduñ wyiinjuø'øy. ²⁶Ween hajxy jaduñ wyiinmahñmech, hoy hajxy hänajty tøø jia wiinhøøñii ja'a møjcu'ugong. Paadia møjcu'ugong jaduñ jia wi'i miäwiinhøøna'añ; ja wi'i miähane'emaamb jaduñ.

3 Pero huuc wiinjuø'ow miich hädaa. Coo hänajty yhabaada'añ coo ja'a Jesucristo yaa quiädaactägatsa'añ hädaa

yaabä naaxwiin, mänitä tsø'ty häyohn jiada'añii yhabeta'añii. ²Haxøøgjatiä jäya'ayhajxy hänäjty jiatcø'owa'añ. Jootmøj hajxy hänäjty ñibiäda'aga'añii. Jiaančh tehṃ yhadsogaambä xädø'ñ hajxy. Niguiumayaanäp hajxy hänäjty. Yajcumayaamb hajxy hänäjty. Capxtägoyyaamb hajxy hänäjty. Cabä tjaŋ tieedy hajxy hänäjty wyiingudsähgø'owa'añ. Cab hajxy hänäjty tii yhojiäwø'owa'añ. Cabä Diosmädia'agy hajxy hänäjty miäbøga'añ. ³Cabä yhuungä tio'oxy hajxy hänäjty choga'añ. Cab hajxy hänäjty pøn miee'xa'añ. Mänähøønø'owaamb hajxy hänäjty. Cabä howyiinmahñdy hajxy hänäjty miøødhada'añ. Mähäyoowhixaamb hajxy hänäjty. Cabä hoybä weenbä hajxy hänäjty choga'añ. ⁴Tioogaambiä miägu'ughajpä hajxy hänäjty. Cab hajxy hänäjty hodiägaamby wyiinmahñdyhada'añ tii hajxy hänäjty tiunaamby. Yhøxta'awaamby hajxy hänäjty neby hajxy xioondä'agät. Cabä Dios hajxy hänäjty wyiingudsähgø'owa'añ. ⁵Jaduhṃ hajxy hänäjty ñibiäda'aga'añii nebiä häna'cä Diosmädia'agy mäbøjpän, pero cab hajxy hänäjty tøyhajt miäbøga'añ.

Pønŋaty jaduhṃ haxøøg jatcøøby, naŋy jaduhṃ mdehṃ piuhwá'adsät. ⁶Jii cahwiindøyhäna'c-hajxy näje'e, jaančh tehṃ yhøhndaacp hajxy. Naŋiä to'oxiøjc hajxy wyiinhøøñ, ja'a hajxy tii ca'a jajp ca'a najuøøbiä. Ja'a to'oxiøjc-hajxy jaduhmbä, cabä howyiinmahñdy hajxy ñä'ägädä møødä. Hamdsoojoot hajxy jaduhṃ jajwiinhøøna'añ. ⁷Hoy ñä'a mädyii

mädia'aguiä hajxy jaduhṃ jia wi'i yhabøga'añ, pero cabä tøyhajt hajxy ñä'ägädä wiinjuø'owa'añ. ⁸Ja'a häna'c-hajxy jaduhṃ høhndaacpä, haxøøgä wyiinmahñdy hajxy. Cabä Diosmädia'agy hajxy miäbøga'añ. Jaduhṃä tøyhajt hajxy miädsibø'øy nebiä Janes ja'a Moisés hajxy jecy miädsibøøyyän møødä Jambres. ⁹Cabä Janeshajxy jecy miäjädaacy. Paady hajxy jaduhṃ quia'a mäjädaacy coo howyiinmahñdy hajxy hänäjty quia'a møødä. Ni häna'c-hajxy jaduhṃ quia'a mäjäda'agaambä, ja'a hajxy jäda'ahaty høhndaacpä.

¹⁰Hoorä, tøøčh miičh xyhiŋy coočh tøyhajt nyajñähixø'øy, coočh hoy njäya'ayhaty. Howyiinmähñdyhøch nmøød. Nmäbøjpiøchä Diosmädia'agy hamuumdu'joot. Mee'xxiéemyhøčhä jäya'ay nmägapxy. Hoy piønøch ndsocy nmee'xy. Cábøčhä Diosmädia'agy mänaa nnänuuxø'øy.

¹¹Jaanaä jaduhṃhøch miičh tøø xyhiŋxpä coočh hoy miänaajä nmee'xtucy, hoy ñéjpiøch hänäjty nja tsaächpøcy, nébiøch jim tøø nŋaty tøø nhabetiän Antioquía, møød jim Iconio, møød jim Listra. Madiú'ujøch jim ndsaächpøjcy. Pero cábøčhä Dios mänaa xñajtshixø'øy. Hoy miänääjøch jaduhṃ xcwieendähaty.

¹²Haaga jaduhṃä jäya'ayhajxy chaächpøgaambä pønŋatiä jioot pädaacp maa ja'a Jesucriston coo hajxy jaduhṃ hoy jiäya'ayhädät.

¹³Pero ja'a cahwiindøybähajxy møødä høhndaacpähajxy, maas haxøøg hajxy tehngajnä jiatcø'owa'añ. Mäwiinhøønaamb hajxy møød hajxy jajwiinhøønaambä.

¹⁴ Pero miičh, naxiä Diosmädia'agy tehngajnä mjaac tehṃ pianócxät, ja'a miičh hamuumdu'joot tøø mmäbóquiäbä. Haa ca'a, høøch miičh jaduṃ tøø nyajnähixø'oy, møødä mdaj møødä mdajhoc. Paady miičh hoy tøø mhabøcy. ¹⁵ Chuucnä miičhä Diosmädia'agy mdägøøyy capxtaapä. Jiibiä tøyhajt hajxy nbáatäm neby hajxy hoy nnähwaats nguhwáatsämät. Coö hajxy jaduṃ nmäbójcäm ja'a Jesucristocøxpä, jaduṃ hajxy nnähwaats nguhwáatsäm. ¹⁶ Ja'a Diosmädia'aguiä, cøxiä Dios jaduṃ yagjahyyä. Jaančh tehṃ tiuungpaatpä Diosmädia'agy jaduṃ. Hahixøøby jaduṃ coö ja'a jäya'ay hajxy nyajnähixøøyyämät. Jaduṃ hajxy nhoj nmägápxämät. Jaduṃ hajxy nyajwiinxiic nyajwiingapxøøyyämät coö ja'a tøyhajt hajxy pianócxät, møød coö hajxy hoy jäya'ayhädät. ¹⁷ Pønjatia Dios tøø yajnähdijy coö ja'a miädia'agy yajwá'xäxät, ween hajxy ca'xy pedyii yhabøcy, jaduṃ hajxy hoy yajtuungpáadät hoy ñä'ä maajä.

4 Coö ja'a Jesucristo yaa quiädaactägatsa'añ hädaa yaabä naaxwiin, mänit tiägø'øwa'añ mähanehmbä. Mänitä jäya'ayhajxy nägøxiä yajtøyhajtyega'añii, møød hajxy hänäjty jujcypiä, møød hajxy hänäjty tøø yhö'oguiäbä. Ja'a Dioscøxpä møødä Jesucristocøxpä, jadúhñhøch miičh nmägapxy nhane'emy ² coö ja'a Diosmädia'agy hoy ñä'ä mänaajä myajwá'xät, møød coö ja'a cu'ug myajmäbógät, møød coö mhoj mmägápxät, møød coö myajwiingapxø'owät

coö hajxy jaduṃ miäbógät. Mee'xxieemiä Diosmädia'agy myajnähixø'owät tehngajnä. ³⁻⁴ Hix, habáatnáp jaduṃ coö ja'a cu'ugä Diosmädia'agy hajxy quia'a tsogaannä. Cabä tøyhajt hajxy jaduṃ miädowaannä. Hoy ñä'ä mädyii mädia'aguiä hajxy hänäjty wyi'i miädowa'añ, nágoo hänäjty quia'a tøyä. Mayyä yajnähixøøbiädøjc hajxy jaduṃ yhøxta'awa'añ, ween hajxy hänäjty jaduṃ yajnähixø'oyii nebiatia jioothajxy hänäjty chocy. ⁵ Pero miičh, tehngajnä howyiinmahñdy mmøødhädät. Mmee'xtügäp jaduṃ coö hänäjty mdsaačhpøcy. Myajwá'xäbä Diosmädia'agy. Hamuumdu'joot mgudiúnät waambatiä Dios tøø xyhane'emy. ⁶ Høøch, ja weenjaty quia'a habaady coöch häna'c xyagho'oga'añ ja'a Jesucristocøxpä. Nähjøjp tu'ujójphøch hädaajän. ⁷ Tøøchä haxøøgpä njøjtána'ay. Tøøch nmäjäda'agy. Tøøch hamuumdu'joot ngudiun waambátyhøchä Dios tøø xyhane'emy. ⁸ Chámhøch njøbhixy coöchä Wiindsón Jesucristo jim xpiäda'aga'añ hawa'adstuum. Mänitøch jim xpiäda'aga'añ coö ja'a jäya'ayhajxy hänäjty nägøxiä yajtøyhajtyega'añii. Hoguiuhdujthaamä Jesucristo hajxy jaduṃ xyajtøyhajtyegáanäm. Cábøch nidiuhṃ jim xpiäda'aga'añ hawa'adstuum. Pønjaty jaduṃ jøbhixp hamuumdu'joot coö ja'a Jesucristo yaa quiädaactägatsa'añ hädaa yaabä naaxwiin, nägøxiä hajxy jim piäda'agáanäbä hawa'adstuum.

⁹Huuc min̄ yaa maačh høøčhän. Mhadó'òdsäp jaduñ. ¹⁰Hix, tøøčhä häna'c xpiuhwa'ačh nämay. Haa ja'a Demas, tøø je'e ñøcxy Tesalónica. Paady yaa tøø choon̄ coo chäna'awa'añ yhäyowa'añ. Haa ja'a Crescente, tøø je'e ñøcxy Galacia. Haa ja'a Tito, tøø je'e ñøcxy Dalmacia. ¹¹Jagóoyyøčhä Lucas yaa xjiaac møødhity. Tunä mayhajt, nøcxä Marcos wowø'øg. Yaa mwoomínät. Hóyhøch yaa xpiuhbédät. ¹²Haa ja'a Tíquico, jímhøch tøø nguexy Efeso. ¹³Coo miich̄ yaa mmínät, mhuc túnäbä mayhajt. Høøčhä nnähgämēm̄ tu'uwijsäc. Jímhøch tøø nnähgue'egy Troas maa ja'a Carpo tiøjcän. Møødhøchä nnocy xpiøcmíñät møødä animalhac-hädiúñäbä. ¹⁴Haa ja'a Alejandro, ja'a pujxthädiuumbä, tøøčh cøxypänejp̄y xñähøønø'ø̄y. Ja'a Dios jaduñ yaghawiimbídäp. ¹⁵Cahwiindø̄y ja'a Alejandro jaduñ. Mniyajcopcø'øwøøjäp. Mø̄j may ja'a Alejandro xmiädsiphájtäm̄ coo ja'a Diosmädia'agy hajxy naxy nyajwá'xäm. ¹⁶Mänáajøch̄ jayøbajt nyajnäxø'øwø'ø̄yän, cábøch̄ pøn̄ mänit̄ xñähgapxtuuty. Nägøxiøčhä häna'c xpiuhwaach. Pero cab

jaduñ̄ ñējpiä. Weenä Dios jaduñ̄ miee'xy. ¹⁷Mäjahñdiúumhøch̄ hänäjty. Mänitøčhä Dios xñäwaañ. Mänitøčhä mäjaa xmiooyy, jadúññhøčhǟ jäya'ayä Diosmädia'agy hoy nyajwiingapxøøyy, ja'a hajxy ca'a judíospä, ween hajxy jaduñ̄ nägøxiä miäbøcy. ¹⁸Xcwieendähadäambøčhä Dios maa ja'a haxøøg ca'a hoybän. Xyajñhwa'ads xyajcuhwa'adsáambøch̄ jaduñ̄. Jadúññhøch̄ jim̄ xyajnøcxa'añ tsajpootyp maa je'e yhane'emiän. Tsøgä Dios hajxy hoy miänaajä wiingudsähgøøyyäm. Amén. ¹⁹Huuc yajpoo'x ja'a Prisca ja'a høøchcøxpä, møødä Aquila, møødä Onesíforo yhuungä tio'oxy. ²⁰Haa ja'a Erasto, jim̄ je'e miähmøoyy Corinto. Haa ja'a Tróximo, jímhøch̄ nnähgueecy Mileto. Pøjcäp hänäjty je'e. ²¹Habáatnäp jaduñ̄ coo tøøchc̄ yhida'añ. Naxy mdehm̄ myínät. Mhadó'òdsäp jaduñ̄. Nägøxiä miichä mabøjpadøjc̄ yaa xyajpoo'xy møødä Eubulo, møødä Pudente, møødä Lino, møødä Claudia. ²²Ween miichä Wiindsón̄ Jesucristo xmiøødhity. Weenä hoyhajtä weenhajtä xmio'oy. Amén.

Tito

1 Pablohájpøch høøch. Ja'a Dióshøch xmioonsähajp. Ja'a Jesucristøch xquiuguexyhajp. Jadúhnhøch tøø xwyiinguexy coöchä jäya'ayä Diosmädia'agy nyajwiinhixó'owät, pønjatiä Dios tøø wyiimbiy, ween hajxy jaduhñ miäböcy, weenä tøyhajt hajxy jaduhñ miøødhaty, jaduhñä Dios hajxy hoy wyiingudsähgó'owät. ²Jéquiänä Dios hajxy xyajwiinwaanóøyyäm coo hajxy xyagjugyhadäänäm cøjxta'axiøø neby je'e jiu gyhatiän. Cabä Dios mänaa yhøhnda'agy, jaduhñä tøyhajt hajxy nmøødhájtäm coo hajxy jaduhñ xyagjugyhadäänäm. ³Coo yhabaaty, mänitä Dios hajxy jaduhñ xyhawáanäm coo hajxy jaduhñ xyagjugyhadäänäm. Tøøchä Dios jaduhñ xyhane'emy coöchä miädia'agy jaduhñ nyajwá'xät. Xtiehm wyiinguéjxhøch jaduhñ. Ja'a Dios hajxy xyajnáhwaats xyajcuhwáatsäm. ⁴Tito, míichhøch hädaa nocy nyajnájaayøøby. Tehm tiøyhájthøch miich njwø'øy nébiøch nhamdsoo huungän. Tu'cuhdujt højtsä Diosmädia'agy nmäböjçäm. Ja'a Diosteedy møødä Wiindsøn Jesucristo, ween miichä mayhajt hajxy xtiuunä, ween miichä

hoyhajtä weenhajt hajxy xmio'oy. Ja'a Jesucristo hajxy xyajnáhwaats xyajcuhwáatsäm.

⁵Mänáajøch jim nwiimbitiän Creta, páadyhøch miich jim nyajmähmøøyy coo mjaac yaghoyó'owät tijaty højts hänajty nga'a yajpéjtäpnä. Jadúhnhøch miich nhane'emy coo wiindsøn mbädá'agät maa tsajtøjçän wiinduhmyhagajpt. ⁶Je'e mbädá'agäp pøn hoy jäya'ayhajp, pøn to'oxiøjç tu'ug yaghijp, pøn yhuung mäböjpä Diosmädia'agy, pøn yhuung hoy wädiyp, pøn yhuung mädia'agymiäböjp. ⁷Ja'a jäya'ayhajxy jaduhñ tunaambä wiindsøn, ja'a Dios hajxy moonsähadäänäp. Howyiinmahñdy hajxy yaghídäp. Cab hajxy jiootmøjhädät. Cab hajxy yhawa'andá'agät. Cab hajxy yhu'ug cab hajxy jiøø'xät. Cab hajxy chiptsögät. Cabä jäya'axiädø'øn hajxy yhadsögät. ⁸Yajtøjtägó'owäp hajxy pønjaty mejtsp maa tiøjç-hajxiän; piu'umió'owäp quioñdymó'owäp hajxy jaduhñ. Chógäp ja'a hoybä hajxy. Cab hajxy choj jootmä'adät. Hoy hajxy jiäya'ayhädät. Hoy ja'a Diosmädia'agy hajxy quiudiünät.

Cabä haxøøgwiinmahñdy hajxy yajtúnät. ⁹Cabä tømíädia'agy hajxy ñajtshixó'owät, ja'a hajxy tøø yajñähixó'oyíjábä, jaduñä mábøjpädøjcä hoguiuhdujt hajxy yajwiingapxó'owät. Jaduhñ hajxy yajcähxó'ogät coo häna'c-hajxy yhøhñda'agy, ja'a wiingmädia'agy hajxy yajñähixøobiä.

¹⁰Nämayyä høhñdaacpähajxy wiädity. Cabä Diosmädia'agy hajxy quiudiuna'añ. Nä'ä nägoodä hajxy jaduññ ñä'ä capxy ñä'ä mädia'agy. Jaduhñä häna'c-hajxy nämay jiatcøobiä, ja'a hajxy jaduññ mänaambä coo ja'a mábøjpädøjc-hajxy tsipcøxp yajcircuncidarhädät. ¹¹Tsipcøxp myaghamónät pønjaty jaduññ wiing yajñähixøoby. Cabä cuhdujt hajxy miøødä coo hajxy jaduññ wiing yajñähixó'owät. Yajmäjuyaamb hajxy, paady hajxy jaduññ wiing yajñähixó'oy. Hočähdiuunñä hajxy jaduññ jiatcø'oy. Haa ja'a mábøjpädøjcä wiingmädia'agy hajxy jaduññ yajñähixøoyyabä, naxy hajxy jaduññ yajtu'udägoyyii, ja'a hajxy tu'jøøn tu'tøjcpä.

¹²Jaduññä Cretabäjäya'ay tu'ug tøø yhuuc mänaambä coogä miägunaaxhajxy jiaančh tehñ yhøhñda'agy, møød coog hajxy hanaxiä quiahwiindøyyä, møød coog hajxy jiaančh tehñ quiaxä, møød coog hajxy jiaančh tehñ ñuuxho'ogy. Jaaya'ay jaduññ tøø miäná'añbä, profeta hijty tiuumby. ¹³Tehñ tiøyhajt jaduññ coo ja'a Cretabä-jäya'ayhajxy jaduññ haxøøg jiaja'ayhaty. Paady miich møc-haamby mhøj mmägápxät, weenä Diosmädia'agy

hajxy jaduññ hoy miäböcy. ¹⁴Cabä høhñda'agymiädia'agy hajxy miøjpädä'agät, ja'a judíoshajxy naxy yajñähixøobiä. Møød weenä mädia'agy hajxy quia'a cudiuññ nebiä häna'c-hajxy jia hane'emiän, ja'a tøyhajt hajxy ca'a tsojpä.

¹⁵Ja'a häna'cä howyiinmahñdy hajxy møødpä, cumáayyabä Dios hajxy jaduññ, hoy hajxy quia'a ja cudiuññ nebiä häna'c høhñdaacpähajxy jia hane'emiän. Pero ja'a häna'cä Diosmädia'agy hajxy ca'a mábøjpä, caba Dios hajxy quiumayii je'eguiøxpä coo haxøøgwiinmahñdy hajxy jiaančh tehñ miøødä. Cab hajxy tii hoy ñänømy. ¹⁶Jaduññ hajxy jia mäna'añ cooc tyjy ja'a Dios hajxy yhixyhaty, pero coo hajxy haxøøgjaty wyl'i jiatcø'oy, jaduññ hajxy yajcähxó'ogy coo hajxy tøyhajt quia'a hixiä. Cabä Diosmädia'agy hajxy quiudiuna'añ. Cabä hodiung hajxy ñä'ägädä jada'añ. Paady hajxy xiøøghadyii ja'a Dios.

2 Pero miich, ja'a hoguiuhdujt myajñähixó'owäp, jaduññä mábøjpädøjcä Diosmädia'agy hajxy hoy quiudiúnät. ²Jaduññä majjäya'adiøjc myajwiinxiic myajwiingapxó'owät coo hajxy quia'a hu'ug quia'a jøø'xät. Cab hajxy nä'ä nägoodä ñä'ä xi'ig ñä'ä hanähátät. Hoy hajxy jiaja'ayhädät. Hamuumdu'jootä Diosmädia'agy hajxy miäbögat. Hoy ja'a miäjøøn miädøjc hajxy choc pia'häyówät. Míee'xtúgäp hajxy coo hajxy hñajty chaächpøcy. ³Jaduññä tajhoctøjc myajwiinxiic myajwiingapxøobiät

coo howyiinmahñdy hajxy miøødhádät, jaduñ hajxy hoy quiuhdujthádät. Cab hajxy pøn ñähøønó'owät. Cab hajxy yhu'ug cab hajxy jíøø'xät. Ja'a hoybä weenbä hajxy yajñähixó'owäp. ⁴Jaduñnä tajhoctøjcä miädsaan miädo'oxy muutspä hajxy yajwiinxii yajwiingapxó'owät coo ja'a yhuung coo ja'a ña'ay hajxy chógät, ⁵møød coo hajxy hoy jiäya'ayhádät. Ja'a howyiinmahñdy hajxy miøødhádäp. Hoy yajxonä jiøøn tiøjc hajxy cwieendähádät. Miøødhádäbä hojioot hajxy. Wyiingudsähgó'owäbä ñihyhap hajxy. Coo hajxy jaduñ hajxy quiuhdujthádät, jaduñnä cu'ugä Diosmädia'agy hajxy wyiingudsähgó'owät.

⁶Jaanä jaduñduhmbä, jaduñnä muutsc-häna'ctøjc myajwiinxii myajwiingapxó'owät coo howyiinmahñdy hajxy miøødhádät. ⁷Jaanä jaduñ miichpä, tehngajnä hoy mwädítät, weenä mäbøjpädøjc jaduñ xpiahixy. Howyiinmahñdymøød myajñähixó'owät. Caj nä'ä nägoodä mnä'ä xi'ig mnä'ä hanähátät. ⁸Ja'a hoguiapxy ja'a homiädia'agy jaduñ myajñähixó'owäp, jaduñ pøn xquia'a jøjcapxó'owät. Jaduñnä nmädsiphájtämhajxy chähdiúnät, cab hajxy jaduñ hoy xñänøømämät haxøøg.

⁹Hoorä, ja'a häna'c-hajxy hijpä cudoogø'oyä, jaduñ myajwiinxii myajwiingapxó'owät coo ja'a wyiindsønä miädia'agy hajxy pedyii quiuidiuun quiuñáxät, hoy hajxy nä'ä waambaty yhane'emyii. Cab hajxy yhadsoowiimbídät. ¹⁰Cab

hajxy miéedsät. Hamuumdu'jootä wyiindsønä miädia'agy hajxy yajtúunät, ween hajxy jaduñ quiumayii, wehñdä wyiindsønä Dios miädia'agy hajxy jaduñ xmiäbøjcät. Ja'a Dios hajxy xyajñähwaats xyajcuhwáatsäm.

¹¹Hix, tøø ja'a Dios jaduñ yajcähxø'ogy coo ja'a mayhajt tøø tiuñ, coo hajxy nägøxiä xyajñähwaats xyajcuhwáatsäm, mäduhñtiä hajxy yaa nhíjtäm hädaa yaabä naaxwiin. ¹²Jaduñnä Dios hajxy xyhanéhäm coo ja'a haxøøgwiinmahñdy hajxy nnajtshixó'oyyämät møødä hadsojtwiinmahñdy, møød coo ja'a howyiinmahñdy hajxy nyaghíjtämät møødä hoguiuhdujt, møød coo ja'a Dios hajxy hamuumdu'joot nwiingudsähgó'oyyämät, jaduñ hajxy hoy nwädíjtämät hädaa yaabä naaxwiin, ¹³je'leguiøxp coo ja'a Jesucristo hajxy jaduñ njøbhíjxäm coo yaa quiädaactägatsa'añ neby hajxy tøø xyajwiinwaanø'oyyäm. Xi'ig xon hajxy jaduñ njøbhíjxäm. NDioshájtäm ja'a Jesucristo hajxy jaduñ. Møj jaanäh je'e. Je'e hajxy xyajñähwaats xyajcuhwáatsäm. Yajxon jiaanäh tehñ quiäda'aga'añ. ¹⁴Paady hajxy hoy xñähho'tútäm, jaduñnä haxøøg ca'a hoybä hajxy xquiøxy yajñähwaats xquiøxy yajcuhwáatsäm. Jaduñ hajxy xqui'u'ughájtäm, weenä hoybä weenbä hajxy jaduñ hamuumdu'joot ndúunäm.

¹⁵Jaduñdsä mäbøjpädøjc myajwiinxii myajwiingapxó'owät coo hajxy jaduñ miäbøgät. Mmøød miichä cuhdujt jaduñ coo mhøj coo mmägäpxät pøn

ca'a mǎbøgaamb, jaduñ mga'a yajpéxät.

3 Jaduñä mǎbøjpädøjc myagjahmiejtstá'agät coo ja'a gobiernähajxy wyiingudsähgø'øwóøjät møødä cuduunghajxy, møød coo ja'a miädia'agyhajxy quiudiúunäxät. Cabä mǎbøjpädøjc-hajxy ñuuxhó'ogät. Tiúnäp ja'a cu'ugtuung hajxy. ²Cab hajxy pøn ñähøønó'øwät. Cab hajxy chiptsógät. Mee'xxieemy hajxy jiäya'ayhádät. Hoy piønä hajxy wyiingudsähgø'øwät.

³Hix, hijty, cabä Diosmädia'agy hajxy hijty nwiinjuóøyyäm. Cab hajxy hijty ngudiúunäm. Tu'udägóøyyäm hajxy hijty. Hanaxiä haxøøg ca'a hoybä hajxy hijty nhadsójcäm. Haxøøg hajxy hijty njäya'ayhájät. Hadsojtwiinmahñdy hajxy hijty nyaghjätäm. Xxiøøghájätäm ja'a cu'ug hajxy hijty. Hamiñ haxøpy hajxy hijty nnimiähän nnimiägø'øwhájätäm. ⁴⁻⁵Pero mänitä Dios yajwiingähxø'cy coo hajxy xñäxúu'tsäm, møød coo hojioot jiaanč tehñ miøødä. Mänit hajxy xyajñähwaats xyajcuhwáatsäm coo hajxy jaduñ xñäxúu'tsäm, ca'a jie'eguiøxpä cooc tyijy hajxy hoy tøø ngudiúunäm. Jaduñ hajxy xyajñähwaats xyajcuhwáatsäm coo hawiinjemyjioot coo hawiinjemywiiinmahñdy hajxy xmióoyyäm, møød coo ja'a DioshEspíritu hajxy xyageem xyajtägátsäm. ⁶Coo ja'a Jesucristo hajxy hoy xñähho'túutäm, jaduñä Dios ja'a yhEspíritu hajxy møj may xmióoyyäm. ⁷Paadiä Dios

ja'a yhEspíritu hajxy xmióoyyäm, jaduñ hajxy xpiädáacäm hawa'adstuum. Møjjä mayhajt hajxy jaduñ xtiúunäm. Møød jaduñ hajxy xyagjugyhadáanäm cøjxta'axiøø nebiä Dios jiugyhatiän. Jaduñ hajxy tøø xyajwiinwaanóøyyäm. Paady hajxy jaduñ njøbhíjxäm.

⁸Tehñ tiøyhajt jaduñ. Naxy miichä mǎbøjpädøjc jaduñ mdehñ miägaxp mdehñ yhané'emät coo hajxy hamuumdul'joot hoy quiuhdujthádät, ja'a Diosmädia'agy hajxy tøø miäbóquiäbä. Tehngajnä hoybä weenbä hajxy tiúnät. Tsoobaatp jaduñ. Jaduñ hajxy ñiyaghoyø'øwóøjät. ⁹Pero caj myajtägø'øwät maa ja'a høhnda'agymiädia'agy hajxy naxy yajcapxiø'øyän, maa ja'a jecyquiuhdujt hajxy naxy yajtsipta'aguiän, maa ja'a jecyjiäya'ay xiøø hajxy naxy yajtøøw yajtøø'xän. Cab jaduñbä capxy mädia'agy jaduñ ñä'ägädä tuungpaady.

¹⁰Jii häna'c-hajxy näje'le maa ja'a tsajtøjcän, wiingjaty hajxy yajñähixø'øy. Y coo ja'a mǎbøjpädøjc-hajxy jaduñ näje'le miäböcy, tu'udägooby hajxy jaduñ. Cabä jiamioød hajxy hoy miøødhijnä tu'ugmädia'agy. Pønjaty jaduñ wiingjaty yajñähixøøby, mhójpä jaduñ tähooc metsc-hooc, ween hajxy yhuuc hamoñ. Y pø cab hajxy jaduñ yhamona'añ, mänit mga'a mämøjø'øwät mga'a mämayø'øwät. ¹¹Pønjaty jaduñ jatcøøby, cabä howyiinmahñdy hajxy miøødä. Haxøögä wyiinmahñdyhajxy jaduñ. Paady hajxy haxøøgtuum piäda'aga'añii.

¹²Jímhøchä Artemas nguexa'añ maa miičhän. Coö ja'a Artemas jaduñ quia'a yajnäbaadø'owät coö jim ñócxät, mänitøchä Tíquico mäböcy jim nguexät. Coö jim miédsät, mänitøch miičh jim nøcxy xpiaady Nicópolis. Jímhøch nhida'añ høxtä coö tøøchpä ñáxät. Mhuuc hadø'ødsäp jaduñ. ¹³Jimä Apoloshajxiäda'a wiädity Creta møødä Zenas, ja'a cuhdujtyajnahixøøbiä. Coö hajxy hánajty tiu'ubøga'añ, mänit miičh cøxiä wiinä mmó'owät tijaty hajxy hánajty yajmaajiadaamby. ¹⁴Jaduñä njamiøødhájtäm

myajwiinxiiic myajwiingapxø'owät coö ja'a hoyba weenba hajxy tehngajnä tiúnät, ween hajxy jaduñ piuhbety pøn hánajty yajmaajiajp. Cab hajxy ñä'ä nuuxhó'ogät.

¹⁵Ja'a njamiøødhøch hajxy yaa xmiøødhijpä, xyhaagä yajpoo'xp miičh jaduñ. Huuc tunä mayhajt, huuc yajpoo'x ja'a høøchcøxpä pønjaty højts jim xchojp xpia'häyoob ja'a Diosmädia'agyquiøxpä. Ween mijtsä Dios ja'a hoyhajtä weenhajt xmiø'oy nägøxiä. Amén.

Filemón

¹Høøch hädaa nocy njahby, høøch Pablohajpä. Tsumyčhänäabiöch cham je'eguiøxpä coöchä Jesucristo miädia'agy nyajwa'xä. Haa ja'a hermano Timoteo, tu'ugwiinmähñdyhöch xmiøødhity coöch hädaa nocy njaay. ²Miičh Filemón, miičh hädaa nocy nyajnäguexaamby. Hoy hajxy nničhojc nnibia'häyóowäm coo hajxy nduunmújcäm ja'a Jesucristocøxpä. Nyajpoo'xyp højts ja'a hermana Apiahajpä. Jadhun je'e njuø'øy nebiä hamdsoo puhdo'oxypän. Njaanä yajpoo'xyp højts ja'a hermano Arquipohajpä. Quipxy højts je'e xmiøødtuumbä maa højts ja'a Diosmädia'agy nyajwa'xiän. Nägøxiä højtsä jäya'ay nyajpoo'xy ja'a hajxy jim mejtspä maa miičhä mdøjcän, ja'a Diosmädia'agy hajxy mabøjpä. ³Ween mijtsä Dios ja'a hoyhajtä weenhajt hajxy xmio'oy møødä Jesucristo. Ja'a Dios hajxy nDeedyhajtäm. Ja'a Jesucristo hajxy nWiindsønhajtäm.

⁴Naaghóoc-høchä Dios nba'ya'axy, ngapxpáatypøch miičhä mxøø, Filemón. Nnämáabiöchä Dios: “Dioscujú'uyäp”, coo miičh hoy mjaančh tehṁ tiuñ. ⁵Tøøch

nmädoxyhaty coo miičhä Jesucristo miädia'agy hamuumdu'joot tøø mmäbøjcä. Jadhunhöch tøø nmädoxyhajpä coo miičhä jäya'ay mjaančh tehṁ chocy mjaančh tehṁ pia'häyoy, ja'a Diosmädia'agy hajxy mabøjpä. ⁶Coo miičhä Diosmädia'agy hamuumdu'joot tøø mmäbøcy, paady miičhä hojiot mjaančh tehṁ miøødä, weenä jäya'ayhajxy jadhun jiaac tehṁ wyiinjuø'øy nebiatiä Jesucristo ja'a mayhajt tiuñ ja'a højtscøxphajtäm. ⁷Mägu'ughajpä, jaančh tehṁ jiootcújc-høch jadhun nniijiäwø'oyii coo miičhä jäya'ay tøø mjootcapxmøcpøcy, ja'a Diosmädia'agy hajxy mabøjpä. Paady miičh jadhun tøø mjootcapxmøcpøcy coo miičh mjaančh tehṁ chocy mjaančh tehṁ pia'häyoy.

⁸⁻¹⁰Høøch Pablo, tøøch nmäjaanä. Chámhöch jadhunajtä ndsumyčhänä'ay ja'a Jesucristo miädia'agyquiøxpä. Huuc møødhata hojiot ja'a høøchcøxpä. Miičh nmänuu'xtaacypy coo miičhä mayhajt cu mduuñ ja'a Onésimocøxpä. Coo miičhä hojiot mjaančh tehṁ miøødä, páadyhöch miičh jadhun nmänuu'xta'agy,

hóyhøchä Jesucristo cuhdujt tøø xjia mo'oy cooçh miiçh nhané'emät. Jadúhñhøch ja'a Onésimo njuø'øy nébiøch nhamdsoo huungpäñ, je'eguiøxpä cooçh je'e ja'a Diosmädia'agy jaduhñ tøø nyajmäbøcy yaa maaçh yaa ndsumyçhänä'ayän.

¹¹Cahnä ja'a Onésimo hänäjty jim piäyø'ogyñä maa miiçhän, cab miiçh mmädia'agy hänäjty xquiudiunä. Cab hänäjty tiuna'añ. Pero coo yaa tøø miech maaçh høøchän, jaançh tehñ yhóyhøch yaa xmiøødtuñ. Jaançh tehñ yhoy miiçh xmiøødtunaambä.

¹²Nguejxtägatsáambiøch jim maa miiçhän, hóyhøch yaa nja tsoy hamuumdu'joot.

¹³Jadúhñhøch nja mänaañ cooçh cu xmiøødmähmøyy yaa maaçh yaa ndsumyçhänä'ayän. Cu xpiuhbéjtyhøch jaduhñ maa miiçhcøxpän. Ja'a Diosmädia'agyquiøxpøch cham ndsumyçhänä'ay. ¹⁴Páadyhøch ja'a Onésimo jim nguejxtägatsa'añ maa miiçhän, cáboch nnajuø'øy pø mmäna'anaamb miiçh jaduhñ coo yaa cu miähmøyy. Pø mdunaambiä mayhajt jaduhñ, ween hamdsoojoot mdúnät; ca'a yhadsipä, ca'a yhajootma'adä; ca'a tii mnajtshäyowø'øy. ¹⁵Wehñdä Dios jaduhñ tøø miäna'añ coo jim piäyø'øgät maa miiçhän, coo yaa yhidät paquiä maaçh høøchän. Hix, tøø ja'a Diosmädia'agy yaa miäbøcy. Y coo jim ñøçxtägätsät maa miiçhän, cab jaduhñ mänaa xpiuhwa'adsaannä. ¹⁶Moonsä miiçh Onésimo hijty mwa'añ. Pero coo jim ñøçxtägätsät maa miiçhän, jaduhñ

miiçh mjuø'øwa'añ neby hamdsoo huch neby hamdsoo puhya'aybän. Jaduhñ miiçh mdsogaambä nébiøch høøch ndsoquiän. Maas hanaxiä miiçh mdsoga'añ. Hix, maas hoy miiçh mmädia'agy xquiudiunäanänä. Xímnäts mijts jaduhñ tu'ugymädia'agy mhidaannä ja'a Jesucristocøxpä.

¹⁷Tøyhajt højts nnijootpáatäm. Tunxä mayhajt jaduhñ. Tsøc Onésimo jaduhñ møødnijootpáatäm neby højts nnijootpáatäm. ¹⁸Pø tøø miiçh xñägädieeyø'øy hoy ñejpiä, pø xmiänuu'xyhajt miiçh jaduhñ, høøchä ngüeentä jaduhñ. ¹⁹Høøch nyajñhwa'adsaamby mäduhñtiä xmiänuu'xiä. Tøyhajt jaduhñ. Hamdsoo cø'øháamhøch hädaa nocy jaduhñ njaay; jaduhñ miiçh tøyhajt mmøødhädät cooçh nga'a hønñda'agy. Y jim miiçh cueentä mmøødäbä maa høøchcøxpän. Hix, høøch miiçh jaduhñ tøø nyajmäbøcy ja'a Diosmädia'agy. ²⁰Mägu'ughajpä, coo ja'a Onésimo jaduhñ mmøødnijootpaadøøð, jaduhñ miiçh myajcähxø'øga'añ cooçh miiçh tøyhajt xjiaançh tsoy. Tunxä mayhajt jaduhñ. Hix, näguipxy højts ja'a Jesucristo jaduhñ nmøødhíjtäm tu'ugmädia'agy.

²¹Hamdsoo cø'øháamhøch cham njaay. Nnajuøøbiøch jaduhñ cooçh miiçh ja'a nmädia'agy xquiudiunäanä nébiøch cham tøø nnäma'ayän. Njaanä najuøøbiøch jaduhmbä coo miiçh hojioot mjaançh tehñ miøødhada'añ ja'a Onésimocøxpä. ²²Chámhøch mayhajt tu'ug

nmäyujwa'anáangombä. Høøch
 maadaact hahixøødiáacäc.
 Pa'ya'ax ja'a Dios hajxy coöch
 ween xyajpädsømy pujxtøgooty.
 Mäníthøch jim nnócxät maa
 mijtsän.

²³Xyajpoo'xp mijts ja'a hermano
 Epafrashajpä. Yaačh jadhñ
 xmiøødtsumyčhänä'ay ja'a
 Jesucristo miädia'agyquiøxpä.

²⁴Xyhaagä nä'ä yajpoo'xp mijts

ja'a hermano Marcoshajxy,
 møødä hermano Aristarco,
 møødä hermano Demas, møødä
 hermano Lucas. Xyhaagä nä'ä
 møødtúumbøch hajxy yaa ja'a
 Diosmädia'agyquiøxpä.

²⁵Weenä Jesucristo hoyhajt
 weenhajt hajxy xmio'oy
 coo jaaya'ay hajxy jadhñ
 mmøødhity tu'ugjoot
 tu'ugjuøhñdy. Amén.

Hebreos

1 Jecy ja'a Dios quiuguexy quiejxy maa hõjts naphájtäm maa hõjts ndeedyhájtäm. Diosmädia'agy-yajwa'xpä hajxy quiejxä. Mayhooc hajxy quiejxä. Madiu'u hajxy miädiaacy. ²Tøø ja'a Dios ja'a yHuung hajxy yaa xyajnäguéjxäm hädaa yaabä naaxwiin. Cahnä jiegø'ø y coo yaa tøø yhoy. Je'e ja'a Diosmädia'agy hajxy tøø xjiaac hawáanäm. Jequiän je'eduhñ wyinguejxä coo ja'a xøøwiin naaxwiin yhädiúnät cøxiä møødä xøø, møødä po'o, møødä madsa'a. Mänit yajnähdijjä coo yhané'emät. ³Jaduhñä Dios yHuung miøjjä jiaančhä nebiä Diosän. Tu'ugjoot tu'ugwiinmahñdy hajxy yhity. Jim hajxy yhane'emy cøxp chaads hädaa yaabä naaxwiin. Tøø hõjts hoy xñähho'túutäm. Tøø ja'a nbojpä ngädieeyhajxy xyajnähwáatsäm. Mänit jim ñøxtägajch tsajpootyp maa ja'a Diosän. Jim je'eduhñ yhanehmbä jada'anäbaadyñä.

⁴Ja'a Dios yHuung, maas møj ja'a cuhdujt miøødä quejee ja'a Dios mioonsä ja'a tsajpootypähajxy miøødä, je'eguiøxpä coo je'e Dyios yHuungä. ⁵Cabä Dios ja'a mioonsä mänaa ñäma'ay:

Míichhøch jäda'a ndehm yHuunghadaamby.
 Ni mädyii mioonsä quia'a nänømy:
 Yø'øjøch jaduhñ
 xTieedyhadaamb;
 nHuunghadáambiøch yø'øduhñ.

⁶Coo ja'a Dios ja'a yHuung yaa quiejxy hädaa yaabä naaxwiin, mänitä Dios miänaañ:
 Wéenhøch nHuung
 xwyiingudsähgøøyyä ja'a nmóonsøchhajxy, ja'a hajxy jim tsajpootypä.

⁷Paquiä Dios ja'a miädia'agy quiudiúunäxä ja'a mioonsähajxy, nebiä pojtgoy wiäditiän, nebiä padooy wiäditiän. ⁸Pero ja'a yHuung, je'eduhñ ñämaay:
 MDioshajp miich, homiänaajä miich mhane'emy;
 homiänaajä miichä tøyhajt myega'añ.

⁹Mdsojpy miich ja'a tøyhajtpä; cabä haxøøgpä mdsoy.
 Maas jootcújc-høch miich nyaghity quejee ja'a nmóonsøchhajxy, ja'a hajxy jim tsajpootypä.

¹⁰Jaduhñä Dios jiaac mänaambä:
 Miičh jecy mhädiuun ja'a naaxwiimbä møødä tsajpootypä.

11-12 Cuhdägoyyaambä naaxwiimbä mөөдä tsajpootypä; tägatsaamb jaduhñ; jaduhñ jiada'añ néjjiämä wit coo tiujnä; caj tiuungpaadaannä. Pero miičh, cөjxta'axiөө miičh mhida'añ; caj miičh mjugyhajt mänaa quiөxa'añ.

13 Cabä Dios ja'a mioonsä mänaa näma'ay:

Yaačh miičh xmiөөdhané'emät.
Caj miičh mmädsip
myajmäjäda'aga'añ.

14 Ja'a Dios ja'a mioonsähajxy ja'a tsajpootypä, jaduhñ mäwíinäts hajxy je'e nebiä pojjän. Cab hajxy quiähxө'ögy. Dios jaduhñ quejxp coo hajxy piuhbédät pөnjatiä Dios piäda'agaamby hawa'adstuum.

2 Tspcөxpä Diosmädia'agy hajxy nyajcopcөöyyämät, ja'a hajxy tөө nmädóowämbä; jaduhñ hajxy nga'a tu'udägóoyämät.

²Haa ja'a Diosmoonsähajxiä, ja'a tsajpootypä, jéquiänä Diosmädia'agy hajxy yaa yajcädaacy hädaa yaabä naaxwiin. Tөyhajt ja'a Diosmädia'agy jaduhñ; pөnjaty ca'a cudiuumb, haxөөgtuum hajxy miähmө'өwa'añ.

³Mөjcuhdujtmөөдä Jesucristo. Hamdsoo hajxy je'e hoy xyhawaänäm neby hajxy nnähwäatsämät. Haa ja'a hajxy jayөbajt mädóowäbä, tөjiajt ja'a mädia'agy jaduhñ maa hajxy je'ejän. Mänit hөjts jaduhñ xyhawaandägájtsäm. Coo ja'a mädia'agy hajxy nga'a yajtuünämät, cab hajxy jaduhñ nnähwäatsämät. ⁴Madiu'u ja'a Dios

ja'a hijxtahñd tөө yajcähxө'ögy, ja'a hoy-yagjuөөñäjatypä; jaduhñ hajxy nmäbөjčämät coo ja'a miädia'agy tiөyhajtä. Tөө ja'a yhEspiritu hajxy xyajnäguéjxäm coo hajxy jaduhñ xpiuhbedäänäm mädyiijaty tuung hajxy xmiöoyyäm. Jaduhñä jioot chocy.

⁵Haa ja'a Dios mioonsähajxiä, ja'a tsajpootypä, cabä Dios jaduhñ tөө miäna'añ coo hajxy yhané'emät mänaa ja'a naaxwiimbä hänajty wyiimbida'añän. ⁶Jiiby jaduhñ myiñ cujaay maa ja'a Diosmädia'aguiän: Dios, tiiguiөxpä ja'a jäya'ay coo mjahmiejtsta'agy, coo mbuhbety.

⁷⁻⁸Maas mөc ja'a mmoonsä cuhdujt hijty tөө mmo'oy quejee ja'a jäya'ayhajxy. Pero mänitä jäya'ay mөjcuhdujt mmooyy coo cөxiä yhané'emät tijaty miičh tөө mbäda'agy.

Jaduhñä Dios ja'a jäya'ay piäda'aga'añ mөj jaančh, coo jaduhñ ween wyiingudsähgө'öyii. Coo ja'a Dios jaduhñ hamdsoo miänaañ, jaduhñä tөyhajt hajxy nmөөdhájtäm coo ja'a mөjcuhdujt hajxy tөө xmiöoyyäm coo hajxy cөxiä nhanéhämät. Pero cajnä quiähxө'ögyñä coo hajxy cөxiä nhane'emäänäm. ⁹Jaduhñä Jesucristo, mänaa yaa yhitiän hädaa yaabä naaxwiin, cabä cuhdujt hijty jiaty mөөдä nebiä Dios mioonsähajxy miөөдän, ja'a hajxy tsajpootypä. Mänitä Dios miänaañ coo ja'a Jesucristo hajxy xñähho'túutämät nägөxiä, je'eguiөxpä coo ja'a Dios hajxy xchөjčäm. Coo ja'a Jesucristo

yho'cy, paadiä møj jaančh piädaacä, paadiä møjcu'ugong hoy quia'a mäjädaacnä. Coö cu miäjädaacy, jaayá'ayädsä mäjaa häxöpy mөөd coö yhané'emät.

¹⁰Paadiä Dios cөxiä wiinä piädaacy, weenä jäya'ayä Dios hajxy jaduhñ wyiingudsähgө'öy. Chojiä jioot jaduhñ coö ja'a yhuunghajxy jim yhidät nägөxiä maa je'ejän, pөnjatiä miädia'agy mähöjcäp. Y jaduhñä Dios miänaañ coö ja'a Jesucristo quimädöwät ja'a höjtscөxpä. Jiaančh cudiuun je'eduhñ coö hajxy xñähho'túutäm.

¹¹Ja'a Jesucristo hajxy jaduhñ xyajnáhwäatsäm. Quipxiä Dios hajxy nDeedyhajtäm mөөdä Jesucristo. Paadiä Jesucristo hajxy xquia'a mädsähdiuunäm. Hix, hamdsoo miänaañ coö hajxy tu'ugpuhya'ay xmiөdhdíjtäm.

¹²Jaduhñ jiiby myiñ cujaay maa ja'a Diosmädia'aguian:

Nmөөdmädia'agäämbiөch
nbuhya'ayhajxy ja'a
miichcөxpä.

Nguyhөwäämbiөch miich jim
tsajtөгooty, jim cu'ughagujc.

¹³Jaduhñ jiiby myiimbä:

Ni mänáajөchä Dios xquia'a
wiinhөөн, päadyhöch nga'a
tsähgө'öy.

Jaduhñ wiingtuun myíngumbä:

Chaačh nhity mөөdhөch
nhuunghajxy;

Diöshөch jaduhñ xmiöooy.

¹⁴Pөñ jaduhñ tu'que'ex,
tu'ugjoot tu'ugnө'ty hajxy jaduhñ.
Jaduhñä Jesucristo hajxy tөө
xmiөdhdíjtäm tu'ugjoot tu'ugnө'ty
mänaa yaa yhiitiän hädaa yaabä
naaxwiin. Paady hajxy jaduhñ
xmiөdhdíjtäm, jaduhñ hajxy
hänajty xñähho'tu'udäänäm.

Jaduhñä mөjcu'ugong hoy quia'a mäjädaacnä. Coö cu miäjädaacy, jaayá'ayädsä mäjaa häxöpy mөөd coö hajxy cu xyajtu'udägöooyäm.

¹⁵Coö ja'a Jesucristo miädia'agy hajxy nmähöjcämät, cabä nho'og hajxy jaduhñ ndsähgө'öyyänät.

Pөñ jaduhñ ca'a mähөjp, je'eds ja'a yho'og tsähgө'öby mädu'ñtiä jia jugyhaty.

¹⁶Coö ja'a Jesucristo yaa yhooy hädaa yaabä naaxwiin, ja'a Abraham yhap yhoc-hajxy yajnäguejxä, neby hajxy jaduhñ piuhbedөjät. Ca'a

Dyiosmoonsähajxiä yajnäguejxä, ja'a tsajpootypä. Tөyhajt jaduhñ.

¹⁷Y paadiä Jesucristo yaa hoy jiäya'ayhaty neby höjtshajtäm; jaduhñ hajxy hoy xñähgapxtúutäm maa ja'a Diosän; jaduhñä nbojpä ngädieey hajxy hoy xñähho'túutäm.

Hojioot ja'a Jesucristo miөdhdajpy. Pedyi jaduhñ quiudiuuñ. ¹⁸Hoyä Jesucristo jia tsaächpөjcy, cabä mөjcu'ugongä miädia'agy yajtuunäxä. Y coö ja'a mөjcu'ugong hajxy hänajty xjia wi'i yajtu'udägöooyäänäm, xpiuhbéjtäm ja'a Jesucristo hajxy jaduhñ je'eguiөxpä coö ja'a mөjcu'ugong miädia'agy quia'a mähöjcäxä ja'a Jesucristäm.

3 Hermanodөjc, tөө ja'a Jesucristo ja'a nbojpä ngädieey hajxy xyajnáhwäatsäm. Tөө ja'a Dios hajxy xyajnáhdíjäm coö ja'a miädia'agy hajxy nmähöjcämät. Tsөгä Jesucristo hajxy jahmiéjtsäm; höxtahmдs höjts ja'a Dios yaa xyajnäguéjxäm. Jaduhñ hajxy njahmiéjtsämät coö hajxy jim xñähgapxtúutäm maa ja'a Dioswiinduumän. ²Haa

ja'a Moisésä, pedyii je'e jecy quiuduuñ maa ja'a Dios ja'a tiõjcän. (Je'eduhñ ñänøomby ja'a judiøshajxy.) Jaanä jaduhñä Jesucristo pedyii quiudiuumbä coo wyiinguejxä coo højts jaduhñ xñähgapxtúutämät. ³Maas hoy jaduhñ coo ja'a Jesucristo hajxy nwiingudsähgøøyyämät quejee ja'a Moisés. Høxtahmñsä tøjcojpä, je'eds jaduhñ wiingudsähgøøyyäp; cabä tøjc jaduhñ wyiingudsähgøøyyii. ⁴Cabä tøjc hamdsoo quiojy; häna'c jaduhñ cojpa. Pero ja'a Dios, cøxiä je'eduhñ piädaacy tijaty yaa hijp hädaa yaabä naaxwiin møødä jim tsajpootyp. ⁵⁻⁶Ja'a Moisés, jayøjpa tøyhajt jaduhñ miädiaactsohñ mädyii ja'a Dios hänajty cujecy quiapxtøwaamby. Pedyii ja'a Moisés quiudiuuñ maa ja'a Dios ja'a quiu'ugän. Pero cabä mõjcuhdajt miooyä nebiä Jesucristo miøødän. Hix, ja'a Jesucristo, ja'a Dios yhamdsoo Uung je'e. Y pedyii jim quiudiuuñ maa ja'a Dios ja'a quiu'ugän. Pero ja'a Moisés, jaduhñ je'e yhiyty nebiä moonsän. Coø hajxy hamuumdu'joot nmäbøjcämät, coo ja'a Jesucristo hajxy jootcujc njøbhíjxämät coo hänajty miejtstägatsa'añ, mänitä Dios hajxy nägøxiä xquiu'ugnäbøjcämät.

⁷Jaduhñ jiiby myiñ cujaay maa ja'a Diosmädia'aguiän:

Cooch nmädia'agy hajxy jäda'anäbaady xmiädóowät,

⁸⁻⁹hamuumdu'joot hajxy jaduhñ myajtúnät.

Haa ja'a jecyjiäya'ayhajxiä, ja'a mijts mhap mdeedyhajxiä, cábøch nmädia'agy hajxy jecy xyajtuunä, høyhøch

hijxtahñd may nja yajcähxø'cy, mänäajøch hajxy jecy nyajwädiñ pactuum juxychägui'xjomøjt.

Cooch nmädia'agy hajxy xquia'a mäbøjcä, páadyhøch hajxy nyajcumädooyy.

¹⁰⁻¹¹Xyagjootmädiägøøyyhøch hajxy je'e. Mänitøch nmänaañ:

“Tøø hajxy jaduhñ mdu'udägoonä. Cáboch nmädia'agy hajxy xyhabøgaanä.

Tøyhajt jaduhñ, cáboch mijts jim nyajmedsaannä maach mijts hijty nyajpoo'xa'añän.”

Jaduhñä Dioshøpñritu miänaañ maa ja'a Diosmädia'aguiän.

¹²Hermanodøjc,

mnigwieendähadøøjap hajxy nebiä Diosmädia'agy hajxy mga'a najtshixø'owät; jaduhñ hajxy mga'a tu'udägóyyät. Jujcy ja'a Dios; ca'a jiaduhñä nebiä jäya'ayhajxy yaabä Dyioøhajpiän. ¹³Pero mäduhñtiä hajxy mjogyhaty, mniguiapxmøcpøgøøjap hajxy jabom-jabom, neby hajxy jaduhñ mga'a tu'udägóyyät. ¹⁴Coo hajxy tehngajnä nmäbøjcämät, neby hajxy tøø nmäbøjtsøhñäm, mänitä Jesucristo hajxy jim xmiødhájtämät tsajpootyp.

¹⁵Jaduhñ jiiby myiñ cujaay maa ja'a Diosmädia'aguiän:

Coo ja'a Diosmädia'agy hajxy mmädóowät jäda'anäbaady, hamuumdu'joot hajxy myajtúnät.

Ja'a jecyjiäya'ayhajxy, cabä Diosmädia'agy hajxy jecy miäbøjcy.

¹⁶Jimä Moisés ja'a jäya'ay hoy wioobädsømy Egiptonaaxooty; je'eds hajxy jecy ca'a mabøjc ja'a Diosmädia'agy, hoy hajxy hānajtj tøø jia mädooy. ¹⁷Je'eds hajxy hoy tiu'udägoonä. Jim hajxy hoy quiøxy ho'nä pactuum. Je'edsä Dios hoyhoy nājootmayhajt juxychägui'xjomøjt. ¹⁸⁻¹⁹Je'edsä Dios jaduhñ nāmaayy coo quia'a yajmedsaannä maa hijty jaduhñ yajpoo'xa'añän, je'eguiøxpä coo hajxy hānajtj quia'a mabøcy.

4 Tsøg hajxy nigwieendähajtäm; jaduhñ hajxy nga'a tu'udägöoyämät. Coo hajxy ndu'udägöoyämät, cabä Dios hajxy jiiby xyajtägøøyyämät maa hajxy xyajpoo'xa'añäm. Tøø hajxy hijty xyajwiinwaanøøyyäm coo hajxy jiiby xyajtägø'owāanäm. ²Tøø ja'a Diosmädia'agy hajxy nmädóowäm nebiä jecyjiäya'ayhajxy jia mädooyän. Xiøøbä hajxy jaduhñ jia nä'ä mädooyy, cab hajxy nā'ä mabøjcy. ³Højts, tøø højts nmabøjcäm, paadiä Dios hajxy jim xyajtägø'owāanäm maa hajxy xyajpoo'xa'añäm. Jimä Dios jaduhñ nānøømy:

Cooch hajxy nnājootmayhajty, päadyhöch hajxy nnāmaayy: “Tøyhajt jaduhñ, cáboch mijts jim nyajmedsaannä maačh mijts hijty nyajpoo'xa'añän.”

Coo ja'a Dios ja'a naaxwiimbä yhädiuumbädøøyy, mänit jaduhñ pioo'xnä. ⁴Jiiby jaduhñ myiñ cujaay maa ja'a Diosmädia'aguiän:

Mänitä Dios hoy pioo'xnä ja'a miäjuxtujxøøbä, coo ja'a naaxwiimbä hānajtj tøø yhädiuumbädøønä.

⁵Wiingtuumä Dios miänāangombä:

Cábøch hajxy nyajmedsaannä maa ja'a poo'xtaactän.

⁶Ja'a jecyjiäya'ayhajxy, ja'a Diosmädia'agy hajxy jayøbajt ja mädoowäbä, cab hajxy nā'ä yajtuuñ. Paady hajxy jim quia'a mejch maa ja'a poo'xtaactän. Pero nāje'ejatiä jäya'ayhajxy miedsa'añ maa ja'a poo'xtaactän. ⁷Cujequiä Dios ja'a David yajmänaañ:

Coo ja'a Diosmädia'agy hajxy mmädówät jäda'anäbaady, hamuumdu'joot hajxy mmäbøgät.

Je'eduhñ nānøømy coo hajxy jäda'anäbaady jim ndägøøyyämät maa ja'a poo'xtaactän. ⁸Coo ja'a Josué ja'a judíoshajxy jecy wioomejch maa ja'a Palestinanaaxootiän, cabä poo'xtaact hajxy nā'ä paaty. Paadiä Dios jaduhñ miäna'añ coo højts jäda'anäbaady ndägøøyyämät maa ja'a poo'xtaactän. ⁹Jimnä ja'a poo'xtaact yhityñä maa ja'a Dios ja'a quiu'ughajxy tiägø'owa'añän. ¹⁰Pøñ jim tagøøby maa ja'a Dios ja'a pioo'xtaactän, jim jaduhñ pioo'xaannä nebiä Dios pioo'xnän mänaa ja'a naaxwiimbä hānajtj tøø yhädiuumbädø'oyän. ¹¹Tsøgä Diosmädia'agy hajxy hamuumdu'joot mabøjcäm; jaduhñ hajxy hoy ndägøøyyämät maa ja'a Dios ja'a pioo'xtaactän. Cabä Diosmädia'agy hajxy nnajtsnixøøyyämät nebiä jecyjiäya'ay hajxy jiatcøøyyän. Cab hajxy miabøjcy, paady hajxy jim quia'a tagøøyy maa ja'a poo'xtaactän.

¹²Ja'a Diosmädia'agy, tuumnä je'eduhñ. Mäjaamøødnä je'eduhñ.

Ja'a Dios hajxy xyajcähxó'cäm ja'a miädia'agyhaam pø nmøødhájtäm ja'a howyihinmahñdy hajxy, pø caj. ¹³Caj tii hayu'u'uch hamee'ch mnä'ägädä túnät. Tsipecøxpä Dios ja'a nwiinmahñdyhájtäm hajxy nägøxiä xyhixyhájtäm neby hajxy njäya'ayhájtäm pø hoy, pø ca'a hoy. Pø cab hajxy hoy njäya'ayhájtäm, mänitä Dios hajxy haxøøgtuum xpiäda'agáanäm.

¹⁴Ja'a Jesucristo, ja'a Dioshuung, tøø jim quioody Dioswiinduum. Jim højts xñähgapxtúutäm. Paady, tsøgå Diosmädia'agy hajxy hamuumdu'joot panócxäm. Cabä wiinghäna'c hajxy pøn xñähgapxtúutäm jim Dioswiinduum.

¹⁵Najuøøbiä Jesucristo neby hajxy yaa ndsaaçhpójcäm hädaa yaabä naaxwiin. Hix, tøø je'e yaa jäya'ayhaty neby højts yaa njäya'ayhájtäm. Tøø jia yajtägoyya'añii ja'a mõjcu'ugóngäm, neby højts xjia wi'i yajtägoyyáanämbä. Pero cabä Jesucristo mänaa tiu'udägoy.

¹⁶Tsøgå Dios hajxy pa'yáaxäm hamuumdu'joot. Xchójcäm Dios hajxy. Miøødhajpiä hojioot je'eduhñ maa højtshájtäm. Xpiuhbéjtäm hajxy jaduhñ coo højts tii nyajmaajiájtämät.

5 Ja'a teedywiindsøn_hajxy, ja'a hajxy jim tuumbä maa ja'a judíos chajtøjc-hajxiän, jaduhñ hajxy piäda'agyii coo ja'a cu'ug hajxy ñähgapxtú'udät maa ja'a Diosän, møød coo hajxy cøxiä quiuyoxó'øwät, møød coo animal hajxy yóxät, weenä cu'ug ja'a piojpä quiädieey hajxy jaduhñ ñähwa'açh quiuhwa'açh, ²⁻³møød weenä

yhamdsoo pojpä yhamdsoo cädieey ñähwaatsnä. Hix, jäya'ayhajp ja'a teedyhajxy neby højtshájtäm. Jimä piojpä quiädieeyhajxy je'ebä. Paady hajxy mee'xxieemy miägapy yhane'emy pønjaty ca'a najuøøby, pønjaty tu'udägooby.

⁴Cabä teedyhajxy hamdsoo nibiäda'agyii. Dios hajxy jaduhñ pädaacp nebiä Aarón jecy piädaacän. ⁵Ni ja'a Jesucristo hamdsoo quia'a nibiädaacä nebiä teedywiindsønän. Ja'a Dios jaduhñ pädaac. Jaduhñä Dios ja'a Jesucristo ñämaayy:

Míichhöch jäda'a ndehm
yHuunghadaamby.

⁶Wiingtuumä Dios jaduhñ miänaañ: Cøjxta'axiøø miich mduna'añ teedy nebiä Melquisedec jecy tiuunän.

⁷Ja'a Jesucristo, mänaa yaa yhitiän hädaa yaabä naaxwiin, mänitä Dios møc pia'yaaxy. Jøøby hänajty. Miänuu'xtaac ja'a Dios coo piuhbedøøjät mänaa hänajty yho'oga'añän. Wyiingudsähgøøbiä Dios hänajty je'e, paadiä miädia'agy miädóowäxä. ⁸Hoyyä Jesucristo jia Dioshuungä, quiudiuunä Tiedy miädia'agy coo chaachpøgät. ⁹Coo miee'xtujcy mänaa chaachpøquiän, xyajnahwáatsäm ja'a nbojpä ngädieeyhájtäm hajxy jaduhñ pønjetiä miädia'agy mäbøjcäp. Cøjxta'axiøø hajxy hodiium xyaghidáanäm. ¹⁰Mänitä Dios ja'a Jesucristo piädaacy teedywiindsøn nebiä Melquisedec jecy tiuunän.

¹¹Madiu'u mijts hädaaduhmbä nja wi'i yajmøødmädia'aga'añ tsipjaty, pero caj mijts mwiinjuø'øwa'añ. ¹²⁻¹³Tøø jegøøñä

mänaa ja'a Diosmädia'agy hajxy mmäbøjtsooñän. Hahixøøby hijty jaduñ coo wiinghäna'c hajxy myajnäihixøøñät. Pero jaduñ mijts tøø mjaty nebiä naamdägø'øybän. Caj mijts ja'a Diosmädia'agy ja'a tsipjatypä mjada'añ. Je'enä hajxy mhabøcyñä ja'a cajpä chipjatiä. Cahnä hoguiuhdujt hajxy mhabøcyñä. ¹⁴Coo ja'a Diosmädia'agy hajxy hamuumdu'joot mgudiünät, mänitä tsipjatypä hajxy jaduñ mwijnjuø'øwät; y coo ja'a hoguiuhdujt hajxy tehngajnä mbanøcxät, mänit hajxy mnajuø'øwät mädyii hänäjty hoguiuhdujt, mädyii hänäjty haxøøgcuhdujt.

6 Tøø mijts ja'a mädia'agy mayhooc mmädoy ja'a Jesucristocøxpä, ja'a cajpä chipjatiä. Tøø hajxy mmädoy coo ja'a mhaxøøgcuhdujt hajxy mnajtshixø'øwät, coo ja'a Diosmädia'agy hajxy hamuumdu'joot mmäbøgät. ²Mnajuøøby hajxy tii hajxy coo tøø mnäbety, tii hajxy coo tøø mgø'øniñähgabyii. Jaduñ hajxy tøø mmädoy coo ja'a ho'ogyjiäya'ayhajxy jiuypipøga'añ, coo ja'a Dios ja'a haxøøgjäya'ayhajxy yajtsaaçhpøga'añ çøjxta'axiøø, coo ja'a naaxwiimbä wyiimbida'añ. ³Pero tsøgä Diosmädia'agy hajxy pedyii jaac habøjcäm, pø chojpiä Dios joot jaduñ.

⁴⁻⁶Pøñä Diosmädia'agy najtshixøøby, hoyyä Diosmädia'agy tøø jia wiinjuøøñä coo ja'a Jesucristo hajxy tøø xñäho'túutäm,

hoyyä piojpä quiädieey tøø jia yajnähwäatsäxä ja'a Jesucristäm, hoy tøø jia puhbedyiijäm ja'a Dioshespöritu, hoy jia najuø'øy coo ja'a Dios ja'a miäjaa quiexa'añ, coo ja'a Diosmädia'agy hajxy jaduñ najtshixø'øwät, cab hajxy hoy miäbøgaannä. Jaduñ hajxy yajcähxø'øgy coo ja'a Dioshuung hajxy yagho'tägach, coo hajxy ñäxi'igy hijxwiinduum. ⁷Pøñä Diosmädia'agy hoy cudiumb, quiumaabiä Dios jaduñ. Jaduñ mäwíinäts hajxy je'e nebiä hoñaaxän. Coo tiu'uy, mänit hotyijä jaduñ tiøømbety, tijaty tøø piäda'agyii, y quiunuu'xypä Dios jaduñ. ⁸Pøñ hoy ca'a cudiumb, haxøøgtuum jaduñ ñä'lä nøcxø'øwaambä. Jaduñ mäwíinäts je'e nebiä naax ca'a hoybän, maa haagä hapy tiøømbetiän. Ño'py hajxy jaduñ.

⁹Hermanodøjc, hoy mijts naamnä weenjaty tøø nja hadsähgø'øy, nnajuøøbiøch jaduñ coo mijts ja'a Dios jaanç tehñ yhoj xpiuhbeda'añ, je'eguiøxpä coo ja'a mbojpä mgädieey hajxy xyajnähwäatsä. ¹⁰Jaanç tehñ yhojjiäya'ay ja'a Dios jaduñ. Jiahmiejchp jaduñ coo mijts hoy mgudiüñ, coo mijtsä hermanodøjc tehngajnä mbuhbety, je'eguiøxpä coo mijtsä Dios mjahmiech. ¹¹Jadúñhøch njoot chocy coo hajxy hoy mgudiünät mäduhñtiä hajxy yaa mjogyhaty hädaa yaabä naaxwiin. Mänit hajxy jim mnøcxät tsajpootyp nebiä Dios hajxy tøø xñäma'ayän. ¹²Cab hajxy mnänuuxø'øwät. Jaduñ hajxy mgudiünät nebiä jäya'ayhajxy jecy

quiudiuuñän, ja'a hajxy jim tøbä ñöcxäbä tsajpootyp. Ja'a Dios jaduñ yajwiinwaanøøyy coo hajxy jim ñöcxät, je'eguiøxpä coo ja'a Diosmädia'agy hajxy hänäjty hoy miäbøcy tehngajnä.

¹³⁻¹⁴ Jéquiänä Dios ja'a

Abraham yajwiinwaanøøyy:

“Tøyhájthøch miich nbuhbeda'añ.

Nyajpu'uwáambiøch

nyaghi'igáambiøch miich.”

Hamdsoo cuhdujtcøxpä Dios jaduñ

miänaañ. Hix, caj pøn møjcuhdujt

miøødä nebiä Dios miøødän.

¹⁵ Yajtøjiajtä Dios jaduñ nebiä

Abraham yajwiinwaanøøyyän,

je'eguiøxpä coo Abraham

hänäjty tehngajnä miäbøcy.

¹⁶ Ja'a Diosøxpä jäya'ayhajxy

hamuumdu'joot jaduñ waambaty

miäna'añ; y coo hajxy jaduñ

miäna'añ hamuumdu'joot, cab

jaduñ pøn waamb miänaañnä.

Tødiägøøby jaduñ. ¹⁷ Paadiä Dios

jaduñ miänaañ: “Tøyhájthøch

tø nyajwiinwaanøøy cooch

nbuhbeda'añ”, neby hajxy jaduñ

ñajuø'øwät coo hajxy tøyhajt

piuhbeda'añii, coo ja'a Dios ja'a

wyiinmahñdy ni mänaa quia'a

yajtägatsa'añ. Hamdsoo ja'a Dios

jaduñ miänaañ. ¹⁸ Jaduhñdsä

tøyhajt hajxy nmøødhájtäm

coo ja'a Dios ni mänaa quia'a

høhñda'agy. Jaduhñdsä tøyhajt

hajxy hoy nmøødhájtäm coo

hajxy homiänaajä xpiuhbedaanäm

coo ja'a miädia'agy hajxy

nmäbøjcämät. ¹⁹⁻²⁰ Jimä Jesucristo

hajxy xñähgapxtüütäm tsajpootyp.

Je'e jim tuumb teedywiindsøn

nebiä Melquisedec jecy tiuñän.

Cøjxta'axiøø ja'a Jesucristo jim

tiuna'añ tsajpootyp. Jaduhñä tøyhajt hajxy hoy nmøødhájtämät coo hajxy jim homiänaajä xyaghidäänäm.

7 ¹⁻² Coo ja'a Abraham ja'a

reyhajxy hänäjty hoy tøb

yagho'ogy, mänaa hajxy hoy

chiptuñän, mänitä Melquisedec hoy

miøødnijøjcubaadø'yii. Mänitä

Melquisedec miänaañ cooc ja'a Dios

ja'a Abraham hänäjty piuhbeda'añ.

Mäduhñtiä ja'a Abraham hänäjty

tøb piaady maa hänäjty hoy

tøb chiptuñän, majc-hit jaduñ

piädaacy tu'cuhdujtjaty. Mänitä

Melquisedec piuhmooyy ja'a

tu'hitpä. Mejtstu'u ja'a Melquisedec

hänäjty tiuñ. Tøb ja'a Dios

tsajpootypä hänäjty piäda'agy coo

tiünät teedy. Y gobiernä hänäjty jim

tiuumby maa ja'a cajpt xiøhatiän

Salem. Jaduhñ miädia'agytiägø'øy

coo hajxy jootcujc yhity.

Jaduhñdsä Melquisedec xiø

miädia'agytiägøøbiä coo hoy

guiobiernähaty. ³ Cab jaduñ

pøn ñä'ägädä najuø'øy pønä

Melquisedec tiajhajt tieedyhajt,

pøn yhaphajt tieedyhajt. Cab

jaduñ pøn najuø'øy mänaa myiñ

mänaa quiahy, mänaa yho'cy

mänaa tiägooyy. Coo je'e tiuñ

teedywiindsøn cøjxta'axiøø, jaduñ

mäwíinäts je'e tiuñ nebiä Jesucristo

tiuñän, ja'a Dios yHuung.

⁴ Cähxø'p jaduñ coo ja'a

Melquisedec møjcuhdujt hänäjty

jiaanç tehñ miøødä, je'eguiøxpä

coo piuhmooyy ja'a tu'hitpä,

mäduhñtiä ja'a Abraham hänäjty

tøb piaady maa hänäjty hoy tøb

chiptuñän. Y ja'a Abrahamä, mijts

mhap mijts mdeedy je'eduhñ. ⁵ Y

ja'a Leví yhap yhoc-hajxiä, ja'a hajxy tuumbä teediä, jaduñ jim myiñ maa ja'a jecyquihdujtän coo hajxy piuhmo'owøøjät ja'a tu'hitpä maa ja'a majc-hitcøxpän. Ja'a miägunaaxhajxy jaduñ yégäp, hoyyä Abraham hajxy quipxy jia møødhaphaty jia møødteedyhaty. ⁶Pero ja'a Melquisedec, cabä Abraham hänajty jiujyhaty miägu'ughaty. Hawiing hänajty tiuñ teedy. Pero puhmooyyä je'e ja'a tu'hitpä. Ja'a Abraham jaduñ yejc, ja'a Dios hänajty tøøbä yajwiinwaanø'øyäbä coo hänajty yajpu'uwa'añ yaghi'iga'añ. Mänitä Melquisedec ja'a Abraham ñämaayy coo ja'a Abraham hänajty piuhbeda'añijäm ja'a Diósäm. ⁷Y tøyhajt jaduñ coo ja'a Melquisedec møjcuhdajt hänajty jiaančh tehñ miøødä. Cabä Abraham quihdujt hänajty miøjjä nebiä Melquisedec quihdujtän. Hiç, ja'a Melquisedec jaduñ mänaañ coo ja'a Dios ja'a Abraham piuhbédät. ⁸Haa ja'a hajxy yaa tuumbä teedy jäda'anäbaadyñä, ho'p hajxy, hoyyä tu'hitpä hajxy jia puhmo'oyii ja'a majc-hitcøxpä. Haa ja'a Melquisedecä, jaanä puhmooyyä je'ebä, pero cabä Diosmädia'agy miäna'añ coo tøø yho'ogy. ⁹⁻¹⁰Hoyyä Levíhajxy hijty jia tuñ teedy, cabä quihdujthajxy hänajty miäbaady nebiä Melquisedec quihdujtän, je'eguiøxpä coo ja'a Abraham ja'a Melquisedec ja'a tu'hitpä hänajty tøø piuhmo'oy. Ja'a Abraham, je'edsä Levíhajxy hänajty yhaphajpy tieedyhajpy.

¹¹Pero ja'a teedyhajxy, ni mänaa hajxy xquia'a yajñähwäatsämät.

Paadiä Dios ja'a Cristo quiejxy coo je'e tiúnät teedy nebiä Melquisedec jecy tiuñän. Cabä tiuñ nebiä Aarónhajxy tiuñän. ¹²Coo ja'a Dios miänaañ coo ja'a Leví yhap yhoc-hajxy quia'a tóunnät teedy, mänitä jecyquihdujt yajtägajtspä. ¹³Coo ja'a Dios ja'a Jesucristo yaa quiejxy, yajtägajts ja'a jecyquihdujt jaduñ, je'eguiøxpä coo ja'a Jesús tiuñ teedy, hoyyä Leví quia'a ja haphaty quia'a ja teedyhaty. ¹⁴Hiç, ja'a Judä je'e yhaphajt tieedyhajt. Y cabä Moisés waamb miänaañ coo ja'a Judä yhap yhoc-hajxy tiúnät teedy.

¹⁵Y coo ja'a Jesucristo teedy tiuñ nebiä Melquisedec jecy tiuñän, cähxø'p jaduñ coo ja'a Dios ja'a jecyquihdujt tøø yajtägajtsnä.

¹⁶Paadiä Jesús piädaacä teedy coo cøjxta'axiøø jiujyhada'añ. Cab jaduñ yhity nebiä yaabä teedyhajxiän. ¹⁷Jaduñä Dios ja'a Jesús ñämaayy:

Cøjxta'axiøø miičh mduna'añ
teedy nebiä Melquisedec jecy
tiuñän.

¹⁸⁻¹⁹Coo ja'a Moisés ja'a jiecycyquihdujt hajxy xquia'a yajñähwäatsäm, paadiä Dios jaduñ miänaañ coo quia'a tóunnät. Mänitä Dios ja'a Jesucristo yaa quiejxy coo hajxy hoy xyajñähwäatsämät. Mänitä Jesucristo hajxy jim xwioonøcxáanäm maa ja'a Dioswiinduumän.

²⁰⁻²¹Coo ja'a Dios ja'a Jesús piädaacy teedy, mänit miänaañ coo ja'a miädia'agy jiaančh tehñ tiøyhajtä. Jaduhñds jim myiñ cujaay maa ja'a Diosmädia'aguiän:

Ja'a Dios mänaaṅ coo
ja'a miädia'agy jiaančh
tehm̄ tiøyhajtä; cábägä
wyiinmahñdy mänaa
yajtägatsa'añ:

“Cøjxta'axiøø miičh mduna'añ
teedy nebiä Melquisedec
jegy tiuunñan”, nõmä Dios ja'a
Jesús ñämaayy.

Pero coo ja'a wiingteedy piädaacä,
cabä Dios waamb miänaañ.

²²Coo ja'a Jesucristo cøjxta'axiøø
yhida'añ, jaduñhä tøyhajt hajxy
nmøødhájtäm coo hajxy maas
hoy xyajñahwa'adsaanäm quejee
ja'a Moisés ja'a jecyquihdujt.
Cab hajxy je'e xyajñahwáatsäm.

²³Ja'a teedyhajxy hädaa yaabä
naaxwiimbä, coo hajxy yho'ogy,
mänit hajxy ñiguiuwichii. Paady
hajxy may tøø tiuunnä. ²⁴Pero cabä
Jesucristo mänaa yho'ogaannä.
Cøjxta'axiøø jaduñ tiuna'añ
teedy. Cabä wiinghäna'c ja'a tuung
jaduñ yajmämähmø'owa'añ.

²⁵Cøjxta'axiøø ja'a Jesucristo
yhida'añ. Hoy jiaančh
yajñahwa'adsaannä pønä jioot
tsojp coo ñähgapxtu'udøøjtät
ja'a Jesucristäm maa ja'a
Dioswiinduumän homiänaajä.

²⁶Coo ja'a Jesucristo jaduñ tiuñ
teedywiindsøn, jaančh teh̄m̄ yhoy
hajxy jaduñ xñähgapxtútütäm. Ni
mänaa wiinghäna'c hajxy jaduñ
xquia'a nähgapxtútütäm nebiä
Jesúsän. Cabä Jesús tii pojpa tii
cädieey ñä'ägädä møødä. Ni pøn
jaduñ quia'a mäbaady nebiä
Jesúsän. Nhaagä møødhájtäm
pojpa cädieey hajxy. Jimä
Jesucristo yhiñnä tsajpootyp;
møjcuhtuñ jim̄ miøød. ²⁷Haa

ja'a teedywiindsøn hajxy hädaa
yaabä naaxwiimbä, jabom-jabomä
animal hajxy xoxy. Jadúhñäc
tyijy ja'a piojpa quiädieey hajxy
ñähwa'ads quiuhwá'adsät, møødä
cu'ug piojpa quiädieeyhajxy. Jayøjp
hajxy xoxy ja'a yhamdsoo pojpa
yhamdsoo cädieeguiøxpä. Mänit
hajxy jiaac xoxy ja'a cu'ug piojpa
quiädieeguiøxpä. Pero cabä
Jesucristo animal mänaa xoxy. Hix,
tähooc jaduñ ñiñähdujca coo
yho'cy. ²⁸Ja'a jecyquihdujt jaduñ
mänaamb coo ja'a jäya'ayhajxy
tiünät teedywiindsøn, hoyyä pojpa
cädieey hajxy jia møødä. Mänitä
Dios cujegy miänaañ coo ja'a
Jesucristo tiünät teedywiindsøn.
Ja'a tøyhajtä Dios jaduñ yejc coo
jaduñ miänaañ. Ni mänaa ja'a
Jesús pojpa cädieey quia'a møødä.

8 Hoorä, jadúhñhöch tøø
nmädia'agy coo ja'a Jesucristo
hajxy jim̄ xñähgapxtútütäm
tsajpootyp. Jim̄ jaduñ tiuñ
teedywiindsøn. Hahooyhaamby
jim̄ yhäña'ay maa ja'a Diosän. ²Jim̄
tiuñ tsajpootyp maa ja'a tsajtøjc
hoybän, ja'a Dios yhädiuunäbä. Ca'a
jiäya'ayä je'e hädiuun. ³Haa ja'a
hajxy yaa tuumbä teedywiindsøn
hädaa yaabä naaxwiinä, jaduñ
hajxy piäda'agyii coo animal
hajxy yóxät, coo hajxy cøxiä
wiinä quiuyoxø'owät. Jadúhñäc
tyijy ja'a piojpa quiädieey hajxy
ñähwa'ads quiuhwá'adsät. Y coo
ja'a Jesucristo jim̄ teedywiindsøn
tiuñ tsajpootyp, paady jaduñ
ñiñähdujca. ⁴Coo häxøpy yaa
yhity hädaa yaabä naaxwiin, cab
häxøpy tiuñ teedywiindsøn. Haa
ja'a hajxy yaa tuumbä teediä,

je'eds hajxy cuyoxøøby nebiä jecyquihdujt yhane'emiän. ⁵Haa ja'a tsajtøjc yaabä maa hajxy tiüñänä, cab jaduñ miäbaady nebiä tsajtøjc jim tsajpootypän. Coö ja'a Moisés ja'a wittsajtøjc hänajty quioja'añ, mäniä Dios ja'a Moisés ñämaayy: "Tsipcøxpä wittsajtøjc jaduñ mgójät nébiøch jim nyaghixiän tunguhduum coö mnähguipxtú'udät." ⁶Tøø ja'a Dios ja'a hawiinjemybiä jajcuhducy coö hajxy jim xyaghidáanäm tsajpootyp øjxta'axiøø. Haa hädaa hawiinjemybiä ja'a Dios jajcuhdujcabä, maas hoy je'eduhñ quejee ja'a Moisés jecy yéjcabä. Paadiä Jesucristo maas hoy tiuñ teedywiindsøn quejee ja'a teedyhajxy, ja'a hajxy hädaa yaabä naaxwiimbä. Ja'a Moisés jecy yéjcabä, cab hajxy jaduñ xjiaty puhbéjtäm nebiä hawiinjemybiän, ja'a jäda'ahatypän.

⁷Coö hajxy häxøpy xpiuhbéjtäm ja'a Moisés jecy jia yéjcabä, cabä Dios ja'a hawiinjemybiä häxøpy tøø ñä'a jajcuhducy. ⁸Cabä Dios ja'a jecyjiäya'ayhajxy quiumaayy je'eguiøxpä coö hajxy hoy quia'a cudiuuñ. Jaduhñ jim myiñ cujaay maa ja'a Diosmädia'aguiän:

Ja'a Dios jaduñ mänaamb:
Abaadaamb jaduñ
coöchä jäya'ayhajxy
nmøødyajcuhduga'añ ja'a
hawiinjemybiä,
ja'a hajxy jim tsänaabiä
judíos-naaxooty møøð
Judábä-naaxooty.

⁹Maas hóyhøch jaduñ
nmøødyajcuhduga'añ
quejéjøch ja'a yhap

ja'a tieedyhajxy
nmøødyajcuhdujcän
mänáajøch hajxy jim
hoy nwoobädsømiän
Egiptonaaxooty.

Cab hajxy hoy ñä'a cudiuuñ
nébiøch nja jajcuhdujquiän.
Páadyhøch hajxy jaduhyyä
nnä'a nähgueecnä, nømä Dios
miänaañ.

¹⁰Coö jaduñ yhabáadät,
mäniätøchä jäya'ayhajxy
nmøødyajcuhduga'añ ja'a
hawiinjemybiä, ja'a hajxy jim
tsänaabiä judíos-naaxooty,
nømä Dios miänaañ.

Nyajnähiø'owáambiøch
nmädia'agy hajxy hoy, neby
hajxy hamuumdu'joot jaduñ
wyiinjuø'owät.

Mänitøch hajxy jaançh tehñ
yhoy xwyiingudsähgø'owa'añ.
Høøch hajxy ngu'ughadáannäp.

¹¹Nägøxiøchä nmädia'agy hajxy
xmiäbøgaanä ñämaj ñäbetiä.
Haagä mäbøgaamb hajxy
jaduhñ.

¹²Nyajnähwa'adsáanäbøch
ja'a piojpä quiädieey
hajxy. Cábøchä piojpä
quiädieeyhajxy mänaa
njahmiedsáanänä.

¹³Coö ja'a Dios miäna'añ coö ja'a
hawiinjemybiä tøø jajcuhducy,
jaduhñ miänaambä coö ja'a jecypiä
quia'a tsoobaatnä, coö quia'a
tunaannä.

9 Jaduhñä jecyquihdujt
myiimbä mädyii ja'a
jäya'ayhajxy quiudiünäp maa ja'a
chajtøjc-hajxiän. ²⁻³Jaduhñdsä
wittsajtøjc hajxy jecy yhädiuñ.
Coö ja'a wit hajxy yaghadøødiujcy,

metscä cuarto jaduñ hoy miähmø'øy. Tu'nax hoy møj miähmø'øy; ja'a cujpä muutsc hoy miähmø'øy. Ja'a cuarto möjpä, je'eduhñ xøhajt “cunuu'xytiøjc”; jiiäiä ceratoyøhñdy hajxy yaghijty møødä meexä maa ja'a cunuu'ychajcaagy hajxy hñajty yujcoñän. Ja'a cuarto muutspä, je'eduhñ xøhajt “cunuu'xytiøjc maa ja'a Dios yhäña'ayän.” ⁴Ja'a orohaltar jiiäiä hijt maa ja'a poom hajxy hñajty jioquiän, møødä cuhdujtcjä; oronähwopy hñajty je'e. Jiiäiä cajäjooty ja'a orotu'ts yhiäiä maa ja'a manä hajxy hñajty yaghitiän. Ja'a manä, je'edsä tsajcaagy hñajty xiøhaty ja'a Dios jecy quiéjxäbä. Jiiäiä Aarón ja'a quiuhdajt yhiäiä ja'a jecy wáamäbä. Jiiäiä tsaä yhiäiä maa ja'a Dios ja'a cuhdujt jecy yuugjahyyän. ⁵Cajänähgøxpä querubín yhäñädiuunnaxyhajxy yhiäiä “maa ja'a Dios yhäña'ayän.” Jimä quieecthajxy quiäijøjna'ay “maa ja'a Dios pojpä cädieey miee'xiän.” Cábøch ngapxtøwa'añ nebiaty hädaaduhmbä hijty tiuñ. ⁶Coo ja'a wittsajtojc hajxy hñajty tøø quiojnä, mänitä teedyhajxy jiiäiä tiägøøchøhñnä maa ja'a möjccunuu'xytiøjcän. Jiiäiä hajxy jabom-jabom tiuunnä. ⁷Pero jiiäiä maa ja'a muutscunuu'xytiøjcän maa ja'a Dios hñajty yhäña'ayän, jagooyä teedywiindsøn hijty jiiäiä tiägø'øy. Tähoøquiä hajxy hijty jiiäiä tiägø'øy ja'a tu'ugjomøjtpä. Coo hajxy hñajty jiiäiä tiägø'øwa'añ, jayøjpä animal hajxy hijty yagho'ogy. Mänitä animalnø'ty hajxy hijty jiiäiä nøcxy quiuyoxø'øy

muutscunuu'xytiøgooty, ja'a piojpä quiädieeguiøxpähajxy, møødä cu'ugä piojpä quiädieeguiøxpähajxy. ⁸Jaduñä Dioshespíritu hajxy xyajwiinjuøøyyäm coo hajxy hoy nga'a tägøøyyämät maa ja'a Dioswiinduumän mäduhñtiä ja'a jecyquihdujt hajxy yajtuññä. ⁹Jaduñ hajxy jäda'anäbaadyñä nhijtäm. Je'enä animal hajxy yoxy; je'enä hajxy cøxiä wiinä quiuyoxø'øy. Paady hajxy jaduñ quiuhdujthatyñä, jaduhñäc tyijy ja'a Dios jiaanč tehñ quiumay. Cab hajxy jaduñ nähwa'ačh quiuhwa'ačh, hoy hajxy jaduñ jia cuhdujthatyñä. ¹⁰Jagooyä ja'a quiuhdujthajxy yhäñäemy tijaty hajxy quiäyap yhäñä'ugäp, neby hajxy ñibiuj ñijie'edsøøjät, neby hajxy yaa jiiäiä'ayhäñä hädaa yaabä naaxwiin. Pero yøø cuhdujt jaduñmbä, cab jaduñ tiuunnä. Tøø ja'a Dios ja'a hawiinjemybiä yajcuhdujnä, mädyii jaduñ tunaamb.

¹¹Mänitä Jesucristo hajxy hoy xjiaanč tehñ yajnähwäatsäm. Jaaya'ay jaduñ túunnäp teedywiindsøn jim tsajpootyp maa ja'a tsajtojc jaanč tehñ yhöybän. Ca'a jiiäiä'ayä hajxy hädiuun hädaa yaabä naaxwiimbä. ¹²Tøø ja'a Jesucristo jim tiägø'øy maa ja'a Dioswiinduumän ja'a tähoøtagø'øyyä. Hamdsoo hñajty tøø ñiñähdugyii coo højts hñajty xñähho'tu'udäñäm. Cabä tii nø'ty quiuyoxøøyy maa ja'a yaabä tsajtojcän nebiä yaabä teedyhajxy quiuhdujthatiän coo chivo hajxy yoxy, coo waj hajxy yoxy. Coo ja'a Jesucristo hajxy tøø xñähho'túütäm,

paady hajxy jim nhidáanäm
Dioswiinduum cõjxta'axiõõ.

¹³Jaduhñä jäya'ayhajxy
quiuuhdujthaty, coo hajxy yho'ogõ'õy,
mänitä chivonõ'ty wajnõ'ty
hajxy yajniñähxänicxyii. Mänitä
wajcujiaam hajxy yajniñähwõjyii,
ja'a hajxy hänäjty tõõ

ñäno'ogõ'õyábä maa ja'a altarän.
Jaduhñ hajxy ñiyajñähwa'açhii.

¹⁴Hoorä, ja'a chivonõ'ty, ja'a
wajnõ'ty, cabä pojpä cädieey mänaa
yajñähwa'açh. Ja'a Jesucristo
hajxy jaduhñ xyajñähwáatsäm
mänaa hajxy xñähho'túutäm. Cabä
Jesucristo tii pojpä cädieey miõõdä.
Cab jaduhñ mänaa yho'ogaannä.

Hamdsoo jim ñiñähdujca
maa ja'a Dioswiinduumän.

Jaduhñä nhaxõõgcuhdujt
hajxy xyajñähwáatsäm, nebiä
Diosmädia'agy hajxy jaduhñ maas
hoy nmäbõjcamät.

¹⁵Coo ja'a Dios ja'a hawiinjemybiä
tõõ yajcuhdujcy, paadiä Jesucristo
hajxy xñähho'túutäm, pønjatiä Dios
jaduhñ wyiimbiiw. Xyajñähwáatsäm
ja'a nbojpä ngädieey hajxy nebiaty
hajxy tõõ njäya'ayhajtäm maa
ja'a jecypiä yhiytiän. Y jim hajxy
xyajñõcxáanäm tsajpootyp nebiä
Dios hajxy xyajwiinwaanõõyyäm.

¹⁶⁻¹⁷Homiädyii testamentänoquiä,
cahnä tiuungpaadyñä, jugyhajpnä
jaaya'ay jaduhñ. Coonä yhõ'ogät,
mänitnä ja'a nocy tiuungpaada'añ.

¹⁸Paadiä Dios jaduhñ miänaañ coo
animal hajxy yóxät, mänaa ja'a
jayõbhajtpä yajcuhduquiän. ¹⁹Coo
ja'a Moisés ja'a cu'ugä jecyquiuuhdujt
hänäjty tõõ quiõxy mo'oy, mänitä
wajhuung yojxy mõõdä chivohuung.
Mänitä nõ'ty hoy ñõõdemõõyyä.

Mänitä tsaptsmeegpõjt hoy
piäda'agy nõ'ñõõjooty mõõdä
hisopohaa'x. Mänitä cu'ug ja'a
nõ'ñõõ yajñähxänicxy mõõdä
jecyquiuuhdujttsaa. ²⁰Mänitä
Moisés miänaañ: “Haa hädaa
nõ'tiä, hijxtahnd hädaaduhñ coo
mijtsä Dios xmiõõdyajcuhdujcy.”
²¹Mänitä Moisés ja'a wittsajtõjc
ja'a nõ'ñõõ hoy yajñähxänicxpä
mõõd tijaty hajxy jiiby yajtuumbly
mänaa ja'a Dios hajxy hänäjty
wyiingudsähgõ'õyän. ²²Jaduhñä
jecyquiuuhdujt hijty yhane'emy
cooc cõxiä ñähwa'açhii nõ'tyaam.
Coogä animal hajxy quia'a yóxät,
cábägä piojpä quiädieey hajxy ñä'ä
nähwá'adsät.

²³Haa ja'a wittsajtõjc hädaa yaabä
naaxwiimbä, mõõd tijaty jiiby hijp
tsajtõgootiä, animalnõ'tyaamä
Moisés yajñähwaach. Pero
hõjtshajtäm, ni mänaa ja'a
animalnõ'ty hajxy xquia'a
yajñähwáatsämät. Paadiä Jesucristo
hajxy hoy xñähho'túutäm, jaduhñ
hajxy nnähwáatsäm. ²⁴Tõõ ja'a
Jesucristo jim tiägõ'õy maa ja'a
Dioswiinduumän. Jim hajxy
xñähgapxtúutäm. Ca'a yhädaa
yaabä tsajtõgootiä tiägõõyy. Haa
ja'a tsajtõjc yaabä, cab jaduhñ
tiehñ miäbaady nebiä tsajtõjc
jim tsajpootypän. ²⁵⁻²⁶Haa ja'a
teedywiindsõñ hädaa yaabä
naaxwiimbä, jomõjt-jomõjt
jiiby tiägõ'õy maa ja'a
muutsunuuxyitiõjcän. Jiibiä
animalnõ'ty nõcxy quiuyoxõ'õy.
Pero ja'a Jesucristo, tähooquiä
yho'cy. Cabä Dios jaduhñ miänaañ
coo mayhooc yhõ'ogät. Coo
yhabaaty, mänitä Jesucristo

hajxy hoy xñähho'túutäm ja'a nbojpä ngädieeyhajtäm. ²⁷Ja'a Dios hajxy xquiunúu'xäm xpiädáacäm coo hõjts tähooquiä nho'ogáanäm. Mänitä Dios hajxy xyajtøyhajtyegáanäm. ²⁸Jaanä tähooquiä ja'a Jesucristo hajxy xñähho'túutämbä ja'a nbojpä ngädieeyhajtäm. Tähoocyajnáhwa'achä hajxy xyajnáhwaats xyajcuhwáatsäm. Coo jadáhooç quiädaactägatsa'añ, mänit hajxy jim xyajnöçxáanänä maa ja'a Dioswiinduumän, pønjaty hänäjty jaduhñ jii jøbhijxp.

10 Haa ja'a jecyquihdujt, hijxtahñd hänäjty jaduhñ hijp coo ja'a Jesucristo hajxy hänäjty xñähho'tu'udáanäm. Nebiä jecyquihdujt hänäjty yhane'emiän, jomøjt-jomøjtä animal hajxy jia yoxy. Pero ni pøn hänäjty quia'a nähwa'ach quia'a cuhwa'ach, pønjaty hänäjty ja wi'i tiägø'owáambäp maa ja'a Dioswiinduumän. ²Coo hajxy häxøpy tøø jiaanç nähwa'ach tøø jiaanç cuhwa'ach ja'a piojpä quiädieey hajxy, cabä animal hajxy häxøpy yojxnä. Tähooquiä hajxy jaduhñ cu yojxy, mänit jaduhñ cu yhojøøyy. Hamdsoo hajxy cu ñajuøøyy coo pojpä cädieey hajxy quia'a møødänä. ³Pero coo animal hajxy hänäjty jaduhñ yoxyñä jomøjt-jomøjt, ñajuøøby hajxy hänäjty jaduhñ coo pojpä cädieey hajxy miøødä. ⁴Hix, ni mänaa ja'a wajnö'ty ja'a chivonø'ty ja'a pojpä cädieey quia'a yajnáhwa'ach quia'a yajcuhwa'ach.

⁵Paadiä Cristo ja'a Dios ñämaayy, mänaa hänäjty jaduhñ yaa tøø

quiäda'aguiän hädaa yaabä naaxwiin:

Caj miich mjoot jaduhñ chocy coo ja'a animal hajxy tehngajnä yóxät.

Páadyhöch miich yaa xquiejxy hädaa yaabä naaxwiin cooçh yaa njäya'ayhádät, nébiøçhä jäya'ayhajxy jaduhñ yaa nnähho'tú'udät.

⁶Caj miich mjoot jaduhñ chocy coo animal hajxy yóxät, coo hajxy ñó'ogät.

Paadiä animal hajxy yoxy, nähwaatspä piojpä quiädieeyhajxy jaduhñ.

⁷Mänitøch nmänaañ:

“Dios, páadyhöch jaduhñ yaa tøø ngäda'agy nébiøch jaduhñ yaa ngudiúnät nébiøch miich xñämaayyän, neby jaduhñ jim myiñän cujaay maa miich mmädia'aguiän ja'a høøçhcøxpä”,

nømä Cristo ja'a Dios ñämaayy.

⁸Jayøjpä Cristo miäna'añ cooc ja'a Dios jioot quia'a tsoçy coo animal hajxy quia'a yóxät ni quia'a nó'ogät. Ja'a piojpä quiädieey hajxy jaduhñ yajnáhwáatsäp yajcuhwáatsäp. Hoyyä jecyquihdujt jia hane'emy coo hajxy tehngajnä yóxät, cabä Dios jaduhñ quiumay. ⁹Jaduhñ miänáangombä: “Teedy, páadyhöch yaa tøø ngäda'agy nébiøch jaduhñ yaa ngudiúnät nébiøch miich xñämaayyän.” Jaduhñ miädia'agytiägø'øyy coo ja'a Cristo hänäjty jaduhñ yhane'ema'añ coo animal hajxy quia'a yójxnät, nebiä Tiedy miädia'agy jaduhñ quiudiúunät. ¹⁰Hoyyä Jesucristo ja'a Tiedy miädia'agy jiaanç

cudiuunä coo hõjts jaduñ
tähooquiä xñähho'túutäm;
paadiä Dios hajxy xyajñähwaats
xyajcuhwáatsäm.

¹¹Jaduhñä jecyquihdujt hijty
yhane'emy coo ja'a teediä animal
hajxy jabom-jabom wyi'i yóxät.
Hoy hajxy jaduñ jia cudiuun, cab
hajxy jaduñ ñä'ägädä nähwaach
ñä'ägädä cuhwaach. ¹²Coo ja'a
Jesucristo ja'a nbojpä ngädieey
hajxy hánajty tøø xñähho'túutäm
tähooquiä, mänit hoy

yhänaaguiäda'agy maa ja'a Dios
yhahooyhaampiän. ¹³Jim jaduñ
yhahixy coo ja'a miädsiphajxy
quia'a mäjäda'aga'añ. ¹⁴Tähooquiä
hajxy tøø xñähho'túutäm.

Jaduhñä nbojpä ngädieey hajxy
xyajñähwaats xyajcuhwáatsänä.
¹⁵Jaduhñä tøyhajt hajxy
nmøødhájtäm coo tiøyyä,
je'eguiøxpä coo ja'a Dioshespíritu
jaduhñ miänaambä maa jaduñ
cujaay myiñän:

¹⁶Coo jaduñ yhabaadät,
mänítöch hajxy
nmøødyajcuhduga'añ, nõmä
Dios miäna'añ:

Nyajñähixø'owáambioch
nmädia'agy hajxy hoy, neby
hajxy jaduñ hamuumdu'joot
wyiñjuø'owät.

¹⁷Mänit miänáangombä:

Cábøchä piojpä quiädieeyhajxy
mänaa njahmiedsáanänä.

¹⁸Jaduhñds je'e, tøø ja'a Jesucristo
ja'a nbojpä ngädieey hajxy
xyajñähwaats xyajcuhwáatsänä
tähooquiä. Hoyyä animal hajxy jia
yoxyñä, cab jaduñ choobaatnä.

¹⁹⁻²⁰Hermanodøjc, maa ja'a
jecyquihdujt myiñän, cabä cuhdujt

pøn miøødä coo jiiby tiägø'owät
maa ja'a muutscunuu'xytiøgootiän.

Pero coo ja'a Jesucristo hajxy
tøø xñähho'túutäm, paady
hajxy jim hoy ndägø'owáanänä
maa ja'a Dioswiinduumän. Tøø
hajxy xyajñähwaats tøø hajxy
xyajcuhwáatsäm ja'a nbojpä
ngädieeyhájtäm. ²¹Je'eds hajxy jim
xñähgapxtúutäm Dioswiinduum.

²²Entonces, tsøg hajxy jim
tägøøyyäm Dioswiinduum. Tsøgä
miädia'agy hajxy hamuumdu'joot
mäbøjcam coo ja'a cuhdujt hajxy
nmøødhájtäm coo hajxy jim
ndägøøyyämät, je'eguiøxpä coo ja'a
Jesucristo hajxy tøø xñähho'túutäm.
Jaduhñä nbojpä ngädieey hajxy tøø
xyajñähwaats tøø xyajcuhwáatsäm.

²³Tsøgä Diosmädia'agy hajxy
tehngajñä mäbøjcam. Cab hajxy
nnajtshixøøyyämät. Nmøødhájtäm
ja'a tøyhajt hajxy jaduñ coo ja'a
Dios hajxy xmio'owáanäm nebiaty
hajxy tøø xyajwiinwaanøøyyäm coo
hajxy cøxiä wiinä xmio'owáanäm.

²⁴Tsøg hajxy niguiapxwíjjäm
neby hajxy maas hoy nniçhoje
nnibia'häyøowämät hamiñ haxøpy,
neby ja'a Diosmädia'agy hajxy
jaduhñ maas hoy ngudiúunämät.

²⁵Jaduhñ hajxy nyajñajuøøyyäm
coo miäwiingoönä coo ja'a
Jesucristo yaa quiädaactägatsa'añ.
Paady, tsøg hajxy

nijjootcapxmøpcøjcam. Tehngajñä
hajxy nhamugøøyyämät ja'a
Dioscøxpä. Naje'e hajxy, cab hajxy
jaduhñ ñä'ägädä mejtsnä. Cabä
quihdujthajxy jaduñ yhooyä.

²⁶Coo hajxy tehngajñä haxøøg
nwädíjtämät, hoyyä tøyhajt hajxy
tøø nja wiinjuøøyyäm, cabä nbojpä

ngädieey hajxy jaduhñ ñä'ägädä nähwáatsámät. ²⁷Haxøøgtuumä Dios hajxy jaduhñ xpiädáacámät maa ja'a jøøn tiogyän, maa ja'a Dios miädsiphajxy yhitiän. Hočähgøøñä jaduhñ jiiby. ²⁸Pøn jaduhñ ca'a cudiuumb nebiä Moisés ja'a jecyquihdujt yhane'emiän, pø tøø testigohajxy jaduhñ yhixy mejstägøøgä, tsipcøxp jaduhñ yagho'oga'añii. ²⁹Maas hanaxiä hajxy jaduhñ quiumädowaannä pønjaty ja'a Dioshespíritu jaduhñ haxøøg nänøømb, ja'a mayhajt tuumbä, pønjetiä Dioshuung jaduhñ xøøghajp, pønjetiä ñø'ty jaduhñ häyoowhíjxäp, hoy hajxy je'eduhñ tøø xjia nähho'túutäm, hoy hajxy je'eduhñ tøø xjia yajnáhwaats tøø xjia yajcuhwáatsäm. ³⁰Tøyhajtä Dios jaduhñ miänaañ: "Høøčh jaduhñ nyaghawiimbidaamby." Chaadsä Diosmädia'agy miänáangumbä: "Dios quiu'ug jaduhñ yajcumädowaambä." ³¹Hočähgøøñä jaduhñ coo ja'a Dios hajxy xyajcumädóowämät; je'eduhñ jugyhajp cøjxta'axiøø. ³²Naxy hajxy mdehm jiahmiédsät nebiä Jesucristo miädia'agy hajxy mmädoodsohnän. Hamuumdu'joot hajxy mbadu'ubøjcy, hoy hajxy hánajty mja tsaächpøcy hoyhoy. ³³Näje'e hajxy myaghäyoowhijxy cu'ughagujc. Y mjootcapxmøcpøjpy hajxy hánajty pønjaty hánajty jaduhñ häyoowhíjxäp. ³⁴Y mnäxuu'chp hajxy hánajty pønjaty hánajty tsumyčhánaaby. Mxoondaacp hajxy hánajty, hoy hajxy cøxiä wiinä xjia pøjcä. Mnajuøøby hajxy hánajty coo hajxy jim mhida'añ tsajpootyp

cøjxta'axiøø. ³⁵Entonces, cab hajxy tii mdájät mmáyät; tehngajnä hajxy mmäbøgät coo ja'a Dios hajxy xyhixyñä. Mjahmiédsäp hajxy jaduhñ coo hajxy nøcxy jim mhidaannä tsajpootyp. ³⁶Naxy hajxy mdehm miee'xtügät, nebiä Diosmädia'agy hajxy jaduhñ hoy mgudiúnät. Jaduhñ hajxy mbáadät tijaty ja'a Dios hajxy tøø xyajwiinwaanøøyyäm coo hajxy xmio'owáanäm. ³⁷Jaduhñä Diosmädia'agy miäna'añ:

Mobädajpä je'e quiäda'aga'añ pønä Dios jaduhñ quiexaamby.

³⁸Pønä Diosmädia'agy hoy cudiuumb, miäbøjpy je'eduhñ tehngajnä.

Pero coo ñajtshixø'owät, cabä Dios quiumayaannä.

³⁹Pero højtshájtäm, cab hajxy mänaa nnajtshixø'owáanäm. Tehngajnä hajxy nmäbøjcam. Paadiä Dios hajxy xyhuuc yajnáhwa'adsáanämbä. Cab hajxy xyajcumädowáanäm.

11 Coo hajxy nmäbøjcam, mäniä töyhajt hajxy nmøødhájtäm coo hajxy nbaadäänäm mädyiijaty hajxy njøbhíjxäm, hoy je'eduhñ quia'a ja cähxø'ogyñä. ²Ja'a jecyjiäya'ayhajxy, coo hajxy miäbøjcy, paadiä Dios quiumaayy.

³Coo hajxy nmäbøjcam, jaduhñ hajxy nyajnajuøøyyäm coo ja'a Dios ja'a naaxwiin yajwa'añguiojy ja'a miädia'agyhaam, møødä madsa'a, møødä po'lo, møødä xøø.

⁴Coo ja'a Abel jecy miäbøjcy, paadiä Dios quiumaayy. Hix, hoyyä Abel quiudiuun coo animal yojxy ja'a Dioscøxpä. Ja'a Caín,

caj quiumaayyã je'eguiøxpã coo hãnajty quia'a mãbøcy. Hix, cabã animal vojxy. Hoy jadhun coo ja'a Abel hajxy nbahjxãmät, hoy jecy jia yagho'cã. Hix, miãbøjc ja'a Abel.

⁵Coo ja'a Enoc jecy miãbøjcy, paadiã Dios quiumaayy. Cabã Enoc ñã'ã ho'cy. Jadhuyyã Dios yajnøcxy tsajpootyp. Jadhun jim myiñ cujaay maa ja'a Diosmãdia'aguiã. ⁶Coo hajxy nga'a mãbøjcãmät, cabã Dios hajxy xquiumáayyãmät. Tsipcøxp hajxy nmãbøjcãmät coo ja'a Dios tiømiãdia'agy. Y jadhun hajxy nmãbøjcãmät coo ja'a Dios piuhbeda'añ pønã Dios wiingudsãhgø'owaamb.

⁷Coo ja'a Dios ja'a Noé jecy ñãmaayy coo ja'a nõøgomdãgoy ja'a naaxwiin hãnajty quiøxy wiinyeegø'øwa'añ, mãnitã Noé ja'a Dios miãdia'agy jadhun quiuidiuunã, hoyyã nõøgomdãgoy hãnajty quia'a ja cãhxø'øgyñã. Mãnitã barco cruundã yhãdiuunã. Jiibiã Noéhajxy choocy møødã yhuung møødã tio'oxy. Coo ja'a Noé jadhun miãbøjcy, paadiã Dios jiaançh tehñ quiumaayy. Pero ja'a wiinghãna'c-hajxy, cab hajxy miãbøjcy. Paady hajxy øjx quiuhdãgoy.

⁸Coo ja'a Dios ja'a Abraham jecy ñãmaayy coo jim chõonãt ñãaxooty, coo jãguemnaax ñøcxãt maa ja'a Dios ja'a Abraham yajnhãdijjiã coo chãnaadiaacpøgãt, miãbøjc ja'a Abraham jadhun. Mãnit jim jiaançh tsohñã ñãaxooty. Nã'ã nõøobã ñã'ã tu'ubøjnã. Cab hãnajty ñajuø'øy maa ñøcxãt.

⁹Coo ja'a Abrahamhajxy jim miejch maa ja'a Dios hãnajty tøø

yajnhãdijjiã, cab hajxy tiehm chãnaadiaacpøjcy, je'eguiøxpã coo hãnajty jiãya'añaaxootiã. Wittøgooty hajxy hãnajty chãna'ay. Pero miãbøjpiã Abrahamhajxy hãnajty coo ja'a naax hajxy hãnajty mio'owa'añii, neby hajxy hãnajty tøø yajwiinwaanø'øyijã ja'a Diósãm. Jadhunã Abraham yhuung Isaac ñãmáayyãbã møødã yhoc-huung Jacob. ¹⁰Hix, ñajuøøbiã Abrahamhajxy hãnajty coo hajxy hãnajty jim ñøcxa'añ tsajpootyp Dioswiinduum. Cab hajxy hãnajty tiajy miay coo ja'a naax hajxy quia'a tsoj mooyyã.

¹¹Jaanã jadhunã Sara jecy miãbøjpã. Tøø hãnajty miãjaanã mãnaa ja'a Dios hoy piuhbetiã coo maaxhuung piãadãt. Y jaançh huungpaat ja'a Sara jadhun je'eguiøxpã coo miãbøjcy nebiã Dios hãnajty tøø yajwiinwaanø'øyã. ¹²Y ja'a Abrahamã, hoy hãnajty tøø jia mãjaanã, møjjøøyy mayøøyy je'eduhñ. Tøø ja'a yhap yhoc-hajxy jadhun jiaançh tehñ miayøøñã. Cab hajxy jadhun hoy yajmãchowa'añ. Jadhun hajxy miayyã nebiã madsa'ajã, nebiã tsabiu'ujã.

¹³Coo ja'a Abrahamhajxy yho'cy, cahnã hajxy hãnajty quiøxy paadyñã mãdyijjatiã Dios hãnajty tøø yajwiinwaanø'øy. Pero miãbøjc hajxy jadhun. Ñajuøøby hajxy hãnajty coo hajxy hãnajty jim ñøcxa'añ tsajpootyp. Paady hajxy xioondaacy. Ñajuøøby hajxy hãnajty coo hajxy hãnajty nã'ã nõøobã wiãdityñã. ¹⁴Pønjaty jadhun wãdijp, cahnã tsãnaadiaact hajxy piadyñã. ¹⁵Coo ja'a jioothajxy cu chojcy, cu wyiimbijty hajxy, cu ñøcxtãgajch

hajxy je'e maa hajxy hānajtʸ tøø yhuuc tsohm̄bān. ¹⁶Pero jim̄ä jioot hajxy hānajtʸ hamuumdu'joot tøø piāda'agy tsajpootyp maa ja'a chānaadiaacthajxy hānajtʸ tøø yhahixøøyyāxān. Ja'a Dios jaduhñ hahixøøyy. Cabā Dios miādsāhdiuun̄ ja'a Abrahamhajxy.

¹⁷⁻¹⁸Coo ja'a Dios ja'a Abraham yhanehmy coo yhuung yóxät, ja'a Isaac-hajpä, miäbøgaambiä Abraham hānajtʸ je'eduhñ, hoy ja'a yhuung hānajtʸ jia tu'uquiiä, hoyyā Dios hānajtʸ tøø jia māna'añ: “Møjø'øwaamb mayø'øwaamb miičh mhuung ja'a Isaac-hajpä.” Nā'lä joodhijx ja'a Dios ja'a Abraham jaduhñ pø jiaančh cudiunaamby hānajtʸ jaduhñ. ¹⁹Miäbøjpiä Abraham hānajtʸ coo ja'a yhuung hānajtʸ yagjujyipiøgāanāxā ja'a Diósām. Mānitā Dios miānāangombā coo ja'a yhuung quia'a yaghó'ogät. Jaduhñ māwīnāts ja'a Isaac hoy jiaty nebiä jadāhooc tøø jiujujyipiøquiäbān.

²⁰Coo ja'a Isaac miäbøjcy, paadiä Jacob nāmaayy møødä Esau coo ja'a hoybā ja'a weenbā hajxy piaada'añ. ²¹Coo ja'a Jacob miäbøjcy, paadiä yhoc-huunghajxy nāmaayy coo ja'a hoybā weenbā hajxy piaada'añ. Ja'a José yhuunghajxy je'e. Mānitā Jacob ja'a Dios wyiingudsāhgøøyy. Cuhdajtcøxp hānajtʸ ñiguuiuhdijyii. Ho'ogāannāp hānajtʸ je'eduhñ. ²²Coo ja'a José miäbøjcy, ñajuøøyy jaduhñ coo yhap yhoc-hajxy hānajtʸ jim̄ cujecy choona'añ Egiptonaaxooty. Paady jaduhñ yhanehmy coo ja'a piäjc miänøcxäxät. Ho'ogāannāp hānajtʸ je'ebä.

²³Coo ja'a Moisés myiiñguiahy jaančh tehñ yajxón, yu'učh hajxy yaghijty tægøøgp'o. Hix, tøø ja'a gobiernā hānajtʸ hoy yhane'emy coo ja'a pigāna'c-huunghajxy quiøxy yagho'ogóøjät ja'a ya'ayhāna'cpä. Ja'a Moisés tiaj tieedy, cabā gobiernā hajxy hānajtʸ chāhgø'øy. Miäbøjpiä Diosmädia'agy hajxy hānajtʸ. ²⁴Coo ja'a Moisés miøjøøñä, miäbøjc je'ebä. Cabā gobiernā hānajtʸ tieedyhaphadaannā, ja'a hānajtʸ jim̄ tuumbä Egiptonaaxooty. ²⁵Hamdsoo jaduhñ miānaañ coo ween yhäyoowhixyii møødä Dios quiu'ughajxy näguipxy. Cab hānajtʸ jim̄ miähmø'øwaannā maa ja'a haxøøgcuhdujt hajxy wyi'i tiuñān. Cab hajxy hānajtʸ ñajuø'øy coo hajxy hānajtʸ jejcy quia'a xoonda'agaannā. ²⁶Cabā Moisés ja'a jioot jim̄ piādaacnā maa ja'a xädø'øñān jim̄ Egiptonaaxooty. Maas jootcujc hānajtʸ ñijäwøøyyänā coo yhäyoowhixøøjät ja'a jäya'aguioøxpä, ja'a Dios hānajtʸ quixaambiä. Najuøøby hānajtʸ jaduhñ coo ja'a hoybā weenbā mio'owa'añiijām ja'a Diósām. ²⁷Coo ja'a Moisés miäbøjcy, paady jim̄ chohñnā Egiptonaaxooty. Hoyyā gobiernā hānajtʸ jia jootma'ady, cabā Moisés nā'ägädä tsāhgøøyy. Tāhoctu'ubøquiä ja'a Moisés tiu'ubøjnā. Ja'a Diosmädia'agy hānajtʸ miäbøjpy, hoyyā Dios mānaa quia'a ja hixyii. ²⁸Coo ja'a Moisés miäbøjcy, paadiä pascuaxøø yagjajtä. Jaduhñ yhanehmy coo ja'a tøghagø'øw nø'ty hajxy yajwiinxānicxø'øwät, nebiä judíos quioobhuunghajxy quia'a yaghó'cäxät, ja'a

ya'ayhäna'cpä. Ja'a Dios ja'a mioonsä tsajpootypä tu'ug quejx coo ja'a quioobhuunghajxy yaghó'cäxät, ja'a ya'ayhäna'cpä, pönjatiä nø'ty hänajty tøø quia'a yajwiinxänicxø'øy ja'a tøghagø'øw. ²⁹Coo judíoshajxy jaduhñ miäbøjcy, mänitä Dios ja'a Tsaptsmejy cujx yaghawaach maa hajxy jaduhñ ñaxø'øwät tø'ødstuum. Mänitä Egiptobä-jäya'ayhajxy hoy jia panaxaambä. Mänitä Dios ja'a nøø hoy yajtu'ugmújcombä. Cøjxä Egiptobä-jäya'ayhajxy ñøøho'ogø'øy. ³⁰⁻³¹Coo ja'a judíoshajxy miäbøjcy, paadiä cajpt hajxy juxtujc-hooc jiuhyohwiädipty ja'a xøhajpä Jericó. Mänitä tsaamuuch piuumnä. Je'e hänajty curaahajp wäditiä maa ja'a cajptän. Cøjxä jäya'ayhajxy jiiby yho'nä, ja'a hajxy hänajty ca'a mabøjpä. Coo ja'a quixy Rahab miäbøjcy, hoy hänajty jia tuñ maa ja'a burdelän, paady jaduhñ quia'a ho'cy, je'leguixpä coo ja'a judíos hänajty tøø yu'uäch, ja'a hajxy hänajty wädijpä hixøøbiä woodsøøbiä.

³²Coo cu ñäbaadøøyy, cu nmädiäacyhöch ja'a Gedeón, ja'a Barac, ja'a Sansón, ja'a Jefté, ja'a David, ja'a Samuel, møødä Dios ja'a quíuguexyhajxy. ³³Coo hajxy miäbøjcy, paadiä miädsip ja'a ñaax hajxy hoy miämähmøøyyanä; paady hajxy hoy guiobiernähajty; paadiä Dios hajxy xpiuhbéjtäm nebiaty hajxy hänajty tøø xyajwiinwaanø'øyyäm; paady hajxy quia'a leontsu'tsä; ³⁴paady hajxy quia'a tooyy møjjøønhaajiooty; paady hajxy quia'a cuhbujxä. Ja'a häna'c-hajxy ca'a møcpä, mänitä

mäjaa hajxy piaaty mänaa hajxy hänajty chiptuna'añän. Cabä miädsip hajxy yajmäjädaacy, hoyyä miädsiphajxy hänajty jia nämayyä. Ñä'ägä yajpäyø'c hajxy je'e. ³⁵Jii ja'a to'oxiøjc-hajxy hänajty näje'e ja'a yhuung ja'a ya'ay jiuypiojcy.

Näje'e ja'a Diosmädia'agy hajxy yajcudsaaächtiunøøyyä. Coo ja'a Diosmädia'agy hajxy hänajty quia'a nä'ägädä najtshixø'øwa'añ, mänit hajxy yaghó'cänä. Tøø hajxy hänajty ñajuø'øy coo hajxy jiuypioğa'añ, coo hajxy jim ñøcxa'añ tsajpootyp. ³⁶Näje'e hajxy wyiinwohnä wiobho'cä. Høxtä yajcudsumøøyyä hajxy näje'e cø'øxoch. ³⁷⁻³⁸Näje'e hajxy quiuhga'tsä, näje'e hajxy jiøø'wa'xä, näje'e hajxy quiuhbujxä. Jim hajxy hänajty näje'e wiädity pactuum, wiinwa'adstuum, tunjooty. Jim hajxy hänajty näje'e chäna'ay tsaajutjooty. Cabä howyit hajxy hänajty miøødä. Meeghac chivohac hajxy hänajty wyithajpy. Jaguiay hajxy hänajty yhity. Xøøghajtäp hajxy hänajty, häyoowhíjxäp hajxy hänajty. Paady hajxy hänajty jaduhñ jiaty yhabety coo ja'a Diosmädia'agy hajxy hänajty miäbøcy. Jaanç tehñ quiumáayyap hajxy hänajty ja'a Diósäm. Cabä Dios jaduhñ quiumay pøn ca'a mabøjp. ³⁹Hoy hajxy jia cumaayyä, cab hajxy miooyyä mädyiijatiä Dios hänajty tøø yajwiinwaanø'øy. ⁴⁰Jäguemiä Dios wyiinmahñdyhajty coo ja'a hoyhajt ja'a weenhajt hajxy xmio'owáanäm. Paadiä jecyjiäya'ayhajxy quia'a tsoj mooyyä, näguipxiä Dios hajxy jaduhñ xmio'owáanäm møødä jecyjiäya'ayhajxy.

12 Tsøgä jecyjiäya'ay hajxy jaduhñ pahíjxäm nebiä Diosmädia'agy hajxy miäbøjquiän. Tsøgä haxøøguhdujt hajxy najtshixøøyyäm. Tsøgä nhamdsoo cuhdujt hajxy høxhíjxäm. Je'eduhñ wiingtuum xjia wi'i wioonøcxäänäm. Tsøg hajxy tehngajnä cudiúunäm nebiä Dios hajxy xyhanéhäm. ²Tsøgä Jesucristo hajxy hamuumdul'joot pahíjxäm. Jaaya'ay hajxy xyajnahixøøyyäm coo ja'a Diosmädia'agy hajxy hoy nmäbøjcämät. Hoçhähdiuunnä ja'a Jesús mähdijc jaduhñ yho'cy cruzøxp. Pero ñajuøøby hänäjty je'eduhñ coo hänäjty jim nøcxy xioonä'aga'añ tsajpootyp. Jim jaduhñ yhänaañ maa Dios yhaooyhaampiän.

³Tsøgä Jesucristo hajxy jahmiejtstáacäm coo jiaançh tehñ chaaçhpøjcy. Ja'a cahwiindøyhäna'c-hajxy jaduhñ jatcøøyy. Míee'xtujc ja'a Jesucristo jaduhñ. Tsøg hajxy jaduhñ pahíjxäm; jaduhñ hajxy nga'a jootmayhájätämät. ⁴Hoyyä haxøøgpä hajxy xjia mädsiphájätäm, cahnä hajxy jaduhñ xyaghó'cäm.

⁵Ja'a Dios hajxy jaduhñ xjiootcapxmøcpójcäm maa ja'a miädia'agy cujaay myiñän:

Huung, ca'a mjootma'ady, hoyyä Dios tøø xjia yajcumädooy. Hoy xjia hojy, ca'a mjootmayhaty.

⁶Miägaxyp yhanehmbiä Dios pønjaty chojpy; yajcumädooby pønjaty yhuunghajpy.

⁷Coo ja'a Dios hajxy yajcumädówät, mmee'xtúgäp

hajxy jaduhñ. Hopiønñä yhuung yajcumädooy. ⁸Yajcumädoobiä Dios ja'a yhuunghajxy nägøxiä; y pø caj mijts jaduhñ xyajcumädooy, cähxø'p jaduhñ coo ja'a Dios hajxy tøyhajt xquia'a huunghaty. ⁹⁻¹⁰Ja'a hajxy ndeedyhájätämbä hädaa yaabä naaxwiimbä, nwiingudsähgøøyyäm hajxy jaduhñ, hoy hajxy hijty xyajcumädóowäm mänaa hajxy tøø nmuutsc-hájätäm. Paady hajxy hijty xyajcumädóowäm coo hajxy hijty nga'a mädia'agymiäbøjcäm. Hoorä, tsøgä nDeedyhájätäm hajxy mädia'agymiäbøjcäm, ja'a jim tsajpootypä. Mänit hajxy jim xyaghíjtämät. Paadiä Dios hajxy xyajcumädóowäm, nebiä miädia'agy hajxy jaduhñ maas hoy nmäbøjcämät, nebiä hawa'adstuum hajxy jaduhñ hoy nhíjtänät nebiä Dios yhitiän. ¹¹Tøyhajt hajxy ndsaaçhpøjcy mänaa ja'a Dios hajxy xyajcumädóowäm. Nbáatäm ja'a tsaachpä hajxy jaduhñ. Pøn jaduhñ mäbøgaamb hamuumdul'joot, cab jaduhñ waamb miäná'anät, hoy hänäjty jia tsaachpøcy. Maas hoy jiäya'ayhadaannä. Maas jootcujc yhidaannä.

¹²Naxy hajxy mdehñ ñijiootcapxmøcpøgøøjät neby hajxy jaduhñ hoy myo'oy mnáxät. ¹³Mhøxtá'awäp ja'a hodi'u hajxy, nebiä hermanodøjc hajxy jaduhñ hoy xpiawädítät, neby hajxy jaduhñ quipxy xquia'a padu'udägøyyät.

¹⁴Naxy hajxy hoy mdehñ yhídät tu'ugmädia'agy nägøxiä. Hoy hajxy mjäya'ayhädät. Pøn hoy ca'a wädijp, cab jim nøcxa'añ Dioswiinduum. ¹⁵Tehngajnä hajxy mnigwieendähadøøjät, neby hajxy

jaduhñ mǵa'a tu'udägóyyät. Coo pøn jadhñ tiu'udägóyyät, je'e jioot ca'a tsojp coo piuhbedóöjät ja'a Diósäm. Cab hajxy mnimiäjootma'adóöjät. Coo hajxy haagä jadhñ mjatcó'owät, pues nägøxiä hajxy jadhñ mmá'adät. ¹⁶Cab hajxy mhaxøøgwädítät. Cabä Diosmädia'agy hajxy myaghäyó'ogät. Jadhñä Esau jecy jiatcøøyy, coo hñajty yäho'ogyii; yajwiingubøjc ja'a ñädeedy ja'a cay. Paadia ñädeedy hñajty miøødä, coo hñajty quioobhuungä. Mo'owáanäp hñajty jadhñ cøxiä mäduhñtiä ja'a tieedy hñajty miädsäna'ay. ¹⁷Y coo ja'a Esau jioot hñajty chocy coo cøxiä mio'owóöjät ja'a tiéediäm, cab tii ñä'ä mooyy, hoy jia jøøyy. Hamdsoo jadhñ quia'a niyaghoyøøyyä.

¹⁸⁻²²Ja'a Moisésajxy, jequiän hoçhähgøøñäbä hajxy jim yhiixy miädooyy maa ja'a tunän ja'a xøhajpä Sinaí. Ja'a pojtäxa'a hajxy yhiix møødä jøøn jim maa hñajty jiaanç tehñ wyiingoodsän. Mänit hajxy miädooyy nebiä jäya'ay xiu'uxiän. Mänit hajxy miädooyy coo ja'a Dios quiapxy. Hoçhähgøøñä ja'a Dios quiapxy. Jadhñä Dios yhanehmy coo hajxy hotyijatiä quihgá'adsät tijaty jim mejtsp maa ja'a tunän, hoy jia animalä. Pero cab hajxy miee'xtujnä. Mänitä Dios hajxy miänuu'xtaacy coo quia'a cápxnät. Moiséspaady je'e chähgøøñä. "Jaanch tehñ chähgøøbiøch, paady ndsäyuy", nømä Moisés miänaañ. Pero jim tsajpootyp jim Dioswiinduum, cab jim yhoçhähgøøñän. Sión jim

xiøhaty maa ja'a Dios yhäña'ayän. Jadhñ jim xiøhajpä, ja'a Jerusalén tsajpootypä. Tøø ja'a Dios cuhdujt hajxy xmio'oy coo hajxy mwiingudsähgø'owät. Milhaamä Diosmoonsähajxy jim xioonda'agy Dioswiinduum. ²³Jimä Dioshuung yhaañämähajxy tiu'ugmucy ja'a xiøøhajxy tøøbä yajcujaayíjábä. Ja'a Diósäm hajxy yajnähwaats yajcuhwaatsä. Nägøxiä ja'a Dios hajxy jim xwyiinmahñdyhixáanäm. ²⁴Jimä Jesucristo hajxy xñähgapxtúútäm nebiä Dios hajxy tøø xmiøødyajcuhdújcäm hawiinjemy. Coo ja'a Abel jecy yagho'cä, mänitä Dios yaghawiimbijty. Pero coo ja'a Jesucristo hajxy tøø xñähho'túútäm, xyajnähwaats xyajcuhwäätsäm ja'a Dios ja'a nbojpä ngädieey hajxy. ²⁵Coo ja'a jecyjäya'ay ja'a Diosmädia'agy hajxy yaa quia'a mäbøjcy hädaa yaabä naaxwiin, mänit hajxy yajcumädoowä. Hoorä, coo ja'a Dios hajxy xyhamdsoo hanéhäm jim tsajpootyp, maas hanaxiä hajxy jadhñ njájtämät coo ja'a miädia'agy hajxy nga'a mäbøjcmät. Entonces, tsøg hajxy hamuumdu'joot mäbøjcmät. ²⁶Coo ja'a Dios jecy quiapxy, mänitä naaxwiin yajtsäyuyy. Jadhñ tøø miänaannä coo cøxiä yajtsäyuyyaannä jadähooc møødä naaxwiin møødä tsajtcøxp. ²⁷Jadhñ miädia'agytiägø'oy coo ja'a Dios yajcuhdägoyya'añ tijaty tøø yhädiuñ møødä naaxwiin møødä tsajtcøxp. Pero mädyiijaty jim tsajpootyp, caj yajcuhdägoyya'añ. ²⁸Tsøgä Dios hajxy nämáayyäm

Dioscujú'uyäp je'eguiøxpä
 coo hajxy jim̄ xyaghidáanäm
 tsajpootyp cøjxta'axiøø.
 Hamuumdu'joot ja'a Dios hajxy
 nwiingudsähgøøyyämät. Jaduhñ
 ja'a Dios hajxy xquiumáayyämät.
²⁹Yajcuhdägoobiä Dios je'e tijaty
 jaduhñ quia'a cumaaby.

13 Tsøg hajxy hamuumdu'joot
 niçhojc nibia'häyóowäm
 nebiä tu'ugpuhya'aybän. ²Coo
 pøn miédsät maa ja'a mdøjcän,
 hamuumdu'jootä mjøøn mdøjc
 hajxy mmó'owät. Näje'e hajxy
 tøø tiøjmo'oy ja'a Diosmoonsä
 tsajpootyp-tsohm̄bä. Cab
 hajxy hänäjty ñajuø'øy pø Dios
 mioonsähajxy je'e.

³Mbuhbédäp hajxy ja'a
 jäya'ayhajxy hijpä tsumy, møød
 hajxy häyoowhíjxäbä. Hix,
 quipxy ja'a Diosmädia'agy hajxy
 mmøødmäbøcy.

⁴Ja'a Dios jaduhñ mänaän coo
 jäya'ayhajxy ñimiøødtsäna'awóøjät
 ya'adio'oxy. Cab jaduhñ yhooyä
 coo ja'a mmägu'ughajpä tio'oxiøjc
 jaduhñ mnä'a wi'i yhäyoowhíjxät,
 coo ja'a Dios jaduhñ xñä'a
 yajcumädówät.

⁵Cabä xädø'øn hajxy mwi'i
 piøcjuø'øwät. Jootcujcä xädø'øn
 hajxy mmähídät, mäduhñtiä
 hajxy mmøødä. Tøø ja'a Dios
 jaduhñ miäna'añ cooc hajxy ni
 mänaa xquia'a nähgue'egáanäm.

⁶Paady hajxy hamuumdu'joot
 nmánáanämät:

Ja'a Dióshøch jaduhñ xpiuhbejp.

Cábøch jaduhñ pøn ndsähgø'øy,
 hoñéjpiøch hajxy cu xjia tun.

⁷Mbahíxäp jäya'ay hajxy,
 ja'a Diosmädia'agy hajxy tøø

xyajnáhixø'øyäbä. Hamuumdu'joot
 ja'a Diosmädia'agy hajxy
 miäbøjcy. Hoy hajxy jiaançh tehñ
 jiäya'ayhajty.

⁸Cabä Jesucristo ja'a
 quiuhdujt mänaa yajtägach.
⁹Cabä wiingmädia'agy hajxy
 mbadu'ubøgät. Coo ja'a Dios hajxy
 xchójcäm, maas hoy jaduhñ coo
 ja'a miädia'agy hajxy nmäbøjcämät.
 Näje'e hajxy ñajtsapxø'øy cooc
 tyjy yhamajtscä, cábc tii
 mdsú'udsät mgáyät. Pero yø'ø
 cuhdujt jaduhñbä, caj yø'ø
 xpiuhbédät.

¹⁰Tøø ja'a Jesucristo hajxy
 xñähho'túutäm, paadiä miädia'agy
 hajxy jaduhñ nbanøcxäm. Pero
 pønä jecyquiuhdujt panøcxnä,
 cabä cuhdujt hajxy miøødä coo
 ja'a Jesucristo hajxy pianøcxät.
¹¹Jegyhajty ja'a teedywiindsøn
 animalnø'ty hajxy hijty quiuyoxø'øy
 maa ja'a muutscunuu'xytiøjcän,
 nebiä piojpä quiädieey hajxy jaduhñ
 ñähwa'ads quiuhwá'adsät. Mänitä
 animalho'ogy hajxy hijty nøcxy
 ño'ogy cajtpa'a. ¹²Jaanä jimä Jesús
 hoy yho'pä cajtpa'a. Jaduhñ hajxy
 xyajnáhwaats xyajcuhwáatsäm
 ja'a nbojpä ngädieeyháltäm.

¹³Tsøgä jecyquiuhdujt hajxy
 najtshixøøyyäm. Tsøgä Jesucristo
 miädia'agy hajxy hamuumdu'joot
 panøcxäm, hoyyä cu'ug hajxy
 xjia xøøgháltäm. ¹⁴Haa hädaa
 yaabä naaxwiinä, caj jiega'añ.
 Pero jim̄ njoot hajxy nbädäacäm
 tsajpootyp. ¹⁵Tsøgä Dios hajxy
 tehngajnä wiingudsähgøøyyäm
 ja'a Jesucristocøxpä. Tsøg hajxy
 tehngajnä mänáanäm coo ja'a
 Dios miøjjä jiaançh. ¹⁶Naxy

hajxy hoy mdehm̄ j̄äya'ayhádät. Mbuhmó'owäp ja'a wiinghäna'c hajxy tijaty hajxy mmøød. Jaduhñä Dios hajxy xjiaančh tehñ quiumáyät.

¹⁷Mmäbójcäp ja'a copc-hajpä miädia'agy hajxy. Xcwieendähajp hajxy jaduhñ neby hajxy mga'a tu'udägóyyät. Najuoøby hajxy coo hajxy wyiinmahñdyhixa'añijjäm ja'a Diósäm. Naxy hajxy mdehm̄ miäböät nebiä mgopc-hajpähajxy jaduhñ yhidät jootcujc. Coo hajxy mga'a mäböät, cab hajxy hñajty jaduhñ tøø mniyaghoyø'øyii.

¹⁸Mdúnäbä mayhajt hajxy, pa'ya'axä Dios hajxy ja'a høøhcøxpä. Hóyhøch nwädity. Chójpiøchä njoot cooch homiänaajä hoy nwädítät. ¹⁹Chójpiøchä njoot jaduhñ cooch jim̄ jadähooc nnøcxtägátsät maa mijtsän. Mänuu'xta'agä Dios hajxy cooch jim̄ ween xyajnøcxy.

²⁰Jootcujcä Dios hajxy xjiaančh tehñ yaghíjtäm. Jaayá'ayädsä Jesucristo yagjujyipiøjtägajts, ja'a nWiindsønñhájäm. Jaayá'ayäts hajxy xmiøødyajcuhdújcäm ja'a

hawiinjemyguiuhdujt mänaa ja'a Jesucristo hajxy xñähho'túutäm. Cabä jemyguiuhdujt mänaa tiägatsaannä. Homiänaajä ja'a Jesucristo hajxy xñä'ägä cueendähájäm. ²¹Weenä Dios hajxy xpiuhbety, nebiä miädia'agy hajxy jaduhñ hoy myajtúunät, ja'a Jesucristocøxpä. Jaduhñä Dios hajxy xquiumáyät. Cøjxta'axiøø tsøg hajxy jaduhñ mänáanäm coo ja'a Jesucristo miøjjä jiaančhä.

²²Hermanodøjc, cab hajxy mdsippädá'agät. Cábøch mijts madiu'u tøø nmägapxy tøø nhane'emy. ²³Tøø ja'a hermano Timoteo yhawa'adspädsøømnä maa ja'a pujxtøjcän. Coo yaa paquiä miédsät, mänítøch jim̄ nmødhádät maa mijtsän.

²⁴Yajpoo'x ja'a copc-hajpähajxy ja'a høøhcøxpä møødä hermanohajxy nägøxiä. Ja'a hermanodøjc-hajxy yaabä Italianaaxooty, xyajpoo'xp mijts jaduhñ.

²⁵Weenä Dios hajxy jaduhñ xjiaac mo'oy ja'a hoyhajt ja'a weenhajt. Amén.

Santiago

1 Høøch xøhajt Santiago.
 Ja'a Diostúunghøch
 nduumby. Ja'a Jesucristo, je'ečh
 nmäduumby. Hermanodøjc,
 mijtshajxy nyajpoo'xyp, mijts
 jäguemnaaxtsohmbä.
²⁻³Coo hajxy mänaa
 mhäyohmbáadät, cab hajxy
 mmáná'anät cooc tyijy ja'a Dios
 hajxy xquia'a hijxnä. Tehngajnä
 ja'a miädia'agy hajxy mmäbøjcät
 coo hajxy xyhixy. Y coo hajxy
 mjaac häyohmbáadät, maas hoy
 hajxy mmäbøgät. Tøyhajt je'eduhñ,
 paady hajxy mjootcugø'øwät. ⁴Coo
 hajxy maas hoy mmäbøgät, pedyii
 ja'a Diosmädia'agy hajxy jaduhñ
 mgudiúnät.
⁵Coo pøn quia'a najuø'øwät
 nebiä wyiinmahñdyhádät, weenä
 Dios miänuu'xta'agy, mänitä
 wiinmahñdy mio'owøøjät. Coo ja'a
 Dios hajxy tii nmäyujwáanämät,
 mänit hajxy cøxiä xmióoyyämät, y
 cab hajxy waamb xñämáayyämät.
⁶Ween hajxy hamuumdu'joot
 nmänuu'xtaacäm. Cab hajxy
 nmänáanämät coo hajxy xquia'a
 mo'owáanäm. Pøn tu'joot ca'a
 mæbøjp, cabä jäwøhñdy tu'hityä
 yaghity. Jaduhñ mäwíinäts
 je'e nebiä mejjiän coo ja'a poj

yagja'tsyo'oy. ⁷⁻⁸Hix, mejtstu'u
 ja'a wiinmahñdy miøødá. Cabä
 tu'hityä yhity. Cab hoy wiädity.
 Cab tii wiinmahñdy mio'owøøjät
 ja'a Diósäm je'eguiøxpä coo
 wiinmahñdy mejtstu'u miøødá.

⁹Mädyii hermano häyooob,
 coo piuhbedøøjät ja'a Diósäm,
 jootcugø'øwäp je'eduhñ.
¹⁰⁻¹¹Mädyii hermano mäyøø,
 coo ja'a mäyøøhadyiibä quia'a
 hajoodhájñät, nälägä jootcugø'øwäp
 je'ebä. Hix, jaduhñ mäwíinäts
 ja'a mäyøøjäya'ayhajxy nebiä
 pøjjiän. Hoy ja'a pøjy jiobø'øy;
 pero coo quiujyxioøjø'øy, mänit
 ñii'xnä. Mänit ñähgahnä.
 Jaduhñdsä mäyøøjäya'ayhajxy
 quiuhdägoyyaambä.
 Yhøxho'ogaamby hajxy tijaty hajxy
 miämäyøøhajpy.

¹²Jootcujc hajxy yhity
 pønjaty mee'xtujp, pønjaty ja'a
 møjcu'ugongä miädia'agy ca'a
 mæbøjcäp. Pønjaty ja'a Dios
 jahmiejtsp, cøjxta'axiøø hajxy
 yagjugyhada'añii nebiä Dios
 jiugyhatian, nebiä Dios hajxy tøø
 xyajwiinwaanøøyyäm. ¹³Coo
 ja'a mjoothajxy chógät coo hajxy
 haxøøg mjatcø'øwät, cab hajxy
 mmáná'anät cooc tyijy ja'a Dios

hajxy xyagjatcø'owa'añ. Hix, cabä Dios mänaaxøø haxøøg jiatcø'øy. Y caj mänaa miäna'añ coo hajxy haxøøg njatcøøyyämät. ¹⁴Ja'a mhamdsoo copc xyajtägöyyäp. ¹⁵Hix, ja'a mhamdsoo copcooty ja'a pojpä cädieey piädsømy. Y coo pønä pojpä cädieey tehngajnä tiúnät, jiipi yhäda'aga'añ haxøøgtuum.

¹⁶Hermanodøjc, ca'a hajxy myajwiinhøñ. ¹⁷Ja'a hoybä ja'a mäbaadpä, Dios hajxy pedyii xmiöoyäm, ja'a tsajpootypä. Je'eduhñ cunuu'x ja'a jajpä ja'a tsämaambä. Cabä Dios wyiinmahñdy mänaa tiägach.

¹⁸Hamdsoojoot ja'a Dios hajxy xpiädáacäm hodiium je'eguiøxpä coo ja'a miädia'agy hajxy nmäbøjcäm, ja'a tøyhajtpä. Paady hajxy jaduñ xquiumáayyäm.

¹⁹Hermanodøjc, homiänaajä ja'a Diosmädia'agy hajxy mmädwá'anät; pero hodiägaamby hajxy mdaj mmáyät coo hajxy hánajty mgapxa'añ mmädia'aga'añ. Y cab hajxy mjootmá'adät.

²⁰Coo hajxy njootmá'tämät, cabä Diosmädia'agy hajxy nyajtuungpáatanä. ²¹Cøxy najtshixø'ow ja'a mhaxøøgcuhdujt hajxy, neby hajxy madiu'u haxøøg mjatcø'øyän. Mee'xxieemy ja'a Diosmädia'agy hajxy mmäbøgät, ja'a hajxy tøø mmädöyyäbä. Y coo hajxy mjaanč mähøgät hamuumdu'joot, mänit hajxy jaduñ mnähwá'adsät.

²²Mgøxy cudiúnäp ja'a Diosmädia'agy hajxy jaduñ. Coo hajxy mnähmädoonáxät, cab hajxy jaduñ mnä'a yajtuungpaady, hoy hajxy mja mäna'añ cooc tyijy

hajxy myajtuungpaady. ²³Pønä Diosmädia'agy nähmädoonajxp, cab hoy quiudiuñ. Jaduhñ mäwíinäts je'e nebiä jäya'ay ñiyhahijxnaxyiijän hijxtjooty. ²⁴Paquiä jaduñ ñiyhahijxnaxyii. Pero coo wyiimbijnä, cab jiahmiejtsnä nebiä wyiin jiojöp quiähxø'øgy. ²⁵Pønä Diosmädia'agy tehngajnä jahmiejtsp, pøn hoy cudiumb, jootcujc jaduñ yhida'añ. Hix, hodiium piäda'aga'añii je'eguiøxpä coo ja'a Diosmädia'agy miäböcy.

²⁶Pønajaty mänaamb cooc tyijy Dios hajxy wyiingudsähgø'øy, y nä'a nägoodä hajxy ñä'a capxtägoy, xiøøbä hajxy ñä'a mäna'añ cooc tyijy Dios hajxy wyiingudsähgø'øy. ²⁷Coo ja'a yaamghuung hajxy mbuhbédät møødä yaamgto'oxy, coo hajxy hánajty tii yajmaajiaty, y coo hajxy haxøøg mga'a wädítät, mänit hajxy myajcähxø'øgät coo Dios hajxy mjaanč wiingudsähgø'øy.

2 Hermanodøjc, paadiä Jesucristo miädia'agy hajxy nmäbøjcäm coo jim yhity tsajpootyp maa ja'a jajpä tsämaambä miøødän. Jaaya'ay hajxy nWiindsøn hájtäm. Cabä yhahixø'øy coo pøn mxøøghádät.

²⁻⁴Tsøg hajxy mädiäacäm, coo jäya'ayhajxy nämetsc miédsät maa ja'a mdsajtøjc-hajxiän, tu'ug mäyøøbä, tu'ug häyoobä, tu'cuhdujt hajxy nämetsc mwiingudsähgø'øwät, hoyyä mäyøøbä orocø'øjädsøhñdy hánajty jia møødä, hoyyä howyit hodiucxy hánajty jia møødä. Cabä häyoobä hajxy mxøøghádät, hoyyä howyit

hodiucxy hānajt̃y quia'a ja mōōdā. Hoorā, coodsā hāyoobā hajxy mnāmá'awāt: “Jii miich huuc tāna'aw”, o coo hajxy mnāmá'awāt: “Jii miich mhāña'awa'añ naaxwiin”, y tōō ja'a māyōōbā hoyhāñaabiejt hajxy hānajt̃y mmo'oy, myajcāhxø'py hajxy jaduħn coo ja'a mguhdujthajxy quia'a hoyyā. Cāhxø'p jaduħn coo ja'a hāyoobā hajxy tōō mga'a nāxuuch.

⁵Hermanodøjc, huuc mādow hādaa mādia'agy hajxy. Pønajat̃y hāyoob hādaa yaabā naaxwiin, Dios tōō yajnāhdijy coo ja'a Diosmādia'agy hajxy miābōgāt hamuumdu'joot, coo hajxy jim ñōcxāt cøxp tsajpootyp. Jim hajxy ñōcxa'añ nāgøxiā. Pønjatiā Dios tōō jiahmiech tōō pia'hāyoy, Dios jaduħn tōō yajwiinwaanø'oy coo hajxy jim ñōcxāt. ⁶Pero mijts, mxøøghajpy hajxy ja'a hāyoobādøjc. Hoorā, ja'a māyōōdøjc-hajxy, xchaačhtiuumb mijts jaduħn. Pawich pajāduty mijts xyajnøcxy hagujc. ⁷Ja'a Jesucristo miādia'agy hajxy mbanøcxāp, y je'e ja'a māyōōdøjc-hajxy wyiinwohmby.

⁸Dios mānaamb coo ja'a mmājōōn coo ja'a mmādøjc mdsōgāt mba'hāyōwāt nebiā mni'x nebiā mgopc mdsoquiān. Ja'a Diosmādia'agy jaduħn miimb. Bueno, pø mjaančh cudiuunāp ja'a Dios miādia'agy jaduħn, hoy jaduħn. ⁹Pero coo ja'a hāyoobādøjc hajxy mxøøghādāt, haxøøg hajxy jaduħn mjāya'ayhaty. Ja'a Diosmādia'agy jaduħn mānaamb cooc yhaxøøgā. ¹⁰Pønā ley hoy tōō jia yajtuñ, pø weeñtiā tōō tiu'udāgoy, jaančh tehñ miøj tōō quiuyo'oyø'oy.

¹¹Dios jaduħn mānaañ, coo ja'a mhamdsoo to'oxiøjc hānajt̃y jyimān, cabā wiingto'oxiøjc mmōōdhādāt. Jaanā jaduħn miānaambā coo mga'a jāya'ay-yaghō'ogāt. Tsøg hajxy mānāanām, pø tōō mjāya'ay-yagho'ogy, tōō ja'a ley jaduħn mga'a yajtuñ, hoy wiingto'oxiøjc mga'a ja mōōdhity.

¹²Hoy hajxy ngapx nmādiāacāmāt, hoy hajxy njāya'ayhājtmāt nebiā Jesucristo hajxy xyhanéhām maa ja'a miādia'agy myiñān cujaay. Hix, xyhixāanām jaaya'ay njoot ngopc-hajtāmhajxy pø hoy hajxy njaančh jāya'ayhājtm. Xpiuhbedāanāmāp hajxy neby hajxy maas hoy njāya'ayhājtmāt. ¹³Pønjatiā jāya'ay nāxuutsp, je'e hajxy pāda'agāanāp hodiium. Cab hajxy yajcumādowa'añii. Pønjatiā jāya'ay ca'a nāxuutsp, je'eds hajxy yajcumādowaanāp. Cab hajxy ñāxuutstāgatsa'añii.

¹⁴Hermanodøjc, nāje'e jāya'ayhajxy miāna'añ cooc tyijy hajxy miābøcy hamuumdu'joot, y cab hajxy hoy wiādity, nébiāc tyijjiāda'aduħn yhuuc nā'ā nāhwá'adsāt. ¹⁵⁻¹⁶Coo mijts hermano nā'ā nāgoobā mnāmá'awāt: “Nøcx hajxy jootcujc wādīt; pāgøøw jocxwit hajxy; hoy hajxy mgay mhú'ugāt”, y cab hajxy hānajt̃y tii tōō mmo'oy, hoy hajxy hānajt̃y tii quia'a ja mōōdā, ni wit ni tucxy, ni cay ni hu'ugy, caj mijts mguhdujt hānajt̃y yhooyā. ¹⁷Coo pøn miānā'anāt cooc tyijy hoy wyl'i pianøcxy, pero cabā quiuhdujt ñā'ā hōyābā, xiøøbā jaduħn ñā'ā māna'añ cooc tyijy hoy pianøcxy.

¹⁸Pero coo pøn miānā'anāt: “Miich mahñdy hoy mbanøcxyp;

høøch, hóyhøch nguhdujt”, høøch hijxtahnd yaghíjác pø hoy mjaanč panøcxy, hoy mga'a ja yajcähxø'ogy pø hoy mguhdujt. Høøch, cooč nguhdujt yhooyä, nyajcähxø'piøch jaduhñ cooč hoy njaanč panøcxy. ¹⁹Miich mänaamb coo Dios tiu'ugä; hoy hit jaduhñ coo jaduhñ mmäná'anät. Pero jaduhñdsä møjcu'uhajxy miänaambä y chähgøøby hajxy je'e. ²⁰Nej, caj miich mnä'ägädä wiinjuø'owa'añä, xiøøbä mja nä'ä mäna'añ coo mmäbøcy, pø cabä mguhdujt ñä'ä hoyyä. ²¹⁻²²Abraham højts hijty nhaphájtäm ndeedyhájtäm. Mänitä Dios ja'a Abraham ñämaayy coo ja'a yhuung yóxät, ja'a Isaac-hajpä. Paadiaduhñ ñämaayy coo ja'a yhuung yóxät, nebiä Dios jaduhñ wyiingudsähgø'owät. Jiaanč cudiunaambiä Abraham hänäjty jaduhñ. Coo jiaanč ja cudiunaañ, paady hodiium piädáacänä. Cähxø'p jaduhñ coo ja'a Diosmädia'agy hänäjty jiaanč mäbøcy. ²³Tøjjajtä Diosmädia'agy jaduhñ nebiä myiñän cujaay: “Coo ja'a Abraham ja'a Dios ja'a miädia'agy miäbøjcä, paadiä hodiium piädáacänä.” Y Abraham, hamdsoo Dios miänaañ coo Abraham hänäjty miägu'ughadyii. ²⁴Jaduhñds je'e, paadiä Dios hajxy hodiium xpiädáacäm coo hajxy hoguiuhdujt nyajtúunäm, coo hajxy hoy nmäbøjcäm. ²⁵Jaduhñä quixy Rahab yhuuc jajpä. Mänitä jäya'ayhajxy miejtstaacy maa ja'a Rahab tiøjcän. Hixøøby woodsøøbiä hajxy hänäjty wiädity. Mänitä Rahab miäbuhbejty. Mänitä tu'u

hajxy wiingpä yajnähixøøyyä. Paadiä Rahab piädáacänä hodiium, hoyyä howyiinmahñdy hänäjty tøø quia'a ja møødhaty. ²⁶Entonces, coo hajxy nmänáanämät cooc tyjy hajxy hoy nmäbøjcäm, pero cabä nguhdujthajxy yhoyhájtäm, xiøøbä hajxy nnä'ä mänaanäm coo hajxy hoy nmäbøjcäm. Cab jaduhñ choobaady coo hajxy nä'ä nägoobä nmänáanämät cooc tyjy hajxy hoy nmäbøjcäm; høxtáhmäts ja'a ni'x ja'a copc coo yho'nä, cab je'e choobaatnä.

3 Hermanodøjc, ca'a hajxy mwi'i ñiwyiindsønbadä'agyii. Hix, pønjaty hoy ca'a yajnähixøøby, cab hajxy quiumaya'añii ja'a Diósäm. ²Madiu'u hajxy ngapxtägóoyyäm nägøxiä. Pøn ca'a capxtägooby, ca'xiä Diosmädia'agy jiaanč tehñ quiudiuñ. Ni nej quia'a jatcø'øy. ³Paadiä cuaay freno hajxy nbädáacäm coo hajxy ween miädia'agymiäbøcy neby hajxy jaduhñ hoy yó'oyät. ⁴Jaanaä jaduhñduhmbä, ja'a barcotimón, chuucpä hajxy yajmäyohby, hoy ja'a barco jia hamøjjä, hoy møc jia pabojoy. ⁵⁻⁶Y yø'ø haaw, hoy jia muutsä, jaduhyä jäya'ay ñä'ä jiaanč tehñ miägäpxtägoobiä møj may. Jaduhñ mäwiinäts yø'ø haaw nebiä jøønän. Coo ja'a yuuc tioyø'ogy, tu'lii'ty ja'a padoy chohnda'agy. Yø'ø haaw, jiaanč tehñ miøødä haxøøgpä yø'ø. Paquiä xyajtu'udägóoyyät. Y ja'a møjcu'ugong, je'eds hajxy xwyi'i yajcapxtägóoyyäm. ⁷Hoñä'ä mädyii animalä hajxy hoy nyajmaaxøøyyämät, caa, muuxy, tsahñdy, møødä

mejjiooty-tsänaabiä. ⁸Pero yø'ø haaw, cab hoy miaaxø'owa'añ. Haagä haxøøgpä jaduhñ miøød. Je'eduhñ xyajtägóoyyäm maa ja'a Dioscøxpän. ⁹⁻¹⁰Jue'e yø'ø haaw, mejtstu'u myiñ. Je'e hajxy nyajtúunäm coo ja'a Diosteedy hajxy ngapxpáatäm. Jaaná je'e hajxy nyajtúunäm coo ja'a jáya'ay hajxy nnähójjäm, ja'a Dios yajmägunu'u'xóoyyabä ja'a yhEspiritu. Hermanodøjc, caj yhoyyá coo hajxy mejtstu'u njäya'ayhájtämät. ¹¹Hix, maa tu'ugpä nøøgopcän, cabä nøø wiingä tægach xiee'xy. Tu'tu'uyyá ñä'ägädä xee'xy. ¹²Jaanä jaduhñduhmbä, tu'tu'uyyá piids tiøømhaty; cabä aceituna miädøømhadø'øy maa ja'a piidsän. Ni ja'a piids quia'a mädoømhadø'øy maa ja'a tsaatypän. Y cabä hoñøø jim mbáadät maa ja'a taamdsnøøgopcän.

¹³Pøn wiinmahñmech maa mijtsän, ween hoy jiäya'ayhaty neby jaduhñ yajcähxó'ögät coo hoguiuhdujt miøødä, coo mee'xxieemy jiäya'ayhaty. ¹⁴Jii häna'c-hajxy näje'e miäna'añ coo hodiuing hajxy mio'owøøjät, coo wiinghäna'c quia'a mo'owøøjät, je'eguiøxpä cooc tyijy hajxy jiaanč tehñ jiaty hoyhoy. Caj mniguiumayøøjät cooc tyijy mjaanč tehñ jiaty. Hix, caj tiøyyä coo mjaanč jaty. ¹⁵Yø'ø wiinmahñdy jaduhñmbä, caj yø'ø jim choon maa ja'a Diosän. Hädaa yaabä naaxwiin hajxy yajcojy. Ja'a mõjcu'ugongä wyiinmahñdy jaduhñ. ¹⁶Ja'a häna'c-hajxy ca'a niyajmädsójcäbä coo wiinghäna'c

hodiuing piáadät, cab hajxy hoy ñimiøødhidyii. Nijiohoj nibiahójjäp hajxy jaduhñ. Madiu'u hajxy haxøøg jiäya'ayhaty. ¹⁷Pero jimä howyiinmahñdy choon maa ja'a Diosän. Coo hajxy je'e mmøødhádät, hoy hajxy jaduhñ mjäya'ayhádät. Cab hajxy mdsiptsáná'awät, cab hajxy mma'adtsáná'awät. Mee'xxieemy hajxy mhídät. Cabä mhamdsoo wiinmahñdy hajxy mwi'i yajtúnät. Mmøødhádäp ja'a hojiot hajxy møødä jáya'ay. Cabä mwiiinmahñdy hajxy mejtstu'u myajtúnät. Cab hajxy mhøhndá'agät. ¹⁸Pønjaty ca'a tsiptsoj, jaanč tehñ yhoy hajxy jiäya'ayhaty, møød ja'a hajxy nägøxiä capxuhgádaacpä.

4 Jim mijts ja'a mdsip myajtsohnda'agy maa ja'a mhaxøøgwiiinmahñdyhajxiän coo hajxy naxy mnimiädsibø'øyii. ²Coo hajxy tii mja hadsoga'añ, je'eds hajxy myajniguiuyagho'ogóoyyap, je'eds hajxy myajniguiumädsiphadøoyyap. Paady hajxy mga'a paady mädyii hajxy mja tsojpy coo ja'a Dios hajxy mga'a mäyujwa'añ. ³Y coo hajxy tii mja yujwa'añ, cab hajxy mbaady, je'eguiøxpä coo ja'a mguhdujthajxy quia'a hoyyá. Hix, näjoot hajxy mwi'i yhadun mwi'i yhanäma'awø'øy mädyii hajxy mja yujwaamby. ⁴Caj mijts Diosmädia'agy hoy mguiduñ. Nej, cab hajxy mnajuø'øyä coo jaduhñ quia'a hoyyá coo ja'a mjoot ja'a mjuøhñdy hajxy yaa mbädá'agät hädaa yaabä naaxwiin. Coo hajxy jaduhñ mbädá'agät hädaa yaabä naaxwiin, Dios hajxy jaduhñ mmädsiphájnäp. ⁵Nej,

tögä xiøøbä ja'a Diosmädia'agy
 ñä'ä mäna'añä: "Tøø ja'a Dios
 ja'a yhEspiritu piäda'agy maa
 højtsøxpän. Xjiaančh tehṃ chojc
 xjiaančh tehṃ pia'häyóowäm hajxy
 jaduṃ." ⁶ Jaančh tehṃ yhoyyä
 Dios hajxy xpiuhbéjtäm neby
 hajxy jaduṃ hoy nmäjädáacämät.
 Jaduṃnä Dios miädia'agy myiimbä:
 "Miädsiphajpiä Dios pøn ja wi'i
 yajcumayaamb. Pero pøn ca'a
 yajcumayaamb, piuhbejpiä Dios
 je'e." ⁷ Mäbøc ja'a Diosmädia'agy
 hajxy tehngajnä. Høxhixä ja'a
 mõjcu'ugongä miädia'agy hajxy;
 mänit hajxy jaduṃ xñähguéecnät.
⁸ Hamuumdu'jootä Diosmädia'agy
 hajxy mbanøcxät; mänitä
 Dios hajxy xpiuhbejtägätsät.
 Pønjetiä haxøøgcuhdujt mõød,
 mhøxhixäp ja'a mguhdujt hajxy
 jaduṃ. Pønjaty mänaamb coo
 mejtstu'u pianøcxa'añ, mõødä
 Dios, mõødä hädaa yaabä
 naaxwiin, mnajtshixøøñäp ja'a
 mhaxøøgwiiimahñdy hajxy.
⁹ Mjootmayhädäp hajxy jaduṃ
 je'eguiøxpä coo haxøøgcuhdujt
 hajxy mmøødä. Cab hajxy
 mxoondáacnät. ¹⁰ Mba'yá'axäp
 ja'a Dios hajxy hamuumdu'joot.
 Mnägäpxäp hajxy nebiaty hajxy tøø
 mhaxøøgwädity. Mänitä Dios hajxy
 xyajmähmø'owät hodium.

¹¹ Hermanodøjc, ca'a hajxy
 mniñähøjyii hamiñ haxøpy. Pøn
 wiinghermano nähojp, jaduṃ
 miäbaatnä nebiä Diosmädia'agy
 ñähøjjiän. Cabä Diosmädia'agy
 hoy ñä'ä cudiuñ. ¹² Tu'ugä Dios
 hajxy xyhanéhäm. Je'e hajxy
 xyhixäm pø hoy ja'a miädia'agy
 hajxy ngudiúunäm. Jaayá'ayäts

cuhdujtmøød pø xpiädáacäm
 hajxy hodium, pø xpiädáacäm
 hajxy haxøøgtuum. Pero miich,
 caj miichä cuhdujt mmøødä coo
 wiinghermano mnähøjät.

¹³ Huuc mädown hajxy, näje'e hajxy
 jaduṃ miäna'añ: "Jäda'a o jaboom
 højts nnøcxa'añ wiinghagajpt. Jim
 højts tu'jumøjt nnyhajada'añii. May
 højts xädø'øn jim nbaada'añ." ¹⁴ Ni
 quia'a najuø'øy hajxy tii jaboom
 jadäänäp. Ja'a jugyhajt, paquiä
 quiøxy. Jaduṃ miäbaady nebiä
 näma'ajän coo paquiä tiägoy.
¹⁵ Jaduṃ hajxy mmäná'anät: "Pø
 mänaambä Dios jaduṃ, mänit
 hajxy njaac jugyhäjtämät. Coo
 ja'a Dios jaduṃ miäná'anät,
 hotyijä hajxy njäjtämät. Coo
 quia'a mäná'anät, cab hajxy tii
 nnä'ägädä jäjtämät." ¹⁶ Pero mijts,
 tehngajnä mijts mw'i ñiguiumayii.
 Haxøøg jaduṃ coo hajxy jaduṃ
 mjatcø'owät. ¹⁷ Pøn najuøøby neby
 hoy quihdujthädät, y cab hoy
 ñä'ä cuhdujthaty, haxøøg jaduṃ
 jiatcø'øy.

5 Ween yø'ø mäyøødøjc-hajxy
 yhuuc yajcopcø'øy. Jø'øwaamb
 hajxy, tsaächya'axaamb hajxy,
 je'eguiøxpä coo ja'a tsaächpä
 hajxy piaada'añ. ²⁻³ Yø'ø hajxy
 cøxiä miämäyøøhajpiä, caj yø'ø
 choobaadaañnä, hoy howyit
 hodiucxy hajxy jia mõødä.
 Cøxaamb jaduṃ tiägoyya'añ. Coo
 hajxy miäyøøjä, cähxø'p hajxy
 coo ja'a häyoobädøjc hajxy quia'a
 näxuuch. Quihäyowø'øwaamb
 hajxy jaduṃ. Xiøøbä hajxy
 tøø ñä'ä yajmayø'øy maa hajxy
 miäyøøhatiän. Hix, möbädajpä
 naaxwiimbä wyiimbida'añ.

⁴Cabä mioonsä hajxy ca'xy tøø yhuuc mäjuuñä. Paady hajxy jim ñäxø'øwóøyyänä maa ja'a Diosän jim tsajpootyp. Miädoobiä Dios ca'xy. ⁵Hoy yajxon hajxy tøø jiaanč tehñ chäna'ay hädaa yaabä naaxwiin. Tøø ja'a miäyøøhadyiibä hajxy jia yajmayø'øy. Pero mobädajpä hajxy quiuhäyowø'øwa'añ. ⁶Tøø ja'a hojiäya'abiä hajxy chaačhtiuñ. Tøø hajxy yagho'ogy. Cabä hojiäya'ayhajxy ñä'ä niñawaanä.

⁷⁻⁸Hermanodøjc, mmeel'xtügäp hajxy jaduñ høxtä Jesucristo cädaactägätsäp. Mobädajpä quiädaactägatsa'añ. Cab hajxy tii mdaj mmáyät. Jaduñ hajxy mmeel'xtügät nebiä jäya'ayhajxy mieel'xtuquiän coo quia'a tsoj tu'uy. ⁹Hermanodøjc, cab hajxy mniñahøjøjät coo Jesucristo hajxy xyajcumädówät. Mobädajpä quiäda'aga'añ. ¹⁰Mjahmiédsäp hajxy nebiä jäya'ayhajxy jecy chaačhpøjquiän, ja'a Diosmädia'agy hajxy jecy yajwá'xäbä. Mee'xtujc hajxy je'e jejcy. ¹¹Pøn mee'xtujp, hoy jia tsaächpøcy, jootcujc hajxy yhity, nebiä Job jecy mieel'xtujquiän mänaa chaačhpøquiän. Tøyhajt jaduñ. Y ñäxuutstägajts ja'a Dios ja'a Job. Hiç, hojioot ja'a Dios jiaanč tehñ miøød.

¹²Hoy hädaa mädia'agy hajxy mmädówät. Cabä Dios hajxy nä'ä nägoobä mgapxpáadät. Coö hajxy jaduñ nä'ä nägoobä mgapxpáadät, mgapxtägóyyäp hajxy jaduñ, y xyajcumädówäp ja'a Dios hajxy. Pø mmøødä tøyhajt hajxy, jaduhyä hajxy mmäná'anät coo tiøyhajtä. Pø

caj, jaduhyä hajxy mmäná'anät coo quia'a tøyhajtä.

¹³Pønjaty tsaächpøjp, weenä Dios hajxy pia'ya'axy. Pønjaty jootcujc, weenä Dioshöy hajxy yhöy ya'axy. ¹⁴Pønjaty pøjcäp, ween hajxy ñäma'ay ja'a tuungmøødpä maa ja'a tsajtøjcän coo oración hajxy tiüünäxät, coo aceite hajxy yajñähjaaxøjät ja'a Diosøxpä. ¹⁵Pø jaanč mäbøjp hajxy, ja'a hajxy oraciöntuumbä, mänitä Dios ja'a pa'amjäya'ay ja'a pia'am yajñähwáatsät, møødä piojpä møødä quiädieey. ¹⁶Myajniñägapxøjät ja'a mbojpä mgädieeyhajxy hamiñ häxøpy. Mniñähgapxtu'udøjät hajxy hamiñ häxøpy nebiä mba'am hajxy jaduñ xñähwá'adsät. Jaanč tehñ tiuungpaatp jaduñ coo ja'a hojiäya'ay hamuumdu'joot yhoraciöntúnät. ¹⁷Høxtahñdsä Elías, ja'a Diosmädia'agy jecy yajwá'xäbä. Jaduñ je'e jäya'ayhajty neby højtshájtämän. Coö ja'a Elías ja'a Dios miänuu'xtaacy coo quia'a yajtú'uwät, tægøøgjumøjt ja cupc quia'a tuuy hädaa yaabä naaxwiin. ¹⁸Mänitä Elías ja'a Dios jadähooc miänuu'xtaactägajch coo yajtú'uwät. Mänit jadähooc tiägøøyy tuubä. Mänitä jäya'ay piäda'agyhajxy yhöyøøyyäxä.

¹⁹⁻²⁰Hermanodøjc, coo pøn ja'a tøyhajt jiojyohdiú'udät maa mijsän, tu'udägóyyäp hajxy jaduñ. Pero coö hajxy mjootcapxmøcpøgät, mänitä wyiinmahñdyhajxy miédsät. Cøxaambä piojpä quiädieey hajxy jaduñ ñähwa'adsa'añ, y hodiium hajxy jaduñ miähmøøwa'añ. Tøyhajt jaduñ.

1 Pedro

1 Høöch xøhajt Pedro. Jesucristøch xquiuguexyhajp. Mijts hädaa nocy nyajnäjaayøøby pønhatiä Diosmädia'agy mäbøjp. Xii yaa hajxy wiingtuumjaty mhadsäna'ay jim maa naax jaduuh xiøhatiän Ponto, møød jim Galacia, møød jim Capadocia, møød jim Asia, møød jim Bitinia. ²Jequiän mijtsä Diosteedy xwyiimbiyy. Tøø Dios hänajty ñajuø'oy coo mijtsä miädia'agy hänajty mmäbögaanä. Ja'a yHespírituhaamä Dios hajxy tøø xyaghodiägø'oy, weenä mädia'agy hajxy jaduuh mmäböögät ja'a Jesucristocøxpä. Jaaya'ay hajxy tøø xyajnähwáatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy mõj may.

³Tsögä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsønhtëm. Højiootä Dios jiaanč tehñ miøød ja'a højtscøxphhtëm, paady hajxy homiänaajä xyagjugyhadaänäm neby je'e jiugyhatiän. Coö Dios ja'a Jesucristo yagjujypiøjtägajch coö hänajty tøø yho'ogy, jaduuhnä tøyhajt hajxy nmøødhhtëm coö Dios hajxy jaduuh xjiaanč

yagjugyhadaänäm homiänaajä ⁴jim tsajpootyp. Jimä hoyhajtä weenhajt hajxy mõj may xmio'owáanäm, neby jaduuh jecy miänaañän cooc hajxy hänajty xmio'owáanäm. Tijaty hajxy yaa nyagjugyhhtëm hädaa yaabä naaxwiin, tsipcøxp jaduuh quiøxa'añ, tsipcøxp jaduuh quiuhdägoyya'añ. Pero mädyiijatiä Dios hajxy jim xmio'owáanäm tsajpootyp, cab jaduuh mänaa quiøxa'añ, cab jaduuh mänaa mia'ada'añ, cab jaduuh mänaa quiuhdägoyya'añ. Homiänaajä yajxøn yhida'añ. ⁵Coö mijtsä Dios miädia'agy jaduuh mmäböjcä, paadiä Dios hajxy xcwieendähada'añ ja'a miøcmäjaahaam. Cab hajxy jaduuh mänaa mguhdägoyya'añ. Coö ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mänit hajxy jim xyajnöcxáanäm tsajpootyp Dioswiinduum. Jimä Dios hajxy homiänaajä xyagjugyhadaänäm neby je'e jiugyhatiän.

⁶Paady mijts jootcujc mhity, hoy hajxy jäda'ahaty madiu'u mja tsaächpøcy. Pero cab hajxy jecy mdsaaächpøga'añ. ⁷Høxtahñdsä

oro, jøønhaamä jäya'ayä oro hajxy yhiixmach pø hoyhoro jaduhñ. Jaanä jaduhñ mijtsä Dios xyhiixmajtspä pø hamuumdu'jootä miädia'agy hajxy mmäbøjcä, hoy hajxy mja jaančh tehñ chaačhpøcy. Jaančh tehñ choobaatp jaduhñ coo hajxy jaduhñ mmäbøgät tehñgajnä. Cabä oro jaduhñ jiaty tsoobaady neby jaduhñ choobaadiän nej mijts homiänaajä mmäbøquiän. Hix, tsipcøxpä oro jaduhñ quiuhdägoyya'añ. Y coo Jesucristo yaa quiädaactägatsa'añ, mänit mijts xquiumaya'añ je'eguiøxpä coo hajxy hänajty tøø mmäbøcy, hoy hajxy hänajty tøø mja jaančh tehñ chaačhpøcy.

⁸⁻⁹Hoyyä Jesucristo hajxy tøø mga'a jagä hixy, mdsojpy mba'häyooby hajxy jaduhñ, y mmäbøjcäbä miädia'agy hajxy jaduhñ. Hoy hajxy tøø mga'a jagä hixy, coo hajxy jaduhñ mmäbøcy, paady hajxy jaduhñ tøø xyajñahwa'ačh. Coo hajxy jaduhñ tøø xyajñahwa'ačh, paady hajxy jaduhñ mjaančh tehñ xioonda'agy nägø'ø nädecypä.

¹⁰Ja'a jäya'ayä Diosmädia'agy hajxy jecy yajwá'xäbä, jia wi'i yajtøøby jia wi'i yajtø'xyp hajxy hänajty neby hajxy piäda'agøøjät hawa'adstuum. Cab hajxy hänajty ñajuø'øby neby hajxy jaduhñ jim piäda'agøøjät. Pero ñägapx hajxy jaduhñ coo mijtsä Dios hänajty xpiäda'aga'añ hawa'adstuum, je'eguiøxpä coo hojioot miøødä.

¹¹Yajtøøby hajxy hänajty pøn mijts hänajty min xpiäda'aga'añ hawa'adstuum. Jaduhñ hajxy hänajty yajtøøbä mänaa hänajty

myina'añ. Ja'a Dios jaduhñ hawaanä ja'a yhEspirituhaam cooc tu'ljäya'ay hänajty yaa min chaačhpøga'añ. Y cooc hänajty tøø yho'nä, mänitac hänajty jiuypjøjtägatsa'añ. Mänitac hänajty jim ñøcxtägatsa'añ tsajpootyp maa Dioswiinduumän. Pero ja'a jecyjiäya'ayhajxy, cab hajxy hänajty jaduhñ ñajuø'øby pønä Dios hänajty tøø ñänømy ja'a yhEspirituhaam. Nä'a cujahy hajxy jaduhñ nebiaty hajxy jaduhñ ñajtscapxøøyyä.

¹²Mänit hajxy jecy yhawáanäxä coogä Dios jaaya'ay hänajty quia'a tsoj quexa'añ, ja'a mijts hänajty xpiäda'agaambä hawa'adstuum. Cujéquiägä Dios hänajty quixa'añ. Hoorä, tøø quiejxnä. Jaduhñ tøø yajtøjiainä coo ja'a yajñahwaatspä tøø quiejxnä. Y tøø mijts jaduhñ mjaančh mädoyhaty coo ja'a yajñahwaatspä yaa tøø yhoy. Ja'a Jesucristøch jaduhñ nnänøømby coo hajxy hoy xñähho'túutäm. Y jaaya'ay mijts xyajmädoyhajtäbä, ja'a Dios ja'a yhEspirituhaam hajxy jaduhñ ñajtscapxøøyyä nebiatiä Diosmädia'agy hajxy yajwá'xät. Tsajpootypä Dios ja'a yhEspiritu yajtsohñdaacy coo jaduhñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduhñ jim hijpä tsajpootypä, jiaančh tehñ yagjuøøby hajxy jaduhñ coo Dios ja'a yHuung jaduhñ yaa quiejxy hädaa yaabä naaxwiin, coo højts hoy xñähho'túutäm.

¹³Y coo Jesucristo jaduhñ yaa jadähooc quiädaactägatsa'añ, mänit hajxy jaduhñ jim xyajñøcxäänäm tsajpootyp maa Dioswiinduumän, pønatiä Diosmädia'agy hänajty

tøø miäbøcy. Mänitä hoyhajtä weenhajtä hajxy jim ca'xy xmio'owáanäm. Coo Dios jaduhñ tøø miäna'añ coogä yHuung yaa quiädaactägatsa'añ, jaduhñä tøyhajt hajxy nmøødhajtäm coo jaduhñ tiøjiada'añ. Tsøcxä njoot hajxy pädaacäm maa hoyhajtän, maa weenhajtän, mädyii Dios hajxy hänajty xmio'owáanäm. Tsøcxä hajxy hoy wädíjtäm. Tsøc hajxy jahmiejtstäacäm coo Jesucristo yaa quiädaactägatsa'añ. ¹⁴Coo Dios hajxy xyhuunghajtäm, paadiä miädia'agy hajxy tsøc mäbøjcäm. Cabä haxøøgwiinmahñdy hajxy jadähooc mbadu'ubøjcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoxyatyñä. ¹⁵Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødä. Jaaya'ay hajxy jaduhñ xyajñähdíjjäm coo hajxy xquiu'ughadäanäm. Paadiä hojioot hajxy tsøc yaghíjtäm nebiä Dios hojioot miøødän. ¹⁶Jaduhñ jim myiñ cujaay maa Diosmädia'aguian: "Høøch, cábøchä haxøøgjoot cábøchä haxøøgwiinmahñdy nnä'ägädä møødä. Høøch hajxy pahix paduünac", nømä Dios jecy miänaañ.

¹⁷Ja'a Dios hajxy nwiingudsähgøøyyäm. NDeedyhajtäm hajxy jaduhñ. Paady hajxy hoy tsøc jäya'ayhajtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduhñ coo Dios hajxy xyajcumädoxwáanäm nebiaty hajxy hänajty yaa haxøøg

tøø njatcøøyyäm hädaa yaabä naaxwiin, hoy hajxy hänajty näje'e tøø nja mäyøødsänáayyäm. ¹⁸⁻¹⁹Ja'a nhaphajtäm ja'a ndeedyhajtämhajxy ja'a jegyhajtypä, coo yhamdsoo cuhdujt hajxy hijty hoy quiudiuñ, jadúhñac tyijy hajxy ñähwa'adsa'añ. Y jaduhñ mijts tøø mbahabøjpä. Pero cab jaduhmbä cuhdujt choobaady. Coo Jesucristo hajxy hoy xñähho'túutäm, ja'a ñø'tyhaam hajxy xpiädäacäm hawa'adstuum. Ni tii hajxy jaduhñ xquia'a pädaacäm hawa'adstuum, ni xädø'øñ. Hix, paquiä xädø'øñ quiøxy. Jagooyyä Jesucristo hajxy xpiädäacäm hawa'adstuum ja'a ñø'tyhaam. Hix, cabä Jesucristo ni tii poj ni tii cädieey quia'a møødä. Paady hajxy je'e hoy xpiädäacäm hawa'adstuum. Coo Jesucristo ja'a poj ja'a cädieey häxøpy miøødhaty, cab hajxy häxøpy tøø xpiädäacäm hawa'adstuum. ²⁰Jéquiänä Dios ja'a yHuung jaduhñ yajñähdijy cooc hänajty yaa quixa'añ hädaa yaabä naaxwiin, cáhnac hädaa naaxwiimbä hänajty yhawijy tiøø'xta'agy. Pero cabä Dios ja'a yHuung choj quejxy. Cujecy jaduhñ quiejxy mänaabä højts hänajty yaa njugyhajtämbä. Højts hoy xñähho'túutäm. ²¹Coo Jesucristo hänajty tøø yho'ogy, mänitä Dios yagjujypiøjtägajch. Mänit jim jadähooc yajnøcxy maa wyiinduumän. Jim jäda'ahaty wyiingudsähgø'øyii. Y coo Dios ja'a yHuung jaduhñ yagjujypiøjtägajch, paadiä miädia'agy hajxy tsøc mäbøjcäm coog hajxy xyagjugyhadaänämbä homiänaajä neby je'e jjugyhatiän.

²²Tøyyä Dios miädia'agy. Y coo mijtsä miädia'agy hoy mgudiuunä, paadiä mjootä mjuohñdyhajxy nähwa'ads yhity. Naxy hajxy jaduhñ mdehmñ ñiçhoc mdehmñ ñimiee'xóøjät hamuumdu'joot. Jaduhñ hajxy mnijäwø'øwóøjät nebiä tu'que'expän nebiä tu'mägu'ugpäñ. ²³Tøø haxøøgjoot tøø haxøøgwiinmahñdy hajxy nnajtshixøøyyäm. Homiänaajä Dios hajxy xyagjugyhadäänäm neby je'e jiugyhatiän. Jaduhñä hojiootä howyiinmahñdy hajxy xmióoyyäm hawiinjemy, je'leguixpää coo miädia'agy hajxy nmäböçäm. Cabä miädia'agy mänaa quiuhdägoyya'añ. Jaaya'ay hajxy jaduhñ xyagjugyhadäänäm homiänaajä neby je'e jiugyhatiän, ca'a piönä hädaa yaabä naaxwiimbä, ni ja'a ndajháltäm ni ja'a ndeedyháltäm. Haa ja'a hädaa yaabä naaxwiimbä jugyhajtä, tsipcøxp jaduhñ quiøxa'añ.

²⁴Jaduhñ jim myiñ cujaay maa Diosmädia'aguiañ:

Høxtahñdsä pøjy, hoy jaduhñ jia yajxonä, tsipcøxp je'e ñä'ägä tø'øch.

Jaduhñ mäwiin højtsháltäm, hoy hajxy mõj jaançh nja nijäwøøyyäm, tsipcøxp hajxy nnä'ägä ho'og nnä'ägä tägoyyaänäm.

²⁵Pero ja'a Diosmädia'agy, cab jaduhñ mänaa quiøxy tiägoy. Ja'a Diosmädia'agy jaduhñ mänaamb coogä Jesucristo hajxy hoy xñähho'túutäm. Tøø mijtsä jäya'ay jaduhñ xyajmädoyhaty, ja'a Diosmädia'agy hajxy jecy yajwá'xäbä.

2 Coo Dios hajxy homiänaajä xyagjugyhadäänäm neby

je'e jiugyhatiän, jaduhñä hojiootä howyiinmahñdy hajxy tøø xmióoyyäm hawiinjemy. Paadiä haxøøgjootä haxøøgwiinmahñdy hajxy tsøc najtshixøøyyäm cøxiä. Cab hajxy mnä'ägä høhñdá'agät ni weeñtiä. Hamuumdu'joot hajxy jaduhñ tøy mjaançh hojiäya'ayhádät. Jii jäya'ayhajxy näje'e, cabä Diosmädia'agy hajxy hoy quiudiuñ, hoy hajxy jia nidijyii nebiä hojiäya'ayän. Ca'a hajxy jaduhñ mbahixy. Ca'a hajxy pøn cøxiä wiinä myajcuxøøghadøøy. Cab hajxy mniñähøøn mniñähóøjät. ²⁻³Tøyhajt jaduhñ coo Jesucristo mayhajt mõj may tøø tiuñ maa mijtscøxpän. Mnajuøøby hajxy jaduhñ, túhmäts. Hahixøøbyxiä jaduhñ coo miädia'agy hajxy tehngajnä mbanøçxät. Høxtahñdsä maaxhuunghajxy, coo hajxy hänajty chi'lidsa'añ, mänitä tsi'tsc hajxy ñäjøøy. Jaduhñ mäwiin mijtspä, mba'yá'axäp ja'a Dios hajxy coo quiapxiä miädia'agy hajxy ween tehngajnä xjiaac yaghabøcy. Jaduhñ hajxy ca'xy pedyii hoy myajtúnät. Y cab hajxy jaduhñ mänaa mdu'udägóyyät.

⁴Tehngajnä Jesucristo wyiinmahñdy hajxy jaac tehñ pahijxä jaac tehñ piaduunä. Ja'a Dios jaduhñ jecy wiinmaayy coo højts hänajty jaduhñ xyhuunghadäänäm ja'a Jesucristocøxpä. Ja'a Jesucristo, ja'a Dios yHuung je'e, paadiä cuhdujt jaduhñ miøødä coo hajxy nwiingudsähgøøyyämät. Pero cabä jäya'ayä Jesucristo hajxy näje'e jijpøøgøøy. Cab hajxy wyiingudsähgøøy. Xiøøghajpy

hajxy jaduhñ. ⁵⁻⁶Jaduhñ
jim myiimbä cujaay maa
Diosmädia'aguiän:

Jim maa cajpt jaduhñ xiøhatiän
Siön, jimhøchä ndsajtøjc tu'ug
ngojy.

Tú'ughøchä tsa nwiimbiiyy
coo jim piäda'agøøjät maa
tøjteecän.

Jaanč tehñ tiuungpaatp yø'ø
tsaa jaduhñ.

Ja'a Dios ja'a Jesucristo jaduhñ
yajmäbaat nebiä tsa ja'a jaanč
tehñ tiuungpaatpän, coo jaduhñ
yaa quiejxy hädaa yaabä naaxwiin,
coo hajxy hoy xyajñhäwáatsäm.
Jaduhñä Dios miänángumbä
cooc tsipcøxp yajtøjiada'añ coo
hajxy jim yajnøcxa'añii tsajpootyp
maa Dioswiinduumän, pønjaty
jaduhñ mäbøjp coo Jesucristo
hajxy xyajñhäwáatsäm, ca'a
wyiinghäna'cä. Coo Jesucristo
hajxy tøø xjiaanč yajñhäwáatsäm,
jaduhñä Dios hajxy tøø
xyajñähdíjjäm coo Jesucristo hajxy
nmøødhíjtämät tu'ugmädia'agy.
Tehngajnä Diosmädia'agy hajxy
tsøc hoy jaac tehñ quiudiúñäm.
Tsøgä Dios hajxy hoy jaac tehñ
wyiingudsähgøøyyäm. Jaduhñä
Dios hajxy xquiumáayyämät.

⁷Coo mijts jaduhñ mmäbøcy
coo Jesucristo hajxy hoy
xyajñhäwáatsäm, paadiä Jesucristo
hajxy mdsocy, paady hajxy
mwiingudsähgø'øy. Hoorä, jaduhñ
jim myíingumbä cujaay maa
Diosmädia'aguiän:

Jii tsa tu'ug, cabä
tøjmuu'tspädøjc-hajxy hijty
hoy yhixy;
cab hajxy hijty yajtuna'añ.

Pero ja'a cudøjc, yajxón
yø'ø tsa yhixy, paady jim
yajpädaacä maa tøjteecän.

⁸Jaduhñ wiingtuum myíingumbä:
Jii tsa tu'ug, coo pøn
quiuhnepy, cädaab hajxy
jaduhñ.

Ja'a Jesucristo jaduhñ yajmäbaatä
neby yø'ø tsaajan.

⁹Højtsä Dios tøø xyajñähdíjjäm
coo miädia'agy hajxy nmäbøjcämät,
coo hajxy xquiu'ughájtämät.
Xyhuunghájtäm hajxy jaduhñ coo
hajxy ween hoy njäya'ayhájtämät
neby je'e hoy jäya'ayhatiän. Tøø
cuhdujt hajxy xmióoyyäm coo
hajxy nDeedyhájtämät nebiä
Jesucristo ja'a Dios Tieedyhatiän.
Tøø Dios hajxy xyajpädsøømäm
haxøøgtuum. Hodium hajxy
hoy xpiädaactägájtsäm. Jaduhñä
miädia'agy hajxy nyajwá'xämät
coo mõjmayhajt tøø tiuñ maa
højtsøxphájtäm. ¹⁰Coo mijts hijty
mga'a mäbøcy, paadiä Dios hajxy
hijty xquia'a cu'ughaty. Cabä Dios
hajxy hijty xñäxuuč. Pero coo
hajxy jaduhñ mmäbøjnä, paadiä
Dios hajxy jaduhñ xñäxuu'tsnä.
Paady hajxy xquiu'ughajnä.

¹¹Mägu'ughajpädøjc, hoy hajxy
yaa nja híjtäm hädaa yaabä
naaxwiin, cabä njoot hajxy yaa
tøø nbädáacäm maa hädaa yaabä
naaxwiimbän. Jimä njoot hajxy tøø
nbädáacäm maa Dioswiinduumän.
Tsøcxä haxøøgwíinmahñdy
hajxy høxhíjxäm, jaduhñä
Dios miädia'agy hajxy hoy
ngudiúñämät. ¹²Hoy hajxy mja
hity maa jäya'ayä Diosmädia'agy
hajxy quia'a mäbøquiän, hoy
hajxy mwädítät. Hoy hajxy jaduhñ

mjäya'ayhádát, hoyyá jáya'ay hajxy cu xjia nähøønø'øw. Coo Dios yaa quiiáda'agát tøyhajtyajyepä, mänit mijtsä jáya'ay hánajty xyhixa'añ coo mijtsä Dios miádia'agy hánajty hoy tøø mjaančh cudiiuunä, ja'a Diosmädia'agy hajxy hánajty tøø quia'a mábøquiäbä. Mänitä Dios hajxy wyiingudsähgø'øwa'añ.

¹³Mwiingudsähgøøyyäbä tuungmøødpä miádia'agy hajxy. Cabä pøn jaduhñ waamb xñänómät. Hix, mbanøcxypä Diosmädia'agy hajxy jaduhñ. Y coo ja'a tuungmøødpä miádia'agy hajxy mga'a wiingudsähgøøyyät, mäna'anaambä jáya'ayhajxy jaduhñ coogä mädia'agy quia'a hoyyá, ja'a mijts jaduhñ mbanøcxypä. Mwiingudsähgøøyyäbä gobiernä miádia'agy hajxypä. Jaaya'ay møjtuung jaduhñ nä'ägä møød. ¹⁴Mwiingudsähgøøyyäbä gobiernä mioonsä miádia'agy hajxypä, ja'a hajxy jaduhñ møjtuungmøødpä. Pønjaty jaduhñ cädiehby, je'e hajxy jaduhñ yajcumädooby. Pønjaty hoy jáya'ayhajp, je'e hajxy jaduhñ quiumaaby. ¹⁵Jaduhñä Dios chocy coo hajxy hoy mjäya'ayhádát. Jii jáya'ayhajxy näje'e, cabä Diosmädia'agy hajxy ñäl'ägädä wiinjuø'øwa'añ. Jaančh tehñ quiihxex hajxy jaduhñ. Hoy hajxy jaduhñ quia'a jagä wiinjuø'øwa'añ, nøm hajxy wyi'i miäna'añ cooc tyijy ja'a Diosmädia'agy quia'a hoyyá. Hoorä, coo mijts tøyhajt mhøjäya'ayhádát, caj mijtsä jáya'ay hoy xñähøønø'øwät, ja'a Diosmädia'agy hajxy ca'a wiinjuø'øwaambä.

¹⁶Näje'ejä jáya'ayhajxy miäna'añ cooc tyijy cuhdujt hajxy miøødä

coo hajxy hoñejpiä jiatcø'øwät, je'eguiøxpä coogä Jesucristo hajxy tøø yajnähwa'ačhii. Pero cab jaduhñ tiøyyä. Cab jaduhñ yhooyä coo hoñejpiä njatcøøyyämät. Pero tsögä Dios miádia'agy hajxy cudiiuunäm nebiaty hajxy xyhanéhäm.

¹⁷Mwiingudsähgø'øwäbä jáya'ay hajxy nägøxiä. Mničhoc mnimiee'xøøjäp hajxy pønjatiiä Diosmädia'agy mábøjp. Mwiingudsähgø'øwäbä Dios hajxy, jaduhñä gobiernä hajxy mwiingudsähgøøbiät.

¹⁸Mijtshajxy moonsähajpä, mmábøjcäbä mwiindsønä miádia'agy hajxy. Mwiingudsähgø'øwäp hajxy jaduhñ, hoy hánajty yhojiäya'ayä quia'a hojiäya'ayä. ¹⁹Coo mwiindsøn hajxy xchaačhtiúnät nä'ä nägoobä, hoy hajxy hánajty tøø mga'a jagä cädieey, mmee'xtügäp hajxy jaduhñ. Mnajuøøby hajxy jaduhñ coo Dios hajxy jaduhñ xquiumáyät. ²⁰Pero pø tøø hajxy hánajty mjaančh cädieey, hahixøøby jaduhñ coo hajxy mgumädöwät. Y cabä Dios hajxy jaduhñ xquiumáyät, hoy hajxy cu mja mee'xtuc. Pero pø cab hajxy hánajty tøø mgädieey, coo mwiindsøn hajxy nä'ä nägoobä xyajcumädöwät, y coo jaduhñ mmee'xtügät, mänitä Dios hajxy jaduhñ xquiumáyät. ²¹Jaduhñä Dios hajxy tøø xyajnähdíjjäm coo häna'c hajxy nä'ä nägoobä xchaačhtiunämät nebiä Jesucristo chaačhtiuunän. Hix, højts jaaya'ay xñähho'túutäm. Y miee'xtujc jaduhñ. Jaduhñä Dios chocy coo Jesucristo hajxy nbahíxämät neby je'e miee'xtujquiän. ²²Cabä

Jesucristo mänaa nã'ägä cädieey.
 Ni mänaa quia'a hõhnda'agy.
²³ Coo haxøøg jia nãmaayyã,
 cab haxøøg yhadsoodägajch.
 Coo chaächtiuunã, cab jaduhñ
 waamb miãnaañ coo hãnajty
 yaghawiimbijtagatsa'añ. Ja'a Dios
 quio'øjooty je'e ñibiãdaacã. Hix,
 ñajuøøbiã Jesucristo hãnajty jaduhñ
 coo jãya'ayhajty hãnajty nãgøxiã
 yajtøyhajtyega'añii ja'a Diósãm.
 Jaduhñã Dios hajxy xyhijxãm
 neby hajxy njãya'ayhãjtãm. ²⁴ Coo
 Jesucristo hajxy hoy xñãhho'túutãm
 cruzcøxp, jaduhñã nbojpã ngädieey
 hajxy xyajnãhwáatsãm. Tsøcxã
 ja'a haxøøgwiinmahñdy hajxy
 najtshixøøyyãm. Tsøc hajxy
 jahmiejtstãacãm coo Jesucristo
 hajxy nmøødhijtãm tu'ugmädia'agy
 mänaa yho'oguiãn, mänaa
 jiuypjøjtãgachãn. Paady hajxy
 njugyhadaãñãm homiãnaajã
 nebiã Dios jiu gyhatiãn. Coo hajxy
 jaduhñ ngudiúunãmät nebiã Dios
 hajxy xyhanéhãmãm, mãnitã Dios
 hajxy jaduhñ xquiumayãañãm.
²⁵ Jaduhñ mäwiin hajxy hijty
 njãya'ayhãjtãm nebiã meeghajxy
 tiãgowiãditiãn jäguemduum. Cabã
 mädia'agy hajxy hijty nmãbøjcãm
 ja'a Jesucristocøxpã. Pero tøø hajxy
 nmãbøjcãnã. Y xcwieendãhãjtãmã
 Jesucristo hajxy jaduhñ.

3 ¹⁻² Mijts to'oxiøjtøjc,
 mwiingudsãhgø'øwãbã
 mnihyhap hajxy. Coo mnihyhapã
 miãdia'agy hajxy hoy mgudiúunãt,
 y coo Jesucristo hajxy
 mwiingudsãhgø'øwãt, wehñdã
 mnihyhapã Diosmädia'agy hajxy
 miãbøgãt, pø cahnã hajxy hãnajty
 miãböcyñã, hoy hajxy hãnajty

waamb mga'a jagã nãma'ay coo
 hajxy ween miãböcy. ³⁻⁴ Je'e
 ja'a Dios jaduhñ quiumaaby coo
 hojioot hajxy mmøødhãdãt, coo
 mnihyhap hajxy mee'xxieemy
 mmãgãpxãt. Je'eds jaduhñ
 tsoobaatp coo Diosmädia'agy
 hajxy jaduhñ mgudiúunãt
 hamuumdu'joot. Y cab hajxy
 jaduhñ mänaa mdu'udãgøyyãt. Cab
 hajxy myajcumãyyãt pø jii howyit
 hodiucxy hajxy hãnajty mmøødã,
 pø jii oronaamdsøm, pø jii
 orotaatstøy hajxy hãnajty mmøødã,
 pø hoyyã mguhwaay hajxy
 howyit hoguiuhxotshaam hãnajty
 mgu'udy. Cabã Dios yø'øduhmãbã
 jiaty møjpãda'agy, ni jaduhñ
 quia'a jega'añ. ⁵ Ja'a to'oxiøjcã
 Diosmädia'agy hajxy hijty jegyhajty
 panøcxpã, wyiingudsãhgøøbiã
 ñihyhap hajxy hijty. Mee'xxieemy
 hajxy hijty. Miãbøjpiã
 Diosmädia'agy hajxy hijty coo
 hajxy hãnajty cwieendãhada'añii
 ja'a Diósãm. ⁶ Jaduhñã Sara ja'a
 ñihyhap jecy wyiingudsãhgøøyy,
 ja'a Abrahamhajpã. Mee'xxieemy
 hãnajty miãgapxy. Quiumaayy
 ja'a Dios ja'a Sara jaduhñ. Y mijts
 to'oxiøjtøjc, jaduhñ mijtsã Dios
 xquiumãabiãt coo mijtsã Sara
 wyiinmahñdy mbahijx mbadúunãt.
 Hoy hajxy mwãdítãt ja'a Dioscøxpã.
 Y cabã mhaa mjoot hajxy myagjãdãt
 cooc tyijy ja'a mnihyhap hajxy
 hãnajty mmãgapxtãgoy.

⁷ Jaanã jaduhñ mijts nmãgapx
 nhanehmãbã, mijts ya'adiøjtøjc.
 Mdsoc mmée'xãbã mdo'oxiøjc
 hajxy. Mmøødhãdãbã hojioot
 hajxy jaduhñ. Hix, cabã to'oxiøjcã
 miãjaahajxy miãbaady nebiã

ya'adiøjc-hajxy miøcän. Paady hajxy mgüeendähädät. Hix, xmiøoby mijtsä Dios ja'a hoyhajtä weenhajt näguipxy møødä mdo'oxiøjc. Hix, näguipxiä Dios hajxy xyajnähwä'äch møødä mdo'oxiøjc-hajxy. Tiuumbiä Dios mayhajt jaduñ. Pero coo mdo'oxiøjc hajxy mga'a tsoc mga'a mee'xät, xiøøbä Dios hajxy jaduñ mnä'a pa'yáaxnät.

⁸Mägu'ughajpädøjc, jaduñ hajxy homiänaajä mnä'ägä niçhoc mnä'ägä nimiee'xøøjät nebiä tu'ugmägu'ug nebiä tu'ugpuhya'ayän. Mniñäxuudsøøjäp hajxy jaduñ hamiñ haxøpy. Mee'xxieemy hajxy mnimiøødcapx mnimiøødmädia'agøøjät. Jaduñ hajxy mhídät tu'ugmädia'agy nägøxiä. Jaduñ hajxy hoy mdsänä'awät nägøxiä. ⁹Coo mijts pøn cøxypänejpä xtiúnät, cab hajxy myaghawiimbijtägätsät. Y coo hajxy pøn xwyiinwóonät, cab hajxy mhadsoowiimbídät. Mmänuu'xtä'agäbä Dios hajxy jaduñ coo ween piuhbedyii ja'a tøø xwyiinwóonäbä. Jaduñ mijtsä Dios tøø xyajnähdijy coo Dios ja'a hoyhajtä weenhajt hajxy xmió'owät.

¹⁰Pø mdsojpiä mhoyhäyow ja'a mhoçhänä'a hajxy, cab hajxy mänaa mhøhndá'agät.

Cab hajxy mänaa mgapxtägóyyät.

¹¹Mnajtshixø'øwäbä mhaxøøgwiiinmahñdy hajxy.

Hoy hajxy mjäya'ayhädät.

Cab hajxy mnimiädsip mnimiäma'adøøjät ni mänaa.

¹²Hix, cwieendähajpiä Dios pønjetiä miädia'agy mabøjcäp.

Y coo Dios hajxy miänuu'xta'agy, mänit hajxy piuhbedyii.

Pero ja'a häna'c-hajxy haxøøg wädijpä, cab hajxy näxuuchii ja'a Diósäm,

nømä Diosmädia'agy miäna'añ.

¹³Hoorä, coo hajxy

hamuumdu'joot mhojiäya'ayhädät, cab hajxy jaduñ pøn cøxypänejpä xtiúnät. ¹⁴Jii jäya'ayhajxy näje'e, mijts xjia wi'i chaaçhtiunaamb, hoy mijts mja hojiäya'ayhaty.

Pero ca'a hajxy mdsähgø'y; ca'a hajxy tii mdajy mmay. Ja'a Dios hajxy jaduñ xcwieendähadaamb.

¹⁵Hamuumdu'jootä Jesucristo hajxy mwiingudsähgø'øwät. Hix, jaaya'ay hajxy nWiindsøn'hajtäm. Y coo hajxy pøn xmiäyajtøwät tiiguiøxpä Diosmädia'agy hajxy hänajty coo mmäbøcy, cab hajxy mdsähgø'øwät; mnägäpxäp hajxy jaduñ tiiguiøxpä hajxy coo mmäbøcy. Mee'xxieemy hajxy jaduñ mhadsówät, ca'a yhajootma'adä. ¹⁶Nägüeentä hajxy tehngajnä mwädität, coo hajxy jaduñ mnä'a cädiéeyät. Jaduñnä tøyhajt hajxy mmøødhädät coo hajxy hänajty hoy mwädity. Hoy hajxy mwädität, hoyyä jäya'ay hajxy xjia nähojy xjia näya'axy coo Jesucristo miädia'agy hajxy hoy myajtuunä. Coo hajxy jaduñ hoy mjaançh wädität, mänitä häna'c-hajxy jaduñ chähdiuna'añ coo mijts hänajty jaduñ tøø xñänømy.

¹⁷Hoy jaduñ coo hajxy hoy mwädität, hoy hajxy hänajty mja tsaachpøcy. Hix, ja'a Dios hajxy hänajty tøø xyajnähdijy coo hajxy tähoocjaty mdsaaçhpøgät, hoy hajxy hänajty mja howiädity. Pero

coo hajxy hānajtʸ haxøøg mʲatcø'øʸ, cab jaduħn yhooyä; mgumädówäp hajxy jaduħn. ¹⁸Hoyyä Jesucristo mānaa quia'a jagä cädieey, tsaächpøjc je'ebä. Coo hajxy hoy xñähho'túutām, jaduħnä nbojpä ngädieey hajxy xyajñähwáatsām. Y jaduħn hajxy jim xyajñøcxáanām Dioswiinduum. Tähooquiä hajxy xñähho'túutām. Ja'a ñi'xä quiopc-hajtiä jaduħn ho'c. Pero ja'a jiootä yhEspíritu, cab jaduħn ñä'ä ho'cy; jujyñä hānajtʸ jaduħn yhity. ¹⁹Ja'a jiävøhñdyaamä Jesucristo yhooy maa ho'ogyjiäya'ayhajxy hānajtʸ tsumy yhitiän. Jimä hawiinjemybiä mädia'agy hajxy hoy yajwiingapxø'øʸii coogä Dios ja'a Jesucristo hānajtʸ tøø quiexy mäyajñähwaatspä. ²⁰Paady hajxy hānajtʸ tsumy yhity je'eguixpā coo Diosmädia'agy hajxy jecy quia'a mävøjcy mānaa Dios jia nägäpxiän coo nøøgomdägoy hānajtʸ tiägø'øwa'añ, mānaa Noé ja'a biarco hānajtʸ yhädiuñän. Cabä Dios mānitiä yajtägøøʸy tuubä. Jia hahijx jecy pø mävøgáanäxäbä miädia'agy hānajtʸ. Coo jaduħn yhijxy coo hajxy hānajtʸ nämay quia'a mävøga'añ, mānitäs yajtägøøñä tuubä. Mānitiä nøøgomdägoy tiägøøñä. Jagooyyä Dios yhijxy coo Noéhajxyhajtʸiä hānajtʸ miävøga'añ, ja'a hajxy hānajtʸ näductújiäbä. Jagooyyä Noéhajxy jaduħn miävøjcy. Je'eds hajxy jaduħn jiiby tsooc barcojooty, ja'a hajxy hānajtʸ tøø yhädiuñäbä. ²¹Nebiä Noéhajxy jecy chooquiän jiiby barcojooty mānaabä nøøgomdägoy jaduħn tiägø'øʸyän, jaduħn mäwiinäs

je'e miäbaady néjjiäm coo hajxy nnäbéjtām nøøjooty, coo Jesucristo hajxy xyajñähwáatsām mānaa jiuypiojtägachän. Paady hajxy jaduħn nnäbéjtām nøøjooty, hijxtahnd jaduħn coo hajxy nnähwáatsām. Ja'a ngorazonghajxy jaduħn wáatsām, ca'a ja'a ñni'xä ngopc-hájtām. Coo hajxy jaduħn nnäbéjtām, jaduħnä Dios hajxy hamuumdu'joot nhawáanām coo Jesucristo miädia'agy hajxy nnä'ägädä panøcxáanām. ²²Coo Jesucristo hānajtʸ tøø jiuypiojtägach, mānit jim ñøocy tsajpootyp. Jim yhäñaañä maa Dios quiø'ø hahooyyaampiän. Je'e jaduħn nänøømby coo cuhdujt jim miøødä møj jaančh. Hix, wiingudsähgøøyyäbä Jesucristo jim. Ja'a Dios mioonsähajxy, ja'a hajxy jim hijpä tsajpootyp, je'eds hajxy jaduħn mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhane'emyii ja'a Jesucristām.

4 Coo Jesucristo chaačhpøjcy, miee'xtujc ja'a tsaächpä jaduħn. Jaanä jaduħn mijtspä, coo Jesucristo hajxy mmøødhity tu'ugmädia'agy, paady hajxy jaduħn mmee'xtújpät, coo hajxy hānajtʸ pøn xyajtsaächpøcy. Coo hajxy jaduħn mjaančh tsaächpøjpat nebiä Jesucristo chaačhpøjquiän, jaduħn hajxy myajcähxø'øgät coo mhaxøøgwiinmahñdy hajxy tøø mhøxhijxnä. ²Coo mhaxøøgwiinmahñdy hajxy jaduħn mjaančh høxhixät, hoy hajxy jaduħn mjäya'ayhada'añ mäduhñtiä hajxy yaa mjaac hida'añ hädaa yaabä naaxwiin. Jaduħnä Dios

hajxy xquiumáyät. ³Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'öyän, ja'a Diosmädia'agy hajxy ca'a mäbøjpä. Cab jaduñ yhahixø'øy coo hajxy jaduñ mjatcø'öñät. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaanč tehñ yhu'ugy mjaanč tehñ jioø'xy coo xøødsuu hijty maa jadyii. Tsähdiuhñdägoy hajxy hijty mjatcø'øy, ya'adiøjc møødä to'oxiøjc. Jäya'ayhadsejtsnaxy hajxy hijty naxy mwiingudsähgøøby møødä jäya'ayhabojtsnaxy.

⁴Y ja'a jäya'ayä Diosmädia'agy hajxy ca'a mäbøjpä, ja'a mijts hijty naxy mmägu'ughajpiä, yagjuøøby hajxy jaduñ coo mijtsä mhaxøøgwiinmahñdy mga'a yaghanajxnä neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä. ⁵Pero coo Dios jaduñ yajñähñjät coo hänajty tøø yhabaatnä, mänit hajxy hänajty tiøyhajtyega'añ maa Dioswiinduumän. Mänitä hajxy yajcumädowa'añii ja'a Diösäm, hoy hajxy hänajty jia juyquii, hoy hajxy hänajty tøø jia ho'ogy.

⁶Hix, jaduñä Dios jioot chocy coo ho'ogyjäya'ayä miädia'agy hajxy ween miäbøjcäxä, paadiä Dios ja'a yHuung Jesucristo jim quiejxy maa ho'ogyjäya'ayhajxy hänajty tsumy yhitiän. Jimä Jesucristo ja'a Diosmädia'agy hoy yajñähixø'øy coogä Jesucristo miäyajñähwa'ačh. Jaduhñägä ho'ogyjäya'ayä jäwøhñdyhajxy homiänaajä jjugyhädät nebiä Dios jjugyhatiän,

hoyyä ñi'xä quiopc-hajxy hänajty tøø jia ho'ogy.

⁷Habáatnöp jaduñ coo naaxwiimbä wyiimbidaannä. Paady hajxy tehngajnä mniyajcopcø'owøøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhñä Dios hajxy hoy mba'yá'axät hamuumdu'joot. ⁸Je'e jaduñ nä'ägä tsoobaatp coo hajxy hamiñ haxøpy mničhoc mnimiee'xøøjät. Hix, coo hajxy hamiñ haxøpy nničhöjcamät, mänit hajxy hoy nnimiämée'xämät. Jaduhñ hajxy hoy ndsänáayyämät.

⁹Coo pøn jim quiuyo'oy quiunaxø'owät maa mjøøn maa ndøjc-hajxiän, hamuumdu'joot hajxy myajtøjtägø'owät. Myajcay myaghú'ugäp hajxy jaduñ hahoy haween. ¹⁰Cøjwiinduumä Dios wiinmahñdy hajxy xmiöoyäm coo tuung hajxy wiingjaty nmøødhájtäm. Jaduhñä jäya'ayhajxy nägøxiä piuhbedøøjät, ja'a hajxy hänajty tøø miäbøquiäbä ja'a Jesucristocøxpä. Jaduhñ hajxy mnibuhbedøøjät nebiätä Dios tuung hajxy cøjwiinduum tøø xmiö'oyän. ¹¹Pønjaty tøø tiuungmo'oyii coo Diosmädia'agy hajxy yajwá'xät, hoy hajxy quiapx miädiá'agät nebiä Dios quiapxy miädiá'aguiän. Pønjaty tøø tiuungmo'oyii coo hajxy miäbuhbedät, ween hajxy jaduñ hamuumdu'joot miäbuhbety. Ja'a Dios jaduñ puhbedäp. Coö hajxy hänajty tijaty mduna'añ, hoy hajxy mdúnät; jaduñä jäya'ayhajxy miäbøgät coo Dios miøjjä jiaančhä. Wyiingudsähgø'owaambiä

Dios hajxy jaduñ je'eguiõxpä coo Jesucristo hajxy hoy xyajñahwáatsäm. Cõjxta'axiõø ja'a Dios wyiingudsähgø'owa'añii. Cõjxta'axiõø mõjcuñdujt miõõdhada'añ. Amén.

¹²Mägu'ughajpädõjc, cab hajxy myagjuõ'owät coo tsaächpä hajxy naxy xpiaady mõc-haampiä. Hiõ, tsipcõxpä tsaächpä hajxy xñä'ägä paada'añ. ¹³Jaduñ quiähxõ'õgät pø hamuumdu'jootä Diosmädia'agy hajxy mjaançh mäbøcy ja'a Jesucristocõxpä, pø caj. Hiõ, maas hanaxiä Jesucristo chaaçhpõjcy mänaa hajxy hoy xñähho'túutäm. Hiõ, coo Jesucristo hajxy jaduñ mmõõdhity tu'ugmädia'agy, paady hajxy jaduñ tsipcõxp mbadsaaçhpõjpät. Y coo Jesucristo hänajty yaa quiädaactägatsa'añ hädaa yaabä naaxwiin, mäñit hajxy hänajty mjaançh tehñ xioõnda'aga'añ. Paady hajxy jäda'ahaty mxoõndáacnät, hoyyá tsaächpä hajxy jaduñ xjia paady. Pero cabä tsaächpä hajxy jaduñ myagjuõ'owät. ¹⁴Coo hajxy pøn xñähõjät ja'a Jesucristocõxpä, cab hajxy myagjuõ'owät. Pero mxoõndá'agäp hajxy jaduñ. Hiõ, jaduñä Dios ja'a yhEspírituhaam hajxy xpíuhbédät mõødä wyiinmahñdyhaam. Coo mijtsä jäya'ay xyhíxät coo hajxy mmee'xtucy coo hajxy hänajty mdsaaçhpøcy, mäñitä Dios hajxy wyiingudsähgø'owa'añ. ¹⁵Hahixøøby jaduñ coo hajxy mdsaaçhpõgät, pø tøø hajxy hänajty mmäjäya'ay-yagho'ogy, pø tøø hajxy hänajty mmämeeçh, pø tøø hajxy hänajty myajtägø'øyy maa cueendä

hajxy hänajty mga'a mõødän. Cab jaduñ yhooyä coo hajxy jaduñ mjatcõ'owät. ¹⁶Pero je'e mäbøcypäiä caj chähdiuhñdmõødä coo hajxy mdsaaçhpõgät je'eguiõxpä coo Jesucristo hajxy hänajty mwiingudsähgø'øyy. Jootcujc hajxy jaduñ mhídät. Mnämä'awäbä Dios hajxy “Dioscujú'uyäp” ja'a Jesucristocõxpä.

¹⁷Tøø yhabaatnä coo Dios hajxy xyajtøyhajtyegáanäm. Coo Diosmädia'agy hajxy nmäbõjcäm, paady hajxy jayõjp xyajtøyhajtyegáanäm, paady hajxy jayõjp xyajtsaaçhpõjcäm. Pero ja'a häna'cä Diosmädia'agy hajxy ca'a mäbõjpä, coo hajxy hänajty tiøyhajtyega'añ, maas hanaxiä hajxy hänajty chaaçhpøga'añ. ¹⁸Siémprämä hojiäya'ayhajxy chaaçhpøga'añ. Maas hanaxiä ca'awiindøyhäna'c-hajxy chaaçhpøga'añ, ja'a Dios hajxy ca'a wiingudsähgøøbiä. ¹⁹Coo hajxy hänajty pøn xyajtsaaçhpøcy nää nägoobä, cab hajxy mmõõpädá'agät. Tehñgajnä hajxy hoy mjaac jäya'ayhádät. Hiõ, ja'a Dios hajxy hänajty tøø xyajmädsocy coo hajxy mdsaaçhpõgät.

5 Mijts majjäya'adiõjc-hajxy, ja'a hajxy jim tuumbä tsajtøgooty, mijts cham nmägapx nhane'emaamby. Nmõõdhõçhä cuñdujt jaduñ cooçh mijts jaduñ nmägapx nhané'emät, je'eguiõxpä cooçh tøø nmäjaabä, mõød cooçh jim nduumbä tsajtøgooty. Nhijxhó'c-hõçhä Jesucristo jim cruzcõxp. Y coo Jesucristo yaa quiädaactägätsät hädaa yaabä naaxwiin, näguipxy hajxy hänajty

jim xyajnöcxáanäm tsajpootyp,
 hөөч mөөд mijts. Jimä hoyhajtä
 weenhajt hajxy xmio'owáanäm
 pedyii. ²Mijts majjäya'adiöjc,
 hoyyä Diosmädia'agy hajxy
 myajnähihö'owät hamuumdu'joot,
 ca'a yhadsip ca'a yhajootma'adä.
 Hamuumdu'jootä cu'ug hajxy
 mmägäp mhané'emät. Hix,
 ja'a Dios hajxy tөө xpiäda'agy
 coo cu'ug hajxy jaduhñ
 myajnähihö'owät, mөөд coo
 hajxy mmägäp mhané'emät.
 Cab hajxy xädö'öñguiöxpä
 myajnähihö'owät. ³Cab hajxy mөc
 mөc mhané'emät. Mee'xxieemy
 hajxy myajnähihö'owät. Hoyyä
 Diosmädia'agy hajxy myajtúnät;
 jaduhñä cu'ug hajxy xpiahix
 xpiadúnät. ⁴Y coo Jesucristo
 yaa quiädaactägätsät, ja'a hajxy
 nWiindsöñhájätämbä, mänit
 hajxy xquiumaya'añ pө tөө hajxy
 hänajty hoy myajnähihö'öy. Mänit
 hajxy hänajty jim xyajnöcxä'añ
 tsajpootyp. Cөjxta'axiөө hajxy
 hänajty jim mhida'añ.

⁵Mөөд mijts muutsc-häna'c,
 jaduhñ mijtspä,
 mwiingudsähgö'owäbä
 majjäya'ay hajxy. Coö hajxy
 waamb xmiägäp xyhané'emät,
 mgudiúnäp hajxy jaduhñ. Hahoy
 haween hajxy mnibiuhbedöjät
 hamiñ haxөpy, hoy miöjjä hoy
 miuutscä. Hix, coö hajxy jootmөj
 mnibiäda'agöjät, xyajcumädöwäbä
 Dios hajxy jaduhñ. Pөnjaty capxp
 mädiaacp mee'xxieemy, je'edsä
 Dios piuhbejpy. Móoyyabä
 hoyhajtä weenhajt hajxy jaduhñ.
⁶Coo Dios hajxy jaduhñ mänaa
 xyajtsaächpögät, cab hajxy

mmөjpadä'agät. Jim hajxy
 mnibiäda'agöjät maa Dios
 quiö'öba'c tiecypia'cän. Mөcmäjaa
 Dios jiaanč tehñ miөөд. Hix,
 cujequiä Dios ja'a tsaächpä hajxy
 xyajnähwä'adsät. Mänit hajxy
 jootcuje xjiaanč tehñ yaghida'añ.
⁷Coo hajxy hänajty tii mnädajy
 mnämay, mmänuu'xtä'agäbä Dios
 hajxy jaduhñ coö hajxy ween
 xyaghoyөөyyä. Hix, homiänaajä
 Dios hajxy xcwieendähäty.

⁸Mniyajcopcө'owöjöp hajxy;
 jaduhñä Jesucristo miädia'agy
 hajxy hoy mbanöcxät tehñgajnä.
 Jaduhñä möjcu'ugongä
 wyiinmahñdy quia'a mäjädá'agät.
 Hix, ja'a möjcu'ugong, homiänaajä
 hajxy jaduhñ xmiädsiphájätäm.
 Xjia wi'i yajtu'udägöyyáanäm hajxy
 jaduhñ. ⁹Cabä möjcu'ugongä
 miädia'agy hajxy mmäböjcat.
 Hamuumdu'jootä Diosmädia'agy
 hajxy myajtúnät tehñgajnä. Hix,
 pөnjatiä Diosmädia'agy mäböjp
 wiinduhmyhagajpt, jaduhñ
 hajxy chaächpөjpä nej mijts
 mdsaaächpөquiän. ¹⁰Cab hajxy
 jejcy mdsaaächpөga'añ. Coö Dios
 ja'a tsaächpä hajxy hänajty tөө
 xyajnähwa'ačh, mänitä Dios hajxy
 hamuumdu'joot xyajmäbögaanä
 ja'a Jesucristo miädia'agy. Ca'xy
 pedyii Dios ja'a wyiinmahñdy hajxy
 xyajnähihö'öwa'añ. Ja'a Diösäts
 hajxy jaduhñ xcwieendähájätäm,
 hoy hajxy nej cu nja jajt cu nja
 habéjtäm. Tiuumbiä Dios mayhajt
 jaduhñ maa höjtscөxphájätäm.
 Jaaya'ay hajxy jaduhñ tөө
 xyajnähdíjjäm coö Jesucristo hajxy
 jim xyajnöcxáanäm tsajpootyp.
 Cөjxta'axiөө hajxy jim nhidáanäm.

Hix, cøxiä Dios ja'a hoyhajtä weenhajt hajxy jaduhñ xmióoyäm.

¹¹Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios mõjcuhdujt miøødhada'añ. Tøyhajt jaduhñ.

¹²Ja'a mägu'ughajpä Silvano hädaa nocy jahby. Høøch nnajtsapxøøyyäp. Cab hädaa nocy jiaty yoñä. Hoyyä Silvano Diosmädia'agy jiaanč tehñ yajtuñ. Tøyhájthøch cham tøø ngapxy tøø nmädia'agy nebiä Dios tøyhajt wyiinmayyän. Tøø Dios mõjmayhajt tiuñ maa højtsøxphájtäm. Tøø hajxy jaduhñ xyajmädsójcäm coo hajxy jim xmiøødhájtämät tsajpootyp.

¹³Ja'a jäya'ayhajxy yaa tsánaabiä Babilonia, ja'a

Diosmädia'agy hajxy mäbøjpä ja'a Jesucristocøxpä, xyajpoo'xp mijts jaduhñ. Nej mijtsä Dios xyajnähdiijiän coo miädia'agy hajxy mmäbøjcät, jaanä jaduhñä jäya'ayhajxy yaabä yajnähdijjäbä coo hajxy miäbøjpät. Jaduhñ mijtsä mmägu'ughajpä Marcos xyajpoo'xpä. Nébiøchä nhamdsoo húungänä Marcos njuø'øy. ¹⁴Coo hajxy hánajty mhamugø'øy Dioswiingudsähgøøbiä, hamiñ haxøpy hajxy mniyajpoo'xøøját. Jaduhñ hajxy myajcähxó'øgät coo hajxy tøyhajt mniçhocy mnibia'häyoyii hamuumdu'joot.

Pønjatiä Diosmädia'agy panøcxp ja'a Jesucristocøxpä, weenä hoyhajtä weenhajt hajxy mio'oyii ja'a Diósäm. Amén.

2 Pedro

1 Høøch xøhajt Simón Pedro. Høøch hädaa nocy njahby. Ja'a Jesucristøch nmøødtuumby. Jaayá'ayhøch tøø xwiinguexy cooçhä miädia'agy nyajwá'xät. Tøø mijtsä Jesucristo xyajnähdijy coo hajxy hoy mmäbøgät jaduñ mäwiin neby højts xyajnähdijjän. Tu'cuhdujt hajxy jaduñ xquiumáayyäm nägøxiä je'leguiøxpä coo hajxy tu'cuhdujt nmäbøjcäm coo tiøyyä. Jaduñ yajnajuø'øy coo Jesucristo yhojiäya'ayä. Jaaya'ay hajxy nDioshåjtäm. Tøø hajxy xpiädäacäm hawa'adstuum. ²Ween mijtsä Dios ja'a hoyhajtä weenhajt xmio'oy mõj may coo ja'a tøyhajt hajxy mmøødä ja'a Diosøxpä møødä Jesucristocøxpä, ja'a hajxy nWiindsønåjtämbä.

³Coo ja'a tøyhajt hajxy nmøødhåjtäm ja'a Jesucristocøxpä, paadiä Dios hajxy madiu'u xpiuhbåjtäm ja'a miäjaahaam, jaduñ hajxy hoy njäya'ayhåjtämät. Mänitä Dios hajxy jaduñ xquiumáayyämät. Jaanä miäjaahaamä Dios hajxy xyagjugyhadäänäm homiänaajä neby je'e jjugyhatiän. Coo Jesucristo miøjjä jiaançhä, coo jiaanç tehñ yhojiäya'ayä, paady

hajxy tøø xyajnähdijjäm coo hajxy hoy njäya'ayhåjtämbät. ⁴Coo Jesucristo jaduñ miøjjä jiaançhä, paadiä mayhajt mõj may tiuna'añ maa højtscøxphåjtäm. Jaduñ jim myiñ cujaay maa Diosmädia'aguiän coogä Dios mayhajt may tiuna'añ maa højtscøxphåjtäm. Homiänaajä hajxy xyagjugyhadäänäm neby je'e jjugyhatiän. Y tøø hojiootä howyiinmahñdy hajxy xmióoyyäm hawiinjemybiä. Jaduñ hajxy hoy nmøødhåjtämät tu'ugmädia'agy. Jaduñä haxøøgpä hajxy yaa hoy njøjyohdiúutämät hädaa yaabä naaxwiin. Ja'a häna'c-hajxy yaa ca'a mäbøjpä, hadsojwiinmahñdy hajxy miøød. Coo yhaxøøgwiinmahñdy hajxy jaduñ quia'a najtshixø'øwa'añ, paady hajxy jiiby quia'awa'añ haxøøgtuum. ⁵⁻⁷Paadiä Diosmädia'agy hajxy tsøc mäbøjcäm. Tsøc hajxy hojiäya'ayhåjtäm hamuumdu'joot. Tsøc hajxy jaac habøjcäm ja'a Diosøxpä. Tsøc hajxy håjtäm najuø'øyhaamby. Tsøc hajxy mee'xtújcäm. Tsøgä Dios hajxy wiingudsähgøøyyäm. Tsøc hajxy niçhöjcäm nebiä tu'ugpuhya'ayän, neby højtsä Jesucristo xchøjcäm.

Tsögä jäya'ay hajxy nägøxiä tsojc mee'xäm, hoy hajxy näje'e quia'a jagä mabøcy.

⁸Coo hajxy jaduñ hamuumdu'joot ngudiúunämät nébiøch naamnä tøø nmädia'agy, mänit hajxy nhoyøoyämät. Mänitä Jesucristo tiuung hoy ndúunämät. Nmøødhájtämä tøyhajt hajxy jaduñ ja'a Jesucristocøxpä. ⁹Hix, pønjaty jaduñ ca'a cudiuumb nébiøch naamnä tøø nmädia'agy, jaduñ mäwíinäts hajxy je'e nebiä wiinds nebiä xoodspän je'eguiøxpä coo hajxy tøø jahdiägoy coo piojpä quiädieey hajxy tøø nähwa'ačhii neby hajxy hijty jegyhajty jiäya'ayhatiän. Jaduñ hajxy tøø jahdiägoobiä coo Dios jioot chocy coo hajxy hoy jiäya'ayhädät. Paady hajxy jaduñ jia yajnáhwaatsä.

¹⁰Hoorä, mägu'ughajpädøjc, tsøc hajxy hamuumdu'joot cudiuunäm nébiøch naamnä tøø nmädia'agy. Jaduñ yajnajuø'owa'añ coo Dios hajxy tøø xyajnáhdíjjäm coo hajxy xquiu'ughadäänäm. Coo hajxy jaduñ ngudiúunämät, cab hajxy jaduñ mänaa ndu'udägóoyämät.

¹¹Jaduñ hajxy hoy yajxonñ nnøcxämät Jesucristo wyiinduum maa cøjxta'axiøø yhane'emian. Jaaya'ay hajxy nWiindsønhájtäm. Tøø hajxy jaduñ xyajnáhwáatsäm.

¹²Homiänájäts mijts jaduñ nyagjahmiejtsta'aga'añ nébiøch naamnä tøø nmädia'aguiän. Tøyhájthøch jaduñ tøø nmädia'agy. Hoy hajxy jaduñ mjaty. Cab hajxy mdsoj jahdiägoyya'añ.

¹³Hawiinmats jaduñ cooçh mijts jaduñ nyagjahmiejtstä'agät tehngajnä, mädúhñtiøch njaac

jugyhaty. ¹⁴Hamdsóojøchä Jesucristo xñämaayy cóogøch mobädajpä nho'ogaannä, ja'a hajxy nWiindsønhájtämbä. ¹⁵Pero cooçh hánajty tøø nho'ogy, hoy hajxy jaduñ mjaac capxtá'agät nébiøch cham nmädia'aguiän. Jaduñ hajxy hoy mjahmiejtstä'agät.

¹⁶Tøø højts mijts nyajwiingapxø'øy coo Jesucristo møcmäjaa miøødä, y coo yaa jadähooc quiädaactägatsa'añ hädaa yaabä naaxwiin. Tøyhajt højts jaduñ nmädiaacy. Cab højts hamdsoo nyajcojy. Diosmädia'agy hädaa jaduñ. Ca'a nälä cueentä nebiä jäya'ay cueentä hajxy yajcojjiän. Hamdsoo højtsä Jesucristo nhijxy coo møcmäjaa miøødä, coo je'e Dyiosä. ¹⁷⁻¹⁸Mänaa højtsä Jesucristo hánajty jim nmøødän maa tunän, mänitä Diosteedy jim quiuhgapxnajxy tsajpootyp: “Høøçh nhamdsoo Huung yø'ø. Njaançh tehñ chójpiøch yø'ø. Jaançh tehñ jiootcújc-høch nnijwiø'owyii maaçh nHuungcøxpän”, nømä Jesucristo nänøømä. Njaançh mädoow højts jaduñ. Møcmäjaahaamä Dios jaduñ quiapxy. Jaançh tehñ yajxonä Jesucristo piädaacä ja'a Tiéediäm, nebiä hajjapän. Paady højts yø'ø tun nyajxøøbejty: “Ja'a tun maa Dios nägapxiän coogä Jesucristo yHuunghaty.”

¹⁹Tøyhajt jaduñ jiaançh jajty nébiøch cham nmädia'aguiän. Hamdsoo højts nhijxy nmädooyy. Hahixøøby jaduñ coo højts mijts nmädia'agy xmiäböjcat. Maas hahixøøby jaduñ coo Diosmädia'agy hajxy mmäböjpat, ja'a jäya'ayhajxy jecy

quiujáhyäbä. Jaduhñ mäwíinädsä Diosmädia'agy miäbaady nebiä jøon tioyyän hagoonstuum. Hix, xyajwiinjuóøyyäm hajxy jaduhñ tijaty hajxy hoy hamdsoo nga'a wiinjuø'owáanäm. Hahixøøby jaduhñ coo hajxy homiänaajä nyajcopcøøyyämät. Coo Jesucristo yaa quiädaactägätsät hädaa yaabä naaxwiin, mänit hajxy cøxiä xyajwiinmädiaagø'owáanäm. Jaduhñ hajxy hoy nwiinjuø'owáanäm cøxiä.

²⁰⁻²¹ Huuc wiinjuø'ow hajxy jaduhñ, coo jäya'ayä Diosmädia'agy hajxy jecy quiujahy, cab hajxy hamdsoo yajcojy. Näje'e hajxy jaduhñ quiujahy tijaty hänäjty jadäänäp tunäänäp. Ja'a Dios je'e najtscapxøøyy ja'a yhEspirituhaam waamb hajxy quiujáayät.

2 Jii jäya'ayhajxy hijty näje'e jegyhajty miäna'añ cooc tyijy Dios hajxy hänäjty ñajtscapxøøyyäbä. Pero hønndaacp hajxy hänäjty jaduhñ. Ja'a Dioscu'ug hajxy hänäjty jia wi'i wyiinhøønaamby. Jaanä jaduhñä hønndaacpähajxy jiiby wiäditaambä maa mgajpthajxiän. Cabä cu'ug ñajuø'owa'añ pø wiinhøñäp hajxy hänäjty jaduhñ. Høxtä mäna'anaambä hønndaacpähajxy jaduhñ cooc tyijy ja'a Jesucristo hajxy tøø xquia'a nähho'túutäm. Paquiä hajxy yajcumädowa'añii. Pønhatiä hønnda'agymiädia'agy mähøgaamb, tu'udägoyyaamb hajxy jaduhñ. Ja'a häna'c-hajxy jaduhñ hønndaacpä, niyhamigähadäänäp hajxy jaduhñ. ² Pahixäänäp hajxy jaduhñ nämay. Ja'a häna'c-hajxy mähahixaamb, ja'a tyijy ja'a

Diosmädia'agy hajxy mähøjpä. Coo hajxy jaduhñ hoy quia'a hida'añ, ni häna'c-hajxy hønndaacpä, ni häna'c-hajxy mähahijxpä, paadiä cu'ugä tøyhajt hajxy quia'a tsoga'añ ja'a Jesucristocøxpä.

³ Ja'a hønndaacpähajxy, xädø'øñ hajxy piøcjuø'owaamby. Hønnda'agymiädia'agyhaamby mijts xyajnähixø'owa'añ; jaduhñä xädø'øñ hajxy xjia wi'i piøgaanä. Jéquiänä Dios tiägøøyy mänaandaacpä coogä häna'c-hajxy quiumädowa'añ, ja'a hønnda'agymiädia'agy hajxy yajnähixøøbiä. Jaduhñä Dios jecy miänaandaacpä cooc hajxy quiuhdägoyya'añ.

⁴ Hix, yajcumädoobiä Dios je'e pønjaty ca'a mähøgaamb. Coo mioonsähajxy näje'e jim jecy quia'a mähøjcy tsajpootyp, paady hajxy jecy quiumädooyy. Haxøøgtuum hajxy hoy quiuhjuipnaxyii maa jiaanč tehñ quiøöcän, maa yhagoonstuumän. Jim hajxy yhida'añ høxtä coonä yhabaadät coo Dios jaduhñ miäná'anät nebiaty hajxy jii jiaac tsaächtiuna'añii. ⁵ Jaanä jaduhñä Dios ja'a jecyjiäya'ay yajcumädoobä, ja'a hajxy jecy tøø quia'a mähøquiäbä. Mänitä Dios nøøgomdägoy quiejxy. Jayooyyä Noéhajxy choocy møødä yhuung møødä tio'oxy ja'a näductujcäp. Jaduhñä Noé ja'a cu'ug hänäjty tøø jia yajwiingapxø'øy coogä yhaxøøgcuhdujt hajxy ñajtshixø'owät, coogä Dios hajxy wyiingudsähgø'owät. ⁶ Jaanä jaduhñä jecyjiäya'ayhajxy jiajpä, ja'a hajxy hijty jim tsänaabiä

maa cajpt hijty jaduñ xiøhatiän Sodoma mөөдä Gomorra. Cabä Dios hajxy hijty ñä'ägä wiingudsähgø'øy. Paady hajxy jøønhaam yajcuhdägooyä. Cøjxä haxøøghäna'c-hajxy yho'ogy. Haagä cujiaam hajxy jiajnä mөөдä quiajphajxy. Hijxtahnd ja'a Dios jaduñ piädaac coo haxøøgjäya'ayhajxy nägøxiä yajcumädowa'añii. ⁷⁻⁸Mänaa Dios ja'a jecyquiajpt jaduñ yajcuhdägoyyän, jagooyä tul'jäya'ay yajtsoocä, ja'a hänäjty xøhjäpä Lot. Paadiä Lot yajtsoocä, je'eguiøxpä coo hänäjty hoy jiäya'ayhaty. Mänitä Dios ja'a Lot yhawaanä coogä quiajpt hänäjty quiuhdägoyya'añ. Paadiä Lot jim chohñ. Jaanč tehñ jiootmayhajpä Lot hänäjty jaduñ coo cu'ughajxy hänäjty haxøøg jiatcø'øy jabom-jabom hijxwiinduum. ⁹Nebiä Dios ja'a Lot jecy yajtsooquiän, jaanä jaduñä Dios ja'a quiu'ug yajtso'ogaambä coo hajxy hänäjty chaačhpøcy. Tøyhajt jaduñ. Jaanä jaduñ tiøyhätjäbä coo Dios yajcopcø'øy nebiatiä haxøøgjäya'ayhajxy jiatcø'øyän. Jéquiänä Dios jaduñ miänaañ cooc hajxy quiumädowa'añ. Coö jaduñ yhabáadät, mänitä Dios miäna'ana'añ nebiaty hajxy jii chaačhtiuna'añii. ¹⁰Nägø'ø nädequiä Dios yajcumädowa'añ pøn yajnahixøøby høhnda'agymiädia'agyhaam, pønä Diosmäjaa xøøghajp. Jaanč tehñ chähdiuhndägoy hajxy ñibiäda'agyii, ja'a høhnda'agymiädia'agy hajxy mäwädiipä. Jootmøj hajxy

jaduñ ñibiäda'agyii. Cab hajxy pøn wyiingudsähgø'øy. Haa jaaya'ayhajxy mõjtuungmөөдpä maa Diosmädia'agy myíñänä, wiingapxpéjtäp hajxy je'ebä. ¹¹Haa ja'a Diosmoonsähajxy jim hijpä tsajpootypä, maas mөcmäjaa hajxy miөөдä quejee ja'a høhnda'agymiädia'agy hajxy mäwädiipä. Pero cabä Diosmoonsä ja'a mõjtuungmөөдpä hajxy wyiingapxpety maa Dioswiinduumän; ni cab hajxy ñähojy.

¹²Jaduñä høhndaacpähajxy ñibiäda'agyii nebiä yuughanimalän coo hajxy tii quia'a wiinjuø'owa'añ ja'a Dioscøxpä. Hix, cabä yuughanimalhajxy tii wyiinjuø'øy ja'a Dioscøxpä. Mädyiijatiä høhndaacpähajxy quia'a wiinjuøøby, je'e hajxy ñäxiicypy. Paquiä hajxy yajcuhdägoyya'añii nebiä animalhajxy paquiä quiuhdägoyyän coo hajxy yagho'ogyii. ¹³Tsaächtiuánäbä høhndaacpähajxy jaduñ je'eguiøxpä coo hajxy hänäjty tøø miädsaačhtiunñ. Xoondaacp hajxy jaduñ coo hajxy cøxypänejpiä jiatcø'øy xøømbaady. Høxtä jiiiby hajxy yajtägø'øy maa mijts naxxy mgaamiuquiän ja'a Jesucristocøxpä. Ja'a Jesucristo miädiä'aguiäc tyjy hajxy pianøcxäp. Pero haxøøgjaty hajxy wyi'i jiatcø'øy mijts mwiinduum maa hajxy hänäjty mgaamiuquiän. Høxtä jiiibypiaady hajxy je'e yøhndaacpä.

¹⁴Homiädyii to'oxiøjcä hajxy jaduñ yhixy, yhadsojpy hajxy jaduñ. Homiänaajä hajxy jaduñ haxøøg jiatcø'owa'añ. Wyiinhøhmby

hajxy pønjatiä Diosmädia'agy hoy ca'a habøjpnä. Hadsojwiinmahñdy hajxy nã'ägä yajtuumbÿ. Tsipecøxp hajxy jaduħñ nã'ägä cumädowa'añ. ¹⁵Tøø tødiu'u hajxy jiojwa'açh. Tøø hajxy jaduħñ tiu'udägoy. Ja'a Balaam hajxy jaduħñ piahijxyp, ja'a Beor yhuung. Jeguiajtiä Balaam hänajty quiudiuna'añ ja'a quia'awiindøguiøxpä møødä xädø'øñguiøxpä. ¹⁶Mäniä Balaam wyiinhøjnajxä tiic jaduħñ coo jiatcø'owa'añ. Ja'a mõjc burra jaduħñ mähoj. Jaduħñ quiapxy nebiä jäya'ayän. Mäniä Balaam ñajuøøñä coo jaduħñ quia'a hoyyä. Jaduħñä burra miädia'agy miäbøjcäxä.

¹⁷Yø'ø häna'cä

høħnda'agymiädia'agy hajxy mäwädijpä, jaduħñ mäwiin hajxy miäbaady nebiä nøøjut tøø tiø'øçhpän. Jaduħñ mäwiin hajxy miäbaatpä nebiä joc piojwäditypän coo hänajty quia'a näl'ägä tu'uy. Hiç, cabä tøyhajt hajxy nã'ä yajnähiçø'ø. Cøjxta'axiøø hajxy jiiby yhida'añ maa haxøøgtuumän. Ja'a Dios jaduħñ mänaaħ cooc hajxy jiiby yhida'añ. ¹⁸Yoñ hajxy jia mädia'agy. Ja wi'i yajcumayaamb hajxy jaduħñ. Pero cabä miädia'agy hajxy choobaady. Ja'a høħnda'agymiädia'agyhaam hajxy wyiinhøøñ pønjatiä Diosmädia'agy naamdägø'øy habøjp. Jøjcapxøøyyäp hajxy jaduħmbä, ween hajxy haxøøg jiatcøøguiumbä neby hajxy hijty jiatcø'øyan. ¹⁹Jaduħñä høħndaacpähajxy yajnähiçø'øy cooc tyijy quia'a nejpiä coo haxøøg mjäya'ayhäädät. Hiç, jaduħñ hajxy yajnähiçøøbiä

cooc tyijy ja'a Dios hajxy xquia'a hanéhmänä coo jecymiädia'agy hajxy ngudiúunämät, jaduħñ jia mänaambä cooc hajxy hoy njäya'ayhäjtämät. Jaduħñ hajxy yhøħndaacpä cooc tyijy hajxy jaduhyä nñähwáatsäm. Ni je'e hajxy tøø quia'a nähwa'açh je'eguiøxpä coo yhaxøøgwiinmahñdy hajxy tøø quia'a najtshixø'øy. Paady hajxy nøcxy quiuhdägoyyaannä. Jaanä jaduħñ højtshäjtämbä, coo nhaxøøgwiinmahñdy hajxy nga'a najtshixøøyyämät, jaduħñ højts nøcxy nguhdägoyyaanämbä. ²⁰Coo Jesucristo hajxy njøjpøgøøyyäm, ja'a hajxy nWiindsønähäjtämbä, paadiä nhaxøøgwiinmahñdy hajxy xyajnähwáatsäm, neby hajxy yaa nmøødhäjtäm hädaa yaabä naaxwiin. Pero, coo Jesucristo miädia'agy mjahdiägøoyyät, y coo mhaxøøgwiinmahñdy jadähooc mbadu'ubøgät, maas haxøøg jadähooc mjada'añ. ²¹Hiç, pønjatiä Diosmädia'agy jaduħñ jahdiägooby, maas hoy haxøpy coo hajxy cu quia'a mäbøjcy. Hiç, coo hajxy jaduħñ yhøħhixät, maas hanaxiä hajxy jaduħñ quiumädowa'añ. ²²Jaduħñ hajxy jiädät nebiä hädaa mädia'agy miäna'añän: "Ja'a huc-hajxy, coo hajxy yhøøçh, ja'a yhamdsoo høøçh hajxy nñawiimbijpy, nøcxy hajxy jadähooc jioø'xø'øgy. Jaanä jaduħñä hädsømhajxy jiatcøøbiä, naamñä hajxy hänajty tøø chi'iy, mäniä hajxy jadähooc nøcxy yajtsnä tiø'pnä mo'ondsooty." Tøyhajt jaduħñ.

3 ¹⁻²Mägu'ughajpädøjc, miämetsc-hoocpä mijts

cham nnäjaayø'oy. Jaduhñ
 mijts cham miämetsc-hoocpä
 nmägapxy nhane'emy coo
 mädia'agy hajxy mjahmiejstá'agät,
 ja'a Diosquexypähajxy jecy
 quiujáhyyäbä. Jaduhñä
 howyiinmahñdy hajxy
 mmøødhädät. Huuc jahmiets hajxy
 jaduhmbä nebiatiä Jesucristo hajxy
 xmiägäpax xyhanéhñäm. Jaaya'ay
 hajxy tøø xñähho'túutäm, paady
 hajxy nWiindsøn'hájtäm. Ja'a
 Jesucristo quiugapxyhajxy, je'e
 mijts tøø xyhawaañä nebiatiä
 Jesucristo hajxy tøø xmiägäpax tøø
 xyhane'emy.

³Naxý hädaa mädia'agy hajxy
 mdehm wyiinjuø'øwät nébiøch
 cham nmädia'aguiän. Coo
 naaxwiimbä hñajty wyiimbida'añ,
 mänitä jäya'ayhajxy quiähxø'oga'añ
 coo Dios hajxy ñänøma'añ. Haxøøg
 hajxy jiatcø'øwa'añ nebiatiä
 yhamdsoo joot hajxy hñajty
 chocy, neby hajxy hñajty ñä'ägä
 cuhdujthatiän. Xñäxi'igaamb
 mijts jaduhñ. ⁴Jaduhñ hajxy
 miäna'ana'añ: “Cab jaduhñ
 tiehñ tiøjiada'añ coo Jesucristo
 wyiimbijtagatsa'añ neby jaduhñ
 tøø yhuuc mänaambä. Hix, caj tii
 mänaa tiägach. Je'enä cøxiä wiinä
 jaduhñ yhityñä mänaa naaxwiimbä
 jecy yhawijy tiøø'xta'aguiän, mänaa
 jecyjiäya'ayhajxy yho'oguiän”, nøm
 hajxy yhøhnda'aga'añ. ⁵Pero tøyhajt
 jaduhñ coo naaxwiimbä jiaanč
 tägach. Pero ja'a høhndaacpähajxy,
 cabä tøyhajt hajxy wyiinjuø'øwa'añ.
 Hix, haagä nøø hijty jegyhajty.
 Mänitä Dios ja'a tsajt jecy
 yhädiuun møødä naaxwiin. Jiibiä
 naaxwiimbä yajcojy nøøjooty.

Mänit hoy piäda'agy nøøhagujc.
⁶Mänitä Dios nøøgomdägoy cujecy
 quiejxy. Mänitä naaxwiimbä
 quiuhdägoooy. Cøjxä jäya'ayhajxy
 yho'ogy. ⁷Ja'a tsajt møød hädaa
 yaabä naaxwiin, tøø Dios jaduhñ
 yajnähdiijy coo quiøxy toya'añ.
 Mänitäc jaduhñ tioya'añ coo Dios
 ja'a jäya'ay yajcuhdägoyya'añ, ja'a
 Diosmädia'agy hajxy ca'a mäbøjpa.
⁸Mägu'ughajpädøjc, tsøc hajxy
 jahmiéjtsäm coo Dios tu'xøø
 jaduhñ ñänømy jadu'miljomøjtpä; y
 jadu'miljomøjtpä, tu'xøøyyä jaduhñ
 ñänømy. ⁹Näje'e jäya'ayhajxy
 miäna'añ cooc tyijy ja'a
 Jesucristo quia'a tsoj yajtøjiada'añ
 coo yaa quiädaactägatsa'añ,
 coo haxøøgjäya'ayhajxy
 yajcumädowa'añii. Pero cab
 jaduhñ tiøyyä neby hajxy
 jaduhñ jia wi'i yhøhnda'agy.
 Hix, mee'xtujpä Jesucristo ja'a
 mijtscøxpä. Cabä jioot chocy coo
 pøn quiuhdägøyyät. Jaduhñä jioot
 jia tsoy coo haxøøgcuhdujt hajxy
 nnajtsnixøøyyämät.

¹⁰Jaguiapxy yhabaada'añ coo
 Jesucristo yaa quiädaactägatsa'añ,
 coo haxøøgjäya'ayhajxy
 yajcumädowa'añii. Cabä pøn
 jaduhñ ñajuø'oy mänaa jaduhñ
 jiaanč habaada'añ. Mänitä
 tsajt quiuhdägoyya'añ. Jaduhñ
 yajmädowa'añ nebiä hänee møc
 ya'axiän. Cøxaambä xøø tioya'añ,
 møødä po'o, møødä mads'a,
 møødä naaxwiimbä, møødä tijaty
 yaa hijp hädaa yaabä naaxwiin.

¹¹Coo cøxiä wiinä jaduhñ
 quiuhdägoyya'añ, paady hajxy tsøc
 hoy jäya'ayhájtäm. Tsøcxä Dios
 hajxy hoy wiingudsähgøøyyäm.

Tsøcxä Diosmädia'agy hajxy hoy cudiúunäm. ¹²Tsøc hajxy jøbhíjxäm coo Jesucristo yaa quiädaactägatsa'añ. Mänitä Dios ja'a tsajt yajtoya'añ, møødä xøø, møødä po'o, møødä madsa'a, møødä naaxwiimbä. Tsøgä jäya'ayä Diosmädia'agy hajxy yajmøødmädiáacäm nämay, ween hajxy miäböcy; jaduñä Dios paquiä yaghabáaadät. ¹³Tøø Dios jaduñ miäna'añ coogä hawiinjemyčhajt yhädiuna'añ, møødä hawiinjemyñaaxwiin. Jimä njoot hajxy nbädáacäm coo Dios hajxy jim xyajnxøcxáanäm. Cabä haxøøgpä jaduñ jim mänaa tiägø'øwa'añ maa ja'a hawiinjemybiä tsajtän, ni jim maa hawiinjemybiä naaxwiimbän.

¹⁴Mägu'ughajpädøjc, tøyhajt jaduñ coo Dios hajxy jim xpiäda'agáanäm, paadiä haxøøgpä hajxy tsøc najtshixøøyyäm hamuumdu'joot; jaduñä Jesucristo hajxy xpiáatämät coo pojpä cädieey hajxy hänäjty nga'a møødhájtäm, coo yaa quiädaactägätsät. Tsøc hajxy jootcujc nimiøødhíjtäm nebiä tu'ugpuhya'ay nebiä tu'ugpuhdo'oxypän. Jaduñä Dios hajxy hoy xyhíjxämät coo hajxy hänäjty hoy ndúunäm.

¹⁵Mjahmiédsäp hädaa mädia'agy hajxy jaduñ. Paadiä Jesucristo jaduñ miee'xtucy, weenä jäya'ayhajxy may miäböcy, ween hajxy jaduñ may ñähwa'ačh.

Ja'a mägu'ughajpä Pablo, jaduñ mijts tøø xñäjaayøøbiä. Ja'a Dios ja'a tøyhajt najtscapxøøyyä. Ja'a tsipjatypä ja'a Dios ja'a Pablo yajwiinjuøøyy. Jadúñhøčhä Pablo njuø'øy nébiøčhä nhamdsoo puhya'ayän. ¹⁶Naaghooc mijtsä Pablo xñäjaayø'øy, jaduñ ñä'ägä mädia'agyhaty nébiøch cham njaayän. Tsipjatiä Pablo siémpräm miädia'agy. Ja'a häna'cä tøyhajt hajxy ca'a tsojpä, wiingä Pablo miädia'agy hajxy yajnähixøøyyä. Cab hajxy jaduñ yajnähixø'øy nebiä Pablo jia mänaañän. Wiingatiä Diosmädia'agy hajxy yajnähixø'øy. Cabä tøyhajtpä hajxy miäböga'añ. Paady hajxy quiuhdägoyya'añ.

¹⁷Mägu'ughajpädøjc, mnä'ägä najuøøby hajxy jaduñ coo høñndaacpähajxy jii wiädita'añ. Cabä tøyhajt hajxy chocy. Haxøøg hajxy jiaančh tehñ jäya'ayhaty. Mnigwieendähadøøjöp hajxy; jaduñä tøyhajt hajxy mga'a najtshixø'øwät. Cab hajxy myajwiinhøønät coo hajxy jaduñ mnä'ä tu'udägóyyät. ¹⁸Jaac habøcxä hajxy jaduñ ja'a Jesucristocøxpä, ja'a hajxy nWiindsøñhájtämbä. Jaaya'ay hajxy xñähho'túutäm. Tehngajnä miädia'agy hajxy mmäböjçät; jaduñä mayhajt møj may tiúnät ja'a mijtscøxpä. Tsøc hajxy homiánaajä capxpátäm møj jaančh. Tsøc hajxy tehngajnä wiingudsähgøøyyäm. Amén.

1 Juan

1 ¹⁻³Jue'e hõjts mijts nyajnäjaayøøby, ja'a Jesucristo. Dioshuung je'e. Jiiyyäm je'e hänäjty mөөдä Dios mänaa hädaa yaabä naaxwiin yhawijy tiøø'xta'aguiän. Jaayá'ayäts hajxy xyhawáañäm nebiä Dios wyiinmay. Jaayá'ayäts hajxy tøø xñähho'túutäm neby hajxy jaduhñ njugyhájtämät nebiä Dios jjugyhatiän cõjxta'axiøø. Tøø hõjts nhamdsoo hixy; tøø hõjts nhamdsoo mädooy. Tøø hõjts nnähdoñ cø'øhaam. Tøyhajt jaduhñ. Paady hõjts mijts jaduhñ nhawáañäm neby hajxy jaduhñ nhájtämät tu'ugmädia'agy, neby hõjts ja'a Dios xmiøødhitiän tu'ugmädia'agy mөөдä yHuung. ⁴Paady jaduhñ nhawáañäm neby hajxy jaduhñ jootcujc nhájtämät tehngajnä.

⁵Hoyyä Dios ja'a wyiinmahñdy; cabä pojpa cádieey ñä'ägädä mөөдä. Jaduhñ hõjts ja'a Jesucristo tøø xyhawaañä, y jaduhñ mijts nhawaañdägájtsäm. ⁶⁻⁹Coo hajxy hoy nwädíjtämät nebiä Dios yhitiän, tu'ugmädia'agy hajxy jaduhñ nhájtämät, je'eguiøxpä coo ja'a Jesucristo hajxy tøø xñähho'túutäm ja'a nbojpa ngädieeyhájtäm cõxiä. Xyajnähwáätsäm hajxy jaduhñ

coo ja'a nbojpa ngädieey hajxy nnägápxämät. Tøyhajt jaduhñ. Cabä Dios yhøhnda'agy. Howyiinmahñdy je'eduhñ miøød. Pero coo hajxy nwädíjtämät haxøøgtuum, cabä Dios hajxy nmøødhájtämät tu'ugmädia'agy. Høhndaacäm hajxy jaduhñ y cabä tøyhajt hajxy nnä'ägädä mөөdhájtäm.

Jaanä jaduhñduhmbä, coo hajxy nnä'ä mänáañämät cooc tyijy pojpa cádieey hajxy nga'a mөөdhájtäm, niwyiinhøhñäm hajxy jaduhñ, ¹⁰y cabä Dios miädia'agy hajxy nmøødhájtäm, ja'a tøyhajt. Coo hajxy jaduhñ nmánáañämät, jaduhñ yajmadowa'añ cooc tyijy ja'a Dios yhøhnda'agy. Hix, je'e jaduhñ mänaamb coo pojpa cádieey hajxy nmøødhájtäm.

2 Mägu'ughajpædøjc, cábøch njoot chocy coo hajxy haxøøg mjatcø'øwät. Páadyhøch mijts hädaa nocy nyajnäjaayø'øy. Coo pøn jaduhñ jiatcø'øwät, nähgapxtu'udøøjap je'e Jesucristäm jim maa Diosän. Cabä Jesucristo pojpa cádieey mänaa miøødä. ²Tøø ja'a nbojpa ngädieey hajxy xñähho'túutäm nägøxiä hädaa yaabä naaxwiin.

³Coo hajxy ngudiúunämät nebiä Dios hajxy xyhanéhäm, mänitä

tøyhajt hajxy nmøødhájtämät
coo je'e hajxy nhixyhájtäm.

⁴Pøñ jaduñ nã'ä mänaamb:

“Nhixyhájpíoch je'e”, hoy quia'a
ja cudiuñ, hõhndaacp je'eduhñ.
Hix, ja'a Diosmädia'agy je'eduhñ
quia'a tsojpy. Tøyhajt je'e. ⁵Pero
pøñ jaduñ cudiuumb, cãhxø'p
jaduhñ coo ja'a Dios jiaançh
tehñ jiahmiech. Jaduhñ hajxy
nyajnajuøyyämät coo hajxy
nmøødhájtäm tu'ugmädia'agy. ⁶Pøñ
jaduhñ mänaamb coo ja'a Dios
miøødhity tu'ugmädia'agy, tsipcøxp
wiädítät nebiä Jesucristo hijty
wiäditiän.

⁷Hädaa mädiá'agyhøch chamñ
nyajñähixøøbiä, tøø hajxy
hijty mmädoy mänaa hajxy
mmäbøjtsooñän. ⁸Pero hädaa
mädia'agy jaduñ, jaduñ
mäwiinäts hädaa nebiä
hawiinjemybiän. Hix, jaduñ hajxy
mniçhocy mnibia'häyoyii nebiä
Jesucristo hajxy xchóçäm. Tøyhajt
jaduhñ. Coo ja'a Jesucristo yaa
tøø yhoy hädaa yaabä naaxwiin,
mäniä homiädia'agy hajxy
xyajwiinjuøyyänä. Cab hajxy
jaduhñ nwädíjtänä hagoodstuum.

⁹⁻¹¹Pøñ ja'a y'hermano tsojpy
pa'häyooob, hoyyä Diosmädia'agy
jaduhñ quiudiuñ. Coo hajxy
jaduhñ ngudiúunämät, cab hajxy
ngädiéhyämät. Pero pøñ ja'a
yhermano mähanhajp, hoy jia
mäna'añ cooc tyijy quiudiuñ ja'a
Diosmädia'agy, je'enä wiädity
hagoodstuum. Jaduhñ wiädity
nebiä wiindspän. Cab jaduñ
ñã'ägä niyaghoyø'oyii.

¹²⁻¹⁴Hermanodøjc, míjtshøch
hädaa nocy nyajnajaayøøby.

Mhixyhajpiä Dios hajxy, ja'a
nDeedyhájtäm. Jaaya'ay ja'a nbojpä
ngädieey hajxy tøø xyajñähwäätsäm
je'eguiøxpä coo ja'a Jesucristo
hajxy tøø xñähho'túütäm. Mijts
majjáya'adiøjc, mhixyhajpiä
Jesucristo hajxy jaduñ.
Jíiyyäm jaaya'ay hánajty
mänaa hädaa yaabä naaxwiin
yhawijy tiøø'xta'aguiän. Y mijts
muutsc-häna'c-hajxy, xmioobiä
Dios ja'a mäjaa hajxy coo ja'a
Diosmädia'agy hajxy tehngajñä
mbanøcxy. Cabä møjcu'ugong hajxy
tøø myajmäjäda'agy.

¹⁵Cabä mjoot hajxy mbädá'agät
hädaa yaabä naaxwiin. Coo pøñ
jaduhñ piädá'agät, cabä Dios hoy
jiahmiédsät, ja'a nDeedyhájtäm.

¹⁶Ja'a møjcu'ugong jaduñ
mänaamb coo hajxy çøxiä
wiinä nhadsóçämät hädaa
yaabä naaxwiin, ja'a haxøøgpä.
Jaanä jaduñ miänaambä coo
hajxy nyajcumáayyämät. Pero
cabä Dios jaduñ miäna'añ.

¹⁷Cuhdägoyyaamb hädaa yaabä
naaxwiin møødä haxøøgpä yaabä.
Pero pøñ cudiuumb nebiä Dios
miäna'añän, cab jaduñ mänaa
quiuhdägoyya'añ. Jim yhida'añ maa
ja'a Diosän çøjxta'axiøø.

¹⁸Hoorä, habáatnäp jaduñ coo
ja'a naaxwiimbä wyiimbida'añ. Tøø
hajxy mmädoyhaty coo ja'a Cristo
miädsip quiähxøøga'añ. Y tøø ja'a
miädsiphajxy may quiähxøøgy.
Jaduñ hajxy nyajnajuøyyäm
coo yhabaätinä. ¹⁹Xmiøødhájtäm
ja'a Cristo miädsiphajxy hijty.
Pero coo hajxy tøø xpiuhwäätsäm,
cãhxø'p jaduñ coo hajxy hijty
tehñ tiøyhajt xquia'a møødhájtäm

hamuumdu'joot. Coo hajxy häxøpy hijty xmiøødhjítäm, cab hajxy häxøpy tøø xpiuhwáatsäm.

²⁰⁻²¹ Pero mijts, ja'a Jesucristo hajxy tøø xyajnäguexy ja'a Dios yHespíritu. Mmøødhajpiä tøyhajt hajxy jaduñ cøxiä. Paady mijts hädaa nocy nyajnäjaayø'øy. Y mnajuøøby hajxy coo ja'a tøyhajt hajxy quia'a møødä, ja'a häna'c hønndaacpähajxy.

²² Je'eduhñ nänøømby, pøn jaduñ mänaamb cooc tyjy ja'a Jesús tøø quia'a quexyii ja'a Diósäm. Ja'a Cristo miädsip je'e, pøn jaduñ ca'a capxpaatp ja'a Dios møødä yHuung. ²³ Pønä Dios yHuung jaduñ capxpáatäp, miøødhijpiä Dios je'e. Pero pønä yHuung jaduñ ca'a capxpáatäp, cabä Dios jaduñ miøødhity.

²⁴ Mgudiúnäp ja'a Diosmädia'agy hajxy tehngajnä neby hajxy mbanøcxtsohñän. Coo hajxy jaduñ mgudiúnät, mänitä Dios hajxy tehngajnä mmøødhidät tu'ugmädia'agy møødä yHuung. ²⁵ Y cøjxta'axiøø hajxy xyagjugyhadaänäm neby je'e jjugyhatiän neby hajxy tøø xyajwiinwaanøøyyäm.

²⁶ Naxy hajxy mdehñ wyiinjuø'øwät coo mijts ja'a Cristo miädsiphajxy xjia wi'i wyiinhøøna'añ. ²⁷ Mijts, cabä yajnähixøøbiä hajxy myajmaajiaty. Mmøødhajpiä Dioshespíritu hajxy. Xyajnähixøøbiä tøyhajt hajxy cøxiä. Cab yhønnda'agy. Mmøødhidäp hajxy jaduñ tu'ugmädia'agy neby hajxy tøø xyajnähixøø'yän.

²⁸ Hoorä, tu'ugmädia'aguüä Jesucristo hajxy mmøødhijnät neby

hajxy jaduñ mga'a tsähdiúnät coo quiädaactägätsät. ²⁹ Mnajuøøby hajxy coo ja'a Jesucristo pojpa cädieey quia'a møødä. Jaduñ hajxy mnajuøøbiät coo ja'a Dios yhuunghaty pønjaty hoy wädijp.

3 Xjiaanč tehñ chójcäm ja'a Dios hajxy. Hamuumdu'joot hajxy xyhuunghjítäm. Tøyhajt jaduñ. Pero cabä jäya'ay hajxy xñajuøøyyäm coo ja'a Dios hajxy xyhuunghjítäm. Hix, cabä Dios hajxy yhixyhaty. ² Hoorä, tøø ja'a Dios hajxy xyhuunghjítäm. Cahnä yajnajuø'øy neby hajxy xyaghidáanäm. Pero coo ja'a Jesucristo quiädaactägätsät, nnajuøøyyäm hajxy coo hajxy jaduñ nhidáanäm neby je'ejän. Nhixáanäm hajxy jaduñ neby jaduñ yhitiän. ³ Pøn hamuumdu'joot mábøjp, hoy jaduñ wiädity nebiä Jesucristo hoy yhitiän.

⁴ Pøn haxøøg jatcøøby, cabä Diosmädia'agy quiudiuñ. Je'e jaduñ xøhajp ja'a haxøøgpä coo ja'a Dios miädia'agy mga'a cudiúunät. ⁵ Paadiä Jesucristo yaa tøø yhoy hädaa yaabä naaxwiin nebiä nbojpä ngädieey hajxy xyajnähwáatsämät. Pero cab jaaya'ay pojpa cädieey nã'ägädä møødä. Tøyhajt jaduñ. ⁶ Pønä Jesucristo tu'ugmädia'agy møødhijp, cab jaduñ haxøøg jiatcøø'y. Pøn jaduñ jatcøøby, cabä Jesucristo miädia'agy nã'ägädä mábøjcä. ⁷ Mägu'ughajpädøjc, cab hajxy myajwiinhøønät. Pøn hoy wädijp, cabä pojpa cädieey nã'ägä møødä, nebiä Jesucristo quia'a møødän. ⁸ Pøn hoy ca'a wädijp, pianøcxäp

je'e ja'a møjcu'ugongä miädia'agy. Homiänaajä ja'a møjcu'ugong haxøøg jiatcø'øy. Mänit jiatcøøčohñ mänaa hädaa yaabä naaxwiin yhawijy tiøø'xta'aguiän. Paadia Dios yHuung yaa tøø yhoy, nebiä møjcu'ugong jaduñ quia'a mäjädá'agät. ⁹Pønä Dios tehñ tiøyhajt Teedyhajt, cabä jioot chocy coo jaduñ jiatcø'øwät, je'eguiøxpä coo je'e miøødhidyijäm ja'a Diósäm. Coo je'e Dyios yhuungä, paady haxøøg quia'a jatcø'øy. ¹⁰Jaduñ myajnujü'øwät pøn Dioshuung. Entonces, pøn hoy ca'a wädijp, pønä miägu'ughajpä ca'a tsojp ca'a pa'häyoob, ca'a Dyios je'e yhuungä. Pero pianøcxäp ja'a møjcu'ugongä miädia'agy je'e.

¹¹Mänaa ja'a Diosmädia'agy hajxy mmäbøjtsoonän, jaduñ hänajty miäna'añ coo hajxy nničhojc nnibia'häyóowämät. Høxtä jäda'anäbaadyñä jaduñ miäna'aññä. Cab jaduñ mänaa tiägach. ¹²Cab hajxy njatcøøyyämät nebiä Cañ jecy jiatcøøyyän coo yhamdsoo puhya'ay yagho'cy. Paady jaduñ yagho'cy coo howyiinmahñdy hänajty quia'a møødä, nebiä piuhya'ay howyiinmahñdy hänajty miøødan. Hiç, pianøcxäp ja'a møjcu'ugongä miädia'agy hänajty je'e.

¹³Entonces, hermanodøjc, cab hajxy myagjuø'øwät coo häna'c hajxy xmiähahñjätäm. ¹⁴Højtshjätäm, cøjxta'axiøø hajxy jim nhidäänäm tsajpootyp. Cab hajxy mänaa jiihy nhäda'agø'øwäänäm haxøøgtuum. Nmøødhjätäm ja'a tøyhajt hajxy jaduñ je'eguiøxpä coo hajxy hamiñ

haxøpy nničhojc nnibia'häyóowäm. Pønä miägu'ughajpä ca'a tsojp ca'a pa'häyoob, je'eds jiihy häda'agø'øwaamb haxøøgtuum. ¹⁵Pønä miägu'ughajpä mahanhajp, jaduñhä wyiinmahñdy je'e nebiä jäya'ay-yagho'pan. Y cabä jäya'ay-yagho'pähajxy cøjxta'axiøø jiuçyhada'añ nebiä Dios jiuçyhatiän. Tøyhajt jaduñ. ¹⁶Coo ja'a Jesucristo hajxy tøø xñähho'túütäm, jaduñhä tøyhajt hajxy nmøødhjätäm coo ja'a Dios hajxy xjiaanč tehñ chójcäm. Hawiinmats hit jaduñ coo hajxy hamiñ haxøpy nniñähho'túütämät. ¹⁷Coo ja'a mäyøøjäya'ay ja'a häyoobä quia'a näxúudsät, cab jaduñ quiudiñ nebiä Dios hajxy xyhanéhäm coo hajxy hamiñ haxøpy nničhojc nnibia'häyóowämät. ¹⁸Mägu'ughajpädøjc, tsøgxä hajxy hamuumdu'joot niñäxúu'tsäm. Jaduñ hajxy nyajcähxø'cämät coo hajxy hamuumdu'joot nničhojc nnibia'häyóowäm. Coo hajxy nga'a niñäxúu'tsämät, cab jaduñ tiuna'añ coo hajxy nja mänäänämät cooc tyijy hajxy nničhojc nnibia'häyóowäm.

¹⁹Hermanodøjc, coo hajxy hamuumdu'joot nničhojc nnibia'häyóowämät, jaduñhä tøyhajt hajxy nmøødhjätäm coo ja'a Dios hajxy xyhuunghjätäm. ²⁰Y coo ja'a njoothajxy hamdsoo miäänäänämät cooc tyijy hajxy hoy nga'a jäya'ayhjäjtäm, tsipøcxp ja'a Diosmädia'agy hajxy nmäbøjcämät. Cabä nhamdsoo wiinmahñdyhajxy nyajcopcøøyyämät. Hiç, xjiødhijxäm ja'a Dios hajxy. Cøxiä hajxy xñajuøøyyäm. ²¹Y

coo ja'a njoothajxy waamb quia'a mänáanämät, jaduhñä tøyhajt hajxy nmøødhájtäm coo ja'a Dios hajxy xyhuunghájtäm. ²²Xmióoyäm ja'a Dios hajxy tijaty hajxy nmäyujwáanäm, je'eguiøxpä coo hajxy ngudiúunäm nebiaty hajxy xyhanéhäm. Paady hajxy xquiumáayyäm. ²³Jaduhñä Dios hajxy xyhanéhäm coo ja'a yHuung Jesucristo miädia'agy hajxy nmäbójcämät, coo hajxy hamiñ haxøpy nniçhojc nnibia'häyóowämät, nebiä Jesucristo hajxy hamdsoo tøø xyajwiingapxøyyäm. ²⁴Pønä Dios miädia'agy cudiúunäp, tu'ugmädia'aguiä Dios jaduhñ miøødhity. Y jaduhñä tøyhajt hajxy nmøødhájtäm coo ja'a Dios hajxy tu'ugmädia'agy xmiøødhájtäm, je'eguiøxpä coo ja'a yHespíritu hajxy tøø xyajnáguéjxäm. Ja'a yHespírituhaam hajxy xyhawáanäm coo hajxy tu'ugmädia'agy xmiøødhájtäm.

4 Hermanodøjc, nämayyä hønndaacpähajxy jii wiädity. Cabä tøyhajtpä hajxy ñä'ägädä yecy. Entonces, cabä hoñä'a mädyii mädia'aguiä hajxy mmäbógät nä'a nägoobä. Pero jawyiin hajxy mhuuc mädia'agyhíxät pø Diosmädia'agy jiaançh møød. ²Jaduhñä tøyhajt hajxy mmøødhádät pø Diosmädia'agy jiaançh møød. Pø mänaamb jaduhñ cooc ja'a Dios yHuung Jesucristo tøø jiaançh jäya'ayhaty hädaa yaabä naaxwiin, pues Diosmädia'agy jaduhñ jiaançh møød. ³Pero pø cab jaduhñ miäna'añä, cabä Diosmädia'agy miøødä. Ja'a Jesucristo miädsip

miädia'agy jaduhñ. Tøø hajxy mmädoyhaty coo ja'a miädsip yaa quiähxø'øga'añ hädaa yaabä naaxwiin. Bueno, yaadsä miädia'agy jaduhñ wiädijnä hädaa yaabä naaxwiin.

⁴Pero mijts, ja'a Dios hajxy xyhuunghajp. Tøø hajxy mga'a yajmäjäda'agy ja'a häna'c yø'øduhmbä hønnda'agymiädia'agy yajwädiipä. Hix, maas mäjaamøødä Dios quejee ja'a møjcu'ugong miøødä, ja'a yaa hanehmbä hädaa yaabä naaxwiin. ⁵Yø'ø hønndaacpähajxy jaduhmbä, ja'a møjcu'ugong miädia'agy hajxy quiudiúunäp; paadiä møjcu'ugongä miädia'agy hajxy miädiaacä. Y paadiä miädia'agyhajxy yaa yajcopcøoyyaxä hädaa yaabä naaxwiin. ⁶Pero højts, ja'a Dios hajxy xyhuunghájtäm. Y cab pøn nmädia'agyhajxy xyajcopcø'owáanäm. Jagooyyä hajxy yajcopcø'owa'añ pønä Diosmädia'agy mäbøjp. Jaduhñä tøyhajt hajxy nmøødhájtäm pøn tøyhajt Dioshuung. Pønä nmädia'agyhajxy xyajcopcøoyyäm, Dioshuung je'e. Pøn jaduhñ xquia'a mädoowäm, ja'a møjcu'ugongä miädia'agy jaduhñ quiudiúunäp.

⁷Hermanodøjc, tsøg hajxy tehngajnä niçhojc nibia'häyóowäm hamiñ haxøpy, je'eguiøxpä coo ja'a Dios hajxy xchójcäm. ⁸Pero pøn xquia'a tsojc xquia'a pa'häyóowäm, cabä Diosmädia'agy miäböcy. Xchójcäm ja'a Dios hajxy jaduhñ. Jaduhñ miäna'añ coo hajxy nniçhojc nnibia'häyóowämät. ⁹⁻¹⁰Coo ja'a Dios hajxy xchójcäm, paadiä Dios ja'a yHuung Jesucristo

hajxy yaa tøø xyajnäguéjxäm hädaa yaabä naaxwiin, neby hajxy jaduhñ xñähho'túutämät ja'a nbojpä ngädieeyháltäm, neby hajxy jim nhíjtämät tsajpootyp cøjxta'axiøø. Ca'a jie'eguiøxpä coo ja'a Dios hajxy njahmiéjtsäm.

¹¹Coo ja'a Dios hajxy xjiaančh tehñ chójcäm, paady hajxy hamiñ haxøpy nničhojc nnibia'häyóowämät. ¹²Tøyhajt jaduhñ, cabä Dios mänaa yhixyii. Pero cab jaduhñ ñejpiä. Hoyyä Dios hajxy mänaa nga'a híjxäm, coo hajxy hamiñ haxøpy nničhojc nnibia'häyóowämät, jaduhñä tøyhajt hajxy nmøødháltäm coo ja'a Dios hajxy homiänaajä xcwieendäháltäm. Y coo ja'a Dios hajxy xchójcäm, maas hoy hajxy nničhojc nnibia'häyóowämät. ¹³Bueno, coo ja'a Dios ja'a yhEspiritu hajxy tøø xmióoyyäm, jaduhñä tøyhajt hajxy nmøødháltäm coo hajxy nmøødháltäm tu'ugmädia'agy. ¹⁴Y hamdsoo ja'a Jesucristo hajxy tøø nhíjxäm mänaa ja'a Dios yaa tøø quiexiän, mänaa hajxy tøø xñähho'túutäm. Tøyhajt jaduhñ. ¹⁵Pøn jaduhñ mänaamb cooc ja'a Jesucristo Dyioshuungä, tu'ugmädia'agy ja'a Dios jaduhñ miøødhity.

¹⁶Jaduhñä tøyhajt hajxy nmøødháltäm coo ja'a Dios hajxy xchójcäm. Nmäbøjcäm hajxy jaduhñ. Xchójcäm ja'a Dios hajxy jaduhñ, paadiä Dios tu'ugmädia'agy miøødhity pøn homiänaajä jahmiejtsp ja'a Dios. ¹⁷Coo ja'a Jesucristo hajxy xchójcäm, maas hoy hajxy nničhojc nnibia'häyóowämät hädaa yaabä

naaxwiin. Y coo hajxy jaduhñ nničhojc nnibia'häyóowämät, cab hajxy jaduhñ ndsähgøøyyämät mänaa ja'a Jesucristo min chaačhtiuna'añän ja'a hajxy ca'a mäbøjpä. ¹⁸Pønä Dios hamuumdu'joot ca'a jahmiejtsp, tsähgøøby je'eduhñ je'eguiøxpä coo yajcumädowa'añii. Pero coo ja'a Dios hajxy hamuumdu'joot njahmiéjtsämät, cab hajxy jaduhñ nnä'ägä tsähgøøyyämät. Hix, pøn jaduhñ tsähgøøby, cähxø'p jaduhñ coo ja'a Dios hamuumdu'joot quia'a jahmiech.

¹⁹Jayøjpä Dios hajxy xchójcäm, paady hajxy jaduhñ njahmiejtsägájtsäm. ²⁰Pøn jaduhñ nä'a mänaamb: “Njahmiéjchpøchä Dios”, hoyyä miägu'ughajpä jia mähanhaty, hønndaacp je'eduhñ. Pø cabä yhamdsoo mägu'ughajpä ñä'a tsoy ñä'a pa'häyoy, cabä Dios hoy jiahmiédsät. Haa ca'a, yhiixypä miägu'ughajpä homiänaajä, pero cabä Dios mänaa yhixy. ²¹Hamdsoo ja'a Dios hajxy xyhanéhñäm coo ja'a nmägu'ughajpä hajxy ndsojc nba'häyóowämät, jaduhñ mäwíinäts nebiä Dios hajxy njahmiéjtsäm.

5 Pøn jaduhñ mäbøjpä coo ja'a Jesucristo Dyiosquexiä, miäbøjpiä Diosmädia'agy je'e. Y pønä Dios jaduhñ jahmiejtsp, chojpy pia'häyooby je'e pønjetiä Diosmädia'agy mäbøjpä. ²Coo ja'a Dios nDeedyháltäm hajxy njahmiéjtsäm, coo ja'a miädia'agy hajxy ngudiúnäm, jaduhñä tøyhajt hajxy nmøødháltäm coo hajxy nničhojc nnibia'häyóowämät, je'eguiøxpä coo ja'a Dios hajxy xyhuungháltäm. ³Coo ja'a Dios

hajxy njahmiéjtsäm, je'eduhñ
ñänømby coo ja'a miädia'agy
hajxy ngudiúunäm. Y cabä Dios
tsipjaty yhane'emy. ⁴⁻⁵Coo ja'a
Dios hajxy xyhuunghájtäm, coo
ja'a miädia'agy hajxy nmäbójcäm,
paadiä mójcu'ugong hajxy jaduñ
nga'a yajmäjädaácäm, je'eguiøxpä
coo hajxy nmäbójcäm coo ja'a
Jesucristo Dyioshuungä.

⁶Tøyhajt jaduñ coo ja'a
Jesucristo ñäbejty. Jaaná tøyhajt
jaduñmä coo yho'cy cruzcøxp.

⁷Jaduñä Dioshespíritu miäna'añ
cooc ja'a Jesucristo Dyioshuungä,
y cabä Dioshespíritu mänaa
yhøhnda'agy. ⁸Coo ja'a Jesucristo
jaduñ ñäbejty, coo yho'cy
cruzcøxp, y coo ja'a Dioshespíritu
jaduñ miäna'añ, jaduñä
tøyhajt hajxy nmøødhájtäm
coo ja'a Jesucristo Dyiosquexiä.

⁹Maas tsoobaatpä Dios ja'a
miädia'agy quejee ja'a jäya'ay ja'a
miädia'agyhajxy. Y jaduñä Dios
miäna'añ cooc ja'a Jesucristo
yHuunghaty. ¹⁰Pønä Jesucristo
miädia'agy mäbójcäp, miøødä
tøyhajt jaduñ coo ja'a Jesucristo
Dyioshuungä. Hiñ, ja'a Dios jaduñ
hawáanäp. Pero pønä Dios ja'a
miädia'agy ca'a mäbójcäp, jaduñ
je'e miäna'añ cooc tyijy ja'a Dios
yhøhnda'agy. Hiñ, cabä Dios ja'a
miädia'agy miäbójcäxä coo ja'a
Jesucristo yHuunghaty. ¹¹Paadiä
Dios hajxy tøø xpiädaácäm
hawa'adstuum coo ja'a Jesucristo
hajxy tøø xñähho'túutäm. Paady
hajxy jaduñ njugyhadaänäm
nebiä Dios jiugyhatiän cøjxta'axiøø.
Tøyhajt jaduñ. Ja'a Dios jaduñ
mänaamb. ¹²Pønä Dioshuung ja'a

miädia'agy mäbójcäp, hodium
je'eduhñ yhity. Cøjxta'axiøø
jiugyhada'añ nebiä Dios jiugyhatiän.
Pero pøn jaduñ ca'a mäbøjcp, cab
jaduñ jiugyhada'añ nebiä Dios
jiugyhatiän.

¹³Mijts, mmäbójcäp ja'a
Dioshuungä miädia'agy
hajxy. Mijtsøoch hädaa nocy
nyajnäaayøøby nebiä tøyhajt
hajxy jaduñ mmøødhádät
coo hajxy hodium mhity, coo
hajxy mjugyhada'añ nebiä Dios
jiugyhatiän cøjxta'axiøø.

¹⁴Coo ja'a Dios hajxy
tu'ugmädia'agy nmøødhájtämät,
jaduñä tøyhajt hajxy nmøødhájtäm
coo hajxy xmiädóowämät coo hajxy
tijaty nmäyujwáanämät. ¹⁵Paadiä
tøyhajt hajxy jaduñ nmøødhájtäm
coo hajxy xmio'owáanäm.

¹⁶⁻¹⁷Ja'a häna'c-hajxy
haxøøgwädijpä, haagä haxøøgtuum
hajxy ñøcxø'owa'añ. Y pø miøødä
mmägu'ughajpä pojpä cädieey,
mmänuu'xtá'agäp ja'a Dios
coo ween yajnähwa'açhi. Pero
coo ja'a mmägu'ughajpä ja'a
Diosmädia'agy tehngajnä quia'a
mäbógät cøjxta'axiøø, haxøøgtuum
jaduñ ñä'ägä hídät; y cabä piojpä
quiädieey mänaa ñähwáatsnät. Y
cabä Dios mmänuu'xtá'agät coo ja'a
mmägu'ughajpä yajnähwa'adsøøjät,
je'eguiøxpä coo ja'a yhamdsoo
wiinmahñdy jaduñ yajtuñ.

¹⁸Pønä Dios Teedyhajp, cab
jaduñ mänaa yhaxøøghäna'c-haty.
Cueendähájtäp je'eduhñ ja'a
Jesucristäm, ja'a Dioshuung. Cabä
Jesucristo ja'a mójcu'ugong jaduñ
mänaa yajmäjäda'agy. Tøyhajt
jaduñ.

¹⁹Jaduhñä tøyhajt hajxy nmøødhájtäm coo ja'a Dios hajxy xyhuunghájtäm. Pero pønä Dios ca'a Teedyhajt, tøø quia'a yajmäjäda'agyíjäm ja'a mõjcu'ugóngäm.

²⁰Jaaná nmøødhájtäm ja'a tøyhajt hajxy jaduhmbä coo ja'a Jesucristo ja'a Dioshuung hajxy hoy tøø xyajnähixóøyyäm ja'a Diosmädia'agy, coo hajxy jaduhñ nmäbójcämät coo

ja'a Dios tiu'ugä. Y tu'ugmädia'aguiä Dios hajxy nmøødhájtäm mõødä yHuung Jesucristo. Hodium hajxy tøø xpiädáacäm. Cøjxta'axiøø hajxy njugyhadaänäm nebiä Dios jiugyhatiän.

²¹Mägu'ughajpädøjc, cab hajxy tii mwiingudsähgø'øwät, ni quepychech, ni naaxpoch, ni tii. Jagoo ja'a Dios hajxy mwiingudsähgø'øwät, ja'a jim hijpä tsajpootyp. Amén.

2 Juan

¹Juánhøch nxøhaty. Høøch hädaa nocy nhädiuumby møød hajxy nägøxiä ja'a tøyhajtmøødpä. Míjtshøch hädaa nocy nyajnäjaayøøby pønjatiä Dios tøø wyiimbiy, pønjatiä Diosmädia'agy mäbøjp. Tøyhájthøch mijts ndsocy nba'häyoy, ²je'eguiøxpä coo ja'a tøyhajt hajxy nmøødhájtäm. Cøjxta'axiøø hajxy jaduhñ nmøødhadäänäm. ³Weenä Dios nDeedyhájtäm hoyhajt weenhajt hajxy xmióoyäm møødá yHuung Jesucristo. Nmøødhájtäm ja'a tøyhajt hajxy jaduhñ. Hamiñ haxøpy hajxy jaduhñ nniçhojc nibia'häyóowäm.

⁴Jootújc-høch nniäwø'oyii coo ja'a tøyhajt hajxy näje'e mjaanç panøcxy nebiä Dios hajxy tøø xyhanéhäm. ⁵⁻⁶Hoorä, hermanodøjc, tsøg hajxy niçhojc nibia'häyóowäm nebiä Dios hajxy tøø xyhanéhäm. Coo hajxy jaduhñ ngudiúunämät, cähxø'p jaduhñ coo ja'a Dios ja'a miädia'agy hajxy njaanç mäbøjcäm.

⁷Nämayyä hønndaacpähajxy yaa wiädity hädaa yaabä naaxwiin. Cab hajxy jaduhñ miäna'añ cooc tyijy ja'a Jesucristo hoy tøø jiäya'ayhaty hädaa yaabä

naaxwiin. Ja'a møjcu'ugongä wyiinmahñdy hajxy miøødhájtäp; ja'a Jesucristo miädsip je'e.

⁸Mnigwieendähadøøjäp hajxy. Cabä hønndaacpä miädia'agy hajxy mmäbøjcät coo ja'a tøyhajt hajxy mnä'a najtshixø'owät, nébiøch mijts tøø nyajnähixø'oyän. Coo ja'a hønndaacpä miädia'agy hajxy jaduhñ mga'a mäbøjcät, xpiädá'agäp ja'a Dios hajxy hodium. Cøjxta'axiøø hajxy jim mhídät tsajpootyp.

⁹Pønä Jesucristo miädia'agy najtshixøoyyap, cabä Dios tu'ugmädia'agy miøødhity. Pero pøn jaduhñ ca'a najtshixøøby, tu'ugmädia'agy ja'a Dios miøødhity møødá yHuung Jesucristo.

¹⁰Homiädyii yajnähixøøbiä hajxy myajtøjtägø'owät coo jim miédsät maa ja'a mjøøn maa ja'a mdøjc-hajxiän. Pero coo miäná'anät cooc tyijy ja'a Jesucristo miädia'agy quia'a tøyyä, cab hajxy myajtøjtägø'owät, ni mga'a yajpóo'xät hajxy, ¹¹coo ja'a cu'ug jaduhñ ñä'a mäná'anät cooc tyijy myiich mjamiøød je'eduhñä, cooc tyijy miich jaduhñ mbayajnähixøøbiä.

¹²Madiú'ujoch mijts nja hawaanäänäm, pero cábøch

njaayaannä. Ja wi'i chójpiøch njoot
 jaduñ cooçh jim nnócxät maa mijtsän.
 Mänit hajxy haawhaam nmädiáacämät;
 jaduñ hajxy maas jootcuje nhíjtämät.

¹³Xyajpoo'xp mijts ja'a
 hermanodøjc-hajxy yaabä. Tøø
 hajxy je'e wyiimbíiwäbä ja'a
 Diósäm. Amén.

3 Juan

¹Juánhøch nxøhaty. Mägu'ughajpä Gayo, miichhøch hädaa nocy nyajnájaayøøby. Tøyhájthøch miich ndsocy nba'häyoy.

²Ween miičhä Dios hoyhajt weenhajt xmio'oy. Nnajuøøbiøch jaduñ coo miičh hoy mwädity.

³Tøøchä hermanohajxy hoy näje'e xyhawaanä coo miičhä Diosmädia'agy hamuumdu'joot mbanøcxy. Páadyhøch jootcujc nnijäwø'oyii. ⁴Cooch nmädoxyhaty cooch njamiøødä Diosmädia'agy hajxy hamuumdu'joot pianøcxy, jaančh tehñ xioondáacpøch jaduñ.

⁵Hoy miičhä Diosmädia'agy mgudiuñ coo ja'a hermanohajxy mbuhbety, ja'a hajxy jäguemgajpt-tsohmä. ⁶Tøø hajxy nägapxy maa ja'a tsajtøjcän coo miičh hajxy mjaančh tehñ chocy mjaančh tehñ pia'häyoy. Y coo hajxy hänajty jiaac tu'ubøgaannä, mmó'owäp hajxy tijaty hajxy hänajty yajmaajiajpy. ⁷Hix, ja'a Jesucristocøxpä hajxy wiädity. Ja'a Diosmädia'agy hajxy yajwa'xyp. Y cab hajxy tii miäyujwa'añ ja'a Diosmädia'agy hajxy ca'a panøcypä. ⁸Paady jaduñ yhahixø'oy coo ja'a hermano hajxy nbuhbéjtämät;

jaduñ hajxy hoy nmøødtúunämät maa ja'a Diostuung jaduñ myiñän.

⁹Tøøchä hermano nocy hajxy tu'ug nja yajnájaayø'oy, pero cábøchä Diótfrefes nmädia'agy xquiudiunaanä, je'eguiøxpä coo ja'a yhamdsoo mädia'agy jaduñ yajtuna'añ maa ja'a hermanohajxiän. ¹⁰Haxøøgjátyhøch naxy xnänømy. Y maas haxøøg jaduñ jiatcø'oy coo ja'a hermano cuhdajt hajxy quia'a mo'oy coo hajxy jiojpoøø'owät ja'a Diosmädia'agy hajxy yajwa'xpä. Y coo pøn hänajty jiojpoøø'owa'añ, mänitä Diótfrefes miäna'añ coo yajpädsøømänät maa ja'a tsajtøjcän. Cooch jim nnøcxät maa mijtsän, mänitøch ngøxy nägápät nebiaty jiatcø'oy. ¹¹Miičh mägu'ughajpä, cab jaduñ mänaa mbajacø'owät. Pøn jaduñ jatcøøby, cabä Diosmädia'agy miäböcy. Pero pøn hoy wädiyp homiänaajä, miäböjpiä Diosmädia'agy je'e. Jaduñ miičh mbahíxät.

¹²Pero ja'a Demetrio, cab jaduñ jiatcø'oy nebiä Diótfrefes jiatcø'oyän. Tøyhajtä Demetrio ja'a Diosmädia'agy pianøcxy hamuumdu'joot. Cumáayyap jaduñ nägøxiä, y ngumäabiøch høøchpä. Mnajuøøby miičh jaduñ coochä tøyhajt nmøødä.

¹³Madiú'ujøch miičh nja hawaan_{aa}n_{aa}m. Pero cábøch njaayaann_{aa}. ¹⁴Chójpíøch njoot jadu_hn cooçh jim nnócxät maa miičhän. Mänit haawhaam nmädiáacämät.

¹⁵Ween miičh jootcuje mmähmø'ø. Xyajpoo'xp miičh ja'a mmägu'ughajpähajxy yaabä. Tunä mayhajt, yajpóo'xäc højts nmägu'ughajpähajxy jim_{bä} nägøxiä.

Judas

¹Høøch xøhajt Judas. Ja'a Jesucristøch ja'a tiuung ndúuñäp. Høøch nbuhya'ay je'e ja'a Jacobo. Míjtshøch hädaa nocy nyajnäjaayøøby. Tøø højts ja'a Diosteedy xyajnáhdíjjäm coo ja'a miädia'agy nmäbøjcämät. Xchójcäm hajxy jaduñ. Tu'ugmädia'agy hajxy xyaghíjtäm møødä Jesucristo.

²Ween mijts ja'a Dios hoyhajt weenhajt xmi'o'y tehngajnä. Tsøg hajxy jahmiéjtsäm coo ja'a Dios hajxy xchójcäm tehngajnä.

³Mägu'ughajpädøjc, jadúñhøch mijts hijty nyajnäjaayø'øwa'añ coo ja'a Jesucristo hajxy tøø xñähho'túutäm. Pero maas hawiinmats jaduñ cooçh mijts nmänuu'xtá'agät coo ja'a Diosmädia'agy hajxy tehngajnä mbanøcxät, nebiä Dios hajxy tähoocmo'ooyä tøø xmióoyyäm. Cab hajxy myajwiinhøønät. ⁴Hix, ja'a häna'c høñndaacpähajxy, hamee'ch hajxy näje'e tøø yajtägø'øwø'øy. Ja'a Diosmädia'agy jecy mänaan cooc ja'a høñndaacpähajxy quiumädowa'añ. Jaduñ hajxy yhøñnda'agy, cábac jaduñ tyijy ñejpiä coo mhaxøøgwädítät, hoyyä Dios ja'a mbojpä mgädieey

tøø xjia yajnähwaatsä. Cabä Jesucristo hajxy quiapxpaatnä, ja'a nWiindsøn hájtämbä. Tu'uquiä Jesucristo hajxy nWiindsøn hájtäm.

⁵Mnajuøøby hajxy jaduñ, hoy ja'a Dios ja'a judíos jim jia woobädsøømy Egiptonaaxooty, mänit yajcuhdägoonä pønjaty hänajty ca'a mäbøjp. Mjahmiédsäp hajxy jaduñ cøxiä. ⁶Haa ja'a Diosmoonsähajxiä, coo hajxy jim näje'e choñ tsajpootyp maa ja'a Dios hänajty tøø piäda'aguiän, paady hajxy jiiby quiejxä tsumyčhänaabiä hagoostuum ja'a Diósäm, høxtä coo yhabaadät coo hajxy hänajty yajcumädowa'añíjjäm ja'a Diósäm. ⁷Høxtáh mät's ja'a jecyjiäya'ayhajxy jiajty, ja'a hajxy hijty jim jegyhajty tsänaabiä maa ja'a cajpt hijty xiøhatiän Sodoma møødä Gomorra, møødä jim b ä ja'a cajpt mäwiingon b ä. Coo hajxy jiaanč teh m yhaxøøg jiäya'ayhajty, paady hajxy jøønhaam yajcumädoowä ja'a Diósäm. Hix, høxtä ya'adiøjcpaady hajxy hijty yhaxøøg jatcø'øy. Hijxtahnd ja'a Dios hajxy jaduñ xmióoyyäm.

⁸Jaduñä høñndaacpähajxy jiatcøøbiä. Cabä tøyhajt hajxy miøødä. Haxøøg hajxy wiädity.

Cabä Diosmädia'agy hajxy miäböcy. Haxøøgä Diosmoonsä hajxy nänömy, ja'a hajxy tsajpootypä.

⁹Ja'a Diosmoonsä mõjhajpä, ja'a xøhajpä Miguel, cabä mõjcu'ugong haxøøg nänamaay mänaa ja'a dijunto Moisés hajxy hänäjty yajtsipta'aguiän. Jagooyyä nänamaay: "Ja'a Dios xyhójäp."

¹⁰Pero yø'ø hõhndaacpähajxy, hotyjatiä hajxy haxøøg nänömy, hoy hajxy tii quia'a ja najuø'øy. Nä'ä nägoobä hajxy jaduhñ jiatcø'øy nebiä animalhajxiän. Paady hajxy quiumädowaannä.

¹¹Haxøøg hajxy jiada'añ yhabeta'añ, je'eguiøxpä coo ja'a Caín hajxy piahixy piaduñ. Jaduhñä Balaam hajxy piahijxpä. Tu'udägooyy ja'a Balaam jecy je'eguiøxpä coo xädø'øñ hänäjty jiaanč tehñ piøcjuø'øy. Yajcumädowáanäp hajxy je'eguiøxpä coo ja'a Dios miädia'agy hajxy quia'a cudiunaanä nebiä Coré jecy quia'a cudiuuñän. Yhamdsoo cuhdujt hajxy jia wi'i yaghidaamby.

¹²Jaanč tehñ yhočhädiuunnä ja'a hõhndaacpähajxy jiatcø'øy maa mijts ja'a cay ja'a hu'ug myagjadyijän. Nä'ä pahuuc nä'ä pajøø'xpä hajxy jim miech. Jaanč tehñ jiootmøj hajxy ñibiäda'agyii. Cab hajxy pøn ñä'ägädä wiingudsähgø'øy. Cabä Diosmädia'agy hajxy hoy yajnahixø'øy. ¹³Jaanč tehñ chähdiuhndägoy hajxy jaduhñ. Coo hajxy tøø tiu'udägoonä, paady hajxy yaghidáanänä cøjxta'axiøø hagogdstuum.

¹⁴Haa ja'a Enocä, ja'a Adán ja'a yhap yhoc je'e ja'a miäjuxtujcpä.

Jecy ja'a Dios ja'a Enoc yajmädiaacy ja'a häna'c hõhndaacpæcøxpä.

"Huuc mädown, milhaamä Dios ja'a mioonsä miøødcäda'aga'añ.

¹⁵Cøxáanäm ja'a Dios hajxy xquiøxy yajtøyhajtyegáanäm. Mänit yajcumädowa'añ pønjaty haxøøg jäya'ayhajp, ja'a Diosmädia'agy hajxy ca'a mäbøjpä, ja'a Dios hajxy haxøøg nänøømbä." ¹⁶Yø'ø hõhndaacpähajxy, jaanč tehñ wyiinhec hajxy jaduhñ. Cab hajxy tii quiumay. Ja'a haxøøgpä hajxy jiaanč tehñ yhadsojpy. Jaanč tehñ ñiguiumáayyap hajxy jaduhñ. Nä'ä mänaamb hajxy jaduhñ cooc tyijy ja'a jäya'ay hajxy jiaanč tehñ wyiingudsähgø'øy. Paady hajxy jaduhñ miäna'añ, coo hajxy yajcumaya'añ.

¹⁷Mägu'ughajpædøjc, mjahmiejchp hajxiäda'a coo ja'a nWiindsøn'hájtäm Jesucristo quiuguexyhajxy jäguemiä miänaañ:

¹⁸"Coo hänäjty yhabaadaannä coo ja'a naaxwiimbä hänäjty wyiimbida'añ, mänitä jäya'ay ja'a Diosmädia'agy hajxy näje'e wyiinwoona'añ. Ja'a haxøøgpä hajxy hänäjty jiaanč tehñ yhadsogaamby." ¹⁹Jaanč tehñ chipyajpædø'øgaamb hajxy maa ja'a hermanodøjc-hajxiän coo ja'a hermanodøjc hajxy tu'ugmädia'agy quia'a hjñät. Haxøøg hajxy jiaanč tehñ wiädity. Cabä Dioshëpëritu hajxy ñä'ägädä møødä. ²⁰Pero mijts mägu'ughajpædøjc, tehngajnä ja'a Diosmädia'agy hajxy maas hoy mjaac panócxcät nebiä Dios hajxy tøø xmióoyyäm. Mba'yá'axäp ja'a Dios hajxy ja'a yhEspëritucøxpä. ²¹Hoyyä

Diosmädia'agy hajxy mjaančh teh̄m
 yajtúnät; mänitä Dios ja'a mbojpa
 mgädieey hajxy xyajnahwa'ads
 xyajcuhwá'adsät. Xchójcäm hajxy
 jaduñ, paady hajxy xyajnahwa'ads
 xyajcuhwa'adsáanäm. Jimä mjoot
 hajxy mbadáacnät tsajpootyp
 coo ja'a Jesucristo hajxy jim
 xyajnøcxáanäm. Jim hajxy
 xyaghidáanäm çøjxta'axiøø. Hojioot
 jiaančh teh̄m miøødhajpy møødä
 højtscøxpä.

²²Mjootcapxmøcpøgäp
 hajxy pønjaty hamuumdu'joot
 ca'a mábøjp. ²³Naxiä jäya'ay
 Diosmädia'agy hajxy mdeh̄m
 yajmábøgät; jaduñ hajxy quia'a
 cá'awät haxøøgtuum. Mnäxúudsäp

hajxy pønjaty hānajaty haxøøg
 wädiip. Pero nägueentä hajxy
 mmøødmädiá'agät, neby hajxy
 jaduñ mga'a pahadägoonáxät.

²⁴⁻²⁵Tu'ugä Dios jaduñ.

Jaaya'ay hajxy xyajnahwáatsäm
 ja'a Jesucristocøxpä ja'a
 nWiindsøn'hájtäm. Je'eds
 mäjaamøød neby hajxy jaduñ
 xcwieendähájtämät. Jaduñ
 hajxy nga'a tu'udägóoyämät.
 Wa'ads hajxy jim xyajmedsáanäm
 tsajpootyp. Mänit hajxy jim
 nxoonäda'agáanäm. Tsøg hajxy
 mänáanäm çøjxta'axiøø coo ja'a
 Dios miøjjä jiaančh. Homiänaajä
 ja'a cuhdujt jiaančh teh̄m miøødä.
 Amén.

Apocalipsis

1 Hädaa mädia'agy, yu'u'ch hijty jaduhñ yhity. Mänitä Dios ja'a Jesucristo ñajtsapxøøyyä coo ja'a Jesucristo ja'a mioonsähajxy yhawaandägájsät tijaty hánajty mobädajp jadáanäp tunáanäp. Mänitä Jesucristo ja'a quiuguexy jim quiejxtägajch maa ja'a Juangän. Hoy ja'a Juan jaduhñ yhawaandägájsäxä. ²Jaduhñä Juan yajwiinhijxä. Y yejc ja'a Juan ja'a tøyhajt jaduhñ mäduhñtiä wyiinhijxy, coo ja'a Diosmädia'agy tiøyyä nebiä Jesucristo hánajty tøø ñägapxiän.

³Jootcujc hajxy yhity pønjaty hädaa nocy capxp, pønjaty jaduhñ mädoob, pønjaty jaduhñ hoy cudiumb nej myiñän cujaay. Hix, mobädajp jaduhñ jiada'añii tiuna'añii.

⁴Høøch Juan hädaa nocy nhädiuumby. Mijts hädaa nocy nyajnäjaayøøby pønjatiä Diosmädia'agy panøcxp jim Asianaaxooty maa ja'a juxtujcpä cajptootypän. Weenä Dios ja'a hoyhajt ja'a weenhajt hajxy xmio'oy. Homiänaajä ja'a Dios ñä'ägädä hity. Y ja'a juxtujcpä juøhñdy jim hijpä Dioswiinduum, jaduhñ ja'a hoyhajt ja'a weenhajt hajxy xmioobiä. ⁵Y

ja'a Jesucristo, jaduhñ ja'a hoyhajt ja'a weenhajt hajxy xmioobiä. Yejpiä Jesucristo ja'a tøyhajt jaduhñ. Jaayá'ayäts jayøjp jujypiøjc. Jaayá'ayäts rey nägøxiä hanehmb. Xchójcäm hajxy jaduhñ. Tøø hajxy xñähho'túutäm. Tøø hajxy xyajnáhwaats xyajcuhwáatsäm ja'a nbojpä ngädieeyhájtäm. ⁶Jaduhñ hajxy tøø xpädáacäm nebiä reyän, nebiä nähgapxtuutpän; jaduhñ ja'a Dios hajxy hoy nmädúunämät. Tsøg hajxy jaduhñ cøjxta'axiøø møj jaan'ch pädáacäm. Amén.

⁷Huuc mäadow hajxy; mobädajpä ja'a Jesucristo miänaca'añ joejooty. Nägøxiä jäya'ayhajxy yhixa'añ, møød hajxy je'e tøøbä miäyaghó'oguiäbä. Coo hajxy jaduhñ yhixa'añ, mänitä jäya'ayhajxy nägøxiä jiø'owa'añ xiuudsa'añ wiinduhmyhagajpt. Tøyhajt jaduhñ.

⁸“Høøch cøxiä nyajtsohndaac. Y høøch cøxiä nyajmayángombä”, nõmä Dios miänaañ. Jaduhñ miädia'agytiägø'oy coo ja'a Dios homiänaajä ñä'ägä hity. Ja'a Dios mõjcuhtujt cøxiä møød.

⁹Høøch Juan, haguípxyhøch mijts ja'a Diosmädia'agy nmøødpanøcxy; haguípxyhøch mijts tøø

nmøødtsaačhpøcy. Tøø ja'a Jesucristo mājaa hajxy xmióoyyäm neby hajxy jaduħn nmee'xtújcämät. Coočhä Diosmädia'agy-yajwa'xyiibä nga'a najtshixø'øwa'añ, møødä Jesucristo miädia'agy, páadyhøch häna'c yaa mädsibø'øbä tøø xquiexy maa xiøhatiän Patmos. Nebiä tsúmybiänøch jaduħn yaa nhity. ¹⁰Mänítøchä Dioshespíritu xñägädaacy. Näxøø hänajty jaduħn. Mänítøch nmädooyy møc quiapxy njøøxcø'ømäambiøch. Jadúħnhøch nmädooyy nebiä xuuxtän.

¹¹Mänítøch je'e xñämaayy: —Høøch cøxiä nyajtsoħndaac; høøch cøxiä nyajmayaamby. Tijaty miičh mwiinhixaamby, jaduħn mgujáayät librojooty. Mänit jim mguéxät maa ja'a hermanodøjc-hajxiän jim Asianaaxooty, maa ja'a juxtujcpä cajptootypän. Jaduħnä juxtujcpä cajpt xiøhaty: Efeso, Esmirna, Pérgamo, Tiatora, Sardis, Filadelfia, Laodicea.

¹²Mänítøch nwa'wiimbijty. Je'ečh hänajty nhixaamby pønħøch hänajty xmiägäpaxp. Mänítøchä ceratoyøhñdy juxtujc nhijxy, haagä orohädiuñ.

¹³Jimä Jesucristo hänajty tiäna'ay maa ja'a ceratoyøhñdy ñähmøjcän. Yoñä wyit hänajty miøødä. Orowøønhaam hänajty quiaačhwøøñä. ¹⁴Jaančh tehñ pioobä quiuhwaay hänajty. Jaduħnä wyiin hänajty quiahxø'øgy nebiä jøønhaayän. ¹⁵Jaduħnä tiecy hänajty yhaambä chämaambä, néjjiämä hobiujxt coo mbó'odät. Jaančh tehñ miøc hänajty quiapxy, nebiä mejy jiäditiän. ¹⁶Juxtujcä

madsa'a hänajty quiaø'ogonhaty maa ja'a yhaøoguiø'øjän. Yhaawjootiä pejyhespada hänajty miøødä, mejtsnaxä jiøjpä. Jaduħnä wyiin jiøjp hänajty quiahxø'øgy nebiä xøø møc yhañän.

¹⁷Coočh jaduħn nhijxy, mänítøch nwiingugädaawøøyy nebiä ho'ogypiän. Mänítøch xquiø'onähgajpy ja'a yhaøoguiø'øhaam. Mänítøch xñämaayy:

—Ca'a mdsähgø'øy. Høøch ja'a jayøbajtpä, høøch ja'a jaac høxhaambä. ¹⁸Júcyhøch hänajty, tøøch hijty nho'ogy. Mänítøch njujypiøjcombä. Cábøch mänaa nho'ogaannä. Høøchä cuħdujt jaduħn nmøød maa ja'a ho'ogyiibä myinø'øyän, maa ja'a ho'pähajxy ñähgäda'aguiän. ¹⁹Mgujáayäp jaduħn nebiaty mwiinhixa'añ, tijaty jájtäp túunäp jäda'ahaty, møød tijaty jadäänäp tunäänäp. ²⁰Jaduħn miädia'agytiägø'øy ja'a tøøbä mhíxiäbä. Ja'a juxtujcpä madsa'ajä, ja'a näjuxtujcpä Diosquexyhajxy je'e, ja'a Dios jim quiejxypä maa ja'a hermanodøjc-hajxiän, maa ja'a cajpt juxtujcpän. Y ja'a juxtujcpä orotoyøhñdiä, ja'a hermanodøjc-hajxy je'eduhñ, ja'a hajxy jim Diosmädia'agy panøcxpä maa ja'a cajpt juxtujcpän.

2 'Jaduħnä Diosquexy myajnäjaayø'øwät, ja'a tøø quiexyiijäbä maa ja'a hermanodøjc-hajxiän jim Efeso: "Ja'a Jesucristo, ja'a juxtujcpä madsa'a quionhijpiä, jim je'e tiäna'ay maa ja'a ceratoyøhñdy ñähmøjcän; je'eds jaduħn mänaamb: ²⁻³Nnajuøøbiøch

jaduhñ coo hajxy hoy mgudiunñ, coo hajxy mõj mmee'xtucy, coo hajxy tøø mdsaačhpøcy ja'a høøčhcøxpä, coo ja'a ca'awiindøybä hajxy mga'a mee'xy. Tøø hajxy mmädia'agyhixy ja'a häna'c-hajxy jaduhñ mänaambä cooc tyijy hajxy tøø quiexyii ja'a Diósäm. Tøø hajxy mnajuø'øy coo hajxy yhøhnda'agy. Hoy hajxy mmee'xtucy. ⁴Je'ečh nga'a hojwiøøby coo hajxy mga'a nijiootpáatänä neby hajxy jecy mhøxtägøøyyän. ⁵Tii hajxy hoy coo mga'a nijiootpáatänä. Naxy hajxy mdehñ ñijiootpaadø'jät neby hajxy myajtsohndaquiän. Pø caj, nøcxáambøčhä mceratoyøhñdyhajxy nbøgáañäm. Cähxø'p jaduhñ coočhä nmädia'agy hajxy jaduhñ xquia'a panøcxänä. ⁶Je'eds hoy coo ja'a nicolaíta miädia'agy hajxy mga'a mee'xä nébiøch jaduhñ nga'a mee'xiän. ⁷Hamädoowhit hajxy nebiä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'ečhä cuhdujt hajxy nmo'owaamby coo hajxy jim ñøcxät maa ja'a Dioswiinduumän. Jimä tøømdsa'am hajxy jiøø'xa'añ ja'a jugyhajtyejpä.”

⁸Jaduhñä Diosquexy myajnäjaayø'øwät ja'a tøø quiexyíijäbä maa ja'a hermanodøjc-hajxiän jim Esmirna. “Ja'a Jesucristo, ja'a jayøbajtpä je'e møødä høxhaambä. Tøø hijty yho'ogy; tøø jadähooc jiuypiojtägach. Je'eds jaduhñ mänaamb: ⁹Nnajuøøbiøch jaduhñ coo hajxy mjaančh tehñ chaachpøcy, coo hajxy mjaančh

tehñ yhäyoy. (Høøčh mijts ja'a hoyhajt ja'a weenhajt nmooby.) Nnajuøøbiøch jaduhñ coo mijtsä judiøshajxy haxøøg xñänømy. Jue'e hajxy jaduhñ, ja'a mõjcu'ugongä miädia'agy hajxy miäbøjcäp. Ja'a hóybäc tyijy hajxy je'eduhñ wyi'i miäbøjpy; cab jaduhñ ñä'ä tóyyäbä. ¹⁰Cab hajxy mdsähgø'owät hoy hajxy nej cu mja jat cu mja habet. Myajtsumaamb hajxy näje'e ja'a mõjcu'ugongcøxpä. Xñä'ä hijxmdsaamb hajxy jaduhñ pø tøyhajt hajxy jaduhñ mjaančh mäbøcy. Majcxøøyyä hajxy mdsaačhpøga'añ. Coočhä nmädia'agy hajxy hamuumdu'joot xquiudiúunät, hoy hajxy cu mja ho'og, høøčh mijts ja'a cuhdujt nmo'owaamby coo hajxy jim mnøcxät Dioswiinduum. ¹¹Hamädoowhit hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, cab hajxy ñä'ägädä tsaächtiuna'añii ja'a Diósäm; cab hajxy piäda'aga'añii mõjcu'uhaam.”

¹²Jaduhñä Diosquexy myajnäjaayø'øwät ja'a jim tøø quiexyíijäbä maa ja'a hermanodøjc-hajxiän jim Pérgamo: “Ja'a Jesucristo yhaawjooty ja'a pejyhespada miøødä, mejtsnaxä jiojpä. Je'eds jaduhñ mänaamb: ¹³Nnajuøøbiøch coočh mijts nmädia'agy hoy xquiudiunä homiánaajä, hoyyä Satanás jim jia gobiernähaty maa mijts mhitiän, hoyyä Antipas jim tøø jia yagho'ogyii. Paady yagho'cä coočh nmädia'agy hijty xyajwa'xä. Ni wéeñtiøch nmädia'agy hajxy

xquia'a hoxhijä. ¹⁴ Je'ečh mábocy nga'a hojwiøby coo häna'c wiingmädia'agy hajxy näje'ejaty yajnähixø'oy nebiä Balaam jecy yajnähixøyyän. Je'edsä Balaam jøjcapxøyy coo ja'a judíošhajxy näma'awóøjät cooc tyijy jaduñ yhooyä coo hajxy ñiyhamigähamäadowóøjät, coo hajxy quiaiy yhú'ugät tijaty hajxy tøø yoxy maa ja'a quepychechwiinduumän. ¹⁵ Jii häna'c-hajxy näje'ebä, cabä nicolaíta miädia'agy hajxy ñajtshixø'owaanä. Cábøch mábójnäbä ja'a mädia'agy jaduñmä nmee'xy. ¹⁶ Weenä mädia'agy jaduñmä hajxy ñajtshixø'oy. Pø caj, nøcxáambøch nmädsibø'owa'añ pønjaty jim haxøøg yajnähixøøby maa mijtsän. Hädaa pejyhespada yaaby nmøødpøch nhaawjooty, hädáajøch nmädsiptunaamby. ¹⁷ Mhamädoowhídäp hajxy waambä Dioshespíritu näma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'ečh nyajcayaamby ja'a maná jim yu'učhpä. Møødøčhä poobtsaa nmo'owa'añ. Jimä jemxyiøø yuugjaayä poobtsaanähgøxp. Ni pøn jaduñ quia'a høxcapy quia'a najuø'oy. Jagooyä yhøxcapy ja'a tøøbä mio'oyíjábä.”

¹⁸ Jaduñä Diosquexy myajnäjaayø'owät ja'a jim tøø quiexyíjábä maa ja'a hermanodøjc-hajxiän jim Tiatira; “Ja'a Jesucristo, jaduñä wyiin quiahxø'ogy nebiä jøønhaayän. Jaančh tehñ yhaamb jaančh tehñ chämaambä tiecy néjjiämä hobiujxt

coo mbó'odät. Jaayá'ayäts jaduñ mänaamb: ¹⁹ Nnajuøøbiøch jaduñ coo hajxy hoy mničhogyii, coo hajxy hoy mmábocy, coo hajxy hoy mgudiñ, coo hajxy mõj mjaančh tehñ miee'xtucy. Jaduñhöch nnajuøøbiä coo hajxy jabom-jabom maas hojiaty mgudiñ. ²⁰ Je'ečh mábocy hoy nga'a mänijwiøyyäp coo ja'a to'oxiøjc jii tu'ug maa mijtsän ja'a xøhjäpä Jezabel. Ja'a Dioscøxpäc tyijy miädia'agy. Pero xjiøjcapxøyyäbøch nmoonsähajxy. Jaduñ yhöñdaacpä cooc tyijy yhooyä coo hajxy ñiyhamigähamäadowóøjät, coo hajxy quiaiy yhú'ugät tijaty hajxy tøø yoxy maa ja'a quepychechwiinduumän. ²¹ Tøøčhä Jezabel mayhooc nja näma'ay coo ja'a mädia'agy jaduñmä ñajtshixøøñät. Pero cab jaduñ nä'ägädä najtshixø'owa'añ. ²² Nyajpa'ambedäämbiøch je'eduhñ møødä yhamigohajxy, pø cabä yhaxøøgcuhdujt hajxy ñajtshixø'owa'añ. Hoyhóyhøch hajxy nyajtsaačhpøga'añ. ²³ Ngøxy pøgáañäbøčhä yhuungä jiugyhajthajxy. Jaduñä hermanodøjc-hajxy nägøxiä ñajuø'owa'añ maa ja'a juxtujcpä cajptän coočhä wyiinmahñdy hajxy nnajuøøyyä. Coo hajxy hoy mguhdujthädät, nmo'owäämbiøčhä hoyhajt ja'a weenhajt hajxy jaduñ. Pø cabä, nyajtsaačhpøgäämbiøch hajxy jaduñ. ²⁴ Pønjaty jim jaac hijp Tiatira, ja'a haxøøgmädia'agy hajxy ca'a panøcxpä, ja'a Satanás miädia'agy hajxy ca'a panøcxäbä, cábøch hajxy waamb nhanehñä. (Tøyhájtäc tyijy ja'a Satanás miädia'agy jaduñ.) ²⁵ Jagóoyyøch

hajxy njaac näma'ay coo hajxy
 hoy mgudiúnät neby hajxy naxy
 mnä'ägädä cuhdujthatiän, høxtä
 coónøch yaa ngädaactägätsät.
²⁶Pønjaty mäjädaacp, pønjátyhøchä
 nmädia'agy hoy xyajtúunäp
 homiänaajä, je'ečhä cuhdujt
 hajxy nmo'owaamby coo hajxy
 guiobiernähädät wiinduhmyhagajpt,
²⁷nébiøch nDeedy
 xquihdujtmooyyän. Møcä cuhdujt
 hajxy miødhada'añ. Coo ja'a
 miädia'agy hajxy quia'a mäbøjcäxät,
 mänit hajxy chaächtiuna'añii,
 ja'a hajxy ca'a mäbøjpä. Jaduhñ
 hajxy chaächtiuna'añii néjjiämä
 tu'ts mwojpu'uwät varillaahaam.
²⁸Nmo'owáambiøchä jaxiøøm
 hajxypä. ²⁹Mhamädoowhídäp hajxy
 waambä Dioshespíritu ñäma'ay
 ja'a hermanodøjc-hajxy maa ja'a
 juxtujcpä cajptän.”

3 'Jaduhñä Diosquexy
 myajnäjaayø'øwät ja'a
 jim tøø quiexyíjábä maa
 ja'a hermanodøjc-hajxiän jim
 Sardis: “Ja'a Jesucristo, je'edsä
 Dioshespíritu møødhajp ja'a
 juxtujcpä, møødá madsa'a
 juxtujcpä. Je'eds jaduhñ mänaamb:
 Nnajuøøbiøch cooçh nmädia'agy
 hajxy xquia'a yajtuunä, hoy
 häna'c-hajxy jia mäna'añ cooc
 tyijy mijts hoy mgudiuñ. ²Naxiä
 mwiinmahñdy hajxy mdehñ
 yajmédsät. Cabä Diosmädia'agy
 hajxy hoy mjaty cudiuñ. Je'ečh
 jaduhñ nja tsojpy coo hajxy pedyii
 mgudiúnät, coo hajxy jaduhñ
 mga'a nä'ägä tu'udägóyyät.
³Mjahmiédsäp ja'a homiädia'agy
 hajxy jaduhñ, ja'a hajxy hijty
 tøø mhabøquiäbä. Je'eds hajxy

myajtúnäp tehngajnä. Najtshixøøñä
 ja'a mhamdsoo wiinmahñdy hajxy
 jaduhñ. Pø cabä, jaguiápxyhøch
 mijts nyajcumädöwät. Cab hajxy
 hänajty mnajuø'øy mänáajøch mijts
 nyajcumädowa'añ. ⁴Jim häna'c
 näje'e maa mijtsän jim Sardis,
 cab hajxy nej jiatcø'øy. Coo hajxy
 hoy wiädity, páadyhøch hajxy
 xmiøødwädita'añ poobwitmøød.
⁵Pønjaty mäjädaacp, poobwit
 hajxy miøødhadaamby. Cábøchä
 xiøøhajxy nbo'odaanä maa hajxy
 myiñän cujaay librojooty. Jim hajxy
 ñøcxa'añ maaçh nDeediän, maa
 ja'a Diosmoonsän. Mänitøch hajxy
 jim ngapxpaada'añ, pønjatiä xiøø
 hänajty miimb cujaay librojooty.
⁶Mhamädoowhídäp hajxy
 waambä Dioshespíritu ñäma'ay
 ja'a hermanodøjc-hajxy maa ja'a
 juxtujcpä cajptän.”

⁷Jaduhñä Diosquexy
 myajnäjaayø'øwät ja'a jim
 tøø quiexyíjábä maa ja'a
 hermanodøjc-hajxiän jim Filadelfia:
 “Ja'a Jesucristo, cabä tii pojpä tii
 cädieey miøødá. Ja'a tøyhájtäts
 jaduhñ ñä'ägä møød. Miøødhájtäbä
 rey David yhawaatst je'eduhñ. Coo
 hänajty tii tøø yaghawa'açh, ni
 pøn jaduhñ quia'a hagø'øwät. Y
 coo hänajty tii tøø yhawäguiiçh, ni
 pøn jaduhñ quia'a yaghawá'adsät.
⁸Jaayá'ayäts jaduhñ mänaamb:
 Nnajuøøbiøch cooçh nmädia'agy
 hajxy hoy xyajtuunä, hoyyä
 møcmäjaa hajxy jaduhñtiäbaady
 mga'a ja møødä. Jaduhñhøch
 nnajuøøbiä cooçh mijtsä nxøø
 xquiapxpáatäbä. Páadyhøch mijts
 jaduhñ nguhdujtmo'oy coo hajxy jim
 mnøcxät Dioswiinduum. ⁹Pønjatiä

møjcu'ugong ja'a miädia'agy jaduhñ mähöjcäp, ja'a judíoshajxy, jaduhñ hajxy miänaambä cooc tyijy ja'a Diosmädia'agy hajxy hoy pianøcxpä. Cab jaduhñ nä'ä tóyyäbä. Nä'ä hõhndaacp hajxy jaduhñ. Nyajmedsäämbiøch hajxy maa mijts mwiinduumän. Mänítøch hajxy jim nyagjijcäda'aga'añ, neby hajxy jaduhñ ñajuø'owät cooch mijts jaduhñ ndsocy. ¹⁰Tøøch nmädia'agy hajxy xyajtuunä coo hajxy mmeel'xtúgät. Páadyhøch mijts ngüeendähada'añ mänaa ja'a tsø'ty ja'a häyohn hánajty ñaxa'añän wiinduhmyñaaxwiin. Mänitä jäya'ayhajxy nägøxiä chaaçhpøga'añ. ¹¹Mobädájþøch jiiþy nhäda'aga'añ. Tehngajnä hajxy jaduhñ hoy mgudiúnät. Jaduhñä cuhdujt hajxy ni pøn xquia'a þójcät coo hajxy jim mnøcxät maa ja'a Dioswiinduumän. ¹²Pønþaty mäjädaacp, cøjxta'axiøø hajxy jim yhida'añ Dioswiinduum. Ni mänaa hajxy jim quia'a tsoonaanä. Ja'a nDéedyhøchä xiøø, jimhøch nyuugjaayaanä maa ja'a wyiinnähgopcøxphaxiän, møødä Dioscajptä xiøø, møød høøch njemyxiøø. Ja'a Dioscajptä, ja'a Jerusalén jemybiä je'e. Jim je'e choona'añ tsajpootyp maa ja'a Diosän. ¹³Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän.”

¹⁴Jaduhñä Diosquexy myajnäjaayø'owät ja'a jim tøø quiexyijjäbä maa ja'a hermanodøjc-hajxiän jim Laodicea: “Ja'a Jesucristo, tøyhajtyejþ je'e. Ni mänaa quia'a hõhnda'agy. Je'e

cøxiä yajtsohndaac mäduhñtiä Dios yhädiuuñ. ¹⁵Jaayá'ayäts jaduhñ mänaamb: Nnajuøøbiøch jaduhñ cooch nmädia'agy hajxy hamuumdu'joot xquia'a panøcxä, hoy hajxy mja mäna'añ cooc tyijy hajxy mmäbøcy. Maas hoy coo hajxy cu mnä'ägä mänaañ coo hajxy mga'a mähøcy. ¹⁶Entonces, coo hajxy hamuumdu'joot mga'a mähøcy, páadyhøch mijts jaduhñ nxøøghada'añ. ¹⁷Jaduhñ hajxy mmäna'añ cooc tyijy hajxy tii mga'a nä'ägädä yajmaajiaty, cooc tyijy hajxy hoy mjaançh tehñ wiädity. Pero cab hajxy jaduhñ mnajuø'oy coo hajxy tijaty mga'a møødä. Jaduhñ mäwíinäts hajxy mhity nebiä häyoobän, nebiä wiindspän, nebiä nähwa'ads høxwa'adspän. ¹⁸Nhuuc yajmädoogyhøch mijts oro hoybä, møødä poobwit, møødä wiindsooy. Jaduhñ hajxy hoy mhíxät. Cooch mijts xmiänuu'xtä'agät, mänítøchä mbojþä mgädieey hajxy nyajnáhwáatsämät. Jaduhñ hajxy hoy jim mnøcxät Dioswiinduum; cab hajxy jaduhñ mnä'ägädä tsähdiúnät. ¹⁹Ndsójþiøch mijts, pero pø cábøch nmädia'agy hajxy xquiudiunaanä, mänit hajxy nyajcumädowa'añ. Nmägapxaamby nhane'emaamby hajxy jaduhñ. Entonces, naxiä mhaxøøgcuhdujt hajxy mdehñ ñajtshixø'owät. Hix, coo hajxy jaduhñ mnä'ä cumädówät. Hamuumdu'jootä nmädia'agy hajxy xquiudiúnät. ²⁰Huuc hamädoowhit hajxy, nja wi'i miänuu'xtäacypiøchä jäya'ayhajxy jaduhñ cooch hajxy xjiøþpøgø'owät. Mänítøchä piojþä quiädieey

hajxy nyajnáhwáatsät. Mänítøch hajxy jaduhñ nmøødhíjnät tu'ugmädia'agy. ²¹Pønjaty mäjädaacp, nmo'owáambiøchä cuhdujt hajxy jaduhñ cooçh hajxy xmiøødgobiernähádät. Jadúhñhøch tøø nmäjädaacpä; páadyhøch nDeedy jaduhñ nmøødgobiernähajpä.

²²Mhamädoowhídäp hajxy waambä Dioshespíritu ja'a hermanodøjc ñäma'ay maa ja'a juxtujcpä tsajtøjcän.”

4 Mänítøchä tsajpootyp nwiinhijxy coo yhawa'adsä. Mänítøch jaaya'ay xmiägápxcombä, ja'a jayøbájtøch hänajty tøbä xyhuuc mägapxpän. Jaduhñä yo't yajmädooyy nebiä xuuxtän. Mänítøch xñämaayy:

—Huuc pet yam; nhuuc yaghíxyhøch miich tii jaduhñ jadäänäp.

²Mänítøchä Dioshespíritu xñägädaacy. Mänítøchä Dios nwiinhijxy; jim hänajty yhäña'ay tsajpootyp. ³Haamb tsämaambä Dios hänajty nebiä tsaa hoybän, nebiä jaspén, nebiä cornalinan. Yajxonä hi'inçh hänajty quiähxø'øgy maa ja'a Dios hänajty yhäña'ayän. Nebiä esmeraldatsaajan hänajty yhañ çhamamy. ⁴Jímhøchä majjaya'ay nhijxy nähii'xmädaaxc. Wäditiä ja'a Dios hajxy hänajty jiuhhänaawiädity. Poobwitmøød hajxy hänajty. Oro hajxy hänajty quiuhjenhajpy. ⁵Jimä wädsuc hänajty piädsømy maa ja'a Dios hänajty yhäña'ayän. Jädijpä hänee hänajty jim. Juxtujcä jøøn hänajty jim tioy Dioswiinduum. Dioshespíritu je'eduhñ ja'a

juxtujcpä. ⁶Haa jim ja'a Dioswiinduumä, jaduhñä mejy hänajty jim quiähxø'øgy nebiä hijxt jaançh tehñ tiø'xypän.

Mädaaxcä animal ja'a Dios hajxy hänajty jim jiuhhänaawiädity. Cøxiä ñi'x quiopc-hajxy hänajty wyiinmøødä, jayøjp jiøøxcø'ømhaambiajpy. ⁷Tu'ug hänajty quiähxø'øgy nebiä leóngän; tu'ug nebiä wajjän; tu'ug nebiä jäya'ayän; tu'ug nebiä jäyøøbiä wiistän. ⁸Haagä queectmøød hajxy hänajty tädujcyaty. Cøxiä ja'a wiin hajxy hänajty miøødä møød nähgøxp møød joodooty. Xøømdsuhñ hajxy hänajty wyi'i miäna'añ:

Jaançh tehñ wia'adsä Dios; je'e hajxy nWiindsønhájtäm. Cøxiä mäjaa miøødä; homiänaajä ñäl'ägädä hity cøjxta'axiøø.

⁹Jaançh hijpä Dios cøjxta'axiøø. Naaghoocä animal ja'a Dios hajxy wyiingudsähgø'øy, ¹⁰mänitä majjaya'ay ja'a Dios hajxy hänajty wyiinjjcäda'agy, ja'a nähii'xmädaaxpä. Mänitä Dios hajxy hänajty jiaançh tehñ wyiingudsähgø'øy. Mänit hajxy hänajty wyl'i ñiguiuhjeendu'udyii. Mänitä quiuhjén hajxy hänajty jim ñajtsconø'øy Dioswiinduum. Mänit hajxy hänajty miäna'añ:

¹¹Dios, højts miich nWiindsønhajpy. Hahixøøby jaduhñ coo højts miich nwiingudsähgø'øwät, coo højts nmänä'anät coo miich ja'a mäjaa mmøødä, coo miich mmøjjä mjaançhä. Cøxiä wiinä miich mjaançh tehñ quiunuu'xy mjaançh tehñ piäda'agy.

5 Mänítöchä Dios nhijxy
 coo nocy hänajty
 quiø'øbøc-haty haxädsach, ja'a
 quiø'ø hahooyhaampiä. Mejtsnaxä
 nocy hänajty jiaayä. Juxtujc-hit
 hänajty yhahoochä. ²Mänítöchä
 Diosmoonsä tu'ug nhijxy, ja'a mäjaa
 jaanč teh̄m miøødpä. Mänit je'e
 miänaañ:

—Pøn̄ cuhdujt møød coo yø'ø nocy
 yhahoo'tstú'udät.

³Ni pøn̄ cuhdujt hänajty quia'a
 møødä coo ja'a nocy hajxy
 yhahoo'tstú'udät, coo hajxy yhéebät,
 ni ja'a jim̄bä tsajpootypä, ni ja'a
 hädaa yaabä naaxwiimbä, ni ja'a
 jiiipiä möjcu'uhaambä. ⁴Mänítöch
 njaanč teh̄m jiøøyy, coo pøn̄
 cuhdujt hänajty quia'a møødä coo
 ja'a nocy hajxy yhéebät, coo hajxy
 quiápxät. ⁵Mänítöchä majjaya'ay
 tu'ug xñämaayy:

—Ca'a mjøøñä. Ja'a Jesucristo,
 je'eds mäjädaac. Je'e cuhdujtmøød
 coo yø'ø nocy yhahoo'tstú'udät. Ja'a
 David ja'a yhap yhoc je'e, ja'a jecy
 jim̄ gobiernähájtäbä Judánaaxooty.
 Paadiä Jesucristo xiøhaty ja'a León
 de Judá.

⁶Mänítöchä Meeghuung tu'ug
 nhijxy. Jim̄ hänajty tiäna'ay
 Dioswiinduum, maa ja'a
 animal nämädaaxpän, maa ja'a
 majjaya'ay nähii'xmädaaxpän.
 Cähxø'p hänajty coo hänajty tøø
 yagho'ogyii. Juxtujcä quiaa'pt
 hänajty; juxtujcä wyiin hänajtypä.
 Haa ja'a wyiin juxtujcpä, ja'a
 Dioshespírituhajxy hänajty je'eduh̄n
 ja'a juxtujcpä. Jim̄ hajxy hänajty
 wiädity wiinduhmyhagajpt.

⁷Mänitä Meeghuungä nocy hoy
 piøjtsoy. Ja'a Dios jaduh̄n yejc;

yhahooguiø'øhaamby hänajty
 tøø quiø'øbøc-haty. ⁸Mänitä
 Meeghuung wyiinjiicädaacä.
 Ja'a nämädaaxpä animalhajxy
 mäwiinjiicädaac møødä
 nähii'xmädaaxpä majjaya'ayhajxy.
 Cødu'ugä harpa hajxy hänajty
 miøødä. Jim̄ä poom hajxy hänajty
 miøødä orojoønebøhñdiooty.
 Haa ja'a poom jaduhmbä, ja'a
 Diospa'yaaxøøc je'eduh̄n. Ja'a
 Diosmädia'agy hajxy mäbøjpä,
 je'edsä Dios hajxy hänajty pa'yaaxp.

⁹Mänitä jemyhøy hajxy yhøøyy:

Miič cuhdujtmøød coo yø'ø
 nocy mhahoo'tstú'udät.

Miič højts xñähho'ttuut. Paady
 højts cuhdujt nmøødä
 coo højts yaa nhídät
 Dioswiinduum.

Wiinduhmyhagajpt højts ndsooñ.
 Cøjhayuuc højts ngapxy.

¹⁰Miič højts cuhdujt xmiiooy
 coo højts jim̄ ngobiernähádät
 naaxwiin.

Diostuung højts ndunaamby
 nebiä teediän.

¹¹Mänítöchä Diosmoonsä nhijxy
 jaanč teh̄m miay. Ja'a Dios
 hajxy hänajty jiuhdánaawiädiipy
 møødä animalhajxy møødä
 majjaya'ayhajxy. ¹²Mänitä
 Diosmoonsähajxy møc jiaanč teh̄m
 yaaxy:

Yø'ø Meeghuung, yø'ø tøø
 yagho'ogyii.

Yø'øøds cuhdujtmøød coo jiaanč
 teh̄m wyiingudsähgø'øwøøjät.
 Hahixøøby jaduh̄n coo højts
 nmänáanämät coo cøxiä
 wiinä miøødä, møødä mäjaa,
 møød coo quiuhwijiä, møød
 coo miøjjä jiaančhä.

¹³Mänit hajxy miänaañ nägøxiä mädyijaty ja'a Dios tøø quiunuuxy, ja'a jimä tsajpootypä, møødä hädaa yaabä naaxwiimbä, møødä jiiipiä møjcu'uhaambä, møødä jiiipiä mejjiootypä:

Tsögä Dios hajxy
wiingudsähgøoyäm møødä
Meeghuung.

Çøjxta'axiøø hajxy yhida'añ
møj jaançh. Møjmäjaa hajxy
miøød.

¹⁴Mänitä nämädaaxpä
animalhajxy miänaañ:

—Tsøc.

Mänitä nähii'xmädaaxpä
majjäya'ay ja'a Dios hajxy
wyiinjiçädaacy. Wyiingudsähgøoyy
hajxy jaduhñ.

6 Mänitøçhä Meeghuung
nhijxy coo ja'a nocy tu'hit
yhahoo'tstuuty ja'a hänajty
juxtujc-hithahooçhpä. Mänitä
animal tu'ug miänaañ:

—Min huug hiç.

Coo ja'a animal jaduhñ miänaañ,
jaduhñ yajmädooyy nebiä hänee
jäditiän. ²Mänitøçhä craa tu'ug
nhijxy coo tøpxt hänajty tu'ug
miøødä. Poobcuaañähgøxp hänajty
yhäña'ay. Mänitä cuhjén miooyyä.
Mänit tiu'ubøjcy tsiptuumbä.
Mäjäda'agaamb hänajty jaduhñ.

³Mänitä Meeghuung ja'a
nocy yhahoo'tstuuty ja'a
miämetsc-hithahooçhpä. Mänitä
miämetspä animal miänaañ:

—Min huug hiç.

⁴Mänitøçhä craa tu'ug
nhijxcombä. Tsaptscuaañähgøxp
hänajty yhäñaabiä. Mänitä cuhdujt
miooyyä coo ja'a jäya'ayhajxy
nøcxy yajnimiädsibøyyii

hädaa yaabä naaxwiin, coo ja'a
jäya'ayhajxy nøcxy yajniyagho'ogyii.
Mänitä yoñhespada tu'ug miooyyä.

⁵Mänitä Meeghuung ja'a
nocy yhahoo'tstúutcombä ja'a
miädägøøghithahooçhpä. Mänitä
miädägøøgpä animal miänaañ:
—Min huug hiç.

Mänitøçhä craa tu'ug nhijxcombä
coo ja'a quixt hänajty tu'ug
miøødä. Jiñgwiaañähgøxp hänajty
yhäñaabiä. ⁶Mänitøçhä mädia'agy
nmädooyy maa ja'a mädaaxpä
animalhajxy hänajtiän:

—Møjyuu jaduhñ jadäänäp.

Ja'a trigo tu'kílobä, mägooxmil
chowhada'añ. Y ja'a cebada
tägøøgkílobä, jaduhñ
chowhadaambä mägooxmil. Pero
cap yø'ø hon myaghäyówät ni yø'ø
vino.

⁷Mänitä Meeghuung ja'a
nocy yhahoo'tstúutcombä ja'a
miämädaaxc-hithahooçhpä. Mänitä
miämädaaxpä animal miänaañ:
—Min huug hiç.

⁸Mänitøçhä craa tu'ug njaac
hijxcombä, ja'a hänajty xøhajpä ja'a
mäyagho'pä. Cuaañähgøxp hänajty
yhäña'ay ja'a poob-lómnbä.
Høxhaamä møjcu'uhaambä hänajty
piamiñ. Mänitä cuhdujt hajxy
miooyyä hädaa yaabä naaxwiin
coo jäya'ay hajxy yaghó'ogät
tu'mädaaxc-hitpä. Hadsip hajxy
hänajty miäyagho'oga'añ, yuuaam,
pa'amhaam, caahaam.

⁹Mänitä Meeghuung ja'a
nocy yhahoo'tstúutcombä ja'a
miämägooxc-hithahooçhpä.
Mänitøçhä háañämähajxy jiiiby
nhijxy altarpa'c, ja'a hajxy
hänajty tøø yagho'ogyiijabä ja'a

Diosmädia'agyquiøxpä. Paady hajxy yagho'cä coo hajxy hänajty hoy tøø jiaančh tehṃ quiudiuñ. ¹⁰Mänit hajxy møc yaaxy:

—Dios, miich højts nWiindsønajpy. Miičhä tøyhajt mmøød. Mänaa højts nnø'ty xygahawiimbjätät jiiby naaxwiin.

¹¹Mänitå poobwit hajxy cødu'ug miooyyå. Mänit hajxy ñåmaayyå coo hajxy ween jiaac poo'xy høxtå coonå hänajty pedyii tøø yagho'ogyii ja'a hermano ja'a Jesucristo hajxy mäduumbå.

¹²Mänitå Meeghuung ja'a nocy yhahoo'tstúutcombå ja'a miädädujc-hithahoočhpå. Mänitå hujx møc ñajxy. Mänitå xøø jyiñøoyy nebiå jiñwitan. Mänitå po'o quiähxø'cy nebiå nø'tian.

¹³Mänitå madsa'a tsajtcøxpå quiahy naaxwiin jaančh tehṃ miay; jaduñ quiahy nebiå piidstøøm piojca'ayan.

¹⁴Mänitå tsajt yhadägoyyøñå nebiå nocy yhaxädsachån. Mänitå tun cøxiå wiingtuum ñå'å yajnøcxå møødå naax hänajty hijpä mejyquiujc.

¹⁵Mänitå jäya'ayhajxy nägøxiå jiiby ñiguiyu'tsä tsaajutjooty, møødå jimbå tsaadunjootypå, møødå reyhajxy, møødå jäya'ayhajxy møjhjäpää, møødå mäyøøjäya'ayhajxy, møødå soldadowiindsønajpy, møødå jäya'ayhajxy ja'a møjcuñdujtmøødpå, møødå nä'å pajäya'ayhajxy. ¹⁶Mänitå tsaadún hajxy ñåmaayy:

—Højts nähgahbéjtåc. Jaduhñ højtså Dios xquia'a híxät ja'a jim häñaabiå tsajpootyp. Jaduhñ højtså Meeghuung xquia'a yajtsaächpøgät.

¹⁷Tøø yhabaatnä coo højts hajxy xyajtsaächpøgaannå nägøxiå. Cab højts hoy nmee'xtuga'añ.

7 Mänitøčhä Diosmoonså mädaaxc nhijxy coo hajxy hänajty jim tiåna'ay hanidiuhmjaty mäduñjatiå naaxteec. Mädaaxnaç hajxy hänajty tiåna'ay. Yhadujpiå poj hajxy hänajty, jaduñ quia'a pøjñät naaxwiin ni mejywyiing ni quepyquiøxp. ²Mänitøčhä Diosmoonså tu'ug jadåhooc nhíjxcombå coo hänajty piedø'øy xøøbädsømypiå, coo ja'a Diossello hänajty miøødå. Mänit hajxy møc miøjyaaxå, ja'a nämådaaxpä, ja'a hajxy hänajty tøø quiuhdujtmø'oyíjåbå coo hajxy quiådiéeyät, coo hajxy cøxypånejpiå jiatcø'øwät hädaa yaabå naaxwiin møødå jim mejjiooty. Mänit hajxy ñåmaayyå:

³—Cab hajxy mgådiéeyät jim naaxwiin ni jim mejjiooty, ni yø'ø quepychaa hajxy nej mga'a túnät, høxtå coonå højtså jäya'ayhajxy hänajty tøø nseñapåda'agy wyiinnåhgopcøxp, ja'a hajxy Diosmäduumbå.

⁴Mänitøčhä mäçhohnd nmådooyy coo ja'a Israel yhap yhoc hajxy hänajty yajseñapåda'aga'añ nä mägo'x-cujuxychågui'xmådaa xmilpä. Nämajmetscjaty hajxy hänajty yajseñapåda'aga'añ.

⁵Nämajmejtsmil hajxy hänajty yajseñapåda'aga'añ ja'a Judå yhap yhoc-hajxy, møødå Rubén yhap yhoc-hajxy, møødå Gad yhap yhoc-hajxy, ⁶møødå Aser yhap yhoc-hajxy, møødå Neftalí yhap yhoc-hajxy, møødå Manasés yhap yhoc-hajxy, ⁷møødå Simeón yhap yhoc-hajxy, møødå Leví yhap yhoc-hajxy, møødå Isacar yhap yhoc-hajxy, ⁸møødå Zabulón yhap

yhoc-hajxy, mөөдä José yhap
yhoc-hajxy, mөөдä Benjamín yhap
yhoc-hajxy.

⁹Mänítöchä majiäya'ay nhijxy.
Wiinduhmyhagajpt hajxy hänäjty
chooñ. Cøjhayuucjaty hajxy
hänäjty miädia'agy. Ja'a Dios hajxy
hänäjty jim̄ jiuhdänaawiädijpy
maa ja'a Meeghuungwiinduumän.
Jaančh teh̄m miay hajxy hänäjty
jaduhñ; cab hajxy hänäjty hoy
yajmäčhowa'añ. Poobwitmөөд
hajxy hänäjty. Mөөдä xi'iwhaay
hajxy hänäjty quiö'ogaphaty.

¹⁰Mänit hajxy nägöxiä yaaxy mөc:
Xyajnäwaats hөjtsä Dios mөөдä
Meeghuung. Gobiernähajpä
Dios jaduhñ.

¹¹Nägöxiä ja'a Diosmoonsä ja'a Dios
hajxy hänäjty jiuhdänaawidity.
Mөөдä majjäya'adiöjc-hajxy hänäjty
jiuhdänaawiädijtäbä mөөдä
animalhajxy ja'a nämädaaxpä.
Mänitä Dios hajxy wyiinijcädaacy;
wyiingudsähgөөyy hajxy jaduhñ.

¹²Mänit hajxy miänaañ:
Tsögä Dios hajxy jaančh
teh̄m wyiingudsähgөөyyäm
cөjxta'axiөө.
Tsög hajxy mänáanäm coo
miөjjä jiaančhä, coo
quihwijjiä, coo miäjaamөөдä.
Tsög hajxy nämáayyäm:
“Dioscujú'uyäp.”

¹³Mänítöchä majjäya'ay tu'ug
xmiäyajtөөyy:
—Pөnäda'a yө'өduhñ
poobwitmөөд. Maa hajxiäda'a
chooñ.

¹⁴Mänítöch nhadsooyy:
—Wiindsón, cáböch nnajuө'өy.
Miičhāda'a mnajuөөby.
Mänítöch xñāmaayy:

—Yө'ө jäya'ayhajxy, tөө hajxy
jiaančh teh̄m chaačhpөcy. Tөө
hajxy nähho'tu'udyii ja'a
Meeghúungäm. Jaduhñ hajxy
tөө yajnähwáatsäbä. ¹⁵Paady
hajxy jim̄ tiäna'ay Dioswiinduum.
Xөөmduhmä Diostuung hajxy
jim̄ tiuñ. Cueendähájtäp hajxy
ja'a Diósäm. ¹⁶Cabä yuu hajxy
mänaa yagjuө'owaannä, ni cab
hajxy tiödsө'owáanänä. Cab
hajxy xiөөno'ogáanänä, ni
cab hajxy yhanho'ogáanänä.
¹⁷Ja'a Meeghuung, jim̄ yhyty
maa ja'a Dios yhäña'ayän.
Je'e hajxy cweendähadaamb
yajxón. Cab hajxy jiө'owaannä
xiuudsäannä je'leguiөxpä coo hajxy
yajxoonda'aga'añii ja'a Diósäm.

8 Mänitä Meeghuung ja'a nocy
yhahoo'tstúutcombä ja'a
miäjuxtujc-hithahoočhpä. Mänit
jim̄ yhamooñ tsajpootyp cupc-hora.
²Mänitä Diosmoonsä juxtujc
nhijxy coo ja'a Dios hajxy hänäjty
jim̄ wyiindäna'ay. Mänitä xuuxt
hajxy miooyyä cөdu'ug. ³⁻⁴Mänitä
Diosmoonsä wiingpä miejtspä.
Jimä orojoөnebөhñdy hänäjty
miөөдä. Mänit hoy tiänaaxiөpy
maa ja'a orohaltar mäwiingonän,
jim̄ mäдөyyä maa ja'a Dios
hänäjty yhäña'ayän. Mänitä poom
may miooyyä coo jim̄ jiögät ja'a
orohaltarnähgөxp. Coo'pä ja'a
poomjoc hänäjty jim̄ maa ja'a
Diosän. Jimä Dios hajxy hänäjty
pia'ya'axy, ja'a Diosmädia'agy
hajxy hänäjty mäböjpä. ⁵Mänitä
Diosmoonsä ja'a joөnebөhñdy
quionө'cy. Mänitä joөmbajc
hoy quiuwobө'өy, ja'a hänäjty
jim̄ hijpä maa ja'a altarän. Mänit

quihga'tsnajxy naaxwiin. Mänit wiädsujcy mөөдä hänee yaaxy. Mänitä hujx ñajxy.

⁶Haa ja'a näjuxtucpä Diosmoonsähajxiä, ja'a xuuxtmөөdpä cөdu'ugä, mänit hajxy ñiyhahixөөyyänä coo hajxy hänajty xiu'uxa'añ.

⁷Mänit tu'ug xiuuxy. Mänitä caandөөtstuu quiahy hädaa yaabä naaxwiin mөөдä jөөn mөөдä nө'ty. Mänitä naaxwiin tiooyy ja'a hänajty miädägөөghitpä cөxiä, mөөдä quepychaa mөөдä hujtshaay.

⁸Mänitä Diosmoonsä ja'a miämetspä xiuuxy. Mänitädsä tun crúundäbä hoy quia'ay mejjiooty. Tooby hänajty je'e. ⁹Mänitä miädөөgpä mejy ñө'tiөөyy. Cөxy ho'c ja'a animalhajxy jaduһn. Cөjxä barco qyiñ.

¹⁰Mänitä Diosmoonsä miädägөөgpä xiuuxy. Mänitä madsa'a crúundäbä quiahy jim tsajpootyp. Tooby hänajty je'ebä. Mänit hoy quia'ay maa ja'a miädägөөghitpä möjnөөjän, maa ja'a miädägөөghitpä nөөgopcän.

¹¹Jaduһnä madsa'a hänajty xiөhaty Tahm. Mänitä nөө miädägөөghitpä tiahmөөbiä. Mänitä jäya'ayhajxy may yho'cy.

¹²Mänitä Diosmoonsä miämädaaxpä xiuuxy. Mänitä xөө tu'nax yho'cy maa hänajty yhawijststuiän ja'a miädägөөghitpä. Jaduһnä po'o jiajpä mөөдä madsa'a. Mädaaxc-hora ja'a xөө hänajty quia'a hañ xөөm; mädaaxc-hora ja'a po'o hänajty quia'a hañ coods.

¹³Mänitөchä wiistä tu'ug nhijxjäyөөyy tsajtcөxp. Mänit mөc yaaxy:

—Coo ja'a Diosmoonsähajxy jiaac xú'uxät ja'a jaac tägөөgpä, mänitä jäya'ayhajxy jiaanч tehм chaaчpөгa'añ, ja'a hajxy jiiby tsänaabiä naaxwiin.

9 Mänitä Diosmoonsä miämägooxpä xiuuxy. Mänitөchä madsa'a tu'ug nhijxcayh, naaxwiin hoy quia'ay. Mänitä madsa'a hawaatst miooyyä coo ja'a jut jaduһn yhawäguii'tstú'udät ja'a jaanч tehм quioөcpä. ²Mänitä jut yhawäguii'tstuuty. Mänitä jөөnjoc qui'ixc piädsөөmy. Mänit cөxp chajpejty. Mänitä xөө cөjx wyiindägө'өyii. Mänitä tsajt cөjx jiaty jөөnjocjooty. ³Mänitä mamiu'u jocjooty piädsөөmy. Mänit hajxy yaa tiägөөyy jäyөөbiä hädaa yaabä naaxwiin. Mänitä mu'u төjpt hajxy miooyyä nebiä caa'ptiөjptän. ⁴Mänit hajxy yhanehmä coo hujtshaay hajxy quia'a jө'өxät ni quepychaa. Je'e hajxy tiөbäp pөnjatiä Diosseñä hänajty ca'a mөөд wyiinnähgopcөxp. ⁵Coo pөn jaduһn tiөbөjät, jaduһnä mu'udөjpt jäwө'өwa'añ nebiä caa'ptiөjpt jäwө'өyän. Mägooxpo'o ja'a mu'uhajxy hänajty miädөba'añ. Pero cabä cuhdujt hajxy miooyyä coo jäya'ay hajxy yaghó'ogät. ⁶Ja wi'i yho'ogaambä jäya'ayhajxy hänajty, pero cab hajxy jaduһn ñä'ä ho'oga'añ.

⁷Jaduһn mäwíinädsä mu'uhajxy hänajty quiahxө'өgy nebiä tsiptuumbä cuaayän. Jim hajxy hänajty miөөдä quihduum nebiä orocuhjenbän. Jaduһnä wyiin jiөjphajxy hänajty quiahxө'өgy nebiä ya'adiөjcän. ⁸Jaduһnä cuhwaay hajxy hänajty miөөдä

nebiä to'oxiøjcuhwaayän. Jaduhnä tiu'tsthajxy hänajty quiähxø'ogy nebiä leöntu'tstän. ⁹Nähbujxt cuhbujxt hajxy hänajty nebiä hacxpøjtän. Coö hajxy hänajty jiäyøy, jaduhn hajxy hänajty jiädity nebiä tsiptuumbä cuaaguiarretän. ¹⁰Jaduhnä tøjpt hajxy hänajty miøødä nebiä caa'ptiøjptän. Jaduhnä cuhdujt hajxy hänajty miøødä coö jäya'ay hajxy tiøbät mägooxpo'o. ¹¹Haa ja'a mu'u wyiindsønhajxiä, jutjooty hänajty chäna'ay, ja'a jaanč tehñ quiøøcpä. Jegyhajty hijty je'e tiuñ Diosmoonsä; tøø yhøxquéjxänä. Abadón hänajty xiøhaty hebreohayuuc-haamby. Apolión hänajty xiøhaty griegohayuuc-haamby. Jaduhñ miädia'agytiägø'øy, ja'a mäyajcuhdägoobiä.

¹²Jaduhnä tsø'ty tu'ug jiajtä. Metscä tsø'ty hänajty quia'a pedyiinä.

¹³Mänitä Diosmoonsä miädädujcpä xiuuxy. Mänitøchä mädia'agy nmädooyy coö jäya'ay jim quiapxy maa ja'a orohaltarän, jim Dioswiinduum. Hamädaaxteecä orohaltar hänajty. ¹⁴Mänitä Diosmoonsä miädädujcpä nāmaayy, ja'a hänajty tøøbä xiu'uxiä:

—Nøcx ja'a Diosmoonsähajxy mädaaxpä mäguejø'øw, ja'a jim cuxochpä maa ja'a Eufratesmøjnøøjän.

¹⁵Mänit hajxy hoy miäguejø'øyii. Mänit hajxy wyiinguejxä coö jäya'ay hajxy yaghó'ogät tu'ug tægøøgpuxy. Jäguemiä hajxy hänajty tøø jajnähdiijyii coö hajxy miäyaghó'ogät. Coö ja'a

miädädujcpä Diosmoonsä jaduhn xiuuxy, habaat jaduhn coö hajxy jiatcø'øwät. ¹⁶Mänitøch nmädooyy coö mejtsmägo'xmillón soldado hajxy hänajty miøødä; haagä cuaayhānaaby hajxy hänajty jaduhn.

¹⁷Haagä caačhpujxtä soldadohajxy hänajty. Jaduhnä pujxt color hänajty miøødä, møødä tsaptspä, møødä hucypiä, møødä pu'tspä. Jaduhnä cuaay quiopc-hajxy hänajty nebiä leöncopcän. Tägøøgtu'u hänajty jiiby piädsømy yhaawjooty, møødä jøøn, møødä joc, møødä azufre. ¹⁸Jaduhnä jäya'ayhajxy yagho'cä ja'a tu'ug tægøøgpuxypä, jøønhaam, joc-haam, azufrehaam. ¹⁹Jimä cuaay mäjaa hajxy hänajty miøødä maa yhaawhaxjiän møødä jiiby maa tiu'tsthajxiän. Jaduhnä tiu'tsthajxy hänajty quiähxø'ogy nebiä tsahñdycopcmmøødpän. Ja'a tiu'tsthaama jäya'ay hajxy hänajty yajtsu'üch.

²⁰Pero ja'a jäya'ayhajxy ja'a mähmøøyyäbä, cabä haxøøgcuhdujt hajxy ñajtshixøøyy. Møjcu'ugong hajxy hänajty jiaanč tehñ wyiingudsähgøøñäp, møødä oronähwopy, møødä platanähwopy, møødä hobiujxtnähwopy, møødä tsahädiuñ, møødä quepychech. Cab yø'øduhmbä nā'ä hixy, ni quia'a mädoy, ni quia'a yo'oy. ²¹Wi'i jäya'ay-yagho'pnä ja'a jäya'ayhajxy hänajty. Wi'i miäbadaacnä hajxy hänajty haxøøgwinnmahñdyaam. Wiingä tægachä to'oxiøjc hajxy miøødtsäna'aynä. Møød hajxy hänajty wyl'i mieečhñä.

10 Mänitøchä Diosmoonsä tu'ug nhijxy jaanč tehñ

miäjaamøød. Jim hänäjty miänacy tsajpootyp. Joczooty hänäjty miänacy. Jimä hi'inčh hänäjty miøødä quiuhduum. Jaduhñä wyiin jiojp hänäjty jiajy nebiä xøøjän. Jaduhñä tiecy hänäjty quiähxø'pä nebiä toobiän. ²Jimä nocyhuung hänäjty quiø'øbøc-haty ja'a haxädsajtstu'udypä. Mänitä yhahoodiecy piädaacy mejywyiing. Mänitä yhanajtyiecy piädaacy tø'ødstuum. ³Mänit møc yaaxy nebiä leóngän. Mänitä hänee ja'a juxtujcpä yaaxwiimbijty. Capx hajxy jaduhñ. ⁴Mänitøch nja tægø'øwaañ cujahbiä waambä häneehajxy quiapxy. Mänitøchä jäya'ay tu'ug xñämaayy jim tsajpootyp:

—Cab jaduhñ mgujáayät nebiä häneehajxy quiapxiän. Ni pøn jaduhñ mga'a yajmøødmädiá'agät.

⁵Haa ja'a Diosmoonsä hänäjty jim tänaabiä mejywyiing møød jim tø'ødstuum, mänit yhahooquiø'ø chajxajy. ⁶Mänit miänaañ:

—Cøjxta'axiøø ja'a Dios ñä'ägädä hity. Cøxiä quiunuu'xy møødä tsajt, møødä naaxwiin, møødä mejy, hotyehm miädyiijatiä. Ja'a Dios jaduhñ mänaamb cooc tøø yhabaatnä. ⁷Coo yhabáadät coo ja'a miäjuxtujcpä Diosmoonsä xiu'uxa'añ, tøø ja'a Dios hänäjty yajtøjiaty nebiä quiuguexyhajxy hänäjty jecy tøø yhawaanän. Cabä wiinghäna'c yhawaanä; ja'a quiuguexiähajtiä yhawaanä.

⁸Mänitøchä jäya'ay jim tu'ug xñämáaguiombä tsajpootyp:

—Nøcx ja'a nocyhuung pøjtsow ja'a haxädsajtstu'udypä, ja'a Diosmoonsä quiø'øbøc-hajpiä.

⁹Mänitøchä Diosmoonsä ja'a nocyhuung hoy nmäyujwa'añ coočh xmió'owät. Mänitøch xñämaayy:

—Pøc; pu'uy. Pa'ag mhaawjooty mjuø'øwa'añ nebiä møjtsiinnøøjän. Pero coo jiiby quiäda'aga'añ maa mjøø'xytiøjcän, mänit mjuø'øwa'añ coo tiahmä.

¹⁰Mänitøchä nocyhuung hoy njaančh pøjtsoy. Mänitøch njaančh puhy. Pá'aghøch jaduhñ njaančh juøøyy nhaawjooty nebiä møjtsiinnøøjän. Pero coo jiiby jiaančh cădaacy maačh njøø'xytiøjcän, mänitøch njaančh juøøyy coo tiahmä. ¹¹Mänitøch hajxy xñämaayy:

—Tsipcøxp mnägapxtägätsät nebiä jäya'ayhajxy jiada'añ yhabeta'añän, ja'a hajxy jim tsänaabiä wiinduhmyñaaaxwiin, ja'a hajxy wiinduhmyhayuuc mädiaacpä, møødä gobiernähajxy.

11 Mänitøchä paxyquipxt hajxy xmiooyy. Mänitøch hajxy xñämaayy:

—Nøcx ja'a Diostøjc quipx møødä altar. Mächow ja'a jäya'ayhajxy, nänaagä Dios hajxy wyiingudsähgø'øy. ²Pero cab jaduhñ jim mguipxät Diostøghaguuy. Ja'a jäguembä-jäya'ay ja'a cuhdujt hajxy tøø mio'oyii coo hajxy jim guobiernähädät maa ja'a Dioscajtän juxychägui'xmejtspo'o. ³Nguexäämbiøchä nguguexy metscä coo hajxy jim miädiá'agät ja'a høøchcøxpä juxychägui'xmejtspo'o. Jiñwitmøød hajxy wiädita'añ.

⁴Haa ja'a Diosquexyhajxy nämetspä, ja'a olivoquepy

hajxy je'e ja'a metspä, mөөдä ceratoyөһнды metspä, ja'a jim tänaabiä Dioswiinduum. Ja'a Dios ja'a naaxwiin cunuux.
⁵Coo ja'a Dioscuguexyhajxy hänajty cөxypänejpiä jia tuna'añii, mänitä jөөн hajxy yhөxpäxujja'añ yhaawjooty. Cөxy toyaambä miädsiphajxy hänajty jaduhñ. Jaduhñ hajxy yho'oga'añ. ⁶Cuhdujtmөөдä Dioscuguexyhajxy hänajty coo hajxy quia'a yajtú'uwät, naagxөө hajxy hänajty miädia'aga'añ ja'a Dioscөxpä. Jaduhñä cuhdujt hajxy hänajty miөөдäbä coo nөө hajxy wia'añdiúnät, yajnө'tycójät. Jaduhñä cuhdujt hajxy hänajty miөөдäbä coo ja'a jäya'ay hajxy yajpa'ambédät hädaa yaabä naaxwiin, coo häyohn hajxy yagjadөөjät, naaghoocä jioothajxy hänajty chocy. ⁷Coo hajxy hänajty tөө miädiaacpäдөөñä, mänitä animal jii by tu'ug piädsөma'añ maa ja'a jut jaanč tehñ quiöөcpän. Mänitä Dioscuguexyhajxy yagho'oga'añii. ⁸⁻⁹Tägөөгxөө ja nähgupc hajxy jim wyijtsna'awa'añ möjcajptooty maa ja'a Jesús jecy miөjpahbejtän cruzcөxp. Haa ja'a cajptjäya'ayhajxiä, haxөөгä cuhdujt hajxy hänajty miөөдä nebiä jecyjjäya'ay ja'a cuhdujt hajxy hijty miөөдän, ja'a hajxy hijty jim jegyhajty tsänaabiä Sodoma möөдä Egipto. Cabä cuhdujt hajxy ñä'ägä yega'añ coo ja'a ho'ogyjiäya'ayhajxy jim yajnaaxtägө'өwөjät. Minaamb hajxy yheeba'añii. Wiinduhmyhagajpt hajxy choona'añ. Cөjhayuuc hajxy miädia'aga'añ. ¹⁰Jaanč tehñ xioonda'agaambä

jäya'ayhajxy hänajty coo ja'a Dioscuguexyhajxy hänajty tөө yho'ogy. Paady hajxy hänajty jootcujc ñijjävөөyyänä, cab hajxy hänajty yhadsibáanänä. Paady hajxy hänajty hotyijjä ñä'ä nimio'owa'añii hamiñ haxөpy. ¹¹Coo tägөөгxөө ja nähgupc hänajty tөө yhabety, mänitä Dios ja'a quiuguexyhajxy hänajty yagjujypiöga'añ jadähooc. Pөnjaty hänajty hixaamb, mänit hajxy hänajty chähgөөbiöga'añ. ¹²Mänitä Dioscuguexyhajxy miädowa'añ coo hajxy hänajty mөc miөjya'axyii jim tsajpootyp:

—Pet hajxy yam cөxp.

Mänit hajxy jocjooty ñөcxa'añ tsajpootyp. Hixáanäp hajxy ja'a miädsípäm. ¹³Mänitiä hujx jaanč tehñ miөc ñaxa'añ. Mänitä tөjc may piuma'añ ja'a miämajc-hitpä jim cajptooty. Juxtujcmilä jäya'ayhajxy yho'oga'añ. Ja'a hajxy hänajty tөө jiaac mähmө'yöyabä, jaanč tehñ chähgө'өwaamb hajxy jaduhñ. Mänitä Dios tsajpootypä hajxy wyiingudsähgө'өwa'añ.

¹⁴Jaduhñ ja'a tsө'ty ñajxy ja'a miämetsc-hoocpä. Paquiä yhabaadängombä coo ja'a miädägөөgpä ñaxängombä.

¹⁵Mänitä miäjuxtujcpä Diosmoonsä xiuuxy. Mänit hajxy jim mөc yaaxy tsajpootyp:

Ja'a Jesucristo hajxy

nWiindsөñhajtäm.

Tөө je'e miөjtägө'өy

wiinduhmyñaaxwiin.

Cөjxta'axiөө

guiobiernähadaannä.

¹⁶Jimä nähii'xmädaaxpä majjäya'ay ja'a Dios hajxy hänajty

juuhháaawiädity. Mänitá Dios
hajxy hoy wyiinjiicáda'agy.
Wyiingudsáhgooyy hajxy jaduhñ.

¹⁷Mänit hajxy miänaañ:

Dios, højts miich
nWiindsønñajpy.

Cøxiä miich mäjaa mmøødä.

Cøjxta'axiøø miich mhity.

Dioscujú'uyäp coo miich tøø
mmøjtägøøñä, coo tøø
mdägøøñä gobiernähajpä.

¹⁸Tøø ja'a jäya'ayhajxy nägøxiä
jia jootma'ady. Pero tøø
yhabaady coo miich
myajcumädowaannä.

Tøø yhabaady coo miichä
ho'ogyjiäya'ayhajxy
myajtøyhajtyegaannä, coo
myajcuhdägoyyaannä
pønjatiä jäya'ayhajxy yaa
yajtu'udägooby hädaa yaabä
naaxwiin.

Jaduhñ tøø yhabaatpä coo
miichä hoyhajt ja'a weenhajt
hajxy mmo'owa'añ pønjaty
miich tøø xquiapxaady,
møød pønjatiä mmädia'agy
hamuumdu'joot tøø xyajtuunä,
møød pønjaty miich tøø
xwyiingudsáhgoøy, hoyyä
møjtuung hajxy tøø quia'a ja
møødhaty.

¹⁹Mänitá Diostøjc jim yhawaach
tsajpootyp. Mänitá caja jiiby
quiähxø'cy tøgooty møødä contrato,
ja'a Dios jecy yajcuhdüjcäbä. Mänit
tiägøoyy wädsujpä. Mänitá hänee
møc jiädijty; møødä hujx møc ñajxy.
Mänitá caandøøtstuu may quiahya.

12 Mänitá hijxtahñd jim
quiähxø'cy tsajtcøxp
jaančh tehñ hoy-yagjuøøñä. Jimä
to'oxiøjc hänajty tu'ug yhajajy

nebiä xøøjän. Jimä po'o hänajty
yajtehm̄bety. Majmetscä madsa'a
hänajty quiuhjenhaty. ²Tøø
hänajty tiehm̄ yhabaatnä coo
yhuungpaada'añ. Paady hänajty
wyi'i ya'axy. ³Mänitá hijxtahñd
wiingpä wyiingähxø'combä. Tu'ugä
dragón hänajty cruundä. Tsaptsä
ñi'x hänajty. Juxtujcä quiopc
hänajty haagä cuhjenmøød. Majcä
quiaa'pt hänajty. ⁴Tiu'tsthaamä
madsa'a tu'ug tægøøgpuxypä
yajcahy naaxwiin ja'a
tsajtcøxpä. Mänitá dragón hoy
wyiindänaaxiøpy ja'a to'oxiøjc
ja'a hänajty huungpaadaambä.
Nägooyyä yhuung hänajty myina'añ,
mänit hänajty chu'uds'añ.
⁵Mänitá ya'ayhäna'c myiññ. Je'e
hänajty tunaamb gobiernä
wiinduhmyñaaxwiin. Møc hänajty
jaduhñ jiaančh tehñ yhane'ema'añ.
⁶Mänitá to'oxiøjc piäyø'cy. Pactuum
ñøcxy. Jimä Dios hänajty tøø
yajnähdijy coo jim yajcayøøjät mil
cumejtsmägo'x cudägøøghii'xxøø.

⁷Mänitá tsip jim piädø'nä
tsajpootyp. Ja'a Miguel hänajty
tuumb Diosmoonsäwiindsønñ. Je'e
ja'a Diosmoonsähajxy miøødpädø'c.
Ja'a dragón ja'a mioonsähajxy
møødpädø'pä. Mänit hajxy
ñiñämejtsä. ⁸Cabä dragónhajxy
ñä'a mäjadaacy. Mänit hajxy quia'a
cuhdujtmóoyyänä coo hajxy jim
jiaag hídät tsajpootyp. ⁹Mänitá
dragónhajxy jim yhøxquéjxänä;
yaa hajxy miänajnä hädaa yaabä
naaxwiin. Haa ja'a dragónhajpä,
ja'a mõjcu'ugong je'e, ja'a
jecychahñdy je'e. Jaduhñ je'e
xiøhajpä Satanás. Je'e hajxy

yaa xwiinhóhñäm hädaa yaabä naaxwiin.

¹⁰Mänitá jäya'ay jim mœc yaaxy tsajpootyp.

—Tøø ja'a Dios miäjäda'agy.

Gobiernä je'le tiunaamby mœødä Jesucristo. Tøø ja'a mœjcu'ugong yhøxquéjxänä. Xøømdsuhm højts nmägu'ughajpähajxy hijty jim yajnähdsomyii Dioswiinduum.

¹¹Paady højts nmägu'ughajpähajxy tøø miäjäda'agy, coo ja'a

Meeghuung hajxy tøø

xñäho'túutäm, mœød coo ja'a

Dios hajxy quiaapxpaady. Hoy

hajxy hänajty jia ho'oga'añ, cab

hajxy hänajty chähgø'øy. Hamdsoo

hajxy jaduhn ñiñähdujcä coo hajxy

yhó'ogät. ¹²Mxoondá'agäp hajxy,

pønjaty jim tsänaaby tsajpootyp.

Pero pønjaty jiiby tsänaaby

naaxwiin, haxøøg hajxy mäßocy

mjada'añ mhabeta'añ, je'eguiøxpä

coo ja'a mœjcu'ugong hajxy jiiby tøø

xñägäda'agy. Hawa'anda'agaambä

mœjcu'ugong jaduhn. Ñajuøøby

jaduhn coo cuhdujt jejcy quia'a

mœødhada'añ coo cøxypänejniä

jiatcø'owät.

¹³Coo ja'a dragón yhiixy coo hänajty tøø quiäda'agy naaxwiin, mänitá to'oxiøjc tiägøøyy päboobiä, ja'a hänajty tøø yhuungpäädiäbä.

¹⁴Mänitá to'oxiøjc wiistäqueect

metsc miooyä mœjty, neby

jaduhn jäyøy ñøcxät pactuum

maa hänajty yajcaya'añiijän

tägøøgjomøjtä cupc. Jäguemä

dragón miähmø'owät. ¹⁵Mänitá

dragón nøø com yhøxpäxuy nebiä

to'oxiøjc jaduhn ñøøgomdsømøøjtät.

¹⁶Mänitá nøøgom cøjx yhuugø'øy

naaxooty. Puhbejtä ja'a to'oxiøjc

jaduhn. ¹⁷Mänitá dragón

ja'a to'oxiøjc jiaanč tehñ

ñähawa'andaacy. Mänitá dragón

tiägøøyy tsiptuumbä mœødä

to'oxiøjc yhuunghajxy, ja'a hajxy

hänajty yaa tsänaabiä hädaa yaabä

naaxwiin, ja'a Diosmädia'agy hajxy

hänajty mäßøjpä, ja'a Jesucristo

hajxy hänajty capxpaatpä.

13 Jímhøch hänajty ndäna'ay

mejypia'a. Mänitøchä

animal cruundä nhijxpädsøømy

mejjiooty. Juxtujcä quiopc hänajty

haagä xøømøød. Haa ja'a xøø

jaduhmbä, haagä haxøøgjatiä Dios

hajxy ñänømy. Majcä quiaa'pt

hänajty haagä cuhjenmøød.

²Jaduhñä ñi'x hänajty nebiä

cuxiøøbøjtän. Jaduhñä tiecy

hänajty nebiä osotequiän. Jaduhñä

yhaaw hänajty nebiä leónhaawän.

Mänitá animal mœjcuhdujt

miooyä mœødä mœcmäjaa. Ja'a

dragón jaduhn yejc; yhamdsoo

je'le jaduhn. ³Tu'ugä animal

quiopc hänajty quiähxø'øgy

nebiä cuhbuxypän. Tøø hänajty

chóoccombä. Mänitá jäya'ayhajxy

nägøxiä jiaanč tehñ yagjuøøyy.

Mänitá animal hajxy tiägøøyy

pawädijpä. ⁴Mänitá dragón hajxy

wyiingudsähgøøyy, je'eguiøxpä

coo ja'a animal mœjcuhdujt hänajty

tøø mio'oy. Jaanä ja'a animal hajxy

wyiingudsähgøøbiä. Jaduhñ hajxy

hänajty miäna'añ:

—Ni pøn mäjaa jaduhn quia'a

møødä nej yø'ø animal mäjaa

miøødän. Ni pøn jaduhn quia'a

mäjädá'agät coo yø'ø animal hajxy

ñä'a mädsibø'owät.

⁵Mänitá animal cuhdujt miooyä

coo ja'a Dios haxøøg ñänømät.

Jaduhñ quiuhdujtmóoyyabä coo yhané'emät juxychägui'xmejtspo'o. ⁶Jaančh jatcøoyy jaduhñ. Haxøøgä Dios jiaančh nänøømy, møødä Dios tiøjc, møød hajxy jim hijpä tsajpootyp. ⁷Jaduhñ quiuhdujtmóoyyabä coo miädsibø'owät ja'a Dioshuunghajxy, coo ja'a Dioshuunghajxy quia'a yajmäjäda'agøøjät. Mänit quiuhdujtmóoyyabä coo ja'a jäya'ayhajxy yhané'emät nägøxiä, ja'a hajxy yaa tsänaabiä wiinduhmyñaaxwiin. ⁸Je'eds hajxy jaduhñ animalwiingudsähgøoyy, pønhatiä xiøø hänajty jim ca'a miimb cujaay nocyquiøxp, ja'a Meeghuung miøødpä, ja'a højts xñähho'túutämbä. Pønjaty cøjxta'axiøø jugyhadaamb nebiä Dios jigyhatiän, je'edsä xiøøhajxy jim miimb cujaay nocyquiøxp. Tøøyyämä xiøøhajxy hänajty quiujähyyäxä coo ja'a naaxwiimbä yhawijy tiøø'xtaacy.

⁹Naxy hajxy hädaa mhuuc tehñ wyiinjuø'owät. ¹⁰Pønjaty mädsuumb, yajtsuumdägatsaamb hajxy je'ebä. Pønjaty mäyagho'p espadahaam, jaanä jaduhñ hajxy yagho'tägatsaanäbä espadahaam. Hix, pønjaty jaduhñ Dioshuung, tsipcøxp hajxy miee'xtügät; tsipcøxp hajxy miäbögät.

¹¹Mänitøchä animal wiingpä nhijxnaaxwiimbädsøømy. Jaanä cruundä je'ebä. Metscä quiaa'pt hänajty je'e nebiä meeghuungcaa'ptän. Wiing hänajty quiapxy miädia'agy nebiä dragóngän. ¹²Jaduhñdsä møjcuhdajt hänajty miøødäbä nebiä jayøbajtpä møjhanimalän.

Quipxy hajxy hänajty yhane'emy nämetscä. Mänitä miämetspä møjhanimal yhanehmy coo ja'a jayøbajtpä wyiingudsähgø'owøøjät, ja'a hänajty cuhbuxypä tøø chø'oguiäbä. ¹³Haa ja'a møjhanimal miämetspä, madiu'u hijxtahñd yajcähxø'cy Haagä hoy-yagjuøøñäjaty. Hijxwiinduumä jøøn yajcahy naaxwiin. ¹⁴Coo ja'a jaya'ayä hijxtahñd hajxy yhijxy, yaghijxmañøøyyä hajxy jaduhñ. Mänit hajxy nämaayyä coo ja'a animal hajxy yhähädiuunnáxät, ja'a hänajty tøø quiuhbuxyijjäbä. ¹⁵Mänitä miämetspä animal quiuhdujtmooyyä coo ja'a animal yhähädiuunnaxy yagjujypiøgät, yajcapxø'ogät. Jaduhñ je'e quiuhdujtmóoyyabä coo yajyagho'ogøøjät pønhatiä animalhähädiuunnaxy ca'a wiingudsähgø'owaamb. ¹⁶Mänitä tsaangu'ughajxy nägøxiä yajseñapädaacy maa yhahooguiø'øhajxiän, o maa wyiinnähgopcøxphajxiän, miøjjä miuutscä, miäyøø quia'a mäyøøjä. ¹⁷Pøn hänajty ca'a señamøød, pønä animal xiøø hänajty ca'a møødhajtäp, o ja'a número, cabä cuhdajt hajxy hänajty mio'oyii coo hajxy jütyät, coo hajxy tiøogät. ¹⁸Pøn cuhwijy, pøn wiinjuøøby, ween yhuuc najuø'oy nebiä animal número miädia'agytiägø'oy. Jaduhñ je'e nebiä jäya'ay número. Jue'e número jaduhñ, tädujmägo'x cudäg øøghii'xtädujc.

14 Mänitøchä Meeghuung nhijxy coo jim tiäna'ay Siöntunnähgøxp. Jimä jäya'ayhajxy hänajty piadänaabiä nämägo'x

cujuxychägui'xmädaaxc mil. Yhaagä mөөд hajxy hänäjty cujaay wyiinnähgopcөxphajxy ja'a Meeghuung xiөө mөөдä Tieedy xiөө. ²Mänitөch jim nmädooyy tsajpootyp nebiä möjnөө may jiäditiän, nebiä hānee mөc ya'axiän. Jadhun hänäjty yajmädoobä nebiä harpa may miäna'añän. ³Ja'a nämägo'x cujuxychägui'xmädaaxc milpä jäya'ay, ja'a hajxy hänäjty tөө yajnäwha'ačhíijäbä hädaa yaabä naaxwiin, jemyhөy hajxy hänäjty jim yhөөby Dioswiinduum. Haa ja'a nämädaaxpä animalhajxiä, jim hajxy hänäjty piahñä'ay mөөдä majjäya'adiөjc-hajxy. Cabä wiinghäna'c-hajxy jiada'añ ja'a jemyhөy jaduhmbä. ⁴Haa ja'a nämägo'x cujuxychägui'xmädaaxc milpä jäya'ayhajxiä, cabä wiingto'oxiөjc hajxy hänäjty tөө miөөдtsäna'ay. Jaanč tehм yhoy hajxy hänäjty jiäya'ayhaty. Majatiä Meeghuung hänäjty ñөcxө'y, pianөcxyp hajxy hänäjty jadhun. Jayөbajt hajxy yajnähdijjä coo hajxy yajnäwha'adsөөjät, coo hajxy yhuunghadөөjät ja'a Diösäm mөөдä Meeghüungäm. ⁵Ni mänaa hajxy quia'a hөhnda'agy. Cab hajxy tii poj tii cädieey miөөдä jim Dioswiinduum.

⁶Mänitөchä Diosmoonsä wiingpä nhijxy; jim hänäjty jiäyөөwiädity tsajtөxp. Ja'a Diosmädia'agy hänäjty yegaamby ja'a ni mänaa ca'a tägajtspä. Nägөxiä ja'a jäya'ayhajxy hänäjty mio'owa'añii, ja'a hajxy yaa tsänaabiä wiinduhmyhagajpt, hoy hajxy wiinghayuucjaty jia mөөдä. ⁷Mänitä Diosmoonsä mөc miänaañ:

—Wiingudsähgө'өw ja'a Dios hajxy. Näma'aw hajxy jadhun coo miөjjä jiaančhä. Tөө yhabaady coo ja'a Dios jäya'ay yajtөyhajtyega'añ. Je'eds cөjx yhädiuñ tsajpootyp mөөдä naaxwiin, mөөдä mejy, mөөдä nөөгopc.

⁸Mänitä Diosmoonsä tu'ug jiaac mänaañ:

—Tөө ja'a möjcajpt Babilonia quiuhdägoy, je'eguiөxpä coo ja'a quiuhdujt jiaanč tehм yhaxөөгä. Tөө ja'a jäya'ayhajxy nägөxiä piajatcө'y ja'a Babilonia quiuhdujt.

⁹Mänitä miädägөөгpä Diosmoonsä mөc miänaañ:

—Pөnä animal wiingudsähgөөby mөөдä yhädiuunnaxy, pөñ yajseñapädaacp wyiinnähgopcөxp o quiө'өгөxp, ¹⁰hoyhoyä Dios jiaanč tehм yajcumädowa'añ. Jөөнjooty, azufrejooty hajxy chaächpөga'añ Diosmoonsäwiinduum mөөдä Meeghuungwiinduum. ¹¹Cөjxta'axiөө hajxy chaächpөga'añ xөөmdsuhм, pөñjatiä animal wiingudsähgөөby mөөдä yhädiuunnaxy, pөñjatiä señä jim mөөdhäjtäp. ¹²Pөñjatiä Diosmädia'agy mäbөjp mөөдä Jesucristo miädia'agy, ween hajxy tehngajnä miee'xtucy.

¹³Mänitөchä jäya'ay jim tsajpootyp xñämaayy:

—Cujaay jadhun: “Pөñjatiä Diosmädia'agy mäbөjp, coo hajxy yhө'ogät, jootcujc hajxy yhida'añ.” Tөyhajt jadhun. Poo'xäännäp hajxy jadhun. Jiahmiedsaambiä Dios jadhun coo ja'a Diosmädia'agy hajxy hoy tөө yajtuñ. Nөmä Dioshөpiritu miäna'añ.

¹⁴Mänitõchä jäya'ay tu'ug nyuughijxy. Poobjoccxp hänajty yhäna'ay. Orocuhjén hänajty quiuhjenhajpy. Arroztujt hänajty quiø'øgaphajpy jaanč tehṃ jiojɔp.

¹⁵Mänitä Diosmoonsä tu'ug piädsøomy maa ja'a Diostajtøjcän. Mänitä jäya'ay miøjyaaxä møc, ja'a hänajty hänaabiä joccxp:

—Tøø yhabaady coo ja'a päda'agy myajpäðø'ögät jii by naaxwiin. Tøø ja'a tiøom miäjay. Nøcx yajpäðø'øg.

¹⁶Mänitä päda'agy hoy jiaanč yajpäðø'ogy arroztujthaam hädaa yaabä naaxwiin. Jaduhṃ miädia'agytiägø'oy coo ja'a jäya'ayhajxy yajcumädowa'añii, ja'a hajxy haxøøgcuhdujtmødpä.

¹⁷Mänitä Diosmoonsä wiingpä piädsøomgombä maa ja'a Diostajtøjcän. Jimä arroztujt hänajty quiø'øgaphajpä jaanč tehṃ jiojɔp. ¹⁸Mänitä wiing Diosmoonsä piädsøomøyy maa ja'a altarän. Je'le cuhdujtmøød maa ja'a jøøngøxpän. Mänitä Diosmoonsä møc miøjyaaxä ja'a arroztujt cabhijpä:

—Tøø ja'a tsaatyp jii by cha'amy naaxwiin; nøcx yajpäðø'øg arroztujthaam.

¹⁹Mänitä tsaatyp hoy jiaanč yajpäðø'ogy arroztujthaam hädaa yaabä naaxwiin. Mänit hoy piäda'agy maa nähhädiunø'oyän maa hajxy tiehndse'ediän. Jaduhṃ mäwínädsä Dios yajtsaačhpøga'añ ja'a hajxy tøø quia'a mäbøquiäbä.

²⁰Cajtpa'a ja'a tsaatyp hajxy hoy tiehndse'edy. Comä nø'ty piädsøomy maa nähhädiunø'oyän. Møjwiinä nø'tymejy quiojy tægøøgmägo'x kilómetro. Coo'pä nø'ty hänajty maa ja'a cuaay frenon.

15 Mänitõchä wiinghijxtahnd jim nhijxy tsajpootyp jaanč tehṃ yhamøj, hoy-yagjuøñä. Juxtújc-høčhä Diosmoonsä nhijxy haagä häyohnmøød. Je'eduhṃ nänøomby coo ja'a Dios juxtujc-hooquiä jiaac yajtsaačhpøga'añ ja'a hajxy yaa ca'a mäbøjɔpä hädaa yaabä naaxwiin.

²Mänitõchä hijxt nhijxy. Jim hänajty hamøj quioonna'ay. Nebiä mejjiän hänajty quiahxø'ogy. Jaduhṃ hänajty quiahxø'pä nebiä toobiän. Jimä jäya'ayä hijxt hajxy hänajty wyiindäna'ay, ja'a animal hajxy hänajty tøø quia'a yajmäjäda'aguüäbä møødä seña, møødä xiøø, møødä número. Jimä harpa hajxy hänajty miøødäbä. Ja'a Dios jaduhṃ yejc. ³Jaduhṃ hajxy hänajty yhöy nebiä Moisés jecy yhöyyän. Je'le ja'a Dios jecy mäduun. Jaduhṃ hajxy hänajty yhöøbä nebiä Meeghuung yhöyyän:

Wiindsøn Dios, cøxiä miich cuhdujtmjaanč tehṃ miøødä. Møj jaanč miich mjaanč tehṃ tiuñ.

Jaanč tehṃ yhöy miich mguhdujtmjaduhṃ. Miich mhanehmby wiinduhmyhagajpt.

⁴Caj miich tii pojɔpä tii cädieey mmøødä. Nägøxiä miichä jäya'ayhajxy xwyiingudsähgø'oy. Nägøxiä hajxy miäna'añ cooc mmøjjä cooc mjaančhä. Minaamb miich jäya'ayhajxy nägøxiä xwyiingudsähgø'owa'añ, ja'a hajxy wiinduhmyhagajptpä, je'leguiøxpä coo hajxy tøø

yhixy tøø miädooy coo miičh
mguhdujt jiaanč tehṁ
yhoyyā.

⁵Mänitøčhä Diostsajtøjc
nhijxhawaach jim tsajpootyp maa
ja'a Dios yhäna'ayän. ⁶Mänitä
Diosmoonsähajxy jiiby piädsøømy,
ja'a häyohnmøødpähajxy ja'a
näjxutjcpä. Poobwit hajxy hänajty
miøød jaanč tehṁ wia'ads. Jimä
orowøøn hajxy hänajty miøødä
chi'tsnähgøxp. ⁷Mänitä orotsim
hajxy cødu'ugjaty miooyyā.
Tu'ugä animal jaduhṁ jejcy
ja'a nämädaaxpähajxy hänajty
jim häñaabiä Dioswiinduum.
Hujtsjatiä orotsim hänajty.
Je'eduhṁ nänøømby coo ja'a
Dios ja'a jäya'ayhajxy jiaanč
tehṁ yajcumädowa'añ, ja'a
hajxy ca'a mabøjpä. Cøjxta'axiøø
ja'a Dios nä'ägädä hity. ⁸Jiiby
Diostsajtøgooty, haagä joc jiiby
pu'xwädijp. Jimä joc chooñ maa
ja'a Dios møj jaanč yhitiän. Caj
pøn jiiby hoy nä'ägädä tägø'øwa'añ
tsajtøgooty høxtä coonä ja'a
Dios hänajty juxtujc-hooc tøø
yajtsaačhpøcy ja'a jäya'ayhajxy ca'a
mabøjpä.

16 Mänitøch nmädooyy
coo jäya'ay møc
quiapxy Diostsajtøgooty. Mänitä
Diosmoonsä näjxutjcpä nämaayyā:

—Nøcx hajxy cuhmänactem jiiby
naaxwiin ja'a orotsimjootypä.
Je'eduhṁ nänøømby coo ja'a Dios
jiaanč tehṁ yajcumädowa'añ ja'a
hajxy ca'a mabøjpä.

²Mänitä Diosmoonsä tu'ug hoy
quihmänactemy hädaa yaabä
naaxwiin ja'a yhorotsimjootypä.
Pønjatiä animalseñä hänajty

møød ja'a hamøjpä, pønjatiä
yhahädiuunnaxy hänajty
wiingudsähgøøyyäp, nägøxiä
haxøøgpu'uds hajxy piaatä ja'a
jaanč tehṁ piahmbä.

³Mänitä Diosmoonsä miämetspä
hoy quiudemø'øy mejjiooty ja'a
yhorotsimjootypä. Mänitä mejyñøø
jijaty nebiä ho'ogyjiäya'añø'tiän.
Cøjx yho'ogy mädyiijaty jiiby
tsänaaby mejjiooty.

⁴Mänitä miädägøøgpä hoy
møjnøøjooty quiudemø'øy
ja'a yhorotsimjootypä møød
jim nøøgopcjooty. Mänitä nøø
jijaty nebiä nø'tiän. ⁵⁻⁶Mänitä
Diosmoonsä ja'a nøøgüeendähajpä
miänaañ:

—Wiindsøn Dios, caj miičh
tii pojpä tii cädieey mmøødä.
Cøjxta'axiøø miičh mhity. Hoy
jaduhṁ coo miičhä jäya'ayhajxy
tøø myajtsaačhpøcy, coo nø'ty
hajxy tøø myaghu'ugy, je'eguiøxpä
coo miičh mgu'ug xyajpuhho'cä
møødä miičh mmädia'agy hajxy tøø
xyajwä'xabä.

⁷Mänitä tu'jäya'ay miänaañ maa
ja'a altarän:

—Tøyhajt jaduhṁ. Wiindsøn Dios,
hoy jaduhṁ coo miičhä jäya'ayhajxy
tøø myajtsaačhpøcy. Miičh cuhdujt
cøxiä mmøød.

⁸Mänitä Diosmoonsä
ja'a miämädaaxpä ja'a xøø
yajwiingutemøøyy ja'a
yhorotsimjootypä. Mänitä
xøø quihdujtmoooyy coo ja'a
jäya'ay ñø'ogät. ⁹Hoyhoyyā
jäya'ayhajxy cøxiä tiooyy. Pero cabä
yhaxøøgcuhdujt hajxy hänajty jia
najtshixø'øwa'añ. Haxøøgjatiä Dios
hajxy nänøømy ja'a jim tsajpootypä.

Cabä Dios hajxy piädaacy mõj jaančh, hoyyä Dios cuhdujt jia mөөdä maa ja'a häyohngөxpän.

¹⁰Mänitä Diosmoonsä miämägooxpä quiudemөөyy maa ja'a animal hänajty yhäña'ayän, ja'a yhorotsimjootypä. Mänit cөjx wyiingoodsө'öy majatiä animal hänajty yhane'emiän. Mänitä jäya'ay tioots hajxy yajtsu'udsөөyy je'eguiөxpä coo hajxy hänajty jiaančh tehм chaačhpөcy. ¹¹Paadiä Dios hajxy haxөөгjaty nänөөmy. Cabä yhaxөөгcuhdujt hajxy hänajty jia najtshixө'owa'añ.

¹²Mänitä Diosmoonsä ja'a miädädujcpä jiiby quiudemөөyy Eufratesmөjnөөjooty, ja'a yhorotsimjootypä. Mänitä nөө tiөөch. Jaduhnä reyhajxy hänajty hoy näxө'owa'añ, ja'a hajxy hänajty jim tshönda'agaambä maa ja'a xөө piädsөmiän.

¹³Mänitөchä haxөөгjuөhñdy tägөөг nhijxpädsөөmy. Jiiby hajxy piädsөmөөyy maa ja'a dragón yhaawjootiän, mөөd maa ja'a animal yhaawjootiän, mөөd maa ja'a miämetspä animal yhaawjootiän, ja'a mõjcu'ugongä miädia'agy hänajty yajwá'xäbä. Jaduhnä haxөөгjuөhñdy hajxy hänajty quiähxө'ögy nebiä yocchän. ¹⁴Hix, mõjcu'uhajxy je'le. Hoy-yagjuөөñajaty hajxy hänajty yajcähxө'ögy. Mänitä reyhajxy hoy nägөxiä wioyii, ja'a hajxy hädaa yaabä naaxwiimbä, coo hajxy nөcxy chiptuna'añ mөөdä Dioscөxpä, mänaa ja'a Dios yajnähdijjiän coo chiptuna'añ. Mäjaamөөdä Dios jaduhñ.

¹⁵Jaaya'ay jaduhñ mänaamb: “Cab

jaduhñ pөñ nänä'ägädä najuө'öy mänääjөch hänajty ngäda'aga'añ. Jootcujc je'le pөnä Diosmädia'agy hänajty hamuumdu'joot mäbөjp. Jaduhñ mäwíinäts hänajty yhida'añ nebiä jujcypiän. Cabä hänajty chähdiunaannä.”

¹⁶Mänitä reyhajxy yhamugөөyy maa xiөhatiän Armagedón ja'a hebreohayuuc-haamby.

¹⁷Mänitä Diosmoonsä ja'a miäjxutujcpä cөxp quiuhdeemnajxy ja'a yhorotsimjootypä. Tu'ugä jäya'ay mөc quiapxy maa ja'a Dios yhäñaadiaactän jim tsajpootyp: —Tөө jaduhñ miaañä.

¹⁸Mänit wiädsujcy mөөdä hänee yaaxy. Mänitä hujx mөc näjxy. Cabä hujx jaduhñ mänaaxөө näxy neby jaduhñ tөө näxiän. ¹⁹Mänitä mõjcajpt ñiwia'xä. Tägөөгhit jaduhñ hoy miähmөөñä. Mänitä tөjc cөjx piumy wiinduhmyhagajpt. Mänitä Dios jäya'ayhajxy chaačhtiuuñ hoyhoy, ja'a hajxy hänajty jim tsänaabiä Babilonia-cajptooty. ²⁰Mänitä tun cөjx yhadägöyyө'öy mөөdä naax ja'a hänajty jim hijpä mejyquijc. ²¹Mänitä jäya'ayhajxy quiuhga'awөөyyä caandөөsttuu hamөjjaty. Juxychägü'x kilo hänajty näje'le jemčhä. Coo hajxy jiaančh tehм chaačhpөjcy, paadiä Dios hajxy haxөөгjaty nänamaayy.

17 Mänitөchä Diosmoonsä tu'ug xñämejch, ja'a hajxy hänajty näjxutujcpä, ja'a orotsim hajxy hänajty miөөdäbä. Mänitөch xñämaayy:

—Jam nyajnähixө'öy coo ja'a cuhhiñdo'oxiөjc ja'a mõjpä yajtsaächpөga'añii, ja'a jim

hãñaabiä mejywyiing. ²Tøø ja'a rey ja'a to'oxiøjc hajxy yaa miøødsãna'ay hädaa yaabã naaxwiin. Ja'a to'oxiøjcøxpä ja'a jäya'ayhajxy nägøxiä yaa yhaxøøgwädity hädaa yaabã naaxwiin.

³Mänítøchä Dioshespíritu xyajwiinhijxy. Mänítøchä Diosmoonsä jim xyajnøcxy maa pøn quia'a tsãna'ayän. Mänítøchä to'oxiøjc tu'ug nhijxy. Animalnähgøxp hänajty yhäña'ay. Tsaptsä animal ñi'x. Jimä mädia'agy hänajty miøødä cujaay ja'a ñi'xcøxp. Haxøøgjatiä Dios hänajty ñänømy. Juxtujcä quiopc hänajty je'e y majcä quiaa'pt. ⁴Ja hucy ja tsaptsä to'oxiøjc wyit hänajty je'e. Oro hänajty ñaandsømhajpy møødä hoçhaa møød perlas. Orotsim hänajty quiø'øgø'owhajpy. Madiu'u haxøøgpä hänajty jiiby yhity orotsimjooty. ⁵Jim hänajty miøødä wyiinnähgøpcøxp cujaay: "Ja'a mõjcajpt Babilonia hädaa. Ja'a cuhhiñdo'oxiøjc tiajhajxy hädaa. Ja'a haxøøgpä yhøjxä tiecy hädaaduhñ ja'a hädaa yaabã naaxwiimbä." Cab jaduhñ yhowyiinjuøøñjä. ⁶Mänítøch nnajuøøyy coo ja'a to'oxiøjc hänajty miu'ugyii. Ja'a Dioshuung ñø'tyhajxy hänajty tøø yhúucäxä møød hajxy tøø yagho'ogyíjábä je'eguiøxpä coo ja'a Jesucristo miädia'agy hajxy miäbøjcä. Cooçh jaduhñ nhijxy, njaançh tehñ yagjuøøyyhøch jaduhñ. ⁷Mänítøchä Diosmoonsä xñämaayy: —Tii jaduhñ coo mwi'i yagjuø'øy. Nhawaanãanãbøch miiçh ja'a to'oxiøjcøxpä møødä animalcøxpä,

ja'a to'oxiøjc yaghãnaabiejpiä, ja'a juxtujcpä quiopc, ja'a majcpä quiaa'pt. ⁸Yø'ø animal tøø mwiinhíxiäbä, jugyhajp hijty yø'øduhñ. Hoy tøø jia cuhdägoy, jutpãdsømaamb jadähooc. Mänit nøcxy yho'ogaannä. Pønjatiä xiøø jim ca'a miimb cujaay librojooty, coo ja'a animal hajxy yhíxät coo tøø jutupãdsømy, mänit hajxy hoyhoy yagjuø'owa'añ. Pero pønjatiä xiøø jim miimb cujaay librojooty, je'eds hajxy cøjxta'axiøø jugyhadaamb nebiä Dios jiugyhatiän, je'eguiøxpä coo ja'a xiøøhajxy jim quiujáhyyãxä mänaa ja'a naaxwiimbä yhawijy tiøø'xta'aguiän.

⁹Pøn jaduhñ wiinjuøøby, ween hädaaduhñ hoy yhuuc wiinjuø'øy: Yø'ø quiopc juxtujcpä, jaduhñ mäwíinãts hajxy yø'ø nebiä juxtujcpä tuñän. Jimä to'oxiøjc yhäña'ay. ¹⁰Jaana jaduhñduhñbä, jaduhñ mäwíinãts hajxy yø'ø nebiä juxtujcpä reyän. Nämägoøxc hajxy jaduhñ tøø quiuhdägoøñä. Tu'ug jäda'ahaty guiobiernähajnä. Jatu'ug, cahnä je'e tiägø'øyñä. Coo hänajty tøø tiägøøñä, cab jaduhñ jiega'añ. ¹¹Haa ja'a animal tøø quiuhdägöyyäbä, tu'ugä näjuxtujcpä rey jaduhñ. Miämetsc-hoocpä jaduhñ tøø piädsøømgombä. Mänit nøcxy yho'ogaannä.

¹²Haa ja'a majcpä quiaa'pt tøø mwiinhíxiäbä, nämajcä reyhajxy jaduhñbä. Cahnä hajxy tiägø'øy gobiernähajpä. Jaduhñä mõjcuhdujt hajxy mio'owa'añii tu'hora quipxy møødä animal. ¹³Tu'ugmädia'aguiä reyhajxy yhity ja'a nämajcpä. Mänitä animal cuhdujt hajxy

mio'owa'añ mөөдä mäjaa. ¹⁴Mänit hajxy tiägø'owa'añ tsiptuumbä maa ja'a Meeghuungcøxpän. Mäjäda'agaambä Meeghuung jaduñ. Hiç, je'e ja'a mõjcuñdujt nä'ägä mөөд. Pønjaty je'e jiamiөөdhajpy, Dioshuunghajxy je'eduhñ. Pedyii hajxy miäböcy.

¹⁵Mänitöçhä Diosmoonsä xñämäaguioimbä:

—Yø'ø mejy tөө mwiinhíxiäbä maa ja'a to'oxiøjc hijty yhäña'ayän, jaduñ mäwíinäts yø'ø nebiä wiinduhmyhagajpt-tsohmän. Madiu'u hayuuc hajxy quiapxy.

¹⁶Y yø'ø animal quiaa'pt tөө mwiinhíxiäbä ja'a majcpä, mänitä to'oxiøjc hajxy miähanhada'añ. Nähwa'ads høxwa'ads hajxy jaduñ ñähgue'egaannä. Chu'udsaaiby hajxy jaduñ; mänit hajxy ño'oga'añ. ¹⁷Ja'a Dios jaduñ tөө wyiinmahñdymo'oy coo hajxy jaduñ quiudiúnät nebiä Dios tөө yajnähdijjiän, coo hajxy tu'ugmädia'agy yhídät, coo ja'a animal hajxy quiuhdujtmó'owät, høxtä coonä hänajty tөө yhabaady nebiä Dios yajnähdijjiän. ¹⁸Haa yø'ø to'oxiøjc tөө mwiinhíxiäbä, jaduñ mäwíinäts yø'ø nebiä mõjcajptän maa ja'a reyhajxy nägøxiä xiøønaxiän.

18 Mänitöçhä Diosmoonsä tu'ug njaag hijxy coo hänajty miänacy tsajpootyp. Mayyä cuhdujt hänajty miөөдä. Haamb tsämaamb hänajty jaduñ. Hajaj jaduñ hädaa yaabä naaxwiin.

²Mänit mõc yaaxy:

—Tөө ja'a mõjcajpt Babilonia quiøxy pumy. Jimä mõjcu'uhajxy çhänäañ, mөөдä

haxøøgjuøhñdy madiu'ubä, mөөдä haxøøghanimalhajxy jäyøøbiä.

³Tөө ja'a jäya'ayhajxy nägøxiä quiøxy pahijxpä nebiä Babilonia haxøøgcuhdujt miөөдän. Tөө ja'a reyhajxy miөөдtsäna'ay. Tөө ja'a hajuubiädøjc-hajxy miäyøøjøøñä je'eguiøxpä coo ja'a Babilonia hijty cøxiä wiinä yaghøxhäyoy.

⁴Mänitöçhä jäya'ay nmädooyy coo hänajty jim quiapxy tsajpootyp:

—Pønjátyhøch nhuunghajpy, mdsóonäp hajxy jim maa yø'ø cajptän, neby hajxy jaduñ mga'a pajatcø'owät, neby hajxy jaduñ mga'a padsaaçhpógät. ⁵Haa ja'a jäya'ayhajxy jim tsänaabiä Babilonia, tөө hajxy mõj may jiaanç tehñ quiädieey. Hoyhoyyä Dios jiaanç tehñ yajtsaaçhpøga'añ.

⁶Jaduñä Babiloniatsohmä hajxy mduundägätsät nebiä wiinghäna'c hajxy tөө tiuñän. Mejtsjäduhñtiä hajxy myajtsaaçhpógät. ⁷Tөө hajxy hanaxiä jiaanç tehñ ñiguiumayii. Cøxiä wiinä hajxy tөө jiaanç tehñ yaghøxhäyoy. Paady hajxy mjaanç tehñ yajtsaaçhpógät. Jaduñ quiopcooty jia wi'i miäna'añ:

“Jadúñhøch chaa nhäña'ay nebiä mõjcuñdujtmөөдpän. Nä'a jájtäbøçhä nnihyhap jim. Cábøch jaduñ mänaa nnä'ägä jootmayhada'añ.” ⁸Coo jaduñ miäna'añ, paquiä chaaçhpøga'añ. Piaadaambiä yuu mөөдä häyohn mөөдä ho'og tägoy. Toyäännäp je'eduhñ. Ja'a Dios jaduñ mänaan coo jaduñ chaaçhtiunøøjtät. Jaayá'ayäts mõjcuñdujtmөөд.

⁹Haa ja'a reyhajxy, ja'a to'oxiøjc hajxy hänajty tөө miөөдtsäná'ayäbä, coo hajxy jaduñ yhíxät coo

hänajty tiooñä, mänit hajxy ñäjø'ow ñäxuudsa'añ. ¹⁰Tsähgø'ø-tsähgø'ø hajxy hänajty jäguem tiäna'awa'añ. Mänit hajxy miäna'ana'añ:

—Miičh Babiloniacajpt, may miičh cuhdujt hijty mjaančh tehṃ miøødä. Pero paquiä mjaančh tehṃ quiuhdägooyy.

¹¹Mänitä hajuubiädøjc-hajxy ñäjø'ow ñäxuudsaambä, je'leguiøxpä coo ja'a tiogyhajxy quia'a nä'ägädä juyáañäxä. ¹²Madiu'u toogy hajxy hänajty miøødä: oro, møødä plata, møødä hočhaa, møødä perlas, møødä howyit, møødä linowit, møødä sedawit, ja hucy ja tsapts. Jaduhñä quepy hajxy hänajty madiu'u miøødäbä ja'a pa'agxuu'pä, ja'a tsowjatypä, møødä tijatiä el efantetøødshadeeñdiuc-hädiüñä bä, møødä hobiujxt, møødä pujxt, møødä mármoltsaa. ¹³Jaduhñä canela hajxy hänajty miøødäbä, møødä jøø'xychooy ja'a jaančh tehṃ pia'agxuu'pä, møødä poom, møødä mirra, møødä perfume, møødä vino, møødä hon, møødä harina hoybä, møødä trigo, møødä jäyujc, møødä waj, møødä meeg, møødä cuaay, møødä carreta, møødä moonsädøjc jamiäjüyyäbä. ¹⁴Mänitä hajuubiädøjc-hajxy miäna'ana'añ:

—Tøø miičh xquiøxy pøjcä tijaty miičh mhadsojpy møødä mmäyøøhadyíjábä.

¹⁵Ñäjø'ow ñäxuudsaambiä hajuubiädøjc-hajxy, ja'a hajxy hänajty tøø miäyøøj'oyäbä maa yø'ø cajptän. Tsähgø'ø-tsähgø'ø hajxy hänajty tiäna'ay jäguem.

¹⁶Mänit hajxy miäna'ana'añ:

—Tøø yø'ø møjcajpt jiaančh tehṃ chaačhpøcy. Jaduhñ hijty je'e

nebiä to'oxiøjc howyitmøødpän ja hucy ja tsapts, møødä oromøødpä, møødä hočhaamøødpä, møødä perlasmøødpä. ¹⁷Paquiä ja'a miäyøøhadyíjábä tøø quiøxy pøjcäxä.

Haa ja'a jäya'ayhajxy hänajty wädijpä barcojooty, jäguem hajxy hänajty tiäna'awaambä, møødä wyiindsøn'hajxy, møødä hajxy nä'ä wädijpä. ¹⁸Coo hajxy yhijxy coo ja'a cajpt hänajty tiooñä, mänit hajxy yaaxy:

—Cab mädyii cajpt ñä'ägädä mäbaady nej yø'ø møjcajpt hijtiän.

¹⁹Mänit hajxy tiägøøyy jøøbiä xuu'tspä. Mänit hajxy yáaxcombä:

—Tøø yø'ø møjcajpt jiaančh tehṃ chaačhpøcy. Haa ja'a cubarcohajxiä, tøø hajxy jia mäyøøj'øñä coo yø'ø cajpt hijty jiaančh tehṃ miäyøøjä. Paquiä tøø quiuhdägooñä.

²⁰Pønjaty jim tsänaaby tsajpootyp, ween hajxy nägøxiä mxoonda'agy, møødä Diosquexy møødä Dioshuung, je'leguiøxpä coo ja'a Dios yø'ø cajpt tøø yajcumädy.

²¹Jaančh tehṃ miøcä Diosmoonsä tu'ug. Mänitä cruundätsaa yajpädø'cy. Mänit miejyquia'adsøøyy. Mänit miänaañ:

—Jaduhñsä Babiloniacajpt jiadaambä yhabetaambä. Cab jaduhñ mänaa ñä'ägädä cähxø'øgaannä. ²²Cab jaduhñ jim pøn xiu'uxaannä. Caj pøn jim tiunaannä. Cab hajxy jim jiodsaannä. ²³Ni jøøn jim quia'a toyaannä. Cab hajxy jim piøgaannä yhu'ugaannä. Paadiä Babiloniacajpt jaduhñ jiadaañ yhabetaañ je'leguiøxpä coo ja'a cu'ug jiaančh tehṃ miäyøøjä. Tøø ja'a

jäya'ayhajxy nägøxiä piahixy ja'a Babilonia yhaxøgcuhdajt.

²⁴Haa ja'a Diosquexy mөөdä Dioshuunghajxiä, ja'a hajxy yaghó'cäbä, jimä ñø'tyhajxy tөө miähmø'øy maa yø'ø cajptootiän. Hix, cu'ug jaduhn jatcøoyy.

19 Mänitøch nmädooyy majiäya'ay hänajty jim ya'axy tsajpootyp:

Møj jaančhä Dios jaduhn.

Jaaya'ay hajxy xyajwaats xyajtséjcäm.

Tsøg hajxy wiingudsähgøoyyäm coo mөcmäjaa miөөdä.

²Hoyyä Dios quiudiuun coo ja'a cuhhiñdo'oxiøjc hoy piäda'agy haducytiuum, je'eguiøxpä coo ja'a yhaxøgcuhdajt piahíjxäxä ja'a jäya'ayhajxy nägøxiä, y coo tөө yagho'ogy ja'a Diosquexypä mөөdä Dioshuung.

Coo ja'a Dios ja'a ca'awiindøybä yajcumädowa'añ, yejpiä tøyhajt jaduhn; cab nä'ä nägoobä yajcumädoy.

³Mänitä majiäya'ayhajxy miänáangombä:

Møj jaančhä Dios. Cøjxta'axiøø yø'ø cuhhiñdo'oxiøjc yhatoy yhapøgø'øwa'añ.

⁴Mänitä majjäya'ay ja'a Dios hajxy wyiinjjicädaacy, ja'a hajxy nähii'xmädaaxpä mөөdä animalhajxy ja'a nämädaaxpä. Mänit hajxy miänaañ:

—Tøyhajt jaduhn, mõj jaančhä Dios.

⁵Mänitä jäya'ay jim tu'ug quiapxy maa ja'a Dios hänajty yhäña'ayän:

Näma'aw ja'a Dios hajxy coo miøjjä coo jiaančhä, pønjaty

Diosquexy, pønjatiä Dios wiingudsähgøøby, miøjjä miuutscä.

⁶Mänitøch nmädooyy coo majiäya'ay hänajty quiapxy. Jaduhn yajmädooyy nebiä mejy mөc yhahøøchän, nebiä hänee mөc ya'axiän:

Møj jaančhä Dios jaduhn. Tөө tiägøøñä gobiernähajpä.

Jimä mõjcuhdajt miөөdä.

⁷Tsøg hajxy jootcugøøyyäm, tsøg hajxy xoondáacäm.

Tsøgä Dios hajxy mõj jaančhä pädáacäm.

Tөө yhabaatnä coo ja'a

Meeghuung piøgaannä. Tөө ja'a jaxie'eb ñiyhahixøøyyänä.

⁸Howyit jaduhn jaančhä tehñ yajpøgø'øwáanäp, wa'adspä, haambä tsämaambä, nömä majiäya'ayhajxy miänaañ.

Haa ja'a howyitä, je'eduhñ ñänøømby coo ja'a Dioshuunghajxy hänajty hoy tөө wiädity hädaa yaabä naaxwiin.

⁹Mänitøchä Diosmoonsä xñämaayy:

—Cujaay jaduhn: “Jootcuje hajxy yhity pønjaty tөө yajwoy tөө yajwich maa ja'a Meeghuung piøga'añän.”

Mänitøch xñämäaguiombä:

—Tøyhajtä Diosmädia'agy jaduhn.

¹⁰Mänitøchä Diosmoonsä

nja wiinjicädaacy. Nja wiingudsähgø'øwáanñøch jaduhn. Mänitøch xñämaayy:

—Ca'ačhä xwyiingudsähgø'øy.

Høøchä Dios xmioonsähajp

nej mijtsä Jesucristo miädia'agy hoy myajtuunä. Ja'a Dios mäbøcy mwiiingudsähgø'øwäp.

Tøyhajtä Jesucristo miädia'agy. Tu'ugmädia'agy hajxy yhity, pønjatiä Jesucristo miädia'agy yajwá'xäp, pønjatiä Jesucristo capxpaatp.

¹¹Mänítöch tsajpootyp nhijxy coo tøø yhawa'ačh. Mänítöčhä jäya'ay tu'ug nhijxy coo ja'a ca'awiindöybä hoy yajcumädowa'añ, coo hoy chiptuna'añ. Paady xiøhaty ja'a hoguiudiuumbä, ja'a tøyhajtyejpä. Poobcuaañhgøxp hänäjty yhäña'ay. ¹²Jaduhñä wyiin hänäjty quiähxø'ogy nebiä jøøn tioyyän. Mayyá cuhjän hänäjty miøødä cuhdum. Jimä xøø hänäjty miøødä cujaay. Ni pøn hänäjty quia'a najuø'øy tii xøø je'e. Je'eduhñ nidiuhñ najuøøby.

¹³Nø'tiä wyit hänäjty tøø yaghucy. Ja'a Diosmädia'agy hänäjty xiøhaty.

¹⁴Jaanč tehñ miajiäya'ay hänäjty panøcxp haagä poobcuaañhgøxp. Poobwit hoybä hajxy hänäjty miøød, jaanč tehñ pioob jaanč tehñ wia'ads. ¹⁵Jim yø'øya'ay espada jaanč tehñ jiojöp hänäjty miøødä yhaawjooty. Je'e ja'a jäya'ay hänäjty yajpuxaamby. Jaanč tehñ miøø guobiernähada'añ. Hoyhoyyä jäya'ay chaächtuuna'añ nebiä Dios ja'a jäya'ay yajcumädoyyän.

¹⁶Jimä xiøø hänäjty miøødä cujaay wyitøcxp møødä piuuguiøxp:

“Hädaa mõjcuhdujtmøød; ni pøn mõjcuhdujt jaduhñ quia'a møødä.”

¹⁷Mänítöčhä Diosmoonsä tu'ug nhijxy coo hänäjty jim tiäna'ay maa ja'a xøøjän. Mänit jaanč tehñ miøøc yaaxy. Ja'a luudhajxy mõjyaaxä, ja'a hajxy cøxp jäyøøwiädijpä:

—Min hajxy tsu'uds. Ja'a Dios hajxy jaduhñ xmio'owaamby.

¹⁸Jäya'ay hajxy nägøxiä mdsu'udsaamby, miøjjä miuutscä, hopiønä, møødä rediøjc-hajxy, møød hajxy tuumbä soldadowiindsøn, møød hajxy møcmäjaamøødpä, møødä cuaay, møød hajxy cuaayhäñaabiä.

¹⁹Mänítöčhä animal nhijxy. Møødä reyhajxy hänäjty jim choonä møødä quiu'ughajxy. Tsiptunaamby hajxy hänäjty jaduhñ møødä jaaya'aguiøxpä ja'a cuaañhgøxp wädijpä møødä quiu'ug. ²⁰Mänitä animal miajtsä møødä craa ja'a jaanč tehñ jäya'awyiinhøhmbä. Tøø ja'a craa hänäjty yajcähxø'ogy hoy-yagjuøñäjaty maa ja'a animal wyiinduumän. Jaduhñä craa hänäjty tøø wyiinhøøn pønjaty yø'ø animal seña hänäjty møødhajtäp, pønjaty yø'ø animal yhädiuunnaxy hänäjty tøø wyiingudsähgøoyyä. Mänit hajxy nämetsc jioønjuipøoyyä maa azufre hänäjty tioyyän.

²¹Mänitä quiu'ughajxy yaghó'cäxä. Jaaya'ay jaduhñ mäyagho'c, ja'a hänäjty cuaayhäñaabiä. Espadahaam miäyagho'cy, ja'a jaanč tehñ jiojöpä, ja'a hänäjty jim miøødpä yhaawjooty. Mänitä ho'ogyjiäya'ayhajxy chu'tsä. Ja'a luudhajxy jaduhñ mädsu'ts jaanč tehñ quiu'uxiä.

20 Mänítöčhä Diosmoonsä tu'ug nhijxy. Jim tsajpootyp hänäjty miänacy. Jimä juthawaatst hänäjty quiø'ogonhaty, ja'a hänäjty jaanč tehñ quiøøcpä. Jimä cadena hänäjty quiøøwitshajpä. ²Mänitä mõjcu'ugong miajtsä, ja'a xøhajpä Satanás. Ja'a dragón je'e møødä

jecychahñdy. Mänit quiø'oxojtsä tiecyxiojtsä cadenahaam. ³Mänit quiujuipøøyyä jutjooty. Mänit yhawägüi'tsä. Mänitä Diosmoonsä yhahoo'ch maa ja'a juthaawän. Mil jomøjtä møjcu'ugong hänajty jiiby yhida'añ, nebiä jäya'ay jaduhñ quia'a wiinhóhñnät. Coø hänajty mil jomøjt tøø yhabejnä, mänit yhöxmasda'añii. Pero cab hänajty jejcy yajwädita'añii coø hänajty tøø yhöxmaçhii.

⁴Mänitøch nhijxy coø cu'ughajxy hänajty yhäña'ay. Haagä møjcuhudjtmøød hajxy hänajty coø hajxy nägøxiä yajtøyhajtyégät. Mänitøchä jäya'ayä yháañämähajxy nhijxä, pønjaty hänajty tøø yo'puxyii. Paady hajxy yo'pujxä coø hajxy hänajty tøø Dyiosmädia'agy-yajwa'xy coø ja'a Jesucristo Dyioshuungä. Cabä animal hajxy hänajty tøø wyiingudsähgø'øy, ni ja'a yhähädiuunnaxy. Ni cab hajxy hänajty tøø piädáacäxä ja'a animal seña, ni wyiinnähgopcøxp ni quiø'ogøxp. Mänitøch nhijxy coø hajxy jiuypiojñä. Mänitä Jesucristo hajxy miøødtägøøyy gobiernähajpä. Mil jomøjt hajxy hänajty tiuna'añ.

⁵⁻⁶Jayøjp hajxy jiuypiojtsohñ. Jootcujc hajxy yhity. Nebiä teediän ja'a Dios hajxy miøødtuñ. Cab hajxy chaaçhtiuna'añii. Coø mil jomøjt hänajty tøø yhabety, mänitä jäya'ay yháañämähajxy jiaac juypiøgaambä nägøxiä, ja'a hajxy hänajty hoy tøø quia'a wädítiäbä. Mänit hajxy yajcumädowa'añii.

⁷Coø mil jomøjt hänajty tøø yhabejnä, mänitä Satanás yhöxmasda'añii. ⁸Mänit

tiägø'owa'añ jäya'awyiinhøhmbä wiinduhmyhagajpt.

Yajwiinhøønaambä Gog møødä Magog. Mänit hajxy yhamugø'owa'añ møødä quiu'ughajxy coø hajxy hänajty chiptuna'añ. Jaançh tehñ miay hajxy hänajty jaduhñ. ⁹Wiinduhmyhagajpt hajxy choona'añ. Mänitä Dioshuunghajxy jiuhbic jiuhgøø'owa'añii.

Mänitä Dios jøøn yajca'awa'añ. Cøxy toyaambä Magoghajxy jaduhñ. ¹⁰Mänitä møjcu'ugong jiøønjuipøøyyä maa ja'a azufre hänajty tioyyän, maa ja'a animalhajxy hänajty tøø jiøønjuipø'øyijän, møødä craa hänajty tøø jiäya'awyiinhøøñäbä. Cøjxta'axiøø hajxy jiiby chaaçhpøga'añ xøømdsuhñ.

¹¹Mänitøchä Dios nhijxy coø hänajty yhäña'ay. Poobä yhäñaabiejt hänajty cruundä. Mänitä naaxwiimbä yhadägøyyøøyy maa ja'a Dioswiinduumän møød tsajtcøxp. ¹²Mänitøchä háañämähajxy nhijxy miøjjä miuutscä. Jim hajxy hänajty tiäna'ay Dioswiinduum. Mänitä Dios ja'a libro yaghawaach møødä libro wiingpä. Jiibiä xiøøhajxy hänajty myiñ cujaay ja'a hajxy jugyhadaambä cøjxta'axiøø nebiä Dios juguayatiän. Mänitä Dios ja'a libro quiapxy pø hoyyä háañämähajxy hänajty tøø jiäya'ayhaty, pø caj. ¹³Mänitä háañämähajxy jiiby piädsøømy mejjiooty, ja'a hajxy hänajty jiiby tøø yhö'oguiäbä. Jaduhñ hajxy jiiby piädsøømbä naaxpa'c. Ja'a hajxy hänajty hoy tøø jiäya'ayhátiaäbä,

hawa'adstuum hajxy hoy miähmøøñä. Ja'a hajxy hänajty hoy tøø quia'a jäya'ayhátiaäbä, haducytiuum hajxy hoy miähmø'øy. ¹⁴⁻¹⁵Mänitä møjcu'ugong jøønjooty piädaacä. Mänitä háañámähajxy jøønjooty quiujuipøøyyä, pønjataä xiøø hänajty ca'a miimb cujaay librojooty. Cab hajxy cøjxta'axiøø jjugyhada'añ nebiä Dios jjugyhatiän.

21 Mänitøchä tsajpootyp jemybiä nhijxy møødä naaxwiin jemybiä. Tøø ja'a tuftsajpootyp hänajty tiägoonä møødä tucnaaxwiimbä. Møødä mejy hänajty tøø tiägoobiä. ²Mänitøchä Dioscajpt nhijxy, ja'a Jerusalén jemybiä. Jim hänajty miänacy tsajpootyp. Jim hänajty tøø choon maa ja'a Diosän. Yajxon hänajty quiähxø'ogy nebiä jaxie'eb ñiyhahixø'oyijän coo hänajty piøga'añ. ³Mänitä jäya'ay møc jiaanč tehñ quiapxy jim tsajpootyp: —Huug hiç, jimä Dios tøø chänaadiaacpøcy maa ja'a jäya'ayhajxiän. Quiu'ughadaambiä Dios ja'a jäya'ayhajxy. Wiingudsähgø'owáanäp ja'a Dios jaduhñ. ⁴Jaduhñä Dios miäna'ana'añ coo ja'a jäya'ayhajxy quia'a jøønät. Cab hajxy pia'ambedaannä, yho'ogaannä. Cab hajxy jiø'owaannä xiuudsaañnä. Tøø yø'øduhmbä hänajty quiøxy cuhdägoonä.

⁵Mänitä Dios miänaañ:

—Tøøch cøxiä wiinä nhädiuundägach.

Mänit miänáangombä:

—Cujaay jaduhñ. Tøyhájthøch nmädia'agy jaduhñ. Cábøch nhøhñda'agy.

⁶Mänitøch xñämaayy:

—Tøø jaduhñ miaañä. Høøch nyajtsohñdaac; jaanä høøch nyajmaabiä. Pønä jioot hamuumdu'joot tøø piäda'agy coo jjugyhada'añ cøjxta'axiøø nébiøch njugyhatiän, nguhdujtmó'owäbøch jaduhñ coo jaduhñ jjugyhádät. ⁷Pøn mäjädaacp, je'e jugyhadaamb cøjxta'axiøø nébiøch njugyhatiän. Høøch cøjxta'axiøø xTieedyhadaamb. Nhuunghadáambiøch jaduhñ. ⁸Haa ja'a hajxy jaduhñ ca'a mäjädaacpä, jøønjooty hajxy nøcxy quia'awa'añ maa ja'a azufre tioyyän. Jiiby hajxy cøjxta'axiøø chaačhpøga'añ, møød hajxy ca'a mäbøjpä, møød hajxy ca'awiindøybä, møød hajxy jäya'ay-yagho'pä, møød hajxy amigähamädoobä, møød hajxy mäwijs mäbäxujpä, møød hajxy quepychechwiingudsähgøøbiä, møød hajxy høhñdaacpä.

⁹Mänitøchä Diosmoonsä tu'ug nhijxy, ja'a hajxy näjuxtujcpä, ja'a orotsim hajxy miøødpä cødu'ug. Jimä tsø'ty häyohn hänajty miøødä ja'a juxtujcpä orotsim. Mänitøch xñämaayy:

—Jamä jaxie'eb nyajnähixø'øy ja'a Meeghuung tio'oxiøjc-hadaambiä.

¹⁰Nwiinhíjxypøch hänajty; ja'a Dioshespiritøch hänajty xyajwiinhijxp. Mänitøchä Diosmoonsä xwioonøcxy maa ja'a cøxptunguhduumän. Mänitøchä Dioscajpt xyajnähixøøyy. Jerusalén xiøhaty. Jim hänajty miänacy tsajpootyp maa ja'a Diosän.

¹¹Jaanch tehñ yhaamb jaanch tehñ chämaambä cajpt hänajty nebiä Diosän. Jaduhñ hänajty

yhaambä chämaambä nebiä hočhaa jaančh tehṃ chowbän, nebiä jaspetsaajan. Jaduhṃ hänajty tiø'xiä nebiä hijxtän. ¹²Piquiä ja'a cajpt quiuraa hänajty yhamuu'dsø'øguiä. Jaančh tehṃ quiøxp hänajty yhamuu'dsø'øguiä. Majmetscä curaahaaw hänajty miøødä. Majmetscä Diosmoonsähajxy hänajty jim yhadäna'ay. Cødu'ugjaty hajxy hänajty yhadäna'ay maa ja'a curaahaawän. Tu'ugjatiä curaahaaw hänajty miøødä cujaay nebiatiä judíoshajxy xiøhaty ja'a nämajmetscjatypä. ¹³Tägøøgä curaahaaw hänajty xøøbädsøømypiä; tägøøg hänajty tsuxpojpejpä; tägøøg hänajty jøømbojmanajpä; tägøøg hänajty xøøguhnaixpä. ¹⁴Majmetscä tsaa hänajty jiiby maa hänajty miuu'dsø'tsoonän. Jim tsaagøxp hänajty quiujaayä nebiatiä Meeghuungä quiuguexyhajxy hänajty xiøhaty, ja'a nämajmetspä. ¹⁵Haa ja'a Diosmóonsøch hänajty xmiøødmäiaacpä, jimä oropaxyquipxt hänajty miøødä. Je'e ja'a cajpt hänajty yajquipxaamby møødä curaahaaw møødä yhamuu'dsø'øgy. ¹⁶Haa ja'a cajpt, hamädaaxteec hänajty je'e. Jaduhṃtiä yoñä nebiä yhoocän. Mänitä Diosmoonsä ja'a cajpt qyipy ja'a oropaxyquipxthaam. Mejtsmil cumejtsmägø'x kilómetro hänajty yoñä; jaduṃ hänajty quiøxpä; jaanä jaduṃ yhooc hänajtypä. ¹⁷Haa ja'a yhamuu'dsø'øguiä, tägøøghii'x cumädaaxc metro hänajty quiøxpä. ¹⁸Haagä jaspetsaahädiuñ ja'a hamuu'dsø'øgy hänajty. Haagä oro

ja'a cajpt hänajty. Jaduhṃ hänajty quiähxø'øgy nebiä hijxt jaančh tehṃ tiø'xypän. ¹⁹Haa ja'a majmetspä tsaa hänajty jiiby hijpä maa ja'a yhamuu'dsø'øgy miuu'dsø'tsoonän, haagä hočhaa hänajty miøød. Haa ja'a jayøjpä tsaajä, jaspé hänajty miøød; ja'a miämetspä, zafiro hänajty miøød; ja'a miädägøøgpä, ágata hänajty miøød; ja'a miämädaaxpä, esmeralda hänajty miøød; ²⁰ja'a miämägøøxpä, ónice hänajty miøød; ja'a miädädujcpä, cornalina hänajty miøød; ja'a miäjuxtujcpä, crisólito hänajty miøød; ja'a miäductujcpä, berilo hänajty miøød; ja'a miädaaxtujcpä, topacio hänajty miøød; ja'a miämajcpä, crisoprasa hänajty miøød; ja'a miämajtu'ugpä, jacinto hänajty miøød; ja'a miämajmetspä, amatista hänajty miøød. ²¹Ja'a majmetspä curaahagø'ow, haagä perlahädiuñ hänajty cødu'ugjaty. Haa ja'a møjtu'u, orohädiuñ je'e. Jaduhṃ hänajty quiähxø'øgy nebiä hijxt tiø'xiän.

²²Cábøch tsajtøjc jim nnä'ägädä hijxy maa yø'ø cajptän, je'eguiøxpä coo ja'a Dios jim chäna'ay møødä Meeghuung. Møjcuhdujtä Dios miøød. ²³Haamb tsämaambä Dios jim yhity møødä Meeghuung. Paadiä xøø jim quia'a hañ ni ja'a po'o. ²⁴Coo ja'a Dioshajxy jim yhañ chämamy, paadiä jäya'ayhajxy jiiby wiädita'añ, ja'a hajxy hänajty tøø ñähwá'ačhäbä. Møødä reyhajxy jiiby wiäditaambä. Yajmedsaamby hajxy mädyiijaty hoy yajxón. ²⁵Cabä curaahaaw mänaa yhaduga'añ. Cab jaduṃ mänaa wyiingoodsø'øwa'añ maa yø'ø

cajptän. ²⁶Medsaambä jäya'ayhajxy jim Dioswiingudsähgøöbiä.

²⁷Cabä haxøøgpä jiiby mänaa tiägø'owa'añ cajptooty, ni ja'a jäya'ayhajxy ca'awiindøybä ni ja'a høhndaacpä. Jagooyyä jäya'ayhajxy jiiby tiägø'owa'añ pønjetiä xiøø jiiby miimb cujaay librojooty ja'a Meeghuung miøødpä. Jaaya'ayäshajxy cøjxta'axiøø jugyhadaamb nebiä Dios jiugyhatiän.

22 Mänitøchä Diosmoonsä möjnøø tu'ug xyajnähiçøøyy jaançh tehñ tiø'xy nebiä hijxtän. Jim hänajty piädsømmø'oy maa ja'a Dios ja'a Meeghuung hänajty miøødhäñ'ayän. Ja'a möjnøø jaduhmbä, yejpiä jugyhajt jaduhñ.

²Møjtu'ugujcä möjnøø hänajty piäyø'ogy. Mejtsnøøba'a ja'a quepychaa hänajty tu'ug tiäna'ay, ja'a jugyhajtyejpä. Majmetshoocä quepychaa hänajty tiøømbety tu'ljomøjtpä. Wiindu'ugäpo'ojaty hänajty tiøømhaty. Ja'a yhaayhaamä jäya'ayhajxy ñähwa'açh wiinduhmyhagajpt.

³Cabä haxøøgpä jim yajpaada'añ. Hix, jimä Dioshajxy yhäña'awa'añ møødä Meeghuung. Jimä mióonsäm wyiingudsähgø'owa'añíjäm.

⁴Jaduhñä wyiin jiojphajxy yhixáanäxä. Haa ja'a Dios xiøøhajxiä, jim cujaay miøødhadaanäxä maa ja'a mioonsä wyiinnähgopcøxpän. ⁵Cab jaduhñ mänaaxøø wyiingoodsø'owaannä. Cabä xøø jim yhanaannä, ni jøøn jim quia'a hajajaannä. Ja'a Dios jim hajajaamb cudøø'xaamb. Haa ja'a

hajxy jim tsánaabiä, cøjxta'axiøø hajxy jim guobiernähada'añ.

⁶Mänitøchä Diosmoonsä xñämaayy:

—Tehñ tiøyhajt hädaa mädia'agy jaduhñ. Haa ja'a Diosä, quiejx ja'a quiuguexy jaduhñ coo ja'a mioonsä nøçxy yhawáanäxä coo miäbodhaty tijaty jadáanäp tunáanäp. Ja'a Dios jaduhñ najtsapxøøyy —nómhøchä Diosmoonsä xñämaayy.

⁷—Mobädájpeçh jiiby nhäda'aga'añ —nømmä Dios miänaañ.

Jootcujc yhity pønjetiä Diosmädia'agy hoy cudiuumb nej yaa myiñän cujaay hädaa librojooty.

⁸Høøch jaduhñ tøø nhixy tøø nmädooy, høøch Juanhajpä. Cooch nwiinhijxpädøøyy, mänitøchä Diosmoonsä nwiinjicädaacy, ja'açh hänajty tøø xyajwiinhixiäbä; nja wiingudsähgø'owáanhöch jaduhñ.

⁹Mänitøch je'e xñämaayy:

—Ca'açh xwyiingudsähgø'oy. Høøchä Dios xmioonsähajp nej mijts jaduhñ xmioonsähajpän coo ja'a Diosmädia'agy hajxy myajwa'xy. Pønjaty hoy cudiuumb nej yaa myiñän cujaay hädaa librojooty, moonsähájtäp hajxy je'ebä ja'a Diósäm. Ja'a Dios mäbøcy hajxy mwiingudsähgø'owäp.

¹⁰Mänitøch xñämáaguioimbä:

—Tøø miäbodhaty coo ja'a Diosmädia'agy tiøjiada'añ nej yaa myiñän cujaay hädaa librojooty. Paady, cabä Diosmädia'agy yu'uçh myaghídät. Naxy mdehñ yajwá'xät.

¹¹Weenä ca'awiindøyhäna'c-hajxy jiaac jatcø'oy haxøøg. Weenä hoyhäna'c-hajxy jiaac cudiuñ hoy nebiä Dios yhane'emiän. Dioshuung

hajxy je'eduhñ —nómhøchä
Diosmoonsä xñämaayy.

¹²—Tøyhajt jaduñ.

Mobädájpøch jiiby nhäda'aga'añ.
Nøcxáambøchä jäya'ayhajxy
nbäda'aga'añ hodiium, ja'a hajxy
hoy tøø quiudiúñäbä. Haa ja'a
jäya'ayhajxy tøø quia'a cudiúñäbä,
haxøøgtúumhøch hajxy nøcxy
nbäda'aga'añ. ¹³Høøch cøxiä
nyajtsohndaac. Høøch jadähooc
cøxiä nyajmayáangombä —nømä
Dios miänaañ.

¹⁴Jootcujc hajxy yhity pønjaty
nähwatasp. Je'edshajxy jiiby
tägø'øwaamb Dioscajptooty. Je'edsä
cuhdujt hajxy mo'owáanäp coo
ja'a tømmdsa'am hajxy jiøø'xät
ja'a jugyhajtyepä. ¹⁵Pero cabä
ca'awiindøyhäna'c-hajxy jiiby
tiägø'øwa'añ, ni ja'a mäwijtspä
ni ja'a mäbäxujpähajxy, ni ja'a
amigähamädoobähajxy, ni ja'a
jäya'ay-yagho'pähajxy, ni ja'a quep
ychechwiingudsähgøøbiähajxy, ni
ja'a hønndaacpähajxy.

¹⁶—Høøch Jesucristo, tøøchä
nguguexy nguexy coo ja'a
hermanohajxy cøxiä yhawáanäxät.
Høøchä rey David nhaphajpy
nhoc-hajpy. Y xyhaphajp
xyhoc-hájpøch je'ebä. Høøch,
jaxiøømhájpøch høøch —nømä
Jesucristo miänaañ.

¹⁷Jaduhñä Dioshëpíritu
miänaambä:

—Min —jaduhñä Meeghuung
tio'oxiøjc miänaambä.

Pøn jaduñ mädoob, ween jaduñ
miänáambät:

—Min.

Pønä jioot pädaacp
hamuumdu'joot coo cøjxta'axiøø
jiugyhada'añ nebiä Dios jiugyhatiän,
yagjyhadáanäp jaduñ
nebiä jiugyhatiän. Cab jaduñ
yagjuya'añii.

¹⁸Pønjetiä Diosmädia'agy
hamädoowhijp nej yaa myiñän
cujaay hädaa librojooty,
nnämäabiøch jaduñ coo ja'a
mhamdsoo mädia'agy hajxy mga'a
yajmäjaayø'øwät. Coö hajxy jaduñ
mjatcø'øwät, mäniä Dios hajxy
xjiaanç tehñ yajtsaachpøgät nej
yaa jaduñ myiñän cujaay hädaa
librojooty. ¹⁹Y coö hajxy näje'ejaty
mbuhgönät, cabä Dios hajxy
xyagjugyhädät cøjxta'axiøø neby
je'e jiugyhatiän, nej yaa myiñän
cujaay hädaa librojooty. Cab hajxy
jiiby xyajtägø'øwät Dioscajptooty.

²⁰Jaaya'ay jaduñ mädiaacpä,
je'eduhñ mänaamb:

—Tøyhajt jaduñ. Mobädájpøch
jiiby nhäda'aga'añ —nømä Dios
miänaañ.

Amén. Min paquiä Jesucristo.
Miich højts nWiindsøn

²¹Ween mijtsä Jesucristo ja'a
hoyhajt ja'a weenhajt nägøxiä
xmio'oy. Amén.